



Tuhun saá ña najándacoo
Jesucristo nu yo

Silacayoapan Mixtec New Testament

Contents

Tuhun vaha n̄cahyí Mateo sahá ña n̄caja Jesucristo	1
Tuhun vaha n̄cahyí Marcos sahá Jesucristo	67
Tuhun vaha n̄cahyí Lucas sahá Jesucristo	106
Tuhun vaha n̄cahyí Juan sahá ña n̄caja Jesucristo	178
Tuhun vaha n̄cahyí Lucas sahá ña n̄caja n̄ apóstol	229
Carta n̄achindahá Pablo nuú n̄a cúu cuéntá Jesús ndúu ñuu Roma	293
Carta nu cúití n̄cahyí Pablo nuú n̄a cúu cuéntá Jesús ndúu ñuu Corinto	319
Carta chí ivi n̄cahyí Pablo nuú n̄a cúu cuéntá Jesús ndúu ñuu Corinto	345
Carta n̄achindahá Pablo nuú n̄a cúu cuéntá Jesús ndúu ñundáhyi Galacia	361
Carta n̄cahyí Pablo nuú n̄a cúu cuéntá Jesús ndúu ñuu Efeso	371
Carta n̄achindahá Pablo nuú n̄a cúu cuéntá Jesús ndúu ñuu Filipos	380
Carta n̄achindahá Pablo nuú n̄a cúu cuéntá Jesús ñuu Colosas	386
Carta nu cúití n̄cahyí Pablo nuú n̄a cúu cuéntá Jesús ñuu Tesalónica	392
Carta chí ivi n̄cahyí Pablo nuú n̄a cúu cuéntá Jesús ñuu Tesalónica	398
Carta nu cúití n̄cahyí Pablo nuú Timoteo	401
Carta ivi n̄cahyí Pablo nuú Timoteo	408
Carta n̄achindahá Pablo nuú Tito	413
Carta n̄cahyí Pablo nuú Filemón	416
Hebreos, mé carta cuah̄an nuú n̄a Israel	418
Carta n̄cahyí Santiago nuú n̄a cúu cuéntá Jesús	437
Cártá n̄cahyí Pedro nu cúití	444
Carta n̄cahyí Pedro chí ivi	452
Carta nu cúití n̄cahyí Juan nuú n̄a cúu cuéntá Jesús	457
Carta chí ivi n̄cahyí Juan nuú n̄a cúu cuéntá Jesús	464
Carta chí un̄i n̄cahyí Juan nuú n̄a cúu cuéntá Jesús	465
Carta n̄cahyí Judas nuú n̄a cúu cuéntá Jesús	466
Ña najánah̄a Jesucristo nu Juan	469



**Tuhun saá ña najándacoo Jesucristo nu yo: El
Nuevo Testamento en el mixteco de Silacayoapan**

New Testament in Mixtec, Silacayoapan (MX:mks:Mixtec, Silacayoapan)

Language: Mixtec, Silacayoapan

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2009 Wycliffe Bible Translators, Inc.

Copyright © 2009 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

ec427121-8e52-5832-b242-32326c8176a0

ISBN: 978-1-5313-0427-0

Tuhun vaha naçahyí Mateo sahá ña naçaja Jesucristo

Chichi naquixi Jesucristo

(Lc. 3:23-38)

1 Ña yóho cúu quiví na naçacuu tásáhnú jícó Jesucristo, mé a naquixi chichi David xihín chichi Abraham:

² Abraham naçacuu tátá Isaac ta Isaac naçacuu tátá Jacob ta Jacob naçacuu tátá Judá xihín java ga ñani da. ³ Judá naçacuu tátá Fares xihín Zara ta náná ndíví da yóho naçanani ña Tamar. Ta Fares naçacuu tátá Esrom ta Esrom naçacuu tátá Aram. ⁴ Ta Aram naçacuu tátá Aminadab ta Aminadab naçacuu tátá Naasón ta Naasón naçacuu tátá Salmón. ⁵ Ta Salmón naçacuu tátá Booz, da cúu jahyi ña naní Rahab. Booz naçacuu tátá Obed ta Obed yóho naçacuu da jahyi ña naní Rut cán. Ta mé Obed yóho naçacuu tátá Isaí. ⁶ Ta Isaí naçacuu tátá rey David ta rey David yóho naçacuu tátá Salomón, da cúu jahyi ña naçacuu ñájihí Urías nu cuítí cán.

⁷ Ta Salomón naçacuu tátá Roboam ta Roboam naçacuu tátá Abías ta Abías yóho naçacuu tátá Asa. ⁸ Ta Asa naçacuu tátá Josafat ta Josafat naçacuu tátá Joram ta Joram naçacuu tátá Uzías. ⁹ Ta Uzías naçacuu tátá Jotam ta Jotam naçacuu tátá Acáz ta Acáz naçacuu tátá Ezequías. ¹⁰ Ta Ezequías naçacuu tátá Manasés ta Manasés naçacuu tátá Amón ta Amón naçacuu tátá Josías. ¹¹ Ta Josías naçacuu tátá Jeconías xihín java ga ñani da. Ta naçacuu da tiempo tá ñatiin soldado na Israel já naçandaca ñahá da na cán ñuu Babilonia.

¹² Ta tá naçanduu na Israel ñuu Babilonia cán já naçacuu Salatiel ta tátá Salatiel naçacuu Jeconías. Ta Salatiel naçacuu tátá Zorobabel. ¹³ Ta Zorobabel naçacuu tátá Abiud ta Abiud naçacuu tátá Eli-

aquim ta Eliaquim naçacuu tátá Azor. ¹⁴ Ta Azor naçacuu tátá Sadoc ta Sadoc naçacuu tátá Aquim ta Aquim naçacuu tátá Eliud. ¹⁵ Ta Eliud naçacuu tátá Eleazar ta Eleazar naçacuu tátá Matán ta Matán naçacuu tátá Jacob. ¹⁶ Ta Jacob naçacuu tátá José, da naçacuu yí María. Ta María cúu ña naçacuu náná Jesucristo, mé a naçindahá Ndióxi cacomí a cuéntá sahá ñayivi.

¹⁷ Ña cán queá janda tá naçasáhá cácu jahyi Abraham janda quiahva naçacuu coo a quiví naçasáhá cácu jahyi David já nayaha uxu comi generación. Ta tá quiahva naçasáhá cácu jahyi David janda quiahva ñatiin na Babilonia na Israel já ñéhe ñahá na cuahan na nayaha inga uxu comi generación. Ta nayaha inga uxu comi generación nani naçanduu na Israel ñuu Babilonia janda quiahva naçacuu coo quiví naçacuu Jesús, mé a naçindahá Ndióxi cacomí a cuéntá sahá ñayivi.

Tá naçacuu Jesús

(Lc. 2:1-7)

¹⁸ Joho naçahin tá naçacuu Jesucristo: Mé María, ña cacuu náná Jesús cán sa naçahan ña tuhun ña ña tandaha ña xihín José. Joo tá cámaní coo da xihín ña já naçandaa ini da ña ñúhu jahyi ña. Ta ña yóho naçacuu a ña naçaja ínimá yí Ndióxi. ¹⁹ Ta José, da cacuu yí María cán cúu dá da cáca ndinuhu ña ndaa. Ta naçahan da ña naçahin ña xihín inga da-taa joo coo naçeen da cahan núu da saha ña nuú ñayivi. Sahá ña cán queá naçacuu ini da jándacoo jehé da ña. ²⁰ Ta nani cáhvi ini da sahá ña caja da anda jávi naquixi in sani nu dá ta naçandaca náha in táto Ndióxi nu dá. Ta tañu mé sani cán naçahan xihín dá. Já naçachi a já:

—José, da naquixi chichi David, a cáyihví tohún tandahún xihín María jan jáchi naçaja ínimá yí Ndióxi ña ñúhu jahyi ña. ²¹ Ta tá sa naçacuu jahyi María

ja chicao ndó quivi á ná cananí a Jesús jáchi jácacu a ñayivi nuú cuachi tá ná candeé ini na mé á —nacachi a.

²²Tóco ndihi ña yóho nayaha ña ná xinu coo nuú tuhun Ndióxi ña nacahyi in profeta sanahá ndivaha cán ta já nacachi da cán já:

²³Vaxi quivi cañuhu jahyi in ña tacú, ña a ñáha coo ña xihín.

Ta tá sa nacacu jahyi ña cán já cacu na quivi á cananí a Emanuel.

Ta tuhun yóho cúní cachi a: ín Ndióxi xoho.

²⁴Ta tá nandicáxi ini José já nacaja da tá ín nacachi tátó Ndióxi cán xihín dá. Ta já natandaha dá xihín María. ²⁵Joo coó nasahin da xihín ña tá quiahva ín in dataa xihín ñájíhí da janda quiahva cacu jahyi María. Ta tá nacacu a cán já nasacu José quivi á cananí a Jesús.

Tá naxito nihni na ndichí Jesús

2 Ta nacacu Jesús in ñuu naní Belén ña ndácaan estado Judea. Ta mé tiempo cán nasacomí rey Herodes cuéntá sahá nación Israel. Ta mé tañu já naxinu coo java na ndichí ñuu Jerusalén. Mé na ndichí yóho cúu ná na jácuaha xihín quimi ta naquixi na chí nu cána candii. ²Ta tá naxinu coo na ñuu Jerusalén já nandaca tuhún na ñayivi já nacachi na já:

—Ndájá ín da loho nacacu viti jan, da cacuu rey nuú na Israel. Jáchi naxini nde naqueta quimi nuú nde ta xihín rí yóho sa nacandaq ini nde ña sa nacacu da. Ta viti vaxi nde yóho caja cáhnu nde da —nacachi na ndichí cán ndaca tuhún na.

³Ta tá naxini joho rey Herodes ña yóho já nacasáhá da ndíhi ndivaha ini da ta quiahva já nacasáhá ndíhi ini tóco ndihi ñayivi ñuu Jerusalén cán. ⁴Sahá ña cán queá nacana rey Herodes cán tóco ndihi na sacuahá nuú jutú xihín na jánaha ley Moisés cán. Ta já nandaca tuhún da na saha ndá ñuu cúu nu cáchi

tuhun Ndióxi cacu da nasahan Ndióxi tuhun a chindahá a cacomí a cuéntá sahá ñayivi. ⁵Já nacachi na cán já xihín dá:

—Ñuu Belén, ña ndácaan estado Judea cán cúu nuú cáchi tuhun Ndióxi cacu da jáchi quiahva já nacahyi in profeta sanahá tá nacachi da já:

⁶Vatí ñuu Belén, ña ndácaan estado Judea,

cúu á in ñuu loho ndivaha tañu ñuu náhnu cán joo ín sahá a, jáchi tañu ñayivi ñuu cán ndindita in da cacomí cuéntá sahá na Israel, na cúu cuéntá Ndióxi, já nacahyi in profeta sanahá.

⁷Tá nandihí já nacana xóo rey Herodes na ndichí cán ta já nandaca tuhún da na cán saha ndá quivi nanaha quimi cán mé rí nu ná. ⁸Anda já nachindahá da na ñuu Belén. Já nacachi da já xihín ná:

—Cuáhán ndo ñuu Belén cán ta ndaca tuhún vaha ndó ndaja cáa sahá ña loho nacacu jan. Ta tá sa nandinehe ndó a já quixi ndó caxi tuhun ndó xihín i já ná cuhun ri yehé va caja cáhnu i ña —nacachi Herodes xihín na.

⁹Ta xihín ña yóho naquee na ndichí cuahan tucu na. Ta quimi, rí naxini na nu cuítí cán já ndaca tucu rí na cuahan na. Ta tá naxinu rí chí nuú ín mé a loho cán anda já nasacandichi rí. ¹⁰Ta cájii ndivaha ini na tá xini na mé quimi cán. ¹¹Tá nandihí já naquihvi na ini vehe já naxini na mé a loho cán xihín María, náná a. Ta já nacaxítí na nu á ta já nacaja cáhnu na ña. Ta tá nandihí já nasuná na yuhú sato ñehe na ta já najoco na jiuahun cuáan nuú a xihín jusa vaha xihín in ña támi sahan naní mirra nu mé a loho cán. ¹²Tá nandihí já naquixi in sani nu ná ta xihín mé sani cán nacachi Ndióxi xihín ná ña ná a ndíco coo na chí nu ín rey Herodes. Sahá ña cán queá nandijama na íchi cuánuhu ná ñuu na.

Tá ñéhe na Jesús cuahan na Egipto

¹³Ta tá sa ñaquee na ndichí cán cuahan na já ñaqui in sani nuú José ta nandaca náha in táto Ndióxi nu dá. Já cáchi a já xihin dá:

—Cuándacoún ndiquehe ña loho jan xihin María, náná a ta cunún cuhun xihin ná chí ñundáhyi nación Egipto. Ta cán coún xihin ná janda quiahva ná caxi tuhun i xuhun. Jáchi caca nuu Herodes ndiinducú da ña loho jan ña cahní ñahá da —ñacachi táto Ndióxi cán xihin José.

¹⁴Anda já nandaco José já ñaquehe da Jesús xihin María, náná a já ñaqueta ñuú na cuahan na chí Egipto.

¹⁵Ta cán nasanduu na janda quiahva ñaxihi Herodes. Tóco ndihi ña yóho ñayaha já ná xinu coo nuú tuhun ñacachi Ndióxi sanahá tá ñacahyí in profeta já: “Ñasahin jahyi i nación Egipto ta ñacana i da ná ndicó coo da”, cáchi tuhun Ndióxi.

Tá ñasahnda Herodes chuun ña ná cahní na ña valí

¹⁶Ta ndaja coo ñaxini Herodes cán ña ñajándahvi na ndichí cán da sahá ña coo ñaxinu ga na nu dá. Ña cán quea a juú quiahva ñaxojo ini da. Ta chí ñasahnda da chuun ña ná cahní ndihi na ña valí, na ivi cuiá chí ninu, mé na ndúu ñuu Belén xihin ñuu válí cátahan xihin á. Jáchi sa ñacaxi tuhun na ndichí cán xihin dá ña ñaxini na mé quimi anda tá-tuhun ivi cuiá. ¹⁷Ta tá ñandihí ñaxihi na valí yóho já ñaxinu coo nuú tuhun ñacahyí profeta Jeremías sanahá ñdivaha tá ñacahyí da já:

¹⁸Ñuu Ramá jandá johó ndáhví tácu cáyuhú cóhó ñáñáha sácu ñá.

Ta ñá sácu yóho cúú ñá Raquel. Sácu ñá sahá jahyi ñá.

Ta co cúní ñá ndico ini ñá jáchi ñaxihi jahyi ñá, cáchi tuhun Ndióxi.

¹⁹Joo tá sa ñaxihi Herodes já ñaqui in tuco sani nuú José nu ñin da nación Egipto cán. Ta nandaca náha in táto Ndióxi nu dá já cáchi a já xihin dá:

²⁰—Cuándacoún ta ndiquehe Jesús xihin María, náná a ta cuahán ndico coo xihin ná chí ñundáhyi Israel. Jáchi sa ñaxihi va na nducú cahní ña loho jan —cáchi táto Ndióxi.

²¹Anda já nandico José ta ñéhe da Jesús xihin María, náná a cuahan na ndicó coo na chí ñundáhyi Israel. ²²Joo tá ñañehe da tuhun ña nandicojo Arquelao chuun cacuu da rey nu Herodes, tátá da já ñayihví José cuhun da chí estado Judea. Ta sahá ña sa ñacaxi tuhun táto Ndióxi tañu sani nu dá sahá ña cán quea nandijama da íchi ta cuahan da chí estado Galilea. ²³Ta ñaxinu coo na in ñuu naní Nazaret nuú nasanduu na. Ta xihin ña yóho ñaxinu coo nuú tuhun ñacahyí na profeta sanahá ña cacuu Jesús da ñuu Nazaret.

Tá ñacasahá Juan, da jácandúta ñayivi cáhan ndojó da yucú íchí cán

(Mr. 1:1-8; Lc. 3:1-9, 15-17; Jn. 1:19-28)

3 Mé tiempo cán Juan, da jácandúta ñayivi ñaxinu da yucú íchí cuénta estado Judea cán. Ta ñacasahá jánaha da ñayivi. ²Já cáchi da já xihin ná:

—Xíní ñúhú jándacoo ndó ña núu cája ndó ta ndicó coo ini ndó nu Ndióxi jáchi sa ñacayati quivi cacomí Ndióxi cuénta sahá ñayivi —cáchi da xihin ná.

³Mé Juan yóho cúú dá da ñacahan profeta Isaías saha tá ñacahyí da já:

Vaxi quivi tá cahan cóhó in da tañu yucú íchí ta cachi da já xihin ñayivi:

“Caja tiava ndó íchi nuú quixi xitoho í, ta cuná ndó in íchi ndacú nu mé á ña ná ndihvi a ínimá ndo”, cáchi tuhun Ndióxi.

⁴Ta jáhma nasandixi Juan yóho nasacuu a ña ñacavaha na xihin íji camello ta nasandico in nií jáhnda tóco

da. Ta naxixi da tica xihín ñuñu yúcu. ⁵Ta naqueta ñayivi ndúu ñuu Jerusalén xihín na ndúu estado Judea xihín na ndúu ñundáhyi yati yuta Jordán cán nasaa na nu Juan taa johu na nu cáhan da. ⁶Ta tá nanahma na cuachi na nu Ndióxi já najácandúta Juan na ini yuta Jordán.

⁷Joo tá naxini Juan ña janda johu xínu coo cuahá na fariseo xihín na saduceo nu dá ña ná jácandúta da na já nacasáhá xójo ndivaha ini da ta já nacachi da já xihín ná:

—Mé ndó cúu ndó tátuhun coo jáchi cúu ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi. ⁸Xíni ñúhú caja ndó ña vaha já ná cuni ñayivi ña mé a ndaa táhyi najándicoo ndó ña núu nasacaja ndó jihna. ⁹Ta a cáhán ndo ña jácaco Ndióxi ndohó sahá ña cúu ndó na naquixi chichi Abraham. Jáchi coo saha toho ña jan nu Ndióxi tá co jándacoo ndó cuachi ndó. Jáchi mé a ndaa ná cahán i xihín ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. ¹⁰Mé ndó cúu ndó tátuhun in yíto, dó sa ñatiin na hacha cuahan na cahnda na. Ta tóco ndihi yíto, dó co sahan cuihi vaha nuu, tahnda do ta quee dó nu ñúhu cayi do. Quiahva já caja ri Ndióxi xihín ndó tá co cúni ndó ndicó coo ini ndó nu mé á. ¹¹Mé a ndaa cája ndúta i ndóhó xihín ticuif ta xihín ña yóho náha ña nandicó coo ini ndó nu Ndióxi. Joo vaxi inga da ta da cán cúu da jándicutú ínimá ndo xihín ínimá yii Ndióxi ta ña cán cacuu a tátuhun ñúhu cayi. Ta da cán iin cuaha chága ndée dá a juú ga yehe. Ta chí coo sahá i ndica xítí i nu dá ña ndaxí i correa ndusa da. ¹²Mé da vaxi cán caxi da ñayivi vaha tañu ñayivi quini. Cúu á tátuhun in da-taa tá jáxixi da trigo xihín pala já ná quee

xehe á já cacu vaha da ña. Ta xehe nacana cán cuhun a cayi a xihín ñúhu ita ña a ndáhva toho —cáchi Juan xihín na cán.

Tá nacandúta Jesús

(Mr. 1:9-11; Lc. 3:21-22)

¹³Naquee Jesús chí estado Galilea cuahan yuta Jordán nu ndácaan Juan jácandúta dá ñayivi ña ná jácandúta da mé á. ¹⁴Joo nu cuifí coo naxeen toho Juan jácandúta dá Jesús. Ña cán quea nacachi da já xihín Jesús:

—Yóhó cúu da ndítahan jácandúta yehe. Ta caa johu vasún yóho ña ná jácandúta i yohó —nacachi Juan cán xihín Jesús.

¹⁵Já nanducú nehe Jesús tuhun nu dá já nacachi a já xihín dá:

—Candehé. Quiahva já ndítahan coo ña yóho viti jáchi ndítahan nu yo jáxinu coo i tóco ndihi ña ndaa ña nasacu ini Ndióxi coo —nacachi a.

Xihín ña yóho nacandúsa Juan ta chí najácandúta dá Jesús. ¹⁶Ta tá nandihí nacandúta Jesús já naqueta ini ticuif cán. Anda já nanuna indiví ta naxini Jesús nanuu ínimá yii Ndióxi jatá ta nasacaa tá quiahva caa in ndijata. ¹⁷Tá nandihí já naxini johu a cáhan in a indiví ta já cáchi a cán já:

—Yóhó cúun jahyi maní i ta cájii ndivaha ini i xuhun —nacachi a.

Xíto ndojó tiñáhá sacuahá Jesús

(Mr. 1:12-13; Lc. 4:1-13)

4 Tá nandihí já ndaca ínimá yii Ndióxi Jesús cuahan chí yucú íchí nuú co ndúu ñayivi já ná coto ndojó tiñáhá sacuahá mé á.

²Ta cán nasahiin a tixi ivi jícó quivi. Nuú ta ndiví coo naxixi a ta tá nandihí já naxinu joco nu á. ³Já nacayati tiñáhá sacuahá nuú Jesús ña coto ndojó ñahá ri já nacachi rí já xihín á:

—Tá tã jivi ndusa jahyi Ndióxi cúin cahnda chuun ña ná nduu yuu yóho pan —ñacachi rí cán xihín Jesús.

⁴ Andã já ñacachi Jesús já xihín rí:

—Já cáchi tũhun Ndióxi: “A juú pan cuití cuxu ñayivi já catacu na, vaħa. Xíni ñúhú rí a caja na ña sáhndã tũhun Ndióxi nu ná já queã cuu catacu na nu Ndióxi” —ñacachi Jesús xihín rí.

⁵ Tá ñandihí já ndáca tiñáhã saçuahã cán Jesús cuahã xihín rí ñuu Jerusalén, ña yíi cán ta já ñajándaa rí a nu jícó jini veñuhu cáhnu ndácaã cán. ⁶ Ta já ñacachi rí já xihín á:

—Tá tã jivi ndusa jahyi Ndióxi cúin jácana mún chí ninu jáchi já cáchi tũhun Ndióxi:

Cahnda Ndióxi chuun nu táto mé á ña ná candaa na yohó.

Ta ndinehe ndáhã ña yohó,

já queã ná a ndícuhe saħun tá ná cachi-hin saħun xihín yuu, já cáchi tũhun Ndióxi —ñacachi rí xihín Jesús.

⁷ Ta já ñanducú nehe Jesús tũhun nu rí já ñacachi a já xihín rí:

—Cáchi tucu tũhun Ndióxi já: “A cóto ndojó tohún Ndióxi, xitohún” —ñacachi Jesús xihín rí.

⁸ Ta tá ñandihí já ndáca tucu tiñáhã saçuahã cán Jesús ñasahã xihín rí in jini yúcu jícó ndivaha. Ta já ñanaha rí ndaja táhan ñuu ndúu ñuyíví nu á ta ñajánaha rí tóco ndihí ña náhnu ndúu cán nu á.

⁹ Ta já ñacachi tucu rí já xihín Jesús:

—Tóco ndihí ña yóho quiahva i nuun tá ná caxítún nuú i caja cáhnún yeħe —ñacachi rí quini cán xihín Jesús.

¹⁰ Andã já ñacachi Jesús já xihín rí:

—Satanás, cuahán caxoo jáchi já cáchi tũhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuun” —ñacachi Jesús xihín rí cán.

¹¹ Tá ñandihí já ñacaxoo tiñáhã saçuahã cán cuahã rí. Ta já ñaxinu java táto Ndióxi chindeé ña Jesús.

Tá ñacasáhã cáxi tũhun Jesús tũhun Ndióxi nuú ña estado Galilea

(Mr. 1:14-15; Lc. 4:14-15)

¹² Tá ñaneħe Jesús tũhun ña ñachi-caã ña Juan, ña jácandúta ñayivi ve-caã já ñaquee a cán cuahã chí estado Galilea. ¹³ Joo coo ñacandoo a ñuu Nazaret chí ñaquee a cuahã coo a chí ñuu Capernaum ña ndácaã yuhú tañuhú, dó ndácaã ñundáhyi cuéntã ña ñaqui xichí Zabolón xihín ña ñaqui xichí Neftalí. ¹⁴ Tóco ndihí ña yóho nayaha ña ná xinu coo nuú tũhun ñacahyí profeta Isaías ñanahã tá ñacahyí ña já:

¹⁵ Ñayivi ndúu ñundáhyi Zabolón xihín ña ndúu ñundáhyi Neftalí, ña ñúhu inga xoo yuta Jordán yati yuhú tañuhú,

ta jári ña ndúu Galilea, mé estado nu ndúu ñayivi, ña coo cúu xichí Israel,

¹⁶ mé ña cán ñasanduu na nuú naá ndivaha ta viti ñaxini na in ñaha yeħe ndivaha.

Jándiyehẽ á nu ná ña ná a quíví ña, joo catacu na andã ama cáa quíví nu ín Ndióxi, ñacahyí Isaías ñanahã.

¹⁷ Ta chí mé tiempo já ñacasáhã Jesús cáhã ndojó a nuú ñayivi ta já cáchi a já xihín ná:

—Xíni ñúhú jándacoo ndó cuachi cája ndó ta ndicó coo ini ndó nu Ndióxi jáchi sa ñacayati quíví cacomí a cuéntã saħã ñayivi —ñacachi Jesús.

Tá cána Jesús comí ña tává tiyacá ña ná caca tuun ña xihín á

(Mr. 1:16-20; Lc. 5:1-11)

¹⁸ Tá xíca Jesús cuahã yuhú tañuhú Galilea, ñandineħe a ivi taã, ña cúu ñani. In ña naní Simón ta cáhã ña Pedro xihín dá. Ta ña inga cán naní ña Andrés. Ndívi ña yóho cúu dá ña tává tiyacá ta ñúhu na jácana na ñunu ná ini tañuhú cán. ¹⁹ Já ñacachi a já xihín ndívi ña:

—Naha quíi ndó candico ndó yehe caca tuun ndó xihín i. Tává ndó tiyacá viti joo caja i ña ná cuu tavá ndó ñayivi tañu cuachi —cáchi a.

²⁰Ta chí ivi laá najándacoo da ñunu da ta nandico da Jesús.

²¹Ta nani xíca Jesús cuahan chága chí nuu já naxini a inga ivi tucu ña, da cúu ñani. In da naní Jacobo ta inga da naní Juan, da cúu jahyi Zebedeo. Ta ndívi mé da yóho ñúhu da ini barco da xihín tátá da ndája vaha da ñunu dá. Ta nacana Jesús ndívi da yóho. ²²Ta chí ivi laá najándacoo da barco da xihín tátá da ta nacasáhá xíca tuun da xihín Jesús.

Jánaha Jesús nuú cuahá ndivaha ñayivi

(Lc. 6:17-19)

²³Níi cúu estado Galilea naxica nuu Jesús cáhan tuhun vaha nuú ñayivi ini veñuhu in in ñuu cán. Cáxi tuhun a nu ná ña sa nandindaa quívi cacomí Ndióxi cuéntá sahá ñayivi ñuyívi. Ta nandaja vaha Jesús na quíhvi tá nuú cuehe ndóho na. ²⁴Ta níi cúu ñundáhyi cuéntá Siria nandicuíta nuu tuhun sahá ña cája Jesús. Sahá ña cán queá néhe na na quíhvi, na ndóho tá nuú cuehe vaxi na nu á ña ná ndaja vaha mé á na ta néhe na na ñúhu ínima quini ini xínu na nu á ta ndijáa na xíhi yihí xihín na quíhvi saha néhe na vaxi na nuú Jesús. Ta nandaja vaha mé á na.

²⁵Ta cuahá ndivaha ñayivi ndíco na Jesús. Cúu ná na naquixi estado Galilea xihín na ndúu uxu ñuu cuéntá Decápolis xihín na ñuu Jerusalén xihín na estado Judea xihín na naquixi ñundáhyi chí xoo oriente nu ndácañ yuta Jordán cán.

Tá cáhan ndojó Jesús jini yúcu

(Lc. 6:20-23)

5 Tá naxini Jesús ña ndíco cuahá ndivaha ñayivi mé á já nandaa jini yúcu ta já nasacoo a cán. Ta nacayati na xíca

tuun xihín á nu á. ²Ta já nacasáhá já-naha nu tóco ndihi na ndúu cán já nacachi a já xihín ná:

³—Tahví nacuu ñayivi tá ndícuni na xíni ñúhú na ña chindeé Ndióxi na jáchi na cán cúu na cacomí Ndióxi cuéntá saha.

⁴Tahví nacuu na ndúu cuéha jáchi na cán cúu na quiahva Ndióxi tuhun ndéé ini.

⁵Tahví nacuu na co ndínehe jíco mé jáchi na cán cúu na ñehe táhvi ndiquehe na ña nasahan Ndióxi tuhun a quiahva nu ná.

⁶Tahví nacuu na xíca ini caja ña cúni Ndióxi. Na cán cúu na caja Ndióxi ña ná xínu nuú ña cúu ini na.

⁷Tahví nacuu na cándáhví ini saha ñayivi jáchi na cán cacuu na cándáhví ri ini Ndióxi saha.

⁸Tahví nacuu na co ndácañ quini ínima jáchi na cán cúu na cuni Ndióxi.

⁹Tahví nacuu na ndíhi ini ña ná coo vaha na xihín ñayivi jáchi na cán cúu na cáchi Ndióxi cúu ná jahyi mé á.

¹⁰Tahví nacuu na ndóho ini saha ña cája na ña sáhdá Ndióxi nu ná caja na jáchi na cán cúu na cacomí Ndióxi cuéntá saha.

¹¹Tahví nacuu ndó tá cáhahá ñayivi xihín ndó ta cája xíxi na xihín ndó saha ña cándeé ini ndó yehe. Ta tahví nacuu ndó tá jácojo na cuachi jíquí jata ndó sahá ña cándeé ini ndó yehe.

¹²Xíni ñúhú caji ndivaha ini ndó ta coo vaha ini ndó jáchi ndiquehe ndó in ña vaha ndivaha caja Ndióxi indiví. Xíni ñúhú ndicuhun ini ndó ña quiahva já nacaja xíxi na xihín na profeta, na nasandu sanahá.

Cúu yó tátuhun ñúhu jandiyehe nuú ñayivi ñuyívi

(Mr. 9:50; Lc. 14:34-35)

¹³Mé ndó cúu ndó tátuhun ñii yívi na. Sa xíni ndó ña cája ñii ña ná ndihaji ñaha

xíxi ndó. Ta quiãhva já cája ndó xihín ñayivi ñuyiví. Joo tá ná ndihi ña ohva ñii cán a cúu ga ndicó coo a cahohva tucu a sahá ña cán queá jandá cuíta va íchi cuanì nihni ñayivi ña jáchi coo chuun toho a.

¹⁴Jári mé ndó cúu ndó tátuhun ñúhu jándiyehé nuú ñayivi ndúu ñuyiví. Ta mé ñúhu cán cúu á tátuhun in ñuu cánúu jata in yucú jícó ta a cúu toho ndácaan jehé a. ¹⁵Jáchi coo chíñúhu ná in lámpara ta tá nu ndíhi já chíjehé na ña tíxi in sa-to. Ña cája na xihín á queá chínúu jícó na ña já ná jándiyehé a nu tóco ndihi na ndúu vehe. ¹⁶Quiãhva já xíní ñúhú ndíhi ini ndó caja vaha ndó ña ná cacuu ndó tátuhun in ñúhu cáyi nuú ñayivi. Jáchi tá ná cuni na ña vaha cája ndó já queá cuu caja cáhnu na Ndióxi, tátá yo, ña ñin indiví.

Jánaħa Jesús saħa ley Moisés

¹⁷A juú cahán ndó ña naquixi i ñuyiví yóho ña cacu xóo i ña nasahnda ley Moisés xihín ña najánaħa na profeta, vaha. Co vaxi toho i cacu xóo i ña. Vaxi i nu ndó jáxinu coo i tóco ndihi ña cáchi mé ley já ná naħa i nu ndó ndíã cúu ndusa ña. ¹⁸Mé a ndaa ná caħan i xihín ndó ña a ndíhi saħa mé ley nani ñin indiví xihín ñuyiví yóho. Ni in túhún toho tuhun, a ndíhi saħa jandá quiãhva ná vaha tóco ndihi ña ndítahan vaha. ¹⁹Sahá ña cán queá ndá na coo cúní caja ña sáhnda ley Moisés vatí cúu á ña loho ndivaha ta ni coo cúní na jánaħa na ñayivi ña ná caja na ña cáchi a já queá cacuu na in na coo cuaha saħa tañu na cacomí Ndióxi cuéntá saħa. Joo na cája ña cáchi mé ley ta jánaħa na ñayivi ña ná caja na ña, mé na cán cacuu na na cáhnu ndivaha tañu na cacomí Ndióxi cuéntá saħa. ²⁰Mé a ndaa ná caħan i xihín ndo ña

tá ná caja cuítí va ndó tá quiãhva cája na jánaħa ley Moisés xihín na fariseo já queá a cúu ndíhvi ndó nuú cacomí Ndióxi cuéntá sahá ñayivi.

Jánaħa Jesús ña co ndítahan cojo ini ñayivi

(Lc. 12:57-59)

²¹Mé ndó sa xíní ndo ña naçachi Moisés xihín tásáħnu jícó ndo sanahá tá naçachi da já: “A cáhni ndó ndii jáchi ndá na ná cahni ndii tandaa quiví caja víf jutixia saħa ná.” ²²Joo yeħe cáchi i xihín ndó viti ña ndá na ná caja cueħe xihín ñani táhan na tandaa quiví caja víf jutixia saħa ná. Ta jári na cánaħa xihín ñani táhan na, á cáchi na cúu ná ñayivi taħi já vaxi quiví tá candichi na nu juéħe cáhnu ta cuu cuħun na indayá saħá.

²³Sahá ña cán queá tá ta ñeħe ndó in ñaha cuahaħan ndó joco ndó nu náa Ndióxi ta nani cuahaħan ndo cán ndicuhun ini ndó ña ñin in ñani táhan ndó ta coo cúní táhan vaha na xihín ndo ²⁴já queá mé jan yati nu náa ndítahan jándacoo tóo ndó ña ñeħe ndó joco ndó jan. Ta ndítahan quee ndó cuħun ndó ndique táhan máni ndó xihín ñani táhan ndó cán. Ta tá ná ndihi já cuu ndicó coo tucu ndó nu náa Ndióxi joco ndó ña najándacoo ndó jan.

²⁵Tá sácú in na saħa ndó cuħun ndó vecaa ta cúní na candaca na ndohó cuħun ndó nu juéħe, xíní ñúhú nducú ndó ndá quiãhva ndique táhan máni ndó xihín ná nani núná nu ndó caja ndó ña. Já queá ná a ndiquiãhva na cán ndohó ndáħa juéħe jáchi cuu ndiquiãhva juéħe cán ndohó ndáħa na policia ta chicaan na ndohó vecaa. ²⁶Mé a ndaa cáchi i xihín ndó ña cañuhu ndó cán jandá quiãhva ná chaħvi ndó tóco ndihi jiħún yíca ndo.

**Jánaḡa Jesús saḡá cuachi cajú
in daṡa tá cúnĭ da coo da
xihĭn in ná coo cúú ñájihĭ da**

²⁷ Mé ndó sa xínĭ ndó ña ñasahnda ley Moisés chuun sanahá ta já ñacachi a já: “Coto a cóo ndó xihĭn ñájihĭ á yĭ ñani táhan ndó.” ²⁸ Joo yeḡe cáchĭ ĭ xihĭn ndó viti ña ndá da sándeḡe in ñánáḡa ta cáhvi núu ini da xihĭn ña já queá cómĭ tá cómĭ da cuachi nu Ndióxi jáchĭ cúú á tátuhun sa ĩn da xihĭn ña.

²⁹ Ña cán queá cáchĭ ĭ xihĭn ndó ña tá nduchú núú cuáha ndó queá jándacava ndoḡo nuú cuachi, tavá ndó ña jácana xícá ndó ña ná cuḡun a jáchĭ vaḡa cháḡa ña ná ndiḡi saḡá in nduchú núú ndó a juú ga ña ná cuḡun in níi yiquí cuñu ndó ini indayá. ³⁰ Ta tá ndahá cuáha ndó queá cajú ña ná ndacava ndó nuú cuachi, chitúhun ndó ña ta jácana xícá ndó ña ná cuḡun a jáchĭ vaḡa cháḡa ná ndiḡi saḡa ndáḡa ndó a juú ga ña ná cuḡun níi yiquí cuñu ndó ini indayá.

**Jánaḡa Jesús ña coo ndítahan nuú
daṡa jándacoo da ñájihĭ da**

(Mt. 19:9; Mr. 10:11-12; Lc. 16:18)

³¹ Ta mé ndó sa xínĭ ndó ña ñasahnda ley Moisés chuun sanahá já cáchĭ a já: “Ndá da cúnĭ jándacoo ñájihĭ da ndítahan caváha da in tutu quiaḡva da nu ña ta sa ĩn vaḡa va cuu jándacoo da ña.” ³² Joo yeḡe cáchĭ ĭ xihĭn ndó viti ña ni in túhún toḡo ṡa coo ndítahan jándacoo da ñájihĭ da. Jáchĭ ndá da jándacoo ñájihĭ da cajú da ña ná cajú ná cuachi tá ná tandahá tucu ña. Jári da tándahá xihĭn ña cómĭ ri da cuachi nu Ndióxi. Joo tá ná candaa ini da ña ĩn ñájihĭ da xihĭn inga daṡa já queá cuu ndusa jándacoo da ña.

**Jánaḡa Jesús ña ndítahan cajú na tá
sáhan na túhun na nuú ñayivi**

³³ Mé ndó sa xínĭ ndó ña ñasahnda ley Moisés chuun sanahá já cáchĭ a já: “Xínĭ ñúhú jáxĭnu coo ndó tóco ndiḡi ña ñasahan ndó túhun ndó cajú ndó tá tavá ndó quivĭ Ndióxi.” ³⁴ Joo yeḡe cáchĭ ĭ xihĭn ndó viti ña ná quiaḡva ndó túhun ndó nuú ñayivi joo a tavá ndó quivĭ ni in ñaḡa. A tavá ndó quivĭ indivĭ jáchĭ indivĭ cúú nu ĩn coo Ndióxi. ³⁵ Ta ni a távavá ndó quivĭ ñundáhyĭ jáchĭ ñundáhyĭ cúú nu sánĭ mé á ta ni a távavá ndó quivĭ ñuu Jerusalén jáchĭ cúú á ñuu ñacaxi Ndióxi, mé á cúú á rey cáhnu ndivaḡa. ³⁶ Ta ni a tavá ndó quivĭ yiquí jínĭ ndó tá sáhan ndó túhun ndó nuú ñayivi jáchĭ coo ndéé ndó ndaja yaa ndó á ndaja tuún ndó ni in túhún ĩjĭ jínĭ ndo. ³⁷ Tá sáhan ndó túhun ndó nuú ñayivi xínĭ ñúhú cachi ndó: “A-ḡan, cajú ĭ ña.” Á tá coo xínĭ ñúhú cachi ndó: “Uḡun, a cuú cajú ĭ ña.” Jáchĭ tá cachi ndó inga túhun já cajú ndó ña cúnĭ ña quini.

**Jánaḡa Jesús ña ndítahan cajú
cáhnu inĭ saḡa táhan ñayivi**

(Lc. 6:29-30)

³⁸ Mé ndó sa xínĭ ndó ña ñasahnda ley Moisés chuun sanahá já cáchĭ a já: “Tá quiaḡva cajú ñayivi xuhun quiaḡva já cajú ri yóḡo va xihĭn ná. Ta tá ná canĭ in da nduchú núún já queá ndítahan canĭ mún nduchú núú da. Tá ná tavá da nuḡún já ndítahan nuun tavá ri yóḡo va nuḡú da”, cáchĭ ley Moisés. ³⁹ Joo yeḡe cáchĭ ĭ xihĭn ndó viti: A cajú ĩhvi ndó xihĭn ñayivi, na cajú núu xihĭn ndo. Ta ndá na ná canĭ in xoo saḡóḡo ndó, cata ñee ndó inga xoo saḡóḡo ndó nu ná ña ná canĭ na a. ⁴⁰ Ta tá cúnĭ in na candaca na ndoḡo cuḡun ndó nu juéḡe saḡá ña cúnĭ na candaa na cotó ndó já queá quiaḡva ndó ña nu ná ta jandá cotó ndéé ndó quiaḡva ndó nu ná. ⁴¹ Ta tá vaxi in

soldado nu ndó ta tá cahnda da chuun ña ná cojo ndó ñaha da in kilometro, xíní ñúhú cojo ndó ña anda ivi kilometro cùhun ndó. ⁴²Ta ndá ña ná cacá in ñaha nu ndó quiahva ndó ña nu ná. Ta ndá ña xíca too ñaha nu ndó, quiahva too ndó ña nu ná.

Xíní ñúhú quihvi iní ña cò cúní mí

(Lc. 6:27-28, 32-36)

⁴³Mé ndó sa xíní ndó ña nasahnda ley Moisés chuun sanahá já cáchí a já: “Quihvi ini ndó ña xíní táhan vaha xihín ndó ta candají ndó ña cò cúní táhan xihín ndó”, cáchí ley Moisés. ⁴⁴Joo yehe cáchí i xihín ndó viti: Nditahan quihvi ini ndó ña cò cúní táhan xihín ndó. Ta cahan vaha ndó xihín ña cánahá xihín ndó. Ta caja vaha ndó xihín ña cándají ndóhó. Ta cacá tahví ndó nu Ndióxi sahá ña caja xíxi xihín ndó. ⁴⁵Jáchí xihín ña yóho náha ña cúní ndó jahyi Ndióxi, tátá yo, mé á íin indiví. Ta mé á caja ña ná cana candii jatá ñayivi quini xihín jatá ñayivi vaha. Ta mé á jácuun javi jatá ñayivi ndaa xihín jatá ña cò caja vaha. ⁴⁶A cáhán ndó ña caja Ndióxi cuahá ñamaní xihín ndó tá quihvi ini cuití ndó ña quihvi ini ndóhó va jáchí janda ñayivi quini, ña játaca jjuhún cuéntá impuesto caja na já. ⁴⁷Ta a cáhán ndó ña ña- caja ndó cuahá ña vaha tá ná cahan Ndióxi cuití ndó xihín ñani táhan ndó jáchí janda ñayivi cò xíní Ndióxi caja na já. ⁴⁸Xíní ñúhú caja ndaa ndó xihín tóco ndihi ñayivi tá quiahva caja ndaa Ndióxi, tátá yo, mé a íin indiví —ñacachi Jesús.

Jánaḡa Jesús ña ndítahan chindeé yo ña ndahví

6 Já ñacachi tucu Jesús já: —A ndúcú ndó caja vaha ndó nuú ñayivi sahá ña ná cuni táhyí ña ña caja ndó já candoo vaha ndó nu ná. Jáchí tá ná caja ndó já coo toho ñaha ñehé táhvi

ndó nu Ndióxi, tátá ndó íin indiví. ²Sahá ña cán queá tá chindeé ndó ñayivi, ña ndímaní ñaha nuu, a cáca nuu ndó cahan lándá ndó ña nuú ñayivi tá quiahva caja ña cò cúní ná tá quiahva ndaa na. Jáchí ña cán sahan na ñaha nuú ña ndahví ini veñuhu xihín nu táca ñayivi íchí já ná cuu cuni táhyí tóco ndihi ñayivi ña vaha caja na. Jáchí ña cán cúní ña ña ná caja cáhnu ñayivi na. Mé a ndaa cáchí i xihín ndó ña sa yahvi na cúní mé ña caja cáhnu ñayivi na. ³Ña ndítahan caja ndó tá chindeé ndó ña ndímaní ñaha nuu queá caja ndó ña ná a cándaa ini ni in ñayivi ña caja ndó ⁴ta xíní ñúhú caja jehé ndó ña. Ta Ndióxi, tátá ndó sánehé a ña vaha caja ndó xihín ñayivi ta mé á queá chahvi a sahá ña caja ndó jan.

Jánaḡa Jesús ñayivi ndaja cacá tahví ña nu Ndióxi

(Lc. 11:2-4)

⁵Tá xíca tahví ndó nu Ndióxi a caja ndó tá quiahva caja ña cò cúní ná tá quiahva ndaa na jáchí cátoó ña candita na veñuhu xihín cáyé ña cacá tahví ña nu Ndióxi ña ná cuni táhyí ñayivi na. Mé a ndaa ná cahan i xihín ndó sa yahvi na cúní mé ña xíní ñayivi na. ⁶Joo ndóhó, tá xíca tahví ndó nu Ndióxi, tátá ndó íin indiví ndítahan quihvi ndó ini vehe ndó ta chicaji tuun ndó yéhe a ta jan cuu ca- ca tahví jehé ndó nu Ndióxi. Jáchí jan íin Ndióxi, tátá ndó xihín ndó taa johó a nu cahan ndó ta caja mé á ñamaní xihín ndó.

⁷Ta tá xíca tahví ndó nu Ndióxi, a cahan tucu tucu ndó mé tuhun ña coo saha jáchí ñayivi, ña cò xíní Ndióxi cán caja na já. Ta cáhán ña taa johó Ndióxi ña sahá ña cuahá cahan ña joo a juú ña ndaa. ⁸Joo a caja ndó tá quiahva caja ña cán jáchí Ndióxi, tátá ndó sa xíní va mé á ndá queá xíní ñúhú ndó janda tá cá- maní cacá ndó ña nu á. ⁹Ña yóho queá

ndítahan cachi ndó tá xíca tǎhví ndó nu Ndióxi:

Tátá Ndióxi, ña ñin indiví, cáhnu ná cacuu quívi ndó.

¹⁰Ná tandaa quíi quívi cacomí ndó cuéntá sahá nde.

Ta ná coo tá ñin cúní mé ndó coo ñuyívi yóho tá quiahva ñin indiví cája ndó.

¹¹Quiahva ndó nuú nde ña ndímaní nuú nde cuxu nde in in quívi.

¹²Caja cáhnu ini ndó sahá cuachi nde tá quiahva cája cáhnu ini mé nde sahá ña núu cája ñayivi xihín nde.

¹³Ta a quiahva ndó ñamaní ña ná coto ndojó tiñáhá sacuahá ndehe já ná a cája nde cuachi nu ndó.

Jáchí cómí ndó cuéntá saha tóco ndihi ñayivi,

ta cúu cája ndó tóco ndihi ñaha, ta cáhnu cúu mé ndó anda ama cáa quívi.

Já ná coo, quiahva já cachi ndó tá xíca tǎhví ndó nu Ndióxi.

¹⁴Jáchí tá cája cáhnu ini ndó sahá ña núu cája inga na xihín ndo já queá caja cáhnu ri ini Ndióxi, tátá ndo, mé a ñin indiví sahá ndo. ¹⁵Ta tá co cúní ndo caja cáhnu ini ndó sahá ña núu nacaja inga na xihín ndó já queá a cája cáhnu ini Ndióxi sahá cuachi cája ndó.

Jánahá Jesús ndaja ndítahan caja na tá cajuhun na

¹⁶Tá cajuhun ndó a cája ndó tá quiahva cája na co cúu ná tá quiahva ndáa na. Na cán cúní na ña ná cuni táhyí tóco ndihi ñayivi ña xíjuhun na sahá ña cán queá cája cueha nuu na já ná ndínehe jícó ñahá na. Mé a ndaa cáchí i xihín ndo ña sa yahvi na cúu ña xíní ñayivi na. ¹⁷Joo ndóhó, tá ná cajuhun ndó ndítahan cuchú nuú ndo ta ndaja víí ndó mé ndó. ¹⁸Já queá ná a cúní ñayivi ña xíjuhun ndó ta in túhún Ndióxi, tátá ndo, mé a ñin tuun xihín ndó cándaa ini

ña mé a ndaa xíjuhun ndó ta mé á queá chahvi a sahá ña cája ndó jan.

Indiví cúu nu ndítahan ndaja tútú ñayivi ña vaha

(Lc. 12:33-34)

¹⁹A ndúcú ndó játaca cuahá ndivaha ndó ña cuíca canduu nu ndo ñuyívi yóho jáchí yóho cúu nu quíhvi tiquíjí ñaha ndó jándihi rí sahá ta já tívi ndihi ñaha ndó. Ta jári cuu quíhvi ña cuíhná caja cuíhná da ña. ²⁰Vaha chága ná játaca ndó ña vaha indiví jáchí cán coo quíhvi toho tiquíjí jándihi rí sahá ñaha ndó. Ta mé cán ni in ñaha co tívi ta ni ña cuíhná a cúu ndíhvi caja cuíhná. ²¹Jáchí nuú nandaja títú ndo ña ndáyahvi nu ndó, cán coo ri ínimá ndo.

Nduchú núu yo cúu á tátuhun lámpara ña jándiyehé nu xíca í

(Lc. 11:34-36)

²²Nduchú núu yo cúu á tátuhun in lámpara jándiyehé nu yó já xíní yo nu xíca í. Ta tá tívi vaha nduchú núu yo já cuu candehé vaha í nu xíca í. ²³Joo tá co tívi nduchú núu yó já queá xíca yó nu naá ndivaha. Ta tá cáhán yo ña cúu yó na xíca nu yéhe ndivaha ta cáa ví yó cája í cuachi já queá cúu yó tátuhun na xíca nu naá ndivaha.

In ñaha cúu Ndióxi ta inga ñaha cúu jihún

(Lc. 16:13)

²⁴Ni in túhún ñayivi a cúu caja chúun nuú ívi xitoho na jáchí candají na in xitoho na ta inga xitoho na quíhvi ini chága na. Á tá coo ta caja ndíví vaha na chuun nuú in xitoho na ta inga na cán a cája chúun vaha na nuu. Ta quiahva já ñin ri xihín ndóhó va jáchí a cuú caja cáhnu ndó Ndióxi tá chínúu ndó ínimá ndó jatá jihún ndo.

Ndaá Ndióxi na cúu cuéntá mé á

(Lc. 12:22-31)

²⁵ Candehé ndo ña cáhan i xihín ndo yóho: A ndícani ini ndó sahá ña cuxu ndó ta ni sahá ña coho ndó ña catacu ndó in in quiví. Ta ni a ndícani ini ndó saha jáhma candixi ndó. Jáchí tá tácu ndo, ña jan cúu ña cáhnu chága a juú ga ña cuxu ndó. Ta íin chága saha yiquí cuñu ndó a juú ga jáhma ndíxi ndó jan. ²⁶ Candehé ndó laa ndáchí nu táchi jan: rí jan ni co xútu rí ta ni a vája sáhan rí jáquee rí ta ni co yáca rí nu táan vaha rí nuní rí. Ta Ndióxi, tátá ndo, mé a íin indiví sáhan ña xixí rí jan nu rí. Á co xíní ndó ña íin chága saha mé ndó a juú ga laa cán. Sahá ña cán queá quiahva mé á ña xíní ñúhú ndó catacu ndó. ²⁷ Ta coó saha toho ña ndícani nahá ini ndó jáchi a cuú ndaja jícó ndó mé ndó java metro chága saha ña ndicani ini ndó.

²⁸ Ta ni co ndítahan ndicani ini ndó saha jáhma candixi ndó. Candehé ndo ndá quiahva ndató sáhnú itá yúcu. Mé ita jan ni co cája chúun a ta ni co cávaha jáhma á. ²⁹ Joo mé a ndaa ná cahan i xihín ndo ña ñúchí chága ita yóho na-caja Ndióxi a juú ga jáhma vaha ndi-vaha nasandixi rey Salomón sanahá, da nasahijn cuahá ñaha cuicá. ³⁰ Candehé ndó ndaja ndaa vaha Ndióxi yucu ita vatí íin tóo a viti ta itaan cáyi a jándihi sahá. Ndaja ga ví caja Ndióxi xihín ndóhó ña quiahva mé á tóco ndihi ña xíní ñúhú ndó catacu ndó. Joo mé ndó co cándúsa ndó ña candaa mé á ndohó. ³¹ Ña cán queá a ndícani ini ndó saha ndá ña cuxu ndó á sahá ña coho ndó á sahá ña candixi ndó. ³² Jáchí na co xíní íchi cuéntá Ndióxi, na cán cúu na ndícani cuahá ini saha tóco ndihi ña yóho. Joo cúu ndó cuéntá Ndióxi, tátá ndo íin indiví ta xíní vaha mé á ña ndímaní nu ndó catacu ndó. ³³ Joo ndítahan nu ndó ndiquiahva ndó mé ndó ndáha Ndióxi ña ná cacomí

mé á cuéntá saha ndó ta já quiahva mé á ña ndímaní nu ndo catacu ndó. ³⁴ A ndícani ini ndó sahá ña quixi nu ndó inga quiví itaan jáchi Ndióxi cuití va xíní a ndía vaxi nu ndó quiví itaan ta coó saha ndicani ini ndó sahá ña ndoho ndó itaan.

Co ndítahan candehé ndaa yó ñayivi

(Lc. 6:37-38, 41-42)

7 'A candehé ndaa ndó ñayivi já ná a candehé ndaa Ndióxi ndohó. ² Jáchí tá quiahva cája ndó xihín inga ñayivi quiahva já caja ri Ndióxi xihín ndóhó va. Sahá ña cán queá tá quiahva sándehe ndaa ndó ñayivi quiahva já caja ri Ndióxi xihín mé ndó. ³ Jáchí ndá cuéntá queá sándehe ndó ña núu cája ñani táhan ndó ta co sándehe ndo ndá quiahva nahnu chága ña núu cája mé ndó. Cúu á tá-tuhun ndácaan in xehe loho nduchú núu ñani táhan ndó nani ndácaan in yító ndúhu cáhnu ini nduchú núu ndo. ⁴ Ta tá a cuú cuni ndó yító cáhnu ndácaan ini nduchú núu mé ndó ndaja caja ndó cachi ndó xihín ñani táhan ndó: "Ñani i, ná tavá loho i xehe ndácaan nduchú núun jan." ⁵ Jándahvi ndó mé ndó xihín ña cája ndó. Xíní ñúhú tavá ndó yító cáhnu ndácaan nduchú núu mé ndó jan já ná nuna nu ndó cuni vaha ndó já ná cuu tavá ndó xehe loho ndácaan nduchú núu ñani táhan ndó.

⁶ A quiahva ndó ña yii cuéntá Ndióxi nuú ñayivi quini. Jáchí tá cája ndó já cúu á tá-tuhun tá ná quiahva ndó ñaha yii nuú tina ta tiahva náá ndicó coo rí tiin rí ndohó. Ta jári cúu á tá-tuhun tá ná quiahva ndó ñaha yahvi ndivaha tá-tuhun perla nu cóchí jáchi cuu cuani nihni rí ña.

Ndaja caja í caca í ñamaní nu Ndióxi

(Lc. 11:9-13; 6:31)

⁷ Ndá ñaha ndímaní nu ndó xíní ñúhú caca ndó ña nu Ndióxi ta já quiahva mé á ña nu ndo. Ndinducú ndó ña cúni ndo

ta ñehē ndó ña caja Ndióxi. Cúú á tátuhun catí ndáha ndo yéhé ta já nuna yéhé nu ndo. ⁸ Jáchí na xíca in ñaha, na cán cúú na ñehē va. Ta na ndúcu ñaha, na cán cúú na ndíñehē ña. Ta na catí ndáha yéhé, na cán cúú na ndínuna yéhé nuu.

⁹ Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéhé ri ndó quiahva ndó yuu nu á ña ná caxí a. ¹⁰ Ta ama ná quiahva ri ndó in coo nu á caxi tá xíca tiyacá nu ndó cuxu a. Co cája ndó já. ¹¹ Candehé ndó. Vatí mé ndó cúú ndó ñayivi cája cuachi joo xíni vaha ndó quiahva ndó ña vaha nuú jahyi ndó. Ndaja ga ví cája Ndióxi, tátá ndo, mé a íin indivi xihín ndo. Quiahva mé á ña vaha nu ndo tá ná caca ndó ña nu mé á.

¹² Candehé ndó. Tá quiahva cúní ndó caja ñayivi xihín ndo quiahva já ndítahan caja ri ndóhó va xihín ná jáchí ña yóho queá sáhdá ley Moisés xihín ña nacahyí na profeta caja ndó.

**Yéhé táhán cúú nuú
quihvi na cuhun indivi**

(Lc. 13:24)

¹³ Cúú á tátuhun íin ivi yéhé. In yéhé cúú á ña táhán ndivaha ta xíní ñuhú ndínducú ndó ndíhvi ndó cán. Jáchí inga yéhé cúú á ña ndíca ndivaha nuú ndíhvi na cuhun indayá. Ta cuahá ndivaha ñayivi cúú na xíca íchí ndíca cuahan na indayá nuú ndíhi saha ná. ¹⁴ Joo ña cúú íchí ña ndáca ñayivi yéhé táhán nu ndíhvi na indivi cúú á ichí táhán ndivaha ta yáncá ndivaha caca nuu í nu á. Ta chá ndivaha cúú na ndíhvi cán.

**Xihín cuíhi cúun nuú in yíto
cuu ndicuní ndá yíto cúú dó**

(Lc. 6:43-44)

¹⁵ Cuéntá coo ndó xihín na tuhún, na cáchí cáhan na cuéntá Ndióxi jan. Jáchí

uun ndivaha cása na nu ndo. Joo cúú ná tátuhun ndivahyí quini ndivaha vatí náha na tátuhun ndicachi loho. ¹⁶ Cúú ndicuni ndó na xihín ña cája na. Jáchí ñayivi quini coo cája vaha toho na. Cúú á tátuhun tá a cuú cuun uva nuú tohínú ta ni a cuú jáquee ndó titó ñuhú nuú tohínú. ¹⁷ Na cán queá tóco ndíhi yító vaha ndinuhu cuíhi vaha vaha cuití cúun nu do. Joo yító quini ndinuhu cuíhi quini cuití cúun nu do. ¹⁸ Dó cúú yító vaha cán a cúu toho cana cuíhi quini nu do ta ni yító quini cán a cúu cuun cuíhi vaha nu do. ¹⁹ Ta tóco ndíhi yító, dó co cána cuíhi vaha nuu, tahnda do ta quee dó nu cándaha ñuhu ña cayi do. ²⁰ Sahá ña cán queá xihín ña cája ñayivi já cuu ndicuni ndó á cúú ná ñayivi vaha á cúú ná na quini.

**A juú ndíhi toho ñayivi ndíhvi na
nuú cacomí Ndióxi cuéntá saha ná**

(Lc. 13:25-27)

²¹ A juú ndíhi toho na cáchí cúú yehe xitoho na cuhun na nuú cacomí Ndióxi cuéntá saha ná. Na cája ña sáhdá Ndióxi, tátá í, mé a íin indivi na cán cuití cúú na cacomí mé á cuéntá saha. ²² Jáchí tá ná xinu coo quivi caja ví Ndióxi sahá ñayivi já queá casáha cahán cuahá ndivaha ñayivi xihín í ta já cachi na já: “Jesús, mé ndó cúú xitoho nde ta xihín quivi mé ndó naxíca nuu nde cáhan nde tuhun Ndióxi xihín ñayivi ta xihín quivi mé ndó natavá nde rí quini nasañuhu ínimá ñayivi ta xihín quivi mé ndó nacaja cuahá ndivaha nde ña xituhún”, cachi na xihín í. ²³ Ta anda já nducú ñehē e tuhun nu ná já cachi í já xihín ná: “Co xíní toho í yo cúú ndóhó. Caxoo ndó nuú í jáchí ndinuhu ña quini cája ndó”, cachi í xihín ná.

**Sácú Jesús quiahva sahá
ivi da nacavaha vehe**

(Mr. 1:22; Lc. 6:47-49)

²⁴ Ndá na xini joho na cahan i ta cája na na, na cán cúu ná tátuhun in dataa, da fin xini túni ta nacavaha da vehe da jata in tóto. ²⁵ Ta tá naxinu javi já nasahnu yuta ta naxinu tachi quini jata vehe cán joo coo ndavicava vehe da jachi tóyí cándichi vehe da jata tóto cán. ²⁶ Joo na xini joho nu cahan i ta co cája na na, na cán cúu ná tátuhun in dataa, da co xini túni ta nacavaha da vehe da nuú ñuti. ²⁷ Tá nandihí já naxinu javi já nasahnu yuta ta naxinu tachi quini jata vehe cán. Anda já nandicava vehe da ta chí nandihí saha chí uun —nacachi Jesús jánaha ñayivi.

²⁸ Ta tá nandihí nacahan Jesús na yóho já tóco ndihí ñayivi nacatontó na xini joho na ndá quiahva jánaha mé á ²⁹ jachi tá jánaha mé á nu ná cahan tá quiahva cahan in da fin saha cahnda chuun ta co cahan toho a tá quiahva cája na jánaha ley Moisés.

**Tá nandaja vaha Jesús in da
ndóho cuehe táhyi**

(Mr. 1:40-45; Lc. 5:12-16)

8 Tá nanuu Jesús jata yucu nuú nasanúu a cán já ndíco cuahá ndivaha ñayivi jata cuahan. ² Ta ndaja coo já nacayati in dataa, da ndóho cuehe táhyi nu á. Ta já nacaxítí da nu á já nacachi da já xihin á:

—Cuu ndaja vaha ndó yehe, xitoho i ta cuni ndó —nacachi da xihin Jesús.

³ Tá nandihí já nacani ndaa ndáha Jesús da já nacachi a já xihin dá:

—Cuni na ná ndivahún na cán queá nandivahún viti —cáchi a xihin dá.

Tá nacachi Jesús já chí ivi laá nandin-daa cuehe táhyi nandoho da cán. ⁴ Anda já nacachi Jesús já xihin dá:

—Candehé. A cáxi tuhun tohún na yóho xihin ni in tuhún ñayivi. Cuáhan ndacún nahun mún nuú jutú. Ta ndítahan jocún ñaha nu Ndióxi tátuhun sáhdá ley Moisés sanahá caja na sa nandivaha. Já ná canda ini tóco ndihí ñayivi na sa nandindaa va cuehe nasandohún —nacachi Jesús xihin da cán.

**Tá nandaja vaha Jesús in da cája
chuun nuú in jefe soldado**

(Lc. 7:1-10)

⁵ Tá nandihí Jesús nuu Capernaum já nacayati in da sáhdá chuun nuú soldado naquixi nuu Roma nu Jesús jachi cuni da caca da in ñamaní nu á.

⁶ Já nacachi da já xihin á:

—Á co cuni ndó caja ndó ñamaní ndaja vaha ndó mozo i, datacú jachi cánduhu da vehe quihvi da naxihí tuchu yiquí cuñu da ta a juú quiahva cáhivhi yiquí cuñu da —nacachi da cán xihin Jesús.

⁷ Já nacachi Jesús já xihin dá:

—Vaha va, cuhun i ndaja vaha i da —nacachi Jesús.

⁸ Anda já nacachi tucu da sáhdá chuun nuú soldado cán já xihin Jesús:

—Candehé ndó. Coó saha toho yehe na ná ndihvi ndó vehe e. Joo cahnda cuití ndó chuun janda nu fin ndó yóho ta já ndivaha va mozo i. ⁹ Jachi ndúu java na náhnu chága sáhdá chuun nuú i. Ta ndúu ri soldado sáhdá ri yehe va chuun nuu. Ta tá chindahá i in da na ná cuhun da nu cuni mí i cuhun da ta cuahan da. Ta tá sáhdá i chuun nuú inga da na ná quixi da nuú i ta vaxi da nuú i. Ta tá sáhdá i chuun nu mozo i na ná caja da na sáhdá i ta cája da na —nacachi da cán.

¹⁰ Tá naxini joho Jesús na yóho já nacatontó a já nacachi a já xihin na ndíco cuahan cán:

—Mé a ndaa ná cahan i xihin ndo na a náha cuni i tañu na Israel in da cándeé cáhnu nahá ini Ndióxi tá quiahva

cándeé cáhnu ini da yóho Ndióxi. ¹¹ Candehé ndo ná cahan i xihin ndo ña quixi ñayivi ndijáá níí cúú saha ñuyiví ta ca-coo na cuxu na xihin Abraham ta xihin Isaac ta xihin Jacob indivi nu fin Ndióxi cómí a cuéntá sahá ñayivi. ¹² Joo cuahá na Israel, na nanditahan nuu coo cán a cóo toho na cán. Na caja Ndióxi xihin na cán quéa cuíta na jata véhe cuhun na nuú naá ndivaha. Ta cán cuacu ndivaha na janda quiahva chicáhná mé nuhu ná —cáchi Jesús.

¹³ Tá nandihí já naçahan tucu Jesús xihin da sáhná chuun nuú soldado cán já naçachi a já xihin dá:

—Cuanúhu vehún. Nandivaha mosún tá quiahva cúnun jáchi naçandúsún yehe —naçachi Jesús xihin dá.

Chí mé hora já nandivaha mozo da cán.

Tá nandaja vaha Jesús ná cúú xojo Pedro

(Mr. 1:29-31; Lc. 4:38-39)

¹⁴ Nasahan Jesús vehe Pedro ta tá naçinu a cán cándúhu ná cúú xojo Pedro quíhvi ña jáchi chícaan cáhni ndeé ña.

¹⁵ Anda já natiin Jesús ndáha ná quíhvi cán ta chí nandindaa cáhni ña. Ta já naçadoco ná cán cája ndívi ná nu ná.

Tá nandaja vaha Jesús cuahá ndivaha na quíhvi

(Mr. 1:32-34; Lc. 4:40-41)

¹⁶ Ta tá naçuaá já ñéhe cuahá ndivaha na na quíhvi xihin na núhu ínimá quini ini nuú Jesús. Ta xihin in túhún tuhun naçahan mé á natavá ínimá quini núhu ínimá ñayivi ta jári nandaja vaha mé á tóco ndihí na quíhvi. ¹⁷ Ta tóco ndihí ña yóho nayaha já ná xinu coo nuú tuhun ña naçahyí profeta Isaías tá naçachi da já: “Mé á nandiquehe ndihí a ña cávitá iní ta naxojo ndihí a cuhe ye”, cáchi tuhun Ndióxi.

Na cúni candico Jesús

(Lc. 9:57-62)

¹⁸ Tá naçini Jesús ña a juú quiahva cándíhi táhan ñayivi ndúu na xihin á já naçahnda chuun ña ná cojo cava na inga xoo tañuhú cán. ¹⁹ Joo naçayati in da já-naha ley Moisés nu á já naçachi da já xihin á:

—Maestro, cúni candico i ndohó ndá naçuu nuú cuhun ndo —naçachi da xihin á.

²⁰ Já nanducú ñéhe Jesús tuhun nu dá já naçachi a já xihin dá:

—Ndicuii cúú rí ta vañi fin cáva núhu rí. Ta laa cúú rí ta vañi fin táca núhu rí. Joo yehe, da nachindahá Ndióxi nduu ñayivi, chí ni nuú cuju mí i coó va —naçachi Jesús xihin dá.

²¹ Ta inga da sa xíca xihin á naçachi da já xihin á:

—Maestro, quiahva jihna ndó ñamaní nuú i ña ná cuhun i jánduxu tátá i já quixi i candico i ndohó —naçachi da xihin á.

²² Já naçachi Jesús já xihin dá:

—Xíní núhú candicún yehe viti jáchi ná cuhun mé ñayivi, na a náha çacu ndaa ínimá jánduxu na ndii jan —naçachi Jesús xihin dá.

Tá najacátaji Jesús tachi xihin tañuhú tá ndícojo do

(Mr. 4:35-41; Lc. 8:22-25)

²³ Ta ndaja coo naquihvi Jesús ini in barco ta cátahan na xíca tuun xihin á cán cuahan na. ²⁴ Ta nani xíca na nuú tañuhú cán cuahan na ta in náá cuítí naçinu in tachi quini ndivaha nuú tañuhú cán. Ta a juú quiahva ndeé naçasáhá ndícojo ticuif cán janda quiahva nandichutú ticuif ini barco cán. Joo cándúhu Jesús ini barco quíji va. ²⁵ Anda já ndáva na xíca tuun xihin á cán nasahan na ndínehe na ña. Já naçayuhú na já cáchi na xihin á:

—Chindeé ndó ndehe, xitoho nde. Jáchí cácoo barco cahá tañuhú cuahan do —nacachi na xihín á.

²⁶ Andá já nanducú ñehe Jesús tñhun nu ná já nacachi a já xihín ná:

—Ndá cuéntá queá yíhvi nahá ndo. Ndá cuéntá queá co cándéé ini ndó yehe —nacachi a.

Já nandaco a ta jánani a tachi quíni cán xihín tañuhú cán ta já nacatáji uun tóco ndihi a cán. ²⁷ Tá naxini na xíca tuun xihín á cán ña yóho já nacatontó na ta nacasáhá ndáca tñhún táhan na já cáchí xihín táhan na já:

—Ta ndá da cúu dataa yóho ña janda tachi xihín tañuhú cándúsa nu cáhan da —cáchí xihín táhan na cán.

Tá naqueta ivi da ñúhu ínima quini ini núú Jesús

(Mr. 5:1-20; Lc. 8:26-39)

²⁸ Tá naxinu coo Jesús inga xoo tañuhú cán nu iin ñundáhyi cuéntá Gadara já naqueta ivi da ñúhu ínima quini ini tañu nu ndúxu ndji. Ta nacayati da nuú Jesús. Ndívi mé da ñúhu ínima quini ini yóho cúu dá tátñhun quíti, rí cuehe ndivaha. Sahá ña cán queá ni in túhún ñayivi a cuú yaha chí íchí cán.

²⁹ Tá naxini da Jesús já nacasáhá da cáyuhú da nu á já cáchí da já xihín á:

—Ndá cuéntá queá vasún quihvi nuún xihín nde, Jesús, da cúu in túhún jini já jahyi Ndióxi. Á vasún jándoho yachún ini nde tá cámaní yii ndindaa tiempo ndoho ini nde —nacachi rí quini cán xihín Jesús.

³⁰ Ta ndaja coo yati cán nasanduu cuahá ndivaha cóchí xíxáhan rí. ³¹ Ta mé rí quini ñúhu ini ndívi dataa cán naxica tahví ri nu Jesús já cáchí ri já xihín á:

—Tá ta ná tavún ndehe ini da yóho, quiahva ñamaní nuú nde ña ná cñhun nde ndihvi nde ini cóchí ndúu cáa —nacachi rí xihín Jesús.

³² Andá já nacachi Jesús já xihín rí:

—Cuáhán ndó, dá já.

Chí naqueta rí quini cán ini ndívi dataa cán já nasahan rí nandihvi rí ini cóchí cán. Ta chí ivi laá xínu tóco ndihi cóchí cán cuahan rí núu rí nu ndáyi yuhú tañuhú cán. Ta najáqueta nuu rí mé rí ini tañuhú chí nacandaa rí ticuifí já naxihí ri.

³³ Ta chí a juú quiahva nayihví da ndáá cóchí chí naxinu ndivaha da cuahan da. Ta tá naxinu da ñuu já nacasáhá da ndicani da ndaja cáa ña nayaha xihín ndívi da nasañuhu ínima quini ini cán. ³⁴ Andá já naqueta tóco ndihi ñayivi ñuu cán cuahan na candehé na Jesús. Ta tá naxini na mé á já naxica tahví na nu á ña ná quee a cñhun a.

Tá nandaja vaha Jesús in da naxihí tñchu saha

(Mr. 2:1-12; Lc. 5:17-26)

9 Tá sa nayaha tóco ndihi ña yóho já nandaa Jesús jatá in barco ta já naxojo cava inga xoo tañuhú cán janda quiahva naxinu coo a ñuu mé á. ² Ta cán ñehe na in da quihvi, da naxihí tñchu saha ta cándúhu da nu yívi loho ñehe na nacasaá na nu á. Ta tá naxini Jesús ndá quiahva cándéé ini da cán mé á já nacachi a já xihín da quihví cán:

—Candehé, jahyi a. A ndicani toho inún jáchí cája cáhnu ini i sahá cuachún viti —nacachi Jesús xihín dá.

³ Java táhan da jánañá ley Moisés nacasáhá da cáhán da já: “Mé da yóho ndája núu da Ndióxi xihín tñhun cáhan da jáchí ni in túhún toho ñayivi a cuú caja cáhnu ini sahá cuachi.” ⁴ Joo sa nacandaa ini Jesús ña cáhvi ini da cán sahá ña cán queá nandaca tñhún a da já nacachi a já xihín dá:

—Ndá cuéntá queá cáhvi núu ini ndó sahá yehe. ⁵ Á cáhán ndo ña ihvi chága cachi i xihín da yóho: “Nacaja cáhnu ini i sahá cuachún viti.” Á tá coo ta cachi i xihín dá: “Cuándaco ta cuáhán.” ⁶ Candehé vaha ndo ná naha i nu ndo ña

íin sahá i, da nachindahá Ndióxi nduu ñayivi caja cáhnu ini i sahá cuachi cája ñayivi ñuyívi yóho —ñacachi Jesús xihín dá.

Tá nandihí já nandicañan tucu a xihín da ñaxihí tuchu saha cán:

—Ta viti cáhan i xuhun cuándacoo ndiquehe xito lohún ta cuanúhu vehún —ñacachi Jesús xihín dá.

⁷Chí ivi laá nandacoo da quíhvi cán ta já ñaquee da cuanúhu dá. ⁸Tá ñaxini ñayivi ndúu cán ña ñacaja Jesús yóho já ñayihví na ta ñacasáhá cája cáhnu na Ndióxi sahá ña nasahan ndée mé á nuú ñayivi ña ná cuu caja na ña xitúhún.

Tá ñacana Jesús Mateo ña caca tuun da xihín á

(Mr. 2:13-17; Lc. 5:27-32)

⁹Tá nandihí já ñaquee Jesús cuñan ta nani xíca cuñan já ñaxini a in dataa naní Mateo, da íin coo nu sácoco da játaca jjuhún cuéntá impuesto. Ta ñacana Jesús da já ñacachi a já xihín dá:

—Naha quí candicún yehe.

Anda já nandaca ndichi Mateo ta ñacasáhá ndíco da Jesús.

¹⁰Tá nandihí já íin coo Jesús xíxi a vehe da cán ta cán ñaxinu coo cuñá táhan na játaca jjuhún cuéntá impuesto xihín java ga ñayivi cája cuachi. Nasacoo na xíxi na xihín Jesús ta cán ndúu coo ri na xíca tuun xihín a cán. ¹¹Ta tá ñaxini ña fariseo ña ndúu ña cán xíxi na xihín Jesús já ñacasáhá ña ndáca tühún ña ña xíca tuun xihín Jesús cán já:

—Ndá cuéntá queá xíxi xitoho ndó xihín ña játaca jjuhún cuéntá impuesto ta xihín java ga ña cája cuachi —ñacachi ña fariseo cán.

¹²Joo tá ñaxini joho Jesús ña yóho já ñacachi a já xihín ña fariseo cán:

—Ñayivi íin vaha co xíni ñúhú toho na da cája tátá ñahá joo ña quíhvi, ña cán cúu ña xíni ñúhú da cája tátá ñahá.

¹³Ta yehe coó vaxi toho i cana i ña sa íin vaha. Vaxi i cana i ñayivi, ña cája cuachi ña ná jándacoo na cuachi cája na. Xíni ñúhú cuñun ndo jácuaha vaha ndó ña cúní cachi tühun Ndióxi tá cáhí a já: “Ña cúní queá ná candáhví ini ndó ñayivi jáchí vaha chága ña yóho a juú ga ña ná joco ndó quíi nuú i”, cáhí tühun Ndióxi —cáhí Jesús xihín ná.

Cáhan Jesús ndá saha queá cajuhun na

(Mr. 2:18-22; Lc. 5:33-39)

¹⁴Tá nandihí ña xíca xihín Juan, da jácandúta ñayivi cán ñaxinu coo na nu Jesús. Já ñacasáhá ndáca tühún ña mé á já ñacachi na já xihín á:

—Ndávaha co xíjuhun toho ña xíca xihín yóhó nani cuñá ndivaha xíjuhun mé nde xihín ña fariseo —ñacachi ña cán xihín Jesús.

¹⁵Anda já nanducú ñehe Jesús tühun nu ná já ñacachi a já xihín ná:

—Á cáhan ndo canduu cuéha ña ndúu in vicó tándaha nani íin mé da tándaha cán xihín ná. Uñun. Jáchí cájii ini na. Joo xinu coo quívi candaa na da tándaha cán anda jáví casáhá cajuhun na. Ta cáhí i xihín ndo ña vaxi quívi candaa na yehe nuú ña yóho ta anda jáví casáhá ña xíca tuun xihín i cajuhun na —ñacachi Jesús.

¹⁶Ta nasacu Jesús inga quiahva nu ná já cáhí a já:

—Ama ná jándaha ñayivi jahmá yatá xihín in tühun jáhma saá jáchí tá nandihí ndíndíi a, sáhdá chága ví a jahmá yatá cán ta jándacáhnu chága ví a yávi ña nandicahmá ña cán. ¹⁷Ta ni co táan ña vino saá ini vóso níi yatá jáchí jácáhndí mé vino cán níi ta cuiñá mé vino cán ta tívi vóso níi cája dó. Sahá ña cán queá ndítahan taan yo vino saá ini vóso níi saá ná a ndíhi saha vino xihín vóso —cáhí Jesús.

**Tá nandaja vaha Jesús jahyi
jihí Jairo xihín in ñá nacani
ndaa ndáha jáhma á**

(Mr. 5:21-43; Lc. 8:40-56)

¹⁸ Ta nani cáhan Jesús cándichi a naxinu ɔo in da sáhdá chuun nuú na Israel. Já nacaxítí da nu á ta já nacachi da já xihín á:

—Jacá naxihí uun ñá loho cúu jahyi jihí i joo tá ná caja ndó ñamaní quixi ndó vehe e ta chinúu ndó ndáha ndó jata ñá já nditacu tucu ñá —nacachi da cán xihín Jesús.

¹⁹ Anda já naquee Jesús cuahan xihín da cán ta ndáca na xíca tuun xihín á cán cuahan na. ²⁰ Ta ndaja coo cán fin in ñáñáha, ñá ndítahví ní ñá tíxi uxu ivi cuia. Ta nacayati ñá chí jata Jesús já nacani ndaa ndáha ñá yuhú jáhma á.

²¹ Jáchí nacahan ña: “Tá ná caní ndaa cuití ndáha í jáhma Jesús já ndivaha í”, nacahan ña. ²² Joo nandicoto nihni jata Jesús nu ñá ta tá naxini a ñá já nacachi a já xihín ña:

—A cáyihví tohún, jahyi a. Nandi-vahún jáchi nacandúsún yehe —nacachi Jesús xihín ñá.

Ta chí mé hora já ndivaha ñá.

²³ Ta tá naxinu ɔo Jesús vehe da sáhdá chuun nuú na Israel cán já naxini a ñá sa ndúu música cán ña ná cuhun na jánduxu na jahyi da cán. Ta naxini a jándá johó sácu cóhó ñayivi ndúu na. ²⁴ Ta chí já nacachi a já xihín tóco ndihi na cán:

—Cuáhán queta ndó jata véhe. Jáchí ɔó naxihí toho ñá loho yóho. Quíji cuití va ñá —nacachi Jesús xihín ñayivi ndúu cán.

Joo nacasáhá na cán sácu ndaa ñahá na. ²⁵ Ta chí natavá Jesús na jata véhe. Ta tá nacayati a nu ñá cán já natiin a ndáha ñá chí ivi laá nandacoo ñá. ²⁶ Ta níí cúu ñundáhyi cán nandicuita nuu tuhun sahá ña nacaja Jesús cán.

Tá nandaja vaha Jesús ivi da cuáá

²⁷ Tá naquee Jesús cuahan já ndíco ivi da cuáá jata cuahan da já nacasáhá cáyuhú cóhó da já cáchí da já xihín á:

—Jesús, da naquixi chíchi David caja ndó ñamaní candáhví loho ini ndó ndehe —cáchí da cáyuhú da jata Jesús.

²⁸ Ta ndaja coo naquihvi Jesús ini in vehe ta já nacayati ndívi da cuáá cán nu á. Já nacasáhá ndáca tuhún a da cán já nacachi a já xihín dá:

—Á cáhán ndo ña cuu caja i jándiyehé nuu ndo —nacachi Jesús xihín da cán.

—Ajan, xitoho nde. Cándúsa nde ña cuu caja ndó ña —nacachi ndívi da cuáá cán xihín Jesús.

²⁹ Tá nandihí já nacani ndaa ndáha Jesús nduchú núu da cán ta já nacachi a já xihín ndívi da cán:

—Ná coo tá quiahva cúni ndo jáchi cándeé ini ndó yehe —cáchí a.

³⁰ Tá nandihí já nacasáhá sándehe ndívi da cuáá cán. Ta nasahnda Jesús chuun nu dá ña ná a cáxi tuhun da nuú ñayivi sahá ña nacaja mé á xihín dá.

³¹ Joo tá jacá naqueta uun da cán já nacasáhá da ndícani da nuú ndijáá ñayivi ndúu ñundáhyi cán sahá ña nacaja Jesús xihín dá.

Tá nandaja vaha Jesús in da níhi

³² Nani naquee da cuáá cán cuahan da já nasaa java ñayivi nu Jesús ñéhe na in da níhi, da ndácaan ínima quini ini. ³³ Ta tá natavá Jesús ínima quini ini da cán chí ivi laá nacasáhá cáhan da. Ta a juú quiahva nacatóntó ñayivi ta já cáchí na já:

—Ni in tuhún tañu ɔó naxini nde in ñaha tátuhun ña yóho ñundáhyi Israel —nacachi na cán.

³⁴ Joo na fariseo cán nacasáhá cáchí na já:

—Rí cúu tiñáhá sacuaḥa nu rí quini sáhan rí ndéé rí nuú Jesús yóho ña ná

tavá a ínima quini ini ñayivi —ñacachi na fariseo cán.

Táhnda ini Jesús sahá ñayivi

³⁵ Ndijáá ñuu náhnu xihín ñuu válí ñaxica nuu Jesús jánaḥa tuhun Ndióxi ini veñuhu na cán. Ta ñacaxi tuhun a tuhun vaha xihín ñayivi ña sa ñacayati quiví cacomí Ndióxi cuéntá saḥa ná. Ta ñandaja vaha mé á tá nuú cueḥe ndóho ñayivi. ³⁶ Ta tá ñaxini Jesús ñayivi cuḥa cán já ñataḥvi ini a saḥa ná jáchi ndóho ini na ta cávita ini na tátuhun ndicachi, rí coó da candaa ñahá. ³⁷ Anda já ñacachi Jesús já xihín na xica tuun xihín a cán:

—Mé á ndaa ndúu cuahá ndivaha ñayivi, na cúní cuni johu tuhun Ndióxi joo chá cuití na cúní cuḥun na caḥan na ña xihín ñayivi. Cúu á tátuhun ín cuahá ndivaha ní ña xíní ñúhú jáquee joo ndímaní ñayivi jáquee na ña. ³⁸ Sahá ña cán queá xíní ñúhú caḥa ṭahví ndó nu Ndióxi ña ná chindahá mé á chága na cája chúun cuéntá mé á —cáchi Jesús xihín ná.

Chindahá Jesús na xica tuun xihín á ña ná cuḥun na caḥan na tuhun Ndióxi xihín ñayivi

(Mr. 3:13-19; Lc. 6:12-16)

10 Tá ñandihí já ñacana Jesús ndíhuxu ivi na xica tuun xihín á cán. Ta já ñasahañ ndée nu ná ña ná cuu tavá na ínima quini ini ñayivi. Ta ñasahañ ndée nu ná ña ná ndaja vaha na tá nuú cueḥe ndóho ñayivi. ² Ña yóho cúu quiví ndíhuxu ivi na cúu apóstol xica tuun xihín á cán: Da nu cuití cán naní da Simón ta caḥan ri na Pedro xihín dá. Ta inga da cán cúu Andrés ñani da. Ta inga da cúu Jacobo xihín ñani da, Juan. Ndívi da yóho cúu dá jahyi Zebedeo. ³ Tañu na cán ndácaan ri Felipe xihín Bartolomé xihín Tomás xihín Mateo, da najátaca jihún

cuéntá impuesto. Ta cán ndácaan ri Jacobo, da cúu jahyi Alfeo xihín Lebeo, da caḥan ri na Tadeo xihín. ⁴ Ta cán ndácaan ri Simón, da ñaxica cuéntá na cananista xihín Judas Iscariote, mé da najicó túhún Jesús tá nu ndíhí cán.

⁵ Tá ñachindahá Jesús ndíhuxu ivi na cán já ñacachi a já xihín ná:

—Coto a cuḥun ndó chí ñuu ñayivi tóho, na coo cúu na Israel. Ta ni a quíhvi ndó ñuu ñúhu chí estado Samaria. ⁶ Vaha chága ná cuḥun ndó caḥan ndó tuhun Ndióxi xihín na Israel jáchi cúu ná tátuhun ndicachi, rí ñandíñúhú. ⁷ Cuáhán ndó caḥi tuhun ndó xihín ná ña sa ñacayati quiví cacomí Ndióxi cuéntá saḥá ñayivi. ⁸ Ta ndaja vaha ndó na quíhvi ta jánditacu ndó ndíi ta ndaja vaha ndó na ndóho cueḥe táhyi. Ta tavá ndó rí quini ñúhu ínima ñayivi. Ta a queḥe ndó yahvi sahá ña cája ndó jáchi coo ñaxeen ndó ndée ñeḥe ndó jan. ⁹ A cáñeḥe toho ndó ni jihun cuáán ni jihun cúxú ni jihún caa cuahá caca nuu ndó. ¹⁰ Ta ni a cáñeḥe ndó yátí cuḥun ndó íchi. Ta ni a cáñeḥe ndó inga naha jáhma ndó cuḥun xihín ndo. Ta ni a cáñeḥe ndó inga ndusa ndó cuḥun ndo. Ta ni garróté a cáñeḥe ndó cuḥun ndo. Jáchi nditahan nuú ñayivi quiahva na ña nu ndo.

¹¹ Tá ná xinu coo ndó in ñuu cáhnu á ñuu loho, xini ñúhú ndinducú ndó in ñayivi, na cuu candee ini ndó ta vehe na jan canduu ndó janda quiahva ná xinu quiví quee ndó cuḥun ndo. ¹² Ta tá ná xinu coo ndó vehe jan caḥan Ndióxi ndó xihín ná. ¹³ Ta tá ná ndiquehe vaha ñayivi vehe jan ndohó já queá cachi ndó xihín ná ña ná coo vaha ini na. Joo tá coo cúní na ndiquehe vaha na ndohó já queá a caḥan ndo xihín ná ña ná coo vaha ini na. ¹⁴ Ta tá coo cúní na ndiquehe vaha na ndohó ta ni coo cúní na cuni johu na nu caḥan ndo já queá cuáhán queta ndó vehe jan á ñuu jan ta catí ndó ña yácá

saha ndó já ná naha ña cuahan cuachí na cán jata mé va na. ¹⁵ Jáchí mé a ndaa ná cahan i xihin ndo ña tá ná xinu coo quivi caja vií Ndióxi sahá ñayivi ndúu ñuyiví já queá jándoho chága Ndióxi ini ñayivi ñuu jan a juú ga tá quiahva najándoho a ini na ñuu Sodoma xihin ñuu Gomorra sanahá sahá ña coo nandiquehe na ndohó.

Vaxi quivi caja xixi ñayivi xihin na xíca cahan tuhun Ndióxi

¹⁶ Candehé ndo. Yehe chindahá i ndohó cuhun ndó tañu ñayivi quini. Cúu ndó tátuhun ndicachi válí tañu ndivahyi ña cán queá xini ñúhú cuéntá vaha coo ndó tá quiahva cája coo. Ta xini ñúhú coo mánsó ndo tá quiahva cája ndijata. ¹⁷ Cuéntá coo ndó jáchi tiin na ndohó ta ndiquiahva na ndohó ndahá na jutixia. Ta cani na ndohó ini veñuhu. ¹⁸ Ta saha mí i cañehe na ndohó cuhun ndó nuú na cúu gobernador á nuú na cómi cuéntá sahá in nación. Ta já ná cuu ndicani ndó sahá i nuú na cán ta xihin nuú na tóho, na coo cúu na Israel. ¹⁹ Joo a ndicani ini ndó saha ndá tuhun cahan ndó tá ná ndiquiahva ñayivi ndohó ndahá na cán. Jáchí tá ná ndindaa hora cahan ndó xihin ná já queá quiahva mé va Ndióxi tuhun nu ndó ña ná cuu cahan ndó sahá i nuú na cán. ²⁰ Jáchí a juú jini mé ndó quixi ña cahan ndo. Ínima yii Ndióxi cacuu ña quiahva tóco ndihi ña cahan ndo.

²¹ Ta java ta jicó túhún da ñani da ta java da jicó túhún da jahyi da ña ná cahní ñahá na. Ta java na ndicuita na cani táhan na xihin tátá na ña ná cahní ñahá na. ²² Ta ndaja táhan ñayivi ndúu ñuyiví yóho candají na ndohó sahá yehe. Joo ndá na ná candico tuun íchi mí i janda ná xinu quivi quivi na, na cán cacuu na cacu ndaa ínima. ²³ Tá ná ndicuita na caja xixi na xihin ndó in ñuu já cunu ndó cuhun ndó inga ñuu. Jáchí mé a ndaa ná

cahan i xihin ndo ña tá sa xinu coo tuu yehe, da nachindahá Ndióxi nduu ñayivi já a ñaha caca nuu ndó ndijáá ñuu ndacaan ñundáhyi Israel.

²⁴ Candehé ndo. Ni in túhún toho da xíca jácuaha tiahva chága da nu mé dá jánaña ñahá cán. Ta ni in túhún mozo coo cúu dá da cahnú chága nuú xitoho da. ²⁵ In da jácuaha ndítahan cajii íni da tá sa xini ndihi da ña xini maestro da. Ta da cúu mozo ndítahan cajii ini da tá ná xinu da cacuu da cahnú tátuhun xitoho da. Candehé ndo. Tá ná cachi ñayivi xihin da cúu xitoho ndó ña cúu da Beelzebú, rí cúu tiñahá sacuaña ndaja ga ví cachi na xihin ndohó.

Yo já ndítahan cayihví yo

(Lc. 12:2-7)

²⁶ Candehé ndo. A cáyihví toho ndó ñayivi jáchi ni in túhún toho ñaha cája ñayivi a cúu coo jehé nahá jáchi vaxi quivi tá ndaca náha nu á. Ta vatí cahan jehé ñayivi tuhun joo vaxi quivi tá canda ini ñayivi sahá. ²⁷ Na cahan yehe xihin ndó nuú naá xini ñúhú cahan ndó ña ndiví táhyí nani yehe candii. Ta ña cahan jehé e xihin ndo xini ñúhú ndaa ndó jini véhe cayuhú ndó ña. ²⁸ A cáyihví toho ndó ñayivi, na cuu caja cahní yiquí cuñu ndó jáchi ni in ñaha a cúu caja na xihin ínima ndo. Ndióxi queá xini ñúhú cayihví ndo jáchi mé á cuu jándihi a saha yiquí cuñu ndó ta cuu jácana mé á ínima ndo ini indayá anda ama cája quivi.

²⁹ Candehé ndo. Laa válí ndáchí ri nu táchi ta núu ndivaha jicó na ri. Joo ni in rí cán coo cúyu nu ñúhu ña quivi rí tá coo sahan Ndióxi, tátá ndó ñamaní. ³⁰ Ta viti caja ndó cuéntá xihin mé ndó. Janda íjii jini ndó jan ndáhvi tá in tá in a nu Ndióxi. ³¹ Na cán queá a cáyihví toho ndó jáchi ndiyahvi chága ndo nu Ndióxi a juú ga cuahá ndivaha laa válí.

**Tá cáhan cáxi ñayivi ña
cúu ná cuéntá Jesús**

(Lc. 12:8-9)

³²Ndá na cáxi tuhun nuú ñayivi ña cuahan na cuéntá mí i já queá cachi mí i sahá na nu Ndióxi, tátá i, mé a íin indiví, ña mé a ndaa cúu ndusa na cán cuéntá mí i. ³³Joo ndá na ná cachi xihín ñayivi ña co xini toho na yehe já queá ni yehe a ndicuni toho i na ña cúu ná cuéntá mí i nu Ndióxi, tátá i, mé a íin indiví.

**Cája Jesús ña sáhná
java táhan ñayivi**

(Lc. 12:51-53; 14:26-27)

³⁴A cáhan toho ndó ña naxinu i ñuyívi yóho caja i ña ná coo vaha ini ñayivi. Co căja i já. Jáchi ña vaxi yehe caja i queá ná cahnda java táhan na. ³⁵Vaxi i jácani táhan i dataa xihín tátá da sahá yehe. Ta vaxi i jácani táhan i in ñañáha xihín náná ña sahá yehe. Ta vaxi i jácani táhan i ña cúu sanu xihín xojo ña sahá yehe. ³⁶Ta ndaja vehe mé ñayivi ndicuita na cani táhan na sahá yehe.

³⁷Ta ndá na cúní chága tátá na á náná na a juú ga yehe já queá coo sahá toho na cacuu na cuéntá mí i. Ta ndá na quíhvi ini chága jahyi yíi na á jahyi jíhí na a juú ga yehe já queá coo sahá toho na cacuu na cuéntá mí i. ³⁸Ndá na co cúní ndoho ini sahá ña candico na yehe ta co íin tiahva na quivi na sahá i já queá coo sahá toho na cacuu na cuéntá mí i. ³⁹Jáchi ndá na cátóo coo chága na ñuyívi yóho, na cán cúu na ndihi saha. Joo na sahan ndeé ini quivi sahá i, na cán cúu na ñehe táhvi na catacu na anda ama cáa quivi.

Ña quiahva Ndióxi nuú ñayivi

(Mr. 9:41)

⁴⁰Ndá na ndiquehe vaha ndohó, ndiquehe vaha ri na yehe va. Ta ndá na ndiquehe vaha yehe, ndiquehe vaha ri na Ndióxi, mé a nachindahá yehe vaxi

i ñuyívi yóho. ⁴¹Ndá na ndiquehe vaha in profeta vaxi cuéntá Ndióxi já queá tá quiahva coo yahvi ndiquehe profeta cán quiahva já coo ri yahvi ndiquehe na cán. Ta ndá na ndiquehe in ta vaha sahá ña cúu dá ñayivi vaha já queá ndiquehe na cán yahvi na tá quiahva cáa yahvi ndiquehe ta vaha cán. ⁴²Ta ndá na ná quiahva ñaha vatí in yáxi ticuifí nuú in na cúu jahyi i yóho sahá ña ndíco na íchi cuéntá mí i, mé a ndaa ná cahan i xihín ndó ña chahvi Ndióxi sahá ñamaní căja na xihín ná —cáchi Jesús.

**Juan, da jácandúta ñayivi
nachindahá da java da xíca
xihín dá nuú Jesús**

(Lc. 7:18-35)

11 Tá nandihí nanaha Jesús nuú na xíca tuun xihín á cán ña ndítahan caja na já naquee a cuahan jánaha nuú ñayivi ta cáxi tuhun a tuhun Ndióxi nuú ñayivi ndúu ñundáhyi cán.

²Mé tiempo já nasandacaan Juan ve-
caa, mé dá cúu dá da jácandúta ñayivi. Ta cán nañehe dá tuhun sahá ña náhnu căja Jesús. Anda já nachindahá da java na xíca xihín dá nu á ³ña ná ndaca tuhún na Jesús á jivi ndusa cúu á Cristo, mé a chindahá Ndióxi cacomí a cuéntá sahá ñayivi, á ndítahan candati na inga ga quixi. ⁴Tá nandihí nandaca tuhún da cán Jesús sahá ña yóho já nacachi Jesús já xihín ná:

—Cuáhán ndó ndicani ndó nu Juan tóco ndihí ña naxini ndó căja i xihín tóco ndihí ña naxini johó ndó cáhan i. ⁵Ta ndicani ndó nu dá ña ndínuna nuú na cuáa ta ndícaca na rénco căja i. Ta ndaja vaha i na ndóho cuehe táhyi. Ta jándin-
una i johó na jóho já ná cuni johó na. Ta jánditacu u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínima ná. ⁶Tahví nacuu na co jándacoo ña cándéé ini na yehe —nacachi Jesús.

⁷Tá naqee nā nāchindahá Juan cán cuahān nā já naçasáhá Jesús cáhan xihín ñayivi já cáchí a já xihín ná:

—Ndía naçahán ndo cuni ndó tá naqueta ndó naçahan ndó sánehé ndo Juan yucú íchí cán. A juú da cán cúu taa láhá já quíji nuu da tátuhun quíji nuu in tóyoó cája tachi. ⁸Ndía naqueta ndó candehé ndó. A juú da cán cúu taa ndíxi jahmá lándā ndivaha. Sa xíní vaha ndó ña co ndúu toho da ndíxi jahmá lándā yucú íchí. Ndá da ndíxi jahmá lándā cúu da ndúu vehe rey cuítí va. ⁹Ndía naçahan ndó candehé ndó cán. Á coo naçahan ndó cuni johó ndó nu cáhan in da cúu profeta nu ndo. Mé a ndaa da cán cúu dá in profeta ta íin chága saha dá a juú ga inga profeta nasanduu sanahá. ¹⁰Jáchí mé Juan cúu dá da cáhan tuhun Ndióxi saha tá cáchí a já:

Chindahá i in da cánúu cūhun nu mún, já ná caha tiahva da íchí nuú quisún, já naçahyí a sanahá.

¹¹Candehé ndo ná cahan i xihín ndo. Tañu tóco ndihi ñayivi coo ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuéntá saha ná, vatí cúu ná na coo saha, na cán cúu na cáhnu chága a juú ga Juan.

¹²Jandā quiví naçinu Juan, da jácandúta ñayivi ta jandā viti ñúhú ndíhi ndivaha ini ñayivi ndiquiahva na mé ná ndáha Ndióxi. Ta na sáhan tuhun ndeé ini, na cán cúu na ñehe táhvi cacomí Ndióxi cuéntá saha. ¹³Jandā tá cámaní xinu Juan tóco ndihi ña naçahyí na profeta xihín ña naçahyí Moisés cáhan ña vaxi quiví cacomí Ndióxi cuéntá saha ñayivi. ¹⁴Ta tá cúní ndo candúsa ndó ña naçahyí na cán sanahá já cuu candaa ini ndó ña Juan cúu dá da naçahan nā cán saha tá naçachi na ña ndítahan quixi tucu profeta Elías ñuyiví yóho. ¹⁵Na íin johó, ná cuni johó na.

¹⁶Ná cahan i xihín ndó ndaja íin ñayivi ndúu tiempo viti. Cúu ná tátuhun nā valí sácoo sájquí nā nuú yahvi ta cáyuhú nā nuú java ga na valí ndúu cán ta já cáchí nā já: ¹⁷“Naçivi nde tótiví nu ndo joo coo naçeen ndó cata sáhá ndo. Ta naçita cuéha ndivaha nde nu ndo ta ni coo naçacu ndó.” ¹⁸Quiahva já íin ñayivi ndúu tiempo viti jáchí tá naquixi Juan, da jácandúta ñayivi ta naçixihun da ta ni coo naçixi da vino joo naçachi ndó saha dá ña ndácaan ínimā quini ini da. ¹⁹Ta tá naçinu yehe, da nāchindahá Ndióxi nduu ñayivi ta xíxi i pan ta xíxi i vino já naçasáhá cáchí ndó sahá i ña cúu u in taa ndehé ndivaha ta xíxi ndivaha i. Ta cáchí ndó ña cátoó ndivaha i cacuu amigo nā cája cuachi xihín nā jácata jiyuhún cuéntá impuesto. Joo nā cúní cándaā ini ña ndaa, na cán cúu na cándaā ini ña cája Juan ta cája ri yehe ña ndaa —naçachi Jesús xihín ná.

Ñayivi saá ini co cúní na caha na ña cúní Ndióxi

(Lc. 10:13-15)

²⁰Tá nandíhi já naçasáhá Jesús jánani a ñayivi ndúu ndíjáá ñuu nuú naçaja cuaha chága mé á ña xitúhún. Jáchí vatí naçaja cuaha mé á ña xitúhún nu ná coo nandíco coo ini na nu Ndióxi. Ña cán quea naçachi Jesús já xihín ná:

²¹—Ndáhví nahá naçuu ndó, na ñuu Corazín. Ta ndáhví nahá naçuu ndó, na ñuu Betsaida. Cuahá ndivaha ña náhnu naçaja i nu ndo joo coo naçeen ndó ndicó coo ini ndó jándacoo ndó cuachi ndó. Sanahá najándíhi Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caha i ña náhnu nuú na cán tá quiahva naçaja i nu mé ndó, sa najándacoo va na cán cuachi na, nduu. Ta chí ivi laa ndaca ndixi na jahmá ndíi ta jácuyu na yaa yiquí jíní na, nduu. Jáchí xihín ña yóho jánaha na ña nandíco coo ini na sahá cuachi na. ²²Mé a ndaa ná

cahan i xihin ndo tá ná xinu quiví caja víf Ndióxi sahá ñayivi já ndoho chága ini mé ndó, na ñuu jan a juú ga tá quiahva nandoho ini ñayivi nasanduu ñuu Tiro xihín ñuu Sidón sanahá. ²³ Ta viti cahan i xihin ndó, na ndúu ñuu Capernaum. Jandá indivi cúní ndó cuhun ndó joo sahá ña sáá ini ndó cuhun ndó jandá indayá, caja Ndióxi. Jáchí tá ná caja i ña xitúhún nuú ñayivi ñuu Sodoma tá quiahva nacaja i nu ndóhó ta ni a ndíhi sahá ñuu cán, nduu. ²⁴ Mé a ndaa ná cahan i xihin ndo ña tá ná xinu quiví caja víf Ndióxi sahá ñayivi já ndoho chága ini mé ndó, na ñuu jan a juú ga tá quiahva nandoho ini ñayivi nasanduu ñuu Sodoma sanahá —nacachi Jesús.

Tá nacajii ndivaha ini Jesús

(Lc. 10:21-22)

²⁵ Mé tiempo cán nacahan Jesús já nacachi a já:

—Cája cáhnu i ndohó, tátá Ndióxi, ña cúu xitoho tóco ndihi ñaha ndúu indivi xihín ñuyiví. Jáchí najánaha ndó ña ndíchí ndivaha nuú ñayivi, na coo cuahá saha nuú java ga na. Ta nacaja ndó ña ná a cuú candaá ini na ndíchí xihín na tácu ini ñaha mé ndó. ²⁶ Já nacaja ndó jáchi já nasacu ini ndó caja ndó —nacachi Jesús.

²⁷ Andá já nacachi a já xihín na ndúu cán:

—Nandiquahva tátá i tóco ndihi ñaha ndahá i ña ná cacomí i cuéntá sahá. Ta ni in túhún toho ñayivi co xini vaha na yehe, da cúu in túhún jini já jahyi Ndióxi. Mé Ndióxi, tátá i cuití va xini vaha yehe. Ta ni in túhún toho na co xini vaha na yo cúu tátá i. In túhún yehe, da cúu jahyi a xini vaha i yo cúu mé á. Ta yehe cúu da caxi ndá ñayivi jánaha i nuu sahá Ndióxi, tátá i já ná candaá vaha ini na yo cúu mé á. ²⁸ Naha ndihi ndó nuú i, na sa nacanaá caja chúun. Taxi ndó ña ndójo ndó jan nuú i ta já yehe caja i ña ná ndiquehe ndée ndo.

²⁹ Yehe cúní ña ná ndiquahva ndó mé ndó ndahá i. Ta ña yóho cúu á tátuhun in yúcu chínúu na sahá jiqui tindiqui. Ta xini ñuhú catiahva ndó caja ndó tá quiahva cája yehe. Jáchí coo cama jini i xihín ñayivi ta cúu u taá manso ndivaha. Quiahva já caja ndó já ñehe íni ndo ndiquehe ndée ndo. ³⁰ Jáchí yúcu chínúu i jata ndo xihín ñaha jácojo i jata ndo cúu á ña cama ñuhú laá —nacachi Jesús.

Ña nacaja na xica tuun xihín Jesús in quiví ndiquehe ndée ñayivi

(Mr. 2:23-28; Lc. 6:1-5)

12 Ta ndaja coo in quiví ndiquehe ndée ñayivi xica Jesús cuahan tañu nuú naxutu na trigo. Ta sahá ña cuíco na xica tuun xihín Jesús sahá ña cán queá nacasáhá na túhún na java yucu jini trigo cán ta tává na trigo sáxi na. ² Tá naxini na fariseo ña yóho já nacasáhá na cahan cuachi na nuú Jesús. Já cáchi na já:

—Candehé. Na xica tuun xuhun jan cája na chuun ña co ndítahan caja ñayivi quiví ndiquehe ndée yo —nacachi na xihín Jesús.

³ Já nanducú ñehe Jesús tuhun nu ná já nacachi a já xihín na:

—Á a ñaha toho cahvi ndó nuú tuhun Ndióxi nu cahan sahá ña nacaja David sanahá tá nacuico da xihín na xica xihín dá. ⁴ Ña nacaja da queá naquihvi da ini veñuhu Ndióxi ta naxixi da pan ña yii. Ta ni nu mé dá ta ni nuú na xica xihín dá cán co cáni a nuu cuxu na pan cán. In túhún jutú cuití va cáni a nuu cuxu na pan cán. ⁵ Ta á a ñaha toho cahvi ndó ña nacahyí Moisés nu ley tá nacahyí da ña co cája toho jutú cuachi nu Ndióxi vatí caja chúun da veñuhu quiví ndiquehe ndée ñayivi. ⁶ Mé a ndaa ná cahan i xihin ndo ña íin chága sahá i, da cándichi yóho a juú ga sahá veñuhu nu cája cáhnu na Ndióxi jan. ⁷ Mé ndó co candaá toho ini ndó ña cúní cachi tuhun

Ndióxi tá cáchí a já: “Yehe cúní ña ná candáhví ini ndó ñayivi jáchí vaha chága ña yóho a juú ga ña ná joco ndó quítí nuú i”, cáchí tuhun Ndióxi. Jáchí tá ná candaa ini ndó tuhun yóho, nduu ta a chícaan toho ndó cuachi jatá ñayivi, na coó cuachi. ⁸ Candehé ndó. Yehe, da nachinehá Ndióxi nduu ñayivi, fin sahá i cahnda i chuun sahá quivi ndiquehe ndée ñayivi —nacachi Jesús.

**Tá nandaja vaha Jesús
in da nahichi ndáha**
(Mr. 3:1-6; Lc. 6:6-11)

⁹ Tá nandihí já naquee Jesús cuahan já nandihvi a veñuhu mé ñuu cán. ¹⁰ Ta cán nasandacaan in dataa, da nahichi ndáha. Ta sahá ña ndúcú na fariseo ndúu cán ndá quiahva caha na já ná cuu chiccaan na cuachi jatá Jesús sahá ña cán queá nandaca tuhún na mé á já nacachi na já:

—Á sahan Ndióxi ñamaní ndaja vahún na quihvi quivi ndiquehe ndée yo —nacachi na cán xihin á.

¹¹ Anda já nacachi Jesús já xihin ná:

—Candehé ndó. Tá fin in ndicachi loho jana ndo ta tá ná ndicava rí ini in táhvi quivi ndiquehe ndée yo, ama ná a cühun ndó tavá ndó rí. ¹² Ta ndiyahvi chága ñayivi a juú ga ndicachi. Ña cán queá sahan Ndióxi ñamaní caha i ña vaha quivi ndiquehe ndée yo —nacachi Jesús xihin ná.

¹³ Tá nandihí nacachi a já xihin dataa, da nahichi ndáha cán já:

—Jándacaa ndáhun —nacachi a xihin dá.

Tá najándacaa da ndáha dá já nandivaha ndáha dá. Ta cáa tá quiahva cáa inga ndáha da cán. ¹⁴ Joo tá naqueta na fariseo cán já nacasáhá na jándique táhan na tuhun na ña cahní na Jesús.

Ña cahan Isaías sahá Jesús

¹⁵ Tá nañehe Jesús tuhun ña ndúcú na cán cahní ñahá na já naquee a cuahan

va ta cuahá ndivaha ñayivi ndíco jatá cuahan. Ta ndaja táhan na quihvi nandaja vaha Jesús. ¹⁶ Ta nasahnda Jesús chuun nuú na sa nandivaha cán ña ná a cáxi tuhun na nuú ñayivi yo cúu mé á. ¹⁷ Tóco ndihí ña yóho nayaha já ná xinu coo nuú tuhun nacahyí profeta Isaías tá nacahyí da já:

¹⁸ Yóho fin da caha chúun cuénta mí i, mé dá nacaxi i.

Quihvi ndivaha ini i da ta cájii íni i xihin ña caha da.

Ta jáchutu ndaa i ínima dá xihin ínima yii mí i,

ña ná jánaha da nuú ñayivi ndúu ñuyiví ndá quiahva caha víi i saha ná.

¹⁹ Ta ni a cahan cuachi toho da ta ni a cáyuhú cóhó da,

já queá a cúní joho ñayivi xíca cállé nu cahan da.

²⁰ Tá quiahva a jácuachi toho da ndoo, dó sa natahnu,

quiahva já a jácuachi toho da ñayivi, na cávitá ini.

Ta quiahva já ni a ndáhvá toho da tití ñúhu loho, ña sa cúní ndahva janda quiahva ná quee vaha ña ndaa xihin ña ihvi.

²¹ Ta ndaja táhan ñayivi ndúu níi cúu ñuyiví tandaa candeé ini na mé dá, nacahyí Isaías sanahá.

**Jácojo na cuachi jatá Jesús ña caha
chúun a xihin ndée tiñahá sacuahá**
(Mr. 3:20-30; Lc. 11:14-23; 12:10)

²² Java ñayivi ñehe na in da cuáa ta cúu dá da níhi jáchí ndacaan rí quini ini da. Ta tá nandaja vaha Jesús da já nasandehé da ta nandicahan da. ²³ Tá naxini ñayivi ndúu cán ña yóho já nacatontó ndivaha na já nacasáhá ndaca tuhún táhan na já cáchí na já:

—Á a juú da yóho cúu da naquixi chichi rey David —cáchí xihin táhan na.

²⁴Tá naxini joho na fariseo na cahan ñayivi cán já nacasáhá cáchí mé na fariseo cán já:

—Taa yóho cúu tává da rí quini ñúhu ini ñayivi jáchí mé Beelzebú, rí cúu tiñáhá sacuaḥa nu rí quini cán sáhan rí ndée rí nu dá cája da ña —ñacachi na.

²⁵Ta sa xini va Jesús na cáhvi ini na cán sahá ña cán queá ñacachi a já xihín ná:

—Tá sáhdá java táhan ñayivi ndúu in nación ta ndúu na cuahá táhdá já cásáhá cáni táhan ndaja táhan mé va na já cama chá ndihi sahá nu ndúu na cán. Ta quiahva já yaha ri xihín in ñuu á in vehe tá sáhdá java táhan ndaja táhan mé ná já queá jándihi na saḥa ná. ²⁶Ta quiahva já yaha xihín Satanás, rí cúu tiñáhá sacuaḥa. Ta tá ná tavá rí inga rí quini ini ñayivi á tá ná cani táhan ndaja táhan mé rí já queá ndihi saḥa ndée ña cómi rí. ²⁷Mé ndó cáchí ndo ña tává i rí quini ini ñayivi xihín ndée Beelzebú, rí cúu tiñáhá sacuaḥa. Joo tá mé a ndaa cúu ndusa ña cáchí ndo sahá i jan, ndáchí quehe na cúu cuéntá mé ndó jan ndée tavá na rí quini ini ñayivi. Ama ná cachi ndó ña tává ndo rí quini xihín ndée tiñáhá sacuaḥa. Na yóho náha ña co cáhvi ndaa ini ndó. ²⁸Candehé ndo. Yehe tává i ínimá quini ini ñayivi xihín ndée ínimá yíi Ndióxi. Ta xihín na yóho náha cáxi a ña sa naxinu coo quivi camomí Ndióxi cuéntá saḥa ndó.

²⁹Candehé ndo. Sácú u in quiahva nu ndo. Ni in daṭaa a cúu ndihvi da caja cuíhna da ñaha vehe in da ndacú joo tá ná cató da da ndacú cán já cuu quehe da ñaha da cán.

³⁰Ndá na coo cuahan xoo i, cúu ná na coo cúní yehe. Jáchí ndá na coo chindeé yehe xihín na cája i, cúu ná na sáji nuu nuú i.

³¹Na cán queá cáchí i xihín ndo ña caja cáhnu ini Ndióxi saḥa tá nuú cuachi cája ñayivi xihín saḥa tá nuú tuhun

quini cahan na. Joo tá ná cahan núu na saḥa ínimá yíi Ndióxi já queá a cája cáhnu toho ini Ndióxi saḥa ña nacaja na.

³²Caja cáhnu ini Ndióxi janda saḥa ndá na ná canahá xihín yehe, da nachindahá Ndióxi nduu ñayivi joo tá ná canahá na xihín ínimá yíi Ndióxi já queá a cája cáhnu toho ini Ndióxi saḥa ná ni nani tácu na ndúu na ñuyívi yóho ta ni tá cuhun na cavií saḥa ná nu Ndióxi.

Xihín cuíhi cúun nuú in yito cuu ndicuní ndá yito cúu dó

(Lc. 6:43-45)

³³Xini ñúhú jándee ndó yitó vaha ña ná cuun cuíhi vaha nu do. Jáchí tá ná jándee ndó yitó núu já queá cuíhi núu cuun nu do. Jáchí xihín cuíhi cúun nuú in yito cuu ndicuní ndá yito cúu dó.

³⁴Mé ndó cúu ndó tátuhun coo jáchí cúu ndó na quini sahá ña cán queá cahan ndó tuhun quini ta a cuú cana tuhun vaha yúhu ndo. Jáchí yúhu ñayivi cána tóco ndihi ña nandicutú ñúhu ínimá ná. ³⁵In taa vaha cahan da ndinuhu ña vaha jáchí ndinuhu ña vaha ñúhu ínimá dá. Ta in taa quini cahan da ndinuhu ña núu jáchí ña núu queá ndacaan ínimá dá. ³⁶Mé a ndaa ná cahan i xihín ndo ña tá ná ndindaa quivi caja víi Ndióxi saḥa ñayivi ndúu ñuyívi anda javí ndiquiahva ñayivi cuéntá nu Ndióxi saḥa ndaja táhan tuhun núu nacahan na ñuyívi yóho. ³⁷Jáchí saḥa mé tuhun nacahan ndó jan caja víi Ndióxi saḥa ndo. Ta xihín na jan cachi Ndióxi ña á in cuachi ndó á coo cuachi ndó —cáchi Jesús.

Xica ñayivi quini na ná caja Jesús na xituhún nu ná

(Mr. 8:12; Lc. 11:29-32)

³⁸Java na fariseo xihín na janaḥa ley Moisés nacahan na xihín Jesús já nacachi na já xihín á:

—Maestro, cúnĭ nde ña ná caja ndó in ñaha xitúhún nuú nde já ná cuni nde — ñacachi na xihín Jesús.

³⁹ Já nanducú ñehe Jesús tũhun nuú na cán já ñacachi a já xihín ná:

—Ñayivi quini, na cõ cúnĭ cándusa Ndióxi, na yóho cúú na cúnĭ cuni ña xitúhún. Joo a cúnĭ toho na ña. Ña cuni ndusa na queá ña ndoho ĩ tá quiahva nandoho Jonás, da nasacuu profeta sanahá. ⁴⁰ Jáchĭ tá quiahva nasandacaan Jonás unĭ quivĭ xihín unĭ ñuú tixi tiyacá cáhnu tá ñacocó rí da quiahva já ndacaan ri yehe, da ñachindahá Ndióxi nduu ñayivi tixi ñundáhyi unĭ quivĭ xihín unĭ ñuú. ⁴¹ Ta ñayivi nasanduu Nínive sanahá cán ndacuĭta na chicaan na cuachi jata ndó tá ná xinu quivĭ caja víi Ndióxi sahá cuachi ñayivi ndúu viti. Jáchĭ mé na nasanduu ñuu Nínive cán najánda-coo na cuachi cája na tá ñacahan Jonás xihín ná ña ñacachi Ndióxi coo. Ta yehe ĩn chága sahá ĩ a juú ga Jonás joo cõ cándusa ndó yehe. ⁴² Jári tá ná xinu quivĭ caja víi Ndióxi sahá cuachi ñayivi ndúu tiempo viti anda já ndacuĭta in ña nasacomí cuéntá sahá ñayivi ndúu chí xoo sur sanahá ta chicaan ña cuachi jata ñayivi ndúu tiempo viti. Jáchĭ mé ña cán vatĭ nasahĭin xícá ndivaha ña nu rey Salomón sanahá nasahan ña cuni johó ña tũhun ndíchĭ cáhan da. Ta yehe ĩn chága sahá ĩ a juú ga Salomón joo cõ cándusa ndó yehe.

**Jánaha Jesús ña cuahá tañu
ndicó cõo tucu ínimã quini
ini ñayivi vatĭ sa ñaquee rí**

(Lc. 11:24-26)

⁴³ Tá queá in ínimã quini ini in dataa já quee rí cuahan rí xica nuu rí ndijáá yucú íchĭ ndinducú rí nuú candõo rí. Ta tá cõ ndĩnehe rí ña já casáhá cáhvi ini rí já: ⁴⁴ “Coho ndicó cõo tucú ini da nuú nasandacaan í cán jáchĭ cúú á tátũhun vehé”, cáhán rĭ. Ta tá xinu cõo rí ini da

cán já sándehe rĭ ña ĩn víi va ini da cán tá quiahva víi ini vehe tá ñatĩhvi á ta nandaca ndójó vaha tóco ndihi ñaha ini a. ⁴⁵ Anda já quee tucu mé rí quini cán cuahan rí quehe rí usa ga rí quini chága a juú ga mé rí já xinu ndihi rí ndĩhvi rí ini dataa cán. Ta mé da cán ndiquini chága da a juú ga tá nasandacaan in tálaá rí ini da. Quiahva já ndoho rĭ ñayivi quini ndúu tiempo viti —cáchi Jesús.

**Nána Jesús xihín ñani
a cúnĭ na cuni na a**

(Mr. 3:31-35; Lc. 8:19-21)

⁴⁶ Nani cáhan yĭi va Jesús xihín ñayivi já ñaxinu cõo náná Jesús xihín ñani a ña ná cahan na xihín á cúnĭ na. Joo ñacandõo na ndíta na jata vehe. ⁴⁷ Já nasahan in na cáxi tũhun na nuú Jesús já cáchi na já xihín á:

—Jata vehe cá ĩn nánún xihín ñanún ta cahan na xũhun cúnĭ na —ñacachi na xihín Jesús.

⁴⁸ Joo nanducú ñehe Jesús tũhun nuú na cán já ñacachi a já xihín ná:

—Cáhan ĩ xihín ndó ndá na cúú ndusa náná ĩ xihín ñani ĩ —ñacachi Jesús xihín ná.

⁴⁹ Anda já ñanaha ndaha mé á na xica tuun xihín á cán já ñacachi a já:

—Na yóho cúú ná tátũhun náná ĩ xihín ñani ĩ. ⁵⁰ Jáchĭ ndá na cája ña cúnĭ Ndióxi, tátá ĩ, mé a ĩn indivĭ, na cán cúú ná tátũhun ñani ĩ xihín quiahva ĩ xihín náná ĩ —ñacachi Jesús xihín na cán.

**Sácú Jesús quiahva
sahá in da sátá tata**

(Mr. 4:1-9; Lc. 8:4-8)

13 Sa mé quivĭ já ñaqueta Jesús vehe cán já nasahan nasacõo a yati yuhú tañuhú cán. ² Ta sahá ña ñataca cuahá ndivaha ñayivi nu á sahá ña cán queá nandaa mé á jata in barco loho ta nasacõo a jata dõo cán nani ndúu ñayivi ñutĭ yuhú tañuhú cán. ³ Anda já

naçasáhá jánaha cuahá ñaha nu ná ta nasacu a quiahva nu ná já nacachi a já xihín ná:

—In da sátá tata naquee da cuahan da cata da ña. ⁴Ta tá sátá da ña cuahan da já nacuyu java ña íchi ta cán naxinu laa ta nasaxí rí ña. ⁵Ta java ña nacuyu a tañu yuu nuú coo cuaha núhu. Ta cama chá nanduta mé tata jáchi coo cúná núhu nuú nacuyu a. ⁶Joo tá naqueta candii já najáhihi ñahá sahá ña coo cuaha yóho a chí nandihí sahá. ⁷Ta java tata nacuyu tañu tohíñú ta tá nasahnu tohíñú cán já nanditáha ndihí a nacaja tohíñú. ⁸Ta java tata nacuyu a nu ñuhú vaha ta já nasahan cuahá ñaha ña jáquee na nu á. Java ña nasahan in ciento a nuú in in tata ta java ña nasahan uni jícó uxu a ta java ña nasahan oco uxu a nuú in in tata. ⁹Ña íin joho, ná cuni joho na —nacachi Jesús.

Ndicani Jesús ndá saha queá nasacu a quiahva nu ná

(Mr. 4:10-12; Lc. 8:9-10)

¹⁰Ña xíca tuun xihín Jesús cán nacayati na nu á já naçasáhá ndaca tuhún na mé á ndá cuéntá queá jánaha mé á xihín quiahva cuití va nuú ñayivi. ¹¹Anda já nacachi Jesús já xihín ná:

—Ña coo nacandaa ini ndó jihna ña cán cándaa ini ndó viti jáchi nasuná Ndióxi xíní túní ndo cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúu na sácú u quiahva nuu. ¹²Jáchi ndá na sa íin ñaha nuu, ñehe táhvi na coo chága ñaha nu ná. Joo na co á ñaha nuu, jandá ña chá íin nu ná ndindaa. ¹³Sahá ña cán queá cáhan i xihín ndinuhu quiahva xihín mé ndó jáchi vatí sándehe na joo cúu ná tátuhun na co tívi nuu. Ta vatí xíní joho na joo cúu ná tátuhun na jóho jáchi co cándaa ini na ña cáhan i xihín ná. ¹⁴Ta xihín ña yóho xínu

coo nuú tuhun nacachi profeta Isaías sa-nahá ndivaha tá nacachi da já:

Vatí xíní joho na joo cúu ná tátuhun na jóho jáchi co cándaa ini na ña cáhan i xihín ná.

Ta vatí sándehe na joo cúu ná tátuhun na co tívi nuu.

¹⁵Jáchi nandaji xíní túní tóco ndihí ñayivi ñuu yóho.

Ta ndájí tuun joho na ta ndájí tuun nduchú núu na.

Ña cán queá a cuú cuni joho na, ta ni a cuú candehé na,

ta ni a cuú cándaa ini na ña xíní joho na. Ta xihín ña yóho co ndícó coo na nuú i

ñá ná ndaja vaha i na, nacahyí Isaías sanahá.

¹⁶Joo tahví nacuu ndó jáchi cándaa ini ndó ña sándehe ndó xihín ña xíní joho ndó. ¹⁷Mé a ndaa ná cáhan i xihín ndo ña cuahá ndivaha na profeta xihín cuahá ndivaha ñayivi vaha naxica ini na cuni na ña xíní ndó yóho viti joo coo naxini na ña ta naxica ini na cuni joho na ña xíní joho ndó yóho joo coo naxini joho na ña.

Ndicani Jesús ña cúní cachi quiahva nasacu a nu ná

(Mr. 4:13-20; Lc. 8:11-15)

¹⁸Cuni joho ndó ña cúní cachi quiahva nasacu u sahá da sátá tata cán. ¹⁹Ñayivi, na xíní joho tuhun vaha sahá ña sa nacayati quiví cacomí Ndióxi cuéntá sahá ñayivi joo co cándaa ini na ña, na cán cúu ná tátuhun tata ña nacuyu íchi cán. Jáchi xínu tiñahá sacuaha ta tává rí tuhun Ndióxi cán ínima ná. ²⁰Ta tata ña nacuyu tañu yuu cán náha ndá quiahva íin ñayivi, na cájii ndivaha ini ndíquehe tuhun Ndióxi. ²¹Joo sahá ña co ñehe íní yóho a cuhun cúná a sahá ña cán queá chá tiempo cuití va cándúsa na tuhun Ndióxi. Jáchi tá cásahá ndóho ini na sahá tuhun Ndióxi chí jándacoo va na ña. ²²Ta tata ña nacuyu tañu to-

hínú cán náha ndá quiahva íin ñayivi, na xini joho tuhun Ndióxi joo co jándacoo na íchi naxica na jihna. Ta casáhá ndícani ini na sahá ñaha ñuyiví yóho ta casáhá na cátoó na canduu cuahá ñaha cuicá nu ná ta casáhá ndícaji ini na caja na ña núu. Sahá ña cán queá cúú á tá-tuhun tata ña co cána ñaha jáquee na nuu jáchi cóo ñasahnu na xihín tuhun Ndióxi.²³ Joo tata ña ñacuyu nuú ñuhú vaha cán náha ndá quiahva íin ñayivi, na xini joho tuhun Ndióxi ta cándaá ini na ña ta cája na ña cájii ini Ndióxi xihín. Java na cúú ná tátuhun yucu trigo ña ñasahan in ciento a nuú in in tata. Ta java na cúú ná tátuhun tata ña ñasahan uní jico uxu a nuú in in tata. Ta java na cúú ná tátuhun tata ña ñasahan oco uxu a nuú in in a —ñacachi Jesús xihín ná.

Sácú Jesús quiahva sahá yucu quini nána tañu trigo

²⁴ Andá já ñasacu Jesús inga quiahva nuú ñayivi ndúu cán já ñacachi a já xihín ná:

—Tá ná casáhá cacomí Ndióxi cuéntá sahá ñayivi já cacuu a tátuhun tá ñaxutu in dataa trigo ña vaha nu ñúhu dá.

²⁵ Joo tá sa ndúu ndihi na quíji na já ñaxinu coo in da co cúní táhan xihín dá ta ñachihin da tata yucu quini tañu trigo cán já ñaquee da cuahan da.²⁶ Ta tá ñasahnu trigo cán ta ñacasáhá cána yóco a já ñanduta ri yucu quini cán.²⁷ Andá já ñasahan na cája chúun cán cáhan na xihín xitoho na já ñacachi na já: “Candehé ndo. Tata vaha queá ñachihin ndó nu ñúhu ndo joo co cándaá ini nde ndáchí ñaquixi yucu quini ñanana xihín á yóho”, ñacachi na cán xihín xitoho na.²⁸ Andá já ñanducú ñehe da cán tuhun nu ná já ñacachi da já xihín ná: “Ndá da co cúní yehe, da cán cúú da ñacaja ña yóho”, ñacachi da. Andá já ñacachi na cája chúun nu dá cán já xihín dá: “Á co cúní ndó ña ná quíhvi nde tuhun

ndihi nde yucu quini cáa tañu trigo”, ñacachi na xihín dá.²⁹ Andá já ñacachi da já xihín ná: “Ná coo mé á jáchi tiaha náá nani tuhun ndó yucu quini jan cuu tuhun ndó yucu trigo xihín á.³⁰ Vaha chá ná quiahva í ñamaní cuahnu a xihín trigo janda quiahva ná ndindaa tiempo jáquee trigo. Ta tá sa jáquee já cahnda i chuun nuú na jáquee ña ná tavá xóo na yucu quini jihna ñúhu ta ná cató na ña tá nuhni tá nuhni ña ná chican ñúhu ná ña. Ta anda jáví ná játaca na trigo taán vaha na ini yáca ñaha í”, ñacachi da —cáchi Jesús sácú a quiahva nu ná.

Sácú Jesús inga quiahva sahá ndíqui mostaza

(Mr. 4:30-32; Lc. 13:18-19)

³¹ Ta ñasacu Jesús inga quiahva nu ná já ñacachi a já xihín ná:

—Tá ná xinu coo quiví cacomí Ndióxi cuéntá sahá ñayivi já cúú á tátuhun in ndíqui mostaza ña chíhin in dataa nu ñúhu da.³² Cúú á ndíqui loho chága nu tóco ndihi ndíqui válí íin ñuyiví. Joo sáhnua a janda quiahva ndúu a in yíto, dó cáhnua nu ndíhi yíto nu xinu coo laa cávaha rí choho ri nu ndáha do —cáchi Jesús.

Sácú Jesús quiahva sahá yusá ñaxaa

(Lc. 13:20-21)

³³ Ta ñasacu Jesús inga quiahva nu ná já ñacachi a já xihín ná:

—Tá ná cacomí Ndióxi cuéntá sahá ñayivi já cacuu a tátuhun tá cává táhan in ñáñaha uní táhnda náhnua harina xihín loho yusá ñaxaa ña ná jáñañu a tóco ndihi mé yusa cán —ñacachi Jesús.

Sácú Jesús quiahva cuití va nuú ñayivi

(Mr. 4:33-34)

³⁴ Xihín ndinuhu quiahva cuití ñajáñaha Jesús tóco ndihi ña yóho nuú ñayivi.³⁵ Já ñacaja Jesús ña ná xinu coo

nuú ña ñacachi in ña profeta sanahá tá ñacachi da já:

Xihín ndinuhu quiahva cuití va cahán i xihín ñayivi,

ta cahán i sahá ñaha nasahiin jehé nu ná janda mé saha tá camaní cava sahá sahá ñuyíví —cáchi tuhun Ndióxi.

Ndicani Jesús ña cúní cachi quiahva nasacu a sahá yucu quini nanana tañu trigo cán

³⁶ Tá nandihí nandindayí Jesús ñayivi cuaha ndúu cán já ñaquihvi a ini vehe. Andá já ñacativi ña xíca tuun xihín a cán nu á já ñacachi na já xihín á:

—Ná ndicani ndó nuú nde ndíá cúní cachi quiahva nasacu ndó sahá yucu quini nanana tañu trigo cán —ñacachi na.

³⁷ Andá já ñacachi Jesús já xihín ná:

—Da xútu tata vaha cúu yehe, ña ñachindahá Ndióxi nduu ñayivi. ³⁸ Ta ñúhu nu xútu u tata cúu á ñayivi ñuyíví. Ta tata vaha cán cúu á yuhú nuú ña cómí Ndióxi cuéntá saha. Ta yucu quini cán cúu á yuhú nuú ñayivi quini, ña cúu cuéntá rí quini. ³⁹ Ta ña cō cúní táhan xihín i nasahan ña ñaxutu da yucu quini nu ñúhu cán ta cúu dá yuhú nuú tiñáha sacuahá. Ta tiempo jáquee ña cán cúu á tá ná xinu cōo quíví caja víí Ndióxi sahá ñayivi ndúu ñuyíví. Ta ña xíca jáquee cán cúu ná tátō Ndióxi. ⁴⁰ Ta tá quiahva ñacaja ña cán xihín yucu quini tá najátaca na ña ta ñachicaan ñúhu ña ña quiahva já yaha ri xihín ñayivi ñuyíví yóho tá ná tandaa quíví ndihí sahá ñuyíví. ⁴¹ Ta yehe, ña ñachindahá Ndióxi nduu ñayivi chindahá i tátō mí i ña ná cahnda java táhan na ña cómí i cuéntá saha xihín ña cōo cúu cuéntá mí i. Jáchí ña cán jácahan ña inga na caja na cuachi xihín java ga ña cája ña núu. ⁴² Ta jáqueta nuu i ña ini indayá ta cán cuacu na andá quiahva chicáhná nuhu na jáchí

ndóho ndivaha ini na. ⁴³ Ta andá já ña cája ña cúní Ndióxi ndiyihvi ndaa na tá quiahva yehe candii nuú cacomí Ndióxi cuéntá saha ná, mé á cúu á tátá ña. Ndá ña ñin joho, ná cuni joho na.

Sácú Jesús quiahva sahá sató jjuhún ndacaan jehé

⁴⁴ Tá ná cacomí Ndióxi cuéntá saha ñayivi cacuu a tátuhun ña yáha xihín in ñataa tá ndínehe dá in sató jjuhún ña ndacaan jehé in ñundáhyi. Ta tá nandihí já chíjahvi tucu da ña xihín ñúhu. Ta já cávatá ndivaha da cuhun ña jícó ña tóco ndihí ña cómí ña ña ná cueen da ñundáhyi nuú ñanduxu mé sató jjuhún cán.

Sácú Jesús quiahva sahá in jíqui sándacu na ña yahvi ndivaha

⁴⁵ Tá ná cacomí Ndióxi cuéntá saha ñayivi cacuu a tátuhun tá xíca nuu in ña cája ñahvi ndúcú ña jíqui sándacu na ña yahvi ndivaha. ⁴⁶ Ta tá ndítahan da in jíqui yahvi ndivaha já cuahan ña jícó ña ndihí ñaha cómí ña ña ná cueen da jíqui yahvi ndivaha cán.

Sácú Jesús quiahva sahá in ñunu tává tiyacá

⁴⁷ Ta tá ná cacomí Ndióxi cuéntá saha ñayivi cacuu a tátuhun in ñunu jácana na nuú tañuhú ta já tñin na tá nuú tiyacá. ⁴⁸ Ta tá sa ñachutú ñunu cán já tává ña tiyacá cán yuhú tañuhú ta cán sácco na ndacahnda java na ri. Ta rí vaha cán táan vaha na ini toyicá ña joo rí núu cán xíta ri cája na. ⁴⁹ Quiahva já yaha ri xihín ñayivi tá ná ndihí sahá ñuyíví. Jáchí queta tátō Ndióxi ndacahnda java ña vaha tañu ña quini. ⁵⁰ Ta ñayivi quini cán chicaan ña ini indayá ta cán cuacu na janda quiahva chicáhná nuhu ña jáchí ndóho ndivaha ini na —cáchi Jesús.

**Tá jánahá Jesús sahá
ña saá xihín ña yatá**

⁵¹ Tá nandihí já nandaca tühún Jesús na já nacachi a já:

—Á cándaá ini ndó tóco ndihí ña cáhan i yóho —cáchi a.

—Ajan, cándaá ini nde ña —nacachi na cán xihín á.

⁵² Anda já nacachi Jesús já xihín ná:

—Tá jácuaha in da jánahá ley Moisés sahá ndaja ndiquiahva da mé dá ndáha Ndióxi cacomí a cuénta saha dá já cúu dá tátuhun in dataa, da íin ñaha ini vehe. Ta xini vaha da tavá da ñaha da á cúu á ña saá á ña yatá —cáchi a.

Tá cuahan Jesús ñuu Nazaret

(Mr. 6:1-6; Lc. 4:16-30)

⁵³ Tá nandihí najánahá Jesús xihín quiahva yóho já naquee a cuanúhu a.

⁵⁴ Tá naxinu a ñuu mé á já nacasáhá jánahá ini veñuhu cán. Ta jandá johó cátontó ñayivi ñuu cán já cáchi na já:

—Ta ndájá nacatiáhvahá ri da yóho ña xini da. Ta ndaja cája da ñaha xitühún yóho. ⁵⁵ Á a juú da yóho cúu jahyi da cája chúun xihín yíto. Á a juú náná da yóho cúu María. Ta ñani da cúu Jacobo xihín José xihín Simón xihín Judas viti. ⁵⁶ Ta sa mé ñuu yóho ndúu ri quiahva da jan. Ndájá nacatiáhvahá ñahá da ña jánahá da nu yo, dá já —nacachi xihín táhan na cán.

⁵⁷ Ta chí coó naxeen na candúsa ñahá na. Sahá ña cán queá nacachi a já xihín ná:

—Vatí tóco ndihí ñayivi cája cáhnu na in profeta joo na vehe da xihín na ñuu da co cándúsa na da —cáchi Jesús.

⁵⁸ Ta coó nacaja cuahá Jesús ña xitühún ñuu cán jáchi coó nacandúsa toho ñayivi cán mé á.

**Tá naxihí Juan, da
nacaja ndúta ñayivi**

(Mr. 6:14-29; Lc. 9:7-9)

14 Mé tiempo cán naxini johó Herodes, da cúu gobernador cán ña ndítuhún na sahá Jesús. ² Anda já nacachi da já xihín mozo da:

—Á a juú Jesús cúu á Juan, da najá-candúta ñayivi ta viti nanditacu tucu da. Sahá ña cán queá íin ndée da cája da tóco ndihí ña cája da yóho —cáchi Herodes.

³ Jáchi janda mé saha natiin Herodes Juan nacató ñahá da ta nacahacaan da da vecaa. Ta nacaja da ña yóho sahá Herodías, ña nasacuu ñájíhí Felipe, ñani da. ⁴ Jáchi mé Juan najánani ñahá da sahá ña íin Herodes xihín ña ta já nacachi da:

—Co ndítahan coún xihín ñájíhí ñanún —nacachi Juan xihín dá.

⁵ Ta janda já nanducú Herodes cahní da Juan joo a cúu caja da ña jáchi yíhví da ñayivi sahá ña cándúsa na ña cúu Juan in profeta nachindahá Ndióxi.

⁶ Joo in tañu nani ndácaan Juan vecaa já nacavaha Herodes víco sahá quivi nacacu da. Ta nandaca ndíchí ña cúu jahyi Herodías cán naxita sahá ña nu ndíhi na ndúu víco cán. Ta a juú quiahva nacajii ini Herodes xihín ña yóho. ⁷ Sahá ña cán queá quivi Ndióxi táv da tá sahan da tühun da nu ña cán ña quiahva da nu ña ndá ña cúni mé ña caça ña nu dá. ⁸ Tá nandihí nandaca tühún jihna ña náná ña já ndáva ña nasahan ña nu Herodes já cáchi ña já xihín dá:

—Viti ñúhú cúni ña ná quiahva ndó yiquí jini Juan, da jácandúta ñayivi nuú i ini in cohó cáhnu —nacachi ña xihín dá.

⁹ Tá nacachi ña já xihín Herodes já nacacuéha ndivaha ini da. Joo sahá ña sa natavá da quivi Ndióxi tá nasahan da tühun dá nu ña cán ta sahá ña cúni da candoo vaha da nuú na ndúu víco xihín

da cán sahá ña cán queá ñasahnda da chuun ña ná quiahva na ña nu ná. ¹⁰Chí ñasahnda da chuun ña ná chitúhun ná yiquí jíní Juan ini veca cán. ¹¹Ta já nachicaan na yiquí jíní da ini in cohó cáhnu já ñasahan na ña nu ná cán. Anda já ñandiquiahva ña cán ña ndáha náná ña.

¹²Anda jáví ñaxinu na ñaxica xihín Juan cán já ñasahan na ñandiquehe na yiquí cuñu da ta ñajánduxu na da. Ta já ñasahan na ñacaxi tuhun na ña yóho nuú Jesús.

Tá ñasahan Jesús ña cuxu uhun mil taa

(Mr. 6:30-44; Lc. 9:10-17; Jn. 6:1-14)

¹³Tá ñaxini johó Jesús saha Juan já ñaquee xóo a ini in barco loho cuahan nuú co ndúu ñayivi. Joo tá ñaxini johó ñayivi ña cuahan Jesús já ñaquee na ñuu na ndíco na cuahan sáhá na nu íin a. ¹⁴Ta tá ñanuu Jesús barco cán já ñaxini a cuahá ndivaha ñayivi ta natahvi ini a saha ná. Ta chí ñandaja vaha mé á na quíhvi ñaquixi tañu na cán. ¹⁵Ta tá sa cáhini cuahan já ñacayati na xica tuun xihín a cán nu á. Já cáhí na já xihín á:

—Sa nahini va ta a juú xoo nu ndúu ñayivi queá yóho. Ndindayí ndó ñayivi ná cuhun na ñuu válí yati jan já ná cueen na ña cuxu na —ñacachi na cán xihín á.

¹⁶Anda já ñacachi a já xihín ná:

—Co xíní ñúhú toho quee na cuhun na. Mé ndó quiahva ndó ná cuxu na —ñacachi Jesús.

¹⁷Anda já ñacachi tucu na cán já xihín á:

—Co mé ñaha va cuxu na yóho. Uhun víxí pan xihín ivi laá tiyacá cuití va íin yóho —ñacachi na xihín Jesús.

¹⁸—Taxi ndó a chóho —ñacachi Jesús xihín ná.

¹⁹Anda já ñasahnda Jesús chuun ña ná ndaca nduu ndihi na cán nuú yucu. Anda já natiin a ndíhuhun pan xihín

ndíví tiyacá cán já ñasandehé a chí indiví já ñandiquiahva ndixahvi nu Ndióxi. Tá ñandihí já ñasahnda java pan ta ñasahan ña nuú na xica tuun xihín á cán ta na cán ñandicahnda na ña nuú ñayivi cuaha cán. ²⁰Ta tóco ndihi na ñaxixi na janda quiahva nachutú na. Ta tá ñandihí ñaxixi na já najátaca na ña ñacandoo cán ta najácutú na uxu ivi toyicá xihín ña ñacandoo cán. ²¹Ta tóco ndihi na ñaxixi cán ñasacuu na tátuhun uhun mil taa. Co cáhan sahá najihí xihín na valí.

Tá ñaxica sáhá Jesús nuú tañuhú

(Mr. 6:45-52; Jn. 6:16-21)

²²Ta tá ñandihí já ñacaja Jesús ña ná ndihvi na xica tuun xihín á cán ini in barco ña ná cuhun cuéé na inga xoo tañuhú cán nani candoo tóo mé á jándindayí a ñayivi cuaha cán. ²³Ta tá sa ñajánduta tóco ndihi ñayivi já ñandaa mé á yúcu cuahan caca tahví a nu Ndióxi. Tá ñandihí já ñacuaá ta in túhun mé á ndácaan xica tahví a nu Ndióxi cán. ²⁴Ta ndaja coo barco loho, dó cándojo na xica tuun xihín á cán sa ñaxinu coo dó janda mahnú tañuhú cuahan do. Ta ndícojo ndivaha tañuhú jáchi xoo cuahan na vaxi tachi. ²⁵Joo tátuhun sa cuahan tívi já xica sáhá Jesús cuahan nuú tañuhú ñaxinu a nu ná. ²⁶Ta tá ñaxini na xica sáhá Jesús vaxi a nuú tañuhú cán já ñacatónto na. Ta ñacasáhá na cáyuhú cóho na sahá ña yíhvi na já cáhí na já:

—Ínima queá vaxi yóho —cáhí na.

²⁷Joo ivi laá ñandicahan Jesús xihín ná já cáhí a já:

—Ndacú coo ini ndó jáchi yehe va cúu u. A yíhvi toho ndó —ñacachi a xihín ná.

²⁸Anda já ñacachi Pedro já xihín Jesús:

—Xitoho i, tá ta jivi cúu mé ndó cahnda ndó chuun ña ná cuu saa i nu ndo ta ná caca i nuú tañuhú —ñacachi da xihín Jesús.

²⁹Ta já cáhí Jesús já:

—Naha quíi —cáchi a xihín dá.

Anda já nanuu Pedro barco cán ta nacasáhá xíca sáhá da nuú tañuhú cuahan da nuú Jesús. ³⁰Joo tá naxini da tachi ndeé xícó nuú tañuhú cán já nayihví da. Chí ivi laá nacasáhá quéta nuu da cuahan da ini tañuhú. Já nacayuhú cóhó da já cáchi da já xihín Jesús:

—Chindeé ndó yehe, xitoho i — nacachi da xihín á.

³¹Ta cama chá natiin Jesús ndáha da ta já nacachi a já xihín dá:

—Ndá cuéntá queá co cándee chága inún yehe ta nacasáhá cáhvi ivi johó inún —nacachi Jesús xihín dá.

³²Ta tá nandaa ndívi na jata barco já nacatáji tachi cán. ³³Anda já nacaja cáhnu na níhu ini barco cán Jesús já cáchi na já xihín á:

—Mé a ndaa táhyí cúu jivi ndusa ndó in túhún jiní já jahyi Ndióxi —nacachi na xihín á.

Tá nandaja vaha Jesús na quíhvi ndúu ñundáhyi Genesaret

(Mr. 6:53-56)

³⁴Ta já naxica loho ga na nuú tañuhú cán já naxinu coo na ñundáhyi Genesaret. ³⁵Ta tá nandicuni ñayivi ndúu cán mé á já nachindahá na chuun nasahan nuú ndaja táhan ñayivi ndúu ndijáá ñundáhyi cán. Já ñéhe ndihi na na quíhvi nacasaá na nu á. ³⁶Ta na quíhvi cán naxica tahví na nu á ña ná quíahva ñamaní cani ndaa ndáha ná yuhú jahmá níhnu a ta tóco ndihi na nacani ndaa ndáha jahmá a nandivaha na.

Ña cája quini ínimá ñayivi

(Mr. 7:1-23)

15 Ndaja coo java na fariseo xihín java na jánaha ley Moisés ndúu ñuu Jerusalén cán nacayati na nuú Jesús já nacasáhá cáchi na já xihín á:

²—Ndávaha co cája na xíca tuun xuhun ña nacachi tásáhnu jíco yo caja

na. Ndávaha xíxi na tá cámani ndahá na tá quíahva sáhdá ley caja na —nacachi na cán xihín Jesús.

³Anda já nanducú ñehe Jesús tuhun nu ná já nacachi a já:

—Ta jári ndóhó va, ndá cuéntá queá jándacoo ndó ña sáhdá Ndióxi nu ndó caja ndó. Ta ña cája ndó queá ndíco ndó costumbre mé va ndó. ⁴Jáchí sáhdá Ndióxi chuun já cáchi a já: “Caja cáh-nún tátún xihín nánún.” Ta jári cáchi a: “Ndá na ná chícaan cháhan jata tátá na á náná na, ndítahan quivi na”, cáchi a.

⁵Joo ndóhó, jánaha ndó nuú ñayivi ña cuu cahan na já xihín tátá na á náná na: “A cuú chindeé e ndohó jáchi sa nasacu xoo i ñaha i quíahva i ña nu Ndióxi”, cáchi na. ⁶Tá ná cachi na ña yóho já queá co ndúsa ga chindeé na tátá náná na. Quíahva johó cája ndó ta sácu xóo ndó ña nasahnda Ndióxi chuun nu ndó ta ndája ndó a tátuhun in ñaha ña coo sáha. Jáchi ndíco cáhnu ndó ña najándacoo tásáhnu jíco ndó nu ndó. ⁷Co cúu ndó tá quíahva ndáa ndó. Mé a ndaa nacahan profeta Isaías sáha ndó sanahá tá nacahyí da ña nacachi Ndióxi:

⁸Yuhú ninu uun na cája cáhnu na yehe. Ta co cája cáhnu na yehe xihín ndinuhu ínimá na.

⁹Ta mé a uun queá cája cáhnu na yehe, jáchi ña jánaha na nuú ñayivi cuití va cúu á ña quíxi jiní mé va na, nacachi profeta Isaías sanahá ndivaha —nacachi Jesús xihín na cán.

¹⁰Tá nandihí já nacana Jesús tóco ndihi ñayivi ndúu cán já nacachi a já xihín ná:

—Cuni johó vaha ndó ña cáhan i xihín ndó ta ná candaa ini ndó ña. ¹¹A juú ñaha xíxi ñayivi ndája quini ínimá ná. Tuhun quini quéta yúhu ná ña jan queá cája quini ñahá —nacachi Jesús.

¹²Tá nandihí já nacayati na xíca tuun xihín Jesús cán nu á já nacachi na já xihín á:

—Chí a váha mé ñacuu ini na fariseo tá ñaxini joho na ña ñacachi ndó jan — ñacachi na cán.

¹³ Andá já ñacachi Jesús já xihín ná:

—Ñayivi, na co ndíquehe váha tuhun Ndióxi cúu ná tátuhun in yíto, dó coó ñajándee Ndióxi, tátá i ña íin indiví. Sahá ña co cúu dó cuéntá mé á já tанда ña quívi ña tuhun mé á do anda yóho do. ¹⁴ Sahá ña cán queá co ndítahan ndicani ini ndó sahá na jan jáchi na cuaá va cúu ná. Ta a cúu toho caja in da cuaá candaca da inga da cuaá cuhun da jáchi ndívi já da ndacava da yávi —ñacachi Jesús.

¹⁵ Tá nandihí já ñacachi Pedro já xihín Jesús:

—Ndicani loho ndó nuú nde ndaja cáa ña cáchi ndo ña co cája quini toho ña xíxi ñayivi mé ná jáchi co cándaq ini nde ña —ñacachi Pedro xihín Jesús.

¹⁶ Já ñacachi Jesús já xihín ná:

—Á coó toho xíní túní ri ndóhó va, váha. ¹⁷ Jáchi co cándaq ini ndó ña tóco ndihí ñaha xíxi ñayivi a cuú caja quini a na. Jáchi ña xíxi ñayivi co xínu a ini ínimá ná joo xínu coo ña tíxi va na já queta tucu a yiquí cuñu na. ¹⁸ Ña cuu ndaja quini ñayivi cúu ña quíxi ínimá ná tátuhun tuhun cáhan na xihín ña cája na.

¹⁹ Jáchi chí ínimá ñayivi quíxi ña cáhvi núu ini na tátuhun ña cáhvi ini na cahní na ndii. Ta sa mé cán quíxi ña cáhvi ini in dātaa coo da xihín ñájíhí ñani táhan da á xihín in ña co cúu ñájíhí da. Ta sa mé cán quíxi ña ndiáva íni da caja cuíhna da. Ta sa mé cán quíxi ña cávaha jíquí da tuhun sahá ñani táhan da ta jári quíxi ña cánahá da xihín Ndióxi. ²⁰ Tóco ndihí ña cáhvi núu ini ñayivi caja na, ña yóho queá ndája quini a na. Joo co cáquini toho ñayivi sahá ña co ndáhá na tá cámaní cuxu na tá quiahva íin costumbre na —ñacachi Jesús xihín na xíca tuun xihín á cán.

Tá ñacandee ini in ña tóho Jesús

(Mr. 7:24-30)

²¹ Tá nandihí já ñaquee Jesús cuahan chí ñundáhyi cuéntá Tiro xihín cuéntá Sidón cán. ²² Ta nu xíca cuahan cán ñaqueta in ñáñáha ñundáhyi Canaán nu á já cáyuhú ña já cáchi ña já xihín á:

—Xitoho i, da ñaquixi chíchi David caja ndó ñamaní candáhví loho ini ndó yehe. Chindee ndó jahyi jíhí i jáchi rí quini ndácaan ini ñá —ñacachi ñáñáha cán xihín Jesús.

²³ Joo ni in túhún tuhun coó ñanducú ñehe Jesús nu ña. Andá já ñacativi na xíca tuun xihín a cán nu á já ñacachi na já xihín á:

—Taxi ndó ñá jan ná quee ña cuhun ña jáchi cáyuhú ña ndácaa ña jata yó vaxi ñá —ñacachi na cán xihín Jesús.

²⁴ Andá já ñacachi Jesús xihín ñáñáha cán já:

—Ñachindahá Ndióxi yehe vaxi i nuú ñayivi Israel cuití va, mé na cúu tátuhun ndicachi, rí nandiñúhú —ñacachi Jesús.

²⁵ Andá já ndáva ña cán ñaxinu coo ña ñacaxítí ña nu Jesús já cáchi ña já xihín á:

—Caja ndó ñamaní chindee loho ndó yehe, xitoho i.

²⁶ Andá já ñacachi Jesús já xihín ná:

—A váha toho candaa i pan ndahá na valí ta já cana i ña nuú tina —ñacachi Jesús xihín ña cán.

²⁷ Andá já ñacachi ña cán já xihín Jesús:

—Mé a ndaa cáhan ndo joo anda tina, rí ndúu tíxi mesa xíxi rí ña jácuyu jahyi xitoho rí —ñacachi ña cán xihín Jesús.

²⁸ Andá já ñacachi Jesús já xihín ná:

—Mé a ndaa cándee cáhnu inún Ndióxi. Ná coo a tá quiahva cúni mún —ñacachi Jesús xihín ñá.

Chí mé hora já ñandiáva jahyi jíhí ña.

Ndája vaha Jesús cuahá na quíhvi

²⁹ Tá nandihí já naquee Jesús cuahan já naxinu coo a yati yuhú tañuhú Galilea. Já nandaa in jini yucu ta cán nasacoo a. ³⁰ Tá já nacasáhá nataca cuahá ndivaha ñayivi já ñehe na na quíhvi saha xihín na cuahá xihín na níhi xihín na rénco ndáha. Ta cuahá ga nuú na quíhvi ñehe na nacasaá na nachinduu na na nu Jesús. Ta nandaja vaha mé á na. ³¹ Tá xihín ña yóho a juú quiahva natatontó na tá naxini na ña nacasáhá ndicahan na níhi. Ta natatontó na tá naxini na ña nandivaha ndahá na rénco ta ndicaca vaha na quíhvi saha ta quiahva já nandivaha ri na cuahá. Ta nacasáhá na cája cáhnu na Ndióxi, mé a cómi cuéntá sahá na Israel.

Tá nasahan Jesús ña cuxu comi mil natáa

(Mr. 8:1-10)

³² Andá já nacana Jesús na xíca tuun xihín á já nacachi a já xihín ná:

—Táhnda ndivaha ini i sahá ñayivi yóho jáchi sa naxinu uní quívi ndúu na xihín i ta chí coó ga ña vuxu na. Ta co cúní chindahá i na nuhu na vehe na jáchi cámani vuxu na ta tiahva náá cuitá na ta cuyu na íchi —nacachi Jesús.

³³ Andá já nacachi na xíca tuun xihín a cán já:

—Coó toho ñuu yati va ta ni mí, a cúu quiahva i ña vuxu na jáchi coó toho ñayivi ndúu yóho nuú cueén ña vuxu na —nacachi na cán xihín Jesús.

³⁴ Já nacachi Jesús já:

—Ndaja pan cómi ndo.

Já nacachi na cán já:

—Usa pan xihín java tiyacá válí.

³⁵ Andá já nasahnda Jesús chuun ña na cacoo ndihí ñayivi nu ñúhu cán. ³⁶ Tá já natiin a ndíhusa pan cán xihín java tiyacá válí cán já nandiquiahva ndixahvi

nu Ndióxi. Ta já nasahnda java ña ta nasahan ña nuú na xíca tuun xihín á cán ña ná ndicahnda na ña nuú ñayivi cuahá cán. ³⁷ Tá naxixi tóco ndihí na jandá quiahva nachutú tixi na. Ta tá najánditaca na ña nacandoo cán já nachutú usa toyicá xihín ña. ³⁸ Tá na naxixi cán cúu ná comi mil ta ta co cáhan sahá najihí xihín na válí. ³⁹ Tá tá nandihí nandindayí Jesús ñayivi já nandihvi a ini barco já naxinu coo a ñundáhyi cuéntá Magdala.

Cúní na fariseo xihín na saduceo cuni na in ña xitúhún caja Jesús

(Mr. 8:11-13; Lc. 12:54-56)

16 Tá ndaja coo naxinu coo na fariseo xihín na saduceo nu Jesús. Ta sahá ña cúní na coto ndojó cuití ñahá na sahá ña cán queá naxica na nu á ña ná caja in ña xitúhún cuéntá indivi já ná candaa ini na á mé a ndaa cúu á ña nachindahá Ndióxi. ² Andá já nanducú ñehe Jesús tuhun nu ná já nacachi a já xihín ná:

—Tá nahini já cáchi ndo já: “Tiempo vaha ndivaha cacuu a jáchi ndíyehé cuahá indiví”, cáchi ndo. ³ Tá naha cáchi ndo já: “Viti ndusa queá cuun ndeé ndivaha javi jáchi íin víco ndivaha ta íin víco cuahá indiví”, cáchi ndo. Co cúu ndó tá quiahva ndáa ndó. Ndá cuéntá queá tiahva ndó ndicuni ndó ndá queá coo tá sándehe ndó indivi joo co tiahva ndó ndicuni ndó ndá tiempo cúu á viti. ⁴ Ñayivi quini, na co cúní candúsa Ndióxi, na cán cúu na xíca ña ná caja i ña xitúhún nu ná. Joo ni in túhún toho ñaha xitúhún a cája ga i nu ná. In túhún ña candehé na cacuu a ña tandaa quívi ndoho i tá quiahva nandoho profeta Jonás sanahá ndivaha —nacachi Jesús xihín ná.

Já naquee a cuahan.

Tá sácú Jesús quiahva sahá na fariseo
(Mr. 8:14-21)

⁵Ta ndaja coo naxinu coo a inga xoo tañuhú xihín na xíca tuun xihín á cán ta nandindójo na cán cañehe na pan cuxu na. ⁶Tá nandihí já nacachi Jesús já xihín ná:

—Candehé ndo. Cuéntá coo ndó xihín na fariseo ta xihín na saduceo jan jáchi ña jánaña na cúú á tátuhun yusa naxaa ña cává táhan na xihín harina cávaha na pan —nacachi Jesús.

⁷Joo na xíca tuun xihín á cán ndítuhún xihín táhan na ña nacachi Jesús já sahá ña coo pan ñehe na cuahan xihín ná.

⁸Ta tá nacandaa ini Jesús ña cáhan na já nacachi a já xihín ná:

—Ndá cuéntá queá co candee cáhnu ini ndó yehe ta cáhan ndo ña cáchi i ña yóho xihín ndo sahá ña co ñehe ndó pan vaxi ndó. ⁹A ñáha cándaa ini ndó. Ndítahan ndicuhun ini ndó ña nandaja cuahá i uhun víxí pan tá naxixi uhun mil taa. Ta sa xini ndó ndaja toyicá najácutú ndo xihín ña nacandoo cán.

¹⁰Ta ndítahan ndicuhun ini ndó ña nacaja i xihín usa pan tá nandicahnda i ña naxixi comi mil taa ta sa xini ndó ndaja toyicá najácutú ndo xihín ña nacandoo cán. ¹¹Ndá cuéntá queá co cándaa toho ini ndó ña coo nacachi i ña yóho xihín ndó sahá ña coo pan ñehe ndó vaxi ndó. Joo nacachi i ña cuéntá coo ndó xihín na fariseo ta xihín na saduceo jáchi ña jánaña na cúú á tátuhun yusa naxaa ña cává táhan na xihín harina cávaha na pan —nacachi Jesús.

¹²Tá nacachi Jesús ña yóho já nacandaa ini na xíca tuun xihín á cán ña a juú toho sahá yusa naxaa cáhan Jesús saha. Ña cuni Jesús cachi a xihín ná queá cuéntá vaha ná coo na xihín ña jánaña na fariseo xihín na saduceo.

Tá cáxi tuhun ndaa Pedro ña cúú Jesús mé á nachindahá Ndióxi cacomí a cuéntá sahá ñayivi

(Mr. 8:27-30; Lc. 9:18-21)

¹³Tá naxinu coo Jesús ñundáhyi Cesarea cuéntá Filipino já nandaca tuhún a na xíca tuun xihín á cán já nacachi a já xihín ná:

—Ndá da cáchi ñayivi cúú yehe, da nachindahá Ndióxi nduu ñayivi —nacachi Jesús.

¹⁴Já nacachi na cán já:

—Java na cáchi na ña cúú ndó Juan, da nacaja ndúta ñayivi. Ta java na cáchi na ña cúú ndó profeta Elías. Ta java na cáchi na ña cúú ndó profeta Jeremías. Ta java na cáchi na ña cúú ndó in táhan profeta nasanduú sanahá —nacachi na.

¹⁵Anda já nacachi Jesús já xihín ná:

—Ta ndóhó ri, ndá da cáchi ndó cúú u —nacachi a.

¹⁶Anda já nanducú ñehe Simón Pedro tuhun nu Jesús já nacachi da já xihín á:

—Mé ndó cúú Cristo, ña nachindahá Ndióxi cacomí cuéntá sahá ñayivi. Ta cúú ndó in túhún jini já jahyi Ndióxi, mé a tácu fin indivi —nacachi da.

¹⁷Anda já nanducú ñehe Jesús tuhun nu dá já nacachi a já xihín dá:

—Tahví nahá cúún, Simón, jahyi Jonás jáchi ni in túhún ñayivi coo nacaxi tuhun ña yóho xuhun. In túhún tátá i, mé a fin indivi nanaha ña yóho nuun.

¹⁸Ta quiahva joho cáchi ri yehe saha yóhó: Yohó cúún Pedro ta quivun cuni cachi a tóto. Ta cúún tátuhun yuu ndúhu sahá in vehe nuú cavaha i veñuhu mí i jáchi yóhó caca nuún cahun sahá i nuú ñayivi já ná quee vaha na xihín tiñahá sacuahá já ná a cühun na indayá. ¹⁹Ta caja i xuhun ña ná cuu ndicanún nuú ñayivi ndaja ndiquiahva na mé ná ndáha i cacomí i cuéntá saha ná. Cacuú a tátuhun quiahva i yávi nuun ña ná cunún íchi nuú ndihvi ñayivi cacomí i cuéntá

sahá ná. Tá cō sáhun ñamaní ná ndihvi ñayivi cán já queá a quiahva toho i ñamaní nu ná. Joo tá sáhun ñamaní nu ná ndihvi na cán já queá quiahva ri yehe ñamaní nu ná —cáchi a xihín Pedro.

²⁰ Andá já ñasahnda Jesús chuun nuú na xica tuun xihín á cán ña ná a cáxi tuhun na xihín ni in túhún ñayivi ña cúu mé á Cristo, mé á ñachindahá Ndióxi cacomí cuéntá sahá ñayivi.

Tá cáxi tuhun Jesús ña quivi a

(Mr. 8:31-9:1; Lc. 9:22-27)

²¹ Ta janda mé quivi já ñacasáhá Jesús cáxi tuhun a xihín na xica tuun xihín á ña ndítahan nu á cūhun a ñuu Jerusalén. Ta mé cán ndoho ndivaha ini a ndahá na sacuahá veñuhu xihín ndahá na sacuahá nuú jutū xihín ndahá na jánaha ley Moisés. Ta caxa xixi ri na cán va xihín á ta cahni ñahá na. Joo tá ná xinu uní quivi nditacu tucu a. ²² Andá já ñatavá xóo Pedro Jesús já ñacasáhá da jánani ñahá da já ñacachi da já xihín á:

—Ama ná yaha ña yóho xihín ndó, xitoho i. Ná a quiahva toho Ndióxi ñamaní ndoho ndó já —ñacachi Pedro xihín Jesús.

²³ Joo ñacava nuu Jesús sándehe a nu Pedro ta já cáchi a já xihín dá:

—Cuáhán quee Satanás, rí cúu tiñáhá sacuahá. Tá quiahva fin na sáji nuu nu ná quiahva já íun nuú i. Jáchí cō cáhvi inún tá quiahva cáhvi ini Ndióxi joo cáhvi inún tá quiahva cáhvi ini ñayivi cuéntá ñuyivi yóho —ñacachi Jesús xihín dá.

²⁴ Andá já ñacachi Jesús já xihín na xica tuun xihín a cán:

—Ndá na cúni candico yehe ndítahan nu ná ndihi chága ini na sahá yehe a juú ga saha mé ná. Ta ndítahan coo tiyhva na ndoho ini na sahá yehe. Ta coo caxa toho a ná quivi na sahá i. ²⁵ Jáchí ndá na catóo coo chága ñuyivi yóho ndihi saha ná. Joo ndá na sahan ndeé ini quivi sahá i xihín sahá tuhun Ndióxi, ñehe

táhvi ná catacu na anda ama cáa quivi. ²⁶ Vatí ná quee vaha in na ñuyivi yóho ta cómi na tóco ndihi ñaha ñuyivi yóho joo ndá chuun queá tá nu ndihí ndihi saha ná indayá. Jáchí ni in ñaha a cuú chahvi in na saha inima ná ña ná a cūhun na indayá. ²⁷ Jáchí yehe, da ñachindahá Ndióxi nduu ñayivi quixi tucu u xihín ndeé Ndióxi, tátá i ta xihín ndeé táto Ndióxi. Mé tiempo cán náha ndaja cáhnu cúu yehe. Andá já chahvi i nuú in in ñayivi sahá ñaha ñacaja na nani ñasanduu na ñuyivi yóho. ²⁸ Mé a ndaa ná cahan i xihín ndo ña java na ndúu yóho a quivi toho na janda quiahva ná xinu quivi cuni na quixi tucu yehe, da ñachindahá Ndióxi nduu ñayivi cacomí i cuéntá sahá na cúu cuéntá mí i —cáchi Jesús.

Tá ñandijama nuu Jesús quiahva cáa

(Mr. 9:2-13; Lc. 9:28-36)

17 Tá ñayaha inu quivi já ñandaa Jesús in yucú jícó ta ndáca táhan Pedro xihín Jacobo xihín ñani da Juan cuahan na xihín á. ² Ta nu táhyí mé na cán ñandijama quiahva cáa. Ta a juú quiahva ñandiyehé nuu á tá quiahva ndiyehé candii. Ta jáhma ndíxi a ñandiyaa cáchi ña ta chí a juú quiahva yehé ña. ³ Ta ndaja coo ñandaca náha Moisés xihín Elías ta ñacasáhá ndítuhún da xihín Jesús. ⁴ Andá já ñandicahan Pedro xihín Jesús já ñacachi da já xihín á:

—Vaha cúu ndúu nde yóho, xitoho nde. Tá cúni ndó cavaha nde uní vehe tiyahvá válí. In a coo mé ndó ta inga coo Moisés ta inga coo Elías —cáchi Pedro.

⁵ Ta nani cahan Pedro nanuu in vico jata ná ta ñacava nuu a na. Ta a juú quiahva ndató yehé a. Ta tañu vico cán ñaxini johó na ña cahan in a ta já cáchi a já:

—Da yóho cúu jahyi maní i ta cájii ini i xihín dá. Cuni johó ndó nu cahan da —ñacachi mé a cán.

⁶Tá naxini joho na xíca tuun xihín Jesús cán ña cáhan yóho já nacaxítí na janda quiahva naxinu nuu ná nu ñúhu. Ta a juú quiahva ná yihví na. ⁷Anda já nacayati Jesús nu ná ta nacani ndaa ndáha na já nacachi a já xihín ná:

—Cuándacoo ndó. A cáyihví toho ndó —nacachi Jesús xihín ná.

⁸Ta tá nandiñehe na cán nuu ná já naxini na ña fin in túhún jiní mé va Jesús.

⁹Ta tá nanuu na jiní yúcu cán já nasahnda Jesús chuun nu ná já nacachi a já xihín ná:

—A cáxi tuhun ndó ña naxini ndó yóho nuú ni in ñayivi janda quiahva ná nditacu tucu yehe, da nachindahá Ndióxi nduu ñayivi —nacachi Jesús.

¹⁰Já nacachi na cán já xihín á:

—Ndávaha cáchi na jánaha ley Moisés ña ndítahan quixi jihna ñúhú profeta Elías —nacachi na.

¹¹Já nacachi Jesús já xihín á:

—Mé a ndaa jihna ñúhú quixi Elías ta ndaja vaha ndihi da ñaha. ¹²Joo mé a ndaa ná cahan i xihín ndó ña sa naquixi va Elías joo coo naxeen na ndicuni na da. Ta nacaja na tá quiahva cúní mé ná xihín dá. Ta quiahva já jándoho ri na ini yehe, da nachindahá Ndióxi nduu ñayivi —nacachi Jesús.

¹³Anda jáví nacandaa ini na xíca tuun xihín Jesús cán ña cáhan Jesús saha Juan, da najácandúta ñayivi tá nacachi a ña sa naquixi va Elías.

Tá nandaja vaha Jesús in da loho ndácaan ínimá quini ini

(Mr. 9:14-29; Lc. 9:37-43)

¹⁴Ta tá sa nanuu na ta naxinu coo na nu ndúu cuahá ñayivi cán já naxinu coo in dataa ta já nacaxítí da nu Jesús. Já nacachi da já xihín á:

¹⁵—Candáhví loho ini ndó jahyi i, xi-toho i jáchi xihí yihí da ta ndóho ndivaha ini da. Ta cuahá tañu ndícava da

nu ñúhu ita á ini ticuí. ¹⁶Ta ñehe e da nacasaá i nuú na xíca tuun xihín ndó yóho joo coo nacuu ndaja vaha na da —nacachi da xihín Jesús.

¹⁷Anda já nacachi Jesús já:

—Ndávhi nahá nacuu ndó jáchi sa cuahá ndivaha quivi fin i xihín ndó ta a ñaha candeé ini ndó yehe. Cúú ndó ñayivi quini ndivaha chí co ndeé ga ini i xihín ña cája ndó. Taxi ndó taa loho jan chóho —nacachi Jesús.

¹⁸Anda já najánani Jesús rí quini ndácaan ini da loho cán. Chí naqueta rí cuahan ri ta mé hora já nandivaha da loho cán.

¹⁹Tá nandihi já nacahan jehé na xíca tuun xihín Jesús cán xihín á já nacachi na já:

—Ndávaha coo nacuu caja nde tavá nde ínimá quini nasandacaan ini da loho jan —nacachi na xihín Jesús.

²⁰Já nacachi Jesús já xihín ná:

—Coo nacuu caja ndó jáchi co cán-deé cáhnu ini ndó yehe. Mé a ndaa cáchi i xihín ndó, loho tinn ndivaha cáa in ndiqui mostaza joo ndúu dó in yito cáhnu. Tá candeé loho ini ndó yehe viti vaxi quivi candeé chága ini ndó yehe. Anda jáví cuu caja ndó in ñaha ihvi ndivaha tátuhun ña cuu cachi ndó xihín in yúcu ña ná caxoo a ta chí caxoo ndusa ña. Tóco ndihi ñaha cuu caja ndó tá ná candeé ini ndó yehe. ²¹Joo tá cúní ndó tavá ndó ínimá quini tátuhun rí yóho xíní ñúhú cajuhun ndó ta caça tahví ndó nu Ndióxi —cáchi Jesús xihín ná.

Tá cáxi tuhun tucu Jesús ña quivi a

(Mr. 9:30-32; Lc. 9:43-45)

²²Ta ndaja coo xíca tútú ndihi na xíca tuun xihín Jesús cán cuahan na xihín á chí estado Galilea. Ta já nandicani Jesús nuú na cán ña tandaa quivi ndiquiahva ñayivi mé á ndáha na cahni ñahá, mé a nachindahá Ndióxi nduu ñayivi. ²³Ta nacachi a xihín ná ña tá sa ná yaha uní

quivi já nditacu tucu a. Tá ñacachi Jesús ña yóho xihín na xíca tuun xihín á cán já ñacacuéha ndivaha ini na.

Tá ñachahvi Jesús jiuhún impuesto cuéntá veñuhu cáhnu ñuu Jerusalén

²⁴Tá ñaxinu ço Jesús ñuu Capernaum xihín na xíca tuun xihín á já ñaxinu ço na já taca jiuhún impuesto cuéntá veñuhu nu Pedro. Já ñacachi na já xihín dá:

—Á ço cháhvi toho Jesús, da já ñaha ndohó jan jiuhún impuesto cuéntá veñuhu ñuu Jerusalén —ñacachi na xihín Pedro.

²⁵Anda já ñacachi Pedro já:

—Cháhvi a ña —ñacachi da.

Anda já ñandihvi Pedro ini vehe nu ndacaan Jesús joo jihna ñúhú ñandicahan Jesús xihín dá já ñacachi a já:

—Ndía cáhvi inún, Simón. Yo já ndítahan nuu chahvi jiuhún cuéntá impuesto nuú na sáhdá chuun ñuyiví yóho. Á na ñuu mé ná á na ñuu tóho —ñacachi Jesús.

²⁶Já ñacachi Pedro já:

—Na tóho va sá cháhvi jiuhún cája na —ñacachi Pedro.

Já ñacachi tucu Jesús já:

—Sahá ña cán queá mé na ñuu ço cháhvi toho na. ²⁷Joo mí ço cúní yo ña ná ndicuíta na xoho sahá ña cán queá cuhún tañuhú. Ta mé cán tavún tiyacá. Ta rí nu cuítí ná tavún jan candehún yúhu rí jáchi jan nditáhún in jiuhún caa. Ta cañehe a cuhun chahvún saha mún ta saha mí i jáchi queta va —ñacachi Jesús xihín Pedro.

Ndícani Jesús ndá na cúu na iin chága saha

(Mr. 9:33-37; Lc. 9:46-48)

18 Mé tañu já ñacayati na xíca tuun xihín Jesús nu á já ñacasahá ndaca tuhún ñahá na já ñacachi na já xihín á:

—Yo já cacuu da cáhnu chága tá ná tandaa quivi cacomí Ndióxi cuéntá sahá ñayivi —ñacachi na xihín Jesús.

²Anda já ñacana Jesús in da loho já ñasacandichi a da mahñú java na cán. ³Já ñacachi a já:

—Mé a ndaa ná cahan i xihín ndo ña ndítahan ndaja núu ndó mé ndó ta nduu ndó tátuhun na valí já cuu cacomí Ndióxi cuéntá saha ndo. ⁴Na cúní cacuu na cáhnu chága tá cacomí Ndióxi cuéntá sahá ñayivi ndítahan nduu na tátuhun in na ço saha ta já nduu na tátuhun ta loho yóho. ⁵Ta ndá na ná ndiquehe in aloho tátuhun da yóho sahá ña cúní na yehe, na cán cúu na ndiquehe ri na yehe viti.

Tá jándacava ñayivi inga na nuú cuachi

(Mr. 9:42-48; Lc. 17:1-2)

⁶Ta ndá na ná jándacava in na ndahví, na cándeé ini yehe nuú cuachi janda vaha chága ná candico in yuú yojó jico ná ta ná ndihi sahá na cahá tañuhú.

⁷Ndáhvi nahá ñacuu ñayivi ñuyiví yóho jáchi mé a ndaa iin cuahá ndivaha ña núu ñuyiví yóho. Ña cán queá ndácava cuahá ñayivi nuú cuachi joo ndáhvi nahá ñacuu na jándacava inga na nuú cuachi.

⁸Sahá ña cán queá tá ndáha ndo á saha ndo jándacava ndohó nuú cuachi, chituhun ndó a ta jácana xíca ndó ña ná cuhun a. Jáchi vaha chága ná cuhun rénco ndó á lundu ndó indivi a juú ga ña ná cuhun ní yiquí cuñu ndó indayá nu cáyi ñúhu ita anda ama caa quivi. ⁹Ta tá nduchú núu ndo jándacava ndohó nuú cuachi, tavá ndó ña ta jácana xíca ndó ña ná cuhun a. Jáchi vaha chága ná cuhun ndó indivi xihín in tuhún nduchú núu ndo a juú ga ña ná cuhun ndó xihín ndívi nduchú núu ndo indayá nu cáyi ñúhu ita.

**Tá sácú Jesús quiǵhva sahá
in ndicachi, rí nandiñúhú**

(Lc. 15:3-7)

10^o Coto a quehe núu ndó ni in na cúu cuéntá mí i jáchi cáchí i xihin ndó ña táto Ndióxi, mé na ndáa na cán ní tiempo ndíta na nu Ndióxi, tátá i indiví. ¹¹ Jáchi yehe, da nachindahá Ndióxi nduu ñayivi naquixi i jácacu u ñayivi, na cája cuachi.

¹² Cuni johó ndó ná cahan i xihin ndo: Tá cómi in dataa in ciento ndicachi ta tá ndiñúhú in rí já queá ña cája da queá jándacoo da comi jico sahun comi rí cán yúcu ta já quee da cuhun da ndinducú da mé rí nandiñúhú cán. ¹³ Ta tá ndiñehe dá ri cajii chága ini da saha rí nandiñúhú cán a juú ga sahá comi jico sahun comi rí sa ndúu nu dá cán. ¹⁴ Ta quiǵhva já ndoho ri Ndióxi, tátá i jáchi co cuni mé á ña ná ndihi sahá ni in na cándeé ini mé á.

**Ndítahan caja cáhnu
iní sahá ñani táhan i**

(Lc. 17:3)

15^o Tá cája quini ñani táhan ndó xihin ndo já queá tavá xóo ndó da ta cahan ndó xihin dá ña ná ndicuni da ña a váha toho cája da. Ta tá ná tahvi ini da sahá cuachi cája da já queá sa ndiquehe táhan maní tucu ndó xihin dá. ¹⁶ Joo tá co cuni da cuni johó da nu cahan ndo já queá ndítahan nu ndó cana ndó in á ivi chága ñani táhan ndó já ná cacuu na testigo sahá ña cahan ndo. ¹⁷ Ta tá co cuni da cuni johó da nu cahan na cán xihin dá já queá ndítahan cuhun ndó nu tóco ndihi na cúu cuéntá Jesús táca veñuhu. Ta tá co cuni da cuni johó da nu cahan ndihi na cán xihin dá já queá ndítahan caja ndó xihin dá tá quiǵhva cája ndó xihin in da tóho, da co cándusa Ndióxi á in da játaca jiyuhún cuéntá impuesto.

¹⁸ Mé a ndaa ná cahan i xihin ndo ña tóco ndihi ñaha ná cató ndo ñuyívi yóho

candico a janda indiví. Ta tóco ndihi ña ná ndaxí ndo ñuyívi yóho janda indiví ndaxi ña.

¹⁹ Ta jári cahan i ña yóho xihin ndó. Tá jándique táhan tuhun ivi ndó ñuyívi yóho ta tá mé a ndaa in cúu ndó sahá ña xíca tahvi ndó nu Ndióxi, mé á ñin indiví já queá quiǵhva tátá i ña nu ndo. ²⁰ Jáchi nu ndúu ivi á uní na ta táca na cuéntá mí i já queá tañu na cán ndacaan i — nacachi Jesús.

**Tá sácú Jesús quiǵhva sahá in da co
cuni caja cáhnu ini da sahá inga da**

²¹ Ta ndaja coo nacayati Pedro ndáca tuhún da Jesús já nacachi da já:

—Xitoho i, ndaja tañu xini ñúhú caja cáhnu ini i sahá ñani táhan i tá cája núu da xihin i. Á ndítahan nuú i caja cáhnu ini i sahá dá janda usa tañu —nacachi da xihin Jesús.

²² Já nacachi Jesús já xihin dá:

—A juú janda usa tañu cuiti ndítahan caja cáhnu inún sahá ñani táhún. Vaha janda comi ciento comi jico uxu tañu ndítahan nuun caja cáhnu inún sahá ñani táhún.

²³ Cáchí i ña yóho xihin ndó jáchi tá cómi Ndióxi cuéntá sahá ñayivi cúu á tá-tuhun ña nayaha xihin in rey tá nacasáha da játaca da cuéntá nuú na yíca nu dá. ²⁴ Mé tañu já ñehe na in da yíca cuahá millón nu dá nacasaá na. ²⁵ Ta sahá ña coo nacuu chahvi da ña yíca da sahá ña cán queá nasahnda rey chuun ña ná jicó na mé dá xihin ñáñíhí da xihin jahyi válí da ta janda ñaha da viti ña ná cuu ndiquehe rey cán cuéntá da. ²⁶ Anda já nacaxítí da yíca cán nu mé rey já nacasáha xíca tahvi da já cáchí da já: “Caja ndó ñamani, xitoho i candati tóo chága ndó yehe, ndáhví i, já chahvi ndihi i ña yíca i nu ndo”, nacachi da xíca tahvi da nu rey cán. ²⁷ Anda já nacandáhví ini rey cán da ta nacaja cáhnu ini a sahá tóco

ndihi ña yícá da já najaní a da cuahan da.

²⁸ Ta tá naqueta da yícá cán cuahan da já nandique táhan da xihín inga da cúu mozo. Ta mé mozo cán yícá da loho va nuú da cán. Ta já ñacasáhá da ndáca yihí da cuénta nuú da cúu mozo jácuahnú ñahá da. Já cáchí da já: “Chahvún ña yícún nuú i”, cáchí da cán. ²⁹ Anda já nandacava xítí mé da cúu mozo cán nu dá já ñacasáhá xíca tahví da nu dá já cáchí da já xihín dá: “Cajún ñamaní candati tóo chágun yehé, ndáhví i, já chahví ndihi i ña yícá i nuun”, ñacachi da cúu mozo cán. ³⁰ Joo cóo ñaxeen da ta ña ñacaja da queá ñasahan da ñachicaan da da cúu mozo cán vecaa janda quiahva ná cuu chahví ndihi da ña yícá da nu dá. ³¹ Ta tá ñaxini java ga ña cúu mozo cán ña yóho já nandihíhví ndivaha ini na ta chí ndáva na ñasahan ña ñacaxi tuhun na nu mé rey cán ndaja cáa ña ñacuu. ³² Anda já xójo ndivaha ini mé rey cán chí ñacana da da ñasayícá cán já ñacachi da já xihín dá: “Mozo quini ndivaha cúu yóhó. Cuahá ndivaha jihún ñasayícún nuú i joo ñacaja cáhnu ini i saha tóco ndihi a jáchí ñaxíca tahvún nuú i. ³³ Quiahva já ndítahan ri nu yóhó va caja cáhnu inún sahá ña yícá ñani táhún nuun jáchí já ñacaja i xuhun”, ñacachi rey cán. ³⁴ Ta sahá ña xójo ndivaha ini mé rey cán xihín dá sahá ña cán queá nandiquiahva da da yícá cán ndáha ña jácaxáhan ñahá cán janda quiahva ná chahví da saha tóco ndihi ña yícá da — cáchí Jesús.

³⁵ Já ñacachi tucu Jesús já:

—Quiahva já caja ri Ndióxi, tátá i, mé a íin indiví xihín ndóhó va tá có cája cáhnu ini ndó sahá ñani táhan ndó xihín ndinuhu ini ndó —cáchí Jesús.

Jánaḡa Jesús nuú ña sa ñatandaha ña có ndítahan jándacoo táhan na

(Mr. 10:1-12; Lc. 16:18)

19 Tá nandihí ñacachi Jesús ña yóho já ñaquee a estado Galilea já ñaxinu cóo a estado Judea, ña íin inga xoo yuta Jordán cán. ² Ta a juú quiahva cuahá ñayivi nandico jatá ta nandaja vaha mé á ña quíhvi.

³ Joo ndaja coo java na ña fariseo ñacayati na nu Jesús sahá ña coto ndojó ñahá ña cúní ña. Já ñacachi na já xihín á:

—Á núná nuú in dataa jándacoo da ñájíhí da saha ndá ña ñacuu —ñacachi ña fariseo cán.

⁴ Anda já ñacachi Jesús já:

—Á a ñaha cahvi ndó tuhun Ndióxi nu cáchí a ña janda mé saha tá ñacavaha Ndióxi ñayivi nu cuítí já ñacavaha dataa ta ñacavaha ñáñáha. ⁵ Ta ñacachi tucu a ña ndítahan nuú dataa jándacoo da tátá da xihín náná da já ndique táhan da xihín ñájíhí da. Já xinu ndíví ña cán cacuu na tátuhun in víxí yiquí cuñu na. ⁶ Sahá ña cán queá có cúu ga ña iví yiquí cuñu sahá ña nanduu na tátuhun in túhún yiquí cuñu na. Sahá ña cán queá có ndítahan nuú da cán janí táhan da ña najácatáhan Ndióxi tá ñatandaha ná — ñacachi Jesús.

⁷ Anda já nandaca tuhún tucu ña cán Jesús já ñacachi na já:

—Joo já cachi ndó xihín nde: ndá cuéntá queá ñasahnda ri Moisés chuun ña cuu cavaha in dataa in tutu quiahva da nu ñájíhí da ta xihín ña cán cuu jándacoo da ña —ñacachi ña cán xihín Jesús.

⁸ Já ñacachi Jesús já:

—Sahá ña táhyí ndivaha ínimá ndó sahá ña cán queá sahan Moisés ñamaní nu ndó ña cuu cavaha ndó tutu quiahva ndó nu ñájíhí ndó ña ná jándacoo ndó ña. Joo tá ñacavaha Ndióxi ñayivi nu cuítí cóo ñacacúní toho a coo ña yóho. ⁹ Cuni johó ndó ná cahan i xihín ndó. Tá

ná jándacoo in dataa nájíhí da ta co cúu á sahá ña nacaja ña cuachi xihín inga ta ta tá tandaha dá xihín inga ña já queá cája da cuachi nu Ndióxi. Ta quiahva já ín ri cuachi da ná tandaha xihín ña nacandoo cán —cáchi Jesús.

¹⁰ Tá naxini joho na xica tuun xihín Jesús cán ña yóho já nacachi na já:

—Tá ta quiahva já cáa janda vaha chága ná a tándahá ñayivi, dá já —nacachi na cán.

¹¹ Já nacachi Jesús já:

—A juú ndihi ñayivi candaa ini ña cáhan i yóho. Ndinuhu na ndínuna xini túni cája Ndióxi, na cán cúu na candaa ini ña yóho. ¹² Ndúu java dataa ta a cuú tandaha da jáchi já nacacu da ta já ta cúu mé va da. Ta java da a cuú tandaha da jáchi já nacaja ñayivi xihín ná ta já ta cúu mé va na. Ta java da a tándaha da jáchi cúni da ndiquiahva ní da mé dá nu Ndióxi ña ná cacomí a cuéntá saha dá. Ta ndá ndó, na ndínuna xini túni, candaa ini ndó ña yóho —nacachi Jesús.

Cája yij Jesús na valí

(Mr. 10:13-16; Lc. 18:15-17)

¹³ Tá nandihí já ñéhe na java na valí nacasaá na nu Jesús ña ná chinúu a ndahá a jiní ná ta já caça tahví a nu Ndióxi saha ná. Joo ndaja coo na xica tuun xihín á cán nacasáhá na cája cuéhe na xihín na ndáca na valí cán. ¹⁴ Já nacachi Jesús xihín na xica tuun xihín á cán já:

—Quiahva ndó ñamaní ná quixi na valí nuú i ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho —nacachi Jesús.

¹⁵ Tá nandihí já naxinúu Jesús ndáha á jiní na valí cán. Anda já naquee a cuahan.

Ndítuhún in da cuicá xihín Jesús

(Mr. 10:17-31; Lc. 18:18-30)

¹⁶ Ta ndaja coo naxinu in dataa nu ín Jesús ta nandaca tuhún ñahá da já nacachi da já:

—Maestro, mé ndó cúu ndó ta vaha ña cán queá ndáca tuhún i ndohó ndía ndítahan caja i já ná ñehe táhvi i cuhun i indiví coo i anda ama cáa quivi —nacachi da xihín Jesús.

¹⁷ Já nacachi Jesús já xihín dá:

—Ndá cuéntá queá cáchún xihín i ña cúu u da vaha. Ni in tuhún toho ñayivi coo cúu ná na vaha ñuyivi yóho. In tuhún Ndióxi cuití va queá vaha. Tá cúnun catacún nu ín mé á já queá xini ñúhú cajún ña sáhdá tuhun Ndióxi —nacachi Jesús xihín dá.

¹⁸ Já nacachi da cán já:

—Ndá cúu mé ña ndítahan caja i —nacachi da.

Já nacachi Jesús já xihín dá:

—Coto a cáhnún ndii. Coto a cóun xihín nájíhí á yí ñani táhún. Coto a cája cuíhnún. Coto a cáhun ña tuhún sahá ñayivi. ¹⁹ Ndítahan caja cáhnún tátún xihín nánún. Ta ndítahan quihvi inún ñani táhún tá quiahva quihvi inún mún —nacachi Jesús.

²⁰ Já nacachi da yúta cán já xihín á:

—Janda ta loho nasacuu u nacasáhá i cája i tóco ndihi ña sáhdá Ndióxi caja i. Ndía cúu ga ndítahan caja i —nacachi da.

²¹ Já nacachi Jesús já xihín dá:

—Tá ta cúnun cacuún in ta ndacú nu Ndióxi cuáhán jicún tóco ndihi ñahún jan ta ndacahndún jihún jan nuú na ndahví já ñehe táhvun coo cuahá ñahún indiví. Ta tá nandihí já quisún candícun yehe —nacachi Jesús.

²² Tá naxini joho da yúta cán ña yóho já naquee cuéha ndivaha da cuahan da jáchi da cuicá ndivaha cúu dá.

²³ Andá já ñacachi Jesús xihín na xíca tuun xihín á cán já:

—Mé a ndaa ná cachi i xihín ndó ña ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuénta saha ná. ²⁴ Jáchí jan-
da cama chága cuu yaha in camello ini in yávi sahá yítucú a juú ga ña ná ndiquiahva in da cuicá mé dá ndáha Ndióxi ña ná cacomí a cuénta saha dá —ñacachi a.

²⁵ Tá naxini joho na xíca tuun xihín Jesús cán ña yóho já ñacatóntó ndivaha na ta nandaca tuhún táhan na já cáchí na já:

—Ndá na cúu na cuu cacu ndaa ínima, dá já —cáchí na.

²⁶ Nandicoto nihni Jesús nu ná já ñacachi a já xihín ná:

—Ni in na a cúu caja ña yóho joo Ndióxi queá cuu caja ña jáchí ni in ñaha co ihvi toho nu Ndióxi —ñacachi Jesús.

²⁷ Andá já ñacachi Pedro já:

—Joo ndehe, najándacoo ndihi nde ñaha ñasacomí nde ta ndíco nde ndohó. Ndía ñehe táhvi nde caja ndó —ñacachi Pedro xihín Jesús.

²⁸ Andá já ñacachi Jesús já xihín dá:

—Mé a ndaa ná cachi i xihín ndo. Tá ná tandaa quivi nduu saá tóco ndihi ñaha já cacoo yehe, da ñachindahá Ndióxi nduu ñayivi nuú ndicáhu ndivaha i. Ta cán cacoo ri ndóhó, na naxíca tuun xihín i nuú uxu ivi táyi vaha. Ta cán caja víí ndó sahá ndíhuxu ivi táhndá na ñaquixi chichi Israel. ²⁹ Ta ndá na najándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi na sahá yehe, na cán cúu na ñehe ná cuaha chága ví ñaha. Ta jatá ña cán ñehe táhvi ná catacu na nu Ndióxi anda ama cáa quivi. ³⁰ Ta ndúu cuahá na íin saha ñuyívi yóho viti joo vaxi quivi cacuu na na coo saha nu Ndióxi. Ta ndúu cuahá na coo saha ñuyívi yóho viti joo

vaxi quivi cacuu na na íin saha nu Ndióxi —ñacachi Jesús.

Sácú Jesús quiahva sahá java da sáhdá uva

20 Já ñacachi Jesús já sácú a quiahva:

—Nuú cacomí Ndióxi cuénta sahá ñayivi cúu á tátuhun ña yóho: Íin in ñaqa naha chá ñaquee da cuahan da nducú da mozo caja chúun da cahnda da uva nu ñúhu dá. ² Ta ñacandoo da chahvi da in jihún caa naní denario in quivi. Ta já ñachindahá da mé mozo cán cuahan da caja chúun da nu ñúhu dá. ³ Tá ñandihí já ñaquee tucu da xihín ñaha ñúhu cán tátuhun caa in naha já nanditahan da java da ndúu núná uun nuú yahvi. ⁴ Já ñacachi mé da xihín ñaha ñúhu cán já: “Cuáhán ri ndóhó va cahnda ndó uva nu ñúhu i ta já chahvi i ndohó tá quiahva ndítahan nu ndó quehe ndó”, ñacachi da. Já ñaquee mozo cán cuahan da jáquee da nu ñúhu dá. ⁵ Ta tá ñacuu çaxivi já ñaqueta tucu da xihín ñaha ñúhu cán cuahan da ta ñatiin da java ga da caja chúun xihín dá. Ta tá ñacuu caa uni ñatiin chága da da jáquee nu ñúhu dá. ⁶ Ta tá ñacuu tátuhun caa uhun sahini ñaqueta tucu da ta nuú yahvi cán naxini chága da da ndúu núná uun. Já ñacachi da já xihín da ndúu cán: “Ndá cuénta queá sa ñacuu ndiví yaa ndúu ndó yóho”, ñacachi da xihín da ndúu cán. ⁷ Ta ñanducú ñehe da cán tuhun já cáchí da já: “Co cája chúun nde jáchí coo na quixi nducú nde caja chúun nde”, ñacachi da cán. Andá já ñacachi da xihín ñaha ñúhu cán já: “Cuáhán ri ndóhó va cahnda ndó uva nu ñúhu i. Ta já chahvi i ndohó tá quiahva ndítahan nu ndó quehe ndó”, ñacachi da.

⁸ Ta tá sa ñacuaá já ñacachi da xihín ñaha ñúhu cán xihín da cómí chuun nu mozo cán ña ná cana da da cúu

mozo cán já ná quehe yahvi da sahá chuun nacaja da. Ta da naquihvi nacaja chúun nu ndíhí cán, da cán cúu da jihna ñúhú ná quehe yahvi. Tá nandihí cán ná quehe yahvi da naquihvi nu cuití. ⁹ Andá já nacasaa da naquihvi caja chúun caa uhun sahini já naquehe in in da cán in denario. ¹⁰ Ta ndaja coo tá nacani a nuú da naquihvi caja chúun janda naha cán quehe yahvi da já quea nacahan da ña cuaha chága jjuhún ndiquehe da nuú da naquihvi caa uhun sahini cán. Joo quiahva já in denario naquehe ri in in da cán. ¹¹ Sahá ña cán quea nacasahá da cahan cuachí da xihín da xihín ñaha ñúhu cán. ¹² Já nacachi da já: “Da nandai cuu caja chúun nu ndíhí cuití yóho in hora cuití nacaja chúun da. Ta tá quiahva nachahvi ndó ndehe, da nacaja chúun ndiví yaa nu ndítahyí quiahva já nachahvi ri ndó nuú da caa va”, nacachi da cahan cuachí da cán. ¹³ Andá já nacachi da xihín ñaha ñúhu cán xihín in táhan mozo cán já: “Candehé, amigo. Co caja quini toho i xuhun. Á a juú in denario nacandoo i chahvi i nuun. ¹⁴ Júhun ña ndítahan quehún ta cuanúhun. Jáchí cúní chahvi i nuú da nacaja chúun in hora cuití va tá quiahva nacandoo i chahvi i nu yóhó. ¹⁵ Jáchí núná nuú i caja i ña cúní mí i xihín jjuhún i. Ta co ndítahan cahihvi inún sahá ña vaha ini i”, nacachi da xihín ñaha ñúhu cán xihín da cahan cuachí cán — nacachi Jesús sácú a quiahva.

¹⁶ Ta nacachi tucu a já:

—Sahá ña cán quea ndúu cuahá na fín saha ñuyiví yóho viti joo vaxi quivi cacuu na na coo saha nu Ndióxi. Ta ndúu cuahá na coo saha ñuyiví yóho viti joo vaxi quivi cacuu na na fín saha nu Ndióxi —nacachi a.

Cáxi tūhun tucu Jesús ña quivi a

(Mr. 10:32-34; Lc. 18:31-34)

¹⁷ Ta tá sa naquee tucu Jesús cuahan chí Jerusalén já íchí cán natavá xoo a ndíhuxu ivi na xíca tuun xihín á cán já nacachi a já xihín ná:

¹⁸ —Candehé ndo. Yóho ndaa í cuahan yó chí Jerusalén nuú ndiquiahva na yehe, da nachindahá Ndióxi nduu ñayivi ndahá na sacuaha nuú jutú xihín nuú na jánaha ley Moisés. Ta na cán cúu na cacu ini sahá ndaja quivi i. ¹⁹ Andá já ndiquiahva na yehe ndahá na tóho ña ná cuacu ndaa na yehe. Ta cani na yehe ta já cata caa na yehe ndica cruxu joo tá ná yaha uní quivi já ndítacu tucu u — nacachi Jesús.

Tá naxica náná Jacobo xihín Juan ñamaní nuú Jesús

(Mr. 10:35-45)

²⁰ Andá já nacayati ñájihí Zebedeo, ña cúu náná Jacobo xihín Juan nuú Jesús. Ta ndáca ña ndiví jahyi ña nacasaa ña nacaxítí ña nu á jáchí cúní ña caça ña in ñamaní nuú Jesús. ²¹ Andá já nacachi Jesús já xihín ña:

—Ndá quea cúní ndó —nacachi a.

Já nacachi ña cán já:

—Ña cúní quea ná caja ndó ñamaní cahnda ndó chuun ña ná cacoo in in jahyi i xoo jjin ndó. In da xoo cuáha ta in da xoo íti jjin ndó indiví tá ná cacomí ndó cuéntá sahá ñayivi —nacachi ña cán.

²² Andá já nacachi Jesús já xihín ña:

—Co cándaq ini ndó ña xíca ndó nuú i —nacachi a.

Andá já nacachi a já xihín Jacobo xihín Juan cán:

—Á cuu ndoho ini ndó tá quiahva ndítahan nuú i ndoho ini i. Jáchí ña vaxi nuú i ndoho ini i cúu á tátuhun coho i in yáxi ndutá ova. Á fín tiahva ndó ndoho ini ndó tá quiahva ndítahan nuú i ndoho

ini i anda quiahva ná quivi i —nacachi Jesús xihin ndívi da cán.

—Cuu caja nde ña —nacachi ndívi da cán xihin Jesús.

²³ Anda já nacachi tucu a já xihin dá:

—Mé a ndaa tandaa quivi coho ndó ña ova ñúhu in yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. Joo sahá ña xica ndó cacoo in ndó xoo cuáha i ta in ndó xoo íti i a juú yehe cúu dá cuu quiahva i ña nu ndo. Jáchi sa nandicaxi Ndióxi na ñehe táhvi cacoo cán —nacachi a.

²⁴ Joo ndaja coo tá naxini joho ndíhuxu chága na xica tuun xihin Jesús cán ña yóho já nacasáhá na xójo ini na xihin ndívi da cúu ñani cán. ²⁵ Anda já nacana Jesús tóco ndihi na xica tuun xihin a cán já nacachi a já xihin dá:

—Sa xini ndó ndaja cája na sáhná chuun nuú ñayivi ndúu ñuyívi yóho. Ña cája na queá jácandíhi na ñayivi ta cája na tá quiahva cuni mé ná. ²⁶ Joo co ndítahan coo ña cán tañu mé ndó jáchi ndá da cuni cacuu da cáhnu chága tañu ndó xini ñúhú cacuu da in da cája chúun cuéntá ndihi ndó. ²⁷ Ta ndá da cuni cacuu da nu cuítí tañu ndóhó ndítahan cacuu da da cája ndívi nuú ndihi ndó. ²⁸ Jáchi ni yehe, da naxindahá Ndióxi nduu ñayivi coo naquixi i ñuyívi yóho ña ná caja ndívi ñayivi nuú i. Ña naquixi i caja i queá caja ndívi i nu ná ta ndiquiahva i mí i quivi i já ná cuu cacu ndaa ínimá cuahá ñayivi ná a cühun na indaya —nacachi a.

Tá nandaja vaha Jesús ivi da cuaá

(Mr. 10:46-52; Lc. 18:35-43)

²⁹ Ta tá naqueta Jesús ñuu Jericó xihin na xica tuun xihin á cán já ndíco cuahá ndivaha ñayivi jatá cásahan na. ³⁰ Ta ndaja coo yati jín íchi cán nasanduu coo ivi da cuaá ta tá naxini joho da ña

yáha Jesús cuahan já nacasáhá ndívi da cáyuhú da já cáchi da já:

—Jesús, da naquixi chíchi David, caja ndó ñamaní candáhví loho ini ndó ndehe —cáchi da.

³¹ Anda já nacasáhá cája cuehe ñayivi xihin ndívi da cuaá cán ña ná catáji yúhu dá. Joo ví ga ví cáyuhú da já cáchi da já:

—Jesús, da naquixi chíchi David, caja ndó ñamaní candáhví loho ini ndó ndehe —nacachi da.

³² Anda já nandaca ndichi Jesús já nacana ndívi da cuaá cán. Ta já nandaca tuhún a da já nacachi a já xihin dá:

—Ndía cuni ndó ña ná caja i xihin ndo —nacachi a.

³³ Já nacachi ndívi da cuaá cán já:

—Candehé nde cuni nde, xitoho.

³⁴ Anda já nacandáhví ini Jesús da ta nacani ndaa ndáha á nuu dá. Chí ivi laá nanuna nuú da cuaá cán ta nacasáhá da ndíco da jatá Jesús cuahan da.

Ndíhvi Jesús ñuu Jerusalén

(Mr. 11:1-11; Lc. 19:28-40; Jn. 12:12-19)

21 Ta tá sa ja chá xinu coo na ñuu Jerusalén já naxinu na in ñuu loho naní Betfagé yati jín yucu naní olivo. Ta cán nasahnda Jesús chuun nuú ivi táhan da xica tuun xihin á cán. ² Já nacachi a já xihin dá:

—Cuáhán ndó ñuu loho jan ta tá ná xinu coo ndó jan ndiñehe ndo in búrró jíhi ndíco ndaa rí ta xihin mé rí jan cándichi inga búrró loho. Ndaxí ndó rí ta cañehe ndó ndívi rí quixi ndó. ³ Ta ndá na ná cahan xihin ndo já queá cachi ndó xihin ná ña xini ñúhú xitoho ndó rí joo tá ná ndihi chuun rí já nducú ñehe tucu da rí, já cachi ndó xihin ná —nacachi Jesús xihin ndívi da cán.

⁴ Tóco ndihi ña yóho nayaha já ná xinu coo nuú ña nacahyí in da profeta já:

⁵ Joho cachi ndó xihin na ñuu Jerusalén: “Candehé ndo. Ndáhví uun cáa da cómi cuéntá saha ndó.

Vaxi da nu ndo ta canú da jata búro jíhí, jahyi in rí ndiójo, canú da vaxi da nu ndo”, cáchí tũhun Ndióxi.

⁶Ta ndívi da xíca tuun xihín Jesús cán nasahan da nacaja da tá fin nasahnda Jesús chuun nu dá. ⁷Já ñehe da búro jíhí cán xihín búro loho, jahyi rí naxinu na nuú Jesús. Anda já nachojó na cotó ndéé na jata ri ta ndaa Jesús jata ri. ⁸Ta mé cuahá ñayivi ndúu cán nacasáhá na chĩnduu na cotó ndéé na íchĩ mé nuú yaha Jesús cán. Ta java na nacasáhá na sáhndá na ndahá yíto ta chĩnduu na do íchĩ mé nuú yaha Jesús cũhun a. ⁹Ta ñayivi cuahan chí nuu ta jári na vaxi chí jata nacasáhá na cáyuhú na já cáchí na já:

—Cája cáhnu í da naquixi chĩchi David yóho. Ndicáhnu nahá ná cacuu da cómi cuéntá saha yo jáchĩ cúu dá da vaxi yuhú nuu Ndióxi. Cáhnu ná cacuu Ndióxi —cáchí ñayivi cuahá cán cáyuhú na casahan na xihín á.

¹⁰Ta tá nandihvi Jesús ñuu Jerusalén cán tóco ndihĩ ñayivi nacasáhá cátóntó ndivaha na. Já cáchí xihín táhan na já:

—Ndá da cúu da yóho —cáchí xihín táhan na.

¹¹Java táhan na cán cáchí na:

—Da yóho cúu in profeta, da ñuu Nazaret cuéntá estado Galilea —cáchí xihín táhan na.

Tá naxaxí Jesús na ndúu jíco ñaha yéhe veũhu

(Mr. 11:15-19; Lc. 19:45-48; Jn. 2:13-22)

¹²Anda já nandihvi Jesús veũhu cáhnu cán já nacasáhá táxi ndihĩ a na ndúu jíco xihín na ndúu xéen cán. Ta naxicó ñehe a mesa na ndúu ndíjama jiyuhún cán ta naxicó ñehe a táyi sácoco na ndúu jíco ndijata. ¹³Já nacasáhá cáchí a já xihín ndihĩ na cán já:

—Já cáchí tũhun Ndióxi já: “Vehe mí í cacuu a vehe nuú quixi na caça tahví

na nu Ndióxi”, cáchí tũhun Ndióxi. Joo ndóhó ndandai cuu ndó yóho caja cuíhna ndo nuú ñayivi —nacachi Jesús xihín ná.

¹⁴Tá nandihĩ já nacayati java na cuahá xihín java na réncoco nu á ini mé veũhu cáhnu cán ta nandaja vaha mé á na.

¹⁵Joo xójo ndivaha ini na sacuahá nuú jutu xihín na jánahá ley Moisés tá naxini na ña xitúhún nacaja mé á ta tá naxini joho na ña cája cáhnu na valí cán mé á tá cáchí na já: “Cája cáhnu í da naquixi chĩchi David.” Saha ña cán queá xójo ini na ¹⁶ta já nacachi na já xihín Jesús:

—Á xini johún ña cáhan na valí yóho —nacachi na xihín Jesús.

Já nacachi Jesús já:

—Ajan, xini joho í ña cája cáhnu na Ndióxi. Á coo nacahvi ndó tũhun Ndióxi nu cáchí a já:

Janda na valí ta janda na chíchĩ nacaja Ndióxi xihín ná,

ña ná cuu caja cáhnu na mé á, cáchí tũhun Ndióxi —nacachi Jesús xihín na cán.

¹⁷Anda já najandacoo a na já naqueta jatá ñuu cán cuahan chí ñuu Betania ta cán nasahin a.

Tá nachicaan Jesús cháhan jata titó ñuhú

(Mr. 11:12-14, 20-26)

¹⁸Ta inga quiví itaan tá nandicó coo a cuahan chí Jerusalén já nacasáhá cuíco a cuahan. ¹⁹Ta yuhú íchĩ cán naxini a cándichi in titó ñuhú. Ta chí nasahan sándehé a á fin cuíhi nu do caxi a. Joo coo ñaha ná ndiñehé a. Ndaha uun do cán cuití va fin. Anda já nacachi a já xihín do:

—Ni in túhún ga tañu a cána cuíhi nu yóho —nacachi a xihín do.

Chí ivi laá nahichĩ titó ñuhú cán. ²⁰Tá naxini na xíca tuun xihín Jesús cán ña yóho já nacatónto na já cáchí na já:

—Ndá cuéntá queá nahichĩ titó ñuhú cán ivi tũhun —nacachi na xihín Jesús.

²¹ Ta nanducú ñehe Jesús tũhun nu ná já ñacachi a já:

—Mé a ndaa ná caħan i xihĩn ndo ña tá ná candee ini ndó yeħe ta ni loho co cáhvi ivi joho ini ndó já quea cuu caja ndó ña náħnu cháħa nuú ña ñacaja i yóho. Ta janda cuu cachi ndó xihĩn in yucu: “Caxoo ta cuáhán jáquetún mún ini tañuhú”, ta chí já ndusa coo. ²² Ta tá ná candee ini ndó yeħe nani xica tahví ndo nu Ndióxi ta co cáhvi ivi joho ini ndó já quea ñeħe ndó ña xica ndo nu á —ñacachi Jesús.

Tá ndaca tũhún na Jesús yo saħan ndee nu á ña jánaħa mé á nuú ñayivi

(Mr. 11:27-33; Lc. 20:1-8)

²³ Tá nandihĩ já nandihvi Jesús ini veñuhu cáħnu cán ta nani jánaħa tũhun Ndióxi nuú na ndúu cán naxinu na sacuaħa nuú jutũ xihĩn na sacuaħa nuú na Israel cán nu á. Já ñacachi na já xihĩn á:

—Yo já saħan ñamanĩ nuun cajún ña cajún yóho —ñacachi na.

²⁴ Anda já nanducú ñehe Jesús tũhun nu ná já ñacachi a já:

—Ta ná ndaca tũhún ri yeħe va ndohó ta tá ná nducú ñeħe ndó tũhun nuú i anda já caxi tũhun i nu ndó yo já nasahañ ñamanĩ nuú i caja i ña caja i yóho. ²⁵ Ta viti cachi ndó xihĩn i yo já ñachindahá Juan ña ná quixi da caja ndúta dá ñayivi. Á Ndióxi ñachindahá da á ñayivi ñachindahá ñahá —ñacachi Jesús ndaca tũhun a na.

Já ñacasáħa ndítũhún xihĩn táhan na já cáhĩ na já:

—Tá ná cachĩ ña Ndióxi quea ñachindahá Juan ta já nducú ñeħe Jesús tũhun nu yo já cachi da xoho: “Ndá cuéntá quea coo ñaxeen ndó candúsa ndó da, dá já”, cachi Jesús xoho. ²⁶ Ta tá ná cachĩ ña ñayivi cúu na ñachindahá Juan já yihví yo ña ndicuĩta ñayivi xihĩn yo. Jáchi tóco ndihĩ na cándúsa na ña ñaquixi Juan

jáyaha da ña ñacahañ Ndióxi nuú ñayivi —cáhĩ na ndítũhún xihĩn táhan na.

²⁷ Sahá ña cán quea ñacachi na já xihĩn Jesús:

—Co xini toho nde yo já ñachindahá Juan.

Anda já ñacachi Jesús já xihĩn ná:

—Ta ni yeħe a cáxi tũhun i nu ndo yo já nasahañ ñamanĩ nuú i caja i ña yóho —ñacachi Jesús xihĩn na cán.

Sácu Jesús quiahva saħa ivi da cúu jahyi in dataa

²⁸ Anda já ñacachi tucu Jesús xihĩn na cán já:

—Cuni joho ndó ña nayaha in tañu. Iin in dataa ta nasahĩin ivi jahyi ta da. Ta nasahañ da nuú in táhan da cán já ñacachi da já xihĩn dá: “Jahyi a, cuáhán caja chúun lohún nu ñuhú i nu cáa tó uva”, ñacachi da xihĩn jahyi da. ²⁹ Já ñacachi jahyi da já xihĩn dá: “A cũhun toho i jáchi co xica ini i cũhun i”, ñacachi da. Joo tá nandihĩ ñacahvi ini da ña a váha ná cuu ini da chí já ñaquee da cuahañ da caja chúun da nu ñũhu tátá da. ³⁰ Ta jári nasahañ tátá da cáħan da xihĩn inga jahyi da ta quiahva já nasahnda ri da chuun nuú da cán. Ta da cán ñacachi da já xihĩn tátá da: “Ajan. Cũhun i”, cáhĩ da. Joo tá nandihĩ coo nasahañ toho da.

³¹ Ta viti cachi ndó xihĩn i ndá da cúu da ñacaja ña cúni tátá da —ñacachi Jesús.

Já ñacachi na cán:

—Da nu cuítĩ.

Anda já ñacachi tucu Jesús já:

—Mé a ndaa ná caħan i xihĩn ndo ña iin cháħa saħa na játaħa jũhún cuéntá impuesto xihĩn najihĩ xica jii ña ná cacomĩ Ndióxi cuéntá saħa ná a juú ga ndohó. ³² Jáchi ñaquixi Juan, da jácandúta ñayivi najánaħa da ndohó ndaja ndítahan caja ndó ta coo ñaxeen ndó candúsa ndó da. Joo na játaħa jũhún cuéntá impuesto xihĩn najihĩ xica jii ñacandúsa na ña ñacahañ da. Ta vatĩ ñax-

ini ndó ña yóho joo cōó ñaxeen ndó ndi-jama ndó ña cāja ndó jáchi cōó ñaxeen ndó candúsa ndó mé Juan.

Sácú Jesús quiahva sahá java mozo, da ñacaja quini xihín xitoho da

(Mr. 12:1-12; Lc. 20:9-19)

³³Cuni johō ndó ná cacu u inga quiahva nu ndo. Nasahin in dataa ta najandee cuaha dá tó uva nu ñuhu dá. Ta nasacu da in corra yíto nu do. Ta ñacavaħa da in nuú cuhni mé uva cán ña cavaħa vino. Ta ñacavaħa da in nu jíco canúu da já cuu candaa da tóco ndihi dó cán.

’Anda já nasahan ndojó da ñuhu dá nuú java na caja chúun na ña. Ta já ñaquee da cuahan xicá da. ³⁴Ta tá ñaxinu tiempo jáquee na já ñachindahá da java mozo da ña ná cuhun na nuú na ndúu cāja chúun ñuhu da cán ña ná ndiquiahva na nu dá ña cáni nu dá ndiquehe da saħa ñuhu dá ña nasahan ndojó da nuú na cán. ³⁵Joo ndaja coo na cāja chúun nu ñuhu cán ñatiin na in táhan da cúu mozo da cán ta ñacani na da. Ta inga táhan da cán ñandicuita ñee na xihín yuu. ³⁶Joo mé da xihín ñaha ñuhu cán ñachindahá cuaha chága da mozo da nasahan da nu ñuhu dá. Ta tá quiahva ñacaja na xihín mé java mozo nasahan nu cuítí cán quiahva já ñacaja ri na xihín tóco ndihi mozo cán.

³⁷’Tá ñandihí já nasacu ini da xihín ñaha ñuhu cán chindahá da jahyi da jáchi ñacahan da: “Cája i cuéntá coo toní ñuhú na xihín jahyi i”, ñacahan da xihín ñaha ñuhu cán. ³⁸Joo tá ñaxini na cāja chúun ndojó ñuhu cán ña vaxi da cúu jahyi da xihín ñaha ñuhu cán já ñacachi xihín táhan na já: “Candehé ndo. Yóho vaxi da cúu jahyi xitoho í. Ta tá ná xinu quivi quivi xitoho í ta da yóho cacuu da ndicojo chuun saħa ñuhu yóho. Cóho cahní yó da já ná candoo ñuhu yóho

ndáħa mí”, ñacachi xihín táhan na cán. ³⁹Ña cán quea ñatiin na da ta ñatavá na da janda yuhú cútu ta cán nasahní na da —ñacachi Jesús sácú a quiahva.

⁴⁰Anda já ñandaca tuhún Jesús na ndúu cán já ñacachi a já:

—Ndía cáhan ndo caja da xihín ñaha ñuhu yóho xihín na cāja chúun nu ñuhu dá —ñacachi a.

⁴¹Anda já ñacachi na cán já xihín Jesús:

—Ña caja da quea cahní da na quini, mé na ñacaja chúun tóo nu ñuhu da cán. Ta já ndiquiahva ndojó da ñuhu da nuú java ga na ña ná caja chúun na nu á. Ta tá jáquee na ndiquiahva na nu dá ña cáni nu dá ndiquehe da saħa ñuhu dá —ñacachi na cán xihín Jesús.

⁴²Já ñacachi Jesús já xihín na cán:

—Á a ñaha cahvi ndó tuhun Ndióxi nu cáchi a:

Mé yuu ña najácana da cávaħa vehe, ña cán cúu ña ñanduu yuu ndúhu saħa vehe ña iin chága saħa.

Ña yóho quea ñacaja Ndióxi, ta cúu á in ñaha cáhnu ndivaħa nu yo, cáchi tuhun Ndióxi.

⁴³Ña cán quea cáhan i xihín ndó ña cacu xoo Ndióxi ndohó ña ná a cácomí ga mé á cuéntá saħa ndo. Ta quiahva mé á ñamaní nuú java ga ñayivi ña ná ndihvi na nuú cacomí Ndióxi cuéntá saħa ná, mé na ndiquiahva na nu á ña cáni nu á ndiquehe a. ⁴⁴Ta cáchi i xihín ndó ña yeħe cúu u tátuhun mé yuu cáhan i saħa. Ta ndá na ná ndicava jatá yuu cán chí chachi xéħe na. Quiahva já ndihí saħa ñayivi tá cō cúní na candúsa na yeħe. Ta tá mé yuu cán ná yaha ndicava jatá in na já caji ndihí ñahá. Quiahva já ndihí saħa ñayivi ini indayá tá cō cúní na candúsa na yeħe —ñacachi Jesús.

⁴⁵Tá ñaxini johō na cúu sacuaħa nuú jutu xihín na fariseo cán ña yóho, ñacandaa táhyí ini na ña saħa mé ná cáhan Jesús. ⁴⁶Sahá ña cán quea ñanducú na

tiin na mé á joo coó n̄acuu caja na sahá ña nayihvi na ñayivi jáchi cándusa ñayivi cán ña cáhan Jesús cuéntá Ndióxi.

Sácú Jesús quiahva sahá vicó tándaha

(Lc. 14:15-24)

22 Tá nandihí já ñacasáhá tucu Jesús jánaḥa ñayivi xihín ndinuhu quiahva. Já cáchí a já xihín ná:

²—Nuú cacomí Ndióxi cuéntá sahá ñayivi cúú á tátuhun ña nayaha xihín in rey tá ñacavaḥa da in vicó ña tándaha jahyí ta da. ³Ñachindahá da mozo da ña ná cuhun da cana da na ndítahan quixi. Joo coó ñaxeen na quixi na mé víco. ⁴Anda já ñachindahá chága da mozo da ña ná caxi tuhun da nuú na ndítahan quixi cán ña sa ñacaja ndíví da ña cuxu na. Sa ñaxihí tindiquí xihín java ga quítí, rí ñandaha. Sa ñacandíví ndihí ñaha cuéntá víco tándaha sahá ña cán queá ná quixi na. Ña yóho cúú chuun ñatahnda nu mozo cán cachi da xihín na ndítahan quixi cán. ⁵Joo co ndáa na cán cuhun na. In táhan da cán ñaquee da cuahan da candehé da nu ñúhu dá. Ta inga da ñaquee da cuahan da caja ndahví da. ⁶Ta java ga na cán ñatiin na mozo mé rey cán ta ñacaja xíxi na xihín dá janda quiahva ñasahní ñahá na. ⁷Anda já ñaxojo ndivaha ini rey cán sahá ña cán queá ñachindahá da soldado da ña ná cuhun na cahní na na ñasahní ndii cán ta ná chicaan ñúhu dá ñuu na. ⁸Anda já ñacachi tucu rey cán já xihín java ga mozo da: “Sa ñacandíví tóco ndihí ñaha ña coo víco joo na ñacana i cán coó saḥa toho na quixi na víco. ⁹Ña cán queá cuáhán ndó ndijáá cáyé náhnu ta ndá ñayivi ñacuu cana ndó na ná quixi na víco tándaha yóho”, ñacachi rey cán ñasahnda da chuun nu mozo da. ¹⁰Anda já ñaquee mozo da ñasahan na ndijáá cáyé ta ndaja cáa mé ñayivi najátaca na. Ñayivi vaha xihín na quini viti ña-

taca ñacaja na. Ta já najácutú na vehe nuú coo víco tándaha cán xihín ñayivi.

¹¹’Anda já nandihvi rey nu ñúhu na cán já ñaxini da ndácaan in dataa, da co ndíxi jáhma ña ndíxi na ndúu víco tándaha. ¹²Ta ñacayati mé rey nu dá já ñacachi da já xihín dá: “Amigo, ndaja ñacajún ñaquihvún yóho tá co ndíxi tohún jáhma ña ndíxi na ndúu víco tándaha”, ñacachi rey xihín da cán. Joo coó ñanducú ñehe da tuhun nu rey. ¹³Anda já ñasahnda rey chuun nu mozo da. Já ñacachi da já xihín ná: “Cató ndó ndáha dá xihín saḥa dá. Ta jácana ndó da chí jata nuú naá yávi. Cán cuacu ndivaha da anda quiahva cahná nuḥu da”, cáchí da. ¹⁴Jáchi cuahá ndivaha cúú ná ñacana Ndióxi ña ná cacomí a cuéntá saḥa joo chá cúú ná ndiquiahva na ndáha mé á ña ná cuu caxi a na —ñacachi Jesús.

Ndáca tuhún na Jesús á ndítahan nu ná chahvi na jihún cuéntá impuesto

(Mr. 12:13-17; Lc. 20:20-26)

¹⁵Tá nandihí já ñaquee na fariseo ñasahan na jándique táhan na tuhun na ndaja caja na coto ndojó na Jesús xihín tuhun cáhan mé á já ná cuu jácojo na cuachi jatá. ¹⁶Ña cán queá ñachindahá na java na cuéntá mé ná xihín java na cuéntá Herodes nuú Jesús já ñacachi na já xihín á:

—Maestro, xini nde ña ndinuhu ña ndaa cáhan mé ndó. Ta cándaa ini nde ña jánaḥa ndó ña ndaa saḥa íchi cuéntá Ndióxi. Ta co queḥe ndó cuéntá tá cáhan núu ñayivi saḥa ndo. Ta cándaa ini nde ña tá cáhan ndó sahá in ñaha cája ñayivi cúú á sahá ña sándehe ndó janda ínima ná. ¹⁷Sahá ña cán queá cúni nde cándaa ini nde ndía cachi ndó sahá ña yóho: Á ndítahan nuú nde chahvi nde jihún cuéntá impuesto nuú da cómi cuéntá sahá ñuu Roma. Á chahvi nde ña á a chahvi toho nde ña —ñacachi na cán xihín Jesús.

¹⁸ Joo sa ñacandaꝝ ini Jesús ña cáhvi núu ini na sahá ña cán queá ñacachi a já xihín ná:

—Co cúú ndó tá quiahva ndáa ndó jáchi cúni ndó coto ndojó cuití ndó yehe.

¹⁹ Jánaha ndó in táhan jjuhún ña cháhvi ndó impuesto jan nuú i —ñacachi Jesús.

Anda já nasahan na in jjuhún ça naní denario nu á. ²⁰ Tá ñaxini Jesús ña yóho já ñacachi a já xihín ná:

—Yo ñahná ta yo quivi queá ndáa nu á —ñacachi a.

²¹ Já ñacachi na cán já xihín á:

—Ñehe a ñahná xihín quivi da cómi cuéntá sahá ñuu Roma —ñacachi na.

Anda já ñacachi tucu Jesús já:

—Ndiquiahva ndó ña cúú ñaha da cómi cuéntá sahá ñuu Roma jan nu dá. Ta ndiquiahva ndó ña cúú ñaha Ndióxi nu á —ñacachi a.

²² Tá ñaxini johó na cán ña yóho já ñacatontó na ta najándacoo na a ñaquee na cuahan na.

Tá ndáca tũhun na Saduceo Jesús á mé a ndaa nditacu ndii

(Mr. 12:18-27; Lc. 20:27-40)

²³ Ta sa mé quivi já nasahan java na saduceo çahan na xihín Jesús. Ta mé na saduceo yóho co cándusa na ña nditacu tucu na sa ñaxihí. Sahá ña cán queá ñandaca tũhún na Jesús já cáhí na já xihín á:

²⁴ —Maestro, nu ley ñacahí Moisés sanahá natahnda chuun ta cáhí a já: “Tá tándaha in dataa xihín ñájihí da ta tá xihí da ta coó jahyi da cácu já queá ndítahan nuú ñani da tandaha dá xihín ña cuáan ñacandoo cán. Ta já ná coo jahyi da cán xihín yuhú nuú ñani da”, cáhí ley Moisés. ²⁵ Ta viti cuni johó ndó ná cacu nde in quiahva nu ndó. Tañu mé nde yóho nasandu usa ñani. Ta da nu cuití cán ñatandaha dá xihín in ñáñaha. Tá ndihí já ñaxihí da. Joo sahá ña coó

jahyi da ñacacu xihín ñájihí da sahá ña cán queá ñandiquehe ñani da, da chí ivi jata dá ña cuáan cán. ²⁶ Ta quiahva já ñandoho ri da chí ivi cán jáchi ñaxihí da ta coó jahyi da ñacacu xihín ña. Ta janda ndíhusa ñani cán ñatandaha xihín ña ta ndíhusa da ñaxihí ta ni in da coó ñacacu jahyi xihín ña. ²⁷ Ta tá nu ndíhí ñaxihí ri ñáñaha cán va. ²⁸ Ta viti cachi ndó xihín nde tá ná xinu quivi nditacu tucu ndii, ndá da cacuu ndusa yí ña cán jáchi ndíhusa ñani cán ñatandaha xihín ña ñuyivi yóho —ñacachi na saduceo cán xihín Jesús.

²⁹ Anda já ñacachi Jesús já:

—A váha toho cáhan ndo jáchi co xini ndó ndaja cáhan tũhun Ndióxi ta ni co xini ndó ndá quiahva cáhnu cúú ndée Ndióxi. ³⁰ Jáchi mé quivi tá ná nditacu tucu ndii a tándaha ga ná ta ni a quiahva na jahyi jíhí na tandaha ná. Cacuu na tátũhun tátó Ndióxi ndúu indivi ta co tándaha na cán. ³¹ Joo sa xini yo ña nditacu tucu ndii. Á a ñaha cahvi ndó tũhun Ndióxi nu cáhí a já: ³² “Yehe cúú Ndióxi ña cája cáhnu Abraham ta yehe cúú Ndióxi ña cája cáhnu Isaac ta yehe cúú Ndióxi ña cája cáhnu Jacob viti”, ñacachi a. Ta ña yóho cúni cachi a ña tácu yii va Abraham xihín Isaac xihín Jacob vatí sa ñaxihí yiquí cuñu na —ñacachi Jesús.

³³ Tá ñaxini johó ñayivi ndúu cán ña yóho já ñacatontó na xihín ña jánaha Jesús nu ná.

Tá çahan Jesús ndá ley queá cáhnu chága

(Mr. 12:28-34)

³⁴ Tá ñañehé na fariseo tũhun ña ñaquee váha Jesús nasahnu a nuú na saduceo já ñanditútu ndihí na. ³⁵ Ta in táhan mé da cán, da jánaha ley Moisés ñandaca tũhún da Jesús jáchi cúni da coto ndojó da mé á. Já ñacachi da já:

³⁶—Maestro, ndíá cúú ña cáhnu chá-ga sáhndá ley Moisés caja í —ñacachi da cán xihín Jesús.

³⁷ Já ñacachi Jesús já xihín dá:

—Ña cáhnu chága nū ley Moisés cúú ña yóho: “Ndítahan quihvi ini ndó Ndióxi, xitoho ndó xihín tóco ndihi íni-ma ndó ta xihín ndinuhu ini ndó ta xihín tóco ndihi xíní túní ndo.” ³⁸ Ña yóho cúú ley nū cuítí ta cúú á ña cáhnu chága nū tóco ndihi ley. ³⁹ Ta tá quiahva ín ña nū cuítí yóho quiahva já ín ri ña chí ivi va ta cáhí a já: “Xíní ñúhú quihvi ini ndó ñani táhan ndó tá quiahva quihvi ini ndó mé ndó.” ⁴⁰ Ta jata ndívi ña yóho tín tóco ndihi ley Moisés xihín ña najánaḡa ña profeta sanahá —ñacachi Jesús xihín ña fariseo cán.

Ndáca tūhún ña Jesús ndáchí ñaquixi a

(Mr. 12:35-37; Lc. 20:41-44)

⁴¹ Ta nani ñanditútú ndihi ña fariseo ndúu na nū Jesús cán já ñandaca tūhún a ña. ⁴² Já ñacachi a já xihín ná:

—Ndíá cáhvi ini ndó saḡa Cristo. Ndá chichi cáhán ndo vaxi a —ñacachi Jesús xihín ná.

Já ñacachi ña cán já:

—Vaxi a chichi David, da ñasacuu rey sanahá —ñacachi ña cán xihín Jesús.

⁴³ Anda já ñacachi tucu Jesús já xihín ná:

—Tá ta mé a ndaa vaxi Cristo chichi David ndá cuéntá queá ñacachi da ña cúú á xitoho da. Jáchi ñachutú ndaa ínima David xihín ínima yii Ndióxi tá ñacahyí da já:

⁴⁴ Já ñacachi Ndióxi xihín xitoho í:

“Cacoo xoo cuáha í yóho janda quiahva ná caja í ña ná cacomún cuéntá saḡá ña co cúní yohó”, ñacachi Ndióxi, ñacachi David.

⁴⁵ Ndávaha cáhí ña ña vaxi Cristo chichi David tá ta sa mé David ñacachi da ña cúú á xitoho da —ñacachi Jesús.

⁴⁶ Ta chí ni in na coo ñacuu caja nducú ñehe na tūhun nū á. Ta janda mé quivi já ni in ga ña coo ñasahan ndeé ini ndaca tūhún chága ña mé á.

Chícaan Jesús cuachi jatá ña fariseo xihín jatá ña jánaḡa ley Moisés

(Mr. 12:38-40; Lc. 11:37-54; 20:45-47)

23 Anda já ñacachi Jesús já xihín tóco ndihi ñayivi ta xihín ña xíca tuun xihín á cán já:

²—Ña jánaḡa ley xihín ña fariseo cúú ná ña ndítahan nū ndicani na ña cúní cachi ley Moisés. ³ Ña cán queá xíní ñúhú caja ndó tóco ndihi ña jánaḡa ña nū ndo. Joo a caja toho ndó tá quiahva caja mé ná jáchi co caja na ña jánaḡa mé va na. ⁴ Jáchi caja na ña ná coo ihvi ndivaha ley janda quiahva co ndeé ini ñayivi caja na ña. Joo mé ná ni loho tín co chindeé ñahá ña. ⁵ Ta caja na tóco ndihi ñaha ña ná cuni ñayivi na jáchi cátóo ña candico listoni náhnu jini ná xihín jico ndáha ná nū ndaa tūhun Ndióxi. Ta cátóo ña coo lándá chága yuhú jáhma ná a juú ga java ga ñayivi. ⁶ Ta tá cuahan ña víco cátóo ña coo na nuú vaha cuítí va. Ta tá quihvi na veñuhu cátóo ña cacoo na nū sácco ña ín chága saḡa. ⁷ Ta cátóo ña ña ná cahan toní ñúhú ndivaha ñayivi xihín ná tá xíca nuu na nuú yahvi. Ta chí a juú quiahva cátóo ña ña ná cachi ñayivi 'maestro' xihín ná.

⁸ Joo ndóhó co ndítahan nū ndó nducú ndó ña ná cahan ñayivi 'maestro' xihín ndo. Jáchi in ñani cúú ndihi ndó ta in tūhún cúú maestro ndo, mé á cúú Cristo. ⁹ Ta a cahan ndo tátá cáhnu xihín ni in ñayivi ñuyíví yóho jáchi in tūhún Ndióxi cúú á tátá ndo ta mé á ín a indiví. ¹⁰ Ta a nducú ndo ña ná cahan ñayivi 'jefe' xihín ndó jáchi in tūhún laá va cúú jefe ndo, mé a cúú Cristo. ¹¹ Ndá da cúú da cáhnu chága tañu ndó xíní ñúhú da caja chúun da saḡá ndihi ndó. ¹² Jáchi

ndá na ndínehe jícó mé, jánuu ndáha Ndióxi na. Joo ndá na jánuu ndáha mé nu Ndióxi, jándínehe jícó mé á na.

¹³Ndáhvi nacuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi sáji nuu ndó nuú ñayivi já ná a cuú cacomí Ndióxi cuéntá saḥa ná. Ta ni ndóhó co ndíquiahva ndó mé ndó ndáha Ndióxi ná cacomí a cuéntá saḥa ndó. Ta cája ndó ña ná a cúu candaa ini ñayivi ndaja caja na ndiquiahva na mé ná ndáha Ndióxi. ¹⁴Ndáhvi nahá nacuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi cándaa ndó vehe najihí cuaan ta tá nandihí cuahá ndivaha xíca tahví ndo nu Ndióxi jáchi cúni ndó jájahvi ndó nuú ña núu cája ndó. Sahá ña cán queá cáchi i xihín ndó ña ndóhó cacuu ndó na ndoho chága ini, caja Ndióxi.

¹⁵Ndáhvi nahá nacuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi a juú quiahva xíca nuu ndó ndúcú ndo in táláa ñayivi ña ná candico na ña jánaḥa ndo. Ta tá sa nandaja ndó na cuéntá mé ndó já cája chága na cuachi janda cáni a nu ná ndoho chága ini na indayá a juú ga mé ndó.

¹⁶Ndáhvi nahá nacuu ndó jáchi cúu ndó tátuhun na cuaá ndáca inga na cuaá. Jáchi jánaḥa ndó ñayivi ña tá sáhan na tuhun na nuú inga ñayivi nani táva na quivi veñuhu cáhnu já queá co ndúsa jáxinu coo na tuhun na. Joo cáchi ndo ña tá táva na quivi jiyhun cuáan ndácaan veñuhu cáhnu já queá ndúsa jáxinu coo na tuhun na, já cáchi ndo. ¹⁷Joo tóntó ndivaha ndó ta cúu ndó tátuhun na cuaá viti. Jáchi co cándaa ini ndó ña íin chága saḥá veñuhu cáhnu a juú ga saḥá jiyhun cuáan jáchi mé jiyhun cuáan cúu á cuéntá Ndióxi saḥá ña ndácaan ini veñuhu cáhnu ña cúu cuéntá mé á. ¹⁸Ta inga tucu ña jánaḥa ndó nuú ñayivi cúu

ña yóho: Tá sáhan in na tuhun na nuú ñayivi nani táva na quivi nu ná Ndióxi já queá co ndúsa jáxinu coo na tuhun na. Joo cáchi ndo ña tá táva ñayivi quivi ña sájoco na cánúu nu ná cán já queá ndúsa jáxinu coo na tuhun na, já cáchi ndo. ¹⁹Joo tóntó ndivaha ndó ta cúu ndó tátuhun na cuaá. Jáchi íin chága saḥá nu ná cán a juú ga saḥá ña sájoco na cánúu nu ná jáchi ña sájoco na cán cúu á cuéntá Ndióxi saḥá ña cánúu a nu ná cuéntá mé á. ²⁰Sahá ña cán queá ndá na táva quivi nu ná já queá táva ndihi ri na quivi tóco ndihi ña sájoco na cánúu nu ná cán. ²¹Ta ndá na táva quivi veñuhu cáhnu já queá táva ri na quivi Ndióxi jáchi cán íin mé á. ²²Ta ndá na táva quivi indivi já queá táva ri na quivi Ndióxi xihín quivi nu sácco a saḥndá a chuun.

²³Ndáhvi nahá nacuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Mé ndó cávaha ndó uxu táhndá ña jáquee ndó ñundáhyi ndo ta sáhan ndó in táhndá ña nu Ndióxi. Já cája ndó anda yucu válí ña támi sáhan tátuhun menta xihín anís xihín comino. Joo co cája ndó ña íin chága saḥa ña saḥndá ley Moisés. Jáchi co cája ndó ña ndaa ta co cándáhvi ini ndó ñayivi ta co cándeé ini ndó Ndióxi tá quiahva saḥndá ley caja ndó. Mé a ndaa xíní ñuhú cája ndó tóco ndihi ña yóho joo a jándacoo ndó ña jóco ndó nu Ndióxi in táhndá nuú uxu táhndá ña ñéhe ndó. ²⁴Mé ndó cúu ndó tátuhun na cuaá ndáca inga na cuaá. Jáchi ndinuhu ini ndó cája ndó ña coo cuahá saḥa cuéntá ley Moisés joo sácú xoo ndó ña íin chága saḥa nu Ndióxi caja ndó. Cúu ndó tátuhun in da ndíhi ini da tavá da in ndicama loho ndácaan tásá da ná a cóco da ri. Joo co íhvi toho nu dá cocó da in camello.

²⁵Ndáhvi nahá nacuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi ndíhi ini ndó caja ndó costumbre ña ndícata ndó

jata vaso xihín jata coho joo ña ñúhu ini a cán najátaca cuíhna ndo sahá ña ndiáva ndivaha ini ndó ña núu. ²⁶ Ndáhví nahá nacuu ndó, ña fariseo jáchi cúu ndó tátuhun ña cuaá. Ña ndítahan caja ndó ñu cuítí queá ndaja víi ndó ínimá ndó já cacuu ndó tátuhun in vaso á in coho sa nandicata vaha na jáchi nandivií ini a xihín jata viti.

²⁷ Ndáhví nahá nacuu ndó, ña jánaha ley Moisés xihín ña fariseo jáchi co cúu ndó tá quiahva ndáa ndó. Cúu ndó tátuhun vehe válí ndíta camasanto ñu táán ña ndii. Ndató jándicuchu na jata joo chí ini a a juú quiahva quini sáhan jáchi ndinuhu lásá ndii ñúhu ini a. ²⁸ Quiahva já cúu mé ndó jáchi ndáa ndó tátuhun ñayivi vaha ndivaha. Joo mé a ndaa co cúu ndó tá quiahva ndáa ndó jáchi ndinuhu ña núu ndácaan ínimá ndo.

²⁹ Ndáhví nahá nacuu ndó, ña jánaha ley Moisés xihín ña fariseo jáchi co cúu ndó tá quiahva ndáa ndó. Cávaha ndó vehe válí ndíta camasanto nuú cañuhu lásá ña nasacuu profeta sanahá ta jácacutú ndó nuú nanduxu ña nacaja ndaa. ³⁰ Ta cáchí ndo já: “Ta tá nasanduu nde tiempo nasanduu tásáhnú jícó yo sanahá ta chí a chíndeé toho nde ña nasahní profeta, ña nasanduu sanahá”, cáchí ndo. ³¹ Ta xihín ña yóho náha táhyí a ña naquixi ndó chichi ña nasahní profeta sanahá. ³² Cuáhán ndo jáxinu coo ndó mé cuachi nacasáhá cája tásáhnú jícó ndo sanahá.

³³ Mé ndó cúu ndó tátuhun coo jáchi cája ndó tá quiahva cája coo. A cuú cacu ndaa ínimá ndó ta chí tandaa quivi cuhun ndó indayá ñu ndoho ndivaha ini ndó. ³⁴ Sahá ña cán queá yehe chindahá i java profeta ñu ndo xihín java ña ndichí xihín java ña jánaha tuhun Ndióxi ñu ndo. Joo java na cahní ndó ña ta java na cata caa ndó ña ndica cruxu ta java na cani ndó ña ini veñuhu ta java na taxí ndó ña tá ñuu tá ñuu. ³⁵ Ña cán queá ca-

ca Ndióxi cuénta ñu ndó saha tóco ndihi ñayivi ndaa, ña nasahní ndo sanahá. Ca-ca mé á cuénta saha Abel, da nasacuu da ndaa janda quiahva naxinu coo a nuú ca-ca mé á cuénta saha Zacarías, da nasacuu jahyi Berequías. Mé da yóho nasahní ndó ini veñuhu tañu ñu náa xihín nuú yii ndivaha. ³⁶ Mé a ndaa ná cahan i xihín ndo ña caça Ndióxi cuénta saha tóco ndihi ndii jan nuú ñayivi ndúu tiempo viti.

Tá sácu Jesús sahá ñayivi ndúu ñuu Jerusalén

(Lc. 13:34-35)

³⁷ Ndáhví nahá nacuu ndó, ña ndúu ñuu Jerusalén. Jáchi sáhní ndó ña profeta. Ta ndicuíta ndó cáni ndó ña xihín yuu ña nachindahá Ndióxi ñu ndó. Cuahá ndivaha tañu cúní jándataca ndihi i ndohó joo coo naxeen ndó cuni johó ndó. Cúu á tá quiahva cája nduxú tá játaca rí jahyi válí rí tixi ndixi rí. ³⁸ Ta viti cuni johó ndó ña cahan i xihín ndo. Vaxi quivi tá janí ndáha mé vehe ndó candoo a. ³⁹ Ta mé a ndaa ná cahan i xihín ndó ña a cúní ga ndó yehe janda quiahva ná xinu coo quivi cachi ndó: “Cáhnú nahá ná cacuu da vaxi cuénta Ndióxi, xitoho í”, cachi ndó —nacachi Jesús xihín ña cán.

Cáxi tuhun Jesús ña vaxi quivi ndihi sahá veñuhu cáhnú ndácaan ñuu Jerusalén

(Mr. 13:1-2; Lc. 21:5-6)

24 Ta tá sa naquee Jesús veñuhu cáhnú Jerusalén cán cuahan ja nacativi ña xica tuun xihín á ñu á ta nacasáhá ña cahan ña xihín á ndá quiahva cáa veñuhu cán. ² Joo nanducú ñehe Jesús tuhun ñu ná já nacachi a já:

—Mé a ndaa ná cahan i xihín ndo ña janda ni in yuu yóho a candoo jata inga yuu jáchi vaxi quivi tá nditaní ndihi ña yóho —nacachi Jesús xihín ña xica tuun xihín á cán.

**Ña coo tá sa ñacayati
quíví ndihi saha ñuyíví**

(Mr. 13:3-23; Lc. 21:7-24; 17:22-24)

³Anda já ñaquee Jesús cuahan chí yúcu nu cáa yitó olivo xihín na xíca tuun xihín á. Ta nani ndúu ña cán ñacativi na xíca tuun xihín á nu ñi in coo a cán já ñacásáhá ndáca tuhún xóo na a já ñacachi na já xihín á:

—Cúni nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá ná xinu coo quíví quixi tucu ndó ñuyíví yóho. Ta ndaja coo tá ná ndihi saha ñuyíví —ñacachi na xihín Jesús.

⁴Já ñacachi Jesús já:

—Cuéntá coo ndó ná a jándahvi ni in na ndohó. ⁵Jáchí cuahá ndivaha na quixi na cuéntá mí i ta cahan ña ña tuhún tá cachi na já xihín ndo: “Yehe cúu Cristo, da ñachindahá Ndióxi cacomí cuéntá sahá ñayivi”, cachi na. Ta xihín ña yóho cuahá ndivaha ñayivi jándahvi na. ⁶Ta jándá johó ñehe ndó tuhun ña ndicuíta ñayivi caní táhan na yóho á cáa. Joo a cáyihví toho ndó jáchí já ndítahan coo. Joo ña yóho coo cúni cachi a ña ñaxinu coo quíví nu ndíhí. ⁷Jáchí ñayivi ndúu in nación ndicuíta na caní táhan na xihín ña ndúu inga nación. Ta quixi tamá ta quixi cuehe ta ndaja táhan quixi a táan. ⁸Ta ña yóho cacuu a tondóhó ña casáhá jihna ñúhú vaxi nuú ñayivi jáchí cámani xinu coo nuú ndoho chága ini na.

⁹Anda já tiin na ndohó ta ndiquiahva na ndohó ndahá ña coo cúni ndohó já ná caja xíxi na xihín ndo. Ta cahni ña ndohó ta tóco ndihi ñayivi ndúu ñuyíví candají ña ndohó sahá yehe. ¹⁰Ta mé tañu já cuahá ná jándacoo na ña candeé ini na yehe ta ndaja táhan mé ná candají táhan na ta ndaja mé ná jicó tuhún táhan na. ¹¹Ta quixi cuahá ndivaha ña tuhún ta cachi na cúu ná profeta cuéntá Ndióxi

joo jándahvi na cuahá ndivaha ñayivi. ¹²Ta sahá ña ndicuahá ndivaha ña núu ñuyíví yóho sahá ña cán queá jándacoo cuahá ñayivi ña quíhvi ini táhan na.

¹³Joo ndá ña ná candico tuun íchi mí i janda ná xinu quíví quivi na, ña cán cacuu na cacu ndaa ínima. ¹⁴Ta ní cúu ñuyíví ndicuíta nuu tuhun vaha cahan sahá yehe já ná candaa ini ñayivi ndá quiahva cacomí Ndióxi cuéntá saha ná. Anda jáví ndihi saha ñuyíví.

¹⁵Ña cáhvi tutu ná candaa ini na ña cahan. Sanahá ñacahyí profeta Daniel sahá in ña quini ña játiví ñahá. Tá ná cuni ndó ña xinu coo ña yóho nuú yíi cuéntá Ndióxi ¹⁶já queá ndá ña ndúu estado Judea xíni ñúhú cunu na cuhun na chí yúcu. ¹⁷Ta ndá ña cándojó jini véhe, coo ndítahan nuu na tavá ña ndá ñaha vehe na. ¹⁸Ta ndá ña ndúu yúcu, ná a ndícó coo na vehe na ndiquehe na jáhma ná. ¹⁹Ndáhvi ñacuu najihí, ña ñúhu jahyi mé quíví já. Ta ndáhvi ñacuu najihí ña néhe ndaa ña valí táhan ña chíchí yíi. ²⁰Caca tahví ndo nu Ndióxi ña ná a cacuu a tiempo vixi tá ná cunu ndó cuhun ndo. Ta caca tahví ndo nu á ña ná a cacuu a quíví ndiquehe ndeé ná. ²¹Jáchí quíví ndoho ndivaha ini ñayivi cacuu a cán. Jáchí janda tá ñacava sahá saha ñuyíví coo ñandoho ini na tá quiahva ndoho ini na mé quíví já. Ta tá ná vaha ña jan, a ndícó coo ga ña ndoho ini na quiahva já. ²²Ta tá ná a ndája cuítí Ndióxi tiempo cán ni in ñayivi a cúu cacu ndaa. Joo sahá ña sa ñacaxi mé á sahá ña cán ndaja cuítí mé á tiempo cán.

²³Ta tá ná cachi in na xihín ndó: “Candehé ndo. Yóho íni Cristo, da ñachindahá Ndióxi cacomí a cuéntá sahá ñayivi.” Á tá ná cachi na: “Candehé ndo. Cáa íni da”, cachi na, já queá a cándúsa toho ndó ña. ²⁴Jáchí quixi cuahá ña jándahvi ndohó ta ndaja na mé ná tá tuhun Cristo. Joo a juú Cristo cúu ná.

Ta quixi cuahá ná ta cachi na cahan na cuéntá Ndióxi ta jári caja na cuahá ndivaha ná náhnu xihín ná xitúhún ná ná jándahvi na ñayivi. Ta janda na sa nacaxi Ndióxi jándahvi na tá ná cuu caja na ña. ²⁵ Candehé ndo jáchi sa nacaxi tuhun yachi ndihi i ña yóho xihín ndo. ²⁶ Ña cán queá tá ná cachi na xihín ndo: “Candehé ndo. Yucú íchí cáa íin Cristo.” Já queá a cúhún ndó jan. Á tá ná cachi na xihín ndo: “Candehé ndo. Ini vehe yóho ndácaan da cúú Cristo.” A cándúsa ndó na. ²⁷ Jáchi tá quiahva yehe tása queéta xoo nu cána candii ta xójo cava indivi quiahva já queta yehe, da nachindahá Ndióxi nduu ñayivi. ²⁸ Mé nu candúhu yiquí cuñu ndii cán cacuu nuú ndicutú tiyocó canduu rí.

Ndá quiahva coo tá ná quixi tucu Jesucristo

(Mr. 13:24-37; Lc. 21:25-33; 17:26-30, 34-36)

²⁹ Ta ivi laá tá jacá nayaha quivi ndoho nahá ini na cán já canaá nuú candii ta ni a ndíyehé ga yoo ta janda indivi quee quimi cuyu rí nu núhu ta janda indivi ña nacavaha Ndióxi ndiquiji nuu. ³⁰ Anda já ndaca náha ña xitúhún indivi já candaa ini ñayivi ña vaxi yehe, da nachindahá Ndióxi nduu ñayivi. Ta ndaja táhan ñayivi ndúu níí cúú sahá ñuyiví ndahyi cóhó na ta já cuni na yehe quixi i tañu vico indivi xihín tóco ndihi ndeé e ta cuni na ndá quiahva cáhnu cúú yehe. ³¹ Ta já chindahá i táto mí i ña ná tiví cóhó na trompeta já ná nditaca tóco ndihi na nacaxi i tañu tóco ndihi ñuu jandá níí cúú sahá ñuyiví ta janda níí cúú sahá indivi.

³² Jácuaaha ndó ña cúní cachi mé quiahva sácú u nu ndó sahá yíto tító ñuhú. Jáchi tá yúta ndáha dó cán ta já vaxi núma válí do já candaa ini ndó ña sa nacayati tiempo ihní. ³³ Quiahva já cuu candaa ini ndó ña tá ná cuni ndó ña sa

cúú tóco ndihi ña nacaxi i xihín ndo yóho já cuu candaa cáxi ini ndó ña sa nacayati tiempo quixi tucu yehe ñuyiví yóho. ³⁴ Mé a ndaa ná cahan i xihín ndo ña yaha tóco ndihi ña yóho ta anda jáví quivi na ndúu tiempo viti. ³⁵ Ta ndihi sahá indivi xihín ñuyiví joo a ndihi toho sahá tuhun nacahan i xihín ndo yóho jáchi coo tá coo tá quiahva nacaxi i yóho.

³⁶ Joo ni in túhún toho ñayivi co xini na ndá quivi á ndá hora yaha ña yóho. Ni mé táto Ndióxi ndúu indivi co xini na ndá quivi coo ña yóho. Ta ni yehe, da cúú in túhún jini já jahyi Ndióxi co xini ndá quivi coo ña yóho. In túhún Ndióxi, tátá i queá xini a. ³⁷ Tá quiahva nayaha tiempo tá nasahin Noé sanahá quiahva já yaha ri tá ná tandaa quivi quixi tucu yehe, da nachindahá Ndióxi nduu ñayivi. ³⁸ Jáchi mé tiempo cán tá cámaní cuun javi quini cán já cáxixi ñayivi ta cáxihí na ta tándaha ná ndúu na janda quiahva naquihvi Noé ini barco cáhnu cán. ³⁹ Ta coo naquehe na cuéntá janda quiahva naxinu coo javi quini cán ta najánaá dó sahá ndihi na. Quiahva já a quehe na cuéntá sahá ndá quivi quixi yehe, da nachindahá Ndióxi nduu ñayivi. ⁴⁰ Mé tiempo já canduu ivi dataa xútu da ta in da ndindita cuhun xihín i ta inga da candoo va. ⁴¹ Ta canduu ivi najihí ndíco na ta in ña ndindita cuhun xihín i ta inga ña candoo va.

⁴² Xini núhú coo tiahva vaha ndó jáchi co xini ndó ndá quivi quixi tucu xitoho ndó. ⁴³ Xini núhú candaa vaha ini ndó ña tá xini in dataa ndá hora cuni quihvi taa cuihná vehe da já queá a cúju toho da jáchi candaa vaha da vehe da já ná a quihvi da cuihná vehe da. ⁴⁴ Sahá ña cán queá ndítahan canduu tiahva ri ndóhó va. Jáchi xinu coo yehe, da nachindahá Ndióxi nduu ñayivi mé hora tá co cáhan ndo xinu coo i nu ndo.

**Da cája chúun vaha ta da
co cája chúun vaha**

(Lc. 12:41-48)

⁴⁵ Mé ndó ndítahan nū ndó cacuu ndó tátuhun in da ndíchí jini, da cája chúun vaha nūú xitoho da. Ta najándacoo xitoho da chuun ndáha dá ña ná quiahva da cuxu na java ga cúu mozo xihín da cán. Anda já ñaquee xitoho da cuahan da. ⁴⁶ Tahví ñacuu mé mozo cán tá xinu coo xitoho da ta ndítahan da cája chuun yii va da ña ñacandoo nū dá caja da. ⁴⁷ Mé a ndaa ná çahan i xihin ndo ña quiahva xitoho da cán chuun nū dá ña ná cacomí da cuéntá saha tóco ndihi ñaha cómí xitoho da. ⁴⁸ Joo tá cásáhá da cája núu da ta cáhán da ña cayáncá ndivaha xitoho da ndicó coo da. ⁴⁹ Ta sahá ña cán queá cásáhá da cája xixi da xihín java ga na cúu mozo xihin dá. Ta já cáa ga da cásáhá xixi da ta xíhi da ta já xíni da. ⁵⁰ Ta ndaja coo xinu coo xitoho mozo cán mé quivi coo cáhán da ña xinu coo da. ⁵¹ Anda jáví jándoho quini xitoho da cán ini da jáchi coo cúu dá tá quiahva cáa da. Ta ndítahan ndoho da tá quiahva ndoho tóco ndihi na cája já mé nūú cuacu ndivaha na janda quiahva cáhñá nuhu ná —ñacachi Jesús.

**Sácú Jesús quiahva sahá ña
ñacaja uxu najihí, na tacú**

25 Já cáchí tucu Jesús já: —Tá ná xinu coo quivi cacomí Ndióxi cuéntá sahá ñayivi já cacuu a tá quiahva nayaha xihín uxu najihí, na tacú tá nasahan na vicó tándaha. Tá ñaquehe na candil ña ñúhu sítí ini já cuahan na ndique táhan na xihín da tándaha cán. ² Uhun táhan na tacú cán cúu ná na tácu ini ta uhun na cán cúu ná na coo tácu toho ini. ³ Ndfuhun na coo tácu ini cán ñatiin na candil ñaha na cuahan na joo coo ñaquehe chága na sítí ña jácutú tucu na candil tá sa cúní ndahva ña. ⁴ Joo na tácu

ini cán ñehe na candil ñaha na ta ñehe ri na yúyú sítí cuahan na ña jácutú na candil tá sa cúní ndahva ña. ⁵ Ta ndaja coo ñacasáhá cayáncá mé da tándaha cán sahá ña cán queá ñanaá ini ndihi na ta ñaquiji va na. ⁶ Joo tá ñacuu yati java ñuú já tácu cáyuhú java na já cáchí na já: “Candehé ndo. Sa vaxi da tándaha. Cuáhán queta ndó ndiquehe ndó da”, cáchí na cáyuhú na cán. ⁷ Já ñanda-coo tóco ndihi na tacú cán ta ñacasáhá na cája ndívi na candil ñaha na. ⁸ Anda já ñacasáhá ndfuhun na coo tácu ini cán çahan na xihín ndfuhun na tácu ini cán já cáchí na já xihin ná: “Caja ndó ñamaní quiahva loho ndó sítí ndo nūú nde jáchi sa nandihí sítí nde ta jalóho cúní ndahva candil ñaha nde”, cáchí na coo tácu ini cán. ⁹ Já ñanducú ñehe ndfuhun na tácu ini cán tuhun nū ná já cáchí na já: “A cúu toho caja nde quiahva nde sítí nū ndó jáchi tiahva náá ndimaní dó nū mé nde. Vaha chága cuáhán mé ndó nū cáyahvi dó cueen ndó do”, ñacachi na tácu ini cán xihin ná. Já ñaquee na coo tácu toho ini cán cuahan na. ¹⁰ Joo nani ñaquee ndfuhun na coo tácu ini cán cuahan na cueen na sítí na já ñaxinu da tándaha cán ta ñandihvi ndfuhun najihí tácu ini cán ini vehe nū ñin vicó tándaha cán ta ñandaji yéhe. ¹¹ Tá ñandihí já ñandai cuu ndfuhun na nasahan ñaxeen sítí cán já cáti ndáha ná yéhe ta cáyuhú na já cáchí na já: “Cuná loho ndó yéhe nūú nde, xitoho”, cáchí na cáyuhú na ndíta na jata véhe. ¹² Anda já ñanducú ñehe da tándaha cán tuhun nū ná já cáchí da já xihin ná: “Coo xini toho i yo cúu ndóhó”, ñacachi da cán xihin ná —ñacachi Jesús.

¹³ Já ñacachi tucu Jesús já:

—Sahá ña cán queá xini ñuhú cuéntá vaha coo ri ndóhó va jáchi coo xini ndó ndá hora xinu coo quivi cacomí Ndióxi cuéntá saha ndo —cáchí Jesús.

Ña ñacaja in ña xihín jjuhún da

(Lc. 19:11-27)

¹⁴ Ta já cáchí tucu Jesús já:

—Tá ná xinu coo quivi cacomí Ndióxi cuéntá sahá ñayivi já cacuu a tátuhun ña ñayaha xihín in ña ña. Tá ñaxinu coo quivi quee da cuhun xicá ña já ñacana da java ña cajú chún xihín dá. Ta já ñandiquiahva da jjuhún ña ndahá ña cán ña ná candaa da ña. ¹⁵ Ta tá quiahva tiahva in in da cañehe da jjuhún quiahva já ñasahan xitoho da ñu dá. In táhan ña cán ñasahan xitoho da uhun mil ñu dá ña ná candaa da ña. Ta inga ña cán ñañehe ivi mil. Ta inga ña cán ñañehe in mil. Anda já ñaquee xitoho da cuahan xicá ña. ¹⁶ Ta ndaja coo ña ñandiquiahva xitoho uhun mil ndáha cán ñacaja da ndahvi xihín jjuhún xitoho da ta já ñañehe dá inga uhun mil chága jatá. ¹⁷ Ta jári ña ñasahan xitoho ivi mil ñu cán ñacaja da ndahvi xihín jjuhún cán ta ñañehe dá inga ivi mil jatá. ¹⁸ Joo ña ñasahan xitoho in mil ñu cán ñatiin da jjuhún xitoho da ta já ñasahan ña ñacaan da in yávi ta já najánduxu ña ña.

¹⁹ Ta tá ña ñayaha cuaha tiempo já ñandicó coo xitoho mozo cán. Ta já ñacásahá cajú ví ña cuéntá xihín ña cán. ²⁰ Ta já ñaxinu ña ñañehe uhun mil cán ñu xitoho da ta já ñandiquiahva da inga uhun mil ña ñañehe dá jatá jjuhún cán ñu xitoho da. Ta já cáchí ña já xihín xitoho da: “Candehé ña uhun mil ñasahan ndó ñu i. Joo yóho ín inga uhun mil ñañehé e jatá”, ñacachi da xihín xitoho da. ²¹ Anda já ñacachi xitoho da já xihín dá: “Vaha ndivaha ñacajún. Mozo vaha ndivaha cúu yóhó jáchi chá va ñasahan i ñuun ta vaha ñacaja chún ña. Sahá ña cán queá cajú i ña ná cacomún cuéntá sahá cuaha chága ñaha. Ta viti cuu coún xihín i ta já ná caji chága inún”, ñacachi xitoho da. ²² Tá ñandihí já ñaxinu coo ri ña ñandiquehe

ivi mil cán ñu xitoho da. Já ñacachi da já xihín xitoho da: “Ivi mil ñasahan ndó ñu i joo yóho ín inga ivi mil ñañehé e jatá”, ñacachi da xihín xitoho da. ²³ Anda já ñacachi xitoho da já xihín dá: “Vaha ndivaha ñacajún. Mozo vaha cúu yóhó jáchi chá va ñasahan i ñuun ta ñacaja chún vahun ña. Sahá ña cán queá cajú i ña ná cacomún cuéntá sahá cuaha chága ñaha. Ta viti cuu coún xihín i ta já ná caji chága inún”, ñacachi xitoho da. ²⁴ Joo tá ñaxinu coo ri ña ñañehe in mil ndahá xitoho cán já ñacásahá cáchí ña já xihín xitoho da: “Candehé ña, xitoho i. Sa candaa vaha ini i ña cúu ndó in ña ndacú ndivaha tuhun. Ta vatí coo xítu ndó ñu in ñúhu joo jáquee tá jáquee ndó ñu á. Ta jataca ndó ña ñu coo ñaxutu ndó ña. ²⁵ Sahá ña cán queá ñayihví vi ta ñasahan i najánduxu u jjuhún ñasahan ndó ñu i tixi ñúhu. Joo yóho ín jjuhún ña ndiquehe ndó ña”, ñacachi ña cán xihín xitoho da. ²⁶ Anda já ñacachi xitoho da já xihín dá: “Coo cúun in mozo vaha ñu i. Cúun ña júsá ndivaha. Sa candaa vaha inún ña jáquee e ñu ñúhu ña coo xítu u, ²⁷ ña cán queá ndá cuéntá queá coo ñasahan tóun jjuhún i banco já ná ndiquehe e jiqui á ñu ña cán tá ná ndicó coo i, nduu”, ñacachi xitoho ña cán xihín dá. ²⁸ Anda já ñacachi da xihín java ña ndúu cán: “Candaa ndó in mil ña ndahá ña ña ta quiahva ndó ña ñu ña ña sa cómi uxu mil ña. ²⁹ Jáchi ña cajú chún vaha ñañehe chága ví ña ñaha já queá ná coo cuahá chága ñu dá. Joo ña coo cajú chún vaha janda ña chá cómi ña ndindaa ndáha dá. ³⁰ Ta mozo ña váha toho ña tiin ndó ña jácana ndó ña ñu naá jatá véhe ña. Cán cúu ñu ndáhyi ndá ñayivi janda quiahva cáhñá ñu ña ná sahá ña ndóho ndivaha ini na”, ñacachi xitoho da, —ñacachi Jesús.

Tá ná caví sahá ñayivi ñu Ndióxi

³¹ Já ñacachi tucu Jesús já:

—Tá ná xīnū quiví quixi yehe, da nāchindahá Ndióxi nduu ñayivi ta quixi i xihín tóco ndihi na cúu táto Ndióxi. Anda já cacoo i nu sácoo na sáhná chuun ta já ndicáhnu ndivaha i. ³²Ta nditaca ñayivi nduu ndíjáá ñuyíví nuú i. Ta já casáhá i ndicahnda java táhan i na tá quiahva cája in da ndáá ndicachi tá sáhná java da ndicachi xihín tijúhu ña ná a cáva táhan rí. ³³Ta já chinduu u ñayivi cuéntá mí i, na cúu tátuhun ndicachi cán xoo cuáha i. Ta xoo íti i chinduu u na co cúu cuéntá mí i, na cúu tátuhun tijúhu cán. ³⁴Ta sahá ña cúu u da cómi cuéntá sahá ñayivi sahá ña cán queá cachi i já xihín na ndúu xoo cuáha i cán já: “Cuáyaha ndó ná cacomí Ndióxi, tátá i cuéntá saha ndo jáchi cúu ndó na nacaja cuhá mé á ñamaní xihín. Jáchi janda tá cámaní cava sáhá saha ñuyíví sa nasacu tiahva mé á nuú canduu ndó ña cacomí a cuéntá saha ndo. ³⁵Jáchi nasahan ndó naxixi i tá nacuico i. Ta nasahan ndó ticuíf nuú i tá nahichi ini i. Ta nandiquehe vaha ndó yehe tá nasacuu u da tóho naxinu i nu ndo. ³⁶Ta najasá ndo jáhma nuú i tá co ñéhé e ña cándixi i. Ta tá nasaquíhvi já nāchindeé ndó yehe. Ta tá nasandacaan i vecaa já naxito nihni ndó yehe.” ³⁷Anda já ndaca tuhún java na nacaja vaha ta já cachi na já xihín i: “Ndá tañu queá naxini nde ña cuíco ndó, xitoho nde ta já nasahan nde ña xixi ndó. Ta ndá tañu naxini nde ña íchi ndó ticuíf ta já nasahan nde ticuíf nu ndo. ³⁸Ta ndá tañu nasacuu ndó da tóho ta nandiquehe vaha nde ndohó. Ta ndá tañu naxini nde ña cámaní jáhma candixi ndó ta najasá nde ña nu ndo. ³⁹Ta ndá tañu queá naxini nde ña quíhvi ndo ta nāchindeé nde ndohó. Ta ndá tañu nasandacaan ndó vecaa ta naxito nihni nde ndohó.” ⁴⁰Anda já cachi yehe, da cómi cuéntá sahá ñayivi já xihín ná: “Mé a ndaa ná cahan i xihín ndó ña tá nacaja ndó a xihín na cúu cuéntá mí i, na coo

saha nuú ñayivi ñuyíví já cúu á tátuhun nacaja ndó a xihín mí i”, cachi i xihín na ndúu xoo cuáha i.

⁴¹’Anda já casáhá cachi i já xihín na ndúu xoo íti i cán já: “Caxoo ndó nuú i jáchi cúu ndó na nacatavi cháhan ta cuhun ndó indayá cañuhu ndó anda ama cáa quiví. Jáchi ña jan cúu ña nasacu tiahva Ndióxi ndacaan tiñáhá sacuaḥa xihín táto mé rí. ⁴²Jáchi coo nasahan ndó ña xixi i tá nacuico i ta ni coo nasahan ndó ticuíf nuú i coho i tá nahichi ini i. ⁴³Da tóho cúu u naxinu coo i tañu ndó ta coo nandiquehe vaha ndó yehe. Ta nandimaní i ña candixi i ta coo nasahan ndó in jáhma loho nuú i. Nasaquíhvi ta nasandacaan i vecaa ta coo naxito nihni ndó yehe”, cachi i xihín na ndúu xoo íti i cán. ⁴⁴Anda já nducú ñehe ri na cán tuhun nuú i já cachi na já xihín i: “Ndá tañu queá naxini nde ña cuíco ndó ta ndá tañu queá naxini nde ña íchi ini ndó ticuíf ta ndá tañu nasacuu ndó da tóho ta ndá tañu nandimaní jáhma ndo ta ndá tañu nasahin quíhvi ndo ta ndá tañu nasandacaan ndó vecaa ta coo nāchindeé nde ndohó”, cachi na ndúu xoo íti i cán xihín i. ⁴⁵Anda já cachi i já xihín na coo cúu cuéntá mí i já: “Mé a ndaa ná cahan i xihín ndo ña tá ta coo nacaja ndó xihín ñani táhan ndó, na coo saha nuú ñayivi ñuyíví já queá coo nacaja ndó ña xihín yehe”, cachi i xihín na coo cúu cuéntá mí i. ⁴⁶Ta já yaha ndihi na cán cuhun ná indayá anda ama cáa quiví. Ta na nacaja vaha cán yaha na nu Ndióxi catacu na anda ama cáa quiví —cáchi Jesús.

Ndítuhún jehé na tiin na Jesús

(Mr. 14:1-2; Lc. 22:1-2; Jn. 11:45-53)

26 Tá nandihí nacahan Jesús tóco ndihi ña yóho xihín ñayivi cán já nacachi a xihín na xíca tuun xihín á cán já:

²—Sá cándaá ini ndó ña tixi ivi quivi coo vicó pascua ta já ndiquiahva na yehe, da nachindahá Ndióxi nduu ñayivi ndahá na cata caa yehe ndica crúxu — ñacachi Jesús xihín na xíca tuun xihín á cán.

³Anda já na sacuaḥa nuú jutu xihín na jánaḥa ley Moisés xihín na sacuaḥa veñuhu nandique táhan na yéhe Caifás, da cúu sacuaḥa chága nu ndíhi jutu cán. ⁴Ta najándique táhan tuhun na ndá quiahva caja na tiin jehé na Jesús ña ná cahní ñahá na. ⁵Já cáchí xihín táhan na já:

—Joo a tíin toho í da tañu mé víco jáchí tiaḥva náa ndivaá ñayivi —ñacachi na.

Tá naḥojo in ñáñáha perfume jini Jesús

(Mr. 14:3-9; Jn. 12:1-8)

⁶Ta ndaja coo íin Jesús ñuu Betania vehe Simón, da cáhan na xihín: taq nan-doho cueḥe táhyi. ⁷Já naxinu in ñáñáha nu á ta cáñee in yúyú ña alabastro ndáha ña. Ta ini mé yúyú cán ñuhu perfume, dó yahvi ndivaḥa. Ta já naxinu ña najácuyu ña do jini Jesús nani íin coo a nu mesa cán. ⁸Tá naxini na xíca tuun xihín Jesús cán ña yóho já ñacasáhá na xójo ini na já cáchí na já:

—Ndá cuéntá queá tiví uun perfume yahvi ndivaḥa yóho. ⁹Jáchí cuu jicó yó do ta já quehé cuahá jihún saḥa do, nduu ta já cuu jasá yo jihún cán nuú na ndahví —ñacachi na cán.

¹⁰Ta ñacandaá ini Jesús ña cáhvi ini na cán ña cán queá ñacasáhá cáchí a já xihín ná:

—Ndá cuéntá queá cája cueḥe ndó xihín ñáñáha jan jáchí ña vaḥa queá ñacaja ña yóho xihín i. ¹¹Jáchí na ndahví níí tiempo canduu na tañu ndó joo yehe a cóo tuun toho i xihín ndo. ¹²Jáchí tá najácuyu ña perfume yiquí cuñu i já ñacaja tiaḥva ña yehe ná coo tiaḥva vi tá

ná casaá quivi nduxu. ¹³Mé a ndaa ná caḥan i xihín ndo ña níí cúu ñuyiví nuú caca nuu ñayivi caḥan na tuhun vaḥa saḥá i ndicani na ña ñacaja ña yóho xihín i já ndicuhun ini na saḥa ña —ñacachi a.

Jicó túhún Judas Jesús

(Mr. 14:10-11; Lc. 22:3-6)

¹⁴Ta ndaja coo in táhan da uxu ivi xíca tuun xihín Jesús, da naní Judas Iscariote ñasahan da caḥan da xihín na sacuaḥa nuú jutu. ¹⁵Ta já cáchí da já xihín ná:

—Ndaja quiahva ndó nuú i tá ná ndiquiahva i Jesús nu ndo —ñacachi Judas xihín na sacuaḥa nuú jutu cán.

Anda já ñasahan na oco uxu jihun cúxú nu dá saḥá Jesús. ¹⁶Ta sa mé nani já ñacasáhá Judas ndúcú da ndaja cuu caja da ndiquiahva da Jesús ndáha ná.

Tá naxijini ndayí Jesús xihín na xíca tuun xihín á

(Mr. 14:12-25; Lc. 22:7-23;

Jn. 13:21-30; 1 Co. 11:23-26)

¹⁷Mé quivi nuú víco xíxi na pan, ña co queé yusá naxaa xihín cán já naxinu na xíca tuun xihín Jesús cán nu á. Já ñacachi na já xihín á:

—Ndáchí cúni ndó cuhun nde caja ndíví nde cajini ndó vicó pascua —ñacachi na xihín á.

¹⁸Anda já ñacachi Jesús já xihín ná:

—Cuáhán ndó ñuu jan ta jan cuni ndó in dataa ta já cachi ndó já xihín dá: “Da jánaḥa ndeḥe cáchí xuhun: Cuhun i vehe ndó cajini i vicó pascua xihín na xíca tuun xihín i jáchí sa nandindaa tiempo cuhun i viti” —ñacachi Jesús.

¹⁹Já ñaquee na cán ñasahan na ñacaja na tá íin ñasahnda Jesús nu ná ta cán ñacaja ndíví na ña cajini na vicó pascua.

²⁰Ta ndaja coo tá ñacuaá já ñasacoo Jesús nu mesa xihín ndífluxu ivi na xíca tuun xihín a cán. ²¹Ta nani xijini na já ñacasáhá cáchí a já:

—Mé a ndaa ná caħan i xihin ndó ña in táhan ndó, na xica tuun xihín i cacuu da jicó túhún yeħe —naçachi Jesús xihin ná.

²² Anda já naçasáhá na cán cacuéħa ndivaha ini na já naçasáhá tá in tá in na ndáca tuhún na Jesús já cáchí na já xihin á:

—Á yeħe cacuu da jicó túhún ndo, xitoho i —cáchí na ndáca tuhún ñahá na.

²³ Anda já nanducú ñeħe Jesús tuhun nu ná já naçachi a já xihin ná:

—Da naquihvi ndáħa ini coħo xixi i, da cán cúú da jicó túhún yeħe. ²⁴ Yeħe cúú da naħindahá Ndióxi nduu ñayivi ta ndítahan nuú i quivi i tá ñin cáchí tuhun Ndióxi. Joo ndáħvi nahá naçuu da jicó túhún yeħe. Janda vaha cháħa ná a cacú da, nduu —naçachi Jesús.

²⁵ Anda já nandicaħan Judas, mé da jicó túhún ñahá cán já naçachi da já xihín Jesús:

—Xitoho i, á yeħe cúú da jicó túhún ndo —naçachi da xihín á.

—Jivi mún cúú dá —naçachi Jesús xihín dá.

²⁶ Ta nani xixi na ndúu na nañiin Jesús pan já nandiquiahva ndixahvi nu Ndióxi. Tá nandihí já naçahnda java ña ta nandicaħnda ña nuú na xica tuun xihín á cán. Ta já naçachi a já xihín ná:

—Júhun ndó jáchi ña yóħo cúú tá-tuhun yiquí cuñu i —naçachi a.

²⁷ Tá nandihí já nañiin a in vaso nu ñúħu tó uva já nandiquiahva ndixahvi nu Ndióxi já naçachi a já xihín na xica tuun xihín á cán já:

—Coho ndihí ndó dó ñúħu ini vaso yóħo. ²⁸ Jáchi dó yóħo cúú dó tá-tuhun ñí i, dó cuíta saħá cuahá ñayivi já ná ndoo cuachi na. Tá ná cuíta ñí i já candaa ini ndó ña najaxinu coo Ndióxi tuhun a naçahan sanahá. ²⁹ Mé a ndaa ná caħan i xihín ndo ña a cóħo ġa i tó uva janda quiahva ná xinu coo quiví coħo tucu u inga dó vaha cháħa xihín ndo

tá ná xinu quiví cacomí Ndióxi, tátá i cuéntá saħá ñayivi —naçachi a.

Cáxi tuhun Jesús ña chijehé tuhún Pedro ña xini da mé á

(Mr. 14:26-31; Lc. 22:31-34; Jn. 13:36-38)

³⁰ Ta tá nandihí naħita na in canto já naquee na cuahān na yúcu yitó olivo.

³¹ Ta já naçachi Jesús já xihín ná:

—Mé ñuú viti jándacoo ndihí ndó yeħe cuħun ndó saħá ña ndoho i. Já cáchí tuhun Ndióxi já: “Cahní i da ndáa ndicachi ta xihín ña yóħo ndicuita nuu ndicachi jaħa dá cuħun ri”, cáchí tuhun Ndióxi. ³² Joo tá sa ná nditacu tucu u já cuħun jihna ñúħú yeħe estado Galilea anda já cuħun mé ndó —naçachi Jesús.

³³ Anda já nanducú ñeħe Pedro tuhun nu á já naçachi da já xihín á:

—Vatí ná jándacoo tóco ndihí na mé ndó saħá ña ndoho ndó joo a jándacoo toħo i ndohó —naçachi da xihín á.

³⁴ Anda já naçachi Jesús já xihín dá:

—Mé a ndaa ná caħan i xuhun ña mé ñuú viti tá cámaní cana chéle já chijehé tuhún ña xínun yeħe uní táħndá —naçachi Jesús xihín dá.

³⁵ Anda já naçachi tucu da já:

—Vatí ná quivi i xihín ndo joo a chí-jehé tuhun toħo i saħá ña xini i mé ndó —naçachi da xihín Jesús.

Ta quiahva já naçachi tóco ndihí java ġa na xica tuun xihín á cán.

Tá xica tahví Jesús nu Ndióxi in nuú nani a Getsemani

(Mr. 14:32-42; Lc. 22:39-46)

³⁶ Anda já naħinu coo Jesús xihín na xica tuun xihín á cán in nuú nani a Getsemani. Já naçachi a já xihín ná:

—Yóħo cacoo ndó nani ná cuħun i cáa caça tahví i nu Ndióxi —cáchí a.

³⁷ Ta ndáca Pedro xihín ndiví da cúú jahyi Zebedeo cuahān xihín á. Ta já naçasáhá cacuéħa ndivaha ini a ta a juú

quiahva táhvi ini a. ³⁸ Anda já ñacachi a já:

—A juú quiahva cácuéha ini i chí quivi i cúu ini i. Yóho candati tóo ndó yehe ta coto a cúju ndo —ñacachi Jesús.

³⁹ Ta já ñaquee mé á nasahan loho chága chí nuu já ñacaxítí a janda quiahva ñaxinu taan nu ñúhu. Ta já cáchí a já:

—Tátá Ndióxi, tá ta ná cuu caja ndó ñamaní ña ná a ndóho i ña ihvi ndivaha vaxi nuú i ndoho i. Joo ná coo tá fin cúni mé ndó ta ná a cóo toho ña cúni yehe —cáchí Jesús.

⁴⁰ Tá ñandihí já ñandicó coo a nuú ñajándacoo a na xíca tuun xihín á cán ta já ñandiñehe á na quíji na ndúu na. Anda já ñacachi a já xihín Pedro:

—Á coo ñacuu candita ndó ni in hora. ⁴¹ Xíní ñúhú coo tiahva ndó ta caça tahví ndo nu Ndióxi já ná a cóto ndojó rí quini ndohó. Jáchí ínimá ñayivi cúni a ndinducú a Ndióxi joo yiquí cuñu na co íin tiahva caja ña cúni Ndióxi —ñacachi Jesús.

⁴² Anda já ñaquee tucu Jesús táhndá ivi cuahan tucu a caça tahví a nu Ndióxi já cáchí a já:

—Tátá Ndióxi, tá ta a cúu va caja ndó ñamaní ná a ndóho ini i ña jan já ná coo tá fin cúni mé ndó coo —cáchí a.

⁴³ Tá ñandihí já ñandicó coo tucu a nu ndúu na xíca tuun xihín á cán ta ñandiñehe á na quíji tucu na ndúu na jáchí ñaquehe a ñahnú na. ⁴⁴ Já ñaquee tucu a nasahan xíca tahví a nu Ndióxi táhndá uní ta sa mé tuhun cán ñacahan tucu a. ⁴⁵ Anda já ñaquixi tucu a nu ndúu na xíca tuun xihín á cán já ñacachi a já xihín ná:

—Vatí cúni ndó cuju ndó ta vatí cúni ndó ndiquehe ndée ndó joo a cúu caja ndó ña viti. Jáchí sa ñaxinu coo hora ndiquiahva na yehe, da ñachindahá Ndióxi nduu ñayivi ndahá ñayivi cája cuachi. ⁴⁶ Cuáhán ndacoo ndó ná coho.

Jáchí sa vaxi da jicó túhún yehe —cáchí a.

Tá ñatiin na Jesús

(Mr. 14:43-50; Lc. 22:47-53; Jn. 18:2-11)

⁴⁷ Ta nani cáhan yii va Jesús já ñaxinu Judas, da cúu in táhan uxu ivi na xíca tuun xihín á cán. Ta ndáca da cuahá ñayivi, ñéhe na machítí xihín yíto viti. Ta ña cán cúu ná ña ñaquixi cuéntá ña sacuaña nuú jutú xihín cuéntá ña sacuaña veñuhu. ⁴⁸ Ta mé Judas, da ndiquiahva ñahá cán sa ñacandoo da xihín na cán ña tatí yúhu dá sajóho Jesús jáchí ñacachi da já xihín ná:

—Ndá da ná tatí yuhú u sajóho, da cán cúu dá tiin ndó —ñacachi da.

⁴⁹ Chí ivi laá ñacativi da nu Jesús já ñacahan Ndióxi dá xihín á ta já ñatatí yúhu dá sajóho mé á. ⁵⁰ Anda já ñacachi Jesús já xihín dá:

—Cama chá cajún ña, amigo.

Anda já ñacayati na nu Jesús ta ñatiin tuun na a.

⁵¹ Joo in táhan da xíca tuun xihín Jesús cán, ñatavá da machítí da ta já ñachitúhun da in johó da cúu mozo nuú da sacuaña chága nu ndíhi jutú cán. ⁵² Anda já ñacachi Jesús já xihín dá:

—Chicaan vaha machítí jan jáchí ndá na sáhní xihín machítí, xihín machítí quivi ri na cán va. ⁵³ Á co cándaq inún ña cuu caça tahví i nu Ndióxi, tátá i ña ná chindahá mé á cuaha ndivaha táto mé á ña ná chindeé na yehe. ⁵⁴ Cuu caja i ña joo xíní ñúhú yaha tá yaha ña ñacahyi nuú tuhun Ndióxi ndoho i —cáchí Jesús.

⁵⁵ Ta já ñacachi Jesús já xihín na ñaxinu tiin ñahá cán:

—Cája ndó xihín i tátuhun cája na xihín ña cuíhna jáchí ñaqueta ndó vaxi ndó tiin ndó yehe xihín machítí ta xihín yíto viti. Ta ndijáá ní quivi ñasahin i xihín ndo ini veñuhu cáhnu jánaha i tuhun Ndióxi nu ndo ta ni in tañu coo ñatiin ndó yehe. ⁵⁶ Joo tóco ndihí ña

yóho yáha ña já ná xinu coo ña ñacahyí ña profeta sahá i ini tuhun Ndióxi sanahá —cáchi a.

Tá ñandihí já ñaxinu ndihí ña xíca tuun xihín Jesús cán cuahan ña ta naján-dacoo na mé á.

Tá ñéhe na Jesús cuahan ña nuú ñataca ndihí ña sacuahá

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Tá ñatiin ña cán Jesús já ñéhe na a cuahan ña nuú Caifás, ña cúu sacuahá chága ñu ndíhi jutú. Ta cán sa ñanditútú ña jánaha ley Moisés ndúu na xihín ña sacuahá veñuhu. ⁵⁸ Joo ndaja coo nasandico xíca Pedro Jesús anda quiahva ñaxinu ña yéhe vehe ña cúu sacuahá chága ñu ndíhi jutú cán. Ta já ñandihí da nasacoo ña nuú ndúu soldado cán sándehe ña ndá queá caja na xihín Jesús.

⁵⁹ Ta ña sacuahá nuú jutú xihín tóco ndihí ña cómi cuéntá sahá ña Israel ñataca na cán ndúcu ña cuachi jácojo na jatá Jesús já ná cuu cahní ñahá ña.

⁶⁰ Joo coo ñañehe ná cuachi jíquí ña cuu chinúu na jatá mé á vatí ñaxinu coo cuahá ña ñacahan ña tuhún sahá. Anda jáví ñaxinu coo ivi ga ña cáhan ña tuhún sahá. ⁶¹ Já ñacachi da já:

—Ñaxini johó ñe ñacachi ña ñan já: “Jánditaní i veñuhu cáhnu cán ta jácandichi tucu u ña tíxi uní quiví”, cáchi ña ñacachi ña cán chícáan ña cuachi jatá Jesús.

⁶² Anda já ñandaca ndichi ña cúu sacuahá chága ñu ndíhi jutú cán já cáchi ña ña xihín Jesús:

—Á chí a ndúcu ñehún tuhun nuú ñe sahá cuachi jácojo na jatun —ñacachi da.

⁶³ Joo ni in tuhun coo ñanducú ñehe Jesús ñu dá. Anda já ñacachi ña cúu sacuahá chága ñu ndíhi jutú cán já xihín á:

—Tavún quivi Ndióxi, ña tácu ñin indiví ta cachún xihín ñe á jivi ndusa yóho cúun Cristo, ña cúu in tuhún jini já jahyí Ndióxi, ña ñachindahá mé á cacomí cuéntá sahá ñayivi —ñacachi ña xihín Jesús.

⁶⁴ Já ñanducú ñehe Jesús tuhun ñu dá já ñacachi a já:

—Ajan, jivi yehe cúu u ña cáchi ndó ñan. Ta viti ná cahan i xihín ñe ña vaxi quivi tá cuni ndó yehe, ña ñachindahá Ndióxi nduu ñayivi cacoo i xoo cuáha Ndióxi, mé á ñin cuaha ñe. Ta já cuni ndó yehe ndicó coo i ñuyiví yóho tañu vico tá ná quixi i chí indiví —ñacachi a.

⁶⁵ Tá ñaxini johó ña sacuahá chága ñu ndíhi jutú cán ña yóho já ñandatá ña jáh-má dá ña ná candaa ini ñayivi ña xójo ini da. Ta já ñacachi da já:

—Ndája núu ña yóho Ndióxi. Coo chicuu chága yó ñayivi ná cahan ña xihín yo jáchi sa ñaxini johó ndihí ña ñacaná ña yóho xihín Ndióxi. ⁶⁶ Ta ndaja xini ndó caja i xihín dá viti —ñacachi da.

Anda já ñacachi ndihí ña cán já:

—Íin cuachi ña ñan ta ndítahan cuhun ña quivi da —ñacachi ña cán.

⁶⁷ Tá já ñacasáhá ña xihnu ndaa na tójí ña ñu á. Ta ñacasáhá túxú ña yiquí a. Ta java na cáni jahndá ñu á. ⁶⁸ Tá já cáchi ña ña xihín á:

—Cahan xihín ñe yo ñacani yohó tá ta mé a ndaa cúun Cristo, ña ñachindahá Ndióxi cacomí cuéntá sahá ñayivi —cáchi ña xihín á.

Tá ñachijehé tuhun Pedro ña xini ña Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Tá ndaja coo ñin coo Pedro yuhú yéhe ña cúu sacuahá chága ñu ndíhi jutú cán. Já ñacativi in ñánaha, ña cája chúun mé vehe cán. Já ñacasáhá cáchi ña ña xihín dá:

—Yóhó cúún in táhan da xíca tuun xihín Jesús, da estado Galilea —nācachi nā cán xihín dá.

⁷⁰ Joo ndaja coo nāchijehé tuhun Pedro nu ndihi nā cán nā xíní da Jesús. Já cáhí da já:

—Co xíní toho i ndá saha cáhun —nācachi da xihín nā cán.

⁷¹ Ta tá sa naqueta da yéhe cán já naxini inga nānáha da já nacasáhá cáhí nā já xihín tóco ndihi nā ndúu cán:

—Naxini i naxica tuun da yóho xihín Jesús, da nuu Nazaret cán —nācachi nā cán.

⁷² Ta já nacasáhá tucu Pedro chíjehé tuhun da nā xíní da Jesús ta natavá da quivi Ndióxi já cáhí da já:

—Co xíní toho i ndá da cúú da jan —nācachi Pedro xihín nā cán.

⁷³ Chá va nayaha nā yóho ta nācayati java nā ndúu cán nu Pedro. Já nācachi na já xihín dá:

—Mé a ndaa táhyí jivi táhan nā xíca tuun xihín Jesús cúú ri yóhó va jáchí cáhun tátuhun cáhan nā cán —nācachi na xihín dá.

⁷⁴ Andá já nacasáhá Pedro cánahá da ta natavá da quivi Ndióxi nā co xíní da Jesús. Já cáhí da já:

—Co xíní toho i ndá da cúú da jan —nācachi da.

Tá nācachi da já chí ivi laá nācana chéle. ⁷⁵ Andá já nādicuhun ini Pedro nā nācahan Jesús xihín dá tá nācachi a xihín dá: “Tá cámaní cana chéle sa chíjehé tuhún nā xínun yehe uní tañu.” Andá já naqueta da jatá véhe ta a juú quiahva sácu da jáchí cácuéha ndivaha ini da.

Tá nāndiquiahva na Jesús ndáha Pilato

(Mr. 15:1; Lc. 23:1-2; Jn. 18:28-32)

27 Tá nativi inga quivi itaan já nāndique táhan ndihi nā sacuahā nuú jutū xihín nā sacuahā veñuhu nā

nditúhún nā ndá quiahva jácojo na cuachi jatá Jesús já ná cuu cahní nāhá na. ² Sahá nā cán queá nacató nā mé á ta ñéhe na a cuahan nā ndiquiahva na mé á nu Pilato, da cúú gobernador nuu cán.

Tá naxihí Judas

³ Ta ndaja coo naxini Judas, da najicó túhún Jesús nā nasacu ini nā cán cahní nā Jesús. Já nācavi ini da sahá nā núu nācaja da chí ndáva da cuahan da nducú ñehe da ndíhoco uxu jiuñun cúxú nuú nā sacuahā nuú jutū xihín nuú nā sacuahā veñuhu. ⁴ Já nācachi da já xihín nā cán:

—Cuachi cáhnu ndivaha queá nācaja i jáchí najicó túhún i in da coo cuachi.

Já nācachi nā cán já xihín dá:

—Co sáhní toho nde mé nde sahá nā yóho. Mún xíní ndá queá nācájún —nācachi nā cán xihín dá.

⁵ Andá já nācuilhna Judas jiuñun cán ini veñuhu cáhnu. Ta já naqueta da nasahan da nācata caa da mé dá já nasahní da mé dá.

⁶ Ta já najátaca nā sacuahā nuú jutū jiuñun cán já nācachi xihín táhan na já:

—A váha toho nā ná chicaan yó jiuñun yóho ini sató nu táán nā jiuñun jóco nā nu Ndióxi jáchí ndijí naxihí sahá nā yóho —nācachi na.

⁷ Ta tá sa nānditúhún váha xihín táhan na já nāxeen na in nūñu xihín jiuñun cán. Mé nūñu cán naní a nūñu da cávaha nāha xihín nūndáhyi. Ta nūñu cán cacuu a nu jánduxu nā nā tóho. ⁸ Sahá nā cán queá nasacu na quivi nūñu cán nā cananí a yójo nuú naxita nīi. Ta já naní a jandá viti. ⁹ Ta xihín nā yóho naxinu coo nuú nā nācayí profeta Jeremías sanahá tá nācachi da já sahá Jesús: “Natiin na ndíhoco uxu jiuñun cúxú jáchí nā jan nasacuu yahvi nasacu nā Israel chahvi na sahá dá. ¹⁰ Ta xihín mé jiuñun cán nāxeen na nūñu naní a nūñu da cávaha nāha xihín nūndáhyi jáchí quiahva já

naſahnda Ndióxi chuun nuú i caja i”,
cáchi tũhun Ndióxi.

Tá cándichi Jesús nu Pilato

(Mr. 15:2-5; Lc. 23:3-5; Jn. 18:33-38)

¹¹ Ta ndaja coo cándichi Jesús nu Pilato, da cúu gobernador. Ta já naſasáhá da cán ndáca tũhún ñahá da já cáchi da já xihín á:

—Á mé a ndaa cúun in rey, da cómi cuéntá sahá na Israel.

—Ajan. Jivi ndusa cúu u tá quiahva cáchi ndó jan —naſacachi Jesús xihín dá.

¹² Ta na ſacuaha nuú jutu xihín na ſacuaha veñuhu naſhicaan na cuachi jatá Jesús joo ni in tũhun coo nanducú ñehe a nu ná. ¹³ Andá já naſacachi Pilato já xihín Jesús:

—Á co xini joho tohún ndaja cuahá nuú cuachi jácojo na jatun —naſacachi da.

¹⁴ Joo ni in tũhún tũhun coo nanducú ñehe Jesús nu dá. Chí cátontó ndivaha da cúu gobernador sahá ña co cáhan Jesús.

Sácu ini na ndaja caja na ña ná quivi Jesús

(Mr. 15:6-20; Lc. 23:13-25;
Jn. 18:38-19:16)

¹⁵ Tañu mé víco pascua naſahiin cos-tumbre da cúu gobernador cán sá janí da in táhan da ndácaan vecaa. Ndá da cúní ñayivi janí da, da cán cúu da janí da. ¹⁶ Mé tañu já naſandacaan in da naní Barrabás vecaa. Níi cúu naſaxita nuu tũhun sahá da yóho. ¹⁷ Ta tá naſata ndihi ñayivi já nandaca tũhún Pilato na já naſacachi da já xihín ná:

—Yo cúní ndo ña ná janí i. Á Barrabás janí i á Jesús, da cáchi na cúu Cristo, da naſhindahá Ndióxi cacomí cuéntá sahá ñayivi. Yo janí i cúní ndo —naſacachi da.

¹⁸ Naſacachi Pilato ña yóho xihín ná jáchi sa cánda vaaha ini da ña sahá ña cáhivi ini na xihín Jesús sahá ña cán quea nandiquiahva na mé á nu dá. ¹⁹ Ta

nani iin coo da nu sácoo da sahdá da chuun vechúun cán já naſhindahá ñajíhí da tũhun nu dá já naſacachi ña já: “Á quíhvi ndáhun Jesús jáchi cúu dá in ta ndaa. Nuú anda véhe naſaní i naſajaja Jesús ta ndicani ndivaha ini i sahá”, naſacachi ña.

²⁰ Joo ndaja coo na ſacuaha nuú jutu xihín na ſacuaha veñuhu cán najácahan na ñayivi ña ná caſa na nu Pilato ña ná janí da Barrabás ta ná cahní da Jesús. ²¹ Andá já naſacachi da cúu gobernador cán já xihín ná:

—Yo cúní ndó ña ná janí i.

Andá já naſacachi na cán já:

—Barrabás jan va janí ndó —naſacachi na xihín dá.

²² Andá já naſacachi tucu Pilato já xihín ná:

—Ndíá cúní ndó caja i xihín Jesús, da cáchi ndo cúu Cristo.

Andá já naſacachi tóco ndihi na cán já:

—Cata caa ndó da ndíca crúxu.

²³ Andá já naſacachi tucu Pilato já xihín ná:

—Ndá cuachi naſajaja da, vaaha —naſacachi da xihín ná.

Joo xihín ña yóho ví ga ví naſasáhá cáyuhú na já cáchi na já:

—Cata caa ndó da ndíca crúxu.

²⁴ Ta tá naſaxini Pilato ña co yaa na cán ta ví ga ví ndíva na já naſtiin da ticuí ta nandahá da nu ndíhi ñayivi cán ta já naſacachi da já xihín ná:

—Xihín ña yóho jánaha i nu ndo ña coo cuachi toho ndójo i saha ndá ña ná caja ndó xihín da yóho jáchi coo cuachi toho da yóho. Jata mé ndó ná cuhun ndihi va —naſacachi da xihín ná.

²⁵ Andá já naſacachi tóco ndihi na cán já:

—Vaaha ná candojo nde cuachi ta jan-da jahyi nde viti ná candojo na cuachi sahá ña ná quivi da —naſacachi na cán xihín dá.

²⁶ Andá já najaní Pilato Barrabás. Ta tá nandihí najácaxáhan na Jesús já nandiquiahva da a ndáha ná ña ná cata caa na a ndica crúxu.

²⁷ Andá já ñéhe soldado cuéntá gobernador cán Jesús yuyéhé vechúun. Já najátaca soldado cán java ga táhan da ta cán ñacava toyiví da mé á ndúu da.

²⁸ Tá nandihí já ñatavá na jáhma á. Andá já ñachinúu na in jahmá cuáhá túun jatá. ²⁹ Ta já ñachinúu na in tiyiví íñu jini á. Ta ñachiñee na in ndoo ndahá cuáha. Ta já ñacasáhá na cáxítí na nu á já sácu ndaa ichi ñahá na já cáchí na já xihín á:

—Cáhnu ñahá ná cacuu yóhó, da cúu rey nuú na Israel —ñacachi na.

³⁰ Ta ñacasáhá xihnu ndaa na tójií na nuu á. Ta já cándaa na ndoo cán ndáha á ta cáni na yiquí jini a xihín do. ³¹ Ta tá sa nandihí ñasacu ndaa ñahá na já ñacandaa na jáhma ñachinúu na jatá cán ta najácandixi tucu na a xihín jáhma mé á. Andá já ñéhe na a cuahan na cata caa na a ndica crúxu.

Tá ñacata caa na Jesús ndica crúxu

(Mr. 15:21-32; Lc.

23:26-43; Jn. 19:17-27)

³² Ta tá ñéhe na Jesús cuahan na cata caa na a já nanditahan na in da naní Simón, da ñuu Cirene. Ta ñacaja ndúsa na xihín dá ña ná ndicojo da crúxu nuú cata caa na Jesús. ³³ Ta ñaxinu coo na xiquí naní Gólgota. Tuhun yóho cúní cachi a: nu ndúu lásá yiquí jini ndii. ³⁴ Mé cán ñasahan na vino nu á, dó ñacava táhan xihín ña ova ña ná coho a do. Joo tá naxito ndojó a do coó ñaxeen toho a coho a do.

³⁵ Ta tá sa nandihí ñacata caa na a ndica crúxu já ñaquehe na jáhma á nandicahnda nu táhan na. Joo jihna ñúhú ñasajíquí na sahá ta da ñaquee vaha cán, da cán nandiquehe jáhma á. Xihín ña yóho ñaxinu coo nuú ña

ñacahyí profeta sanahá tá ñacahyí da já: “Nandicahnda nu táhan mé ná cotó ñihnu i ta já nasajíquí na sahá cotó maá i ta da ñaquee vaha cán nandiquehe da ña”, cáchí tuhun Ndióxi. ³⁶ Ta já ñasacoo soldado cán ndúu na ndáá ñahá na. ³⁷ Ta jini ndica crúxu cán ñacahyí na ndá saha ñacata caa na a já cáchí a já: “Da yóho cúu Jesús, da cúu rey nuú na Israel.”

³⁸ Ta sa mé já ñacata caa ri na ivi ta cuíhna xihín Jesús: in da xoo cuáha ta inga da xoo íti. ³⁹ Chí cáva jini mé ñayivi yáha cán cánahá na xihín á. ⁴⁰ Ta já cáchí na já:

—Yóhó cáchún jánditani veñuhu cáhnu cán ta tixi uní víxí quiví cáchún jácandichi tucún ña. Tá ta mé a ndaa cúun jahyi Ndióxi jácacu mún ta cuáhán nuu ndica crúxu jan —ñacachi na xihín Jesús.

⁴¹ Ta quiahva já ñacaja ri na sacuahá nuú jutu xihín na jánaha ley Moisés xihín na sacuahá veñuhu. Sácu ndaa na a já cáchí na já:

⁴² —Najácacu da java ga ñayivi ta viti chí a cuú caja da jácacu da mé dá. Tá ta mé a ndaa cúu dá rey nuú na Israel, ná nuu da ndica crúxu viti ñúhú já ná candúsa nde da. ⁴³ Cándéé ini da Ndióxi ta cáchí da cúu da jahyi Ndióxi já quea ná quixi Ndióxi chindeé a da tá ta mé a ndaa quíhvi ini a da —ñacachi na cán cánahá na xihín Jesús.

⁴⁴ Quiahva já cánahá ri ndíví ta cuíhna táca in in xoo jini á cán xihín á.

Tá ñaxihí Jesús

(Mr. 15:33-41; Lc.

23:44-49; Jn. 19:28-30)

⁴⁵ Tá ñaxinu coo caxiví ndaa ñacanaá ní cúu ñuyiví ta janda caa uní sahini já ñacasáhá nandiyehé tucu. ⁴⁶ Ta sa mé hora já ñacayuhú cóhó Jesús já ñacachi a já:

—Elí, Elí, lama sabactani —ña yóho cúní cachi a: Ndióxi mí i, Ndióxi mí i, ndávaha najándacoo ndáha ndó yehe.

⁴⁷ Ta java na ndíta cán tá naxini joho na tuhun cáhí a já nacachi na já:

—Cána da profeta Elías —nacachi na cán.

⁴⁸ Ivi laá xínu in da nasahan da naxin-daxi da in ticoto ini vino iyá. Ta naxató da ña nuú in yitó ndoq já naxiñee da do yati yúhu Jesús ña ná coho a do. ⁴⁹ Joo na java ndíta cán nacachi na já xihin dá:

—Cóho candehé yo á quixi Elías já-cacu a da —nacachi na cán.

⁵⁰ Anda já nacayuhú cóhó tucu Jesús já naxihí a. ⁵¹ Ta ndaja coo nandatá java ndaa jahmá ndeé ña sáji nuu nuú yii ndivaha veñuhu cáhnu ñuu Jerusalén cán. Janda jini á ta janda sahá nandata. Ta mé hora já nataan ta ndijáa yuu tóto ndúu cán nandata. ⁵² Ta nanuna cáva nu nasañuhu na naxihí ta cuahá ñayivi, na nasacuu cuéntá Ndióxi nanditacu tucu na. ⁵³ Ta tá sa nanditacu tucu Jesús já naxinu na naqueta cáva cán ñuu Jerusalén ta cuahá ndivaha ñayivi naxini ñahá.

⁵⁴ Ta da cúu sacuahá nuú soldado cuéntá Roma xihin da ndáa Jesús xihin da cán tá naxini da ña nataan ta naxini da java ga ña nayaha cán já nacasáha yihví ndivaha da. Já nacachi da já:

—Mé a ndaa táhyí cúu da yóho in tuhún jini já jahyi Ndióxi —nacachi da.

⁵⁵ Ta mé cán nasandita cuahá najihí sánehé xicá na Jesús. Mé na cán cúu na nacaja ndívi ñahá nu Jesús tá nandico na mé á naquixi na janda estado Galilea. ⁵⁶ Tañu najihí cán nasandacaan María, ña ñuu Magdala xihin María, ña cúu náná Jacobo xihin José. Ta cán nasandacaan ri ña cúu náná ndívi da cúu jahyi Zebedeo.

Tá nacicaan na yiquí cuñu Jesús ini cáva

(Mr. 15:42-47; Lc.

23:50-56; Jn. 19:38-42)

⁵⁷ Ta ndaja coo nasahiin in da cuicá naní José, da ñuu Arimatea. Mé da yóho nasacuu da in táhan da nasaxica tuun xihín Jesús. Ta tá sa nacuaá já naxinu da ⁵⁸ nasahan da cahan ndahví da xihin Pilato ña ná ndiquiahva da yiquí cuñu Jesús nu dá. Anda já nasahnda Pilato chuun ña ná ndiquiahva na ña nu dá. ⁵⁹ Ta já naxitiví José cán yiquí cuñu Jesús xihin in jáhma vaha ña vií. ⁶⁰ Ta já nacicaan da yiquí cuñu Jesús ini in yávi ña saá ndacaan ndica cáva ña jacá nacaán da cuéntá mé dá. Ta tá nandihí já nachijahví da yuhú cáva cán xihin in yuu jáhnda cáhnu ta já naquee da cuahan da. ⁶¹ Ta nu yéhe mé cáva cán nasanduu coo María, ña ñuu Magdala xihin inga ña naní María cán.

Tá ndáa java soldado nu ndacaan Jesús

⁶² Ta ndaja coo sa nandihí nacaja ndívi na ñaha cuéntá quivi ndíquehe ndeé na. Ta inga quiví itaan najátaca táhan na sacuahá nuú jutu xihin na fariseo já nasahan na nu Pilato. ⁶³ Já nacachi na já xihin dá:

—Vaxi nde nu ndo caça loho nde ñamaní nu ndó. Jáchí ndícuñun ini nde ña tá nasatacu Jesús, da naxica jándahvi ñayivi cán nacachi da ña tá sa ná yaha uní quivi já nditacu tucu da. ⁶⁴ Ña cúni nde queé ná chindahá loho ndó na cuñun candaa nuú nacicaan na yiquí cuñu da cán janda quiahva ná yaha uní quivi. Jáchí tiahva náa xinu coo na naxica tuun xihin dá ñuu ta caja cuíhna na yiquí cuñu da. Ta já casáha cachi na xihin ñayivi ñuu ña nanditacu tucu Jesús tañu na naxihí. Ta xihin ña yóho jándahvi chága na ñayivi a juú ga jihna —nacachi na.

⁶⁵ Andá já n̄acachi Pilato já:

—Cañehe ndó in táhndá soldado. Cuáhán ndó candaa ndó nu ndácaan da tá quiahva x̄inj mé ndó caja ndó —cáchi Pilato x̄ihin ná.

⁶⁶ Andá já naquee n̄a cán nasahan n̄a já n̄achicají vaha chága n̄a nu ndácaan yiquí cuñu Jesús cán. Ta nasacu na sello yuu jáhndá cán ta já nasacu na soldado ña ná candaa da ña.

Tá n̄anditacu tucu Jesús

(Mr. 16:1-8; Lc. 24:1-12; Jn. 20:1-10)

28 Tá sa nayaha quiv̄i ndíquehe ndée ná ta nat̄ivi inga quiv̄i itaan já n̄axinu María, ña ñuu Magdala x̄ihin inga María cán s̄andehé n̄a nuú n̄achicāan n̄a yiquí cuñu Jesús cán. ²In naá cuítí n̄ataan ndeé ndivaha. Nayaha ña yóho jáchi nanuu in táto Ndióxi indiví. Ta najátiví a yuu jáhndá nasajahvi nuú nasandacaan yiquí cuñu Jesús cán. Ta já nasaco a jatá. ³Ta yéhe mé táto Ndióxi cán tá quiahva yéhe tasa. Ta jáhma ndíxi a cúu á jahmá yaa cachi. ⁴Ta a juú quiahva ná yihví soldado ndúu cán n̄acaja táto Ndióxi chí n̄acasáhá quiji ninu da. Ta já n̄acuyu da nu núhu tátuhun ndii n̄axihí. ⁵Joo ndaja coo táto Ndióxi cán n̄andicahan x̄ihin najihí cán já n̄acachi a já x̄ihin ná:

—A cáyihví toho ndó. Sa x̄iní vaha i ña ndínducú ndo Jesús, ña n̄acata caa na ndica crúxu. ⁶Coo toho a cán iin yóho jáchi sa n̄anditacu tucu a tá quiahva n̄acachi mé á x̄ihin ndo. Naha ndó candehé ndo nuú nasah̄iin a já cuni ndó ña coo ga iin nuú nasacu na ña. ⁷Ta cama ndó cuhun ndó caxi t̄uhun ndó x̄ihin da n̄axica tuun x̄ihin á ña sa n̄anditacu tucu Jesús tañu n̄a sa n̄axihí. Ta viti cánuú mé á cuahan estado Galilea. Ta tá cuhun ndó cán já cuni ndó a. Ta ndicuhun ini ndó ña n̄acachi i x̄ihin ndo —n̄acachi táto Ndióxi cán.

⁸ Andá já naquee mé najihí cán mé nuú nasandacaan yiquí cuñu Jesús. Ta vatí yihví n̄a joo cávatá ndivaha na ta sahá ña cán queá x̄inu na cuahan n̄a caxi t̄uhun na ña yóho nuú n̄a n̄axica tuun x̄ihin Jesús cán. ⁹Ta nani cuahan n̄a ivi laá sa iin va Jesús x̄ihin ná. Já n̄acachi a já x̄ihin ná:

—Ndióxi ná coo x̄ihin ndo.

Andá já n̄acayati n̄a cán nu á já nanumi na sahá ta n̄acaja cáhnu na a. ¹⁰Andá já n̄acachi tucu Jesús já x̄ihin ná:

—A cáyihví toho ndó. Cuáhán ndo caxi t̄uhun ndó x̄ihin n̄a cúu cuéntá mí i ña ná cuhun n̄a estado Galilea jáchi cán cuni na yehe —n̄acachi Jesús x̄ihin najihí cán.

¹¹Ta nani x̄inu najihí cán cuahan n̄a já ndáva java soldado, da nasandaa nuú nasandacaan Jesús cán n̄axinu da ñuu Jerusalén já n̄acaxi t̄uhun da ña n̄acuu nuú n̄a sacuah̄a nuú jut̄u. ¹²Andá já najátaca táhan n̄a sacuah̄a cán x̄ihin n̄a sacuah̄a veñuhu já najándique táhan na t̄uhun na ta já nasahan cuahá ndivaha na j̄iuhún nuú n̄a soldado cán. ¹³Já n̄acachi na já x̄ihin soldado cán:

—Coto a cáhan ndó ña n̄anditacu Jesús. Ña cachi ndó cúu ña yóho: “N̄a n̄axica tuun x̄ihin á cán, n̄a cán cúu n̄a n̄aquixi ñuu ta n̄acaja cuíhná n̄a yiquí cuñu a nani n̄aquiji nde”, já cachi ndó x̄ihin ndá n̄a ná ndaca t̄uhún ndohó.

¹⁴Ta a cáyihví toho ndó tá ná candaa ini da cúu gobernador sahá ña yóho jáchi cahan mé nde x̄ihin dá ta chindeé nde ndohó ña ná a cája da ni in ñaha x̄ihin ndo —n̄acachi n̄a sacuah̄a cán x̄ihin soldado.

¹⁵Andá já naquee da cúu soldado cán j̄iuhún ta n̄acaja da tá quiahva nasahnda n̄a sacuah̄a cán chuun nu dá. Ta x̄ihin ña yóho n̄andicuita nuu t̄uhun sahá ña nayaha cán. Ta cáhan n̄a Israel cán sahá ña yóho janda quiv̄i viti.

**Tá sáhndá Jesús chuun nuú na
naxica tuun xihín á**

(Mr. 16:14-18; Lc.
24:36-49; Jn. 20:19-23)

¹⁶ Joo ndíhuxu in na naxica tuun xihín Jesús cán nasahan na chí Galilea. Já nandaa na in jini yúcu tá quiahva nasahnda mé Jesús chuun nu ná. ¹⁷ Ta tá naxini na mé á já naxaja cáhnu na a. Joo java na cáhvi ivi joho ini na jáchi co cándúsa na ña nanditacu tucu a. ¹⁸ Anda já naxayati Jesús nu ná já naxachi a já xihín ná:

—Nasahan Ndióxi ndée nuú i caja i ña náhnu ndivaha indivi xihín ñuyívi yóho.

¹⁹ Sahá ña cán quéa cuáhán ndo jánahá ndo nuú ñayivi ndúu ndijáá ñuyívi ndaja caja na caca vaha na íchi cuéntá mí i. Ta caja ndúta ndó na xihín quivi Ndióxi, tátá i ta xihín quivi yehe, da cúú in túhún jini já jahyi mé á ta xihín quivi ínima yii Ndióxi. ²⁰ Ta jánahá ndó na ña ná caja na tóco ndihi ña nasahnda i nu ndó caja ndó. Ta mé a ndaa coo i xihín ndo ndijáá ní quivi janda quiahva ná xinu coo quivi ndihi saha ñuyívi. Já ná coo —naxachi Jesús.

Tuhun vaha naçahyí Marcos saha Jesucristo

Tá jácandúta Juan ñayivi yucú íchí

(Mt. 3:1-12; Lc. 3:1-9,
15-17; Jn. 1:19-28)

1 Quiahva johu naçava sáhá tuhun vaha cáhan saha Jesucristo, mé a cúú in túhún jiní já jahyi Ndióxi.

²Sanhá naçahyí profeta Isaías ña cahan Ndióxi xihín jahyi a. Já cáhí a já: Chindahá i in da canú cuhun nu mún, ña ná caxi tuhun da nuú ñayivi saha yóhó ta já ndaja ndacú da íchí nuú yahún.

³Ta cahan cóhó da tañu yucú íchí ta cachi da já xihín ñayivi:

“Caja tiahva ndó íchí nuú quixi xitoho í ta cuná ndó in íchí ndacú nu mé á ña ná ndihvi a ínimá ndo”, naçahyí Isaías.

⁴Ta ndaja coo iin Juan yucú íchí ta nacasáhá cája ndúta dá ñayivi. Ta caxi tuhun da xihín ná ña tá cúní na caja cáhnu ini Ndióxi sahá cuachi na já ndítahan nu ná ndicó coo ini na ta já candúta ná. ⁵Chí naquixi cuahá ndivaha ñayivi estado Judea xihín ñuu Jerusalén taa johu na nu cáhan da ta tá náhma na cuachi na já naçaja ndúta dá na ini yuta Jordán.

⁶Ta nasandixi mé Juan yóho jáhma ña naçavaha na xihín fji camello ta nasandico in ní jáhnda tóco dá. Ta naixi da tica xihín ñuñu yucú. ⁷Tá caxi tuhun da nuú ñayivi já cáhí da já:

—Jatá yehe vaxi in da iin cuaha chága ndée dá a juú ga yehe chí coó sahá i ndica xítí i nu dá ña ndaxí i correa ndusa dá. ⁸Yehe najácandúta i ndohó xihín ticuí joo mé da cán cúú da jándicutú ínimá ndó xihín ínimá yii Ndióxi — naçachi Juan xihín ná.

Tá naçandúta Jesús

(Mt. 3:13-17; Lc. 3:21-22)

⁹Mé tiempo já naquee Jesús ñuu Nazaret ña ndácaan estado Galilea. Naixinu a nu iin Juan ta najácandúta Juan Jesús ini yuta Jordán cán. ¹⁰Ta tá naquee Jesús ticuí cán já naixini a nandinuna indiví ta nanuu ínimá yii Ndióxi jatá mé á. Ta cá ínimá yii Ndióxi yóho tá quiahva cá in ndijata. ¹¹Ta naixini johu na cáhan in a indiví ta já cáhí a já:

—Yóhó cúún jahyi máni i ta cájii ndivaha ini i xuhun.

Tá naixito ndojó tiñáhá saçuaha Jesús

(Mt. 4:1-11; Lc. 4:1-13)

¹²Ivi laá nasahan ínimá yii Ndióxi ndáca Jesús yucú íchí nu coó ñayivi. ¹³Ta cán nasahiin a ivi jico quivi ta mé tiñáhá saçuaha naixito ndojó rí a. Ta cán ndúu quití quini joo naixinu java tátó Ndióxi chindeé na mé á.

Cásahá Jesús cáhan tuhun vaha xihín ñayivi

(Mt. 4:12-17; Lc. 4:14-15)

¹⁴Tá nandihí naçicaan na Juan veçaa já nasahan Jesús estado Galilea caxi tuhun a nuú ñayivi tuhun vaha saha Ndióxi. ¹⁵Já cáhí a já xihín ná:

—Sa naixinu tiempo viti ta naçayati quivi cacomí Ndióxi cuéntá sahá ñayivi. Na ndítahan nu ndo quéa jándacoo ndó cuachi cája ndó ta candusa ndó tuhun vaha ña cuu jáçacu ndohó —naçachi Jesús.

Cána Jesús comí na caca tuun xihín á

(Mt. 4:18-22; Lc.: 5:1-11)

¹⁶In tañu xíca Jesús cuahan yati yuhú tañuhú Galilea. Ta naixini a in da naní Simón xihín Andrés, da cúú ñani. Ndiví mé da yóho cúú dá da tává tiyacá ta

ñúhu da jácana da ñúnu dá ini tañuhú.

¹⁷ Nacasáhá cáchí Jesús já xihín dá:

—Naha quíi ndó candico ndó yehe caca tuun ndó xihín i. Tává ndó tiyacá viti joo caja i ña ná cuu tavá ndó ñayivi tañu cuachi —ñacachi Jesús.

¹⁸ Ta chí ivi laá najándacoo da ñúnu dá ta nandico da Jesús.

¹⁹ Anda já naxica loho ga Jesús chí nuu já naxini a Jacobo xihín ñani da Juan, da cúu jahyi Zebedeo. Ndiví da yóho ñúhu da ini barco ndája vaha da ñúnu dá. ²⁰ Nacana Jesús ndiví da yóho ta chí najándacoo da tátá da, Zebedeo cán ini barco xihín java ga da cája chúun xihín dá ta já nacasáhá xica tuun da xihín Jesús.

Tá ndácaan ínimá quini ini in dataa

(Lc. 4:31-37)

²¹ Naxinu coo Jesús xihín na xica tuun xihín á ñuu Capernaum. Ta tá natandaa quivi ndíquehe ndée ñayivi já naquihvi Jesús ini veñuhu ta nacasáhá jánaħa na cán. ²² Ta nacatontó tóco ndihi ñayivi sahá tuhun cáħan mé á jáchí najánaħa mé á tátuhun in da ĩin saħa cahnda chuun ta co cáħan tátuhun na jánaħa ley Moisés. ²³ Ini mé veñuhu cán nasandacaan in dataa, da ndácaan ínimá quini ini. Nacasáhá cáyuhú rí cán já cáchí rí já:

²⁴ —Jesús, da ñuu Nazaret. Ndá cuéntá queá quihvi nuún xihín nde. Á vasún jándihún saħá nde. Sa xini vaha i yohó ta cándaħ cáxí ini i ña cúun in da yii nachindahá Ndióxi —ñacachi rí cán.

²⁵ Ta nacasáhá Jesús jánaħi a rí quini ndácaan ini da cán. Já nacachi a já:

—Caji yuhun ta janí da yóho.

²⁶ Ta tá quéta rí quini ndácaan ini da cán nasahní yihí rí da ta cáyuhú cóhó rí já naqueta rí ini da cán. ²⁷ Nacatontó tóco ndihi ñayivi chí nacasáhá ndáca tuhún táhan na já cáchí na já:

—Ndíá queá yóho. Ta ndá naquixi tuhun saá jánaħa da yóho jáchí cáħan da xihín rí quini tátuhun in da sáħndá chuun ta chí cándúsa rí quee rí cuħun rí —ñacachi na.

²⁸ Ta chí cama chá nandicuĳta nuu tuhun saħa Jesús níi cúu estado Galilea.

Ta nandaja vaha Jesús ñá cúu xojo Simón

(Mt. 8:14-15; Lc. 4:38-39)

²⁹ Tá naquee na veñuhu já cuħan Jesús xihín Jacobo xihín Juan vehe Simón xihín ñani da, Andrés. ³⁰ Ta ndaja coo cándúhu ñá cúu xojo Simón nuú xito nachicaan cáħni ndeé ña. Ta tá naxinu coo na cán já nacaxi tuhun na nuú Jesús ña quihvi ña. ³¹ Anda já nacayati Jesús nu ña ta natiin a ndáħa ña já nandinehe a ña chí ivi laá nandindaa cáħni á ña. Anda já nacasáhá cája ndiví ña ña cuxu na.

Ndája vaha Jesús cuħá ñayivi

(Mt. 8:16-17; Lc. 4:40-41)

³² Tá naqueta nuu candii ta nacuaá já ñéhe ndihi ñayivi na quihvi xihín na ñúhu ínimá quini ini nacasaħ na nu Jesús. ³³ Ta tóco ndihi na ñuu nandai cuu na yuyéhe nu ĩin Jesús. ³⁴ Nandaja vaha Jesús cuħá ñayivi, na ndóħo tá nuú cuħe. Ta natavá a cuħá ínimá quini ini ñayivi. Joo coo nasahaħ Jesús ñamaní nu rí quini ña ná caħan rí jáchí xini rí yo cúu Jesús.

Xica nuu Jesús jánaħa ñayivi estado Galilea

(Lc. 4:42-44)

³⁵ Ta naha inga quivi itaan tá cámaní yíi tivi nandacoo Jesús ta naquee a ñuu cuħan nuú coo ñayivi ña caca tahví a nu Ndióxi. ³⁶ Tá nandacoo Simón xihín java ga da xica tuun xihín Jesús já naxini na ña coo a ĩin chí naquee na cuħan

na ndinducú na mé á. ³⁷ Ta tá nandinehe ñahá na já cáchí na já xihin á:

—Tóco ndihi ñayivi ndínducú na ndohó.

³⁸ Joo cáchí Jesús já xihin ná:

—Cóho java ga ñuu yati yóho ña ná jánaḥa i tuhun vaha nuú na cán viti jáchi sahá ña yóho vaxi i —cáchí Jesús.

³⁹ Ta chí naḥica nuu Jesús ní cúú estado Galilea cáhan tuhun vaha ini veñuhu in in ñuu cán ta tává a ínima quini ndácaan ini ñayivi.

Tá nandaja vaha Jesús in da ndóho cuehe táhyi

(Mt. 8:1-4; Lc. 5:12-16)

⁴⁰ Ta ndaja coo naçayati in dataa ndóho cuehe táhyi nuú Jesús ta naçaxítí da nu á já naçasáhá cáchí da já:

—Cuu ndaja vaha ndó yehe tá cúní ndó —cáchí da.

⁴¹ Ta natahvi ini Jesús saha dá. Anda já nacani ndaa ndáha á da. Já cáchí a já:

—Cúní ña ná ndivahún ña cán queá nandivahún viti —naçachi Jesús xihin dá.

⁴² Tá naçachi a já chí ivi laá nandin-daa cuehe táhyi ña nandoho da cán. Já nandivi yiquí cuñu da. ⁴³ Tá nandihí najándindayí Jesús da ta nasahnda chuun nu dá já cáchí a já xihin dá:

⁴⁴ —Candehé. A cáhun xihín ni in túhún toho ñayivi ña naçaja i xuhun. Cuáhán ndacún nahun mún nuú jutú. Ta ndítahan jocún ñaha nu Ndióxi tátuhun nasahnda ley Moisés sanahá caja na sa nandivaha. Já ná candaa ini tóco ndihi ñayivi ña sa nandindaa va cuehe nasandohún —naçachi Jesús xihin dá.

⁴⁵ Joo tá naquee da cuahan da naçasáhá da ndicani da nuú ndihi ñayivi ña nandaja vaha Jesús da sahá ña cán queá coo naçuu ga ndihvi tívi Jesús ni in ñuu. Jata ñuu nuú co ndúu ñayivi nasahin a ta janda mé cán xinu coo ñayivi, na quíxi nuú ndijáá ñuu xito nihni na mé á.

Tá nandaja vaha Jesús in da naxihí tuchu saha

(Mt. 9:1-8; Lc. 5:17-26)

2 Tá nayaha chá quivi já nandico coo tucu Jesús ñuu Capernaum. Ta nandaa ini ñayivi ña íin a vehe. ² Ta chí cama chá nanditútu cuahá ñayivi chí co vátí ga yuyehé cándita na. Já naçasáhá cáxi tuhun Jesús tuhun Ndióxi nu ná. ³ Anda já naxinu coo comí taa ta ñéhe da in da naxihí tuchu saha. Nasaa da nu íin Jesús. ⁴ Joo naxini da ña a cuú xinu da yati nu íin Jesús sahá cuahá ñayivi chítú ndaa nu íin a cán. Chí nandaa da jini véhe ta naçasáhá da súná da jini véhe mé xoo nu íin Jesús. Ta mé cán najánuu da xito loho nu cándúhu da quíhvi chí yávi jini véhe cán. ⁵ Tá naxini Jesús ña cándeé ini da cán mé á já cáchí a já xihin mé da quíhvi cán:

—Candehé, jahyi a. Sa naçaja cáhnu ini i sahá cuachún viti —naçachi Jesús.

⁶ Joo java na jánaḥa ley Moisés ndúu coo cán naçasáhá cáhán na: ⁷ “Ndá cuéntá queá ndája núu da Ndióxi xihín tuhun cáhan da. Jáchi ni in túhún toho ñayivi a cuú caja cáhnu ini sahá cuachi. In túhún jini Ndióxi queá cuu caja cáhnu ini sahá cuachi”, naçahán na. ⁸ Joo sa nandaa ini Jesús ña cáhvi ini na cán chí naçachi a já xihin ná:

—Ndávaha cáhán ndo já. ⁹ Á cáhán ndó ña ihvi chága cachi i xihín da yóho: “Naçaja cáhnu ini i sahá cuachún viti.” Á tá coo ta cachi i xihin dá: “Cuándacoo, ndiquehe xitún ta caca nuún.” ¹⁰ Candehé vaha ndó ná naḥa i nu ndo ña íin sahá i, da naçindahá Ndióxi nduu u ñayivi caja cáhnu ini i sahá cuachi cája ñayivi ñuyívi yóho —naçachi Jesús xihin ná.

Anda já naçachi a xihin mé da naxihí tuchu saha cán:

¹¹—Ta viti cáhan i xuhun cuándaco ndiquehe xito lohún ta cuanúhu — ñacachi a.

¹²Chí ivi laá nandacoo mé da quíhvi cán ta nandiquehe da xito loho da já ñaquee da cuahan da nuú ndihi na ndúu cán. Anda já ñacatóntó tóco ndihi na ta ñacasáhá cája cáhnu na Ndióxi já cáchí na já:

—Ni in túhún tañu coo ñaxini nde in ñaha cáhnu tátuhun ña yóho —ñacachi na.

Tá ñacana Jesús Leví, da cáhan na Mateo xihín

(Mt. 9:9-13; Lc. 5:27-32)

¹³Tá nandihí já ñasahan tucu Jesús yuhú tañuhú cán ta tá ñacayati cuahá ñayivi nu á já ñacasáhá jánahá nu ná.

¹⁴Nani xíca Jesús cuahan nayaha nu íin in da naní Leví, jahyi Alfeo. Ta íin coo da nu sácoo da játaca jihún cuéntá impuesto. Ta cáchí a já xihín dá:

—Naha quí candicun yehe.

Anda já nandaca ndichi Leví ta nandico da Jesús.

¹⁵Tá nandihí ñasahan Jesús vehe Leví ta ñasacoo a xíxi a xihín cuahá da já-taca jihún cuéntá impuesto xihín java ga na cája cuachi. Ta sa mé cán ñasandu du ri java da xíca tuun xihín Jesús xíxi da tañu na cán jáchí cuahá ñayivi ndico na Jesús. ¹⁶Joo na jánahá ley Moisés xihín na fariseo tá ñaxini na íin coo Jesús xíxi a xihín na cán ñacasáhá cáchí na já xihín da xíca tuun xihín Jesús:

—Ndá cuéntá queá xíxi xitoho ndó xihín na játaca jihún cuéntá impuesto ta xihín java ga na cája cuachi —ñacachi na cán.

¹⁷Tá ñaxini joho Jesús ña yóho ñacasáhá cáchí a já:

—Ñayivi íin vaha coo xíní ñuhú toho na da cája tátá ñahá joo na quíhvi, na cán cúu na xíní ñuhú da cája tátá ñahá. Ta yehe coo vaxi toho i cana i na sa íin vaha.

Vaxi i cana i ñayivi, na cája cuachi ña ná jándacoo na cuachi cája na —ñacachi Jesús.

Cáhan Jesús ndá saha queá cajuhun na

(Mt. 9:14-17; Lc. 5:33-39)

¹⁸In tañu tá xíjuhun na xíca xihín Juan xihín na xíca xihín na fariseo ñaxinu coo java ñayivi nu Jesús ta ñacasáhá ndáca tuhún na mé á já cáchí na já:

—Ndávaha coo xíjuhun toho na xíca tuun xihín yóho joo xíjuhun mé nde, na xíca xihín Juan xihín na xíca xihín na fariseo —ñacachi na.

¹⁹Ta nanducú ñehe Jesús tuhun nu ná já ñacachi a já:

—Á cáhán ndo xíjuhun na ndúu ví-coo tándaha nani íin mé da tándaha cán xihín ná. Uñun. Jáchí cájii íni na nani íin mé da tándaha xihín ná. Chí a cuú toho cajuhun na. ²⁰Joo xinu quívi candaa na mé da tándaha ta anda jávi casáhá cajuhun na. Ta cáchí i xihín ndó ña vaxi quívi candaa na yehe nuú na yóho ta anda jávi casáhá na xíca tuun xihín i cajuhun na —ñacachi Jesús.

²¹Ta ñasacu Jesús inga quiahva nu ná já cáchí a já:

—Ama ná jándaha ñayivi jahmá yatá xihín in túhún jáhma saá jáchí tá nandihí ndíndíí a, sáhdá chága ví a jahmá yatá cán ta jándacáhnu chága ví a yávi ña nandicahmá na cán. ²²Ta ni coo táán na vino saá ini voso níi yatá jáchí jácáhdí mé vino cán níi ta cuiṭa mé vino cán ta tívi voso níi cajú dó sahá ña cán queá ndítahan taán na vino saá ini voso níi saá —ñacachi a.

Ña ñacaja na xíca tuun xihín Jesús in quívi ndiquehe ndée ñayivi

(Mt. 12:1-8; Lc. 6:1-5)

²³In quívi ndiquehe ndée ñayivi nani xíca Jesús cuahan tañu nuú ñaxutu na trigo xihín na xíca tuun xihín á já ña-

casáhá túhun na yucu jini trigo. ²⁴Tá naxini na fariseo ña cája na já nacachi na já xihín Jesús:

—Candehé. Ndávaha cája na xíca tuun xuhun chuun ña co ndítahan caja na quivi ndíquehe ndée yo —nacachi na fariseo.

²⁵Anda já nacachi Jesús já xihín ná:

—Á a ñaha cahvi ndó nuú tuhun Ndióxi nu cáhan sahá ña nacaja David sanahá tá nacuico mé dá xihín na xíca xihín dá. ²⁶Ña nacaja David queá naquihvi da veñuhu Ndióxi tá nasacuu Abiatar da sacuha nuú jutú. Já naxixi da pan yii ña in túhún jutú cúu da ndítahan nuú cuxu ña cán, nduu. Joo naxixi David ña ta nasahan da ña nuú java ga na xíca xihín dá.

²⁷Ta nacachi tucu Jesús já xihín ná:

—Candehé ndo. Coó nacavaha Ndióxi ñayivi ndoho ini na sahá quivi ndíquehe ndée ná jáchi nasacu ini a cavaha in quivi já ná cuu ndíquehe ndée ñayivi. ²⁸Ña cán queá yehe va, da nachindahá Ndióxi nduu ñayivi íin sahá i cahnda i chuun sahá quivi ndíquehe ndée ñayivi —nacachi Jesús.

Tá nandaja vaha Jesús in da nahichi ndáha

(Mt. 12:9-14; Lc. 6:6-11)

3 Naquihvi tucu Jesús ini veñuhu ta cán nasandacaan in dataa, da nahichi ndáha. ²Ta nacasáhá nání na fariseo Jesús sándehe na á ndaja vaha mé á da cán quivi ndíquehe ndée ná já ná cuu chicao na cuachi jatá. ³Anda já cáchi Jesús xihín da nahichi ndáha cán já:

—Cuándacoo ta candichi mahñú yóho —nacachi Jesús.

⁴Anda já nandaca tuhún a na java cán já cáchi a já xihín ná:

—Ndía cáchi ley ndítahan caja í mé quivi ndíquehe ndée ñayivi. Á chindeé

yó ñayivi á caja í ña núu xihín ná. Á jácácu ná á cahni yó na —nacachi Jesús.

Joo ni in túhún tuhun coo nacahan na. ⁵Nacasáhá xójo ini Jesús sándehe a nu ná. Joo táhvi tucu ini a saha ná jáchi cúu ná ñayivi sáa ini. Ta cáchi a xihín mé dataa, da nahichi ndáha cán:

—Jándacaa ndáhun.

Tá najandacaa da ndáha dá ivi laá nandivaha ndáha dá. ⁶Tá nandihí naquee na fariseo veñuhu já nacasáhá na jándique táhan na tuhun na xihín na cuéntá Herodes ña cahni na Jesús.

Tá nanditútu cuahá ñayivi yuhú tañuhú

⁷Joo nasahan Jesús xihín na xíca tuun xihín á yuhú tañuhú ta cuahá ndivaha ñayivi estado Galilea nandico na nasahan na. ⁸Tá nacandaa ini ñayivi ña náhnu cája Jesús, naquixi cuahá na estado Judea xihín na ñuu Jerusalén xihín na ñundáhyi Idumea xihín na inga xoo yuta Jordán xihín java na ndúu ñuu válí jiiñ ñuu Tiro xihín Sidón jáchi candehé na Jesús cúni na. ⁹Sahá ña yóho queá naxica Jesús ñamaní nuú na xíca tuun xihín á ña ná cacu tiqva na in barco nuú ndacaan mé á ña ná a cándihí ñayivi cuaha cán ña. ¹⁰Jáchi cuahá ndivaha ñayivi nandaja vaha mé á. Sahá ña cán queá tóco ndihí na quihvi cáti na jatá ña cani ndaa ndáha ná mé á cúni na.

¹¹Ta tá naxini na ñúhu ínima quini ini cán Jesús ivi laá ndícava xítí na nu á ta casáhá cáyuhú cóhó na já cáchi rí quini ndácaan ini na cán já:

—Yóhó cúun da cúu in túhún jini já jahyi Ndióxi.

¹²Joo jananí Jesús rí cán já sáhdá a chuun nu rí ña ná a cáxi tuhun rí yo cúu mé á.

**Tá naçaxi Jesús uxu ivi
da caca tuun xihin á**

(Mt. 10:1-4; Lc. 6:12-16)

¹³Tá nandihí já naquee xóo Jesús nasahan in xiquí ta tá nandihí nacana mé á java na xica xihin á cán, mé na cuni a çaxi a ta naxinu na cán nu Jesús. ¹⁴Ta tañu na cán nandicaxi Jesús uxu ivi da caca tuun xihin á ta tá nandihí já naxindahá mé á da çuhun da çahan da tuhun Ndióxi xihin ñayivi. ¹⁵Ta naçaja mé á ña cuu ndaja vaha da na quihvi ta cuu cahnda da chuun nu rí quini ña ná quee rí ini ñayivi. ¹⁶Ña yóho cúu quiví uxu ivi da nandicaxi Jesús caca tuun xihin á: Simón, da nasacu tucu a quivi cananí Pedro ¹⁷xihin Jacobo xihin ñani da, da naní Juan, jahyi Zebedeo. Ndívi da yóho nasacu a quivi cananí Boanerges ta mé tuhun yóho cuni cachi a cúu dá tátuhun jahyi in tasa ña cána indiví. ¹⁸Naçaxi a Andrés xihin Felipe xihin Bartolomé xihin Mateo xihin Tomás xihin Jacobo, da cúu jahyi Alfeo xihin Tadeo xihin Simón, da naxica cuéntá na cananista ¹⁹xihin Judas Iscariote, mé da najicó tuhún Jesús tá nu ndíhí.

**Jácojo na cuachi jatá Jesús ña cája
chúun a xihin ndée tiñáhá saçuaha**

(Mt. 12:22-32; Lc. 11:14-23; 12:10)

Anda já naquihvi Jesús ini in vehe xihin na xica tuun xihin á. ²⁰Ta inga tucu naxutú cuahá ñayivi nu íin a janda a cuú cuxu a xihin na xica tuun xihin á cán. ²¹Ta tá nañehé na vehe Jesús tuhun sahá ña yóho ivi laá naquixi na ña cañehe na mé á çuhun a cuni na jáchi naçataçhi Jesús cáhán na.

²²Jári na jánaħa ley Moisés, na naquixi Jerusalén naçasáhá çahan na já cáchi na já:

—Taa yóho ndáçaan Beelzebú ini da, rí cúu saçuaha nu rí quini. Ta xihin ndée

mé rí cán tává da rí quini ini ñayivi — naçachi na.

²³Anda já nacana Jesús ñayivi já nasacu a in quiahva nu ná ja cáchi a já xihin ná:

—A cuú tavá tiñáhá saçuaha mé rí. ²⁴Jáchi tá sáhdá java táhan na ndúu in ñuu ta cáni táhan ndaja táhan mé va na já queá a ñehé íni na coo nahá na. ²⁵Ta tá cásáhá sáhdá java táhan na ndúu in vehe ta cáni táhan na já a cuú ga canduu nahá na mé vehe cán. ²⁶Ta quiahva já tá ná casáhá rí quini ndúu ndáħa tiñáhá saçuaha cáni táhan rí xihin mé va rí janda quiahva sáhdá java táhan rí já queá a cuú canduu nahá rí jáchi ndihí saħa rí.

²⁷Sácu u inga quiahva nu ndo. Ni in dataa a cuú ndihvi da caja cuíhná da ñaha vehe in da ndacú cán joo tá ná cató da da ndacú já cuu quehe da ñaha da cán.

²⁸Mé a ndaa ná çahan i xihin ndo. Ndióxi cuu caja cáhnu ini a saħa tá nuú cuachi cája ñayivi xihin saħa tá nuú tuhun quini çahan na. ²⁹Joo tá ná çahan núu na saħa ínimá yí Ndióxi já queá a cája cáhnu ini Ndióxi saħa ña naçaja na ta anda ama cáa quivi candojo na cuachi saħá —naçachi Jesús.

³⁰Naçachi a ña yóho xihin na cán jáchi cáchi na ña ndáçaan ínimá quini ini a.

**Náná Jesús xihin ñani
a cuni na cuni na a**

(Mt. 12:46-50; Lc. 8:19-21)

³¹Tá nandihí naxinu náná Jesús xihin ñani a nu íin a joo naçandoo na jata véhe. Ta naxindahá na in na nasahan nacana ñahá. ³²Ta na ndúu coo xihin Jesús cáchi na já xihin á:

—Jata véhe cáa íin nánún xihin ñanún ta ndínducú na yohó —cáchi na xihin Jesús.

³³Anda já naçachi Jesús já xihin ná:

—Ná çahan i xihin ndo yo já cúu tátuhun náná i xihin ñani i.

³⁴ Andá já nasandehé a nuú na ndúu coo tiyivi xihin á cán já cáchi a já xihin ná:

—Na yóho cúu ná tátuhun náná i xihin ñani i. ³⁵ Jáchí ndá na cája ña cúní Ndióxi, na cán cúu ná tátuhun ñani i xihín quiahvá i xihin náná i —nacachi Jesús.

Sácú Jesús quiahva sahá in da sátá tata

(Mt. 13:1-9; Lc. 8:4-8)

4 Nacasáhá tucu Jesús jánaḡa ñayivi yuhú tañuhú ta nataca cuahá ñayivi nu íin a cán. A juú quiahva cuahá cúu ná sahá ña cán queá naquihvi Jesús ini in barco, dó cándichi yuhú tañuhú cán. Ta nasacoo a cán ta tóco ndihi ñayivi nandaca ndita na nuú ñutí yuhú tañuhú cán. ² Já najánḡa cuahá ñaha nuú na cán ta nasacu a quiahva nu ná já cáchi a já:

³—Cuni johó ndó ña yóho: In da sátá tata naquee da cuahān da cata da ña. ⁴ Ta tá sátá da ña cuahān da nacuyu java ña íchi ta naxinu laa ta nasaxí rí a. ⁵ Ta java ña nacuyu a tañu yuu nuú coo cuahā ñuhū. Ta cama chá nandutá mé tata cán jáchi co cúná ñuhū nuú nacuyu a. ⁶ Joo tá naqueta candii já najáhichi a ña sahá ña coo cuahā yóho a chí nandihí sahá. ⁷ Ta java tata nacuyu a tañu tohíñú ta tá nasahnu tohíñú cán já nanditáḡa ndihí a nacaja tohíñú chí coo nasahan mé tata cán ndá ñaha jáquee na nu á. ⁸ Ta java tata nacuyu a nuú ñuhú vaha. Nandutá mé tata cán ta nasahnu a já nasahan cuahá ñaha ña jáquee na nu á. Java ña nasahan oco uxu a nuú in in tata ta java ña nasahan uni jico uxu a ta java ña in ciento a nuú in in tata.

⁹ Andá já nacachi tucu Jesús já xihin ná:

—Na íin johó, ná cuni johó na —nacachi a.

Ndícani Jesús ndá saḡa queá nasacu a quiahva nu ná

(Mt. 13:10-17; Lc. 8:9-10)

¹⁰ Tá nacandoo Jesús xihin mé na uxu ivi xíca tuun xihin á cán xihín java ga na ndíco ñahá cán já nacasáhá ndáca tuhún na Jesús ña ndíca cúní cachi a xihín quiahva nasacu a nuú na cán. ¹¹ Ta cáchi a já xihin ná:

—Ña coo nacandaa ini ndó jihna ña cán cándaa ini ndó a viti jáchi nasuná Ndióxi xíní túní ndo cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saḡa, na cán cúu na sácú u quiahva nuu. ¹² Já queá vatí sandehé na joo cúu ná tátuhun na co tvi nuu ta vatí xíní johó na joo cúu ná tátuhun na jóho jáchi co cándaa ini na ña cáhan i xihin ná. Ta sahá ña cán queá co ndíco coo na nu Ndióxi ta ni mé á co cája cáhnu ini sahá cuachi na.

Ndícani Jesús sahá da sátá tata cán

(Mt. 13:18-23; Lc. 8:11-15)

¹³ Ta já cáchi tucu a já xihín na xíca tuun xihin á:

—Ta tá co cándaa ini ndó quiahva, ña nasacu u yóho ndaja caja ndó cándaa ini ndó java ga quiahva ña cachi i xihin ndo. ¹⁴ Mé da sátá tata cán cúu dá tátuhun da xíca cáhan tuhun Ndióxi xihín ñayivi. ¹⁵ Java ga ñayivi cúu ná tátuhun tata ña nacuyu íchi. Táa johó na tuhun Ndióxi ta tá nandihí naxini johó na ña já vaxi tiñahá sacuahā ta cája rí xihin ná ña ndíndójó na ña. ¹⁶ Ta java ñayivi cúu ná tátuhun tata ña nacuyu tañu yuu jáchi táa johó na tuhun Ndióxi ta cájii ini na ndíquehe na ña. ¹⁷ Ta tá quiahva ndiává yucu sahá ña co ñuhū cúná yóho a quiahva já ndóho ñayivi tá casáhá ndicuíta ñayivi cája xíxi na xihin ná. Ta tá casáhá ndóho ini na sahá tuhun Ndióxi ña naxini johó na cán chí

iví lãá jándacoo va na ña cándeé ini na Ndióxi.¹⁸ Ta java na cúu ná tátuhun tata ña nacuyu tañu tohiñú jáchi táa johu na tuhun Ndióxi.¹⁹ Joo ndícani ndivaha ini na sahá ñaha ñuyívi yóho. Cátóó ndivaha na ñaha cuíca chí jándahvi na mé ná xihín ña cán ta xíca ini na coo tóco ndihi ñaha nu ná. Ta cáva nuu táhan ñaha ñuyívi yóho xihín tuhun Ndióxi ini ínima ná sahá ña cán queá cávitá ini na ta coo sáhnua na xihín tuhun Ndióxi.²⁰ Joo ndúu java na xini johu tuhun Ndióxi ta cándúsa na ña. Ta cája chúun vaha na xihin á ta já cuahnu na xihin á. Cúu ná tátuhun tata nacuyu nu ñuhú vaha. Java na cúu ná tátuhun tata ña nasahan oco uxu a nuú in in a. Ta java na cúu ná tátuhun ña nasahan uní jico uxu a ta java na cúu ná tátuhun ña nasahan in ciento a nuú in in tata —nacachi Jesús xihín na cán.

Sácú Jesús quiahva sahá in lámpara

(Lc. 8:16-18)

²¹ Ta cáhí tucu Jesús xihin ná:

—Coó toho chuun lámpara tá chícaan í ña tíxi sato á tíxi xito jáchi chuun ña queá cánúu ña nu jícó já ná jándiyehé ña nu yo.²² Ni in túhún toho ñaha a cuú coo jehé jáchi xinu quivi já ndáca náha nu á. Ta ni in tuhun nacahan jehé ñayivi a cuú coo jehé nahá jáchi xinu quivi já candaa ini tóco ndihi ñayivi sahá tuhun nasahin jehé cán.²³ Na fin johu, ná cuni johu na —nacachi a.

²⁴ Ta cáhí tucu a já xihin ná:

—Candehé vaha ndó ña taa johu ndó. Tá quiahva cája ndó xihín ñayivi quiahva já caja Ndióxi xihin ndo joo chága ví caja mé á xihin ndo.²⁵ Jáchi da sa fin ñaha nuu, ñehé táhvi dá coo chága ñaha nu dá joo da coo ñaha nuu, jandá ña chá fin nu dá ndindaa —nacachi Jesús.

Jánaha Jesús nu ná ndá quiahva sáhnua tata

²⁶ Ta cáhí tucu Jesús já:

—Tá ndiquiahva ñayivi mé ná ndáha Ndióxi ña ná cacomí a cuénta saha ná já cúu á tátuhun in dataa nachihin tata.²⁷ Tá nandihí yáha quivi ta quíji da ta ndácoo da já yáha quivi xihín nuú. Ta já ndúta mé tata cán ta sáhnua a joo mé da nachihin a cán coo xini da ndaja sáhnua a.²⁸ Sáhnua a jáchi chuun nu mé ñúhu queá caja ña ná cuahnu ña cán. Jihna ñúhú ndúta mé yucu trigo já cana yóco a ta nu mé yóco a cán ndícutú ndaa ndíqui á.²⁹ Ta tá nachichi mé ndíqui a cán já queé na cuahan na jáquee na ña jáchi naxinu coo quivi jáquee na ña —nacachi Jesús.

Sácú Jesús inga quiahva saha ndíqui mostaza

(Mt. 13:31-32; Lc. 13:18-19)

³⁰ Ta cáhí tucu Jesús já:

—Viti sácú u inga quiahva nu ndo já ná cándaq ini ndó ndá quiahva caja Ndióxi xihin ñayivi tá casahá a comí a cuénta saha ná.³¹ Cúu á tátuhun in ndíqui mostaza ña chíhin na nuú ñundáhyi. Cúu á ndíqui loho chága nu tóco ndihi ndíqui válí fin ñuyívi.³² Joo tá nandihí nachihin na a nasahnu a ta nanduu a in yíto, dó cáhnua nu ndíhi yíto. Ta xihin ndahá náhnua dó sácú do cáti ta jandá laa ndíquehe ndée ri nu cáti do —nacachi Jesús.

Sácú Jesús quiahva cuití va nuú ñayivi

(Mt. 13:34-35)

³³ Najánaha Jesús tuhun Ndióxi nu ná. Ta nasacu cuahá quiahva nu ná tátuhun ña yóho jandá quiahva xinu nu mé ná cándaq ini na.³⁴ Xihin mé quiahva cuití va najánaha Jesús nuú ñayivi joo tá nandoo Jesús xihin mé na xica tuun xihin á já ndícani cáxi ndihi a ñaha nuú na cán.

Tá najácatáji Jesús tañuhú tá ndícojo do

(Mt. 8:23-27; Lc. 8:22-25)

³⁵ Tá ñacuaá mé quiví cán já ñacachi Jesús já xihín ña xíca tuun xihín á:

—Cóho inga xoo tañuhú yóho.

³⁶ Anda já najándacoo na ñayivi já ñaquee na cuahan ña xihín Jesús ini mé barco nuú sa ndácaan mé á. Ta ndáca táhan java ga barco cuahan dó xihín ná.

³⁷ Ta ndaja coo ñaxinu in tachí quíni ndivaha. Ta ñacasáhá ndícojo tañuhú ndíhvi dó ini barco já ñacasáhá ndícutú ticuí ini mé barco cán. ³⁸ Ta chí xoo jatá mé barco cán cándúhu Jesús quíji a ta cánúu jini á jatá ña yíhi jini ná. Já najándacaxí ini na mé á ta cáchí ña já xihín á:

—Maestro. Chí co sáhní a mé á ña cúní ndihi saha yo jáchí sácoo barco cahá ticuí cuahan do —ñacachi na.

³⁹ Anda já ñandacoo Jesús ta ñacasáhá jananí a tachí xihín tañuhú viti já cáchí a já:

—Catáji ndo.

Já najáyaa tachí. Já ñacandoo táji ní mé cán. ⁴⁰ Anda já ñacachi Jesús xihín ña xíca tuun xihín á:

—Ndávaha ñayihví ñahá ndo. Ndávaha co cándeé ini ndó yehe —ñacachi a.

⁴¹ A juú quiahva ñayihví mé ña cán já ñacasáhá cáhan xihín táhan na:

—Ndá ña cúní dataa yóho ña janda tachí xihín tañuhú cándúsa nu cáhan ña —ñacachi ña cán.

Tá ñandaja vaha Jesús in da ndácaan ínimá quini ini

(Mt. 8:28-34; Lc. 8:26-39)

5 Anda já ñaxinu ña inga xoo mé tañuhú cán nu íin ñundáhyi cuéntá Gadara. ² Ta tá ñanuú Jesús barco cán já ñaquee in dataa camasanto já ñaxinu ña nuú Jesús. Mé ña yóho cúní dá ña ndácaan ínimá quini ini. ³ Ta íin va

da nu ndúxu ndii ta ni in na a cuú cató ña ña ni xihín cadena a cuú cató ña ña. ⁴ Vatí cuahá tañu sa ñacató ña saha dá xihín ndáha dá joo sáhná ña cadena ta jácuachi ña ña ta ni in na a cuú caja xihín dá. ⁵ Nuú ta ndiví xíca nuu da yúcu xihín nu ndúxu ndii cáyuhú ña xíca nuu da ta jándicuehe ña mé dá xihín yuu. ⁶ Joo tá ñaxini xíca ña Jesús, ñihi chá ñasahan ña ñaxinu ña nu íin a já ñandicava xítí ña nu á. ⁷ Ta cáyuhú cóho ña já cáchí ña já xihín á:

—Ndá cuéntá quea vasún quíhvi nuún xihín i. Yóhó cúnú Jesús, ña cúnú in túhún jini já jahyi Ndióxi, ña cáhnu ndivaha. Xíca tahví i nuun ña ná a jándohún ini i —ñacachi da.

⁸ Ñacachi ña ña yóho xihín Jesús jáchí ñacasáhá sáhná mé á chuun nu rí quini cán já cáchí a já:

—Ínimá quini, janí ña yóho.

⁹ Anda já ñandaca túhún Jesús mé rí quini cán já cáchí a já:

—Ndaja nanún.

Anda já ñanducú ñehe ña cán túhun nu á já ñacachi ña já xihín á:

—Legión naní ñe jáchí cuaha cúní ñe.

¹⁰ Ndáhví mé xíca tahví ña cán nu Jesús ña ná a tává xíca a rí quini cuhun rí. ¹¹ Ta ndaja coo xíca nuu cuaha cóchí xíxáhan rí yati yúcu cán. ¹² Saha ña cán quea ñaxíca tahví mé ínimá quini cán nu Jesús já cáchí rí já:

—Chindahá ñehe ná cuhun ñe ndíhvi ñe cóchí cáa.

¹³ Anda já ñasahan Jesús ñamaní ta chí ñaquee ínimá quini ñasañuhu ini ña cán já ñandíhvi rí ini cóchí xíca nuu cán. Ta tóco ndihi cóchí yóho xínu rí cuahan rí ñanuú rí nu ndáyi já najáqueta nuu rí mé rí ini tañuhú chí ñacandaa rí ticuí já ñaxihí rí. Tátuhun ivi mil cóchí ñandihí saha.

¹⁴ Ta ndaja coo mé ña ndáa cóchí cán ñayihví ña chí xínu ña cuahan ña caxi

tuhun da ña nayaha yóho nuú ñayivi ñuu Gadara xihín nuú java ga na ndúu yati cán. Naquee cuahá ñayivi mé cán candehé na ña nacuu. ¹⁵ Tá naxinu coo na nu íin Jesús naxini na íin coo da nasañuhu cuaha rí quini ini cán. Sa nandaca ndixi da jáhma ta sa nandicaxí táhyí ini da. Chí nayihví na. ¹⁶ Ta na naxini ña nacaja Jesús cán ñacasáhá na ndícani na nuú ñayivi ña nandoho dataa, da nasañuhu rí quini ini cán xihín ña nandoho cóchí viti. ¹⁷ Anda já ñacasáhá na xíca tahví na nu Jesús ña ná quee a cuhun a.

¹⁸ Tá sa cuahan ndíhvi Jesús ini mé barco cán já naxinu da nasañuhu rí quini ini cán já ñacasáhá da xíca tahví da nu á ña ná quiahva ñamaní nu dá cuhun da xihín á. ¹⁹ Joo coo nasahan Jesús ñamaní nu dá já nacachi a xihín dá:

—Cuanúhu vehún ta ndicani nuú na vehún ndaja náhnu ñaha nacaja Ndióxi xuhun ta ndaja natahvi ini a sahun — nacachi a.

²⁰ Já naquee da cuahan da ta ñacasáhá da ndícani da nuú ñayivi ndúu java ñuu cuéntá Decápolis tóco ndihi ña nacaja Jesús xihín dá. Chí catóntó na táa johu na ña.

Tá nandaja vaha Jesús jahyi jhí Jairo xihín in ñá nacani ndaa ndáha jáhma á

(Mt. 9:18-26; Lc. 8:40-56)

²¹ Tá nandihí nandihvi Jesús ini mé barco cán já naxinu coo a inga xoo tañuhú nuú naquixi a. Ta cán nanditútú cuahá ñayivi nu á mé yuhú tañuhú cán. ²² Já naxinu in da naní Jairo, da sáhdá chuun veñuhu. Tá naxini da Jesús nacaxítí da sahá. ²³ Ta ndáhví mé naxíca tahví da nu á já cáchí da já:

—Xíhi jahyí i viti ñuhú. Caja ndó ñamaní ná cohó vehe chinúu ndó ndáha ndó jata ña ná ndivaha ñá já ná catacu ñá —nacachi da.

²⁴ Anda já naquee Jesús cuahan xihín dá. Chí cándíhi táhan mé ñayivi ndíco na jatá cuahan na. ²⁵ Ta tañu ñayivi cán ndácaan in ñá quíhvi. Sa naxinu uxu iví cuia ndítahví nii ña. ²⁶ Nandoho ndivaha ini ñá nuú na cája tátá ñayivi ta sa najátiví ndihi ñá jjuhún ña catátá ña cúní ña. Joo a cuú ndivaha ñá ta janda cája ndeé chága ví a xihín ña. ²⁷ Tá naxini johu ña saha Jesús já cuahan ña cayati ñá chí jatá tañu tóco ndihi ñayivi cuahan jata mé a cán. Ta nacani ndaa ndáha ñá jáhma á ²⁸ jáchi nacahán ña: “Tá ná cani ndaa cuití ndahá yo jáhma á já ndavaha í”, nacahán ña. ²⁹ Ivi laá nahíchi nii ña. Naxini cáxí ña nandivaha ñá ta cuahan va cuehe nandoho ña. ³⁰ Jári Jesús iví laá nacandaa ini a ña nandivaha in ñayivi nacaja ndeé mé á. Já ñacasáhá sándehe a chí jata tañu ñayivi. Já ñacasáhá ndáca tuhún á na já cáchí a já:

—Ndá ndó nacani ndaa ndáha jahmá i.

³¹ Ta nanducú ñehe mé na xíca tuun xihín á cán tuhun nu á já cáchí na já xihín á:

—Sándehe vaha mé ndó ndá quiahva cándíhi táhan ñayivi vaxi na xihín ndo ta cáa ga mé ndó ndáca tuhún ndó ndá na nacani ndaa ndáha jáhma ndo —nacachi na.

³² Joo cáva nuu nuu Jesús sándehe a ndá na nacani ndaa ndáha jáhma á. ³³ Ta mé ña nandivaha cán tá nacandaa ini ña ña nayaha já ñacasáhá quíji ninu ña sahá ña yíhvi ña. Já naxinu ña nasaxítí ña nu Jesús. Anda já ñacasáhá ña ndícani ña nu á ndaja cáa ña nacaja ña. ³⁴ Anda já nacachi Jesús já xihín ña:

—Jahyi a, nandivahún jáchi nacandúsún yehe. Cuanúhu ta a ndícani ga inún jáchi nandindaa cuhun —nacachi Jesús.

³⁵ Cáhan yii va Jesús xihín ñá cán tá naxinu java na naquixi vehe mé da sáh-

ndá chuun veñuhu cán já nacachi na já xihin dá:

—Sa naxihí va jahyi ndó. A jáquihvi ga ndó da xíca jánaḥa ñayivi jan —nacachi na.

³⁶ Joo nacaja Jesús tátuhun co xini joho a nuú nacahan na. Nacasáhá cáchí a já xihín da sáhdá chuun veñuhu cán:

—A cáyihví tohún. Candúsa cuití vún yehe —cáchí a.

³⁷ Ta coḥ nasahan Jesús ñamaní nuú na cuahá ndúu cán cuhun na xihín á. Na nasahan cuití xihín á cúu Pedro xihín Jacobo xihín Juan, da cúu ñani Jacobo.

³⁸ Tá naxinu na vehe mé da sáhdá chuun veñuhu cán já naxini a ndíváá ñayivi sácu ndivaha na cáyuhú na ndúu na cán. ³⁹ Já naquihvi a vehe ta já cáchí a já:

—Ndávaha ndíváá nahá ndo ta sácu cuahá ndo. Ta coḥ naxihí toho ñáloho yóho joo quíji cuití va ñá —nacachi a xihín na cán.

⁴⁰ Joo nacasáhá na sácu ndaa na a. Anda já natavá Jesús tóco ndihi ñayivi jata véhe. Na naquihvi xihín á nasacuu tátá náná ñá xihín na xíca tuun xihín á. Ta nacayati a nuú cándúhu mé ñáloho cán.

⁴¹ Já natiin a ndáha ña ta nacasáhá cáchí a já xihín ña:

—Talita, cumi —nacachi a. Mé tuhun yóho cúní cachí a: Ñáloho cáhan i xuhun cuándaco.

⁴² Ivi laá nandaco ñáloho, ná ndacaan uxu ivi cuija ta nacasáhá ña xíca nuu ñá. Já nacatontó tóco ndihi ñayivi. ⁴³ Joo nasahnda Jesús chuun nuú na ndúu cán ña ná a cáxi tuhun na ña nayaha yóho nuú java ga ñayivi. Ta nasahnda a chuun nuú ná ña ná quiahva na ña cuxu mé ñáloho cán.

Íin Jesús ñuu a Nazaret

(Mt. 13:53-58; Lc. 4:16-30)

6 Naquee Jesús cuanúhu á ñuu a. Já naquee na xíca tuun xihín á cuahan

na xihín á. ² Tá naxinu quivi ndíquehe ndée ná já nacasáhá Jesús jánaḥa ñayivi ini veñuhu cán. Ta cuahá ñayivi naxini joho nuú nacahan ta chí nacatontó na ta ndáca tuhún xihín táhan na já cáchí na já:

—Ndájá nacatiahva nahá da yóho ña jánaḥa dá nu yo. Ndá naquixi ña ndíchí jini dá. Ndá naquixi ñaha xitúhún cája da. ³ Á a juú da yóho cúu da cája chúun xihín yito, da cúu jahyi María. Ta ñani da cúu Jacobo xihín José xihín Judas xihín Simón. Ta quiahva da jan ndúu ñuu yóho xihín mí —cáchí na ndáca tuhún táhan na.

Ta chí coḥ naxeen na candúsa ñahá na. ⁴ Sahá ña cán queá nacachi Jesús já xihín ná:

—Vatí tóco ndihi ñayivi cája cáhnu na in profeta joo na vehe da xihín na ñuu da co cándúsa na da —nacachi Jesús.

⁵ Chí coḥ nacuu caja Jesús ña náhnu nuú na cán. Java va na quihvi cuití va nachinúu a ndahá jini ná já nandaja vaha a na. ⁶ Ta chí nacatontó Jesús sahá ña co cándúsa na mé á. Sahá ña cán queá naquee Jesús cuahan jánaḥa ñayivi java ga ñuu válí ndúu yati cán.

Tá nachindahá Jesús uxu ivi na xíca tuun xihín á caxi tuhun na nuú ñayivi saha mé á

(Mt. 10:5-15; Lc. 9:1-6)

⁷ Tá najánditaca Jesús ndíhuxu ivi na xíca tuun xihín á cán já nachindahá a na tá ivi tá ivi cañehe táhan na cuhun na. Ta nasahan ndée nuú ná ña ná cuu tavá na ínimá quini ñúhu ini ñayivi. ⁸ Ta nasahnda a chuun nuú ná ña ná a cáñehe toho na ñaha cuhun na íchí. In túhún ña cuu cañehe na cuhun na cúu in garrote, dó tiin ndaa na. Joo a cuú cañehe na ni yátí ni pan ni jihún. ⁹ Ndítahan cayihi na ndusa ta in túhún cotó na ndítahan candixi na cuhun na. ¹⁰ Ta nacachi a já xihín ná:

—Tá ná x̄inu ɔo ndó in vehe, canduu ndó mé vehe jan andá quiahva x̄inu quiví quee ndó c̄uhun ndo. ¹¹ Ta ndá ñuu ɔo c̄uní n̄a ndiquehe vaha na ndohó ta ni ɔo c̄uní n̄a taa johó na nu cáhan ndo já queá cuáhán queta ndó c̄uhun ndo ta catí ndó ña yáca saha ndo já ná nahá ña cuahan cuachi na cán jatá mé va na. Mé a ndaa ná cahan i x̄ihin ndo ña tá ná x̄inu quiví caha vií Ndióxi sahá ñayivi ndúu ñuyiví já queá jándoho chága Ndióxi ini ñayivi ñuu jan sahá ña ɔo nandiquehe na ndohó a juú ga tá quiahva najándoho a ini n̄a ñuu Sodoma x̄ihin Gomorra sa-nahá —n̄acachi Jesús x̄ihin ná.

¹² Andá já ñaquee mé n̄a x̄ica tuun x̄ihin á cuahan n̄a caxi t̄uhun na nuú ñayivi ña ndítahan nu ná ndicó ɔo ini na jándacoo na cuachi cája na. ¹³ Ta ñatavá cuahá ná ínima quini ñasañuhu ini ñayivi ta tá ñaxojo n̄a síti j̄iní ñayivi quíhvi já nandivaha na.

Tá ñaxihí Juan, da ñacaja ndúta ñayivi

(Mt. 14:1-12; Lc. 9:7-9)

¹⁴ Ñañehe Herodes, mé da cómi cuéntá sahá ñayivi cán t̄uhun sahá Jesús jáchi ní c̄úu nandicuita nuu t̄uhun sahá. Ta já cáchi Herodes já saha Jesús:

—Á a juú Jesús c̄úu á Juan, da najá-candúta ñayivi ta viti nanditacu tucu da. Sahá ña cán queá ín ndée da cája da tóco ndihi ña cája da yóho —cáchi da.

¹⁵ Ta java na cáchi n̄a já:

—Á a juú da yóho c̄úu Elías, da ñasacuu profeta.

Ta java na cáchi n̄a já:

—Á a juú da yóho c̄úu in profeta tát̄uhun n̄a profeta ñasanduu sanahá ndivaha.

¹⁶ Tá ñaxini johó Herodes ña yóho já ñacasáhá cáchi da já:

—Jivi ndusa da yóho c̄úu Juan, da najácandúta ñayivi, da ñasahnda i chuun

na chitúhun ná j̄ico dá joo viti nanditacu tucu da —n̄acachi da.

¹⁷ Jáchi mé Herodes yóho sa ñasahnda da chuun ña ná tiin na Juan, da najá-candúta ñayivi ta ñacató n̄a da já ñachi-caan n̄a da vecaa. Nacaja da ña yóho sahá Herodías, ña ñasacuu ñájíhí Felipe, ñani mé Herodes jáchi sa ñaquehe Herodes ña cacuu ná ñájíhí mé dá. ¹⁸ Ta ñatiin Herodes mé Juan jáchi já ñasacahan Juan já x̄ihin dá:

—Co ndítahan coún x̄ihin ñájíhí ñanún —n̄acachi da.

¹⁹ Sahá ña cán queá ñaxojo ini Herodías x̄ihin Juan. Ta c̄uní ña cahní ná da joo a c̄úu caha ná. ²⁰ Jáchi yíhvi Herodes Juan sahá ña x̄iní da ña c̄úu Juan in t̄aa ndaa, da ɔo cája cuachi. Ña cán queá ɔo ñasahan Herodes ñamaní nu mé Herodías caha ná ña núu x̄ihin dá. Ta t̄aa johó Herodes nu cáhan Juan vatí cáhvi ivi johó ini da sahá ña x̄iní johó da joo cájii ini da t̄aa johó da nu cáhan da. ²¹ Joo in quiví ñanuna nu Herodías cahní ña Juan jáchi ñacaja Herodes in víco cuéntá quiví ñacacu da. Mé já ñacana da da náhnu ndúu nu dá ña ná quixi na cuxu na x̄ihin dá. Ta ñacana da tóco ndihi n̄a c̄úu sacuaha nuú soldado x̄ihin tóco ndihi ñayivi ín saha estado Galilea. ²² Ta ndaja coo ná c̄úu jahyi jíhí Herodías ñaquíhvi ná nu ndúu na x̄ixi na ta ñacasáhá ña x̄ita sahá ña nuú ndihi n̄a cán. Ta ñacatóo Herodes x̄ihín n̄a ndúu x̄ixi x̄ihin dá ndá quiahva ñaxita sahá ña sahá ña cán queá ñacachi Herodes x̄ihin ña:

—Ndía c̄uní mún, cacún ña nuú i jáchi quiahva i ña nuun —n̄acachi da.

²³ Ta ñasahan da t̄uhun da nu ná cán ña quiahva da tóco ndihi ñaha ná caca ná nu dá vatí ñahñu táhvi ndaa ñundáhyi ña cómi da chuun saha ñacachi da quiahva da nu ña. ²⁴ Já ñaquee ná cán cuahan ná caxi t̄uhún ña nu náná ña ña ñacachi Herodes x̄ihin ná. Ta nandaca t̄uhún ná

náná ña ndíá caca ñá nu dá ta já nacachi mé náná ña já xihin ña:

—Caca yiquí jíní Juan, da jácandúta ñayivi —nacachi Herodías.

²⁵ Ta cama chá naquihvi tucu ñá cán nu ndácaan Herodes já cáchí ña já xihin dá:

—Viti ñuhú cúní ña ná quiahva mé ndó yiquí jíní Juan, da jácandúta ñayivi nuú í ini in cohó cáhnu —nacachi ñá.

²⁶ Ta ndaja coo nacasáhá nacacuéha ndivaha ini Herodes sahá ña naxica ñá cán yiquí jíní Juan. Joo sahá ña sa nasahan da tuhun da nu ña ta sa naxini johó tóco ndihi na ndúu xíxi xihin dá cán ña nacachi da xihin ña sahá ña cán quéa ndúsá caja da ña cúní ña. ²⁷ Chí ivi laá natchindahá da in soldado vecaa ña ná cañehe da yiquí jíní Juan quixi a. ²⁸ Naxinu soldado cán vecaa já natchituhun dá jico Juan já ñehe da ña ini in cohó cáhnu já nandiquiahva da ña nu ñá cán já nandiquiahva ñá a nu náná ña.

²⁹ Tá nacandaa ini na naxica xihin Juan ña nacaja na xihin dá já nasahan na nandiquehe na yiquí cuñu da já naján-duxu na da.

Tá nasahan Jesús ña cuxu uhun mil taa

(Mt. 14:13-21; Lc. 9:10-17; Jn. 6:1-14)

³⁰ Tá nandihí já nandique táhan tucu na xica tuun xihin Jesús xihin á já nacasáhá ndícani na nu á ña nacaja na xihin ña najánaha na. ³¹ Já nacachi Jesús xihin ná:

—Naha ndó ná cohó ndiquehe ndée loho í nu cáa xóo.

Nacachi a já xihin ná jáchí cuahan vaxi ñayivi xica nuu cuaha chá na mé cán ta chí co sahan na ñamaní cuyu na. ³² Anda já nandihvi Jesús xihin na xica tuun xihin á ini in barco já naquee na cuahan na in nu cáa xóo. ³³ Joo cuahá ñayivi nandicuni na Jesús tá naquee a cuahan. Já xínu cuahá ñayivi tá nuú nuu cán

cuahan sáhá na xoo nuú cuahan Jesús ini barco. Ta jihna ga mé ná naxinu yuhú tañuhú cán a juú ga Jesús. ³⁴ Tá nanuu Jesús barco cán já naxini a cuahá ndivaha ñayivi. Já natahvi ini a saha ná jáchí tá quiahva ndúu ndicachi, rí coo xitoho quiahva já ndúu na. Anda já nacasáhá jánaha cuahá ñaha nu ná. ³⁵ Ta tá sa cáhini cuahan naxinu na xica tuun xihin á já cáchí na já:

—Sa nahini va ta a juú xoo nu ndúu ñayivi quéa yóho. ³⁶ Ndindayi ndó ñayivi ná cuhun na nuu válí xihin nuú yati yóho já ná cueen na ña cuyu na —nacachi na xica tuun xihin Jesús.

³⁷ Tá nandihí já nanducú ñehe Jesús tuhun já cáchí a já:

—Mé ndó quiahva ndó ná cuyu na —nacachi Jesús xihin na cán.

Ta nacachi na já xihin á:

—Ndá cuu caja nde quiahva nde ña cuyu na yóho jáchí jihún cuahá ndivaha xíní ñuhú nde já cuu cueen nde pan cuyu ñayivi cuaha yóho. Ta ni a quéta toho ivi ciento denario —nacachi na.

³⁸ Já nacachi tucu Jesús já xihin na cán:

—Ndaja pan cómí ndo. Cuahán ndo candehé ndo.

Tá nasahan na sándehe na já cáchí na já xihin á:

—Ín uhun pan xihin ivi tiyacá.

³⁹ Anda já nasahnda Jesús chuun nu ná ña ná jácaco na ndihí ñayivi tá táhnda nuú yucu cuí cán. ⁴⁰ Ta nasaco na java táhnda in ciento na ta java táhnda ivi jico uxu na. ⁴¹ Anda já natiin Jesús ndihuhun pan xihin ndíví tiyacá ta sándehe a indiví já nandiquiahva ndixahvi nu Ndióxi. Ta nasahnda java pan já nasahan ña nuú na xica tuun xihin á já ná ndicahnda na ña nuú ñayivi. Tá quiahva já nasahnda tiyacá já nanditahnda rí nu tóco ndihí ñayivi cán. ⁴² Já naxixi tóco ndihí ñayivi cán ta natchutú tixi ndihi na. ⁴³ Ta mé pan xihin tiyacá ña nacandoo

naxixi na najácutú nā uxu ivi toyicá.

⁴⁴ Ta naxixi uhun mil datāa cán.

Tá naxica sáhá Jesús nuú tañuhú

(Mt. 14:22-27; Jn. 6:16-21)

⁴⁵ Tá nandihí nācaja Jesús nā ná ndihvi nā xica tuun xihín á ini in barco nā ná cūhun cuéé nā inga xoo tañuhú já xinu nā Betsaida nani ndíndayí a ñayivi já saā mé á cán ndique táhan xihín ná.

⁴⁶ Ta tá sa nandindayí ndihí a ñayivi naqee a cuāhan yícū cacā tahví a nu Ndíoxi. ⁴⁷ Tá nācuāá sa ndācañ barco maññú tañuhú cán ta Jesús ín yij va nu ñūhu. ⁴⁸ Ta naxini a ñā ndóho ini nā xica tuun xihín á jáchi a cuú jácaca na barco ini ticuif jáchi mé xoo nuú cūhun na vaxi tachi. Tá sa cuāhan tívi já xica sáhá Jesús cuāhan nuú ticuif xoo nu ndúu na ta tá nācayati a nu ndúu na jalóho yāha saa cūhun a, nduu. ⁴⁹ Joo tá naxini na xica sáhá Jesús nuú ticuif nācāhán nā cúú á in ínima já nācayuhú cóhó nā. ⁵⁰ Jáchi tóco ndihí nā naxini ñahá nayihvi nā. Joo nandicāhan Jesús já cáchí a já:

—Ndacú coo ini ndó jáchi yehe va cúú u. A yihvi toho ndó —nācachi Jesús.

⁵¹ Tá nādaa Jesús jata barco nu cándójó nā já najáyaā tachi. Chí nācatóntó mé nā xica tuun xihín á cán.

⁵² Jáchi a ñāha tacu vāha ini na sahá ñā nācaja Jesús tá nāndaja cuāha mé á pan xihín tiyacá jáchi nāndaji tuun xíní túni ná.

Tá nāndaja vāha Jesús nā quíhvi ndúu ñundáhyi Genesaret

(Mt. 14:34-36)

⁵³ Naxinu nā inga xoo tañuhú ta nācató ndaa na barco yuhú tañuhú cán já nāsaā nā ñundáhyi Genesaret. ⁵⁴ Tá quéta Jesús xihín nā xica tuun xihín á ini barco cán ivi laā nandicuni ñayivi mé á. ⁵⁵ Já xínu na cuāhan nā ndijáá ñuu válí ndúu yati cán ndúcú nā nā quíhvi já ñéhe na nā nuú xito cāsā nā nu Jesús.

⁵⁶ Ta ndá ñuu nācuu nu quíhvi Jesús cúú á ñuu nāhnu á ñuu válí á yícū já quéta ñayivi sácú nā nā quíhvi yuhú íchi. Ta já xica tahví nā nu Jesús ñā ná quiahva ñamaní caní ndaa ndāhā ná a vatí loho yuhú jahmá a. Ta ndá nā nācani ndaa ndāhā mé á ivi laā nandivāha na.

Ñā cāja quini ínima ñayivi

(Mt. 15:1-20)

7 In tañu nā fariseo xihín java nā já-nāhā ley Moisés, nā nāquixi ñuu Jerusalén nācayati na nu ín Jesús. ² Ta nāxojó ini na tá naxini na ñā ndúu coo java na xica tuun xihín Jesús xíxi na tá cámaní ndahá nā tá quiahva ín costumbre nā Israel. ³ Jáchi jánahā nā fariseo xihín ndihí nā Israel ñā a cuú cuxu na tá cámaní ndahá vāha na tá quiahva ín costumbre tásāhnu jíco nā. ⁴ Ta jári já-nāhā nā ñā tá ndícó coo na sahan nā yahvi xíní ñūhú ndahá nā tá quiahva ín costumbre nā já ná cuu cuxu na. Ta ín cuāhá ga nuú ñāha jánahā nā ndítahan caja na tátuhun ñā ndícata na yáxi xíhi na xihín tindohó xihín cohó caa andā xito quíji nā viti, ndítahan ndicata na. ⁵ Andā já nācasáhā nā fariseo xihín nā já-nāhā ley Moisés cáchí nā já xihín Jesús.

—Ndávāha co cāja nā xica tuun xūhun tá quiahva nācachi tásāhnu jíco yo caja í. Ndávāha xíxi na tá cámaní ndahá nā tá quiahva sáhdá ley caja í —nācachi na. ⁶ Já nācachi Jesús já xihín ná:

—Mé a ndāa nācāhan profeta Isaías saha ndó jáchi co cúú ndó tá quiahva ndāa ndó.

Já nācāhyi da já:

Yuhú ñinu uun na cāja cáhnu na yehe. Ta co cāja cáhnu na yehe xihín ndinuhu ínima ná.

⁷ Mé a uun va quéa cāja cáhnu na yehe,

jáchi ñā jánahā nā nuú ñayivi cúú á ñā quixi jiní mé cuití va na, nācāhyi Isaías sanahá.

⁸ Jáchĭ najándacoo ndó ña ñasahnda Ndióxi nū ndó caja ndó ta ñacasáhá ndíco cáhnu ndó costumbre ña ñacaja tásáhnu jícó ndo. Ta sahá ña yóho ndí-cata ndó tindohó xihĭn yáxi xihĭ ndó ta cája ndó cuahá chága costumbre yatá — ñacachi Jesús xihĭn ná.

⁹ Já ñacachi tucu a já xihĭn ná:

—Sahá ña cúnĭ ndo candíco cáhnu ndó costumbre mé va ndó sahá ña cán queá najándacoo ndó ña ñasahnda Ndióxi caja ndó. ¹⁰ Jáchĭ já cáchĭ ley Moisés: “Caja cáhnún tátún xihĭn nánún”, ta jári cáchĭ a já: “Ndá na ná chicao chahan jata tátá na á jata náná na, ndítahan quivi na”, cáchĭ ley Moisés. ¹¹ Joo ndóhó já-ñaha ndó nuú ñayivi ña cuu cahan na já xihĭn tátá na á náná na: “A cuú chindeé e ndóhó jáchĭ sa ñasacu xoo ĩ ñaha ĩ quiahva ĩ ña nū Ndióxi”, cáchĭ na. ¹² Tá ná cachi na ña yóho já queá co ndúsa ga chindeé na tátá na á náná na. ¹³ Quiahva joho cája ndó sácu xóo ndó ña ñasahnda Ndióxi nū ndo ta ndája ndó a tátuhun in ñaha ña coó saha. Jáchĭ ndíco cáhnu ndó costumbre ña najándadacoo tásáhnu jícó ndó nū ndo ta quiahva já jáñaha ndó nuú jahyi ndó. Ta cuahá ga ñaha tátuhun ña yóho cája ndó —ñacachi Jesús.

¹⁴ Andá já ñacana tucu Jesús ñayivi já ñacachi a já xihĭn ná:

—Cuni johó ndihi ndó nū cáhan ĩ xihĭn ndo ta candaa ini ndó ña. ¹⁵ Ni in ñaha xixi ñayivi a cuú caja quini ínimá ná. Ña cuu ndaja quini ñayivi cúu ña quixi ínimá na tátuhun ña cáhan na xihĭn ña cája na. ¹⁶ Ña íin johó, ná cuni johó na —cáchĭ Jesús.

¹⁷ Tá ñandihĭ ñandihvi Jesús ini in vehe ta ñacandoo cuahá ñayivi jata véhe. Já ñandaca tuhún na xica tuun xihĭn á ña ndía cúnĭ cachi a xihĭn tuhun ñacahan xihĭn ná. ¹⁸ Ta ñanducú ñehe a tuhun nū ná já ñacachi a já:

—Á coó toho xínĭ túnĭ ri ndóhó va, vaha. Jáchĭ co cándaa ini ndó ña tóco

ndihi ñaha xixi ñayivi a cuú caja quini a na. ¹⁹ Jáchĭ ña xixi ñayivi co xínu a ini ínimá ná joo xínu coo a tixi na já queta tucu a yiquí cuú na —ñacachi Jesús.

Xihĭn tuhun yóho ñacachi Jesús xihĭn ná ña cuu cuxu na tóco ndihi ñaha ña xixi ñayivi jáchĭ co ndája quini a ínimá ná. ²⁰ Ta ñacachi tucu Jesús já:

—Ña cuu ndaja quini ñayivi cúu ña quíxi ínimá ná tátuhun tuhun cáhan na xihĭn ña cája na. ²¹ Jáchĭ chí ini ínimá ná queta ña cáhvi núu ini na tátuhun ña cáhvi ini in dātaa coo da xihĭn ñájhĭ ñani táhan da á tá xíca ini da coo da xihĭn in ñañaha, ná co cúu ñájhĭ da á tá cáhvi ini na cahni na ndĭi. ²² Ta sa mé cán queta ña xíca ini na caja cuíhna na ta jári xíca ini na coo cuahá ndivaha ñaha nū ná. Ta sa mé cán queta ña núu cája na ta cáhan na ña tuhún ta cája na tá nuú cuachi ta cáhĭhvi ini na ta catóo na cáhan na saha táhan na ta cája cáhnu na mé ná ta quíhvi cája na. ²³ Tóco ndihi ña núu yóho ña cáhvi ini ñayivi caja na, quíxi a ínimá ná ta ndája quini a na.

Tá ñacandee ini in ña tóho Jesús

(Mt. 15:21-28)

²⁴ Já ñaquee Jesús cuahan chí ñundáhyĭ cuéntá Tiro xihĭn Sidón. Ta ñaquihvi a in vehe coo a ta co cúnĭ a ña ná candaa ini na ñuu ña iin a cán joo coo ñacuu coo jehé a. ²⁵ Chá va ta ñacandaa ini in ñañaha ña íin Jesús vehe cán. Ta íin in jahyi jhĭ ña, ná ndácaan ínimá quini ini. Ta ndaja coo ñasaa ná ta ñacaxítĭ ña saha Jesús. ²⁶ Ta cúu ná ná tóho cuéntá ñundáhyĭ Sirofenicia. Ta ñaxíca tahvi ná nū Jesús ña ná tavá a ínimá quini ndácaan ini jahyi ná. ²⁷ Andá já ñacachi Jesús já xihĭn ña:

—Jihna ñúhú ndítahan nuú ĩ chindeé e na Israel andá javí cuu chindeé e ndohó, na tóho jáchĭ íin in tuhun ta cáchĭ a ña

a váha toho candaa í pan xíxi na valí ta jácana í ña nuú tina —ñacachi Jesús.

²⁸ Andá já ñacachi mé ñá tóho cán já xihín Jesús:

—Mé a ndaa cáhan ndó, xitoho. Joo anda tina, rí ndúu tixi mesa xíxi rí ña jácyu jahyi xitoho rí —ñacachi ñá.

²⁹ Andá já ñacachi Jesús já xihín ñá:

—Vaha va ñacahun. Saha ña cán queá cáchi í xuhun cuanúhu viti jáchi sa ña-queta va ínimá quini nasandacaan ini jahyún —ñacachi Jesús.

³⁰ Ta tá naxinu ñá vehe já naxini ñá cándúhu jahyi ñá nuú xito ta sa coó ga ínimá quini cán ndácaan ini jahyi ñá.

Tá nandaja vaha Jesús in da jóho, da a cuú cahan

³¹ Naquee Jesús ñundáhyi cuéntá Tiro ta nayaha chí ñuu Sidón xihín java ga ñuu cuéntá Decápolis cán já naxinu coo a tañuhú Galilea. ³² Cán ñéhe na in dataa ñacasaa na nu Jesús. Cúu dá da jóho ta cúu dá da níhi. Ta naxica na nu á ña ná chinúu a ndáha á jiní dá já ná ndivaha da. ³³ Já ñatavá xóo Jesús da tañu ñayivi cán. Já najáquihvi a in nducu ndáha joho da ta naxihnu a tójíí a já ñacani ndaa a tójíí a yáa dá. ³⁴ Tá nandihí nasandehé a indiví já ndísaá ndísaá ínimá á já ñacachi a já xihín dá:

—Efata —ñacachi a ta ña yóho cúni cachi: Ná ndinuna.

³⁵ Ivi laá nandinuna joho mé da jóho cán ta nandivaha yáa dá já ñacasáhá cahan vaha da. ³⁶ Ta ñasahnda Jesús chuun nuú ndihi na ña ná a cáxi tuhun na ña yóho nuú ni in ñayivi. Joo tá ñacachi a ña yóho já queá ví ga ví cáhan na. ³⁷ Chí cátonó ndihi ñayivi tá xíni joho na ña ta cahan xihín táhan na já cáchi na já:

—Vaha ndivaha cája Jesús tóco ndihi ñaha jáchi jánditacu a na jóho ta jándicahan mé á na níhi —ñacachi na.

Tá ñasahan Jesús ña cuxu comi mil ñayivi

(Mt. 15:32-39)

8 Mé já nanditútu tucu cuahá ñayivi ta chí coó mé ñaha cuxu na. Andá já ñacana Jesús na xica tuun xihín á já ñacachi a já xihín ná:

²—Táhnđa ndivaha ini í sahá ñayivi yóho jáchi sa naxinu uní quivi ndúu na xihín í yóho ta chí coó ga ñaha cuxu na.

³Ta coo cúni chindahá í na nuhu na vehe na jáchi cámaní cuxu na ta tiahva náá cuitá na ta cuyu na íchi jáchi sa cání ndivaha ñaquixi java na —ñacachi Jesús.

⁴ Andá já ñacachi na xica tuun xihín á cán já:

—Ndaa cáhan ndo. Ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —ñacachi na.

⁵ Andá já nandaca tuhún Jesús na já cáchi a já xihín ná:

—Ndaja pan cómi ndo.

Já ñacachi na cán já:

—Usa ña.

⁶ Andá já ñasahnda Jesús chuun nuú ñayivi ña ná cacoo na nu ñúhu. Já ñatiin a ndíhusa pan cán. Ta nandiquiahva ndixahvi nu Ndióxi. Já ñasahnda java ña ta ñasahan ña nuú na xica tuun xihín á cán ña ná ndicahnda na ña nuú ñayivi cuahá cán. ⁷ Ta jári ñasacomí na java tiyacá valí ta nandiquiahva mé á ndixahvi nu Ndióxi saha ri já ñasahnda chuun nu ná ña ná ndicahnda na ri. ⁸ Ta naxixi tóco ndihi na ndúu cán anda quiahva nachutú tixi na ta tá nandihí najácutú na jandá usa toyicá xihín ña nacandoo. ⁹ Tátuhun comi mil ñayivi naxixi. Ta tá nandihí já najándindayí Jesús na. ¹⁰ Já nandihvi a ini barco xihín na xica tuun xihín á já ñaquee na cuahan na ñundáhyi cuéntá Dalmanuta.

**Cúni na fariseo ña ná caja
Jesús in ña xitúhún nu ná**

(Mt. 16:1-4; Lc. 12:54-56)

¹¹ Andá já naxinu na fariseo nu Jesús já ñacasáhá ndítúhún na xihín á. Ta sahá ña cúni na coto ndojó cuití ñahá na sahá ña cán queá naxica na nu á ña ná caja in ña xitúhún, ña quixi indiví já ná candaá ini na á mé a ndaa cúu á ña ñachindahá Ndióxi. ¹² Ndisaa ndísaa ini Jesús jáchi ndíhi ini a xihín ná já cáchi a já:

—Ndá saha queá xica na yóho ña ná caja i in ña xitúhún. Mé a ndaa ná cahan i xihín ndó ña a caja i ñaha xitúhún nuú na yóho —ñacachi a.

¹³ Andá já nandihvi tucu Jesús ini mé barco cán ta najandacoo a na cán já ñaquee a cuahan inga xoo tañuhú.

**Tá cahan Jesús sahá
ña jánaha na fariseo**

(Mt. 16:5-12)

¹⁴ Ta ndaja coo nandindójó mé na xica tuun xihín a cán cañehe na ñaha cuxu na joo ñasahjin in pan cuití va xihín ná ini barco cán. ¹⁵ Andá já ñasahnda Jesús chuun nu ná já cáchi a já xihín ná:

—Candehé ndo. Cuéntá coo ndó xihín na fariseo ta xihín na cúu cuéntá Herodes jáchi ña jánaha na cúu á tá-tuhun yúsa ñaxaa ña cáva táhan na xihín harina cávaha na pan —ñacachi Jesús.

¹⁶ Coó ñacandaá ini na ña cáchi a ña cán queá ñacasáhá ndítúhún xihín táhan na já cáchi na já:

—Sahá ña coó pan ñehé vaxí sahá ña cán queá cahan Jesús ña yóho xoho —ñacachi na.

¹⁷ Sa ñacandaá ini Jesús ña cahan na ta já ñacasáhá cáchi a já:

—Mé ndó cáchi ndó ña coó pan ñehé vaxí jáchi co candaá ini ndó ta ni co caja ndó cuéntá sahá ña jánaha i. Nandaji tuun xini túni ndo. ¹⁸ Cúu ndó tá-

tuhun na co tívi nuu xihín na coó johó jáchi vatí xíní ndo ta xíní johó ndó joo co candaá ini ndó. Á co ndícuhun ini ndó ña ñacaja i ¹⁹ tá nandicahnda i ndíhuhun pan nuú uhun mil taa. Ndaja toyicá nanditaca ñacaja ndó xihín ña ñacandoo cán —ñacachi Jesús.

Já nanducú ñehe na tuhún nu á:

—Uxu ivi ña.

²⁰ Ta ñacachi tucu Jesús xihín ná já:

—Ta tá nandicahnda i usa pan nuú comi mil ñayivi, ndaja toyicá nanditaca ñacaja ndó xihín ña ñacandoo —ñacachi a.

Já nanducú ñehe na tuhun nu á:

—Usa ña.

²¹ Andá já ñacachi a já xihín ná:

—Cámani yii va candaá ini ndó —ñacachi a.

**Tá nandaja vaha Jesús in
da cuaá ñuu Betsaida**

²² Tá nandihí naxinu na ñuu Betsaida já ñehe na in da cuaá ñacasaa na nu Jesús. Já naxica tahví na nu á ña ná cani ndaa ndáha á da. ²³ Ta chí ñatiin a ndáha da cuaá cán já ñatavá a da yuhú ñuu. Ñachindaa tójijí a nduchú núu da já ñachinúu a ndáha á jini dá. Já ñandaca tuhún a da á cuu candehé da. ²⁴ Ta já ñacachi da cán já sándehe da:

—Sándehe e java taa joo tá quiahva ndaa yito quiahva já ndaa da xica nuu da xíní i —ñacachi da.

²⁵ Andá já ñachinúu tucu Jesús ndáha á nduchú núu da já ñasandehé ndaa da. Andá jávi ñandivaha nduchú núu da ta ñacasáhá sándehe cáxi vaha da tóco ndihi ñaha. ²⁶ Ta ñachindahá Jesús da cuanúhu da vehe da já ñacachi a já xihín dá:

—A ndíhvún mahnú ñuu ni a ndícanún ña yóho nuú ñayivi ndúu jan —ñacachi a.

**Tá cáxi tũhun ndaa Pedro ña cúu
Jesús mé a nachindahá Ndióxi
cacomí cuéntá sahá ñayivi**

(Mt. 16:13-20; Lc. 9:18-21)

²⁷ Tá nandihí já nasahan Jesús xihín na xíca tuun xihín á ñuu válí ndácaan Cesaarea cuéntá Filipino. Nani xíca na cuahan na íchi nandaca tuhún a na já cáchí a já xihín ná:

—Ndá da cáchí ñayivi cúu yehe — nacachi a.

²⁸ Já nacachi na cán já:

—Java na cáchí na ña cúu ndó Juan, da nacaja ndúta ñayivi. Ta java na cáchí na ña cúu ndó profeta Elías. Ta java na cáchí na ña cúu ndó in táhan profeta nasandu sanahá —nacachi na.

²⁹ Andá já nandaca tuhún tucu Jesús na já cáchí a já xihín ná:

—Ta ndóhó ri, ndá da cáchí ndo cúu u —nacachi a.

Andá já nacachi Pedro já xihín á:

—Mé ndó cúu Cristo, mé a nachindahá Ndióxi cacomí cuéntá sahá ñayivi —nacachi da.

³⁰ Andá já nasahnda Jesús chuun nu ná ña ná a cáxi tũhun na ña yóho nuú ni in ñayivi.

Cáxi tũhun Jesús ña quivi a

(Mt. 16:21-28; Lc. 9:22-27)

³¹ Andá já nacasáhá jánaħa Jesús nu ná ña tandaa quiví ndoho ndivaha ini mé á, da nachindahá Ndióxi nduu ñayivi. Ta na sacuahá veñuhu xihín na sacuahá nuú jutũ xihín na jánaħa ley Moisés candají na mé á janda quiahva ná cahni ñahá na. Joo tá ná xinu uní quiví nditacu tucu a.

³² Cáxi ndivaha nacahan Jesús ña yóho xihín ná ta chí anda já natavá xóo Pedro Jesús já nacasáhá jánani da a sahá ña nacachi a xihín ná. ³³ Joo nacava Jesús ta nandicoto nihni a nuú na xíca tuun xihín á já nacasáhá ndícuħe a xihín Pedro já cáchí a já xihín dá:

—Cuáhán quee Satanás, rí cúu tiñáhá sacuahá. Co iin xíní túnun tá quiahva iin xíní túní Ndióxi jáchí cáhvi inún tá quiahva cáhvi ini ñayivi ñuyiví yóho — nacachi a.

³⁴ Andá já nacana Jesús na xíca tuun xihín á xihín java ga ñayivi já nacachi a já xihín ná:

—Ndá na cúni candico yehe ndítahan nu ná ndihí chága ini na sahá yehe a juú ga saħa mé ná. Ta ndítahan coo tiaħva na ndoho ini na sahá yehe. Ta coo caja toho a ná quivi na sahá i. ³⁵ Jáchí ndá na cátóo coo chága ñuyiví yóho ndihí saħa ná. Joo ndá na sáhan ndeé ini quivi sahá i xihín sahá tũhun Ndióxi, ñeħe táhvi ná catacu na anda ama cáa quiví.

³⁶ Vati ná quee vaha in na ñuyiví yóho ta comí na tóco ndihí ñaha ñuyiví joo ndá chuun quea tá nu ndíhí ndihí saħa ná in-dayá. ³⁷ Jáchí ni in ñaha a cuú chahvi in na saħa ínimā ná ná a cúhun na in-dayá. ³⁸ Candehé ndo. Mé tiempo viti cája ñayivi cuahá cuachi ta co xéen na caja na ña sáhndá Ndióxi nu ná. Ta ndá na cácahan nuu sahá i xihín sahá tũhun vaha cáhan i quiahva já cacahan ri nuú yehe, da nachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán naħa ndaja cáhnu cúu yehe jáchí quixi i xihín ndée Ndióxi ta xihín ndée táto yii mé á viti —nacachi Jesús.

9 Ta nacachi tucu Jesús já xihín ná: —Mé a ndaa ná caħan i xihín ndo. Java na ndúu yóho a quiví toho na janda quiahva ná xinu quiví cuni na cacomí Ndióxi cuéntá sahá ñayivi xihín ndée mé á —nacachi a.

Tá nandijama Jesús quiahva cáa

(Mt. 17:1-13; Lc. 9:28-36)

² Tá nayaha iñu quiví já ndaa Jesús in yucú jícó ta ndáca táhan Pedro xihín Jacobo xihín Juan cuahan na xihín á. Ta nu táhyí mé na cán nandijama quiahva

cáa. ³Ta a juú quiahva nandiyehē jáhma ndíxi a chí nandiyaa cachi ña. Ni in ñayivi ñuyiví yóho a cuú ndicata yaa nahá jáhma tá quiahva yaa nanduu jáhma á. ⁴Anda já na xíca tuun xihín Jesús naxini na Elías xihín Moisés ndúu na ndítúhún na xihín á. ⁵Ta já ñacachi Pedro já xihín Jesús:

—Maestro, vaha cúu ndúu nde yóho jáchi já cuu cavaha nde uní vehe tiyahvá válí. In a coo mé ndó ta inga coo Moisés ta inga coo Elías —ñacachi da.

⁶Nayihví ndivaha na xíca tuun xihín Jesús sahá ña cán queá co xíní mé Pedro ndía cáa cáhan va da. ⁷Anda já nanuu in vico jata ná já najajahvi a na ta tañu vico cán naxini johu na ña cáhan in a já cáchí a já:

—Da yóho cúu jahyi maní i. Cuni johu ndó nu cáhan da.

⁸Ta tá nandicoto nihni na sa coó ga na naxini na ta jandá in túhún Jesús naxini na.

⁹Tá sa cuahan nuu na jiní yúcu cán já nasahnda Jesús chuun nu ná ña ná a cáxi tuhun na nuú ñayivi ña naxini na anda quiahva ná xinú quivi nditacu tucu mé a nachindahá Ndióxi nduu ñayivi.

¹⁰Sahá ña cán queá nachijehé tuhun na sahá joo nandítúhún xihín táhan na ndía cúní cachi Jesús tá ñacachi a ña nditacu tucu a. ¹¹Anda já ñacasahá ndáca tuhún na mé á já cáchí na já xihín á:

—Ndávaha cáchí na jánahá ley Moisés ña ndítahan quixi jihna ñúhú profeta Elías —ñacachi na.

¹²Já ñacachi Jesús já xihín á:

—Mé a ndaa jihna ñúhú quixi Elías ta ndaja vaha ndihi da ñaha. Á co xíní ndó ndá quiahva cáchí tuhun Ndióxi sahá da chindahá Ndióxi nduu ñayivi. Cáchí a ña ndoho ini da ta candají na da. ¹³Joo cáxi tuhun i nu ndó ña sa naquixi va Elías ta ñacaja na tá quiahva cúní mé va na xihín dá ta tá quiahva cáchí tuhun

Ndióxi ndoho da quiahva já ndoho da —ñacachi Jesús.

Tá nandaja vaha Jesús in ta loho ndácaan ínimá quini ini

(Mt. 17:14-21; Lc. 9:37-43)

¹⁴Tá nandihí já nandicó coo Jesús xihín na cán nu ndúu java ga na xíca tuun xihín á cán. Já naxini na cuhá ndivaha ñayivi ñacava nuu na na cán. Jári núhu java na jánahá ley Moisés cáni táhan yúhu ná xihín na xíca tuun xihín Jesús. ¹⁵Tá naxini ñayivi yóho Jesús chí ñacatóntó ndihí na já nandava nihni na nasahan na cáhan Ndióxi ná xihín á. ¹⁶Anda já ñandaca tuhún Jesús na já cáchí a já xihín ná:

—Ndá saha ndítúhún ndó xihín na jan —ñacachi a.

¹⁷In da cándichi cán nanducú ñehe da tuhun nu Jesús já cáchí da já:

—Maestro, yóho ñehe e jahyi i ñacasaa i nu ndó jáchi ndácaan in ínimá quini ini da ta nandaja níhi ñahá ri. ¹⁸Ndá ñacuu tíin rí da, jándacava rí da nu núhu ta já casáhá cána cuyu chiquiñu yúhu dá ta cáhñá nuhu dá. Xihín ña yóho casáhá jácuitá rí da. Ta sa naxíca i ñamaní nuú na xíca tuun xihín ndó ña ná tavá na mé ínimá quini yóho joo coó ñacuu caja na ña —ñacachi da.

¹⁹Já ñacachi Jesús já xihín ná:

—Ndáhví nahá ñacuu ndó jáchi sa cuhá ndivaha quivi íin i xihín ndo ta a ñaha candeé ini ndó yehē. Ta chí co ndeé ga ini i xihín ña cája ndó. Taxi ndó da loho jan chóho —ñacachi a.

²⁰Chí ñehe na da loho cán nasaa na nu Jesús. Ta tá naxini mé rí quini ndácaan ini da loho Jesús ivi laá ñacaja rí ña ná quivi yihí da loho cán já tívi núu da nandicava da nu núhu xihín chiquiñu cána yúhu dá. ²¹Anda já ñandaca tuhún Jesús tátá da cán já cáchí a já xihín dá:

—Á sanahá ndóho jahyún ña yóho —ñacachi a.

Já **na**çachi tátá **da** cán **ja**:

—**Ja**nda tá loho da **ca**ja rí **ja** **xih**in dá.

²² Ta **cu**ahá tañu **ch**ícaan rí quini da ini **yá**vi núhu **xih**in ini **ti**cuíí viti **ña** **ca**hní **ñ**ahá rí **cú**ni rí. **Ñ**a cán **que**á **xí**ca **ta**hví **i** **nu** ndó **ña** ná **ca**ndáhví loho ini ndó **nde**he ta **ch**indeé ndó **nde**he tá **ta** **cu**u **ca**ja ndó **ña** —**na**çachi da.

²³ **And**a **ja** **ca**chí **Jesús** **ja** **xih**in dá:

—**Cu**u **ca**ja **i** **ña** tá **ca**ndúsún **ye**he. **Já**chí **cu**u **ca**ja **i** **tó**có **nd**ihi **ña**ha **xih**in **ñ**ayivi tá **ca**ndeé ini na **ye**he —**na**çachi a.

²⁴ **I**vi **la**á **na**çayuhú tátá mé **da** loho cán **ja** **ca**chí **da** **ja**:

—**Cá**ndúsa **vi** **joo** **ch**indeé ndó **ye**he ná **ca**ndúsa **chá**ga **i** —**na**çachi da.

²⁵ Ta tá **na**xini **Jesús** **ña** **na**çasáhá **ch**útú **cu**ahá **ñ**ayivi **ja** **na**ndicuehe mé á **xih**in mé rí quini cán **ja** **ca**chí **a** **ja** **xih**in rí:

—**Í**nima quini, rí **na**ndaja **ní**hi ta **na**ndaja **jó**ho **da** loho **yó**ho, **sá**hndá **i** **chu**un **nu**un **ña** ná **que**ún **cu**hun ta **a** **nd**ícó **co**o **ga**ún **nd**ihevún ini da —**na**çachi a.

²⁶ **And**a **ja** **na**çayuhú **có**hó rí quini cán **ja** **na**sahní **yí**hi **tucu** rí **da**. **Ch**í **na**queta rí **cu**ahan rí ta **na**jándacoo rí **da** loho cán **tá**tuhun in **nd**ií **sá**há **ña** cán **que**á **na**çasáhá **ca**chí **ñ**ayivi **ña** **sá** **na**xíhi va **da** **jan**. ²⁷ **Joo** **na**tiin **Jesús** **ndá**ha dá **ja** **na**ndínehe a **da**. Ta **ja** **na**ndaça **nd**ichi **da** cán.

²⁸ Ta tá **na**ndíhvi **Jesús** ini in **ve**he **xih**in **na** **xí**ca **tu**un **xih**in á **ja** **na**ndaça **tú**hún **je**hé **na** mé á **ja** **ca**chí **na** **ja** **xih**in á:

—**N**dávaha **co**o **na**çuu **ca**ja **nde**he **tavá** **nde** **í**nima quini **na**sandacaan ini **da** loho **jan** —**na**çachi na.

²⁹ **Já** **na**çachi **Jesús** **ja** **xih**in ná:

—**Tá** **cú**ni ndó **tavá** **ndo** tá **í**nima quini **tá**han rí **yó**ho **nd**ítahan **ca**juhun ndó ta **ca**ça **ta**hví **ndo** **nu** **N**díoxi —**na**çachi a.

Cáxí **tú**hun **tucu** **Jesús** **na**daja **coo** **nu**ú **qui**vi **a**

(Mt. 17:22-23; Lc. 9:43-45)

³⁰ **Tá** **na**quee na **cu**ahan **na** **na**yaha na **ch**í estado Galilea ta **co** **cú**ni **Jesús** **ña** ná **ca**ndaá ini **ñ**ayivi ³¹ **ja**chí **ja**na^ha **Jesús** **nu**ú **na** **na** **xí**ca **tu**un **xih**in á **cú**ni **a**. Ta **ca**chí **a** **xih**in ná **ña** **vaxi** **qui**vi **nd**iquiahva **ñ**ayivi mé á, **da** **na**chindahá **N**díoxi **nduu** **ñ**ayivi **nda**há **ñ**ayivi ta **ca**hní **ñ**ahá **na** **joo** tá ná **ya**ha **un**i **qui**vi **nd**itacu **tucu** a. ³² **Joo** **co**o **na**çandaá ini na **ña** **ca**han **xih**in ná ta **yí**hvi **na** **na**çaça **tú**hún **na** mé á **sá**há **tú**hun **ca**han.

Ndícani **Jesús** **ndá** **na** **cú**ú **na** **í**n **chá**ga **sá**ha

(Mt. 18:1-5; Lc. 9:46-48)

³³ Ta **na**daja **coo** **na**xinu **na** **ñuu** **C**aper-naum ta tá **sá** **ndúu** na **ve**he **ja** **na**çasáhá **ndá**ça **tú**hún **Jesús** **na** **xí**ca **tu**un **xih**in á **ja** **ca**chí **a** **ja** **xih**in ná:

—**N**día **nd**ítuhún ndó **sá**ha tá **vaxi** ndó **í**chi —**na**çachi a.

³⁴ **Joo** **co**o **na**nducú **ñe**he **na** cán **tú**hun **nu** á **ja**chí **í**chi **nu**ú **na**quixi na **na**ndítuhún **cu**ahá ná **sá**ha **ndá** **da** **cú**ú **da** **ca**hnu **chá**ga tañu mé ná. ³⁵ **And**a **ja** **na**sacoo **Jesús** **ja** **na**cana **ndí**huxu **í**vi **da** **xí**ca **tu**un **xih**in á **ja** **na**çasáhá **ca**chí **a** **ja** **xih**in dá:

—**N**dá ndó, **na** **cú**ni **ca**cuu **na** **nu** **cu**ítí **nd**ítahan **na**daja **núu** ndó mé ndó **ca**cuu ndó **na** **nu** **ndí**hi ta **ca**ja **ndí**vi **ndo** **nu** **ndí**hi na —**na**çachi a.

³⁶ **Tá** **na**ndíhi **ja** **na**cana **Jesús** in **da** loho **ja** **na**sacu a **da** **ma**hñú **nu** **ndúu** na **ja** **na**sáñehe **nda**a **da** **ja** **na**çasáhá **ca**chí **a** **ja**:

³⁷ —**N**dá **na** ná **nd**iquehe **vaha** in **da** loho **tá**tuhun **da** **yó**ho **sá**há **ña** **quí**hvi ini na **ye**he, **ndí**quehe rí na **ye**he viti. Ta **ndá** **na** **ndí**quehe **ye**he, **a** **ju**ú in **tú**hún **ye**he **ndí**quehe na **vaha** **ja**chí **ndí**quehe rí na

tátá i, mé a nāchindahá yehē —nācachi a.

**Tá ndúu java nā ndíquehe saha
yo já queá cuahan nā xoo í**

(Mt. 10:42; Lc. 9:49-50)

³⁸ Andá já nācachi Juan já:

—Maestro, naxini ndē in dātaa ta cāhan da quiví mé ndó já táva da ínima quini nūhu ini ñayivi. Joo cō xica nuu da xihín yo sahá ñā cán queá nasaji nuu nde nū dá caja da ñā —nācachi da.

³⁹ Joo nācachi Jesús já:

—A cájí nuu ndó nū dá jáchi tá cája in na ñā xitúhún xihín quiví i já queá a cuú caca nuu na cāhan núu na sahá i. ⁴⁰ Jáchi ndá nā cō ndíndita caja xixi xohō, mé nā cán cuahan nā xoo mí. ⁴¹ Ta ndá na ná quiahva in ñaha nū ndó vatí in yáxi ticuíf sahá ñā ndíco ndó yehē mé a ndaa ná cāhan i xihín ndō ñā chāhvi tá chāhvi Ndióxi sahá ñamaní cája na xihín ndó —nācachi Jesús.

**Tá jándacava ñayivi
inga na nuú cuachi**

(Mt. 18:6-9; Lc. 17:1-2)

⁴² Ta cáchí tucu Jesús já:

—Ndá nā ná jándacava in nā ndāhví, nā cāndeé ini yehē nuú cuachi janda vaha chága ná candico in yuú yojó jico ná ta ná ndihi sahá nā cāhá tañuhú. ⁴³ Tá ndáha ndō queá jándacava ndohó nuú cuachi chitúhún ndó a jáchi vaha chága ná cūhún ndó indiví xihín in túhún ndáha ndō a juú ga cūhún ndó xihín ndíví ndáha ndō indayá nuú cō ndáhva ñūhu cáyi. ⁴⁴ Ta cán ni ticujú cō xihí ni ñūhu cáyi cō ndáhva. ⁴⁵ Tá saha ndō queá jándacava ndohó nuú cuachi chitúhún ri ndó ñā jan va jáchi vaha chága ná cūhún réncō ndó indiví xihín in túhún saha ndō a juú ga cūhún ndó xihín ndíví saha ndō indayá nuú cō ndáhva ñūhu cáyi. ⁴⁶ Ta cán ni ticujú cō xihí ta ni ñūhu cáyi cō ndáhva. ⁴⁷ Tá nduchú núu

ndó queá jándacava ndohó nuú cuachi tavá ndó ñā jáchi vaha chága ná coo cóhó nuu ndó cūhún ndó nuú cacomí Ndióxi cuéntá saha ndō a juú ga ñā ná coo ndíví nduchú núu ndō cūhún ndó indayá. ⁴⁸ Ta cán ni cō xihí ticujú ta ni ñūhu cáyi cō ndáhva.

⁴⁹ Tá quiahva ndívíf jiuuhún cuáán cája ñūhu cáyi quiahva já ndívíf ínima ñayivi xihín ñā ndóho ini na. Ta tóco ndihi ñaha jóco nā nū Ndióxi chícaan nā ñii yívi na já cō tiví a. ⁵⁰ Vaha va cája ñii jáchi xihín ñii ndíhaji ñā xixi na joo tá cō óhva ñā já a cuú caja ohva tucu yó a já ná caja chúun tucú ñā. Ndítahan nū ndóhó caja ndó tátuhun cája ñii ta já canduu víf xihín táhan ndó —cáchí Jesús.

**Jánaha Jesús nuú nā sa natandaha
ñā cō ndítahan jándacoo táhan na**

(Mt. 19:1-12; Lc. 16:18)

10 Naquee Jesús ñuu Capernaum cuahan. Já nasahan estado Judea xihín ñundáhyi iin inga xoo yuta Jordán. Cán nacasáhá nanditaca tucu ñayivi nū á chí jánaha tucu a nā tá quiahva nacaan mé á cája. ² Andá já nācayati java nā fariseo nū Jesús sahá ñā coto ndojó ñahá nā cūni nā. Nācachi na já xihín á:

—Á núná nuú in dātaa jándacoo da ñájíhí da —nācachi na.

³ Já nanducú ñehe Jesús tūhun nū ná já cáchí a já xihín ná:

—Ndaja cáchí ley Moisés ñā ndítahan caja ndó —nācachi a.

⁴ Andá já nācachi nā cán já:

—Tá ná quiahva in dātaa in tutu nū ñájíhí da sahá ñā cūni da jándacoo da ñā já queá sahan ley Moisés ñamaní jándacoo da ñā —nācachi na.

⁵ Andá já nācachi Jesús já xihín ná:

—Sahan ley Moisés ñamaní yóho nū ndō jáchi táhyí ndivaha ínima ndō. ⁶ Joo janda mé saha tá nācavaha Ndióxi ñayivi nū cuítí já nācavaha in túhún taa xihín in túhún ñaha. ⁷ Sahá ñā cán queá ndíta-

han nuú dataa jándacoo da tátá da xihín náná da já ndique táhan da xihín ñájíhí da. ⁸ Já xinu ndívi na cán cacuu na tá-tuhun in víxí yiquí cuñu na sahá ña cán quea co cúu ga na ivi yiquí cuñu sahá ña nanduu na tátuhun in túhún yiquí cuñu. ⁹ Sahá ña cán quea co ndítahan nuú na cán janí táhan na ña najácatáhan Ndióxi tá nantandaha ná —ñacachi Jesús xihín ná.

¹⁰ Ta tá nandicó coo tucu na vehe já ñacasáhá tucu na xíca tuun xihín á cán ndáca tuhún na Jesús sahá ña ñacahan.

¹¹ Ta nanducú ñehe Jesús tuhun nu ná já ñacachi a já:

—Tá ná jándacoo in dataa ñájíhí da ta tándaha dá xihín inga ñáñáha já quea cája da cuachi nu ñájíhí nuú da jáchi ín da xihín inga ñáha. ¹² Ta tá ná jándacoo in ñáñáha yí ña ta tándaha ña xihín inga da cája ri ña cán va cuachi nu yí ña jáchi ín ña xihín inga dataa —ñacachi Jesús.

Cája yíi Jesús na valí

(Mt. 19:13-15; Lc. 18:15-17)

¹³ Andá já ñehe na java na valí ñacasaá na nu Jesús ña ná caní ndaa ndáha á na. Joo mé na xíca tuun xihín á cán ñacasáhá na cája cuehe na xihín mé na ndáca na valí cán. ¹⁴ Tá naxini Jesús ña cája na já nandicuehe a já cáchi a já xihín na xíca tuun xihín á:

—Quiahva ndó ñamaní ná quixi na valí nuú i ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho. ¹⁵ Mé a ndaa ná cahan i xihín ndo ndá na co cúní ndiquiahva na mé ná ndáha Ndióxi tátuhun cája na valí yóho já quea a cúu cacomí Ndióxi cuéntá saha ná —ñacachi a.

¹⁶ Andá já ñacasáhá Jesús ñehe ndaa na valí ta chínúu a ndáha á jiní ná já cája yíi á na.

Cáhan in da cuicá xihín Jesús

(Mt. 19:16-30; Lc. 18:18-30)

¹⁷ Tá cuahan tucu Jesús íchi já xínu in dataa ñacasaá da ñasaxítí da nu á já cáchi da já xihín á:

—Maestro, mé ndó cúu ndó taa vaha ña cán quea ndáca tuhún i ndohó ndía ndítahan caja i já ná ñehe táhvi cuhun i indiví coo i anda ama cáa quivi —ñacachi da.

¹⁸ Já ñacachi Jesús já xihín dá:

—Ndá cuéntá quea cáchún xihín i ña cúu u da vaha. Ni in túhún toho ñayivi co cúu ná na vaha ñuyivi yóho. In túhún Ndióxi cuití va quea vaha. ¹⁹ Sa xíní vún ña sáhdná Ndióxi nuun cajún já cáchi a já: “Coto a cóun xihín ñájíhí á yí ñani táhún. Coto a cáhnún ndíi. Coto a cája cuíhnún. Coto a cáhún ña tuhún sahá ñayivi. Coto a jándahvún ñayivi. Ta caja cáhnún tátún xihín nánún” —ñacachi Jesús xihín dá.

²⁰ Já ñacachi da cán já:

—Maestro, janda tá ñasacuu u taa loho ñacasáhá i cája i tóco ndíhi ña sáhdná Ndióxi caja i —ñacachi da.

²¹ Ñasandehé Jesús nu dá ta táhdna ini a saha dá já ñacachi a já xihín dá:

—Inga ñaha cámaní cajún: Cuáhán jicún tóco ndíhi ñahún jan ta ndacahndún jiahún jan nuú na ndahví já ñehe táhvun coo cuahá ñahún indiví. Ta tá ndíhi já quisún candicún yehe —ñacachi Jesús.

²² Joo tá naxini johó da cuicá cán ña ñacachi Jesús ivi laa ñacavitá ini da já naquee cuéha dá cuahan da jáchi ín cuahá ndivaha ñaha da.

²³ Andá já ñacasáhá sádehé Jesús nuú na xíca tuun xihín a cán já ñacachi a já:

—Ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná —ñacachi a.

²⁴ Chí ñacatóntó mé ña xíca tuun xihín á cán sahá tũhun ñacahan joo ñandicahan tucu Jesús já cáchí a já:

—Jahyi a, ndaja yáncá cáa sahá in ña cándeé ini jiihún ndiquiahva na mé ná ndáha Ndióxi ña ná cacomí a cuéntá saha ná. ²⁵ Jáchí janda cama chága cuu yaha in camello ini in yávi saha yítucú a juú ga ña ná ndiquiahva in ña cuicá mé dá ndáha Ndióxi ña ná cacomí a cuéntá saha dá —ñacachi Jesús.

²⁶ Anda já ñacatóntó ndihi mé ña xíca tuun xihín á cán tá ñaxini johu na ña yóho. Já ñacasáhá ndáca tũhún táhan na já cáchí ña já:

—Ndá ña cúu ña cuu cacu ndaa ínima, dá já —ñacachi na.

²⁷ Nandicotu nihni Jesús nu ná já cáchí a já xihín ná:

—Ni in na a cúu caja ña yóho joo Ndióxi quéa cuu caja ña jáchí ni in ñaha co fhvi toho nu Ndióxi —ñacachi a.

²⁸ Anda já ñacachi Pedro já xihín Jesús:

—Joo ndehe najándacoo ndihi nde ña ñasacomí nde ta ndíco nde ndohó —ñacachi da.

²⁹ Já ñanducú ñehe Jesús tũhun nu ná já cáchí a já:

—Mé a ndaa ná cahan i xihín ndo ña ndá ña jándacoo vehe na á ñani na á quiahva na á tátá ña á náná ña á ñájíhí ña á jahyi na á ñundáhyi ná sahá yehe xihín sahá tũhun cahan i, ³⁰ ña cán cúu ña ñehe cuaha chága ví ñaha ñuyíví yóho jatá ña najándacoo na tátũhun vehe na, ñani na, quiahva na, náná ña, jahyi na, ñundáhyi ná viti vatí ná ndicuíta ñayivi caja xíxi na xihín ná. Joo ñehe táhvi ná catacu na anda ama cáa quívi xihín Ndióxi. ³¹ Ta ndúu cuahá ña íin sahá ñuyíví yóho viti joo vaxi quívi cacuu na ña coo saha nu Ndióxi. Ta ndúu cuahá ña coo saha ñuyíví yóho viti joo vaxi quívi cacuu na ña íin saha nu Ndióxi —ñacachi a.

Cáxi tũhun tucu Jesús ña quivi a

(Mt. 20:17-19; Lc. 18:31-34)

³² Ta ndaja coo cuahan Jesús xihín ña xíca tuun xihín á chí íchí ndáa cuahan chí Jerusalén. Cánuu Jesús cuahan xihín ná. Ta ñacatóntó ña cán ta yíhvi ña cuahan ña xihín á. Anda já ñatavá xóo tucu a ndíhuxu ívi ña xíca tuun xihín á já ñacasáhá cahan xihín ná ña ndoho a chága chí nuu. ³³ Já ñacachi a já:

—Candehé ndo. Yóho ndáa í cuahan yo chí Jerusalén nuú ndiquiahva na yehe, ña ñachindahá Ndióxi nduu ñayivi ndahá ña sacuaha nuú jutu xihín nuú ña jánahe ley Moisés. ña yóho cúu ña cacu ini sahá ndaja quivi i. Anda já ndiquiahva na yehe ndahá ña tóho. ³⁴ Cuacu ndaa na yehe ta cani na yehe ta cuihna na tójí ña nuú i ta já cahní ña yehe. Joo tá ná yaha uní quívi nditacu tucu u —ñacachi Jesús xihín ná.

Tá ñaxíca Jacobo xihín Juan ñamaní nu Jesús

(Mt. 20:20-28)

³⁵ Anda já ñacayati Jacobo xihín Juan, jahyi Zebedeo nu Jesús já ñacachi da já xihín á:

—Maestro, cúní nde caca nde in ñamaní nu ndo —ñacachi da.

³⁶ Já ñacachi Jesús já xihín dá:

—Ndía maní cúní ndó caja i xihín ndo —ñacachi a.

³⁷ Já ñacachi ña cán já xihín á:

—Ña xíca nde nu ndo quéa ná quiahva ndó ñamaní nuú nde cacoo in in nde xoo jíin ndo. In nde coo xoo cuaha ta in nde coo xoo íti jíin mé ndó indiví nuú coo ndó cacomí ndó cuéntá sahá ñayivi —ñacachi da.

³⁸ Anda já ñacachi Jesús já xihín dá:

—Co cándaq ini ndó ña xíca ndó nuú i. Á cuu ndoho ini ndó tá quiahva ndítahan nuú i ndoho ini i. Jáchí ña vaxi nuú i ndoho ini i cúu á tátũhun coho i in yáxi

ndutá ova. Á iin tiq̄hva ndó ndoho ini ndó tá quiahva nditahan nuú i ndoho ini i anda quiahva ná quivi i —nacachi a.

³⁹ Já nacachi da cán já:

—Cuu caja nde ña.

Já nacachi Jesús já xihin dá:

—Mé a ndaa tandaa quivi coho ndó ña ova núhu ini yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. ⁴⁰ Joo sahá ña cacoo in ndó xoo cuáha i ta in ndó xoo íti i a juú nuú i quiahva i ña nu ndo. Jáchí sa nandicaxi Ndióxi na ñehe táhvi cacoo cán —nacachi Jesús xihin dá.

⁴¹ Tá naxini johu uxu chága na xíca tuun xihin Jesús cán ña yóho já nacasáhá xójo ini na xihin Jacobo xihin Juan viti.

⁴² Joo nacana Jesús na já nacachi a já xihin ná:

—Sa xini ndó ndaja cája na sáhnadá chuun nuú ñayivi ndúu ñuyívi yóho. Ña cája na queá jácandíhi na ñayivi ta cája na tá quiahva cúní mé ná. ⁴³ Joo co ndítahan coo ña cán tañu mé ndó jáchí ndá da cúní cacuu da cáhnu chága tañu ndó xini núhú cacuu da in da cája ndívi nuú ndihi ndó. ⁴⁴ Ta ndá da cúní cacuu ta nu cuítí tañu ndóhó ndítahan cacuu da da cája ndívi nu ndihi ndó. ⁴⁵ Jáchí ni yehe, da nachindahá Ndióxi nduu ñayivi coo naquixi i ñuyívi yóho ña ná caja ndívi ñayivi nuú i. Ña naquixi i caja i queá caja ndívi i nu ná ta ndiquiahva i mí i quivi i já ná cuu cacu ndaa ínimá cuahá ñayivi ná a cúhūn na indayá —nacachi a.

Tá nandaja vaha Jesús in da cuáá naní Bartimeo

(Mt. 20:29-34; Lc. 18:35-43)

⁴⁶ Anda já naxinu na ñuu Jericó. Ta tá sa naqueta tucu Jesús cuahan jatá ñuu cán xihin na xíca tuun xihin á xihin cuahá ga ñayivi ta mé yuhú íchí cán iin coo in da cuáá naní Bartimeo, jahyi Timeo sáti da. ⁴⁷ Ta tá naxini johu da ña

cáyati Jesús, da ñuu Nazaret vaxi da já nacasáhá mé da cuáá cán cáyuhú cóho da já cáchí da já:

—Jesús, da naquixi chichi David caja ndó ñamaní candáhvi loho ini ndó yehe —nacachi da.

⁴⁸ Joo nacasáhá cuahá ñayivi cája cuēhe na xihin dá ña ná caji da yúhu dá. Joo ví ga ví cáyuhú da já cáchí da já:

—Ndóhó, da naquixi chichi David caja ndó ñamaní candáhvi loho ini ndó yehe —nacachi da.

⁴⁹ Anda já nandaca ndichi Jesús já nacachi a já:

—Cana ndó da ná quixi da.

Já nacana na da cuáá cán já cáchí na já xihin dá:

—A ndícani inún. Candichi jáchí cána Jesús yohó —nacachi na.

⁵⁰ Anda já najácana da cotó ndeé da ta nandaca ndichi da já nasaa da nu iin Jesús. ⁵¹ Anda já nandaca tuhún Jesús da já cáchí a já xihin dá:

—Ndía cúnun ná caja i xuhun.

Já nacachi mé da cuáá cán já:

—Candehé e cúní, xitoho.

⁵² Já nacachi Jesús já xihin dá:

—Cuu nuhu vún viti. Sa nandivahún jáchí nacandeé inún yehe —nacachi a.

Chí ivi laá nandaca ndehé da cuáá cán. Já nandico da Jesús íchí cán cuahan da.

Ndihvi Jesús ñuu Jerusalén

(Mt. 21:1-11; Lc. 19:28-40; Jn. 12:12-19)

11 Tá naxinu na yati ñuu Jerusalén jijn ñuu Betfagé xihin ñuu Betania ña ndíque táhan nuu xihin yucu yitó Olivo já nasahnda Jesús chuun nuú ivi da xíca tuun xihin á. ² Já cáchí a já xihin dá:

—Cuáhán ndo ñuu loho ndácaan yati jan. Tá ná xinu coo ndó jan ndiñehe ndó in búrró ndíco ndaa, rí cámaní yii ndaa na. Ndaxí ndó ri ta cañehe ndó ri quixi ndó. ³ Ta ndá na ná ndaca tuhún ndohó saha ri já queá cachi ndó xihin ná ña xini

ñuhú xitoho ndó ri viti joo tá ná ndihi chuun rí já ndixi tucu rí, já cachi ndó xihin ná —ñacachi Jesús xihin da.

⁴Ta ñaquee da cán cuahan da já ñandiñehe dá mé búrrō cán ndíco ndaa rí jín yéhe yuhú íchi já ñandaxí da ri.

⁵Ta ndaja coo java na ndúu cán ñacasáhá cáchi na já:

—Ndía cája ndó. Ndávaha ndáxi ndo búrrō jana nde jan —ñacachi na.

⁶Anda já ñanducú ñehe mé da xíca tuun xihin Jesús cán tuhun nu ná ta ñacachi da tá quiahva ñacachi Jesús xihin dá. Anda já ñañehe dá ñamaní cañehe da rí cuhun da. ⁷Tá ñandihí já ñehe da búrrō cán ñacasaa da nu Jesús já ñachojó da cotó ndéé da jata ri já ñandaa Jesús jata ri. ⁸Ta cuahá ñayivi ñacasáhá na chín-duu na cotó ndéé na íchi ta java na ñacasáhá na sáhdá na ndáha yíto já chín-duu na do íchi. ⁹Ta na cuahan chí nuu ta jári na vaxi chí jata ñacasáhá na cáyuhú na já cáchi na já:

—Cája cáhnu í Ndióxi. Ndicáhnu nahá ná cacuu da cómi cuéntá saha yo jáchi cúu dá da vaxi yuhú nuu Ndióxi. ¹⁰Cáhnu ná coo quiví tá casáhá Ndióxi cacomí a cuéntá saha yo. Tá quiahva ñasacomí David, tátá yo cuéntá sahá ñayivi sanahá quiahva já cacomí mé á cuéntá saha yo. Cáhnu ná cacuu Ndióxi —cáchi ñayivi.

¹¹Anda já ñandihvi Jesús ñuu Jerusalén ta já ñaxinu a veñuhu cáhnu cán. Ta tá ñandihí ñasandehé ndihí a níí xoo cán já ñaquee a cuahan chí ñuu Betania xihin ndíhuxu ivi na xíca tuun xihin á jáchi sa nahini ta cuahan cuáá va.

Tá ñachicaan Jesús cháhan jata titó ñuhú

(Mt. 21:18-19)

¹²Tá ñaquee na Betania inga quiví itaan já ñacasáhá cuíco Jesús cuahan.

¹³Tá ñaxini xíca a in titó ñuhú vaha dó

ndoco ndáha. Ñasahan Jesús sándehé a á íin cuihi nu do joo co rí ná ñehe a. Ndáha uun va dó cán íin jáchi a juú tiempo coo rí cán queá. ¹⁴Anda já ñacahan Jesús xihin titó ñuhú cán já cáchi a já xihin do:

—Ni in ga na a cáxi ga cuihi nu yóho —cáchi a xihin do.

Ta ñaxini johó na xíca tuun xihin á cán tuhun yóho.

Tá ñataxi Jesús na ndúu jícó ñaha yéhe veñuhu

(Mt. 21:12-17; Lc. 19:45-48; Jn. 2:13-22)

¹⁵Tá ñandihí já ñaxinu na Jerusalén. Ta tá ñandihvi Jesús veñuhu cáhnu cán já ñacasáhá táxi a na ndúu jícó cán xihin na ndúu xéen viti. Ta ñaxicó ñehe a mesa na ndúu ndíjama jjuhún ñayivi ta ñaxicó ñehe a táyi sácoo na ndúu jícó ndíjata. ¹⁶Ta chí coo ñasahan ñamaní nuu ñayivi cañehe na ñaha ndihvi na veñuhu. ¹⁷Anda já ñacasáhá jánahá nu ná já cáchi a já xihin ná:

—Já cáchi tuhun Ndióxi: “Vehe mí i cacuu a vehe nuu quixi na caça tahví na nuu i saha tóco ndihí ñayivi ñuyiví”, cáchi tuhun Ndióxi. Joo ndóhó ñandai cuu ndó yóho caha cuíhná ndo nuu ñayivi —ñacachi Jesús xihin ná.

¹⁸Tá mé na sacuahá nuu jutú cán xihin na jánahá ley Moisés ñaxini johó na ña yóho já ñacasáhá na ndúcú na ndá quiahva cahní na a jáchi yíhví ñahá na sahá ña cátontó ndihí ñayivi xihin ña jánahá mé á nu ná. ¹⁹Joo tá ñacuaá já ñaquee Jesús ñuu cuahan xihin na xíca tuun xihin á.

Tá nahichi titó ñuhú, dó coo cuihi nuu

(Mt. 21:20-22)

²⁰Ta naha chá inga quiví itaan nayaha na nu cándichi mé titó ñuhú cán já ñaxini na ña nahichi do janda yóho do nahichi. ²¹Anda já ñandicuhun ini Pedro

sahá mé titó ñuhú já cáchí da já xihin Jesús:

—Maestro, candehe ndó titó ñuhú, dó ñacahan cuehe ndó xihin. Sa nahichi dó viti —ñacachi da.

²² Já ñacachi Jesús já xihin dá:

—Candeé ini ndó Ndióxi. ²³ Jáchi mé a ndaa ná cahan i xihin ndo ña tá ná cachi ndó xihin yucu yóho: “Caxoo ta cuáhán jáquetún mún ini tañuhú”, ta tá co cáhvi ivi joho ini ndó ta tá candúsa ndó coo tá iin cáchí ndó ta chí já ndusa coo. ²⁴ Sahá ña cán queá cáchí i xihin ndo ña tóco ndihi ñaha xíca tahví ndó nu Ndióxi ta tá candúsa ndó ña sa ñañehe ndó a já queá ñehe ndusa ndó a. ²⁵ Ta tá ndúu ndó xíca tahví ndo nu Ndióxi xini ñuhú caja cáhnu ini ndó saha ndá na xójo ini ndó xihin já ná caja cáhnu ri ini Ndióxi, tátá ndo ña iin indivi sahá cuachi ndó. ²⁶ Joo tá co cája cáhnu ini ndó sahá ñayivi já queá ni Ndióxi, tátá ndo ña iin indivi a cája cáhnu ini a sahá cuachi ndó —ñacachi a.

Tá ñandaca tuhún na Jesús ña ndáchí quíxi ndée á ña cája cuahá nuú ñaha

(Mt. 21:23-27; Lc. 20:1-8)

²⁷ Anda já ñandicó coo tucu na ñuu Jerusalén. Ta tá xíca Jesús chí veñuhu cáhnu cán já ñacayati na sacuaḥa nuú jutú xihín na jánaha ley Moisés xihín na sacuaḥa veñuhu nu á. ²⁸ Já ñandaca tuhún na Jesús já cáchí na já xihin á:

—Yo já sahan ñamaní nuun cajún ña cajún yóho —ñacachi na.

²⁹ Já ñacachi Jesús já xihin ná:

—Ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndo yo já ñasahan ñamaní nuú i caja i ña cája i yóho. ³⁰ Cachi ndó xihín i yo já ñachindahá Juan ña ná quíxi da caja ndúta da ñayivi. Á Ndióxi ñachindahá da, á ñayivi ñachindahá ñahá. Nducú ñehe quíi ndó tuhun nuú i viti —ñacachi Jesús xihin ná.

³¹ Anda já ñacasáhá ndítuhún xihin táhan na cán já cáchí na já:

—Tá ná cachí ña Ndióxi queá ñachindahá Juan ta já nducú nehe Jesús tuhun nu yó já cachi da xoho: “Ndá cuéntá queá coo ñaxeen ndó candúsa ndó da, dá já”, cachi Jesús xoho. ³² Ta tá ná cachí: “Ñayivi cúu na ñachindahá Juan”, já ndicuíta ñayivi xihin yo —ñacachi na ndítuhún xihin táhan na.

Já cáchí na jáchi yíhvi na ñayivi jáchi tóco ndihi ñayivi ñacahán na saha Juan ña cúu dá da ñachindahá Ndióxi jáyaha da tuhun cahan mé á nuú ñayivi. ³³ Sahá ña cán queá ñacachi na já xihin Jesús:

—Co xini toho nde yo ñachindahá Juan.

Anda já ñacachi a já xihin ná:

—Ta ni yehe a caxi tuhun i nu ndo yo já ñasahan ndée nuú i caja i ña yóho —ñacachi a.

Sácú Jesús quiahva sahá java mozo, da ñacaja quini xihín xitoho

(Mt. 21:33-46; Lc. 20:9-19)

12 Anda já ñacasáhá Jesús sácú a quiahva nuú ñayivi já ñacachi a já xihin ná:

—Ñasahin in dataa najándee cuaha dá tó uva nu ñuhú dá ta já ñasacu da in corra yíto nu do. Ta ñacavaḥa da in nuú cuhní mé uva cán ña cavaha vino. Ta ñacavaḥa da in nu jíco canúu da já cuu candaa da tóco ndihi dó cán.

“Tá ñandihí já ñasahan ndojó da ñuhú dá nuú java na caja chúun na ña já ñaquee da cuahan xíca da. ² Ta tá ñaxinu tiempo jáquee na já ñachindahá da in mozo da nuú na cája chúun ñuhú da cán ña ná ndiquiahva na ña cáni nu dá ndiquehe da saha ñuhú da ña ñasahan ndojó da nuú na cán. ³ Joo mé na cája chúun tóo ñuhú cán ñatiin na mozo da cán já ñacani na da. Tá ñandihí já ñanducú ñehe na da nuú xitoho da joo coo ñaha ná sahan na nu dá. ⁴ An-

da já nāchindahá tucu mé da xihín ñaha ñúhu cán inga mozo. Joo da yóho nācaja xíxi tucu na xihín dá jáchi nācani na da xihín yuu. Ta najándicuehe na jini dá já nacasáhá cánahá na xihín dá. ⁵ Ta mé da xihín ñaha ñúhu cán nāchindahá tucu da inga mozo da ta nasahní na da. Ta nāchindahá cuahá ga da mozo da nasahan cán. Ta java da nācani na ta java da nasahní na.

⁶ Nācandoo in túhún jahyi mé da xihín ñaha ñúhu cán ta quíhvi ndivaha ini da jahyi da. Joo tá nu ndíhí já nāchindahá da jahyi da jáchi cáhán da: “Cája i cuéntá coo toni ñúhu na xihín jahyí i”, nācáhán da. ⁷ Joo mé na cája chúun ñúhu cán nācasáhá ndítúhún xihín táhan na já cáhí na já: “Candehé ndo. Yóho vaxi da cúu jahyi xitoho í. Ta tá ná xinu quiví quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mí”, nācachi xihín táhan na cán. ⁸ Anda já natiin na da cán ta nasahní na da já najácana na yiquí cuñu da jatá cútu cán —nācachi Jesús.

⁹ Anda já nandaca tuhún Jesús ñayivi ndúu cán já cáhí a já:

—Á co xini ndó ndíja caja da xihín ñaha ñúhu yóho viti. Ña caja da queá quixi da ta cahní ndihi da na cája chúun too nu ñúhu dá. Já ndiquiahva da ñúhu dá nuú java ga na já ná caja chúun na nu á.

¹⁰ Á co xini ndó ña cáhí tuhún Ndióxi. Ña cáhí a queá:

Mé yuu ña najácana da cávaha vehe, ña cán cúu ña nandu yuu ndúhu saha vehe ña iin chága saha.

¹¹ Ña yóho queá nācaja Ndióxi ta cúu á in ñaha cáhnu ndivaha nu yo, cáhí tuhún Ndióxi —nācachi Jesús.

¹² Anda já nacasáhá ndúcú na sacuahtiin na Jesús chicaan na a veca jáchi nācandaa ini na ña saha mé ná nasacu a quiahva yóho. Joo sahá ña yíhvi na

ñayivi najándacoo na a ta naquee na cuahan na.

Ndáca tuhún na Jesús á ndítahan nu ná chahvi na jjuhún cuéntá impuesto

(Mt. 22:15-22; Lc. 20:20-26)

¹³ Tá nandihí já nāchindahá na java na fariseo xihín na cúu cuéntá Herodes nu Jesús ña ná coto ndojó ñahá na xihín tuhun cáhan mé á já ná chicaan na cuachi jatá. ¹⁴ Anda já naxinu na nu Jesús já cáhí na já xihín á:

—Maestro, xini nde ña ndinuhu ña ndaa cáhan mé ndó. Ta co quehe ndó cuéntá tá cáhan núu ñayivi saha ndo. Ta cándaa ini nde ña tá cáhan ndó sahá in ñaha cája ñayivi cúu á sahá ña sándehe ndó jandá ínima ná. Ta cándaa ini nde ña jánaha ndó ña ndaa saha íchi cuéntá Ndióxi. Ta viti cúní nde ndaca tuhún nde ndohó á ndítahan nuú nde chahvi nde jjuhún cuéntá impuesto nuú da cómi cuéntá saha yo ñuu Roma. Á chahvi nde ña, á a chahvi toho nde ña —nācachi na.

¹⁵ Joo sa nācandaa ini Jesús ña co cúu ná tá quiahva ndáa na ña cán queá nācachi a já xihín ná:

—Cándaa cáxi táhyí ini i ña cúní ndó coto ndojó cuití ndó yehe. Jánaha ndó in táhan jjuhún jan nuú i ná candehé e ña —nācachi a.

¹⁶ Já nasahan na mé jjuhún cán nu á ta tá naxini a ña já nācachi a já xihín ná:

—Yo nahná ta yo quiví queá ndaa nu á.

Já nācachi na cán já xihín á:

—Ñehe a quiví xihín nahná da cómi cuéntá saha yó ñuu Roma —nācachi na xihín á.

¹⁷ Anda já nācachi Jesús já xihín ná:

—Ndiquiahva ndó ñaha da cómi cuéntá saha ndó ñuu Roma jan nu dá. Ta ndiquiahva ndó nu Ndióxi ña cúu ñaha mé á —nācachi a.

Chí nācatóntó mé na cán sahá ña nācachi Jesús xihín ná.

**Ndáca tũhún na saduceo Jesús
á mé a ndaa nditacu ndii**

(Mt. 22:23-33; Lc. 20:27-40)

¹⁸ Andá já nasahan java na saduceo cahán na xihín Jesús. Ta mé na saduceo yóho co cándusa na ña ndítacu tucu na sa naxihí. Sahá ña cán quéa nandaca tũhún na Jesús já cáchí na já xihín á:

¹⁹ —Maestro, nu ley nacañhi Moisés sanahá natañda chuun ta cáchí a já: “Tá tándañha in dataa xihín ñájíhí da ta tá coó jahyi ñá cácu xihín dá ta tá ná xinu quivi quivi da cán já quéa cáchí ley Moisés ña ndítahan tandañha tucu ñájíhí da xihín da cúu ñani mé ndii cán já ná coo jahyi da cán xihín yuhú nuú ñani da”, já cáchí ley Moisés. ²⁰ Ta viti cuni johó ndó ná cacu nde in quiahva nu ndó. Nasahin usa ñani ta da nu cuítí natan-dañha dá xihín in ñañáñha. Tá nandihí naxihí da joo coó jahyi da ná cacu xihín ñá cán. ²¹ Ta natandañha ñani da, da chí ivi xihín ñá cuáan cán. Ta já naxihí ri da cán va ta ni da yóho coó nacacu jahyi xihín ñájíhí ñani. Ta quiahva já nandoho ri ñani da, da chí uní. ²² Andá quiahva naxinu ndíhusa da natandañha xihín ña ta ni in da coó nacacu jahyi xihín ña. Tá nu ndíhí naxihí ri mé va ñá. ²³ Ta viti ndáca tũhún nde ndohó ndá da cacuu ndusa yí ñá cán tá ná xinu quivi nditacu tucu ndii jáchí ndíhusa va ñani da cán natandañha xihín ñá —nacachi na.

²⁴ Andá já nanducú ñehe Jesús tũhun nu ná já cáchí a já xihín ná:

—A váha toho cáhvi ini ndó jáchí co xini ndó ndaja cáhan tũhun Ndióxi ta ni co xini ndó ndá quiahva cáhnu cúu ndée Ndióxi. ²⁵ Jáchí tá ná nditacu tucu ndii a tándañha ga na ta ni a quiahva na jahyi jíhí na tandañha ná. Cacuu na tá-tũhun táto Ndióxi ndúu indiví ta co tándañhá na cán. ²⁶ Joo sa xini yo ña nditacu tucu ndii. Á a ñáha cahvi ndó ña nacañhi Moisés sahá ña nacañhan Ndióxi xihín dá

tañu tohíñú, dó cándaha ñũhu cán. Já nacachi a já xihín dá: “Yehe cúu Ndióxi cája cáhnu Abraham ta yehe cúu Ndióxi cája cáhnu Isaac ta yehe cúu Ndióxi cája cáhnu Jacob”, nacachi a. ²⁷ Ta ña yóho cúní cachi a ña tácu yí va Abraham xihín Isaac xihín Jacob vatí sa naxihí yiquí cuñu na. Sahá ña cán quéa co xini ndó ndá saha cáhan ndo —nacachi a.

**Tá cáhan Jesús ndia cúu ña cáhnu
chága sáhdá Ndióxi caja í**

(Mt. 22:34-40)

²⁸ Ta ndaja coo in da jánaha ley Moisés nacayati da nu Jesús jáchí sa naxini johó da ña nacañhan Jesús xihín na ndúu cán. Sahá ña xini da ña nanducú ñehe ndaa Jesús tũhun nuú na cán sahá ña cán quéa nandaca tũhún da Jesús já cáchí da já xihín á:

—Ndiá cúu ña cáhnu chága sáhdá Ndióxi caja í —nacachi da.

²⁹ Já nacachi Jesús já xihín dá:

—Ña cáhnu chága cúu ña cáchí tũhun Ndióxi yóho: “Taa johó ndó, na Israel. Ín in tũhún jini Ndióxi ta mé á cúu xito ho í. ³⁰ Ta ndítahan quihvi ini ndó mé Ndióxi, xito ho ndó xihín tóco ndihí ínima ndo ta xihín ndinuhu ini ndó. Ta quihvi ini ndó a xihín tóco ndihí xini túni ndo ta xihín tóco ndihí ndée ndo.” Ña yóho cúu ña nu cuítí sáhdá Ndióxi caja ndó. ³¹ Tá cúní coo ña nu cuítí já cúní coo ri ña chí ivi va ta cáchí a: “Quihvi ini ndó ñani táhan ndó tá quiahva quihvi ini ndó mé ndó.” Coó ga inga ña sáhdá Ndióxi caja ndó cacuu ña cáhnu chága nuú ña yóho —nacachi a.

³² Andá já nacachi mé da jánaha ley Moisés cán xihín Jesús:

—Vaha chá nacañhan ndó, Maestro. Mé a ndaa quéa nacañhan ndo ña ín in tálaá cuítí Ndióxi ta coó inga ga Ndióxi. ³³ Ta ndítahan quihvi ini mé á xihín tóco ndihí ínima yo ta xihín ndinuhu ini ta xihín tóco ndihí xini túni yo ta xihín tóco

ndihi ndée yō. Ta ndítahan quihvi iní ñani táhan í tá quiahva quihvi iní mí. Ndiyahvi chága ña yóho a juú ga tóco ndihi ñaha jóco na nu Ndióxi ta ndiyahvi chága ña a juú ga ñaha chícaan ñúhu ná nu náa —ñacachi da.

³⁴Tá ñaxini Jesús ña ñanducú ñehe vaha da cán tuhun nu á já cáchi a já xihín dá:

—Jalóho cúní ña cacomí Ndióxi cuéntá sahun —ñacachi Jesús.

Tá ñandihí cán ni in ga na coó nasahan ndee ini na ndaca tuhún ga na mé á.

Ndáca tuhún na Jesús ndáchí ñaquixi a

(Mt. 22:41-46; Lc. 20:41-44)

³⁵Ndácaan Jesús veñuhu cáhnu já-ñaha nuú ñayivi já cáchi a já xihín ná:

—Ndávaha cáchi na jáñaha ley Moisés ña vaxi Cristo chichi David. ³⁶Ta sa mé David tá ñachutú ndaa ini da xihín ínima yij Ndióxi já ñacachi da já:

Já ñacachi Ndióxi xihín xitoho i: “Cacoo xoo cuáha i yóho, anda quiahva ná caha i ña ná cacomún cuéntá sahá na co cúní yohó”, ñacachi Ndióxi sanahá.

³⁷Ndávaha cáchi na ña vaxi Cristo chichi David joo mé tiempo cán ñacachi David ña cúú á xitoho da —ñacachi Jesús.

Ta cuaha ndivaha ñayivi cájii íní na táa johó na nu cáhan Jesús.

Chícaan Jesús cuachi jatá na jáñaha ley Moisés

(Mt. 23:1-36; Lc. 11:37-54; 20:45-47)

³⁸Tá jáñaha Jesús na já cáchi a já xihín ná:

—Cuéntá coo ndó xihín na jáñaha ley Moisés jáchi cátoó na cándixi na jáhma nání caca nuu na. Ta cátoó na cahan toní ñúhu ndivaha ñayivi xihín ná tá xíca nuu na nuú yahvi. ³⁹Ta tá cuahan na veñuhu cátoó na cacoo na nu sácoo na íin chága saha. Ta tá cuahan na víco nuú vaha

cátóo na coo na. Cuéntá coo ndó xihín na yóho. ⁴⁰Jáchi cándaa na vehe najihí cuáan ta tá ñandihí cuahá ndivaha xíca tahví na nu Ndióxi jáchi cúní na jájahvi na nuú ña núu cája na. Mé a ndaa ná cahan i xihín ndo ña mé na jáñaha ley Moisés yóho cacuu na na ndoho chága ini caha Ndióxi —cáchi Jesús.

Ña najoco in ná cuáan ndáhvi

(Lc. 21:1-4)

⁴¹In tañu íin coo Jesús ini veñuhu cáhnu cán yati nu íin sató nu táán na jiuhún jóco na nu Ndióxi. Ta sándehe a ndá quiahva táán ñayivi jiuhún ini mé sató cán. Ta ñaxini a cuahá ña cuicá xínu coo táán cuahá na jiuhún ini mé sató cán. ⁴²Ta mé já ñaxinu coo in ná cuáan ndáhvi ta ñataán ña ivi jiuhún ña núu yahvi ini mé sató cán. ⁴³Já ñacana Jesús na xíca tuun xihín á ta já cáchi a já xihín ná:

—Mé a ndaa ná cahan i xihín ndo ña cuaha chága jiuhún nasahan ná cuáan ndáhvi yóho a juú ga tóco ndihi java ga na cán. ⁴⁴Jáchi tóco ndihi na cán nasahan na ña yójó nu ná joo ña cuáan ndáhvi yóho nasahan ná nu Ndióxi tóco ndihi ña cómi ña catacu ña —ñacachi a xihín ná.

Cáxi tuhun Jesús nu ná ña vaxi quivi ndihi sahá veñuhu cáhnu ñuu Jerusalén

(Mt. 24:1-2; Lc. 21:5-6)

13 Tá ñaquee Jesús veñuhu cáhnu cán já ñacachi in da xíca tuun xihín a cán já:

—Maestro, candehé ndó ndaja náhnu yuu ñacavaha na veñuhu yóho ta ndaja jícó ndivaha ñacavaha na ña —ñacachi da.

²Anda já ñacachi Jesús já xihín dá:

—Mé a ndaa náhnu a joo ndá chuun cúú á jáchi ni janda in yuu yóho a cán-

doj jatá inga yuu jáchi vaxi quivi tá ndi-
tani ndihi ña yóho —ñacachi a.

**Ndicani Jesús ña coo tá ná
cayati quivi ndihi saha ñuyivi**

(Mt. 24:3-28; Lc. 21:7-24; 17:22-24)

³Anda já nasahan na cán yucu yíto
Olivo, ña xíto ndaa táhan xihín veñuhu
cáhu cán. Ta tá fin coo Jesús cán já
naxinu Pedro xihín Jacobo xihín Juan
xihín Andrés já nacahan jehé na xihín á
já cáchi na já:

⁴—Cúni nde ña ná caxi tuhun ndó
xihín nde ndá ama coo tóco ndihi ña
yóho. Ta ndaja coo tá sa nacayati mé
quivi cán —ñacachi na.

⁵Já ñacachi Jesús já xihín ná:

—Cuénta coo ndó ta a quiahva ndó
ñamaní jándahvi ni in ñayivi ndohó.

⁶Jáchi cuahá ndivaha na quixi na cuénta
mí i ta cahan na ña tuhún tá cachi na já
xihín ndó: “Yehe cúu Cristo, da nacin-
dahá Ndióxi cacomí cuénta sahá ñayivi.”
Ta xihín ña yóho cuahá ndivaha ñayivi
jándahvi na.

⁷Joo tá nacasahá xini johó ndó ña
yóho cáa cúu tondohó, a cáyihvi toho
ndó jáchi quiahva já ndítahan coo. Joo
cámaní yíi xinu coo quivi nu ndíhi.

⁸Jáchi ñayivi ndúu in nación ndicuíta na
cani táhan na xihín na ndúu inga nación
ta cani táhan na in ñuu xihín na inga
ñuu. Ta quixi nditáan ndijáa nu ndúu
ñayivi já xinu tama ndeé ta já casahá na
ndivaa na. Ta tóco ndihi ña yóho cúu á
tá cava sahá sahá ña núu vaxi nuú ñayivi
jáchi cámaní xinu coo chaga nuú ndoho
ini na.

⁹Joo candaa vaha ndó mé ndó jáchi
ndiquiahva na ndohó ndahá na cómi
chuun ta cani na ndohó ini veñuhu. Ta
sahá yehe cañehe na ndohó nuú na cómi
cuénta sahá ñayivi xihín nuú na cúu ju-
tixia ta já cuu cahan ndó sahá i nuú na
cán. ¹⁰Joo jihna ñuhú xini ñuhú ndicuíta
nuu tuhun vaha saha mí i nu tóco ndihi

ñayivi anda jávi ndihi saha ñuyivi yóho.

¹¹Ta tá ná cañehe na ndohó cūhun ndó
nuú na jutixia, a ndicani ini ndó sahá
ndá tuhun cahan ndó xihín ná. Mé hora
já cahan ndó ña quiahva Ndióxi nu ndó
cahan ndó. Jáchi a juú jini mé ndó quixi
ña cahan ndó. Ínima yii Ndióxi cacuu ña
quiahva tóco ndihi ña cahan ndó. ¹²Ta
java ña jicó tuhún da jahyi da ña ná cahní
ñahá na. Ta cuahá ná ndicuíta na cani
táhan na xihín tátá na ta cahní ñahá
na. ¹³Ta ndaja táhan ñayivi ndúu ñuyivi
yóho candají na ndohó sahá yehe. Joo
ndá na ná candico tuun íchi mí i janda
ná xinu quivi quivi na, na jan cacuu na
cacu ndaa ínima.

¹⁴Ña cáhvi tutu ná candaa ini na ña
cahan. Daniel cúu da nacahyí sanahá
sahá in ña quini ña jativí ñahá. Tá ná
cuni ndó ña cándichi in a nuú co ndí-
tahan coo a já ndítahan nuú na ndúu es-
tado Judea cunu na cūhun na chí yucu.
¹⁵Ta ndá na cánúu jini véhe mé quivi já
co ndítahan nuu na tavá na ñaha vehe
na. ¹⁶Ta ndá na ndúu yucu co ndíta-
han ndicó coo na vehe na ndiquehe na
jáhma ná. ¹⁷Ndahví najihí, mé na ñuhu
jahyi mé quivi já. Ta ndahví na ñehe
ndaa na valí táhan ña chíchi yii. ¹⁸Ca-
ca ñahví ndo nu Ndióxi ña ná a cacuu a
tiempo vixi tá ná cunu ndó cūhun ndo
já ná a ndóho chaga ini ndó. ¹⁹Jáchi
quivi ndoho ndivaha ini ndó cacuu a cán.
Jáchi janda tá nacava sahá saha ñuyivi
coo nandoho ini na tá quiahva ndoho ini
na mé quivi jan. Ta tá ná yaha ña jan, a
ndicó coo ga ña ndoho ini na quiahva já.
²⁰Ta tá ná a ndaja cuítí Ndióxi tiempo
yóho ni in ñayivi a cúu cacu ndaa. Joo
nasacu ini a ndaja cuítí a mé tiempo
yóho jáchi quihvi ini a tóco ndihi na na-
caxi mé á.

²¹Ta tá ná cachi in na xihín ndó: “Can-
dehé ndo, yóho in Cristo, da nacin-
dahá Ndióxi cacomí cuénta sahá ñayivi”, á tá

ná cachi na: “Candehé ndo, cáa íin da”, cachi na já queá a cándúsa toho ndó na. ²²Jáchí quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuahá ná ta cachi na cahán na cuéntá Ndióxi ta jári caja na cuahá nuú ña náhnu xihín ña xitúhún ña ná jándahvi na ñayivi. Ta anda na sa ñacaxi Ndióxi jándahvi na tá ná cuu caja na ña. ²³Xíní ñúhú candehé vaha ndó mé ndó jáchí sa ñacaxi tuhun yachí ndihi i ña yóho xihín ndo —ñacachi Jesús.

Ndaja coo tá ná xinu coo quivi quixi tucu Jesús

(Mt. 24:29-35, 42, 44; Lc. 21:25-36)

²⁴Já cáchí tucu Jesús já:

—Joo tá sa nayaha tóco ndihi ña ñandoho ini ñayivi já canaa nuú candii ta a ndíyehé ga yoo. ²⁵Anda indivi quee quimi cuyu rí nu ñúhu ta quiji nuu indivi ña ñacavaha Ndióxi. ²⁶Anda já cuni na yehé quixi i tañu víco xihín tóco ndihi ndée cáhnu i, da ñachindahá Ndióxi nduu ñayivi. Ta cuni na ndá quiahva cáhnu cúu yehé. ²⁷Ta tá ñandihí já chindahá i táto mí i ña ná jánditaca na ña sa ñacaxi i tañu tóco ndihi ñuu janda ní cúu sahá ñuyíví ta janda ní cúu sahá indivi.

²⁸Catiahva ndó ña cúní cachi mé quiahva sácú u nu ndó sahá titó ñúhú. Tá yúta ndáha dó cán ta vaxi núma válí do já candaa ini ndó ña vaxi tiempo ihní. ²⁹Ta quiahva já cacuu ña yóho tá ná cuni ndó yaha tóco ndihi ña yóho. Jáchí anda jáví candaa ini ndó ña ñacayati tiempo quixi tucu yehé ñuyíví yóho. ³⁰Mé a ndaa ná cahán i xihín ndó ña yaha tá yaha tóco ndihi ña ñacachi i xihín ndo ta anda jáví quivi na ndúu tiempo viti. ³¹Ta ndihi sahá indivi xihín ñuyíví joo a ndíhi toho sahá tuhun ñacahan i xihín ndó yóho. Jáchí coo tá coo va ña.

³²Joo ni in túhún toho ñayivi co xíní na ndá quivi á ndá hora yaha ña yóho. Ta ni mé táto Ndióxi ndúu indivi co xíní na ndá quivi coo ña yóho. Ta ni yehé, da cúu in túhún jini já jahyi Ndióxi co xíní ndá quivi coo ña yóho. In túhún Ndióxi, táta yo queá xíní a.

³³Sahá ña cán queá cañuhu ini ndó sahá ña yóho. Coo tiahva ndó ta caça tahví ndo nu Ndióxi jáchí co xíní ndó ndá quivi xinu coo ña yóho. ³⁴Jáchí ña yóho cúu á tátuhun in dataa queá cuahan xicá joo tá cámaní quee da cuhun da janda-coo tóo da vehe da nu mozo da ña ná candaa na ña. Ta sahan da chuun caja in in mozo da. Ta nuú da ndáa yéhe ñasahnda da chuun ña ná candaa vaha da ña. ³⁵Sahá ña cán queá xíní ñúhú coo tiahva ndó jáchí co xíní ndo ndá quivi xinu coo mé da cúu xitoho vehe. Co xíní ndo á cacuu a tá ñacuaá tóo á cacuu a java ñuu táji á cacuu a tá ñacana chéle á cacuu a tá sa ñatívi. ³⁶Cuéntá coo ndó. A juú tiahva náa xinu coo da ta ndíyehé dá ndohó ndúu ndó quíji ndo. ³⁷Ña cahán i xihín ndó cahán i xihín ndihi na: Xíní ñúhú coo tiahva ndó sahá mé quivi quixi tucu u —ñacachi Jesús.

Ndítuhún jehé na tiin na Jesús

(Mt. 26:1-5; Lc. 22:1-2; Jn. 11:45-53)

14 Tá cámaní ivi quivi caja na víco pascua xihín víco tá xixi na pan ña co queé yusá ñaxaa xihín já ñacasáhá na sacuahá nuú jutu xihín na jánahe ley Moisés ndúcú na ndá quiahva caja na tiin jehé na Jesús já cuu cahní na a. ²Ta já cáchí xihín táhan na:

—A tiin toho í da mé víco jáchí tiahva náa ndivaa ñayivi —ñacachi na.

Tá ñachojó in ñánáha perfume jini Jesús

(Mt. 26:6-13; Jn. 12:1-8)

³Ta ndaja coo íin Jesús ñuu Betania vehe Simón, da cahán na xihín: taa ñan-

doho cuehe táhyi. Ta nani ndúu coo na nu mesa cán naxinu in ñáñáha ta ñéhe ñá in yúyú alabastro nachutu jini a xihin perfume, dó támi ndivaha sahan ta cúu dó perfume yahvi ndivaha. Ta natahvi ñá yóho mé yúyú cán já nachojó ña do jini Jesús. ⁴Ta java na ndúu cán nacasáha cáchi xihin táhan na já:

—Ndávaha nativi un perfume yóho.

⁵Cuu jicó yó do, nduu ta yáha ga nuú uni ciento denario quehé saha dó ta xihin jjuhún cán cuu chindeé yó na ndahvi, nduu —cáchi na.

Sahá ña cán queá naxojo ini na xihin ñáñáha cán ta nacahan núu na saha ña.

⁶Anda já nacachi Jesús já xihin ná:

—A cahan ndó xihin ña. A jáquihvi ndó ña. Ña vaha queá nacaja ñá yóho xihin i. ⁷Jáchi na ndahvi ní tiempo canduu na tañu ndó ta cuu caja ndó ña vaha xihin ná ndá tañu cuni mé va ndó joo yehé a cóo tuun toho i xihin ndo. ⁸Mé ñá yóho nacaja ñá janda nuú naxinu ndéé ñá caja ñá xihin i. Sa najándicuchu yachi va ñá yóho yiquí cuñu i xihin perfume, dó támi sahan jan ña ná coo tiahva vi tá ná casaá quivi nduxu. ⁹Mé a ndaa ná cahan i xihin ndo ní cúu ñuyivi nuú caca nuu ñayivi cahan na tuhun vaha saha mí i já queá ndicani na ña nacaja ñá yóho xihin i já ndicuhun ini na saha ña —nacachi a.

Jicó túhún Judas Jesús

(Mt. 26:14-16; Lc. 22:3-6)

¹⁰Ta ndaja coo in táhan da uxu ivi xica tuun xihin Jesús, da nani Judas Iscariote nasahan da cahan da xihin na sacuha nuú jutú. Já nasahan da tuhun da nuú na cán ña ndiquahva da Jesús ndáha ná. ¹¹Tá naxini johu na cán ña nacachi da xihin ná nacavatá na ta nasahan na tuhun na nu mé Judas ña quiahva na jjuhún nu dá. Ta sa mé nani já na-

casáha Judas ndúcu da ndaja cuu caja da ndiquahva da Jesús nu ná.

Tá naxijini ndayi Jesús xihin na xica tuun xihin á

(Mt. 26:17-29; Lc. 22:7-23;
Jn. 13:21-30; 1 Co 11:23-26)

¹²Mé quivi nuú vicó pascua tá xixi na pan ña co queé yusá naxaa xihin já sáhní na ndicachi válí jóco na nu Ndióxi. Já nandaca tuhún na xica tuun xihin Jesús mé á já cáchi na já xihin á:

—Ndáchi cuni ndó cuhun nde caja ndívi nde cajini ndó vicó pascua —nacachi na.

¹³Anda já nachindahá Jesús ivi da xica tuun xihin á já cáchi a já xihin dá:

—Cuáhán ndó ñuu jan jáchi jan ndiñehe ndó in dataa ñéhe da in yoo ticuij ta candico ndó da cuhun ndo. ¹⁴Tá ná xinu da vehe nuú ndihvi da já cachi ndó xihin da cúu xitoho vehe cán já: “Da jánaha ndehe cáchi xuhun: Ndáchi íin nuú coo i cajini i vicó pascua xihin na xica tuun xihin i.” ¹⁵Anda já jánaha mé da cán in cuarto cáhnu ña cánúu jini véhe piso ninu. Sa íin tiahva va ña. Cán caja ndívi ndo ña cajini —nacachi Jesús xihin ná.

¹⁶Já naquee mé na xica tuun xihin Jesús cán cuahan na ta tá naxinu na ñuu cán nasahin tá íin cáchi Jesús xihin ná. Já nacaja ndívi na ña cajini na vicó pascua mé cán.

¹⁷Tá nacuaá naxinu Jesús xihin ndihuxu ivi na xica tuun xihin á. ¹⁸Ta tá ndúu coo na nu mesa xixi na já nacachi Jesús já xihin ná:

—Mé a ndaa ná cahan i xihin ndo ña in táhan ndó, da ndúu coo xixi xihin i nu mesa yóho cacuu da jicó túhún yehé —nacachi a.

¹⁹Anda já nacasáha na cán cacuéha ini na já nacasáha tá in tá in na ndaca tuhún na mé á já cáchi na já xihin á:

—Á yehé cacuu da jicó túhún mé ndó.

Já naçachi inga tucu da já:

—Á a juú yehe cacuu da.

²⁰ Anda já naçachi Jesús já:

—In táhan ndó da cúú uxu ivi, da in ndúu xíxi xihín i ini cohó i, da cán cúú da jicó túhún yehe. ²¹ Yehe cúú da naçindahá Ndióxi nduu ñayivi ta ndítahan nuú i quivi i tá ín cáhí tũhun Ndióxi. Joo ndáhvi nahá naçuu da jicó túhún yehe. Janda vaha chága ná a cacú da, nduu —naçachi a.

²² Nani xíxi na ndúu na nañiin Jesús pan já nandiquiahva ndixahvi nu Ndióxi. Tá nandih naçahnda java ña ta nasahan ña nu ná já cáhí a já xihín ná:

—Júhun ndó jáchí ña yóho cúú tá-tũhun yiquí cuñu i —naçachi a.

²³ Tá nandih nañiin a in vaso nu ñúhu tó uva já nandiquiahva ndixahvi nu Ndióxi. Ta naçahan mé á do nuú na cán ta tá in tá in na naçih na do. ²⁴ Já naçachi a já xihín ná:

—Dó yóho cúú dó tátũhun ní i, dó cuíta sahá cuahá ñayivi. Tá ná cuíta ní i já canda ini ndó ña najáxinu coo Ndióxi tũhun a nasahan sanahá. ²⁵ Mé a nda ná cahan i xihín ndo ña a cóho ga i tó uva janda quiahva ná xinu coo quiví coho tucu u inga dó vaha chága tá ná xinu quiví cacomí Ndióxi cuéntá sahá ñayivi —naçachi a.

Cáxi tũhun Jesús ña chijehé tũhun Pedro ña xini da mé á

(Mt. 26:30-35; Lc.

22:31-34; Jn. 13:36-38)

²⁶ Tá nandih naçita na in canto já naçee na cahan na yúcu yitó Olivo.

²⁷ Anda já naçachi Jesús já xihín ná:

—Tóco ndih ndó jándacoo ndó yehe ñúú viti jáchí já cáhí tũhun Ndióxi já: “Cahní i da ndáá ndicachi ta xihín ña yóho ndicuíta nuu ndicachi jana dá cũhun ri”, cáhí tũhun Ndióxi. ²⁸ Joo tá nandih nditacu tucu u ta já cũhun jihna

ñúhu yehe estado Galilea anda já cũhun mé ndó —naçachi a.

²⁹ Anda já naçachi Pedro já xihín Jesús:

—Vatí ná jándacoo ndih na mé ndó joo a jándacoo toho i ndohó —naçachi da.

³⁰ Anda já naçachi Jesús já xihín dá:

—Mé a nda ná cahan i xũhun mé ñúú viti tá camaní cana ivi chéle já chijehé tũhun ña xínún yehe uní tañu —naçachi a.

³¹ Já naçasahá ndúcú ndéé Pedro cahan da já cáhí da já:

—Vatí ná quivi i xihín ndo joo a chí-jehé tũhun toho i sahá ña xini i mé ndó —naçachi da.

Ta mé quiahva já naçachi ndih na cán xihín á.

Tá xica tahví Jesús tañu yitó olivo naní a Getsemaní

(Mt. 26:36-46; Lc. 22:39-46)

³² Anda já naçinu na cán in nuú naní Getsemaní já naçachi Jesús já xihín na xica tuun xihín á:

—Yóho cacoo ndó nani ná cũhun i caa caça tahví i nu Ndióxi —naçachi a.

³³ Ta ndáca Pedro xihín Jacobo xihín Juan cahan xihín á. Ta ndaja coo naçasahá cacuéha ini a ta a juú quiahva táhví ini a. ³⁴ Já naçachi a já xihín ná:

—Cacuéha ndivaha ini i chí quivi i cúu ini i. Yóho candoo tóo ndó ta coto a cúju ndo —naçachi a.

³⁵ Anda já naçee Jesús cahan chága chí nuu já naçaxítí a janda quiahva naçinu coo nuu á nu ñúhu cán. Já naçica tahví a nu Ndióxi ña ná caja mé á ña ná a ndóho a tá quiahva vaxi nu á ndoho a chí nuu. ³⁶ Já cáhí a já xica tahví a nu Ndióxi:

—Tátá Ndióxi, tóco ndih ñaha cuu caja ndó. Chindeé ndó yehe ná a ndóho i ña ihvi ndivaha ña vaxi nuú i ndoho i.

Joo ná coo tá iin cúni mé ndó ta ná a cóo toho ña cúni yehe —ñacachi a.

³⁷ Anda já nandicó coo a nu ndúu na xíca tuun xihín á cán ta já nandiñehe á na quíji na ndúu na. Já ñacasáhá cáchí a já xihín Pedro:

—Á quíji vún, Simón. Á coo ñacuu canditún ni in hora. ³⁸ Xíni ñúhú coo tiahva ndó ta caça tahví ndo nu Ndióxi já ná a cóto ndojó rí quini ndohó. Mé a ndaa ínimá ñayivi cúni a ndinducú a Ndióxi joo yiquí cuñu na co iin tiahva caja ña cúni Ndióxi —ñacachi a.

³⁹ Anda já ñaquee tucu a cuahan caça tahví a nu Ndióxi. Ta sa mé tuhun ñacahan nu cuítí cán ñacahan tucu a chí ivi. ⁴⁰ Ta tá nandicó coo a nandiñehe tucu a na xíca tuun xihín á cán ndúu na quíji na jáchi ñaquehe a mahnú na. Ta chí co xíni na ndá tuhun nducú ñehe na nu Jesús sahá ña quíji na. ⁴¹ Tá nandicó coo a táhndá uní já ñacachi a já xihín ná:

—Vatí cúni ndó cuju ndo ta vatí cúni ndó ndiquehe ndée ndo joo a cúu caja ndó ña viti. Jáchi sa ñaxinu coo hora ndiquiahva na yehe, da ñachindahá Ndióxi nduu ñayivi ndahá ñayivi cája cuachi. ⁴² Cuahán ndaoco ndó ná coho. Jáchi sa vaxi da jícó túhún yehe —ñacachi a.

Tá ñatiin na Jesús

(Mt. 26:47-56; Lc. 22:47-53; Jn. 18:2-11)

⁴³ Ta nani cáhan yii va Jesús cándichi a já ñaxinu Judas, da cúu in táhan da uxu ivi xíca tuun xihín Jesús cán. Ta xihín mé da cán vaxi cuahá ñayivi ñehe na machiti xihín yíto viti. Mé na vaxi cán cúu ná na vaxi cuéntá na sacuahá nuú jutú xihín nuú na jánaḡa ley Moisés xihín nuú na sacuahá veñuhu. ⁴⁴ Ta mé Judas, da ndiquiahva mé á nuú na cán sa ñacandoo da xihín na cán ña tatí yúhu dá sajóho Jesús jáchi ñacachi da já xihín ná:

—Mé da ná tatí yuhú u sajóho, da cán cúu dá tiin ndó ta cató tuun ndó da cañehe ndó cuhun ndo —ñacachi da.

⁴⁵ Ta tá ñaxinu da cán chí ivi laá ñacayati da nu Jesús já cáchí da já xihín á:

—Maestro, maestro.

Já ñatati yúhu dá sajóho a. ⁴⁶ Anda já ñatiin tuun na Jesús.

⁴⁷ Joo in táhan da xíca tuun xihín Jesús cán ñatavá da machiti da já ñachitúhun dá in johu da cúu mozo da sacuahá nuú jutú cán. ⁴⁸ Anda já ñacachi Jesús já xihín na ñaxinu tiin ñahá cán:

—Cája ndó xihín i tátuhun cája na xihín ṡa cuíhná jáchi ñaqueta ndó vaxi ndó tiin ndó yehe xihín machiti ta xihín yíto. ⁴⁹ Ndijáá ní quivi ñasahiiin i tañu ndó jan ta najánaḡa i ndohó ini veñuhu cáhnu ta ni in tañu coo ñatiin ndó yehe. Joo tóco ndihi ña yáha yóho xíni ñúhú yaha ña já ná xinu coo nuú ña ñacahyi sahá i ini tuhun Ndióxi —ñacachi a.

⁵⁰ Anda já ñaxinu ndihi na xíca tuun xihín Jesús cán cuahan na ta najándacoo na mé á.

Tá ñaxinu in ñatacú cuahan da

⁵¹ Joo in ñatacú cátiví da in túhún jiní sávana ndíco da jatá na cán cuahan da ta ñatiin na da. ⁵² Joo najaní da mé dá ta ñacandoo sávana da já ñaxinu lahla da cuahan da.

Ñasacu na Jesús nuú ñataca ndihi na sacuahá

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Anda já nasañehe na Jesús ñasahan na nuú da cúu sacuahá cháḡa nu ndíhi jutú. Ta nandique táhan tóco ndihi na sacuahá nuú jutú xihín na sacuahá veñuhu xihín na jánaḡa ley Moisés. ⁵⁴ Ta ñasandíco xíca Pedro Jesús anda quiahva ñaxinu da yéhe vehe da cúu sacuahá cháḡa nu ndíhi jutú cán. Já

naſaco da xihín da ndáá veñuhu cáhnu cán xítúní da yati yávi núhu cán.

⁵⁵ Ta na ſacuaha nuú jutú xihin tóco ndihi na cómi cuéntá sahá na Israel natata na cán ndúcú na cuachi jácana na jatá Jesús já cuu cahní ñahá na. Joo coó cuachi jíquí ná ñeñe ná chímúu na jata mé á. ⁵⁶ Ta cuaha ná naſasáhá cáhan na ña tuhún saha Jesús joo co xínu tuhun cáhan na jáchi á cuú ndique táhan vaha tuhun na. ⁵⁷ Ta nandaca ndichi java da cáhan da tuhun jíquí saha Jesús já cáchi da já:

⁵⁸ —Naſaxini joho nde naſacachi da jan já: “Jánditani i veñuhu cáhnu cán, ña nacavaña ñayivi ta tixi uní quívi jácandichi tucu u inga ga ña a cuú cavaña ndahá ta” —naſacachi da.

⁵⁹ Joo ni já coó naſacuu ndique táhan tuhun na xihin ña naſacachi na cán.

⁶⁰ Anda já nandaca ndichi mé da cuú ſacuaha chága nu ndíhi jutú tañu na cán já nandaca tuhún da Jesús já cáchi da já xihin á:

—Á chí a ndúcú ñehún tuhun nuú nde sahá cuachi jácojo na jatun —naſacachi da.

⁶¹ Joo coó naſacahan Jesús ni in tuhun xihin ná já táji ní já va naſahiin a. Mé da cuú ſacuaha chága nu ndíhi jutú cán naſasáhá ndaca tuhún tucu da a já cáchi da já xihin á:

—Á jivi ndusa yóhó cúun Cristo, da cuú in túhún jiní já jahyi Ndióxi yíi, mé da naſchindahá Ndióxi cacomí cuéntá sahá ñayivi —naſacachi da.

⁶² Anda já naſacachi Jesús já:

—Ajan, jivi yehe cuú dá. Ta vaxi quívi tá cuni ndó yehe, da naſchindahá Ndióxi nduu ñayivi caoó i xoo cuáha Ndióxi, mé a ín cuaha ndée. Ta já cuni ndó yehe ndicó coo i ñuyívi yóho tañu vico tá ná quixi i chí indiví —naſacachi a.

⁶³ Anda já nandatá da cuú ſacuaha chága nu ndíhi jutú jáhma da ña ná can-

daa ini ñayivi ña xójo ini da. Já cáchi da já:

—Ndá chicuu chága yó ñayivi ndicani nu yo. Xihin ña naſacahan da yóho cánda iní ña ndája núu da Ndióxi. ⁶⁴ Á ſa naſaxini joho ndó ña ndája núu da Ndióxi xihin tuhun naſacahan da. Ndaja xíní ndó caja i xihin dá viti —naſacachi da.

Anda já nandique táhan tuhun ndihi ñayivi ña ndaca cuachi nu Jesús ña cán quea ndítahan quívi a.

⁶⁵ Java na naſasáhá na xihnu ndaa na tójií nu á ta java na naſchicaji na jáhma nu á já naſasáhá cáni na jahnda nuu á já ndaca tuhún ñahá na já cáchi na já xihin á:

—Cahan xihín nde yo naſacani yóhó viti —naſacachi na.

Ta janda na ndáá veñuhu cáhnu cán viti naſasáhá cáni na jahnda nuu á.

Tá naſchijehé tuhun Pedro ña xíní da Jesús

(Mt. 26:69-75; Lc. 22:56-62;

Jn. 18:15-18, 25-29)

⁶⁶ Ta ndaja coo Pedro ín yíi dá xítúní da cán já naſaxinu in ña cája chúun xihin da cuú ſacuaha chága nu ndíhi jutú. ⁶⁷ Já naſaxini ña xítúní Pedro ta nahá vaha naſandehé ña nu dá já cáchi ña já:

—Yóhó cúun táhan da xíca tuun xihin Jesús, da ñuu Nazaret —naſacachi ña.

⁶⁸ Joo naſchijehé tuhun da ña xíní da Jesús já cáchi da já:

—Uhun. Co xíní toho i da ta co xíní toho yehe ndá saha cáhun —cáchi Pedro.

Anda já naſacayati da yuyéhé ta ivi laá nacana chéle. ⁶⁹ Tá naſaxini mé ña cája chúun xihin da cuú ſacuaha chága nu ndíhi jutú cán ña naſandichi tóo da yéhé cán já naſasáhá ña cáxi tuhun ña xihin tóco ndihi ñayivi ndúu cán já cáchi ña já:

—Candehé ndó. Da cáa cuú in táhan da xíca tuun xihin Jesús —naſacachi ña.

⁷⁰ Nacachi tucu Pedro ña cō xini da Jesús. Chá va nayaha ña yóho ta já nacachi na ndúu xitúni cán xihin Pedro:

—Táhan ri da caa va cúu yóhó jáchi cúun da Galilea ta cáhun tátuhun cáhan na cán —nacachi na.

⁷¹ Anda já nacasáhá Pedro cánahá da ta natavá da quivi Ndióxi ña cō xini da Jesús já nacachi da já:

—Ni cō xini mí i ndá ña cúu da jan, da cáhan ndó sahá jan —nacachi da.

⁷² Tá nacachi da já ivi laá nacana chéle ña chí ivi. Anda já nandicuhun ini Pedro ña nacachi Jesús xihin dá tá nacachi a já: “Tá camaní cana ivi chéle sa chí-jehé tuhún ña xínun yehe uní tañu.” Tá nandicuhun ini Pedro ña yóho já nacasáhá sácu ndivaha da.

Tá nandiquiahva na Jesús ndáha Pilato

(Mt. 27:1-2, 11-14; Lc. 23:1-5; Jn. 18:28-38)

15 Tá nativi inga quivi itaan já nandique táhan na sacuahá nuú jutú xihin na sacuahá veñuhu xihin na jánahá ley Moisés xihin ndihi na cómi cuéntá sahá na Israel. Já nacató na Jesús ñehe na a cuahan na já nandiquiahva na mé á nu Pilato. ² Ta mé Pilato nandaca tuhún da Jesús já cáchi da já xihin á:

—Á mé a ndaa cúun in rey, da cómi cuéntá sahá na Israel.

—Ajan. Jivi cúu u tá quiahva cáchi ndo jan —nacachi Jesús xihin dá.

³ Ta najácojo na sacuahá nuú jutú cán cuahá cuachi jata Jesús. ⁴ Já nandaca tuhún tucu Pilato Jesús já nacachi da já xihin á:

—Ndávaha cō ndúcu ñehún tuhun nuú i. Candehé ndaja cuahá nuú cuachi já-cojo na jatun —nacachi da.

⁵ Joo ni in tuhun coo nacahan Jesús. Tá naxini Pilato ña cō ndúcu ñehe Jesús tuhun já nacatóntó da sahá ña cája.

Sácu ini na saha Jesús ndaja caja na ña ná quivi a

(Mt. 27:15-31; Lc. 23:13-25; Jn. 18:38-19:16)

⁶ Tañu mé víco pascua nasahjin costumbre Pilato ña janí da in da ndácaan vecaa. Ndá da cúni ñayivi janí da, da cán cúu da janí da. ⁷ Ta ndaja coo mé já ndácaan in da naní Barrabás vecaa xihin java ga da naxica xihin dá. Ndácaan da vecaa sahá ña nasahní da ndii tá nandivaa ñayivi. ⁸ Chí naxinu ñayivi nu Pilato já nacasáhá na cáhan na xihin dá ña ná caja da tá quiahva sá caja da. ⁹ Joo nandaca tuhún Pilato na já cáchi da já:

—Á cō cúni ndó ña ná janí i da cúu rey nuú ñayivi Israel yóho —nacachi da.

¹⁰ Nacachi Pilato ña yóho jáchi xini da ña nandiquiahva na sacuahá nuú jutú cán Jesús nu da sahá ña cáhivi ini na xihin á. ¹¹ Joo na sacuahá nuú jutú cán nacasáhá na jándinihi na ñayivi ña ná cachi na xihin Pilato ña ná janí da Barrabás. ¹² Tá nandihí já nandaca tuhún Pilato na já nacachi da já xihin ná:

—Ndía cúni ndó caja i xihin da cáchi ndó cúu rey nu ndóhó, na Israel —nacachi da.

¹³ Anda já nanducú ñehe ñayivi cán tuhun nu Pilato já cáchi na já xihin dá:

—Cata caa ndó da ndica crúxu.

¹⁴ Já nacachi Pilato já xihin ná:

—Ndá cuachi nacaja da, vaha.

Joo ví ga ví cáyuhú cóho na já cáchi na já:

—Cata caa ndó da ndica crúxu.

¹⁵ Ta sahá ña cúni Pilato candoo vaha da nuú ñayivi najaní da Barrabás. Ta tá nandihí najácaxáhan na Jesús já nandiquiahva da a ndáha na cuhun cata caa ñahá na ndica crúxu.

¹⁶ Anda já ñehe soldado Jesús cuahan na yuyéhé vechúun cán. Já najánditaca soldado cán java ga táhan da. ¹⁷ Já nacinúu na in jahmá cuahá túun jata Jesús

ta nāchinúu na in tiyivi íñu jini á. ¹⁸Tá nandihí já nacasáhá nā cáyuhú nā já cáchí nā já:

—Cáhnú nahá ná cacuu yóhó, dā cúú rey nuú nā Israel —cáchí nā sácú ndaa ñahá nā.

¹⁹Tá nandihí nacasáhá cáni na yiquí jini á xihín in ndoó ta nacasáhá nā xihnu ndaa na tójií nā nuú á já nacasáhá nā cáxítí nā nu á ña cája na tátuhun cája cáhnú na a. ²⁰Tá nandihí nasacu ndaa na a já natavá nā jáhma cuáhá túun ña nasanúu jatá. Ta najándaca ndixi na a xihín jáhma mé á já nasāñehe na a cuahan nā cata caa na a ndica crúxu.

Tá nācata caa na Jesús ndica crúxu

(Mt. 27:32-44; Lc. 23:26-43; Jn. 19:17-27)

²¹Tá ñehe na Jesús cuahan nā cata caa na a ndica crúxu já nandique táhan na xihín in da vaxi da ndihvi da ñuu Jerusalén. Mé dā cán naní dā Simón, dā ñuu Cirene, dā cúú tátá Alejandro xihín Rufo. Já nācāja ndúsa ná xihín dá ña ná ndicojo da crúxu nuú cata caa na Jesús.

²²Já nasāñehe na Jesús nasahan nā in xiquí naní Gólgota. Tuhun yóhó cúní cáchí a: nu ndúu lásá yiquí jini ndij.

²³Cán nasahan nā vino nu Jesús, dó nācava táhan xihín jusa ña naní mirra. Joo coó nāxēen toho a coho a do. ²⁴Anda já nācata caa na a ndica crúxu. Já nacasáhá soldado cán sájiquí dā saha jáhma Jesús ta nācachi xihín táhan da ña ndá dā ná quee vaha cuu quehe in in jáhma Jesús.

²⁵Ta cúú á tátuhun caa in naha tá nācata caa na Jesús ndica crúxu cán. ²⁶Ta jini ndica crúxu cán nācahyi nā ndá sahá nācata caa na a ta já cáchí a já: “Dā yóhó cúú rey nuú nā Israel.” ²⁷Ta sa mé já nācata caa na ivi ta cuíhna xihín Jesús: in da xoo cuáha ta in da xoo íti. ²⁸Ta xihín ña yóhó naxinu coo tuhun Ndióxi tá cáchí a já: “Tañu ta quini nasacu na a.”

²⁹Chí cáva jini mé ñayivi yáha cán cánahá nā xihín á já cáchí nā já:

—Candehé. Yóhó cáchún ña jánditanun veñuhu cáhnú cán ta tixi uní víxi quivi cáchún jácandichi tucún ña. ³⁰Jācācu mún. Cuáhán nuu ndica crúxu jan —nācachi na sácú ndaa ichi nā.

³¹Ta quiahva já cája na sacuahā nuú jutú cán xihín nā jánaha ley Moisés sácú ndaa ñahá nā. Ta nacasáhá cáhan xihín táhan na já cáchí nā já:

—Nacuu nācāja Jesús jácācu da java ga ñayivi joo viti a cuú jácācu da mé dá. ³²Tá ta mé a ndaa cúú dá Cristo, dā cúú rey nuú nā Israel ná nuu da ndica crúxu viti ñúhú já ná candúsa nde dā —cáchí nā.

Ta janda dā ivi táhan ndācaa ndica crúxu jini á cán cánahá dā xihín á.

Tá naxihí Jesús

(Mt. 27:45-56; Lc. 23:44-49; Jn. 19:28-30)

³³Tá naxinu coo caxivi ndaa nācanaá ní cúú ñuyivi ta janda caa uní sahini já nacasáhá nandiyēhe tucu. ³⁴Ta sa mé hora já nācayuhú cóhó Jesús já cáchí a já:

—Eloi, Eloi, lama sabactani —nācachi a.

Tuhun yóhó cúní cáchí a: Ndióxi mí i, Ndióxi mí i, ndāvaha najándacoo ndáha ndó yehe.

³⁵Ta java nā ndíta cán naxini johō na tuhun cáchí a. Já nācachi na já:

—Cuni johō ndó jáchí cána da profeta Elías —nācachi na.

³⁶Anda já xínu in da nasahan dā nachindaxi da in ticoto ini vino iyá. Já nācató dā mé ticoto cán nuú in yitó ndoó já nāchitivi da do yati yúhu Jesús ña ná coho a do. Já nācachi da já xihín java dā cán:

—Cóhō candehó á quixi Elías jánuu a dā ndica crúxu —nācachi da.

³⁷ Anda já nacayuhú cóhó Jesús já naxihí a. ³⁸ Anda já nandatá java ndaa jáhma ndeé ña sáji nuu nuú yíi ndivaha veñuhu cáhnu ñuu Jerusalén cán. Janda jini á ta janda sahá nandatá. ³⁹ Ta ndaja coo in dataa, da sáhdá chuun nuú soldado cuéntá Roma nasahijn da nu ndáca caa Jesús cán ta tá naxini da naxihí a já nacachi da já:

—Mé a ndaa táhyí cúu da yóho in tuhún jini já jahyi Ndióxi —nacachi da.

⁴⁰ Ta nasanduu java najihí ta sándehe xíca na Jesús. Tañu na yóho nasandacaan ña naní María, ña ñuu Magdala xihín María, ña cúu náná Jacobo, da loho chá nuú José xihín in ña naní Salomé. ⁴¹ Nasandico najihí yóho jata Jesús ta nachindeé ñahá na tá nasahijn a estado Galilea. Cuahá ga najihí nasanduu cán ta java na cúu ná na nasahan xihín á ñuu Jerusalén jihna tá cámaní quivi a.

Tá najánduxu na Jesús

(Mt. 27:57-61; Lc.

23:50-56; Jn. 19:38-42)

⁴² Tá nacuaá too uun quiví viernexe tá cámaní casaá quiví ndíquehe ndée na Israel já nayaha tóco ndihi ña yóho. ⁴³ Ta ndaja coo fin in da naní José, da ñuu Arimatea, da cúu táhan na cómi cuéntá sahá na Israel. Mé José yóho ndáti da casaá quiví cacomí Ndióxi cuéntá sahá ñayivi ñuyiví yóho. Ta nasahan ndeé ini da cūhun da cahan máni dá xihín Pilato sahá yiquí cuñu Jesús ña ná quiahva mé Pilato ña nu dá. ⁴⁴ Chí nacatóntó Pilato tá nacandaá ini da ña sa naxihí Jesús. Já nacana da da sáhdá chuun nuú soldado da já nandaca tuhún ñahá da á sa naxihí Jesús. ⁴⁵ Tá nacaxi tuhun da cán nu Pilato ña sa naxihí Jesús já nasahan Pilato ñamaní nuú José ña ná ndiquehe da yiquí cuñu Jesús. ⁴⁶ Anda já naxeen José in jahmá vaha ta najánuu da yiquí cuñu Jesús ndica crúxu já nachitiví da

ña xihín mé jahmá vaha cán. Tá nandihí já nachicaan da mé yiquí cuñu Jesús cán ini in yávi ndácaan ndica cáva. Tá nandihí já nachijahvi da yuhú cáva cán xihín in yuu jáhdá cáhnu. ⁴⁷ Ta ndaja coo María, ña ñuu Magdala xihín María, náná José nasandehé na nuú nasacu na yiquí cuñu Jesús ini mé cáva cán.

Tá nanditacu tucu Jesús

(Mt. 28:1-10; Lc. 24:1-12; Jn. 20:1-10)

16 Ta tá sa nayaha quiví ndíquehe ndée na já nasahan María, ña ñuu Magdala xihín María, ña cúu náná Jacobo xihín Salomé viti naquee na cuahan na cueen na java nuú ñaha támi sahan ña chindáá na yiquí cuñu Jesús. ² Ta naha chá mé quiví domingo tá naqueta candii já cuahan na nuú nachicaan na yiquí cuñu Jesús cán. ³ Ta nani xíca na cuahan na íchi cán já ndítuhún xihín táhan na ndá quiahva caja na tavá na yuu ndáji nuú ndácaan yiquí cuñu Jesús cán. Já cáchí na já:

—Yo tavá toho yuu ndáji nuu nuú quihví ini nu ndácaan yiquí cuñu Jesús —cáchí xihín táhan na cásahan na jáchi cáhnu ndivaha mé yuu cán.

⁴ Joo tá naxinu na mé cáva cán já naxini na ña coo ga yuu ndáji yuhú cáva cán. ⁵ Ta tá nandihvi na mé cáva cán já naxini na cá fin in dataa ndíxí jahmá yaa ña cáni. Fin coo da xoo cuáha ta cúu dá da yúta. Tá naxini najihí yóho da cán chí nayihví na. ⁶ Anda já nacahan da cán já cáchí da já:

—A yíhví toho ndó. Xini yehé ña ndínducú ndo Jesús ña Nazaret, ña nacata caa na ndica crúxu. Candehé ndo nuú nasacu na a. Coo ga fin viti jáchi nanditacu tucu a. ⁷ Ta viti cuahán ndo caxi tuhun ndó xihín na naxica tuun xihín á ta xihín Pedro ña cánuu mé á cuahan estado Galilea. Tá cūhun ndó cán já cuni ndó a tá quiahva nacachi mé á xihín ndo —nacachi táto Ndióxi.

⁸ Já naq̄uee n̄a cán xínu na cuah̄an n̄a jách̄i n̄ayih̄ví ndiv̄aha na and̄a quíji n̄inu na. Coó naçah̄an n̄a xih̄ín ni in n̄ayivi jách̄i n̄ayih̄ví ndiv̄aha na.

Tá n̄axini María, ñá ñuu Magdala Jesús

(Jn. 20:11-18)

⁹ Tá n̄andihi n̄anditacu tucu Jesús ta tá n̄at̄ivi mé quívi domingo já ñá n̄u cuíft̄i n̄axini Jesús nas̄acuu ñá María, ñá ñuu Magdala, mé ñá n̄atavá Jesús us̄a rí quini n̄as̄andacaan ini ñá. ¹⁰ Ta tá n̄axini ñá mé á já naq̄uee ñá cuah̄an ñá çaxi tuhun ñá nuú n̄a n̄axica tuun xih̄ín Jesús ñá tácu a. Ta ndúu cuéh̄a ini na ta s̄acu na ndúu na tá nas̄aa ñá. ¹¹ Ta naçaxi tuhun ñá n̄u ná ñá n̄anditacu tucu Jesús ta n̄axini ñá mé á joo coó n̄axeen na candúsa na ñá.

Tá n̄axini iv̄i d̄a n̄axica tuun xih̄ín Jesús mé á

(Lc. 24:13-35)

¹² Ta tá n̄andihi já n̄andijama Jesús ndá quiah̄va cáa já n̄andaca náha á nuú iv̄i táhan n̄a cuah̄an yúcu, n̄a n̄axica tuun xih̄ín á. ¹³ Joo tá n̄andicuni na mé á já naq̄uee na cuah̄an n̄a çaxi tuhun na xih̄ín n̄a java cán joo coó n̄axeen na candúsa na tuhun naçah̄an ndívi n̄a yóho xih̄ín ná.

Sáhn̄dá Jesús chuun nuú n̄a xica tuun xih̄ín á

(Mt. 28:16-20; Lc. 24:36-49; Jn. 20:19-23)

¹⁴ Tá n̄andihi cán n̄andaca náha Jesús nuú ndíhuxu in n̄a n̄axica tuun xih̄ín á

nani ndúu na xíxi na. Já naçasáh̄a jánan̄i a n̄a jách̄i n̄andaja táhyí n̄a ínima ná ta coó n̄axeen na candúsa na ñá n̄axini n̄a java cán Jesús tá n̄andihi n̄anditacu tucu a. ¹⁵ Já naçasáh̄a cách̄i Jesús já xih̄ín ná:

—Cuáhán ndo ní cúu ñuyívi yóho ta çaxi tuhun ndó xih̄ín ndihi n̄ayivi tuhun v̄aha sah̄a i. ¹⁶ Ta ndá n̄a ná candúsa yehe ta candúta ná já quéa çacu ndaa ínima ná ta a cúhun n̄a indayá. Joo n̄a coó candúsa yehe, n̄a cán cúu n̄a çuhun n̄a ndoho ini na indayá and̄a ama cáa quívi. ¹⁷ Joo n̄a cándeé ini yehe çaja na ñá xitúhún. Ta xih̄ín quívi yehe tavá n̄a ínima quini ndácaan ini n̄ayivi. Ta ndaçaah̄an n̄a tuhun saá ñá coó naçatiãhva na. ¹⁸ Ta tá ná tiin ndáha ná coo ta tá ná coho na ñá cúu cah̄ní ñahá, a cah̄ní toho a n̄a. Ta tá ná chinúu na ndáha ná jiní n̄a quíhv̄i já ndiv̄aha mé n̄a quíhv̄i cán —naçachi Jesús.

Tá n̄andaa Jesús cuah̄an indiví

(Lc. 24:50-53)

¹⁹ Tá n̄andihi naçah̄an Jesús, xitoho í tóco ndihi tuhun yóho xih̄ín ná and̄a já n̄andindita cuah̄an indiví ta nas̄aço a xoo cuáha Ndióxi, tátá yo. ²⁰ Tá n̄andihi já naq̄uee n̄a n̄axica tuun xih̄ín á cán cuah̄an n̄a çaxi tuhun na tuhun v̄aha sah̄a Jesús ndijáá ñuu. Ta já n̄achindeé Jesús, xitoho í n̄a cán ta náha ñá cúu á ñá ndaa çahan n̄a jách̄i naçaja mé á ñá cúu çaja na cuah̄a nuú ñá xitúhún. Já ná coo.

Tuhun vaha nacahyí Lucas sahá Jesucristo

Ndícani Lucas ndavaha nacahyí da tuhun yóho

1 Sa xíní vahún, Teófilo ña sa cuahá ñayivi ndúcú na cahyí na tá cáa tá ín ña nayaha tañu nde. ² Ta najánaha na nuú nde tóco ndihi ña ñaxini na janda mé saha. Mé na yóho cúú ná na ñaxica nuu nacahan na tuhun vaha saha Jesús nuú ñayivi. ³ Ta cúní ri yehe va cahyí i ña jáchi cuéé cuéé nandaca tuhún i ndaja cáa anda mé saha já ná cuu cahyí ví ndihi i ña nu mún, Teófilo, da quíhvi ndivaha ini i. ⁴ Jáchi cúní ña ná canda vaha inún ndaja cáa ña ndaa ña najánaha na nuun.

Cáxi tuhun in táto Ndióxi ña cacu Juan, da jácandúta ñayivi

⁵ Mé tiempo cán nasacuu Herodes rey nuú na Judea. Ta nasahin in da cúú jutú naní Zacarías. Ta nasacuu da cuénta in táhnda jutú naní Abías. Ta ñájíhí da naní ña Elisabet, ná naquixi chíchi Aarón, da nasacuu jutú sanahá. ⁶ Mé Zacarías yóho xihín ñájíhí da nasacuu na ñayivi ñaxica ndaa nu Ndióxi. Ta xihín ndinuhu ini na nacaja na ña sáhnda Ndióxi nuú tuhun mé á caja na. Ta ni in túhún toho ñayivi coó nacuu ñehe ín na cahan núu na saha ná. ⁷ Joo coó toho jahyi na nacacu jáchi coó nacuu canduu jahyi Elisabet cán. Ta mé tiempo já sa nacayatá ndivaha ndívi na.

⁸ Ta ndaja coo in quívi nanditahan nuú mé táhnda jutú xíca xihín Zacarías cán caja chúun na cuénta Ndióxi. ⁹ Tóco ndihi jutú cán nasajíquí na ndá da ná quee vaha ta da cán cacuu da quíhvi chiníhí ini veñuhu cáhnu ndacaan ñuu Jerusalén cán. Ta naquee vaha Zacarías. ¹⁰ Ta nani chiníhí Zacarías cán ini

veñuhu já nanditútu ñayivi ndúu na yéhe ñuhu cán ndícahán na Ndióxi. ¹¹ Ta nani chiníhí Zacarías nu ná cán ndacaan da já nacanáha in táto Ndióxi nu dá cándichi a xoo cuáha nu ná nu chiníhí da cán. ¹² Tá ñaxini Zacarías táto Ndióxi cán, ñayíhvi ndivaha da ta ni co xíní da ndíca caja da. ¹³ Joo nandicahan táto Ndióxi cán xihín dá já nacachi a já:

—A yíhvi tohún, Zacarías jáchi sa ñaxini joho Ndióxi nuú ñaxica tahvún nu á. Sahá ña cán quea caja mé á ña ná cacu in jahyi Elisabet, ñájíhún. Ta cacún quívi dá cananí da Juan. ¹⁴ A juú quíahva cavatún ta cajii inún caja ta loho jan tá ná cacu da. Ta cuahá ga java na cajii ín na caja da tá ná cacu da. ¹⁵ Jáchi da cáhnu cacuu jahyún jan nu Ndióxi. A cóho da ni in túhún toho dó xíhi ñayivi xíni na xihín. Ta cacuu da in da jándicutú ndaa Ndióxi xihín ínimá yí mé á janda tá cámaní cacu da. ¹⁶ Ta mé jahyún jan caja da ña ná ndicó coo cuahá na Israel nu Ndióxi, xitoho na. ¹⁷ Ta jihna ñúhú mé Juan cuhún da caja tiaha da ñayivi janda ná quixi mé á chindahá Ndióxi. Tá quíahva nandicutú ndaa ínimá profeta Elías xihín ínimá yí Ndióxi quíahva já ndicutú ndaa ínimá Juan xihín á já ná coo ndéé dá caja da ñaha tátuhun nacaja Elías. Ta caja mé Juan ña ná ndique táhan mání ñayivi xihín jahyi na. Ta caja da ña ná coo joho ñayivi sáá ini já ná caja na ña cúní Ndióxi. Quíahva já caja da cacu tiaha da ñayivi janda quíahva ná xinu quívi quixi da nasahan Ndióxi tuhun a chindahá a —nacachi táto Ndióxi cán xihín Zacarías.

¹⁸ Anda já nandaca tuhún Zacarías cán táto Ndióxi já nacachi da já xihín á:

—Ndaja caja i canda ini i á mé a ndaa táhyí coo tá ín cáhún coo jáchi sa nacayatá ndivaha i ta quíahva já nacayatá ri ñájíhí vi —nacachi Zacarías cán.

¹⁹ Andá já nanducú ñehe táto Ndióxi cán tũhun nu dá já cáchí a já xihín dá:

—Yehe cúu Gabriel ta chuun Ndióxi xíca nuu i cája i. Mé a cán ñachindahá yehe ña ná quixi i çaxi tũhun i ña yóho xũhun. ²⁰ Joo viti sahá ña coó ñacandúsún ña ñacachi i xũhun candoo níhun ña ná a cúu çahun jandá quiahva ná xĩnu quivi cacu jahyún. Sa vaxi quivi coo tá fin ñacachi i xũhun coo —ñacachi táto Ndióxi cán xihín dá.

²¹ Joo ndaja coo ñayivi ndíta ndáti yéhe ñũhu cán sa ñacasahá ndíhi ini na sahá ña sa ñacanahá ta coó Zacarías cán quéta jata véhe. ²² Joo tá ñaqueta Zacarías veñũhu coó ñacuu çahun da ni in túhún tũhun xihín ná. Xihín ña yóho ñacandaã ini na ña ñaxini da in ñaha ñacaja Ndióxi nu náã yii mé á cán. Jandá ndáha uun da cúu nuú ña cán jáchĩ ñacandoo níhi dá.

²³ Ta tá sa najáxinu Zacarías quivi cája chúun da veñũhu cán já ñaquee da cuanũhu dá vehe da. ²⁴ Tá sa ñayaha ña yóho já ñaquee jahyi Elisabet, ñájihĩ Zacarías cán. Ta tixi uñun yoo coó ñaquee ñá caca nuu ñá. Ta ñacahán ña: ²⁵ “Ñacaja Ndióxi ña yóho xihín i viti já ná a cándehé ndaa nahá ga ñayivi yehe”, ñacahán ña.

Cáxi tũhun táto Ndióxi xihín María ña cacu Jesús

²⁶ Tá ñaxinu iñu yoo ñũhu jahyi Elisabet cán já ñachindahá Ndióxi mé Gabriel, táto mé á in ñuu naní Nazaret ndácaan estado Galilea. ²⁷ Ñasahan táto Ndióxi yóho Nazaret ñaxito nihni a in ñá tacú naní María, ñá ñatiin tũhun in da naní José ña ná tandaha ñá xihín dá. Mé José yóho ñaquixi da chĩchi David, da ñasacomí cuéntá sahá ñayivi Israel sa-nahá. ²⁸ Ñandĩhvi táto Ndióxi cán nu fin ñá ta já ñacachi a já xihín ña:

—Cáhan Ndióxi yehe xũhun, María jáchĩ cúun in ña ñahehe táhvi nu Ndióxi.

Íin Ndióxi xũhun ta ñacaja cuaha chága ñamanĩ xũhun a juú ga xihín java ga najihĩ —ñacachi táto Ndióxi cán xihín ña.

²⁹ Joo tá ñaxini María táto Ndióxi cán já ñacatóntó ña táa joho ñá ña cáhan mé a cán xihín ña. “Ta ndá cuéntá quéa cáhan táto Ndióxi yóho já xihín yo”, ñacahán ña. ³⁰ Andá já ñacachi táto Ndióxi cán já xihín ña:

—A yĩhvi tohũn, María jáchĩ cúun in ña ñahehe táhvi nu Ndióxi. ³¹ Ta viti quee jahyún ta tá sa ñacacu a já cacún quivi á ná cananí a Jesús. ³² Mé jahyún jan cacuu a ña cáhnu. Ta cachi ñayivi saha dá ña cacuu da in túhún jini já jahyi Ndióxi, mé á cáhnu nu ndíhi a. Ta mé Ndióxi, xitoho í caja ña ná cacomí jahyún cuéntá sahá ñayivi tá quiahva ñasacomí David, da cúu tásahnu jicó da cuéntá sahá ñayivi. ³³ Quixi da cacomí da cuéntá sahá ñayivi Israel ta anda ama cáa quivi cacomí da cuéntá saha ná —ñacachi táto Ndióxi cán xihín María.

³⁴ Andá já ñandaca tũhún María táto Ndióxi cán já cáchĩ ña já xihín á:

—Ndaja coo cacu jahyi i ta ni in túhún toho ña co fin xihín i —ñacachi ná xihín á.

³⁵ Andá já nanducú ñehe táto Ndióxi cán tũhun nu ñá já cáchĩ a já:

—Ínima yii Ndióxi quéa quixi jándicutú yohó. Ta ndée Ndióxi, mé á cáhnu nu ndíhi a cán çava nuu a yohó tátũhun caja in viço. Sahá ña cán quéa tá ná cacu jahyún jan cacuu da in da yii ñacaxi Ndióxi caja chúun nu mé á. Ta cachi ñayivi saha dá ña cúu dá in túhún jini já jahyi Ndióxi. ³⁶ Ta cáxi tũhun i xũhun ña cacu jahyi Elisabet, ñá cúu táhún cán vatĩ sa ñacayatá ña. Ta viti sa ñaxinu iñu yoo ñũhu jahyi ñá, mé ñá ñacachi ñayivi saha ña a cúu coo jahyi ñá. ³⁷ Jáchĩ Ndióxi cuu caja tóco ndihi ñaha —ñacachi táto Ndióxi cán xihín María.

³⁸ Andá já ñacachi María já:

—Ndióxi cúu xitoho i ta ná caja mé á tá quiahva cúnĭ a xihín ĭ. Ná coo tá ĩn cáchĭ ndó coo.

Tá nandĭhi naçachi María cán ña yóho já naquee táto Ndióxi cán cuahañ.

Xíto nihni María Elisabet, ñá cúu táhan ñá

³⁹ Ta mé tañu quivĭ já já xínu María naçahan ñá in ñuu ndáçaan chí yúcu cuéntá Judea cán. ⁴⁰ Ta tá naquihvi ñá vehe Zacarías, yĭ Elisabet cán já naçahan Ndióxi ñá xihín Elisabet. ⁴¹ Ta tá naçini joho Elisabet naçahan Ndióxi María xihín ñá chí naçandita ña loho ndáçaan tixi Elisabet cán chí ĩvi laá nandicutú ndaa ñá xihín ínima yĭ Ndióxi. ⁴² Anda já naçayuhú cóhó Elisabet já naçachi ñá já xihín María:

—Ni in túhún toho najihí coó naçaja manĭ Ndióxi xihín tá quiahva naçaja manĭ á yohó. Ta naçaja yĭ mé á jahyún. ⁴³ Ta coó saha toho yehe ná quisún yóho, ñá cúu náná xitoho ĭ coto nihnún yehe. ⁴⁴ Jáçhi tá naçini joho uun ĭ ña naçahan Ndiósun xihín ĭ ĩvi laá naçanda jahyi ĭ ini tixi ĭ jáçhi naçajĭ ínĭ a. ⁴⁵ Tahvi naçuún jáçhi naçandúsún ña naçachi Ndióxi, xitoho í xuhun. Jáçhi caja tá caja mé á ña naçachi a caja —naçachi Elisabet cán xihín María.

⁴⁶ Anda já naçachi María já: Caja cáhnu ĭ Ndióxi, xitoho í xihín ínima ĭ.

⁴⁷ Ta cájĭ ndivaha ini ĭ xihín ña caja Ndióxi, mé a jáçacu yehe.

⁴⁸ Jáçhi nandicuhun ini a sahá yehe, ñá ndáhvĭ, ñá cúu in mozo mé á.

Ta cachi ñayivi ndúu viti xihín na vaxi quivĭ canduu ñuyívĭ yóho ña naçaja cuaha Ndióxi ñamanĭ xihín ĭ.

⁴⁹ Jáçhi mé Ndióxi, mé a cuu caja tóco ndihi ñaha naçaja cuahá ña náhnu xihín ĭ.

Ta yĭ ndivaha quivĭ mé á.

⁵⁰ Ta níi tiempo táhvi ini mé á saha tóco ndihi ñayivi, na caja cáhnu mé á.

⁵¹ A juu quiahva náhnu ñaha naçaja mé á.

Nasahnu a nuu na ndínehe jícó mé.

⁵² Ta naçandaa mé á chuun ndahá da náhnu ta najánuu ndáha mé á da.

Ta nandínehe jícó mé á na najánuu ndáha mé ñuyívĭ yóho.

⁵³ Ta najándicutú ndaa mé á ñaha nuu na nandimanĭ ñaha cuxu.

Ta naçandaa mé á ña naçacomĭ na cuicá já naçaxĭ a na cán ná quee na cuhun na.

⁵⁴ Naçindeé a na Israel, na caja chúun cuéntá mé á.

Ta coó nandindójó a tahvi ini a saha ná.

⁵⁵ Jáçhi quiahva já naçahan mé á tuhun a caja anda ama cáa quivĭ xihín Abraham ta xihín tásáhnu jícó yo, na naquixi chĭchi mé dá, já naçachi María caja cáhnu ñá Ndióxi.

⁵⁶ Ta naçandoo María naçahiin ñá vehe Elisabet tixi unĭ yoo. Anda já naquee ñá cuanúhu ñá vehe ñá.

Tá naçacu Juan, da jáçandúta ñayivi

⁵⁷ Tá nandindaa quivĭ cacu jahyi Elisabet já naçacu in ta loho. ⁵⁸ Ta tóco ndihi ñayivi ndúu yati xihín ñá xihín na cúu táhan ñá naçahan na xíto nihni na ña. Ta cájĭ ínĭ na jáçhi naçandaa ini na ña naçaja Ndióxi cuahá ñamanĭ xihín ña.

⁵⁹ Ta tá naçinu ña loho cán una quivĭ já naçahan na naçicañ na marca yiquí cuñu a tátuhun ĩn costumbre na. Ta naçahan na cananĭ a Zacarías tá quiahva nanĭ tátá a. ⁶⁰ Joo já naçachi Elisabet já:

—A cananĭ toho da já. Juan va cananĭ da —naçachi ñá xihín na cán.

⁶¹ Anda já naçachi na cán já xihín ña: —Ndá cuéntá quea cananĭ jahyún já ta ni in túhún toho na vehún coó nanĭ já.

⁶² Anda já naçuu ndáha ná nu Zacarías cán ña ndáca tuhún na da ndaja coo cananĭ ña loho cán. ⁶³ Anda já naçaxĭ-

cã Zacarías cãn in tutu nu ná ta já nacahyí da já: “Juan cananí da.” Tá nacahvi na cãn ña yóho já nacatóntó ndihi na. ⁶⁴Ta chí sa mé hora já nandicahan tucu Zacarías. Já nacasáhá da cãja cáhnu da Ndióxi. ⁶⁵Xihín tóco ndihi ña nayaha yóho nacatóntó ndihi na nasandu yati xihín Zacarías cãn. Ta ní cúu ñuu válí ñúhu chí yúcu cuéntá Judea cãn nandicutá nuu tũhun saha tóco ndihi ña nayaha yóho. ⁶⁶Ta tóco ndihi na naxini joho ña yóho nacasáhá ndicani ini na sahá. Já nacasáhá ndaca tũhún táhan na já cáchí xihín táhan na já:

—Ndá tã cacuu tã loho yóho tá ná cuahnu da.

Nacachi na ña yóho jáchí naxini táhyí na ñamaní náhnu cãja Ndióxi xihín tã loho cãn.

Cãja cáhnu Zacarías Ndióxi

⁶⁷Anda já nandicutú ínima Zacarías, tátá Juan cãn xihín ínima yíi Ndióxi. Já nacasáhá da cãhan da tũhun sahan Ndióxi nu dá cãhan da. Já nacachi da já: ⁶⁸Cãhnu ná cacuu Ndióxi, mé a cúu xi-toho ñayivi naquixi chichi Israel.

Jáchí naquixi a jácãcu a mí, na cúu cuéntá mé á.

⁶⁹Nachindahá Ndióxi mé a jácãcu mí ná a cũhun yó indayá.

Ta ín ndéé á cãja tóco ndihi ña náhnu. Ta naquixi a chichi David, da nacaja chúun cuéntá Ndióxi sanahá.

⁷⁰Ta jãnda sanahá ndivaha nasahan Ndióxi tũhun a ña cãja mé á ña yóho.

Ta já najáyaha na profeta cãn tũhun nacãhan Ndióxi nuú ñayivi.

⁷¹Ña nacachi mé á quéã jácãcu a mí ndahá na ihvi yo xihín ndáha na co cúní mí.

⁷²Ta nacachi a tãhvi ini a saha tásãhnu jícó yo, na nasandu sanahá cãn.

Ta a ndíndójó toho mé á sahá tũhun yíi nasahan nu ná jáchí ña yíi cúu tóco ndihi tũhun sahan Ndióxi nuú ñayivi.

⁷³Ña yóho cúu tũhun nacachi Ndióxi jáxinu coo a nuu tá nasahan mé á tũhun a nu Abraham, da nasacuu tásãhnu jícó yo cãn.

⁷⁴Ta nacachi mé á xihín dá ña jácãcu a mí ndahá na co cúní mí já ná a cáy-ihví yo cãja chúun í cuéntá mé á.

⁷⁵Ta já ná cacuu ñayivi ndaa, na nandiquiahva mé cãja ña cúní mé á tóco ndihi quívi ndúu ñuyiví yóho, nacachi Zacarías nu ndíhi ñayivi cãn.

⁷⁶Anda já nacasáhá da cãhan da xihín ña loho jahyi da já cáchí da já xihín á: Ta yóhó, jahyi a, cachi ñayivi sahan ña cúun in profeta Ndióxi, mé a cúu cáhnu nu ndíhi a.

Ta jihna ñúhú cũhún jácãhún ñayivi ña ná cacu tãhva na ínima ná ndiquehe na mé a chindahá Ndióxi vaxi.

⁷⁷Ta xihín ña yóho cuu cãxi tũhún xihín ñayivi ña cãja cáhnu ini Ndióxi sahá cuachi na.

Já ná cuu cãcu ndaa ínima ná ná a cũhun na indayá.

⁷⁸Sahá ña quíhvi ini Ndióxi mí ta sahá ña táhvi ini mé á saha yo sahá ña cãn quéã jãnda indiví nu ín mé á nachindahá a in a cuu chindeé a mí ná ndíhvi íchí saá cuéntá mé á.

⁷⁹Jáchí vaxi a jándiyehé a nuú ñayivi ndúu nuú naá ña ná caca na íchí nuú cuu coo vaha ini na xihín Ndióxi, nacachi Zacarías xihín jahyi loho da.

⁸⁰Já nacasáhá sãhnu tã loho cãn cuahan da. Ta ndíndacú da xihín ñaha Ndióxi viti. Ta nasahin da yucú íchí nuú co ndúu cuahá ñayivi jãnda quiahva naxinu quívi nacasáhá jãnahã da nuú na Israel.

Tá ñacacu Jesús ñuu Belén

(Mt. 1:18-25)

2 Ta mé tiempo cán tá ñasacomí Augusto cuéntá sahá ñayivi ndúu ñuyiví já ñasahnda da chuun ña ná nditaca quiví ndaja táhan ñayivi cómí da cuéntá saha. ² Ta mé tañu nu cuítí tá ñanditaca quiví ná já ñasacuu Cireneo gobernador estado Siria. ³ Ta tóco ndihi ñayivi ñanditahan nu ná cuhun na tá ñuu tá ñuu nuú ñacacu tásáhnú jíco na ná quee quiví ná. ⁴ Sahá ña cán quea ñaquee José ñuu Nazaret cuéntá Galilea cán já ñasahan da ñuu Belén ña ndácaan estado Judea nuú ñacacu David jáchi ñaquixi da chíchi David. ⁵ Ñasahan María xihín José ñuu Belén quee quiví ná. Mé María yóho cúú ña ñaxica da cacuu ñájihí da. Ta sa já ñúhu jahyi ña cuahan ña ñuu Belén. ⁶ Ta nani ñasanduu na ñuu Belén cán ñaxinu quiví cacu jahyi María. ⁷ Ta ñacacu jahyi nuú ña. Ta ñachitíví ña a ticoto já ñachindúhu ña a nu xixáhan quítí cán. Mé nu sánduu quítí cán ñacacu jahyi María jáchi coo ñañehe ná vehe canduu na jáchi sa ñacatáñu va vehe nuú canduu ñayivi xínu coo ñuu Belén cán.

Cáxi tuhun táto Ndióxi xihín na ndáá ndicachi ña ñacacu Jesús

⁸ Ñasanduu java na ndáá ndicachi jana ná ñuu yati ñuu Belén cán. ⁹ Ta in náá cuítí ñanaha táto Ndióxi mé á nu ná. Ta chí ñandiyihví ndaa nu ndúu na cán ñacaja Ndióxi ta ñayihví ndivaha na. ¹⁰ Joo ñandicahan táto Ndióxi cán xihín ná já ñacachi a já:

—A yíhví toho ndó jáchi tuhun vaha quea ñehe e vaxi i cahan i xihín ndo. Ta xihín ña yóho cajii ndivaha ini tóco ndihi ñayivi. ¹¹ Jáchi mé quiví víti ñacacu in a jácacu a ndohó nuú cuachi ndó ta mé á cán cúú Cristo, xitoho ndó, ña ñachindahá Ndióxi cacomí a cuéntá saha ndo. Ta ñacacu a ñuu Belén nuú ñacacu

David sañahá. ¹² Tá ná cuhun ndo cán já cuni ndó ña loho cán cáttíví a ticoto cándúhu á nu xixáhan quítí. Tá ná cuni ndó ña yóho já candaa ini ndó ña cáhan i ña ndaa xihín ndo —ñacachi táto Ndióxi xihín na ndáá ndicachi cán.

¹³ Ta nani cáhan táto Ndióxi cán ñaxinu coo cuaha chága táto Ndióxi nu fin a cán. Mé táto Ndióxi yóho ñaquixi na indiví ta cája cáhnú na Ndióxi já cáhí na já:

¹⁴ Cáhnú ná cacuu Ndióxi fin indiví.

Ta ná coo vaha ini tóco ndihi ñayivi ndúu ñuyiví, mé na cájii ini xihín ñamaní cája Ndióxi xihín ná, ñacachi táto Ndióxi cán.

¹⁵ Ta tá sa ñandicó coo táto Ndióxi cán cuahan chí indiví já ñacasáhá cáhí xihín táhan na ndáá ndicachi cán já:

—Cóho quí yó ñuu Belén candehé yó ña ñacachi Ndióxi, xitoho í xoho ña ñacuu ñuu Belén cán.

¹⁶ Já xínu na ñasahan na ta tá ñaxinu coo na cán já ñandinehe ná María xihín José xihín mé ña loho cándúhu nu xixáhan quítí cán. ¹⁷ Anda já ñacasáhá ñandicani na ndáá ndicachi cán nu ná ña ñacachi táto Ndióxi xihín ná sahá ña loho cán. ¹⁸ Ta chí cáttóntó tóco ndihi ñayivi tá ximí johó na ña ndícani na ndáá ndicachi cán nu ná. ¹⁹ Joo ñandicuhun ini María tóco ndihi ña ñayaha ta ndícani ini ña sahá. ²⁰ Tá ñandihí já ñaquee na ndáá ndicachi cán cuahan na. Ta a juú quiahva cája cáhnú na Ndióxi cuahan na saha tóco ndihi ña ñaxini johó na xihín saha tóco ndihi ña ñaxini na jáchi nasahiin tá fin ñacachi táto Ndióxi cán xihín ná.

Tá ñehe na léé loho Jesús cuahan na ndiquiahva na cuéntá saha mé á veñuhu cáhnú ñuu Jerusalén

²¹ Tá ñayaha una quiví ñacacu léé jahyi María cán já ñachicaan na marca yiquí cuñu a tá quiahva fin costumbre

na. Ta nasacu na quivi á cananí a Jesús jáchi quiahva já nacachi táto Ndióxi cán xihin María ña ndítahan cananí a janda tá camaní cañuhu jahyi ná.

²² Ta nu ley Moisés, ña nacahyí da sa-nahá cáchí a ña tá ná ndihi nacacu jahyi in ñañáha, a cúu quihvi ña veñuhu anda ná yaha sáhdá ley quivi. Ta tá sa nayaha quivi cán já naquehe María xihin José mé lee loho Jesús cán. Já ñehe na ña cuahan na ndiquiahva na cuéntá sahá nu Ndióxi veñuhu cáhnu ñuu Jerusalén cán. ²³ Nacaja na ña yóho jáchi já cáchí ley nasahnda Ndióxi sanahá: “Tóco ndihi taa valí, na cúu jahyi nuú najihí, ndítahan ndiquiahva na ña nu Ndióxi.” ²⁴ Ta jári najoco na ña sáhdá ley Moisés coo tá nandihí nacacu jahyi na. Ta ña yóho cúu ivi ndiyuu á ivi ndijata.

²⁵ Ta ndaja coo mé tiempo cán nasahjin in dataa naní Simeón ñuu Jerusalén cán. Ta nasacuu da in taa vaha ndivaha, da cája cáhnu Ndióxi. Ta ndáti da xinu coo quivi chindahá Ndióxi in da chindeé na Israel já ná a ndóho ga ini na. Ta nandicutú ndaa ínimá dá xihin ínimá yíi Ndióxi. ²⁶ Ta mé a cán quea nacachi xihin dá ña a quiví toho da janda quiahva ná cuni táhyí da Cristo, mé a nasahan Ndióxi tuhun a chindahá a. ²⁷ Ta mé ínimá yíi Ndióxi ndáca Simeón cuahan da veñuhu mé quivi naxinu María xihin José cán caja na xihin Jesús tá quiahva sáhdá ley Moisés caja na. ²⁸ Tá nandique táhan da xihin ná já ñatiin da Jesús já nasañehe ndaa da a. Já nacasáhá da cája cáhnu da Ndióxi já cáchí da já:

²⁹ Tátá Ndióxi, sa cuu quiahva ndó ña-maní quivi yaa i viti,

jáchi sa najaxinu coo ndó nuú tuhun ndó, ña nasahan ndó nuú yehe, da cúu mozo ndo.

³⁰ Jáchi naxini i xihín nuú i mé a naxinchahá ndó jácacu ndehe.

³¹ Nasacu ndó a ña ná jácacu a ndaja táhan ñayivi.

³² Mé a yóho jándiyehé a nuú na coo naquixi chichi Israel.

Ta saha mé a yóho cuahan vaha ñayivi sahá na Israel, na cúu cuéntá mé ndo, nacachi Simeón.

³³ Chí nacatontó José xihin María táa johu na ña cuahan Simeón saha Jesús.

³⁴ Tá nandihí naxiča táhvi Simeón nu Ndióxi saha ná anda já nacasáhá cáchí da já xihin María, náná Jesús:

—Nacaxi Ndióxi taa loho yóho ña ná caja da ná cuhun cuahá na Israel ndoho ini na ta caja da ña ná cacu ínimá cuahá na cán. Naquixi da nu Ndióxi joo candají cuaha ná da ³⁵ já náha táhyí ña cáhvi ini in in na cán. Ta yóhó, María táhvi ndivaha inún sahá ña yóho ta cacuu a tá-tuhun tuxu na machiti ínimun —nacachi Simeón xihin María.

³⁶ Ta mé cán nasahjin ri in ná naní Ana, ná jáyaha tuhun cuahan Ndióxi nuú ñayivi. Ta nasacuu ná jahyi da naní Fanuel, da naquixi chichi Aser. Mé Ana yóho nacayatá ña. Tá yúta ná ñatandaha ña joo usa laá cuia nasahjin ná xihin yíi ña já naxihí da. ³⁷ Ta viti sa naxinu comi jícó comi cuia íin cuahan ña. Nuú ta ndiví íin tuun ná veñuhu cája cáhnu ná Ndióxi. Xíjuhun ná ta xíca táhvi ña nu mé á. ³⁸ Mé hora íin Simeón ndítuhún da xihin María já naxinu coo Ana cán. Ta tá nandihí nandiquiahva ná ndixahvi nu Ndióxi já nacasáhá cuahan ná sahá ña loho Jesús cán nuú ñayivi, na ndáti quixi quiví chindahá Ndióxi da chindeé na ñuu Jerusalén. Ta cáchí ña ña jivi mé Jesús cán quea ndáti na quixi.

Tá nandicó coo na ñuu Nazaret

³⁹ Tá nandihí nacaja José xihin María ña sáhdá ley Moisés cája na cán já cuanúhu na ñuu Nazaret, ña ndácaan estado Galilea cán. ⁴⁰ Ta mé taa loho Jesús sáhnu da ta ndíndacu da. Ta johu

ndíndichí ga ví jini dá cuahan da. Ta cuahá ndivaha namani cája Ndióxi xihin dá.

Ndácaan Jesús veñuhu cáhnu ñuu Jerusalén

⁴¹ Tá nu cuía sahan náná tátá Jesús ví-co pascua ñuu Jerusalén. ⁴² Ta tá naxinu Jesús uxu ivi cuía já ndáca táhan mé á xihin ná tá cuahan na víco ñuu Jerusalén cán jáchi já nasahiin costum-bre ñayivi cája na tañu víco cán. ⁴³ Ta tá sa nayaha víco cán já nandico coo José xihin María cuahan na. Joo coo naxini na ña nacandoo Jesús ñuu Jerusalén cán. ⁴⁴ Tañu ñayivi cuaha cán catáhan da vaxi da, nacahan na. Ta tá sa naxinu ní in quivi xica na cuahan na já nacasáhá ndínducú na da tañu ñayivi cúu táhan na xihin tañu na xini táhan xihin ná. ⁴⁵ Joo coo nandinehe ná da. Anda já nandico coo tucu na ñuu Jerusalén ndínducú na da.

⁴⁶ Janda quivi uni ví já nandinehe ná Jesús ini veñuhu cáhnu cán. Caa íin coo da tañu na jánahá ley Moisés cán. Taa johó da nu cáhan na ta ndáca tuhún da na sahá java ga ñaha. ⁴⁷ Ta chí catóntó tóco ndihi ñayivi tá xini johó na tuhun ndúcú ñehe da nuú na jánahá ley Moisés cán jáchi náha ña ndíchí jini dá. ⁴⁸ Tá naxini María xihin José ña ndácaan Jesús tañu na jánahá ley Moisés cán já nacatóntó na. Anda já nacachi María já xihin Jesús:

—Jahyi maní i. Ndá cuéntá quea nacajún ña yóho xihin nde. Yehe xihin tátún a juú quiahva ndícani ini nde xica nuu nde ndínducú nde yohó —nacachi María xihin Jesús.

⁴⁹ Anda já nacachi Jesús já:

—Ndá cuéntá quea ndínducú ndó yehe. Á co xini toho ndó ña ndítahan ndihi ini i cája i chuun nasahnda tátá i, mé á íin indivi nuú i cája i, vaha —nacachi Jesús xihin ná.

⁵⁰ Joo ni María ni José coo nacandaa ini na ña nacachi Jesús cán xihin ná.

⁵¹ Anda já nandico coo Jesús cuahan xihin ná ñuu Nazaret. Ta nacaja da tóco ndihi ña cúni na. Ta nandicuhun ini María ña nacaja Jesús ini veñuhu cáhnu cán. ⁵² Ta sáhnu Jesús ta catacu ini da cuahan. Ta cájii ini Ndióxi xihin ña cája Jesús. Ta quiahva já cájii ri ini ñayivi va xihin ña cája da.

Cásahá Juan cáhan da tuhun Ndióxi xihin ñayivi yucú íchí cán

(Mt. 3:1-12; Mr. 1:1-8; Jn. 1:19-28)

3 Tá naxinu sahun cuía cómi Tiberio cuéntá sahá ñayivi ñuyivi já nasacuu Poncio Pilato gobernador nuú na ndúu estado Judea. Ta da naní Herodes nasacuu gobernador nuú na ndúu estado Galilea. Ta ñani Herodes, da naní Felipe cán nasacuu gobernador nuú na ndúu Iturea xihin nuú na ndúu Traconite. Ta da naní Lisaniás nasacuu gobernador nuú na ndúu Abilinia. ² Ta Anás xihin Caifás nasacuu da sacuha nu ndíhi jutú. Mé tiempo cán nacahan Ndióxi xihin Juan, da cúu jahyi Zacarías, mé nu íin da yucú íchí cán. ³ Anda já nayaha Juan ndíjái ñuu válí ñuhu yuhú yuta Jordán cán. Ta cáxi tuhun da nuú ñayivi ña ndítahan nu ná jándacoo na ña núu cája na já ná cája cáhnu ini Ndióxi sahá cuachi na ta já ná candúta ná. ⁴ Tóco ndihi ña yóho nayaha tá íin nacachi Isaiás tá nacahyí da sanahá:

Vaxi quivi tá cahan cóhó in da tañu yucu íchí ta cachi da já:

“Caja tiahva ndó íchí nuú quixi xitoho í, ta cuná ndó in ichí ndacú nu mé á ña ná ndihvi a ínimá ndo.

⁵ Tóco ndihi ña cúu táhvi ná ndicutú ndihi a.

Tóco ndihi yucu xihin xiqui ná ndicava ndaa ndihi a.

Tóco ndihi ichí ndicava ná ndindacú ndihi a.

Ta íchi ña co fin ndaa nuu ndindaa ndihi nu á.

⁶Ta tóco ndihi ñayivi ndúu ñuyívi cuni na ndá quiahva jácacu Ndióxi ñayivi”, já cáchi tutu ñacahyí Isaías sanahá ndivaha.

⁷Ta ñacasáhá ñayivi ndái cuu na nu fin Juan ña ná jácandúta da na joo ñacasáhá xójo ndivaha ini da xihin ná já cáchi da já:

—Mé ndó cúú ndó tátuhun coo jáchi cúú ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi. ⁸Xíní ñúhú caja ndó ña vaha já ná cuni ñayivi ña mé a ndaa táhyí najándicoo ndó ña núu ñasacaja ndó jihna. Ta a cáhán ndo ña jácacu Ndióxi ndohó sahá ña cúú ndó na ñaquixi chichi Abraham. Jáchi coo saha toho ña jan nu Ndióxi tá co jándacoo ndó cuachi ndó. Jáchi mé a ndaa ná cahan i xihin ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. ⁹Mé ndó cúú ndó tátuhun in yíto, dó sa ñatiin na hacha cuahan na cahnda na. Ta tóco ndihi yíto, dó co sahan cuhi vaha nuu, tahnda do ta quee dó nu ñúhu cayi do. Quiahva já caja rí Ndióxi xihin ndóhó tá co cúni ndó ndicó coo ini ndó nu mé á —ñacachi Juan xihin ñayivi cán.

¹⁰Anda já ñacasáhá ñayivi cán ndáca tuhún na da já cáchi na já xihin dá:

—Ndía ndítahan nuú nde caja nde.

¹¹Já cáchi Juan já xihin ná:

—Ndá na ndúu ivi cotó ná quiahva na in a nuú na coo ñaha nuu. Ta ndá na fin ña cuxu ná cahnda java táhan na ña xihin na coo a nuu —cáchi Juan xihin na cán.

¹²Tañu na ñandai cuu cán ñaxinu ri java da játaca jiuhún cuéntá impuesto ña candúta dá. Ta ñandaca tuhún da Juan já ñacachi da já:

—Maestro, ndía ndítahan nuú nde caja nde.

¹³Anda já ñacachi Juan já xihin dá:

—Quehe ndó jiuhún nuú ñayivi tá quiahva sahdá ley cuití va quehe ndó —ñacachi Juan xihin da cán.

¹⁴Ta jári java da cúú soldado ñandaca tuhún da Juan já ñacachi da já:

—Ta ndehe ri ndía ndítahan caja nde. Já ñacachi Juan já xihin dá:

—A cándaa ndó ña cómi ñayivi. A jáy-ihví ndó na sahá ña ná quiahva na ñaha nu ndo. Ta ni a jácojo ndó cuachi jata ná tá coo ñacaja na ña. Ta xíní ñúhú coo vaha ini ndó xihin yahvi quehe ndó sahá chuun cája ndó —ñacachi Juan xihin da cán.

¹⁵Tóco ndihi ñayivi ndíhi ini na jáchi cúni na candaa ini na ña á mé Juan cúú Cristo, da ñachindahá Ndióxi cacomí cuéntá sahá ñayivi. ¹⁶Joo ñandicahan Juan xihin tóco ndihi ñayivi já ñacachi da já xihin ná:

—Mé a ndaa cája ndúta i ndohó xihin ticuú. Joo vaxi inga da ta da cán cúú da jándicutú ínima ndo xihin ínima yí Ndióxi ta ña cán cacuu a tátuhun ñúhu cáyi. Ta da cán fin cuaha chaga ndee dá a juú ga yehe. Ta chí coo sahá i ndica xítí i nu dá ña ndaxí i correa ndusa dá.

¹⁷Mé da vaxi cán caxi da ñayivi vaha tañu ñayivi quini. Cúú á tátuhun in da-ta tá jáxixi da trigo xihin pala já ná quee xehe á já cacu vaha da ña. Ta xehe nacana cán cuhun a cayi a xihin ñúhu ita ña a ndáhva toho —ñacachi Juan.

¹⁸Quiahva johu ñacahan Juan nuú ñayivi tá ñacaxi tuhun da tuhun vaha nu ná. Ta cuahá java ga ñaha cahan da xihin ná caja na. ¹⁹Inga ñaha ñacaja da quea najánani da Herodes, da cúú gobernador jáchi ñasahin Herodes xihin Herodías, ña cúú ñájilí ñani da, Felipe. Ta najánani Juan da sahá java ga ña núu ñacaja da. ²⁰Joo ñacaja jóhó Herodes mé dá ta coo ñaxeen da coo johu da nu cahan

Juan xih̄in dá. Ña ñacaja da quéa ñacaja chága da ña núu tá ñachicaan da Juan vecaa.

Tá ñacandúta Jesús

(Mt. 3:13-17; Mr. 1:9-11)

²¹ Tá cámaní ndácaan Juan vecaa, cája ndúta dá ñayivi ta já najácandúta ri da Jesús. Ta nani xíca ñhví Jesús nu Ndióxi já ñanuna indiví. ²² Ta ñanuu ínimá yii Ndióxi jata Jesús. Ta ñasacaa ínimá yii Ndióxi yóho tá quiahva cáa in ndijata. Tá ñandihí já ñaxini johó na ña cáhan in a indiví já ñacachi a já:

—Yóhó cúun jahyi maní i ta cájii ndi-
vaha ini i xuhun —ñacachi a.

Ña yóho cúu quiví na ñasacuu tásáhnú jícó Jesús

(Mt. 1:1-17)

²³ Ñasandacaan Jesús tátuhun oco uxu cuiá tá ñacasáhá jánahá tuhun Ndióxi nuú ñayivi. Ta ñacahán ñayivi ña ñasacuu a jahyi José. Ta José cán ñasacuu da jahyi Elí, ²⁴ ta tátá Elí ñasananí Matat. Ta tátá Matat ñasananí Leví. Ta tátá Leví ñasananí Melqui. Ta tátá Melqui ñasananí Jana. Ta tátá Jana ñasananí José. ²⁵ Ta tátá José ñasananí Matatías. Ta tátá Matatías ñasananí Amós. Ta tátá Amós ñasananí Nahum. Ta tátá Nahum ñasananí Esli. Ta tátá Esli ñasananí Nagai. ²⁶ Ta tátá Nagai ñasananí Maat. Ta tátá Maat ñasananí Matatías. Ta tátá Matatías ñasananí Semei. Ta tátá Semei ñasananí José. Ta tátá José ñasananí Judá. ²⁷ Ta tátá Judá ñasananí Joana. Ta tátá Joana ñasananí Resa. Ta tátá Resa ñasananí Zorababel. Ta tátá Zorababel ñasananí Salatiel. Ta tátá Salatiel ñasananí Neri. ²⁸ Ta tátá Neri ñasananí Melqui. Ta tátá Melqui ñasananí Adi. Ta tátá Adi ñasananí Cosam. Ta tátá Cosam ñasananí Elmodam. Ta tátá Elmodam ñasananí Er. ²⁹ Ta tátá Er ñasananí Jo-

sué. Ta tátá Josué ñasananí Eliezer. Ta tátá Eliezer ñasananí Jorim. Ta tátá Jorim ñasananí Matat. ³⁰ Ta tátá Matat ñasananí Leví. Ta tátá Leví ñasananí Simeón. Ta tátá Simeón ñasananí Judá. Ta tátá Judá ñasananí José. Ta tátá José ñasananí Jonán. Ta tátá Jonán ñasananí Eliaquim. ³¹ Ta tátá Eliaquim ñasananí Melea. Ta tátá Melea ñasananí Mainán. Ta tátá Mainán ñasananí Matata. Ta tátá Matata ñasananí Natán. ³² Ta tátá Natán ñasananí David. Ta tátá David ñasananí Isaí. Ta tátá Isaí ñasananí Obed. Ta tátá Obed ñasananí Booz. Ta tátá Booz ñasananí Salmón. Ta tátá Salmón ñasananí Naasón. ³³ Ta tátá Naasón ñasananí Aminadab. Ta tátá Aminadab ñasananí Aram. Ta tátá Aram ñasananí Esrom. Ta tátá Esrom ñasananí Fares. Ta tátá Fares ñasananí Judá. ³⁴ Ta tátá Judá ñasananí Jacob. Ta tátá Jacob ñasananí Isaac. Ta tátá Isaac ñasananí Abraham. Ta tátá Abraham ñasananí Taré. Ta tátá Taré ñasananí Nacor. ³⁵ Ta tátá Nacor ñasananí Serug. Ta tátá Serug ñasananí Ragau. Ta tátá Ragau ñasananí Peleg. Ta tátá Peleg ñasananí Heber. Ta tátá Heber ñasananí Sala. ³⁶ Ta tátá Sala ñasananí Cainán. Ta tátá Cainán ñasananí Arfaxad. Ta tátá Arfaxad ñasananí Sem. Ta tátá Sem ñasananí Noé. Ta tátá Noé ñasananí Lamec. ³⁷ Ta tátá Lamec ñasananí Matusalén. Ta tátá Matusalén ñasananí Enoc. Ta tátá Enoc ñasananí Jared. Ta tátá Jared ñasananí Mahalaleel. Ta tátá Mahalaleel ñasananí Cainán. ³⁸ Ta tátá Cainán ñasananí Enós. Ta tátá Enós ñasananí Set. Ta tátá Set ñasananí Adán. Ta Ndióxi ñacavaha Adán.

Xíto ndojó tiñhá sácuahá Jesús

(Mt. 4:1-11; Mr. 1:12-13)

4 Tá ñandihí cán ñaquee Jesús yuta Jordán. Ta ñandicutú ndaa ínimá mé á xih̄in ínimá yii Ndióxi ta mé á

cán nasandaca Jesús nasahan yucú íchí nuú co ndúu ñayivi. ²Ta cán nasahjin Jesús tixi ivi jico quivi ta naxito ndojó tiñáhá sacuahá mé á. Ta tóco ndihi quivi cán coo naxixi a ta tá nandihí já nacasáhá cuíco a. ³Anda já nacachi tiñáhá sacuahá cán já xihín á:

—Tá tã jivi ndusa jahyi Ndióxi cúun, cahnda chuun ña ná nduu yuu yóho pan.

⁴Anda já nanducú ñehe Jesús tũhun nu rí já cáchí a já:

—Já cáchí tũhun Ndióxi: “A juú pan cuití cuxu ñayivi já catacu na, vaha. Xíní ñuhú caja ri na ña sáhná tũhun Ndióxi nu ná já queá ná cuu catacu na nu Ndióxi”, —nacachi Jesús xihín rí cán.

⁵Tá nandihí já ndáca tiñáhá sacuahá cán Jesús nasahan rí in jini yucú jícó xihín á já nanaha rí tóco ndihi ñuu ndúu ñuyívi nu á in tóco loho johó. ⁶Anda já nacachi rí já xihín á:

—Candehé ndaja náhnu cúu ñuu ndúu ñuyívi ta yehe sáhná i chuun nuú ndaja táhan ña ta cuu jasá i ña nu yóhó jáchí cuu jasá i ña yo nu cúni mí i jasá i ña. ⁷Ta quiahva i ña nuun tá ná caxítún nuú i caja cáhnún yehe —nacachi rí xihín á.

⁸Joo nanducú ñehe Jesús tũhun nu rí já cáchí a já:

—Satanás, cuáhán caxoo jáchí já cáchí tũhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuu” —nacachi Jesús xihín tiñáhá sacuahá cán.

⁹Tá nandihí já ndáca tucu tiñáhá sacuahá cán Jesús nasahan rí ñuu Jerusalén xihín á. Ta najándaá rí a nu jícó jini veñuhu cáhnu ndácaan cán já nacachi rí já xihín á:

—Tá tã jivi ndusa jahyi Ndióxi cúun jácana mún chí niju. ¹⁰Jáchí nuú tũhun Ndióxi ndáa in tũhun ña cáchí a já: Cahnda Ndióxi chuun nu tátó mé á ña ná candaa na yohó.

¹¹Ta ndiñehe ndáha ná yohó já queá ná a ndícuehe sahun tá ná cachihín

sahun xihín yuu, cáchí tũhun Ndióxi —nacachi rí xihín Jesús.

¹²Anda já nanducú ñehe Jesús tũhun nu rí já cáchí a já:

—Íin inga tucu nuú nacahyi tũhun Ndióxi ta cáchí a já: “A cóto ndojó tohún Ndióxi, xitohún” —nacachi Jesús xihín rí cán.

¹³Ña cán queá naquee xóo tóo tiñáhá sacuahá nu Jesús ta naquee rí cuahan rí jáchí coo ñeñe íni rí ndá quiahva coto ndojó chága rí a.

Tá nacasáhá cáxi tũhun Jesús tũhun Ndióxi nuú na estado Galilea

(Mt. 4:12-17; Mr. 1:14-15)

¹⁴Ta ndaja coo nandicó coo Jesús estado Galilea. Ta íin cuahá ndée a jáchí nandicutú ndaa ínimá mé á xihín ínimá yii Ndióxi. Ta ndijáá ñayivi ndúu cán nacasáhá na cáhan na saha mé á. ¹⁵Ta nacasáhá a janaha tũhun Ndióxi nuú ñayivi ini veñuhu in in ñuu na. Ta tóco ndihi na cáhan vaha na sahá ña cája mé á.

Tá nasahjin Jesús ñuu Nazaret

(Mt. 13:53-58; Mr. 6:1-6)

¹⁶Tá nandihí já cuanúhu Jesús ñuu Nazaret nuú nasahnu a. Ta mé quivi ndíquehe ndée ná cán, nasahan mé á veñuhu. Ta nacaja tá quiahva sá caja mé á já nandaca ndichi a cahvi a tũhun Ndióxi nuú ñayivi. ¹⁷Nasahan na libro nacahyi profeta Isaías nu á ña ná cahvi a ña nuú na ndúu veñuhu cán. Ta tá nasuná a libro cán já nandiñehe á nu ndáa ña cáchí a já:

¹⁸Chútú ndaa ínimá i xihín ínimá yii Ndióxi, jáchí nacaxi mé á yehe ña ná cuhun i caxi tũhun i tũhun saá ña vaha nuú na ndahví.

Ta nachindahá mé á yehe ña ná ndaja vaha i na íin cuéha ini.

Ta nachindahá mé á yehe ña ná caxi tũhun i nuú na ndúu ndahá tiñáhá

sacuahā ndá quiahva caja na queta na ndáha rí.

Ta nachindahá mé á yehe ña ná cuná i nduchú núu na cuahá já ná cuu candehé na.

Ta nachindahá a yehe ña ná candaa i ña ndóho ini ñayivi.

¹⁹ Ta nachindahá mé á yehe ña ná cahān i xihín ñayivi ña sa naxinu coo tiempo vaha ndivaha jáchi cúní Ndióxi caja cuahá ñamaní xihín ñayivi, já cáchi ña ñacahvi Jesús núu na cán.

²⁰ Tá nandihí já nachicaji Jesús libro cán já nandiquiahva mé á ña núu da cája chúun veñuhu cán ta ñasacoo a. Na ñúhu veñuhu cán sándehe ná nu mé á. ²¹ Sahá ña cán queá ñacachi a já xihín ná:

—Mé quívi viti naxini ndó naxinu coo núu tuhun ñacahví Isaías sanahá ndivaha —ñacachi Jesús xihín na cán.

²² Ta ndijáá ñayivi cán cahān vaha na saha Jesús ta cátóntó na sahá ña ndató ndivaha tuhun cahān xihín ná. Já ñacasahá ndáca tuhún táhan na já cáchi na já:

—Á a juú da yóho cúu jahyi José cán —cáchi na cahān xihín táhan na.

²³ Andá já ñacachi Jesús xihín na cán já:

—Cája i cuéntá cúní ndó cachi ndó tuhun yóho xihín i: “Yohó, da cúu doctor ndaja vaha jihna mún.” Ta xihín ña yóho cúní ndó cachi ndó xihín i: “Ña náhnu naxini joh nde ñacajún ñuu Capernaum cán, caja ña mé ñuu mún yóho ná cuni nde.”

²⁴ Andá já ñacahan chága Jesús xihín ná já ñacachi tucu a já:

—Mé a ndaa ná cahān i xihín ndo ña ni in túhún toho ñayivi co ndíquehe vaha na profeta mé ñuu da. ²⁵ Mé a ndaa ná cahān i xihín ndo. Tá ñasahíin profeta Elías sanahá já ñasanduu cuahá ri na cuān tañu ñayivi Israel ta ñandoho ndivaha ini na jáchi ñaquixi in joco ndeé

ndivaha sahá ña coó ñacuun javi tixi uni cuiá java. ²⁶ Joo coó nachindahá toho Ndióxi Elías ña ná cūhun da chindeé da na ndúu nación Israel cán. Ña ñacaja Ndióxi queá nachindahá a da núu in ña cuān ñasahíin ñuu Sarepta yati ñuu Sidón cán. ²⁷ Ta quiahva já ñasahíin ri tiempo tá ñasacuu Eliseo profeta. Mé tiempo cán ñasanduu cuahá na ñandoho cuehe táhyi nación Israel cán. Joo in túhún da ñandaja vaha da cán, da naní Naamán, da ñaquixi ñuu tóho naní Siria —ñacachi Jesús xihín na cán.

²⁸ Tá naxini joh na ñúhu veñuhu cán ña ñacachi Jesús xihín ná já ñaxojo ndivaha ini na xihín á. ²⁹ Já nandicuita na xihín á ta ñatavá na Jesús yuhú ñuu. Ta cán najándaa na a jini yucú jícó nu cánúu ñuu cán. Já ñacahán na chindahá nihni na a janda ninu. ³⁰ Joo ñayaha Jesús cuahān nu ná já ñaquee a cuahān va.

In da ñasandacaan ínima quini ini

(Mr. 1:21-28)

³¹ Andá já ñaquee Jesús cuahān ñuu Capernaum, ña ndácaan estado Galilea. Ta cán ñacasahá jánahā tuhun Ndióxi núu ñayivi mé quívi ndíquehe ndeé ná. ³² Ta chí cátóntó na tá quiahva jánahā Jesús nu ná jáchi cahān mé á tátuhun in da ín saha cahnda chuun.

³³ Mé ini veñuhu nu ndácaan Jesús jánahā cán ñasandacaan in dataa, da ndácaan in ínima quini ini. Já ñacayuhú ínima quini cán nu Jesús já cáchi rí já:

³⁴ —Jándacoo táji ndehe, Jesús, da ñuu Nazaret. Ndá cuéntá queá quíhvi nuún xihín nde. A vásún jándihún sahá nde. Sa xini vaha i yohó ta cándaa cáxi ini i ña cúun in da yíi nachindahá Ndióxi —ñacachi ínima quini cán xihín Jesús.

³⁵ Andá já ñacasahá Jesús jánani a ínima quini ndácaan ini dataa cán já ñacachi a já xihín rí:

—Caji yúhūn ta janí dā yóho —
nācachi Jesús xihín rí.

Tá nācachi a já chí najándacava rí
quini dataa nuú nā cán já naqueta rí ini
dā cán. Ta coó nācāja rí ni in nā núu
xihín dá. ³⁶Tóco ndihi ñayivi nasanduu
cán nayihví ndivaha na. Ta já nācasáhá
cáchi xihín táhan na já:

—Íin ndivaha sahá tūhun cáhan Jesús
yóho jáchi xihín nā cáhan dā sáhndá dā
chuun xihín ndée dá ta tává dā ínimā
quini ta chí queé rí cuāhan rí —nācachi
xihín táhan na cán.

³⁷Ta níí cúú ñuu válí cán nandicujta
nuu tūhun saha Jesús.

**Ndája vaha Jesús ñá
cúú xojo Simón Pedro**

(Mt. 8:14-15; Mr. 1:29-31)

³⁸Anda já naquee Jesús veñuhu cán já
cuāhan vehe in dā naní Simón. Tá nax-
inu a cán já naquihvi a ini vehe da. Ta
naxini a ñā quihvi ñá cúú xojo Simón
cán, ñā chícaan cáhni ndée ñā. Chí nax-
ica tahví nā nū Jesús ñā ná ndaja vaha
mé á ñā. ³⁹Anda já nācayati Jesús nū ñā
já nasahnda chuun nuú cuēhe cán ñā ná
quee a. Já nandindaa ñā chícaan cáhni
á ñā chí ivi laá nandicoo ñā já nācasáhá
cāja ndíví ñā ñā cuxu na.

Ndája vaha Jesús cuahá nā quihvi

(Mt. 8:16-17; Mr. 1:32-34)

⁴⁰Tá naqueta nuu candii mé quiví cán
já ñēhe ñayivi nā quihvi ndúu nū ná nax-
inu nā nū Jesús. Tá nuú cuēhe nasandoo
nā cán ta tá nāchinúu Jesús ndáha
á jiní in in na já nandivaha na nācāja mé
á. ⁴¹Ta cuāha táhan nā quihvi cán nā-
cana ínimā quini ini na nācāja mé á. Ta
tá quéta rí quini cán já cáyuhú cóhó rí
nū Jesús já cáchi rí já:

—Yóhó cúún in túhún jiní já jahyi
Ndióxi —cáchi rí xihín Jesús.

Joo najánani Jesús ínimā quini cán ta
co cúni a quiahva ñamaní ñā ná cáhan

rí jáchi xini vaha rí cán ñā cúú mé
á Cristo, dā nāchindahá Ndióxi cacomí
cuéntá sahá ñayivi.

**Jánaḡa Jesús tūhun Ndióxi nuú
ñayivi ndúu estado Galilea**

(Mr. 1:35-39)

⁴²Tá nativi inga quiví itaan já naquee
Jesús ñuu cán ta cuāhan in nū cáa xóo.
Joo nācasáhá ñayivi ndínducú nā mé á
janda quiahva naxinu nā nū ín a jáchi
cúni nā caji na nuu á ná a jándacoo a nā.
⁴³Anda já nācachi Jesús já xihín ná:

—Ndítahan nuú i cuhun i caxi tūhun i
xihín ñayivi ndúu java ga ñuu ñā vaxi
quiví cacomí Ndióxi cuéntá saha ná.
Jáchi chuun yóho nāchindahá Ndióxi
yehe vaxi i —nācachi Jesús xihín nā cán.

⁴⁴Chí naxica nuu Jesús jánaḡa tūhun
Ndióxi nuú ñayivi ini veñuhu estado
Galilea cán.

**Cája Jesús ñā ná cuu
tiin cuahá ná tiyacá**

(Mt. 4:18-22; Mr. 1:16-20)

5 In tañu íin Jesús yuhú tañuhú naní
Genesaret. Ta a juú quiahva nātaca
ñayivi chí nācasáhá cándíhi na Jesús
jáchi cúni nā cuni johu na tūhun Ndióxi.

²Ta naxini Jesús ivi barco ndíta dó yati
yuhú tañuhú cán. Coó dā núhu ini dó
jáchi sa naquee dā tává tiyacá ta yati
jiní va ndícata da ñúnu dá. ³Anda já
naquihvi Jesús ini in táhan barco cán,
dó cúú ñaha Simón. Ta nācachi Jesús
xihín Simón ñā ná jácaxicá loho da dó.
Tá nandihí já nācācoo Jesús ini barco já
nācasáhá jánaḡa nuú ñayivi janda mé ini
barco cán. ⁴Ta tá sa nandihí nācāhan
xihín ñayivi cán já nācachi a já xihín
Simón:

—Cañehe barco yóho ná cuhun dó xoo
nū cúná chága ticuifí ta jácanún ñūnun
tavun tiyacá —nācachi Jesús xihín dá.

⁵Anda já nanducú ñēhe Simón tūhun
nū Jesús já cáchi dā já xihín á:

—Maestro, nini yaa ñuú ñacaja chúun nde ña nducú nde tavá nde tiyacá. Ta coó ñaha ñatavá nde. Joo tá sa cáhí mé ndó já caja i tá iin cáhí ndo cuhun i jácana i ñunu i ini tañuhú —ñacachi Simón xihin Jesús.

⁶Ta tá ñacaja da ña ñacachi Jesús xihin dá já a juú quiahva cuahá tiyacá ñatavá da chí janda ñunu dá cán ñacasáhá táhnda. ⁷Anda já ñacuu ndáha dá nuú java ga da táv tiyacá ñuhu ini inga barco ña ná quixi da chindeé táhan da xihin dá. Anda já ñaquixi da cán chindeé táhan da xihin Simón. Já najacutú da ndívi barco cán xihín tiyacá chí janda nducú cacoo dó cán चाहá tañuhú xihin ña cuahá tiyacá ñaquee ini dó. ⁸Tá naxini Simón Pedro cán ña yóho já ñacaxítí da nu Jesús já cáhí da já xihin á:

—A cáyati ndó nuú i, xitoho i jáchí cúu u in ta cája cuachi.

⁹Já ñacachi Simón jáchí ñayihví da. Ta quiahva já ñayihví da ñachindeé táhan xihin dá cán sahá ña cuaha nahá tiyacá ñatavá da. ¹⁰Quiahva já ñayihví ri Jacobo xihin Juan, da cúu jahyi Zebedeo. Ndívi da yóho chindeé táhan da xihin Simón cán. Ta já ñacachi Jesús já xihin Simón:

—A cáyihví tohún jáchí viti casáhún caca nuún tavún ñayivi tañu cuachi tá quiahva ñacajún tá ñatavún tiyacá ini tañuhú —ñacachi Jesús xihin dá.

¹¹Ña cán queá tá ñatavá da cán barco da yuhú tañuhú cán já najandacoo ndihi da ñaha da ta ñandico da Jesús.

Tá ñandaja vaha Jesús in da ndóho cuehe táhyi

(Mt. 8:1-4; Mr. 1:40-45)

¹²Ta ndaja coo iin Jesús in ñuu ta já ñaxinu coo in da ndóho cuehe táhyi nu á. Ta tá ñaxini da Jesús já ñacaxítí da nu á janda quiahva ñacani ndaa nuu dá nu ñuhu. Já ñacasáhá xica tahví da nu á já cáhí da já xihin á:

—Cuu ndaja vaha ndó yehe, xitoho i tá cúní ndo —ñacachi da xihin Jesús.

¹³Anda já ñacani ndaa ndáha Jesús da já ñacachi a já:

—Cúní ña ná ndivahún ña cán quea ñandivahún viti —ñacachi Jesús.

Tá ñacachi Jesús já chí ivi laá ñandin-daa cuehe táhyi ñandoho da cán. ¹⁴Anda já ñasahnda Jesús chuun nu dá ña ná a ndicani da nuú ñayivi sahá ña ñacaja xihin dá. Ña ñacachi a xihin dá quea:

—Cuahán ndacún jáñahun mún nuú jutú. Ta ndítahan jocún ñaha nu Ndióxi tátuhun ñasahnda ley Moisés sanahá caja na sa ñandivaha. Já ná candaa ini ñayivi ña sa ñandindaa va cuehe ñasandohún —ñacachi Jesús xihin da cán.

¹⁵Joo ví ga ví ñacasáhá ndicuita nuu tuhun sahá ña cája Jesús. Sahá ña cán queá táca cuahá ndivaha ñayivi cuni johu na nu cáhan mé á xihin ná. Ta jári táca na jáchí cúní na ña ná ndaja vaha mé á na. ¹⁶Joo táv xoo Jesús mé á xoo nuú coo ñayivi ta cán sá xica tahví a nu Ndióxi.

Ndája vaha Jesús in da ñaxihí tuchu saha

(Mt. 9:1-8; Mr. 2:1-12)

¹⁷In tañu ndácaan Jesús ini in vehe jáñaha nuú ñayivi. Tañu na cán ñasandu coo java na fariseo xihin java na jáñaha ley Moisés. Tóco ndihi na cúu ná na ñaquixi ndijáá ñuu válí ñuhu estado Galilea cán xihin ñuu válí ñuhu estado Judea xihin ñuu Jerusalén viti. Ta náha Jesús ña ñehe a ndé Ndióxi jáchí ndivaha ñayivi cája mé á. ¹⁸Mé hora já ñaxinu coo java dataa ta ñehe da in xito loho nu cánduhu in da quihvi, da ñaxihí tuchu saha. Ta cúní da jáquihvi da da cán ini vehe nu ndácaan Jesús cán já chinduhu dá da nu Jesús, ñacahán da. ¹⁹Joo coo ñacuu caja da quihvi da jáchí ñanditútú ndivaha ñayivi ndúu na yéhe vehe cán. Sahá ña cán quea ñan-

daa da jini véhe já natavá da teja cándójó cán. Já najánuu da xito loho nu cándúhu mé da quíhvi cán tañu tóco ndihi ñayivi ñúhu ini vehe cán janda quiahva naxinu xito da quíhvi cán nu fin Jesús. ²⁰ Tá naxini Jesús ña cándeé ini da ñehe da quíhvi cán mé á já nacachi a já xihín da quíhvi cán já:

—Candehé. Sa nacaja cáhnu ini i sahá cuachún viti —nacachi Jesús xihín dá.

²¹ Anda já nacasáhá na jánaha ley Moisés xihín na fariseo cán cáhán na: “Ndá da cúu da yóho ta ndá cuéntá queá ndája núu da Ndióxi xihín tūhun cáhán da. Jáchí ni in tūhún toho ñayivi a cúu caja cáhnu ini sahá cuachi. In tūhún jini Ndióxi queá cuu caja cáhnu ini sahá cuachi”, nacahán na cán.

²² Joo Jesús sa nacandaa va ini a ña cáhvi ini na cán sahá ña cán queá nacachi a já xihín ná:

—Ndávaha cáhán ndo já. ²³ Á cáhán ndo ña ihvi chága cachi i xihín da yóho: “Nacaja cáhnu ini i sahá cuachún viti.” Á tá coó tá cachi i xihín dá: “Ndicoo ta cuanúhu.” ²⁴ Candehé vaha ndo ná naha i nu ndo ña fin sahá i, da nachindahá Ndióxi nduu u ñayivi, caja cáhnu ini i sahá cuachi ñayivi ñuyiví yóho —nacachi Jesús xihín na cán.

Anda já nacachi tucu a xihín da naxihi tuchu saha cán já:

—Ta viti cáhán i xuhun, cuándacoo ndiquehe xito lohún ta cuanúhu.

²⁵ Tá nacachi Jesús já chí ivi laá nandicoo da nu ndíhi ñayivi ndúu cán jáchí nandivaha saha dá. Ta nandiquehe da xito loho da nuú nasandúhu dá. Anda já cája cáhnu da Ndióxi naquee da cuanúhu dá vehe da. ²⁶ Ta tóco ndihi ñayivi nasanduu cán nacatóntó na ta nacaja cáhnu na Ndióxi sahá ña nacaja Jesús. Ta a juú quiahva yíhvi na já nacachi na já:

—Ña náhnu ndivaha va queá naxini quiví viti —nacachi na.

Cána Jesús in da naní Leví, da cáhan na Mateo xihín, ña ná caca da xihín á

(Mt. 9:9-13; Mr. 2:13-17)

²⁷ Tá nandíhi já naquee Jesús xíca cuahan. Ta cán naxini a in da játaca jiuhún cuéntá impuesto. Mé da yóho naní da Leví ta fin coo da nu sácoo na játaca jiuhún cuéntá impuesto cán. Anda já nacachi Jesús já xihín dá:

—Naha quí candicun yehe —nacachi a xihín dá.

²⁸ Anda já nandaca ndichi Leví cán ta najándacoo da tóco ndihi ñaha cán ta já nacasáhá ndico da Jesús xíca da. ²⁹ Tá nandíhi já nacavaha Leví in víco cáhnu mé vehe da cán ña caja cáhnu da Jesús. Ta cán nataca cuaha táhan na játaca jiuhún cuéntá impuesto ndúu na vehe da. Ta cuahá ga ñayivi nataca ndúu coo nu mesa cán. ³⁰ Joo na fariseo xihín na jánaha ley Moisés nacasáhá na cáhán núu na sahá na xíca tuun xihín Jesús já nacachi na já:

—Ndá cuéntá queá xíxi ndó xihín na játaca jiuhún cuéntá impuesto ta xihín java ga na cája cuachi —nacachi na cán xihín na xíca tuun xihín Jesús.

³¹ Anda já nanducú ñehe Jesús tūhun nuú na cán já nacachi a já xihín ná:

—Ñayivi fin vaha coo xíní ñúhú toho na da cája tátá ñahá joo na quíhvi, na cán cúu na xíní ñúhú da cája tátá ñahá. ³² Ta yehe coo vaxi toho i cana i na sa fin vaha. Vaxi i cana i ñayivi, na cája cuachi ña ná jándacoo na cuachi cája na —nacachi Jesús xihín na cán.

Ndáca tūhún na Jesús ndá cuéntá queá coo xijuhun da xíca tuun xihín á

(Mt. 9:14-17; Mr. 2:18-22)

³³ Anda já nacasáhá ndáca tūhún tucu na Jesús já cáchí na já xihín á:

—Xíní nde ña xíca tahví ndivaha va na nasaxíca tuun xihín Juan ta jári xijuhun ndivaha va na cán. Ta quiahva já cája na

fariseo. Joo na xíca tuun xihín yóhó jan níí tiempo xíxi na pan ta xíhi na vino. Ndá cuéntá queá cája na já —nacachi na cán xihín Jesús.

³⁴ Andá já nanducú ñehe Jesús tũhun nu ná já cáhí a já xihín ná:

—Cúú á tátũhun tá cája na víco tán-daha tá fin va mé da tándaha cán xihín ná já queá co ndítahan nu ná cajuhun na. Quiahva já fin ri xihín yehe va. Coó saha cajuhun na xíca tuun xihín i jáchí fin vi xihín ná viti. ³⁵ Joo vaxi quivi ndindaa i nuú na yóho. Andá já casáhá na yóho cajuhun na —nacachi Jesús xihín na cán.

³⁶ Andá já nasacu Jesús quiahva nu ná já nacachi a já xihín ná:

—Ni in túhún toho ñayivi co sáhná na in túhún jáhmá saá já ndicahmá na in jáhmá yatá. Jáchí tá ná cajú na já játiví na jáhmá saá cán. Ta ni co ndíque táhan vaha in jáhmá yatá tá jándaha na ña xihín in túhún jahmá saá. ³⁷ Ta ni in túhún toho ñayivi co táán na vino saá ini in níí yatá. Jáchí tá ná cajú na já já queá jácáhní va vino saá níí yatá cán. Ta xihín ña yóho tiví níí cán ta tiví ri dó cúú vino cán va. ³⁸ Ña ndítahan cajú na queá taán na vino saá ini níí saá já ná cuu cañuhu vaha dó cán ta mé níí co cáhní a. ³⁹ Ta ni in túhún táhan na xíhi vino yatá co xíca na vino saá coho na jáchí cáhí na ña vaha chága xíhi dó yatá —nacachi Jesús xihín quiahva sácú a nuú na cán.

**Tá na xíca tuun xihín Jesús
tũhun na yucu jini trigo quivi
ndíquehe ndée ñayivi**

(Mt. 12:1-8; Mr. 2:23-28)

6 In quivi ndíquehe ndée ñayivi nani xíca Jesús cuahan xihín na xíca tuun xihín á já nayaha na tañu nuú naxutu na trigo. Já nacasáhá na cán túhún na yucu jini trigo cán já tává na trigo já chíníhni ndáha ná a ta sáxi na casahan na. ² Tá

naxini java na fariseo cán ña cajú na já nacachi na já:

—Ndávaha cajú ndó chuun ña co ndítahan cajú ndó quivi ndíquehe ndée yo —nacachi na fariseo cán xihín na xíca tuun xihín Jesús.

³ Andá já nanducú ñehe Jesús tũhun nu ná já nacachi a:

—Á a ñaha cahvi ndó nuú tũhun Ndióxi nu cahan sahá ña nacaja David sanahá tá nacuico da xihín na xíca xihín dá. ⁴ Ña nacaja da cán queá naquihvi da ini veñuhu Ndióxi ta nañin da pan yii já naxixi da ña ta nasahan da ña nuú na xíca xihín dá ña ná cuxu na. Joo jutú cuití va cúú na ndítahan nuú cuxu ña cán, nduu. ⁵ Ta yehe va, da nachindahá Ndióxi nduu ñayivi fin sahá i cahnda i chuun sahá quivi ndíquehe ndée ñayivi —nacachi Jesús xihín na cán.

**Tá nandaja vaha Jesús
in da nahichi ndáha**

(Mt. 12:9-14; Mr. 3:1-6)

⁶ Inga tucu quivi ndíquehe ndée ná já naquihvi Jesús ini in veñuhu ta nacasáhá jánaha nu ná. Ta ini mé veñuhu cán nasandacaan in dataa, da nahichi ndahá cuáha. ⁷ Ta ndaja coo na jánaha ley Moisés xihín na fariseo nání na Jesús sándehe na ña á ndaja vaha mé á da cán quivi ndíquehe ndée na. Ta xihín ña yóho cáhan na cuu ñehe íni na jácojo na cuachi jatá. ⁸ Joo sa xini va Jesús ña cáhvi ini na cán. Sahá ña cán queá nacachi a já xihín da nahichi ndáha cán já:

—Cuándaco ta candichi mahnú yóho —nacachi Jesús xihín dá.

Andá já nandaca ndichi da cán nuú Jesús.

⁹ Andá já nacasáhá Jesús cahan xihín java ga na ndúu cán já nacachi a já xihín ná:

—Cuni johó ndó ná ndaca tũhún i ndohó. Ndía cáhí ley ndítahan cajú í mé quivi ndíquehe ndée ñayivi. Á chindeé

yo ñayivi á caja í ña núu xihín ná. Á jácácu ná á cahní yó ná —ñacachi Jesús xihín ná.

¹⁰ Andá já nandicoto nihni Jesús nuú ndihi na ñacava nuu ndúu xihín á cán. Ta ñacachi a já xihín da ñahichí ndáha: —Jándacaá ndáhun.

Ta tá najándacaá da cán ndáha dá chí ivi laá nandivaha ndáha dá. ¹¹ Joo tóco ndihi na java ndúu cán naxojo ndivaha ini na. Já ñacasáhá ndítúhún xihín táhan na ña ndá queá cuu caja na já ná cuu jándihi na saha Jesús.

**Tá ñacaxi Jesús uxu
ivi da cacuu apóstol**

(Mt. 10:1-4; Mr. 3:13-19)

¹² Mé tañu já ñaquee Jesús nasahan in jini yúcu caça tahví a nu Ndióxi. Ta níí cúú ñuu naxica tahví a nu Ndióxi. ¹³ Ta tá sa ñativi já ñacana mé á na xíca xihín á. Ta tañu na cán ñacaxi a uxu ivi da cacuu da in táhndá ña cananí apóstol, da chindahá a caca nuu cáhan tuhun Ndióxi. ¹⁴ Ñacaxi a da naní Simón, da ñasacu tucu a quivi cananí Pedro. Ta ñacaxi a da cúú ñani Pedro, da naní Andrés. Ta ñacaxi a Jacobo xihín Juan xihín Felipe xihín Bartolomé ¹⁵ xihín Mateo xihín Tomás xihín Jacobo, da cúú jahyi Alfeo. Ta ñacaxi a Simón, da ñaxica cuéntá na cananista. ¹⁶ Ta ñacaxi ri a Judas, ñani Jacobo xihín Judas Iscariote, mé da ñajicó túhún Jesús tá nu ndíhí.

Jánaha Jesús nuú cuahá ñayivi

(Mt. 4:23-25)

¹⁷ Tá nandihí ñanuu Jesús jini yúcu xihín na xíca tuun xihín á já ñaxinu a yojó ndaa ñasahjin a xihín ná. Ta cán ñasanduu ri cuahá ndivaha ñayivi táhan na ñaquixi ndijáá ñuu válí ndúu chí estado Judea xihín na ndúu ñuu Jerusalén xihín na ndúu ñuu Tiro xihín Sidón, ña ndúu yati yuhú tañuhú. Ta tóco ndihi ñayivi yóho ñaxinu na cuni johó na nu

cáhan Jesús. Ta ñaxinu na jáchi cúni na ña ná ndaja vaha mé á na. ¹⁸ Ta tóco ndihi na ñasañuhu ínima quini ini ñandaja vaha ri Jesús na jáchi ñatavá a ínima quini ñasañuhu ini na. ¹⁹ Ta tóco ndihi ñayivi cúni na caní ndaa ndáha ná Jesús jáchi xihín ndée mé á ndája vaha tóco ndihi na quíhvi.

**Jánaha Jesús ndá quiahva caji
chága ini já ná a cánduu cuéha yo**

(Mt. 5:1-12)

²⁰ Tá nandihí já ñasandehé Jesús nuú na xíca tuun xihín á já ñacasáhá cáhí a já xihín ná:

—Tahví ñacuu ndó, na cándahví jáchi ndóhó cúú na cacomí Ndióxi cuéntá saha.

²¹ Tahví ñacuu ndó, na cuíco viti ñúhú jáchi ndóhó cacuu na chutú ndaa tá ná ndihi.

Tahví ñacuu ndó, na sácu viti jáchi ndóhó cacuu na casáhá cuacu tá nu ndíhí.

²² Tahví ñacuu ndó tá cándají ñayivi ndohó ta casáhá táxi na ndohó á cánahá na xihín ndo. Ta tahví ñacuu ndó tá quehe núu na ndohó sahá ña cáhán na ña cúú ndó na núu ndivaha. Tá ná caja na tóco ndihi ña yóho xihín ndo sahá ña cándeé ini ndó yehe, da ñachindahá Ndióxi nduu ñayivi, tahví ñacuu ndó.

²³ Já queá ndítahan cájii ndivaha ini ndó mé quivi já jáchi sa ñaxica tahví Ndióxi in ña vaha ndivaha ím indivi quiahva nu ndo. Jáchi tá quiahva cája xíxi na jan xihín ndó viti quiahva já ñacaja xíxi ri tásáhnú jicó na jan xihín na ñasacuu profeta sanahá.

²⁴ Joo ndáhví ñacuu ndó, na cuicá viti jáchi sa ñacajii ndivaha va ini ndó ñuyiví yóho.

²⁵ Ndáhví ñacuu ndó, na ñachutú ndaa viti jáchi ndóhó cúú na quixi tama nuu.

'Ndáhví nācuu ndó, nā sácū viti jáchī ndóhó cúú nā cuaca xihīn nā cacuéha ini ndó.

²⁶'Ndáhví nācuu ndó tá ná casáhá ñayivi cahan vaha na saha ndo jáchī quiahva já nācahan vaha tásáhnū jícó nā jan sahá nā profeta túhún nasanduu najándahvi ñayivi sanhá.

Xíní ñúhú quihvi ini nā cō cúní mí

(Mt. 5:38-48; 7:12)

²⁷'Tóco ndihi ndó, nā xíní johō nū cahan i yóho, ndítahan quihvi ini ndó nā cō cúní ndohó. Ta xíní ñúhú caha vaha ndó xihīn ndá nā cándajī ndohó. ²⁸Xíní ñúhú caça tahví ndó nū Ndióxi nā ná caha yii á nā nachicaan cháhan jatā ndo. Ta caça tahví ndó nū Ndióxi sahá nā cá-nahá xihīn ndo. ²⁹Ta ndá nā ná canī in xoo sajóho ndó, cata ñee ndó inga xoo sajóho ndó nū ná ñā ná canī na. Ta tá ná candaa na jahmá ndeé ndo quiahva ndó ñamanī ñā ná quehe ri na cotó ndo tá já cúnī na. ³⁰A cájīhnda ndó nuú nā xíca ñaha nū ndo. Ta ndá nā cándaa ñā cúú ñaha ndó, a ndíndaca ndó ñā nū ná. ³¹Tá quiahva cúnī ndó caha ñayivi xihīn ndo quiahva já ndítahan caha ri ndóhó va xihīn ná.

³²Jáchī tá quihvi ini ndó ñayivi sahá ñā quihvi ri ini nā cán ndohó va, ndía vaha cája ndó jáchī quiahva já cája ñayivi quini. ³³Ta tá cája vaha cuítī ndo xihīn nā cája vaha xihīn mé ndó, ndía vaha cája ndó jáchī quiahva já cája ri ñayivi quini va. ³⁴Ta tá sahan too ndó ñaha ndó nuú ñayivi sahá ñā cáhán ndo caha na ñamanī xihīn mé ndó, ndía vaha cája ndó jáchī quiahva já cája ri ñayivi quini va. ³⁵Joo ndóhó, xíní ñúhú quihvi ini ndó nā cō cúní ndohó. Ta xíní ñúhú caha vaha ndó xihīn ñayivi. Ta xíní ñúhú quiahva too ndó ñaha ndó ta a cándati ndó ñā ná nducú ñehe nā cán ñā nū ndo. Tá ná caha ndó já já queá ñehe táhvi ndó ñā vaha ndivaha caha Ndióxi ta nduu ndó

jahvi Ndióxi, mé a cúú Ndióxi cáhnu ndivaha. Jáchī mé Ndióxi cándáhví ini a ndá nā cō ndíquiahva ndixahvi nū mé á ta cándáhví ri ini a ñayivi quini va. ³⁶Xíní ñúhú tahnda ini ndó sahá ñayivi tá quiahva táhnda ini Ndióxi sahá ná.

Cō ndítahan candehé ndaa yó ñayivi

(Mt. 7:1-5)

³⁷'A candehé ndaa ndó ñayivi já ná a cája Ndióxi já xihīn ndo. A chícaan ndó cuachi jatá inga na já ná a quehe Ndióxi cuéntá sahá cuachi mé ndó. Caha cáhnu ini ndó saha ná já ná caha cáhnu ini Ndióxi saha mé ndó. ³⁸Jasá ndo ñaha nuú ñayivi já ná ñehe ndó ñaha nū Ndióxi. Cúú á tátuhun cája ñayivi tá jáchutú nā in ndohó xihīn nūnī ta quíji nihni na ndohó já ná ndituun a ta jácuyū chága nā nūnī já táán nā ñā ini a janda quiahva xíta ñā yuhú ndohó cán. Tá quiahva cája mé ndó xihīn ñayivi quiahva já caha Ndióxi xihīn ndo jáchī tá cuaha sahan ndó nuú ñayivi quiahva já cuaha quiahva ri Ndióxi nū ndóhó va — nācachi Jesús xihīn nā cán.

³⁹Tá nandihī já nasacu a quiahva nū ná já nācachi a já:

—A cuú toho caha in ta cuáá candaca da inga da cuáá cūhun da jáchī ndívī já da ndicava da yávi. ⁴⁰Ni in túhún toho da xíca jácuaha tiaha chága nū mé da jánaña ñahá cán. Joo tá ná xīnū quivī já catiaha vaha da já candaa ini da tóco ndihī ñā xínī da najánaña ñahá cán.

⁴¹'Jáchī ndá cuéntá queá sándehe ndó ñā núu cája ñani táhan ndó ta cō sándehe ndo ndá quiahva náhnu chága ñā núu cája mé ndó. Cúú á tátuhun ndácaan in xehē loho nduchú núú ñani táhan ndó nani ndácaan in yító ndúhu cáhnu ini nduchú núú ndo. ⁴²Ta tá a cūú cuni ndó yító cáhnu ndácaan ini nduchú núú mé ndó ndaja caha ndó cachi ndó xihīn ñani táhan ndó: “Ñani i, ná tavá loho i xehē ndácaan nduchú núún jan.” Ján-

dahvi ndó mé ndó xihín ña cája ndó. Xíní ñúhú tavá ndo yito cáhnu ndácaan nduchú núú mé ndó já ná nuna nu ndó cuni vaha ndó já ná cuu tavá ndó xehe loho ndácaan nduchú núú ñani táhan ndó —ñacachi Jesús.

Tá xíní yo cuihi in yito já cándaq iní ndá yito cúú dó

(Mt. 7:17-20; 12:34-35)

⁴³ Andá já ñacasáhá tucu a cáhí já:

—Coó toho yitó vaha cúun cuihi quini nuu. Ta ni coó yitó quini cuu cuun cuihi vaha nuu. ⁴⁴ Jáchi xihín cuihi cúun nuú in in yito cándaq iní ndá yito cúú dó. A vája cúú tuhun sáhdá ñayivi tití ñúhú nuú tohínú. Ta ni a vája cúú tuhun sáhdá na uva nuú tonáña yúcu. ⁴⁵ In taa vaha cáhan da ndinuhu ña vaha jáchi ndinuhu ña vaha ñúhu ínimá dá. Ta in taa quini cáhan da ndinuhu ña núu jáchi ña núu queá ndácaan ínimá dá. Jáchi yúhu ñayivi cána tóco ndihi ña nandicutú ñúhu ínimá ná —ñacachi Jesús.

Sácú Jesús quiavha sahá ivi da ñacavaha vehe

(Mt. 7:24-27)

⁴⁶ Cáhan tucu Jesús já cáhí a já:

—Ndá cuéntá queá cáhan xitoho nahá ndó yehe ta co cája ndó ña sáhdá i nu ndo. ⁴⁷ Ná cahan i xihín ndó ndaja íin da vaxi nuú i cuni johó da tuhun cáhan i ta cája da ña cáhí i. ⁴⁸ Cúú dá tátuhun in dataa ñacavaha vehe. Tá ñacasáhá da tává da sahá vehe da já nasata cúná da já ná chinúu da vehe da jatá tóto. Ta tá nasahnu cuahá yuta já ñacani ndaa ñihi ticuifí cán jatá vehe da. Joo coó nandicava vehe da ñacaja ticuifí cán jáchi tóyifí cándichi vehe da jatá tóto cán. ⁴⁹ Joo ndá da xíní johó nu cáhan i ta co cája da ña cáhí i, cúú dá tátuhun inga dataa, da ñacavaha vehe nu ñúhu uun. Ta coó nasata da nuú nanduxu sahá. Ta tá nasahnu cuahá yuta já ñacani ndaa ñihi

ticuifí cán jatá vehe da. Ta xihín ña yóho nandicava vehe da ta chí nandihí saha chí uun —ñacachi Jesús.

Tá ñandaja vaha Jesús in da cája chúun nuú in jefe soldado

(Mt. 8:5-13)

7 Tá nandihí ñacahan Jesús xihín ñayivi cán já ñaquee a cuahan chí Capernaum. ² Mé ñuu Capernaum cán nasahíin in dataa, da sáhdá chuun nuú soldado ñaquixi ñuu Roma. Mé da yóho nasahíin in mozo da ta quíhvi ndivaha ini da mozo da. Joo ndaja coo mé mozo da yóho quíhvi ndeé da ta janda ja chá quivi da. ³ Tá ñaxini johó da sáhdá chuun nuú soldado yóho sahá Jesús já nachindahá da java na sacuaha táhan na ñaquixi chichi Israel já ná caça na ñamaní nuú Jesús quixi a ndaja vaha mozo da cán. ⁴ Tá ñaxinu na cán nuú Jesús ñacasáhá xíca tahví ndivaha na nu á já cáhí na já xihín á:

—Íin sahá da sáhdá chuun nuú soldado yóho ña ná chindeé ndó da. ⁵ Jáchi quíhvi ini da tóco ndihi ñayivi ndúu nación Israel ta sa mé da jan cúú da nasahnda chuun ña ná cavaha na veñuhu nde —ñacachi na cán xihín Jesús.

⁶ Andá já ñaquee Jesús cuahan xihín ná. Joo tá sa jalóho xinu coo na vehe da sáhdá chuun nuú soldado cán já nachindahá da java amigo da nuú Jesús ná cahan na yuhú nu da já ñacachi na já:

—A jándihí ndó mé ndó ndihvi ndó vehe e, xitoho i jáchi coó saha toho i ña ná ndihvi ndó vehe e. ⁷ Sahá ña cán queá coó nasahan ndeé ini i cuhun i ndinducú u mé ndó. Joo janda nu íin ndó jan cahnnda ndó chuun ña ná ndivaha mozo i já ndivaha da. ⁸ Jáchi ndúu java na nahnu chága sáhdá chuun nuú i. Ta ndúu ri soldado sáhdá ri yehe va chuun nuu. Ta tá chindahá i in da ña ná cuhun da nu

cúni mí i cuhūn dā ta cuḡaḡaḡa dā. Ta tá sáhná i chuun nuú inga da ñā ná quixi da nuú i ta vaxi da nuú i. Ta tá sáhná i chuun nu mozo i ñā ná caja da ñā sáhná i ta caja da ñā —ḡacachi na.

⁹Tá ḡaxini johō Jesús tóco ndihi ñā ḡacahaḡa amigo dā sáhná chuun nuú soldado cán xihín á já ḡacatóntó a xihín dāḡaa cán. Andā já ḡasandehé a nu tóco ndihi ñayivi ndíco cuḡaḡaḡa cán já ḡacachi a já xihín ná:

—Mé a ndāa ná caḡaḡa i xihín ndo ñā a ñāha cuni i tañu ḡa Israel in dā cándeé cáhnu ḡahá ini Ndióxi tá quiaḡaḡa cándeé cáhnu ini dā yóho Ndióxi —ḡacachi Jesús xihín ḡa ndíco jatá cán.

¹⁰Ta tá nandíco coo ḡa cúu mozo dā sáhná chuun nuú soldado cán vehe da já ḡaxini na ñā sḡa ḡandivaha va dā ḡasaquihvi cán.

Tá najánditacu Jesús jahyi in ñā cuáaḡa

¹¹Tá sḡa ḡayaha ñā yóho já ḡaquee Jesús cuḡaḡaḡa chí in ñuu naní Naín xihín ḡa xíca tuun xihín á. Ta a juú quiaḡaḡa cuḡahá ñayivi ndíco cuḡaḡaḡa. ¹²Tá ḡaxinu coo a yati yuhú ñuu cán já ḡaxini a ñayivi ñeḡe na in ndij cuḡaḡaḡa ḡa jánduxu ḡa. Mé ndij cán ḡasacuu da in túhún já nu náná dā, ñā cúu ñā cuáaḡa. Ta a juú quiaḡaḡa cuḡahá ñayivi ñuu cán ndáca táhan xihín ñā cuḡaḡaḡa ḡa jánduxu ḡa jahyi ñā. ¹³Tá ḡaxini Jesús ñā já ḡataḡhvi ini a saḡa ñā. Andā já ḡacachi a já xihín ñā:

—A cuácu gaun.

¹⁴Andā já ḡacayati Jesús nuú sató ndij cán já ḡacani ndaa ndáha á do. Andā já ḡasacuíta ḡa ndójo sató ndij cán. Ta ḡacahaḡa Jesús xihín dā cúu ndij cán já ḡacachi a já xihín dá:

—Yeḡe cáhan i xuhun, dā tacú, cuándacoo —ḡacachi Jesús xihín dá.

¹⁵Andā já ḡasacoo dā ḡasacuu ndij cán ta ḡacasáhá dā cáhan dā. Já

ḡandiquiaḡaḡa Jesús dā nu náná dā. ¹⁶Tá ḡaxini tóco ndihi ñayivi cuḡaḡaḡa cán ñā ḡacaja Jesús já yihvi ḡa. Ta ḡacasáhá ḡa cája cáhnu na Ndióxi já cáhí ḡa já:

—In profeta cáhnu ndivaha cúu dā ḡaxinu coo tañu mí yóho viti.

Ta ḡacachi tucu na:

—Ndióxi queḡa ḡaxinu coo nu yo ñā ná chindeé a ñayivi cuéntá mé á —ḡacachi na.

¹⁷Ta ní cúu ñayivi cuéntá estado Judea xihín ḡa ndúu yati cán ḡacandaa ini na saḡa ñā ḡacaja Jesús cán.

Juan, dā jácandúta ñayivi, ḡachindahá dā java dā xíca xihín dá nu Jesús

(Mt. 11:2-19)

¹⁸Ta ndaja coo ḡañeḡe Juan, dā jácandúta ñayivi, tuḡun saḡa tóco ndihi ñā ḡacaja Jesús yóho jáchí ḡandicani ḡa xíca xihín Juan ñā nu dá. Saḡa ñā cán queḡa ḡacana da ivi táhan dā xíca xihín dā ¹⁹já ḡachindahá dā ḡa nu Jesús ñā ná ndaca tuḡún ḡa mé á á jivi ndusa cúu á Cristo, mé a chindahá Ndióxi cacomí cuéntá saḡa ñayivi, á ndítahan candati na inga ga quixi. ²⁰Tá ḡaxinu ḡa xíca xihín Juan nu ín Jesús já ḡacachi na já xihín á:

—Dā naní Juan, dā xíca jácandúta ñayivi, dā cán cúu dā ḡachindahá ndeḡe vaxi nde ndaca tuḡún nde ndoḡó á cúu ndó Cristo, ñā chindahá Ndióxi cacomí cuéntá saḡa ñayivi, á ndítahan candati nde inga ga —ḡacachi ḡa cán xihín Jesús.

²¹Mé hora ḡaxinu coo ḡa cán nu ín Jesús já ḡaxini na ḡandaja vaha Jesús cuḡahá ñayivi quihvi, ḡa ḡasandoho tá nuú cueḡe. Ta ḡatavá a ínimā quini ḡasañuhu ínimā java na. Ta cuḡahá ndivaha ḡa cuáá ḡandinuna nuu ḡacaja Jesús. ²²Saḡa ñā cán queḡa tá ḡanducú ñeḡe Jesús tuḡun nuú ḡa xíca xihín Juan cán já ḡacachi a já xihín ná:

—Cuáhán ndó ndicani ndó nu Juan saha tóco ndihi ña naxini ndó cája i xihin tóco ndihi ña naxini johó ndó cáhan i. Ta ndicani ndó nu dá ña ndinuna nuú na cuaá ta ndícaca na réncó cája i. Ta ndája vaha i na ndóho cuehe táhyi. Ta jándinuna i johó na jóho já ná cuni johó na. Ta jánditacu u ndji. Ta cáxi tuhun i tuhun Ndióxi nuú na ndahví já ná cuu cacu ndaa ínima ná. ²³Tahví nacuu na cò jándacoo ña cándéé ini na yehe — nacachi Jesús xihin ná.

²⁴Tá naquee na nachindahá Juan cán cuahan na já nacasáhá Jesús cáhan saha Juan nuú ñayivi cán já cáhí a já xihin ná:

—Ndía nacahán ndó cuni ndó tá naqueta ndó nasahan ndó sándehe ndó Juan yucú íchí cán. A juú da cán cúú ta láchá já quíji nuu da tátuhun quíji nuu in tíyoó cája tachi. ²⁵Ndía naqueta ndó candehé ndó. A juú da cán cúú ta ndíxi jahmá lándá ndivaha. Sa xini vaha ndó ña cò ndúu toho da ndíxi jahmá lándá yucú íchí. Ndá da ndíxi jahmá lándá ta cája da ña cúní yiquí cuñu da, mé da cán cúú da ndúu vehe rey cuítí va.

²⁶Ndía nasahan ndó naxini ndó cán. A còó nasahan ndó cuni johó ndó nu cáhan in da cúú profeta nu ndó. Mé a ndaa da cán cúú dá in profeta ta ín chága saha dá a juú ga inga profeta nasanduu sanahá.

²⁷Jáchí mé Juan cúú dá da cáhan tuhun Ndióxi saha tá cáhí a já:

Chindahá i in da canuú cuhun nu mún, já ná cajú tihva da íchí nuú quisún, já nacahyi a sanahá.

²⁸Candehé ndó ná cahán i xihin ndó. Tañu tóco ndihi ñayivi còó ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquahva mé ndáha Ndióxi ña ná cacomí a cuéntá saha ná, vatí cúú ná na còó saha, na cán cúú na cáhnu chága a juú ga Juan —nacachi Jesús.

²⁹Tá naxini johó tóco ndihi ñayivi ndúu cán ña yóho já nandicuni na ña cája ndaa Ndióxi tóco ndihi ñaha. Na nacahán já cúú na najácandúta Juan ta tañu na cán nasañuhu java ri na já-taca jjuhún cuéntá impuesto. ³⁰Joo na fariseo xihín na jánaha ley Moisés, na còó najácandúta Juan cán, na cán cúú na naquee núu na tóco ndihi ñamaní cúní Ndióxi cajú xihín ná. ³¹Anda já nacachi Jesús já xihín ná:

—Ná cahán i xihín ndó ndaja ín ñayivi ndúu tiempo viti. ³²Cúú ná tátuhun na valí sácoo sájíquí nuú yahvi ta cáyuhú na nuú java ga na valí ndúu cán já cáhí na já: “Natívi ndé tótívi nu ndó joo còó naxeen ndó cata sáhá ndó. Ta naxita cueha ndivaha nde nu ndó ta ni còó nasacu ndó.” ³³Quiahva já ín ñayivi ndúu tiempo viti jáchí naquixi Juan, da jácandúta ñayivi ta naxijuhun da ta còó naxihi da vino joo nacachi ndó saha dá ña ndácaan ínima quini ini da. ³⁴Ta tá naxinu yehe, da nachindahá Ndióxi nduu ñayivi ta xíxi i pan ta xíhi i vino já nacasáhá cáhí ndó sahá i ña cúu u in ta ndehé ndivaha ta xíhi ndivaha i. Ta cáhí ndó ña cátoó ndivaha i cacuu u amigo na cajú cuachi xihín na já-taca jjuhún cuéntá impuesto. ³⁵Joo na cúní cándaq ini ña ndaa, na cán cúú na cándaq ini ña cajú Juan xihín yehe ña ndaa —nacachi Jesús xihín na cán.

Ín Jesús vehe Simón, da cúú fariseo

³⁶In táhan da fariseo nacana da Jesús ña ná cuhun a cuxu a vehe da. Anda já nasahan Jesús vehe da já nasacoo a nu mesa. ³⁷Joo ndaja coo in ñañáha, mé ña ñuu cán tá nañehe ña tuhun ña naxinu Jesús vehe Simón cán cuxu a já naxinu ña xihín in yúyú alabastro, ña naxutú ndaa xihín síti támi sahan nacasaq ña nu Jesús. Mé ñañáha yóho cúú ña in ña cajú cuahá cuachi. ³⁸Ta sácu ña nacaxítí ña saha Jesús ta xihín ticuí nuu

ñá najácuchu ñá sahá. Ta tá nandihí já najáhichí ñá do xihín ijí jiní ña. Anda já natatí yúhu ñá sahá. Ta nachojó ñá sítí támi sáhan cán jata sahá á. ³⁹Tá naxini mé da fariseo, da nacana Jesús vehe da cán ña yóho já nacahán da já: “Tá profeta ndusa ná cacuu da yóho ta sa cánda da va ini da ndá ñá cúu ñá cáni ndaa ndáha saha dá jáchi cúu ñá ña cája cuahá cuachi”, nacahán Simón cán.

⁴⁰ Anda já nacachi Jesús já xihín da fariseo cán:

—Candehé Simón, cuni johó ná cahan i xuhun —nacachi Jesús xihin dá.

Anda já nacachi Simón cán já xihin Jesús:

—Cahan mé á xihín i, xitoho i —nacachi da.

⁴¹ Anda já nasacu Jesús in quiahva nu dá já nacachi a já xihin dá:

—Nasanduu ivi dataa ta nasayicá da jiyuhún nu mé da sáhan tóo a cán. In da nasayicá uhun ciento ta inga da nasayicá ivi jico uxu. ⁴²Ta ni in da cán co ndéé da chahvi da ña yicá da sahá ña cán queá nacaja cáhnu ini da sáhan tóo jiyuhún cán sahá ña yicá ndíví da cán. Ta viti cachún xihín i, Simón, ndá da cáhún tixi ndíví da yóho cacuu da da quihvi ini chága mé da, da nacaja cáhnu ini saha cuéntá ña nasayicá da cán —nacachi Jesús xihin Simón.

⁴³ Anda já nanducú ñehe Simón cán tuhun nu Jesús já nacachi da já xihin á:

—Cája i cuéntá ña quihvi ini chága da nasayicá cuahá jiyuhún cán nu dá —nacachi da.

Anda já nacachi Jesús já xihin Simón:

—Mé a ndaa cáhún —nacachi a.

⁴⁴ Anda já nasandehé Jesús ñá nachojó sítí sahá cán já nacachi a já xihin Simón:

—Candehé vaha ñañáha jan, Simón. Naquihvi i vehún joo coo nasahún ticuí ndoo sahá i. Joo ñañáha yóho najácuchu ñá sahá i xihín ticuí nuu ña. Ta tá nandihí já najáhichí ñá sahá i xihin ijí

jiní ña. ⁴⁵Ta yóhó, coo natatí yuhún sajóho yehe tá nasaa i vehún. Joo ñá yóho, janda nani naquihvi ñá vehún tátí yúhu ñá sahá i. Ta anda viti ñúhú cája ñá a. ⁴⁶Ta ni coo nachojó tohún sítí jiní i tá naxinu i vehún. Joo ñá yóho nachojó ñá sítí támi sáhan sahá i. ⁴⁷Ta cáhí i xuhun, Simón, ña xihín ña cája ñá yóho náha ña mé a ndaa quihvi ini ñá yehe jáchi nacaja cáhnu ini i sahá cuachi ná vatí cuahá ndivaha cúu á. Joo ndá na cáhán ña chá cuití va cuachi cája cáhnu ini i saha, na cán cúu ri na chá cuití quihvi ini na yehe —nacachi Jesús xihin Simón.

⁴⁸ Anda já nacasahá cáhí a já xihin ñañáha cán:

—Sa nacaja cáhnu ini i sahá cuachún viti.

⁴⁹ Ta tóco ndihí java ga na natata ndúu coo nu mesa vehe Simón cán nacasahá cáhí xihin táhan na já:

—Ndá ta cáhí da yóho jáchi janda cuachi cája ñayivi cája cáhnu ini da saha —nacachi xihin táhan na cán.

⁵⁰ Anda já nacachi Jesús já xihin ñañáha cán:

—Nacacu ndaa inimum jáchi nacandee inún yehe. Cuanúhu ta a ndícani ga inún viti —nacachi Jesús xihin ña.

Tá java najihí chindeé na Jesús

8 Tá nandihí nayaha ña yóho já nacasahá Jesús xíca nuu a cuahá ñuu náhnu xihín ñuu válí ña caxi tuhun a xihin ná ña sa nacayati quiví cacomí Ndióxi cuéntá saha ná. Ta ndíco ndíhuxu ivi na apóstol cán mé á. ²Ta nasandaca táhan java ri najihí xihin á, na natavá mé á inima quini ini xihín na nandaja vaha mé á nuú cuhehe nasandoho na. Tañu najihí yóho nasandacaan ñá naní María, ñá cahan na Magdalena xihin. Mé María yóho cúu ñá natavá Jesús usa inima quini ini. ³Ta catáhan ri in ñá naní Juana cuahan ñá xihin na cán. Mé Juana

cúu ná ñájhí da naní Chuza, da cómi cuéntá sahá vehe Herodes. Ta jári in ñá naní Susana ñaxica nuu ná xihin Jesús. Cuaha chága najihí ñaxica nuu na xihin á ta ñachindeé ñahá na xihín ña cómi na.

**Sácú Jesús quiahva
sahá in da sátá tata**

(Mt. 13:1-17; Mr. 4:1-12)

⁴ Naqueta ñayivi cuahá ñuu jáchi cúni na cuni na Jesús. Ta tá sa ñataca cuahá ñayivi nu ín Jesús, ñacasahá cáhan xihin ná. Ta ñasacu a in quiahva nu ná já ñacachi a já xihin ná:

⁵ —In da sátá tata ñaquee da cuahan da cata da ña. Ta tá sátá da ña cuahan da já ñacuyu java ña íchi. Ta tá ñayaha ñayivi já ñachiníhni saha joho na a ta já ñaxinu laa ñasaxí rí ña. ⁶ Ta java tata cán ñacuyu a tañu yuu. Ta tá ñanduta mé tata cán, cama chá ñahichí a jáchi íchí ndivaha tañu yuu cán. ⁷ Ta java ga tata cán ñacuyu a tañu tohínú ta tá ñanduta ña já ñanditaha ndihi a ñacaja tohínú, dó ñasahnu xihin á cán. ⁸ Joo java tata ñacuyu a nu ñuhú vaha. Ta tá ñasahnu a já ñajáquee na cuahá ñaha nu á. Janda in ciento tata ñacana jatá in in nuú tata cán —ñacachi Jesús xihin ná.

Ta tá ñandihí ñandicani Jesús ña yóho nu ná já ñacahan cóhó a nu ná já ñacachi a já xihin ná:

—Ndá ndó, na ín joho, ná cuni joho ndó —ñacachi Jesús xihín na cán.

⁹ Anda já ñacasahá na xica tuun xihin á cán ndáca tuhún na mé á ndia cúni cachi quiahva ñacachi a xihín ñayivi cán. ¹⁰ Ta ñanducú ñehe Jesús tuhun nu ná já ñacachi a já xihin ná:

—Ña cóo ñacandaa ini ndó jihna, ña cán cándaq ini ndó viti jáchi ñasuná Ndióxi xini túní ndó candaq ini ndó ndá quiahva cacomí mé á cuéntá sahá ñayivi. Joo sácú u quiahva nuú java ga ñayivi já queá vatí sánehé na joo cúu ná tátuhun na có tvi nuu. Ta vatí xini joho na, cúu

na tátuhun na jóho jáchi có cándaq ini na ña cáhan i xihin ná —ñacachi Jesús xihín na xica tuun xihin á cán.

**Ndicani Jesús ña cúni cachi
quiahva ñasacu a nuú na cán**

(Mt. 13:18-23; Mr. 4:13-20)

¹¹ Anda já ñacachi Jesús já xihin ná:

—Ña yóho cúni cachi quiahva ñasacu u nuú ñayivi yóho: Mé tata cán cúu á yuhú nuú tuhun Ndióxi, ña xica java na cáhan na xihín ñayivi. ¹² Mé tata ña ñandicava íchi cán náha nu yo ndá quiahva ín java ñayivi. Xini joho na tuhun Ndióxi joo tá ñandihí já vaxi tiñahá sacuaha ta cája rí xihin ná ña ndíndójó ña ña já ná a cándusa na tuhun Ndióxi ña ná a cácu ndaa ínima ná. ¹³ Ta tata ña ñandicava tañu yuu cán náha nu yo ña ndúu java ñayivi ta xini joho na tuhun Ndióxi ta cájji ín na ndíquehe na ña. Joo sahá ña có ñehe ín yóho á cuhun cúna a sahá ña cán queá chá tiempo cuití va cándusa na tuhun Ndióxi. Jáchi tá cásahá ndóho ini na sahá tuhun Ndióxi chí jándacoo va na ña. ¹⁴ Ta tata ña ñandicava tañu tohínú cán náha nu yo ña ndúu java ñayivi ta xini joho na tuhun Ndióxi joo có jándacoo na íchi ñaxica na jihna. Ta cásahá ndicani ini na sahá ñaha ñuyiví yóho ta cásahá na cátóo na canduu cuahá ñaha cuicá nu ná ta cásahá ndicají ini na caja na ña núu. Sahá ña cán queá cúu á tátuhun tata ña có cána ñaha jáquee na nuu jáchi cóo ñasahnu na xihín tuhun Ndióxi. ¹⁵ Joo tata ña ñandicava nu ñuhú vaha cán náha nu yo ña ndúu java ñayivi ta xini joho na tuhun Ndióxi xihín ndinuhu ini na ta cája na ña sáhdá a nu ná. Ta sahá ña ndíco cáhnu na Ndióxi ta có jándacoo na mé á sahá ña cán queá cúu ná tátuhun tata ñasahan cuahá ñaha ña cuu jáquee na nuu jáchi sáhnu na xihín tuhun Ndióxi —ñacachi Jesús ndicani a nuú na xica tuun xihin á cán.

**Sácú Jesús in quiahva
sahá in lámpara**

(Mr. 4:21-25)

¹⁶Ni in túhún toho ñayivi cō ndíc-ahmi na in lámpara ta anda já chíjahvi na jatá xihín in ñaha. Ta ni cō chícaan jehé na ña tixi xito. Ña cája na queá chínúu jicó na ña já ná yehe a nuú na quíhvi ini vehe cán. ¹⁷Ni in túhún toho ñaha a cuú coo jehé nahá jáchí xinu quívi já ndáca náha nu á. Ta ni in tuhun ñacahan jehé ñayivi a cuú coo jehé nahá jáchí xinu quívi já candaa ini tóco ndihi ñayivi sahá tuhun ñasahiin jehé cán.

¹⁸Sahá ña cán queá ndítahan coo johō vaha ndó nu cáhan i xihín ndō. Jáchí da íin ñaha nuu, ñehe táhvi dá coo chága ñaha nu dá joo da coó ñaha nuu, jandá ña loho íin nu dá ndindaa —ñacachi Jesús.

**Tá ñaxinu cōo náná Jesús
xihín ñani a nu íin a**

(Mt. 12:46-50; Mr. 3:31-35)

¹⁹Anda já ñaxinu cōo náná Jesús xihín ñani a mé nu íin a cán. Joo coó ñacuu cayatí na nu á jáchí a juú quiahva ñachutú ñayivi ndúu na xihín á cán. ²⁰Anda já ñasahan in da çaxi tuhun da xihín Jesús já cáchí da já xihín á:

—Jata véhe cáa íin nánún xihín ñanún ta çahan na xuhun cúní na —ñacachi da cán xihín Jesús.

²¹Anda já ñacachi Jesús xihín tóco ndihi ñayivi ndúu cán já:

—Ndá na xíní johō tuhun Ndióxi ta cája na ña cáchí a, na cán cúú ná tátuhun náná i xihín ñani i —ñacachi Jesús xihín ná.

**Tá najácatáji Jesús tachi
xihín tañuhú tá ndícojo dō**

(Mt. 8:23-27; Mr. 4:35-41)

²²In quívi ñaquíhvi Jesús ini in barco xihín na xíca tuun xihín á. Ta já ñacachi a já xihín ná:

—Cóho inga xoo tañuhú yóho.

Anda já ñaquee na cuahan na. ²³Ta nani jójo cava na tañuhú cán cuahan na já ñanaá ini Jesús ñaquíji á. Ta in náá cuití ñaxinu in tachi quíni ndivaha nuú tañuhú cán ta ñacasáhá ndíndita dó ta jáchutú dō ini barco cán. Ta chí iyo ndivaha cáa jáchí cuu cacōo barco çahá ticuí. ²⁴Anda já ñasahan na ndíñehe na Jesús já ñacachi na já xihín á:

—Maestro, Maestro. Cáçoo barco yo çahá ticuí cuahan dō —ñacachi na xihín á.

Anda já ñandicoo Jesús já ñacasáhá já-ñani a tachi xihín ticuí ndícojo cán. Tá ñandihí já najáyaa mé á tachi xihín ticuí chí táji ní uun ñacandoo nuú tañuhú cán. ²⁵Anda já ñacachi Jesús já xihín na xíca tuun xihín á:

—Ndaja vaha cō cándeé ini ndó yehe —ñacachi a.

Joo na cán ñayíhvi na ta ñacatóntó na. Ta chí jandá ndáca tuhún táhan na já cáchí na já:

—Ndá da cúú dataa yóho ña anda tachi xihín tañuhú cándúsa nu cáhan da —ñacachi xihín táhan na cán.

**Tá ñatava Jesús ínimā quini
ñasañuhu ini in dataa ñuu Gadara**

(Mt. 8:28-34; Mr. 5:1-20)

²⁶Tá ñandihí já cuahan na ta ñaxinu cōo na ñundáhyi cuéntá Gadara, ña cándōo inga xoo tañuhú ta ndícoto nihni táhan xihín estado Galilea. ²⁷Tá ñanuu Jesús barco cán já ñacayati in dataa, da ñuu Gadara cán nu á. Mé da yóho sa ñacaná ndivaha ñuhu ínimā quini ini da. Ta já cáa vichí láhlá da xíca nuu da. Ta ni

co íin da vehe. Tañu nu jánduxu na ndii cán va íin tuun da. ²⁸ Tá naxini da Jesús nandicava xítí da nu á ta já nacayuhú da já nacachi da já xihín á:

—Ndá cuéntá queá vasún quihvi nuún xihín i. Yóhó cúún Jesús, da cúú in túhún jini já jahyi Ndióxi, ña cáhnu ndivaha. Xíca tahví i nuun ña ná a jándohún ini i.

²⁹ Nacachi da ña yóho xihín Jesús jáchi ñacasáhá sáhdá mé á chuun nu ínimá quini cán ña ná quee rí ínimá da cán. Ta cuahá tañu ñasatiin rí da. Ta vatí ñacató na ndáha dá xihín saha dá xihín cadena joo ñasahnda túhun dá ña nacaja rí quini cán. Ta já nacaja rí ña ná cunu da cuhun da chí yucú íchí nuú co ndúu ñayivi. ³⁰ Nandaca tuhún Jesús mé rí quini cán já nacachi a já xihín rí:

—Ndaja nanún.

Anda já nanducú ñehe da cán tuhun nu á já nacachi da já xihín á:

—Legión naní i.

Nacachi da cán ña naní da Legión jáchi cuahá ndivaha rí quini nandihvi rí ini da.

³¹ Ta mé rí quini ñúhu ini da cán naxica tahví rí nu Jesús ña ná a chindahá a rí cuhun rí nu ndúu ínimá ndii. ³² Ta yati in ndica yucu cán ñasanduu cuahá ndivaha cóchí xíxáhan rí. Sáhá ña cán queá naxica rí quini cán ñamaní nu Jesús ña ná ndihvi rí ini cóchí ndúu cán. Anda já ñasahan Jesús ñamaní nu rí. ³³ Chí ñaquee rí quini dataa cán cuahan rí já nandihvi rí ini cóchí cán. Ta tóco ndihi cóchí yóho xínu rí cuahan rí ñanuu rí nu ndáyi já najáqueta nuu rí mé rí ini tañuhú cán ta já ñacandaa rí ticuí já naxihí rí.

³⁴ Tá naxini mé dataa ndáa cóchí cán ña yóho já naxinu da cuahan da caxi tuhun da ña ñayaha yóho nuú ñayivi ñuu Gadara cán xihín nuú java ga na ndúu yati cán. ³⁵ Anda já ñaqueta ñayivi sándehe na ña ñacuu cán. Ta tá naxinu coo na nu íin Jesús cán já naxini na íin coo mé da nasañuhu rí quini ini cán saha

Jesús. Ta sa nandaca ndixi da jáhma ta chí sa nandicaxí táhyí ini da. Tá naxini na ña yóho chí ñayihví na. ³⁶ Ta na naxini nuú ñatavá Jesús rí quini ini dataa cán, na cán cúú na nandicani ña nuú na coo naxini cán. ³⁷ Tá naxini johu na ñuu Gadara cán ndaja ñasahin já naxica tahví ndihi na nu Jesús ña ná quee a cuhun a jáchi yihví ndivaha na. Sáhá ña cán queá nandihvi tucu Jesús ini barco cán ña ná quee a cuhun a. ³⁸ Joo tá cámaní quee a cuhun a já ñacasáhá da ñaqueta rí quini ini cán xíca tahví da nu Jesús ña ná quiahva mé á ñamaní cuhun da xihín á. Joo ñasahnda Jesús chuun nu dá ña ná candoo da. Já nacachi a já xihín dá:

³⁹ —Cuanúhu vehún. Ta já ndicanún nuú na vehún ndaja náhnu ñaha nacaja Ndióxi xuhun —nacachi Jesús xihín da cán.

Anda já ñaquee da cán cuahan da. Já nandicani da nu tóco ndihi na Gadara cán ndaja cáa ña nacaja Jesús xihín dá.

Tá nandaja vaha Jesús jahyi jíhí Jairo xihín in ña ñacani ndaa ndáha jáhma á

(Mt. 9:18-26; Mr. 5:21-43)

⁴⁰ Tá nandicó coo Jesús inga xoo tañuhú cán, a juú quiahva cávatá ñayivi naxinu na ndiquehe na mé á jáchi mé cán ñasanduu na ndáti na mé á. ⁴¹ Anda já ñacasaa in dataa naní Jairo, da sáhdá chuun veñuhu. Mé Jairo yóho naxinu da nacaxítí da saha Jesús já naxica tahví da nu á ña ná cuhun a vehe da. ⁴² Jáchi xihí ña loho cúú jahyi jíhí da ta in já cúú ña nu dá ta ndácaan ña tátuhun uxu ivi cuja. Chí ñaquee Jesús cuahan ta nani xíca cuahan vehe Jairo cán a juú quiahva cuahá ñayivi ndico na jatá cuahan na ta chí janda cándihi na mé á cuahan na.

⁴³ Ta tañu ñayivi cuahan cán ndácaan in ñanáha ta ndítahví nijí ñá tixi uxu ivi cuja. Ta najándihi ndihi ña jíuhún ña

nuú nā cāja tátá ñayivi joo ni in na coó ñacuu caja tátá ñahá. ⁴⁴ Joo ñacayati ñá chí jata Jesús ta ñatiin ñá yúhu jáhma á. Chí ivi laá nasacuiin ñii ñá cán.

⁴⁵ Andá já ñacasáhá Jesús ndáca tuhún a tóco ndihi ñayivi já ñacachi a já xihin ná:

—Ndá ndó ñacani ndaa ndáha yehe — ñacachi a xihin ná.

Joo ni in na coó ñasahan tuhun nu á. Sáhá ñá cán queá ñacachi Pedro xihín java ga da xica tuun xihín mé á cán já xihín á:

—Maestro, a juú quiahva cándfhi ñayivi mé ndó ta chindahá nihni joho na mé ndó vaxi na ta cáa ga mé ndó ndáca tuhún ndo ndá ña ñacani ndaa ndáha ndohó —ñacachi da cán xihín á.

⁴⁶ Andá já ñacachi Jesús já:

—Íin in ña ñacani ndaa ndáha yehe jáchi ñacandaa ini i ña ñandivaha in na xihín ndée mí i —ñacachi Jesús.

⁴⁷ Joo ndaja coo mé ñá ñandivaha cán tá ñaxini ñá ña ñacandaa ini Jesús sahá ña ñacaja ñá já ñandiquiji ninu ñá xihín ña yíhvi ña ta já ñaxinu coo ña ñacaxítí ña nu Jesús. Ta nu ndíhi ñayivi ndúu cán ñacasáhá ña ndícani ñá nu á ndá cuéntá queá ñacani ndaa ndáha ña mé á chí ivi laá ñandivaha ñá. ⁴⁸ Andá já ñacachi Jesús já xihín ña:

—Jahyi a, ñandivahún jáchi ñacandúsún yehe. Cuanúhu. Ta a ndícani ga inún —ñacachi Jesús xihín ña.

⁴⁹ Ta nani cáhan Jesús xihín ñá cán já ñaxinu in da ñaquixi chí vehe Jairo, da sáhndá chuun veñuhu cán. Já ñacachi da cán já xihín dá:

—Sa ñaxihí va jahyi ndó. A jáquihvi ga ndó da xica jánaha ñayivi jan.

⁵⁰ Joo tá ñaxini joho Jesús ña ñacachi da cán já ñacachi a já xihín Jairo:

—A cáyhvi tohún. Candúsa cuití vún yehe chí ndivaha va jahyún —ñacachi Jesús xihín dá.

⁵¹ Tá ñaxinu coo Jesús vehe Jairo cán coo ñaxeen a quiahva ñamani ña ná quihvi ñayivi ini vehe cán xihín á. Na ñaquihvi xihín á nasacuu Pedro xihín Jacobo xihín Juan xihín tátá mé ñá loho cán xihín náná ña. ⁵² Jandá joho ndíváá ñayivi sácu ndivaha na ndúu na saha ñá loho cán. Andá já ñandicahan Jesús xihín ná já ñacachi a já:

—A cuáu ndó. Coó ñaxihí toho ñá loho yóho. Quíji cuití va ñá —ñacachi a xihín ná.

⁵³ Joo ñacasáhá ña cán sácu ndaa na Jesús jáchi xíní ña sa ñaxihí ñá loho cán ta sa cúu ñá ndí. ⁵⁴ Andá já ñatiin Jesús ndáha ñá ñaxihí cán já ñacahan cóhó a xihín ña já ñacachi a já:

—Ñá loho, cuándacoo.

⁵⁵ Chí ivi laá ñanditacu ñá loho cán já ñandicoo ñá. Ta nasahnda Jesús chuun ña ná quiahva na ña cuxu ñá. ⁵⁶ Chí a juú quiahva ñacatóntó tátá náná ñá loho cán sahá ña ñacaja Jesús. Joo nasahnda Jesús chuun nu ná ña ná a ndícani na nuú ni in ñayivi sahá ña nayaha.

Tá ñachindahá Jesús ndíhuxu ivi na xica tuun xihín á ña ná cuhun na caxi tuhun na tuhun Ndióxi nuú ñayivi

(Mt. 10:5-15; Mr. 6:7-13)

9 Najánditaca Jesús ndíhuxu ivi na xica tuun xihín á já ñasahan ndée nu ná ña ná cuu tavá ña tá nuú ínima quini ñúhu ini ñayivi ta ñasahan ndée mé á nu ná ña ná cuu ndaja vaha na tá nuú cuehe ndóho ñayivi. ² Nasahnda Jesús chuun nu ná ña ná caxi tuhun na xihín ñayivi ña sa ñacayati quiví cacomí Ndióxi cuéntá saha ná. Ta nasahnda chuun nu ná ña ná ndaja vaha na ña quíhvi. ³ Ta ñacachi a já xihín ná:

—A cánehe ndó ñaha cuhun ndó íchi. Ni garróte ni yátí ni pan ni jiuhún a cánehe ndó cuhun ndo. In túhún cotó cánehe ndó cuhun xihín ndo. ⁴ Tá ná xinu coo ndó in vehe, canduu ndó vehe

jan jandá quiahva ná ndindaa quiví quee ndó cuhun ndo. ⁵Ta ndá ñuu nuú co cúní na ndiquehe vaha na ndohó, cuáhán quee ndó ñuu jan ta catí ndó ña yácá saha ndo já ná nahá ña cuahan cuachi na cán jatá mé va na —nacachi Jesús xihín ná.

⁶Anda já naquee na cán cuahan na ta nasahan na naxica nuu na ndijáá ñuu válí. Xíca na cáxi tuhun na nuú ñayivi tuhun vaha cáhan saha Jesús, mé a cuu jácaçu nahá. Ta ndája vaha na na quíhvi.

Tá naxihí Juan, da nacaja ndúta ñayivi

(Mt. 14:1-12; Mr. 6:14-29)

⁷Ta ndaja coo Herodes, da cúu gobernador cán nacandaa ini da saha tóco ndihi ña cája Jesús. Ta chí co xíní da ndía cahán da jáchi java na cáhí na xihín dá ña cúu Jesús mé Juan, da najácandúta ñayivi ta viti nanditacu tucu da cáhí java na xihín dá. ⁸Ta java ri na cáhí na ña cúu Jesús profeta Elías, mé da naxica nuu sanahá ta viti naxinu tucu da nu ná. Ta java na cáhí na ña cúu á in táhan na profeta nasanduu sanahá joo túní queá nanditacu tucu a xíca nuu a, cáhí na.

⁹Anda já nacachi Herodes já xihín ná:

—Mí yehe cúu da nasahnda chuun ña ná chituhun ná jico da naní Juan cán. Ta co xíní ndá da cúu da naní Jesús yóho. Jáchi mé a ndaa xíní joho i ña cája cuahá ndivaha da ña náhnu —nacachi Herodes cán.

Ta chí cúní Herodes cuni da Jesús.

Sáhan Jesús ña cuxu uhun mil taa

(Mt. 14:13-21; Mr. 6:30-44; Jn. 6:1-14)

¹⁰Tá nandico coo na nachindahá Jesús caca nuu cahan tuhun Ndióxi xihín ñayivi cán nu íin mé á já nandicani na nu á saha tóco ndihi ña nacaja na nuú nasahan na. Anda já ñéhe Jesús na nasahan na in nu cáa xóo yati chí ñuu Betsaida cán. ¹¹Joo tá nacandaa ini

ñayivi ndá xoo cuahan Jesús já ndico na cuahan na. Ta nandiquehe vaha Jesús na ta nandicani a nu ná ña sa nacayati quiví cacomí Ndióxi cuéntá saha ná. Ta nandaja vaha mé á na quíhvi.

¹²Ta tá sa cáhini cuahan já nacayati ndíhuxu ivi na apóstol cán nu Jesús já nacachi na já xihín á:

—Cahan ndó xihín ñayivi ná quee na cuhun na ndiquehe ndée ná ta ná nducú na ña cuxu na ñuu válí xihín nuú yati chá yóho nu ndúu ñayivi jáchi coo ñaha mé va nu ndúu yóho —nacachi na cán xihín Jesús.

¹³Anda já nacachi Jesús já xihín ná:

—Mé ndó quiahva ndó ná cuxu na —nacachi a xihín ná.

Anda já nacachi na cán já xihín á:

—Uhun víxí pan xihín ivi laá tiyacá cuití va íin nuú nde. Ta ama ná cuhun ri ndehe cueen nde ñaha cuxu tóco ndihi ñayivi ndúu yóho —nacachi na cán.

¹⁴Jáchi ñayivi cán cúu ná tátuhun uhun mil taa. Anda já nacachi tucu Jesús já xihín na xíca tuun xihín á:

—Cacu coo ndó na tá táhnda ivi jico uxu, ivi jico uxu na.

¹⁵Chí nasacu coo ndíhuxu ivi na apóstol cán na. ¹⁶Anda já natiin Jesús ndíhuhun pan xihín ndíví tiyacá cán já nasandehé a chí indiví já nandiquiahva ndixahvi nu Ndióxi sahá ña cán. Tá nandihí já nasahnda java táhvi a ña já nasahan ña nuú na xíca tuun xihín á cán já nanditahnda ña cuxu ñayivi ndúu cán.

¹⁷Ta tóco ndihi na nañehé naxixi jandá quiahva nachutú tixi na. Tá nandihí já najáchutú na uxu ivi toyicá xihín ña nacandoo naxixi ndihi na cán.

Tá náhma Pedro ña cúu Jesús mé a nachindahá Ndióxi cacomí cuéntá sahá ñayivi

(Mt. 16:13-28; Mr. 8:27-9:1)

¹⁸In tañu tá nacana xóo Jesús xihín na xíca tuun xihín á ña caca tahví a nu

Ndióxi já nandaca tuhún mé á na já nacachi a já xihin ná:

—Ndá da cáchi ñayivi cúu yehe — nacachi a xihin ná.

¹⁹ Andá já nanducú ñehe na cán tuhun nu á já nacachi na já xihin á:

—Java ñayivi cáchi na ña cúu ndó Juan, da najácandúta ñayivi. Ta java na cáchi na ña cúu ndó profeta Elías. Ta cáchi java ga ví na cúu ndó in táhan profeta nasanduu sanahá, da nanditacu tucu xíca nuu viti —nacachi na xíca tuun xihin Jesús cán.

²⁰ Andá já nandaca tuhún Jesús na já nacachi a já xihin ná:

—Ta ndóho ri ndá da cáchi ndo cúu u —nacachi a xihin ná.

Andá já nacachi Pedro já xihin á:

—Mé ndó cúu Cristo, ña nachindahá Ndióxi cacomí cuéntá sahá ñayivi — nacachi da xihin á.

²¹ Joo nacachi Jesús xihin na xíca tuun xihin a ña coto a ndícani na ña yóho nuú ni in túhún ñayivi. ²² Andá já nacachi a já xihin na cán:

—Yehe cúu u da nachindahá Ndióxi nduu ñayivi ta ndítahan nuú i ndoho ndivaha ini i. Ta na sacuahá veñuhu xihin na sacuahá nuú jutu xihin na jánahá ley Moisés candají na yehe ta anda já cahní na yehe. Joo tá ná xinu uní quiví já nditacu tucu u —nacachi a xihin ná.

²³ Tá nandihí já nacachi tucu a já xihin ndihi na xíca tuun xihin á cán já:

—Ndá na cúní candico yehe ndítahan nu ná ndihi chága ini na sahá yehe a juú ga saha mé ná. Ta ndijáá ní quiví ndítahan coo tiyhva na ndoho ini na sahá yehe ta coo caja toho a ná quivi na sahá i. ²⁴ Jáchí ndá na cátoó coo chága ñuyiví yóho ndihi saha ná. Joo ndá na sáhan ndeé ini quivi sahá i ñehe táhvi ná catacu na anda ama cáa quiví. ²⁵ Vatí ná quee vaha in na ñuyiví yóho ta cómí na tóco ndihi ñaha ñuyiví joo ndá chuun queá tá nu ndihí ndihi saha ná indayá.

²⁶ Ndá na cácahan nuu sahá i xihin sahá tuhun vaha cáhan i quiahva já cacahan ri nuú yehe, da nachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán nahá ndaja cáhnu cúu yehe jáchi quixi i xihin ndeé Ndióxi ta xihin ndeé táto mé á viti.

²⁷ Mé a ndaa ná cáhan i xihin ndo ña ndúu java na ndíta yóho ta ni a quiví toho na janda quiahva ná xinu quiví cuni na cacomí Ndióxi cuéntá sahá ñayivi — nacachi Jesús xihin na cán.

Tá nandijama Jesús quiahva cáa

(Mt. 17:1-8; Mr. 9:2-8)

²⁸ Ta tá nayaha tátuhun uná quiví nacachi Jesús ña yóho xihin ná já nandaa jiní in yucu ña caca táhvi a nu Ndióxi. Ta ndáca táhan Pedro xihin Jacobo xihin Juan cuahan na xihin á. ²⁹ Ta nani xíca táhvi Jesús nu Ndióxi já nandijama quiahva cáa nuu á. Ta janda jáhma ndíxi a cán nandiyaa cachi ña ta chí a juú quiahva yehe ña. ³⁰ Andá já naxini na ivi taa ndúu da ndítuhún da xihin Jesús. In da cán cúu Moisés ta inga da cán cúu Elías. ³¹ A juú quiahva ndató ndíyehe ndaa nu ndúu na cáhan na xihin Jesús ta ndítuhún na sahá ña jándoho na ini a ñuu Jerusalén ta já quivi a. ³² Ta vatí cúní cuju Pedro xihin java ga na cáthán xihin dá cán nasandita na. Ta naxini na ndá quiahva cáhnu cúu Jesús xihin da ivi táhan ndúu xihin á cán. ³³ Ta tá nacasáhá cáxíca Moisés xihin Elías cán nu Jesús cuahan na já nacachi Pedro já xihin Jesús:

—Maestro, ndaja vaha cúu á ndúu nde yóho jáchi já cuu cavaha nde uní vehe tiyahvá válí. In a coo mé ndó ta inga coo Moisés ta inga coo Elías —nacachi da.

Joo chí co xini mé va Pedro ndía cáa cáhan da. ³⁴ Ta nani cáhan da ndíta na já nanuu in vico jata ná ta najájahví a na. Ta chí nacasáhá yíhvi na xíca tuun xihin Jesús cán tá naxini na nacava nuu vico

cán na. ³⁵ Andá já naxini johu na cáhan in a tañu viçó cán já nacachi a já:

—Da yóho cúú jahyi maní i. Cuni johu ndó nu cáhan da.

³⁶ Tá nandihí naxini johu na ña cáchi a cán já naxini na ña íin in túhún jini mé va Jesús. Ta mé na xica tuun xihin á cán nasahiin táji yúhu ná sahá ña naxini na ta coó nandicani na sahá nuú ni in túhún ñayivi.

Tá nandaja vaha Jesús in taa loho ndácaan ínima quini ini

(Mt. 17:14-21; Mr. 9:14-29)

³⁷ Ta inga quiví itaan tá nanuu Jesús xihin na xica tuun xihin á jini yucu cán já naqueta cuahá ndivaha ñayivi cuahan na ndique táhan na xihin Jesús. ³⁸ Andá já nandicahan cóho ndivaha in dataa tañu tóco ndihí ñayivi cán já nacachi da já xihin Jesús:

—Maestro, caja ndó ñamaní candehe loho ndó jahyí i jáchi in túhún jini já cúú dá nuú i. ³⁹ Ta ndácaan in ínima quini ini da ta tীন rí dá ta cája rí xihin dá ña ná ndahyi cóhó da. Ta cája rí ña ná quivi yihí da ta já cána cuyu chiquiñu yúhu dá. A juú quiahva cája xíxi rí quini cán xihin dá ta chí co cúni rí janí rí da. ⁴⁰ Sa naxica tahví i nuú na xica tuun xihin ndo ña ná tavá na mé rí quini cán joo coó nacuu caja na ña —nacachi da cán xihin Jesús.

⁴¹ Andá já nacachi Jesús já:

—Ndáhví nahá nacuu ndó jáchi sa cuahá ndivaha quiví íin i xihin ndo ta a náha candeé ini ndó yehe. Cúú ndó ñayivi quini ndivaha chí co ndéé ga ini i xihin ña cája ndó. Taxi ndó taa loho jan chóho —nacachi Jesús xihin ná.

⁴² Ta tá cáyati taa loho cán cuahan da nu Jesús já nacaja rí quini cán ña ná ndicava da nu ñúhu ta cán nacaja rí ña ná quivi yihí tucu da. Andá já najánani Jesús rí quini cán já ndivaha taa loho cán ta ndiquiahva mé á da nu tátá da.

⁴³ Ta tóco ndihí ñayivi nasanduu cán na-

catóntó na tá naxini na ña náhnu cája Ndióxi.

Ta nani catóntó na ndúu na sahá ña náhnu cája Jesús cán já nacasáhá cáhan mé á xihin na xica tuun xihin á. Já nacachi a já xihin ná:

⁴⁴ —Cuni johu vaha ndó ña yóho ta coto a ndíndójó ndó ña. Tiin na yehe, da nachindahá Ndióxi nduu ñayivi ta já ndiquiahva na yehe ndahá java dataa —nacachi Jesús xihin ná.

⁴⁵ Joo ni in táhan na xica tuun xihin á cán coó nacandaa ini na ndíá cúni cachi Jesús. Jáchi coó nanuna xini túni ná ña ná candaa ini na ña. Ta yíhvi na ndaca tuhún na mé á ña ná ndicani a ña nu ná.

Ndicani Jesús ndá na cúú na íin chága saha

(Mt. 18:1-5; Mr. 9:33-37)

⁴⁶ Tá nandihí já nacasáhá na xica tuun xihin Jesús cán ndítuhún xihin táhan na saha ndá da cúú da cáhnu chága tañu mé ná. ⁴⁷ Andá já naxini Jesús ña cáhvi ini na cán já natiin a in taa loho já nasacu ndichi a da jín á. ⁴⁸ Já nacachi a já xihin ná:

—Ndá na ná ndiquehe vaha taa loho yóho sahá ña quíhvi ini na yehe, ndiquehe ri na yehe viti. Ta ndá na ndiquehe yehe, ndiquehe ri na tátá i, mé a nachindahá yehe. Ndá na coó saha mé tañu tóco ndihí ndó, na cán cúú na íin chága saha nu Ndióxi —nacachi Jesús xihin na cán.

Tá ndúu java na ndiquehe saha yo já queá cuahan na xoo í

(Mr. 9:38-40)

⁴⁹ Andá já nacachi Juan já xihin Jesús: —Maestro, naxini nde in dataa ta cáhan da quiví mé ndó já táv da ínima quini ñúhu ini ñayivi. Joo co xica nuu da xihin yo sahá ña cán queá nasaji nuu nde nu dá caja da ña —nacachi da cán.

⁵⁰ Andá já nacachi Jesús já xihin dá:

—A cájí nuu ndó nu dá sahá ña cája da ña. Jáchí ndá da cō ndíndita cajú xíxi xohó, mé da cán cuahan da xoo mí — ñacachi Jesús.

Jánani Jesús Jacobo xihín Juan

⁵¹ Tá ñacayati quíví ndíndita Jesús cūhun a indiví cō ñayihví a quehe a íchí cuahan chí ñuu Jerusalén. ⁵² Ñachindahá Jesús java na xíca xihín á ña ná cūhun cuéé na in ñuu loho ndácaan estado Samaria cán já ná nducú na nuú canduu tóo na chí ñaquee na cuahan na. ⁵³ Joo cō ñaxeen toho na Samaria cán ndiquehe na Jesús jáchí ñaxini na ña cuahan chí ñuu Jerusalén. ⁵⁴ Tá ñaxini Jacobo xihín Juan cán ña yóho já ñacachi da já xihín Jesús:

—Á cō cúní ndó, xitoho í ña ná cahnda nde chuun ña ná cuyu ñúhu cáyi indiví já ná jánaa nde sahá ñayivi yóho tá quiahva ñacaja profeta Elías sanahá — ñacachi na xihín á.

⁵⁵ Anda já ñandicoto nihni Jesús nu ná já ñacasahá jánani a na já ñacachi a já xihín ná:

—Cō xíní ndó ña a váha toho cáhvi ini ndó já. ⁵⁶ Jáchí cō ña quixi toho yehe, da ñachindahá Ndióxi nduu ñayivi, ña ná jánaa í sahá ñayivi. Ña quixi í ñuyíví yóho jáchí cúní ña ná cacu ndaa ínimá ná — ñacachi Jesús xihín na cán.

Anda já ñaquee na cuahan na inga ñuu loho.

Na cúní candíco Jesús

(Mt. 8:19-22)

⁵⁷ Ta nani xíca na cuahan na já ñacachi in dataa já xihín Jesús:

—Cúní candíco í ndohó ndá ñacuu nuú cūhun ndo — ñacachi da.

⁵⁸ Anda já ñanducú ñehe Jesús tūhun nu dá já cáchí a já xihín dá:

—Ndicuii cúu rí ta vatí íin cáva ñúhu rí. Laa cúu rí ta vatí íin táca ñúhu rí. Joo yehe, da ñachindahá Ndióxi nduu ñayivi

chí ni nuú cuju mí í cō va — ñacachi a xihín dá.

⁵⁹ Tá ñandihí já ñacachi Jesús já xihín inga da:

—Naha quíí candíco yehe.

Joo ñanducú ñehe da cán tūhun nu Jesús já cáchí da já xihín á:

—Quiahva jihna ndó ñamaní nuú í ña ná cūhun í jánduxu tátá í já quixi í candíco í ndohó — ñacachi da xihín Jesús.

⁶⁰ Anda já ñacachi Jesús já xihín dá:

—Ná cūhun mé ñayivi, na a ñáha cacu ndaa ínimá jánduxu na ndíi jan. Joo yóho, cuahán caxi tūhun nuú ñayivi ña sa ñandindaa quíví cacomí Ndióxi cuéntá sahá ná — ñacachi Jesús xihín dá.

⁶¹ Anda já ñacatívi inga dataa nu Jesús já ñacachi da já xihín á:

—Jesús, candíco í ndohó cúní. Joo quiahva ndó ñamaní nuú í ná cūhun loho í ndindayí jihna ñúhú í na vehe e já quixi í candíco í ndohó — ñacachi da xihín Jesús.

⁶² Anda já ñacachi Jesús já xihín dá:

—Ndá da cásahá ndíco yehe ta já ndicó cōo tucu da cuahan da chí jata, cúu dá da cōo chuun toho cacomí Ndióxi cuéntá sahá. Jáchí da cán cúu dá tátūhun da tín yata ta cásahá da xútu da cuahan da joo tá ñandihí ndicoto nihni tucu da chí jata ta chí cōo sahá dá cacomí Ndióxi cuéntá sahá dá — ñacachi Jesús.

Chíndahá Jesús uní jico uxu taja cūhun da cahan da tūhun Ndióxi xihín ñayivi

10 Tá ñandihí já ñacaxi Jesús inga uní jico uxu chága dataa. Ta tá ivi tá ivi da ñachindahá a da cuahan da já ná cūhun cuéé da cahan da tūhun Ndióxi xihín ñayivi ndúu tóco ndihí ñuu nuú ñasacu ini Jesús cūhun a coto nihni a ñayivi. ² Anda já ñacachi a já xihín ná:

—Mé a ndaa ndúu cuahá ndivaha ñayivi, na cúní cuni johó tūhun Ndióxi joo cōo cuahá na cúní cūhun cahan

ñā xihín ná. Cúú á tátuhun vaha ndi-
vaha ñacana ní nuú utu joo ndímaní na
jáquee ña. Ñā cán queá xíní ñúhú ca-
ca tahví ndo nuú da xihín ñaha utu cán
ñā ná chindahá chága da ña jáquee nuú
utu da. Quiahva já ndítahan caça tahví
ndo nu Ndióxi ñā ná chindahá chága
mé á na caca nuu cahan tuhun Ndióxi
xihín ñayivi já ná ndiquehe vaha na ña.
³Mé ndó cúú ndó na chindahá i cuhun
caca nuu cahan tuhun Ndióxi. Mé a ndaa
iyo ndivaha cáa nuú cuhun ndo jáchi
cacuu ndó tátuhun ndicachi válí tañu
cuahá ndivahyí. ⁴Tá naquee ndó cuahan
ndo coto a cánehe ndó yátí cuhun ndo
ni jjuhún ni inga ndusa ndó a cánehe
ndó cuhun ndo. Ta a cácuíta ndó cahan
Ndióxi ndó xihín ñayivi ndique táhan
xihín ndó íchi. ⁵Ta tá ná xinu coo ndó in
vehe, jihna ñúhú cahan Ndióxi ndó xihín
na ndúu vehe cán já cachi ndó já xihín
ná: “Ná coo vaha ini ndó, na ndúu vehe
yóho”, cachi ndó xihín ná. ⁶Ta tá mé a
ndaa íin vaha ini ñayivi ndúu vehe cán
já a cándoó núu toho tuhun ñacachi ndó
xihín na cán. Joo tá co íin vaha ini na cán
já a quehe ndó cuéntá sahá ñā ñacachi
ndó ñā ná coo vaha ini na jan jáchi a juú
na coo vaha ini cúú toho na jan. ⁷Tá ná
xinu coo ndó in vehe nu ndíquehe vaha
na ndohó, canduu ndó mé vehe jan. Ta
a cáca nuu ndó tá vehe tá vehe nducú
ndo nuú coo ndó. Ta ndá ñaha íin nu ná
sáhan na nu ndo cuxu ndó á coho ndó,
tiin ndó a ndáha ná. Jáchi ndítahan nuú
in dataa ndiquehe da ñā catacu da sahá
chuun cája da. ⁸Ta tá ná xinu coo ndó in
ñuu nu ndíquehe vaha na ndohó, cuxu
ndó ndíá cúú mé a sáhan na nu ndo. ⁹Ta
ndaja vaha ndó ndá na quíhvi ndúu cán.
Ta cachi ndó já xihín ná: “Sā ñacayati
quíví cacomí Ndióxi cuéntá sahá ndo”,
cachi ndó xihín ná. ¹⁰Joo tá ná xinu coo
ndó in ñuu nuú co cúni na ndiquehe
vaha na ndohó, cuahán ndó cáyé ñuu
cán já cachi ndó já xihín ná: ¹¹“Janda ña

yácá ñatiin ndaa sahá nde ñuu ndó yóho
quíji nihni nde ta xihín ñā yóho náha
nde ñā cuahan cuachi ndó jata mé va
ndó. Jáchi sa ñacaxi tuhun va nde xihín
ndo ñā sa ñacayati quíví cacomí Ndióxi
cuéntá sahá ñayivi”, cachi ndó xihín ná
—ñacachi Jesús xihín na cán.

¹²Anda já ñacachi tucu a já xihín ná:

—Tá ná xinu coo quíví caja víí Ndióxi
sahá ñayivi já jándoho chága mé á ini
ñayivi ñuu jan a juú ga tá quiahva naján-
doho a ini na ñuu Sodoma sanahá —
ñacachi Jesús xihín ná.

Cáhan Jesús sahá ñuu nu ndúu ñayivi, na co cúni jándacoo cuachi

(Mt. 11:20-24)

¹³Anda já ñacachi tucu Jesús xihín ná
já:

—Ndáhví nahá ñacuu ndó, na ñuu
Corazín. Ta ndáhví nahá ñacuu ndó na
ñuu Betsaida. Cuahá ndivaha ñā náhnu
ñacaja i nu ndo joo coo ñaxeen ndó ndicó
coo ini ndó jándacoo ndó cuachi ndó.
Sanahá najándihi Ndióxi sahá ñuu Tiro
xihín sahá ñuu Sidón sahá cuachi na. Tá
ná sahan i caja i ñā náhnu nuú na cán tá
quiahva ñacaja i nu mé ndó, sa najánda-
coo va na cán cuachi na, nduu. Ta chí ívi
laá ndaca ndixi na jahmá ndíí ta jácuuyu
na yaa yíquí jíni na, nduu. Jáchi xihín
ñā yóho jánaña na ñā ñandicó coo ini na
sahá cuachi na. ¹⁴Joo tá ná xinu quíví
caja víí Ndióxi sahá ñayivi já ndoho chá-
ga ini mé ndó, na ñuu jan a juú ga
tá quiahva ñandoho ini ñayivi ñasan-
duu ñuu Tiro xihín ñuu Sidón sanahá.
¹⁵Ta viti cáhan i xihín ndó, na ndúu
ñuu Capernaum. Janda indiví cúni ndó
cuhun ndó joo sahá ñā sáá ini ndó cuhun
ndó janda indayá, caja Ndióxi —ñacachi
Jesús.

¹⁶Anda já ñacachi a xihín na xíca tuun
xihín á já:

—Ndá na xini johu nu cáhan ndo ta
cája na ñā cáchí ndo já queá cúú á tá-

tuhun cája na ña cáchí yehe xihín ná caja na. Ta ndá na cándají ndohó cúú á tá-tuhun cándají ri na yehe va. Ta ndá na cándají yehe, cándají ri na Ndióxi, mé a nāchindahá a yehe quixi i ñuyívi yóho —nācachi Jesús xihín na chindahá mé á cūhun caḥan tuhun Ndióxi xihín ñayivi cān.

Anda já naquee na cuḥan na.

Tá nādicó coo ndíhuní jico uxu na nāchindahá Jesús caca nuu caḥan tuhun Ndióxi

¹⁷ A juú quiahva cájii íní na uní jico uxu na nāchindahá Jesús caḥan tuhun Ndióxi cān tá nādicó coo na. Já nācachi na já xihín Jesús:

—Tá cáḥan nde quívi ndó sáhná nde chuun nu ínimā quini ta chí xíní johó rí ta cāja rí ña sáhná nde nu rí —nācachi na cān xihín Jesús.

¹⁸ Anda já nācachi Jesús já xihín ná:

—Mé a ndāa quēa cáḥan ndó jan. Jáchí naxini i xihín nuu mí i ndá quiahva naquee Satanás, rí cúú tiñáhá sacuaḥa indiví ta nādicava rí nu ñúhu tátuhun in tasa. ¹⁹ Chí nasāḥan i ndēe nu ndóhó ña ná cuu cahnda ndó chuun nuú tiñáhá sacuaḥa. Já cuu cuḥni nihni ndó jatá coo xihín jatā líhma ta a ndóho ndó ni in ñaha. Ta nasāḥan i ndēe nu ndo ña ná cuu quee vaḥa ndó nuú ndihi ña núu cúní tiñáhá sacuaḥa caja rí xihín ndo. ²⁰ Vatí cájii ini ndó sahá ña cándúsa rí quini nu sáhná ndó chuun nu rí joo ndítahan cajii chága ini ndó sahá ña sa naquee va quívi ndó ña cūhun ndó indiví —nācachi Jesús xihín ná.

Tá nācājii ndivāḥa ini Jesús

(Mt. 11:25-27; 13:16-17)

²¹ Ta chí mé hora já nācāja ínimā yii Ndióxi ña ná cajii ndivāḥa ini Jesús. Já nācasáhá cáchí a já:

—Cāja cáhnu i ndohó, tátá Ndióxi, ña cúú xitoho tóco ndihi ñaha ndúu in-

diví xihín ñuyívi. Jáchí najánaḥa ndó ña ndíchí ndivāḥa nuú ñayivi, na coo cuḥá sahá nuú java ga na. Ta nācāja ndó ña ná a cúu candāa ini na ndíchí xihín na tácu ini ñaha mé ndó. Já nācāja ndó jáchí já nasacu ini ndó caja ndó —nācachi Jesús.

²² Anda já nācachi a já xihín na ndúu cān:

—Nāndiquiahva tátá i tóco ndihi ñaha ndahá i ña ná cacomí i cuéntá sahá. Ta ni in túhún toho ñayivi co xíní vaḥa na yehe, da cúú in túhún jini já jahyi Ndióxi. Mé Ndióxi, tátá i cuití va xíní vaḥa yehe. Ta ni in túhún toho na co xíní vaḥa yo cúú tátá i. In túhún yehe, da cúú jahyi a xíní vaḥa i yo cúú mé á. Ta yehe cúú da caxi ndá ñayivi jánaḥa i nuu sahá Ndióxi, tátá i já ná candāa vaḥa ini na yo cúú mé á —nācachi Jesús.

²³ Anda já nasandehé a nuú na xíca tuun xihín á cān. Já nācasáhá cáchí a já xihín mé cuití na:

—Tahví nācuu ñayivi tá ná cuu candehé na tóco ndihi ña xíní mé ndó viti. ²⁴ Mé a ndāa ná caḥan i xihín ndo ña cuḥa táhan na profeta nasanduu sanahá ta cuḥa táhan na nasacomí cuéntá sahá ñayivi sanahá cúní na cuni na tóco ndihi ña xíní ndo cāja i. Joo coo naxini na ña. Ta cúní na cuni johó na ña xíní johó ndó cáḥan i xihín ndo. Joo coo naxini johó na ña.

Sácu Jesús quiahva sahá in da Samaria, da nācāja vaḥa

²⁵ Ta ndaja coo in da jánaḥa ley Moisés nādaḥa ndichi da caḥan da xihín Jesús jáchí cúní da coto ndojó ñahá da. Ta nācachi da já xihín á:

—Maestro, ndíā ndítahan caja i já ná cuu catacu u indiví anda ama cáa quívi —nācachi da xihín á.

²⁶ Anda já nāducú ñehe Jesús tuhun nu dá já nācachi a já xihín dá:

—Ndaja cáchí ley Moisés. Ndaja cáchí ley tá cáhvún ña —ñacachi Jesús xihín dá.

²⁷ Andá já nanducú ñehe da jánaha ley Moisés cán tuhun nu Jesús já ñacachi da já:

—“Quihvi inún Ndióxi, xitohún xihín tóco ndihi ínimun ta xihín ndinuhu inún. Ta quihvi inún a xihín tóco ndihi ndéun ta xihín tóco ndihi xíní túnun. Ta quihvi inún ñani táhún tá quiahva quihvi inún mún” —ñacachi da cán nanducú ñehe da tuhun nu Jesús.

²⁸ Andá já ñacachi Jesús já xihín dá:

—Mé a ndaa vaha va ñacahun. Cuáhán caja tóco ndihi ña yóho já ñehe táhvun catacún indivi andá ama cáa quivi —ñacachi Jesús xihin dá.

²⁹ Joo da jánaha ley Moisés cán cuni da candoo vaha da nuú ñayivi ndúu cán sahá ña cán queá cáchí da já xihín Jesús:

—Yo já cúu ñani táhan i.

³⁰ Andá já nandicani Jesús nu dá já cáchí a já xihín dá:

—In tañu naquee in dataa ñuu Jerusalén cuahan da íchi ña nanuu cuahan chí ñuu Jericó. Ta ndaja coo cán naqueta java ña cuihná nu dá. Ta ñatiin na da ta ñacaja cuihná ndihi na ñaha da janda jáhma dá viti ñaquehe na. Tá nandihí já ñacani quini ndivaha na da janda quiahva ñasahní too na da. Já ñaquee na cuahan ña. ³¹ Ta ña vaha queá ñayaha in jutu mé íchi cán. Joo tá ñaxini ñahá da já ñayaha saa da cuahan va da. ³² Ta sa mé íchi cán ñayaha ri in da ñaquixi chichi Leví ta tá ñaxini da da nandicuehe cándúhu íchi cán já ñayaha saa da cuahan da. ³³ Jári in da Samaria xíca cuahan mé íchi cán. Joo tá ñaxini da da nandicuehe cándúhu íchi cán chí ñatahvi ini da saha dá. ³⁴ Andá já ñacayati da nu cándúhu dá. Já ñacaja tátá da nuú nandicuehe da quihvi cán xihín síti xihín vino viti. Ta já ñacató da nuú nandicuehe cán xihín ticoto.

Tá nandihí ñajánda da da jata búrru jana dá já ñehe ñahá da cuahan da. Já nanducú da vehe coo too da quihvi cán ña ná candaa na da. ³⁵ Ta inga quivi itaan tá ñasacu ini da Samaria cán quehe da íchi cuhun da já ñatavá da ivi jiuhún caa ñasahan da nuú da xihín ñaha vehe cán. Já ñacachi da já xihín dá: “Cajún ñamaní candaa vahún da quihvi yóho. Ta tá ná chicaan chágun jiuhún xihín dá, a ndicani toho inún jáchi चाहvi mí vi ña nuun tá ná ndicó coo i”, cáchí da Samaria cán —ñacachi Jesús.

³⁶ Andá já nandaca tuhún Jesús da jánaha ley Moisés cán já ñacachi a já xihín dá:

—Ta viti cachún xihín i tixi ndihuni da ñayaha íchi nuú nasanduhú da nandicuehe ñacaja ña cuihná yóho, ndá da cúu da ñanaha ña mé a ndaa táhyí quihvi ini da ñani táhan da —ñacachi Jesús.

³⁷ Andá já ñacachi da jánaha ley Moisés já:

—Da ñatahvi ini sahá da nandicuehe jan, da jan cúu da cája i cuénta ñanaha da ña mé a ndaa quihvi ini da ñani táhan da —ñacachi da cán.

Andá já ñacachi Jesús já xihín dá:

—Ta viti cuáhán ri yóhó va, quihvi inún ñani táhún tá quiahva ñacaja da Samaria yóho —ñacachi a xihín dá.

Tá ñasahan Jesús vehe Marta xihín María

³⁸ Naquehe Jesús íchi xíca cuahan jan-da quiahva ñaxinu coo a in ñuu loho. Ta cán nandiquehe vaha in ña naní Marta mé á vehe ñá. ³⁹ Ta ñasahin in quihvi Marta yóho, ña naní María. Ta ñaxinu coo María nasacoo ña yati saha Jesús jáchi cuni ña cuni johó ña nu cáhan mé á. ⁴⁰ Joo ndaja coo a juú quiahva ndíhi ini mé Marta cája ndívi ña ñaha cuxu

na ndácaan ña. Anda já nacayati ñá nu Jesús já nacachi ñá já xihín á:

—Candehé ndo, xitoho i. Á co sándehé toho ndó ña in túhún mí i cája ndívi i ñaha ta ñá cúu quihví i jan co chindeé loho ñá yehe. Cahán loho ndó xihín ña ná chindeé ñá yehe —nacachi Marta cán xihín Jesús.

⁴¹ Anda já nanducú ñehe Jesús tuhun nu ña já cáchi a já xihín ña:

—Marta loho, a juú quiahva ndícani inún ta ndíhi inún jáchi fin ndivaha chuun nuun. ⁴² Joo fin in túhún ñaha ña fin chága saha ta cúu á ña ndítahan cajún. Ta María, ñá cúu quihvun yóho nacaxi ñá ña vaha chága. Ta ni in na a cúu caji nuu nu ñá cuni johó ñá tuhun cáhan i —nacachi Jesús xihín ña.

Jánaha Jesús na xica tuun xihín á ndaja caja na caça tahví na nu Ndióxi

(Mt. 6:9-15; 7:7-11)

11 In tañu xica tahví Jesús nu Ndióxi ndácaan. Ta tá nandíhi naxica tahví a já nacachi in táhan da xica tuun xihín á cán já xihín á:

—Jánaha ndó ndehe, xitoho nde caça tahví nde nu Ndióxi, tátá yo tá quiahva nacaja Juan, da nacaja ndúta ñayivi. Jáchi najánaha da nuú na nasaxica xihín dá ndá quiahva caja na caça tahví na nu Ndióxi —nacachi da cán xihín Jesús.

² Anda já nacachi Jesús já xihín na cán:

—Tá ná caça tahví ndo nu Ndióxi já cachi ndó já:

Tátá Ndióxi, ña fin indiví, cáhnu ná cacuu quívi ndo.

Ná tandaa quí quívi cacomí ndó cuéntá sahá nde.

Ta ná coo tá fin cúní mé ndó coo ñuyívi yóho tá quiahva fin indiví cája ndó.

³ Quiahva ndó nuú nde ña ndímaní nuú nde cuxu nde in in quívi.

⁴ Caja cáhnu ini ndó sahá cuachi nde tá quiahva cája cáhnu ini nde saha

tócó ndíhi ña núu cája ñayivi xihín nde.

Ta a quiahva ndó ñamaní ña ná coto ndojó tiñáhá sacuaña ndehe já ná a cája nde cuachi nu ndo, já cachi ndó caça tahví ndo —nacachi Jesús.

⁵ Anda já nasacu Jesús in quiahva nu ná já nacachi a já xihín ná:

—Cúu á tátuhun tá ná चुणुन ndó vehe in amigo ndo java ñuú táji ta já cachi ndó já xihín dá: “Amigo, á a quiahva tóun uní pan nuú i ⁶ jáchi nacasaá in da xíní táhan xihín i vehe e ta cúu dá da nasahan xíca ta coo ñaha nuú i quiahva i cuxu da”, cachi ndó xihín amigo ndo. ⁷ Ta viti ná caja í cuéntá nducú ñehe da ndácaan ini vehe cán tuhun nu ndo já cachi da já: “A jáquihvún yehe jáchi ndáji tuun yéhe. Ta ndúu jahyi válí i quíji na xihín i nuú xito ta a cuú caja i ndacoo i quiahva i ndá ñaha nuun”, cachi da cán xihín ndo ná caja í cuéntá. ⁸ Mé a ndaa ná cahán i xihín ndo ña vatí co cúní da jan ndacoo da quiahva da ñaha nu ndo sahá ña xíní táhan ndó xihín dá joo ndacoo tá ndacoo da quiahva da ñaha nu ndo sahá ña jáquihvi ndó da. Sahá ña cán quea ndacoo da quiahva da tocó ndíhi ña xíní ñúhú ndo nu ndo. ⁹ Ña cán quea cáhan i ña yóho xihín ndo: Ndá ñaha ndímaní nu ndo xíní ñúhú caça ndó ña nu Ndióxi ta já quiahva mé á ña nu ndo. Ndinducú ndo ña cúní ndo ta ñehe ndó ña caja Ndióxi. Cúu á tátuhun catí ndáha ndo yéhe ta já nuna yéhe nu ndo. ¹⁰ Jáchi na xíca, na cán cúu na ñehe va. Ta na ndúcú ñaha, na cán cúu na ndíñehe va. Ta na catí ndáha yéhe, na cán cúu na ndínuna yéhe nuu.

¹¹ Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéhe ri ndó quiahva ndó yuu nu á ña ná caxí a. Ta ama ná quiahva ndó coo caxí a tá xíca cuñu tiyacá caxí a. ¹² Ta ama cuéhe ri ndó quiahva ndó líhma caxí jahyi ndó tá xíca ndívi nu ndo. ¹³ Vatí cúu ndó ñayivi

cája cuachi joo xini vaha ndó quiahva ndó ña vaha nuú jahyi ndó. Ta ndaja ga ví cája Ndióxi, tátá ndo, mé a íin indivi xihin ndo. Quiahva mé á ínima yii á nu ndá na ná caca ña nu á —nacachi Jesús.

Chicaan na cuachi Jesús ña ñehe a ndée tiñáhá sacuaḥa

(Mt. 12:22-30; Mr. 3:20-27)

¹⁴ In tañu táva Jesús ínima quini ini in dataa, da nanduu nihi, nacaja rí quini. Ta tá sa nacana mé rí quini ini da cán nacaja Jesús anda já nandicaḥan tucu da. Ta chí nacatontó cuahá ñayivi ndúu cán tá naxini na ña yóho. ¹⁵ Joo java na nacasáhá cáchí na já saḥa Jesús:

—Taa yóho cúu táva da rí quini ñúhu ini ñayivi jáchi mé Beelzebú, rí cúu tiñáhá sacuaḥa nu rí quini cán, sáhan rí ndée rí nu dá cája da ña —nacachi na.

¹⁶ Ta java ga na cúni na coto ndojó na Jesús sahá ña cán queá naxica na nu á ña ná caja mé á ñaha xitúhún quixi indivi já ná cumi na. ¹⁷ Joo xini vaha va Jesús ña cáhvi ini na cán sahá ña cán queá nacachi a já xihin ná:

—Tá sáhná java táhan ñayivi ndúu in ñuu ta ndúu na cuahá táhná já casáhá cáni táhan ndaja táhan mé va na já cama chá ndihi sahá ñuu nu ndúu na cán. Ta quiahva já yáha xihin na ndúu in vehe tá casáhá sáhná java táhan na ta cáni táhan na já cama chá ndihi sahá vehe na. ¹⁸ Ta quiahva já yáha xihin Satanás, rí cúu tiñáhá sacuaḥa va. Tá ná cani táhan ndaja táhan mé rí já queá ndihi saha ndée ña cómi rí. Cáhan i ña yóho xihin ndo jáchi cáchí ndo ña táva i rí quini ini ñayivi xihin ndée Beelzebú, rí cúu tiñáhá sacuaḥa. ¹⁹ Joo tá mé a ndaa cúu ndusa ña cáchí ndó sahá i jan, ndáchí quehe na cúu cuéntá mé ndó jan ndée táva na rí quini ini ñayivi. Ama ná cachi ndó ña táva ndó rí quini xihin ndée tiñáhá

sacuaḥa. Ña yóho náha ña co cáhvi ndaa ini ndó. ²⁰ Joo yehe xihin in túhún ndée Ndióxi táva i ínima quini ini ñayivi. Ta xihin ña yóho náha cáxi a ña sa naxinu coo quiví cacomí Ndióxi cuéntá saha ndo —cáchi Jesús.

²¹ Ta sácú Jesús quiahva nu ná ta xihin ña yóho jánaḥa ña quee vaha mé á xihin tiñáhá sacuaḥa. Já cáchí a já:

—Íin in dataa ta tóyíí cáa da ta ñehe da ndá chún chindeé da mé dá. Ta nani ndáa da vehe da mé a ndaa coo toho ñaha ndoho ñaha da jáchi ndáa vaha da ña. ²² Joo tá ná quixi inga taa, da ndacú chága a juú ga mé da cán ta quee vaha da xihin dá já candaa ndihi da ndá chún ña nacandéé ini da mé dá. Ta já caja tá cúni mé da ndacú chága cán xihin ñaha da inga cán.

²³ Ndá na coo cuahan xoo i, cúu ná na coo cúni yehe. Jáchi ndá na coo chindeé yehe xihin ña cája i, cúu ná na sáji nuu nuú i.

Jánaḥa Jesús ña cuahá tañu ndicó coo tucu rí quini ini ñayivi vatí sa naquee rí

(Mt. 12:43-45)

²⁴ Tá quéta in rí quini ini in dataa já queé rí cuahan rí xica nuu rí ndijáá yucú íchí ndínducú rí nuú candoo rí. Ta tá coo ndínehe rí ña já casáhá cáhvi ini rí já: “Cóho ndicó coo tucú ini da nuú nasandacaan í cán jáchi cúu á tátuhun vehé”, cáhán rí. ²⁵ Ta tá xinu coo rí ini da cán já sándehé rí ña íin víi va ini da cán tá quiahva víi ini vehe tá natihvi á ta nandaca ndójó vaha tóco ndihi ñaha ini a. ²⁶ Anda já quee tucu mé rí quini cán cuahan rí quehe rí usa ga rí quini chága a juú ga mé rí já xinu ndihi rí ndihvi rí ini da cán. Ta mé da cán ndiquini chága da a juú tá nasandacaan in talaá rí ini da —nacachi Jesús.

Ndá nā cúú nā tǎhví chága nācuu

²⁷ Ta nani cáhan Jesús tuhun yóho nuú ñayivi já nacayuhú cóhó in ñánáha tañu ñayivi cuaha cán já nacachi ñá já:

—Tǎhví nācuu ñá najácacu yohó, mé ñá najácúahnu yohó —nacachi ñá xihin Jesús.

²⁸ Anda já nacachi Jesús já:

—Tǎhví chága nācuu ñayivi tá xíni johu na tuhun Ndióxi ta cǎja na ñá cáchí a —nacachi Jesús.

Xíca ñayivi quini ñá ná cǎja Jesús ñá xitúhún cuni na

²⁹ Tá ndítaca cuahá ñayivi nuú in Jesús já nacasáhá mé á cáhan xihin ná já nacachi a já:

—Quini ndivaha va ñayivi ndúu tiempo viti. Xíca nā ñá ná cǎja í ñaha xitúhún nuú ná. Joo coó toho ñá cán coo. Ñá cuni ndusa na queá ndoho í tá quiahva nandoho Jonás, da nasacuu profeta sanahá. ³⁰ Jáchi mé ñayivi nasanduu sanahá ñuu Nínive cán nacandaá ini na ñá nachindahá Ndióxi Jonás nuú ná. Ta quiahva já candaá ri ini nā ndúu viti ñá nachindahá ri Ndióxi yehe va, da nanduu ñayivi. ³¹ Tá ná xinu quiví cǎja víf Ndióxi sahá cuachi ñayivi ndúu tiempo viti anda já ndicuíta in ñá nasacomí cuéntá sahá ñayivi ndúu chí sur sanahá ta chicao ñá cuachi jatá ñayivi ndúu tiempo viti. Jáchi mé ñá cán vatí nasahin xíca ndivaha ñá nuú rey Salomón sanahá nasahan ñá cuni johu ñá tuhun ndíchí cáhan da. Ta yehe in chága sahá í a juú ga Salomón joo co cándúsa ndó yehe. ³² Ta jári ñayivi nasanduu Nínive sanahá cán ndicuíta na chicao na cuachi jatá ndo tá ná xinu quiví cǎja víf Ndióxi sahá cuachi ñayivi ndúu viti. Jáchi mé nā nasanduu ñuu Nínive cán najándacoo na cuachi cǎja na tá nacahan Jonás xihin ná ñá nacachi Ndióxi coo. Ta

yehe in chága sahá í a juú ga Jonás joo co cándúsa ndó yehe.

Nduchú núu yo cúú á tátuhun in lámpara

(Mt. 5:15; 6:22-23)

³³ Ni in túhún toho ñayivi co chicao ñúhu ná in lámpara ta já quehe na ñá sácú nā in nuú jehé. Ni co chicao na ñá tixi sato. Ñá cǎja na queá chínúu jíco nā ñá já ná yehe nuú nā quíhvi ini vehe cán. ³⁴ Nduchú núu yo cúú á tátuhun in lámpara jándiyehé a nu yo já xíní yo nu xíca í. Ta tá tíví vaha nduchú núu yo já cuu candehé vaha í nu xíca í. Joo tá co tíví nduchú núu yo já queá xíca í nu naá ndivaha. ³⁵ Cuéntá coo ndó a juú cahan ndo ñá cúú ndó na xíca nu yehe ta cǎa ví ndó cǎja ndó cuachi tátuhun nā xíca nu naá. ³⁶ Tá ná quiahva ndó ñamaní jándiyehé Ndióxi inima ndo já a cǎja ga ndó cuachi jáchi a cánehe ga ndó inima quini. Tá cǎja ndó ñá cúní Ndióxi já cúú á tátuhun in lámpara jándiyehé inima ndo —nacachi Jesús.

Chicao Jesús cuachi jatá nā fariseo xihín jatá nā jánahe ley Moisés

(Mt. 23:1-36; Mr.

12:38-40; Lc. 20:45-47)

³⁷ Tá nandihí nacahan Jesús já nacana in da fariseo Jesús ñá ná cuhun a cuxu a vehe da. Tá nandihí já nasahan Jesús vehe da já naquihvi a nasacoo a nu mesa xihin java nā cán. ³⁸ Joo ndaja coo da fariseo cán chí nacatontó da jáchi naxini da ñá coo nandahá Jesús cacoo a cuxu a tá quiahva in costumbre mé nā fariseo cán. ³⁹ Anda já nacachi Jesús já xihín da fariseo cán:

—Ndóhó, nā fariseo, ndíhi ini ndó cǎja ndó costumbre ñá ndícata ndó jatá vaso xihín jatá cohó viti joo co ndíhi ini ndó ndícata ndó ini a. Quiahva já cǎja mé va ndó jáchi ndíhi ini ndó ndahá ndo tátuhun costumbre ndo joo co ndíhi

ini ndó ndaja vií ndo ínima ndo nuú năchutú ndaa xihín ñaha quini cáhvi ini ndó. ⁴⁰Ndaja tóntó jiní ndo. Á co xíní toho ndó ña tá năcavaha Ndióxi ñayivi já năcavaha mé á yiquí cuñu na ta năcavaha mé á ínima ná. ⁴¹Caja ndó ñamaní xihín na ndahví xihín ndinuhu ini ndó já ná coo vií ndó nu Ndióxi.

⁴²Ndahví năcuu ndó, na fariseo. Mé ndó tá cáhí ndo sáhan ndó ñaha nu Ndióxi já cávaha ndó uxu táhnda ñaha ndó cán. Ta in a sáhan ndó nu Ndióxi ta quéhe ndihi ndó ña java cán. Quiahva já cája ndó xihín minu estila xihín yucu lotá ta quiahva já cája ndó xihín tá nuú ñaha cána nu ñúhu ndo. Joo co cája ndó ña ndaa xihín ñayivi. Ta ni co quihvi ini ndó Ndióxi. Joo ña cúní Ndióxi caja ndó queá ná caja ndaa ndó ta ná quihvi ini ndó a. Ta a ndíndójó ndó quiahva ndó ñaha nu Ndióxi.

⁴³Ndahví năcuu ndó, na fariseo. Jáchi tá sáhan ndó veñuhu cátóo ndo cacoo ndó nu sácoo na náhnu. Ta cúní ndó ña ná cahan Ndióxi toní ñúhú ndivaha ñayivi xihín ndo tá ndique táhan na xihín ndo íchi.

⁴⁴Ndahví năcuu ndó, na jánaha ley Moisés. Ta ndahví năcuu ndó, na fariseo. Jáchi co cúu ndó tá quiahva ndaa ndó. Mé ndó cúu ndó tátuhun yávi nu táan na ndii jáchi núu cája ndó. Vatí xójo cava ñayivi yáha na nuú nanduxu ndii cán joo co xíní na ña cúu á in yávi nu ñúhu ndii jáchi coo yuu ñáñí a —năcachi Jesús.

⁴⁵Anda já nanducú ñehe in da jánaha ley Moisés cán tuhun nu Jesús já năcachi da já xihín á:

—Maestro, xihín tuhun cáhan jan jándihihvi ri a ndehe va.

⁴⁶Anda já năcachi Jesús já xihín dá:

—Ndahví năcuu ri ndóhó va, na jánaha ley Moisés. Jáchi cája ndó ña ná coo ihvi ndivaha ley já ná a cúu caja ñayivi ña. Joo mé ndó cája ndúsa ndó

xihín ná ña ná caja na ña vatí ni mé ndó a cúu caja ndó ña.

⁴⁷Ndahví năcuu ndó jáchi cúu á tátuhun cávaha ndó ñáñí nu jánduxu ndó na profeta, na năsahní tásáhnú jícó ndo sanahá. ⁴⁸Ta xihín ña yóho náha ndó ña cájii ini ndó xihín ña năcaja tásáhnú jícó ndo sanahá tá năsahní na na profeta. Ta viti cúu á tátuhun chíndeé táhan ndó xihín na cán jáchi mé ná năsahní na na profeta ta mé ndó năcavaha ndó nuú nanduxu na.

⁴⁹Xíní vaha Ndióxi ñayivi ta ndaa năcahan mé á tá năcachi a já: “Chindahá i java profeta xihín java apóstol nu ndo. Joo mé ndó cahní ndo java na ta java na ndicuita ñee ndó na”, năcachi Ndióxi sanahá. ⁵⁰Joo viti caca Ndióxi cuéntá nuú ñayivi ndúu tiempo viti saha tóco ndihi na profeta, na naxihí ndijáá tiempo janda nani năcava sáhá saha ñuyiví. ⁵¹Caca Ndióxi cuéntá nuú ñayivi ndúu tiempo viti sahá na profeta ndii naxihí sanahá. Caca mé á cuéntá sahá Abel, da naxihí năcaja Caín cán. Ta caca mé á cuéntá sahá ndijáá na profeta naxihí tiempo năquixi cán janda quiahva naxinu coo a nuú caca cuéntá sahá ndii Zacarías. Mé da yóho năsahní na da ini veñuhu sanahá tañu nu náa xihín nuú yii ndivaha. Ña cán queá cahan i xihín ndó ña caca Ndióxi cuéntá saha tóco ndihi ndii jan nuú ñayivi ndúu tiempo viti.

⁵²Ndahví năcuu ndó, na jánaha ley Moisés. Jáchi cája ndó ña ná a cúu candaa ini ñayivi ña cáhí tuhun Ndióxi. Ta xihín ña yóho cúu ndó na sájí nuu cuití va jáchi ni co sáhan ndó ñamaní nu ná ña ná candúsa na ña ndaa. Ta mé ndó vatí xíní ndó cúu á ña ndaa joo co cája ndó ña cáhí a —năcachi Jesús xihín na jánaha ley Moisés cán.

⁵³Tá năcachi Jesús ña yóho já năxójo ndivaha ini na jánaha ley Moisés cán xihín na fariseo cán xihín á. Ta já năcasahá na ndaca tuhún cuaha chaga na

mé á sahá ña cúni na jáquihvi cuití ñaha na. ⁵⁴Ta nasacu cuaha ná tuhun ihvi nu á jáchi ndúcú na ndá quiahva chicao na cuachi jatá xihín in tuhun ña ná yaha yúhu á cahan.

Jánaha Jesús sahá na co cúu ná tá quiahva ndáa na

12 Ta nani cahan Jesús cán ñacasáhá táca cuahá ndivaha ñayivi. Cuaha mil na ñacasáhá ndái cuu na cán. Janda quiahva cándíhi táhan ndaja táhan mé ná xihín á cuahan ná. Nu cuítí ñacahan Jesús xihín na xíca tuun xihín á já cáchi á já:

—Cuéntá coo ndó xihín na fariseo jáchi cúu ná tátuhun yusa ñaxaa quee xihín harina ña cávaha na pan. Co cúu ná tá quiahva ndáa na. ²Ta ni in túhún toho ñaha a cúu coo jehé nahá jáchi cana tá cana tuhun sahá. ³Tóco ndihi tuhun ñacahan jehé ndó ñuu já vaxi quivi cuni joho ñayivi ña ndivi táhyí. Tóco ndihi ña ñacahan jehé ndo tá ndájí yéhe já vaxi quivi candaa ini tóco ndihi ñayivi ñuu sahá —ñacachi Jesús xihín na xíca tuun xihín á.

Yo já ndítahan cayihví yo

(Mt. 10:26-31)

⁴Anda já ñacasáhá cahan Jesús xihín ndihi na cán já cáchi á já:

—Candehé ndo, na cúu amigo i. Cúni cahan i xihín ndo ña a cáyihví toho ndó ñayivi, na cuu cahni yiquí cuñu ndó. Jáchi ña jan cúu ndihi va ña cája na ta a cúu caja na ni in ñaha xihín ínimá ndó. ⁵Ta viti ná cahan i xihín ndó yo já ndítahan ndusa nu ndó cayihví ndo: Ndítahan cayihví ndó Ndióxi jáchi mé a cán quea cuu caja ña ná quivi ndó ta tá ñandihí cuu chicao ínimá ndo ini indayá. Mé a cán quea ndítahan ndusa cayihví ndo.

⁶Sa xini vaha ndó ña uhun laa válí yahvi rí ivi jjuhún. Vatí núu ndivaha sahan ñayivi rí joo co ndíndójo toho

Ndióxi saha ri jáchi ndáa mé á ri. ⁷Quiahva já íin ri saha mé ndó nu Ndióxi. Jáchi janda íj jini ndó jan ndáhvi tá in tá in a nu Ndióxi. A cáyihví toho ndó jáchi ndiyahvi chága ndóho nu Ndióxi a juú ga cuahá laa válí.

Tá cahan cáxi ñayivi ña cúu ná cuéntá Jesús

(Mt. 10:32-33; 12:32; 10:19-20)

⁸Mé a ndaa ná cahan i xihín ndó ña ndá na cáxi tuhun nuú ñayivi ña cuahan na cuéntá mí i já quea cachi mí i, da ñachindahá Ndióxi nduu ñayivi saha ná ña mé a ndaa cúu ndusa na cán cuéntá mí i. Já cachi i xihín táto Ndióxi. ⁹Joo ndá na ná cachi xihín ñayivi ña co xini toho na yehe já quea ni yehe a ndícuni toho i na ña cúu ná cuéntá mí i nu táto Ndióxi.

¹⁰Ta ndá na ná cahan núu sahá yehe, da ñachindahá Ndióxi nduu ñayivi, caja cáhnu ini i saha ná. Joo ndá na ná cahan núu saha ínimá yí Ndióxi, na cán cúu na a cája cáhnu ini toho Ndióxi saha.

¹¹Tá ná tiin na ndóho ña cañehe na ndóho cuhun ndó ñahma ndó nuú na saçuaha veñuhu á nuú na jutixia sahá i, a ndícani toho ini ndó ña ndá tuhun quea cahan ndó nuú na cán. ¹²Jáchi tá ná xinu coo hora cahan ndó nuú na cán, já-ñaha ínimá yí Ndióxi nu ndo ndá tuhun nducú ñehe ndó nuú na cán —ñacachi Jesús xihín ná.

In da cuicá, da ñacaja quíhvi

¹³In táhan da ndácaan tañu ñayivi cuaha cán ñacahan da xihín Jesús já ñacachi da já xihín á:

—Maestro, cahan loho ndó xihín ñani i ña ná cahnda java da ñaha ña ñajándacoo tátá nde nuú nde tá ñaxihí na —ñacachi da xihín Jesús.

¹⁴Anda já ñanducú ñehe Jesús tuhun nu dá já ñacachi a já xihín dá:

—A juú juéxe cúu yehe já coo i cahnda java i ñaha ndó, vaha.

¹⁵ Andá já nacachi tucu a já xihín na ndúu cán:

—Cuni joho vaha ndó. Cuénta coo ndó ña ná a ndiávā nahá ini ndó canduu cuahá ñaha cuicá nu ndo. Jáchi a juú saha ña ndúu cuahá ñaha cuicá nu ndó chí cuu catacu nahá chága ndó, vaha — nacachi Jesús.

¹⁶ Andá já nasacu a in quiahva nu ná já nacachi a já xihín ná:

—Nasahjin in da cuicá ta a juú quiahva nasahnu vaha ñaha nu ñúhu dá.

¹⁷ Andá já nacasáhá mé da cuicá cán ndícani ini da já nacahán da já: “Ndáchí taán toho í cuahá nahá ñaha nacana nu yo yóho jáchi coó ga nuú cañuhu a”, nacahán da.

¹⁸ Andá já nacahán tucu da já: “Ña caja í queá ndicani ndihi í yáca nñi ñaha í já cavaha í ña náhnu chága. Ta cán taán yo ndihi ña nacana nu yo ta cán taán yo tóco ndihi java ga ña cómi yo.

¹⁹ Andá já cachi i já xihín mí i: Sa cuahá ndivaha va ñaha nasacu vahún viti. Ta queta ña cusún tixi cuahá ndivaha cuia. Ta viti jandá ndiquehe ndée cuití vún. Cuxu cuití vún. Coho cuití vún. Ta jandá cajji cuití ini vún, já va cachi i xihín mí i”, nacahán da.

²⁰ Joo nacahan Ndióxi já nacachi a já xihín dá: “Taa quíhvi, sa mé ñuu viti quiivi vún. Ta tóco ndihi ña nasacu vahún jan a juú ña cusún cúu á. Ndá na cúu mé va na cuxu ña jan”, nacachi Ndióxi xihín dá.

²¹ Quíhvi ndivaha cája ñayivi tá ndája tútú na ñaha ñuyívi yóho joo co ñúhu ini na saha Ndióxi ña ná caja na ña cúní mé á. Sahá ña cán queá cúu ná na ndahví ndivaha nu mé á —nacachi Jesús xihín ná.

Ndáá Ndióxi na cúu ndusa jahyi mé á

(Mt. 6:25-34)

²² Tá nandihí já nacahan Jesús xihín na xica tuun xihín á cán já nacachi a já xihín ná:

—A ndícani toho ini ndó sahá ña cuxu ndó catacu ndó ta ni saha jáhma candixi ndó.

²³ Jáchi cáhnu chága mé ndó a juú ga ña xixi ndó xihín ña ndíxi ndó.

²⁴ Candehé ndó rí naní ticacá jan. Co xútu rí ta ni co jáquee rí. Ta ni coó yáca nu táan rí ñaha rí. Joo sáhan va Ndióxi ñaha cuxu rí ña ná catacu rí vatí laa va cúu rí. Ta mé ndó ndiyahvi chága ndó a juú ga laa jan.

²⁵ A ndícani toho ini ndó jáchi coó toho a ñehe ndó ndícani ini ndó. Ni in túhún toho ndó a cúu ndaja jícó ndo mé ndó java metro chága sahá ña ndícani ini ndó.

²⁶ Tá ta ni loho ña yóho a cúu caja ndó, ndía ndóho ndó ndícani nahá ini ndó caja ndó java ga ñaha, dá já.

²⁷ Candehé ndo ndá quiahva ndató sáhnu ita. Co cája chúun a ta ni co cávaha jáhma á. Joo mé a ndaa ná cahan i xihín ndo ña ñúchí chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahjin cuahá ñaha cuicá.

²⁸ Candehé ndó ndaja ndáa vaha Ndióxi yucu ita vatí íin tóo a viti ta itaan cáyi a jándihí sahá. Ta ndiyahvi chága mé ndó a juú ga yucu ita. Joo co cándúsa ndó ña candaa mé á ndohó. Ña cán queá xíní ñúhú candee ini ndó Ndióxi ña quiahva tá quiahva mé á jáhma candixi ndó.

²⁹ Ta a ndícani ini ndó ndaja caja ndó ñehe ndó ña cuxu ndó xihín ña coho ndó.

³⁰ Jáchi ñayivi, na co xíní íchí cuéntá Ndióxi, na cán cúu na ndícani cuahá ini saha tóco ndihi ña yóho. Joo cúu ndó cuéntá Ndióxi, mé a cúu tátá ndo ta xíní vaha mé a ña ndímaní nu ndó catacu ndó.

³¹ Joo ndítahan nu ndó ndiquiahva ndó mé ndó ndáha Ndióxi ña ná cacomí a cuéntá saha ndo já quiahva mé á nu ndo ña ndímaní nu ndo catacu ndó.

**Indiví cúú nū ndítahan ndaja
tútú ñayivi ña vaha**

(Mt. 6:19-21)

³² A cáyihví toho ndó jáchí mé ndó cúú ndó tátuhun ndicachi válí janá i. Mé a ndaa chá va cúú ndó joo cájii ini Ndióxi ña cómi a cuéntá saha ndo. ³³ Jicó ndó ña cómi ndo ta jasá ndó ñaha nuú na ndímaní ñaha nuú. Jáchí quiahva já ndaja títú ndó ñaha vaha indiví nuú cūhun ndo. Jáchí mé cán a ndíhi sahá ña vaha cómi ndo. Ta ni na cuihná a cuú quihvi na caja cuihná ñaha ndó cán. Ta ni tiquijí a cuú jándihi rí sahá ñaha ndó cán. ³⁴ Jáchí nuú nandaja títú ndo ña ndáyahvi nū ndo, cán coo ri ínima ndo.

**Naha Jesús ña xíní ñúhú canduu
tiahva ñayivi cūhun na xihín mé á**

³⁵ Xíní ñúhú canduu tiahva ndó candati ndó ndá hora ndicó coo tucu u quixi i ndiquehe e ndohó. ³⁶ Xíní ñúhú cacuu ndó tátuhun mozo tá ndáti tiahva da ndicó coo xitoho da, da cuahan víco tándaha. Ndáti tiahva da cuná da yéhe nū dá tá ná xinu coo da caní ndáha dá yéhe. ³⁷ Tahví nacuu mozo tá co quíji da ndúu da tá ná xinu coo xitoho da. Mé a ndaa ná cahan i xihín ndo ña jandá mé da cúú xitoho da cán ndiquehe ñahá da ta já cacoo da da nū mesa da ta já chicaan da cohó cuxu mozo da. ³⁸ Coo caja toho a ña ná xinu coo xitoho da java ñuú táji á tá sa yati tiví, tahví nacuu mozo cán tá ndíta da ndúu da tá naxinu xitoho da nū dá. ³⁹ Candehé ndo jáchí xíní ñúhú candaa ini ndó ña yóho. Tá xíní in dataa ndá hora cúní na cuihná quihvi na vehe da já queá a cúju da jáchí ndáa vaha da vehe da já ná a quihvi na caja cuihná ña ñaha vehe da. ⁴⁰ Quiahva já xínú ñúhú canduu tiahva ri ndóhó va jáchí quixi tucu yehé, da nachindahá Ndióxi ndúu ñayivi mé quiví co cáhán ndo quixi i —nacachi Jesús xihín ná.

**In mozo vaha xihín in mozo a vaha
(Mt. 24:45-51)**

⁴¹ Anda já nandaa tuhún Pedro Jesús já nacachi da já xihín á:

—Á nuú ndehe cuití nasacu ndó quiahva yóho á nasacu ndó ña nuú ndaja táhan ñayivi ndúu yóho.

⁴² Anda já nacachi Jesús já xihín dá:

—Ña cahan i yóho cahan i ña xihín da tácu ini, da cája vaha ndusa. Cúú á tátuhun in mozo tá jándacoo xitoho da chuun ndáha dá ña ná quiahva da cuxu na java ga cúú mozo xihín dá cán. Anda já naquee mé xitoho da cuahan da. ⁴³ Tahví nacuu mé mozo cán tá xinu coo xitoho da ta ndínehe dá da cája da chuun ña nacandoo nū dá caja da. ⁴⁴ Mé a ndaa ná cahan i xihín ndo ña quiahva xitoho da cán chuun nū dá ña ná cacomí da cuéntá saha tóco ndihí ñaha cómi xitoho da. ⁴⁵ Joo da cúú mozo yóho tá ná casahá da cahan da ña cayancá ndivaha xitoho da ndicó coo da ta sahá ña cán queá casahá da cája xixi da xihín java ga na cúú mozo xihín dá cán. Ta já caa ga da casahá xixi da ta xihí da ta já xini da. ⁴⁶ Ta ndaja coo xinu coo xitoho mozo cán mé quiví co cáhán da. Anda jáví jándoho quini xitoho da cán ini da jáchí coo nacaja da ña ndítahan caja da. Ta ndoho da yóho tá quiahva ndóho tóco ndihí na sáá ini, mé na co cája ña sáhná xitoho na nū ná caja na.

⁴⁷ Tá ná candaa ini mozo ña cúní xitoho da caja da joo co íin tiahva da caja da ña ta ni co cúní da caja da ña sáhná xitoho da nū dá, da cán cúú da ndoho ndivaha ini. ⁴⁸ Joo tá íin in mozo ta co cándaa vaha ini da ndá queá cúní xitoho da caja da ta ndaja coo cája da in ñaha ña co táhán ini xitoho da xihín já queá chá cuití va ndoho ini da. Tá ná caja Ndióxi cuahá ñamaní xihín in ñayivi já queá ndítahan caja chúun cuaha ná nū mé á. Ta tá sa cándéé ini ñayivi inga

na já queá ndinuhu ñamaní náhnu chága caca na cán ña ná caja na xihín ná.

**Cája Jesús ña sáhdá
java táhan ñayivi**

(Mt. 10:34-36)

⁴⁹Yehe ñaquixi i ñuyívi yóho cahnda java táhan i ñayivi já ná nahá na cúní cuhun xoo mí i xihín na co cúní cuhun xoo i. Ta ña yóho cúu á tátuhun ñaquixi i chícaan ñúhu i ñuyívi yóho. Ta cúní ña ná ndihi quí chuun ñaquixi caja i yóho. ⁵⁰Vaxi quívi ndoho ndivaha ini i ta a juú quiahva ndíhi ini i ndáti xinu coo mé quívi jan. ⁵¹A cáhán toho ndó ña ñaxinu i ñuyívi yóho caja i ña ná coo vaha ini ñayivi. Na vaxi yehe caja i queá ná cahnda java táhan na. ⁵²Jáchí viti xihín chí nuu cacuu a tátuhun canduu uhun ñayivi in vehe joo a cúní táhan na sahá yehe jáchi ivi na cacuu cuéntá mí i ta uní na candají yehe. Á tá coo ta uní na quíhví ini yehe ta ivi na candají ri yehe. ⁵³Ta jári da cúu tátá cani táhan da xihín jahyi da sahá yehe. Ta jári ndicuíta dataa cani táhan da xihín tátá da sahá yehe. Ta jári najihí cani táhan na xihín jahyi jíhi na sahá yehe. Ta jári najihí cani táhan na xihín náná na sahá yehe. Ta jári ndicuíta najihí cani táhan na xihín sanu na sahá yehe. Ta jári ndicuíta najihí cani táhan na xihín xojo na sahá yehe —ñacachi Jesús.

**Co cúní ñayivi candaa
ini na yo cúu Jesús**

(Mt. 16:1-4; Mr. 8:11-13)

⁵⁴Anda já ñacachi tucu Jesús já xihín ñayivi:

—Mé ndó tá xíní ndo ndicuíta vico vaxi a ñuu ndó chí xoo nu queá candii já cáhí ndó ña cuun javí ta chí cúun ndusa dó. ⁵⁵Ta tá xíní ndo vaxi tachí chí xoo sur já cáhí ndo ña ihní ndivaha coo ta chí ihní ndusa sáhiin. ⁵⁶Co cúu ndó tá quiahva ndáa ndó. Cándaa vaha ini ndó

ña cúu ñuyívi ta cándaa ini ndó cahán ndó ndá queá coo tá sánehé ndó indiví. Joo co cúní ndó candaa ini ndó ña já-naha i nu ndo.

**Ndítahan caja vaha
ndó xihín na co cúní ndohó**

(Mt. 5:25-26)

⁵⁷Ndávaha co tává vaha ndó cuéntá ndía queá vaha ta ndía queá a váha. ⁵⁸Tá sácú ini na saha ndó cuhun ndó vecaa ta ndáca táhan ndó xihín na cán cuahan ndó nuu na jutixia, xíní ñúhú nducú ndó ndá quiahva ndique táhan mání tucu ndó xihín ná nani xíca ndó íchi cuahan ndo. Já queá ná a cánehe na cán ndohó cuhun ndó nu juéxe jáchi da cúu juéxe cán ndiquiahva da ndohó ndáha policia ta policia cán chicaan da ndohó vecaa. ⁵⁹Mé a ndaa ná cahán i xihín ndo ña tá ndácaan ndó vecaa jan chí a cána ndó janda quiahva ná chahvi ndihi ndó ña yíca ndo nuu da cán já janí da ndohó —ñacachi Jesús xihín ná.

**Cáhan Jesús ña ndítahan
jándacoo ñayivi cuachi cája na**

13 Mé tiempo já ñaxinu coo java na ndicani na nu Jesús sahá ña nasahní Pilato java dataa estado Galilea nani jóco da nu Ndióxi. Ña cán queá cáhí na ña ñacátahan níi da ñaxihí xihín níi quíti, rí jóco da. ²Anda já ñacachi Jesús já xihín ná:

—Á cáhán ndo ña ñaxihí da Galilea yóho sahá ña ín chága cuachi da a juú ga java ga na Galilea. ³A juú a já jáchi quiahva já ndihi ri saha ndóhó va tá ná a jándacoo ndó cuachi cája ndó. ⁴Sanahá ndivaha já ñaxihí sahun uní taa jáchi nandicava in torre naní Siloé jata ná. Á cáhán ndo ña nandicava torre cán jata na yóho jáchi nasahíin chága cuachi na a juú ga na ñuu Jerusalén. Joo co cúu á quiahva já. ⁵Mé a ndaa ná cahán i xihín ndo ña quiahva já ndihi ri saha ndóhó

va tá ná a jándacoo ndó cuachi cája ndó —nacachi Jesús xihín ná.

Sácú Jesús quiahva sahá in tító ñuhú, dó cō cána cuihi nuu

⁶ Andá já nasacu Jesús in quiahva nu ná já nacachi a já xihín ná:

—In dātaa najándeē da in tító ñuhú nu ñuhú dá. Ta tá nayaha tiempo já nasahan da sándehe dá do ña á cána tító ñuhú nu do. Joo cō mé rí nandínehe dá. ⁷ Andá já nacachi da já xihín da ndáá ñuhú dá cán: “Candehé, sa naxinu uní cuia já cuítí quixi i ndúcu u tító ñuhú nu yíto yóho. Ta cōo ñaha cána nu do. Vaha chága ná cahndún do jáchi ndá chuun queá candichi uun dó cája tánu dó nu ñuhú i”, nacachi da xihín da ndáá ñuhú dá cán. ⁸ Andá já nacachi da ndáá ñuhú dá cán já xihín dá: “Quiahva ndó ñamaní, xitoho i ña ná coo tóo ga dó cuia víti ná jātayi i ñuhú saha do ta ná chicaoan loho i tata saha do. ⁹ Ta xihín ña yóho jonáá cana cuihi nu do. Ta tá cōo ñaha cána nu do já cahnda ndó do tá cúní ndó”, nacachi mozo cán xihín xitoho da —nacachi Jesús.

Mé quivi ndiquehe ndée ñayivi ndája vaha Jesús in ña xíca tojo

¹⁰ Ta ndaja coo in quivi ndiquehe ndée ná já nasandacaan Jesús veñuhu jánaḥa tuhun Ndióxi nuú ñayivi. ¹¹ Ta mé ini veñuhu cán nasandacaan in ñañáha, ña quíhvi saḥun uní cuia. In ínimā quini cúú rí naquihvi ini ña ta nacaja rí ña ná nditojo ña ta chí ni loho a cuú jándicāa ña mé ña. ¹² Tá naxini Jesús ña já nacana mé á ña já nacachi a já xihín ña:

—Ndaja vaha i yohó viti —nacachi Jesús xihín ña.

¹³ Andá já nachojó a ndáha á jata ña chí mé hora já nandicāa yiquí cuñu ña ta nacasáha ña cája cáhnu ña Ndióxi. ¹⁴ Joo mé dá cúú sacuaḥa veñuhu cán nacasáha

ndícuēhe da jáchi nandaja vaha Jesús ñañáha cán mé quivi ndiquehe ndée ná. Já nacasáha cáchi da cán já xihín ñayivi ndúu ini veñuhu cán já:

—Íin iñu quivi núná nu yó cája chúun í ta tañu quivi já cuu quixi ndó catátá ndó tá cúní ndó. Joo a quíxi ndó catátá ndó quivi ndiquehe ndée yó —nacachi da xihín ná.

¹⁵ Andá já nacachi Jesús já xihín da sacuaḥa veñuhu:

—Cō cúú ndó tá quiahva ndáa ndó. Cája mé ndó chuun quivi ndiquehe ndée yo tá ndáxi ndó tindiqui á búrrō jana ndó sáhan ndó jácōho ndó rí ticuí. ¹⁶ Ta viti candehé ndó ñañáha yóho. Cúú ña ña naquixi chichi Abraham ta sa íin saḥun uní cuia naquehe cuēhe ña nacaja Satanás, mé tiñáha sacuaḥa. Ta mé ndó cáhán ndó ña a váha toho nacaja i ña najaní i ñañáha yóho ndáha cuēhe ña nandoho ña tixi cuahá cuia. Joo mé a ndaa nanditahan nuú i janí i ña ndahá cuēhe yóho cōo cāja toho a cúú á quivi ndiquehe ndée yo —nacachi Jesús.

¹⁷ Tá nacachi Jesús ña yóho chí a juú quiahva nacacahan nuú na cō cúní Jesús cán. Joo tóco ndihi java ga ñayivi cán cájii ndivaha ini na jáchi naxini na ña cája Jesús ña náhnu ndivaha.

Sácú Jesús quiahva sahá in ndiqui mostaza

(Mt. 13:31-32; Mr. 4:30-32)

¹⁸ Tá nandihí já nacachi tucu Jesús já:

—Ná ndicani i nu ndó ndaja íin nu ndiquiahva ñayivi mé ná ndáha Ndióxi ña ná cacomí a cuéntá saha ná. ¹⁹ Cúú á tátuhun in ndiqui mostaza ña chíhin in dātaa nu ñuhú dá. Ta mé ndiqui loho yóho sáhnu a janda quiahva ndúu a tátuhun in yitó cáhnu nu xínu cōo laa chójó rí táca rí nu ndáha do —nacachi Jesús.

Sácú Jesús quiahva saha ndaja cája yusá naxiaa tá queé a xihin harina

(Mt. 13:33)

²⁰ Andá já nacachi tucu Jesús já:

—Ná ndicani i nu ndo ndaja iin nu ndiquiahva ñayivi mé ná ndáha Ndióxi ña ná cacomí a cuéntá saha ná. ²¹ Cúú á tátuhun tá cávaha na pan ta queé yusá naxaa xihin harina. Cúú á tátuhun tá cáva táhan in ñánáha loho yusá naxaa xihin uní táhndá náhnu harina ña ná já-nañu a tóco ndihi mé yúsa cán —nacachi Jesús.

Táhán ndivaha yéhe nuú quihvi ñayivi cuhun na indivi

(Mt. 7:13-14, 21-23)

²² Nandiquehe Jesús íchi cuahan chí ñuu Jerusalén ta ndijáá ñuu náhnu xihin ñuu válí nu yáha jánaḥa mé á tūhun Ndióxi cuahan. ²³ Ta ndaja coo nandaca tūhún in da Jesús já nacachi da já xihin á:

—Xitoho í, á chá cuití va ñayivi cacuu na çacu ndaa ínima cuhun chí indivi —nacachi da xihin Jesús.

Andá já nanducú ñehe Jesús tūhun já cachi a já xihin dá:

²⁴ —Cúú á tátuhun iin in yéhe táhan loho nuú ndihvi ñayivi indivi. Ña cán queé xini ñúhú ndó ndihini ini ndó ndihvi ndó chí yéhe loho cán jáchi cuahá ndivaha ñayivi ndítihvi na ña quihvi na joo a cúu quihvi na. ²⁵ Jáchi tá quiahva iin in xitoho vehe quiahva já iin Ndióxi. Jáchi tá ná ndicoo da cúu xitoho vehe cán chícaji tuun da viti yéhe vehe da já xinu coo ndó cándichi ndó jata véhe cáni ndáha ndó yéhe já cachi ndó já: “Á ndúyu ndó, xitoho í. Á a cája ndó ñamanj cuná loho ndó yéhe ná quihvi nde”, cachi ndó xihin dá. Ta já nducú ñehe da cán tūhun nu ndó cachi da já xihin ndo: “Cuáhán ndo jáchi co xini toho i ndohó.” ²⁶ Ta já casáhá mé ndó cachi

ndó já xihin dá: “Cuahá tañu sa naxixi nde ta naxihi nde xihin ndo. Ta níí cáyé ñuu nde naxica nuu ndó najánaḥa ndó ñayivi.” ²⁷ Andá já nducú ñehe da cán tūhun nu ndo já cachi da já xihin ndo: “Sa nacahan vi xihin ndo ña co xini toho i ndá na cúu ndohó. Caxoo ndihi ndó nuú i jáchi cúu ndó ñayivi cája ndinuhu ña núu.” ²⁸ Ta cán ndusa queé cuacu cóho ndo ta casáhá cañá nuḥu ndó xihin ña cojo ini ndó. Jáchi cán cuni ndó Abraham xihin Isaac xihin Jacob xihin tóco ndihi na profeta. Cuni ndó ña ndúu na indivi cán ta cómi Ndióxi cuéntá saha ná. Ta a juú quiahva táhnda ini ndó jáchi tavá xoo Ndióxi ndohó ña ná a ndihvi ndó nu ndúu na cán. ²⁹ Jáchi xinu ñayivi ndúu ndijáá ñuyivi nu Ndióxi ta ndaca nduu na nuú cacomí Ndióxi cuéntá sahá ñayivi. ³⁰ Ta mé quivi cán já cuni ndó java ñayivi, na coo saha mé nuú ñayivi ta nduu na na iin chága saha nu Ndióxi. Ta cán cuni ndó java na ndínehe jícó mé viti ta a cóo toho saha ná nu Ndióxi —nacachi Jesús.

Táhnda ini Jesús ta sácu a sahá ñayivi ndúu ñuu Jerusalén

(Mt. 23:37-39)

³¹ Mé quivi já naxinu coo java na fariseo nu Jesús já nacachi na já xihin á:

—Cuáhán inga ñuu coún jáchi sácú ini Herodes cañí da yohó —nacachi na xihin á.

³² Andá já nacachi Jesús já xihin ná:

—Cuáhán ndó caḥan ndó xihin da cátoó jándahvi ñayivi jan ta cachi ndó xihin dá ña táva i ínima quini ñúhu ini ñayivi ta ndája vaha i na quihvi ta caja tá caja i ña yoho janda quiahva ná xinu coo quivi jándihi i chuun yoho. ³³ Joo sa mé Jerusalén jan quivi vi jáchi jan cúu nu sáhní na profeta. Ta viti ndítahan caca nuu yíí vi íchi xica i cuahan i yoho —nacachi Jesús.

³⁴ Anda já ñacachi tucu Jesús já:

—Ndáhvi ñahá ñacuu ndó, ña ndúu ñuu Jerusalén. Jáchi sáhní ndó ña profeta. Ta ndícuíta ndó cáni ndó ña ñachindahá Ndióxi nu ndó xihín yuu. Cuahá ndivaha tañu cúní jánditaca ndihi i ndohó joo coo ñaxeen ndó. Cúú á tá quiahva cája nduxú tá játaca rí jahyi válí rí tixi ndixi rí. ³⁵ Ta viti cuni johó ndó ña cáhan i xihín ndó. Vaxi quiví janí ndáha mé vehe ndó candoo a. Ta mé a ndaa ná cáhan i xihín ndó ña a cúní ga ndó yehe janda quiahva ná xinu coo quiví cachi ndó: “Cáhnú ñahá ná cacuu da vaxi cuéntá Ndióxi, xitoho í” —ñacachi Jesús.

Tá ñandaja vaha Jesús in da ñaquihvi cuiñu

14 Ta ndaja coo in quiví ndíquehe ndée ná já ñasahan Jesús ñaxixi a vehe in da cúú sacuahá nuú ña fariseo. Ta java ga ña fariseo cán ñacashá nání ña Jesús ndúu na. ² Ta mé yati nu Jesús cán ñasahiin in dataa, da ñaquihvi cuiñu yiquí cuñu. ³ Anda já ñandaca tuhún Jesús ña jáñaha ley Moisés xihín ña fariseo já ñacachi a já xihín ná:

—Á núná nu yó ndaja vaha í in da quíhvi mé quiví ndíquehe ndée yo, á coo núná toho nu yó cája í ña —ñacachi Jesús xihín ná.

⁴ Joo táji ñasahiin yuhú ña cán. Anda já ñandaja vaha Jesús da quíhvi cán já ñacachi a xihín dá ña ná quee da cuhun da. ⁵ Ta já ñacachi a já xihín ña fariseo cán:

—Mé ndó tá ndicava búrró á tindiquí jana ndó ini in táhvi chí ivi laá tavá ndó rí. Ta coo caja toho a á cúú á quiví ndíquehe ndée yo —ñacachi Jesús.

⁶ Joo coo ñacuu nducú ñehe na tuhun nu Jesús.

⁷ Anda já ñaxini Jesús ña jandá johó ndácaxi na ñataca cán nuú vaha cacoo na já ñajánaha nu ná ndía vaha chága ndítahan caja na. Já ñacachi a já:

⁸ —Tá ná cana in na yohó cuhun in víco tándaha, a nducú tohún cacoun nu sácco ña náhnú. Jáchi cuu xinu coo in da íin chága saha a juú ga yohó. ⁹ Ta da ñacana yohó víco cán cuu cachi da já cuhun: “Quiahva nu íin coún ná cacoo da yoho”, cachi da cuhun. Anda já cacahan nuun já queún cuhun cacoun janda nu ndíhí. ¹⁰ Ña ndítahan cajún queá cacoun janda nu ndíhí. Já queá tá ná xinu da ñacana yohó nu íun já cachi da já cuhun: “Amigo, cuahán yaha nu ndúu ña náhnú coún.” Xihín ña yoho ndindita jícun nuú ña ndúu coo nu mesa xixi cuhun cán. ¹¹ Jáchi ndá ña cája cáhnú mé, ña cán cacuu ña ñanuu ndáha johó. Ta ña coo ndínehe jícó mé, ña cán cúú ña ndicáhnú —ñacachi Jesús.

¹² Anda já ñacahan Jesús xihín mé da ñacana ñahá cán já ñacachi a já xihín dá:

—Tá ná cavaha cuahún ña cajáhnú na á ña cajini na, a cána tohún ña cúú amigún jan ni ña cúú ñanún jan ta ni a cána tohún ña cúú táhún ta ni a cánún ña cuicá ndúu yati cuhun jan. Jáchi tá ná caja na víco cana ri ña jan va yohó ta xihín ña jan táhnda cuéntá sahá ñamaní ñacajún xihín ña cán. ¹³ Ña ndítahan cajún tá ná cavahún in víco queá canún ña ndahví ta canún ña récco ta canún ña cuaá. ¹⁴ Ta já caji ínúñ jáchi ña cán a cúú toho caja na chahvi na ñamaní ñacajún xihín ná ñuyiví yoho. Joo vaxi quiví tá ná nditacu ñayivi ñasanehe ínimá vaha ñuyiví yoho já chahvi Ndióxi ñamaní ñacajún jan —ñacachi Jesús xihín ná.

Sácú Jesús quiahva sahá in dataa, da nacana cuaha chá ñayivi ña ná cuhun na víco vehe da

(Mt. 22:1-10)

¹⁵ Tá naxini johu in táhan da íin coo nu mesa xihin Jesús cán ña yóho já nacachi da já xihin á:

—Tahví nacuu na ná ñehē táhvi cuhun indiví ña ná cacomí Ndióxi cuéntá saha ná —nacachi da xihin Jesús.

¹⁶ Anda já nasacu Jesús in quiahva nu dá já nacachi a já xihin dá:

—In dataa nacavaha da in víco cáhnu ta nacana cuahá ndivaha da ñayivi. ¹⁷ Ta tá sa naxinu coo hora cajíni na já nasahnda da chuun nu mozo da ña ná cuhun da cana da na ña quixi na ndaca nduu na nu mesa. Já nacachi da já xihin ná: “Naha quíi ndo jáchi sa nacandíví ndihi ñaha”, nacachi mozo xihin na cán. ¹⁸ Joo tóco ndihi na cán nacasáhá na cáhan na ña a cúu toho cuhun na. Ta in táhan da cán nacasáhá cáchi da já xihin mé mozo cán já: “Jacá naxeen uun i in núhu ta xíní núhú cuhun i candehé e nu á. Cáhnu coo inún”, nacachi da xihin mozo cán. ¹⁹ Ta inga da nacachi da xihin mé mozo cán já: “Jacá naxeen e uhun yúntá tindiquí ta viti cúní cuhun i coto ndojó i ri. Cáhnu coo inún”, nacachi da xihin mozo cán. ²⁰ Ta inga tucu da nacasáhá cáchi da já: “Jacá natandaha vi sahá ña cán queá a cúu toho cuhun i”, nacachi da xihin mozo cán. ²¹ Tá nandicó coo mozo cán nuú xitoho da já nandicani ndihi da nuú xitoho da ña nacachi na cán xihin dá. Anda já nacasáhá nandicuehe xitoho da cán já nacachi tucu da já xihin mozo da: “Ta viti cuahán camún ndijáá cáyé ñuu játacún na ndahví xihín na réncu xihín na cuaa. Cañehún na quisún yóho ná cuxu na”, nacachi xitoho da cán xihin dá. ²² Tá nandihí já nasahan mozo cán já nacaja da ña nacachi xitoho da xihin dá. Ta tá nandicó coo da já nacachi da já

xihín xitoho da: “Sa nacaja i tá íin nasahnda ndó nuú i. Joo yójó tá yójó nuú cuu canduu chága na”, nacachi da xihín xitoho da. ²³ Anda já nacachi xitoho da já xihin dá: “Cuahán ndijáá cáyé xihín ndijáá íchi ta xihín ña ndúsa játacún na ña ná quixi na já ná chutú vehe e. ²⁴ Jáchi ni in túhún toho táhan na nacana i quixi vehe e nu cuítí cán, a quixi ga na cajíni na ña nacatáhan vehe e”, nacachi da xihin mozo da —nacachi Jesús.

Ndítahan jándacoo í ndá ña ndáyahvi nu yo tá ta mé a ndaa cúní yó candico yó Jesús

(Mt. 10:37-38)

²⁵ Cuahá ñayivi ndíco na jata Jesús cuahan na. Anda já nandicó coo játa nuu Jesús já nacachi a já xihin ná:

²⁶ —Ndá na cúní jácuaha xihín i xíní núhú quihvi ini chága na yehe a juú ga tátá na xihín náná na. Ta xíní núhú quihvi ini chága na yehe a juú ga ñájíhí na á jahyi na á ñani na á quiahva na. Ta xíní núhú quihvi ini chága na yehe a juú ga mé ná. ²⁷ Ta ndá na co ndíco yehe sahá ña yíhvi na quivi na, mé a ndaa coo saha toho na cacuu na cuéntá yehe. ²⁸ Tá cúní ndó cavaha ndó in vehe jícó ña cája ndó queá tavá vaha ndó cuéntá ña á queta jjuhún ndo á a queta já ná jáxinu ndó ña. ²⁹ Jáchi tá ná a tává jihna ndó cuéntá ta casáhá ndó cavaha ndó vehe ndó joo tá nandihí co queta ga jjuhún ndó ña ná jáxinu coo ndó ña já queá cacahan nuu ndo jáchi casáhá ñayivi cuacu ndaa na ndohó. ³⁰ Já cachi na já xihin ndo: “Taa jan nacasáhá da cavaha da vehe da joo coo nacuu jáxinu dá ña”, já cachi na cuacu ndaa na ndohó —nacachi Jesús.

³¹ Anda já nacachi tucu Jesús já:

—Tá ná caní táhan in rey, da cómí uxu mil soldado xihín inga rey, da cómí o-co mil soldado já queá xíní núhú ndicani vaha ini da ña á cuu quee vaha da xihín

da inga rey cán tá ná quihvi táhan da xihín dá. ³²Ta tá natavá vaha da cuéntá ña a cuú quee vaha da xihín rey, da cómi oco mil soldado cán janda xicá va íin da já chindahá da java nataa ña ná cuhun da caa da ñamaní nuú inga rey cán ña ná ndico va tondóhó. ³³Quiahva já íin ri xihín ndóhó va. Ndá ndóhó, na co cúní jándacoo tóco ndihi ña cómi ndo sahá yehe já queá coo sahá toho ndó cacuu ndó cuéntá yehe —nacachi Jesús.

Cáhan Jesús ña tá jándacoo ñayivi íchí cuéntá mé á cuú ná tátuhun ñii, ña co óhva ga

(Mt. 5:13; Mr. 9:50)

³⁴Anda já nacachi tucu Jesús já:

—Ña vaha ndivaha cuú ñii yívi na joo cóo chuun toho a tá co óhva ña. ³⁵Mé ñii, ña co óhva ga jan ni co váha ña já-cana í nu núhu yo jáchí co ndáhá toho núhu yo cája ña. Ña cája na xihín ñii jan queá sátá va na ña. Na íin johó, ná cuni johó na —nacachi Jesús.

Sácú Jesús quiahva sahá in ndicachi, rí nandiñuhú

(Mt. 18:10-14)

15 Cuahá na játaca jiuuhún cuéntá impuesto xihín cuahá na cája cuachi nacasáhá na cáyati na nu íin Jesús jáchí cúní na cuni johó na nu cáhan mé á. ²Sahá ña cán queá nacasáhá na fariseo xihín na jánahe ley Moisés cáhan núu na sahá. Já cáchí xihín táhan na já:

—Taa jan ndiquehe vaha da ñayivi cája cuachi ta xíxi da xihín ná —cáchí xihín táhan na cán.

³Anda já nasacu Jesús in quiahva nu ná já nacachi a já xihín ná:

⁴—Mé ndó tá cómi ndo in ciento ndicachi ta tá in cuití ndiñuhú in ndicachi jana ndo ña cája ndó queá jándacoo ndó comi jíco sahun comi rí cán yucu ta já quee ndó cuahan ndó ndinducú ndó rí nandiñuhú cán janda quiahva ndiñehe

ndó ri. ⁵Ta tá ndiñehe ndó ri já cávatá ndo já quehe ndó ri chinúu ndó ri sahá jiqui ndo vaxi ndó. ⁶Ta tá xínu coo ndó vehe ndó já játaca ndó ñani táhan ndo xihín na xíní táhan xihín ndó. Já casáhá cáchí ndó já xihín ná: “Xíní núhú cajii íni ndó xihín i jáchí cajii íni i sahá ña nandiñehe e ndicachi janá i, rí nandiñuhú cán”, cáchí ndó xihín ná. ⁷Mé a ndaa ná cahan i xihín ndo ña quiahva já ta janda chága ví cajii ini na ndúu indiví tá jándacoo in ñayivi cuachi cája na a juú ga sahá comi jíco sahun comi ñayivi, na cája tá cája ña vaha.

Sácú Jesús quiahva sahá in jiuuhún, ña nandiñuhú

⁸Ta viti ná cahan tucu u inga quiahva xihín ndo. In ñañáha nasahin uxu jiuuhún caa ña yahvi ndivaha nu ña. Ta tá ndiñuhú in táhan ña cán já ndicahmi ña núhu ta tíhvi ná vehe ña jáchí ndíhi ini ña ndínducú ña ña ta ví ví ndínducú ña ña janda quiahva ná ndiñehe ña ña. ⁹Ta tá sa nandiñehe ña ña já játaca ña ñani táhan ña xihín na xíní táhan xihín ña já casáhá cáchí ña já xihín ná: “Xíní núhú cajii íni ndó xihín i jáchí cajii ini i sahá ña nandiñehe e jiuuhún i, ña nandiñuhú”, cachi ña cán —nacachi Jesús.

¹⁰Anda já nacachi tucu Jesús já:

—Mé a ndaa ná cahan i xihín ndo quiahva já cajii íni tátó Ndióxi ndúu indiví tá jándacoo in ñayivi cuachi cája na —nacachi Jesús.

Tá najándacoo in dataa tátá da ta naquee da cuahan xicá da

¹¹Anda já nasacu Jesús in quiahva nu ná já nacachi a já:

—In dataa nasahin ivi jahyi taa da. ¹²Ta da loho chá cán nacachi da já xihín tátá da: “Taa i, á a váha ná ndicahnda va ndó ñaha cómi ndo já ná ndiquehe e ña cáni nuú i ndiquehe e”, nacachi da cán xihín tátá da. Anda já nasahnda java

tátá da ñaha, in táhndá ñaquehe mé dá ta in táhndá ñaquehe ñani da. ¹³ Ta chá va quiví nayaha já najicó ndihi da loho chá cán ñaha ña ñañehe dá nu tátá da ta xihín jjuhún ñacana cán ñaquehe da cuahan xicá ndivaha da chí ñuu tóho. Ta cán ñacasáhá da jativí ndaja ñacuu johó da jjuhún da ña cája da ña núu. ¹⁴ Ta tá sa najativí ndihi da jjuhún da já ñaxinu in tamá ndeé ndivaha mé nu ín da cán. Já ñacasáhá ñaxinu joco nu dá ta ñacasáhá cuíco da. ¹⁵ Anda já ñaquehe da ñasahan da ndúcu da chuun caja da nuú in dataa mé nu ín da cán. Ta ñasahan da cán chuun nu dá ña ná cuhun da candaa da cóchí janá da cán. ¹⁶ Ta tá cúni coo ndiava já cúni coo ña sáxi cóchí cán. Ta chí caxi da ña cán janda quiahva chutú tixi da cúni da. Joo co sáhan na ña nu dá. ¹⁷ Anda já ñacasáhá da ndícani ini da já ñacahan da já: “Cuaha chá mozo táhan na cája chúun nu tátá i chí yójó johó ñaha xixáhan na ta yóho xihí va yehe joco ín i. ¹⁸ Ña caja i queá ndicó coo tucu u nu ín tátá i ta já cachi i já xihín ná: Tátá maní i, ñacaja i cuachi nu Ndióxi ta ñacaja ri cuachi nu ndóhó va. ¹⁹ Ta chí coó saha mí vi cacuu u jahyi ndó sahá ña ñacaja i. Ndiqeehe ndó yehe ná cacuu u tátuhun in mozo va ndó, já cachi i cuhun i nu tátá i”, ñacahan da. ²⁰ Anda já ñaquehe da íchi cuanúhu dá vehe tátá da.

“Ta janda xicá va vaxi da já ñaxini tátá da mé dá já ñandicuni a da. Ta ñatahvi ini a saha dá. Já xínu a ñasahan ñehé a da já ñanumi a da ta natatí yúhu á sajóho da. ²¹ Anda já ñacachi da já xihín tátá da: “Tátá maní i, ñacaja i cuachi nu Ndióxi ta ñacaja ri cuachi nu ndóhó va. Ta chí coó saha mí i cacuu u jahyi ndó”, ñacachi da xihín tátá da. ²² Ta ndaja coo tátá da ñacasáhá cahan xihín java ga mozo já ñacachi a já xihín ná: “Cama ndó ta tavá ndó jáhma, ña vaha ta jácandixi ndó jahyi i. Ta chicaan ndó in jéhe

nducu ndáha dá. Ta chicaan ndó ndusa saha dá. ²³ Ta cañehe ndó chélo, ri ndató ñandaha jan já ná quivi ri cuxú jáchi caja i in víco viti. ²⁴ Jáchi jahyi i yóho tá ñaquehe da cuahan da ñacahan i ñaxihí da. Joo viti ñandicó coo da nuú i. Sahá ña cán cúu á tátuhun ñanditacu tucu da. Ñasacuu da tátuhun da ñandiñúhu joo viti ñandee va da”, ñacachi tátá da cán. Anda já ñacasáhá na cája na víco.

²⁵ Joo ndaja coo da cúu ñani da, da sacuaaha chága cán, ndácaan da cája chúun da yúcu va. Ta tá ñandicó coo da já ñaxini johó da tiví musica ta caxita sáha na. ²⁶ Anda já ñacana da in da cája chúun cán já ñandaca tuhún ñahá da ndía cúu. ²⁷ Anda já ñacachi da cája chúun cán xihín dá: “Cúu víco jáchi ñandicó coo ñanún. Ta ñasahnda tátún chuun ña ná quivi chélo, ri ndató ñandaha cán jáchi cajii ín na ña ñacasaa vaha ñanún ta coó a ñandoho da”, ñacachi da cán. ²⁸ Joo ndaja coo da sacuaaha cán najoo da ta chí coó ñaxeen da quihvi da nu cúu víco cán. Sahá ña cán ñaqueta tátá da jata véhe já cahan ñahví a xihín dá ña ná quihvi da. ²⁹ Anda já ñacasáhá cáchi da já xihín tátá da: “Taá i, sa cándaqa vaha ini ndó ña sa cuahá ndivaha cuia cája chúun i nu ndo ta cája i tóco ndihi ña sáhndá ndó nuú i caja i. Joo ni in túhún toho tañu coó ñasahan ndó ni in tijúhu loho nuú i ña ná caja i in víco loho cuxu u xihín na xini táhan xihín i. ³⁰ Joo viti ñasahní ndó chélo, ri ndató ñandaha jan, ña cája ndó víco jáchi ñacasaa ñani i jan. Ta mé da jan ñaxica nuu da najativí ndaja ñacuu da jjuhún ndo xihín najihí xica jii”, ñacachi da cán xihín tátá da. ³¹ Anda já ñacachi tátá da já xihín dá: “Candehé jahyi a. Mé a ndaa níi tiempo ín xihín i. Ta ñaha mé vún cúu ndihi ña ín nuú i. ³² Joo mé a ndaa ndítahan nu yo caja i víco ta cajii ín yo viti jáchi ñandicó coo ñanún, mé da ñacahan yo ña ñaxihí. Ta

viti ñacasaa da cúu á tátuhun ñanditacu tucu da. Ñasacuu a tátuhun ñandiñúhú da joo ñandiñehe yó da viti”, ñacachi a cán xihín jahyi a —ñacachi Jesús.

Ndindaa chuun ndáha in mozo jáchi coó ñacaja vaha da nuú xitoho da

16 Andá já ñasacu tucu Jesús inga quiahva nuú ña xíca tuun xihín á. Já ñacachi a já xihín ná:

—Ñasahiin in ña cuiçá ta ñasahiin in da ndáá ñaha da. Joo java ñayivi ñasahan ña chicao ña cuachi jata dá nuú xitoho da ña játiví ndaja ñacuu johoda ña cúu ñaha xitoho da. ²Andá já ñacana xitoho da mé dá já ñacachi da já xihín dá: “Joho cáchí ñayivi ñaquixi na cáhan ña sahun sahá ña cán queá táxi i cuéntá nuun ña ndicanún nuú i ndaja cáa chuun ñacajún jáchi ndindaa chuun ndáhun ta a cácuu gaún da ndáá ñaha i”, ñacachi xitoho da cán xihín dá. ³Andá já ñacasáhá da cúu mozo cán ndícani ini da já ñacahán da já: “Ndía caja i viti jáchi ndindaa va chuun ndahá i caja xitoho i. Ta co ndée toho i caja i chuun ve. Ta tá ná caca nuu i cuati i ta cacahan va nuú i. ⁴Sa xíní vī ndía caja i já ná ndiquehe vaha ñayivi yehe vehe na tá ná ndindaa chuun ndahá i caja xitoho i”, ñacahán da. ⁵Andá já ñacana da tá in tá in ña yíca nuú xitoho da. Ta tá ñaxinu da nu cuítí cán nu dá já ñandaca tuhún ñahá da já ñacachi da já xihín dá: “Ndaja yícun nuú xitoho i”, ñacachi da xihín da yíca cán. ⁶Já ñanducú ñehe da cán tuhun já ñacachi da já: “In ciento lata síti yíca i nuú xitohún”, ñacachi da cán xihín dá. Andá já ñacachi da cúu mozo cán já xihín dá: “Candehé nu tutu yóho ndáá ndaja yícun nuú xitoho i. Joo cacoo quí jan ta cahyí ña yícun ivi jico uxu lata síti cuití va”, ñacachi mozo cán xihín da yíca nuú xitoho da cán. ⁷Tá ñandihí já ñandaca tuhún da inga da yíca nuú xitoho da já ñacachi da já xihín dá: “Ta yóho ri ndaja

yícun nuú xitoho i”, ñacachi da. Andá já ñanducú ñehe da yíca cán tuhun nu dá já ñacachi da já xihín dá: “In ciento maquila trigo yíca i nu dá”, ñacachi da cán. Andá já ñacachi tucu da ndáá ñaha cán já: “Candehé yóho ndáá ndaja yícun. Joo cacoo quí jan ta cahyí ña yícun comi jico maquila trigo cuití va”, ñacachi da ndáá ñaha cán xihín dá. ⁸Tá ñandihí já ñacachi xitoho da xihín dá ña mé a ndaa cúu dá in da ndíchí jini jáchi xihín ña ñacaja da cán candoo vaha da nuú ñayivi yíca nuú xitoho da vatí coó ñacaja vaha da nuú xitoho da —ñacachi Jesús xihín quiahva sácú a nuú ña xíca tuun xihín á cán.

Andá já ñacachi tucu a já xihín ná:

—Ñayivi cátóo canduu vaha ñuyiví yóho xíní vaha chága ña ndaja cája na candoo vaha nu táhan na a juú ga ña sa xíca íchi cuéntá Ndióxi.

⁹Ñayivi ndúu ñuyiví yóho cája na ña núu xihín ña cómí ña. Joo ndóhó, xíní ñúhú caja ndó ndinuhu ña vaha xihín ña cómí ndo. Jáchi ña jan queá cúní Ndióxi caja ndó. Jáchi tá ná xinu quiví quivi ndó já ndiquehe vaha na ndohó indiví sahá ña ñacaja vaha ndó xihín ña ñasacomí ndo.

¹⁰Ta ndá da xihín ndinuhu ini ndáá da ñaha da vatí loho cúu á quiahva já caja ri da candaa da ñaha da tá cuaha cúu á. Joo ndá da co ndáá da ñaha da xihín ndinuhu ini da vatí loho cúu á quiahva já a cándaa vaha da ñaha da tá cuaha cúu á. ¹¹Ta tá co ndáá vaha ndó ñaha ñuyiví yóho já queá ni Ndióxi a quiahva toho a ñaha cuéntá indiví nu ndo jáchi a cátiavha ndó candaa ndó ña. ¹²Ta tá co tiávha ndó candaa ndó ña ñasahan too inga na nu ndo, náha ña a cúu ndiquiahva na ña cacuu ñaha mé ndó nu ndo jáchi a cátiavha ndó candaa ndó ña.

¹³Ni in túhún toho mozo a cúu caja chúun nuú ivi xitoho. Jáchi candají da

in xitoho da ta inga xitoho da quihv̄i ini chága da. Á tá coo ta caja ndív̄i vaha da chuun nuú in xitoho da ta inga da cán a cája chuun vaha da nuu. Ta quiahva já iin ri xih̄in ndóhó va jáchi a cuú caja cáhnu ndó Ndióxi tá chínúu ndó ínima ndó jatá jjuhún ndo —nacachi Jesús.

¹⁴ Ta nu cáhan Jesús cán ndíta na fariseo, na cátoó ndivaha jjuhún táa johu na nu cáhan mé á. Ta nacasáhá na sácu ndaa na Jesús. ¹⁵ Anda já nacachi Jesús já xih̄in ná:

—Cája ndó tátuhun cúu ndó ñayivi vaha nuú ñayivi joo sa xín̄i vaha Ndióxi ínima ndo. Ndá ña cáhvi ini ñayivi ndáyahvi chága, ña jan queá co ndáyahvi nu Ndióxi —nacachi Jesús xih̄in ná.

Ndítahan nuú ñayivi caja na ña nasahnda Ndióxi anda quiahva ná naá saha ñuyív̄i xih̄in indiví

¹⁶ Anda já nacachi tucu Jesús já:

—Janda tá cámaní xinu Juan, da naja ndúta ñayivi já nasah̄in ley Moisés xih̄in ña najánaḡa na profeta sanahá. Joo viti ndijáá ndícuíta nuu tuhun Ndióxi cuahan ña vaxi quiv̄i cacomí Ndióxi cuéntá sahá ñayivi. Ta ndá na cún̄i ndiquiahva na mé ná ndáḡa Ndióxi ndí-tahan nu ná ndih̄i ini na ndih̄vi na íchi cuéntá mé á.

¹⁷ Joo janda quiahva ná naá saha ñuyív̄i xih̄in indiví ndítahan nuú ñayivi caja na tóco ndih̄i ña sáhdá ley. Jáchi janda vaha chága iin a ná ndih̄i sahá ñuyív̄i xih̄in indiví a juú ga ña ná ndih̄i sahá in túhún tuhun ndácaan nu ley Moisés —nacachi Jesús.

Tá jándacoo táhan na sa natandaha

(Mt. 19:1-12; Mr. 10:1-12)

¹⁸ Anda já nacachi tucu Jesús já:

—Tá jándacoo in dataa ñájihí da ta tándaha dá xih̄in inga ñañaḡa já queá cája da cuachi nu Ndióxi. Ta ndá da tán-

daḡa xih̄in in ñañaḡa, ña najándacoo yí, cája ri da cán va cuachi nu Ndióxi —nacachi Jesús.

Ña nandoho in da cuicá xih̄in ña nandoho in da naní Lázaro

¹⁹ Ndícani Jesús nuú ñayivi já nacachi a já xih̄in ná:

—Nasah̄in in da cuicá ta a juú quiahva vaha jáhma nasandixi da ta chí a juú quiahva ñúchí nacaja cutú da vehe da jáchi ndijáá ní quiv̄i nasacaja da víco nu xixáhan cuicá ndivaha da.

²⁰ Ta nasah̄in in da ndahví naní Lázaro. Quíhv̄i da ta ndóho da cueḡe ndih̄i táhyi. Ta ndahví cáa da iin coo da nu ñúhu yuyéhé da cuicá cán. ²¹ Ta mé da ndahví yóho cún̄i da jáchutú da tíxi da xih̄in ña ndícava nu mesa da cuicá cán. Ta xih̄in ña ndeé quíhv̄i da ndahví yóho chí janda tina xinu coo rí yáco ndaa rí nuú ndih̄i nanana ní da cán. ²² Ta ndaja coo in quiv̄i naxih̄i da ndahví cán. Já naxinu táto Ndióxi já ñeḡe na da cuahan da coo da indiví nu iin Abraham. Ta jári da cuicá cán va naxih̄i da ta nasahan na najánduxu ná da. ²³ Ta nani ndóho ini da cuicá cán ndácaan da indayá já nandiḡeḡe da nuu dá. Já naxini xícá da Abraham. Ta naxini da iin Lázaro xih̄in dá. ²⁴ Anda já nacasáhá da cuicá cán cáyuhú da já nacachi da já: “Tátá Abraham, candáhv̄i loho ini ndó yeḡe. Ta ná chindahá ndó Lázaro ná quixi da yóho quiahva loho da ticuif̄i jándaxi loho da yaá i jáchi ndóho ndivaha ini i indayá yóho nu cáyi ñuhú ita.”

²⁵ Anda já nacachi Abraham já xih̄in dá: “Jahyi a, xín̄i ñúhú ndicuhun inún ña vaha ndivaha nasah̄iún ñuyív̄i. Ta Lázaro yóho ndahví ndivaha nandoho da ñuyív̄i sahá ña cán queá co ndóho ga ini da yóho viti nani ndóho inún jan viti. ²⁶ Ta a cúu saḡa toho Lázaro nu iún jan jáchi iin in táhv̄i cúná ndivaha taḡu ndeḡe, na ndúu xoo chóho xih̄in ndóhó, na ndúu xoo chí jan. Sahá

ñā cān quēā a cūi cūhūn nā ndúu xoo chóho chí jan ta ni nā ndúu xoo chí jan a cūi quixi xoo chóho”, ñacachi Abraham xihín dā cān. ²⁷ Andā já ñacachi dā cuicá cān já xihín Abraham: “Tá tã já ta caja loho ndó ñamaní, tátá Abraham ñā ná chindahá loho ndó Lázaro ñā ná cūhūn dā vehe tátá i ²⁸ ná cāhan loho da xihín nā vehe e. Jáchī ndúu uñun ñani i ta cō cūni i ñā ná quixi nā cān yóho ndoho ini na tá quiāhva ndóho ini i viti”, ñacachi dā cuicá cān xihín Abraham. ²⁹ Joo ñanducú ñehe Abraham tūhun nū dá já ñacachi da já xihín dá: “Sā íin va ley ñacāhyí Moisés xihín ñā ñacāhyí nā profeta nuú nā cān. Vaha va ná caja na ñā cāhí a”, ñacachi Abraham xihín dá. ³⁰ Andā já ñanducú ñehe dā cuicá cān tūhun nū Abraham já ñacachi da já xihín dá: “Mé a ndāā quēā cāhan ndó jan, tátá Abraham. Joo vaha chágā ná chindahá ndó in táhan nā sã ñaxihí já ná cāhan nā xihín ñani i já ná jándacoo cama na cuāchi cāja na”, ñacachi da xihín Abraham. ³¹ Andā já ñacachi tucu Abraham já xihín dá: “Tá cō cūni ñanún caja da ñā ñacāhyí Moisés xihín ñā ñacāhyí nā profeta quiāhva já a cándúsa toho ri na ndiquehe vaha na in ndijí tá ná ndítacu a cūhūn a cāhan xihín ñanún”, ñacachi Abraham xihín dā cuicá cān —ñacachi Jesús xihín ñayivi.

Tá jácāhan táhan ñayivi caja na cuāchi

(Mt. 18:6-7, 21-22; Mr. 9:42)

17 Andā já ñacachi Jesús já xihín nā xíca tuun xihín á:

—Níí tiempo quixi ñaha ñā cāja ñā ná ndicají ini ñayivi caja na cuāchi. Joo ndáhví ñacuu na tá ná jándicava na inga na nuú cuāchi. ² Jandā vaha chágā ná candiçō in yuú yojó jicō ná ta ná ndihi saha ná cāhá tañuhú a juú gā ñā jándicava na nā ndahví yóho nuú cuāchi. ³ Cuéntá coo ndó xihín ñā cāja ndó.

”Tá ná caja ñani táhan ndó cuāchi nū ndo, jáñani ndó dā. Ta tá ná tãhvi ini da sahá cuāchi ñacaja da, caja cāhnu ini ndó saha dá. ⁴ Ta vatí usā táhndá ná caja da cuāchi nū ndo in quiví ta já vaxi tucu da nū ndo usā táhndá ta já cāsáhá cāhí tucu da xihín ndo ñā a ndicó cōo gā dā caja da ñā já ndítahan nū ndó caja cāhnu ini ndó saha dá —ñacachi Jesús.

Cūni nā xíca tuun xihín Jesús candee cāhnu chágā ini na mé á

⁵ Tá ñandihí já ñacachi nā xíca tuun xihín Jesús cān já xihín á:

—Vá ná caja ndó ñā ná candee chágā ini nde ndohó —ñacachi na xihín á.

⁶ Andā já ñacachi Jesús já xihín ná:

—Tá ná candee ini ndó vehe vatí cūi á tátūhun in ndiquí mostaza cuu cachi ndó xihín in yító cāhnu ñā ná cūhūn dó candichi dó ini tañuhú ta chí já ndusa coo.

Ñā ndítahan caja in da nuú xitoho da

⁷ Tá íin in mozo ndo ta chindahá ndó dā yúcu ñā ná tiin da yatā á candaa da quítí jana ndo ta tá ná ndicó cōo dā cān já ama ná cachi ndó xihín dá ñā ná yaha da cacōo da nū mesa cuxu da. ⁸ Ñā caja ndó quēā cachi ndó já xihín dá: “Jácatáhan ñaha ná cajíni i ta caja ndíví ná cuxu u. Ta tá sã ñandihí ñaxixi i já cuxu mún tá cūnun”, ñā jan va quēā cāhan ndó xihín mozo ndo. ⁹ Ta ama ná ndiquiāhva ñayivi ndixahvi nū mozo nā tá ñandihí ñacaja da in chuun ñasahnda na nū dá caja da. ¹⁰ Ta quiāhva já ndítahan coo ri xihín ndóhó va. Tá ná ndihi ñacaja ndó tóco ndihi chuun ñasahnda Ndióxi nū ndo já ndítahan nū ndó cachi ndó já: “Mé nde cūi nde mozo cōo saha ta ñacaja cuití va nde chuun ndítahan nuú nde caja nde”, já ndítahan cachi ndó —ñacachi Jesús xihín nā cān.

Tá nandaja vaha Jesús uxu taa ndóho cuehe táhyi

¹¹ Ta nani xíca Jesús cuahan chí ñuu Jerusalén já nayaha chí xoo nu fin lindero na Samaria xihín na Galilea. ¹² Ta tá naxinu coo a in ñuu loho já naqueta uxu taa ndóho cuehe táhyi nu á joo nasacuíta xíca da nu á. ¹³ Já nacasáhá cáyuhú da nu Jesús já nacachi da já xihín á:

—Jesús, maestro, candáhví loho ini ndó ndehe —nacachi da xihín Jesús.

¹⁴ Tá naxini Jesús ndíhuxu da cán já nacachi a já xihín dá:

—Cuáhán ndó nahá ndó mé ndó nuú na cúu jutú —nacachi Jesús xihín dá.

Ta nani xíca ndihi da cuahan da nandivií yiquí cuñu da ta nandindaa cuehe da. ¹⁵ Ta ndaja coo in táhan ndíhuxu da cán tá naxini da ña nandivií yiquí cuñu da já nacavatá ndivaha da. Ta nacasáhá da cája cáhnu da Ndióxi cáyuhú cóhó da já nandicó coo da nu Jesús. ¹⁶ Já nacaxítí da nu á janda quiahva naxinu taan da nu ñúhu jáchi ndíquiahva ndivaha da ndixahvi nu á. Ta mé dataa yóho cúu dá da Samaria. ¹⁷ Anda já nacachi Jesús já xihín dá:

—Uxu cúu da nandivaha nacaja i. Joo in da cán coo naxeen toho da ndicó coo da ndiquiahva da ndixahvi nuú i. ¹⁸ In túhún da tóho yóho cuití va cúu da nandicó coo ndíquiahva ndixahvi nu Ndióxi —nacachi Jesús.

¹⁹ Anda já nacachi Jesús já xihín dataa cán:

—Candichi ta cuáhán. Nandivahún jáchi nacandúsún yehe —nacachi Jesús.

Ndaja coo tá ná xinu coo quiví cacomí Ndióxi cuéntá sahá ñayivi

(Mt. 24:23-28, 36-41)

²⁰ Ta ndaja coo na fariseo nacasáhá na ndáca tuhún na Jesús ña ndá ama casáhá Ndióxi cacomí a cuéntá sahá ñayivi. An-

da já nanducú ñehe Jesús tuhun nu ná já nacachi a já xihín ná:

—A cúu cuni ndó nuú cacomí Ndióxi cuéntá sahá ñayivi. ²¹ Coó toho ñayivi cachi xihín ndo: “Yóho ín a”, á “Cáa ín a.” Mé a ndaa ná cahan i xihín ndo sa naxinu va quiví ta viti tañu mé ndó nacasáhá comí Ndióxi cuéntá sahá ñayivi —nacachi Jesús xihín na fariseo cán.

²² Anda já nacasáhá cáhí a já xihín na xíca tuun xihín á:

—Vaxi quiví tá cúní ndó cuni ndó yehe, da nachindahá Ndióxi nduu ñayivi vatí ná coo i in quiví cuití va. Joo a cóo toho i xihín ndo. ²³ Ta queta ñayivi cachi xihín ndo: “Yóho ín da.” Á tá coó ta cachi na xihín ndo: “Cán ín da”, cachi na xihín ndo. Joo coto a cühun ndó candehé ndo. A cándico ndó jata ná cühun ndo. ²⁴ Jáchi tá ná xinu ndusa quiví quixi yehe já cuni ndó quixi i tá quiahva quixi tasa. Ta ndijáá ñayivi cuni na ndá quiahva ndiyehé a tá xoo tá xoo. Quiahva já coo tá ná xinu quiví quixi yehe, da nachindahá Ndióxi nduu ñayivi. ²⁵ Joo jihna ñúhú ndítahan nuú i ndoho ndivaha ini i. Ta a juú quiahva candají ñayivi ndúu tiempo viti yehe. ²⁶ Tá quiahva nasahiin tiempo tá nasahiin Noé sanahá quiahva já coo ri tá ná xinu coo quiví quixi ri yehe, da nachindahá Ndióxi nduu ñayivi. ²⁷ Jáchi mé tiempo cán xíxi na ta xíhi na ta cája na vicó tándaha janda quiahva naxinu quiví naquihvi Noé ini barco cáhnu. Já naxinu javí quíni ndivaha ta najahvi ñuyiví xihín ticuí já naxihí ndihi ñayivi nasanduu tiempo cán. ²⁸ Ta quiahva já nasahiin ri mé tiempo tá nasatacu Lot sanahá. Janda joho cáxixi ñayivi ta janda joho cáxihí na ta janda joho xéen na ñaha ta janda joho jícó na ñaha ndúu na janda joho cáxutu na ta janda joho cávaha na vehe na. ²⁹ Ta tá naxinu quiví najandacoo Lot ñuu Sodoma cán já naqueta da cuahan da xihín na vehe da

já naçuyu ñúhu xihín yuu cáyi chí indiví ta já naçihí ndihi ñayivi nasanduu cán. ³⁰ Quiahva já caja ñayivi mé tiempo já jáchi ndihi ini na catacu na janda quiahva xinu coo quiví quixi tucu yehe ñuyiví yóho, mé da nachindahá Ndióxi nduu ñayivi.

³¹ Ta ndá ndó, na ndúu jata véhe ndó mé quiví já a quihvi ndó ini vehe ndó ña tavá ndó ñaha cómi ndo. Ta ndá ndó, na ndúu yúcu a ndíxi ndó vehe ndó. ³² Ndítahan ndicuhun ini ndó ndaja ñandoho ñá cúu ñájíhi Lot jáchi naçava jata nuu ña sándehe ñá ña najándacoo ñá ta já nandihí saha mé ñá cán. ³³ Ndá na chinúu ínimá jata ñaha ñuyiví yóho, na cán cúu na ndihi saha. Joo ndá na ndíquiahva mé ndáha mí i ta íin tiaha na quivi na sahá i, na cán cúu na catacu anda ama cáa quivi.

³⁴ Mé a ndaa ná cahan i xihín ndo ña tá ná xinu quiví cán já ndiquehe e na cúu cuéntá mí i. Cacu a tátuhun tá ndúu ivi na quíji na in xito ta in na ndiquehe e ta inga na candoo va sahá ña coo nacandúsa na mí i. ³⁵ Ta tá ndúu ivi na ndíco na ta in ñá ndindita cuhun xihín i ta inga ñá candoo va. ³⁶ Ta tá ndúu ivi dataa yúcu xútu da ta in da ndindita cuhun xihín i ta inga da candoo va —naçachi Jesús.

³⁷ Tá naçini joh na xíca tuun xihín Jesús ña yóho já nañaca tuhún na mé á já naçachi na já xihín á:

—Ta ndachi yaha tóco ndihi ña cáchi ndó xihín nde yóho, xitoho.

Anda já naçachi Jesús já xihín ná:

—Tá quiahva cája tiyocó tá táca ri nu cándúhu in quíti, rí naçihí quiahva já caja ñayivi taca na nuú i tá ná xinu quiví quixi i —naçachi Jesús.

**Tá naçica in ñá cuáan
ñamaní nuú da cúu juéxe**

18 Nasacu Jesús in quiahva nu ná jáchi xihín quiahva yóho cúni a

jánaça nu ná ña ní tiempo xíní ñúhú caça tahví na nu Ndióxi ta co ndítahan cuitá ini na xihín á. ² Já naçachi a já xihín ná:

—In nuu nasahin in juéxe ta coo nasahin toní ñúhú da xihín Ndióxi ta ni co sáhní da mé dá cúu ñayivi. ³ Ta mé nuu cán nasahin in ñá cuáan. Ta ndijáa ní quiví sahan ña cahan ndahví ña xihín mé juéxe cán ña ná caja víf da sahá ña sahá in na co cúni táhan xihín ña. ⁴ Ta sa cuhá quiví ta já cúu va ña sahan ñá nu dá ta co cúni da caja víf da saha ña. Joo tá nandihí já naçahan da já: “Vatí coo toní ñúhú i xihín Ndióxi ta ni co sáhní i mí i cúu ñayivi ⁵ joo já caja tá caja víf i saha ña cuáan yóho jáchi jándihí ndivaha ña yehe sahá ña cán ndiquehe e saha ña já ná a quixi ga ña jándihí ñá ini i”, naçahan da cúu juéxe cán —naçachi Jesús xihín ná.

⁶ Anda já naçachi Jesús já xihín na ndúu cán já:

—Ña yóho quea naçachi juéxe, da co ñehe ínimá vaha cán. ⁷ Joo cáhnu ga ví ñaha caja Ndióxi tá ná ndiquehe a sahá na cúu cuéntá mé á tá xíca tahví na nu á nuú ta ndiví. Jáchi ndáti tiaha chindee a na cúu cuéntá mé á. ⁸ Mé a ndaa ná cahan i xihín ndo ña ivi laá ndiquehe mé á saha ná. Joo in ñaha cúni ndaça tuhún i ndohó. Á ndiñehé e ñayivi cándeé ini na yehe tá ná xinu quiví quixi tucu u ñuyiví yóho —naçachi Jesús xihín ná.

**Sácú Jesús quiahva sahá
in da fariseo xihín sahá da
játaca jihún cuéntá impuesto**

⁹ Anda já nasacu Jesús inga quiahva nuú java ñayivi, na ndiñehe jíco mé, na cáhan ña mé cuití na cája ña vaha. Ta já naçasahá cáchi a já xihín ná:

¹⁰ —In tañu ivi ta naçahan da veñuhu caça tahví da nu Ndióxi. In táhan da cán cúu fariseo ta inga da cán cúu da játaca jihún cuéntá impuesto. ¹¹ Ta

nani xíca tahví da fariseo cán nu Ndióxi cándichi da já cáchi da já: “Tátá Ndióxi, ndiquiahva i ndixahvi nu ndo jáchi co cája i tá quiahva cája java ga ñayivi. Jáchi java na cája cuíhna na ta quini cája na ta cátóo na coo na xihin ñájíhí ñani táhan na. Ta jári ndiquiahva i ndixahvi nu ndo jáchi co cája i tá quiahva cája da játaca jiuhn cuéntá impuesto yóho. ¹² Jáchi yehe ivi tañu xíjuhun i in in semana ta tá cháhvi na yehe sahá chuun cája i já cávaha i uxu táhndá ta já jóco i in táhndá nu mé ndó”, cáchi da fariseo cán. ¹³ Joo da játaca jiuhn cuéntá impuesto cán xíca xíca nasandichi da ta chí ni nuu dá co cúní da ndínehe da indivi sahá ña cáhán da ña coo saha dá caja da ña. Ña cája da queá cáni da yíca ndicá da ta já cáchi da já xíca tahví da nu Ndióxi: “Tátá Ndióxi, cándahví ini ndó yehe jáchi cúu u in da cája cuachi”, cáchi da. ¹⁴ Mé a ndaa ná cahan i xihin ndo ña nacaja cáhnu ini Ndióxi sahá da játaca jiuhn cuéntá impuesto já cuanúhu va da joo coo nacaja cáhnu ini a sahá da fariseo cán. Nacaja cáhnu ini Ndióxi sahá da játaca jiuhn cuéntá impuesto jáchi ndá na ndínehe jíco mé jánuu ndáha Ndióxi na. Joo ndá na jánuu mé nu Ndióxi já jándínehe jíco mé á na —nacachi Jesús xihin ná.

Cája yij Jesús na valí

(Mt. 19:13-15; Mr. 10:13-16)

¹⁵ Ta cuahá ñayivi ñéhe na na valí naxinu coo na nu Jesús já ná caní ndaa ndáha á na. Joo tá naxini na xíca tuun xihin Jesús cán ña yóho, nacasáha na cája cuehe na xihin mé na ndáca na valí cán. ¹⁶ Joo nacana Jesús na já nacachi a já xihin ná:

—Quiahva ndó ñamaní ná quixi na valí nuu i. Ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho. ¹⁷ Mé a ndaa ná cahan i xihin ndo ndá

na co cúní ndiquiahva na mé ná ndáha Ndióxi tátuhun cája na valí yóho já queá a cúu cacomí Ndióxi cuéntá saha ná —nacachi Jesús xihin ná.

Cáhan in da cuicá xihin Jesús

(Mt. 19:16-30; Mr. 10:17-31)

¹⁸ In táhan da sáhndá chuun cán nandaca tuhún da Jesús já nacachi da já xihin á:

—Maestro, mé ndó cúu ndó ta vaha ña cán queá ndáca tuhún i ndohó ndía ndítahan caja i já ná ñehe táhvi i cuhun i indivi coo i anda ama cáa quivi —nacachi da xihin Jesús.

¹⁹ Anda já nacachi Jesús já xihin dá:

—Ndá cuéntá queá cáchún xihín i ña cúu u da vaha. Ni in tuhún toho ñayivi co cúu ná na vaha ñuyivi yóho. In tuhún Ndióxi cuití va queá vaha. ²⁰ Sa xini vún ña sáhndá Ndióxi nuun cajún já cáchi a já: “Coto a coún xihin ñájíhí á yí ñani táhún. Coto a cáhnún ndíi. Coto a cája cuíhnún. Coto a cáhun ña tuhún sahá ñayivi. Ta caja cáhnún tátún nánún” —nacachi Jesús xihín da cuicá cán.

²¹ Anda já nanducú ñehe da cán tuhun nu Jesús já nacachi da já xihin á:

—Janda ta loho i nacasáha i cája i tóco ndíhi ña sáhndá Ndióxi caja i —nacachi da xihin Jesús.

²² Tá naxini johó Jesús ña nacachi da yóho xihin á já nacachi a já xihin dá:

—Inga ñaha cámaní cajún: Cuáhán jícún tóco ndíhi ñahún jan ta ndicahnda jiuhn jan nuu na ndahví já ñehe táhvun coo cuahá ñahún indivi. Ta tá nandíhi já quisún candicún yehe —nacachi Jesús xihin dá.

²³ Tá naxini johó da cuicá cán ña nacachi Jesús xihin dá já nacacuéha ndivaha ini da jáchi iin cuahá ndivaha ñaha dá. ²⁴ Tá naxini Jesús ña nacacuéha ini da cuicá cán já cáchi a já:

—Ndaja yáncá ndivaha cáa já ndiquiahva na cuicá mé ná ndáha

Ndióxi ña ná cacomí a cuénta saha ná.
²⁵ Jáchí janda cama chága cuu yaha in camello ini in yávi saha yítucú a juú ga ña ná ndiquiahva in na cuicá mé ná ndáha Ndióxi ña ná cacomí a cuénta saha ná —nacachi Jesús.

²⁶ Tá naxini joho ñayivi ndíta cán ña nacachi Jesús já nacachi na cán já:

—Ndá na cúu na cuu cacu ndaa ínima, dá já.

²⁷ Anda já nacachi Jesús já xihin ná:

—Ndióxi quea cuu caja tóco ndihi ñaha vatí ñayivi a cuú caja na ña — nacachi Jesús xihin ñayivi ndúu cán.

²⁸ Anda já nacachi Pedro já:

—Candehé ndo, xitoho i. Ndehe najándacoo nde tóco ndihi ña nasacomí nde ta ndíco nde ndohó —nacachi da xihin Jesús.

²⁹ Anda já nanducú ñehe Jesús tuhun nu dá já nacachi a já:

—Mé a ndaa ná cahan i xihin ndo ña ndá na jándacoo vehe á tátá náná na á ñani na á ñájíhí na á jahyi na sahá ña cúní na ña ná cacomí Ndióxi cuénta saha ná, ³⁰ na cán cúu na ñehe cuaha chága ñaha ñuyíví yóho jata tóco ndihi ña najándacoo na. Ta vaxi quíví já ñehe táhví ri na catacu na indiví anda ama cáa quíví —nacachi Jesús.

Cáxi tuhun tucu Jesús ña quivi a

(Mt. 20:17-19; Mr. 10:32-34)

³¹ Tá nandihí já natavá xóo Jesús ndíhuxu iví na xíca tuun xihin á cán. Já nacachi a já xihin ná:

—Viti cohó chí ñuu Jerusalén nuú xinu coo tóco ndihi ña nacahyí na profeta sahá yehe, da nachindahá Ndióxi nduu ñayivi. ³² Jáchí mé ñuu cán tiin na yehe já ndiquiahva na yehe ndahá na tóho. Cuacu ndaa na yehe. Canahá na xihín i. Cuihna ndaa na tójí na yehe.

³³ Cani na yehe. Ta tá nandihí já cahní na yehe. Joo tá ná yaha uní quíví já nditacu tucu u tañu na naxihí —nacachi Jesús.

³⁴ Joo na xíca tuun xihin á cán ni loho coo nacandaa ini na ña cúní Jesús cachi a xihin ná. Jáchí cúu á ñaha ña coo nacuu candaa ini na saha.

Tá nandaja vaha Jesús in da cuaá ñuu Jericó

(Mt. 20:29-34; Mr. 10:46-52)

³⁵ Tá nacayati Jesús ñuu Jericó cán ta yati jín íchi nu xíca mé á cuahan cán ín coo in da cuaá sáti da. ³⁶ Ta tá naxini joho da ña yáha cuahá ñayivi cuahan na já nacasáhá da ndaca tuhún da ndíá cúu.

³⁷ Anda já nacachi na já xihin dá:

—Jesús, da ñuu Nazaret, da cán cúu da yáha cuahan yóho —nacachi na xihin dá.

³⁸ Anda já nacasáhá da cuaá cán cáyuhú da já cáhí da já:

—Jesús, da naquixi chichi David, caja ndó ñamaní candáhví loho ini ndó yehe —cáhí da.

³⁹ Joo ñayivi, na cánúú cuahan xihin Jesús cán nacasáhá na caja cuhe na xihin dá ña ná caji da yúhu dá. Joo ví ga ví nacasáhá da cáyuhú da já cáhí tucu da:

—Ndóhó, da naquixi chichi David, caja ndó ñamaní candáhví loho ini ndó yehe —cáhí da cáyuhú da.

⁴⁰ Anda já nacandichi Jesús já nasahnda chuun ña ná cañehe na da cuaá cán nu á. Ta tá naxinu da nu á já nandaca tuhún a da. ⁴¹ Já nacachi a já xihin dá:

—Ndíá cúnun ná caja i xuhun — nacachi Jesús xihin dá.

Anda já nanducú ñehe da cuaá cán tuhun nu á já nacachi da já:

—Ndaca ndehé e cúní i, xitoho i — nacachi da.

⁴² Tá nandihí já nacachi Jesús já xihin dá:

—Candehé viti. Nandivahún jáchí cán-deé inún yehe —nacachi Jesús xihin dá.

⁴³ Chí iví laá nanuna nuú da cuaá cán. Ta chí a juú quiahva caja cáhnu

da Ndióxi. Ndíco da Jesús cuahan da. Ta jári tóco ndihi ñayivi tá naxini na ña yóho já nacasáhá na cája cáhnu na Ndióxi.

Tá cáhan Jesús xihín in da naní Zaqueo

19 Tá nandihí já nandihvi Jesús ñuu Jericó cán já xíca mahnú ñuu cuahan. ²Tá cán nasahin in da cuicá naní Zaqueo, da cúú da sacuaḥa nuú na játaca jjuhún cuéntá impuesto. ³Tá cúní da cuni da Jesús joo a cuú cuni ñahá da jáchi cáti cuahá ndivaha ñayivi nu Jesús. Ta mé dá cō xínū cōo da cuni ñahá da jáchi cúú dá da ndihí. ⁴Chí xínu da nancanuú da nuú ñayivi cuahá cán já nandaa da nuú in yíto yati mé jīn íchi, mé nuú yaha Jesús cán ña ná cuni ñahá da. ⁵Tá tá nayaha Jesús yati saḥa yíto cán já nandiñehe nuú á nu cánúu da cán. Já nacachi a já xihín dá:

—Zaqueo, cuánuu quíi jáchi cúní coo tóo i vehún quívi víti —nacachi Jesús xihín dá.

⁶Anda já ndáva nihni Zaqueo nanuu da nu yíto cán. Já cávatá da nandiquehe vaha da Jesús cañehe da a cuahan da xihín á vehe da. ⁷Joo tá naxini tóco ndihi java ga ñayivi cán ña yóho já nacasáhá na cáhan núu na saḥa Jesús. Ta cáhí na ña cuahan mé á coo tóo a vehe in dataa, da cája cuahá cuachi. ⁸Tá tá sa ndúu ndihi na vehe Zaqueo já nandaca ndichi Zaqueo já nacachi da já xihín Jesús:

—Candehé ndo, xitoho i. Cahnda java ndaa i ñaha cómi i ta já ndicahnda i ña nuú na ndahví. Ta ndá na nacaja cuíhná i ñaha, na cán quiahva i comi táhndá chága ñaha nuu jáchi najándahvi i na —nacachi Zaqueo cán.

⁹Anda já nacachi Jesús já xihín ná:

—Quívi viti cája cáhnu ini Ndióxi saḥa cuachi da yóho xihín cuachi na vehe da jáchi xihín ña nacaja da yóho viti náha

ña mé a ndaa cándéé ini da Ndióxi tá quiahva nacaja Abraham. ¹⁰Ta yehe, da nachindahá Ndióxi nduu ñayivi naquixi i ndinducú u na xíca nuu cája cuahá cuachi jáchi cacu ndaa ínima ná cúní —nacachi Jesús xihín ná ta já naquee a cuahan tucu a íchi chí ñuu Jerusalén.

Tá nasahan in dataa jjuhún da nuú uxu mozo da

(Mt. 25:14-30)

¹¹Tá nani xíní joho ñayivi ña cáhan Jesús já nasacu mé á in quiahva nu ná jáchi cáyati chága mé á ñuu Jerusalén cuahan. Ta mé ñayivi ndíco cuahan cán nacahán na ña tá xínū cōo a ñuu Jerusalén cán chí ivi laá va casáhá Ndióxi cacomí a cuéntá saḥá ñayivi vatí a juú a já. ¹²Anda já nacachi Jesús já xihín ná:

—Nasahin in dataa, da cúú jahyi in rey. In quívi naquee da cuahan xícá da ña ndicojo da chuun cacuu da rey. Tá nandihí nasacu ini da nuḥu da ñuu da. ¹³Joo tá cámaní nuḥu da já nacana da uxu mozo da. Tá nasahan da in in jjuhún nuú in in da cán ta mé jjuhún cán cúú á ña iin ndivaha yahvi. Anda já nacachi da já xihín mozo dá: “Caja ndó ndahvi xihín jjuhún yóho janda quiahva ná xínū quívi ndicó cōo tucu u quixi i”, nacachi da xihín mozo da. Já naquee da cuanúhu dá. ¹⁴Tá ndaja coo ñayivi ñundáhyi xícá cándají na da. Saḥá ña cán quea nachindahá na in táhndá táto ña ná cachi na xihín tátá da ña cō cúní toho na ña ná cacomí da cán cuéntá saḥa ná. ¹⁵Joo já nandicojo da cán chuun cacuu da rey mé ñundáhyi xícá. Tá tá naxínū cōo da cán já nasahnda da chuun ña ná cuḥun na cana na mozo da, da nasahan da jjuhún nu cán. Jáchi cúní da candaa ini da ndaja jjuhún nañeḥe in in da cán jatá jjuhún da. ¹⁶Tá nandihí já naxínū cōo in táhan da nañeḥe jjuhún cán nu dá já nacachi da já: “Candehé ndó, xitoho

i. Nasahan ndó in jjuhún nuú i ta viti nanduu a uxu”, nacachi da. ¹⁷ Andá já nanducú ñehe da cúu rey cán tuhun nu dá já nacachi da já xihín dá: “Vaha ndivaha nacajún xihín ña yóho. Náha ña mé a ndaa cúun in mozo vaha jáchi nacaja ndihún tá ñin nacachi i xuhún cajún xihín jjuhún i vatí loho queá nasahan i nuun caja chúun. Ta viti caja i ña ná cacomún cuéntá sahá uxu ñuu”, nacachi rey cán xihín dá. ¹⁸ Tá nandihí já naxinu coo inga táhan da ñañehe jjuhún cán nu dá já nacachi da já: “Candehé ndo, xitoho i. Nasahan ndó in jjuhún nuú i ta viti nanduu a uhun”, nacachi mozo cán. ¹⁹ Andá já nacachi da cúu rey já xihín dá: “Vaha nacajún sahá ña cán queá caja i ña ná cacomún cuéntá sahá uhun ñuu”, nacachi rey cán xihín dá. ²⁰ Ta tá nandihí já naxinu coo inga táhan da cán já nacachi da já: “Candehé ndo, xitoho i. Yóho ñin mé jjuhún nasahan ndó nuú i. Nachicaan vaha i ña nu jáhma i ²¹ sahá ña yíhvi i ndohó. Jáchi cúu ndó in taa cuehe ndivaha. Ta cátóo ndó ndiquehe maní uun ndó ñaha. Ta cátóo ndó ña ná caja chúun inga ñayivi já jandá xinu uun ndó ndiquehe ndó ñaha ñañehe ná jatá chuun cája ndó”, nacachi mozo cán. ²² Andá já nanducú ñehe da cúu rey cán tuhun nu mozo da já nacachi da já xihín dá: “Coo cúun in mozo vaha nuú i. Xihín tuhun cáhun chícaún cuachi jatun jáchi coo cúnun caja chúun sahá i. Cáchún ña xini vahún cúu yehe in da cuehe ndivaha ta cátóo i quehe e jiquí jjuhún i vatí coo nacaja chúun i sahá. ²³ Sahá ña cán queá ndá cuéntá queá coo nasahan tóun jjuhún i, dá já. Já queá tá ná ndicó coo i já ná ndiquehe e jiquí á nuú na cán, nduu”, nacachi rey cán xihín mozo da. ²⁴ Tá nandihí já nacachi tucu rey xihín java ga ñayivi ndíta cán já: “Candaa ndó jjuhún ndáha dá ta quiahva ndó ña nuú da cómi uxu a jan”, nacachi da cúu rey cán. ²⁵ Andá já nacachi na ndíta cán já

xihín rey: “Candehé ndo, xitoho i. Ndá túni quiahva ri nde jjuhún yóho nuú da sa cómi uxu a cáa jáchi sa cuahá va jjuhún cómi da cáa”, nacachi na xihín rey cán. ²⁶ Já nacachi rey cán já: “Mé a ndaa ná cahan i xihín ndo, ña ndá na sa ñin ñaha nuu, mé na cán ñehe táhvi ná coo chága ña nu ná. Joo ndá na coo ñaha nuu sahá ña coo cája chúun na já queá janda ña loho cómi na ndindaa”, nacachi rey cán. ²⁷ Ta nacachi tucu da já: “Cuáhán ndó quehe ndó ñayivi quini, na coo cúni yehe, na coo naxeen ña ná cacomí i cuéntá sahá na cán já ná quixi na. Ta cahní ndó na ná quivi na nuu táhyi i”, nacachi rey cán —nacachi Jesús ndicani a nuú ñayivi.

Ndihvi Jesús ñuu Jerusalén

(Mt. 21:1-11; Mr. 11:1-11; Jn. 12:12-19)

²⁸ Tá nandihí nacachi Jesús ña yóho xihín ná já ñaquehe tucu a íchi xíca cuahan chí ñuu Jerusalén. ²⁹ Ta tá sa naxinu coo a jini yúcu yitó olivo cán nuú ja chá xinu coo a ñuu Betfagé xihín ñuu Betania cán já nasahnda chuun nuú ivi táhan da xíca tuun xihín á cán. ³⁰ Já nacachi a já xihín dá:

—Cuáhán ndo ñuu loho ndácaan jan. Ta tá ná xinu coo ndó jan ndiñehe ndó in búrró ndíco ndaa jan, rí a ñaha yii ndaa na. Ndaxí ndó rí ta cañehe ndó rí quixi ndó. ³¹ Ta ndá na ná ndaca tuhún ndohó ña ndá cuéntá queá ndaxí ndó rí já cachi ndó já xihín ná: “Mé a cúu xitoho nde xini ñuhú a rí”, cachi ndó xihín ná —nacachi Jesús xihín da cán.

³² Já ñaque ndívi da cuahan da. Ta tá quiahva nacachi Jesús coo chí quiahva já ndusa nasahin. ³³ Jáchi nani ndaxí da búrró cán ndúu da já nacahan mé na xihín jana rí cán saha rí já nacachi na cán já:

—Ndá cuéntá queá ndaxí ndó búrró jana nde jan —nacachi na cán.

³⁴ Andá já nanducú ñehe da xíca tuun xihín Jesús cán tũhun nu ná já ñacachi da já:

—Ndáxí nde ri jáchi mé a cúu xitoho nde, xíní ñúhú a ri —ñacachi da.

³⁵ Já ñaquehe da ri ñehe da cuahan da nu Jesús. Andá já ñachojó ñayivi jáhma ná jata ri já najánda na Jesús jata ri.

³⁶ Ta nani xíca búro cán cuahan ri xihín Jesús já ñachinduu ñayivi jáhma ná íchi nuú yaha ri cán xihín á. ³⁷ Ta yati ñuu Jerusalén, mé nuú ndíca yúcu naní yitó Olivo cán já ñacasáhá cáyuhú tóco ndihi na cúu cuéntá mé á cán. Cája cáhnu na Ndióxi xihín ña cájii íni ná saha tóco ndihi ña náhnu ñaxini na ñacaja Jesús.

³⁸ Já cáchi na já cáyuhú na:

—Ndicáhnu ñahá ná cacuu da cómi cuéntá saha yo yóho jáchi cúu dá da vaxi yuhú nuú Ndióxi. Viti cájii ini na ndúu indiví. Cáhnu ná cacuu Ndióxi —cáchi na cáyuhú na.

³⁹ Andá já ñacachi java na fariseo ñúhu tañu ñayivi cán já xihín Jesús:

—Maestro, jánani ndó na ndíco jata ndó yóho ná a cáyuhú cóhó na —ñacachi na xihín Jesús.

⁴⁰ Joo nanducú ñehe Jesús tũhun nu ná já ñacachi a já xihín ná:

—Mé a ndaa ná cahan i xihín ndo ña tá ná catáji yuhú na yóho janda já yuu ndúu jíin íchi jan casáhá cayuhú a caja cáhnu a yehe —ñacachi Jesús.

⁴¹ Tá ñacayati chága Jesús ñuu Jerusalén cán ta tá ñaxini a ñuu cán já ñacasáhá táhvi ini a sácu a sahá. ⁴² Já ñacachi a já:

—Cúni jánaha i ndohó ndía ndítahan caja ndó já ná coo vaha ínimá ndó nu Ndióxi. Joo co cúni toho ndó candaá ini ndó ña. Ta viti a cúu ga candaá ini ndó ña. ⁴³ Jáchi vaxi quivi tá quixi na co cúni ndohó ta caji nuu na nu ndo ta cani táhan na xihín ndo. Ta ni in xoo a cúu cunu ndó jáchi ní cúu caji nuu na cán já ná a queé ndó. ⁴⁴ Ta jándihi na saha ndo

jáchi cahni na tóco ndihi ndó, na ndúu cán. Ta ni in yuu a cándo jata inga yuu jáchi ña cuyu cacuu ndihi a. Já ndoho ndó jáchi co candaá ini ndó ña ña quixi i jaca cu ndohó já ná a ndíhi saha ndo —ñacachi Jesús.

Tá ñataxí Jesús na ndúu jícó ñaha yéhe veñuhu

(Mt. 21:12-17; Mr. 11:15-19; Jn. 2:13-22)

⁴⁵ Tá ñaxinu coo Jesús ñuu Jerusalén cán já ñandihvi a veñuhu cáhnu ndácaan ñuu cán. Já ñacasáhá táxi a na ndúu jícó cán xihín na ndúu xéen cán. ⁴⁶ Jáchi ñacaja cuehe a xihín ná ta já ñacachi a já:

—Já cáchi tũhun Ndióxi: “Vehe mí i cacuu a nuú quixi na caça tahvi na nuú i”, cáchi a. Joo ndohó ñandai cuu ndó yóho cája cuíhna ndó nuú ñayivi —ñacachi Jesús.

⁴⁷ Ndijáá ní quivi sahan Jesús veñuhu cáhnu cán jánaha tũhun Ndióxi nuú ñayivi. Joo na cúu sacuaha nuú jutu xihín na jánaha ley Moisés xihín na sacuaha ñuu ndúcu na ndá quiahva caja na cahni na Jesús. ⁴⁸ Joo co ñehe íni na ndaja caja na cahni na Jesús jáchi tóco ndihi ñayivi cúni na taa johu na nu jánaha Jesús.

Tá ñandaca tũhún na Jesús ña yo sahan ñamaní nu á jánaha ñayivi

(Mt. 21:23-27; Mr. 11:27-33)

20 Ta ndaja coo in quivi ndácaan Jesús veñuhu cáhnu jánaha ñayivi ndaja cuu caçu ndaa ínimá ná já ñaxinu na cúu sacuaha nuú jutu xihín na jánaha ley Moisés ta catáhan ri na sacuaha veñuhu ñaxinu coo na xihín ná nu ndácaan Jesús cán. ² Andá já ñacachi na já xihín Jesús:

—Ndá saha queá jánahún ña yóho. Yo já sahan ñamaní nuun cajún ña cájún yóho —ñacachi na cán xihín Jesús.

³Anda já nanducú ñehe Jesús tũhun nu ná já ñacachi a já xihín ná:

—Ndáca tũhún ri yehe va ndohó. Cachi ndó xihín i: ⁴Yo já ñachindahá Juan ña ná quixi da caja ndúta dá ñayivi. Á Ndióxi ñachindahá da, á ñayivi ñachindahá ñahá —ñacachi Jesús xihín na cán ndáca tũhún a na.

⁵Anda já ñacasáhá ndítũhún xihín táhan na sacuaḡa cán já cáchí na já:

—Ndífa cachi yó xihín Jesús yóho. Jáchí tá ná cáchí ña Ndióxi quéa ñachindahá Juan já nducú ñehe Jesús tũhun nu yo já cachi a já xohó: “Ndá cuéntá quéa coó ñaxeen ndó candúsa ndó da, dá já”, cachi Jesús xohó. ⁶Ta tá ná cáchí ñayivi va cúu na ñachindahá Juan já ndicuiṭa ñayivi ta cahní na mí xihín yuu. Jáchí tóco ndihi ñayivi cándaḡa vaha ini na ña Ndióxi quéa ñachindahá Juan jáyaha da tũhun cáhan mé á nuú ñayivi —ñacachi xihín táhan na cán.

⁷Sahá ña cán quéa ñacachi na xihín Jesús ña co xíní toho na yo já ñachindahá Juan ña ná quixi da caja ndúta dá ñayivi. ⁸Anda já nanducú ñehe Jesús tũhun nu ná já ñacachi a já xihín ná:

—Ta ni yehe a cáxi tũhun i xihín ndó yo já nasahan ñamaní nuú i caja i ña yóho —ñacachi Jesús xihín ná.

Sácú Jesús quiaḡva saḡá java mozo, da ñacaja quini xihín xitoho da

(Mt. 21:33-44; Mr. 12:1-11)

⁹Tá nandihí já ñacasáhá Jesús cáhan xihín ñayivi ta já nasacu a quiaḡva yóho nu ná já ñacachi a já:

—Nasahĩin in datḡa ta najándeé cuḡa da tó uva. Ta tá nandihí já nasahan ndojó na mé dó uva cán. Anda já naquee da cuḡahan xicá da cuḡa tiempo. ¹⁰Ta tá ñaxinu coo tiempo jáquee na uva nu dó uva ñaha da cán já ñachindahá da in mozo da ña ná cuḡun da ndiquehe da uva, rí ndítahan nu dá ndiquehe da. Joo mé na cája chúun tóo ñũhu dá cán

naṭiin na mé mozo cán ta ñacani na da ta já cáa unun da nandicó coo da ñacaja na. ¹¹Tá nandihí já ñachindahá mé da xihín ñaha ñũhu cán inga tucu mozo da. Joo quiaḡva já ñacaja ri na xihín da cán va. Ñacanáha na xihín dá ta ñacani na da. Ta já cáa unun da ñachindahá tucu na da nuú xitoho da. Coó ñaha nasahan na nu dá. ¹²Ta mé da xihín ñaha ñũhu cán ñachindahá tucu da inga mozo dá ta quiaḡva já ñacaja ri na xihín da cán va. Najándicueḡe na da ta já nataxí na da.

¹³Ta tá nu ndíhí já ñacahán mé da xihín ñaha ñũhu cán já: “Ña caja i viti quéa chindahá i jahyi maní i jáchí cája i cuéntá coo toní ñũhú na xihín dá tá ná cuni na da”, ñacahán mé da xihín ñaha ñũhu cán. Ta tá nandihí já ñachindahá da jahyi maní dá. ¹⁴Joo tá ñaxini na cája chúun tóo ñũhu dá cán ña vaxi jahyi da já ñacachi xihín táhan na cán já: “Candehé ndo. Yóho vaxi da cúu jahyi xitoho í. Ta tá ná xinu quiví quivi xitoho í ta da yóho cacuu da ndicojo chuun saḡa ñũhu yóho. Cóho cahní yó da já ná candoo ñũhu yóho ndáha mí”, ñacachi xihín táhan na cán. ¹⁵Anda já natavá na da cúu jahyi xitoho cán jata cútu ta cán nasahní na da —ñacachi Jesús.

Anda já nandaca tũhún Jesús ñayivi ndúu cán já ñacachi a já xihín ná:

—Á co xíní ndó ndífa caja da xihín ñaha ñũhu viti. ¹⁶Ña caja da quéa quixi da ta cahní ndihi da na ñacaja chúun tóo nu ñũhu dá. Já ndiquiaḡva da ñũhu dá nuú java ga na já ná caja chúun na nu á —ñacachi Jesús.

Tá ñaxini johó na ndíta cán ña yóho já ñacachi ndihi na já:

—A cándéé Ndióxi coo ña jan já —ñacachi na cán.

¹⁷Joo nasandehé Jesús nu ná já ñacachi a já:

—Ta viti cachi ndó xihín i ndífa cúni cachi tũhun Ndióxi tá cáchí a já: Mé yuu ña najácana da cávaha vehe,

ñā cán cúú ñā nanduu yūú ndúhū sahá vehe ñā íin chága saha, cáchí tūhun Ndióxi.

¹⁸ Ta yehe cúú ū tátūhun in tóto cáhnu. Ta ndá nā ná yaha ndicava jata tóto cán chí chachi ndihi na. Quiahva já ndihi sahá ñayivi tá cō cúnī nā candúsa na yehe. Ta mé tóto cáhnu cán tá ná yaha ndicava jata in ñayivi chícaji ndihī ñahá a cán. Quiahva já ndihi sahá ñayivi ini indayá tá cō cúnī nā candúsa na yehe — nacachi Jesús.

Ndáca tūhún nā Jesús á ndítahan nū ná chahvi na jūhún cuéntá impuesto
(Mt. 21:45-46; 22:15-22; Mr. 12:12-17)

¹⁹ Chí sa mé hora já cúnī nā cúú sacuahā nuú jutu xihín nā jánaha ley Moisés cán tiin na Jesús jáchī nacandaa ini na ñā saha mé va nā cán sácú Jesús mé quiahva nuú ñayivi cán. Joo coó ñatiin na Jesús jáchī ñayihví nā ñayivi ndúu táa johō nū cáhan Jesús cán. ²⁰ Ñā nacaja na queá nachindahá nā java dataa ñā ná cananí da Jesús. Ta ndája da mé dá ñā cúú dá taa vaha ndivaha joo cō cúú da tá quiahva ndáa da. Ta xihín ñā yóho cúnī da cayati da nū Jesús ná candehé da á yaha yúhu á cáhan ndá ñaha ñā cuu cūhun da jicó tūhún da mé á nuú da cúú gobernador. ²¹ Sahá ñā cán queá nacayati da nū Jesús ta nandaca tūhún da mé á já nacachi da já xihín á:

—Maestro, cándaa ini nde ñā cáhan ndó ta jánaha ndó ñā ndaa. Ta cándaa ini nde ñā tá cáhan ndó sahá in ñaha cája ñayivi cúú á sahá ñā sándehe ndó janda ínima ná. Ta cándaa ini nde ñā jánaha ndó ñā ndaa saha íchī cuéntá Ndióxi. ²² Sahá ñā cán queá cúnī nde candaa ini nde viti á ndítahan nuú nde chahvi nde jūhún cuéntá impuesto nuú da cómī cuéntá saha yō ñuu Roma, á cō ndítahan toho nuú nde caja nde ñā —nacachi na cán xihín Jesús.

²³ Joo sa nacandaa va ini Jesús ñā cáhvi núu va ini na sahá ñā cán queá nanducú ñehe a tūhun nū ná já nacachi a já xihín ná:

—Cándaá cáxí táhyí ini í ñā cúnī ndó coto ndojó cuití ndó yehe. ²⁴ Jánaha ndó in táhan jūhún jan nuú í. Yo nahná ta yo quiví queá ndáa nū á —nacachi a xihín ná.

Já nacachi na já:

—Ñehe a quiví xihín nahná da cómī cuéntá sahá yō ñuu Roma —nacachi na xihín á.

²⁵ Anda já nacachi Jesús já xihín ná:

—Ndiquiahva ndó ñaha da cómī cuéntá saha ndó ñuu Roma jan nū dá. Ta ndiquiahva ndó nū Ndióxi ñā cúú ñaha mé á nū á —nacachi Jesús xihín ná.

²⁶ Chí coó nacuu caja na jándahvi na Jesús nuú ñayivi ndúu cán jáchī víi nanducú ñehe ndihi Jesús tūhun nū ná. Ta chí johō cátóntó ndihi ñayivi xihín quiahva nanducú ñehe Jesús tūhun nū ná. Chí nacatáji nā cán.

Ndáca tūhún nā saduceo Jesús á mé a ndaa nditacu tucu ndií

(Mt. 22:23-33; Mr. 12:18-27)

²⁷ Tá nandihí já naquee java nā saduceo cuahan nā cáhan nā xihín Jesús. Ta mé nā saduceo cō cándúsa na ñā ndítacu tucu nā sa naxihí. Tá nasaa nā nū íin Jesús já nacachi na já xihín á:

²⁸ —Maestro, nū ley nacahyi Moisés sanahá natahnda chuun ta cáchí a já: “Tá tándaha in dataa xihín ñájihí da ta tá coó jahyi ñā cacu xihín dá ta tá ná xinu quiví quivi da já queá cáchí ley Moisés ñā ndítahan tandaha tucu ñájihí da xihín da cúú ñani mé ndií cán já ná coo jahyi da cán xihín yuhú nuú ñani da”, já cáchí ley Moisés. ²⁹ Ta viti cuni johō ndó ná cacu nde in quiahva nū ndo. Nasahin usá ñani. Ta da nū cuití cán natandaha dá. Joo nayaha tiempo naxihí da ta coó toho jahyi da nacacu xihín ñájihí da.

³⁰ Andá já natandaha tucu ñá cuáan cán xihín ñani chí ivi mé ndii cán. Joo naxinu quivi naxihí ri da yóho va ta chí coó jahyi da nacacu xihín ñá cán. ³¹ Andá já natandahá da chí uní cán xihín ñá. Joo ni da cán ni java ga ñani da coó nacuu cacu jahyi xihín ñá. Ndihusa da natandaha xihín ñá ta ndihusa da naxihí. Joo ni in da coó nacacu jahyi xihín ñá. ³² Tá nu ndíhí já naxihí ri mé va ñá. ³³ Ñá cúní nde candaa ini nde queá, ndá da cacuu ndusa yíi ñá cán tá ná xinu quivi nditacu tucu ndii. Jáchi ndihusa va ñani da cán natandahá xihín ñá —nacachi na cán ndáca tuhún na Jesús.

³⁴ Andá já nanducú ñehe Jesús tuhun nu ná já nacachi a já:

—Nani ndúu ñayivi ñuyivi yóho cuítí va tándaha ná. ³⁵ Jáchi ndá na nanditacu tucu ta nañehe táhvi ná coo na indivi já queá co tándaha na ta ni co sáhan toho na jahyi jíhí na tándaha ná. ³⁶ Jáchi mé cán cacuu na tátuhun táto Ndióxi já a quivi ga na. Ta cacuu na jahyi Ndióxi jáchi sa nanditacu na tañu ndii. ³⁷ Ta sa xini yo ñá nditacu tucu ndii jáchi já nacachi Moisés sanahá tá nacahyí da sahá ñá naxini da tañu tohínú, dó cándaha ñúhu cáyi cán. Tá nacahan da sahá Ndióxi, nacachi da ñá jandá viti cája cáhnu Abraham xihín Isaac xihín Jacob mé Ndióxi vatí naxihí na sanahá. ³⁸ Ta ñá yóho cúní cachi a ñá tácu yíi va Abraham xihín Isaac xihín Jacob vatí sa naxihí yiquí cuñu na. Jáchi tóco ndihi na cúu cuéntá Ndióxi, tácu na nu mé á —nacachi Jesús xihín ná.

³⁹ Andá já nacachi java na jánaha ley Moisés cán já xihín á:

—Vaha va nacahan ndó, Maestro.

⁴⁰ Ta chí coó nasahan ndeé ga ini na ndáca tuhún chága na mé á.

Jánaha Jesús nuú ñayivi ñá cúu Cristo ta ta cúu á Ndióxi

(Mt. 22:41-46; Mr. 12:35-37)

⁴¹ Andá já nacachi Jesús já xihín ñayivi ndúu cán:

—Ndávaha cáchi ñayivi ñá vaxi Cristo chíchi David. ⁴² Ta ndáa ini Salmos ñá nacahyí David já nacachi da já:

Ndióxi queá nacachi já xihín xitoho i:

“Coo xoo cuáha i yóho,

⁴³ janda quiahva ná caja i ñá ná común cuéntá sahá na co cúní yohó”, nacachi Ndióxi, já nacahyí David sanahá.

⁴⁴ Ndávaha cáchi na ñá vaxi Cristo chíchi David joo mé tiempo cán nacachi David ñá cúu á xitoho da —nacachi Jesús.

Cáhan Jesús sahá cuachi na jánaha ley Moisés

(Mt. 23:1-36; Mr.

12:38-40; Lc. 11:37-54)

⁴⁵ Tóco ndihi ñayivi ndúu cán naxini johó na tá nacasahá Jesús cáchi a xihín na xíca tuun xihín á já:

⁴⁶ —Cuéntá coo ndó xihín na jánaha ley Moisés jáchi cátoó na cándixi na jahmá nání caca nuu na. Ta cátoó na cahan toní ñúhú ndivaha ñayivi xihín ná tá xíca nuu na nuú yahvi. Ta tá cuahan na veñuhu cátoó na cacoo na nu sácoo na ín chága saha. Ta tá cuahan na víco cátoó na coo vaha na. ⁴⁷ Ta cándaa na vehe najihí cuáan. Ta tá nandihí cáni ndivaha cája na xíca táhvi na nu Ndióxi jáchi cúní na jájahvi na nuú ñá núu cája na. Mé a ndaa ná cahan i xihín ndo ñá na jánaha ley Moisés yóho cacuu na na ndoho chága ini caja Ndióxi nu ndíhí —nacachi Jesús.

Ñá najoco in ñá cuáan ndáhvi

(Mr. 12:41-44)

21 Ta ndaja coo ndácaan Jesús ini veñuhu cáhnu cán ta sándehe a

ndá quiáhva táan na cuicá jjuhún ini sato nu jóco ñayivi jjuhún nu Ndióxi. ² Ta jári naxini a naxinu coo in ñá cuáan ndáhví ta ñataán ña ivi jjuhún ña núu yahvi ini mé sato cán. ³ Anda já ñacachi Jesús já xihín na xica tuun xihín á cán:

—Mé a ndaa ná cahan i xihín ndo ña cuaha chága jjuhún ñasahan ñá cuáan ndáhví yóho a juú ga tóco ndihi java ga na cán. ⁴ Jáchi tóco ndihi na java cán sahan na ña yóho nu va na. Joo ñá cuáan ndáhví yóho ñasahan ñá nu Ndióxi tóco ndihi ña cómi ñá catacu ñá —ñacachi Jesús.

**Cáxi tuhun Jesús ña vaxi
quivi ndihi sahá veñuhu
cáhnú ndácahan Jerusalén cán**

(Mt. 24:1-2; Mr. 13:1-2)

⁵ Java ñayivi cán ndítuhún na sahá veñuhu cáhnú ñuu Jerusalén ndíta na. Ta ndítuhún na sahá yuu ndató ndivaha ñacavaha veñuhu cán. Ta cahan na sahá ñaha ñajoco ñayivi nu Ndióxi ndáa cán. Anda já ñacachi Jesús já xihín ná:

⁶—Vaxi quivi ndihi sahá tóco ndihi ña ndíta ndó sándehe ndo yóho. Ta ni jandá in yuu a cándoo jatá inga yuu ña nditani cacuu tóco ndihi ña yóho —ñacachi Jesús xihín ná.

**Ña coo tá ná cayati
quivi ndihi sahá ñuyiví**

(Mt. 24:3-28; Mr. 13:3-23)

⁷ Anda já ñandaca tuhún na Jesús já ñacachi na já xihín á:

—Maestro, ndá ama coo tóco ndihi ña yóho. Ta ndaja coo tá sa ñacayati mé quivi cán —ñacachi na xihín Jesús.

⁸ Anda já ñacachi Jesús já:

—Cuéntá coo ndó ta a quiáhva ndó ñamanj jándahvi ñayivi ndohó. Jáchi quixi cuahá ndivaha na cuéntá mí i ta cahan na ña tuhún tá cachi na já xihín ndo: “Yehe cúu Cristo, da ñachindahá Ndióxi cacomí a cuéntá sahá ñayivi.” Ta cachi

na já: “Viti naxinu coo tiempo ndihi sahá ñuyiví”, cachi na xihín ndo. Joo coto a cándusa ndó candico ndó jata ná cuhun ndo. ⁹ Tá ná cuni johó ndó ña cáni táhan ñayivi ñuyiví yóho, a cáyihví toho ndó. Jáchi ndúsa já ndítahan coo. Joo cámaní yii va jáxinu coo quivi ndihi sahá ñuyiví —ñacachi Jesús xihín ná.

¹⁰ Anda já ñacahan chága Jesús xihín ná já ñacachi a já:

—Ñayivi ndúu in nación ndicujta na cani táhan na xihín na ndúu inga nación ta cani táhan na in ñuu xihín na inga ñuu. ¹¹ Ta quixi cuahá ña taan tá sa ñacayati quivi ndihi sahá ñuyiví. Ta quixi tama ndeé. Ta quixi cuhe nuú ñayivi ndúu cuahá ñuu. Ta chí catóntó ndivaha ñayivi cuni na ñaha náhnú chí indiví. Ta yihví ndivaha na tá cuni na java ñaha xituhún ndivaha.

¹² Joo tá cámaní xinu coo quivi coo tóco ndihi ña yóho já ndicujta ñayivi caja xíxi na xihín ndó, na cándusa yehe. Ta cañehe na ndohó cuhun ndó ini veñuhu na ta cán caja víi na saha ndo sahá ña cándeé ini ndó yehe. Ta taán na ndohó ini vecaa ta já cañehe na ndohó cuhun ndó cavií saha ndó nuú na cúu jutixia xihín nuú na cómi cuéntá sahá ñayivi. Tóco ndihi ña yóho ndoho ndó sahá ña cándeé ini ndó yehe. ¹³ Ta xihín ña yóho cuu ñehe íni ndo cahan ndó sahá i nuú na cán. ¹⁴ Ta a ndícani ini ndó saha ndá tuhun cahan ndó saha mé ndó nuú na cán tá ná xinu ndó nu ná. ¹⁵ Jáchi mí i quiáhva i tuhun nu ndo ta ndaja ndíchí i jini ndo já ná cuu nducú ñehe vaha ndó tuhun nuú na cán. Ta chí a cúu quee vaha yuhú na cán xihín ndo. ¹⁶ Joo cuahá ñayivi jicó tuhún na ndohó. Ta chí jandá tátá ndo á ñani ndó á táhan ndó á na xíní táhan xihín ndo, na cán cacuu na jicó tuhún ndohó cuahá tañu. Ta java táhan ndó, na cándeé ini yehe quivi ndó caja na. ¹⁷ Ta ndijáá ñayivi ñuyiví candají na ndohó sahá ña cándeé ini ndó

yehe. ¹⁸ Joo ni in ñaha a ndóho ndó anda ni in ijí jiní ndó a ndíhi saha. ¹⁹ Ta tá coo ñacuitá ndo xihín tóco ndihi ña núu caja na xihín ndo já xinu ndó canduu ndó indivi anda ama cáa quivi.

²⁰ Tá ná cuni ndó ña ñacava tiyivi soldado jatá ñuu Jerusalén ndúu da, xíní ñúhú candaa ini ndó ña sa ñaxinu quivi ndihi sahá ñuu cán. ²¹ Ña ndítahan caja ndó mé quivi cán quea cunu ndó cuhun ndó chí yúcu tá ndúu ndó chí estado Judea. Ta ndá ndó, ña ndúu ñuu Jerusalén xíní ñúhú jándacoo ndó ñuu jan ta cunu ndó cuhun ndo. Ta ndá ndó, ña ndúu yúcu, a ndícó coo ga ndó ndihvi ndó ñuu Jerusalén yóho. ²² Jáchí mé quivi já cacuu a quivi ndoho ini ñayivi já ná xinu coo tóco ndihi nuú ña ñacachi tuhun Ndióxi coo sanahá ndivaha. ²³ Ndáhví ñacuu najihí tá ñúhu jahyi na mé quivi já. Ta ndáhví ñacuu na tá ñehe ndaa na ña valí táhan ña chíhí yí. Jáchí ndoho ndivaha ini ñayivi ndúu ñuyíví mé quivi já sahá ña xójo ndivaha ini Ndióxi xihín ña cán. ²⁴ Java ñayivi quivi na caja soldado ta java na cao ná já cañehe na ña cuhun ña ndijáá chí ñuu tóho canduu na jáchí ndihi sahá ñuu Jerusalén yóho. Ta já quixi ña ñuu tóho ta casáhá ña cahnda na chuun nuú ñuu Jerusalén yóho janda quiahva ná xinu coo quivi cacu ini Ndióxi ña ná quee na tóho cán cuhun ña.

²⁵ Andá já cuni ndó ña nánhu ndivaha chí nuú candii xihín nuú yoo xihín nuú quimi viti. Ta ñayivi ñuyíví yóho yihví ndivaha na ta chí a candaa ini na ndía caja na jáchí quini ndivaha tacu nuú ndicojo tañuhú. ²⁶ Ta chí janda quivi tóo ñayivi xihín ña yihví ña jáchí casáhá ndicani ndivaha ini na saha tóco ndihi tondóho vaxi ñuyíví yóho. Jáchí janda mé candii xihín yoo xihín quimi ndiquiji nuu a. ²⁷ Andá já cuni ndó yehe, da ñachindahá Ndióxi nduu ñayivi, quixi i tañu vico xihín tóco ndihi ndée cáhnu

i ta chí ndiyihvi ndaa mé nuú quixi i. ²⁸ Tá ná casáhá yaha tóco ndihi ña cáhí i xihín ndo yóho, xíní ñúhú ndindee ini ndó ta ndiñehe ndó nuu ndó jáchí sa ñacayati quivi jácacu Ndióxi ndohó cuhun ndó coo ndó indivi —ñacachi Jesús xihín ná.

Sácú Jesús quiahva sahá tító ñuhú

(Mt. 24:32-35; Mr. 13:28-31)

²⁹ Andá já ñasacu a in quiahva nu ná já ñacachi a já:

—Xíní ñúhú candehé ndo ndá quiahva cája chúun in tító ñuhú, á ndá yító ñacuu. ³⁰ Tá ná cuni ndó ña jandá joho cana núma do já candaa ini ndó ña ñacayati tiempo javi. ³¹ Ta quiahva já tá ná cuni ndó ña sa cúu yaha tóco ndihi ña cáhí i xihín ndo yóho já candaa ini ndó ña sa ñacayati quivi casáhá Ndióxi cacomí a cuéntá sahá ñayivi.

³² Mé a ndaa ná cahan i xihín ndo ña cuni ñayivi ndúu mé tiempo já yaha tóco ndihi ña ñacachi i xihín ndo já quivi na. ³³ Mé a ndaa ña cúu indivi xihín ñundáhyi yóho ndihi sahá joo tuhun ñacahan yehe xihín ndo a ndíhi toho sahá jáchí coo tá coo tá ín ñacachi i xihín ndó coo.

³⁴ Cuéntá coo ndó. Xíní ñuhú candati tiahva ndó quivi quixi i ndiquehe e ndohó. A cáca nuu ndó yóho cáa ña caja ndó ña cúní yiquí cuñu ndó. A cóho ndó caca nuu ndó. Ta a ndíhi ñahá ini ndó ndicani ini ndó sahá ñaha ñuyíví yóho. ³⁵ Tá ná xinu quivi quixi i cacuu a tá tuhun tá sácú jehé in dataa in trampa nuú in quítí sahá ña cúní da tiin da ri. Mé quítí cán co xíní rí ndáchí ín jehé trampa tiin ñahá cán. Quiahva já co xíní ñayivi ndúu ñuyíví ndá quivi quixi tucu u ñuyíví yóho. ³⁶ Xíní ñuhú canduu tiahva ndó quivi quixi i. Níí tiempo xíní ñuhú caca tahví ndo nu Ndióxi já ná ndindee ini ndó tá ná quixi tóco ndihi ña yóho nu ndo ta já ná cuu xinu coo

vaha ndó indiví já ná cuu coo víi ndo nuú yehé, da nachindahá Ndióxi nduu ñayivi —ñacachi Jesús jánaḥa nuú ñayivi cán.

³⁷ Nini quívi nasahin Jesús ini veñuhu cáhnu jánaḥa tuhun Ndióxi nuú na cán. Ta tá nuú já sahan quíji a yúcu yitó Olivo cán. ³⁸ Ndijáá ní quívi naha chá naxinu coo ñayivi veñuhu cáhnu cán jáchi cuni na cuni johó na ña jánaḥa Jesús nu ná.

Jándique táhan na tuhun na ña cahní na Jesús

(Mt. 26:1-5, 14-16; Mr. 14:1-2,
10-11; Jn. 11:45-53)

22 Ta yati tandaa víco pascua tá xíxi ñayivi pan ña coo quée yusá naxiaa xihin. ² Já nacasáhá na sacuaḥa nuú jutú xihin na jánaḥa ley Moisés ndúcu na ndaja caja na cahní na Jesús. A cuú caja na cahní tívi na ña jáchi yíhvi na canahá ñayivi xihin ná.

³ Joo ndaja coo tiñáhá sacuaḥa nandeta nuu rí ínimá in táhan uxu ivi da xíca tuun xihin Jesús. Mé da cán nani da Judas ta Judas Iscariote cáhan na xihin dá. ⁴ Ta nasahan Judas cahan da xihin na sacuaḥa nuú jutú ta xihin na sacuaḥa nuú policía ndáá veñuhu. Ta nandituhún da xihin ná ña cuu caja da jicó túhún da Jesús ta ndiquiahva ñahá dá mé á nu ná. ⁵ Xihin ña yóho ñacajii íni na cán ta nasahan na tuhun na nu Judas ña quiahva na jiuhún nu dá. ⁶ Ta nandúsa Judas caja da ña chí nacasáhá da ndúcu da ndaja caja da ndiquiahva da Jesús nuú na cán tá coo ñayivi ndúu xihin á.

Xijini Jesús víco pascua xihin na xíca tuun xihin á

(Mt. 26:17-29; Mr. 14:12-25;
Jn. 13:21-30; 1 Co 11:23-26)

⁷ Natandaa mé víco tá xíxi na pan ña coo quée yusá naxiaa xihin. Mé víco yóho nasacaja na ña tá nu cuá ta sáhní na ndicachi válí jóco na nu Ndióxi. ⁸ Mé quívi

já nasahnda Jesús chuun nu Pedro xihin nu Juan já ñacachi a já xihin dá:

—Cuáhán ndó caja ndívi ndo ña cajini víco pascua —ñacachi a xihin dá.

⁹ Anda já ñacachi da cán já xihin á:

—Yo vehe cuni ndó cuhun nde ná caja ndívi nde ña cuxú.

¹⁰ Anda já nanducú ñehe Jesús tuhun nu dá já ñacachi a já:

—Tá ná quíhvi ndó ñuu Jerusalén jan já cuni ndó in dataa ta ndójo da in yoo ticuif cuahan da. Candico ndó jata dá cuhun ndo janda quiahva cuni ndó ndá vehe quíhvi da. ¹¹ Ta já cuhun ndó cahan ndó xihin mé da xihin ñaha vehe cán já cachi ndó já xihin dá: “Da jánaḥa ndehe cúu da cáchi xuhun: Ndáchí íni nuú coo i cajini i víco pascua xihin na xíca tuun xihin i.” ¹² Anda já jánaḥa mé da cán in cuarto cáhnu ña cánúu jini véhe piso ninu. Sa íni tiḥva va ña. Cán caja ndívi ndó ña cajini —ñacachi Jesús.

¹³ Anda já ñaquee ndívi da cán cuahan da. Ta tá íni ñacachi Jesús xihin dá coo quiahva já ndusa nasahin. Ta chí ñacaja ndívi da tóco ndihi ña cajini na víco pascua.

¹⁴ Tá naxinu coo hora cajini na já nasacoo Jesús xihin tóco ndihi na xíca tuun xihin á nu mesa. ¹⁵ Anda já ñacachi Jesús já xihin ná:

—Sa xíca ndivaha ini i cajini i víco pascua yóho xihin ndó nani íni tóo i xihin ndo jáchi vaxi quívi quivi i. ¹⁶ Jáchi mé a ndaá ná cahan i xihin ndo janda ná xinu quívi cacomí Ndióxi cuéntá sahá ñayivi anda jávi cajini tucu u víco pascua xihin ndo —ñacachi Jesús xihin ná.

¹⁷ Anda já natiin a in vaso nu ñúhu tó uva ta nandiquiahva ndixahvi nu Ndióxi. Ta já ñacachi a já xihin na xíca tuun xihin á:

—Coho ndó dó ñúhu ini vaso yóho ta cahnda java ndó dó nu táhan ndó.

¹⁸ Jáchi a ndíco coo ga i coho i tó uva janda quiahva ná xinu coo quívi

cacomí Ndióxi cuéntá sahá ñayivi — ñacachi Jesús xihín ná.

¹⁹Tá nandihí ñatiin a pan ta nandiquiahva ndixahvi nu Ndióxi sahá. Anda já ñasahnda java ña já ñasahan ña nuú ná xíca tuun xihín á cán já ñacachi a já xihín ná:

—Mé pan yóho cúú á tátuhun yiquí cuñu i jáchi ndiquiahva i mí i quivi i sahá ndihí ndó. Xíní ñúhú caja ndó ña yóho ña ná ndicuhun ini ndó ña naxihí i saha ndó —ñacachi Jesús xihín ná.

²⁰Tá sa nandihí naxijíni na ta já ñatiin a vaso nu ñúhu tó uva ta já ñacachi a já:

—Dó ñúhu ini vaso yóho cúú dó tátuhun níj i jáchi cahní na yehe ta cuiña níj i saha ndihí ndó. Ta xihín ña yóho xinu coo nuú tuhun nasahan Ndióxi nuú ñayivi sanahá tá ñacachi a jácacu a ñayivi.

²¹Cuni johó vaha ndó ná cahan i xihín ndó. Nu mesa yóho íin coo da jicó túhún yehe. ²²Jáchi janda sanahá ñasacu ini Ndióxi ña ndítahan ndoho ini yehe, da ñachindahá mé á nduu ñayivi. Joo ndáhví ñacuu da jicó túhún yehe — ñacachi Jesús.

²³Xihín ña ñacachi Jesús yóho ñacahá na xíca tuun xihín á cán ndáca tuhún táhan na saha ndá da cúú da sácú ini chuhun jicó túhún ñahá.

Ndítuhún ihvi xihín táhan na xíca tuun xihín Jesús

²⁴Tá nandihí já ñacahá ndítuhún ihvi xihín táhan da xíca tuun xihín Jesús cán sahá ndá da cúú da íin chága saha.

²⁵Sahá ña cán queá ñacachi Jesús já xihín ndihí da cán:

—Ndijáá ñuyiví sáhná rey chuun nuú ñayivi tá quiahva cúni mé dá. Ta jári cúni da ña ná cachi ñayivi saha dá ña cúú dá da cája vaha. ²⁶Joo coo ndítahan coo ña cán tañu mé ndó. Ña ndítahan caja ndó queá tá in ndó cúni ndó cacuu ndó da íin chága saha, xíní ñúhú jánuu

ndáha ndó mé ndó tátuhun da loho chága nu ndíhi ndó. Ta ndá da cúni cahnda chuun, xíní ñúhú cacuu da tátuhun in da cája ndívi nu mesa xitoho da. ²⁷Mé ndó sa cánda vaha ini ndó ña íin chága sahá da íin coo nu mesa a juú ga da cája ndívi ñahá. Joo yehe najánuu ndáha i mí i ta nduu u tátuhun in da cája ndívi nu ndo.

²⁸Ndóhó cúú ndó na ñasanduu tuun xihín i nu tóco ndihí ña ihvi ñaquixi nuú i. ²⁹Sahá ña cán queá tá quiahva ñacaja tátá i ñamaní xihín i ña ná cacomí i cuéntá sahá ñayivi quiahva já caja i ñamaní xihín ndó ³⁰ña ná ndítutú ndó canduu ndó xihín i tá ná cacomí i cuéntá sahá ñayivi. Ta já ná cuu caja víi ndó sahá na ñaquixi ndíhuxu ivi táhndá na ñaquixi chichi Israel —ñacachi Jesús xihín ná.

Cáxi tuhun Jesús ña chijehé tuhun Pedro ña xini da mé á

(Mt. 26:31-35; Mr.

14:27-31; Jn. 13:36-38)

³¹Anda já nandicahan Jesús já ñacachi a já xihín Pedro:

—Simón, cuni johó vahún. Jáchi ñaxica Satanás, mé tiñahá sacuahá ñamaní ña ná coto ndojó rí tóco ndihí ndó tá quiahva jáxixi na trigo. ³²Joo sa ñaxica tahví i nu Ndióxi saha yóhó, Simón já ná a jándacoún ña cándeé inún yehe. Ta tá sa nandicó coo inún xihín ña cajún jan, ndítahan chindeún java ga na cándeé ini yehe já ná coo ndacu na íchi cuéntá mí i —ñacachi Jesús xihín dá.

³³Anda já nanducú ñehe Pedro tuhun nu Jesús já ñacachi da já xihín á:

—Candehé ndo, xitoho i. Yehe sa íin tiaha i chuhun i veca xihín ndo. Ta janda ná cahní na yehe xihín ndo tá cúni na jáchi sa íin tiaha vi —ñacachi da xihín Jesús.

³⁴Já ñacachi Jesús já xihín dá:

—Candehé Pedro ná caḥan i ña ndaa xuhun. Mé quiví viti tá cámani cana chéle já uni tañu chijehé tuhún sahá i ta caḥún ña co xini tohún yehe —nacachi Jesús xihin dá.

**Cáxi tuhun Jesús ña
sa cáyati hora ndoho ini a**

³⁵Tá nandihí já nandaca tuhún Jesús na xica tuun xihin á cán já nacachi a já xihin ná:

—Jihna nachindahá i ndohó cuhun ndó caḥan ndó tuhun Ndióxi ta nacachi i xihin ndo ña ná a cañehe ndó yátí ni jjuhún ta ni inga ndusa a cañehe ndó cuhun xihin ndo. Á nandimaní ñaha nu ndo tá nasahan ndo já —nacachi Jesús xihin ná.

Já nacachi na já:

—Ni in ñaha coo nandimaní nuú nde —nacachi na.

³⁶Anda já nacachi tucu a já xihin ná:

—Joo viti coo ga ña cán coo. Viti cáchí i xihin ndo ña tá iin yátí nu ndo, xini ñúhú cañehe ndó ña cuhun ndo. Cañehe ndó jjuhún ndo tá ná quee ndó cuhun ndo. Ta tá coo machiti nu ndó, xini ñúhú jicó ndó jahmá ndeé ndo já cueen ndó machiti ña ná coo tiahva ndó. ³⁷Jáchí sanahá nacahyi a nu libro yii Ndióxi ta sahá yehe nacahan tá nacachi a já: “Nacachi ñayivi cúú dá ta quini sahá ña cán quea nachitahan na da xihín ñayivi quini.” Tóco ndihí ña nacahyi nuú tuhun Ndióxi sahá yehe sanahá xini ñúhú xinu coo a viti —nacachi Jesús.

³⁸Anda já nacachi na xica tuun xihin á cán já:

—Candehé ndo, xitoho nde. Yóho ñéhe nde ivi machiti —nacachi na.

—Sa iin vaha —nacachi Jesús xihin ná.

**Cuḥan Jesús Getsemaní
caca tahví a nu Ndióxi**

(Mt. 26:36-46; Mr. 14:32-42)

³⁹Tá nandihí já naquee Jesús cuḥan yucu yito Olivo nu sá sahan tuun a ca-ca tahví a nu Ndióxi. Ta já ndico ndihí na xica tuun xihin á cán jatá cuḥan na. ⁴⁰Ta tá sa naxinu coo na cán já nacachi a já xihin ná:

—Caca tahví ndó nu Ndióxi já ná a ndícava ndó nuú cuachi tá ná coto ndojó tiñhá ndohó —nacachi Jesús xihin ná.

⁴¹Tá nandihí já natavá xoo Jesús mé á tañu na cán já nasahan tátuhun in quiahva nu xinu coo in yuu tá jání yó ña xihin ndáha yo. Quiahva já nacaxicá mé á tañu na cán já nacaxítí a xica tahví a nu Ndióxi. ⁴²Já nacachi a já:

—Tátá Ndióxi, á cuu caja ndó ñamaní já ná a ndóho i ña ihvi ndivaha ña vaxi nuú i ndoho i. Joo ná coo tá iin cúni mé ndó ná a coo toho ña cúni yehe —cáchí Jesús xica tahví a.

⁴³Anda já nacanaha in táto Ndióxi indiví já naxinu a sahan tuhun ndeé ini Jesús. ⁴⁴Ta nacasahá ndóho ndivaha ini Jesús jáchí nacacueha ini a. Sahá ña cán quea nanducú ndéé chága ví a xica tahví a nu Ndióxi. Ta chí ndícaa mé teen á nu ñúhú ta dó cán cúú dó tátuhun ni cúyu nu ñúhú.

⁴⁵Ta tá nandihí naxica tahví a nu Ndióxi já nandaca ndichi a já naquee a cuḥan nu ndúu na xica tuun xihin á cán. Ta nanditahan mé á na ndúu na quiji na. A juú quiahva cándíí ini na sahá ña cán nanaá ini na naquiji na. ⁴⁶Anda já nacachi a já xihin ná:

—Ndá cuéntá quea quiji ndo ndúu ndó. Cuáhán ndacoo ndó ta caca tahví ndó nu Ndióxi já ná a ndícava ndó nuú cuachi tá ná coto ndojó tiñhá ndohó —nacachi Jesús xihin ná.

Tá natiin na Jesús

(Mt. 26:47-56; Mr. 14:43-50; Jn. 18:2-11)

⁴⁷ Janda cáhan chá va Jesús xihín na xíca tuun xihín á cán cándichi a já naxinu cuahá ndivaha ñayivi nu íin a. Ta in táhan da uxu ivi xíca tuun xihín á, da naní Judas cán, da cán cúú da ndáca ñayivi vaxi da. Ta ñacayati da tatí yúhu dá sajóho Jesús. ⁴⁸ Anda já ñacachi Jesús já xihín dá:

—Judas, tatí yúhun sajóho i tátuhun da quíhvi ini yehe. Joo xihín ña cájún jan ndíquiahvún yehe ndahá na co cúni yehe, da nachindahá Ndióxi nduu ñayivi —ñacachi Jesús.

⁴⁹ Tá ñaxini tóco ndihi na ndúu xihín Jesús cán ña cúú já ñacasáhá ndáca tuhún na mé á já ñacachi na já:

—Á cúni ndó, xitoho nde ña ná ndicuíta nde xihín machiti caní táhan nde xihín ná —ñacachi na.

⁵⁰ Joo in táhan da xíca tuun xihín Jesús cán najándicuehe da in da cúú mozo da sacuahá nuú jutú cán jáchi ñachitúhun dá johó xoo cuáha da. ⁵¹ Joo já ñacachi Jesús já xihín ná:

—Sa íin vaha. A cáni táhan ndó xihín ná —ñacachi Jesús.

Tá ñandihí já ñacani ndaa ndáha mé á johó mozo cán já ñandaja vaha mé á da. ⁵² Ta ñacasáhá cáhan Jesús xihín na sacuahá nuú jutú cán xihín na sacuahá nu políca ndáa veñuhu xihín na sacuahá veñuhu cán, mé na ñacasaa tiin na Jesús já ñacachi a já xihín ná:

—Cája ndó xihín i tátuhun cája na xihín taja cuihná jáchi ñaqueta ndó vaxi ndó tiin ndó yehe xihín machiti ta xihín yíto. ⁵³ Joo coo a ná caja toho ndó xihín i tá ñasahin i tañu ndó veñuhu cán. Joo núná nu ndó viti caja núu ndó jáchi ñasahan Ndióxi ñamaní ña ná tiin ndó yehe. Jáchi ñacuaá viti ta chindee

tiñhá sacuahá ndohó caja ndó ña núu —ñacachi Jesús xihín na cán.

Tá ñachijehé tuhun

Pedro ña xini da Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Anda já natiin na Jesús. Já ñehe na a cuahan na vehe da cúú sacuahá nuú jutú cán. Ta xíca xíca ndíco Pedro jata ná cuahan da. ⁵⁵ Ta tá naxinu coo ñayivi cán yuhú yéhe da cúú sacuahá nuú jutú cán já ñandicahmi na ñúhu ñasacoo na xítúni na. Já naxinu coo ri Pedro ñasacoo da tañu na cán xítúni da. ⁵⁶ Joo ndaja coo in ñañáha cája chúun vehe jutú sacuahá cán ñaxini ná íin coo da xítúni da yávi núhu cán. Ta ñacasáhá sándehe ná nu dá já cáchi ná já:

—Da xíca tuun xihín Jesús cúú ri da íin coo yóho va —ñacachi ná cán.

⁵⁷ Joo ñacasáhá Pedro chíjehé tuhun da já ñacachi da já:

—Candehé, ñañáha. Co xini toho i ndá da cúú da jan —ñacachi Pedro xihín ná cán.

⁵⁸ Chá va ta ñaxini inga dataa Pedro ta já ñacachi da já xihín dá:

—In táhan da xíca tuun xihín Jesús cáa cúú ri yóho va —ñacachi da cán xihín Pedro.

Anda já ñacachi Pedro já:

—Uhun. A juú toho táhan na cán cúú yehe —ñacachi da.

⁵⁹ Ta tá sa ñayaha tátuhun in hora já ñacachi inga dataa já:

—Mé a ndaa da xíca tuun xihín Jesús cúú ri da yóho va jáchi cúú dá da estado Galilea.

⁶⁰ Anda já ñacachi Pedro já xihín dá:

—Co xini toho i ndá saha cáhun —ñacachi Pedro.

Tá chí mé hora já nani cáhan Pedro xihín dataa cán já ñacana chéle. ⁶¹ Anda já ñandicoto nihni Jesús ñasandehé a nu Pedro. Tá ñandicuhun ini Pedro sahá

tuhun nacachi Jesús xihín dá tá cámaní tiin na a tá nacachi a já: “Mé quivi viti tá cámaní cana chéle já uní tañu chijehé tuhún sahá i ta cahún ña co xini tohún yehe”, nacachi a xihín dá. ⁶² Andá já naqueta Pedro cuahan da já nacasáhá sácu ndivaha da.

Tá sácu ndaa na Jesús

(Mt. 26:67-68; Mr. 14:65)

⁶³ Ta java dataa, da ndúu ndáá Jesús cán nacasáhá da sácu ndaa da ña. Ta nacani nahá da. ⁶⁴ Nachicaji da nuu á ta nacani da jahnda nuu á já nacasáhá da ndáca tuhún da mé á já cáchí da já xihín á:

—Cachi yo já nacani jahnda nuun — cáchí da xihín á.

⁶⁵ Ta cuahá chága nuú ña núu cáhan na xihín á ña cánahá na xihín á.

Ndája ndíchí na Jesús

(Mt. 26:59-66; Mr. 14:55-64; Jn. 18:19-24)

⁶⁶ Ta tá sa nativi já nataca na sacuahá nuú na Israel cán xihín na sacuahá nuú jutú cán xihín na jánaha ley Moisés cán viti. Já ñehe na Jesús cuahan na cavií sahá nuú na cán. Ta tá sa nanditútu ndihi na cán ndúu na já nandaca tuhún na Jesús já nacachi na já xihín á:

⁶⁷ —Caxi tuhun xihín nde á cúun Cristo, da nachindahá Ndióxi cacomí cuéntá sahá ñayivi —nacachi na xihín á.

Andá já nacachi Jesús já xihín ná:

—Tá ajan ná cachi i xihín ndo ta chí a cándusa toho ndó yehe. ⁶⁸ Ta cája i cuéntá a cáhan ndó xihín i tá ná ndaca tuhún i ndohó. Ta cája i cuéntá ni a cándusa ndó janí ndó yehe. ⁶⁹ Joo viti sa natandaa quivi cuhun yehe, da nachindahá Ndióxi nduu ñayivi ta coo i xoo cuáha Ndióxi indivi jáchi iin ndée mé á caja tóco ndihi ñaha —nacachi Jesús xihín ná.

⁷⁰ Andá já nacasáhá tóco ndihi na cán ndáca tuhún na mé á já nacachi na já:

—Á jivi ndusa yóhó cúun in tuhún jiní já jahyi Ndióxi, dá já —nacachi na.

Andá já nacachi Jesús já xihín ná:

—Ajan. Jivi cúu u tá iin cáchí ndó jan —nacachi Jesús.

⁷¹ Andá já nacasáhá tóco ndihi na cán cáhan na já nacachi na já:

—Co ndítahan ndinducú chága yó ñayivi cacuu testigo nuú ña cáhan da yóho jáchi sa xini johó í ña cáhan da ta chícagan da cuachi jata mé dá —nacachi na cán.

Tá nandiquihva na Jesús ndáha Pilato

(Mt. 27:1-2, 11-14; Mr. 15:1-5; Jn. 18:28-38)

23 Andá já nandaca ndichi ndihi na cán já ñehe na Jesús nasahan na nu Pilato. ² Ta cán nacasáhá na chícagan na cuachi jata já nacachi na já sahá:

—Natiin nde da yóho jáchi xica nuu da jándivaa da ñayivi nuu nde. Cáchí da ña co ndítahan toho nuú nde chahvi nde jjuhún cuéntá impuesto nuú da cómi cuéntá sahá yó nuu Roma. Ta cáchí da ña mé dá cúu dá Cristo, da chindahá Ndióxi cacomí cuéntá sahá ñayivi. Ta cáchí da cúu dá in rey —nacachi na cán xihín Pilato.

³ Andá já nandaca tuhún Pilato Jesús já nacachi da já xihín á:

—Á mé a ndaa cúun in rey, da cómi cuéntá sahá na Israel —nacachi da cán xihín Jesús.

Andá já nacachi Jesús já xihín dá:

—Ajan. Jivi cúu u tá quihva cáchí ndó jan.

⁴ Andá já nandicahan Pilato xihín na sacuahá nuú jutú cán ta xihín ñayivi ndúu cán já nacachi da já:

—Co ndínehe mí vi ndá cuachi quéa nacaja da yóho —nacachi Pilato.

⁵Joo ñayivi cuahã cán ñacasáhã cáyuhú cóhó chága ña já cáchí ña já:

—Mé da ñan naxica nuu da jándivaa da tóco ndihi ñayivi estado Judea xihín ña jánaã da nu ná. Ta jandã Galilea ñacasáhã da jándivaa da ñayivi. Ta viti naxinu da ñuu nde cája da já —ñacachi ñayivi cáyuhú ña.

Tá ñéhe na Jesús cuahã ña nu Herodes

⁶Tá naxini johõ Pilato ña ñacachi ñayivi cán já nandaca tuhún da ña á cúú Jesús da estado Galilea. ⁷Ta tá ñacachi na ña ndusa cúú Jesús da estado Galilea já ñachindahã Pilato Jesús ña ná cuhun a nuú Herodes, da cúú gobernador nuú ñayivi estado Galilea. Jáchi mé tañu já ñasahjin tóo da ñuu Jerusalén. ⁸Tá naxini Herodes Jesús já ñacajii íni da jáchi sa jandã jihna cuni da Jesús cúni da. Jáchi cuahã tañu nandicani ñayivi nu dá sahã ña cája Jesús. Ta cúni da cuni da ña ná caja Jesús in ñaha xituhún. ⁹Ta cuahã ndivaha ñaha nandaca tuhún Herodes cán Jesús joo coo nanducú ñehe a tuhun nu dá. ¹⁰Ta tañu ñayivi cán ñúhu ri na sacuahã nuú jutú xihín ña jánaã ley Moisés ta chí a juú quiahva ndúcú ndéé ña chícaan ña cuachi jata Jesús. ¹¹Andã já ñacasáhã Herodes cája xixi da xihín Jesús ta quiahva já cája ri ña cúú soldado da cán xihín á. Ta najãcandixi na Jesús xihín jahmã lãnda tátuhun jáhma sãndixi in rey. Ñacaja na já xihín á jáchi cúni ña cuacu ndaa ñahã ña. Tá nandihí já ñachindahã tucu Herodes Jesús ña ná cuhun a nu Pilato. ¹²Ta chí mé quivi já ñandique táhan mání Herodes xihín Pilato jáchi jihna coo cúni táhan toho da, nduu.

Sácú ini na ndaja caja na cahní ña Jesús

(Mt. 27:15-26; Mr. 15:6-15;
Jn. 18:39-19:16)

¹³Andã já najãnditaca Pilato ña cúú sacuahã nuú jutú cán xihín ña jutixia xihín java ñayivi. ¹⁴Já ñacachi da já xihín ná:

—Mé ndó ñéhe ndó da yóho ñacasaa da nuú i. Ta cáchí ndó ña xica nuu da jándivaa da ñayivi. Joo sa naxini ndó ña ñandaja ndíchí i da nu ndo. Ta ni in tuhún toho cuachi táhan ña cáhan ndó saha ñan coo nanditahan i nu dá. ¹⁵Ta ni Herodes coo cuachi ná ndiñehe jata dá sahã ña cán quéa nanducú ñehe da da nuú i. Cuni johõ vaha ndó: Coó saha cúú á ña quivi da. ¹⁶Ña caja i quéa jándoho i ini da. Andã já janí vi da cuhun da —ñacachi Pilato cán xihín ná.

¹⁷Tañu víco pascua cán ñasahjin costumbre nu Pilato janí da in táhan da ñúhu vecaã ña ná candoo vaha da nuú ñayivi. ¹⁸Sahã ña cán quéa ñacasáhã cáyuhú tóco ndihi ñayivi nu dá já cáchí ña já:

—Cahní ndó da ñan ta janí ndó Barrabás nuú nde —cáchí ña cáyuhú ña.

¹⁹Mé Barrabás yóho ndãcaan da vecaã jáchi najátaca cuahã dá ñayivi ta nandicuita da xihín ña sacuahã ñuu Jerusalén cán ta cúú dá da sãhní ndii. Sahã ña cán quéa ndãcaan da vecaã. ²⁰Joo cúni Pilato janí da Jesús sahã ña cán quéa ñacahan tucu da xihín ñayivi. ²¹Joo ví ga ví ñacasáhã ña cán cáyuhú cóhó ña nu dá já cáchí ña já:

—Cata caa ndó da ndica crúxu. Cata caa ndó da.

²²Ta andã já ñacahan tucu Pilato ña cúú uní xihín ná já ñacachi da já:

—Coó toho ña núu ñahã ñacaja toho da yóho. A cuú cahnda i chuun ña ná cahní ña da jáchi coo cuachi da. Ña caja i quéa cahnda i chuun ña ná jándoho

na ini da. Anda já janí ví da —nacachi Pilato.

²³ Joo ví ga ví ndúcú ndéé na cán cáyuhú na ña ná cata caa na Jesús ndica crúxu. Ta xihín ña ndúcú ndéé na cán cáhan na ta ndúcú ndéé ri na sacuaḡa nuú jutú cán cáhan na. Sahá ña cán quéa nataḡnu ini Pilato. ²⁴ Ta nacandúsa da caja da ña cúni na cán xihín Jesús. ²⁵ Ta najaní da Barrabás jáchi da cán nacahan mé ná saḡa ña ná janí dá. Ta mé Barrabás yóho nasandacaan da vecaa saḡa ña najándivaḡa da ñayivi ta saḡa ña nasahní da ndii. Anda já nandiquiḡhva da Jesús nu ná ña ná caja na tá cúni mé ná xihín á.

Tá nacata caa na Jesús ndica crúxu

(Mt. 27:32-44; Mr.

15:21-32; Jn. 19:17-27)

²⁶ Ta tá ñehe na Jesús cuḡan na cata caa na a já naxini na in da naní Simón, da ñuu Cirene vaxi da ndihvi da ñuu Jerusalén. Ta já najácuhun ndáḡa ná da ña ná ndacojo da crúxu nuú taca Jesús cán. Ta nandico da Jesús cuḡan da.

²⁷ Ta a juú quiḡhva cuḡa ña ñayivi ndí-co jatá cuḡan na. Ta cuḡa najihí sácu ndivaha na ta cáyuhú na cuḡan na jatá jáchi táhnda ini na saḡa. ²⁸ Joo nandi-coto nihni Jesús nu ná já nacachi a já xihín ná:

—Najihí, na ñuu Jerusalén, a cuácu toho ndó saḡa yehe. Saḡa mé va ndó ta saḡa jahyi ndó viti ndítahan cuacu ndó. ²⁹ Jáchi vaxi quívi já casáḡa ñayivi cachi na já: “Tahví nacuu najihí, na coo na-cacu jahyi. Ta tahví nacuu na coo jahyí chíhí”, cachi na jáchi ndóho ndivaha ini na. ³⁰ Mé tiempo já casáḡa ñayivi cachi na já: “Vá ná cuyu yúcu jatá yo já ná quívi”, cachi na. Ta cachi na xihín java yúcu: “Chijehé ndó ndeḡe”, já cachi na saḡa ña ndóho ndivaha ini na. ³¹ Can-dehé ndo ndá quiḡhva jándoho na ini i ta cúu u tátuhun in yitó cuí, dó tácu. Ta

cája xíxi na xihín i joo xíxi cháḡa caja na xihín ndóhó jáchi cúu ndó tátuhun in yitó íchí —nacachi Jesús xihín na cán.

³² Ta tá ñehe na Jesús cuḡan cata caa na a ndica crúxu já ñehe ri na ivi da cúu da quini cuḡan na cata caa na da já ná quívi da xihín á. ³³ Ta tá naxinu coo na in nuú naní lásá yiquí jíní ndii cán nacata caa na a ndica crúxu. Ta nacata caa ri na ivi da quini cán va: in da xoo cuáḡa Jesús ta inga da xoo íti a. ³⁴ Ta tá cáta caa na Jesús ndica crúxu já nacachi a já:

—Tátá Ndióxi caja cáhnu ini ndó saḡa ña cája ñayivi yóho xihín i. Jáchi co xíni na ndía cája na —nacachi Jesús.

Ta ndaja coo java soldado cán na-casáḡa da sájíquí da saḡa jáhḡa Jesús já quéa ndá da ná quee vaha ndiquehe da jáhḡa á. ³⁵ Ta ñayivi ndúu cán sán-dehé na nu tácaa Jesús ndica crúxu nani na cúu jutixia nasacuḡta na ndúu na sácu ndaa ñahá cán já cáhí na já:

—Najácacu da java ga ñayivi. Ta viti ná jacacu da mé dá tá mé a ndaa cúu dá Cristo, da nacaxi Ndióxi cacomí cuéntá saḡa ñayivi —cáhí na sácu ndaa ñahá na.

³⁶ Ta jári java soldado sácu ndaa da Jesús ndúu da. Ta nacayati da cán nu Jesús já nachiḡee da vino, dó iyá yúhu á ña ná coho a do. ³⁷ Ta já cáhí da já cáyuhú da nu á:

—Tá ta mé a ndaa cúun rey, da cómi cuéntá saḡa na Israel chindeé mún já ná a quívun —cáhí da.

³⁸ Ta nachindaa na in tabla ndica crúxu yati jini Jesús ta nu mé tabla cán nacayí na: “Da yóho cúu rey nuú na Israel.” Ta mé ña yóho nacayí na ña tuhun griego, ña cáhan na nación Grecia xihín tuhun latín, ña cáhan na ñuu Roma xihín tuhun hebrero, ña cáhan na Israel viti.

³⁹ Ta in táhan da quini tácaa ndica inga crúxu yati jini á cán nacasáḡa da cáḡa da xihín á. Já cáhí da já:

—Tá mé a ndaa cúun Cristo, da nachindahá Ndióxi cacomí cuéntá sahá ñayivi chindeé mún já ná a quívún. Ta chindeé ndehe já ná a quíví nde —cáchi da.

⁴⁰ Joo inga táhan da quini tácaa inga xoo jíin a cán ñacasáhá da jánani da da cáhan xihín Jesús cán já ñacachi da já xihín dá:

—Á co yíhvi tohún Ndióxi. Jáchi in cúú yo ndóho iní yóho ⁴¹ joo mé Jesús yóho coó toho cuachi ñacaja da. Ta mé cuití ví ndítahan ndoho iní ña ná chahví sahá cuachi ñacaja í —ñacachi da cán já-nani da inga da tácaa cán.

⁴² Tá ñandihi já ñacachi da já xihín Jesús:

—Jesús, caja ndó ñamaní ndicuhun iní ndó sahá í tá ná casáhá ndó cacomí ndó cuéntá sahá ñayivi —ñacachi da xihín Jesús.

⁴³ Anda já ñacachi Jesús já xihín dá:

—Mé a ndaa ná cahan í xuhun ña mé quíví víti cuhún coún xihín í indiví —ñacachi a xihín dá.

Tá ñaxihí Jesús

(Mt. 27:45-56; Mr.

15:33-41; Jn. 19:28-30)

⁴⁴ Ta tátuhun çaxiví já ñacanaá níí cúú ñuyíví. Ta janda çaa uní sahini já ñacasáhá ñandiyehé tucu. ⁴⁵ Nanaá nuú çandii. Ta janda já ñandatá java ndaa jáhma ndeé ña tácaa veñuhu cáhnu ñuu Jerusalén ña sáji nuu nuú yíí ndivaha. ⁴⁶ Anda já ñacayuhú cóho Jesús já cáchi a já:

—Tátá Ndióxi, ndáha mé ndó janda-coo í ínima í.

Ta tá ñacachi a ña yóho já ñaxihí va.

⁴⁷ Ta ndaja coo da sáhdá chuun nuú soldado cuéntá Roma cán tá ñaxini da tóco ndihi ña ñayaha yóho já ñacasáhá cája cáhnu da Ndióxi já ñacachi da já:

—Mé a ndaa táhyí coó toho cuachi da yóho —ñacachi da.

⁴⁸ Ta tóco ndihi ñayivi ñasanduu cán, na ñaxini nuú ñaxihí Jesús jandá joho cáni na yica ndíca na sahá ña táhnda ini na saha Jesús já cuanúhu va na. ⁴⁹ Joo tóco ndihi na xíní táhan xihín Jesús ñacandoo na ndíta xíca na sándeheé na. Ta tañu na cán ñasanduu ri najihí táhan na ñaqui xihiín á janda estado Galilea cán.

Tá ñachicaan na yiquí cuñu Jesús ini cava

(Mt. 27:57-61; Mr.

15:42-47; Jn. 19:38-42)

⁵⁰ Ta ndaja coo ñasahijn in ñataa nani José, da ñuu Arimatea ña ndácaan estado Judea cán. Ta cúú dá in ña va, da cája ña ndaa cuití va. Ta cúú da in táhan na cómi cuéntá sahá na Israel. ⁵¹ Mé José yóho coó ñatahan ini da xihín ña ñacaja java ga na cán jáchi ndáti da casaa quíví cacomí Ndióxi cuéntá sahá ñayivi. ⁵² Ta ñasahan da cahan ndahví da xihín Pilato ña ná ndiquiahva da yiquí cuñu Jesús nu dá. ⁵³ Ta chí ñasahan Pilato ñamaní nu dá chí ñasahan da najánuu da yiquí cuñu Jesús ndíca crúxu cán. Já ñachitíví ñahá da xihín jáhma va, ta já ñachicaan ñahá da ini in yáví ndácaan ndíca cava. Ta ni in túhún toho ndíj a ñaha chícaan na ini mé cava cán. ⁵⁴ Mé quíví cán ñasacuu a quíví cája ndíví ñayivi ñaha vehe na jáchi ja chá cacuu a quíví ndíquehe ndeé ná sahá ña cán queá ndíhi ini na jáxinu na chuun cája na.

⁵⁵ Ta najihí, na ñasandico jata Jesús janda tá ñaqui xihi a chí estado Galilea cán ñasahan na sándeheé na ndíca cava nuú najáqueta nuu na yiquí cuñu Jesús cán. ⁵⁶ Ta tá ñasaa na vehe na já ñacaja ndíví na perfume xihín java ga ñaha támi sahan ña ná jándicuchu na yiquí cuñu Jesús. Ta inga quíví itaan ñandiquehe ndeé ná tá quiahva ñasahnda Ndióxi caja na janda sanahá.

Tá nanditacu tucu Jesús

(Mt. 28:1-10; Mr. 16:1-8; Jn. 20:1-10)

24 Ta tá sa nayaha quivi ndíquehe ndéé ná ta naha chá quivi domingo já naquee tucu najihí cán cuahan na nuú nachicaan na yiquí cuñu Jesús ini cáva cán. Já ñéhe na perfume, dó ñacaja tiahva na cán. Ta ndáca táhan java ga najihí xihín ná cuahan na. ²Ta tá naxinu coo na cán já naxini na ña coó ga yuu ndáji ndaa yuhú cáva nuú nasandacaan yiquí cuñu Jesús. ³Anda já naquihvi na ini cáva cán joo coó ga yiquí cuñu Jesús nanditahan na. ⁴Ta chí nayihvi na ta co xini na ndía caja na. Ta jonáa va naxini na ndíta ivi dataa yati jín ná. Ta a juú quiahva ndató yéhe jáhma ndíxi da cán. ⁵Ta chí a juú quiahva yihvi najihí já ñacandayi na jandá quiahva naxinu jini ná nu ñúhú. Anda já ñacachi dataa cán já xihín ná:

—Co ndítahan toho ndinducú ndo in da tácu tañu nu sánduu ndji. ⁶Coó toho Jesús íin yóho jáchi sa nanditacu va. Xini ñúhú ndicuhun ini ndó ña ñacachi a xihín ndo tá nasahin a estado Galilea. ⁷Mé á cúú á da ñachindahá Ndióxi nduu ñayivi ta sa ñacachi a xihín ndo ña ndiquiahva na mé á ndahá ñayivi quini. Ta ñacachi a xihín ndó ña cata caa na a ndica crúxu ta tá ná xinu uní quivi já nditacu tucu a —ñacachi dataa cán.

⁸Anda já ndicuhun ini najihí cán ña ñacachi Jesús xihín ná. ⁹Chí naquee na cuahan na já ndicanani ndihi na sahá ña yóho nuú na uxu in naxica tuun xihín Jesús xihín nuú java ga na ndúu cán viti. ¹⁰Mé najihí cán, na nasahan cáxi tuhun ña yóho nuú na apóstol cán nasacuu María, ña ñuu Magdala xihín Juana xihín María, ña cúú náná Jacobo xihín java ga najihí. ¹¹Joo na apóstol, na naxica tuun xihín Jesús cán ñacahán na ña cuénto uun va queá. Sahá ña cán

queá coó naheen na candúsa na ña ñacachi najihí cán xihín ná.

¹²Joo ndaja coo naqueta Pedro xínu da cuahan da sándehe da ini cáva nuú nachicaan na yiquí cuñu Jesús cán. Naxini da jáhma vaha ña nasativí a cán joo coó toho yiquí cuñu a. Ta chí ñacatóntó da naquee da cuanúhu dá vehe da.

Cátahan Jesús cuahan xihín ivi na cuahan chí ñuu Emaús

(Mr. 16:12-13)

¹³Ta mé quivi já ivi táhan na cúú cuéntá Jesús naquee na cuahan na in ñuu naní Emaús. Mé ñuu cán ñéhe táhan tátuhun uxu in kilometro xihín ñuu Jerusalén. ¹⁴Ta ndítuhún na cán cásahan na saha tóco ndihi ña ñacuu ñuu Jerusalén cán. ¹⁵Ta nani ndítuhún na cásahan na já ñacayati Jesús nu ná já ñacasahá xíca mé á xihín ná cuahan na. ¹⁶Ta vatí sándehe na cán nu Jesús joo coó ñacuu ndicuni na mé á. ¹⁷Anda já ñandaca tuhún Jesús na cán já ñacachi a já:

—Ndía ndítuhún ndó cásahan ndo. Ta ndavaha cácuéha ini ndó cásahan ndo —ñacachi a xihín ná.

¹⁸Já in táhan na cán, da naní Cleofas nanducú ñehe da tuhun nu á já ñacachi da já:

—Níí cúú va ndicuiña nuu tuhun sahá ña ñacuu ñuu Jerusalén tañu quivi yóho. In tuhún yóho tañu na ndúu cán cúú da co xini ña nayaha —ñacachi da.

¹⁹Anda já ñacachi Jesús já xihín ná:

—Ndía ñacuu, vaha.

Já ñacachi na cán já xihín á:

—Naquixi in da naní Jesús chí ñuu Nazaret ta nasacuu da in profeta cáhnu ndivaha jáchi cuahá ndivaha ña náhnu ñacahan da. Ta cuahá ndivaha ña náhnu ñacaja da nu Ndióxi xihín nuú ñayivi. ²⁰Joo na sacuahá nuú jutú xihín na jutixia ñuu nde natiin na mé Jesús ta já nandiquiahva na da ña ná cahni na da ta

já n̄acata caa na da nd̄ica crúxu. ²¹ Joo mé nd̄e n̄acahán nd̄e ñ̄a mé Jesús cán cacuu da da nd̄ati nd̄e chindeé da nd̄ehe, na Israel yóho já ná a cája x̄ixi ga na ñ̄uu Roma x̄ihín nd̄e, n̄acahán nd̄e. Joo n̄andihí va viti jáchi sa nayaha un̄i quiv̄i n̄axih̄i da cán. ²² Vatí naqueta java najih̄i tañu nd̄e yóho najáyihv̄i na nd̄ehe jáchi naha chá nasahan na nuú n̄anduxu Jesús cán. ²³ Ta cáchi na ñ̄a coo ga yiquí cuñu Jesús ndác̄aan cán. Sahá ñ̄a cán queá n̄axinu na nuú nasanduu nd̄e ta n̄andicaní na nuú nd̄e ñ̄a n̄acanáha java táto Ndióxi nu ná ta n̄acachi na ñ̄a tácu va Jesús. ²⁴ Ta java táhan da x̄ica tuun x̄ihín nd̄e cán nasahan da s̄andeh̄e da ini cáva cán ta chí já ndusa cáa tá quiahva cáchi najih̄i. Ta coo mé Jesús n̄axini na —n̄acachi na cán x̄ihín Jesús.

²⁵ And̄a já n̄acachi Jesús já x̄ihín na cán:

—Ñ̄ayivi tóntó ndivaha cúu ndó. Jáchi yáncá ndivaha já x̄inu ini ndó candúsa ndó ñ̄a ndaa ñ̄a n̄acahan na profeta sanahá. ²⁶ Á coo cándaq̄a ini ndó ñ̄a jihna núhú n̄anditahan nuú da cúu Cristo ndoho ini da ta tá sa n̄andihí já ndiñehe jícó Ndióxi da já ndacojo da chuun cacomí da cuéntá sahá ñ̄ayivi —n̄acachi Jesús.

²⁷ And̄a já n̄acasáhá nd̄icani a nu ná ñ̄a n̄acahyí nuú tuhun Ndióxi nu cáhan saha tóco ndihí ñ̄a ndítahan ndoho da cúu Cristo. N̄acasáhá nd̄icani a j̄anda libro n̄acahyí Moisés sanahá j̄anda quiahva n̄axinu a nu tóco ndihí libro ñ̄a n̄acahyí na profeta sanahá.

²⁸ Ta tá n̄axinu coo na ñ̄uu nuú cuahan na cán já n̄acaja Jesús tátuhun yáha saa cuahan. ²⁹ Joo mé na cán n̄acaja ndúsa ná x̄ihín á ñ̄a ná coo tóo a x̄ihín ná. Já n̄acachi na já x̄ihín á:

—Yóho candoo ndó coo tóo ndó jáchi sa nahini cuí va ta ja chá cuaá —n̄acachi na x̄ihín á.

And̄a já naquihvi Jesús ini vehe ñ̄a candoo a x̄ihín ná. ³⁰ Ta tá nasacoo a nu mesa x̄ihín ná já n̄atiin a in pan já n̄andiquiahva ndixahvi nu Ndióxi sahá. Ta nasahnda java ñ̄a já nasahan ñ̄a nu ná. ³¹ Ta chí iv̄i laá nanuna x̄iní tún̄i ná ta já n̄andicuni na mé á ñ̄a cúu á Jesús. Joo iv̄i laá najándiñhú á mé á nu ná. ³² And̄a já n̄acachi x̄ihín táhan na já:

—Íchi queá cájii ndivaha iní tá n̄andicaní Jesús tuhun Ndióxi nu yo tá vaxí íchi x̄ihín á —n̄acachi x̄ihín táhan na cán.

³³ Chí iv̄i laá naquehe tucu na íchi ñ̄a ndicó coo tucu na ñ̄uu Jerusalén. Tá n̄axinu na cán n̄andiñehe ná ñ̄a ndítútú ndíhuxu in táhan na n̄axica tuun x̄ihín Jesús cán ndúu na x̄ihín java ga na ndúu cán. ³⁴ And̄a já n̄acachi na cán x̄ihín ndíví na yóho:

—Mé a ndaa táhyí n̄anditacu tucu Jesús, xitoho í. Ta n̄axini Simón mé á —n̄acachi na.

³⁵ And̄a já n̄acasáhá ndíví na cán nd̄icani na ñ̄a nasandaca táhan na x̄ihín Jesús nasahan na. Ta n̄andicaní na ñ̄a n̄andicuni na mé á nani nasahnda java mé á pan ñ̄a cuxu na.

Naha Jesús mé á nuú na n̄axica tuun x̄ihín á

(Mt. 28:16-20; Mr.

16:14-18; Jn. 20:19-23)

³⁶ Ta nani ndítuhún yii ná ndúu na já n̄axinu coo Jesús n̄andaca ndichi a mahñú na cán já n̄acahan Ndióxi á x̄ihín ná já n̄acachi a já:

—Ná caja Ndióxi ñ̄a ná coo vaha ini ndó.

³⁷ Joo nayihv̄i na cán ta n̄acahán na ñ̄a cúu á in ínima ndii va. ³⁸ Joo já n̄acachi Jesús já:

—Ndá cuéntá queá yíhv̄i ndo. Ta ndá cuéntá queá coo cándúsa ndó ñ̄a cúu yehe Jesús. ³⁹ Candehé ndó ndahá i ta candehé ndó sahá i. Sa mé yehe cúu vi. Cani

ndaa ndáha ndó yehe ta candehé vaha ndó yehe. Jáchí in ínimá ndíi cóo toho yiquí cuñu a tá quiahva sándehe ndó ña íin yiquí cuñu yehe —nācachi Jesús xihin ná.

⁴⁰ Ta nani cāhan Jesús xihin ná já nācasáhá náha ndáha á xihin sahá nu ná. ⁴¹ Joo cāmaní yíi candúsa nā cán ña cúu mé á Jesús jáchi nācatóntó nā ta cájii ndivaha ini na ña cán queá nācachi tucu Jesús já xihin ná:

—Ndá ñaha íin nu ndó ná cuxu u —nācachi Jesús xihin ná.

⁴² Anda já nasahan na in túhun tiyacá nayata nu á xihin in ñimá ñuñu nu á. ⁴³ Já natiin a ña ndáha ná já naxixi a ña nani sándehe nā a. ⁴⁴ Tá nandihí já nācachi a já xihin ná:

—Sā nayaha tá íin nācachi i xihin ndó jihna. Sā naxinu cóo tá íin nācāhyí Moisés xihín nā profeta sanahá sahá ña ndítahan ndoho i. Ta jári David tá nācāhyí da libro Salmos já nācāhan ri da cán va sahá ña ndoho i —nācachi a xihin ná.

⁴⁵ Anda já nācāja Jesús ña ná ndinuna xíní túni ná já ná candaā ini na ña cúni cachi túhun Ndióxi cán. ⁴⁶ Ta nācachi a já xihin ná:

—Jānda sanahá nācāhyi ña ndítahan quivi yehe, da cúu Cristo, da nāchindahá Ndióxi cacomí cuéntá sahá ñayivi. Joo nācāhyi ri ña ndítahan nditacu tucu u

quivi uní. ⁴⁷ Ña cán queá ndítahan nuú ñayivi caca nuu na cāhan nā túhun vaha sahá i níi cúu ñuyiví já ná ndicó cóo ini ñayivi ta jándacoo na cuāchi cája na. Anda já cāja cāhnu ini Ndióxi sahá ndihí cuāchi na. Ta jānda ñuu Jerusalén xíní ñúhú ñayivi casáhá nā cāhan nā túhun vaha sahá i ta já cūhun nā jānda ndijáá ñuyiví. ⁴⁸ Ta ndóhó cúu nā naxini ndaja cáa ña nandoho i ña cán queá ndítahan nu ndó cūhun ndó caxi túhun ndó tóco ndihí ña yóho nuú ñayivi. ⁴⁹ Cuni johō vaha ndó jáchi chindahá i ínimá yii Ndióxi já ná cañuhu a ini in in ndó. Jáchí quiahva já nācachi Ndióxi, tátá i tá nasahan túhun a nu ndo. Joo ndítahan canduu ndihí ndó ñuu Jerusalén yóho jānda quiahva ná ndicutú ndaa ínimā ndo xihin ndéé Ndióxi ña quixi indiví —nācachi Jesús xihin ná.

Tá nāndaa Jesús cuāhan indiví

(Mr. 16:19-20)

⁵⁰ Anda já ndāca Jesús nā cán nasahan nā xihin á yuhú ñuu Betania. Ta nāndiñehe a ndáha á já nācāja yii á nā. ⁵¹ Ta tá cája yii á nā já natavá xóo a mé á já nāndaa cuāhan indiví. ⁵² Tá nandihí nācāja cāhnu nā cán Jesús já cávatá ndivaha na nāndicó cóo na ñuu Jerusalén. ⁵³ Ta níi tiempo nāsan-duu tuun na veñuhu cāhnu cája cāhnu na Ndióxi. Já ná coo.

Tuhun vaha naçahyí Juan sahá ña naçaja Jesucristo

Jesucristo cúu á tuhun Ndióxi ta nanduu a ñayivi

1 Tá naçava sáhá saha ñuyívi sa fin va mé á naní tuhun Ndióxi. Nasahjin mé á xihin Ndióxi ta in cúu mé á xihin Ndióxi. ²Ta janda mé saha sa fin va xihin Ndióxi. ³Ta mé a cán cúu á Jesucristo ta naçaja Ndióxi ña naçavaña mé á tóco ndihi ñaha. Ta ni in túhún toho ñaha fin, a cóo tá ná a cávaha mé á ña, nduu. ⁴Ta mé á queá cája ña ná catacu tóco ndihi ñaha ta mé á jándiyéhe a ínima ñayivi já ná ndicuni na yo cúu mé á. ⁵Mé Jesucristo cúu á tátuhun in ñúhu cáyi ña jándiyéhe a xoo naá ta a cuú ndahva ña.

⁶Ta ndaja coo nachindahá Ndióxi in ñataa naní Juan. ⁷Naquixi da çaxi tuhun da xihín ñayivi ña cúu Jesucristo ña jándiyéhe ínima ñayivi, na ndúu nuú naá já ná cuu candúsa na mé á sahá ña naçahan da. ⁸Mé Juan yóho coo cúu dá mé á jándiyéhe ínima ñayivi. Naquixi cuití da çaxi tuhun da xihín ñayivi ña mé Jesucristo queá jándiyéhe ínima ñayivi. ⁹Mé Jesucristo naxinu a ñuyívi yóho ta cúu ndusa mé a ña jándiyéhe ínima tóco ndihi ñayivi.

¹⁰Naquixi mé a naní tuhun Ndióxi ta nasahjin a ñuyívi yóho. Ta xihín ña naçaja Jesucristo naçavaña Ndióxi ñuyívi. Joo ñayivi ndúu ñuyívi yóho coo naxeen na candaa ini na yo cúu mé á. ¹¹Naquixi Jesucristo ñuyívi ña naçavaña mé á joo na ñuu mé á coo naxeen toho na ndiquehe vaha na mé á. ¹²Joo ndá na ná ndiquehe vaha mé á ta candeé ini na mé á já queá sahan mé á ñamaní nu ná ña ná nduu na na cúu cuéntá Ndióxi. ¹³Ta na cán cúu na nanduu jahyi mé á. Ta coo cúu á sahá ña naçacu na ñuyívi yóho ta ni coo cúu á sahá ña cúní in ña cacu in

jahyi da. Nanduu na jahyi mé á jáchi já nasacu ini mé á coo.

¹⁴Mé Jesucristo, mé a naní tuhun Ndióxi cán nanduu a in ña ta naquixi a nasahjin a tañu nde. Ta tóco ndihi ña naçacaja mé á naçacuu a ña ndaa. Ta a juú quiahva quihvi ini a ñayivi. Ta naxini nde ndá quiahva cáhnu cúu mé á jáchi sahá ña cúu mé á in túhún jini já jahyi Ndióxi sahá ña cán queá naçaja Ndióxi ña ná ndicáhnu ndivaha mé á. ¹⁵Tá nandicaní mé Juan sahá Jesús nuú ñayivi já naçachi da já saha mé á:

—Mé a yóho cúu á ña naçahan i sahá nu ndo tá naçachi i xihin ndo ña vaxi inga a jatá yehe. Ta naçachi i xihin ndo ña fin chága saha mé a cán a juú ga yehe jáchi janda tá cámaní yií cacu u sa fin va mé á —naçachi Juan.

¹⁶Ta sahá ña fin ndivaha ñamaní nu mé á sahá ña cán queá a juú quiahva ñehe táhvi tóco ndihí nu mé á. ¹⁷Naçahyí Moisés ley Ndióxi sanahá. Joo Jesucristo, mé á cúu á ña ndaa naquixi a ñuyívi yóho sahá ña quihvi ndivaha ini a mí. ¹⁸Ta ni in túhún toho ñayivi coo naxini na Ndióxi. In túhún Jesucristo, mé á cúu in túhún jini já jahyi Ndióxi, mé a cán queá xini ndá quiahva fin Ndióxi jáchi in cúu á xihin á ta mé a queá nañaha ña yóho nu yo.

Ndicani Juan nuú ñayivi yo cúu Jesús

(Mt. 3:11-12; Mr. 1:7-8; Lc. 3:15-17)

¹⁹Ta ndaja coo java na saçuaha nuú na Israel, na ndúu ñuu Jerusalén cán nachindahá na java jutú xihín java na naquixi chichi Leví nu fin Juan ña ná ndaça tuhún na da á cúu dá da nasahan Ndióxi tuhun a chindahá a ñuyívi. ²⁰Ta cáxi táhyí naçahan Juan xihín ná ña coo cúu dá da cán ta já naçachi da já:

—A juú toho yehe cúu da naçachi Ndióxi chindahá a cacomí cuéntá sahá ñayivi —naçachi Juan.

²¹ Anda já nandaca tühún tucu na da já nacachi na já xihín dá:

—Yo já cúú yóhó, dá já. Á a juú yóhó cúú profeta Elías —nacachi na.

—A juú toho yehe cúú profeta Elías —nacachi Juan.

Anda já nacachi tucu na já xihín dá:

—Á a juú toho yóhó cúú profeta da nacachi Ndióxi chindahá a, dá já —nacachi na.

Joo nanducú ñehe Juan tühun nu ná já nacachi da já xihín ná:

—Ni in tühún toho da cáhí ndó jan co cúú yehe.

²² Anda já nacachi tucu na já xihín dá:

—Ndítahan ndicani lohún nuú nde yo cúú yóhó. Jáchi java na nachindahá na ndehe ña ná quixi nde ndaca tühún nde yóhó. Ta tá co cúnun caxi tühún xihín nde yo cúú yóhó, ndá cuhun nde quehe nde tühun nducú ñehe nde nuú na nachindahá ndehe cán —nacachi na.

²³ Anda já nacachi Juan já xihín ná:

—Yehe cúú da xíca nuu tañu yucú íchí ta cáyuhú cóhó i já cáhí i já xihín ñayivi: “Cuná ndó in íchí ndacú nu mé á ña ná ndihvi a ínimá ndo” —nacachi Juan xihín ná tá quiahva nacahí profeta Isaías sanahá.

²⁴ Ta na nandaca tühún Juan cán nasahan na jáchi já natahnda chuun nacaja na fariseo, mé na sáhná chuun ñuu Jerusalén cán. ²⁵ Já nacachi tucu na já xihín Juan:

—Ndá cuéntá queá cája ndúta yóhó ñayivi tá ta co cúún Cristo, da nachindahá Ndióxi cacomí cuéntá sahá ñayivi. Ta ndá cuéntá queá jácandutun ñayivi tá ta ni co cúún Elías ta ni co cúún mé profeta, da nacachi Ndióxi chindahá a —nacachi na cán.

²⁶ Anda já nacachi Juan já xihín ná:

—Yehe cája ndutá i ñayivi xihín ticuí joo tañu mé ndó íin in da co xini ndo.

²⁷ Ta vaxi in da jatá yehe ta íin cuaha chága saha dá a juú ga yehe. Ta chí ni

coó sahá i ndaxí i correa ndusa dá —nacachi Juan xihín na nasahan ndaca tühún ñahá cán.

²⁸ Tóco ndihi ña yóho nayaha chí ñuu Betábara ña ndacaan inga xoo yuta Jordán nuú nacaja ndúta Juan ñayivi.

Jesús cúú á tátuhun in ndicachi rí jóco na nu Ndióxi

²⁹ Ta inga quiví itaan já naxini Juan cáyati Jesús vaxi a nu íin da. Já nacachi Juan já xihín ñayivi ndúu cán:

—Candehé ndo. Da vaxi jan cúú dá tátuhun ndicachi jóco na nu Ndióxi. Ta da jan cúú da jándoo cuachi ñayivi ndúu ñuyiví. ³⁰ Da jan cúú da cáhí i saha ña vaxi in da jatá yehe ta íin cuaha chága saha dá a juú ga yehe. Jáchi janda tá cámaní cacu yehe sa íin va mé da jan. ³¹ Ta ni mí i coó naxini i ndá quiahva cáa da joo nacasáhá i jácandutá i ñayivi xihín ticuí já ná candaa ini na Israel yo cúú mé dá —nacachi Juan.

³² Ta nandicani da ña naxini da já nacachi da já:

—Sa xini xihín nuu mí i ndá quiahva nanuu ínimá yii Ndióxi jatá Jesús. Mé ínimá yii Ndióxi cán nanuu a indiví ta cáa tá quiahva cáa in ndijata. ³³ Mé a ndaa coó naxini toho yehe yo cúú mé da yóho, nduu. Joo Ndióxi, mé a nachindahá yehe jácandutá i ñayivi xihín ticuí, mé a cán queá nacachi já xihín i: “Ndá da ná cunún ná nuu ínimá yii mí i ta sacoo a jata dá, da cán cúú da jándicutú ini ñayivi xihín ínimá yii mí i”, nacachi Ndióxi xihín i. ³⁴ Ta viti mé a ndaa sa xini vi yo cúú mé á ta cáxi tühun i xihín ndo ña mé á cúú á in tühún jini já jahyi Ndióxi —nacachi Juan.

Tá nacasáhá java ñayivi ndíco na Jesús xíca na xihín á

³⁵ Ta inga quiví itaan nasahiin tucu Juan cán xihín ivi na xíca xihín dá. ³⁶ Já

naxini da ña yáha Jesús cuahān já ñacachi Juan já xihín na xíca xihín dá cán:

—Candehé ndo. Da jan cúu tátuhun ndicachi, rí jóco na nu Ndióxi —ñacachi Juan.

³⁷ Tá naxini joho da ndíta xihín da cán ña yóho já ndíco da jatá Jesús cuahān da.

³⁸ Tá naxini Jesús ña ndíco da cán jatá já nandicoto nihni a nu dá já ñacachi a xihín ndívi da cán já:

—Ndíca cúní ndo —ñacachi a.

Já ñacachi da cán já xihín á:

—Maestro, ndájá íin vehe ndó já —ñacachi da.

³⁹ Anda já nanducú ñehe Jesús tūhun nu dá já ñacachi a já:

—Cóho ná cuni ndó, dá já —ñacachi a.

Já ndáca táhan da ñasahān da xihín á sándehe da nu íin a. Ta nasacuu a tátuhun caa comí sahini já ñasanduu da xihín á.

⁴⁰ In táhan da naxini joho ña ñacachi Juan ta ndíco da jatá Jesús cán naní da Andrés, da cúu ñani Simón, da cáhan na Pedro xihín cán. ⁴¹ Mé Andrés yóho ndáva da ñasahān da ndínducú da ñani da, da naní Simón cán. Ta tá nandíñehe ñahá da já ñacachi da já xihín dá:

—Nanditahan nde da ñachindahá Ndióxi cacomí cuéntá sahá ñayivi, mé a cúu Cristo —ñacachi da.

⁴² Tá nandíhi já ndáca Andrés cán ñani da ñasahān da nu Jesús. Ta tá naxini Jesús da já ñacachi a já xihín dá:

—Yóhó cúun Simón, jahyi Jonás. Joo yehe chinúu í quivun cananún Cefas viti —ñacachi Jesús.

Quivi Cefas yóho in cúu va xihín Pedro ta cúní cachi a in tóto.

Cána Jesús Felipe xihín Natanael ña ná caca tuun da xihín á

⁴³ Ta inga quiví itaan já ñaquee Jesús cuahān chí estado Galilea. Ta cán nandi-

tahan mé á da naní Felipe já ñacachi a já xihín dá:

—Naha quí caca tuún xihín í —ñacachi a xihín dá.

⁴⁴ Mé Felipe yóho cúu dá da ñuu Bet-saida ta mé ñuu cán cúu ri ñuu Andrés xihín Pedro. ⁴⁵ Ta ndaja coo Felipe yóho ndáva da ñasahān da nandínducú da Natanael ta tá nandíñehe ñahá da já ñacachi da já xihín dá:

—Nanditahan nde da ñacahyí Moisés saha nu ley sanahá. Ta jári na saha dá. Ta mé dá cúu Jesús, jahyi José, da ñuu Nazaret —ñacachi Felipe xihín Natanael cán.

⁴⁶ Anda já ñacachi Natanael já:

—Ndá quehe ri ñaha vaha quixi chí ñuu Nazaret jan —ñacachi da.

Anda já ñacachi Felipe já xihín dá:

—Cóho candehún —ñacachi da.

Anda já ñaquee da cuahān da nu íin Jesús.

⁴⁷ Ta tá naxini Jesús ñacayati Natanael nu á já ñacachi a já:

—Da yóho cúu ndusa in da ñaquixi chichi Israel ta cúu dá taa cája ña ndaa cuití va —ñacachi Jesús.

⁴⁸ Tá naxini joho Natanael ña yóho já nandaca tūhún da Jesús já ñacachi da já xihín á:

—Á xini ndó yehe, vaha.

Anda já ñacachi Jesús já xihín dá:

—Janda tá camaní quee Felipe cūhun da cana da yohó já naxini í íin coún saha titó ñuhú —ñacachi Jesús xihín Natanael.

⁴⁹ Anda já ñacasáhá cáchi da já xihín Jesús:

—Maestro, jivi ndusa cúu ndó in tūhún jini já jahyi Ndióxi ta cúu ndó ña cómí cuéntá sahá ñayivi Israel —ñacachi da xihín Jesús.

⁵⁰ Anda já nanducú ñehe Jesús tūhun nu dá já ñacachi a já:

—Ñacandúsún yehe sahá ña ñacachi í xūhun ña naxini í íin coún saha titó

ñuhú. Joo náhnu chága ñaha cunún xihín nduchú núún caja i —ñacachi Jesús xihín dá.

⁵¹ Andá já ñacachi tucu Jesús já:

—Mé a ndaa ná cañan i xihín ndo ña cuni ndó xihín nuu ndó ña nuná indiví. Ta cuni ndó táto Ndióxi ndaa na ta nuu na xinu na nu íin yehe, da ñachindahá Ndióxi nduu ñayivi —ñacachi Jesús.

Tá ñasahan Jesús in vicó tándaha

2 Tá nayaha uní quivi já nasahjin in vicó tándaha ñuu Caná ña ndacaan estado Galilea cán. Ta ñasahan María, náná Jesús mé víco cán. ² Ta jári ñacana na Jesús xihín na xíca tuun xihín á ta chí ñasahan ndihi na mé víco cán. ³ Joo ndaja coo nani cúu víco cán ñandihí va vino xíhi na. Ta tá ñaxini náná Jesús ña yóho já ñacachi ñá já xihín Jesús:

—Sá ñandihí va vino xíhi na —ñacachi ñá xihín á.

⁴ Já ñacachi Jesús já xihín ñá:

—Co xíní ñuhú toho cañan ndó já xihín i jáchi cámaní yíi va ndindaa hora caja i ñaha xitúhún —ñacachi Jesús xihín ña.

⁵ Tá ñandihí já ñacachi náná Jesús já xihín na jácaca vino cán:

—Ndá ñaha ná cahnda Jesús nu ndó caja ndó, caja ndó ña —ñacachi ñá xihín ná.

⁶ Ta mé vehe nu cúu víco cán nasahjin inu yoo náhnu ña ñacavaña na xihín yuu. Mé yoo cán ñasacuu a nu táan na Israel cán ticuí, dó ndája víi na mé ná tá quiahva sáhdá ley nu ná caja na. Ta tátuhun comí jícó á in ciento litro ticuí quéta ini in in yoo náhnu cán. ⁷ Tá ñandihí já ñacachi Jesús já xihín na jácaca vino cán:

—Jácutú ndihí ndó yoo náhnu jan xihín ticuí.

Ta chí najácutú jíní ndaa na yoo náhnu cán xihín ticuí. ⁸ Tá ñandihí já ñacachi tucu Jesús já xihín ná:

—Ta viti tavá loho ndó do ta quiahva ndó do ná coto ndojó da cómí chuun saha víco yóho —ñacachi Jesús.

Já ñéhe na do ñasahan na nuú da cómí chuun saha víco cán. ⁹ Joo sa ñacaja Jesús ña ná nduu ticuí cán vino. Ta ñaxito ndojó da do joo co xíní da ndájá ñaquixi dó. In túhún na xíní cúu na ñaxini ña ñandaja Jesús cán ticuí ña ná nduu dó vino. Tá ñaxito ndojó mé da cómí chuun yóho do já ñacatóntó da ta ñacana da mé da tándaha cán. ¹⁰ Já ñacachi da já xihín dá:

—Ndijáá ñayivi tá cája na in víco já sahan na vino vaña nu cuítí nuú na táhan cán. Ta tá sa ñaxihí cuahá na já sahan na dó núu cán. Joo yóho ñasacu vahún vino vaha ta ja víti sáhún do nuú na táca víco —ñacachi da.

¹¹ Ña xitúhún yóho ñacaja Jesús ñuu Caná cuéntá estado Galilea ñasacuu a ña xitúhún nu cuítí ñacaja Jesús já ná cuni ñayivi ndá quiahva cáhnu cúu mé á. Ta xihín ña yóho ñacandé ini na xíca tuun xihín a cán mé á.

¹² Tá sa nayaha ña yóho já ñaquee a cuahan xihín na xíca tuun xihín á chí ñuu Capernaum. Ta ndáca táhan náná a xihín ñani a ndíco na cuahan na xihín á. Ta ñasanduu na ñuu Capernaum cán chá quivi cuítí va.

Tává Jesús na ndúu jícó veñuhu cáhnu ñuu Jerusalén

(Mt. 21:12-13; Mr.

11:15-18; Lc. 19:45-46)

¹³ Tá ñacayati quivi caja na Israel vicó pascua já ñaquee Jesús ñasahan chí ñuu Jerusalén. ¹⁴ Ta tá ñaxinu coo a veñuhu cáhnu ndacaan Jerusalén cán já ñaxini a ña jandá johó ndúu na jícó. Java na jícó tindiquí xihín ndicachi xihín ndijata viti ta java na ndúu coo ndíjama jihún. ¹⁵ Ta chí ñatiin Jesús yóho ta ñacavaña in churrú xihín á já ñacasáhá táxi ndihí a na ndúu jícó cán. Ta janda tindiquí

xihín ndicachi jana ná natavá a ri quee rí cūhun ri. Ta já naxinu cōo a nu ndúu na ndijama jiuhún cán já naxicó ñehe a mesa na já nacuyu ndihi jiuhún na nu ñūhu. ¹⁶ Ta nasahnda a chuun nuú na jícó ndijata cán já nacachi a já:

—Tavá ndihi ndó ña jícó ndó jan. A cája ndó xihín vehe tátá i ña cúu á nu cáyahvi ñaha —nacachi Jesús xihín ná.

¹⁷ Tá ndihi já nandicūhun ini na xíca tuun xihín Jesús cán ña cáchí tūhun Ndióxi. Já cáchí a já: “A juú quiahva xójo ini i sahá ña cō cája cáhu ñayivi vehe Ndióxi”, cáchí tūhun Ndióxi.

¹⁸ Tá naxini na Israel cán ña nacaja Jesús ña yóho já nandaca tūhun na mé á já nacachi na já xihín á:

—Xíní ñúhú cajún in ñaha xitúhún já ná cuni nde ña mé á ndaa íin sahún tasún na ndúu jícó veñuhu yóho —nacachi na xihín Jesús.

¹⁹ Anda já nanducú ñehe Jesús tūhun nu ná já nacachi a já xihín á:

—Tá ná jánditani ndó veñuhu yóho ta tixi uní quivi já jácandichi tucu u ña —nacachi Jesús xihín ná.

²⁰ Anda já nacachi na Israel cán já xihín á:

—Cō cándúsa nde ña cáchún jáchí nacaja chúun na ivi jico iñu cuiá já naxinu veñuhu jan. Ta yóhó cáchún ña tixi uní víxí quivi jácandichi tucún ña, vaha —nacachi na cán xihín Jesús.

²¹ Joo cō cáhan toho Jesús sahá veñuhu cáhu cán jáchí cáhan mé á saha yiquí cuñu a. ²² Na cán quea tá naxihí Jesús ta nanditacu tucu a tixi uní quivi já nandicūhun ini na xíca tuun xihín á cán sahá tūhun nacahan mé á nuú na Israel yóho. Ta chí nacandúsa na tūhun Ndióxi ta nacandúsa na tóco ndihi ña nacahan Jesús xihín ná.

Sa xínj va Jesús ínima ñayivi

²³ Cuahá ñayivi ñuu Jerusalén cán nacandúsa na Jesús nani nasahijn a ví-

cō pascua cán sahá ña náhu xihín ña xitúhún nacaja nu ná. ²⁴ Vatí nacachi na cándúsa na mé á joo cōo nacandúsa toho Jesús na jáchí xíní vaha mé á ndá ínima ñehe in in na cán. ²⁵ Ta cō xíní ñúhú toho a ña caxi tūhun na xihín á ndá quiahva íin in in ñayivi jáchí sa xíní ndihi va mé á ínima ná.

Nditúhún Nicodemo xihín Jesús

3 Nasahijn in da xíca cuéntá na fariseo naní Nicodemo ta cúu dá da sacuaḥa nuú na Israel cán. ² Ta ñuu naqueta da cuaḥan da coto nihni da Jesús. Ta tá naxinu cōo da nu á já nacachi da já xihín á:

—Maestro, cándaḥa cáxí ini nde ña nachindahá Ndióxi ndohó vaxi ndó nuú nde ña ná jánaḥa ndó nuú nde. Jáchí ni in túhún toho ñayivi a cuú caja ña náhu cája mé ndó tá ta cō íin Ndióxi xihín ná —nacachi da xihín Jesús.

³ Anda já nanducú ñehe Jesús tūhun nu dá já nacachi a já:

—Mé a ndaa ná caḥan i xihín ndo ña ni in túhún ñayivi a cúu cacomí Ndióxi cuéntá saḥa tá ná a ndicó cōo tucu na cacu tucu na —nacachi a.

⁴ Anda já nandaca tūhun Nicodemo Jesús já nacachi da:

—Ndá quiahva cuu cacu tucu na tá sa nacayatá na. Ama ná ndihvi tucu na tixi náná na já cacu tucu na —nacachi Nicodemo xihín Jesús.

⁵ Anda já nacachi tucu Jesús já xihín dá:

—Cáhan i ña ndaa xihín ndo. Tá nacandúta ñayivi xihín ticuí ta tá nandicutú ndaa ínima ná xihín ínima yíi Ndióxi já cúu á tátūhun cácu tucu na ta anda já cuu cacomí Ndióxi cuéntá saḥa ná. ⁶ Jáchí ñuyiví yóho cácu jahyi ñayivi ta sa já ñayivi cúu va na. Joo na jándicutú Ndióxi xihín ínima yíi mé á, na cán cúu jahyi mé á. ⁷ Ta cō ndítahan catóntó ndó tá cáchí i xihín ndó ña ndítahan cacu tucu ndihi ñayivi já ná cacomí

Ndióxi cuéntá saha ná. ⁸ Jáchí cúú á tá-tuhun tá xícó tachi ndá xoo cúní mé á. Vatí xíní johó í xícó tachi joo cò xíní yo ndá xoo quíxi a ta cò xíní yo ndá xoo cuahan. Quiahva já fin ínimá yí Ndióxi jáchi vatí cò xíní ñayivi mé á joo xíní na ndá quíahva cája mé á tá ñúhu a ini na —ñacachi Jesús xihín Nicodemo.

⁹ Tá nandihí já ñacachi Nicodemo já xihín Jesús:

—Cò cándaqá toho ini í ña cáchí ndo xihín í —ñacachi da.

¹⁰ Anda já ñacachi Jesús já xihín dá:

—Cúú ndó da jánaqá nuú ñayivi Israel ta ndítahan candaqá ini ndó ña yóho, nduu jáchi cúú ndó maestro cáhnu nu ná. ¹¹ Mé a ndaa ná cahan í xihín ndo. Cáhan nde sahá ña cándaqá ini nde ta sahá ña ñaxini nde xihín nuú nde joo ndóhó cò cándúsa ndó ña cáhan nde xihín ndo. ¹² Cáhan í sahá ñaha ñuyíví yóho xihín ndo ta cò cándúsa ndó ña. Ndaja ga ví caja ndó tá ná cahan í sahá ñaha fin indiví.

¹³ Ni in túhún toho ñayivi a ñaha ndaa cuhun chí indiví. In túhún da ndaa indiví cúú da nanuu, da ñaquixi ñuyíví yóho. Ta da cán cúú yehe, da ñachindahá Ndióxi nduu ñayivi. ¹⁴ Sanahá ndivaha ñacata caa Moisés in cò, rí ñacavaha xihín caa nu yító yucú íchí. Quiahva já cata caa ri na yehe, da ñachindahá Ndióxi nduu ñayivi ndíca crúxu ¹⁵ já quéa ná cacu ndaa ínimá ñayivi já ná a cuhun na indayá tá ná candee ini na yehe. Ta xihín ña yóho catacu na anda ama caa quívi.

Quíhvi ndivaha ini Ndióxi ñayivi ndúu ñuyíví

¹⁶ Jáchí saha ña ñaquíhvi ndivaha ini Ndióxi ñayivi ndúu ñuyíví sahá ña cán quéa ñachindahá mé á in túhún jini já jahyi a ñuyíví yóho. Já quéa tá ná candee ini na mé á cuu cacu ndaa ínimá ná já ná catacu na anda ama caa quívi. ¹⁷ Cò

ñachindahá Ndióxi jahyi a ña ná quixi da jándihí da sahá na ndúu ñuyíví yóho. Ñachindahá a jahyi a jáchi cúni a jácacu a ñayivi.

¹⁸ Ta ndá na sa cándee ini yehe, ña cúú u jahyi Ndióxi, na cán cúú na cája cáhnu ini Ndióxi saha. Joo na cò ñaxeen cándúsa ñahá cán, na cán cúú na cò cája cáhnu ini Ndióxi saha jáchi cò ñaxeen na cándúsa na da cúú in túhún jini já jahyi mé á. ¹⁹ Ta na cò ñaxeen cándúsa cán sa ñasacu va Ndióxi saha ná cuhun na indayá jáchi ñacaan na cája na ña núu. Saha ña cán quéa ñaxinu mé á cúú jahyi Ndióxi ñuyíví yóho ta cúní a jándiyéhe a nuú ñayivi. Jáchí cátoó chága na canduu na nuú naá jáchi cája na ña núu. ²⁰ Jáchí tóco ndihí na cája ña núu cándají na ña vaha, ña cúú tá-tuhun ña yehe. Ta cò cúní na cayati na nuú ña yehe cán já ná a ndítivi ña núu cája na. ²¹ Joo na cája ña ndaa, na cán cúú na cayati chága nuú ña vaha, ña cúú tá-tuhun ña yehe já ná ñaha ña mé a ndaa cája na ña cúní Ndióxi —ñacachi Jesús.

Ndícani tucu Juan sahá Jesús

²² Tá sa ñayaha ña yóho já ñaquee Jesús ñasahan chí estado Judea xihín na xíca tuun xihín á. Ta cán ñasahin a chá tiempo xihín ná jáchi najácandúta ná ñayivi mé cán. ²³ Ta jári Juan va najácandúta dá ñayivi chí ñuu naní Enón yati ñuu Salim cán jáchi cán ñúhu cuhá ticuí. Ta cuhá ñayivi ñasahan na cán candúta ná. ²⁴ Tóco ndihí ña yóho ñayaha tá cámaní tiin na Juan chicaan na da vecaa.

²⁵ In tañu java na xíca xihín Juan cán ñacasahá na ndítuhún ihvi na xihín java na Israel sahá ña yóho: á ndíyahvi chága tá cája ndúta Juan ñayivi á tá cája ndúta na xíca tuun xihín Jesús ñayivi. ²⁶ Tá nandihí já ndáva na xíca xihín Juan ñasahan na cáhan na xihín dá já ñacachi na já:

—Maestro, *daṭaa*, *da* *nanditúhún xihín* ndó inga xoo *yuta* Jordán cán, *da* *na-cahan* mé ndó *saha nuú nde* cán, *viti xíca* nuu *da jácandúta* dá *ñayivi* ta *jandá* joho *tóco ndihi ñayivi ndíco* na *da* *viti* —*ñacachi* na cán *xihín* Juan.

²⁷ *Anda* já *ñacachi* Juan já *xihín* na cán:

—Ni in *túhún* toho *ñaha* a *cúu* caja *ñayivi* tá *co* *sáhan* *Ndióxi ñamaní* nu ná caja na *ña*. ²⁸ Ta *sa* *naxini* *joho* ndó *ña* *ñacaxi* *tuhun yachi vi xihín ndo* *ña* *co* *cúu* *yehe* *da* *ñasahan* *Ndióxi* *tuhun* a *chindahá* a *cacomí* a *cuéntá* *sahá* *ñayivi*. *Nachindahá* *Ndióxi* *yehe* já ná *cacu* *tiqhva i íchi* *nuú* *quixi* mé *da* *cán*. ²⁹ *Candehé* *ndo*. *Cúu* á *tátuhun* tá *cúu* in *víco* *tándaha*. Ta *da* *cúu* *amigo* *da* *tándaha* *cán* *ndáti* *da* *casaa* *da*. Ta *cáji* ini *da* tá *xíni* *joho* *da* *nu* *cáhan* *vatá* *da* *tándaha* *cán* *jáchi* *iin* *ñájihí* *da* *xihín* *dá*. Ta *quiahva* já *cáji* ini *i* *jáchi* *cásahá* *ñayivi* *ndíco* *na* *jata* *Jesús* *viti*. ³⁰ Mé *Jesús* *jan* *ndicáhu* *joho* *ga* *cuhun* *a*. Ta *yehe* *ndítahan* *nuu* *ndáha* *joho* *i* *cuhun* *i* —*ñacachi* Juan.

Jesús queá ñaquixi chí indiví

³¹ Mé *Jesús* *ñaquixi* *chí* *indiví* ta *cáhu* *chága* mé á *nu* *ndíhi* *ñaha*. Ta *ñayivi* *ñacacu* *ñuyívi* *yóho* *cáhan* *na* *sahá* *ñaha* *ñuyívi* *cuití* *va*. Joo mé á *ñaquixi* *chí* *indiví* *cán* *cúu* á *ña* *cáhu* *chága* *nu* *tóco* *ndihi* *ñaha*. ³² Ta *cáhan* mé a *cán* *sahá* *ña* *naxini* *xihín* *nuu* a ta *cáhan* *sahá* *ña* *naxini* *joho* a. Joo ni in na *co* *cúni* *candúsa* na *ña* *cáhan* mé á. ³³ Joo *ndá* *na* *candúsa* *nu* *cáhan* mé á, *na* *cán* *cúu* *na* *candaa* *cáxi* ini na *ña* *cáhan* *Ndióxi* *ña* *ndaa*. ³⁴ *Ndióxi* *queá* *nachindahá* mé á ta *cáhan* *ndinuhu* *tuhun* *Ndióxi* *jáchi* *co* *ndáhví* *toho* *cúu* ini *Ndióxi* *jándicutú* *ndaa* mé a *cán* *xihín* *ínima* *yí* mé á. ³⁵ Ta *Ndióxi*, *tátá* a *ña* *iin* *indiví* *quíhvi* *ndivaha* ini a in *túhún* *jini* já *jahyi* a ta *ñasahan* *ndée* a *nuú* *jahyi* a *ña* ná *cuu* caja *tóco* *ndihi*

ñaha. ³⁶ Ta *ndá* *na* *cándeé* ini mé a *cúu* in *túhún* *jini* já *jahyi* *Ndióxi* *cán*, *na* *cán* *cúu* *na* *catacu* *anda* *ama* *cáa* *quívi*. Joo *na* *co* *cúni* *candúsa* *ñahá* *cán*, *na* *cán* *cúu* *na* a *ñehe* *táhví* *toho* na *catacu* na *xihín* *Ndióxi*. *Ña* *caja* *Ndióxi* *xihín* ná *queá* *chindahá* a *na* *cuhun* *na* *indayá* *anda* *ama* *cáa* *quívi*.

Ndítúhún Jesús xihín in ñañáha cuéntá Samaria

4 Ta *ndaja* *coo* na *fariseo* *ñacandaa* ini na *ña* *cuaha* *chága* *ñayivi* *ndíco* *jata* *Jesús* ta *cuaha* *chága* *ñayivi* *jácandúta* *Jesús* a *juú* *ga* Juan. ² *Vatí* a *juú* mé *Jesús* *jácandúta* *ñayivi* *joo* *na* *xíca* *tuun* *xihín* á *cán* *jácandúta* *ñahá*. ³ Ta tá *naxini* *joho* *Jesús* *ña* *cáhan* *ñayivi* *sahá* já *naquee* a *estado* *Judea* *xihín* *na* *xíca* *tuun* *xihín* á *cuahan* *na* *ndíco* *coo* na *chí* *estado* *Galilea*.

⁴ Ta *nuú* *cuhun* a *Galilea* *cán* *ndúsa* *yaha* *ndaa* *estado* *Samaria* já *xinu* a *nuú* *cuhun* a *cán*. ⁵ Ta *naxinu* a in *ñuu* *loho* *naní* *Sicar* *cuéntá* mé *Samaria* *cán* *yati* *nuú* *ñundáhyi* *ña* *najándicoo* *tahvi* *Jacob* *nu* *José*, *jahyi* *da*. ⁶ Ta *cán* *ñasahíin* in *chicoho* *ña* *naní* *chicoho* *Jacob*. Ta *cúu* á *tátuhun* *çaxivi* tá *naxinu* *coo* *Jesús* *ñuu* *Sicar* *cán*. Ta *chí* a *váha* *ga* *ñacanaá* a *sahá* *ña* *cán* *queá* *ñasaco* a *yati* *yuhú* *chicoho* *cán*. ⁷ Ta *nani* *iin* *coo* a *cán* já *naxinu* in *ñañáha* *cuéntá* *Samaria* *tavá* *ña* *ticuí* ini *chicoho* *cán*. Já *ñacachi* *Jesús* já *xihín* *ña*:

—*Quiahva* *loho* *ticuí* ná *coho* *i* — *ñacachi* a *xihín* *ña*. ⁸ *Jáchi* *sa* *cuahan* *na* *xíca* *tuun* *xihín* á *ñuu* *cueen* na *ñaha* *cuxu* na.

⁹ *Anda* já *ñacatóntó* *ña* *jáchi* *co* *xíni* *táhan* *vaha* *na* *Israel* *xihín* *na* *Samaria*. Ta *ñacachi* *ña* já *xihín* *Jesús* *já*:

—*Ndá* *cuéntá* *queá* *xíca* *yóhó*, *da* *Israel*, *ticuí* *nuú* *i* *cohun* ta *ña* *Samaria* *va* *cúu* *yehe* —*ñacachi* *ña* *cán* *xihín* *Jesús*.

¹⁰ Já *ñacachi* a *já* *xihín* *ña*:

—Tá ná candaꝯ inún yo cúú yehe, da xíca ticuíꝯ nuꝯ ta tá ná candaꝯ inún ndá quiahva ín ña cúní Ndióxi quiahva nuꝯ já cacún ña nuú i. Jáchi yehe cuu caja i ña ná catacún anda ama cáa quívi ta ña yóho cuu a tátuhun ticuíꝯ, do a cúú ndihi saha —nꝯacachi Jesús.

¹¹ Anda já nꝯacachi ña cán já xihín á:

—Candehé ndo. Ni yáxi co ñehe ndó tavá ndó ticuíꝯ ini chꝯoꝯo yóho ta chꝯoꝯo cúná ndivaha cúú ña yóho. Ndá cuu caja ri ndó quiahva ndó ticuíꝯ cáchi ndo jan nuú i. ¹²Tásáhnú jícó nde, da naní Jacob cán najándacoo chꝯoꝯo yóho nuú nde. Ta nuú chꝯoꝯo yóho naxihi da cán ticuíꝯ ta sa mé chꝯoꝯo yóho naxihi ri jahyi da cán ta yóho naxihi ri quítí ja-na dá. Ama ná cuu quiahva mé ndó ticuíꝯ vaha chága a juú ga dó najándacoo Jacob nuú nde —nꝯacachi ña cán xihín Jesús.

¹³ Anda já nꝯanducú ñehe Jesús tũhun nu ña já nꝯacachi a já:

—Ndá ñayivi nꝯacuu va xíhi ticuíꝯ chꝯoꝯo yóho já queá ichi tá ichi ini na.

¹⁴ Joo ndá na ná coho ticuíꝯ táhan dó sahan yehe, na cán cúú na a ndícó coo ga na ichi ini na anda ama cáa quívi. Jáchi cúú á tátuhun sa mé ini mé va na cana ticuíꝯ, dó a ndíhi saha ta catacu na anda ama cáa quívi —nꝯacachi Jesús xihín ña.

¹⁵ Anda já nꝯacachi ña cán já xihín Jesús:

—Quiahva mé ndó ticuíꝯ, dó co ndíhi saha jan nuú i ña ná a ichi ga ini i ticuíꝯ já ná a quíxi ga i yóho tavá i dó coho i —nꝯacachi ña xihín á.

¹⁶ Anda já nꝯacachi Jesús já xihín ña:

—Cuáhán cana yíun ná quixi da yóho xũhun.

¹⁷ Anda já nꝯanducú ñehe ña cán tũhun nu á já nꝯacachi ña já:

—Coó toho yíi i.

Anda já nꝯacachi Jesús já xihín ña:

—Mé a ndaa coó toho yíun. ¹⁸Joo nasahin uñun yíun ta da ín xũhun viti

jan co cúú toho da yíun. Ndaꝯ ndusa cáhun —nꝯacachi Jesús.

¹⁹ Já nꝯacachi ña já xihín á:

—Jivi ndusa in profeta cúú mé ndó.

²⁰ Tásáhnú jícó nde, na Samaria yóho nꝯacaja cáhnú na Ndióxi yati jini yúcu jan. Joo ndóhó, na Israel cáchi ndo ña ndúsa ndítahan nuú nde cũhun nde ñuu Jerusalén caha cáhnú nde Ndióxi. Ta mé ndó ndaja cachi ndó —nꝯacachi ña cán xihín Jesús.

²¹ Anda já nꝯanducú ñehe Jesús tũhun nu ña já nꝯacachi a já xihín ña:

—Xíní ñúhú candúsún ña cáhan i jáchi mé a ndaa vaxi quívi caja cáhnú ndihi ndó Ndióxi, tátá yo ndá xoo nꝯacuu va. A cúní ñúhú ga ndó cũhun ndo jini yúcu cáa ta ni a cúní ñúhú ga ndó cũhun ndó ñuu Jerusalén caha cáhnú ndó Ndióxi.

²² Joo ndóhó, na Samaria caha cáhnú cuáá ndo Ndióxi jáchi co xini ndó a. Joo ndehe, na Israel xini vaha nde yo cúú Ndióxi caha cáhnú nde. Jáchi chichi mé nde, na Israel nasacu ini Ndióxi quixi mé á jácacu ñayivi. ²³ Ta viti naxinu quívi tá ndítahan caha cáhnú ñayivi Ndióxi, tátá yo xihín ndinuhu ini na tá quiahva cúní ínima yíi Ndióxi jáchi quiahva já cúní Ndióxi, tátá yo ña ná caha cáhnú ñayivi mé á. ²⁴ A cuú cuni yó Ndióxi jáchi coó toho yiquí cuñu a sahá ña cán queá xini ñúhú caha cáhnú ñayivi mé á xihín ínima ná ta xihín ndinuhu ini na —nꝯacachi Jesús xihín ña.

²⁵ Anda já nꝯacachi tucu ña cán já:

—Sa candaꝯ cáxi ini i ña vaxi quívi quixi da chindahá Ndióxi cacomí a cuéntá sahá ñayivi, mé da cúú Cristo. Ta tá ná quixi da cán já ndicani ndihi da nuú nde ndaja coo —nꝯacachi ña cán xihín Jesús.

²⁶ Anda já nꝯacachi Jesús já xihín ña:

—Da cán cúú yehe, da cáhan xũhun viti —nꝯacachi Jesús xihín ña.

²⁷ Ta nani cáhan Jesús xihín ña naxinu coo na xíca tuun xihín á já nꝯacatóntó

na jáchi naxini na ndítuhún a xihín in ñáñáha. Joo ni in túhún na coo nasahan ndeé ini na cuhun na ndaca tuhún ñahá ndá a cuni ñá cán, á ndá saha ndítuhún a xihín ñá. ²⁸ Tá nandihí já najándacoo ñá cán yoo ñá ta naquee ñá cuahan ñá ñuu. Ta cán ñacasáhá cahan ñá xihín na ñuu cán já cáchí ñá já xihín ná:

²⁹ —Naha quíí ndó. Candehé ndó in dataa, da ñacahan ndihí da tá quiahva ñacaja i. Á a juú da yóho cúú Cristo, da ñacachi Ndióxi chindahá a cacomí cuéntá sahá ñayivi —ñacachi ñá cán xihín ná.

³⁰ Tá nandihí já ñaqueta ndihí na cán cuahan na xihín ñá nu íin Jesús. ³¹ Joo tá cámani xinú coo na nu íin Jesús já najacahan na xica xihín á mé á ñá ná cuxu a vatí loho.

³² Andá já ñacachi Jesús já xihín na xica tuun xihín á cán:

—Sa íin va ñaha cuxu u. Ta ndóhó, co xíní toho ndó ndá a queá —ñacachi Jesús xihín ná.

³³ Tá nandihí já ñacasáhá na cán ndáca tuhún táhan na já cáchí na já:

—Ndá na sa ñaquixi ñehe va ñaha cuxu a —cáchí xihín táhan na.

³⁴ Sahá ñá cán queá ñacachi Jesús já xihín ná:

—Tá quiahva ndíva ha ini ñayivi tá xíxi na quiahva já ndíva ha ini i tá cája i chuun ña ñachindahá Ndióxi yehe caja i ñuyívi yóho. Ta xíní ñúhú caja i ña jan-da quiahva ná jáxinu coo i ña. ³⁵ Xíní ñúhú ndínehe ndó nuu ndó candehé ndo ñayivi jáchi cúú ná tátuhun nuú naxutu na trigo. Joo co xíní ñúhú caja ndó tá quiahva cája ñayivi tá ndáti na comí yoo jáquee na trigo. Jáchi viti ñúhú íin tiahva ñayivi ndiquehe na tuhun Ndióxi. ³⁶ Ndá na xica chindeé ñayivi ndiquehe na tuhun Ndióxi, na cán cúú ná tátuhun na xica jáquee trigo. Ta a cája chúun uun toho na jáchi quehe na yahvi sahá chuun cája na. Ta na ndiquehe tuhun Ndióxi

cán cúú na cuhun catacu indivi anda ama cáa quívi. Ta sahá na cán cavatá da naxutu xihín da najáquee. ³⁷ Jáchi íin in tuhun ta ndaa cahan ña. Já cáchí a já: “In da xútu ta inga da jáquee jáchi cúú ndívi da da cája chúun nuú in xitoho.” ³⁸ Ta quiahva já ñayaha xihín mé ndó jáchi yehe ñachindahá i ndohó ña ná cuhun ndó chindeé ndo ñayivi ndihvi na íchi cuéntá Ndióxi vatí coo ñandoho ini ndó caxi tuhun ndó tuhun Ndióxi xihín ná. Jáchi inga na ñacaxi tuhun tuhun Ndióxi xihín na cán joo ndóhó ñehe táhvi ndó chindeé ndó na ndihvi na íchi cuéntá Ndióxi —ñacachi Jesús xihín na xica tuun xihín á cán nani cámani xinú coo ñayivi ñuu cán nu á.

³⁹ Ta cuahá ñayivi ñuu Samaria cán ñacandúsa na Jesús sahá ña ñacahan ñáñáha cán xihín ná jáchi ñacachi ñá cán já xihín ná: “Ñacachi mé á xihín i ndaja cáa tóco ndihí ña ñacaja i.” ⁴⁰ Sahá ña cán queá tá naxinu coo na Samaria cán nu íin Jesús já naxica táhvi na nu á ña ná coo chága xihín ná. Sahá ña cán queá ñacandoo Jesús ñasahin a ivi quívi xihín na cán. ⁴¹ Ta cuahá java ga na Samaria cán ñacandúsa na Jesús sahá tuhun ñacahan mé á xihín ná. ⁴² Já ñacachi mé na Samaria cán xihín ñáñáha cán já:

—Ñacandúsa nde yohó tá ñacahún sahá Jesús nuú nde joo viti cándéé ini nde mé á jáchi naxini johó nde nu cahan mé á. Ta viti ndusa cándúsa nde ña cúú á Cristo, mé á ñachindahá Ndióxi jácaco a ñayivi ñuyívi —ñacachi na Samaria cán xihín ñá.

Tá ñandaja vaha Jesús jahyi in da cája chúun cuéntá gobierno

⁴³ Tá sa ñayaha ivi quívi ñasahin Jesús mé Samaria cán já ñaquee tucu a cuahan chí estado Galilea. ⁴⁴ Jáchi sa ñacachi mé Jesús já: “Ni in túhún toho profeta co cája cáhnu na da ñuu da”, ñacachi Jesús. ⁴⁵ Joo tá naxinu coo Jesús

estado Galilea cán já nandiquehe vaha na cán mé á jáchi sa nasahan ri na cán vicó pascua ñuu Jerusalén ta cán naxini na ña nánu nacija mé á.

⁴⁶ Andá já naxinu coo tucu Jesús ñuu Caná cuéntá Galilea cán nuú nandaja mé á ticuij nanduu dó vino. Ta mé ñuu cán nasahijn in dataa, da cája chúun cuéntá gobierno. Ta a juú quiahva quíhvi jahyi da cándúhu dá ñuu Capernaum. ⁴⁷ Ta tá naxini joho da cán ña sa naquee Jesús estado Judea ta ín a estado Galilea viti já ndáva da nasahan da nu á já naxica tahví da nu á ña ná cuhun a vehe da ndaja vaha jahyi da jáchi sa ndicáhvi da cándúhu dá. ⁴⁸ Tá nandihí já nacihi Jesús já xihín dá:

—Ndúsa caja i ña nánu xihín ña xitúhún nu ndo já cuu candúsa ndó yehe á tá coo ta co cúnj ndó candúsa ndó yehe —nacihi Jesús.

⁴⁹ Andá já nanducú ñehe da cája chúun cuéntá gobierno cán tuhun nuú Jesús já nacihi da já xihín á:

—Á a cuú caja ndó ñamaní cuhun quíj ndó vehe e jáchi cúnj quivi jahyi i —nacihi da xihín Jesús.

⁵⁰ Andá já nacihi Jesús já xihín dá:

—Cuáhán ndicó coo ndó vehe ndó jáchi nandivaha jahyi ndó —nacihi Jesús xihín dá.

Ta nandúsa da cán ña nacihi Jesús xihín dá chí naquee da nandicó coo da cuanúhu dá. ⁵¹ Ta tá sa yati xinu coo da vehe da já ndáva nihni na cuú mozo da nasahan na ñehe ná da já nacihi na já xihín dá:

—Sa co quíhvi ga jahyi ndó viti.

⁵² Andá já nandaca tuhún da cán mozo da já cáchi da já:

—Ndá hora nacasáhá nandivaha jahyi i —nacihi da xihín ná.

Já nacihi na cán já:

—Cuni tátuhun caa in sahini já nandindaa ña chicaan cáhni á da.

⁵³ Xihín ña yóho nandaa ini da cán ña mé a ndaa nandaja vaha Jesús jahyi da jáchi mé hora cán nacihi Jesús xihín dá ña tácu tá tácu jahyi da. Sahá ña cán quea nandúsa mé dá xihín na vehe da Jesús.

⁵⁴ Ta xihín ña yóho naxinu ivi ña xitúhún nacija Jesús estado Galilea cán andá nani naquee a Judea já nandicó coo tucu a Galilea.

Tá nandaja vaha Jesús in da quíhvi, da ín yuhú ticuij naní Betesda

5 Tá nayaha ña yóho já naquee Jesús cuahan ñuu Jerusalén nu cája na Israel vicó. ² Ta mé nu quíhvi joho na ñuu Jerusalén cán ín in yéhe naní yéhe ndicachi. Ta yati cán nasahijn in vehe ta ín uhun yuyéhe nu quíhvi na ini a ta ini mé vehe cán ndacaan in pila cáhnu nu ñúhu ticuij ta naní a Betesda tuhun hebreo.

³ Ta ní ini mé vehe cán nacaníhni na quíhvi ndúu na. Java na cuú ná na cuáa. Java na quíhvi saha. Ta java na naxihí tuhú. Ní cán nacaníhni na ndúu na ndáti na ndicanda ticuij cán. ⁴ Jáchi ndá tañu núu táto Ndióxi ta jándicanda mé á ticuij cán. Ta ndá na ná queta nuu nu cuítí ini mé ticuij cán tá nandihí nandicanda do já ndivaha na ta co cája toho a ndá cuehe ndóho na. ⁵ Ta tañu tóco ndihí na quíhvi nasanduu cán nasandacaan in dataa, da sa ín oco sahun uní cuia quíhvi da. ⁶ Ta tá naxini Jesús cándúhu dá tañu na quíhvi cán ta tá nandaa ini a ña sanahá ndivaha quíhvi da já nandaca tuhún a da já nacihi a já xihín dá:

—Á ndivahún cúnun.

⁷ Andá já nanducú ñehe da cán tuhun nu á já nacihi da já:

—Coo ni in ñayivi yóho ña chindee na yehe queta nuu i ini ticuij tá ndicanda do. Jáchi tá jacá cáhán uun i jáqueta i mí i, sa naquee vaha va inga na nuú i. Ña cán quea a cuú ndivaha i —nacihi da cán xihín Jesús.

⁸ Andá já nacachi Jesús já xihín dá:

—Cuáhán ndacoo nditivún yívun ta cuanúhun —nacachi Jesús xihín dá cán.

⁹ Tá nacachi Jesús já chí ivi laá nandivaha dá quíhvi cán já nandiquehe da yívi dá já nacasáhá dá xíca da. Ta sahá ña cúu á quívi ndíquehe ndée ná ¹⁰ sahá ña cán queá naqueta java na sacuaḥa nuú na Israel já nacachi na já xihín dá:

—Viti cúu á quívi ndíquehe ndée yo ta co ndítahan toho nuun cojún yívun caca nuún —nacachi na xihín dá.

¹¹ Andá já nanducú ñehe dá cán tuhun nu ná já nacachi da já:

—Mé da nandaja vaha yehe cán cúu dá nasahnda chuun nuú i ña ná cojo i yívi cuhun i —nacachi da cán xihín ná.

¹² Já nandaca tuhún tucu na Israel cán dá já nacachi na já:

—Yo já nacachi xuhun ña ná ndicojún yívun cuhun —nacachi na cán.

¹³ Joo dá cán co xini dá yo nandaja vaha ñahá jáchi tá nandaja vaha Jesús dá já naquihvi nuu a cán tañu ñayivi cuḥa cán cuḥan. ¹⁴ Tá nandihí já nanditahan Jesús dá cán ini veñuhu cáhnu já nacachi a já xihín dá:

—Candehé. Sa co quíhvi gaún viti. A ndíco coo gaún cajún cuachi jáchi tiḥva náá quixi ña ndeé chága ví ndohún —nacachi Jesús xihín dá.

¹⁵ Tá nandihí já ndáva dá cán nasahan dá cáxi tuhun da nuú na Israel ña Jesús cúu ña nandaja vaha ñahá. ¹⁶ Sahá ña cán queá nacasáhá na Israel cán cája xíxi na xihín Jesús. Ndúcú na cahní na a sahá ña cája chúun a ndája vaha mé á na quíhvi quívi ndíquehe ndée ná. ¹⁷ Andá já nacachi Jesús já xihín ná:

—Cája chúun ta cája chúun Ndióxi, tátá i sahá ña cán queá cája chúun ta cája chúun ri yehe va —nacachi Jesús.

¹⁸ Sahá ña cán queá ví ga ví cuni na Israel cán cahní na Jesús jáchi cáchi na co cája cáhnu a Ndióxi quívi ndíquehe ndée ná tá quiahva cáchi ley. Ta cuni

na cahní na mé á jáchi cáchi a ña cúu á in túhún jini já jahyi Ndióxi ta xihín ña yoho ndája mé á tátuhun mé Ndióxi.

Ña cúu cája Jesús sahá ña cúu á in túhún jini já jahyi Ndióxi

¹⁹ Já nacachi Jesús já xihín na Israel cán:

—Mé a ndaa ná caḥan i xihín ndo. Yehe cúu u in túhún jini já jahyi Ndióxi ta co cája i ni in ñaha cuéntá mí i jáchi cája i ña xini i cája Ndióxi, tátá i. Ta tóco ndihí ña cája tátá i ña cán cúu ña cája ri yehe va. ²⁰ Jáchi sahá ña quíhvi ini Ndióxi, tátá i yehe sahá ña cán queá náha mé á nuú i ndaja táhan ñaha cája mé á. Ta janda ñaha náhnu chága ví nahá mé á nuú i ta chí catóntó ndihí ndó tá ná cuni ndó ña. ²¹ Jáchi tá quiahva cája Ndióxi, tátá i jánditacu a ndii ña ná catacu na quiahva já cuu caja ri yehe jánditacu u na cuni mí i catacu. ²² Ta mé Ndióxi, tátá i co cája víi toho a sahá ñayivi. Ña nacaja mé á queá nasahan ñamaní nuú i, dá cúu in túhún jini já jahyi mé á, ña ná caja víi i saha ná. ²³ Já queá ná caja cáhnu ñayivi yehe tá quiahva cája cáhnu na Ndióxi, tátá i. Jáchi ndá na co cája cáhnu yehe náha ña co cája cáhnu na Ndióxi, tátá i jáchi mé a cán nachindahá yehe vaxi i.

²⁴ Mé a ndaa ná caḥan i xihín ndo. Ndá na táa johó vaha nu cáhan i ta cándusa na Ndióxi, mé a nachindahá yehe quixi i, na cán cúu na catacu anda ama cáa quívi. Ta a jándoho Ndióxi ini na indayá jáchi cúu á tátuhun sa najánditacu tucu Ndióxi na. ²⁵ Mé a ndaa ná caḥan i xihín ndo ña vaxi quívi ta cúu á tiempo viti tá na co tácu cuni johó na ña cáhan yehe, dá cúu in túhún jini já jahyi Ndióxi. Ta ndá na ná ndiquehe vaha tuhun cáhan i xihín ná catacu na anda ama cáa quívi. ²⁶ Jáchi tá quiahva cuu caja Ndióxi catacu ñayivi quiahva já nacaja mé á ña ná caja ri yehe, dá cúu in

túhún jini já jahyi mé á, ña ná cuu catacu ñayivi. ²⁷ Ta nasahan mé á ñamaní nuú i ña ná caja víi i sahá ñayivi ñuyívi jáchi yehe cúu da naquixi indivi nduu in ñayivi. ²⁸ A cátontó ndo sahá ña cáhan i xihín ndo yóho jáchi mé a ndaa vaxi quívi tá cuni johó tóco ndihi na sa naxihí nuú cáhan i xihín ná ²⁹ já queta na camasano. Ta na ñacaja vaha cán nditacu na ta cuhun na catacu na anda ama cáa quívi. Ta na ñacaja ña quini nditacu na ta cuhun na indayá ndoho ini na.

Náha Jesús ña iin saha cája tóco ndihi ña cája

³⁰ Tóco ndihi ña cája i a juú in túhún mí i caja ña. Tá quiahva sáhdá Ndióxi, tátá i chuun nuú i ña ná caja víi i sahá ñayivi quiahva já cája víi i saha ná. Ta cája víi ndaa i saha ná jáchi co ndúcú u caja i ña cúní mí i. Ña ndúcú u caja i cúu ña cúní Ndióxi, tátá i caja i jáchi mé á nachindahá yehe quixi i. ³¹ Jáchi tá saha mí i ná caca nuu i cáhan i, co nditahan ndíquehe ndó ña cáhan i sahá i. Co ndítahan nuú i cáhan i saha mí i ³² jáchi iin inga ña cáhan sahá i ta ña cáhan mé a cán sahá i cúu á ña ndaa. ³³ Ta mé ndó nachindahá ndo java na nasahan na ndaca tuhún na Juan sahá i. Ta ña ndaa nasacuu tóco ndihi tuhun nanducú ñehe da cán nu ndo. ³⁴ Vatí co ndátí i cándúsa ndó yehe sahá ña cáhan in ñayivi sahá i joo cuu cacu ndaa ínimá ndó tá ná cándúsa ndó ña cáhan Juan sahá i. ³⁵ Jáchi mé Juan, da ñacaja ndúta ñayivi cán nasacuu da tátuhun in íti, dó jándiyéhe nuu ndo. Joo chá tiempo cuití va ñacajii ini ndó xihín tuhun nacahan da. ³⁶ Iin inga ña cáhnu chága a juú ga ña nacahan Juan sahá i. Ta ña cán cúu á ña náhnu xihín ña xitúhún naxini ndó ñacaja i. Ta ña yóho náha nu ndo yo cúu yehe ta náha ña cúu á ña ndaa ña nachindahá Ndióxi, tátá i yehe. Jáchi tóco ndihi ña cája i cúu á ña na-

cachi Ndióxi, tátá i xihín i caja i. ³⁷ Ta Ndióxi, tátá i, mé á nachindahá yehe náha tuhun sahá i. Joo ndóhó, co xini johó ndó nu cáhan mé á ta ni co xini tívi ndó a. ³⁸ Ta ni coo tuhun mé á ndacaan ínimá ndo jáchi co cándúsa ndó yehe, da nachindahá mé á quixi ñuyívi yóho. ³⁹ Vatí jácuaha vaha ndó tuhun Ndióxi sahá ña ndúcú ndo ndaja cuu catacu ndó anda ama cáa quívi joo co cándaa ini ndó ña mé tuhun Ndióxi cán cúu á ña cáhan sahá yehe. ⁴⁰ Ta co cúní ndó quixi ndó nuú i já ná caja i ña ná catacu ndó anda ama cáa quívi.

⁴¹ Co ndúcú toho i ña ná caja cáhnu ndó yehe. ⁴² Sa xini vaha i ínimá ndo ta cándaa ini i ña co quíhvi ini ndó Ndióxi. ⁴³ Naxinu i ñuyívi yóho cuéntá Ndióxi, tátá i ta co cúní ndó ndiquehe vaha ndó yehe. Joo tá ná quixi in da cuéntá mé dá já ndiquehe vaha ndusa ndó da. ⁴⁴ Jáchi mé ndó cátóo ndó candoo vaha ndó nuú ñayivi cuití va ta co ndúcú ndó candoo vaha ndó nu Ndióxi. Saha ña cán quea ihvi ndivaha cúu ini ndó cándeé ini ndó in túhún jini Ndióxi. ⁴⁵ Coto a juú cáhan ndo ña jácojo i cuachi jata ndo nu Ndióxi, tátá i. Mé ley ñacahyí Moisés, ña cán cúu á chícacaa cuachi jata ndó vatí cándeé ini ndó da. ⁴⁶ Tá ta mé a ndaa cándúsa ndó ña ñacahyí Moisés sanahá já quea cándúsa ndó yehe jáchi sahá yehe ñacahyí Moisés sanahá. ⁴⁷ Joo sahá ña co cándúsa ndó ña ñacahyí Moisés sahá i sahá ña cán quea co cándúsa ndó ña cáhan i xihín ndo —ñacachi Jesús xihín na Israel cán.

Sáhan Jesús ña cuxu uhun mil ta

(Mt. 14:13-21; Mr. 6:30-44; Lc. 9:10-17)

6 Tá sa nayaha tóco ndihi ña yóho já ñaquee Jesús cuahan inga xoo tañuhú Galilea cán. Ta mé tañuhú cán cáhan tucu na xihín dó naní do Tiberias. ² Ta cuahá ndivaha ñayivi ndico jata Jesús cuahan na jáchi naxini na ña

náhn̄u n̄acaja mé á tá n̄andaja v̄aha mé á n̄a quih̄vi. ³Tá n̄andihi já n̄andaa Jesús in x̄iqui ta cán nasacoo a x̄ihín n̄a x̄ica tuun x̄ihín a cán. ⁴Ta mé tiempo já s̄a cáyati vicó pascua n̄a cája mé n̄a Israel cán. ⁵Ta tá n̄andicoto nihni Jesús já n̄axini a n̄a ndíco cuah̄á n̄ayivi jatá v̄axi na já n̄acachi a já x̄ihín Felipe:

—Ndájá cájún cuéntá cohó cueen nah̄á yo n̄a cuxu tóco ndihi n̄ayivi yóho —n̄acachi Jesús x̄ihín dá.

⁶Nacachi Jesús n̄a yóho x̄ihín Felipe jách̄i cún̄i a cuni a ndíá cachi dá cán x̄ihín á. Jách̄i s̄a x̄in̄i v̄aha Jesús ndáa quéa caja n̄a ná cuxu ndihi n̄a cán. ⁷Anda já n̄anducú ñehe Felipe tuhun nuú Jesús já n̄acachi da já x̄ihín á:

—Ni iv̄i ciento denario ná cañehé, a quéta toho n̄a cán cueén pan ná quiahva in yuhú in yuhú cuxu in in n̄ayivi ndúu yóho —n̄acachi dá cán x̄ihín Jesús.

⁸Anda já nacahan Andrés, dá cúu in táhan n̄a x̄ica tuun x̄ihín Jesús, dá cúu ñani Simón Pedro. Já n̄acachi da já x̄ihín Jesús:

⁹—Yóho íin in t̄a loho ta ñéhe da uh̄un pan cebada x̄ihín iv̄i t̄iyacá. Joo ama ná queta ri n̄a yóho cuxu tóco ndihi n̄ayivi jan —n̄acachi Andrés x̄ihín Jesús.

¹⁰Anda já n̄acachi Jesús já:

—Cahan ndó x̄ihín ná n̄a ná cacoo na.

Anda já nasacoo ndihi n̄a cán. Ta a juú quiahva ndató nasahnu yuc̄u nuú nasacoo tátuhun uh̄un mil t̄a. ¹¹Tá n̄andihi já n̄atiin Jesús pan cán já n̄andiquiahva ndixah̄vi nu Ndióxi. Ta tá n̄andihi já nasahan n̄a nuú n̄a x̄ica tuun x̄ihín á ta n̄andicahnda na n̄a nuú na ndúu coo cán. Ta quiahva já nacaja ri a x̄ihín t̄iyacá va. Ta n̄axixi ndihi na janda quiahva nachutú t̄ixi na. ¹²Ta tá n̄andihi já n̄acachi Jesús já x̄ihín n̄a x̄ica tuun x̄ihín á cán:

—Jánditaca ndó tóco ndihi n̄a nacandoo jan já ná a t̄ív̄i n̄a —n̄acachi Jesús x̄ihín ná.

¹³Sahá n̄a cán quéa najánditaca na n̄a ta najándicutú na ux̄u iv̄i toyicá x̄ihín n̄a nacandoo. ¹⁴Tá naxini ndihi n̄ayivi cán n̄a xitúhún nacaja Jesús yóho já n̄acasahá cách̄i x̄ihín táhan na já:

—Jivi ndusa dá yóho cúu profeta n̄acachi Ndióxi chindahá a ñuyiv̄i yóho —cách̄i x̄ihín táhan na.

¹⁵Joo naquee Jesús cuahan in túhún mé á coo a yúcu jách̄i x̄in̄i mé á n̄a ndúcu n̄ayivi cañehe ndúsa n̄a mé á jách̄i cún̄i na ndaja na mé á rey nu ná.

Tá n̄axica sáhá Jesús nuú tañuhú

(Mt. 14:22-27; Mr. 6:45-52)

¹⁶Tá s̄a nacuaá já nanuu n̄a x̄ica tuun x̄ihín Jesús x̄iqui cán cuahan chí yuhú tañuhú cán. ¹⁷Ta chí s̄a nacanaá v̄aha va ta coo Jesús x̄inu coo nu ndúu na sahá n̄a cán quéa n̄andaa na jatá in barco ta n̄acasahá n̄a jándicaca na do jách̄i cún̄i n̄a cuh̄un n̄a nuu Capernaum. ¹⁸Ta ndaja coo n̄acasahá ndícojo ticuiv̄i nuú tañuhú cán jách̄i n̄acasahá x̄ícó in tach̄i ndeé ndivaha. ¹⁹Ta tá s̄a nacaxicá n̄a uh̄un á ñ̄u kilometro cuahan n̄a x̄ihín barco cán nuú ticuiv̄i já n̄axini na x̄ica sáhá Jesús cuahan nuú ticuiv̄i já cáyati a nu barco cándójó n̄a cán. Anda já n̄acasahá yíhv̄i n̄a ndúu na. ²⁰Ta tá n̄axinu coo Jesús nu ná já n̄acachi a já x̄ihín ná:

—A cáyih̄v̄i toho ndó jách̄i yehe va cúu u —n̄acachi a x̄ihín ná.

²¹Anda já cávatá n̄a najándaa na a jata barco. Ta iv̄i laá s̄a n̄axinu coo na nuú cuahan n̄a.

Nd̄inducú n̄ayivi Jesús

²²Tá n̄at̄ivi inga quiv̄i itaan já n̄acasahá n̄ayivi nd̄inducú n̄a Jesús jách̄i n̄axini na n̄a coo n̄andaa toho a in túhún barco nasah̄in cán x̄ihín n̄a x̄ica tuun x̄ihín a jách̄i mé cuití n̄a cán s̄a n̄andaa cuahan. ²³Ta nani ndúu na yuhú tañuhú yati nuú n̄andaja cuah̄a Jesús pan tá n̄andihi n̄andiquiahva mé á ndix-

ahvi nu Ndióxi cán já naxinu ɔo java barco, dó naquixi chí ñuu Tiberias. ²⁴ Ta sahá ña ɔo nanditahan na Jesús sahá ña cán queá nandaa na barco cán já naquee na cuahan na ñuu Capernaum ndinducú ñahá na.

Jesús cúú á tátuhun pan xixi ñayivi já tácu na

²⁵ Tá naxinu ɔo na cán inga xoo tañuhú já nanditahan na Jesús. Ta nacasáhá ndáca tuhún na mé á já cáchí na já:

—Maestro, ndá hora naxinu ɔo ndó yóho —nacachi na xihin á.

²⁶ Andá já nacachi Jesús já xihin ná:

—Mé a ndaa ná cahan i xihin ndo. Xíca ndó ndinducú ndó yehe joo ɔo cúú á sahá ña nacandaa ini ndó yo cúú yehe. Sahá ña náhnu nacaja i tá nasahan i ña naxixi ndó janda naxutú tixi ndó sahá ña cán queá ndinducú ndó yehe. ²⁷ ɔo ndítahan ndihi nahá ini ndó sahá ña cuxu ndó ñuyívi yóho. Ña ndítahan caja ndó queá ndinducú ndó ndá quiahva catacu ndó anda ama cáa quivi. Jáchí yehe cúú da naxindahá Ndióxi nduu ñayivi ta cuu caja i ña ná catacu ndó anda ama cáa quivi. Jáchí Ndióxi, tátá i náha ña mé a ndaa nacaxi a yehe caja i chuun yóho —nacachi Jesús xihin na cán.

²⁸ Andá já nacachi na cán já xihin á:

—Ndá ndítahan nuú nde caja nde já ná jáxinu ɔo nde ña cuni Ndióxi —nacachi na xihin Jesús.

²⁹ Já nacachi Jesús já xihin ná:

—Ña cuni Ndióxi caja ndó queá ná candúsa ndó yehe, da naxindahá mé á ñuyívi yóho.

³⁰ Andá já nacachi tucu na cán já xihin á:

—Ndá náha xituhún chága cuu caja ndó nuú nde viti ña ná cuni nde ña já ná cuu candúsa nde ndohó. Ndá a náhnu queá cuu caja ndó. ³¹ Jáchí mé tásáhnu jícó nde naxixi na pan tá naxica

na yucú íchí nu ɔo ndúu ñayivi cán. Já cáchí tuhun Ndióxi já: “Naxixi na pan ña naquixi indivi nacaja Moisés” —nacachi na cán xihin Jesús.

³² Já nacachi Jesús já xihin ná:

—Mé a ndaa ná cahan i xihin ndo. A juú toho Moisés cúú da nasahan pan ña naquixi indivi nu ná. Jáchí Ndióxi, tátá i cúú ndusa ña nasahan pan naquixi indivi nu ná. Ta viti cuni Ndióxi quiahva in náha va ha chága nu ndo a juú ga ña nasahan Moisés nuú na cán sanahá. ³³ Jáchí yehe cúú u tátuhun pan ña nanuu indivi nacaja Ndióxi ña ná cuu catacu ñayivi anda ama cáa quivi —nacachi Jesús xihin na cán.

³⁴ Andá já nacachi na cán já xihin á:

—Nini quivi quiahva ndó táhan pan jan nuú nde, xitoho.

³⁵ Já nacachi Jesús já xihin ná:

—Yehe cúú u tátuhun mé pan jan. Tá ná ndiquehe ñayivi yehe já ndivaha ini na ta cúú á tátuhun a cuíco ga na. Ta ndá na cándúsa na mí i já cúú á tátuhun a íchí ga ini na ticuí. ³⁶ Joo cúú á tá quiahva nacachi i xihin ndo: ɔo cándúsa toho ndó yehe vatí xini ndó yehe. ³⁷ Joo tóco ndihi na vaxi nuú i cája Ndióxi, na cán cúú na cándúsa yehe. Ta ndá na cándúsa yehe, na cán ɔo táxi i na ña ná quee na cuhun na. ³⁸ Jáchí vatí nanuu i indivi nu ín Ndióxi joo ɔo naquixi i caja i ña cuni mí i. Vaxi i caja i ña cuni Ndióxi, tátá i jáchí mé á naxindahá yehe. ³⁹ Ta ña cuni Ndióxi queá ña ná a quiahva i ñamaní ndihi sahá na nasahan mé á nuú i. Ña cuni mé á queá ná jánditacu u tóco ndihi na tá ná xinu ɔo quivi nu ndíhí. ⁴⁰ Ña cuni Ndióxi queá ná catacu ñayivi, na cándeé ini yehe anda ama cáa quivi. Ta yehe, da cúú in tuhún jini já jahyi mé á jánditacu u na quivi nu ndíhí cuí —nacachi Jesús.

⁴¹ Andá já nacasáhá na Israel cán cahan nuu na sahá Jesús jáchí sa nacachi a ña cúú á tátuhun pan ta nacachi a ña

ñanuu a chí indiví. ⁴² Ta já ñacachi xih̄in táhan na cán já:

—Á a juú jahyi José va cúu Jesús yóho. Ta xinī vaha va mí yo cúu náná da xih̄in tátá da. Ta ndá cuéntá queá cáchí ri da ña ñaquixi da chí indiví, dá já —ñacachi xih̄in táhan na cán.

⁴³ Andá já ñacachi Jesús já xih̄in ná:

—A cahan núu ga ndó sahá i. ⁴⁴ Jáchi jácahan Ndióxi, tátá i, ñayivi ña ná candúsa na yehe. Ta ni in túhún toho ñayivi a cuú candúsa na yehe tá ta co jácahan Ndióxi ínima ná, mé á ñachindahá yehe. Ta na cán cúu na jánditacu u quiví nu ndíhí. ⁴⁵ Já ñacahyí na profeta sanahá: “Jánaha Ndióxi tóco ndihi ñayivi.” Ña cán queá tóco ndihi ñayivi, na xinī johu nu cahan Ndióxi ta cája na ña jánaha mé a nu ná, na cán cúu na vaxi nuú i.

⁴⁶ Joo a juú cahan ndo ña cuu cuni java ñayivi Ndióxi, tátá i. Jáchi yehe, da ñachindahá mé á ñuyiví yóho, cúu in túhún da xinī ñahá. ⁴⁷ Mé a ndaa ná cahan i xih̄in ndo. Ndá na candeé ini yehe, na cán cúu na catacu anda ama cáa quiví. ⁴⁸ Jáchi yehe cúu u tátuhun pan ña cuu caja ña ná catacu na. ⁴⁹ Sa xinī ndó tásáhnú jícó ndo naxixi na pan yucú íchí sanahá joo naxih̄i tá naxih̄i na.

⁵⁰ Joo yehe cúu u tátuhun pan ña ñanuu chí indiví já queá ndá na cándúsa yehe cúu ná tátuhun na xixi pan ta já a quiví na. Jáchi tá ná cuxu na pan quiahva i nu ná já queá catacu na anda ama cáa quiví.

⁵¹ Yehe cúu u tátuhun mé pan xixi na. Ñanuu i indiví ta a cúu ndihi sahá i. Ta jivi mé yiquí cuñu i cúu á tátuhun pan xixi na yóho ta vaxi quiví ndiquiahva i ña nu ná já ná cuu cacu ndaa ínima ná. Ta tá ná cuxu na ña já catacu na anda ama cáa quiví —ñacachi Jesús.

⁵² Andá já ñacasáhá na Israel cán ndítuhún cuehe xih̄in táhan na já ñacachi na já:

—Cáchí da yóho ña cúu yiquí cuñu da tátuhun pan xixi ñayivi. Ndaja cuu caja

ri da quiahva da ña nu yo cuxú —cáchí xih̄in táhan na.

⁵³ Andá já ñacachi Jesús já xih̄in ná:

—Mé a ndaa ná cahan i xih̄in ndo. A cuú catacu ndó anda ama cáa quiví tá ta co cándúsa ndó yehe. Ta tá cándúsa ndó yehe cúu á tátuhun xixi ndó yiquí cuñu i ta cúu á tátuhun xih̄i ndó ní i. ⁵⁴ Ndá na xixi na yiquí cuñu i ta xih̄i na ní i, na cán cúu na cacu ndaa ínima ná ta jánditacu u na quiví nu ndíhí. ⁵⁵ Jáchi yiquí cuñu i cúu ndusa tátuhun in ñaha vaha ndivaha cuxu na ta ní i cúu dó tátuhun in dó vaha xih̄i na. ⁵⁶ Ndá na ná ndiquehe vaha yehe cúu á tátuhun ndiquehe vaha na in pan cuxu na ta cúu á tátuhun ndiquehe na ticuí xih̄i na. Já queá in nduu na xih̄in i ta já in nduu ri yehe va xih̄in mé ná. ⁵⁷ Ta sahá ña tácu Ndióxi, tátá i, mé a ñachindahá yehe sahá ña cán queá tácu ri yehe va cája mé á. Quiahva já vaha ri xih̄in ñayivi jáchi tá ná ndiquehe vaha na yehe já catacu na caja i. ⁵⁸ Jáchi yehe cúu u ndusa tátuhun pan ña ñanuu indiví. Ta co cúu á tátuhun ña nayaha xih̄in tásáhnú jícó ndo tá naxixi na pan naní maná yucú íchí cán jáchi tá nandihí naxih̄i tá naxih̄i na cán. Joo ndá na candeé ini yehe cúu ná tátuhun na xixi pan ña ñaquixi indiví. Ta na cán catacu na anda ama cáa quiví —ñacachi Jesús.

⁵⁹ Tóco ndihi ña yóho najánaha Jesús nu ná ini veñuhu ñuu Capernaum cán.

Cuu catacu ñayivi anda ama cáa quiví tá ná candeé ini na Jesús

⁶⁰ Ta cuahá táhan na xica xih̄in Jesús cán tá naxini johu na ña ñacahan mé á já ñacasáhá cahan núu na sahá já cáchí na já:

—Yáncá ndivaha candúsa í tuhun cahan Jesús yóho. A cúu toho caja i xih̄in á —ñacachi na cán.

⁶¹ Tá naxini Jesús ña cáhvi núu ini na xica xih̄in a cán já ñacasáhá cáchí a já xih̄in ná:

—Ndíhiví ndó sahá tuhun nacahan i yóho. ⁶² Ndaja ga ví ndihiví ndó tá ná cuni ndó yehe ndaa i cuhun i indiví nuú nasahin i jáchi yehe cúú u da nachindahá Ndióxi nduu ñayivi. ⁶³ Nasahan Ndióxi in ínima nuú in in ñayivi ña ná chindeé a na ndinducú na mé á. Joo yiquí cuúu ñayivi co chindeé toho a na ndinducú na mé á. Ta tóco ndihi ña nacahan i xihín ndo cúú á ña cuu xinu ini ínima ndo ña ná catacu ndó anda ama cáa quívi. ⁶⁴ Joo ndúu java ndó camaní yíí candúsa ndó ña cáhan i xihín ndo — nacachi a.

Nacachi Jesús ña yóho jáchi sa xini mé á anda saha ndá na cúú na co candúsa ñahá. Ta sa xini Jesús ndá da cúú da jicó túhún ñahá. ⁶⁵ Anda já nacachi tucu a já:

—Sahá ña cán queá cáchi i xihín ndó ña ni in túhún toho ñayivi a cuú candúsa na yehe tá co jácahan Ndióxi ínima ná — nacachi Jesús.

⁶⁶ Tá nacachi Jesús ña yóho já queá cuaha táhan na nasaxica xihín a cán najándacoo na mé á ta chí coo naxeen ga na caca nuu na xihín á. ⁶⁷ Anda já nandaca túhún Jesús ndíhuxu ivi na xica tuun xihín a cán já nacachi a já xihín ná:

—Á cuhun ri ndóhó va cuni ndo — nacachi a.

⁶⁸ Anda já nanducú ñehe Simón Pedro tuhun nuú Jesús já nacachi da já:

—Candehé ndo, xitoho i. Yo nuú ga cuu cuhun nde. Tuhun cáhan ndó xihín nde caja ña ná cuhun nde catacu nde anda ama cáa quívi tá ná candúsa nde ña. ⁶⁹ Ta ndehe sa nacandúsa va nde ndohó. Ta sa xini vaha nde ña cúú ndó Cristo, ña in túhún jini já jahyi Ndióxi, ña tácu indiví — nacachi Pedro cán xihín Jesús.

⁷⁰ Anda já nacachi Jesús já:

—Mé a ndaa nacaxi i ndíhuxu ivi ndó ña ná caca tuun ndó xihín i. Ta vatí nacaxi i ndihi ndó joo in táhan ndó cúú dá cuénta tiñahá sacuha — nacachi Jesús.

⁷¹ Nacachi Jesús ña yóho saha Judas, jahyi Simón Iscariote jáchi mé Judas cán cúú dá da jicó túhún ñahá chága chí nuu vatí cúú dá in táhan da uxu ivi na xica tuun xihín Jesús cán.

Có cuni na cúú ñani Jesús candúsa na mé á

7 Tá nayaha ña yóho já naxica nuu Jesús tá nuu tá nuu estado Galilea cán. Coó naxeen ga cuhun a chí Judea jáchi cán nacasáhá na ndúcu na mé á cahná na a. ² Joo sahá ña nacayati víco tá ndúu ñayivi vehe tiyahvá válí cája na Israel ³ sahá ña cán queá nacachi java ñani Jesús já xihín á:

—Ndía cájún coún yóho. Cuáhán chí Judea já ná cuni na xica xuhun cán ndaja ndaa ña náhnu cájún. ⁴ Jáchi tá cuni in dataa nahá da ña náhnu cája da já queá co ndácoo jehé toho da cája da ña. Tá ta mé a ndaa cájún ña náhnu já queá xini ñúhú cájún ña já ná cuni níí cúú ñayivi ndaja náhnu ñaha cájún — nacachi ñani Jesús xihín á.

⁵ Nacachi na cán ña yóho jáchi ni mé ñani a cán coo nacandúsa ñahá. ⁶ Anda já nacachi Jesús xihín na cán já:

—Camaní yíí ndindaa hora cuhun i. Ta vaha ri ndóhó ndá hora nacuu va cuu cuhun ndó jan. ⁷ Jáchi ñayivi cája ña núu ñuyívi yóho a cuú candají toho na ndohó joo candají na yehe jáchi cáxi táhyí cáhan i xihín ná ña cája na ña núu. ⁸ Cuáhán mé ndó víco tá cuni ndó cuhun ndo jáchi yehe a cuhun toho i jáchi camaní yíí xinu hora cuhun i — nacachi a.

⁹ Ña yóho nacachi Jesús xihín ñani a. Ta nacandoo mé á estado Galilea cán.

Tá naxinu coo Jesús víco vehe tiyahvá cán

¹⁰ Joo tá nandihí naquee ñani Jesús cán cuahan na víco já naquee ri Jesús cuahan mé víco cán. Joo coo naxeen a nahá tívi a mé á nuú ñayivi. ¹¹ Ta mé na

sacuaḡa nuú na Israel cán naçasáhá na ndúcú na Jesús: “Ndá xíca nuu da tañu víco cán”, cáhán na.

¹² Ta jandá johó ndítuhún yaá ñayivi sahá Jesús xíca nuu na víco cán. Java na cáhí na sahá Jesús ña cúú dá ta cája vaḡa. Ta java na cáhí na: “Co cúú toho da ta vaḡa jáchí xíca nuu cuití da jándahvi da ñayivi”, cáhí na.

¹³ Joo ni in na co sáhan ndée ini caḡan sahá nuú na sacuaḡa nuú na Israel cán jáchí yíhvi ñahá na.

¹⁴ Ta tá nataḡvi java víco cán já naquihvi Jesús ini veñuhu cáhnu ñuu Jerusalén cán já naçasáhá jánaḡa nuú ñayivi. ¹⁵ Ta tá xíní johó na Israel cán nu caḡan Jesús chí cátóntó na já naçasáhá ndáca tuhún táhan na já cáhí na já:

—Ndájá naçatiahva nahá da yóho ña jánaḡa da nu yo jáchí a juú da naxíca jácuaha cúú dá —naçachi xihín táhan na cán.

¹⁶ Andá já naçachi Jesús já xihín ná:

—Ña jánaḡa i nu ndo yóho co cúú á ña naquixi jiní mí i jáchí cúú á ña quíxi nu Ndióxi, tátá i, mé á naçindahá yeḡe.

¹⁷ Ta tá mé a ndaa sácú ini ndó cajú ndó ña cúní Ndióxi já queá cuu candaá ini ndó á caḡan i cuéntá Ndióxi, á caḡan i cuéntá mí cuití vi. ¹⁸ Jáchí ndá na caḡan cuéntá mé ná já queá ndúcú na ña ná cajú cáhnu ñayivi na. Joo ndá na ndúcú ña ná ndicáhnu mé á naçindahá ñahá cán, na cán cúú ndusa na caḡan ña ndaa ta co cája na ña co ndítahan nu ná cajú na.

¹⁹ Mé a ndaa najándacoo Moisés ley nu ndo joo ni in túhún ndo co cája ndó ña cáhí a. Ta viti cúní ndó cahní ndó yeḡe —naçachi Jesús.

²⁰ Andá já nanducú ñeḡe na cán tuhun nu á já naçachi na já:

—Rí quini va ndácaan ini yóhó jáchí ni in túhún toho na co ndúcú cahní yohó —naçachi na cán.

²¹ Andá já naçachi Jesús já xihín ná:

—Chí cátóntó ndivaḡa ndó sahá in túhún ña cáhnu naçaja i quívi ndíquehe ndée yo. ²² Joo candehé ndo. Moisés cúú da naḡahnda chuun nu tásáhnu jícó yo ña ná chicaan na marca yiquí cuñu na vatí a juú Moisés natavá sahá, vaḡa. Mé tásáhnu jícó yo natavá sahá ta mé ndó chicaan tá chicaan ndó marca yiquí cuñu ta valí vatí cúú á quívi ndíquehe ndée yo. ²³ Ta viti cáhí ndo xihín i ndaja cáa ri ña yóho. Mé ndó chicaan ndó marca yiquí cuñu da valí vatí cúú á quívi ndíquehe ndée yo jáchí co cúní ndó yaḡa nuú ña naḡahnda Moisés nu ndó. Ta viti xójo ini ndó xihín i sahá ña nandaja vaḡa i in ní yiquí cuñu in daḡaa quívi ndíquehe ndée yo. Ndaja cáa ri ña jan cáa já. ²⁴ Mé ndó ndaja naçuu caḡan núu ndó sahá ñayivi ta co ndítahan toho cajú ndó já. Jáchí ndítahan nu ndó candaá ini ndó ña cúú ña ndaa —naçachi Jesús xihín na cán.

Ndicani Jesús ndáchí naquixi a

²⁵ Ta java na ñuu Jerusalén naçasáhá ndáca tuhún táhan na já cáhí na já:

—Á a juú da yóho cúú da xíca na ndúcú na cahní na. ²⁶ Nu ndíhi na cándichi da jánaḡa da ta ni in na co ndaa cúu da. Á tá coḡ ta jandá na jutixia cáa cándusa na ña cúú dá Cristo, da naçindahá Ndióxi cacomí a cuéntá sahá ñayivi. ²⁷ Joo mí xíní vaḡa í ndá ñuu naquixi da yóho ña cán queá xíní yo ña co cúú toho da Cristo jáchí tá ná quixi ndusa Cristo cán ni in na a candaá ini ndá ñuu quixi da —naçachi na cán caḡan na sahá Jesús.

²⁸ Ta nani jánaḡa Jesús ini veñuhu cáhnu cán já naçasáhá caḡan cóhó a já naçachi a já:

—Mé a ndaa xíní vaḡa ndó yeḡe ta xíní ndó ndá ñuu naquixi i. Joo coḡ vaxi yeḡe cuéntá mí i. Mé Ndióxi naçindahá yeḡe vaxi i, mé a cán cája ña ndaa. Joo mé ndó co xíní toho ndó a. ²⁹ Yeḡe xíní vaḡa i yo

cúu mé á jáchì nàquixi ì nù ìn mé á ta nàchindahá mé á yehè vaxi ì —nàcachi a.

³⁰ Andá já ndúcu nà tiin na Jesús chicaan nà a vecaa joo ni in na coó nasahan ndeé ini tiin ñahá jáchì cámaní yí ndinda hora tiin na a. ³¹ Ta cuahá táhan ñayivi naxini johò nuú nàcahan Jesús cán nàcandúsa na mé á ta já cáchì nà já:

—Á a juú da yóho cúu Cristo jáchì tá ná quixi inga da ama ná caja da ñaha xitúhún chága a juú ga da yóho —nàcachi na.

Ndúcu nà fariseo chicaan nà Jesús vecaa

³² Tá naxini johò nà fariseo ña cáhan núu ñayivi sahá Jesús já nandindeé ini na ta nandindeé ini ri nà sacuahá nuú jutú cán chí nàchindahá nà java soldado cuéntá veñuhu cáhnu cán ña ná tiin na Jesús chicaan nà a vecaa. ³³ Andá já nàcachi tucu Jesús já:

—Chá tiempo cuití va coo tóo ì xihìn ndò ñuyíví yóho jáchì tá nandihí já cùhun tucu ù nù ìn mé á nàchindahá yehè. ³⁴ Andá jáví caca nuu ndó ndinducú ndó yehè joo a ndítahan ndó yehè jáchì a cúu cùhun ndó nuú coo ì —nàcachi Jesús.

³⁵ Tá naxini johò nà Israel cán ña nàcachi Jesús já nàcasáhá ndáca tuhún táhan na já cáchì nà já:

—Ta ndáchí já cùhun ri da yóho ña cáchì da ña a cúu nditahan í da. Á cùhun xíca da ñuu nà tóho nù ndúu nà Israel ña ná jánahá da nuú nà griego. ³⁶ Ndía cúni cachi da xihìn yó tá nàcachi da ña ndinducú yó da ta a ndítahan toho í da. Jáchì nàcachi da xihìn yó ña a cúu cohò nuú coo da —nàcachi xihìn táhan nà cán jáchì coó nàcandaa ini na ña nàcachi Jesús xihìn ná.

Jesús cúu á tátuhun yuta ticuif

³⁷ Ta mé quiví nù ndíhí víco cán nasacuu a quiví cáhnu chága nuú nà Israel. Ta mé quiví cán nandaca ndichi Jesús já nàcayuhú a já nàcachi a já:

—Ndá ndó íchì ini ticuif, naha ndó nuú ì já ná caja ì ña ná ndivaha ini ndó.

³⁸ Jáchì já nàcahyí a nuú tuhun Ndióxi: “Ndá nà ná candeé ini yehè, ini mé ñima ná cana tátuhun yuta ticuif, dó caja ña ná catacu na” —nàcachi Jesús xihìn nà cán.

³⁹ Ña cúni Jesús cachi a xihìn nà yóho quéa tá ná candeé ini na mé á já xinu quiví ndiquehe na ñima yí Ndióxi ini ñima ná. Vatí mé a ndaa a ñaha toho xinu ñima yí Ndióxi ini ñayivi jáchì cámaní yí va ndindita Jesús ndicáhnu ndivaha mé á indiví.

Sa jiin sa jiin ñaha cáhan ñayivi sahá Jesús

⁴⁰ Java nà ndúu tañu ñayivi cuahá cán tá naxini johò na ña yóho já nàcasáhá cáchì nà já:

—Jivi ndusa da yóho cúu profeta nàcachi Ndióxi chindahá a ñuyíví yóho —cáchì nà.

⁴¹ Ta java na cáchì nà sahá Jesús ña cúu á Cristo, da nàchindahá Ndióxi cacomí cuéntá sahá ñayivi. Ta java na cáchì nà ña a juú toho a jáchì cáhán nà ña a cúu toho quixi Cristo estado Galilea. ⁴² Jáchì cáchì tuhun Ndióxi ña tá ná quixi Cristo ñuyíví yóho cacuu da da quixi chichi David, da nasacomí cuéntá sahá ñayivi Israel sanahá. Ta cáchì tuhun Ndióxi ña cacu da cán ñuu Belén nuú nàcacu mé David cán.

⁴³ Ta chí nàcasáhá nà sáhdá java táhan na sahá ña coó nandique táhan tuhun na sahá Jesús. ⁴⁴ Ta java na cúni nà tiin na a ña ná cañehe ñahá nà cùhun a vecaa. Joo ni in na coó natiin ñahá.

Cō cúnj nā jutixia candúsa na Jesús

⁴⁵Tá nandihí já nandicó cōo soldado cuéntá veñuhu cán nū ndúu nā fariseo xihín nā sacuaḥa nuú jutū cán joo cōó Jesús ñehe na ná casaḥa nā. Já naçasáhá nā ndúu cán ndáca tuhún ñahá nā já cáchí nā já:

—Ndá cuéntá queá cōó natiin ndó da —naçachi nā cán xihín soldado.

⁴⁶Andá já nanducú ñehe soldado cán tuhun nū ná já cáchí da já xihín ná:

—Naçatóntó nde naxini johō nde nū cāḥan da jáchí ñúchí ndivaha cāḥan da ta ni in túhún nā cōó naçahān tá quiaḥva cāḥan mé dá —naçachi soldado cán.

⁴⁷Já naçachi nā fariseo já xihín dá:

—Á jári ndóhó va najándahvi da jan viti. ⁴⁸Jáchí jandá ni in túhún toho táhan nā sacuaḥa ndúu tañu mé nde cō cándúsa nde da jan. Ta ni in nā fariseo cō cándúsa na nū cāḥan Jesús jan. ⁴⁹Joo cháhan va vaxi jatá ñayivi cándéé ini Jesús jan jáchí cō xini nā ña cáchí ley Moisés —naçachi nā fariseo xihín soldado.

⁵⁰Andá já nandicaḥan Nicodemo, da cúú in táhan nā fariseo cán, mé dá naçahān da nanditúhún xihín Jesús in ñuú. Já naçachi da já xihín nā java ga cán:

⁵¹—Cáchí ley ña a cuú tiñ in taḥa ta já chicaḥan ndaja naçuú da vecaa. Ña cáchí ley queá ndítahan cuni johō í nuú cāḥan da já ná candaa iní ndaja cáa ña naçaja da —naçachi Nicodemo.

⁵²Andá já naçaja ceḥe nā xihín Nicodemo já naçachi na já xihín dá:

—Á da Galilea cúú ri yóhó va. Cuáhán cahvi vaḥa tuhun Ndióxi já cunún ña cō cána ni in profeta estado Galilea —naçachi na xihín Nicodemo.

⁵³Tá nandihí já nandicuíta nuu ndihí nā cán cuánúhu ná vehe na.

Cája cáhnu ini Jesús saḥá in ñañáḥa

8 Ta ndaja cōo naquee Jesús cuahān chí yúcu yitó olivo. ²Ta tá nativi inga quiví itaan já nandicó cōo tucu a veñuhu cáhnu cán. Ta tá naçayati ñayivi nū á já naçacōo a ta naçasáhá jánaḥa nū ná. ³Ta ndaja cōo na jánaḥa ley Moisés xihín nā fariseo ñehe na in ñañáḥa naçaa nā nū á. Mé ñañáḥa cán nanditahan na ña mé hora cándúhu ñá xihín in dataa, da cō cúú yí ña. Ta já ñehe na ña naçacu ndichi na ña nū nā ndúu cán. ⁴Já naçachi na já xihín Jesús:

—Candehé ndo Maestro. Nanditahan nde ñañáḥa yóho cándúhu ñá xihín in dataa, da cō cúú yí ña. ⁵Ta nū ley najándacoo Moisés nuú nde táhnda chuun ña ná cuun nde yuu najihí cája já. Ta mé ndó ndía cachi ndó —naçachi na.

⁶Naçachi nā cán já xihín Jesús jáchí cúnj nā coto ndojó cuití ñahá nā ta cúnj nā ñeḥe iní nā jácojo na cuachi jatá Jesús. Tá nandihí já naçacōo Jesús já naçasáhá cáhyí a nū ñúhu cán xihín nducu ndáḥa á. ⁷Ta saḥá ña ndúcú ndéé nā cán ndáca tuhún ñahá nā nandaca ndichi Jesús já naçachi a já xihín ná:

—Ndá ndó, nā cōó naçaja cuachi jácana jihna ñúhú ndó yuú jatá ña —naçachi a xihín ná.

⁸Já naçacōo tucu a cáhyí a nū ñúhu cán xihín nducu ndáḥa á. ⁹Ta tá naxini johō tóco ndihí nā cán ña naçachi Jesús já naçasáhá nā cácahan nuu ná ta tá in tá in na naçasáhá queé na cuahān nā. Ta jihna ñúhú ga nā yatá naçasáhá queé cuahān já ndíco nā yúta chága cuahān na. Ta tá sa naquee ndihí na cuahān nā já naçandōo mé Jesús xihín ñá cán. ¹⁰Andá já nandaca ndichi a ta nandaca tuhún a ña já naçachi a já xihín ñá:

—Ndáchí cuahān nā jácojo cuachi jatun. Á cōó ga nā jácojo cuachi jatun viti —naçachi Jesús xihín ña.

¹¹ Andá já ñacachi ñá cán já xihín Jesús:

—Mé a ndaa cóo ga na.

Andá já ñacachi Jesús já:

—Ta ni yehe a chicaan i cuachi jatun.

Cuanúhu vehún ta a cája gaún cuachi — ñacachi a.

Jesús cúú á tátuhun ñúhu ña jándiyéhe ínimá ñayivi

¹² Já ñacasáhá tucu Jesús cáhan xihín ñayivi já cáchí a já xihín ná:

—Yehe cúú u tátuhun ñúhu ña jándiyéhe ínimá ñayivi ta ndá na cándéé ini yehe cúú á tátuhun a cáca ga na nuú naá. Jáchí jándiyéhe e nu ná ta cája i ña ná catacu na andá ama cáa quivi.

¹³ Andá já ñacachi ña fariseo já:

—Saha mé vún cáhun ta xihín ña jan náhún ña cúnun ndínehe jícun mún. Ta xihín ña jan náha ña có cáhun ña ndaa —ñacachi na.

¹⁴ Andá já ñacachi Jesús já xihín ná:

—Tóco ndihi ña cáhan i saha mí i cúú á ña ndaa ta iin sahá vatí mí i cáhan i ña. Jáchí xini vaha i ndá ñaquixi i ta xini vaha i ndá cuhun i. Joo ndóhó, có xini toho ndó ndá ñaquixi i ta có xini toho ndó ndá cuhun i. ¹⁵ Mé ndó cátoó ndó cándéhé ndaa ndó ñayivi tá quiahva cája ñayivi ñuyiví. Joo yehe có cája toho i já.

¹⁶ Joo tá ná caja ví i sahá ñayivi, caja i ña tá quiahva ndítahan caja i jáchí cája i ña ndaa. Ta a juú in túhún yehe caja ví saha ná jáchí Ndióxi, tátá i, mé a nachindahá yehe, mé á cán queá caja ví saha ná xihín mí i. ¹⁷ Nu ley mé ndó cáchí a ña tá in nuú cáhan ivi ñayivi sahá ña nayaha já náha ña cúú á ña ndaa. ¹⁸ Ta viti cuni johó ndó jáchí quiahva já yaha ri xihín yehe va. Jáchí yehe cúú in testigo ta cáhan i saha mí i. Ta inga testigo cúú Ndióxi, tátá i, mé a nachindahá yehe —ñacachi Jesús xihín ná.

¹⁹ Andá já nandaca tuhún na Jesús já cáchí na já xihín á:

—Ndájá iin tátún jan —ñacachi na.

Andá já ñacachi Jesús já:

—Tá ná cuni ndó yo cúú yehe já cuu candaa ri ini ndó yo cúú tátá i. Joo có xini ndó yo cúú yehe ta cáchí ga ví tátá i có xini ndó a —ñacachi Jesús.

²⁰ Tóco ndihi ña yóho ñacachi Jesús xihín ná nani jánaña ini veñuhu cáhnu yati nuú ñasahin sató ndée jjuhún jó-co na cán. Joo ni in na cóo ñasahan ndeé ini tiin ñahá chicaan vecaa jáchí cóo ñasahan Ndióxi ñamaní sahá ña cámaní yí ndindaa hora tiin na mé á.

Cáhan Jesús xihín ñayivi ña a cúú toho cuhun na nuú cuhun mé á

²¹ Andá já ñacasáhá tucu Jesús cáchí a já xihín ná:

—Vaxi quivi quee yehe cuhun i. Ta caca nuu ndó ndinducú ndó yehe joo a ndínehe ndó yehe jáchí cája tá cája ndó cuachi janda quiahva xinu quivi quivi ndó. Ta sahá ña cán queá a cúú cuhun ndó nuú cuhun yehe cán —ñacachi Jesús.

²² Andá já ñacasáhá na Israel cán ndítuhún xihín táhan na já cáchí na já:

—Á cahní da yóho mé dá cuni da ña cán queá cáchí da xihín yo ña a cúú toho caja í cohó nuú cuhun da —cáchí na.

²³ Já ñacachi tucu Jesús já:

—Mé ndó cúú ndó ñayivi ndúu ñuyiví yóho joo yehe cúú u da ñaquixi chí indiví. Mé ndó cúú ndó cuéntá ñuyiví yóho joo yehe có cúú toho i cuéntá ñuyiví yóho. ²⁴ Sahá ña cán queá ñacachi i xihín ndó ña caja ndó cuachi janda quiahva xinu quivi quivi ndó. Jáchí tá có cándúsa ndó ña cúú yehe da cáchí i cúú u, da nachindahá Ndióxi, já queá quivi ndó sahá cuachi ndó —ñacachi Jesús.

²⁵ Andá já nandaca tuhún na cán Jesús já ñacachi na já xihín á:

—Ta ndá da cúú yóhó, dá já —ñacachi na.

Já ñacachi Jesús já:

—Janda sahá va nacahan i xihin ndó yo cúu yehe. ²⁶ Ta ña xini johó i cahan mé á nachindahá yehe, ña cán cúu ña cahan i xihin ñayivi ñuyiví. Ta ndinuhu ña ndaa queá cahan mé á. Ta mé a ndaa fin cuahá ndivaha ña núu cája ndó ta cuu tavá i sahá nu ndó tá ná caja víi i saha ndó —nacachi Jesús.

²⁷ Joo coó nacandaa ini na ña cahan Jesús saha Ndióxi, tátá a tá nacachi a já xihin ná. ²⁸ Saha ña cán queá nacachi tucu a já xihin ná:

—Tá nandihí ná cata caa ndó yehe, da nachindahá Ndióxi nduu ñayivi ndica crúxu já queá candaa ndusa ini ndó ña yehe cúu u da cáhí i cúu u. Ta ni in túhún ñaha co cája i cuéntá mí i. Ta ña jánaha i nu ndó cúu ña najánaha Ndióxi, tátá i nuú i. ²⁹ Ta mé á nachindahá yehe co najándacoo ndáha toho a yehe jáchi fin tuun Ndióxi, tátá i xihin i. Ta ní tiempo ña cája i cúu ña cájii ini Ndióxi xihin —nacachi Jesús.

³⁰ Ta chí cuahá ñayivi nacandúsa na Jesús tá naxini johó na tóco ndihí ña yóho.

Ná ndúu ndáha rí quini xihin na ndúu ndáha Ndióxi

³¹ Anda já nacahan Jesús xihin java na Israel, na sa nacandúsa ñahá cán já nacachi a já xihin ná:

—Tá ná caja ndó tá fin nacahan i xihin ndó já nahá ndó ña mé a ndaa táhyí cúu ndó na cuéntá mí i. ³² Ta já candaa ini ndó ña ndaa ta ña cán caja ña ná a cácuu ga ndó tátuhun in mozo, da ndúu ndáha rí quini —nacachi Jesús.

³³ Anda já nacachi na cán já xihin á:

—Na naquixi chichi Abraham cúu nde. Ta janda ni in túhún tañu coó nasacuu nde mozo. Joo yóho cáhún xihin nde ña a cácuu ga nde mozo. Ndaja cáa ña cáa ri a já —nacachi na.

³⁴ Já nacachi Jesús já xihin ná:

—Mé a ndaa ná cahan i xihin ndo. Tóco ndihí na sá caja cuachi cúu tá cúu na tátuhun mozo nuú cuachi jáchi cómi a cuéntá saha ná. ³⁵ Ta da cúu mozo nuú in xitoho, coó saha dá coo nahá da xihin xitoho da jáchi vaxi quivi ndítahan quee da cuhun da. Joo da cúu jahyi mé da cúu xitoho cán fin saha dá coo nahá da xihin tátá da jáchi cúu dá da vehe tátá da. ³⁶ Ta quiahva já fin xihin yehe, da cúu jahyi Ndióxi. Cája i ña ná a cácomí ga cuachi cuéntá saha ndo ta já a cácuu ga ndó tátuhun mozo nuú cuachi cája ndó. ³⁷ Ta sa cándaa vaha ini i ña cúu ndó ñayivi naquixi chichi Abraham. Joo mé ndó cúní ndó cahní ndó yehe jáchi co cúní ndó ndiquehe vaha ndó tuhun cahan i. ³⁸ Cahan i saha tóco ndihí ña nanaha Ndióxi, tátá i nuú i. Joo ndóhó cája ndó ña cahan tátá ndo xihin ndó —nacachi Jesús.

³⁹ Anda já nacachi na cán já xihin á:

—Abraham cúu tátá nde jáchi chichi da cán naquixi nde —nacachi na.

Já nacachi Jesús já xihin ná:

—Tá jivi ndusa cúu ndó na naquixi chichi Abraham já queá caja ndó tá quiahva nacaja da cán, nduu. ⁴⁰ Joo ndúcú ndó cahní ndó yehe jáchi cahan i ña ndaa xihin ndo tá cáhí i ña najánaha Ndióxi nuú i. Mé Abraham coó nacaja toho da já. ⁴¹ Joo cája ndó ña núu tá quiahva cája tátá ndo —nacachi Jesús.

Já nacachi na cán já xihin á:

—A juú jahyi ndáhví toho ñayivi cúu ndehe. Ndióxi cúu ndusa tátá nde —nacachi na.

⁴² Já nacachi Jesús já:

—Tá Ndióxi ndusa ná cacuu tátá ndo ta quihvi ini va ndó yehe, nduu. Jáchi Ndióxi nachindahá yehe vaxi i ta fin i yóho viti. Coó vaxi toho i cuéntá mí i. Ndióxi queá nachindahá yehe vaxi i. ⁴³ Joo co cándaa ini ndó tóco ndihí ña ndícáni i nu ndo ta cúu á sahá ña co cúní ndó cuni johó ndó nu cahan i xihin ndo.

⁴⁴ Tátá ndo cúu tiñáhá saꝓuaḥa ta cája ndó ña cúní rí cán jáchí ñúhu ndó ndáha rí. Ta rí sáhní ndíi cúu rí cán jandá mé saḥa. Ta ni in túhún tañu coḡ natiin rí ña ndaa já caḥan rí ña. Jáchí caḥan rí ña túhún cuití va ta cuéntá mé rí quíxi ndíhi ña túhún. ⁴⁵ Candehé ndo. Co cúní ndó candúsa ndó yeḥe jáchí caḥan i ña ndaa xihín ndó. ⁴⁶ Ni in túhún toho ndó a cúu nahá nuú ñayivi ña ín cuachi i. Ta tá caḥan i ña ndaa cuití va xihín ndó ndá cuéntá queá co candúsa ndó yeḥe, dá já. ⁴⁷ Jáchí ndá na cúu ndusa cuéntá Ndióxi táa johó na ña cúu túhun Ndióxi. Joo náha cáxi a ña co cúu ndó cuéntá Ndióxi jáchí co cúní ndó cuni johó ndó nu caḥan mé á xihín ndo —naçachi Jesús.

Jandá tá cámaní cacu Abraham sa ín va Jesús

⁴⁸ Andá já naçanaḥá na Israel xihín Jesús já naçachi na já:

—Mé a ndaa cúun in da Samaria ta ndácaan rí quini inún —naçachi na.

⁴⁹ Andá já naçachi Jesús já xihín ná:

—Coḡ toho rí quini ndácaan ínima yeḥe. Ña cája i queá cája cáhnu i Ndióxi, tátá i. Joo quehe núu ndivaḥa ndó yeḥe.

⁵⁰ Co cúní toho i ña ná caja cáhnu ndó yeḥe vatí mé a ndaa cúní Ndióxi ña ná caja cáhnu ndó yeḥe. Ta mé a cán queá caja víf saḥa ndo. ⁵¹ Mé a ndaa ná caḥan i xihín ndó. Ndá na ná caja ña caḥan i yóho, na cán catacu na anda ama cáa quívi —naçachi Jesús.

⁵² Já nanducú ñehe na cán túhun nu á ja naçachi na já xihín á:

—Viti ndusa cándaa ini nde ña ndácaan rí quini inún jáchí cáhún ña tá ná caja nde ña cáhún já queá catacu nde anda ama cáa quívi. Joo xini vaḥa nde ña naḥihí tá naḥihí Abraham, tásáhnú jícó nde ta jári na profeta na sanduu sa-nahá naḥihí na. ⁵³ Á cáhnu chága yóho a juú ga Abraham, da nasacuu tásáhnú jícó nde, dá já. Mé Abraham naḥihí da

ta jári mé na profeta naḥihí ri na cán va. Á cájún cuéntá ña cúun da cáhnu chága a juú ga na cán, dá já —naçachi na xihín Jesús.

⁵⁴ Já naçachi Jesús já xihín ná:

—Tá ná caja cáhnu i mí i, coḡ saḥa toho ña cája i. Joo Ndióxi, tátá i jándicáhnú a yeḥe. Ta jári mé ndó cáchí ndo ña jivi mé a cán cúu Ndióxi cája cáhnu ndó. ⁵⁵ Joo co xini toho ndó yo cúu mé á. Yeḥe xini yo cúu mé á. Tá ná cachi i ña co xini toho i mé á, cúu u in da túhún tátuhun mé ndó. Joo mé a ndaa xini vaḥa i yo cúu Ndióxi ta cája i ña cáchí mé á. ⁵⁶ Ta mé Abraham, da nasacuu tásáhnú jícó ndo naçajii íni da jáchí nañeḥe dá túhun ña quixi yeḥe ñuyívi yóho. Ta a juú quiaḥva naçajii ini da tá naḥini da ña yóho —naçachi Jesús.

⁵⁷ Andá já cánaḥá chága na Israel xihín á já naçachi na já xihín á:

—Ni ivi jícó uxu cuia co ndácaan yóho viti. Ta ndaja cúu cáhún naḥinún Abraham, da cúu tásáhnú jícó nde —naçachi na.

⁵⁸ Já nanducú ñehe Jesús túhun nu ná já naçachi a já xihín ná:

—Mé a ndaa ná caḥan i xihín ndo. Jandá tá cámaní cacu Abraham sa ín va yeḥe jáchí cúu u Ndióxi —naçachi Jesús.

⁵⁹ Andá já natiin na Israel cán yuu ña janí na jatá. Joo nandacoḡ jehé Jesús já nayaha tañu na cán ta naquee a veñuḥu cáhnu cán cuḥan.

Cája Jesús ña ná ndinuna nuú in daḥaa naçacu cuáá

9 In tañu tá xica Jesús cuḥan já naḥini a in daḥaa, da naçacu cuáá. ² Andá já naçasáhnú na xica tuun xihín Jesús cán ndáca túhún na mé á saḥá da cuáá cán já cáchí na já xihín á:

—Maestro, ndá cuéntá queá naçacu cuáá da yóho. Á naçacu cuáá da saḥá cuachi naçaja tátá da á náná da. Á na-

cacu cuáá dā sahá cuachi nacaja mé dá —nacachi na.

³ Já nanducú ñehe Jesús tūhun nū ná já nacachi a já xihín ná:

—Coó nacacu cuáá toho dā yóho sahá cuachi mé dá ta ni sahá cuachi tátá dā á náná dā. Nacacu cuáá dā já ná nahá i nuú ñayivi ndá quiahva náhnu ñaha cúú cāja Ndióxi. ⁴ Jáchi ndítahan cāja i chuun, ña nachindahá tátá i cāja i nani xíca nuu i ñuyíví yóho. Ta cúú á tátūhun ndívi táhyí cúú á viti joo vaxi quívi a cóo ga i cāja i ña yóho ta já cacuu a tátūhun nacuaá ndivaha. Ta mé tiempo já ni in na a cúu cāja chúun. ⁵ Nani ín tóo i ñuyíví yóho cúú á tátūhun jándiyéhe mí i nuú ña ndúu ñuyíví yóho —nacachi Jesús.

⁶ Tá nandíhi nacachi Jesús ña yóho já ñaxihnu a tójií a nū ñúhu. Ta xihín tójií a cán nacavaha in mbohla loho ndahyi ta nachindaa mé á ña nduchú núú dā cuaá cán. ⁷ Tá nandíhi já nacachi a já xihín dá:

—Cuáhán chicoho naní Siloé ta cán cuchún nuún —nacachi Jesús xihín dá. Mé tūhun Siloé yóho cúní cachi a: Dā nachindahá na.

Anda já naquee mé dā cuaá cán nasahan dā nachichí nuú dā ta tá nandicó coo dā cán sa sándehe va da nacasaá dā. ⁸ Ta ndaja coo java ña cúú ñani táhan da xihín java ña ñaxini ña sáti dā cán tá ñaxini na ña sándehe tucu da já nacachi na xihín táhan na já:

—Á a juú dā yóho cúú dā dā cuaá sá-coo sáti yuhú íchi —cáchi xihín táhan na.

⁹ Ta já cáchi java na já:

—Jivi dā ñan cúú dá.

Ta java na cáchi na:

—A juú toho dā ñan cúú dá vatí quiahva já cáa da —nacachi na.

Joo mé dā nasahiin cuaá cán cáhan dā xihín ná já cáchi dā já:

—Jivi yehe cúú dā nasacuu dā cuaá cán —cáchi dā.

¹⁰ Anda já nacasáhá ña ndáca tūhún ña dā já cáchi ña já xihín dá:

—Ndaja nacajún ñanuná nuun —cáchi na.

¹¹ Já nacachi dā cán já:

—Dā naní Jesús cúú dā nacavaha in mbohla loho ndahyi. Ta nachindaa da ña nuú i ta nacachi da xihín i ña ná चुहण i cuchú nuú i chicoho naní Siloé. Ta já nasahan i nachichí nuú i cán ta xihín ña yóho ñanuná nuú i. Sándehe e viti —nacachi da.

¹² Já nandaca tūhún tucu ña cán dā já cáchi ña já:

—Ta ndájá cuahan dā nandaja vaha yohó viti —nacachi na.

—Co xini toho i —nacachi da xihín ná.

Ndája ndíchi ña fariseo dā cuaá, dā nandivaha cán

¹³ Tá nandíhi ndáca na dā nasacuu dā cuaá cán nasahan dā nuú ña fariseo ¹⁴ jáchi nasacuu a quívi ndíquehe ndée ña tá nandaja vaha Jesús dā cuaá cán xihín mbohla loho ndahyi nachindaa a nuú dā cán. ¹⁵ Já nandaca tūhún ña fariseo cán dā ndá quiahva ñanuná nuú dá sándehe dā viti. Já nanducú ñehe da tūhun nū ná já nacachi da já xihín ná:

—Nachindaa da ndahyi nuú i ta nachichí nuú i ta viti tívi nuú i sándehe e —nacachi da xihín ná.

¹⁶ Joo java ña fariseo nacachi na xihín dā nasacuu dā cuaá cán já:

—Dā nandaja vaha yohó coo vaxi toho da cuéntá Ndióxi jáchi co cāja cáhnu da quívi ndíquehe ndée yo —nacachi na.

Joo já cáchi java ña fariseo já:

—Tá dā cāja cuachi ná cacuu Jesús ñan ta a cúu cāja da ñaha xitúhún nahá tá-tūhun ña yóho, nduu —nacachi java na.

Chí coo nacuu ndique táhan vaha tūhun ña fariseo cán sahá ña cán queá nasahnda táhan ndaja táhan mé va na.

¹⁷ Já nacasáhá ndáca tūhún tucu na dā

naşacuu da cúaá cán já cáhí na já xihín dá:

—Ta viti nanúná nuun naçaja da jan. Yo já cúú dá cáhún —naçachi na.

Já nanducú ñehe da tuhun nu ná já naçachi da já xihín ná:

—Yehe cáhí i ña cúú dá in profeta —naçachi da.

¹⁸ Joo coó naheen na Israel cán candúsa na ña naşacuu da da cúaá ta ni co candúsa na ña nanúná nuu dá. Sahá ña cán queá naşahan na naçana na tátá náná da. ¹⁹ Ta já nandaca tuhún na tátá da xihín náná da já naçachi na já xihín ná:

—Á jahyi ndó cúú da yóho. Á mé a ndaa sa já cúaá já cáa da naçacu da. Ta ndá cuéntá queá sa tívi nuu dá viti —naçachi na.

²⁰ Anda já nanducú ñehe na cán tuhun nuú na Israel cán já naçachi na já xihín ná:

—Cándaa cáxi ini nde ña jahyi nde cúú da yóho. Ta xini vaha nde ña naçacu cúaá da. ²¹ Joo co xini nde ndaja naçuu nanúná nuu dá sándehe da viti. Ta ni co xini nde yo cúú da naşuná nuu dá. Jan fin mé jahyi nde. Ndaça tuhún ndó mé dá. Sa quiahva cahan mé da jan xihín ndo cúú á jáchi a juú da loho ga cúú dá jan —naçachi tátá da naşacuu da cúaá cán xihín na Israel cán.

²² Naçachi na ña yóho jáchi yíhvi na ña ná a quiahva ga na Israel cán ñamaní nu ná ndihvi na veñuhu. Jáchi mé na Israel cán najándique táhan na tuhun na ña a quiahva ga na ñamaní nuú ñayivi quihvi na ini veñuhu tá ta cahan na ña cúú Jesús da naçindahá Ndióxi cacomí cuéntá sahá ñayivi. ²³ Sahá ña cán queá naçachi tátá náná da naşacuu da cúaá cán xihín na Israel ña ndítahan ndaca tuhún na mé dá jáchi a juú ga da loho cúú da jan.

²⁴ Tá nandihi já naçana tucu na Israel da naşacuu da cúaá cán já naçachi na já xihín dá:

—Xini ñuhú caja cáhnún Ndióxi ta a caja cáhnún Jesús jan jáchi xini vaha nde ña cúú dá in da caja cuachi —naçachi na.

²⁵ Anda já naçachi da cán já xihín na Israel:

—Co xini toho i á cúú dá da caja cuachi á cúú dá da co caja cuachi. Na xini ndusa i queá naşacuu u da cúaá ta jivi da jan naşuná nuú i sándehe e viti —naçachi da xihín ná.

²⁶ Anda já naçasáhá ndaca tuhún tucu na da já cáhí na já xihín dá:

—Ta ndaja naçaja da naşuná da nduchú núún. Ndiá naçaja da xuhun —naçachi na xihín dá.

²⁷ Anda já naçachi da naşacuu da cúaá cán já xihín ná:

—Sa naçachi vi xihín ndo ndá quiahva naçaja da naşuná da nuú i. Joo co cúni ndó candúsa ndó yehe. Ndá cuéntá queá ndaca tuhún tucu ndó yehe. Á cuhun ri ndóhó va caca nuu ndó xihín dá cúni ndo, vaha —naçachi da xihín ná.

²⁸ Já naçasáhá na Israel cán canahá na xihín dá ta já naçachi na já xihín dá:

—Yóhó va cúú da xica nuu xihín da jan. Joo ndehe jácuaha nde ley Moisés cuití va. ²⁹ Jáchi cándaa vaha ini nde ña naçahan Ndióxi xihín Moisés. Joo mé Jesús jan co cúú dá cuéntá Ndióxi ta ni co xini nde ndájá naquixi da jan —naçachi na xihín da naşacuu da cúaá cán.

³⁰ Anda já naçachi tucu da cán já xihín ná:

—Mé a ndaa catóntó vi xihín ña yóho jáchi jivi Jesús jan naşuná da nuú i ta ndóhó ni co cándaa ini ndó ndá da cúú dá ta ni co xini ndo ndájá naquixi da.

³¹ Sa xini yo ña co xini johu Ndióxi ña xica tahvi ñayivi caja cuachi nu á. Joo xini johu mé á nu cahan ñayivi tá caja cáhnu na mé á ta tá caja na ña cúni a. ³² Ta viti candehé ndo. Janda saha ñuyívi a ñaha

cuni johó í ña ndícuná in ñataa nduchú núú in ña ñacacu cuáá. ³³ Ta Jesús yóho a cúu toho caja cuná a nuú í tá ña cō cúú á ña ñaquixi cuéntá Ndióxi —ñacachi da.

³⁴ Andá já ñanducú ñehe ña cán tũhun nu dá já ñacachi na já xihín dá:

—Andá tá ñacacún ñachutú ndaún xihín cuachi. Ta viti chí cúní ri yóhó jáñahún ndehe —ñacachi ña Israel cán xihín dá.

Andá já ñataxí ña ña veñuhu cán.

Ñayivi, ña sáñdehé cúú ná tātũhun ña cō tívi nuu

³⁵ Tá ñandihi já ñacandaa ini Jesús ña ñataxí ña ña ñasacuu ña cuáá cán veñuhu. Ta tá ñanditahan tucu Jesús ña já ñacachi a já xihín dá:

—Á cándee inún ña ñachindahá Ndióxi nduu ñayivi —ñacachi Jesús xihín dá.

³⁶ Já ñacachi da já xihín á:

—Cachi ndó xihín í yo já cúú dá ña ná cuu cándee ini í ña —ñacachi da.

³⁷ Andá já ñacachi Jesús já xihín dá:

—Sa ñaxini vún yehe ta jivi yehe, ña cáhan xuhun yóho cúú ña ñachindahá Ndióxi nduu ñayivi —ñacachi Jesús.

³⁸ Ta tá ñacachi Jesús ña yóho já ñacaxítí ña cán nu á caja cáhnu ña a já ñacachi da já xihín á:

—Mé a ndaa cándee ini í ndohó, xitohó í —ñacachi da.

³⁹ Andá já ñacachi tucu Jesús já xihín dá:

—Yehe ñaquixi í ñuyíví yóho já ná ñaha í nuú ñayivi ndá quiahva ndaa ña cája na. Jáchi ndá ña cándee ini yehe cúú ná tātũhun ña sa ñandiyehé nuu. Joo ndá ña cáhán ña cúú ná ña sa ñandiyehé nuu cúú ná tātũhun ña cuáá —ñacachi Jesús.

⁴⁰ Ta java ña fariseo, ña ndíta xihín Jesús cán tá ñaxini johó na ña yóho já ñandaca tũhún ña mé á já cáhí ña já:

—Á cō cáhún ña cúú ri ndehe va ña cuáá —ñacachi na.

⁴¹ Andá já ñacachi Jesús já xihín ná:

—Tá ná ndicuni ndó ña cúú ndó tá tũhun ña cuáá ta cō toho cuachi ndó, nduu. Joo tá cáhí ndó ña tívi vaha ndivaha nuu ndo ta cō xíní ñúhú ndó in ña jáñaha ndohó sahá ña cán quéa íin tá íin cuachi ndó —ñacachi Jesús xihín ná.

Jesús cúú á tātũhun in ña ndaa ndicachi

10 Andá já ñacachi Jesús já: —Mé a ndaa ná cáhan í xihín ndo. Tá ná quihvi in ñataa ini in corra nu ñúhu ndicachi joo cō cúní ña quihvi da chí yéhe nu quihvi mé rí ta ña cája da quéa ndáva ndojó ña corra rí já náha xicá a ña cúú dá ña cuíhna. ² Joo mé ña quihvi chí yéhe cúú dá ña ndaa ndicachi. ³ Ta mé ña ndaa yéhe corra nu ñúhu ndicachi cán súná ña yéhe ña ná ndihvi ña ndaa ndicachi ta jácana da rí cán tá quivi in in rí. Ta mé ndicachi cán ndícuni rí tachi dá já quéta rí cuahan rí caca nuu rí xihín dá. ⁴ Ta tá sa ñaqueta ndihi rí já ndaca da rí. Ta cánuú ña nu rí cuahan ña já vaha cuahan rí xihín dá jáchi ndícuni vaha rí tachi dá. ⁵ Joo cō ndíco rí jatá ñayivi tóho jáchi cō ndícuni rí tachi ná jáchi cúú ná ña tóho. ña cája rí quéa xínu rí nu ná —ñacachi Jesús xihín ña fariseo.

⁶ Ta ña yóho ñasacuu in quiahva nasacu Jesús nuu ña fariseo joo cō ñacandaa ini na ña cúní mé á cachi a xihín ná.

⁷ Andá já ñacachi tucu Jesús já xihín ná:

—Mé a ndaa ná cáhan í xihín ndo. Yehe cúú u tātũhun in yéhe nu yáha ndicachi já ndihvi rí corra rí. ⁸ Tóco ndihi ña ñaquixi tá cámaní xinu í ñuyíví yóho najándahvi na ñayivi ta cúú ná tātũhun ña cuíhna. Joo cō ñaxeen ña cúú cuéntá mí í, ña cúú tātũhun ndicachi taa johó ña nu cáhan ña cán. ⁹ Yehe cúú u tātũhun in yéhe ta ndá ña ná quixi nuú í quiahva í

ñamaní nū ná quihvi na já ná çacu ndaa ínimá ná. Cúú á tátuhun núná nuú ndicachi quihvi rí ini corra rí ta núná nuú rí queta tucu rí jáchi íin yucu cuí nū rí xixáhan rí.

¹⁰Jáchi da cúú da cuihná cán cája cuihná da rí ta sáhní da rí ta jándihi da saha rí. Joo yehe naquixi i ñuyívi yóho já ná cuu catacu vaha ñayivi ta já ná cuu coo vaha na anda ama cía quívi. ¹¹Yehe cúú u tátuhun in da ndáa vaha ndicachi. Jáchi da cán co yíhvi da quivi da sahá ndicachi jana dá. ¹²Joo da quéhe yahvi sahá ña ndáa da ndicachi, ndáa da rí saha yahvi quéhe da cán cuití va. Sahá ña cán queá tá xíní da vaxi ndivahyí quehe rí in ndicachi, ña cája da queá xínu da cuahan da ta jándacoo da ndicachi ndáhvi cán. Jáchi co cúú dá da ndáa vaha rí ta ni jana dá co cúú ndicachi cán. Ta co sáhní da mé dá tá ná xínu coo ndivahyí ña ná tiin rí ndicachi cán cata nuu ñahá rí. ¹³Da quéhe yahvi cán jándacoo da rí jáchi co cúú rí jana mé dá ta co sáhní da mé dá cúú ndicachi.

¹⁴Joo yehe cúú u tátuhun in da ndáa vaha ndicachi. Tá quiahva xíní vaha da cán ndá rí cúú ndicachi jana dá quiahva já xíní vaha i ndá na cúú cuéntá mí i. Ta jári xíní vaha mé ná yehe. ¹⁵Tá quiahva xíní vaha Ndióxi, tátá i yehe ta xíní vaha i mé á quiahva já xíní vaha i na cúú cuéntá mí i. Ta sahá ña yóho íin tiahva i ndiquiahva i mí i quivi i saha ná jáchi cúú ná tátuhun ndicachi janá i. ¹⁶Joo ndúu java ga ñayivi inga nuu ta cacuu na cuéntá mí i. Xíní ñúhú ndiquehe e na cán ña ná cuni johu na nū cáhan i. Ta in nduu ndihi na ña ná candaa i tóco ndihi na.

¹⁷Quíhvi ini Ndióxi, tátá i yehe jáchi ndiquiahva i mí i quivi i sahá na cúú cuéntá mí i ta tá nandihí nditacu tucu u. ¹⁸Ta ni in na a cúú cahní yehe ndaja nacuu joo ndiquiahva i mí i quivi i jáchi cúní caja i ña. Núná nuú i ndiquiahva i

mí i quivi i ta núná nuú i nditacu tucu u. Ña yóho cúú chuun nasahnda tátá i nuú i caja i —nacachi Jesús.

¹⁹Tá naxini johu na Israel cán ña yóho já nacasáhá na sáhní táhan tucu na.

²⁰Ta cuahá táhan na cán nacasáhá cáchi na já:

—Ndá cuéntá queá táa johu ndó nū cáhan da jan ta da nacatachi va cúú dá. Tiñáhá va ndácaan ini da —cáchi xihín táhan na.

²¹Joo java na cáhan vaha na sahá Jesús já cáchi na já:

—Ni in toho ñayivi a cúú cáhan vaha nahá tátuhun cáhan Jesús yóho tá ndácaan tiñáhá ini ínimá ná. Jáchi ama ná cuu caja ri tiñáhá jándiyehé rí nuú na cuáá —cáchi java na cán.

Cándají na Israel Jesús

²²Naxinu coo quívi cája na víco nū cuía nuu Jerusalén tá cája cáhnu na quívi naxinu veñuhu cáhnu nuu Jerusalén. Ta mé tiempo víxi nasacuu a cán. ²³Ta jivi ini mé veñuhu cáhnu cán nasahín Jesús ta xíca nuu a yati yuyehé naní Salomón. ²⁴Já nacava tiyivi na Israel cán mé á já nacasáhá ndáca tuhún na mé á já nacachi na já xihín á:

—Ndaja cía chí quívi çaxi tuhun ndaun xihín nde ña á jivi ndusa cúún Cristo, da chindahá Ndióxi cacomí cuéntá sahá ñayivi. Jáchi in ivi johu cáhun xíní nde ta co cándaq vaha ini nde á jivún á a juú tohún —nacachi na cán.

²⁵Anda já nanducú ñehe Jesús tuhun nū ná já nacachi a já:

—Sa nacahan vi xihín ndó joo coo nacandúsa ndó yehe. Tóco ndihi ña náhnu cája i, cája i ña xihín ndée sahan tátá i nuú i ta jivi mé ña náhnu jan náha nū ndó ña cúú u da nachindahá Ndióxi.

²⁶Joo ndóhó co cándúsa ndó yehe jáchi co cúú ndó tátuhun ndicachi janá i.

²⁷Joo ñayivi, na cúú tátuhun ndicachi janá i, na cán cúú na ndícuni nū cáhan i

ta ndícuni i ña ña cúu ná cuéntá mí i ta já ndíco ña yehe. ²⁸ Ta caja i ña ná catacu na anda ama cáa quívi já ná a ndíhi saha ná. Ta ni in tühún ñayivi a cúu caja candaa ña cán ndahá i tá sa ñúhu na ndahá i. ²⁹ Ndióxi, tátá i nasahan ña cán nuú i ta mé á queá cáhu chága nu tóco ndíhi ñaha. Ta ni in na a cúu caja candaa ña cán ndahá mé á. ³⁰ Yehe xihín Ndióxi, tátá i in cúu va nde —ñacachi Jesús.

³¹ Anda já ñatiin tucu ña Israel cán yuu cuun na Jesús ña cahní ñahá na. ³² Anda já ñacachi Jesús já xihín ná:

—Cuahá ndivaha ña náhnu ñacaja i nu ndó, ña nasahan tátá i ñamaní nuú i caja i nu ndo yóho ta viti cachi ndó xihín i ndá queá co táhan ini ndó xihín. Ndá cuéntá queá vaxi ndó cuun ndó yuú yehe —ñacachi Jesús.

³³ Anda já ñacachi ña cán já xihín á:

—Co ndúcu toho nde cuun nde yuu yohó sahá ña náhnu cájún. Cuun nde yuu yohó cúni nde jáchi ndája núun Ndióxi. Jáchi cúun in taa tátuhun ndehe ta ndájún mún cúun Ndióxi —ñacachi ña cán.

³⁴ Anda já ñacachi Jesús já xihín ná:

—Nu ley najándacoo Moisés nu ndo cáchi a ña cúu ñayivi tátuhun Ndióxi sahá ña cúu ná jahyi mé á. ³⁵ Ta sa cánda ña va iní ña a cuú tahnú ña cáhan tühun Ndióxi. Ta ñacachi Ndióxi xihín ña ñandiquehe tühun mé á ña cúu ná tátuhun Ndióxi. ³⁶ Sahá ña cán queá ndá cuéntá queá cáchi ndo ña ñandaja núu i Ndióxi sahá ña cáchi i cúu u in tühún jini já jahyi Ndióxi. Jáchi mé Ndióxi ñacaxi a yehe ta ñachindahá a yehe vaxi i ñuyívi yóho. ³⁷ Sahá ña cán queá co ndítahan candúsa ndó yehe tá ta co cája i ña náhnu tátuhun ña cája Ndióxi, tátá i. ³⁸ Joo tá cája i ña já queá xíní ñúhú candúsa ndó ña náhnu xíní ndo cája i vatí co cúni ndó candúsa ndó yehe. Ta xihín ña yóho cuu candúsa ndó ña in cúu Ndióxi,

tátá i xihín i ta in cúu yehe xihín mé á —ñacachi Jesús.

³⁹ Anda já ndúcu tucu na tiin na a chicaan ña a vecaa joo ñachijehé a nu ná cuahan.

⁴⁰ Ta já ñaquee tucu a cuahan chí inga xoo yuta Jordán nuú ñacaja ndúta Juan ñayivi nu cúti cán. Ta ñacandoo Jesús ñasahiin a cán. ⁴¹ Ta cuahá ñayivi ñacasahá ña xínu ña nu á ta já cáchi xihín táhan na já:

—Mé a ndaa coó toho ñaha xitühun ñacaja Juan. Joo tóco ndíhi ña ñacachi ña cán saha Jesús yóho cúu á ña ndaa —ñacachi xihín táhan ña cán.

⁴² Ta cuahá ná ñacandúsa na Jesús mé nuú ñasahiin a cán.

Tá najánditacu Jesús Lázaro

11 Ta ndaja coo ñaquehe cuehe in ña naní Lázaro, ña ñuu Betania. Ta jivi mé ñuu yóho cúu ri ñuu María xihín Marta, quíhvi ña. ² Mé María, ña cúu quiahva Lázaro yóho cúu ña ña ñaxojo perfume jatá sahá Jesús ta najándihichi ña do xihín jí jini ña. ³ Ta mé ña xihín quíhvi ña ñachindahá ña chuun cuahan nuú Jesús ña cácahvi ndivaha Lázaro, ña quíhvi ini mé á.

⁴ Ta tá ñahehe Jesús tühun yóho já ñacachi a já:

—A juú cuehe cahní ñahá cúu toho ña yóho. Joo xihín cuehe yóho cuu ñaha ndá quiahva cáhnu cúu Ndióxi. Ta xihín ña yóho ñaha nuú ñayivi ndá quiahva cáhnu cúu yehe, ña cúu in tühún jini já jahyi Ndióxi —ñacachi a.

⁵ Ta ndaja coo quíhvi ndivaha ini Jesús Marta xihín quíhvi ña ta quiahva já quíhvi ri ini a Lázaro viti. ⁶ Joo tá ñahehe Jesús tühun ña quíhvi Lázaro já ñacandoo a ivi quívi chága mé nuú ñasahiin a cán. ⁷ Ta tá ñandíhi já ñacachi Jesús já xihín ña xíca tuun xihín á:

—Xihín ndo ná coho tucú chí Judea —ñacachi a.

⁸ Andá já ñacachi ña cán já xihín á:

—Maestro, viti chá va ndúcu ñayivi ndúu cán cahní ña ndohó xihín yuu ta cáa tucu ri ndó cuhun ndo cúní ndo — ñacachi na.

⁹ Joo sa xíní Jesús ña cámaní xinu quívi quivi a sahá ña cán queá ñacachi a já xihín ná:

—Candehé ndó. Uxu ivi hora ndáca in quívi ta tá xíca nuu na ndiví a cúu toho cachihin saha ná jáchí tvi xíca yéhe nu xíca na. ¹⁰ Joo ndá ña xíca nuu ñuú cuu cachihin saha ná jáchí co yéhe nu xíca na —ñacachi Jesús.

¹¹ Tá nandihí já ñacachi tucu a já xihín ná:

—Sa naquiji va amigo yo Lázaro viti. Joo vílaá cuhun i ndíhe e da —ñacachi Jesús.

¹² Andá já ñacachi ña cán já xihín á:

—Maestro, tá ta nanaá ini da naquiji dá já queá iin vaha da, dá já —ñacachi ña cán.

¹³ Joo ña cúní cachi Jesús queá sa naxihí va Lázaro vatí ña xíca tuun xihín a cán ñacahán ña ña cúní mé á cachi a queá naquiji Lázaro cán tá quiahva quiji tóco ndihí ñayivi. ¹⁴ Andá já ñacahan cáxí táhyí tucu Jesús xihín ná já ñacachi a já:

—Naxihí va Lázaro. ¹⁵ Joo cájii va ini i ña coó i ná sahiin i tá naxihí da jáchí ña yóho chindeé a ndohó já ná candúsa chága ndó yehe. Cóho candehé yo Lázaro — ñacachi Jesús.

¹⁶ Andá já ñacasáhá Tomás, da cáhan ña cuatí xihín cán cáhan da xihín java ga ña xíca tuun xihín Jesús já cáchí da já:

—Cóho ri mí ví quiví xihín mé dá, dá já —cáchí da.

Já ñaquee na cuahan ña.

Cúu cája Jesús ña ná nditacu tucu ña sa naxihí

¹⁷ Tá naxinu coo Jesús yati ñuu Betania cán já ñañehe á tuhun ña sa nax-

ihí Lázaro ta sa iin comí quívi ñachi-caan va na da ini in cáva. ¹⁸ Mé ñuu Betania cán ñehe táhan yati a xihín Jerusalén tátuhun uní kilometro ñehe táhan. ¹⁹ Ta cuaha táhan ña Israel cán ñasahan ña ndúu tóo na xihín Marta xihín María tá quiahva jáyaha na ini na sahá ña naxihí Lázaro quiahva na. ²⁰ Ta tá ñañehe Marta tuhun ña cáyati Jesús ñuu cán cuahan já ndáva ña ñasahan ñehe ñahá ña. Joo ñacandoo María vehe. ²¹ Tá nandique táhan Marta xihín Jesús já ñacachi ná já xihín á:

—Xitoho, tá ná coo ndó yóho ta ni a quiví toho Lázaro quiahva i, nduu. ²² Joo cándaq vaha ini i ña tá ná caqa ndó ña cúní mé ndó nu Ndióxi quiahva va mé a cán ña nu ndo —ñacachi Marta.

²³ Andá já ñacachi Jesús já xihín ná:

—Candehé Marta. A ndícani inún jáchí nditacu tucu va Lázaro, quiahvún jan —ñacachi Jesús.

²⁴ Andá já ñacachi ná já xihín á:

—Sa xíní vi ña nditacu tucu quiahva i tá ná xinu coo quívi nu ndihí tá ná nditacu tóco ndihí ña sa naxihí —ñacachi Marta.

²⁵ Já ñacachi Jesús já xihín ná:

—Yehe cúu da cuu caja ña ná nditacu tucu ndii ta cuu caja i ña ná catacu ñayivi anda ama cáa quívi. Ta ndá ña cándéé ini yehe vatí ná quivi na catacu tá catacu na. ²⁶ Ta tóco ndihí ña cándéé ini yehe catacu na anda ama cáa quívi ta a ndíhi toho saha ná ini indayá. Á cándúsún ña cáhan i xuhun —ñacachi Jesús.

²⁷ Andá já ñacachi Marta já xihín á:

—Cándúsa i ndohó ña cúu ndó in túhun jini já jahyi Ndióxi ta cándúsa i ña mé ndó cúu Cristo, da ñachindahá Ndióxi quixi ñuyiví yóho —ñacachi ná xihín á.

Sácu Jesús saha Lázaro

²⁸ Tá nandihí já ñaquee Marta ñasahan ná cana ná María quihvi ña. Ta já ña-

cahan yaá ña xihín María já nacachi ña já xihín ña:

—Sa naxinu coo Jesús, xitoho í ta fin a yóho. Cuáhán nu fin a jáchi cána yohó —nacachi Marta xihín quihvi ña.

²⁹Tá naxini joho María cán ña nacachi quihvi ña xihín ña chí ivi laá ndáva ña nasahan ña nu fin Jesús. ³⁰Mé Jesús nasandati a cán yuhú ñuu, mé nuú nandique táhan xihín Marta cán. ³¹Ta ndaja coo mé ña Israel, ña ndúu jáyaha ini ña cán tá naxini na naquee númi joho ña cuahan ña já nandicutita na ndíco ña jata ña cuahan na. Jáchi nacahán na cuahan ña cuacu ña nu ndácaan Lázaro, quiahva ña. ³²Ta tá naxinu coo ña nu fin Jesús já nacaxítí ña nu á já nacasáhá cáchí ña já xihín á:

—Tá ná coo ndó yóho, nduu ta ni a quíví toho Lázaro quiahva i —nacachi ña.

³³Ta tá naxini Jesús ña sácu cóho María xihín ña Israel, ña ndíco nasaa xihín ña cán já natahvi ndivaha ini a janda quiahva nandisaa ini a. ³⁴Anda já nandaca tuhún a María cán já nacachi a já xihín ña:

—Ndájá nachicaan ndó da já —nacachi Jesús.

—Naha quíí ndó, xitoho i. Candehé ndo nuú nachicaan nde da —nacachi María.

³⁵Anda já nasacu Jesús. ³⁶Tá naxini ña Israel ña yóho já nacasáhá cáchí xihín táhan na já:

—Candehé ndo ndaja náha naquihvi ini Jesús yóho Lázaro —nacachi na.

³⁷Ta java na nacasáhá cáchí ña já:

—Mé Jesús yóho nasuná da nduchú núu ña cuaá. Á chí a cúu cuití caja da chindeé da Lázaro já ná a quíví da, nduu —nacachi java ña cán.

Jánditacu tucu Jesús Lázaro

³⁸Tá nandihí já nacasáhá táhvi ndivaha tucu ini Jesús ta já nacayati a nuú

nachicaan ña yiquí cuño Lázaro. Mé nuú ndácaan da cán nasacuu a in ndíca cáva ta in yuu jáhndá cáhnu nasaji nuu yéhe cán. ³⁹Anda já nandicahan Jesús xihín java ña ndúu cán ña ná jácaxoo na yuu ndájí nuu nu ndácaan Lázaro cán. Joo ndaja coo Marta, ña cúu quiahva mé ndii cán nacasáhá ña cáchí ña já xihín Jesús:

—Candehé ndo, xitoho i. Sa quini cúu sáhan ndii quiahva i jan jáchi sa fin comí quíví naxihí da —nacachi ña.

⁴⁰Anda já nacachi Jesús já xihín ña:

—Xíní núhú ndicuhun inún tá nacachi i xuhun ña tá ná candúsún Ndióxi já cunún ndá quiahva cáhnu ñaha cuu caja mé á —nacachi Jesús.

⁴¹Tá nandihí já najácaxoo na yuu cáhnu ña nasaji nuu nuú nasandacaan Lázaro. Já nandiñehe Jesús nuu á chí indiví já nacachi a já:

—Tátá Ndióxi, ndiquiahva i ndixahvi nu ndo jáchi naxini joho ndó nuú nacahan i xihín ndo. ⁴²Vatí mé a ndaa cánda va ha ini i ña ní tiempo xini joho ndó nu cáhan i xihín ndo. Joo cáhan i ña yóho sahá ña ná cuni joho ñayivi ndúu xihín i yóho já ná candúsa na ña mé ndó nachindahá ndó yehe vaxi i ñuyíví yóho —nacachi Jesús ndiquiahva ndixahvi nu Ndióxi.

⁴³Tá nandihí já nacayuhú cóho a já nacachi a já:

—Lázaro, cuáhán queta.

⁴⁴Tá nandihí já naqueta Lázaro nuú nasandacaan da. Nacava nuu ndáha dá anda saha dá xihín ticoto ta ndáji jáhma nuu dá naqueta da vaxi da. Anda já nacachi Jesús xihín java ña ndúu cán ña ná ndaxí ña da já ná quee da cuhun da. Ta já nacaja na.

Jándique táhan ña Israel tuhun na ña tiin na Jesús chicaan ña vecaa

(Mt. 26:1-5; Mr. 14:1-2; Lc. 22:1-2)

⁴⁵Ta cuaha táhan ña Israel, ña ndáca táhan nasahan xihín María cán tá naxini

na ña najánditacu tucu Jesús Lázaro cán já ñacandúsa na mé á. ⁴⁶ Joo java táhan na Israel cán ndáva na ñasahan na cáhan na xihín na fariseo ta nandicani na nu ná ña ñacaja Jesús. ⁴⁷ Anda já ñacasáhá na fariseo xihín na saçuaha nuú jutú cán najátaca na tóco ndihi na saçuaha nuú na Israel já ñacachi na já xihín ná:

—Ndía caja í xihín Jesús viti jáchi cuahá ndivaha ñaha xitúhún cája da yóho. ⁴⁸ Xíní núhú caji nuu í nu dá jáchi tá ná a cáji nuu í nu dá vaxi quívi tá tóco ndihi ñayivi candeé ini na mé dá. Ta xihín ña yóho xinu ini na jutixia ñuu Roma quixi na jándicani na veñuhu í ta jándihi na saha tóco ndihi mí, na Israel —ñacachi na.

⁴⁹ Joo in táhan da ndúu cán naní da Caifás, da ñasacuu da saçuaha chága nu ndíhi jutú mé cuia cán, nandicahan da já ñacachi da já:

—Mé ndó cúu ndó ñayivi co xíní túni. ⁵⁰ Jáchi co cándaq ini ndó ña vaha chága ña ná quivi in taq nu ndíhi ñayivi já ná a ndíhi saha tóco ndihi ñayivi. Ña cán queá cáhan í ña vaha chága ná quivi Jesús jan já ná a ndíhi saha mí —ñacachi Caifás.

⁵¹ Joo coo ñacahan Caifás ña yóho sahá ña ñaquixi a jini mé dá. Ndióxi queá najácahan ínimá dá ña cáchi da já jáchi mé tiempo já ñasacuu da saçuaha chága nu ndíhi jutú ta najácahan Ndióxi ínimá dá ña ná cachi da ña ndítahan quivi Jesús sahá na Israel. ⁵² Ta a juú sahá in túhún na Israel cuití va vaha jáchi mé Jesús nanditahan quivi a saha tóco ndihi na cúu cuéntá Ndióxi, na ndicuita nuu ndúu ndijáá ñuyívi já ná cuu coo in ñuu. ⁵³ Chí janda mé quívi já ñasacu ini na Israel cán cahni na Jesús.

⁵⁴ Sahá ña cán queá coo ñaxica nuu tívi ga Jesús tañu na Israel cán. Ña ñacaja mé á queá ñaquee a estado Judea cán já ñasahan chí in ñuu naní Efraín, ña íin yati xoo yucú íchí nuú coo ñayivi.

Cán ñasahin a xihín na xica tuun xihín á.

⁵⁵ Tá ñacayati quívi coo vicó pascua cája na Israel já ñaquee cuahá ñayivi ndúu ndijáá ñuu cán cuahan na chí Jerusalén jáchi cúni na ndaja víi na mé ná, ná coo tiahva na tá quiahva ñasahnda ley Moisés nu ná caja na tá camani chá quívi coo vicó pascua. ⁵⁶ Tá ñataca ñayivi ñuu Jerusalén cán ñacasáhá ndúcu na Jesús. Joo nani núhu na veñuhu cáhnu cán ndáca túhún táhan na sahá Jesús já cáchi xihín táhan na já:

—Ndaja xíní ndo á quixi Jesús á a quíxi toho a vicó pascua yóho —ñacachi xihín táhan na cán.

⁵⁷ Ta na fariseo xihín na saçuaha nuú jutú ñasahnda na chuun ña ndá na ná cuni Jesús já ná cuhun na caxi túhun na xihín na cán ndájá íin a jáchi cúni na tiin na a chican na a vecaa.

Tá ñachojó in ñañáha perfume sahá Jesús

(Mt. 26:6-13; Mr. 14:3-9)

12 Ta tá camani inu quívi coo vicó pascua já ñaquee Jesús ñasahan ñuu Betania, mé ñuu nu íin Lázaro, da najánditacu tucu mé á cán. ² Ta cán ñacaja ndívi na ña cajini Jesús jáchi cúni na caja cáhnu na mé á. Ta mé Marta cúu ná cája ndívi nu ná. Ta Lázaro cúu in táhan da íin coo nu mesa xixi xihín Jesús. ³ Ta ndaja coo María ñasahan ná quehe ná tá túhun java litro perfume, dó yahvi ndivaha. Jáchi cúu dó dó ñacavaha xihín ndinuhu yucu támi sahan naní nardo. Najácuyu ná do jata saha Jesús. Ta tá nandíhi já najáhichi ná sahá xihín íj jini ña. Ta níi ini vehe cán nandicuita nuu jí-co perfume cán. ⁴ Anda já ñaxini in táhan da xica tuun xihín Jesús, da naní Judas Iscariote cán ña yóho. Mé Judas yóho cúu dá da jicó túhún Jesús tá nu ndíhi ta já cáchi da já:

⁵—Ndá cuéntá queá coó ñacayahvi perfume yóho já ná cana jjuhún jasá yó nuú ña ndahví, nduu. Jáchi quiahva na uní ciento denario saha dó, nduu — ñacachi Judas cán. Ta in denario cúú ña quehe ñayivi cája chúun na in quívi.

⁶Joo coó ñacachi Judas ña yóho sahá ña quíhvi ini ndusa da ña ndahví, vaha. Ñacachi da já jáchi cúú dá da cuihná ta ndáha mé dá ñuhu ndihi jjuhún ta cája cuihná da ña tá cúni da. ⁷Anda já ñacachi Jesús já xihín dá:

—A cáhnu xihín ña jáchi nasacu vaha ña dó ña ná chojó ña dó yiquí cunu i. Jáchi sa xini ña ña sa ñacayati quívi quívi i. ⁸Ta ní tiempo canduu ña ndahví jan tañu ndó ta ndá tañu cúni mé ndó cuu chindeé ndó ña. Joo yehe a cóo tuun toho i xihín ndo —ñacachi Jesús.

Sácú ini ña sacuahá nuú jutu cahní ña Lázaro

⁹Cuahá ña Israel cán ñañehe ná tujun ña ñin Jesús ñuu Betania. Sahá ña cán queá nasahan ña cán jáchi cúni ña cuni na Jesús ta cúni ña cuni na Lázaro, mé da najánditacu tucu Jesús. ¹⁰Anda já nasacu ini ña sacuahá nuú jutu cán cahní ri ña Lázaro viti. ¹¹Jáchi saha Lázaro cán cuahá ña Israel ñacasáha ña cándéé ini na Jesús. Ta najándacoo na ndíco ña jatá ña sacuahá nuú ña Israel.

Tá ñaquíhvi Jesús ñuu Jerusalén

(Mt. 21:1-11; Mr. 11:1-11; Lc. 19:28-40)

¹²Ta inga quívi itaen cuahá ndivaha ñayivi ñaxinu coo na ñuu Jerusalén nuú coo vicó pascua. Ta tá ñacandaá ini na ña xinu coo Jesús ñuu Jerusalén cán ¹³já nasahan ña nasahnda na ndáha tó ñuu já ndáva na nasahan ña ñañehe ñahá ña. Ta cáyuhú ña já cáchi ña já:

—Cája cáhnu í Ndióxi. Cáhnu ñahá ná cacuu da cómi cuéntá sahá ña Israel jáchi cúú dá da vaxi yuhú nuú Ndióxi — cáchi ña.

¹⁴Nanditahan Jesús in búrru ta nasanu a ri tá quiahva ñacachi tujun Ndióxi sanahá tá cáchi a já:

¹⁵A cáyihvi toho ndó, ña nduu ñuu Sión. Candehé ndó da cómi cuéntá saha ndó jan,

cánuu da jata búrru loho vaxi da, cáchi tujun Ndióxi.

¹⁶Ta coó ñacandaá ini ña xíca tuun xihín Jesús cán ndá cuéntá queá cája ñayivi já xihín á. Joo chága chí nuu tá sa nandindita Jesús cuahan indivi já ñacandaá ini na ña quiahva já ndáa nuú tujun Ndióxi sanahá ña caja na xihín Jesús.

¹⁷Mé ñayivi, ña nasanduu xihín Jesús tá ñacahan xihín Lázaro ña ná queta da nuú nanduxu da ña nditacu da, mé na cán nandicani na nuú java ga ñayivi ña ñaxini na ñacaja Jesús cán. ¹⁸Sahá ña cán queá ñaqueta ñayivi nasahan ña ñehe ná Jesús jáchi ñañehe ná tujun sahá ña cáhnu ñacaja mé a cán. ¹⁹Tá ñaxini ña fariseo ña yóho já ñacasáha cáchi xihín táhan na já:

—Candehé ndo. Ndá cuu caja í quee vaha í xihín da jan. Jáchi tóco ndihi ñayivi cáti na cuahan ña xihín da jan — ñacachi xihín táhan ña fariseo cán.

Java ña griego ndínducú ña Jesús

²⁰Tañu ñayivi cuahá ñaxinu coo cája cáhnu Ndióxi víco ñuu Jerusalén cán ñaxinu coo ri java ña ñaquixi chí ñundáhyi cuéntá Grecia. ²¹Ta mé ña griego yóho ñacayati na nu Felipe, da ñuu Betsaida cuéntá Galilea cán. Ta já ñacasáha ña cáhan ndahví ña xihín dá já ñacachi na já xihín dá:

—Cahan nde xihín Jesús cúni nde — ñacachi na.

²²Anda já ñaquee Felipe nasahan da çaxi tujun da xihín Andrés ta já ndáca táhan ndívi da nasahan da ndícani da ña nuú Jesús. ²³Anda já ñacachi Jesús já xihín dá:

—Sa naxinu coo va tiempo caja cáhnu Ndióxi yehe, da naxindahá mé á nduu ñayivi. ²⁴ Mé a ndaa ná cahan i xihin ndo. Tá quiahva ndihi saha in ndiquí trigo tá ndícava ña ini ñundáhyi quiahva já ndítahan nuú i quivi i. Jáchí tá ná a ndíhi saha ndiquí trigo cán já in já cacuu va ña. Joo tá ná ndihi sahá ña cán já nduta ña ta já ndicuahá ndivaha ña. ²⁵ Ndá na cátoó chága cája ña cúní mé cuití na a juú ga ña cúní Ndióxi, na cán cúu na ndíhi saha. Joo na cája ña cúní Ndióxi, na cán cúu na catacu anda ama cáa quívi. ²⁶ Ta ndá na cúní caja chúun cuéntá mí i ndítahan nu ná candico na yehe. Jáchí nuú coo yehe, cán coo ri na cája ña cúní yehe. Ta na cán cacuu na na ndínehe jícó Ndióxi.

Cáxi tuhun Jesús ña quivi a

²⁷ Ta viti ñúhú cácuéha ndivaha ini i. Ta a cúu caca tahví i nu Ndióxi ña ná a quiahva mé á ñamaní ndoho ini i jáchí sahá chuun yóho naquixi i ñuyívi yóho. ²⁸ Ña ndítahan cachi i queá: “Tátá Ndióxi, cáhnu ná cacuu mé ndó” — naxachi Jesús.

Tá naxachi Jesús ña yóho, naxahan Ndióxi indiví já naxachi a já:

—Sa nandaja cáhnu i mí i ta caja tucu u ña — naxachi a.

²⁹ Ta ñayivi ndúu cán tá naxini joho na ña yóho já naxachi na ña javi va cána. Ta java na naxachi na táto Ndióxi queá naxahan.

³⁰ Anda já nandicahan Jesús xihin ná já naxachi a já:

—A juú sahá yehe naxini joho ndó ña yóho. Joo nacatácu a já ná cuni joho mé ndó. ³¹ Ta sa natandaa quívi cavií sahá ñayivi ndúu ñuyívi ta sa natandaa quívi ndíhi sahá ña cája tiñahá sacuahá, mé rí sáhdá chuun ñuyívi yóho. ³² Jáchí tá ná cata caa na yehe já caja i ña ná casahá ñayivi níi cúu ñuyívi candeé ini na yehe — naxachi Jesús.

³³ Xihín ña yóho cúní mé á ndicani a nu ná ña quivi a ndica crúxu. ³⁴ Anda já naxachi ñayivi ndúu cán já xihin á:

—Tá cáhvi nde ley Moisés naxahyi sanahá já cándaa ini nde ña anda ama cáa quívi catacu da chindahá Ndióxi cacomí cuéntá sahá ñayivi. Yo já cúu da cáhun saha. Tá ta mé a ndaa cúun da naxindahá Ndióxi nduu ñayivi, da catacu anda ama cáa quívi ndá cuéntá queá cáchún quivún — naxachi na xihín Jesús.

³⁵ Já naxachi Jesús já xihin ná:

—Yehe cúu da jándiyehé ínimá ñayivi ta coo too loho chága i xihin ndo. Sahá ña cán queá xíní ñúhú caca nuu ndó nani jándiyehé íchí cuhun ndo ta viti núná nu ndó caja ndó ña. Jáchí vaxi quívi quivi i caja na ta anda já cacuu a tátuhun canaá yávi ta já a cándaa ini ndó ndá xoo cuhun ndo. ³⁶ Xíní ñúhú candeé ini ndó yehe jáchí cúu u da jándiyehé nu ndó nani íin i xihin ndó. Anda jávi xinu coo ndó cacuu ndó ñayivi cuéntá mí i — naxachi Jesús.

Tá nandíhi já naquee Jesús cuahan chíjehé a nu ná.

Có cándusa na Israel Jesús

³⁷ Vatí naxaja Jesús cuahá ña xitúhún nuú ñayivi cán joo coo naxeen na cándusa na mé á. ³⁸ Já naxahin jáchí nandítahan xinu coo nuú tuhun ña naxahyi Isaías sanahá cán tá naxachi a já: Tátá Ndióxi, co cúní na cándusa na tuhun ña cahan í xihin ná.

Vatí xíní na ña náhnu cája mé ndó joo co cúní na cándusa na ndohó, já naxahyi Isaías sanahá.

³⁹ Sahá ña cán queá coo naxuu cándusa ñahá ñayivi cán. Ta inga tucu tuhun naxahyi Isaías queá cáchí já:

⁴⁰ Mé Ndióxi queá najácuaa ñahá ta coo naxuná a ínimá ná,

já ná a cúu cándaa ini na yo cúu mé á, já ná a cúu ndicó coo na nu mé á ña ná ndaja vaha mé á na, naxahyi Isaías.

⁴¹ Quiáhva já nacahan Isaías jáchi naxini mé dá ndá quiáhva cáhnu cúú Jesús.

⁴² Ta cuaha táhan na Israel cán nacandee ini na Jesús. Ta janda java na sacuaha nuú na Israel cán nacandee ini na Jesús. Joo coo naxeen na nahá tuhun na sahá jáchi nayihví na taxí na fariseo cán na veñuhu. ⁴³ Jáchi cúni na candoo vaha chága na nuú ñayivi a juú ga nu Ndióxi.

Táhvi ini ñayivi sahá cuachi na tá xíni johu na nu cáhan Jesús

⁴⁴ Tá nandihí já nacahan cóhó Jesús já nacachi a já:

—Ndá na candeé ini yehe já queá a juú in túhún yehe candeé ini na, vaha. Jáchi candeé ini ri na Ndióxi, tátá i, mé a nachindahá yehe vaxi i ñuyívi yóho. ⁴⁵ Ta ndá na xíni yehe xíni ri na mé a nachindahá yehe vaxi i ñuyívi. ⁴⁶ Yehe naquixi i ñuyívi yóho ña ná jándiyéhe ínimá ñayivi já queá ndá na ná candeé ini yehe, a canduu ga na nuú naá. ⁴⁷ Joo na xíni johu nu cáhan i ta co cája na ña, a juú toho yehe chícaan cuachi jata ná. Joo tuhun cáhan i queá chícaan cuachi jata ná. Jáchi coo vaxi i ñuyívi yóho chícaan i cuachi jata ñayivi. Naquixi i já ná cuu cacu ndaa ínimá ná. ⁴⁸ Ndá na cándají yehe ta co cúni na caja na ña cáchi i xihín ná, na cán cúú na cuhún indayá jáchi mé tuhun nacahan i cacuu a ña chícaan cuachi jata ná tá ná xínu coo mé quívi nu ndíhí cuí. ⁴⁹ Jáchi co jánahá i ña quíxi jini mé cuití i. Tóco ndihí ña cáhan i ta tóco ndihí ña jánahá i nuú ñayivi cúú a ña nachindahá Ndióxi, tátá i yehe jánahá i nu ná. ⁵⁰ Ta cándaa cáxi ini i ña tóco ndihí ña jánahá Ndióxi, tátá i caja ña ná cuhún na coo na indiví anda ama cáa quívi. Ta tóco ndihí ña cáhan i xihín ñayivi, cáhan i ña tá quiáhva nasahnda Ndióxi, tátá i nuú i caja i —nacachi Jesús.

Jándoo Jesús sahá na xíca tuun xihín á

13 Tácamaní in quívi coo vicó pas-cua já sa xíni Jesús ña sa naxínu coo quívi quívi a jándacoo a ñuyívi yóho já ndaa mé á ndique táhan xihín Ndióxi, tátá a. Ní tiempo naquihvi ini Jesús tóco ndihí na cúú cuéntá mé á ndúu ñuyívi yóho ta coo najándacoo mé á ña quíhvi ini a na.

² Ta ndaja coo íin Jesús xihín na xíca tuun xihín á xíjini na. Jihna sa najácahan tínahá sacuaha Judas Iscariote, da cúú jahyi Simón, ña ná jicó túhún da Jesús. ³ Joo sa xíni vaha Jesús ña nasahan Ndióxi, tátá a tóco ndihí ndée á nu mé á. Ta sa xíni a ña naquixi a nu Ndióxi ta jivi nu Ndióxi ndindita tucu a cuhún a. ⁴ Ta nani xíjini na nandaca ndichi Jesús já natavá a cotó níhnu a ta já natiin a in jáhma nachínee a tóco á. ⁵ Tá nandihí já nataán a ticuí ini in tishan loho já nacasáhá jándoo a sahá na xíca tuun xihín a cán. Ta já najándihichi a saha ná xihín jáhma cánee tóco á cán.

⁶ Ta tá nanditahan ndoo saha Simón Pedro já nandaca tuhún da Jesús já cáchi da já:

—Á mé a ndaa jándoo ndó sahá i, xi-toho i —nacachi da.

⁷ Já nacachi Jesús já xihín dá:

—Viti ñúhú co cándaa toho inún ndía queá cája i yóho joo chága chí nuu já candaa inún ndá cuéntá queá cája i já —nacachi Jesús.

⁸ Anda já nacachi Pedro já:

—Chí a quiáhva toho mí i ñamaní nu ndó jándoo ndó sahá i —nacachi da.

Anda já nacachi Jesús já xihín dá:

—Tá ná a quiáhvún ñamaní jándoo i sahún já a cúu cacuún cuéntá mí i —nacachi Jesús.

⁹ Anda já nacachi tucu da já xihín Jesús:

—Tá ta já cáchí ndo quiahva va i sahá i jándoo ndó ta quiahva ri ñamaní jándahá ndó yehe ta quiahva ri ñamaní chihin ndó jiní i viti —ñacachi da.

¹⁰ Andá já nanducú ñehe Jesús tuhun nu dá já ñacachi a já xihín dá:

—Tá sa ñachichi vaha ñayivi já ndúu vií na ta sahá cuití va ndó xíní ñúhú ndicata i. Mé ndó, na xíca tuun xihín i, sa ndúu vií ndo jáchi sa najándoo i cuachi ndó sahá ña candeé ini ndó yehe vatí a juú ndihi ndó ndúu vií —ñacachi Jesús.

¹¹ Ñacachi Jesús a juú ndihi na ndúu vií jáchi sa ñacandaa va ini mé á ndá da cúu da jicó túhún ñahá.

¹² Tá nandihí najándoo Jesús sahá na já ñacandixi tucu a cotó ñihnu a. Já ñasacoo tucu a nu mesa já ñacachi a já xihín ná:

—Cája i cuéntá co cándaa vaha ini ndó ndá cuéntá queá najándoo i sahá ndo. Sahá ña cán queá ndicani i ña nu ndo viti. ¹³ Mé ndó cáchí ndo maestro xihín i ta cáchí ndo cúu u xitoho ndó ta ndaa cáhan ndó jáchi jivi ndusa i. ¹⁴ Ta viti candehe ndó. Yehe cúu u maestro ndo ta cúu u xitoho ndó ta najándoo i sahá ndo. Sahá ña cán queá quiahva já ndítahan caja ndó xihín ndaja táhan mé ndó.

¹⁵ Sa ñasacu u in quiahva nu ndo ta ndítahan caja ndó tá quiahva ñacaja mí i xihín ndo. ¹⁶ Xíní ñúhú cándaa ini ndó ña ni in túhún toho mozo a cuú cacuu da da cáhnu chága a juú ga xitoho da. Ta mé a ndaa iin chága sahá in da sáhná chuun a juú ga mé da cuahan caja chúun cán. ¹⁷ Tá ñacandaa ini ndó ña cáhan i xihín ndo yóho ta tá ná caja ndó ña já queá cuu cajii ini ndó.

¹⁸ A juú sahá tóco ndihi ndó cáhan i jáchi sa cándaa vaha ini mí i ndá ndó ñacaxi i. Joo sahá in ndó ndítahan xinu coo nuú tuhun Ndióxi tá ñacachi a já: “In da sácoco tuun xíxi xihín i, da cán cúu da nandicuíta xihín i”, cáchí tuhun Ndióxi.

¹⁹ Sa cáxi tuhun cuéé e ña yóho xihín ndo

já queá tá sa ñaxinu ña yóho já candeé ini ndó yehe, ña cúu u da cáchí i cúu u. ²⁰ Mé a ndaa ná cáhan i xihín ndo. Ndá na ná ndiquehe vaha in da ná chindahá i, cúu á tátuhun ndiquehe vaha na yehe. Ta ndá na ndiquehe vaha yehe, ndiquehe vaha ri na Ndióxi, mé a ñachindahá yehe quixi i ñuyivi yóho —ñacachi Jesús.

Cáxi tuhun Jesús ña cúu Judas da jicó túhún ñahá

(Mt. 26:20-25; Mr.

14:17-21; Lc. 22:21-23)

²¹ Tá nandihí ñacachi Jesús ña yóho já ñacacuehá ndivaha ini a já ñacachi a já:

—Mé a ndaa ná cáhan i xihín ndo. In táhan ndó cacuu da cuhun jicó túhún yehe —ñacachi Jesús.

²² Tá nandihí já ñacasáhá na xíca tuun xihín Jesús cán sándehe nu táhan na. “Yo sahá cáhan Jesús”, cáhan na. ²³ Jíin Jesús cán iin coo in táhan da xíca tuun xihín á, da quíhvi ini mé á cán. ²⁴ Sahá ña cán queá ñacuu ndáha Simón Pedro nu dá ña ná ndaca tuhún da mé á sahá ndá da cúu da jicó túhún ñahá. ²⁵ Andá já ñacativi chága da cán jíin Jesús já ñacasáhá da ndáca tuhún ñahá da já ñacachi da já:

—Ndá da cúu dá, xitoho i —ñacachi da.

²⁶ Andá já ñacachi Jesús já xihín dá:

—Viti ñúhú chindaxi i in túhún pan ta ndá da ná quiahva i túhún pan cán nuu, da cán cúu dá —ñacachi Jesús.

Tá nandihí já ñachindaxi a in túhún pan já ñasahan ña nu Judas Iscariote, da cúu jahyi Simón. ²⁷ Ta tá ñatiin Judas pan cán chí ivi laá nandihvi tiñáhá sacuahá ini da. Já ñacachi Jesús já xihín dá:

—Xíní ñúhú ndihi inún cajún ña ñasacu inún cajún —ñacachi Jesús.

²⁸ Joo ni in túhún java ga na ndúu coo xíxi xihín Jesús cán coo ñacandaa ini na ndá cuéntá queá ñacachi Jesús ña yóho

xihin Judas. ²⁹ Java na nacahán na ña nasahnda Jesús chuun nu Judas ña ná cuhun da cueen da ñaha cuéntá víco pas-cua. Ta java na nacahán na ña nasahnda chuun nu dá ña ná jasá da jjuhún nuú na ndahví jáchi ndáha mé dá ñúhu ndihi jjuhún. ³⁰ Tá nandihí ñatiin Judas pan nasahan Jesús nu dá chí ivi laá naquee da cuahan da. Ta sa ñuú va queá cán.

Ndítahan quihvi ini táhan na cúu cuéntá Jesús

³¹ Tá sa naqueta Judas cuahan da já nacasáhá cáchí Jesús já xihín na xica tuun xihín á:

—Viti ndusa queá nacasáhá ndicáhnu ndivaha yehe, da nachindahá Ndióxi nduu ñayivi. Ta sahá ña caja i ndicáhnu ndivaha Ndióxi, tátá i. ³² Ta tá náha yehe ndá quiahva cáhnu cúu Ndióxi, tátá i quiahva já náha ri Ndióxi ndá quiahva cáhnu cúu yehe, da nachindahá Ndióxi nduu ñayivi. Ta ja chá cámani coo tóco ndihi ña yóho. ³³ Candehé ndo, jahyi mání i. Ja chá cuití tiempo coo i xihín ndo. Anda já ndinducú ndó yehe joo a ndínehe ndó yehe. Ndítahan ndicuhun ini ndó tá nacachi i xihín na Israel ña a cúu cuhun na nuú cuhun yehe. Quiahva já cáchí ri xihín ndóhó va: A cúu cuhun ndó nuú cuhun i. ³⁴ Ta viti sáhná i inga chuun nu ndo ta cúu á ña saá. Ta ña yóho cúu á: Ndítahan quihvi ini táhan ndó. Tá quiahva quihvi ini yehe ndohó quiahva já ndítahan quihvi ri ini táhan ndó. ³⁵ Jáchi tá ná quihvi ini táhan ndó já candaa ini tóco ndihi ñayivi ña mé a ndaa táhyí cúu ndó cuéntá mí i — nacachi Jesús.

Cáxi tühun Jesús ña chijehé tühun Pedro ña xíní da mé á

(Mt. 26:31-35; Mr.
14:27-31; Lc. 22:31-34)

³⁶ Anda já nandaca tühún Simón Pedro cán Jesús já nacachi da já xihín á:

—Xitoho i, ndájá cuhun ndó já — nacachi da.

Anda já nacachi Jesús já xihín dá:

—A cúu toho cuhun yóhó nuú cuhun i viti. Joo cacuáchi lohún já xinu coún cán —nacachi Jesús.

³⁷ Anda já nacachi Pedro já xihín Jesús:

—Ndá cuéntá queá cáchí ndo ña a cúu candico i ndohó cuhun i nuú cuhun ndó viti. Jáchi sa fin tiahva i quivi i saha ndo —nacachi Pedro.

³⁸ Já nanducú ñehe Jesús tühun nu dá já nacachi a já xihín dá:

—Mé a ndaa ná cahán i xuhun. Vatí fin tiahvún quivún sahá i joo tá cámani cana chéle já uni tañu chijehé tühún sahá i ta cahún ña co xíní tohún yehe —nacachi Jesús xihín Pedro.

Ndáca Jesús ñayivi cuhun na nu Ndióxi, tátá a

14 Já nacachi tucu Jesús já: —Coto a ndícani ini ndó. Ndí-tahan candee ini ndó Ndióxi ta ndítahan candee ini ndó yehe. ² Mé nu fin Ndióxi, tátá i, cán fin cuahá ndivaha nu núná nu ndó canduu ndó. Tá ná a cóo nuú canduu ndó cán janda mé saha va sa nacaxi tühun i xihín ndó, nduu. Ta cuhun i cacu tiahva i mé nuú canduu ndó cán. ³ Tá sa ná quee e cuhun i ta tá sa ná caja ndívi i nuú canduu ndó cán já quixi tucu u ndiquehe e ndohó já ná cuhun ndó canduu ndó xihín i mé nuú coo i cán. ⁴ Mé ndó sa xíní ndó ndá íchi candico ndó já cuu saa ndó nuú cuhun i —nacachi Jesús xihín na xica tuun xihín a cán.

⁵ Anda já nandicahan Tomás xihín Jesús já nacachi da já xihín á:

—Mé nde co xíní toho nde ndájá cuhun ndo, xitoho nde. Ndaja caja ri nde candaa ini nde ndá íchi quehe nde cuhun nde —nacachi da xihín á.

⁶ Já nanducú ñehe Jesús tühun nu dá já nacachi a já xihín dá:

—Yehe cúu tátuhun íchi ña ndítahan candico ñayivi ta yehe cúu da jánaħa ña ndaa. Ta yehe cúu da cája ña ná catacu ñayivi anda ama cáa quivi. Ta in túhún yehe ndítahan candeé ini ñayivi já ná cuu xinu coo na nu Ndióxi, tátá i. ⁷Tá xini ndó yo cúu yehe já xini ri ndó yo cúu Ndióxi, tátá i. Ta viti xihin chí nuu xini ndó a jáchi sa ñaxini ndó a —ñacachi Jesús.

⁸Anda já ñacachi Felipe já xihin Jesús:

—Xitoho nde, jánaħa ndó nuu nde yo cúu tátá ndo já ná caji ini nde —ñacachi da.

⁹Anda já ñacachi Jesús já xihin dá:

—Ndá cuéntá quea cáchún já jáchi janda jihna ndivaha va íin i xihin ndo ta sa ndítahan candaa ini ndó yo cúu yehe. Jáchi ndá na sa xini yo cúu yehe xini ri na yo cúu Ndióxi, tátá i. Saha ña cán quea ndá cuéntá quea cuni ndó ña ná jánaħa i tátá i nu ndo. ¹⁰Xini ñuhú candúsa ndó ña in cúu va yehe xihin Ndióxi, tátá i ta in cúu va mé á xihin i. Tóco ndihi ña cáhan i xihin ndo yóho co cáhan i ña saħá ña quixi a jini mé cuití vi. Cáhan i ña quixi nu Ndióxi jáchi íin mé á xihin i. Ta chuun cája i quixi a nu Ndióxi jáchi cája chúun mé á. ¹¹Xini ñuhú candúsa ndó ña in cúu yehe xihin Ndióxi, tátá i ta in cúu Ndióxi, tátá i xihin i. Ta tá co cuni ndó candúsa ndó ña já quea xini ñuhú candúsa ndó ña saħá ña náhnu ñaxini ndó ñacaja i. ¹²Mé a ndaa ná cáhan i xihin ndo. Ndá na candeé ini yehe, cuu caja na ña xitúhún tátuhun ña cája mí i. Ta janda ña náhnu chága cuu caja na jáchi cuhun i nu íin Ndióxi, tátá i. ¹³Ta tóco ndihi ña caça ndó nu Ndióxi, xini ñuhú caça ndó ña xihin quivi mí i já ná caja i ña. Ta ndicáhnu Ndióxi, tátá i xihin ña caja i saħa ndo. ¹⁴Ta caja i ndá ña ná caça ndo nuu i tá ná caça ndó ña xihin quivi mí i.

Sáhan Jesús tũhun a ña chindahá a ínima yii Ndióxi cañuhu a ini ñayivi

¹⁵Tá mé a ndaa quihvi ini ndó yehe, caja tá caja ndó ña saħndá i nu ndo caja ndó. ¹⁶Ta caça i nu Ndióxi, tátá i ña ná chindahá mé á ínima yii mé á nu ndo. Ta chíndeé mé á ndohó já ná quiahva tũhun ndéé ini ndó ta já cuu coo tuun a xihin ndo. ¹⁷Joo ñayivi, na co cúu cuéntá mí i, a cúu ndiquehe na ña jáchi co candaa ini na yo cúu mé á ta ni co cuni na ndiquehe vaħa na ña. Joo ndohó xini vaħa ndó a jáchi sa íin a xihin ndo ta ní tiempo cañuhu a ini ndó. ¹⁸A jándacoo ndáħa toho i ndohó jáchi ndicó coo tucu u já coo i xihin ndo. ¹⁹Ja chá cuití ta a cuni ga ñayivi cuéntá ñuyívi yehe. Joo mé ndó cuni tá cuni ndó yehe. Ta saħá ña nditacu tucu u saħá ña cán quea cuu catacu mé ndó anda ama cáa quivi. ²⁰Ta mé quivi cán candaa ini ndó ña mé a ndaa in cúu yehe xihin Ndióxi, tátá i. Ta candaa ini ndó ña quiahva já in cúu ndó xihin i ta in cúu yehe xihin mé ndó viti. ²¹Ndá na ndiquehe vaħa tũhun cáhan i ta cája na ña, náħa na xihin ña yóho ña mé a ndaa quihvi ini na yehe. Ta mé Ndióxi, tátá i quihvi ini a ndijáa na quihvi ini yehe. Ta quihvi ri ini yehe na ta naħa i mí i nu ná —ñacachi Jesús.

²²Anda já in da naní Judas, da co cúu toho da naní Judas Iscariote, nandaca tũhún da Jesús já ñacachi da já xihin á:

—Xitoho nde, ndá cuéntá quea cáchi ndó ña naħa ndó mé ndó nuu nde joo a náħa toho ndó mé ndó nuu ñayivi cuéntá ñuyívi —ñacachi da.

²³Já nanducú ñehe Jesús tũhun nu dá já ñacachi a já xihin dá:

—Ndá na quihvi ini yehe, na cán cúu na cája ña cáhan i. Ta já quihvi ini Ndióxi, tátá i na ta já quixi nde coo nde xihin ná. ²⁴Joo na co quihvi ini yehe, na cán cúu na quehe núu tũhun cáhan i. Ta mé tũhun cáhan i nu ndó yóho co

cúu á ña quíxi jiní mí i. Cúu á tũhun Ndióxi, tátá i, mé a ñachindahá yehe quixi i ñuyívi yóho.

²⁵Tóco ndihi ña yóho ndícani i ña nu ndó viti nani íin i xihín ndo. ²⁶Joo ínima yíi Ndióxi, mé a chindahá Ndióxi yuhú nuú i quixi a, chindeé a ndohó. Mé a cán queá jánaħa tóco ndihi ñaha nu ndo. Ta jándicũhun a ini ndó tóco ndihi ña ñacachi i xihín ndo.

²⁷Tá sa ná quee e cũhun i já caja i ña ná coo vaħa ini ndó. Joo a cácuu a tátũhun tá cája ñayivi cuéntá ñuyívi. “Ná coo vaħa ini ndó”, cáchí xihín táhan na joo coo íin vaħa ini xihín táhan na. Coto a ndícani ñahá ini ndó ta coto a yíhví ndo jáchí caja i ña ná coo vaħa ini ndó. ²⁸Sa ñaxini joho ndó ña ñacachi i xihín ndo ña quee e cũhun i ta ndicó coo tucu u já coo i xihín ndo. Ta tá mé a ndaa quíhví ndusa ini ndó yehe já queá cajíi ini ndó saħá ña cáchí i cũhun i nu íin Ndióxi, tátá i. Ta íin chága saħa mé á a juú ga yehe. ²⁹Sa ndícani cuéé vî ña yóho nu ndo já queá tá ná xinu coo ña cáchí i xihín ndo coo já queá cuu candúsa ndó yehe.

³⁰Ja chá cuití va coo i ñuyívi yóho nditũhún i xihín ndo jáchí sa ñatandaa hora xinu rí quini, rí cómí cuéntá saħá ñayivi ñuyívi yóho vatí mé a ndaa co ndéé rí caja rí ni in ñaha xihín i. ³¹Joo yaħa tá yaħa ña cúni ri caja rí xihín i. Ta xihín ña yóho candaa ini ñayivi ndúu ñuyívi ña mé a ndaa quíhví ini ndusa i Ndióxi, tátá i ta cája i ña ñasahnda mé á nuú i caja i. Candichi ndó. Xihín ndo ná coħo —ñacachi Jesús xihín na xíca tuun xihín a cán.

Jesús cúu á tátũhun in tó uva

15 Andá já ñacachi tucu Jesús já xihín ná:

—Yehe cúu ndusa tátũhun in tó uva ta Ndióxi, tátá i cúu á tátũhun da ndája víi saħa mé tó uva cán. ²Ta ñayivi cúu ná tátũhun ndáħa tó uva cán. Ta ndá na co

xeén caja ña cúni Ndióxi jácaxoo a na nu mé á tá quiahva cája da ndája víi dó cán tá chítũhun dá ndáħa tó uva, ña co cána uva nuu. Joo tá cána cuaħa uva nu do já queá ndája víi da ndáħa do ta ndíjatá da do já ná cana cuaħa chága uva nu do. Quiahva já cája ri Ndióxi xihín ñayivi, na cája ña cúni mé á. ³Joo mé ndó sa ñandivíi va ndó jáchí ñaxini joho ndó ña jánaħa i nu ndo. ⁴Xíni ñúhú in cacuu ndó xihín i tá quiahva in cúu yehe xihín ndo. Jáchí in ndáħa tó uva a cuú cana uva nu do tá co tíin dó tóco tó uva cán. Quiahva já íin ri xihín ndóħó va. A cúu caja ndó ña cúni Ndióxi tá coo in cúu ndó xihín i.

⁵Yehe cúu u tátũhun tó uva ta ndóħó cúu ndó tátũhun ndáħa mé tó uva cán. Ta ndá na in cúu xihín i tá quiahva in cúu u xihín ná já queá cuu caja ndihi na ña cúni Ndióxi. Cacuu a tátũhun cána cuaħa uva vaħa nu ndáħa tó uva cán. Jáchí mé a ndaa ni in túhún ñaha a cúu caja ndó tá ná a chindeé yehe ndohó. ⁶Ta ndá na co cúni in cacuu xihín i, na cán cúu na jácaxoo Ndióxi. Ta cúu ná tátũhun in ndáħa tó uva, dó sa ñahichí ta nditaca dó cũhun dó cayi do.

⁷Tá in ná cacuu ndó xihín i ta tá ná caja ndó ña ñajánaħa i nu ndo já cuu çaça ndó ndá ña cúni mé ndó nuú i já quiahva i ña nu ndo. ⁸Mé Ndióxi, tátá i ndicáħnu ndivaha tá ná caja ndó ña cúni a xihín ndinuħu ini ndó. Ta xihín ña yóho náħa ndó ña cúu ndó cuéntá mí i. ⁹Quíhví ini i ndohó tá quiahva quíhví ini Ndióxi, tátá i yehe. Xíni ñúhú coo tuun ndó xihín i jáchí quíhví ini i ndohó. ¹⁰Tá ná caja ndó tóco ndihi ña saħnda i nu ndo caja ndó já queá coo tuun ndó xihín i jáchí quíhví ini i ndohó. Quiahva já cája ri yehe va. Cája i tóco ndihi ña ñasahnda Ndióxi, tátá i caja i ta xihín ña yóho íin tuun i xihín á jáchí quíhví ini a yehe.

¹¹Cáxi tũhun i ña yóho xihín ndo já ná cajíi íni ndo tá quiahva cájii íni yehe. Ta xihín ña yóho ndicutú ndaa ínima ndo

xihín ña cájji ini ndó. ¹² Cuni johó ndó ña sáhndá i nu ndo yóho: Ndítahan quihvi ini táhan ndó tá quiahva quihvi ini yehe ndohó. ¹³ Tá mé a ndaa táhyí quihvi ini ñayivi ñani táhan na já queá fin tiahva na quivi na saha ná. ¹⁴ Mé ndó cúu ndó amigo i tá cajú ndó ña sáhndá i nu ndó cajú ndó. ¹⁵ Cáchi i xihín ndo ña cúu ndó amigo i jáchi cáxi tuhun ndihi i xihín ndo ña cáhan Ndióxi, tátá i xihín i. Ta a cáhan ga i xihín ndo ña cúu ndó mozo jáchi in mozo co xini toho da ndaja cá ña cajú xitoho da. ¹⁶ Mé ndó coo ñacaxi ndó yehe caca nuu i xihín ndo. Joo mí i ñacaxi i ndohó ña ná caca nuu ndó xihín i. Ta najánaha i ndohó ndá quiahva cajú ndó já ná cacuu ndó tátuhun in yíto, dó sahan cuahá cuhi ña a ndíhi saha. Tá ná cajú ndó ña cúní Ndióxi já quiahva tátá i ndá a cúní mé ndó tá ná caca ndó ña xihín quivi mí i. ¹⁷ Ña yóho queá sáhndá i nu ndó cajú ndó: Quihvi ini táhan ndó.

Cándají ñayivi cuéntá ñuyíví Jesús ta cándají ri na ña cúu cuéntá mé á

¹⁸ Candehé ndo. Tá ná casahá candají ñayivi cuéntá ñuyíví ndohó xini ñúhú ndicuhun ini ndó ña jihna ñúhú ga ñacandají ri na yehe va. ¹⁹ Tá ná cajú ndó tá quiahva cajú ñayivi ñuyíví já queá quihvi ini va na cán ndohó. Jáchi já cajú xihín táhan mé na cán. Joo yehe ñacaxi i ndohó ña ná quee ndó tañu na cán. Saha ña cán queá co cúní na cán ndohó jáchi co cúu ga ndó na ñuyíví yóho. ²⁰ Coto a ndíndójó ndo ña ñacahan i xihín ndo tá ñacachi i ña ni in túhún toho mozo a cúu cacuu da da cáhnu chága nuú xitoho da. Ta ni mé ndó co cúu ndó na náhnu chága a juú ga yehe. Jáchi tá quiahva ñacaja xixi na xihín yehe quiahva já cajú xixi ri na xihín ndohó va. Tá ná candúsa na ña ñacahan i xihín ná quiahva já candúsa ri na ña ná cahan ri ndohó va xihín ná. ²¹ Tóco ndihi ña yóho cajú na xihín ndo sahá ña cándéé ini ndó yehe. Jáchi co

xini na Ndióxi, tátá i, mé a ñachindahá yehe vaxi i ñuyíví yóho.

²² Tá ná a quixi toho i ñuyíví yóho caxi tuhun i xihín ñayivi, nduu coo toho na jácojo cuachi jata ná, nduu. Joo viti ñaquixi i ñuyíví yóho ta ndítahan nu ná ndiquiahva na cuéntá sahá cuachi na. ²³ Ndá ñayivi cándají yehe, cándají ri na Ndióxi, tátá i. ²⁴ Ñacaja i ña náhnu nu ná joo coo ñacandúsa na yehe sahá ña cán queá ndójo na cuachi. Ta ni in túhún toho ñayivi coo ñacaja ña náhnu tá quiahva ñacaja i nu ná. Vatí ñaxini na ña náhnu ñacaja i joo cándají na yehe ta cándají na Ndióxi, tátá i. ²⁵ Joo xihín tóco ndihi ña cúu yóho xinu coo nu ley najándacoo Moisés nu ná sanahá tá cáchi a já: “Chí coo saha ná candají na yehe”, já ñacachi Moisés sanahá.

²⁶ Tá ná quixi ínima yii Ndióxi, mé a chindahá i cuéntá Ndióxi, tátá i, mé a cán queá cahan vaha sahá i. Ta jánaha ña ndaa saha Ndióxi ta chindeé a ñayivi. ²⁷ Ta jári mé ndó cahan vaha ndó sahá i jáchi janda saha tá ñacasahá cajú chúun i ñuyíví yóho ñasanduu tuun ndó xihín i —ñacachi Jesús.

16 Já ñacachi tucu Jesús já: —Caxi tuhun i ña yóho xihín ndó já ná a jándacoo ndó ña cándéé ini ndó yehe. ² Jáchi vaxi quivi tá taxi ñayivi ndohó veñuhu. Ta ndá na ná cahní ndohó cahan na ña cajú chúun na cuéntá Ndióxi. ³ Cajú na ña yóho jáchi co xini na yo cúu Ndióxi, tátá i ta ni co xini na yehe. ⁴ Sa cáxi tuhun cuéé e ña yóho xihín ndo já queá tá ná xinu coo quivi cán já ndicuhun ini ndó ña sa ñacaxi tuhun yachi vi xihín ndo ña já coo.

Ña cajú ínima yii Ndióxi

¹ Coo ñacaxi tuhun i ña yóho xihín ndó jihna jáchi ñasahiin i xihín ndo. ⁵ Já chá cuhun i coo i xihín Ndióxi, tátá i, mé a ñachindahá yehe ñuyíví yóho joo ni in ndó co ndáca tuhún ndó yehe ndájá

cuhun i. ⁶Ñā cāja ndó queá cacuéha ndivaha ini ndó sahá ñā ndícani i tóco ndihi ñā yóho nu ndo. ⁷Joo mé a ndaa ná cahan i xihin ndo: Vaha chága ná quee e cuhun i. Jáchí tá ná a quee yehe cuhun i já a cúu quixi ínimā yíi Ndióxi coo a xihin ndo ta mé a cán chindeé a ndohó. Joo tá ná quee e cuhun i já chindahá i mé á quixi a nu ndo. ⁸Ta tá ná xinu a cán jánaha cáxi táhyí a nuú ñayivi ñā cāja na cuachi. Ta jánaha nu ná ndaja fin íchi cuéntá ñā ndaa. Ta jánaha nu ná ndá quiahva cavií sahá ñayivi caja Ndióxi. ⁹Ta jánaha cáxi táhyí a ñā fin cuachi na jáchí co cándéé ini na yehe. ¹⁰Ta jánaha ínimā yíi Ndióxi ndaja fin íchi cuéntá ñā ndaa jáchí quee e cuhun i nu fin Ndióxi, tátá i ta a cúní ga ndó yehe. ¹¹Ta jánaha cáxi táhyí a ñā caja víi Ndióxi sahá cuachi jáchí sa ñacaja víi a sahá tiñáha sacuaha vatí viti ñúhú cómi rí cuéntá sahá ñayivi ñuyiví yóho.

¹²Fin cuahá ndivaha ñaha cúní cahan chága i xihin ndo. Joo vatí já va viti jáchí a cándoo ga jiní ndo. ¹³Tá ná xinu ínimā yíi Ndióxi, mé a cúu ñā ndaa, mé a cán candaca ndohó íchi cuéntá ñā ndaa. Ta a cahan toho a cán ñā quixi jiní mé á jáchí cahan mé á ñā xíní joho a cahan Ndióxi. Ta caxi tuhun a xihin ndo ndá a coo chága chí nuu. ¹⁴Ta mé a cán caja cáhnu a yehe jáchí jánaha nu ndó ñā cúní mí i jánaha i nu ndo. ¹⁵Tóco ndihi ñaha jánaha Ndióxi, tátá i cúu rí a ñā jánaha yehe va. Sahá ñā cán queá cáchí i xihin ndó ñā ínimā yíi mé á caxi tuhun a xihin ndó ñā cúní mí i jánaha i nu ndo.

¹⁶Ja chá cuití coo i xihin ndo ta a cúní ga ndó yehe jáchí quee e cuhun i nu fin Ndióxi, tátá i. Joo tá nandihí já cuni tucu ndó yehe —cáchí Jesús.

¹⁷Anda já ñacasáhá java na xíca tuun xihin á cán ndaca tuhún táhan na já cáchí xihin táhan na já:

—Ndía cúní rí Jesús cachi a xoho tá cáchí a ñā ja chá cuití va ta a cúní ga í

mé á ta tá nandihí já cuni tucu mé á. Ta cáchí a ñā cúu á sahá ñā quee a cuhun a nu fin Ndióxi, tátá a. ¹⁸Ndía cúní rí a cachi a ñā ja chá cuití va cuni mé á. Co cándaa vaha toho iní ndía cúní mé á cachi a xihín tuhun yóho —ñacachi xihin táhan na.

¹⁹Joo ñacandaa ini Jesús ñā cúní ñā ndaca tuhún ñā mé á sahá ñā cán queá ñacachi a já xihin ná:

—Ñacachi i xihin ndó ñā ja chá cuití ta a cúní ga ndó yehe ta tá nandihí já cuni tucu ndó yehe. Ta viti cúní ndo ndaca tuhún ndó yehe ndía cúní cachi ñā yóho. ²⁰Mé a ndaa ná cahan i xihin ndo. Tandaa quívi cuacu ndó ta cacuéha ndivaha ini ndó ta ñayivi ñuyiví yóho cavatá ndivaha na sahá ñā ndoho i. Ta vatí cacuéha ini ndó joo in cuití ndajama ñā jan ta já cajií ndivaha ini ndó. ²¹Cacuu a tátuhun tá xinu coo hora cacu jahyi in ñañáha ta já casáhá ndóho ini ñā. Joo tá sa ñacacu jahyi ñā ndíndójó ndihi ñā sahá ñā nandoho ini ñā jáchí sa ñacacu jahyi ñā ta cajií ndivaha ini ñā xihin á. ²²Quiahva já ndóho ini ndó xihín ñā táhnda ini ndó viti. Joo ndicó coo tucu yehe já cuni táhan tucu ta já ndicutú ndaa ínimā ndó xihín ñā cajií íni ndo. Ta ni in na a cúu caja caji nuu nuú ñā cajií íni ndó jan.

²³Mé quívi cán coo ga ñaha caça ndó nuú i. Jáchí mé Ndióxi, tátá i quiahva tóco ndihi ñā xíní ñúhú ndo tá ná caça ndó ñā nu á xihín quívi mí i. ²⁴Janda viti a ñaha caça ndó ñaha nu Ndióxi, tátá i xihín quívi yehe. Joo viti xíní ñúhú caça ndó ñā cúní ndó nu mé á xihín quívi yehe ta já quiahva mé á ñā nu ndo. Ta xihín ñā yóho cuu ndicutú ndaa ini ndó xihín ñā cajií íni ndo.

Ñaquee vaha Jesús nu tóco ndihi ñā núu ñuyiví yóho

²⁵Xihín quiahva cuití ñacahan i ñā yóho xihin ndo. Joo tandaa quívi ta a

cáhan ga i xihín quiahva nu ndo. Ña caja i queá cáxi táhyi cáhan i saha Ndióxi, tátá i nu ndo. ²⁶Ta mé quivi cán caca ndó ña cúní ndó nu Ndióxi, tátá i xihín quivi mí i. Sa núná nu ndó caca tahví ndó nu á ta co xíní ñúhú ga caca tahví yehe nu mé á saha ndo. ²⁷Jáchí sa quíhvi ini tátá i ndohó sahá ña quíhvi ini ndó yehe ta sahá ña nacandúsa ndó ña nachindahá mé á yehe vaxi i. ²⁸Mé nu fin Ndióxi, tátá i naquee e vaxi i ñuyívi yóho. Ta yachí chá ta jándacoo i ñuyívi yóho já ndicó coo tucu u cuhun i nu fin Ndióxi, tátá i —nacachi Jesús.

²⁹Anda já nacachi na xíca tuun xihín á cán já:

—Viti ndusa queá cáhan cáxi táhyi ndo xihín nde ta co sácú ga ndó quiahva nuú nde. ³⁰Ta viti ndusa cándaá ini nde ña xíní ndo tóco ndihi ñaha. Ta ni co xíní ñúhú toho ndó ña ná ndaca tühún nde ndohó jáchí sa xíní va ndó ña cúní nde cándaá ini nde. Sahá ña cán queá cándúsa nde ña naquixi ndó nu fin Ndióxi —nacachi na.

³¹Já nanducú ñehe Jesús tühun nu ná ja nacachi a já xihín ná:

—Á ja viti ndusa cándúsa ndó yehe. ³²Joo sa naxinu coo va hora ndicuíta nuu ndó ndá nacuu cuhun ndo ta jándacoo in tühún ndó yehe. Vatí mé a ndaa a cándo mé toho i jáchí fin Ndióxi, tátá i xihín i. ³³Cáxi tühun i ña yóho xihín ndo já ná coo vaha ini ndó sahá ña in cúú ndó xihín i. Mé a ndaa ndoho tá ndoho ini ndó ñuyívi yóho. Joo a cáyhvi toho ndó jáchí yehe nacandee e nasahnu i nu tóco ndihi ña núu ñuyívi yóho —nacachi Jesús xihín na xíca tuun xihín á cán.

**Xíca tahví Jesús nu Ndióxi
sahá na xíca tuun xihín á**

17 Tá nandihí nacachi Jesús tóco ndihi ña yóho xihín na xíca tuun xihín á cán já nandínehe a nuu á chí indívi já nacachi a já:

—Tátá Ndióxi, sa naxinu coo quivi quivi i. Caja ndó ña ndicáhnu ndivaha mí i, da cúú in tühún jini já jahyi mé ndó já ná cuu caja cáhnu ri yehe va ndohó. ²Jáchí mé ndó nasahan ndó nuú i ña ná cacomí i cuénta saha tóco ndihi ñayivi já ná cuu caja i ña ná catacu na anda ama cáa quivi jáchí cúú ná na nasahan ndo nuú i. ³Ta tá xíní na yo cúú mé ndó ta tá xíní na yo cúú yehe, da nachindahá ndó ñuyívi yóho já cuu catacu na anda ama cáa quivi. Jáchí in tühún mé ndó cúú ndusa Ndióxi.

⁴Sa nacaja cáhnu i ndohó nani fin i ñuyívi yóho ta sa najaxinu coo ndihi i ña nasahnda ndó nuú i caja i. ⁵Ta viti xíca tahví i nu ndo, tátá Ndióxi ña ná nahá ndo nuú ñayivi ndaja cáhnu cúú yehe nu mé ndó jáchí quiahva já in cáhnu nasacuu u xihín ndó janda tá cámaní cava sáhá saha ñuyívi.

⁶Ta nacaxi ndó na cacuu cuénta mí i tañu ñayivi cuénta ñuyívi yóho. Ta sa nacaxi tühun i xihín ná yo cúú mé ndó. Nacaxi ndó na ta nandiquiahva ndó na nuú i. Ta nacandúsa na tühun ndó. ⁷Ta viti cándaá ini na ña tóco ndihi ña sahan ndó nuú i quíxi a cuénta mé ndó. ⁸Ta sa nacaxi tühun i xihín ná tóco ndihi ña nasahan ndó nuú i ta nandiquehe vaha na ña. Ta sa nacandaá ini na ña mé a ndaa naquixi i cuénta mé ndó. Ta nacandúsa na ña nachindahá ndó yehe.

⁹Co xíca tahví i nu ndó sahá ñayivi cuénta ñuyívi yóho. Joo xíca tahví i nu ndó sahá na nasahan ndó nuú i jáchí cúú ná cuénta mé ndó. ¹⁰Tóco ndihi na cúú cuénta mí i cúú ná cuénta mé ndó viti. Ta tóco ndihi na cúú cuénta mé ndó cúú ri na cuénta yehe va. Ta ndicáhnu ndivaha mí i sahá ña cája na.

¹¹’A cóo ga i ñuyívi yóho jáchí saa i nu fin mé ndó. Joo na nacaxi ndó yóho canduu tóo na ñuyívi yóho. Tátá Ndióxi, yii ndivaha cúú mé ndó. Xíca tahví i nu ndó ña ná cándaá vaha ndó na cúú

cuéntá mé ndó jáchí xihín ndéé mé ndó cuu candico na íchi cuéntá mé ndó. Já quéa in ná nduu ndihi na tá quiahva in cúu mé ndó xihín yehe. ¹² Jáchí nani ín i xihín ná ñuyíví yóho ndáá i na xihín ndéé mé ndó. Ta ni in túhún toho táhan na nasahan ndó nuú i cacomí i cuéntá saha cán coó nandihí saha. In túhún da nandihí saha cúu da janda sa-nahá nasahijn saha ña ndihí saha dá já ná cuu xinú coo nuú ña nacahyi nuú tuhun Ndióxi sanahá.

¹³ Ta viti quee e ñuyíví yóho saa i nu ín ndó jan. Joo cáhan i ña yóho xihín ndó nani ín i ñuyíví yóho já ná ndicutú ndaa ini na yóho xihín ña cájii íní na tá quiahva cájii íní mí i. ¹⁴ Sa nacaxi tuhun i tuhun mé ndó nu ná. Joo na cúu cuéntá ñuyíví cándají na na cúu cuéntá mí i jáchí co cúu ná cuéntá ñuyíví yóho tá quiahva co cúu toho yehe cuéntá ñuyíví yóho. ¹⁵ Co xíca tahví i nu ndo ña ná tavá ndo na ñuyíví yóho. Ña cúní quéa ná chindee ndó na já ná a quee vaha tiñáhá sacuaha xihín ná. ¹⁶ Tá quiahva co cúu toho i da cuéntá ñuyíví yóho quiahva já co cúu ga na cán ñayivi cuéntá ñuyíví. ¹⁷ Ta xíca tahví i nu ndó ña ná ndaja víí ndó na xihín tuhun mé ndó ña jánahá ndó nu ná jáchí tuhun mé ndó cúu ña ndaa. ¹⁸ Ta tá quiahva nacaja ndó nachindahá ndó yehe tañu na ñuyíví yóho quiahva já chindahá ri yehe va na cúu cuéntá mí i tañu ñayivi cuéntá ñuyíví. ¹⁹ Ta ndíquiahva i mí i caja i ña cúní mé ndó já quéa ná cuu ndiquiahva na yóho mé ná ndáha mé ndó sahá ña sa xíní na ña ndaa.

²⁰ Ta a juú sahá na yóho cuití va xíca tahví i nu ndo, vaha. Xíca tahví ri nu ndó sahá na ná candúsa yehe chága chí nuú sahá tuhun cahan mé na yóho xihín ná. ²¹ Tátá Ndióxi, xíca tahví i nu ndó ña ná caja ndó ña in ná nduu tóco ndihi na cúu cuéntá mé ndó yóho. Ta caja ndó ña in ná nduu ndihi na xihín yó

tá quiahva in cúu ndó xihín yehe ta in cúu yehe xihín mé ndó. Jáchí tá ná caja ndó ña in ná nduu tóco ndihi na já cuu candúsa ñayivi cuéntá ñuyíví ña mé a ndaa nachindahá ndó yehe vaxi i. ²² Nacaja i ña nandicáhnu na cán tá quiahva nandaja cáhnu ndó yehe. Já quéa in ná nduu ndihi na tá quiahva in cúu mé ndó xihín yehe. ²³ Ta in cúu yehe xihín ná tá quiahva in cúu mé ndó xihín i já ná xinú coo ndihi na cacuu na tátuhun in víxí ñayivi. Ta já ná cuni ñayivi cuéntá ñuyíví ña mé a ndaa nachindahá ndó yehe vaxi i. Ta já ná cuni na ña quíhvi ini ndó na tá quiahva quíhvi ini ndó yehe.

²⁴ Tátá Ndióxi, nacaja ndó ña cómí i cuéntá sahá na yóho. Ta cúní ña ná coo na xihín i nuú coo i já ná cuni na ndá quiahva cáhnu cúu u jáchí nacaja ndó ña ná ndicáhnu ndivaha i. Jáchí janda tá camaní cava sahá saha ñuyíví quíhvi ini ndó yehe. ²⁵ Tátá Ndióxi, caja ndó ña ndaa. Ta ñayivi cuéntá ñuyíví yóho co xíní toho na ndohó. Joo yehe xíní vaha i ndohó ta na cúu cuéntá mí i yóho sa cándaa vaha ini na ña nachindahá ndó yehe. ²⁶ Sa nacaja i ña ná candaa ini na yo cúu mé ndó ta cája i ña ná candaa chága ini na saha ndo. Ta xihín ña yóho candaa ini na ña quíhvi ini ndó na tá quiahva quíhvi ini ndó yehe ta já in ná nduu na xihín i —nacachi Jesús xíca tahví a nu Ndióxi.

Tá natiin na Jesús

(Mt. 26:47-56; Mr.

14:43-50; Lc. 22:47-53)

18 Tá nandihí naxica tahví Jesús nu Ndióxi já naqueta mé á xihín na xíca tuun xihín a cán cuahan chí inga xoo yívi naní Cedrón. Ta yati cán cáa cuaha yitó cuihi nuú naquihvi Jesús xihín na xíca tuun xihín á. ² Ta Judas Iscariote, mé da jíco túhún ñahá cán sa xíní vaha da nu sáhiin Jesús xihín na xíca tuun xihín á jáchí cuahá tañu nanditútú

ndihi na cán. ³ Ña cán quea ndáca da in táhndá soldado ta ndáca da java policia, na ndáa veñuhu cáhnu ñuu Jerusalén cán. Cúu ná na nāchindahá na sacuaḡa nuú jutu xihín na fariseo. Ta jandá johō ñeḡe na ñaḡa ná caní na a cuahān na ta ñeḡe ri na ití yúsá jándiyéḡe na nu ná. ⁴ Joo sa xini vaḡa Jesús ndíā ndítahan ndohō a saḡá ña cán quea naqueta nu ná já nandaca tuhún a na já nācachi a já xihín ná:

—Yo ndínducú ndo já —nācachi a.

⁵ Já nanducú ñeḡe na cán tuhun nu á já nācachi na já xihín á:

—Ndínducú nde Jesús, da ñuu Nazaret —nācachi na.

—Yeḡe cúu u da ndínducú ndo —nācachi a.

Ta tañu na cán ndácaan ri Judas, da najicó tuhún ñahá cán. ⁶ Tá nācachi Jesús: “Yeḡe cúu u da ndínducú ndo”, já naxica jātá na ta nacuyu na nu ñúhu. ⁷ Já nandaca tuhún tucu Jesús na já nācachi a já xihín ná:

—Yo ndínducú ndo já —nācachi a.

Já nanducú ñeḡe na cán tuhun nu á já nācachi na já xihín á:

—Jesús, da ñuu Nazaret ndínducú nde —nācachi na.

⁸ Anda já nācachi tucu Jesús já xihín ná:

—Sa nācachi vi xihín ndo ña yeḡe cúu u da ndínducú ndo. Saḡá ña cán quea quiahva ndó ñamaní nuú na yóho ña ná quee na cūhun na —nācachi Jesús.

⁹ Nācachi Jesús ña yóho já ná a tīn na na xica tuun xihín a cán já ná xinu coo nuú tuhun ña nācachi mé á tá naxica tahví a nu Ndióxi tá nācachi a já: “Tátá Ndióxi, ni in tuhún toho táhan na nasahan ndó nuú i coo nandihí saḡa jáchi nasandaa vaḡa i na.” ¹⁰ Ta ndaja coo nasanee in machítí nu tóco Simón Pedro. Já natuhun da ña ta nāchitūhun dá johō cuáha in da naní Malco, da cúu mozo nuú da cúu sacuaḡa cháḡa nu ndíhi

jutu. ¹¹ Anda já nācachi Jesús já xihín Pedro:

—Chicaan vaḡa machítí jan. Jáchi sa nasacu ini Ndióxi, tátá i ndohō ini i tóco ndihí ña vaḡi nuú i ta fin tiaḡva i ndohō ini i —nācachi Jesús.

Ñeḡe na Jesús cuahān na nuú da sacuaḡa cháḡa nu ndíhi jutu

(Mt. 26:57-58; Mr. 14:53-54; Lc. 22:54)

¹² Tóco ndihí soldado cán xihín da sáḡndá chuun nu dá xihín java na ndáa veñuhu cán naḡtiin na Jesús ta nācató na a. ¹³ Jihna ñúhú ñeḡe na a nasahan na nu Anás, da cúu xojo Caifás, da sacuaḡa cháḡa nu ndíhi jutu mé cuiā cán. ¹⁴ Mé Caifás yóho cúu dá da nācachi xihín na Israel ña vaḡa cháḡa ña ná quivi in taḡa nu ndíhi ñayivi já ná a ndíhi saḡa tóco ndihí ñayivi.

Chíjehé tuhun Pedro ña xini da Jesús

(Mt. 26:69-70; Mr.

14:66-68; Lc. 22:55-57)

¹⁵ Ta ndaja coo Simón Pedro xihín inga táhan da xica tuun xihín Jesús cán ndíco na jatá nu ñeḡe na a cuahān na. Ta da inga cán xini táhan vaḡa da xihín da sacuaḡa cháḡa nu ndíhi jutu ña cán quea nañeḡe dá ñamaní ndihvi da xihín Jesús yuyéḡe veḡe jutu cán. ¹⁶ Joo nācandoo Pedro jata veḡe yati yéḡe cán. Joo da inga cán nandicó coo da já naxica da ñamaní nu ña ndáa yéḡe veḡe jutu cán ña ná quiahva ña ñamaní nu Pedro quihvi da. Saḡá ña cán naquihvi Pedro chí yuyéḡe veḡe cán. ¹⁷ Ta mé ña ndáa yéḡe cán nandaca tuhún ña Pedro já nācachi ña já xihín dá:

—Á a juú in táhan da xica tuun xihín Jesús cúu yóho —nācachi ña.

Anda já nācachi Pedro já xihín ña:

—Coo cúu toho i in táhan da xica tuun xihín á —nācachi Pedro.

¹⁸ Ta mé ñuu cán vixi xini na cúu mozo xihín na ndáa veñuhu cán. Saḡá

ñā cán quēa nandicahmi na ñūhu ta nandaca nduu na xítuní na ta tañu na cán cándichi ri Pedro xítuní da.

Ndája ndichi da sacuaḡa cháḡa nu ndíhi jutū Jesús

(Mt. 26:59-66; Mr. 14:55-64; Lc. 22:66-71)

¹⁹ Tá nandihí já nacasáhá da sacuaḡa cháḡa nu ndíhi jutū cán ndája ndichi da Jesús já nandaca tuhún da mé á sahá na naxica tuun xihín á. Ta nandaca tuhún da mé á sahá ña najánaha nuú ñayivi.

²⁰ Anda já nacachi Jesús já xihín dá:

—Coó nacahan jehé toho i xihín ñayivi tá najánaha i nu ná. Níi tiempo najánaha i tuhun Ndióxi nu ná ini veñuhu ta quiahva já najánaha i nu ná nu táca na ini veñuhu cáhnu ñuu Jerusalén. Ta ni in túhún toho ñaha coó najánaha jehé e nu ná. ²¹ Ta viti cachi ndó xihín i ndá cuéntá quēa ndaca tuhún ndó yehe sahá ña yóho. Cuáhán ndó ndaca tuhún ndo ñayivi, na najánaha i nu cán já ná ndicani na cán nu ndo ndaja cáa ña najánaha i nu ná. Jáchi xini vaha na ña nacahan i xihín ná —nacachi Jesús.

²² Tá nacachi Jesús ña yóho já nacani in da ndáá veñuhu cán jahndá nuu á já nacachi da já xihín á:

—A váha toho ndínehe yúhún nuú da sacuaḡa cháḡa nu ndíhi jutū —nacachi da.

²³ Anda já nacachi Jesús já xihín dá:

—Tá co váha ná caja i, cahan xihín i ndá cúu ña coó nacaja vaha i. Joo tá nacaja vaha i ndá cuéntá quēa cánún yehe —nacachi Jesús.

²⁴ Tá nandihí já nasañehe na Jesús nuú Caifás, da sacuaḡa cháḡa nu ndíhi jutū cán ta sa já ndíco a xihín yóho ñehe na a cuahan na.

Chíjehé tuhun tucu Pedro ña xini da Jesús

(Mt. 26:71-75; Mr. 14:69-72; Lc. 22:58-62)

²⁵ Ta ndaja coo ín coo yi Pedro xítuní da xihín java na ndúu cán. Ta já nacasáhá na cán ndaca tuhún na da já nacachi na já xihín dá:

—Á a juú táhan da xica tuun xihín Jesús cúu yóho —nacachi na.

Joo nachijehé tuhun Pedro ña xini da Jesús já nacachi da já:

—Co cúu toho i in táhan da xica tuun xihín á —nacachi da.

²⁶ Joo tá nandihí já nandaca tuhún in da cúu mozo nuú da sacuaḡa cháḡa nu ndíhi jutū cán, da cúu in táhan da nachituhún Pedro johó. Ta nacachi da já xihín Pedro:

—Cája i cuéntá naxini i yóho nu cáa cuḡa yitó cuihi nuú natiiin na Jesús cán —nacachi da.

²⁷ Joo nachijehé tuhun tucu Pedro ña xini da Jesús ta ivi laá nacana chéle tá quiahva nacachi Jesús xihín dá coo.

Ñehe na Jesús cuahan na nu Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Ta tá nativi yaa já natavá na Jesús vehe Caifás cán já ñehe na a cuahan na vechúun nu ndacaan da cúu gobernador cuéntá ñuu Roma. Joo mé na Israel coó naxeen na ndihvi na vechúun cán jáchi cáchi ley na ña tá ná ndihvi na vehe na tóho já cuu yuxu na ta já a cúu cajini na vicó pascua ña coo quiví itaan. ²⁹ Sahá ña cán quēa naqueta Pilato, da cúu gobernador jata véhe cahan da xihín na Israel já nacachi da já:

—Ndá cuachi nacaja da yóho —nacachi Pilato.

³⁰ Já nanducú ñehe na Israel cán tuhun nu dá já nacachi na já:

—Ta tá a juú taa quini ná cacuu da yóho ta a cañehe toho nde da quixi da nu ndó, nduu —nacachi na.

³¹ Já nacachi Pilato já xihín ná:

—Mé ndó cañehe ndó da cuhun ndo. Caja víí ndó saha dá tá quiahva sáhdá ley mé ndó —nacachi Pilato.

Já nacachi na Israel cán já xihín dá:

—Ña cuní nde quea ná cata caa ndó da ndica cruxu jáchi cúu nde na Israel ta co ñehe toho nde ñamaní cahní nde ñayivi —nacachi na.

³² Ta xihín ña yóho naxinu coo nuú ña nacachi Jesús tá nacachi a ndá quiahva quivi a. ³³ Tá nandihí já nandihvi tucu Pilato ini vechúun cán ta nacana da Jesús já nandaca tuhún ñahá da já nacachi da já xihín á:

—Á mé a ndaa cúun in rey, da cómí cuéntá sahá na Israel —nacachi da.

³⁴ Já nacachi Jesús já xihín dá:

—Á jiní mé ndó naquixi ña ndaca tuhún ndó yehe. Á ndaca tuhún ndó yehe sahá ña nacachi ñayivi sahá í —nacachi a.

³⁵ Andá já nacachi Pilato já xihín Jesús:

—Co cándaq ini í saha ña yóho jáchi co cúu yehe da Israel. Mé ñayivi Israel jan xihín na sacuaqa nuú jutu cúu na nandiquiahva yohó ndahá í. Ndía naca-jún, vaha —nacachi Pilato.

³⁶ Já nanducú ñehe Jesús tuhun nu dá já nacachi a já xihín dá:

—Co cómí í cuéntá sahá ñayivi tá-tuhun cája ñayivi cuéntá ñuyíví. Jáchi tá ná cacomí í cuéntá saha ná tátuhun na ñuyíví já quea cuu caja í xihín na cómí í cuéntá saha ña ná caní táhan na xihín na Israel ña ná a tfin na yehe. Joo co cómí toho í cuéntá saha ná tátuhun cája ñayivi cuéntá ñuyíví —nacachi a.

³⁷ Andá já nacachi tucu Pilato já xihín Jesús:

—Á cúun da cómí cuéntá sahá ñayivi, dá já —nacachi da.

Já nacachi Jesús já xihín dá:

—Ña ndaa quea cáhan ndó jan. Yehe cúu u da cómí cuéntá sahá ñayivi cuéntá mí í jáchi nacacu u ñuyíví yóho ña ná caja í já. Ta naquixi í já ná caxi tuhun í ña ndaa xihín ñayivi. Ta tóco ndihí na cúu cuéntá ña ndaa xini johó ña cáhan í —nacachi a.

³⁸ Já nacachi tucu Pilato já xihín á:

—Yo xini ndía cúu ña ndaa —nacachi da.

Tá nandihí já naqueta tucu Pilato vechúun cáhan da xihín na Israel já nacachi da já xihín ná:

—Chí co ndínehe mí ví ndá cuachi quea nacaja da yóho. ³⁹ Tañu mé víco pascua fin in costumbre ndo ña ná janí í in da sá ndacaan vecaa. Ta viti cachi ndó xihín í a co cúni ndó ña ná janí í da cúu rey nuú na Israel —nacachi Pilato.

⁴⁰ Ta já nacasáhá tóco ndihí na cán cáyuhú cóhó na já cáchí na já:

—A janí toho ndó Jesús jan. Vaha chaga ná janí ndó Barrabás jan —cáchí na cáyuhú na nu Pilato.

Ta Barrabás cán nasacuu da in taa cuihná.

Sácu na sahá Jesús quivi a

19 Andá já nasahnda Pilato chuun ña ná jácaxáhan na Jesús xihín churrú. ² Ta da cúu soldado cán najehén da in tiyivi xihín íñu já nacinúu da a jiní á ta nacinúu da in jáhma cuáhá túun jatá. ³ Tá nandihí já nacativi da nu á sácu ndaa ichi ñahá da já nacachi da já xihín á:

—Cáhnú nahá ná cacuu yóhó, da cúu rey nuú na Israel —nacachi da.

Andá já cáni da nuu á.

⁴ Tá nandihí já naqueta tucu Pilato chí jatá já nacachi da já xihín tóco ndihí na ndúu cán:

—Candehé ndo. Tavá ñehe e Jesús nu ndo já ná cándaq ini ndó ña coó toho cuachi da ndítahan í —nacachi da.

⁵Tá nandihí já n̄tavá ñehe Pilato Jesús ta s̄a já cánúu tiyiví ñ̄nu j̄iní á. Ta s̄a já tácaa jahmá cuáhá túun jatá naqueta. Anda já ñacasáhá cáchí Pilato já:

—Candehé ndo. Yóho ñ̄n da —ñacachi da.

⁶Joo n̄a s̄acuaha nuú jutu xihín n̄a ndáa veñuhu tá ñaxini na Jesús já ñacasáhá na cáyuhú cóhó n̄a já cáchí n̄a já:

—Cata caa ndó da nd̄ica crúxu, cata caa ndó da —cáchí na.

Anda já ñacachi Pilato já xihín ná:

—Mé ndó cañehe ndó da c̄uhun ndo cata caa ndó da nd̄ica crúxu tá cún̄i ndo. Jáchi yehe c̄o ndítahan i ndá cuachi n̄a-
caja da —ñacachi Pilato.

⁷Anda já ñacachi n̄a Israel cán já xihín Pilato:

—Nu ley mé nde ndítahan quivi da jáchi cáchí da cúu dá in túhún j̄iní já jahyi Ndióxi —ñacachi na.

⁸Tá ñaxini johó Pilato cán ñ̄a yóho já nayihví chága ví da. ⁹Já ñaquihvi tucu Pilato xihín Jesús ini vechúun cán já nandaca túhún da mé á já ñacachi da já xihín á:

—Ndá ñ̄nu ñaquisún já —ñacachi da.

Joo cóo nanducú ñehe Jesús túhun nu dá.

¹⁰Já ñacachi tucu Pilato já:

—Ndá cuéntá queá c̄o cúnun nducú ñ̄ehún túhun nuú i. Á c̄o x̄iní tohún ñ̄a cuu cahnda i chuun ñ̄a ná cata caa na yohó nd̄ica crúxu. Ta cuu janí ri yohó ñ̄a ná queún c̄uhun tá cún̄i —ñacachi da.

¹¹Anda já nanducú ñehe Jesús túhun nu dá já ñacachi a já xihín dá:

—Ni in túhún toho ñ̄aha c̄o núná nu ndó caja ndó xihín i tá c̄o s̄ahan Ndióxi, tátá i ñ̄aman̄i nu ndo. Joo mé a ndaa ñ̄in chága cuachi nuú da nandiquiahva yehe ndáha ndó a juú ga ndóhó —ñacachi Jesús.

¹²Anda já nanducú Pilato ndá quiahva caja da janí da Jesús ñ̄a ná quee a c̄uhun

a. Joo cóo ñaxeen n̄a Israel ta ñacasáhá na cáyuhú cóhó n̄a nu dá já cáchí n̄a já:

—Tá ná janí ndó Jesús jan já queá náha ñ̄a c̄o cúu ndó da ñehe táhan vaha xihín da cómí cuéntá sahá ñ̄ayivi ñ̄uu Roma. Jáchi Jesús jan cáchí da ñ̄a cúu dá da cómí cuéntá sahá ñ̄ayivi ta xihín ñ̄a yóho jándihihvi da emperador, da cómí cuéntá sahá ñ̄ayivi ñ̄uu Roma —ñacachi na.

¹³Tá ñaxini johó Pilato ñ̄a yóho já ñasahnda da chuun ñ̄a ná tavá na Jesús. Ta ñasac̄oo mé dá nu s̄ac̄oo da s̄ahnda chuun vechúun. Mé nu s̄ac̄oo da cán naní a Gabata túhun hebreo. Mé túhun yóho cún̄i cachi a nuú ñaquihvi piso yuu.

¹⁴Nayaha tóco ndihí ñ̄a yóho tá cámaní in quiví coo víco pascua. Ta cúu á tá-túhun caxiví ta nandaca ndichi Pilato já ñacachi da já xihín n̄a Israel cán:

—Jan ñ̄in da cúu rey nu ndo —ñacachi da.

¹⁵Joo n̄a cán ñacasáhá tucu na cáyuhú cóhó n̄a nu dá já cáchí n̄a já:

—Cahní ndó da. Ná quivi da. Cata caa ndó da nd̄ica crúxu —cáchí ñ̄a.

Já ñacachi Pilato já xihín ná:

—Ama ná cata caa ri da cúu rey nu ndó nd̄ica crúxu —ñacachi Pilato.

Anda já ñacachi n̄a s̄acuaha nuú jutu cán já:

—Da cómí cuéntá sahá ñ̄uu Roma, in túhún da cán cuití va cúu rey nuú nde —ñacachi n̄a cán.

¹⁶Anda já nandiquiahva Pilato Jesús nu ná ñ̄a ná cañehe na a c̄uhun n̄a cata caa na a nd̄ica crúxu.

Cáta caa na Jesús nd̄ica crúxu

(Mt. 27:32-44; Mr.

15:21-32; Lc. 23:26-43)

¹⁷Nachinúu na in crúxu joco Jesús já ndójo a do cuahan chí xiquí naní a nu ndúu lásá yiquí jín̄i nd̄i. Ta cáchí n̄a Gólgota xihín á túhun hebreo. ¹⁸Ta cán ñacata caa na a nd̄ica crúxu ta ña-

cata caa ri na inga ivi da xihín á, in in da in in xoo jíin á. Ta tácaa Jesús mahñú ndívi da cán. ¹⁹ Ta nasahnda Pilato chuun ña ná cūhun java na chítivi ndaa na in tabla ndica crúxu yati jini Jesús cán. Ta nu tabla cán ñacahí na: “Da yóho cúu Jesús, da ñuu Nazaret, da cúu rey nuú na Israel.” ²⁰ Ta cuahá na Israel ñacahvi na ña ñacahyi cán jáchi yati yuhú ñuu Jerusalén ñacata caa na Jesús. Ta ña ndáa nu tabla cán ñacahí na ña tuhun hebrero ña cáhan na Israel xihín tuhun latín ña cáhan na ñuu Roma xihín tuhun griego ña cáhan na nación Grecia. ²¹ Ta tá ñaxini na sacuahá nuú jutū cán ña yóho já ñacachi na já xihín Pilato:

—A cáhyi toho ndó ña cúu da jan rey nuú na Israel. Vaha chága ná cahí ndó ña cáchi da cúu dá rey nuú na Israel — ñacachi na.

²² Já ñanducú ñehe Pilato tuhun nu ná já ñacachi da já xihín ná:

—Coo tá coo ña sa nasacu u ta a táva toho i ña — ñacachi da.

²³ Tá ñandihí ñacata caa mé soldado Jesús ndica crúxu, já ñatiin da jahmá a ta ñandicahnda nu táhan ndícomi dá ña. Ta cotó ndéé a cúu á ña ñacavaha ní na ña jini á ta janda sahá ta coo ñacucu na ña. Ta ñatiin da ña ²⁴ ta já ñacachi xihín táhan da já:

—Ná a jácuachí toho í jáhma jan já ná coo ní yí va. Ña cuu caja í queá cajíquí yo sahá ta ndá da ná quee vaha, da cán ndiquehe jáhma jan — ñacachi xihín táhan da cán.

Ñacaja da ña yóho já ná xinu coo nuú tuhun Ndióxi ñacahyi sanahá tá ñacachi a já: “Ñandicahnda nu táhan mé ná jahmá i ta já ñasajíquí na sahá cotó ndéé e ta da ñaquee vaha cán ñandiquehe da ña.” Quiahva já ñacahyi tuhun Ndióxi sanahá. Ta quiahva já ñacaja soldado cán xihín jáhma á.

²⁵ Ta jíin mé crúxu nuú ñacata caa na Jesús cán nasandichi náná a xihín quihvi

ñá cán xihín María, ñá cúu ñájíhí Cleofas xihín María, ñá ñuu Magdala. ²⁶ Tá ñaxini Jesús ña cándichi náná a saha crúxu ta tá ñaxini a cándichi yehe, da naní Juan, da xica tuun xihín á, da quihvi ndivaha ini mé á chí já ñacachi a já xihín náná a:

—Da jan cúu tátuhun jahyi ndó viti — ñacachi Jesús.

²⁷ Tá ñandihí já ñacachi a já xihín mé da xica tuun xihín a cán:

—Candaa vaha ña jáchi cúu ña tátuhun nánún viti — ñacachi Jesús.

Tá ñaxini johó da ña yóho já ñandiquehe vaha da María cán ndáa da ña tátuhun náná da.

Tá ñaxihí Jesús

(Mt. 27:45-56; Mr.

15:33-41; Lc. 23:44-49)

²⁸ Tá sa ñayaha tóco ndihí ña yóho já sa xini vaha Jesús ña sa ñaxinu coo tóco ndihí ña ñacachi tuhun Ndióxi coo. Ta ñaxinu coo nuú ña ñacahyi nuú tuhun Ndióxi sahá Jesús sanahá tá ñacachi a já:

—Íchi ini i ticuíf.

²⁹ Mé cán nasandichi in tindoño ñachutú jini xihín vino iyá. Ta najándaxi na in ticoño xihín vino cán já ñacató da ña nuú in yito naní hisopo ta já ñachitivi na ña yati yúhu Jesús ña ná coho a do. ³⁰ Anda já ñaxihí Jesús mé vino iyá cán já ñacachi a já:

—Sa ñayaha tóco ndihí ñaha ña ndítahan ndoho i — ñacachi a.

Já ñanditoo jico á. Ñaxihí a.

Tá ñatuxú na in yito tátuhun póyá yicá ndicá Jesús

³¹ Ta ndaja coo nasahan na Israel cán ñaxica na ñamaní nu Pilato ña ná cahnda da chuun ña ná cahnu da lásá sahá da tácaa ndica crúxu cán já ná quivi yachi da. Jáchi coo ñaxeen na Israel cán ña ná taca ndii ndica crúxu inga

quívī itaān. Jáchī cacuu a quívī ndiquehe ndéé ná ta cacuu a in quívī yīī ndivaha nu ná. ³²Sahá ñā cán queá naquee soldado nasahan da já nasahnu da lásá sahá ndívī da tácaā ndīca crúxu jīīn Jesús cán. ³³Joo tá nacayati da nu Jesús ñā cahnu da lásá sahá, naxini da ñā sa naxihī va mé á sahá ñā cán queá coó nasahnu da lásá sahá.

³⁴Joo in táhan soldado cán natuxú da in yíto tátuhun póyá yicá ndícá a já nacana niī xihín ticuíf cán. ³⁵Ta yehe cúu u da ndīcani ñā yóho nu ndo ta naxini i ñā xihín nuú i. Ta cúu á ñā ndāa. Ta cándaā cáxí ini i ñā cáhan i ñā ndāa já ná candúsa ndó ñā ndīcani i nu ndo. ³⁶Jáchī tóco ndihi ñā yóho nayaha já ná xīnu coo nuú tūhun Ndióxi tá cáchí a já: “Ni in túhún toho lásá da, a cáhnu na”, já cáchí tūhun Ndióxi. ³⁷Ta inga tucu cáchí tūhun Ndióxi já: “Cuni tucu na da, da natuxú na póyá yicá ndícá”, já nacahyí na nuú tūhun Ndióxi sanahá.

Tá najánduxu na Jesús

(Mt. 27:57-61; Mr.

15:42-47; Lc. 23:50-56)

³⁸Tá sa nayaha tóco ndihi ñā yóho já naxīnu coo in da naní José, da ñuu Arimateo, nu Pilato. Ta naxīca da ñamanī nu Pilato ñā ná ndiquehe da yiquí cuñu Jesús cañehe da cūhun da. Mé José yóho cúu dá cuéntá Jesús joo coó nanaha tūhun da sahá jáchī yīhvī da na Israel. Ta ndaja coo nasahan Pilato ñamanī nu dá ñā ná ndiquehe da yiquí cuñu Jesús. Chí nasahan da nandiquehe da ñā. ³⁹Ta jári iin in da naní Nicodemo ta ñéhe da tátuhun oco uxu kilo perfume, dó nacavaha xihín ñā naní mirra ta xihín ñā naní aloes. Mé Nicodemo yóho cúu da da nasahan nanditúhún xihín Jesús tá ñuu. ⁴⁰Ñā cán queá ñatiin José xihín Nicodemo yiquí cuñu Jesús ta naxitívī na ñā xihín in jáhma vaha ñā nachindaxi da xihín mé perfume cán. Jáchī quiahva

já iin costumbre na Israel cája na tá jánduxu na ndii. ⁴¹Ta yati nuú nacata caa na Jesús cán nasahīn nu cáa cuaha yitó cuihi. Ta tañu yitó cán nasahīn in yávi ndīca cáva nuú cuu chīcaān na ndii. Mé cáva cán nasacuu a ñā saá jáchī ni in ndii a ñāha chīcaān na ini ñā cán. ⁴²Ta cán nachīcaān da yiquí cuñu Jesús jáchī yati nasahīn a. Ta númī dá jáchī sa nacativi quívī ndiquehe ndéé na Israel.

Tá nanditacu tucu Jesús

(Mt. 28:1-10; Mr. 16:1-8; Lc. 24:1-12)

20 Ta tá sa nayaha mé quívī ndiquehe ndéé ná ta naha vaha chá quívī domingo tá cámanī queta candii já nasahan María, ñā ñuu Magdala nuú nachīcaān na yiquí cuñu Jesús cán. Já naxini ñā ñā nacaxoo yūu cáhnu nasandaji yuhú cáva cán. ²Anda já naxīnu ñā nasahan ñā nu iin Simón Pedro xihín inga da naxīca tuun xihín Jesús, da quíhvī ndivaha ini mé á cán. Ta tá naxīnu coo ñā nu dá já nacachi ñā já xihín dá:

—Natavá na yiquí cuñu xitoho i ta yo xīnī ndájá nasacu na ñā —nacachi ñā.

³Anda já naqueta Pedro xihín inga da naxīca tuun xihín Jesús cán ndáva da cuahan da nuú nasandacaān Jesús. ⁴In nuú xīnu ndívī da cuahan da. Joo nihi chága xīnu da inga cán a juú ga Pedro ñā cán queá jihna ñúhú da naxīnu coo da nuú nandacaān Jesús cán. ⁵Anda já nacandayī da sándehé da nuú nasandacaān Jesús cán. Já naxini da ñúhu ticoto nasatívī a cán cuití va. Joo coó nandihvi da janda mé ini cáva cán. ⁶Anda já naxīnu coo Simón Pedro ta nandihvi da cán. Ta naxini da mé ticoto nasatívī yiquí cuñu Jesús cán. ⁷Ta naxini da ticoto ñā nasatívī jīnī á nacaxoo jīn ñā cán ta nanditívī vaha ñā. ⁸Anda já nandihvi ri da inga cán, da naxīnu jihna ñúhú. Ta tá naxini da ñā coó yiquí cuñu Jesús ndacaān já nacandúsa da ñā nanditacu tucu

a. ⁹ Jáchí coo ñacandaa ini ña cóú cuéntá mé á ña cáhí tũhun Ndióxi ñu cáhí a ña nditacu tucu Jesús. ¹⁰ Tá ñandihí já ndáca táhan ndívi ña ñaxica tuun xihín Jesús cán ñandicó coo da vehe nuú ñasanduu na.

Tá ñaxini María, ña ñuu Magdala Jesús

(Mr. 16:9-11)

¹¹ Ta nani ñayaha tóco ndihí ña yóho, ñandicó coo María mé nuú ñasandacaan yiquí cuñu Jesús. Sácu ña ín ña yuhú cáva cán. Ta nani sácu ña ñacandayi ña ndicoto nihni ña ini cáva cán. ¹² Já ñaxini ña iví tátõ Ndióxi, ña ndíxi jahmá yaa. Ndáa ndúu coo a nuú ñasahíin yiquí cuñu Jesús: in a nuú ñasahíin jini Jesús ta inga nuú ñasahíin sahá. ¹³ Anda já ñandaca tũhún tátõ Ndióxi cán María já ñacachi a já xihín ña:

—Ndá cuéntá queá sácún —ñacachi a.

Já ñacachi ña já xihín á:

—Sácu u jáchí ñaquehe na yiquí cuñu Jesús, xitoho i ta co xini ndájá ñasacu na ña —ñacachi ña.

¹⁴ Tá jacá ñacachi uun ña ña yóho já ñandicoto nihni ña já ñaxini ña in a cándichi a ñu ña já va joo coo ñandicuni ña ña cóú á Jesús. ¹⁵ Anda já ñandaca tũhún Jesús ña já ñacachi a já xihín ña:

—Ndá cuéntá queá sácún. Yo já ndín-ducún —ñacachi a.

Ta ñacahan María ña mé ña cáhan xihín ña cóú dá ña ndáá mé yitó cuíhi cáa cán. Sahá ña cán queá já ñacachi ña já:

—Tá ñatavún yiquí cuñu Jesús ña ñasandacaan ini cáva yóho, caxi tũhún xihín i ndájá ñasacún ña já ná cũhun i ndiquehe e ña —ñacachi María.

¹⁶ Anda já ñacachi Jesús já xihín ña:

—María.

Anda já ñacava nuú ña já ñandicuni ña Jesús ta ñacahan ña tũhun hebreo xihín á já ñacachi ña já:

—Raboni —mé tũhun yóho cóú cachi a maestro.

¹⁷ Já ñacachi Jesús já xihín ña:

—A tíin tuún yehe. Jáchí a ñáha toho ndindita i cũhun i indivi ñu ín Ndióxi, tátá i. Joo cuáhán caxi tũhún xihín ña cóú cuéntá mí i ña cũhun i ñu ín Ndióxi, tátá i, mé a cóú tátá mé ndó viti. Cóú á Ndióxi ñu mí i ta cóú ri a Ndióxi ñu mé ndó —ñacachi Jesús.

¹⁸ Anda já ndáva María, ña ñuu Magdala ñasahan ña ñandicani ña nuú ña ñaxica tuun xihín Jesús cán ña ñaxini ña mé á. Ta ñandicani ña ña ñacachi Jesús xihín ña.

Tá ñaxini ña ñaxica tuun xihín Jesús mé á

(Mt. 28:16-20; Mr.

16:14-18; Lc. 24:36-49)

¹⁹ Ta tá ñacuaá mé quívi domingo cán já ñanditútú tóco ndihí ña ñaxica tuun xihín Jesús cán. Núhu tuun na ini vehe ta ñachicaji tuun ña yéhe jáchí yíhví ña xinu ña Israel cán tiin ñahá ña. Ta in cuití ñaxinu coo Jesús ñu ná ta ñandaca ndichi a mahnú ndaa ñu ndúu ña cán. Já ñacahan Ndióxi a xihín ná já ñacachi a já:

—Ná coo vaha ini ndó —ñacachi a.

²⁰ Ta tá ñacachi a ña yóho já najánaha ndáha á xihín yicá ndíca a ñu ná ña ná candaa ini na ña jivi cóú mé á. Ta ñacajii íní ña tá ñaxini na a. ²¹ Tá ñandihí já ñacachi tucu Jesús já xihín ná:

—Ná coo vaha ini ndó. Tá quiahva ñacaja Ndióxi, tátá i ñachindahá a yehe ñuyívi yóho quiahva já chindahá ri yehe va ndohó cũhun ndo caxi tũhun ndó xihín ñayivi saha mí i —ñacachi Jesús.

²² Anda já ñativi a ñu ná já ñacachi a já xihín ná:

—Ndiquehe ndó ínima yii Ndióxi.

²³ Ta tá ná caja cáhnu ini ndó saha cuachi ñayivi, ña cán cóú ña sa ñacaja cáhnu ini Ndióxi saha. Ta tá ná a caja

cáhnú ini ndó sahá cuachi, na cán cúú na coo nacaja cáhnú ini Ndióxi saha — nacachi Jesús.

Tá naxini xihín nuu Tomás Jesús

²⁴ In táhan da naxica tuun xihín Jesús, da naní Tomás, da cáhan na cuatí xihín cán, coo toho da nasahiin xihín na cán tá naquixi Jesús nu ndúu na. ²⁵ Tá nandihí já naxaxi tuhun na java cán xihín dá já nacachi na já:

—Naxini nde Jesús, xitoho í —nacachi na.

Já nanducú ñehe Tomás tuhun nu ná já nacachi da já xihín ná:

—A cándusa toho í ña cáhí ndo jan-da quiahva ná cuni xihín nuú í ndáha Jesús ta já jáquihvi í nducu ndahá í ini yávi nuú naquihvi clavo nacaja na cán. Ta xíní ñúhú jáquihvi í nducu ndahá í ini yávi nacaán na yicá ndíca a cán. Anda jávi cándusa í ndohó —nacachi da.

²⁶ Tá nayaha una quivi já nandique táhan tucu na naxica tuun xihín Jesús cán ini in vehe. Ta mé tañu já nasahiin Tomás xihín ná. Ta quiahva já nasaji tuun tucu na yéhe vehe nu ñúhu na cán. Anda já in cuítí naxinu coo Jesús nu ná ta nandaca ndichi a mahñú na cán ta nacahan Ndióxi á xihín ná já nacachi a já xihín ná:

—Ná coo vaha ini ndó —nacachi a.

²⁷ Tá nandihí já nacachi a já xihín Tomás:

—Naha quí jáquihvi nducú ndáhun ini ndahá í ta candehé ini ndahá í nuú naquihvi clavo. Ta jáquihvi nducú ndáhun yicá ndíca í já ná cunún nuú najándicuehe na yehe. A cáhvi ivi joho inún jáchi xíní ñúhú cándúsún yehe — nacachi Jesús.

²⁸ Anda já nacatontó Tomás já nacachi da já:

—Mé ndó cúú xitoho í ta cúú ndó Ndióxi ña cája cáhnú í —nacachi da.

²⁹ Anda já nacachi Jesús já xihín dá:

—Mé a ndaa cándúsún yehe viti jáchi naxinún yehe. Joo caji ini ñayivi, na cándusa yehe vatí coo í xíní na xihín nuu ná —nacachi Jesús.

Cáhan Juan ndá sahá nacahyí da libro yóho

³⁰ Cuahá ndivaha java ga ña xitúhún nacaja Jesús nuú na naxica tuun xihín a cán vatí coo ná cahyí a nu libro yóho.

³¹ Joo ña yóho nacahyí a já ná cándusa ndó ña cúú Jesús da naxindahá Ndióxi cacomí cuéntá sahá ñayivi, mé a cúú in túhún jini já jahyi Ndióxi. Ta sahá ña cándeé ini ndó mé á cuu catacu ndó anda ama cáa quivi.

Náha Jesús mé á nuú usa táhan na naxica tuun xihín a cán

21 Tá sa nayaha ña yóho já nanaha tucu Jesús mé á nuú na naxica tuun xihín á nani nasanduu na yati yuhú tañuhú naní Tiberias cán. Ta quiahva joho nasahiin a. ² In tañu ndúu tútú Simón Pedro xihín Tomás, da cáhan na cuatí xihín cán. Ta jári ndúu Natanael, da ñuu Caná cuéntá Galilea cán xihín ndívi da cúú jahyi Zebedeo cán. Ta nasanduu ri inga ivi ga táhan da naxica tuun xihín Jesús. ³ Anda já nacahan Simón Pedro xihín tóco ndihí na cán já nacachi da já xihín ná:

—Cuhun í tavá í tiyacá —nacachi da.

—Cuhun ri ndehe va tavá nde tiyacá xuhun —nacachi na cán xihín dá.

Já nandihvi ndihí na ini barco cuahan na tavá na tiyacá. Joo coo tiyacá natavá na mé ñuú cán. ⁴ Ta tá sa cuahan ndúcú tivi já nacanaha Jesús yuhú ticuí cán. Joo na naxica tuun xihín a cán coo xíní na ña cúú á Jesús. ⁵ Anda já nacayuhú Jesús ndáca tuhún á na já nacachi a já xihín ná:

—Á coo toho tiyacá natavá ndo, ñani —nacayuhú a.

—Coó mé rí ná tavá nde —nanducú ñehe na tũhun nu á.

⁶ Anda já ñacachi tucu Jesús já xihĩn ná:

—Jácana tucu ndó ñũnu ndó chí xoo cuáha barco jan já tavá ndó rĩ —ñacachi a.

Anda já najácana na ñũnu ná cán xoo cuáha barco ta tá nandihĩ chí co ndéé na tavá na ñũnu cán jáchi a juú quiahva ñachutú ndaa ña xihĩn tiyacá. ⁷ Anda já nandicahan yehe, da quĩhvi ndivaha ini mé a cán já ñacachi i já xihĩn Pedro:

—Cúu á Jesús, xitoho í —ñacachi i.

Tá ñaxini johõ Simón Pedro ña cúu a cán Jesús já nandicandixi da cotó da jáchi coó toho cotó da ndíxi da, nduu. Tá nandihĩ já ndáva da cuahan da jítá da ticuĩf chí yuhú tañuhú cán. ⁸ Tá nandihĩ já ñaxinu coo java ga na ñaxica tuun xihĩn Jesús cán xihĩn barco na chí yuhú tañuhú já ñũhu na ñũnu ñachutú xihĩn tiyacá cán nasaa na janda yũhu. Jáchi tá-tũhun in ciento metro nasandichi barco na yuhú tañuhú cán tá ñatavá na tiyacá.

⁹ Tá ñaxinu coo na cán nu ñũhu já ñaxini na cáyi ñũhu. Ta ñaxini na cánuu in tiyacá yáta rí nu ñũhu cán. Ta ñaxini na ña sa ín pan cuxu na viti. ¹⁰ Anda já ñacachi Jesús já xihĩn ná:

—Taxi ndó java tiyacá, rí jacá ñatavá ndó jan —ñacachi a.

¹¹ Anda já ndáva Simón Pedro nasahan da ñandaa da jata barco cán já ñũhu da ñũnu, ña ñachutú ndaa xihĩn tiyacá náhnu cán, ñaxinu da janda yũhu. Ta nasacu rí in ciento ivi jico sahun uni. Ta vatĩ cuaha ndivaha cúu rí coó ñatahnda ñũnu nuú nasañuhu rí cán. ¹² Anda já ñacachi Jesús já xihĩn ná:

—Naha ndó cajini ndó —ñacachi a.

Ta ni in túhũn na cán coó nasahan ndéé ini na ndaca tũhũn na yo cúu mé á. Jáchi sa ñacandaa cáxi ini na ña cúu á Jesús, xitoho na. ¹³ Tá nandihĩ já ñatiin Jesús pan cán já nasahnda java ña já

nasahan ña nu ná. Ta quiahva já ñacaja ri a xihĩn tiyacá va, nandicahnda rĩ já nasahan rí nu ná.

¹⁴ Xihĩn ña yóho ñaxinu uni tañu ña-ñaha Jesús mé á nuú na ñaxica tuun xihĩn á janda naní nanditacu tucu a.

Cáhan Jesús xihĩn Simón Pedro

¹⁵ Tá nandihĩ ñaxijini na já ñandaca tũhũn Jesús Simón Pedro já ñacachi a já xihĩn dá:

—Simón, da cúu jahyi Jonás á quĩhvi ini chágũn yehe a juú ga na java yóho —ñacachi a.

Já ñacachi da cán já:

—Mé ndó cúu ndó xitoho i ta sa xini vaha ndó ña quĩhvi ini i ndohó —ñacachi da.

Já ñacachi Jesús já xihĩn dá:

—Xini ñũhú candaa vahũn na cúu cuénta mí i tá quiahva ndaa vaha pastõ ndicachi válĩ jana dá —ñacachi a.

¹⁶ Anda já ñacachi tucu Jesús já xihĩn dá:

—Simón, da cúu jahyi Jonás, á quĩhvi inũn yehe —ñacachi a.

Anda já ñacachi da já xihĩn á:

—Mé ndó cúu ndó xitoho i ta cándaa vaha ini ndó ña quĩhvi ini i ndohó —ñacachi da.

Já ñacachi Jesús já xihĩn dá:

—Xini ñũhú candaa vahũn na cúu cuénta mí i tá quiahva ndaa vaha pastõ ndicachi jana dá —ñacachi a xihĩn dá.

¹⁷ Anda já ñandaca tũhũn tucu a da táhnda uni já ñacachi a já xihĩn dá:

—Simón, da cúu jahyi Jonás, á mé a ndaa quĩhvi inũn yehe —ñacachi a.

Tá ñaxini mé Simón Pedro cán ña ñaxinu uni táhnda ndaca tũhũn Jesús da sahá ña yóho já ñacacuéha ini da já ñacachi da já xihĩn Jesús:

—Jesús, mé ndó xini vaha ndó tóco ndihĩ ñaha. Mé ndó xini vaha ndó ña quĩhvi ini i ndohó —ñacachi da.

Já ñacachi Jesús já xihĩn dá:

—Xíní ñúhú candaa vahún na cúú cuéntá mí i tá quiahva ndáá vaha pastó ndicachi jana dá. ¹⁸ Jáchí mé a ndaa ná cahan i xuhun. Tá nasacuún taa yúta chá já ndicandisún jáhmun ña cúnun ta já cuahún ndá nu cúní mún cuhun. Joo tá ná cayatún já jácaún ndáhun ta inga na jácandixi yohó jáhmun. Ta já tiin ndaa na yohó cuhún xihín ná nuú co cúní mún cuhun —nacachi a.

¹⁹ Xihín ña yóho cúní Jesús ndicani a nu Pedro cán ndá quiahva quivi da ña ná caja cáhnu da Ndióxi. Tá nandihí já nacachi Jesús já xihín dá:

—Xíní ñúhú candicún yehe —nacachi a.

Ndáca tühún Pedro saha Juan nu Jesús

²⁰ Nani xíca na cásahan na xihín Jesús já nandicoto nihni Pedro chí jata dá já naxini da tácaa Juan vaxi da. Mé Juan yóho cúú dá da quíhvi ndivaha ini mé Jesús. Ta sa mé Juan yóho cúú yehe, da nasahjin coo jijn á tá naxijini na vicó pascua. Ta cúú yehe, da nandaca tühún mé á saha ndá da cúú da jicó tühún ñahá.

²¹ Tá naxini Pedro ndico da yóho jata ná

já nandaca tühún da Jesús já nacachi da já xihín á:

—Ta ndaja coo Juan yóho, xitoho i. Ndaja quivi da —nacachi Pedro.

²² Anda já nanducú ñehe Jesús tühun nu dá já nacachi a já xihín dá:

—Tá cúní yehe ña ná catacu da janda quiahva ná xinu coo quiví ndicó coo i ñuyiví yóho, co ndítahan toho ndihi inún sahá. Na ndítahan cajún queá candicún yehe —nacachi a.

²³ Ta sahá ña nacachi Jesús ña yóho sahá ña cán queá nandicuíta nuu tühun tañu tóco ndihi na naxica tuun xihín Jesús cán. Ta cáhí na sahá i ña a quiví toho i. Joo a juú toho ña yóho queá cúní Jesús cachi a xihín ná. Na nacachi Jesús queá tá cúní mé á catacu u janda quiahva ná ndicó coo mé á, co ndítahan toho ndihi ini Pedro sahá ña cán.

²⁴ Ta jivi mé da cahan na saha cán cúú yehe, da cáhyí tóco ndihi ña yóho. Ta tóco ndihi na xini na ña cúú á ña ndaa.

²⁵ Cuahá ndivaha nuú ñaha nacaja chága Jesús. Tá ná cacu ini i cahyí i tá in tá in ña nacaja mé á, cája i cuéntá a quéta toho ñuyiví yóho coo libro cahan sahá ña nacaja mé á. Já ná coo.

Tuhun vaha naçahyí Lucas sahá ña naçaja na apóstol

Nasahan Jesús tuhun a quixi ínimā yíi Ndióxi

1 Jihna sa naçahyí i in libro ña ná candoo a nu ndóhó, tá Teófilo. Mé libro cán cahan ndihi a sahá ña najánaħa Jesús ta cáhan ndihi a sahá ña najánaħa mé á tá naçasáħá cája chúun a ² ta janda tá nandaa cuahan indiví. Tá nasahin a ñuyívi yóho ta cámaní cuħun a indiví já naçaxi Jesús uxu ivi dataa cacuu da apóstol ña ná caja chúun na cuéntá mé á. Ta naçaja ínimā yíi Ndióxi ña ná cuu jánaħa Jesús nuú na cán ña ndítahan nu ná caja na.

³ Ta tá sa naçihí Jesús ta nanditacu tucu a já naçica nuu a ñuyívi yóho tixi ivi jícó quivi. Ta nanaħa mé á nuú ndihi na cúu apóstol já ná candaa ini na ña mé a ndaa nanditacu tucu a. Ta najánaħa nu ná ña cúní Ndióxi cacomí a cuéntá sahá ñayivi.

⁴ Tá cámaní ndaa Jesús cuħun a indiví já nasahin a xihín na apóstol já nasahnda mé á chuun nu ná já cáhí a já xihín ná:
—Xíní ñúhú candati ndó ñuu Jerusalén yóho anda quiahva xinu ínimā yíi Ndióxi cañuhu a ini ínimā ndo. Jáchi nasahan tátá i tuhun a nu ndo ña quixi ínimā yíi mé á ndacaan ini ínimā ndo ña cán queá najánaħa i ndohó ña naçachi mé á. ⁵ Mé a ndaa najácandúta Juan ñayivi xihín ticuí joo tixi chá quivi jándicutú Ndióxi ndohó xihín ínimā yíi mé á —cáhi Jesús xihín ná.

Tá nandaa Jesús cuahan indiví

⁶ Ta ndaja coo tá nataca na cán xihín Jesús já naçasáħá ndaca tuhún na mé á já cáhí na já xihín á:

—Jesús, xitoho nde, á viti queá quiahva ndó ñamaní nuú nde, na Israel

cacomí nde cuéntá saħa mé nde já ná a cacomí ga gobierno ñuu Roma cuéntá sahá nde —naçachi na xihín á.

⁷ Anda já nanducú ñehe Jesús tuhun nu ná já naçachi a já:

—Coo ndítahan toho nu ndóhó candaa ini ndó ndá quivi caja Ndióxi, tátá yo ña jan. Jáchi in tuhún mé á cuití va queá xíní a ndá quivi yaha ña sáħndá mé á coo. ⁸ Joo ndítahan nu ndó candati ndó yóho anda quiahva ná quixi ínimā yíi Ndióxi cañuhu a ini ndó. Já ná nduu ndeé ini ndó ña ná cuu jánaħa ndó nuú ñayivi sahá i. Anda já ndítahan nu mé ndó cahan ndó sahá i ñuu Jerusalén yóho xihín estado Judea xihín estado Samaria. Anda já quee ndó cuħun ndó cuahá ñuu xícá ní cúu ñuyívi jánaħa ndó nuú ñayivi cán saħa mí i —naçachi Jesús xihín ná.

⁹ Tá nandihí naçahan Jesús ña yóho xihín ná ta nani sáñdehé cáxi na cán nu Jesús ndíta na já nandaa cuahan indiví. Já naxinu in viço naçijahvi ñahá a chí coo naxini ga na mé á. ¹⁰ Ta nani ndíta na cán sáñdehé na nuú nandaa Jesús cuahan indiví já nandicoto nihni na ta sa ndíta ivi ta ndíxi jahmá yaa jin ná. ¹¹ Já naçachi da já xihín ná:

—Taa Galilea, ndávaħa sáñdehé ndó indiví nuú nandaa Jesús cuahan. Jáchi tá quiahva naxini ndó nandindita cuahan indiví quiahva já cuni tucu ndó a ndicó coo tucu a ñuyívi yóho —naçachi ndívi da cán xihín ná.

Naçaxi na Matías caja da chuun ña najándacoo Judas

¹² Tá nandihí nandaa Jesús cuahan indiví já naquee na apóstol yucu naní yitó olivo cán já nandicó coo na ñuu Jerusalén. Ta mé yucu cán cáñdo a tá tuhun in kilómetro jatá ñuu Jerusalén. ¹³ Tá naxinu coo na ñuu Jerusalén cán já nandaa na vehe cánúu jícó jáchi mé vehe cán nasanduu tóo na. Tóco ndihi na

nasanduu cán nasacuu Pedro xihin Jacobo xihin Juan xihin Andrés xihin Felipe xihin Tomás xihin Bartolomé xihin Mateo xihin Jacobo, da cúu jahyi Alfeo xihin Simón, da naxica cuénta cananista xihin Judas, da cúu ñani Jacobo. ¹⁴ Níi tiempo nasatata ndíhuxu in na yóho xihin ñani Jesús xihin María, náná Jesús xihin java ga najihí caca tahví na nu Ndióxi.

¹⁵ Ta ndaja coo in quivi natata tátuhun in ciento oco na cúu cuénta Jesús. Já nandichi Pedro mahñú na cán ta já nacachi da já xihin ná:

¹⁶ —Candehé ndo, ñani i, na cúu cuénta Jesús. Nasahin tá in nacachi ínimayii Ndióxi coo. Jáchi nacaja Ndióxi ña ná cahan rey David ini tuhun mé á saha Judas, da nasandaca na natiin Jesús ñéhe na a cuahan na veca. ¹⁷ Mé Judas yóho nasacuu da da naxica xihin yo ta nacaja chuun da cuénta Jesús xihin yo.

¹⁸ Joo najicó tühún da Jesús ta naquehe da juhún saha ña núu nacaja da. Ta xihin juhún cán naxeen da in ñuhu. Ta tá nandihí já najándicava ndayi da mé dá ta nandata tixi da chí nacana cuyu ndihí xiti da. ¹⁹ Tá nañehé ñayivi ñuu Jerusalén tuhun ña sa naxihí Judas cán já nacinúu na quivi mé ñuhu naxeen da cán cananí a Acéldama. Mé tuhun cán cúní cachi a yójo nuú naxita nii jáchi cán naxita nii Judas tá naxihí da. ²⁰ Jáchi já cáhí in Salmo ndácaan ini libro yii Ndióxi tá nacahan saha Judas já cáhí a já:

Ná candoo ndáha vehe da,
ta ni in ñayivi ná a canduu ga ini a.
Ta sa mé cán ndácaan inga tucu Salmo ta cáhí a:

Inga tucu da ná ndicojo chuun nasandojo da, cáhí tuhun Ndióxi.

²¹ Andá já nacachi tucu Pedro já xihin ná:

—Tañu mí yóho ndúu java na naxica nuu xihin yo tá naxica í xihin Jesús,

xitoho í nani nasahin a ñuyiví yóho. ²² Java na yóho nasanduu na xihin yo tá najácandúta Juan Jesús xihin ticuí ta nasanduu na xihin yo janda quiahva nandaa Jesús cuahan indiví. Ña cán quea ndítahan nu yó caxí in da tañu na yóho já ná caca da xihin yo caxi tuhun da nuú ñayivi ña nanditacu tucu Jesús — nacachi Pedro xihin na cán.

²³ Sahá ña cán quea nacana ivi da tañu ñayivi cán. Andá já nasacu ini na caxi na in da tañu ndívi da. In da nacana na cán nasananí José ta naní tucu da Barsabás ta inga tucu quivi dá nasacuu Justo. Ta da inga cán nasananí Matías. ²⁴ Andá já naxica tahví ndihí na cán nu Ndióxi já nacachi na já:

—Tátá Ndióxi, sa xini ndó ndía cáhvi ini tóco ndihí ñayivi. Ña cán quea caja ndó ñamaní jánahá ndó nuú nde ndá da cúu da sa nacaxi ndó ²⁵ cacuu apóstol ña ná caja da mé chuun ña najándacoo Judas. Mé Judas nacaja da cuachi cáhnu nu ndo ña cán quea viti in da nu ndítahan nu dá coo da —nacachi na xihin Ndióxi.

²⁶ Andá já nasajiquí na ndá da cuu quee vaha. Naquee vaha Matías chí nandique táhan da xihin na uxu in apóstol cuénta Jesús cán.

Tá nanuu ínimayii Ndióxi játá na cúu cuénta Jesús

2 Tá naxinu coo quivi coo víco Pentecostés já nanditaca ndihí na cúu cuénta Jesús ndúu tütú na ini in vehe. ² In cuití naxini johó na in a ñhi naquixi a chí indiví. Tá quiahva ñhi xícó tachí ndeé quiahva já ñhi a naquixi a. Ta já naxini johó ndihí na ndúu coo vehe cán ña. ³ Andá já naxini na in ñaha ña cáa tá quiahva cáa ñuhú ita. Andá já nanditahnda ña nasandójó a jini in in na cán. ⁴ Ta naxutú ndaa ínimayii ndihí na cán xihin ínimayii Ndióxi. Chí nacasáhá nandicahan na tuhun, ña coó nasatihva na jáchi já nacaja ínimayii Ndióxi.

⁵Mé tiempo já nasanduu java na Israel, na cája cáhnu Ndióxi ñuu Jerusalén cán. Mé na Israel yóho naquixi na ndijáa ñuu jatá ñuyiví. ⁶Tá naxini joho na cán ña níhi xójo cúu cán já ñacasáhá ndítaca na. Joo tá naxinu na nu ndúu na cúu cuéntá Jesús cán já ñacatóntó na jáchi naxini joho na cáhan na cúu cuéntá Jesús cán mé tuhun cáhan na vatí co cúu ná na ñuu na. ⁷Chí ñacatóntó ndivaha na cán já ñacasáhá ndítúhún xihin táhan na já cáchi na já:

—Tóco ndihi na cúu cuéntá Jesús yóho cúu ná na naquixi estado Galilea. ⁸Ndá cuéntá queá cáhan na tuhun cáhan in in mí. ⁹Jáchi sa jíin sa jíin ñuu naquixi mí. Java í naquixi nación Partia ta java í naquixi nación Media ta java í naquixi nación Elam ta java í naquixi nación Mesopotamia ta java í naquixi estado Judea ta java í naquixi estado Capadocia ta java í naquixi estado Ponto ta java í naquixi estado Asia ¹⁰ta java í naquixi estado Frigia ta java í naquixi estado Panfilia ta java í naquixi nación Egipto ta java í naquixi ñuu cuéntá Africa, ña xicá chága a juú ga ñuu Cirene. Ta ndúu java ñayivi naquixi ñuu Roma yóho. Ta java na cán cúu ná na naquixi chichi Israel ta java na co cúu ná na naquixi chichi Israel joo cája cáhnu na Ndióxi, mé a cája cáhnu mí. ¹¹Ta sa mé yóho ndúu java ñayivi naquixi nación Creta xihin nación Arabia. Ta xini joho ndihí cáhan na cúu cuéntá Jesús yóho tuhun cáhan in in mí. Ta cáhan na sahá ñaha xitúhún cája Ndióxi xihin ná —cáchi ndihi na sánehé cán.

¹²Ta chí co xini na ndúu sánehé cán ndíá cahán na sahá na cúu cuéntá Jesús cán. Jáchi ñacatóntó ndivaha na janda ndáca tuhún táhan mé ná ndúu na já cáchi na já:

—Ndíá cuni cachi ña cája na yóho.

¹³Joo java na ndúu cán ñacasáhá sácu ndaa ñahá na já cáchi na já:

—Na xíhi va cúu na yóho.

Cáhan ndojó Pedro nuú ñayivi

¹⁴Anda já nacandichi Pedro xihin ndihuxu in ga na apóstol cán já ñacasáhá cáhan cóho da xihin tóco ndihi na cán já cáchi da já:

—Cuni joho vaha ndó ña cáhan i xihin ndó, ñayivi Israel, na estado Judea xihin ndihi ndó na tóho ndúu ñuu Jerusalén viti. ¹⁵Mé ndó cáhan ndo ña naxini tóco ndihi ñayivi ndúu yóho. Joo co cúu ná na naxini jáchi jacá caa in naha va queá. ¹⁶Ña cája na yóho queá nacachi da naní Joel sanahá tá nacahan da xihin ñayivi ña ndítahan coo. Mé da cán cúu da nacachi ña cáchi Ndióxi coo já nacachi da já:

¹⁷Tá sa nacayati quiví ndihi saha ñuyiví yóho já cáchi Ndióxi já:

“Chindahá i ínima yii mí i cañuhu a ini tóco ndihi ñayivi.

Ta tóco ndihi jahyi yii ndo xihin jahyi jíhi ndo caxi tuhun na xihin ndó tuhun cahán i xihin ná.

Ta na tacú cuni ndímáhnú na ñaha ñaha i nu ná.

Ta na yatá quixi sani nu ná caja i.

¹⁸Ta mé tiempo já chindahá i ínima yii mí i ña ná cañuhu a ini na cája chúun cuéntá mí i, á cúu ná ña á cúu ná ñaha.

Ta caja i ña ná cahán na sahá i nuú ñayivi.

¹⁹Ta cuhá ndivaha ña náhnú caja i indivi xihin ñuyiví ta cuni ñayivi ña.

Cuni na nii xihin ñuhú cáyí xihin ñihma ña ndindita tátuhun víco núhu.

²⁰Ta canaa nuú candii ta ndicuáhá nii nuú yoo.

Ña yóho cacuu ña yaha tá sa nacayati quivi xinu yehe, mé á cúu xitoho na caja víi i sahá ñayivi ñuyiví.

Mé quivi cán cacuu a in quivi cáhnu ndivaha.

²¹ Joo cacu ndaa ínimā tóco ndihi nā ná ndicahán quiví i”, ñacachi Ndióxi ini libro ñacahyí Joel sanahá —ñacachi Pedro.

²² Andā já ñacachi tucu Pedro já:

—Cuni johō vaha ndó tūhun cáhan i xihín ndó, nā Israel. Jáchi cáhan i saha Jesús, mé a ñaquixi ñuu Nazaret. Jáchi ñatahan ini Ndióxi xihín tóco ndihi ñaha ñacaja mé Jesús. Ta ñaxini xihín ñuu ndó ña náhnu xihín ña xitúhún ñacaja mé á nū ndó xihín ndée nasahan Ndióxi nū a. Ta sa cándaq vaha ini mé ndó ña yóho.

²³ Joo tá ñatiin ndó Jesús já najáxinu coo ndó ña ñasacu ini Ndióxi coo sanahá ndivaha. Ta mé ndó ñandiquiahva ndó Jesús ndáha ña quini. Ta ñacaja ndó ña ná cata caa na Jesús ndíca crúxu. ²⁴ Joo najánditacu Ndióxi Jesús já ná a cóo a nū ndóho ini nā sa ñaxihí jáchi ni in ñaha a cúu caja ña ná coo Jesucristo nū ndúu nā sa ñaxihí. ²⁵ Sanahá ndivaha ñacahyí rey David sahá Jesús já ñacachi da já:

Xíní vaha i ña ní tiempo íin ndó xitoho i, xihín i, ta íin ndó xoo cuáha i chindeé ndó yehe sahá ña cán queá co yíhvi toho i.

²⁶ Sahá ña cán queá ñacajii ndivaha ini i,

ta ñacahan vatá ndivaha i.

Jáchi vatí ná quiví i cacuu u ndii joo coo vaha ini i.

²⁷ Jáchi caja ndó ña ná nditacu tucu u já ná a cándoō nahá ínimā i nū ndúu ínimā ndii.

Ta ni a quiáhva toho ndó ñamaní tahyí yiquí cuñu i jáchi cúu u jahyí máni ndó.

²⁸ Najánaha ndó nuú i ndaja caja i ña cúní ndó.

Jáchutú ndaa ndó ínimā i xihín ña cájii ini i jáchi já íin va ndó xihín i, ñacahyí David sanahá ndivaha —cáchi Pedro xihín nā ndúu cán.

²⁹ Andā já ñacachi tucu Pedro já xihín ná:

—Candehé ndó, ñani i ná ndicani i nū ndó ña cúní cachi ña yóho. Sa cándaq cáxi iní ña sa ñaxihí David, da ñasacuu tásáhnu jícó yo. Ta najánduxu nā da ta íin yii va nuú najánduxu nā da. ³⁰ Ñacachi David ña yóho jáchi ñasacuu da profeta. Jáchi mé Ndióxi queá nasahan tūhun a nū dá ta ñacachi a xihín dá ña quixi Jesucristo chichi mé dá ta ñacachi a ña cacomí mé Jesucristo cán cuéntá sahá ñayivi Israel. ³¹ Sa ñacandaq ini David ña caja Ndióxi chí nū sahá ña cán queá ñacachi da xihín ñayivi ña nditacu tucu Jesús tá ñandihí quiví a. Ta ñacaxi tūhun David nū ná ña a jándicoo toho Ndióxi ínimā Jesús nū ndúu ínimā ndii ta ni a quiáhva toho mé á ñamaní tahyí yiquí cuñu mé Jesús cán. ³² Ta viti cándaq iní ña ñaxinu tūhun ñacahyí David jáchi ñaxini tóco ndihí ña najánditacu Ndióxi Jesús. ³³ Ta najándindita cáhnu ndivaha Ndióxi Jesús ta ñasacu a ña xoo cuáha mé á. Ta nasahan Ndióxi ínimā yii mé á nū Jesús jáchi ña yóho cúu tūhun nasahan Ndióxi sanahá. Ta tóco ndihi ña ñaxini ndó xihín ñuu ndó ta ñaxini johō ndó yóho cúu á ña ñaquixi cuéntá Ndióxi. ³⁴ Ta sa xíní yo ña co cáhan David saha mé dá jáchi a juú David cúu da ñandaa indiví, vaha. Sa mé David cúu dá da ñacachi tūhun yóho:

Ñacachi Ndióxi xihín xitoho i:

“Naha xoo cuáha jiiñ i cacotín,

³⁵ janda quiahva ná cacu u ña cándají yohó tixi sahun”, ñacachi Ndióxi —já ñacahyí David sanahá.

³⁶ Andā já ñacachi tucu Pedro já:

—Ña cán queá cúní ña ná candaq ini tóco ndihi ndó ña cáhan i xihín ndó, nā Israel. Mé Jesús, mé a ñacata caa ndó ndíca crúxu ñandaja Ndióxi ña ná nduu a xitoho ñayivi. Ta ñandaja Ndióxi ña ná nduu a ña ñachindahá mé á cacomí cuéntá sahá ñayivi —ñacachi Pedro xihín nā ndúu cán.

³⁷ Tá naxini joho na cán ña ñacachi Pedro xihin ná ivi laá natahvi ini na já ñacashá ndáca tuhún na Pedro xihin java ga na apóstol cán já cáchi na já xihin ná: —Ndía ndítahan caja nde, ñani, na cúu cuéntá Jesús.

³⁸ Anda já ñanducú ñehe Pedro tuhun nu ná já cáchi da já xihin ná:

—Xíní ñúhú ndicó coo ini ndó ta jándi-coo ndó cuachi cája ndó ta candúta ndó cuéntá Jesucristo já queá ná caja cáhnu ini Ndióxi sahá cuachi ndó ta já ñehe táhvi ndó quiahva Ndióxi ínima yii mé á nu ndo. ³⁹ Jáchi nasahan Ndióxi tuhun a caja ña jáchutú ndaa ínima ndo xihin ínima yii mé á ta quiahva já caja ri a xihín jahyi ndó ta jári xihín na tóho, na ndúu xíca. Jáchi já caja mé á xihín ñayivi ñacaxi mé á —ñacachi Pedro xihin ná.

⁴⁰ Ta cuahá ndivaha java ga tuhun ñacahan Pedro xihin ná ta já najácahan da na já ñacachi da já xihin ná:

—Candéé ini ndó Jesús já ná jácacu a ndohó já ná a cühun ndó indayá nuú cühun ñayivi cája cuachi —ñacachi Pedro xihin ná.

⁴¹ Cuahá ñayivi ñandiquehe vaha na tuhun ñacahan Pedro ta ñacandéé ini na Jesús. Ta mé quivi já ñacandúta tátuhun uní mil ñayivi já ñandihvi na íchi cuéntá Jesús. Ta ñandique táhan na cán xihín java ga na cúu cuéntá Jesús. ⁴² Ta ndinuhu ini na jácuaha na ña jánaħa na apóstol nu ná. Ta cándúsa táhan tóco ndihi na ta ndítutú na xíca tahvi na nu Ndióxi. Ta níí tiempo sá taca na ndicahnda java táhan na pan cuxu na.

Ña ñacaja ñayivi tá ñacashá na ndicó na íchi cuéntá Jesús

⁴³ Mé tiempo já nasahan Ndióxi ñamaní nuú na apóstol cán ña ná cuu caja na cuahá ndivaha ñaha xituhún xihín cuahá ña náhnu ndivaha ta chí cátontó tóco ndihi ñayivi tá xíní na ña yóho. ⁴⁴ Ta tóco ndihi na cúu cuéntá Jesús cán

in ñanduu ndihi na ta ndicahnda java ñaha nu táhan na. ⁴⁵ Ta jícó na ñaha cómi na ta já ndicahnda na jiuhún na nuú na ndímaní ñaha nuú. ⁴⁶ Ta ndijáá níí quivi ndítutú na cája cáhnu na Ndióxi veñuhu cáhnu ndácaan ñuu Jerusalén cán. Ta tá ndíque táhan na vehe já ndicahnda java táhan na pan cuxu na ta cávatá ndivaha xihín táhan na cája na já. Ta ni in na co ndíñehe jícó mé. ⁴⁷ Na caja cáhnu na Ndióxi ta tóco ndihi ñayivi ndúu ñuu Jerusalén ín vaha ini na xihín na cán. Ta nini quivi ñacaja Ndióxi ña ñandicuhá na cúu cuéntá Jesús, mé na jácacu ndaa Ndióxi ínima.

Ndivaha in ña réncó cája Pedro

3 In quivi tátuhun caa uní sahini cuahan Pedro xihín Juan veñuhu cáhnu Jerusalén cán. Mé hora já táca ñayivi cuahan na veñuhu caça tahvi na nu Ndióxi. ² Ta mé yuyéhé ñuhu cán ín coo in da ñaxihí tuchu saħa. Ta janda tá ñacacu da cáa da já. Ta ndijáá níí quivi ñehe na da cuahan da yuyéhé ñuhu cáhnu naní yéhé ñúchí. Ta cán ín coo da sáti da nuú ñayivi ndíhvi ini veñuhu cán. ³ Ta tá naxini da réncó cán cuahan quíhvi Pedro xihín Juan ini veñuhu cán já ñacata ñee da ndáħa dá nu ná sáti da. ⁴ Anda já ñandicoto nihni Pedro xihín Juan nuú da réncó cán já ñacachi Pedro já xihín dá:

—Candéhé nuú nde.

⁵ Anda já nasandehé cáxi da cán nu ná jáchi cáhán da quiahva na jiuhún nu dá. ⁶ Joo já ñacachi Pedro xihín dá já:

—Coó toho jiuhún i quiahva i nuun joo ña ín nuú i ña cán quiahva i nuun. Ín ndivaha ndéé Jesucristo, mé á ñuu Nazaret sahá ña cán queá sahnda i chuun nuun ña ná candichún cacún —ñacachi Pedro xihín dá.

⁷ Anda já ñatiin Pedro ndahá cuaha da cán ta ñandíñehe da da já ñacandichi da chí ivi laá ñandihvi ndéé saħa

dá já nanditacu tũchu saha dá. ⁸Anda já nacandita mé da nasahiin réncõ saha cân já nacandichi da ta já nacasáhá da xica da. Cándita da cája cáhnu da Ndióxi nandihvi da xihĩn ná ini veũhu cân. ⁹Ta tóco ndihi ñayivi ndũu cân naxini na cándita da cája cáhnu da Ndióxi. ¹⁰Ta a juú quiahva nacatontó na ta nayihví na sahá ña naxini na cân. Jáchi nandicuni na da cân cúu da da nasacuu réncõ, da nasahiin coo sáti yéhé ñuhu naní yéhé ñúchí cân.

Cáhan ndojó Pedro nuú ñayivi ndũu yéhé ñuhu cáhnu cân

¹¹Mé da nasacuu tãa réncõ cân ñatiin tuun da Pedro xihĩn Juan ta chí co cúni da janí ñahá da. Ta tóco ndihi ñayivi nacatontó na xínu na cuahãn na candehé na da réncõ cân nu ndíta da yéhé ñuhu, ña naní yéhé Salomón. ¹²Tá naxini Pedro nacasáhá táca cuahá ñayivi nu íin da já nacasáhá cáchí da já xihĩn ná:

—Cuni johõ vaha ndó, ñayivi Israel. Cátontó ndivaha ndó sãndehé ndó ndehẽ jáchi cáhãn ndõ ña nandaja vaha nde da yóho xihĩn ndéé mé nde. Á tá coó ta cáhãn ndõ ña nandaja vaha nde da sahá ña ndicahãn ndivaha nde Ndióxi. ¹³Joo co íin toho a tá quiahva cáhãn ndõ. Jáchi mé Ndióxi, ña nacaja cáhnu Abraham xihĩn Isaac xihĩn Jacob, tásãhnu jícõ yo nandaja vaha mé á da yóho. Ta mé Ndióxi cân nacaja ña ná nduu cáhnu ndivaha Jesucristo, jahyi mé á. Joo mé ndó nandiquiahva ndó a ndahá na jutixia. Ta tá cúni Pilato janí da Jesús já nasaji nuu ndó nu dá cãja da ña. ¹⁴Mé Jesús cúu á ña yii ndivaha ta ndinuhu ña ndaa cuití va cája. Joo mé ndó nacandají ndó a ta naxicã ndó nu Pilato ña ná janí da in da sãhni ndii. ¹⁵Tá nandihí já nasahni ndó Jesús, mé a cúu cája ña ná catacu ñayivi anda ama cáa quivi. Ta vatí naxihí a nasacuu a ndii joo najãnditacu tucu Ndióxi mé á. Ta cándaã cáxí ini nde ña

cáhan nde ña ndaa xihĩn ndo. ¹⁶Ta sa mé Jesús cúu á ña cándeé ini nde. Ta sahá ña cándeé ini nde mé á sahá ña cân quẽa nandivaha da cándichi nu ndó yóho. Ta xini ndó da nandivaha yóho ta cándaã cáxí ini ndó nandihvi ndéẽ sahá dá sahá ña cándeé cáhnu ini nde Jesús.

¹⁷Candehé ndo, ñani i. Sa xini vaha nde viti ña tá nasahni ndó Jesús co nacandaã ini ndó ndíã nacaja ndó. Ta ni na cúu jefe ndõ co nacandaã ini na ndíã nacaja na. ¹⁸Joo xihĩn ña yóho najãxĩnu coo Ndióxi tũhun nasahan nu yó sa-nahá tá nacachi na profeta cuéntã Ndióxi ña ndítahan ndoho ini Jesucristo, mé a nachindahá Ndióxi cacomí cuéntã sahá ñayivi. ¹⁹Sahá ña cân quẽa xini ñúhú jándacoo ndó cuachi cája ndó ta ndicó coo ini ndó nu Ndióxi já ná jándoo mé á cuachi nacaja ndó. Anda já cãja Ndióxi ña ná ndivaha ini ndó. ²⁰Jãnda jihna nacaxi Ndióxi Jesucristo ná chindahá a ña ná quixi a ñuyiví yóho já ná cacomí a cuéntã sahá ñayivi. ²¹Ta viti íin Jesucristo indiví ndátí a tandaa quiví cãja Ndióxi ña nduu ví tóco ndihi ñaha. Já ndítahan coo jáchi sanahá ndivaha nacahan Ndióxi xihĩn na profeta mé á sahá ña yóho ta mé ná nacaxi tũhun na ña nuú ñayivi. ²²Ta ña yóho cúu tũhun nacahan Moisés nu tásãhnu jícõ yo já nacachi da já xihĩn ná: “Taũu mé ndó jan cana in profeta cãja Ndióxi, xitoho í tá quiahva nacaja mé á xihĩn mí i. Ta coto a quẽhe núu ndó ni in túhũn tũhun cáhan mé profeta jan xihĩn ndo. ²³Jáchi tóco ndihi ñayivi, na co cúni candúsa tũhun cáhan mé profeta jan ndihi sahá ná ta a ñẽhe táhvi ga na coo na xihĩn na ñuu Ndióxi”, nacachi Moisés sanahá —nacachi Pedro xihĩn ná.

²⁴Ta nacahan chága Pedro xihĩn ná já cáchí da já xihĩn ná:

—Tóco ndihi na profeta nacahan na sahá ña yãha tiempo viti. Ta profeta Samuel cúu da nacasáhá cáhan sahá ña

yóho. Ta tóco ndihi java ga na profeta naquixi tá nu ndíhí naçahan na cán saha tiempo viti. ²⁵ Náchindahá Ndióxi na profeta sanahá ña ná çaxi tuhun na xihin yo ña sahan Ndióxi tuhun a nu yó, na Israel. Naçaja vaha mé á saha yo tá naçachi a já xihin Abraham, da naçacuu tásáhu jícó yo: “Xihín ña caja na quixi chichún chí nuu já caja cuahá ndivaha i ñamaní xihin tóco ndihi ñayivi ndúu ndijáá ñuyiví”, naçachi a. ²⁶ Tá najánditacu Ndióxi Jesucristo, jahyi mé á jihna ñúhú ga nu mé ndó, na Israel nachindahá a ña já ná caja yii á ndohó já ná jándicoo ndó cuachi cája ndó —naçachi Pedro.

Ndíquehe Pedro xihin Juan saha mé dá nuú na sacuahá veñuhu

4 Ta janda cáhan chá va Pedro xihin Juan nuú ñayivi cán já naixinu java da cúu jutú xihín da sáhdá chuun nu policia veñuhu cán. Ta tañu na yóho naixinu ri na saduceo. ² Xójo ndivaha ini na jáchi jánaha Pedro xihin Juan nuú ñayivi ña sa nanditacu tucu Jesucristo. Ta xihín ña yóho náha ña vaxi quivi nditacu tucu ndii. ³ Saha ña cán queá nañiin na cán Pedro xihin Juan ta nataán na da vecaa. Ta cán naçandoo da jandá inga quiví itaan jáchi sa naçuaá va. ⁴ Joo cuahá ndivaha ñayivi naçandúsa tuhun naçahan Pedro ta xihín ña yóho nandicuaaha chága na cúu cuéntá Jesús. Jáchi na naçandúsa cán naçacuu na tá-tuhun uhun mil dataa.

⁵ Ta ndaja coo na cúu sacuahá nuú ñayivi Israel cán xihin na sacuahá veñuhu xihin na jánaha ley Moisés nandique táhan ndihi na inga quiví itaan. ⁶ Ta tañu na cán ndácaan ri da naní Anás, da cúu sacuahá nuú jutú. Ta tañu na cán naçandacaan ri Caifás xihin Juan xihin Alejandro xihin tóco ndihi na cúu na vehe na sacuahá nuú jutú cán. ⁷ Andá já natavá na Pedro xihin Juan vecaa. Ta ñehe na da cuahan na nuú nataca

na cán ta nasani ndichi na da mañnú na nataca cán ta já nandaca tuhún na da já cáchi na já xihin dá:

—Ndaja naçaja ndó nandaja vaha ndó da nasaquíhvi saha cán. Yo já nasahan ndée nu ndó ña cúu cája ndó ña yóho —cáchi na ndáca tuhún ñahá na.

⁸ Ta naçaja Ndióxi ña ná ndicutu ndaa ínima Pedro xihin ínima yii Ndióxi ña cán queá naçasáhá da ndúú ñehe da tuhun nu ná já cáchi da já xihin ná:

—Cuni joho vaha ndó, na sacuahá nuu xihin na sacuahá veñuhu Israel. ⁹ Nandaca tuhún ndó ndehe ndaja naçaja nde nandaja vaha nde da nasaquíhvi saha cán. ¹⁰ Cuni joho ndó ná ndicani nde sahá ña yóho nu ndo ta já ná cuu canda ri ini tóco ndihi ñayivi Israel ña mé dataa, da cándichi nu ndo yóho nandivaha da xihin ndée Jesucristo, ña nuu Nazaret. Mé a cán naçata caa mé ndó ndica crúxu cán ta tá nandihí já najánditacu ñahá Ndióxi. ¹¹ Ta mé Jesús yóho cúu á ña cáhan tuhun Ndióxi saha, ña cúu á tátuhun yuu ndúhu, ña naçandají na cávaha vehe. Ta mé ndó cúu ndó tátuhun na cávaha vehe cán, na naçandají Jesús. Joo viti naixinu a cúu á tátuhun yuu ña ín chága saha naçaja Ndióxi. ¹² Jáchi ni in túhún toho ñayivi ndúu ñuyiví a cúu jácaçu mí ña ná a cùhun yó indayá. In túhún Jesucristo queá nachindahá Ndióxi nu yo já ná caçu ndaa ínima yo —naçachi Pedro xihin ná.

¹³ Tá naixiní na sacuahá cán ña co yíhvi Pedro ni Juan ndíta da cáhan da xihin ná já naçatontó na jáchi sa xini na ña coó tiaha da tutu. Ta naixiní na ña cúu dá da ndahví, da naçica xihin Jesús. ¹⁴ Ta ni co ñehe íní na sacuahá cán cachi na xihin Pedro ña cúu dá da tuhún jáchi sa nuu táhyí na já va cándichi da nandivaha saha cán. ¹⁵ Andá já natavá tóo na da cán já naçasáhá ndítuhún xihin táhan na. ¹⁶ Já cáchi na já:

—Ndíá caja í xihin ndíví dā yóho viti jáchi sá nacandaā ini ndihi ñayivi ñuu Jerusalén ñā xitúhún nacaja da. Ta ni mí, a cúu cachí ñā cúú á ñā tuhún. ¹⁷ Joo cóho jáyihví yó nā ná a cáhan chága nā saha Jesús nuú ni in tuhún toho ga ñayivi. Jáchi co cúní yo ñā ná ndicuíta nuu tuhun saha Jesús —cáchi nā ndítuhún xihin táhan na.

¹⁸ Andā já nacana tucu na Pedro xihin Juan ta nasahnda na chuun nu ná ñā ná a jánaha ga nā saha Jesús ta ni ná a cáhan ga nā quívi Jesús. ¹⁹ Andā já nanducú ñehe Pedro xihin Juan tuhun nu ná já cáchi dā já xihin ná:

—Cahvi vaha ini ndó, nā sacuahā. Á cáhán ndó ñā vaha chága caja nde ñā sáhdá ndóhó á ñā sáhdá Ndióxi nuú nde caja nde. ²⁰ Jáchi a cuú jándacoo nde cáhan nde sahá ñā naxini nde xihín sahá ñā naxini johó nde —cáchi dā xihín nā sacuahā cán.

²¹ Andā já nacahan cuehe nā sacuahā cán xihín dá ñā ná a jánaha chága dā saha Jesús. Joo tóco ndihi ñayivi cája cáhnu na Ndióxi sahá ñā nacaja dā cán. Ñā cán queá najaní ñahá nā jáchi coó nāñehe íní nā ndá quiahva caja xíxi na xihín dá. ²² Ta mé dā nandivaha cán naxinu chága dā nuú ivi jíco cuia tá nandivaha saha dá.

Xíca tahví nā cúú cuéntá Jesús nu Ndióxi

²³ Ta tá sa najani Pedro xihin Juan já naquee da cuahan da nuú nasanduu java ga nā cúú cuéntá Jesús cán. Ta já nandicani na nuú nā cán ñā nacahan nā sacuahá nuú jutú xihín nā sacuahá veñuhu cán xihín ná. ²⁴ Tá naxini johó java ga nā cúú cuéntá Jesús cán ñā ndícani da nu ná já nacasáhá tóco ndihi na xíca tahví nā nu Ndióxi já cáchi nā já:

—Tátá Ndióxi. Mé ndó cúú Ndióxi ñā nacavaha indiví xihín ñuyívi xihín

tañuhú xihín tóco ndihi ñaha. ²⁵ Sanahá ndivaha tá najāndicutú ndaa ndó ínima David, tásáhnú jíco nde xihín ínima yíi mé ndó já nacachi ndó já xihín dá ta já nacahí da:

Ndá cuéntá queá ndívaā nahá ñayivi ndúu ñuyívi ta ndinuhu ñā núu cáhvi ini na caja na.

²⁶ Tóco ndihi dā cómi cuéntá sahá ñayivi ndúu ñuyívi xihín dā sáhdá chuun nuú ñuu nandique táhan na cani táhan na xihín Ndióxi.

Ta cáni táhan na xihín mé a nacaxi Ndióxi chindahá a cacomí cuéntá sahá ñayivi, nacachi ndó sanahá.

²⁷ Ta mé a ndaa queá yóho jáchi ini ñuu yóho najátaca táhan Herodes xihín Poncio Pilato xihín nā tóho xihín nā Israel viti. Najátaca táhan na caja núu na xihín Jesús, dā cúú jahyi yíi mé ndó, mé a nacaxi ndó. ²⁸ Joo xihín ñā nacaja nā yóho naxinu coo nuú ñā nasacu ini mé ndó coo janda jihna ndivaha jáchi cuu caja ndó tóco ndihi ñā cúní ndó caja ndó. ²⁹ Ta viti candehé ndo, tátá Ndióxi ndá quiahva cúní nā caja xíxi na xihín nde. Ta quiahva ndó ñamaní ná candee ini nde ndohó já ná a yíhvi nde cáhan nde tuhun vaha saha mé ndó xihín ndá nuú ñayivi nacuu jáchi mé nde cúú nde nā cája chúun nu ndo. ³⁰ Ta xíca tahví nde nu ndo ñā ná cuu ndaja vaha nde nā quíhvi xihín ndee mé ndó. Ta ná caja ndó ñamaní ñā ná caja cuahá nde ñaha xitúhún xihín cuahá ñā náhnú ná cuni ñayivi ñā xihín ndee Jesucristo, jahyi yíi mé ndó cája nde tóco ndihi ñā yóho —cáchi nā xíca tahví nā nu Ndióxi.

³¹ Tá nandihí naxíca tahví nā nu Ndióxi já naquiji nuu vehe nu ndúu tútú nā cán. Ta já nandicutú ndaa ínima ndihi nā cán xihín ínima yíi Ndióxi ta nandindeé ini na cáhan nā tuhun Ndióxi nuú ñayivi.

**Sáhnadá java táhan na cúu
cuéntá Jesús ñaha cómi na**

³² Cuahá ndivaha nasacuu na cúu cuéntá Jesús cán joo chí in jini ndíhi na. Ta ni in tuhún na co cájihnda ñaha nu táhan jáchi cáchi na: “Ñaha tóco ndihí queá.” ³³ Xihin ndée sáhan Ndióxi nu ná cáxi tuhun na apóstol ña nanditacu tucu Jesús. Ta nacaja Ndióxi cuahá ndivaha ñamaní xihin tóco ndihí na cúu cuéntá Jesús cán. ³⁴ Ta ni in na coó nandimaní ñaha nuu jáchi na ín ñaha nuu tátuhun vehe á ñuhu najicó na ña ta ñéhe na mé jiyhún cán ³⁵ ta sáhan na ña nuú na apóstol já ná ndicahnda mé ná ña nuú in in na xini ñuhú a. ³⁶ Já nacaja in dataa naní José, da naquixi chichi Leví. Ta cúu dá da nacacu in isla naní Chipre. Mé da yóho nachinúu na apóstol quivi dá naní da Bernabé ta mé tuhun yóho cúní cachi a da sáhan tuhun ndeé ini ñayivi. ³⁷ Ta mé da naní Bernabé yóho najicó da ñuhu dá ta já nasahan da mé jiyhún da cán nuú na apóstol.

**Cája Ananías xihin
Safira cuachi nu Ndióxi**

5 Joo mé tañu já in da naní Ananías xihin Safira, ñájihí da najicó na in ñundáhyi ná. ² Joo coó nandiquiahva ndihí da jiyhún ña nacayahvi ñuhu cán nuú na apóstol. Ta nacachi da xihin ná ña cán cúu ndihí va ña naquehe da saha ñuhu. Joo najándique táhan tuhun da xihin ñájihí da ña ná candoo chá jiyhún cán nu ná. ³ Ta tá naxinu coo Ananías ndiquiahva da jiyhún cán nu Pedro já nacachi Pedro já xihin dá:

—Ndá cuéntá queá nasahun ñamaní nu tiñahá sacuaha nandihvi rí inimun, Ananías. Ta nasacu inún jándahvún ínimá yii Ndióxi ta já naquehún táhan jiyhún nachahvi na sahá ñuhu jan. ⁴ Ñaha

mé vún nasacuu ñuhu jan, nduu. Ta tá najicún ña, ñaha mé vún cúu ri jiyhún jan va. Nacahvi inún cajún ña núu yóho ta xihín ña nacajún yóho a juú nu mé nde cuití va nacahún ña tuhún joo nacahún ña tuhún nu Ndióxi —nacachi Pedro xihin dá.

⁵ Tá naxini johó Ananías ña nacachi Pedro xihin dá ivi laá nandicava da naxihí da sahá cuachi nacaja da nu Ndióxi. Ta tóco ndihí na nacandaa ini sahá ña nayaha yóho nayihvi ndivaha na. ⁶ Anda já naxinu java da tacú já nachitívi na ndií cán já ñéhe na a cuahan na jánduxu na.

⁷ Ta tá sa nayaha tátuhun uní hora já naquihvi ñájihí Ananías nu ndácaan Pedro cán. Joo ni co xini ñá ña nandoho yí ña. ⁸ Anda já nandaca tuhún Pedro ña já cáchi da já xihin ña:

—Á mé a ndaa najicó ndó ñuhu ndo ta nachahvi na tá quiahva nacachi yíun xihín i sahá —nacachi Pedro.

Anda já nanducú ñehe ñá cán tuhun nu dá já cáchi ña já xihin dá:

—Ajan, quiahva já najicó nde ña.

⁹ Anda já nacachi Pedro já xihin ña:

—Mé ndó najándique táhan ndó tuhun ndó coto ndojó ndo ínimá yii Ndióxi. Candehé. Jata vehe jan vaxi na nasahan najánduxu yíun. Ta viti cañehe ri na yohó va cuhun na jánduxu na —nacachi Pedro xihin ña.

¹⁰ Tá nacachi Pedro já ivi laá nandicava ña saha dá naxihí ña sahá cuachi nacaja ñá. Tá naxinu coo da tacú, da nasahan najánduxu yí ñá cán já naxini na cánduhu ri mé va ña naxihí ña. Anda já natavá na ña ta najánduxu na ña in xoo mé nuú najánduxu na yí ña cán.

¹¹ Ta tóco ndihí na cúu cuéntá Jesús cán xihin tóco ndihí java ga na tá nacandaa ini na sahá ña nayaha yóho nayihvi ndivaha na.

Sáhan Ndióxi ndée nuú na apóstol já ná caja na cuahá ñaha xitúhún

¹² Ta nacaja Ndióxi ña ná cuu caja na apóstol cán cuahá ñaha xitúhún xihín cuahá ña náhnu tañu ñayivi cán. Ta tóco ndihi na cúu cuéntá Jesús nasataca na yéhe ñuhu cáhnu naní yéhe Salomón. ¹³ Ta java ga ñayivi, na co ndíco íchi cuéntá Jesús cán yíhvi na catáhan na xihín na cúu cuéntá Jesús yóho. Joo ndijáá java ga ñayivi cán ín toni ñúhú na xihín na apóstol cán. ¹⁴ Ta cuahá ndivaha ñayivi nacasáhá cándúsa na Ndióxi, ña viti najihí viti. ¹⁵ Ta sahá ña náhnu cája na apóstol yóho natavá na na quíhvi jata véhe ta nachinduu na na nuú xito á nu yívi mé nuú yaha Pedro cán. Já queá tá ná yaha da vatí candahvi cuití da ná caní ndaa jatá java na cán ña ná ndivaha na. ¹⁶ Ta cuahá ñayivi ndúu java ñuu válí ndúu yati cán ñéhe na na quíhvi xihín na ñúhu ínima quini ini vaxi na ñuu Jerusalén ta cán nandivaha ndihi na.

Jándoho na ini na apóstol

¹⁷ Anda já da cúu sacuahá nuú jutu cán xihín na cúu cuéntá Saduceo cán nacasáhá cáhíhvi ndivaha ini na xihín na apóstol. ¹⁸ Sahá ña cán queá natiin na na apóstol cán ta nataán na na veca. ¹⁹ Joo ñuu naxinu coo in táto Ndióxi ta nasuná a yéhe caa cán ta natavá a na ta já nacachi a já xihín ná:

²⁰ —Cuahán ndó veñuhu cáhnu ta ndicani ndó nuú ñayivi saha tóco ndihi ña cája Ndióxi, mé a ndíjama ñayivi ná ndihvi na íchi cuéntá mé á —nacachi a xihín ná.

²¹ Ña cán queá tá nativi inga quivi itaan já nandihvi na apóstol veñuhu cáhnu cán ta nacasáhá na jánaha na nuú ñayivi cán.

Joo da cúu sacuahá nuú jutu cán xihín tóco ndihi na sacuahá cómi cuéntá sahá

nación Israel cán nasahnda na chuun nu policia cán ña ná cuhun na tavá na na apóstol ñúhu veca cán ná quixi na nuú na sacuahá cán. ²² Joo tá naxinu coo na cúu policia veca cán coo nandínehe toho ñahá na. Ta já nandíco coo na caxi tuhun na xihín na sacuahá cán. ²³ Já cáhí na já:

—Tá naxinu nde yéhe caa já naxini nde ndáji tuun a ta ndíta soldado ndáa vaha da ña. Joo tá nandihvi nde ini veca sándehe nde coo na apóstol cán ná ndínehe nde.

²⁴ Tá naxini joho na sacuahá nuú jutu xihín da cúu sacuahá nu policia veñuhu xihín java ga na sacuahá veñuhu cán ña yóho já nacasáhá ndáca tuhún táhan na sahá ña ndítahan quixi nu ná chí nuu sahá ña cája na apóstol yóho.

²⁵ Mé hora já naxinu coo in dataa ta cáhí da já xihín ná:

—Na apóstol nataán ndó veca cuni cán, ndíta na jatá veñuhu jánaha na ñayivi —nacachi da cán xihín ná.

²⁶ Anda já nasahan da cúu sacuahá nuú policia xihín java ga policia já natiin tucu da na apóstol nasanehe da na nuú na sacuahá veñuhu cán. Joo coo nacaja xixi na xihín ná jáchi nayihvi na ndicuíta ñayivi cuaha cán caní na na xihín yuu. ²⁷ Ta tá naxinu coo na xihín na apóstol nu ndúu na sacuahá veñuhu cán já nasacu ndichi na na nu ná. Anda já nacachi da cúu sacuahá nuú jutu cán já xihín ná:

²⁸ —Mé nde nasahnda nde chuun nu ndó ña ná a jánaha chága ndó sahá Jesús jan. Joo mé ndó sa najándicutú ndó Jerusalén xihín ña jánaha ndó jan. Ta cúní ndó jácojo ndó cuachi jatá nde ña nasahní nde Jesús jan —cáhí da.

²⁹ Anda já nanducú ñehe Pedro xihín java ga na apóstol cán tuhun nu ná já cáhí na já xihín ná:

—Ndítahan nuú nde caja jihna ñúhú ga nde ña sáhdá Ndióxi nuú nde, a juú

ga ña sáhndá ñayivi nuú nde caja nde. Sahá ña cán queá coó ñacaja nde ña ñacachi ndó xihín nde.³⁰ Ta mé Ndióxi ñacaja cáhnu tásáhnu jícó yo sanahá ñacaja ña ná nditacu Jesús, mé a ñasahní ndo tá ñacata caa ndó a ndíca crúxu.³¹ Joo ñandiñehe jícó Ndióxi Jesús ta ñasacu a ña xoo cuáha mé á ta ñacaja ña ná nduu Jesús ña cacomí cuéntá sahá ñayivi Israel ta jácaçu a ña já ná a cúhun ña indayá. Ta tá ná ndicó çoó ini na já caja cáhnu ini Ndióxi sahá cuachi cája na.³² Ta ñaxini xihín nuú nde tóco ndihi ña yóho ta cáhan nde sahá ta quíahva já cáhan ínimá yíi Ndióxi sahá ña yóho. Ta chindahá Ndióxi ínimá yíi mé á cañuhu a ini na cája ña cúni mé á —cáchi ña apóstol xihín ña cán.

³³ Tá ñaxini johó ña sacuahá cán ña ñacachi ña apóstol já ivi laá ñaxojo ndivaha ini na xihín ná chí cúni ña cahní ñahá ña.³⁴ Joo ndaja coo íin tañu ña cán in ña sacuahá cúu fariseo naní Gamaliel, ña íin toni ñuhú ñayivi xihín. Ta cúu dá ña jánaha ley Moisés nu ná. ñacandichi da tañu ña sacuahá cán já ñasahnda da chuun ña ná tavá xóo na ña apóstol cán jata véhe.³⁵ Anda já ñacachi da já xihín ña sacuahá cán:

—Candehé ndo, ñataa Israel. Cuéntá coo ndó a juú caja ndaja ñacuu ndó xihín ña apóstol yóho.³⁶ Xíní ñuhú ndicuhun ini ndó ña sanahá ñandindita in ña naní Teudas ta ñacachi da xihín ñayivi ña cúu dá in ña íin cuahá saha. Ta ñasandico tátuhun comí ciento ña jata dá joo ñasahní ña ña ta tá ñaxihí ña já ñandicuíta nuu tóco ndihi ñayivi ñaxica jata ña cán ta xihín ña yóho ñanaá sahá ndihi ña ñacaja da.³⁷ Tá ñandihí já ñandindita inga tucu ña naní Judas, ña ñaquixi estado Galilea mé tiempo cándahví ñayivi ñuu. Ta cuahá ndivaha ñayivi ñandico jata ña cán joo ñasahní ri na ña cán va ta tóco ndihi ña ñasandico jata dá ñandicuíta nuu ndihi na.³⁸ Sahá

ñá cán queá jácahan i ndohó viti ná a quíhvi ndáha ndó ña apóstol yóho. A quíhvi nuu ndó xihín ña cája na jáchi tá jini mé va na ñaquixi ña cája na já queá ndihi va sahá ña cája na yóho.³⁹ Joo tá Ndióxi ñachindahá ña caja na ña cája na yóho já queá a cúu toho caja ndó jándihí ndó sahá ña cája na. Cuéntá coo ndó jáchi tiaha náá xihín Ndióxi caní táhan ndó —cáchi Gamaliel xihín ña sacuahá cán.

⁴⁰ Tóco ndihi ña sacuahá ñaxini johó nuú ñacahan ña cán, ñatahan ini na xihín ña ñacahan ña. Anda já ñacana na ña apóstol ta já ñacani na ña xihín churú. Ta ñacachi na xihín ná ña ná a cáhan ga ña saha Jesús nuú ñayivi. Anda já ñajaní ñahá ña.⁴¹ Ta cájii ndivaha ini na apóstol cán ñaqueta na nu ñuhú ña sacuahá cán jáchi ñasahan Ndióxi ñamaní nu ná ndoho ini na sahá Jesús.⁴² Ta ndijáá ní quívi ini veñuhu cáhnu xihín ini vehe ñayivi cáhan ña ta jánaha ña saha Jesucristo.

Cáxi na usá ña cacuu diácono, ña chíndeé ña apóstol

6 Ta mé tiempo cán ndícuahá ndivaha ña cúu cuéntá Jesús. Ta ndaja coo ña cáhan ñuhun griego cán ñacasahá cáhan cuachí ña nuú ña Israel. Mé ña cáhan ñuhun griego yóho cáchi ña ña ço ndítahnda in nuú ñaha cája ña Israel tá ndítahnda ña cuxu ña cuáan in in quívi.² Anda já ñandaja títú ndíhuxu ivi ña apóstol cán tóco ndihi ña cúu cuéntá Jesús já ñacasahá cáchi ña já xihín ná:

—Ña ndítahan nu mé nde, ña apóstol queá caxi ñuhun nde ñuhun Ndióxi nuú ñayivi. Sahá ña cán queá ço yáchi nde ndícahnda nde ña cuxu ñayivi.³ Sahá ña cán queá xíní ñuhú ndinducú mé ndó usá ña tañu ndó já ná caja na chuun yóho. Joo xíní ñuhú cacuu na ñayivi cándeé ini ndó. Ta xíní ñuhú cacuu na ña ñatcu ini. Ta xíní ñuhú cacuu na ña ñandi-

cutú ndaa ínimā xihín ínimā yii Ndióxi já ná cuu quiāhva ndó chuun yóho nū ná. ⁴Ta ña caja mé nde queá ndinuhu ini nde caca tahví nde nū Ndióxi ta jánaha nde tūhun mé á nuú ñayivi —nācachi na apóstol xihín na cúu cuéntá Jesús cán.

⁵Ta tóco ndihi na ñatahan ini na xihín ña nācachi na apóstol. Saha ña cán queá nācaxi na da naní Esteban. Mé Esteban yóho cúu dá da cāndeé cāhnu ini Ndióxi. Ta cúu dá da nādicutú ndaa ínimā xihín ínimā yii Ndióxi. Ta nācaxi na da naní Felipe xihín Prócoro xihín Nicanor xihín Timón xihín Parmenas xihín Nicolás, da nāquixi ñuu Antioquía. Mé Nicolás yóho nācasáhá cāndúsa da tá quiāhva cāndúsa na Israel, nduu joo nāndiquehe da íchi cuéntá Jesús. ⁶Tá nāndihi já ñehe na cúu cuéntá Jesús cán ndihusa na nāxinu coo na nū ndúu na apóstol cán. Andā já nāxicā tahví na nū Ndióxi saha ná. Ta nāchinúu na apóstol cán ndáha ná jiní in in ndihusa na cán ña ná caja na chuun Ndióxi.

⁷Ta nācasáhá ndicuija nuu tūhun cāhan saha Jesús chí nādicuāhá na cúu cuéntá Jesús ñuu Jerusalén. Ta cuāhá na cúu jutū cán nācasáhá cāndeé ini na Jesús.

Tiin na Esteban

⁸Ta ndaja coo nācāja cuāha Ndióxi ña-maní xihín in da naní Esteban cán ta nādicutú ndaa ínimā dá xihín ínimā yii Ndióxi chí nācasáhá cāja da cuāhá ñaha náhnu xihín ña xituhún nuú ñayivi. ⁹Joo in quiví nācasáhá java na cáni táhan yūhu ná xihín mé Esteban. Na cán cúu ná cuéntá veñuhu naní Esclavos Liberados xihín java na ñuu Cirene xihín na ñuu Alejandría xihín na ñuu Cilicia xihín java ga na nāquixi ñuu válí ndúu estado Asia nācasáhá cáni táhan yūhu ná xihín dá. ¹⁰Joo a cuú quee vaha na xihín dá jáchi nasahan ínimā yii Ndióxi tūhun ndíchí nuú mé Esteban cán ña

ná nducú ñehe da nū ná. ¹¹Andā já nācāhvi na cán java na já ná cāhan na tūhun tūhún saha Esteban. Ta nācachi na cán ña nāxini johō na ña nācanahá Esteban xihín Moisés ta nācanahá da xihín Ndióxi. ¹²Ta xihín ña yóho najāndivaa ná ñayivi xihín na sačuāha veñuhu xihín na jánaha ley Moisés. Ta já ñatiin na da já ñehe na da cuāhan da nuú ndihi na sačuāha ñuu cán. ¹³Ta nānducú na da cāndúsa cavaha tūhun tūhún saha Esteban ta já nācasáhá cāchí da cāvaha ña tūhún já:

—Cānahá da yóho xihín veñuhu cāhnu Ndióxi yóho ta cānahá da xihín ley Moisés. ¹⁴Ta nāxini johō nde cāchí da ña jātani Jesús veñuhu cāhnu yóho, mé da nāquixi ñuu Nazaret ta ndijama da costumbre najāndacoo Moisés nū yo —cāchí da cāhan ña tūhún saha Esteban.

¹⁵Andā já nādicoto nihni na sačuāha xihín tóco ndihi na ndúu coo cán nū Esteban já nāxini na nāndiyéhe nuu dá tá-tūhun in nuu tátō Ndióxi ndúu indiví.

Ndíquehe Esteban saha mé dá nuú na sačuāha

7 Andā já nāñaca tūhún da cúu sačuāha nuú jutū cán Esteban já nācachi da já xihín dá:

—Á ña ndaa cúu ndihi ña cāhan na yóho sahan.

²Andā já nānducú ñehe Esteban tūhun nū ná já nācachi da já:

—A juú toho ña ndaa queá cāhan na jan sahá i. Joo cuni johō ndó ña ná cāhan i xihín ndo, na sačuāha xihín ñani i. Sanahá ndivaha tá nasahiin tásáhnu jícó yo, da nāsanani Abraham ñundáhyi Mesopotamia tá cámani quee da cuhūn da coo da ñuu Harán já nāñaha Ndióxi mé á nū dá. Ta mé Ndióxi, xitoho í cúu á in Ndióxi cāhnu ndivaha. ³Ta já nācachi a já xihín Abraham: “Jāndacoo táhún ta jāndacoo ñuún ta cuāhán inga ñuu nuú naha i nuún coún”, nācachi Ndióxi

xihin dá. ⁴Anda já najándacoo Abraham ñundáhyi Caldea nuú nasahiin da ta já naquee da cuahan da coo da ñuu Harán. Tá nandihí já naxihí tátá da ta janda já nasandaca Ndióxi Abraham naquixi da nu ndúu yó viti. ⁵Joo coó nasahan Ndióxi ñundáhyi nu dá tá nasahiin da yóho. Ni in loho ñúhu coó nasahan mé á nu dá mé tiempo cán. Joo nacachi a xihin dá ña quiahva ña nu dá chága chí nuu. Ta nacachi a xihin dá ña nduu a ñaha jahyi da tá ná quivi da vatí cámaní cacu jahyi Abraham mé tiempo já. ⁶Ta nacachi Ndióxi xihin dá ña tóco ndihí jahyi da xihin na quixi chichi jahyi da cacuu na tátuhun na tóho jáchi canduu na inga ñuu, ña co cúu ñuu na. Ta cán caja chúun na joo a quehe yahvi na sahá chuun caja na ta jándoho ndivaha na cán ini na tixi comi ciento cuia. ⁷Nacachi tucu Ndióxi xihin dá já: “Joo jándoho i ini ñayivi, na caja xixi xihin ñayivi quixi chichún. Ta tá nandihí caja i ña ná queta na quixi chichún ta quixi na chóho já ná caja cáhnu na yehe.” ⁸Ña yóho quea nacachi Ndióxi xihin Abraham tá nasahan tuhun a nu dá. Ta nacachi a xihin dá ña ná chicaan da marca yiquí cuñu da já ná a ndíndójó da sahá tuhun nasahan Ndióxi nu dá. Ta tá nacacu jahyi Abraham, da naní Isaac já nachicaan Abraham marca yiquí cuñu da tá naxinu unā quiví nacacu da. Ta quiahva já nacaja ri Isaac xihin Jacob, jahyi da tá nacacu da. Ta sa mé quiahva já nacaja ri Jacob xihin uxu ivi jahyi da tá nacacu da. Ta jahyi Jacob yóho cúu tátá uxu ivi táhnda ñayivi Israel.

⁹Ta mé jahyi Jacob yóho nasacuu tásáhnu jícó yo joo nacahihvi ini na xihin in ñani na, da naní José. Sahá ña cán quea najicó na da cuahan da nación Egipto. Joo nasahiin Ndióxi xihin dá. ¹⁰Ta nachindee a da nu tóco ndihí ña nandoho ini da ta nasahan cuaha Ndióxi xini túni dá. Ta nacaja mé á ña ná tahan

ini Faraón, mé rey nación Egipto cán xihin ña cája José. Sahá ña cán quea nasacu rey cán José ña ná nduu da gobernador saha tóco ndihí nación Egipto cán. Ta nacaja rey cán ña ná cacomí da cuéntá sahá vehe mé rey cán viti.

¹¹Ta in tañu naxinu tama ndeé ta nacasáhá ndóho ndivaha ini tóco ndihí ñayivi ndúu nación Egipto. Ta quiahva já nandoho ri ini na ndúu ñundáhyi Canaán ta chí co ñehe ná ña cuxu tásáhnu jícó yo. ¹²Joo tá nacandaa ini Jacob ña ñin trigo nación Egipto já nachindahá da jahyi da, na nasacuu tásáhnu jícó yo cán já nasahan na naxeen na ña cuxu na. Ta tá nasahan na nu cuítí yóho coó nandicuni na ñani na José cán. ¹³Joo tá nasahan na ña chí ivi chí Egipto cán já najánaha José mé dá nuú ñani da. Ta xihin ña yóho nacandaa ini da cúu rey nación Egipto cán ña cúu José da Israel. ¹⁴Anda já nasahnda José chuun ña ná cañehe na Jacob, tátá da xihin tóco ndihí na vehe da quixi na canduu na ñundáhyi Egipto cán. Ta tóco ndihí na nasahan cán nasacuu na uni jícó sahun ñayivi. ¹⁵Já naquee Jacob cuahan da coo da Egipto xihin tóco ndihí na vehe da. Ta sa mé cán naxihí da ta cán naxihí jahyi da, na nasacuu tásáhnu jícó yo. ¹⁶Já nachicaan na ndi cán ini cáva mé Egipto cán joo tá nayaha tiempo já natavá na lásá na já ñehe na ña nasahan na nachicaan na ini cáva mé cama santo ña naxeen Abraham nuú jahyi in da naní Hamor ñuu Siquem cán.

¹⁷Ta tá nacayati quiví xinu coo ña nasahan Ndióxi tuhun a nu Abraham coo já nacasáhá cacu cuahá jahyi na naquixi chichi Israel. Já nandicuaaha ná nani ndúu na Egipto cán. ¹⁸Anda já nacasáhá inga tucu rey cómi da cuéntá sahá ñayivi nación Egipto cán ta mé rey saá cán co xini toho da José. ¹⁹Ta mé rey yóho najándahvi da tásáhnu jícó yo cán ta nacasáhá cája xixi da xihin ná. Ta

naçaja ndusa dá xihin ná ña ná jándacoo na jahyi na, na jacá naçacu já ná quivi na. ²⁰Ta mé tiempo já naçacu Moisés ta naçacuu da in ticuáhá loho ña natahan ini Ndióxi xihin. Ta najácuañu tátá náná Moisés yóho mé dá tixi uní yoo mé vehe mé na cán. ²¹Joo tá naxinu quivi ndítahan nu ná jándacoo na da já nandiquehe ná cúu jahyi rey Egipto cán da já najácuañu ña da tátuhun jahyi ña. ²²Ta najácuaña Moisés tóco ndihi ña xini na ndíchí nación Egipto cán. Ta nandindíchí ndivaha jini dá. Ta naçaja cuaha dá ña náñnu.

²³Ta tá naxinu Moisés ivi jico cuia já naçacu ini da coto nihni da ñani táhan da, na naquixi chichi Israel. ²⁴Tá naçasaá da nu ndúu na cán já naxini da cája xíxi in da Egipto xihin in da Israel. Ta cúni Moisés ndiquehe da sahá da Israel ña cán queá nañni Moisés mé da Egipto cán. ²⁵Jáchí naçahán Moisés ña cuu candaa ini na Israel cán ña chindahá Ndióxi da já ná janí da na ndáha na Egipto cán. Joo coó naçandaa ini na ña yóho. ²⁶Ta inga quivi itaan tá naxinu coo Moisés nu ndúu na Israel cán já naxini da cáni táhan ivi da naquixi chichi Israel. Andá já naçasaá Moisés sañndá java táhan da da cán já cáhí da já xihin ná: “Ndaja ñani mé va ndó, a váha toho cája ndó cáni táhan ndaja táhan mé va ndó.” ²⁷Andá já naçindahá nihni da cája xíxi xihin ñani táhan cán Moisés já naçachi da já xihin dá: “Ni in toho na coó naçahan chuun nu yóho cacuún da cacomí cuéntá sahá nde já ná cuu caja viún sahá nde. ²⁸Á tá quiahva naçajún nañni da Egipto cán cuni quiahva já cúnun cajún xihin i”, naçachi da cán xihin Moisés. ²⁹Tá naxini joho Moisés ña yóho já nayihví ndivaha da chí naxinu da cuahan da chí ñundáhyi cuéntá Madián já nañni da cán tátuhun in da toho. Ta cán natandaha dá ta naçacu ivi jahyi ta da.

³⁰Ta tá sa nayaha ivi jico cuia nañni Moisés Madián cán já nañni in táto Ndióxi mé á nu dá tañu in tohíñú cándaha ñúhu mé yucú íchí yati yucú naní Sinaí cán. ³¹Ta chí naçatontó Moisés xihin ña naxini da naçaja Ndióxi cán. Ta tá naçayati da sáñdehé da ña já naxini joho da cáhan Ndióxi xihin dá já cáhí a já: ³²“Yehe cúu u Ndióxi naçaja cáñu tásáñnu jícun Abraham xihin Isaac xihin Jacob.” Andá já naçasaá quíji Moisés xihin ña yihví da ta coo naçahan ndeé ini da ndicoto nihni da nu cáhan Ndióxi cán. ³³Andá já naçachi tucu Ndióxi já xihin dá: “Tavá ndusa sañun jáchi yii ndivaha cúu nu sánun jan. ³⁴Sa naxini i ndá quiahva ndáhví ndóho ñayivi cuéntá mí i, na ndúu Egipto ta naxini joho i nu tána na sahá ña jándoho na Egipto jan ini na. Sañá ña cán queá vaxi i chindeé e na ta yóho cacuún da chindahá i cuñun Egipto já ná tavún na nu ndóho ini na cán”, naçachi Ndióxi xihin Moisés.

³⁵Naçandají na Israel cán Moisés ta naçachi na xihin dá: “Coó na naçacu toho yóho ña ná cacomún cuéntá sahá nde já ná cuu caja viún sahá nde.” Joo Ndióxi queá naçindahá Moisés ña ná cacuu da da cacomí cuéntá sahá na Israel cán ta já ná jacacu da na. Jáchi já naçachi táto Ndióxi xihin dá tá nañni mé á tañu tohíñú cándaha ñúhu cán. ³⁶Ta mé Moisés naçahan tucu da mé Egipto cán ta natavá da tóco ndihi na Israel, na nañnduu Egipto cán ta naçaja da cuahá ñaha náñnu xihin ña xituhún mé Egipto cán. Ta quiahva já naçaja da xihin tañuhú naní Tañuhú Cuahá tá nañni da do nuú nayaha na Israel cán. Ta quiahva já naçaja da cuahá ña náñnu yucú íchí nuú naxica na ivi jico cuia cán. ³⁷Ta mé Moisés naçaxi tuhun da xihin ñayivi já naçachi da já xihin ná: “Tá quiahva naçaja Ndióxi naçindahá a yehe nu ndo quiahva já chindahá mé á inga da cacuu

profeta nu ndo. Ta mé da cán cacuu da in da quixi chichi mé ndó”, nacachi Moisés xihín ná. ³⁸Ta mé Moisés nasahin da tañu ñayivi Israel, na nasacuu tásáhnú jícó yo tá naxica na yucú íchí cán. Ta xihín mé da cán nacahan táto Ndióxi jini yucú Ndióxi cán. Ta cán nasahan Ndióxi ley nu dá já ná nahá da ña nu yo ña ná caca vaha í íchí cuéntá Ndióxi.

³⁹Joo coo naxeen toho tásáhnú jícó yo cuni johó na nuú nacahan Moisés xihín ná. Ña cán queá nacandají na da ta nacasáhá ndúcú na ndicó coo na Egipto.

⁴⁰Ta nani nasahin Moisés jini yucú Sinaí cán já nacachi na xihín Aarón, ñani Moisés já: “Cúni nde ña ná cavahún tiniñu yúu Ndióxi caja cáhnú nde ta ná canuú a cuhun a nuú nde. Jáchi coo cándaq ini nde ndíá nandoho Moisés, da natavá ndehe nuú nasanduu nde Egipto cán.” ⁴¹Anda já nacavaha na in yoco ñehe nahná chélo ta já nasahní na quítí najoco na nuú mé yoco cán. Ta nacajii ndivaha ini na xihín yoco ña nacavaha mé na cán. ⁴²Anda já najándacoo Ndióxi na já ná caja cáhnú na ndá ña cúni na tátuhun quimi xihín yoo xihín candii. Já nacachi Ndióxi ini libro nacahyí na profeta sanahá:

Ndóhó, na Israel, a juú nu mí i nasahní toho ndó quítí najoco ndó tañu ivi jico cuiá nani naxica nuu ndó yucú íchí jan.

⁴³Ña nacaja ndó queá nacaja cáhnú ndó yoco ña nacavaha mé va ndó.

Ta nacachi ndó ña cúu mé yoco cán inga ndiόxi naní Moloc.

Ta nasanehe ndó ña xihín cáti á tá cuahan ndo.

Ta nacavaha ndó inga tiniñu quimi nacachi ndó cúu á inga tucu ndiόxi naní Renfán.

Ta nasanehe ndó tiniñu cán cuahan ndó caja cáhnú ndó coo nacaja cáhnú ndó yehe.

Ña cán queá tavá i ndohó ñundáhyi na Israel ta chindahá i ndohó in ñuu tóho xicá chága a juú ga Babilonia, nacachi Ndióxi xihín na cán — nacachi Esteban xihín na sacuahá ñuu cán.

⁴⁴Já nacachi tucu Esteban já xihín ná:

—Vatí nacaja cáhnú tásáhnú jícó yo java ga yoco joo nasanehe tá nasanehe na in veñuhu ní quítí cuéntá Ndióxi tá naxica nuu na yucú íchí nuú coo ndúu ñayivi cán. Jáchi janda jihna nasahnda Ndióxi chuun nu Moisés tá quiahva coo mé veñuhu ní quítí cán ta nasahnda chuun nu dá ña ná cavaha da ña xihín ní quítí. Ta ini mé veñuhu cán nataán da yuu jáhnda nu ndáq ley nasahan Ndióxi nu dá sanahá. ⁴⁵Tá sa nayaha cuahá cuiá já naxihí Moisés já nandiquehe da naní Josué chuun ña cañehe da cuéntá saha tásáhnú jícó yo. Ta mé tásáhnú jícó yo nacani táhan na xihín na nasanduu ñundáhyi yóho. Ta nacaja Ndióxi ña ná quee vaha na Israel xihín na cán. Natavá Ndióxi na cán já ná canduu na Israel ñundáhyi yóho ta mé tiempo já na Israel ñehe na veñuhu ní quítí cuahan na. Ta já nasahin a xihín ná janda quiví nasacomí David cuéntá sahá na Israel.

⁴⁶Nacaja Ndióxi cuahá ñamaní xihín David sahá ña cán queá nasacu ini David cavaha da in nuú coo Ndióxi, mé a nacaja cáhnú Jacob sanahá. ⁴⁷Joo da nacavaha mé vehe Ndióxi cán nasacuu Salomón, jahyi David. ⁴⁸Ta sa cándaq ini ña a juú quiahva cáhnú cúu Ndióxi ta coo ndácaan toho a ini veñuhu cavaha dataa. Íin in profeta ta nacahyí da ña nacachi Ndióxi já:

⁴⁹Tátuhun in rey, da íin coo silleta vaha, ta chinúu da saha dá jatá in táyi loho, quiahva já íin coo i indivi ta chinúu i sahá i jatá ñuyiví.

Yehe cómi i cuéntá sahá indivi xihín ñuyiví sahá ña cán queá coo toho vehe cuu cavaha ndó coo yehe,

ta co xíní ñúhú i in vehe nu ndíquehe ndée.

⁵⁰ Jáchí yehe cúu Ndióxi ña ñacavaha tóco ndihi ñaha, já ñacachi Ndióxi sanahá —ñacachi Esteban xihín ná.

⁵¹ Anda já ñacachi tucu Esteban já xihín ná:

—Joo mé ndó cúu ndó ñayivi saá ini ta cúu ndó tátuhun na co xíní Ndióxi. Jáchí co cúní ndó cuni johó ndó ña cáhí Ndióxi xihín ndó ta co cúní ndó can-
daa ini ndó tühun Ndióxi. Ta ni co cúní ndó quiahva ndó ñamaní ndihvi inima yii Ndióxi ini inima ndó. Xíxi ndivaha ñasahin ini tásahnu jícó ndó ta quiahva já cája ri mé ndó viti. ⁵² Mé tásahnu jícó ndó nacaja xíxi ndivaha na xihín ndihi na profeta ta nasahní ñahá na mé na yóho ñaquixi na cáxi tühun saha mé a quixi chí nuu, mé a co cája cuachi. Ta tá ñaxinu mé a cán já najicó túhún ndó a ta nasahní ndó a. ⁵³ Ta mé ndó cúu ndó na ñasahan tátó Ndióxi ley nuu joo co cúní ndó caja ndó ña cáhí a —ñacachi Esteban xihín ná.

Tá nasahní na Esteban

⁵⁴ Tá ñaxini johó na sacuahá cán tóco ndihi ña ñacahan Esteban já ñaxojo ndivaha ini na xihín dá chí cáhñá nuhu na. ⁵⁵ Joo ñandicutú ndaa inima Esteban xihín inima yii Ndióxi ta já ñandicoto nihni da indivi já ñaxini da ndá quiahva cáhnu cúu Ndióxi ta ñaxini da cándichi Jesús xoo cuáha Ndióxi. ⁵⁶ Anda já ñacachi Esteban já xihín ná:

—Candehé ndó. Núná indivi xíní i ta tívi cándichi Jesús xoo cuáha Ndióxi —ñacachi Esteban xihín ná.

⁵⁷ Joo ñachicaji tuun na cán johó na já ná a cúní johó na ña cáhan Esteban. Ta ñacasáhá cáyuhú cóhó na cáti na cuahan na cani na da. ⁵⁸ Natavá na mé Esteban yuhú ñuu ta cán ñacasáhá cúun na yuu dá. Ta mé na najácojo cuachi jatá Esteban cán natavá na cotó na ta ñachin-

duu tóo na ña nuu in da tacú naní Saulo cándichi cán. ⁵⁹ Ta nani cúun na cán yuu Esteban já ñacasáhá mé Esteban xíca tahví da nu Ndióxi já cáhí da já:

—Jesús, mé ndó cúu xitoho i. Ndiquehe ndó inima i viti.

⁶⁰ Anda já ñacaxítí Esteban já ñacasáhá cáyuhú cóhó da já ñacachi da já: —Jesús, xitoho i, a quehe ndó cuéntá sahá cuachi cája na yóho.

Tá ñandihí ñacachi Esteban tühun yóho já ñaxihí da.

Cásahá Saulo cája xíxi da xihín na cúu cuéntá Jesús

8 Ta mé hora nasahní na Esteban cándichi Saulo sándehe da ta ñathan ini da xihín na nasahní Esteban cán.

Ta mé quívi cán ñacasáhá na cája xíxi chága na xihín na cúu cuéntá Jesús ndúu ñuu Jerusalén cán. Chí tóco ndihi na cúu cuéntá Jesús ñandicuíta nuu na ndijáa chí estado Judea xihín estado Samaria. Joo mé na apóstol cuití va coo ñaxita nuu toho na. Ñacandoo na ñuu Jerusalén. ² Ta java dataa ñandiquehe na yiquí cuñu Esteban cuahan na jánduxu na da tá quiahva ín costumbre na ta a juú quiahva nasacu na saha dá. ³ Ta mé Saulo nacaja xíxi chága da xihín na cúu cuéntá Jesús ta ñaquihvi da vehe tá vehe na ta ñúhu da na ta tává da na jatá véhe. Coó caja toho á cúu ná ñaa á cúu ná ñáha ta já ñéhe da na cuahan na vecaa.

Cáhan na cúu cuéntá Jesús tühun vaha saha mé á nuu na estado Samaria

⁴ Ta na cúu cuéntá Jesús tá ñandicuíta nuu na jatá ñuu Jerusalén cán ñacaxi tühun na tühun vaha sahá Jesús ní cúu nu xíca na cuahan na. ⁵ Ta ndaja coo in da cúu cuéntá Jesús naní Felipe ñaquee da cuahan da chí in ñuu cuéntá Samaria ta cán ñacasáhá da cáhan da saha Jesucristo nuu ñayivi. ⁶ Ñacasáhá ndítútú

cuahá ñayivi nu dá ta xihín ndinuhu ini na táa johu na nu cáhan da xihin ná jáchi naxini xihín nuu ná cuahá ñaha náhnu cája Felipe. ⁷Nandaja vaha da cuahá ñayivi, na nasañuhu ínimá quini ini chí cáyuhú cóhó mé ínimá quini cán tá quéta ini na quíhvi cán. Ta nandaja vaha ri da cuahá na naxihí tuchu ta nandaja vaha ri da na xíca réncu. ⁸Sahá ña cán quéa nacajíi ndivaha ini ñayivi ñuu cán xihín ña nacaja da.

⁹Ta mé ñuu cán nasahíin in da tají naní Simón. Mé Simón yóho nasacuu da in taa, da najándahvi ñayivi Samaria cán jáchi nasacachi da ña cúu dá in da íin ndivaha saha. ¹⁰Ta tócu ndihi mé ñayivi ñuu cán, á cúu ná na ndahví á na náhnu, nasaxini johu na xihín ndinuhu ini na nuú nasacahan da, nduu. Ta nacachi na saha dá ña cája da ña náhnu tá quiahva cája Ndióxi. ¹¹Ta nasacandúsa na nuú nasacahan da xihin ná jáchi tixi cuahá tiempo najándahvi da na xihín ña tají. ¹²Ta ndaja coo nacasáhá na cándúsa na ñuu cán tuhun vaha cáhan Felipe saha Jesucristo, ña cacomí Ndióxi cuéntá saha ná tá ná candeé ini na Jesucristo. Ta já nacasáhá na cándúta ná, taa xihin ñáha viti. ¹³Ta janda mé Simón cán nacandúsa da ta nacandúta dá já nacasáhá xíca nuu da xihin Felipe. Ta chí catóntó da xíní da ña náhnu xihín ña xitúhún cája Felipe cán.

¹⁴Ta tá nañehé na apóstol ndúu ñuu Jerusalén cán tuhun ña nandiquehe na Samaria cán tuhun vaha cáhan saha Jesús já nachindahá na Pedro xihin Juan estado Samaria cán. ¹⁵Ta tá naxinu coo Pedro xihin Juan estado Samaria cán já naxíca tahví na nu Ndióxi sahá na cúu cuéntá Jesús cán ña ná chutú ndaa ínimá ná xihin ínimá yíi Ndióxi. ¹⁶Jáchi sa nacandúta ná cuéntá Jesucristo sahá ña candeé ini na mé á joo a ñáha chutú ndaa ínimá ná xihin ínimá yíi Ndióxi. ¹⁷Anda já chójó Pedro xihin Juan ndáha dá jíni

in in na cán nani xíca tahví da nu Ndióxi já nachutú ndaa ínimá ná xihin ínimá yíi Ndióxi.

¹⁸Tá naxini Simón ña nachutú ínimá na cúu cuéntá Jesús cán xihin ínimá yíi Ndióxi tá chínúu na apóstol ndáha ná jíni ná já cúni da cueen da ndé Ndióxi cán. ¹⁹Já nacachi Simón já xihin ná:

—Quiahva ndó ndé cómi ndó jan nuú i já ná cacomí ri yehe va ña já quéa ndá na ná chinúu i ndahá i jíni ná cuu ndicutú ndaa ínimá ná xihin ínimá yíi Ndióxi.

²⁰Anda já nanducú ñehe Pedro tuhun nu dá já cáhí da já xihin dá:

—Ná jándihi Ndióxi sahun xihin saha jíjuhún cómún jáchi cáhún ña cuu cueún ña jása maní uun Ndióxi nuú ñayivi.

²¹Coó sahá tohún cajún ña cája nde yóho jáchi coo íin vaha toho ínimun nu Ndióxi. ²²Xíní ñúhú jándacoún ña núu cáhvi inún jan ta ndítahan caça tahvún nu Ndióxi já ná candehe mé á á caha cáhnu ini a sahun jáchi núu ndivaha cáhvi inún. ²³Jáchi náha cáxi ña cáhíhvi ndivaha inún. Cúu á tátuhun mé ña quini nacató a yohó chí cájún ña núu.

²⁴Anda já nanducú ñehe Simón tuhun nu Pedro já cáhí da já:

—Caça tahvi ndó nu Ndióxi sahá i já ná a quíxi ña núu cáhí ndó jan nuú i —nacachi da xihin ná.

²⁵Tá nandihí nandicaní Pedro xihin Juan sahá ña nacaja Ndióxi xihin ná. Ta tá nandihí nacahan na tuhun Ndióxi nuú na cán já naquee na nasahan na cáhan na tuhun Ndióxi, ña cuu jácaçu ñayivi ndijáá ñuu válí ñúhu chí estado Samaria cán. Anda jáví nandicó coo tucu na chí ñuu Jerusalén.

Cáhan Felipe saha Jesús nuú in da naquixi nación Etiopía

²⁶Tá sa nayaha ña yóho já naxinu in táto Ndióxi nu íin Felipe estado Samaria cán ta já cáhí a já xihin dá:

—Cuáhán chí sur nu quée íchi ña quéta ñuu Jerusalén cuahan chí ñuu Gaza —nacachi táto Ndióxi xihin dá.

Ta mé íchi cán yáha nuú co ndúu ñayivi jáchi íchí ndivaha. ²⁷ Andá já naquee Felipe cuahan da. Ta íchi nu xíca da cuahan da cán nanditahan da in da-
taa, da naquixi nación Etiopía. Mé da Etiopía yóho cúu dá in ña cáhnu nación dá jáchi cúu dá da cómi cuéntá sahá ji-
uhún ña cúu ñaha ña naní Candace, ña cómi cuéntá sahá ñayivi nación Etiopía. Mé da yóho sa nasahan da ñuu Jerusalén
caja cáhnu da Ndióxi. ²⁸ Ta tá cuahan tucu da íchi ndicó coo da Etiopía cán ta nani íin coo da jata carreta já cáhvi da
libro nacahyí profeta Isaías. ²⁹ Andá já nacahan ínima yii Ndióxi xihin Felipe já nacachi a já xihin dá:

—Cativi jíin carreta cuahan jan.

³⁰ Andá já nacayati Felipe jíin carreta cán ta já naxini johó da cáhvi da Etiopía cán libro Isaías. Andá já nandaca tuhún Felipe da já cáhí da já xihin dá:

—Á cándaq inún ña cáhvún jan.

³¹ Andá já nanducú ñehe da Etiopía cán tuhun nu Felipe já nacachi da já:

—Ndaja caja i candaq ini i ña cáhvi i tá coo na ndicani nuú i ndía cúní cachi a —nacachi da Etiopía cán xihin Felipe.

Andá já naxíca da ñamaní nu Felipe ña ná ndaa da jata carreta da já ná cacoo da xihin dá ta ná ndicani da nu dá ña cúní cachi a. Chí nandaa Felipe carreta cán.

³² Ta cáhvi da Etiopía cán tuhun Ndióxi nu cáhí a:

Tá quiahva ñehe na in ndicachi cuahan rí quivi rí quiahva já nasañehe na da cuahan da quivi da.

Ta tá quiahva cája ndicachi tá co ndáhyi rí nani ndíjatá na rí quiahva já nacaja mé dá jáchi coo nasuná da yúhu dá cahan da.

³³ Nacaja xíxi ndivaha na xihin dá ta coo nacaja ndaa na xihin dá.

Jáchi janda na naquixi chíchi nuú naquixi mé dá coo nandiquehe na saha dá.

Ña nacaja na quée nasahní na da já ná a coo ga da ñuyíví yóho, cáhí tuhun Ndióxi nu cáhvi da Etiopía cán.

³⁴ Andá já nandaca tuhún da Etiopía cán Felipe já cáhí da já xihin dá:

—Ta viti caja ndó ñamaní ndicani ndó nuú i ndía cúní cachi a yóho. Á saha mé va profeta yóho cahan da á sahá inga va da cahan da.

³⁵ Andá já nacasahá Felipe ndicani da nuú da cán ña nacahyí Isaías já nandicani da tuhun vaha saha Jesús nu dá.

³⁶ Ta tá yáha na cuahan na nu ñúhu ticuíf já nacachi da Etiopía cán já xihin Felipe:

—Yóho ñúhu ticuíf. Á cuu caja ndúta ndó yehe —nacachi da xihin Felipe.

³⁷ Andá já nacachi Felipe xihin dá:

—Tá cándeé ini ndó Jesús xihin ndinuhu ini ndó ta cuu va candúta ndó.

Andá já nanducú ñehe da cán tuhun nu Felipe já cáhí da já:

—Cándusa i ña cúu Jesucristo in túhún jíni já jahyi Ndióxi —nacachi da Etiopía cán.

³⁸ Chí ivi laá nasahnda da Etiopía cán chuun ña ná cani ndichi na carreta cándójó na cuahan na cán. Andá já nanuu ndíví da cuahan da nu ñúhu ticuíf ta já najácandúta Felipe da Etiopía cán.

³⁹ Tá nandihí naquee na ini ticuíf cán já ñehe ínima yii Ndióxi Felipe cuahan da inga xoo chí coo naxini táhan chága da xihin da Etiopía cán. Joo cájii ini da Etiopía cán cuahan da íchi. ⁴⁰ Tá nandicoto nihni Felipe sa íin da in ñuu naní Azoto. Ta tá ñuu tá ñuu cuahan da cahan da tuhun vaha saha Jesús nuú ñayivi andá quiahva naxinu coo da ñuu Cesarea.

Ndiquehe Saulo íchi cuéntá Jesús

(Hch. 22:6-16; 26:12-18)

9 Joo ndaja coo da naní Saulo cája xíxi tá cája xíxi da xihin na cúu cuéntá

Jesús. Ta sácú ini da ndaja caja da cahní da na. Ta sahá ña cúní da jándihi da saha ná sahá ña cán queá nasahan da cahan da xihín da cúu sacuahá nuú jutú ² ña ná quiahva na in carta nu cáhan ña ñehe dá ñamaní quihvi da veñuhu ñúhu ñuu Damasco já ná ndinducú da na ndíco íchí cuéntá Jesús já ná cató da na cañehe da na quixi na cuhun na veca ñuu Jerusalén. Co cája toho a á cúu ná ña á ñáha. Chí ñaquee Saulo ñuu Jerusalén xihín mé carta. ³ Joo nani xíca da cuahan da íchí tá sa yati xinú coo da ñuu Damasco já in náá cuití ñandiyihvi ndaa ñúhu jata dá. Mé ñúhu yóho ñaquixi a chí indiví. ⁴ Chí ivi laá ñandicava Saulo nu ñúhu. Anda já naxini johó da cahan in a xihín dá já cáchí a já xihín dá:

—Saulo, Saulo. Ndá cuéntá queá cája xísún xihín i —cáchí a xihín dá.

⁵ Anda já ñacasáhá ndáca tuhún Saulo já cáchí da já:

—Yo cúu ndó, na cahan. Ndaja naní ndo —cáchí da.

Anda já nanducú ñehe a cán tuhun nu dá já cáchí a já xihín dá:

—Yehe cúu u Jesús, mé a cája xísún xihín. Ta xihín ña cájún yóho cúu á tátuhun cája xísún xihín mé vún jáchí cájún tátuhun cája in tindiquí tá sání ndaa rí nu yócó poya ta jándicuehe rí mé va rí.

⁶ Anda já ñacasáhá quíji Saulo xihín ña yíhvi da já ñacachi da já:

—Cahan ndó xihín i, xitoho i ndía queá cúní ndó ná caja i —cáchí da.

Anda já nanducú ñehe Jesús tuhun nu dá já cáchí a já xihín dá:

—Cuándacoo ta cuahán quihvi ñuu Damasco. Ta jan cahan na xuhun ndía ndítahan cajún —cáchí Jesús.

⁷ Ta tóco ndihi da casahan xihín Saulo cán ñayíhvi ndivaha da jáchí naxini johó da ña cahan cán vatí coo ñayivi ná xini da. ⁸ Tá ñandihí já nandacoo Saulo nu

ñúhu. Joo tá ñasuná da nduchú núu da chí co tívi ga nuú dá. Sahá ña cán queá jandá tñin ndaa na da cuahan da chí Damasco. ⁹ Cán ñasahíin cuáá da tíxi uní quívi ta chí coo naxixi da ta ni ticuí coo naxihi da.

¹⁰ Mé ñuu Damasco cán ñasahíin in da cúu cuéntá Jesús naní Ananías. Ta ndaja coo naxini ndímáhnú da Jesús ta ñacahan xihín dá já ñacachi a já:

—Ananías.

Anda já nanducú ñehe da tuhun nu á já cáchí da já:

—Yóho ín i. Ndía cúní ndo, xitoho i.

¹¹ Anda já ñacachi Jesús xihín dá:

—Candichi ta cuahán cáyé naní a Ndacú Ndaa. Ta vehe da naní Judas cán ndaca tuhún sahá in da naní Saulo, da ñacacu ñuu Tarso. Viti ñúhú xíca tahví da nu Ndióxí ndácaan da. ¹² Jáchí naxini ndímáhnú da ña quíhvi mún, Ananías vehe nu ndácaan da. Ta naxini da ña chínúún ndáhun jiní dá ta já cuu candehé tucu da —ñacachi Jesús xihín Ananías.

¹³ Tá naxini johó Ananías ña yóho já ñacachi da já:

—Candehé ndo, xitoho i. Yíhvi i cuhun i jáchí sa cuahá ndivaha ñayivi ndícani nuú i sahá mé Saulo jan. Ta ndícani na nuú i ndá quiahva xíxi cája da xihín na cúu cuéntá mé á, na ndúu ñuu Jerusalén.

¹⁴ Ta viti vaxi da jan ñuu yóho jáchí sa naxíca da ñamaní nuú na sacuahá nuú jutú ña ná cuu játaca da tóco ndihi na cája cáhnu mé ndó já ná cañehe da na cuhun na veca —ñacachi Ananías.

¹⁵ Anda já ñacachi Jesús já xihín Ananías:

—Cuahán quí jáchí sa ñacaxi i da ña ná cahan da sahá i nuú ñayivi java ga nación ta quiahva já cahan da sahá i nuú na cómi cuéntá sahá na cán. Ta ñacaxi i da ña ná cahan da sahá i nuú na ñaquixi chichi Israel viti. ¹⁶ Ta jáñaha i nu dá ndá

quiahva ndítahan ndoho ini da sahá i — ñacachi Jesús.

¹⁷ Andá já ñaquee Ananías cuahan da vehe nu ín Saulo cán. Tá naxinu da cán já naxinúu da ndáha dá jini Saulo já ñacachi da já xihin dá:

—Ñani Saulo. Mé Jesús, xitoho í, mé á naxinún nu ñaquisún íchi cán, mé á cán quéa ñachindahá yehe vaxi i já ná nd-inuna nduchú núún já ná cuu candehé tucún. Ta já cúní Ndióxi ña ná ndicutú ndaa ínimun xihin ínima yii mé á — ñacachi Ananías xihin Saulo.

¹⁸ Chí ivi laá ñacasáhá cúyu ñaha tá-tuhun runchu tiyacá nduchú núú Saulo chí ñanuna nuu dá sándehe tucu da. Andá já ñasahan Saulo ñacandúta dá. ¹⁹ Tá ñandihí já naxixi da ta ñandihvi tucu ndée dá ta ñasahin tóo da chá quivi xihin na cúu cuéntá Jesús ndúu ñuu Damasco cán.

Cáhan Saulo saha Jesús nuú ñayivi ñuu Damasco

²⁰ Tá ñandihí já ñacasáhá Saulo jánaaha da tuhun Ndióxi ini veñuhu ta jánaaha da ña cúu Jesús in túhún jini já jahyi Ndióxi. ²¹ Ta tóco ndihí na táa johu nu cáhan da cátóntó na cája da. Já cáchi xihin táhan na já:

—Á a juú da yóho cúu da ñandicuita cája xíxi xihin na cúu cuéntá Jesús ñuu Jerusalén, nduu. Á a juú sa mé da yóho vaxi da tiin da na cúu cuéntá Jesús mé ñuu yóho já ná cuhun na nuú na sacuaaha nuú jutú já ná taán ñahá na vecaa — ñacachi xihin táhan na.

²² Joo ví ga ví ndíndeé ini Saulo cáhan da tuhun Ndióxi. Ta náha da nuú ñayivi ña mé Jesús cúu Cristo, mé á ñachindahá Ndióxi cacomí cuéntá sahá ñayivi. Jan-da quiahva já najájacá da xíní túní na ñaquixi chichi Israel ndúu Damasco cán xihin tuhun cáhan da xihin ná.

Xínu Saulo nuú java na Israel jáchi cúní na cahní na da

²³ Tá sa nayaha cuahá quivi já najándique táhan na ñaquixi chichi Israel cán tuhun na ña cahní na Saulo.

²⁴ Joo ñacandaa ini Saulo ña ndúcú na cahní na da. Ta mé na ndúcú cahní Saulo cán ñasandati na ñuu ta ndiví yéhe ñuu cán janda quiahva ná queta da já ná cahní na da. ²⁵ Joo in ñuu na cúu cuéntá Jesús ndúu ñuu Damasco cán ñachicaan na da ini in toyicá cáhuu já najánuu na da ndica náma cáhuu ndájí yuhú ñuu cán já ñacacu da ta ñaquee da cuahan da.

Cuahan Saulo ñuu Jerusalén

²⁶ Tá naxinu co Saulo ñuu Jerusalén já ñanducú da ndique táhan da xihin na cúu cuéntá Jesús ndúu cán. Joo tóco ndihí na cán nayihví na da jáchi co cándusa na ña sa ñandiquehe da íchi cuéntá Jesús. ²⁷ Joo ñandiquehe Bernabé saha Saulo. Ñasahan da najánaaha da da nuú na apóstol cán já ná ndique táhan na xihin dá. Ta ñandicani Bernabé nu ná ndaja ñasahin tá ñaxini Saulo Jesús íchi nu xíca da cuahan da chí ñuu Damasco. Ta ñandicani da ña ñacahan Jesús xihin Saulo. Ta ñandicani da ña co nayihví Saulo cahan da saha Jesús ñuu Damasco. ²⁸ Andá já ñandiquehe na Saulo ta ñacandoo da ñuu Jerusalén. Ta ñacasáhá xíca nuu da xihin na apóstol. ²⁹ Ta co yihví da cáhan da sahá Jesús. Ta ñanditúhún da xihin na ñaquixi chichi Israel, na cáhan tuhun griego ndúu ñuu cán. Joo mé na cán ndúcú na ndá quiahva caja na cahní na da. ³⁰ Tá ñacandaa ini na cúu cuéntá Jesús ña ndúcú na cahní na Saulo já ñéhe na da cuahan da ñuu Cesarea. Andá já ñachindahá na da cuanúhu dá ñuu Tarso.

³¹ Andá já ñanduu vaha ini tóco ndihí na cúu cuéntá Jesús ndúu ndijáá estado

Judea xihin estado Galilea xihin estado Samaria. Ta nandindacú chága ví ini na xihin tuhun Ndióxi. Ta xihin ndinuhu ini na cája cáhnu na Ndióxi. Ta chindeé ini-ma yí mé á na. Ta já nandicuaḥa chága na cuḥan na.

Ndivaha in da naní Eneas

³² Ta ndaja coo xíca nuu Pedro xító nihni da na cúu cuéntá Jesús ndúu ñuu válí cán. Ta já nasahan ri da xító nihni da na cúu cuéntá Jesús ndúu ñuu Lida. ³³ Cán nanditahan da in dataa naní Eneas, da naxihí tuchu saḥa. Ta tixi unā cuia nasandúhu dá jáchi a cuú caca da. ³⁴ Anda já nacahan Pedro xihin dá já nacachi da já:

—Eneas, viti ndája vaha Jesucristo yohó. Cuáhán ndacoo. Nditivún yívun — cáchi Pedro xihin dá.

Chí ivi laá nandacoo Eneas. ³⁵ Tóco ndihi na ndúu ñuu Lida xihin na ñuu Sarón naxini na da nandivaha yóho ta anda já najándacoo na costumbre yatá nasacaja na já nandiquehe na íchi cuéntá Jesús, xitoho í.

Ndítacu in ñañáḥa naní Dorcas

³⁶ Ta ndaja coo nasahin in ñañáḥa, ná cúu cuéntá Jesús ñuu Jope. Ta mé ñañáḥa yóho naní ná Tabita ta tuhun griego cáchi na Dorcas xihin ná. Ta mé Dorcas yóho ní tiempo nandihí ini ná cája ná ñamaní xihin ñayivi ta nachindeé ná na ndahví. ³⁷ Ta mé tañu já naquehe cueḥe Dorcas ta naxihí ña. Ta tá sa nandicata na yiquí cūñu ná já ñehe na ña nasahan na nachindúhu ná ña piso ñinu vehe cán. ³⁸ Ta yati va ñehe táhan ñuu Jope cán xihin ñuu Lida nu íin Pedro. Tá nacandaḥa ini na cúu cuéntá Jesús ña íin yati Pedro já nachindahá na ivi dataa nasahan da cana da Pedro ña ná cuhun quíí dá ñuu Jope cán.

³⁹ Anda já ndáca táhan Pedro cuḥan da xihin ndíví dataa cán. Tá naxinu coo

Pedro ñuu Jope cán já najáquihvi na da ini vehe nu ndácaan mé ndii Dorcas cán. Nataca tivivi cuḥá najihí cuáan ndúu na sácu ndivaha na saḥa ná naxihí cán. Ta najánaḥa na jáhma ña nacavaha Dorcas nu dá tá nasatacu ná. ⁴⁰ Anda já nacachi Pedro xihin ndihi ñayivi ndúu cán ña ná quee tóo na jatá vehe. Tá sa naqueta na cán já nacaxítí da xíca tahví da nu Ndióxi. Anda já nacasáḥa sándeḥé da ndii cán já nacasáḥa cáchi da já xihin ña:

—Cuáhán ndacoo, Tabita.

Tá nacachi da já chí ivi laá nanuna nduchú núu ña nanditacu ná. Tá naxini ná Pedro já nasacoo ná. ⁴¹ Anda já natiin Pedro ndáḥa ña já nandinehe da ña. Anda já nacana da na cúu cuéntá Jesús xihin na cuáan cán ná quihvi tucu na cán jáchi sa nanditacu ná. ⁴² Tóco ndihi ñayivi ñuu Jope cán nacandaḥa ini na ña nanditacu Dorcas chí cuḥa ná nacandúsa na Jesús ta nandihvi na íchi cuéntá mé á. ⁴³ Ta chí nacandoo Pedro cuḥá quivi ñuu Jope cán. Nacandoo tóo da vehe in da naní Simón, da ndája víí ní quíí.

Cáḥan Pedro tuhun vaha saḥa Jesús nu Cornelio

10 Ta ndaja coo nasahin in dataa naní Cornelio ñuu Cesarea cán. Ta mé Cornelio yóho cúu dá da cómi chuun nuú iñu ciento soldado. Ta mé táhndá soldado yóho naní a Táhndá Italiano. ² Ta mé Cornelio yóho xihin tóco ndihi na vehe da cája cáhnu na Ndióxi xihin ndinuhu ini na. Ta jása da jihuñ da ña chindeé da na naquixi chichi Israel. Ta ní tiempo xíca tahví da nu Ndióxi. ³ In quivi tátuhun caa uní sahini nani xíca tahví da nu Ndióxi já naxini cáxi táhyí da naquihvi in táto Ndióxi ini vehe nu ndácaan da já nacachi a já xihin dá:

—Cornelio.

⁴Ta chí nayihví Cornelio sándehe da táto Ndióxi cán. Anda já nacachi da já:

—Ndía cúní ndo, táto Ndióxi.

Anda já nanducú ñehe táto Ndióxi cán tuhun nu dá já cáchi a já xihín dá:

—Xíní johó Ndióxi tá xíca tahvún nu á ta sa xíní a ña nachindeé cuahún na ndahví. Ta táhán ini mé á xihín ña cájún.

⁵Ta viti cúní Ndióxi ña ná chindahún java dataa ná cuhún da ñuu Jope já ná cana da da naní Simón, da cáhan tucu na Pedro xihín ná quixi da. ⁶Íin tóo Pedro vehe inga da naní Simón, da ndája víí níí quítí. Ta yati yuhú tañuhú íin vehe da. Ta mé Pedro cán caxi tuhun da xuhun ndía ndítahan nuun cajún —nacachi táto Ndióxi cán.

⁷Tá sa naquee táto Ndióxi cán cuahan já nacana Cornelio iví mozo da ta nacana da in táhan soldado, da cómí da cuéntá saha. Ta mé soldado yóho cúú dá in da cája cáhnu Ndióxi. Ta cándéé ini Cornelio da. ⁸Ta tá nandihí nandicani Cornelio nu ndíhuni da ña nacachi táto Ndióxi xihín dá já nachindahá ñahá da cuahan da ñuu Jope.

⁹Ta inga quiví itaan xíca na cán cuahan na íchi ta sa yati xinu coo na ñuu Jope. Ta cúú á tátuhun caxiví ta mé hora já nandaa Pedro jiní véhe ca-ca tahví da nu Ndióxi. ¹⁰A juú quiahva cuíco Pedro chí naxica da ña cuxu da. Ta nani cája ndíví na ña cuxu da já najá-ñaha Ndióxi in ñaha nu dá. ¹¹Ta ña naxini da queá nandinuna indiví já nanuu in jáhma cáhnu tátuhun in sábaná ña ndí-co ndícomí tito ta núu a vaxi ñuyíví yóho xíní da. ¹²Ta mé ini jáhma cán ñúhu tá nuú quítí, rí comí saha xihín coo xihín laa viti. ¹³Anda já naxini johó da cáhan in a xihín dá já nacachi a já:

—Pedro. Candichi ta cahní quítí jan casún.

¹⁴Anda já nanducú ñehe Pedro tuhun já cáchi da já:

—A cája toho í já, xitoho í jáchi ni in túhún tañu a ñaha caxí í quítí quini tá-tuhun rí yóho. Jáchi cáchi ley nasahan ndó nuú nde ña ná a cáxi toho nde rí —cáchi Pedro xihín á.

¹⁵Anda já nacahan tucu a xihín dá já nacachi a já:

—Sa nandaja víí va Ndióxi rí jan. Saha ña cán queá coo ndítahan cachún ña cúú rí rí quini —cáchi a xihín dá.

¹⁶Tixi uní táhndá naxini da ña yóho nacaja Ndióxi. Anda já nandindita tucu jáhma cán cuahan chí indiví. ¹⁷Chí nacasáhá ndícani ini Pedro ndía cúní cachi ña naxini da. Ta xihín ña yóho naxinu coo ndíhuni dataa, da nachindahá Cornelio mé vehe nu íin Pedro cán. Jáchi vaxi da ndaca tuhún da sahá vehe Simón janda quiahva nanditahan da ña. ¹⁸Ndíta ndíhuni da cán yuyéhe vehe Simón ta cáyuhú da ndáca tuhún da sahá in da naní Simón, da cáhan tucu na Pedro xihín. ¹⁹Ta nani ndáca tuhún na yóho íin yíí va Pedro jiní véhe cán ndícani ini da sahá ña naxini da nacaja Ndióxi cán. Anda já nacahan ínima yíí Ndióxi xihín dá já cáchi a já:

—Candéhe, nandai cuu uní ta vehe yóho ta ndínducú da yohó. ²⁰Cuáhan nuu cuhún xihín dá ta a ndícani inún jáchi mí í nachindahá í da vaxi —cáchi a xihín Pedro.

²¹Anda já nanuu Pedro já naxinu da nu ndíta dataa nachindahá Cornelio cán. Já nacachi Pedro já xihín dá:

—Yehe cúú Pedro, da vaxi ndó ndínducú ndo ta viti cachi ndó xihín í ndá queá cúní ndo.

²²Anda já nanducú ñehe da cán tuhun nu Pedro já cáchi da já:

—Da naní Cornelio cúú da nachindahá ndehe vaxi nde. Mé Cornelio cúú dá in da cómí cuéntá sahá ínu ciento soldado. Mé dá cúú dá in ta cája ña ndaa. Ta cája cáhnu da Ndióxi. Ta quíhvi ndíva ha ini na Israel da. Ta nacahan in táto

Ndióxi xihín dá ña ná chindahá da ndehe cana nde ndohó cuhún ndó vehe da já ná cahan ndó xihín dá ndá queá cúní Ndióxi caja da —cáchi da xihín Pedro.

²³ Anda já najáyaha Pedro ndíhuni da-
taa cán ini vehe. Já nacandoo da cán naquiji da ñuu vehe Simón cán. Ta inga quiví itaan já naquee Pedro cuahan da xihín ndíhuni da-
taa cán. Ta ndáca Pedro java na cúu cuéntá Jesús ndúu ñuu Jope cán cuahan na xihín dá.

²⁴ Janda inga quiví itaan já naxinu coo na ñuu Cesarea nu fin Cornelio ndáti da na. Mé Cornelio yóho sa najátaca da tóco ndihi na vehe da xihín java na ñehe táhan vaha xihín dá ndúu na xihín dá ndáti na saa Pedro. ²⁵ Tá naxinu coo Pedro vehe cán já naqueta Cornelio ndiquehe ñahá da. Ta tá ndihi já nacaxítí Cornelio nu Pedro ña caja cáhnu ñahá da. ²⁶ Joo nasacu ndichi Pedro da já nacachi Pedro já xihín dá:

—Candichi jáchi ñayivi xihín mé vún cúu yehe.

²⁷ Sa já cahan Pedro xihín dá ndáca táhan da nandíhvi da ini vehe. Ta tá nandíhvi da cán já naxini Pedro nanditútú cuahá ñayivi ndúu na cán. ²⁸ Anda já nacasáhá Pedro cahan da xihín ná já cáchi da já:

—Sa xini vaha ndó ña cúu yehe in da naquixi chichi Israel. Ta sa xini ndó ña sáhdá ley nuú nde ña ná a catáhan nde xihín ñayivi tóho. Ta ni vehe na ná a ndíhvi nde cáchi ley. Joo viti najánaha Ndióxi nuú i ña coo cúu ndehe ñayivi víi chága a juú ga ndóho, na tóho. ²⁹ Sahá ña cán queá tá nacana ndó yehe ivi laá naquee e vaxi i. Ta ni coo nandaja ndíhí i da ndáca yehe vaxi i yóho. Ta viti cúní candaá ini i ndá cuéntá queá nacana ndó yehe vaxi i —cáchi Pedro.

³⁰ Anda já nanducú ñehe Cornelio tuhun nu Pedro já cáchi da já:

—Janda comí quiví tátuhun hora viti, xijuhun i ta xíca tahví i nu Ndióxi ndá-

caan i vehe e. Ta tá nasandehé e já naxini i in da-
taa ndíxí jahmá yehe cándichi da nuú i. ³¹ Já nacachi da já xihín i: “Cornelio, sa xini joho Ndióxi nu xíca tahvún nu á. Ta quehe a cuéntá sahá ñamani cájún xihín na ndahví. ³² Ña cán queá chindahá java da-
taa ná cuhún da ñuu Jope cana da Simón, da cahan tucu na Pedro xihín ná quixi da cahan da cuhún. Viti fin tóo da vehe in da naní Simón, da ndája víi níi quítí. Ta yati yuhú tañuhú ndácaan vehe da”, nacachi táto Ndióxi cán xihín i. ³³ Sahá ña cán queá ivi laá nachindahá i mozo i nasaa da nducú da ndohó. Ta vaha nacaja ndó vaxi ndó. Ta viti nanditútú ndihi nde ndáti nde nu Ndióxi. Ta cúní nde cuni joho nde tóco ndihi ña nasahnda Ndióxi nu ndó cachi ndó xihín nde —cáchi Cornelio xihín Pedro.

Cáxi tuhun Pedro nuú ñayivi vehe Cornelio

³⁴ Anda já nacasáhá cahan Pedro já nacachi da já:

—Viti candaá ini i ña coo na náhnu chága a juú ga inga na nu Ndióxi jáchi nu mé á in cúu ndihi ví. ³⁵ Ña cája mé á queá ndíquehe vaha ndá ñayivi nacuu tá cándéé ini na mé á ta cája na ña vaha. Coó caja toho a á cúu ná na Israel á na tóho. ³⁶ Nacaxi tuhun Ndióxi nuú ñayivi Israel ndá quiahva cuu coo vaha ini na tá cándéé ini na Jesucristo, mé á cúu xitoho toco ndihí. ³⁷ Sa candaá ini ndó ndaja nasahin tá nacasáhá Juan cáxi tuhun da nuú ñayivi ndúu estado Galilea ña ná ndicó coo ini na nuú cuachi na ta já ná candúta na. Ta nandicúita nuu tuhun ndijáá nu ndúu na Israel. ³⁸ Ta sa candaá ini ndó ndaja nacaja Ndióxi xihín Jesús, mé a naquixi ñuu Nazaret. Najándicutú ndaa Ndióxi Jesús xihín ínima yii mé á ta najándicutú a ña xihín ndéé mé á. Ta mé Jesús naxíca nuu a cája ndinuhu ña vaha xihín ñayivi.

Ta nandaja vaha mé á na nasandoho ini nacaja tiñáhá sacuaḥa. Nacaja Jesús ña yóho jáchi nasahiin Ndióxi xihin á. ³⁹Ta mé nde, na apóstol cúu na naxini ña nacaja Jesús tóco ndihi ña yóho tá nasahiin a estado Judea ta tá nasahiin a ñuu Jerusalén. Anda já nasahní na mé á tá nacata caa na a ndica crúxu. ⁴⁰Joo tá nayaha uní quiví já najánditacu Ndióxi Jesús ta nacaja Ndióxi ña ná naḥa Jesús mé á nuú nde. ⁴¹Coó nanaha toho Jesús mé á nu tóco ndihi ñayivi. Nuú ndeḥe, na naxaxi Ndióxi cuití va nanaha Jesús mé á. Jáchi janda jhna naxaxi mé á ndeḥe ña ná cuni nde ña ta ná caḥan nde xihin ñayivi saḥa mé á. Ta tá sa nanditacu tucu a tañu ndii cán já naxixi nde xihin á. ⁴²Ta mé á naxindahá ndeḥe caxi tūhun nde nuú ñayivi saḥa Jesús ta ná ndicani nde nu ná ña nasacu Ndióxi mé Jesús ña ná caja víí a saḥa ñayivi. Coó caja toho a á tácu na á naxihí na. ⁴³Ta jári na profeta va janda sanahá nacahan na saḥa Jesús ta nacachi na ña caja cáhnu ini Ndióxi saḥa cuachi ndijáá ñayivi tá ná candeé ini na mé á —cáchi Pedro xihin ndihi na ndúu vehe Cornelio cán.

Jándicutú Ndióxi na coó naquixi chichi Israel xihin ínimá yii mé á

⁴⁴Ta nani cáḥan Pedro cándichi da já naxinu ínimá yii Ndióxi najándicutú a ínimá tóco ndihi na táa johó ña cáḥan da cán. ⁴⁵Ta na cúu cuéntá Jesús, na naquixi chichi Israel, na ndáca Pedro vaxi xihin dá cán, nacatóntó na tá naxini na nandicutú na tóho cán xihin ínimá yii Ndióxi. ⁴⁶Ta xini na ña cúu á ña ndaa jáchi naxini johó ña cája cáhnu na Ndióxi ta cáḥan na inga tūhun ña coó nasatiahva na. ⁴⁷Anda já nacachi Pedro já:

—Cája i cuéntá ni in túhún toho ñayivi a cúu caji nuu nuú na tóho yóho ña ná candúta ná jáchi sa nandicutú ínimá ná

xihin ínimá yii Ndióxi tátūhun nandicutú mé nde xihin á —cáchi Pedro.

⁴⁸Anda já nasahnda Pedro chuun ña ná jácandúta ná na cuéntá Jesucristo. Tá nandihí já naxica tahví na cán nu Pedro ña ná candoo da chága quiví xihin ná.

Ndicani Pedro nuú na cúu cuéntá Jesús ndúu ñuu Jerusalén saḥa ña nayaha vehe Cornelio

11 Tóco ndihi na apóstol xihin na cúu cuéntá Jesús ndúu estado Judea nañeḥe ná tūhun ña nandiqueheri na coó naquixi chichi Israel tūhun Ndióxi. ²Ta tá nandicó coo Pedro chí ñuu Jerusalén já nacasáhá in táhnda na cúu cuéntá Jesús ndúu ñuu cán cáḥan núu na saḥa dá. Mé na yóho cáhán na ña ndítahan nuú na tóho caḥnda loho na yiquí cuñu na tátūhun íin costumbre na Israel. ³Já cáchi na já xihin dá:

—Ndá cuéntá quea nasahún naxito nhún na coó naquixi chichi Israel. Ta ndá cuéntá quea naxisún xihin ná. A váha toho nacajún cáhán nde —nacachi na Israel cán xihin Pedro.

⁴Anda já nacasáhá Pedro ndicani da tóco ndihi ña nayaha janda saḥa. Já nacachi da já:

⁵—Nasahin i ñuu Jope. Ta nani xíca tahví i nu Ndióxi já najánaḥa mé á in ñaha nuú i. Ta ña naxini i cúu in jáhma cáhnu tátūhun sáḥana nanuu chí indiví ta ndicómí xoo tito á nacaḥo. Ta chí janda yati nu íin i naxinu a. ⁶Ta tá nasandehé vaha i ini a já naxini i núhu tá nuú quití, rí comí saḥa xihin tá nuú quití yícú xihin coo xihin laa núhu ini a naxini i. ⁷Anda já naxini johó i cáḥan in a já nacachi a já xihín i: “Pedro, cuáhán ndaḥo cahní quití jan casún.” ⁸Anda já nanducú ñeḥe e tūhun já nacachi i já: “A cáxi toho i rí yóho, xitoho i jáchi co xini toho i caxí i quití quini tátūhun rí yóho”, cáchi i xihin Ndióxi. ⁹Anda já nacahan tucu a cán chí indiví já nacachi a já: “Sa

ñandaja vií va Ndióxi rí jan. Sáhá ña cán quéa co ndítahan cachún ña cúu rí rí quini”, ñacachi Ndióxi xihín i. ¹⁰ Uní táhnda ñayaha ña yóho ñacaja Ndióxi. Anda já ñandaa tucu tóco ndihi ña cán cuahan tucu a chí indiví. ¹¹ Ta chí sa mé hora já ñaxinu coo uní ñaa ndínducú ña yehe mé vehe nuú ñasahin tóo i cán. Ta ña cán ña quixi ña janda ñuu Cesarea ndínducú ña yehe. ¹² Ta já ñachindahá ínimá yíi Ndióxi yehe cuahan i xihín ná sahá ña cán quéa coo ñayihví i cuhun i xihín ná. Ta ndáca i ñuu ñanání yóho ñasahan ña xihín i. Tá ñaxinu coo ñe ñuu cán já ña quihvi ñe vehe Cornelio, ña ñachindahá ña cán ndínducú yehe. ¹³ Ta tá sa ñuhu ndihi ñe vehe Cornelio cán já ñacasahá ndícani ña nuú ñe ña ñaxini ña cándichi in táto Ndióxi ini vehe ña ñacachi a xihín dá já: “Chindahá java ña cuhun ña ñuu Jope cana ña in ña ñaní Simón, ña cáhan tucu ña Pedro xihín. ¹⁴ Ta ña cán caxi tuhun xuhun ta xihín ndihi ña vehún ñaja caju ndó caju ndaa ínimá ndó”, ñacachi táto Ndióxi xihín Cornelio cán. ¹⁵ Ta tá ñacasahá i cáhan i xihín ña vehe Cornelio cán já ñandicutú ña ínimá ná xihín ínimá yíi Ndióxi tá quíahva ñajándicutú a ínimá mí jihna. ¹⁶ Xihín ña yóho ñandicuhun ini i ña ñacachi Jesús, xitoho í xihín yo tá ñacachi a já: “Mé a ña ñajácandúta Juan ndohó xihín ticuí joo vaxi quívi jándicutú Ndióxi ndohó xihín ínimá yíi mé á”, ñacachi Jesús. ¹⁷ Ta tá sa ñasahan Ndióxi ínimá yíi mé á nuú ña cán tá quíahva ñacaja xihín mí sahá ña ñacandúsa í Jesucristo, xitoho í ama ná cani táhan i xihín Ndióxi sahá ña caju mé á xihín ña cán —ñacachi Pedro.

¹⁸ Tá ñaxini joho ña cán ña ñacachi Pedro já ñacatáji ná ta ñacaja cáhnu ña Ndióxi já ñacachi ña já:

—Mé a ña ñasahan ri Ndióxi ñamaní nuú ña tóho ña ná ndicó coo ini ña jándacoo ña cuachi caju ña já ná coo ña xihín

mé á anda ama caju quívi —ñacachi ña cúu cuéntá Jesús, ña ña quixi chíchi Israel cán.

Cuahá ña ñuu Antioquía ndíquehe ña íchi cuéntá Jesús

¹⁹ Tá ñandihí ñasahní ña Esteban já ñacasahá caju xíxi ña xihín ña cúu cuéntá Jesús. Anda já ñandicutá nuu ña cuahan ña ta java ña ñaxinu ña janda chí estado Fenicia. Java ña ñaxinu ña cuahan ña chí isla Chipre. Ta java ña ñaxinu ña chí ñuu Antioquía. Ta cán ñacasahá cáhan ña tuhun Ndióxi nuú ña ña quixi chíchi Israel cuití va. Joo coo ñacaxi tuhun ña ña nuú ña tóho cán. ²⁰ Joo java ña cúu cuéntá Jesús, ña ña quixi chí isla Chipre cán xihín ña ña quixi ñuu Cirene ñaxinu coo ña ñuu Antioquía ta ñacasahá ña cáhan ña tuhun vaha saha Jesús, xitoho í xihín ña coo ña quixi chíchi Israel ndúu cán. ²¹ Ta ñasahan Ndióxi cuahá ndéé mé á nu ná. Ta cuahá ndivaha ñayivi ñajándacoo ña costumbre yatá ña ta ñandíquehe ña íchi cuéntá Jesús, xitoho í.

²² Tá ñacandaa ini ña cúu cuéntá Jesús ndúu ñuu Jerusalén tóco ndihí ña ñayaha cán já ñachindahá ña Bernabé cuahan ña janda ñuu Antioquía cán. ²³ Tá ñaxinu coo Bernabé ñuu Antioquía cán já ñaxini ña ndá quíahva ñacaja Ndióxi ñamaní xihín ñayivi ñuu cán chí ñacajíi ndivaha ini ña. Ta ñacahan ña xihín ná ña ná candico ña íchi cuéntá Jesús xihín ndinuhu ini ña. ²⁴ Mé Bernabé yóho cúu dá in ña vaha. Ta chutú ña ínimá ña xihín ínimá yíi Ndióxi ta cándeé cáhnu ini ña mé á. Ta cuahá ñayivi ñandíquehe ña íchi cuéntá Jesús, xitoho í sahá ña ñacaja ña.

²⁵ Tá ñandihí já ñaquee Bernabé cuahan ña ndínducú ña Saulo chí ñuu Tarso. Ta tá ñandíñehe dá Saulo já ñehe ña ña cuahan ña chí ñuu Antioquía. ²⁶ Ta ñasanduu ña xihín ña cúu cuéntá Jesús

mé ñuu cán tátuhun in cuiã. Ta najá-
naha ña tuhun Ndióxi nuú cuahá ndi-
vaha ñayivi. Ta mé ñuu Antioquia cán
cúu nuú nu cuítí nasacu na quívi ná
cananí ña ña cúu cuéntá Jesús.

²⁷ Ta mé tiempo já ñaxinu çoo java na
profeta mé ñuu Antioquia cán. Mé pro-
feta yóho ñaxixi na chí ñuu Jerusalén ta
tiãha na jáyaha na tuhun cáhan Ndióxi
nuú ñayivi. ²⁸ Ta in táhan ña profeta cán,
ña naní Agabo ñandaca ndíchí ña tañu
ña cúu cuéntá Jesús mé vehe nuú ñataca
na cán. Já ñacachi da já:

—Cáxi tuhun ínimã yii Ndióxi xihín
i ña quixi in tamã ndeé ndivaha ndijáá
ñuyívi yóho —ñacachi da xihín ná.

Ta chí já ndusa ñasahíin jáchi ñaxixi
in tamã ndeé ndivaha tá nasacomí Clau-
dio cuéntá sahá ñayivi ñuu Roma. ²⁹ An-
da já ña cúu cuéntá Jesús ñuu Antioquia
cán najátaca na jjuhún chindeé ñahá ña
cán. Ta ndá quiahva xínu çoo nu mé ná
quiahva na, quiahva já sahan na. Anda
já ñachindahá ña ña nuú ña cúu cuéntá
Jesús ndúu estado Judea. ³⁰ Ta mé Saulo
xihín Bernabé cúu ña ñéhe jjuhún cán
cuahan ña ndiquiahva da ña nuú ña
sacuahã cómí cuéntá sahá ña cúu cuéntá
Jesús ndúu estado Judea cán.

Tá ñacasáhá ndóho chága ini ña cúu cuéntá Jesús

12 Ta mé tiempo já ñacasáhá
Herodes, ña cómí cuéntá sahá
ñuu Jerusalén cán cája xíxi da xihín
java ña cúu cuéntá Jesús. ² Nasahnda
da chuun ña ná cahní ña Jacobo, ñani
Juan xihín yuchú cán. Ta já ñacaja
na. ³ Ta tá ñaxini Herodes ña ñacajii
íní ña sacuahã veñuhu Israel xihín ña
ñasahní ña Jacobo já ñatiin ri da Pedro.
Ta ña yóho nasacuu a mé tiempo tá
cája ña Israel víco tá xíxi na pan ña
çoo cáva táhan yusá ñaxaa xihín. ⁴ Tá
sa ñachicaan Herodes Pedro vecaa já
ñasahnda da chuun nuú comí táhndá

soldado ña ná candaa na ña. Ta comí
comí ña ndáca in in táhndá cán. Mé
Herodes nasacu ini da tavá ña Pedro
vecaa ndiquiahva da ña nuú ñayivi
Israel ña ná cahní ña ña tá sa ná yaha
víco. ⁵ Nani ndácaan Pedro vecaa ndáá
vaha na ña. Joo ña cúu cuéntá Jesús
xihín ndinuhu ini na xíca tahví ña nu
Ndióxi sahá ña.

Tává Ndióxi Pedro vecaa

⁶ Ta in nuú sácú ini Herodes tavá
ña Pedro vecaa inga quívi itaan ña
ndiquiahva da ña nuú ñayivi, nduu. Joo
mé nuú já nani cándúhu Pedro quíji ña
tañu ivi soldado ta ndíco jjin ga cadena
ndáha dá ta çoo cáhan sahá java ga sol-
dado ndíta ndáá yéhe vecaa cán. ⁷ Ta
in náá cuití ñaxinu çoo in tátõ Ndióxi
ini vecaa cán chí ñandiyihvi ndaa ini a.
Anda já ñaxinu çoo mé tátõ Ndióxi nu
cándúhu Pedro já ñaxini a ndáha á yica
ndíca ña já ñandicáxi ini da. Anda já ña-
cachi a já xihín dá:

—Camún ndacoo quíun.

Anda já ñacuyu cadena ña nasandico
ndáha Pedro. ⁸ Anda já ñacachi tucu tátõ
Ndióxi cán já xihín dá:

—Ndaja tuun níí tísun ta cayihi
ndusun.

Ta tá sa ñacaja da ña já ñacachi tucu
tátõ Ndióxi já xihín dá:

—Quehe ticachí ñihnu chinúu jatun ná
çoo candico yehe —cáchi a xihín dá.

⁹ Anda já tácaa Pedro jata tátõ Ndióxi
cán cuahan ña. Joo çoo xini ña á jivi queá
á a juú a. “Sání ví”, cáhan ña. ¹⁰ Ta xíca
na casahan ña já ñayaha na nu ndíta in
táhndá soldado. Ta anda já ñayaha na
nu ndíta inga táhndá soldado. Ta tá sa
ñaxinu çoo na yéhe caa cán já ñanuna
mé va já ñaquee na vecaa cuahan ña. Ta
tá sa ñaxica chá ña cáyé cán já ñaquee
tátõ Ndióxi cán cuahan ta já ñacandoo
Pedro cán. ¹¹ Anda já ñacandaa ini Pedro
ña ñayaha. Ta ñacachi da já xihín mé dá:

—Viti ndusa cándaꝓ ini i ña mé a ndaa táhyí queá ñacaja táto Ndióxi yóho. Mé Ndióxi ñachindahá a táto á já ná tava a yehe ndáha Herodes já ná a cáhni da yehe tá quiahva cúni ña Israel —ñacachi da.

¹² Nani cáhan Pedro xíca da cuahan da vehe María, ña cúu náná Juan, da naní tucu Marcos. Cán ñanditútú cuahá ña cúu cuéntá Jesús ndúu na xíca tahví ña nu Ndióxi saha Pedro. ¹³ Ta tá ñaxinu coo da vehe María cán já ñacasáhá cáti ndáha dá yéhe cán. Anda já ñaxinu coo in ña loho naní Rode ña candehé ña ndá ña cándichi jata véhe cán. ¹⁴ Tá ñaxini johó ña cáhan da já ñandicuni ña tachí Pedro. Joo ñandindójó ña cuná ña yéhe sahá ña cájii íni ña. Ta já xínu ña ñandicó coo tucu ña ini vehe caxi tũhun ña xihín ña java cán ña cándichi Pedro jata véhe. ¹⁵ Joo tá ñandicani ña ña yóho nu ná já ñacachi na já xihín ña:

—Tachí va cúu yóho.

—Jivi da —cáchi ña cán ndúcú ndéé ña cáhan ña xihín ná.

Anda já ñacachi ña cán já:

—Ndá ínimã va da queá jan jáchi veca va ndácaan Pedro —ñacachi na.

¹⁶ Joo ndaja coo Pedro cáti ndáha yii va da yéhe cán. Já ñaxinu coo na ñasuná ña yéhe nu dá ta chí ñayihví ña tá ñaxini na da. ¹⁷ Joo ñacuu ndáha dá nu ná ña ná a cáhan chága ña. Anda já ñacasáhá da ndicani da nu ná ndaja ñacaja Ndióxi ñatavá a da veca cán. Ta já ñacachi da xihín ná:

—Ndicani ndó ña yóho nu Jacobo ta ndicani ndó ña nu tóco ndihi ña cúu cuéntá Jesús —ñacachi Pedro.

Anda já ñaqueta Pedro cuahan da.

¹⁸ Tá ñaxivi inga quiví itaan já ñacatóntó soldado veca cán tá ñacandaꝓ ini da ña coo Pedro iin veca ta coo ñaxini da ndáchí cuahan da. ¹⁹ Anda já ñasahnda Herodes chuun ña ná ndinducú ña da. Joo coo ñandinehe ná da.

Anda já ñacasáhá da ndája ndichi da soldado veca cán ndáchí cuahan Pedro. Joo coo ñacuu cachi ña cán ndáchí cuahan da. Sahá ña cán queá ñasahnda Herodes chuun ña ná cahni ndihi na soldado da ñasandaꝓ yéhe caa cán. Tá ñayaha ña yóho já ñajándacoo Herodes estado Judea cán ta ñaquee da cuahan da chí Cesarea coo da.

Quiví ñaxihí Herodes

²⁰ A juú quiahva xójo ini Herodes xihín ñayivi ndúu ñuu Tiro xihín ña ndúu ñuu Sidón. Joo ndívi ñuu cán ñajándique táhan na tũhun na cuhun ña cáhan ña xihín dá. Coo vaha ini na xihín dá cúni ña jáchi ñundáhyi rey cán cána tóco ndihi ña xíxi na. Joo jihna ñúhú ñandique táhan mání ná xihín in da naní Blasto. Mé Blasto yóho ñasacuu da in da cáhnu cája chúun nu rey cán. Ta ñacáhan ña ña ná cáhan ndahví da cán nu rey saha ná. ²¹ Ta ñasacu Herodes in quiví nditútú ndihi na nu dá. Ta tá ñatanda mé quiví já ñasacandixi Herodes jáhma vaha ndivaha da, ña sácandixi rey. Ta ñasacoo da nu sácoo rey. Ta já ñacáhan cóho da xihín ñayivi. ²² Tá ñaxinu coo ña cáhan da já ñacasáhá ñayivi cán cáyuhú ña já cáchi ña já:

—Ndióxi cúu da yóho ta coo cúu dá ndá ña ñacuu —cáchi ña cája cáhnu na Herodes cán.

²³ Ta chí sa mé hora já ñaxinu in táto Ndióxi ta ñacaja ña ná quehe Herodes cuehe jáchi coo ñacaja cáhnu da Ndióxi ta já ñasahan da ñamaní nuú ñayivi ña cáchi ña cúu dá ndiόxi. Chí sa mé hora já ñaquihvi ticujú yiquí cuñu da já ñaxihí da.

²⁴ Ta níi cúu ñandicuiña nuu tũhun vaha saha Jesús xíca cuahan. Ta chí ñandicuaha chága ña cúu cuéntá Jesús.

²⁵ Ta ndaja coo ñandiquiahva Bernabé xihín Saulo mé jihún nuú ña sacuaha veñuhu ndúu ñuu Jerusalén já ñandicó

çoo da cuahã da ñuu Antioquía. Ta ndáca na Juan, da naní tucu Marcos cuahã da xihĩn ná.

Cája chúun Bernabé xihĩn Saulo cuéntá Ndióxi

13 Ta ndaja coo tañu ña cúu cuéntá Jesús ndúu ñuu Antioquía cán ndúu ña cúu profeta ta ndúu ri ña já-ñaã tuhun Ndióxi. Ta ña yóho cúu quivĩ ná: Bernabé xihĩn Saulo xihĩn Simón, da cáhan ña Taa Tuún xihĩn, xihĩn Lucio, da ñuu Cirene xihĩn Manaén, da ñasahnu xihĩn Herodes. Mé Herodes yóho cúu dá da cómi cuéntá sahá ñayivi estado Galilea. ²In quivĩ nani ñanditútú ndihi na ndúu na xijuhun na ta cája cáhnu na Ndióxi já ñacahã ínimã yii mé á xihĩn ná já ñacachi a já:

—Tavá jíin ndó Bernabé xihĩn Saulo jáchi sa ñacaxi mí i chuun quiahva i nu ná caha na —ñacachi a.

³Ta tá sa ñandihĩ ñaxijuhun na ta tá ñandihĩ ñaxica tahví ña nu Ndióxi já ñachojó ña ndáha ná jini Saulo xihĩn Bernabé já ñandindayĩ ña ña cuahã ña caha na chuun Ndióxi.

Cáhan Saulo xihĩn Bernabé tuhun vaha saha Jesús isla Chipre

⁴Tá ñandihĩ já ñachindahá ínimã yii Ndióxi Saulo xihĩn Bernabé cuahã ña ñuu Seleucia. Ta cán ñandaa na barco cuahã ña isla Chipre. ⁵Ta ndáca na Juan, da naní tucu Marcos cuahã da xihĩn ná já ná chindeé da ña. Ta tá ñaxinu çoo na ñuu Salamina nu sá ndíchĩ barco cán já ñacasáhá ña cáhan ña tuhun Ndióxi nuú ñayivi táca veñuhu ña Israel cán. ⁶Níi cúu isla cán ñaxica nuu na jandã quiahva ñaxinu çoo na ñuu Pafos. Ta cán ñanditahan na in da tajĩ ñaquixi chichi Israel ta naní da Barjesús. Ta cúu dá in da tuhún jáchi cáchi da xihĩn ñayivi ña cáhan da cuéntá Ndióxi. ⁷Ta mé da tajĩ yóho ñasahĩn tuun da

xihĩn in da naní Sergio Paulo, da cúu gobernador nuú ñayivi isla Chipre cán. Ta ñasacuu da da ndíchĩ jini. Ta mé gobernador yóho ñacana da Bernabé xihĩn Saulo jáchi cúni da cuni johu da tuhun Ndióxi. ⁸Joo da tajĩ naní Barjesús, da naní tucu Elimas ñacasáhá da sáji nuu da nuú Bernabé xihĩn nuú Saulo jáchi ço cúni da ña ná candeé ini gobernador cán Jesús. ⁹Ñandicutú ndaa ínimã yii Ndióxi ini Saulo, da cáhan ña Pablo xihĩn já ñacasáhá sãndehé ndaa da nuú da tajĩ cán. ¹⁰Já ñacachi da já xihĩn dá:

—Yóhó cúun ña quini ta cúun jahyi tiñáhá, da xica jándahvi ñayivi. Ço cúun tóco ndihi ña vaha jáchi cunun caji nuún nuú ñayivi ná a ndíquehe na íchi cuéntá Jesús. ¹¹Ta viti jándoho Ndióxi inún. Jácuaã a yohó ta ni a cúun nuú candii tixi chá quivĩ —ñacachi Pablo xihĩn da tajĩ cán.

Tá ñacachi Pablo já chí ivi laã ñacuaã da cán. Jandá tiin ndaa na da xica da jáchi ço tívi nuu dá. ¹²Tá ñaxini da cúu gobernador cán ña yóho chí ivi laã ñacandúsa da Jesús. Jáchi chí cátóntó da xini johu da tóco ndihi ña cáhan ña saha Jesús.

Xinu çoo Pablo xihĩn Bernabé ñuu Antioquía ña ndácaan estado Pisidia

¹³Ñandaa Pablo xihĩn ña xica xihĩn dá barco ñuu Pafos cuahã ña chí ñuu Perge ña ndácaan estado Panfilia. Joo ñasahnda táhan Juan, da naní tucu Marcos xihĩn ná já ñandicó çoo da chí ñuu Jerusalén. ¹⁴Tá ñandihĩ já ñaquee Pablo xihĩn ña xica xihĩn dá ñuu Perge já ñaxinu ña ñuu Antioquía ña ndácaan estado Pisidia. Ta mé quivĩ ndíquehe ndéé ñayivi ñandihvi na veñuhu já ñasacoo na. ¹⁵Ta tá sa ñandihĩ ñacahvi na ley Moisés xihĩn ña ñacahví ña profeta já ñacana ña sacuaã veñuhu cán Pablo xihĩn ña xica xihĩn dá já ñacachi na já xihĩn ná:

—Ñani i, tá iin tũhun vaha cuni ndó caħan ndó xihín ñayivi yóho cuu candichi ndó caħan ndó xihín ná viti — nacachi na cán xihín dá.

¹⁶ Andá já nacandichi Pablo já nacuu ndáha dá nu ná catáji yúhu ná já nacasáhá cáchi dá já xihín ná:

—Cuni johó ndó ñayivi Israel xihín tóco ndihi ndó, na cája cáhnu Ndióxi.

¹⁷ Mé Ndióxi, mé a cája cáhnu ñayivi nación Israel nacaxi a tásáhnu jícó yo ta nacaja mé á ña ná ndicuaħá ndivaha na nani nasacuu na na tóho nación Egipto cán. Joo tá nandihí já natavá mé á na xihín ndée mé á. ¹⁸ Ta cáhnu nasahin ini Ndióxi sahá cuachi na tañu ivi jico cuia nani naxica nuu na yucú íchí cán.

¹⁹ Ta najándihí Ndióxi sahá usa nación ñayivi nasanduu ñundáhyi Canaán já najáyaha ñundáhyi jan ndáha tásáhnu jícó yo jáchi janda sanahá nasahan mé á tũhun a nu ná ña caja já xihín ná.

²⁰ Andá já nasahnda Ndióxi chuun nu juexe já ná cacomí na cuéntá saħa ná tixi comi ciento java cuia janda quiahva naxinu coo tiempo tá naquixi profeta Samuel, da jáyaha tũhun cáhan Ndióxi nuú ñayivi. ²¹ Andá já naxica tahví na Israel nu Ndióxi ña ná cacu mé á in rey ná cacomí da cuéntá saħa ná. Sahá ña cán quea nasacu Ndióxi in da naní Saúl ná cacuu da rey nu ná. Nasacuu da jahyi Cis, da naquixi chichi Benjamín.

Ta nasacomí Saúl cuéntá saħa ná tixi ivi jico cuia. ²² Tá nandihí já natavá Ndióxi Saúl já nachinúu a David ña ná cacomí da cuéntá saħa ná. Já nacachi Ndióxi já saħa dá: “fin vaha ini i xihín David, jahyi Isaf jáchi xini ña caja mé dá tóco ndihi ña cuni”, nacachi Ndióxi saħa David.

²³ Ta in da naquixi chichi mé David cán cúu Jesús, mé a nasahan Ndióxi tũhun a chindahá jácacu ñayivi Israel janda sanahá ndivaha. ²⁴ Ta janda tá cámaní quixi Jesús já naxica nuu Juan, da jácanduta ñayivi nacahan da xihín ñayivi ña

ndítahan nu ná jándicoo na cuachi cája na ta ná canduta ná. ²⁵ Ta tá sa yati quivi da já nacachi da já xihín ñayivi: “A juú caħán ndo ña cúu yeħe da nachindahá Ndióxi cacomí cuéntá saħa ñayivi, vaha. Jáchi ja chá xinu inga da fin chága saħa a juú ga yeħe. Ta da cán cacomí cuéntá saħa ndo ta cúu ndusa da cáhnu chága ta chí coo saħa mí i caxítí i ndaxí i correa ndusa dá”, nacachi Juan xihín ñayivi cán.

²⁶ Cuni johó vaha ndó, ñani i, na naquixi chichi Abraham xihín tóco ndihi ndó, na cája cáhnu Ndióxi xihín ndinuhu ini. Mé Ndióxi cuni a ña ná candaa ini ndó ña nachindahá mé á Jesús ñuyivi yóho já ná jácacu a ndohó já ná a cũhun ndó indayá. ²⁷ Tóco ndihi na ndúu ñuu Jerusalén xihín na sacuaħa coo nacandaa ini na ña nachindahá Ndióxi Jesús ñuyivi yóho. Ta ni coo nacandaa ini na tũhun nacahyí profeta saħa Jesús tá nasacahvi na ña veñuhu tá quivi ndiquehe ndée ná. Sahá ña cán quea nasahní na Jesús joo xihín ña nacaja na yóho najáxinu coo na ña nacachi profeta sanahá. ²⁸ Ta vatí coo nañeħe ná cuachi chicaan na jata Jesús joo naxica na ñamaní nu Pilato ña ná cahnda da chuun ña ná cahní na Jesús. ²⁹ Ta tá sa naxinu coo tóco ndihi ña cáchi tũhun Ndióxi saħa mé á coo anda já najánuu na a ndica cruxu já najánduxu na ña. ³⁰ Joo najánditacu Ndióxi Jesús tañu ndij. ³¹ Ta tixi cuahá quivi nanaha Jesús mé á nuú na nasaneħe táhan xihín á tá naquee a estado Galilea cuahan chí Jerusalén. Ta mé na cán cúu na xica cáhan saħa mé á nuú ñayivi viti.

³² Sahá ña cán quea cáxi tũhun nde tũhun vaha saħa Jesús nu ndóho viti jáchi janda saħa nacachi Ndióxi xihín tásáhnu jícó yo ña já coo. ³³ Ta tá najánditacu Ndióxi Jesús najáxinu coo a tũhun nasahan nu yó, na naquixi chichi na cán. Jáchi já nacahyí a nu Salmo ivi ta saħa

Jesús nacahan tá nacachi a já: “Jahyi mí i cúu yóhó. Ta yehe cája ña ná catacún quivi viti”, cáchi tuhun Ndióxi.³⁴ Joo Ndióxi sa nasahan va tuhun a ña jánditacu a Jesús já ná a táhyi yiquí cuñu a. Jáchi já nacahyi a ini libro yii mé á já cáchi a já: “Nu yóhó quiahva i tóco ndihi ña vaha, ña nasahan i tuhun i nu David quiahva i nu dá”, cáchi tuhun Ndióxi.³⁵ Já cáchi tucu inga Salmo já: “Mé ndó a quiahva toho ndó ñamaní tahyi yiquí cuñu i jáchi cúu u jahyi máni mé ndo, da cája chúun nu ndo”, cáchi tuhun Ndióxi.³⁶ Ta sa xini yo co cahan ña yóho sahá ña nacaja David jáchi tá nandihí nacaja da ña nasahnda Ndióxi nu dá já naxihí da ta najánduxu na da nuú nanduxu tásáhnú jícó da. Ta natahyi yiquí cuñu da cán.³⁷ Joo yiquí cuñu Jesús coo natahyi toho a jáchi najánditacu Ndióxi ña.³⁸ Ña cán queá vaxi nde caxi tuhun nde ña yóho nu ndo, ñani i já ná candaa ini ndó ña cája cahnú ini Ndióxi sahá cuachi ñayivi sahá ña nacaja Jesús tá naxihí a ndica crúxu.³⁹ Ta cája cahnú ini Ndióxi sahá cuachi ñayivi tá cándéé ini na Jesús. Jáchi ni in túhún ñayivi a cúu nduu ndaa nu Ndióxi sahá ña sácú vaha na ley Moisés.⁴⁰ Joo cuéntá coo ndó a juú ndoho ndó ña nacachi na profeta sanahá tá nacachi na já:⁴¹ Cuni johó vaha ndó, ndóhó na sácú ndaa ichi ña cahan Ndióxi. Catóntó ndo jáchi cama chá ndihi saha ndo. Jáchi yehe cúu Ndióxi ta cája i ña nahnú ndivaha, joo co cándúsa ndó ña cája i vatí ndicani java na ña nu ndo, nacachi Ndióxi sanahá —nacachi Pablo xihin ná.⁴² Ta tá naqueta Pablo xihin na xica xihin dá veñuhu na Israel cán já naxica ñayivi, na coo naquixi chichi Israel ñamaní nu dá ña ná cahan da xihin ná sahá tuhun Ndióxi inga quivi ndiquehe ndéé ná.⁴³ Tá naquee ndihi na veñuhu cán já cuahá na Israel xihin cuahá na tóho,

na cándúsa ley Moisés ta cája cahnú na Ndióxi nacasáhá na ndico na jatá Pablo xihin jatá Bernabé. Ta Pablo xihin Bernabé jánahá da na ña ná candéé cahnú ini na Ndióxi já ná caja mé á ñamaní xihin ná.

⁴⁴ Ta tá naxinu coo inga quivi ndiquehe ndéé ná já nataca tátuhun tóco ndihi ñayivi nuu veñuhu cán ña taa johó na tuhun Ndióxi cuni na.⁴⁵ Joo tá naxini na naquixi chichi Israel cán ña nataca cuahá ndivaha ñayivi já nacasáhá na Israel cáhivi ini na. Já nacasáhá na cahan núu na saha Pablo ta nacanahá na xihin dá.⁴⁶ Xihin ña cán nandindeé chága ini Pablo xihin Bernabé já nacasáhá cáchi da já:

—Jihna ñúhú ndítahan nuú nde caxi tuhun nde tuhun Ndióxi nu mé ndó, na naquixi chichi Israel. Joo sándehe nde ña co cuni toho ndó ndiquehe ndó ña. Ta cája nde cuéntá ña coo saha ndó cahun ndó indiví. Sahá ña cán queá vaha chága ná cahun nde cahan nde tuhun Ndióxi xihin na coo naquixi chichi Israel.⁴⁷ Jáchi já cáa chuun nasahnda Ndióxi nuú nde tá nacachi a já xihin nde: Nasacu yehe ndohó ña ná caxi tuhun ndó nuú ñayivi tóho ndúu ndijáá ñuyiví, já ná candaa ini na ndaja caja na ná cacu ndaa ínima ná, nacachi Ndióxi —nacachi Pablo xihin ná.

⁴⁸ Tá naxini johó na tóho, na coo naquixi chichi Israel cán ña yóho chí nacajii ini na já nacasáhá na cahan na ña cúu ndusa tuhun Ndióxi ña vaha. Ta tóco ndihi na nacaxi Ndióxi cacu ndaa ínima, nandihvi na ichi cuéntá mé á.⁴⁹ Já nasahjin nuú naxita nuu tuhun Ndióxi níí cúu ñundáhyi cán.⁵⁰ Joo na naquixi chichi Israel cán najándivaa na java najihí, na catóo cahun veñuhu, na co cahan núu ñayivi saha. Ta najándivaa na java dataa, da iin saha nuu cán ña ná ndicuita na xihin Pablo xihin Bernabé viti ta anda quiahva ná tavá na

da ñundáhyi cuéntá ñuu cán. ⁵¹Anda já naquiji nihni Pablo xihín Bernabé ña yácá ndusá saha mé dá já ná naha nuú na cán ña coó natahan ini da xihín ña cája na Israel cán. Já naquee da ñuu Antioquía cán cuahan da inga ñuu naní Iconio. ⁵²Ta na cúu cuéntá Jesús, na ñacandoo ñuu Antioquía cán ñandicutú ndaa ínima ná xihín ínima yii Ndióxi ta cájii ndivaha ini na.

Cahan Pablo xihín Bernabé tũhun Ndióxi nuú ñayivi ndúu ñuu Iconio

14 Tá naxinu Pablo xihín Bernabé ñuu Iconio já ñandihvi da veñuhu nu ndítaca na Israel cán. Ta cán ñacahan da tũhun vaha saha Jesús nu ná. Ta cuhá ndivaha na Israel xihín na coó naquixi chichi Israel ñacandee ini na Jesús. ²Joo java na Israel, na coó ñacandúsa tũhun Ndióxi ñacasáhá na cáva na jini ñayivi, na coó naquixi chichi Israel ña ná cahan núu na sahá na cúu cuéntá Jesús. ³Sahá ña cán queá nasanduu nahá chága ví Pablo xihín Bernabé mé ñuu cán. Ta co ná yihví na cahan chága ví na tũhun Ndióxi jáchi cándee ini na Jesús, xitoho na. Ta nasahan Ndióxi ndee á nu ná ña ná cuu caha na cuhá nuú ña náhnu ta xihín ña yóho ñacandaa ini ñayivi ña mé a ndaa táhyí quíhvi ini ndusa Ndióxi ñayivi. ⁴Joo ñayivi ñuu cán ñacasáhá na sáhdá táhan na jáchi java na cuahan na jatá na Israel ta java na cuahan jatá na apóstol cán. ⁵Anda já na Israel xihín na coó naquixi chichi Israel najandique táhan na tũhun na xihín na jutixia ñuu cán ña ndúcú na canahá quini na xihín na apóstol ta nducú na cahní na da xihín yuu. ⁶Joo tá ñacandaa ini Pablo xihín Bernabé ña sácú ini na cán caha xíxi na xihín dá já naxinu da cuahan da chí estado Licaonia. Naxinu coo da ñuu Listra xihín ñuu Derbe xihín java ga ñuu válí ñuhu ndijáa chí cán. ⁷Ta cán ñacahan

ri da tũhun vaha saha Jesús nuú ñayivi ndúu cán va.

Cúun na yuu Pablo ñuu Listra

⁸Tá naxinu coo da ñuu Listra cán já ñandique táhan da xihín in dataa, da a cúu caca. Ta fin coo da cán jáchi cúu dá da quíhvi saha janda tá ñacacu da cáa da já. ⁹Ta fin coo da quíhvi saha yóho táa johu da nu cahan Pablo. Anda já ñandicoto nihni Pablo nu dá ta cándaa ini Pablo ña cuu ndivaha da jáchi cándee ini da quíhvi cán Ndióxi. ¹⁰Sahá ña cán queá ñacayuhú Pablo nu dá já cáchi da já:

—Cuahán candichi —ñacachi Pablo.

Ta chí ivi laá ñacandita da ta ñacasáhá xíca da. ¹¹Tá naxini ñayivi ñuu cán ña ñandaja vaha Pablo da cán já ñacasáhá na cán cáyuhú cóhó na mé tũhun cahan na ñuu Licaonia, ña co cándaa ini Pablo. Já cáchi na já:

—Ndióxi cúu da yóho ña naquixi indiví túní a ñehe cuití da nahná ñayivi —cáchi na cáyuhú na tũhun mé ná.

¹²Ñacachi na cán ña Bernabé cúu dá in ndióxi naní Júpiter. Ta Pablo cúu dá in ndióxi naní Mercurio cáchi na jáchi mé dá cúu da cahan chága. ¹³Ta da cúu jutú nuú veñuhu Júpiter, ña ndácaan yuhú ñuu cán ñehe da tindiquí xihín cuhá ita jáchi ndúcú ndihi na cán cahní na tindiquí joco na rí nu Pablo xihín nuú Bernabé caha cáhnu na da. ¹⁴Joo tá ñacandaa ini Pablo xihín Bernabé ña ndúcú na cán caha cáhnu na da já ñandatá da jáhma dá sahá ña co táhán ini da xihín ña cája na. Ta já ñacasáhá na xínu na naquihvi na tañu ñayivi cán. Ta cáyuhú Pablo já cáchi da já xihín ná:

¹⁵—Candehé ndo. A váha toho ña ndúcú ndó caha ndó yóho jáchi ñayivi xihín mé va ndó cúu ndehe. Ndá cuéntá queá cúní ndó caha cáhnu ndó ndehe. Ta chuun vaxi nde yóho queá caxi tũhun nde xihín ndó tũhun vaha saha Jesús. Ta

ja ndítahan nu ndo jándacoo ndó ña a váha jan. Ta candico ndó Ndióxi tácu, mé á nacavaha indivi xihin ñuyivi xihin tañuhú xihin tóco ndihi ñaha ndúu nuú in in ña cán. ¹⁶ Anda sanahá najándicoo ndáha Ndióxi ñayivi ndijáá nación caja na ndía cúní mé va na caja na. ¹⁷ Joo níí tiempo najánaha Ndióxi yo cúú mé á nu ná jáchi níí tiempo nacaja va ha mé á xihin ná. Mé a chindahá javi nu yo. Ta mé á cája ña ná cana va ha ñundáhyi yo. Ta cája mé á ña ná a cámani ña cuxú já ná cajii íní yo —nacachi Pablo xihin na cán.

¹⁸ Ta vatí nacahan Pablo tuhun yóho xihin ná joo ihvi ndivaha já nacava da jini ñayivi cán ña ná a cáhni na tindiqui joco na nu dá ña caja cáhnu na da.

¹⁹ Tá nandihí já naxinu coo java na Israel, na naquixi ñuu Antioquía xihin java na naquixi chí ñuu Iconio. Já nacava na jini ñayivi já nacati na nacuun na yuu Pablo. Ta tá sa nacahan na naxihí da já ñúhu na da nasahan na najácana na da yuhú ñuu. ²⁰ Joo na cúú cuéntá Jesús nataca na ta nacava nuu na nu cánduhu Pablo ta já nandacoo da já naquihvi tucu da ñuu cán. Ta inga quivi itaan já naquee da xihin Bernabé cuahan da ñuu Derbe.

²¹ Tá naxinu coo ndívi da cán ñuu Derbe já nacasáhá da cáxi tuhun da nuú ñayivi sahá Jesús ta cuaha ná nandiquehe íchi cuéntá Jesús ñuu cán. Anda javi nandico coo Pablo xihin Bernabé chí ñuu Listra xihin ñuu Iconio já naquee da cuahan da chí Antioquía. ²² Ta mé ñuu cán najácahan da na cúú cuéntá Jesús ña ná coo ndacú chága na ta ná a jándacoo na ña cándeé ini na Jesús. Ta nacachi da ña já ndusa ndoho ndivaha ini na janda quiahva ná xinu coo na cacomí Ndióxi cuéntá saha ná. ²³ Tá nandihí já nasacu Pablo xihin Bernabé java da sacuaha ña ná cacomí da cuéntá sahá na cúú cuéntá Jesús in in ñuu cán. Ta tá nandihí naxijuhun na ta

naxica tahvi na nu Ndióxi saha ná já nandiquiahva da na ndáha Ndióxi ña ná candaa mé á na jáchi cándeé ini na mé á.

Ndíco coo Pablo xihin Bernabé ñuu Antioquía ña ndacaan estado Siria

²⁴ Tá nandihí já nayaha Pablo xihin Bernabé chí estado Pisidia janda quiahva naxinu coo na ñundáhyi cuéntá Panfilia. ²⁵ Ta nacahan na tuhun va ha saha Jesús nuú ñayivi ñuu Perge. Anda já naquee na cuahan na chí ñuu Atalia. ²⁶ Ta ñuu Atalia cán nandaa na barco já nandico coo na chí Antioquía nuú naquee na jinha. Jáchi mé cán cúú nuú nandiquiahva na da ndáha Ndióxi ña ná caja da chuun mé á. Ta viti sa najándihí da chuun natahnda nu dá cán. ²⁷ Tá naxinu coo Pablo xihin Bernabé mé ñuu Antioquía cán já najátaca da tóco ndihi na cúú cuéntá Jesús ndúu ñuu cán já nandicani da tóco ndihi ña nacaja Ndióxi xihin dá. Nandicani da ndá quiahva nasahan Ndióxi ña maní nuú na coo naquixi chíchi Israel ña ná ndiquehe na íchi cuéntá mé á. ²⁸ Ta nacandoo nahá Pablo xihin Bernabé ñuu Antioquía cán xihin na cúú cuéntá Jesús.

Ndítaca na sacuaha cuéntá Jesús

15 Ta ndaja coo mé tiempo já java dataa, da naquixi chí estado Judea naxinu da ñuu Antioquía cán. Ta nacasáhá na jánaha na nuú na cúú cuéntá Jesús ña ndítahan nu ná caja na ña cáchi ley Moisés ña ná chacaan na marca yiquí cuñu na já ná cuu jácau Ndióxi na. ² Joo Pablo xihin Bernabé nacasáhá cáni táhan ndeé yúhu dá xihin na Judea cán sahá ña yóho. Ta sahá ña nandituhún cuaha ná sahá ña yóho sahá ña cán quea nasacu ini na cúú cuéntá Jesús cán chindahá na Pablo xihin Bernabé xihin java ga da cúú cuéntá Jesús ña ná cuhun na ñuu Jerusalén já ná ndituhún chága na sahá ña yóho xihin na apóstol

ta xihín na sacuahá cómi cuéntá sahá na cúu cuéntá Jesús ndúu Jerusalén cán.

³Anda já na cúu cuéntá Jesús ndúu Antioquía nachindahá na na cán chí naquee na cuahan na. Ta nu xíca na cuahan na cán nayaha na chí ñundáhyi Fenicia xihín ñundáhyi Samaria. Ta cán nandicani na nuú na cúu cuéntá Jesús ndá quiahva nandiquehe na coó naquixi chichi Israel íchi cuéntá Jesús ta já najándacoo na costumbre yatá nasacaja na jihna. Chí nacajii ndivaha ini na cúu cuéntá Jesús cán tá naxini johu na ña yóho.

⁴Tá naxinu coo Pablo xihín Bernabé xihín java ga na cán ñuu Jerusalén já nandiquehe vaha na cúu cuéntá Jesús ndúu ñuu cán na. Ta jári na apóstol xihín na sacuahá veñuhu cán nandiquehe vaha na na. Anda já nandicani Pablo nuú na cán tóco ndihi ña náhnu nacaja Ndióxi xihín dá. ⁵Joo java na fariseo, na sa ndiquehe íchi cuéntá Jesús nandaca ndichi na já nacasáhá cáchi na já:

—Ndítahan nuú na cúu cuéntá Jesús, na coó naquixi chichi Israel chicao na marca yiquí cuñu na. Ta ndítahan nu mí cahan í xihín ná ña ná cacu vaha na ley Moisés —nacachi na fariseo cán.

⁶Anda já nataca na apóstol xihín na sacuahá veñuhu ña ná nditúhún na ndaja coo sahá ña yóho. ⁷Sa nanditúhún cuahá ndivaha na cán sahá ña yóho. Anda já nandaca ndichi Pablo tañu na cán ta já nacachi da já:

—Sa xíni vaha ndó, ñani i ña nacaxi Ndióxi yehe jihna ña ná caxi tuhún i tuhun vaha saha Jesús nuú na coó naquixi chichi Israel já ná candeé ri ini na cán va Jesús ña ná jácau Ndióxi na. ⁸Ta mé Ndióxi, mé a xíni ndaja cáa ínima in in ñayivi, mé a cán queá najá-naha nu yo ña ndiquehe vaha mé á na tóho. Jáchi nasahan ínima yii mé á nu ná tá quiahva nacaja xihín mí, na naquixi chichi Israel. ⁹Ni in tühún toho í coo

cúu yo na vaha chága a juú ga inga na nu Ndióxi. Jáchi tá quiahva nandaja vií Ndióxi mí sahá ña candeé ini Jesucristo quiahva já nandaja vií ri a na cán va sahá ña candeé ini na Jesucristo. ¹⁰Ta viti cúu á tátuhun nandindójó ndó ña nacaja Ndióxi tá nachindahá Jesucristo quivi a sahá cuachí. Ta viti cuni ndó caja ndúsa ndó xihín na tóho yóho ña ná cacu vaha na ley Moisés. Ta sa cándaqa ini ndó ña ni mí ta ni tásáhnu jíco yo a cuú caja í cacu vaha í ley cán. ¹¹Joo ña candeé cáhnu ini queá ña jácau maní uun Ndióxi mí sahá ña táhvi ini Jesucristo saha mí. Ta quiahva já táhvi ri ini a sahá na tóho cán va —nacachi Pedro xihín ná.

¹²Ta xihín ña yóho nacatáji yúhu tóco ndihi na cán. Ta táa johu na tá nacasáhá Pablo xihín Bernabé ndícani da nu ná tóco ndihi ña náhnu xihín ña xitúhún ña nasahan Ndióxi ñamaní nu dá caja da nuú na coó naquixi chichi Israel cán. ¹³Tá nandihí nacahan da cán já nacasáhá Jacobo cáchi da já:

—Cuni johu ndó ná cahan i xihín ndó, ñani i. ¹⁴Sa nacaxi tuhún Simón, da naní tucu Pedro nu yo tá nu cuítí nacaja Ndióxi ñamaní xihín na tóho ta nacaxi a na ña ná nduu na ñayivi cuéntá mé á.

¹⁵Ta in quiahva cahan ña yóho xihín ña nacahyí na profeta sanahá tá nacahyí na ña nacachi Ndióxi:

¹⁶Tá sa nayaha tiempo já ndicó coo tucu ú. Ta tá quiahva nacaja cáhnu ñayivi yehe tá tiempo nasacomí David cuéntá sahá ñayivi Israel, quiahva já vaxi quivi caja i ña ná caja cáhnu tucu na yehe.

¹⁷Caja i já jáchi cuni ña ná ndinducú na tóho yehe ña ná cacuu u xitoho tóco ndihi na,

mé ná cúu ná nacaxi yehe ná cacuu na cuéntá mí i.

¹⁸Ña yóho queá nacachi Ndióxi sanahá ndivaha tá nacaxi tuhun a ndaja coo

tiempo viti —ñacachi Jacobo xihín na cán.

¹⁹ Já ñacachi tucu Jacobo já xihín ná:

—Sahá ña cán queá cáhan i ña co ndítahan caja ndúsa yó xihín na tóho cacu vaha na ley Moisés jáchi ñacasáhá ndíco na íchi cuéntá Ndióxi viti. ²⁰ Joo ña ndítahan caja í queá cahyí yo in carta ná cuhun a nuú na cúu cuéntá Jesús ndúu ñuu Antioquía já ná caja na ñamaní ña ná a cáxi na cuñu quíti, rí najoco ñayivi nuú tiniñu yúu. Ta ná a cóo na xihín na co cúu ñájíhi na á yí ná. Ta coto ná a cáxi na cuñu quíti, rí nasahnú. Ta coto ná a cáxi na nií. ²¹ Jáchi janda sanahá najáñaha na ña yóho nuú ñayivi ndijáá ñuu tá quivi ndíquehe ndée ná tá jánaha na ley Moisés nu ná ini veñuhu —ñacachi Jacobo xihín ná.

²² Anda já na apóstol xihín na sacuahá veñuhu cán xihín tóco ndihi na cúu cuéntá Jesús najándique táhan na tuhun na ña caxi na tañu tóco ndihi na cúu cuéntá Jesús cán java da ná cuhun ñuu Antioquía xihín Pablo xihín Bernabé. Ta da ñacaxi na cuhun cúu Judas, da naní tucu Barsabás xihín Silas. Ndívi da yóho cúu da ín saha nuú na cúu cuéntá Jesús cán. ²³ Ta ña yóho cúu tuhun ndáa nu carta ñehe na cán cuahan na:

“Tóco ndihi ndehe, na cúu apóstol xihín na sacuahá veñuhu xihín na cúu cuéntá Jesús ndúu ñuu yóho chindahá nde Ndióxi coo ndóhó, na cúu cuéntá Jesús, na coo ñaquixi chichi Israel, na ndúu ñuu Antioquía xihín ñundáhyi cuéntá Siria xihín Cilicia jan. ²⁴ Sa ñañehé nde tuhun ña ñaquee java na cúu cuéntá Jesús ñuu yóho ñasaa na chí jan tá coo ñaxica na ñamaní nuú nde cuhun na. Ta najáquihvi na ndóhó ta najájana na jiní ndó xihín tuhun cáhan na jáchi cáchi na xihín ndó ña ndítahan nu ndó chícaan ndó marca yiquí cuñu ndó ta ndítahan cacu vaha ndó ley Moisés já ná cuu cacu ndaa ínimá ndo.

²⁵ Sahá ña cán queá ñúhu johu ndihi nde ña ná caxi nde java ñaní já ná catáhan da xihín Pablo xihín Bernabé saa da coto niñi da ndóhó. ²⁶ Mé Pablo xihín Bernabé yóho ndúu tiaha da quivi da saha Jesucristo, mé a cúu xitoho í. ²⁷ Ta chindahá nde Judas xihín Silas já ná cáhan yahu mé ná xihín ndo já ná ndicani na saha tóco ndihi ña yóho nu ndo. ²⁸ Mé ínimá yíi Ndióxi najácahan ndehe ña co ndítahan nuú nde caja ndúsa nde xihín ndó cacu vaha ndó tóco ndihi ña sáhná ley Moisés. Joo ná cáhan nde xihín ndo ndía queá co ndítahan caja ndó: ²⁹ Coto a cáxi ndó cuñu quíti, rí najoco na nuú tiniñu yúu. Ta coto a cáxi ndo nií ta a cáxi ndó cuñu quíti, rí nasahnú. Ta coto a cóo ndó xihín ñájíhi á yí inga na. Tá ná cacu vaha ndó tóco ndihi ña yóho já queá cúu ndó na cája vaha. Ña yóho cúu tuhun cáhan nde xihín ndo ta ná coo Ndióxi xihín ndo.” Ña yóho cáchi carta ñachindahá na nuú na ñuu Antioquía cán.

³⁰ Anda já ñaquee na cán cuahan na ñuu Antioquía. Ta tá ñaxinu na ñuu Antioquía cán já najátaca na tóco ndihi na cúu cuéntá Jesús cán já ñandiquiahva na carta nu ná. ³¹ Ta tá ñandihí ñacahvi na cúu cuéntá Jesús mé carta já ñacajii ndivaha ini na jáchi ñandindeé chága ví ini na ñacaja ña cáchi carta cán. ³² Mé Judas xihín Silas cúu da profeta, da jáyaha tuhun cáhan Ndióxi nuú ñayivi. Ta xihín ña yóho ñasahan da cuahá tuhun ndeé ini na cúu cuéntá Jesús. ³³ Ñasanduu na cán chá quivi ta chí ñasacu ini Judas xihín Silas ndicó coo da ñuu Jerusalén jáchi cán ndúu na nachindahá ñahá ñuu Antioquía. Já ñandindayí na cúu cuéntá Jesús da ña ná coo vaha da tá cuhun da íchi. ³⁴ Joo ñasacu ini Silas candoo da ñuu Antioquía cán. ³⁵ Ta ñacandoo Pablo xihín Bernabé chága quivi ñuu Antioquía cán ta xihín cuahá java ga na najánaha chága na tuhun vaha saha Jesús nuú ñayivi.

Cuahan tucu Pablo cahan da tuhun vaha saha Jesús nuú ñayivi

³⁶ Tá nayaha quivi já nacachi Pablo já xihín Bernabé:

—Cóho coto nihní na cúu cuéntá Jesús ndúu ndijáá ñuu nuú naxica nuu í nacahan yó tuhun Ndióxi jihna já ná candehé yo á ndíco yií va na Jesús —nacachi da.

³⁷ Cándúsa Bernabé cuhun da joo cúni da candaca tucu da Juan, da cahan na Marcos xihin ña cuhun da xihin ná.

³⁸ Joo Pablo nacahán da ña vaha chága ná a cánehe na da cuhun da xihin ná jáchi najandacoo da na tá naxinu na estado Panfilia sahá ña cóo naxeen ga da caca nuu da caja da chuun Ndióxi xihin ná. ³⁹ Nanditúhún cuaha ná sahá ña yóho joo cóo nandique táhan tuhun na sahá ña cán queá nasahnda táhan na. Sahá ña cán queá ñañehe Bernabé Marcos cuahan xihin dá chí isla Chipre.

⁴⁰ Ta naxaxi Pablo Silas candaca táhan xihin dá. Ta naxica tahvi na cúu cuéntá Jesús nu Ndióxi saha dá ña ná chindeé a da nuú cuhun da. Anda já naquee da cuahan da. ⁴¹ Nayaha da chí ñundáhyi Siria xihín ñundáhyi Cilicia ta ní cúu nuú cuahan da sahan da tuhun ndeé ini na cúu cuéntá Jesús ña ná candee chága ini na mé á.

Cátahan Timoteo xica da xihin Pablo xihin Silas

16 Ta nayaha Pablo xihin Silas ñuu Derbe anda já naxinu cóo na ñuu Listra. Ta cán nandinehe ná in da cúu cuéntá Jesús, naní Timoteo, da cúu jahyi in ñá cúu cuéntá Jesús, ña naquixi chichi Israel. Ta tátá da cúu griego. ² Ta na cúu cuéntá Jesús ndúu ñuu Listra xihin na ndúu ñuu Iconio nacahan vaha na saha Timoteo. ³ Cúni Pablo ña ná catáhan Timoteo xihin dá caca nuu da xihin dá

sahá ña cán queá nacaja Pablo ña nachicaan na marca yiquí cuñu Timoteo tá quiahva cáchi ley Moisés já ná a cahan núu na Israel ndúu ndijáá ñuu válí cán saha dá. Jáchi sa xini vaha ndihi na cán ña cúu Timoteo jahyi in taa griego sahá ña cán queá cóo nachicaan na marca Timoteo tá loho chá da. ⁴ Ta já naquee ndihi na cán cuahan na ta ní cúu ñuu nu xica na cuahan na cáxi tuhun na nuú na cúu cuéntá Jesús ña ná caja na ña nacachi na sacuaha xihin na apóstol ndúu ñuu Jerusalén cán. ⁵ Xihin ña yóho nandindacú chága na cúu cuéntá Jesús ta candeé cáhnu chága ini na mé á. Ta in in quivi yaha joho ndicuaha chága ñayivi ndihvi ichi cuéntá Jesús.

Ña naxini Pablo nacaja Ndióxi tá nasahin da ñuu Troas

⁶ Ta nasaji ínima yií Ndióxi na cán ña ná a cuhun na estado Asia cahan na tuhun vaha saha Jesús nuú ñayivi cán. Sahá ña cán queá nayaha na ñundáhyi cuéntá Frigia xihin Galacia cuahan na. ⁷ Já naxinu cóo na yuhu estado Misia. Ta chí cán yaha na cuhun na ñundáhyi cuéntá Bitinia nacahán na. Joo cóo nasahan ínima yií Ndióxi ñamaní nu ná caja na ña. ⁸ Anda já nayaha saa na estado Misia janda quiahva naxinu cóo na in ñuu naní Troas. ⁹ Ta in ñuu nani iin da mé ñuu Troas cán nasani ndímáhnú Pablo. Ta ña naxini da cúu in taa, da naquixi chí estado Macedonia. Ta cándichi da cahan ndahvi da xihin Pablo já cáchi da já: “Naha ndó chí Macedonia yóho ña ná chindeé ndó ndehe.” ¹⁰ Tá nandicani Pablo ña yóho nuú nde chí ivi laá nacaja tiahva nde ñaha nde jáchi sa nacanda cáxi ini nde ña mé Ndióxi queá cána ndehe ña ná cuhun nde estado Macedonia cán já ná caxi tuhun nde tuhun vaha saha Jesús nuú ñayivi ndúu cán.

Xinu coo Pablo xihín na xíca xihín dá ñuu Filipos

¹¹ Tá nandihí já nandaa nde barco ñuu Troas já naquee nde cuahan ndacu nde isla naní Samotracia. Ta janda quivi itaan já naxinu coo nde ñuu Neápolis.

¹² Ta cán nanuu nde mé barco cuahan sáhá nde chí ñuu Filipos. Mé ñuu Filipos cán cúú á ñuu ña íin chága saha nuú java ga ñuu válí ñúhu chí Macedonia cán. Ta ndíco a ñuu Roma. Ta nasandu nde ñuu Filipos cán chá quivi. ¹³ Ta in quivi ndíquehe ndée ná já naquee nde cuahan nde yuhú ñuu yati yuhú yuta nu sá taca ñayivi xíca tahví na nu Ndióxi. Já nasacoo nde cán ta nacasáhá nde cáhan nde tuhun vaha saha Jesús nuú najihí, na táca cán. ¹⁴ In mé ñañáha cán naní ña Lidia ta cúú ñá ñá ñuu Tiatira. Mé Lidia yóho cúú ñá ñá jíco jáhma vaha ña color ndihí. Ta cúú ñá in ñá cája cáhnu Ndióxi. Ta nani xini johó ñá ña cáhan Pablo saha Jesús já nasuná Ndióxi xini túni ña já nacandúsa ñá ña cáhan Pablo cán. ¹⁵ Tá nandihí nacandúta ñá xihín na vehe ñá ta já cáhí ña já xihín nde:

—Tá ta mé a ndaa ndícuni ndó yehe ña cúú u cuéntá Jesús caja ndó ñamaní saa ndó vehe e coo ndó —nacachi ñá xihín nde.

Ta nacaja ndúsa ñá xihín nde chí nacandoo tóo nde vehe ñá cán.

¹⁶ Ta ndaja coo in tañu tá cuahan nde nu sá xíca tahví nde nu Ndióxi já nanditahan nde in ñá tacú, ñá ndacaan ínima quini ini. Ta cája ña cán ña ná ndicuni ini ñá. Mé ñá tacú yóho cúú ñá naxeen na. Ta mé xitoho ñá cán tává cuaha dá jiyuhún sahá ña ndícuni ini ñá. ¹⁷ Ta mé ñá tacú yóho nacasáhá ña ndíco ñá jata Pablo xihín jatá nde ta cáyuhú cóho ña já cáhí ña já:

—Da cája cáhnu Ndióxi, ña cáhnu íin indiví cúú da casahan yóho. Ta xíca da cáxi tuhun da xihín ndó ndá quiahva cuu

caacu ndaa ínima ndo —cáhí ña cáyuhú ña.

¹⁸ Já cuití já cuití cája ñá cuahá quivi janda quiahva co ndée ga ini Pablo xihín ña cája ñá. Chí nandicoto nihni Pablo nu ñá já nacachi da já xihín ínima quini ndacaan ini ñá cán:

—Xihín quivi Jesucristo sáhdá i chuun nuun ña ná queún ini ñá loho yóho —cáhí Pablo.

Chí ivi laá naqueta ínima quini cán cuahan.

¹⁹ Joo tá naxini na cúú xitoho ñá cán ña a cóo ga cana jiyuhún na caja ñá cán já ñatiin na Pablo xihín Silas já ñehe na da nasahan na vechúun nuú na jutixia. ²⁰ Tá naxinu coo na cán já nacachi na já xihín da cúú juéxe cán:

—Da naquixi chichi Israel yóho nandai cuu da jándinihi da ñayivi ñuu í. ²¹ Jáchi jánaha da costumbre mé va da nuú ñayivi. Ta mí a cuú candúsa í ta ni a cúú caja í costumbre da yóho jáchi cúú yó ñayivi ndíco ñuu Roma —nacachi na cán xihín juéxe.

²² Anda já nandicuíta ñayivi xihín dá. Já nasahnda juéxe cán chuun ña ná tavá na jáhma Pablo xihín Silas ta ná caní na ndíví da xihín yíto. ²³ Tá nandihí nacani quini ndivaha na da já nataán na da vecaa. Ta nasahnda na chuun nuú da ndáa vecaa cán ña ná candaa vaha da da. ²⁴ Tá natahnda chuun yóho nuú da ndáa vecaa cán já nachicaan da Pablo xihín Silas janda sa véhe cuí vecaa cán. Ta já nachicaan da saha dá tañu ivi yíto naní cepo já ná ndituun vaha da.

²⁵ Joo tátuhun java ñuú xíca tahví Pablo xihín Silas nu Ndióxi ta xíta da ña cája cáhnu da mé á nani táa johó java ga na ñúhu ini vecaa cán nu cáhan da. ²⁶ In jonáa cuití nacasáhá táan ndeé ndivaha chí janda yuu ndúhu sahá vecaa cán canda. Anda já nanuna tóco ndihi yéhe caa cán ta nacuyu cadena nasandico tóco ndihi na nasañuhu vecaa cán.

²⁷ Anda já nandicáxi ini da ndáá vecaa cán ta tá naxini da núná yéhé caa cán já natuhun da yuchú cáni dá ña cahni da mé dá jáchi nacahan da sa naquee ndihi na nasañuhu vecaa cán cuahan na. ²⁸ Joo nacayuhú Pablo nu dá já nacachi Pablo já xihin dá:

—A cáhni tohún yohó jáchi yóho ndúu ndihi va nde.

²⁹ Anda já naxica da ndáá vecaa cán in lámpara já xínu da nandihvi da nu ndúu na vecaa. Ta chí quíji mé dá xihin ña yihvi da já nacaxítí da nu Pablo xihin nu Silas. ³⁰ Tá nandihvi já natavá da na já nacasáhá ndáca tuhún da na já nacachi da já:

—Ndía ndítahan caja i já ná jácaçu ndaa Ndióxi ínimá i —nacachi da.

³¹ Anda já nanducú ñehe Pablo xihin Silas tuhún nu dá já cáchi da já xihin dá:

—Ndítahan candúsún Jesucristo, xi-toho í já ná caçu ndaa ínimun xihin ínimá tóco ndihi na vehún —nacachi da.

³² Anda já nacasáhá Pablo ndícani da tuhún vaha saha Jesús nuú da cán xihin nu tóco ndihi na ndúu vehe da cán. ³³ Ta mé hora já nacaja tátá da ndáá vecaa cán nuú nandicuehe jata Pablo xihin jata Silas nuú nacani yito cán. Ta tá nandihvi já nacandúta da ndáá vecaa cán xihin tóco ndihi na vehe da. ³⁴ Tá nandihvi já ndáca da Pablo xihin Silas nasahan da xihin dá vehe da. Ta cán nacaja ndívi na ña cuxu Pablo xihin Silas. Ta chí nacajii ndivaha ini da ndáá vecaa cán xihin na vehe da jáchi sa nandiquehe na íchi cuéntá Jesús.

³⁵ Ta naha inga quívi itaan já nachine-dahá na cúu juéxe cán policia nuú da ndáá vecaa cán ña ná janí da Pablo xihin Silas vecaa. ³⁶ Anda já nacachi da ndáá vecaa cán já xihin Pablo:

—Nasahnda na cúu juéxe chuun nuú i ña ná janí i ndohó cuhun ndo. Saha ña cán quea cáxi tuhún i xihin ndó cuahán

quee ndó ta ná cuhun Ndióxi xihin ndo —nacachi da xihin dá.

³⁷ Joo nacahan Pablo xihin da cúu policia cán já nacachi da já xihin ná:

—A váha toho nacaja na xihin nde jáchi cúu nde na romano ta na jutixia jan nacani quini na ndehe nu táhyi tóco ndihi ñayivi tá cámani caja víi na sahá nde. Ta tá nandihvi já nataán jíin ga na ndehe vecaa. Ta viti cúni na janí jehé na ndehe quee nde cuhun nde. Joo a váha toho cája na já. Saha ña cán quea a queta nde janda quiahva ná quixi mé ná tavá na ndehe já quee nde —nacachi Pablo xihin da cúu policia cán.

³⁸ Anda já nasahan na cúu policia nandicani na nuú na cúu juéxe ña nacachi Pablo xihin ná. Tá nacandaa ini na cúu juéxe cán ña cúu Pablo xihin Silas da romano chí nayihvi na. ³⁹ Anda já nasahan na naxica na ñamani nu Pablo xihin nu Silas ña ná caja cáhnu ini da sahá ña nacaja na. Já natavá na da vecaa ta tá nandihvi já naxica na ñamani nu dá ña ná quee da ñuu cán cuhun da. ⁴⁰ Tá naquee Pablo xihin Silas vecaa já nasahan na vehe ña naní Lidia. Ta tá nandihvi nandique táhan da xihin na cúu cuéntá Jesús ndúu cán já nasahan da tuhún ndéé ini na anda já naquee da cuahan da.

Ndínihvi ñayivi ñuu Tesalónica

17 Nani xica Pablo xihin Silas cuahan da íchi nayaha da chí ñuu naní Anfípolis xihin inga ñuu naní Apolonia anda quiahva naxinu coo na ñuu Tesalónica. Cán nasahin veñuhu nu táca na Israel. ² Ta sahá ña nacaan Pablo sahan da veñuhu quívi ndiquehe ndéé ná sahá ña cán quea naquihvi da veñuhu cán. Ta tíxi uní semana nacahan da tuhún Ndióxi xihin ná mé quívi ndiquehe ndéé ná. ³ Ta nu libro yii Ndióxi táva Pablo tuhún ndícani da nu ná ña ndítahan nuú Jesucristo

ndoho ini a. Ta tá sa nandihí naxihí a já nditacu a jáchi já cáchi libro yí Ndióxi coo. Já nacachi Pablo já xihín ná:

—Mé Jesús, mé a cáhan i saha nu ndo yóho, mé a yóho cúu Cristo, ña nachine-dahá Ndióxi cacomí cuéntá sahá ñayivi —nacachi Pablo.

⁴ Ta chí nacandúsa java na Israel ña nacachi Pablo xihín ná. Anda já nacatáhan na xihín Pablo xihín Silas xíca nuu na. Ta cuahá ri na griego, na sa cája cáhnu Ndióxi ndúu cán nacandúsa na ña nacachi Pablo xihín ná. Ta nacandúsa ri cuahá najihí, na íin toní núnú ñayivi xihín ta nandihvi na íchi cuéntá Jesús. ⁵ Joo na Israel, na co cándúsa Jesús nacasáhá cáhiví ini na. Sahá ña cán queá najátaca na java tãa quini, da coó chuun nu xíca nuu mé cáyé cán. Já nacasáhá na jándiníhi na ñayivi mé ñuu Tesalónica cán. Anda já cáti na nasahan na vehe in da naní Jasón. Ta xihín ña ndúsa naquihvi na vehe da cán ña ndínducú na Pablo xihín Silas ña tavá na da ndíquiáhva na da nuú na sacuahá ñuu cán. ⁶ Joo coo nandínehe ná Pablo xihín Silas cán sahá ña cán queá janda mé Jasón, da xihín ñaha vehe cán núnú na da xihín java ga na cúu cuéntá Jesús cuahan na nuú na jutixia ñuu cán. Tá nandihí já cáyuhú na já cáchi na já xihín na jutixia cán:

—Da naní Pablo xihín da naní Silas xíca nuu da ní cúu ñuyiví jájana da jini ñayivi. Ta quiahva já cúní da caja da xihín ñayivi ñuu í. ⁷ Ta da naní Jasón yóho nandiquehe vaha da da cán vehe da. Ta xihín ña cája na yóho náha ña co cája na ña sáhdá ley ñuu Roma ta ni co cája cáhnu na da cómí cuéntá sahá ñuu Roma. Jáchi mé na yóho xíca na cáhan na ña íin inga da cómí cuéntá sahá ñayivi. Ta cáchi na cúu dá in da naní Jesús —nacachi na.

⁸ Tá naxini johó ñayivi xihín na jutixia cán ña yóho chí nacasáhá na ndívaá na.

⁹ Joo nachahvi Jasón xihín java na cúu cuéntá Jesús cán jihún nuú na jutixia cán já najaní ñahá na.

Cuahan Pablo xihín Silas ñuu Berea

¹⁰ Ta tá sa nacuaá mé ñuu já nachine-dahá na cúu cuéntá Jesús cán Pablo xihín Silas já ná cuhun da chí ñuu Berea. Ta tá naxinu coo da ñuu Berea cán já nandihvi da veñuhu na Israel cán. ¹¹ Ta nasuná chága na Israel cán ínima ná a juú ga na ndúu ñuu Tesalónica chí cájii íni na nandiquehe na tuhun Ndióxi. Ta ndijáá ní quiví ndínducú na nuú tuhun Ndióxi ña á mé a ndaa cúu ña já-naha Pablo nu ná. ¹² Ta cuahá táhan na naquixi chichi Israel cán nandiquehe na íchi cuéntá Jesús. Ta cuahá najihí griego, na tácu ini nación cán xihín cuahá na-tãa griego nandiquehe na íchi cuéntá Jesús. ¹³ Joo tá nañehé na Israel ñuu Tesalónica tuhun ña íin Pablo ñuu Berea cáhan da tuhun Ndióxi nuú ñayivi chí iví laá nasahan na jándiníhi na ñayivi ñuu Berea cán já ná ndicuítá na xihín Pablo. ¹⁴ Joo iví laá na cúu cuéntá Jesús cán nachine-dahá na Pablo cuahan da yati yuhú tañuhú nani nacandoo Silas xihín Timoteo ñuu Berea cán. ¹⁵ Ta java na cúu cuéntá Jesús ndáca na Pablo ta nasanehe na da janda ñuu Atenas. Ta tá nandicó coo na cán ñuu Berea já ñéhe na chuun ña ná cuhun quí Silas xihín Timoteo ñuu Atenas ná ndique táhan da xihín Pablo.

Íin Pablo ñuu Atenas

¹⁶ Nani ndátí Pablo xinu coo Silas xihín Timoteo ñuu Atenas cán já nacasáhá ndíhi ini da jáchi ní cúu ñuu cán nachusú ndaa xihín cuahá tiniñu yúu ndícahán ñayivi ñuu cán. ¹⁷ Sahá ña cán queá nacasáhá Pablo cáhan da tuhun Ndióxi xihín na Israel ini veñuhu na. Ta quiahva já nacahan ri da tuhun Ndióxi xihín java na tóho, na cája cáhnu Ndióxi cán. Ta jári ndijáá ní quiví cáhan da

tuhun Ndióxi xihín ñayivi táca nuú yahvi ñuu cán. ¹⁸ Ta java taa, da jácuaha íchi cuénta Epicureos xihín da jácuaha íchi cuénta Estoicos ñacasáhá ndítuhún na xihín Pablo. Joo java na cán cáchi na saha Pablo ña cuahá ndivaha cáhan da ta co cándaq ini na ndá queá cáhan da. Ta java na cáchi na já saha dá:

—Á tá coo ta java ga ndióxi xica nuu da cáhan da saha —cáchi na.

Ñacachi na ña yóho saha Pablo jáchi ñaxica nuu mé dá cáhan da tuhun vaha saha Jesús ta cáhan da ña ñanditacu tucu Jesús. ¹⁹ Saha ña cán queá ndáca na Pablo cuahán ná in nuú naní Areópago jáchi cán cúu nu ndítaca ñayivi ndítuhún na. Ta tá ñaxinu coo Pablo cán já ñacasáhá ndáca tuhún na da já cáchi na já xihín dá:

—Á cajún ñamaní caxi tuhún xihín nde ndá cúu ña saá ña xícun jáñahún nuú ñayivi. ²⁰ Jáchi sa ñañehé nde tuhun ña cátontó ñayivi xihín ña jáñahún nu ná ta viti cúni nde candaq ini nde ndía queá jáñahún nu ná —ñacachi na xihín Pablo.

²¹ Ñacachi na já xihín Pablo jáchi tóco ndihi ñayivi Atenas xihín na tóho ndúu cán ndijáá ní quiví ndinuhu ini na ndítuhún na ñaha saá, ña ñaxini joho na jáñaha inga na.

²² Anda já ñacandichi Pablo tañu na ndúu mé nuú naní Areópago cán já ñacachi da já xihín ná:

—Candehé ndó, ñayivi ñuu Atenas. Candaq cáxi ini i ña cúu ndó ñayivi cátoó ndicahán cuahá nuú tñiñu yúu, ña cúu ndióxi ndo ta ndicahán ndó ña xihín ndinuhu ini ndó. ²³ Jáchi tá xica nuu i ñuu ndó já ñaxini i cuahá nunáa nu cája cáhnu ndó ña. Ta nu xica nuu i cán ñaxini i inga nunáa. Ta nunáa cán ndáa in tuhun ta cáchi a: “Náa yóho cúu nu ndicahán nde ndióxi co xini nde”, já ñaxini i cáchi a. Ta vatí co xini ndó Ndióxi ndicahán ndo cán joo cája cáhnu ndó ña. Ta

mé Ndióxi cán queá cúni cáhan i saha nu ndó viti.

²⁴ Mé Ndióxi cán queá ñacavaha ñuyiví xihín tóco ndihi ñaha in ñuyiví yóho. Ta mé á cómi a cuénta sahá indiví xihín ñuyiví. Ta co ndácaan toho mé á ini veñuhu ña ñacavaha ndahá ñayivi. ²⁵ Ta ni co xini ñuhú a chindeé ñayivi mé á jáchi sa mé á queá cája ña ña catacu mí. Mé Ndióxi queá sahan tachi yó nu yo ta mé á sahan tóco ndihi ñaha nu yo.

²⁶ Mé Ndióxi cán ñacavaha in taa nu cuítí. Ta tóco ndihi ñayivi ndúu ñuyiví ñaxixi na chichi mé taa, da ñacavaha Ndióxi cán. Tá ñandihí já ñajándicuita nuu Ndióxi ñayivi ñaxixi chichi da cán ní cúu ñuyiví já ñatahnda in in nación canduu a. Ta sa ñasacu ini Ndióxi ndaja tiempo canduu in in nación ñuyiví yóho ta ñasacu ini mé á ndáchi coo in in nación. ²⁷ Já ñacaja Ndióxi jáchi cúni a ña ná ndinducú ñayivi mé á ta já ná ndiñehé ná íchi cuénta mé á. Joo mé a ndaa yati va in Ndióxi nu tóco ndihi ñayivi. ²⁸ Jáchi mé á cája ña ná catacú ta ná canda yiquí cuñu í. Sañahá ñacachi java taa cuénta mé ndó já: “Cúu yó na vehe Ndióxi.” ²⁹ Joo tá mé a ndaa cúu yó na vehe Ndióxi co ndítahan cáhan yo ña Ndióxi cúu tñiñu yúu ña ñajándicuchu na xihín jiuñun cuán á xihín jiuñun cúxú. Ta ni co ndítahan cáhan yo ña Ndióxi cúu tñiñu yúu cávaha ndahá ñayivi xihín yuu. Jáchi jini mé va na ña ña cána ña cávaha na. ³⁰ Jihna ñasacu ini Ndióxi ña a jándoho toho a ini ñayivi sahá cuachi ñasacaja na jáchi co candaq ini na ña cúni mé á, nduu. Joo viti sahnda Ndióxi chuun nu tóco ndihi ñayivi ña ná ndicó coo ini na ta ná a cája cáhnu ga na tñiñu yúu. ³¹ Jáchi sa ñasacu Ndióxi in quiví caja víi a saha tóco ndihi ñayivi ndúu ñuyiví yóho. Ta sa ñacaxi mé á Jesús ña caja víi ndaa mé á saha ná. Ta ñajánditacu tucu Ndióxi

Jesús tá nandihí naxihí a. Ta xihín ña yóho nanaha nuú ñayivi ña mé a ndaa caja víi Jesús saha ná —ñacachi Pablo xihín ndihi na cán.

³² Tá naxini johó na cán ña cáchí Pablo ña vaxi quiví nditacu ndijí já ñacasáhá java na cán sácú ndaa na da. Joo java na cáchí na já xihín dá:

—Vaha chága ná cahún sahá ña jan nuú nde inga tañu —cáchí na xihín dá.

³³ Andá já ñaquee Pablo nu Areópago cán cuahan da. ³⁴ Joo java ñayivi, na nandúsa ña cáchí da ñacasáhá ndíco na da xíca na. Tañu na cán nasandacaan in da naní Dionisio, da cúu táhan na ndítaca Areópago cán. Ta tañu na nandúsa cán ndácaan ri in ñañáha naní Dámaris. Ta jári java chága na cándúsa nandihvi na íchí cuéntá Jesús.

Xínu coo Pablo ñuu Corinto

18 Tá nandihí já ñaquee Pablo ñuu Atenas cán já cuahan da chí ñuu Corinto. ² Ta mé cán nandique táhan da xihín in da Israel naní Aquila, da nasacuu estado Ponto. Ta jacá cúu saá va naxinu coo Aquila ñuu Corinto cán xihín ñájíhí da, ña naní Priscila. Ta ndíví na yóho sa ñaquee na ñuu Roma ndácaan nación Italia jáchí Claudio, da cómí cuéntá sahá na ñuu Roma cán nasahnda da chuun ña ná quee ndihi na Israel cuhun na. Ña cán queá naxinu Aquila xihín ñájíhí da ñuu Corinto cán. Andá já nasahan Pablo naxito nihni da na nu ndúu na cán. ³ Ta ñacandoo Pablo vehe na cán cája chúun da xihín ná jáchí sa mé chuun ña cája na cán tiahva ri da cán va. Ta chuun nasacaja na queá cávaha na vehe lona, ña ndeé. ⁴ Ta tá xínu coo quiví ndíquehe ndeé ná já sahan da veñuhu na Israel cahan da tuhun Ndióxi xihín ná. Ta já najaxinu da ini na Israel xihín na tóho já ñacasáhá na cándúsa na Jesús.

⁵ Ta ndaja coo najandacoo Silas xihín Timoteo estado Macedonia ta naxinu coo na ñuu Corinto cán. Andá jáví najandacoo Pablo chuun cája da cán já ñacasáhá da ndúcú ndeé chága da cahan da tuhun Ndióxi nuú ñayivi. Ta cáxí táhyí cahan da xihín na ñaquixi chichi Israel ña mé Jesús cúu á ña ndáti na chindahá Ndióxi quixi. ⁶ Joo na ñaquixi chichi Israel cán coo nandiquehe na tuhun cahan Pablo ta ñacasáhá canahá na xihín dá ta cahan núu na saha Jesús. Andá já ñaquixi nihni Pablo jáhma dá já ná candaa ini na ña co ndójo ga da cuachi sahá na Israel cán ta já ñacachi da já xihín ná:

—Tá ná cuhun ndó indayá ta cómí mé va ndó cuachi sahá. Joo yehe co ndójo ga i cuachi saha ndo jáchí sa ñacahan i tuhun Ndióxi xihín ndo ta co cúní ndó cándúsa ndó ña. Viti xihín chí nuu cuhun i cahan i tuhun vaha saha Jesús nuú na coo ñaquixi chichi Israel —ñacachi Pablo xihín ná.

⁷ Já ñaqueta da veñuhu na cán cuahan da. Já nasaa da vehe in da naní Justo, da cája cáhnu Ndióxi. Ta yati jín veñuhu cán fin vehe da. ⁸ Ta in da naní Crispo, da sahnáda chuun veñuhu cán ñacandúsa da Jesús, xitoho í xihín tóco ndihi na vehe da. Ta cuaha táhan mé na ñuu Corinto cán nandiquehe na íchí cuéntá Jesús ta ñacandúta ná tá naxini johó na tuhun Ndióxi ñacahan Pablo xihín ná. ⁹ Ta ndaja coo in nuú ñaquixi tátuhun in sani nu Pablo ta xihín ña cán ñacahan Ndióxi xihín dá já ñacachi a já:

—A yíhvún cahún sahá i nuú ñayivi ta coto a catáji yíhvun cahan chágun xihín ná saha i. ¹⁰ Jáchí fin vj xuhun ta ni in na a cúu tiin yohó ña ná caja xíxi na xuhun. Jáchí sa ndúu cuahá ndivaha ñayivi ñuu yóho, na cacuu cuéntá mí i —ñacachi Ndióxi xihín dá.

¹¹ Sahá ña cán queá nasahiin tóo Pablo in cuia java ñuu Corinto cán ta najánaha da tuhun Ndióxi nuú ñayivi cán.

¹² Joo mé tiempo cán ñacasáhá cómi in da naní Galión cuéntá sahá ñayivi estado Acaya nu ndácaan ñuu Corinto cán. Já nandique táhan ndihi na Israel ña cúní na caja xíxi na xihín Pablo chí ñatiin na da já ñéhe na da cuahan da vechúun. ¹³ Ta mé cán ñacasáhá cáhí na já xihín da cúu gobernador cán:

—Da naní Pablo yóho xíca da jácahan da ñayivi ña ndítahan nu ná caja cáhnu na Ndióxi ta co sáhndá ley yo cajú í já —cáhí na cán xihín gobernador.

¹⁴ Anda já ndúcu Pablo candichi da cahan da joo mé Galión cán ñacasáhá cáhí da já xihín na Israel cán:

—Tá cuachi ndeé ná caja da yóho já queá cuu cuni johó i nu cáhan ndo ná ndaja ndichi i saha dá, nduu. ¹⁵ Joo co cúní toho i caja víi sahá ña jan jáchi cúu á sahá tuhun cáhan ndo xihín sahá quívi ñayivi Israel xihín saha ley mé va ndó ña cán queá vaha chága ná caja víi mé va ndó sahá ña yóho —ñacachi da cúu gobernador cán xihín ná.

¹⁶ Tá nandihí já ñatavá da na Israel vechúun cán. ¹⁷ Anda já ñatiin tóco ndihi na griego cán da naní Sóstenes, da sáhndá chuun veñuhu cán. Ta ñatiin na da mé nu táhyí mé da cúu gobernador cán ñacani na da. Joo co ñasahní toho Galión mé dá sahá ña ñacaja na.

Ndicó coo tucu Pablo chí Antioquía

¹⁸ Cuahá va quívi ñacandoo tóo chága Pablo ñuu Corinto cán. Anda já ñandindayí da na cúu cuéntá Jesús ndúu cán já ñaquee da cuahan da ñundáhyi cuéntá Siria. Ta ndáca da Aquila xihín Priscila cuahan na xihín dá. Ta tá ñaxinu da ñuu Cencrea tá cámani ndaa da barco cuhun chága da chí nuu já najatá lahla da jini dá já ná xinu coo nuu tuhun ñacahan da. ¹⁹ Ta tá ñaxinu coo da ñuu Efeso xihín na ndáca táhan xihín dá cán já najándacoo da Priscila xihín Aquila. Ta ñaquee da cuahan da chí veñuhu ñuu Efeso cán nuu

ñacahan da tuhun Ndióxi nuu na Israel, na táca cán. ²⁰ Tá nandihí já ñacasáhá cáhan ndahví na Israel cán xihín Pablo ña ná candoo tóo da chága quívi xihín ná. Joo coo ñaxeen toho da. ²¹ Ña ñacaja da queá ñandindayí da na já ñacachi da já xihín ná:

—Ndítahan cuhun i coo i Jerusalén jáchi sa ñandindaa quívi vaxi víco. Joo ndicó coo tucu u coto nihni i ndohó tá cúní Ndióxi —ñacachi Pablo xihín ná.

Tá nandihí já ñandaa da barco ñaquee da ñuu Efeso. ²² Ta tá ñaxinu coo da ñuu Cesarea já ñaquee da cuahan da chí ñuu Jerusalén cahan Ndióxi da xihín na cúu cuéntá Jesús ndúu cán. Tá nandihí já ñaquee da cuahan da chí inga ñuu naní Antioquía. ²³ Ta tá nandihí nasahin da chá quívi cán já ñaquee tucu da cuahan da tá in tá in ñuu válí ñúhu chí estado Galacia xihín estado Frigia ña quiahva da tuhun ndeé ini na cúu cuéntá Jesús ndúu cán.

Cáhan Apolos tuhun Ndióxi nuu na ñuu Efeso

²⁴ Mé tañu já ñaxinu coo in da ñaquixi chichi Israel naní Apolos mé ñuu Efeso cán. Mé Apolos yóho cúu dá da ñacacu ñuu Alejandría. Ta cúu dá in da tiahva vaha tuhun Ndióxi ta tiahva vaha da jánaha da ña nuu ñayivi. ²⁵ Mé Apolos yóho sa najácuaha vaha da íchi cuéntá Jesús, xitoho í ta xihín ndinuhu ini da cáhan da saha mé á nuu ñayivi. Ta cáxi táhyí jánaha da saha Jesús nu ná. Ta ñacahan da xihín ná ña ndítahan candúta ñayivi tá quiahva najácandúta Juan ñayivi jihna. Joo co xini vaha da tóco ndihi ña najánaaha Jesús. ²⁶ Chí já ñaquihvi mé Apolos veñuhu cán cahan da tuhun Ndióxi xihín ñayivi jáchi co yíhvi da cahan da xihín ná. Ta ndaja coo ñaxini johó Priscila xihín Aquila nu cáhan da. Ta tá nandihí já ñéhe na da cuahan na já nandicani vaha chága na

nu dá ndaja íin íchì cuéntá Ndióxi. ²⁷ Ta tá nasacu ini Apolos cùhun da chí estado Acaya já nachindeé na cúu cuéntá Jesús da já ná cuu cùhun vaha da. Ta nacahí nà in carta nasahan na nu dá ná quiahva da ña nuú na cúu cuéntá Jesús ndúu cán já queá ná ndiquehe vaha na da. Ta tá naxinu coo Apolos yóho estado Acaya cán nachindeé cuahá ndivaha da na cúu cuéntá Jesús, na nacandéé ini mé á sahá ña nataví ini Ndióxi saha ná. ²⁸ Ta nu cáxi táhí ndihi ñayivi nanaha da ña a juú ña ndaa cúu ña jánaha na Israel nuú ñayivi. Ta xihín tuhun Ndióxi nanaha da nu ná ña mé Jesús cúu Cristo, mé a nachindahá Ndióxi cacomí cuéntá sahá ñayivi.

Tá íin Pablo ñuu Efeso

19 Ta nani íin Apolos ñuu Corinto cán já nayaha Pablo chí yúcu janda quiahva naxinu coo da ñuu Efeso. Ta cán nandiñehe dá java na cúu cuéntá Jesús. ² Já nandaca tuhún da na já nacachi da já xihín ná:

—Á nandicutú ndaa ínima ndo xihín ínima yii Ndióxi tá nacandúsa ndó Jesús —nacachi da xihín ná.

Já nanducú ñehe na cán tuhun nu dá já cáhí na já xihín dá:

—Chí a náha mé va candaá ini nde saha ínima yii Ndióxi jan —nacachi na cán xihín Pablo.

³ Andá já nandaca tuhún Pablo na já cáhí da já xihín ná:

—Ndaja vaha nacandúta ndo, dá já.

Andá já nanducú ñehe na cán tuhun nu dá já nacachi na já:

—Nacandúta nde tá quiahva najánaha Juan —nacachi na.

⁴ Andá já nacachi tucu Pablo já xihín ná:

—Najácandúta Juan ñayivi já ná naha na nuú ñayivi ña nandijama na ta co cája ga na cuachi nasacaja na jihna. Joo nacahan Juan xihín ná ña ndítahan nu ná

candúsa na inga da vaxi jata dá. Ta da nacahan Juan cán saha cúu Jesús, mé a nachindahá Ndióxi cacomí cuéntá sahá ñayivi —nacachi Pablo xihín ná.

⁵ Tá naxini johó na cán ña nacachi Pablo xihín ná chí ivi laá nacandúta ná cuéntá Jesús, mé a cúu xitoho í. ⁶ Ta tá nachojó Pablo ndáha dá jini ná já naxinu ínima yii Ndióxi najándicutú a ini na. Andá já nacasahá na ndícatan na inga tuhun ña coó nasatiahva na. Ta jáyaha na tuhun nacahan Ndióxi nuú na ndúu cán. ⁷ Ta tixi ndihi na cán cúu ná tátuhun uxu ivi taa.

⁸ Ta tixi uni yoo nasahin Pablo ñuu cán sahan da veñuhu jánaha da saha Jesús nuú ñayivi xihín ndinuhu ini da. Ta jáxinu da ini ñayivi ña ná ndihvi na íchì cuéntá Jesús já cuu cacomí mé á cuéntá saha ná. ⁹ Joo java na cán saá ini na ta coó naxeen na candúsa na nu cáhan da. Ña nacaja na queá nacasahá cáhan núu na sahá tuhun vaha cáhan saha Jesús nuú ñayivi. Sahá ña cán queá natavá xoo Pablo na cúu cuéntá Jesús tañu na cán já nasahan ndaca da na in vehe escuela nu fin in da naní Tiranno ta cán jánaha Pablo tuhun Ndióxi nu ná ndijáá ní quivi. ¹⁰ Já nasacaja Pablo tixi ivi cuia ta xihín ña cája da naxini johó ndihi na ndúu estado Asia tuhun vaha saha Jesús, xitoho í. Ta na naxini johó tuhun Ndióxi cán cúu ná na naquixi chichi Israel xihín na tóho viti. ¹¹ Ta nacaja Ndióxi ña ná cuu caja Pablo cuahá ña xituhún nuú ñayivi ndúu cán. ¹² Jáchi janda pañito á jáhma ña cáni ndaa Pablo cán ñehe na ña cuahan na ta jácani ndaa na ña na quíhvi xihín á chí ndívaha na. Ta tá ñúhu ínima quini ini na janda rí cán queta cuahan.

¹³ Joo java na Israel, na co cúu cuéntá Jesús xica nuu na tává na ínima quini ñúhu ini ñayivi. Ta ndaja coo nasacu ini na caja chúun na quivi Jesús, xitoho í, ña

ná tavá nā ínima quini. Já nacachi nā cán já xihín ínima quini ndácaan ini ñayivi:

—Xihín quivi Jesús ña xica nuu Pablo cáhan da saha, sáhdá nde chuun nuun ña ná queún cuhun —nacachi nā cán.

¹⁴ Já nacaja ndihusa jahyi in da naní Esceva, da cúu da sacuaḥa nuú jutu veñuhu nā Israel ndúu ñuu cán. ¹⁵ Joo tá nacachi na ña yóho xihín rí quini ñuhu ini in dataa já nanducú ñehe rí cán tuhun nu ná já cáhí rí já:

—Xini vi yóo cúu Jesús ta xini ri ndá da cúu Pablo va. Joo mé ndó, co xini toho i ndohó —nacachi rí quini.

¹⁶ Tá nacachi ínima quini cán já chí ivi laá nandava dataa ndácaan ínima quini ini cán jata ndihusa nā cán ta nacaja xixi quini da xihín ná jáchi a juú quiahva ndacú da. Quini nacaja da cán xihín ná anda naxinu lahla ndihi na jata véhe ta chí a váha na nandicueḥe nā nacaja ínima quini cán. ¹⁷ Ta chí nacandaa ini ndihi ñayivi ndúu ñuu Efeso cán sahá ña nayaha yóho vatí cúu ná nā Israel á cúu ná nā toho nañeḥe ndihi na tuhun. Sahá ña cán queá nayihví nā. Ta cuaha ná nacahan nā ña cáhnu cúu quivi Jesús ña cúu xitoho í.

¹⁸ Ta cuaha táhan nā cándusa Jesús cán nacasáhá nā náhma nā tóco ndihi cuachi nacaja na. ¹⁹ Ta cuahá nā nasacuu nā tají ñehe ndihi na libro ña tají naxinu nā ta nachicaan ñuhu ná ña nuú ndihi ñayivi. Tá najitá nā cuéntá sahá yahvi tóco ndihi libro nacayi cán naxinu a tátuhun ivi jico uxu mil jihun cúxú. ²⁰ Já nacasáhá xita nuu tuhun vaha saha Jesús. Ta náha ña mé a ndaa ín ndée Jesús caja tóco ndihi ñaha.

²¹ Tá sa nayaha ndihi ña yóho já nasacu ini Pablo cuhun da coto nihni da estado Macedonia xihín estado Acaya. Já quehe tucu da íchi cuhun da janda Jerusalén. Ta nacachi da ña tá sa nasahan da ñuu Jerusalén já yaha da cuhun da chí ñuu Roma. ²² Ta mé Pablo

yóho nachindahá da ivi táhan da xica chindee táhan xihín dá ña ná cuhun da chí estado Macedonia. Ta da nachindahá da cán cúu Timoteo xihín Erasto ta mé Pablo nacandoo too chága da estado Asia.

Ndávaa ñayivi ndúu ñuu Efeso

²³ Mé tiempo já a juú quiahva cuahá ñayivi ñuu Efeso nandivaa nā sahá ña nandihvi cuahá ñayivi íchi cuéntá Jesús. ²⁴ In da naní Demetrio cúu dá da najandivaa nā cán. Mé Demetrio yóho cávaha da tiniñu yúu xihín jihun cúxú ta mé tiniñu yúu cán ndaa tá quiahva cáa in veñuhu cuéntá Diana, ña cúu ndióxi cája cáhnu nā ñuu cán. Ta a juú quiahva vaha cána jihún nā cája chúun xihín dá cán. ²⁵ Sahá ña cán queá mé Demetrio yóho najátaca da tóco ndihi nā cája chúun xihín dá ta najátaca ri da java ga táhan na cája mé chuun cávaha tiniñu yúu cán. Já nacachi da já xihín ná:

—Candehé ndo, sa cándaa vaha ini ndó ña vaha ndivaha cána jihún yo xihín chuun cája í yóho ta ndúu vaha í cája ña. ²⁶ Joo sa xini ndo ta ñeḥe mé ndó tuhun sahá da naní Pablo. Xica nuu da cáhan da xihín ñayivi ña a juú toho ndióxi cúu ña cávaha ndahá ñayivi. Ta sa cuahá ndivaha ñayivi nacava da jini. Ta a juú in túhún ñuu Efeso yóho cuítí va jáchi sa nacandee da nacava da jini cuahá nā ndúu chí estado Asia viti. ²⁷ Ta ihvi ndivaha cáa ña yóho jáchi cuu cahnu da nuú chuun cája í ta nu cána jihún yo queá yóho. Ta janda veñuhu ndióxi yo, ña naní Diana cuu ndihi saha vatí ní cúu cáhan vaha na saha veñuhu ña. Joo xihín ña cája Pablo yóho tá xica nuu da cuu casáhá ñayivi cahán núu na saha Diana ta cuu casáhá nā candají nā ña cúu ndióxi yo, mé Diana yóho. Ta mé ña cúu ña ña cáhnu ndivaha ta ñayivi ní cúu estado Asia yóho xihín ñayivi ní cúu ñuyíví cája cáhnu na ña —nacachi

Demetrio cán xihín java gā dā cāvaha tñiñu yúu cán.

²⁸ Ta tá naxini johō ndihi nā cán ña nācachi Demetrio chí ivi laá najaa quini na já nacayuhú nā já nacachi na já:

—Cáhnū ná cacuu Diana, ñá cúu ndióxi ndícahán nā Efeso.

²⁹ Ta xihín ña yóho tóco ndihi ñayivi ñuu cán nacasáhá nā ndívaa nā. Sahá ña cán quéa ña tiin na ivi dāta, dā naní Gayo xihín dā naní Aristarco. Ndíví dā yóho cúu dā dā estado Macedonia ta xica nuu da xihín Pablo. Ta mé ñayivi cán ña tiin na dā já ñúhu na dā cuahan dā vehe nū ndítaca ñayivi cán. ³⁰ Ndúcú Pablo quíhvi nuu da tañu ñayivi cán ña cahan dā xihín ná cúní dā. Joo nā cúu cuéntá Jesús cán coó naxeen na ña ná cuhun dā. ³¹ Ta jári java nā jutixia cuéntá estado Asia ndúu cán ta xíní táhan vaha xihín Pablo sahá ña cán quéa nachindahá nā chuun nū dá ña ná a quíhvi nuu da cahan dā xihín nā cán.

³² Tañu nū táca ñayivi ndívaa nahá cán sa jíin sa jíin ñaha cáyuhú nā ndúu na. Jáchi cuahá nā nataca cán ni co xíní nā ndá cuéntá quéa nataca nā tañu ñayivi cuaha cán. ³³ Joo java ñayivi ndúu cán nandicani na ndaja caa ña cúu cán nuú in dā naní Alejandro. Ta java nā Israel ndúu cán nachindahá nā Alejandro já ná candichi da cahan dā xihín ñayivi cán. Andā já nandínehe Alejandro ndáha dá já ná catáji tóo yúhu ná já nacasáhá ndíquehe da sahá nā cúu cuéntá Jesús. ³⁴ Joo tá naxini ñayivi cán ña cúu Alejandro in dā Israel chí ivi laá nacasáhá tóco ndihi na cán cáyuhú nā já cáhí na já:

—Cáhnū ná cacuu Diana, ñá cúu ndióxi ndícahán nā Efeso.

Ta coó nacatáji nā tixi ivi hora cáyuhú nā mé tuhun yóho.

³⁵ Ta tá sa nacatáji loho ñayivi já nacasáhá dā cúu dā cáhyí tutu ñuu cán cahan dā xihín ñayivi já cáhí dā já xihín ná:

—Candehé ndó, nā Efeso. Sa cándaq ini ndihi ñayivi ndúu ñuyíví ña ndítahan nuú ñayivi ndúu ñuu Efeso canda vaha na veñuhu ñá cúu ndióxi naní Diana. Jáchi mé ñá cúu ñá ñá cáhnū ndívaha ta indivi naquixi nahná ña nandíca nū yo. ³⁶ Ta ni in na a cúu cachi ña cáhan i ña tuhún sahá ña cán quéa caja ndó ñamaní catáji ndo ta ndicani vaha ini ndó sahá ña cúní ndó caja ndó. ³⁷ Jáchi ndíví dā ndáca ndó nacasaa ndó yóho co cāja cuíhná dā veñuhu Diana ta ni co cáhan núu da saha ña. ³⁸ Ta tá co táhán ini Demetrio xihín nā cāja chuun xihín dá sahá ña cāja Pablo já ndítahan nū ná cuhun nā vechúun nuú jutixia ta cán cuu ndiquehe in in na saha mé ná jáchi sahá ña cán ndúu juéxe cán caja víí nā sahá ñayivi. ³⁹ Joo tá inga ñaha quéa cúní ndó caja víí ndó saha, xíní ñúhú ndítaca ndihí já ná cuu caja víí yó sahá. ⁴⁰ Jáchi cāja i cuéntá cuu chican nā cuachi jata yo sahá ña jándicuíta i ñayivi caní táhan na saha tóco ndihi ña nayaha quíví viti. Jáchi mé a ndaa co xíní yo ndá tuhun nducú ñehé tá ná ndaca tuhún nā mí ndá cuéntá quéa nandívaa nahá yo —nacachi da xihín ná.

⁴¹ Tá nandihí nacachi dā cáhyí tutu cán tuhun yóho xihín ñayivi cán já najánduta dā nā.

Cuahan Pablo estado Macedonia xihín estado Grecia

20 Tá sa nanduta ndihi ñayivi, nā nandívaa nahá cán já nacana Pablo tóco ndihi nā cúu cuéntá Jesús jáchi cúní dā cahan dā xihín ná sahá java ñaha ña ndítahan nū ná caja na. Ta tá nandihí nacahan dā xihín ná já nannumi da nā ta nandindayí dā nā já naquee da cuahan dā chí Macedonia. ² Níí cúu estado Macedonia cán naxica nuu da sahan da tuhun ndéé ini nā cúu cuéntá Jesús xihín tuhun cahan dā. Tá nandihí já naquee da cuahan dā ta naxinu dā chí

estado Grecia. ³Ta ñacandoo da cán tixi uní yoo. Ta tá ja chá quehe da barco cuhun da chí ñundáhyi cuéntá Siria já ñañehe dá tuhun ña sácu ini na Israel cán cahní na da. Sahá ña cán queá nasacu ini da ña vaha chága ná cuhun sáhá da já ná yaha tucu da chí Macedonia. ⁴Ta ndáca táhan java na cúu cuéntá Jesús cuahan na xihín Pablo. Ta na cán cúu na yóho: in da naní Sópater, da ñuu Berea xihín Aristarco xihín Segundo, da ñuu Tesalónica xihín Gayo, da ñuu Derbe xihín Timoteo. Ta tañu na cán cuahan ri Tíquico xihín Trófimo, da ñaquixi estado Asia. ⁵Tócó ndihi na ndáca táhan xihín Pablo yóho nasahan cuéé na chinuu candati na ndehe ñuu Troas. ⁶Joo ndehe, da cúu Pablo xihín Lucas tá sa nayaha víco tá xixi na pan ña co cáva táhan yusá naxaa xihín já nandaa nde barco ñuu Filipos cuahan nde chí Troas. Ta janda quiví uhun já ñandique táhan nde xihín ndihi na cán. Ta chí ñacandoo tóo chága nde usa quiví ñuu Troas cán.

Xíto nihni Pablo ñuu Troas

⁷Ta quiví domingo nataca ndihi nde, na cúu cuéntá Jesús ña cuxu nde pan yii. Ta sahá ña queta Pablo cuhun da inga quiví itaan sahá ña cán queá najañaha cuaha dá nu ná janda quiahva naxinu java ñuu. ⁸Tócó ndihi na cúu cuéntá Jesús cán ñanditútú nde ndúu nde in vehe cánúu jiní ñinu. Ta chí ndíyihvi ndaa nu ndúu nde jáchi cuahá lámpara cáyi. ⁹Ta ndaja coo in da loho naní Eutico iin coo da ventana xini johu da nu cahan Pablo. Joo sahá ña cuaha cahan Pablo sahá ña cán queá ñanaá ini da loho cán chí ñaquiji da. Já najani dá ñandicava da janda nu ñúhu piso uní. Ta tá ñanuu na cúu cuéntá Jesús cán ñandinehe na da janda ndii cúu dá. ¹⁰Anda já ñanuu Pablo ta najáca da mé dá jatá da loho cán ta ñanumi da da ta já

ñacachi da já xihín na cúu cuéntá Jesús cán:

—A cáyihvi toho ndó jáchi tácu va da yóho —ñacachi Pablo chí najánditacu ñahá da.

¹¹Anda já nandaa tucu Pablo cuahan da vehe piso ñinu cán. Já ñasahnda java da pan yii cán ta naxixi na ña. Anda já ñacahan chága da xihín ná janda quiahva ñatívi. Já ñaquee da cuahan da. ¹²Ta sahá mé da loho, da ñandicava cán cájii íni na ndáca vaha na da cuahan na jáchi ñanditacu da.

Queé Pablo ñuu Troas ta cuahan da chí ñuu Mileto

¹³Nasacu ini Pablo cuhun sáhá da anda ñuu Asón. Joo mé nde nandaa nde barco nasahan nde mé ñuu cán jáchi janda cán ñacandoo nde ndique táhan nde xihín dá. ¹⁴Ta tá ñandique táhan nde ñuu Asón cán xihín dá já nandaa da xihín ndihi nde ini barco. Já ñaquee nde cuahan nde ñuu Mítelene. ¹⁵Cásahan nde ini barco ta inga quiví itaan já nayaha nde yati isla Quío ta janda tá nayaha inga tucu quiví já naxinu coo nde ñuu Samos. Ta ñaquee tucu nde cuahan nde janda quiahva naxinu coo nde ñuu Trogilio. Ta cán ñandiquehe nde nde ta janda inga quiví itaan naxinu coo nde ñuu Mileto. ¹⁶Co cúní Pablo cayáncá da estado Asia sahá ña cán queá coo nasahan nde ñuu Efeso. Númí da cuhun da ñuu Jerusalén coo da quiví víco Pentecostés jáchi nasacu ini da coo da víco cán tá ná quiahva Ndióxi ñamaní nu dá.

Cáhan Pablo xihín na sacuahá ñuu Efeso

¹⁷Ta nani ndúu nde ñuu Mileto cán já ñacana Pablo tóco ndihi na sacuahá veñuhu ñuu Efeso cán já ná quixi na. ¹⁸Ta tá sa nataca na nu ndúu nde já ñacachi da já xihín ná:

—Sa xini vaha ndó ndaja nacaja i jandá quiví nu cuítí tá naxinu coo i estado Asia yóho. ¹⁹ Níí tiempo nasahin i tañu ndó cán nacaja chúun i cuéntá Jesucristo, xitoho í. Ta coó nandinehe jícó i mí i sahá ña nacaja i. Ta cuahá tañu nasacu u saha ndo. Ta nandoho ini i sahá ña cúní na Israel cahní na yehe. ²⁰ Ta coó najándacoo i cáhan i tuhun Ndióxi xihin ndo jáchi xini vaha i ña jan cuu chindeé a ndohó. Ta najánaḥa i ndohó nu táhyí ñayivi ta jári ini vehe ndó. ²¹ Ta najánaḥa i nuú na Israel xihín nuú na tóho ña ndítahan nu ná ndicó coo ini na ta jándacoo na cuachi cája na. Ta nacachi i xihin ná ña ndítahan candeé ini na Jesucristo, xitoho í. ²² Ta viti cuhun i chí ñuu Jerusalén jáchi cúní ínimá yii Ndióxi ña ná cuhun i cán ta co xini ndíá cuu ndoho i ñuu cán. ²³ Ña xini ndusa i queá ña nacaxi tuhun ínimá yii Ndióxi xihín i ña ndá ñuu nacuu nuú cuhun i ña jivi i chicaan ñayivi yehe vecaa á jivi i caja xíxi na xihín i. ²⁴ Joo ni in ña yóho co cája toho a nuú i. Ta vatí ná cahní na yehe co yíhví toho i. Jáchi ña cúní mí i queá cajii íní i jáxinu coo i chuun nasahan Jesucristo nuú i caja i. Ta ña yóho cúú á cáxi tuhun i nuú ñayivi tuhun vaha saha mé á ta saha ndá quiahva quíhví ini a ñayivi.

²⁵ Sa naxica nuu i tañu ndó ta nacahan i xihin ndó ña vaxi quiví cacomí Ndióxi cuéntá sahá ñayivi. Ta viti xini vaha i ña ni in ndó a cúní ga ndó yehe. ²⁶ Sahá ña cán queá cáxi tuhun i xihin ndó quiví viti ña co ndójo ga i cuachi saha ndo tá ná jándicoo ndó íchi cuéntá Jesús. ²⁷ Jáchi sa nacaxi tuhun i nu ndo tóco ndihi ña sácú ini Ndióxi caja ta coó nachijehé tuhun toho i sahá nu ndo. ²⁸ Sahá ña cán queá ndítahan candaa vaha ndó mé va ndó ta candaa vaha ndó tóco ndihi na cúú cuéntá Jesús ná cuahnu chága na xihín tuhun Ndióxi. Jáchi mé ínimá yii Ndióxi nasacu a ndohó ña ná cacomí ndo

cuéntá sahá na cúú cuéntá mé á jáchi naxita nii mé á sahá ndihi na tá naxihí a ndica crúxu. ²⁹ Cáhan i ña yóho xihin ndo jáchi sa cándaa vaha ini i ña tá sa ná quee yehe cuhun i já quixi java ñayivi ta cacu ini na jándihi na sahá na cúú cuéntá Jesús. Ta tá quiahva cája ndivahyí jándihi rí sahá ndicachi quiahva já cacúní na jándihi na sahá na cúú cuéntá Jesús. ³⁰ Ta jandá mé tañu mé ndó jan va cana java na ta jánaḥa na ña tuhun nuú ñayivi. Ta nducú na ndiquehe na na sa cúú cuéntá Jesús cuhun na jatá na cán. ³¹ Ña cán queá cuéntá vaha coo ndó ná a jándahvi na ndohó. Xíni ñúhú ndicuhun ini ndó ña tixi uní cuiá coo najándacoo i cáhan i xihin ndó ndáa queá ndítahan nu ndó caja ndó. Ta ñuu ta ndiví nacahan i xihin ndó sahá ña yóho ta chí anda nasacu u saha ndo ña ná caja ndó ña cúní Ndióxi.

³² Viti jándacoo i ndohó, ñani i, ndahá Ndióxi jáchi cáchi tuhun mé á ña quíhví ini a tóco ndihi ñayivi. Ín ndé Ndióxi caja ndacú a ndohó já ná cuu coo ndó xihin tóco ndihi na nacaxi mé á caja ñamaní xihin. ³³ Ta xini ñúhú ndicuhun ini ndó ña coó nandiava ini i quehe e jihuún á jáhma vaha cómí java ga ñayivi. ³⁴ Ña nacaja i queá nacaja chúun i xihin ndahá i já ná a ndímaní ñaha catacu u ta já ná cuu catacu na xíca xihín i. ³⁵ Ta níí tiempo najánaḥa i nu ndo ña quiahva já ndítahan nu ndó caja chúun ndó já ná coo ñaha catacu ndó ta já ná cuu chindeé ndó na ndímaní ñaha nuu. Ndítahan ndicuhun ini ndó tuhun nacachi Jesucristo tá nacachi a: “Cájii chága ini na jása ñaha a juú ga na ñéhe á”, nacachi Pablo xihín na sacuaḥa veñuhu ñuu Efeso cán.

³⁶ Tá nandihí nacahan Pablo já nacaxítí dá já nacasáhá xíca tahví dá nu Ndióxi xihin ndihi na cúú cuéntá Jesús cán. ³⁷ Ta tóco ndihi na cán nasacu na xihin dá ta nanumi na dá ta já natatí

yúhu ná sajóho da ña ndíndayí na da.
³⁸Tócó ndihi na ñacacuéha ini na saha Pablo jáchi ñacachi da xihín ná ña a cúní ga na da. Tá nandihí já ndáca táhan ndihi na ñasahan na xihín dá janda nuú ñandaa da barco cán.

Cuahan Pablo chí ñuu Jerusalén

21 Tá nandihí ñandindayí nde na cúú cuéntá Jesús cán já ñandaa nde barco ñaquee nde cuahan ndacú nde in ñuu naní Cos. Ta inga quiví itaan já ñaquee tucu nde cuahan nde chí inga ñuu naní Rodas. Ta já ñaquee nde cuahan nde chí ñuu naní Pátara.
²Ta mé cán ñandique táhan nde xihín in barco, dó cuhun chí estado Fenicia ta chí ñandaa nde dó cuahan nde.
³Ta nani cásahan nde ini dó já ñaxini nde isla Chipre xoo íti nde. Joo ñayaha saa va nde janda quiahva ñaxinu coo nde ñuu Tiro ndácaan estado Siria jáchi mé cán ndítahan nu ná jánuu na ñaha ndójo dó.
⁴Mé ñuu Tiro cán ñanditahan nde na cúú cuéntá Jesús ta ñacandoo too nde xihín ná tixi usa quiví. Ta najácahan ínima yii Ndióxi na cán ña ná caxi tuhun na xihín Pablo ña ná a cuhun da ñuu Jerusalén.
⁵Joo tá sa ñayaha usa quiví já ñaquee nde cuahan nde chí ñuu Jerusalén. Ta ñaqueta tóco ndihi na cúú cuéntá Jesús cán xihín ñájihí na xihín jahyi válí na já ndáca táhan na xihín nde cuahan nde anda yuhú ñuu cán. Ta yatí yuhú tañuhú cán ñacaxítí ndihi nde ñaxica tahví nde nu Ndióxi.
⁶Ta tá ñandindayí táhan nde já ñandaa nde barco ta na cán ñaquee na cuanúhu ná vehe na.

⁷Ñaquee nde mé ñuu Tiro cásahan nde nuú tañuhú janda quiahva ñaxinu coo nde ñuu Tolemaida. Ta mé cán ñacahan Ndióxi nde xihín na cúú cuéntá Jesús ndúu cán. Ta chí ñacandoo nde in quiví xihín ná.
⁸Ta inga quiví itaan já ñaquee nde cuahan nde janda quiahva ñaxinu coo nde ñuu Cesarea. Ta cán

ñasahan nde vehe in da sáxica nuu cáhan tuhun Ndióxi xihín ñayivi. Mé da yóho naní da Felipe ta ñacacuu da in táhan ndíhusa da chindeé na apóstol veñuhu ñuu Jerusalén. Ta chí ñacandoo too nde vehe da cán.
⁹Ta ñasahiin comí jahyi jíhí da, na tacú. Ta tiahva ndícomí ná jayaha na tuhun cáhan Ndióxi nuú ñayivi.
¹⁰Tá sa ñacaja chá quiví ndúu nde vehe da cán já ñaxinu coo in profeta, da ña quixi estado Judea ta naní da Agabo.
¹¹Mé da yóho ñasa da coto nihni da ñehe nu ndúu nde cán. Ta nani íin da xihín nde cán já ñatiin da cinturón ñaha Pablo. Já ñacató da ndáha dá xihín saha dá xihín mé cinturón ta já ñacachi da já:

—Cáchi ínima yii Ndióxi ña tá quiahva ñacaja i ñacató i mí i quiahva já cató na Israel da xihín ñaha cinturón yóho. Ta já ndiquiahva na da ndahá na tóho — ñacachi Agabo cán xihín nde.

¹²Tá ñaxini johó nde ña ñacachi Agabo yóho já ñacasahá nde cáhan ndahví nde xihín Pablo ña ná a cuhun da ñuu Jerusalén. Ta jári na cúú cuéntá Jesús ndúu ñuu Cesarea cán cáhan ndahví na xihín dá ña ná a cuhun da.
¹³Joo ñanducú ñehe Pablo tuhun nuú nde já ñacachi da já:

—Ndá cuéntá queá sácu cóhó ndo ta cája ndó ña cándíí ini i. Candehé ndo ná cáhan i xihín ndo. Coó cava toho a ná cató na yehe jáchi íin tiahva i ndiquiahva i mí i quiví i saha Jesús, xitoho í mé ñuu Jerusalén cán — ñacachi da.

¹⁴Coó ñacuu cava nde cava nde jini dá ña ná a cuhun da. Chí coó ñacahan chága nde sahá ña yóho xihín dá ta ñacachi nde:

—Ná coo tá quiahva cúní Ndióxi va.

¹⁵Tá nandihí já ñacaja tiahva nde ñaha nde ta já ñaquee nde cuahan nde ñuu Jerusalén.
¹⁶Ta ndáca táhan java na cúú cuéntá Jesús ñuu Cesarea cán cuahan na xihín nde. Ta tañu na cán

ndácaan in da naní Mnasón, da naquixi isla Chipre. Ta anda sanahá ndíco da íchí cuéntá Jesús. Ta sa mé vehe da yóho sácú ini nde canduu tóo nde ñuu Jerusalén cán.

Xíto nihni Pablo da naní Jacobo

¹⁷Tá naxinu coo nde ñuu Jerusalén já cávatá na cúu cuéntá Jesús cán nandiquehe na ndehe. ¹⁸Ta inga quiví itaan já ndáca Pablo ndehe nasahan nde coto nihni nde Jacobo. Ta tá naxinu coo nde cán já naxini nde ña nataca tóco ndihi na sacuaḥa nuú na cúu cuéntá Jesús cán. ¹⁹Ta naçahan Ndióxi Pablo xihin ná já naçasáhá ndícani da nu ná tá in tá in ña náhnu nasahan Ndióxi ñamaní nu dá caja da tañu na tóho, na coó naquixi chichi Israel. ²⁰Tá naxini joho na cán ña yóho já naçaja cáhnu na Ndióxi. Ta tá nandihí já naçasáhá cáchí na já xihin Pablo:

—Candehé, ñani i. Sa xini vahún ña cuahá ndivaha táhan na naquixi chichi Israel sa ndíco na íchí cuéntá Jesús viti. Ta tóco ndihi na cáchí na ña ndítahan caja na ña sáhdá ley Moisés. ²¹Joo nañehe ná tuhun ña xica nuún jánahún nuú na Israel, na ndúu ñuu tóho ña co xini ñuhú ga caja na ña sáhdá ley Moisés ta ni marca cán co xini ñuhú chicaan ga na yiquí cuñu jahyi na. Ta jánahún na ña co ndítahan caja na costumbre najándacoo tásáhnu jícó yo nu yo. ²²Ta co xini nde ndíca caja nde viti jáchí nditútú na ndúu Jerusalén yóho tá ná candaa ini na ña naçasaun yóho. ²³Sahá ña cán quea caja nde cuéntá ña vaha chága ná cajún ña cáchí nde yóho: Cañehún comí ta ndúu tañu nde yóho já ná cuñun na xuhun. Jáchí sa naxinu coo quiví caja ndícomí da yóho ña nasahan da tuhun da nu Ndióxi caja da. ²⁴Ná cuñun xihin dá já ná ndaja viún mún xihin dá tá quiahva sáhdá ley Moisés ta já ná chahvún nuú jatá jini dá. Ta

xihín ña yóho cuni na Israel ña a juú ña ndaa cúu tóco ndihi tuhun cáhan ihvi na sañun. Ta xihin ña yóho cuni na ña caja tá cajún ña sáhdá ley Moisés. ²⁵Ta sahá na tóho, na cúu cuéntá Jesús, sa naçahyí nde in carta cuahān nu ná ña ná a jándihí na mé ná caja na ley Moisés. Joo naçachi nde xihin ná ña ná a cáxí na cuñu quítí, rí najoco na nuú tiniñu yúu. Ta ná a cáxí na ni ta ni ná a cúxu na cuñu quítí, rí nasahnú. Ta ná a cóo na xihin ta a ñaha, na co cúu yí ná á ñajihí na. Ña yóho cúu tuhun naçahyí nde nu carta cuahān nuú na tóho —naçachi na sacuaḥa cán xihin Pablo.

²⁶Anda já naquehe Pablo ndícomí da-taa cán ndáca da cuahān xihin dá. Ta inga quiví itaan já nandaja víí da mé dá nu Ndióxi ta nandivií ndícomí da cán viti. Ta tá nandihí já naquihvi da veñuhu ña çaxi tuhun da xihin ná ndá quiví xinu coo ña ndivií na já ná cuu joco in in da cán ñaha nu Ndióxi.

Tiin na Pablo veñuhu cáhnu ñuu Jerusalén cuahān da vecaa

²⁷Tá ja chá xinu coo quiví usa já naxinu coo java da Israel, da naquixi chí estado cuéntá Asia. Ta tá naxini na cán ndácaan Pablo ini veñuhu cáhnu cán já najándivaa na ñayivi já ná ndicuita na caja xixi na xihin dá. ²⁸Ta naçasáhá cáyuhú na nuú ñayivi já cáchí na já xihin ná:

—Candehé ndó, na Israel. Caja ndó ñamaní chindeé ndó ndehe xihin da yóho jáchí ní cúu nu xica da yóho cáhan núu da sahá ñayivi Israel ta jánahā da ñayivi ña co ndítahan nu ná candúsa na ley Moisés ta ni co ndítahan nu ná caja cáhnu na veñuhu cáhnu ndácaan Jerusalén yóho. Ta viti caja núu chága da jáchí janda java da tóho, da ñuu Grecia najaquihvi da veñuhu í ta jáyuxu da veñuhu yii yóho xihin da tóho jan — cáchí na.

²⁹ Tóco ndihi ña yóho ñacachi ña Israel ñaquixi Asia cán xihín ñayivi jáchi ñacahán da ña najáquihvi Pablo cán da naní Trófimo, da tóho ñuu Efeso ini veñuhu joo a juú a já. Ñacahán ña já jáchi ñaxini na ndáca táhan Trófimo xihín Pablo xíca nuu da ñuu Jerusalén cán.

³⁰ Xihín ña ñacachi da ñaquixi Asia yóho ñandivaa tóco ndihi ñayivi ñuu Jerusalén já xínu na ñaxinu çoo na ñatiin na Pablo. Já ñúhu na da ñatavá ña da jatá veñuhu cán ta ivi laá ñachicaji na yéhe veñuhu cán. ³¹ Chí ndúcu ña cahní na da joo da cóo jefe soldado cán ñañehe dá ñuhun ña ñandivaa ndihi ñayivi ñuu Jerusalén cán. ³² Anda já najátaca da cóo jefe soldado xihín java ga da ñáhnú já xínu da ñaxinu çoo da nu ndivaa ñayivi cán. Tá ñaxini ñayivi cán vaxi da cóo jefe soldado cán xihín java soldado já najáyaa ñahá na chí çoo cáni ga ña Pablo. ³³ Anda já ñacayati da cóo jefe soldado cán nu Pablo já ñatiin da da çuhun da vecaa. Ta ñasahnda da chuun ña ná cató ña da xihín ivi cadena. Tá ñandihí já ñacasáhá ndáca ñuhun da ñayivi ña ndá da cóo jefe soldado ta ndí ñacaja da. ³⁴ Joo sa jíin sa jíin ñuhun cáyuhú in in ñayivi cán. Sahá ña cán queá çoo ñacuu candaa ini da cóo jefe soldado cán ndá cuachi queá jácojo na jata Pablo jáchi a juú quiahva ndivaa ña cán ndúu na. Sahá ña cán queá ñasahnda mé jefe soldado cán chuun ña ná cañehe na Pablo vehe nu ndúu soldado. ³⁵ Ta tá ñaxinu çoo na cán ñacahán ña ndaa na cuani vehe soldado cán xihín Pablo joo çoo ñacuu ndaa na jáchi chí cándíhi táhan ñayivi cúni ña caní na Pablo. Sahá ña cán queá ñasajocó soldado cán Pablo já ñandaa na cuani vehe soldado cán xihín dá. ³⁶ Ta tóco ndihi ña cán cáyuhú cóho ña ndíca na jata soldado já cáchi ña já:

—Cahní ndó da. Ná quivi da —cáyuhú ña.

Ndíquehe Pablo saha mé dá nuú ñayivi cán

³⁷ Ta tá sa ndúcu ña jáquihvi na Pablo ini vehe soldado cán já ñacachi Pablo já xihín da cóo jefe soldado cán:

—Á quiahva ndó ñamaní nuú i ná çahan i ivi joho ñuhun xihín ñayivi yóho.

Anda já ñanducú ñehe da cóo jefe soldado cán ñuhun nu Pablo já ñacachi da já:

—Á tiahvún çahun ñuhun griego, dá já. ³⁸ Á a juú toho yóho cóo da ñaquixi nación Egipto viti chá va, da najáçahan ñayivi ná ndicuíta na caní táhan na xihín gobierno ta ñasandaca da comí mil da sáhní ndii ñasahan da chí yucú íchí nuú çoo ñayivi. Á a juú toho yóho cóo mé da cán —ñacachi da cóo jefe soldado cán xihín Pablo.

³⁹ Anda já ñanducú ñehe Pablo ñuhun nu dá já ñacachi da já:

—Jíin va cóo yehe jáchi cóo u in da ñaquixi chichi Israel ta ñacacu u ñuu Tarso, in ñuu cáhnú ndáçaan estado Cilicia. Ta viti á cuu quiahva loho ndó ñamaní nuú i ná çahan i ivi ñuhun xihín ñayivi yóho —ñacachi Pablo xihín da cóo jefe soldado cán.

⁴⁰ Anda já ñasahan da cán ñamaní nu Pablo ña ná çahan da xihín ñayivi. Anda já ñandaca ndichi Pablo nuú cuani vehe cán já ñandiñehe da ndáha dá nu ná já ná catáji yúhu ná. Ta tá sa ñacatáji yúhu ná já ñacasáhá çahan da ñuhun hebreo xihín ná.

22 Já ñacasáhá Pablo cáchi da já xihín ná:

—Cuni joho ndó nu cáhan i xihín ndóho, ña sacuaça xihín ñani i jáchi cúni ndiquehe e sahá i viti —ñacachi Pablo xihín ná.

² Tá ñaxini joho ña cán ña çahan Pablo ñuhun hebreo, mé ñuhun çahan mé ná já ñacatáji chága yúhu ná. Anda já ñacachi Pablo já xihín ná: ³ —Yehe

cúu u da naquixi chichi Israel. Ta nacacu u ñuu Tarso ndácaan estado Cilia. Joo nasahnu u ñuu Jerusalén yóho ta mé yóho najácuaha vi xihín in da naní Gamaliel. Ta tá quiahva sáhdá ley Moisés, ña nasacu vaha tásáhnú jícó yo quiahva já nandihí ini i cája i. Ní tiempo nandihí ini i cája chúun i cuéntá Ndióxi xihín ndinuhu ini i tá quiahva cája mé ndó anda quivi víti. ⁴ Naxica nuu i cája xixi i xihín na ndico íchi cuéntá Jesús janda quiahva sáhní i na. Ta cuahá taa, ñáha viti naxica nuu i játaca i na ña ná cuhun na vecaa. ⁵ Ta xini vaha da cúu sacuahá nuú jutu xihín ndihi na sacuahá veñuhu ña cáhan i ña ndaa xihin ndo. Jáchi mé na yóho cúu na nacañyí tutu nasahan na nuú i já ná ndiquiahva i ña nuú ñaní, na naquixi chichi Israel ndúu ñuu Damasco cán. Ta nasahan i cán ndínducú u na cúu cuéntá Jesús ña cañehe e na quixi i ñuu Jerusalén yóho caja xixi nde xihin ná.

**Ndicani Pablo ndaja nacuu
nandiquehe da íchi cuéntá Jesús**

(Hch. 9:1-19; 26:12-18)

⁶ Joo nani xica i íchi cuahan i tátuhun caxivi cáa tá sa yati xinu coo i ñuu Damasco cán já in cuití nandiyehé ndaa nu íin i ta mé a yóho naquixi a indiví. ⁷ Chí nandicava i nu ñúhu ta já naxini johó i in a cáhan xihín i já nacachi a já: “Saulo, Saulo ndá cuéntá queá ndícuítún cája xísún xihín i”, nacachi a xihín i. ⁸ Anda já nacasáhá ndáca tuhún i já cáchi i já: “Ndá na cúu ndóho ta ndaja naní ndo”, nacachi i xihin á. Anda já nanducú ñehe a tuhun nuú i já cáchi a já: “Yehé cúu Jesús, da ñuu Nazaret ta xihín yehé ndícuítún cája xísún viti”, nacachi a cán xihín i. ⁹ Ta na cuahan xihín i cán nayihví na tá naxini na ña nandiyehé nu íin i cán. Joo coo naxini johó na ña cáhan xihín i cán. ¹⁰ Anda já nacachi i já xihín Jesús: “Cahan ndó xihín i, xi-

toho i ndía ndítahan caja i.” Anda jávi nacachi a já xihín i: “Candichi ta cuáhán ñuu Damasco nu cáhún cuhun jan. Ta ñuu jan ndicani in da nuun ndía ndítahan cajún”, nacachi Jesús xihín i. ¹¹ Ta chí nacuaá nuú i nacaja ña nandiyihví cán. Sahá ña cán queá jandá natiin ndaa na ndáca táhan i cán yehé cuahan nde janda quiahva naxinu coo nde ñuu Damasco cán.

¹² Ta mé cán nasahijn in da naní Ananías, da cája ña sáhdá ley Moisés xihín ndinuhu ini da. Ta tóco ndihi na Israel ndúu Damasco cán cáhan na saha dá ña cúu dá taa vaha. ¹³ Ta mé Ananías yóho nasaa da naxito nihni da yehé. Já nacasáhá cáchi da já xihín i: “Saulo, ñani i candehé tucu viti.” Tá nacachi da já chí ivi laá nanuna nuú i já naxini i da. ¹⁴ Anda já nacachi da cán já xihín i: “Mé Ndióxi, ña nacaja cáhnú tásáhnú jícó yo, mé a cán queá nacaxi a yohó já ná canda inún ndá queá sácú ini mé á caja xuhun. Ta nacaxi a yohó já ná cunún Jesús, mé a cája ndinuhu ña ndaa. Ta nacaxi a yohó já ná cuni johún nu cáhan Jesús. ¹⁵ Já queá cuhún cahún saha mé á nu tóco ndihi ñayivi. Já ná ndicanún nu ná sahá ña naxinún xihín ña naxini johún. ¹⁶ A cándati chágún viti. Cuándaco. Cándéé inún Jesucristo viti chí cuáhán candúta já ná ndoo cuachún, caja Ndióxi”, nacachi Ananías xihín i.

**Ndicani Pablo ña naxindahá
Ndióxi da cahán da tuhun
vaha saha Jesús nuú na tóho**

¹⁷ Tá nandihí já nandico coo i ñuu Jerusalén ta nasahan i veñuhu cáhnú cán caça tahví i nu Ndióxi. Ta nani xica tahví i cán já naquixi tátuhun in sani nuú i vatí ndíta i. ¹⁸ Ta naxini i Jesús, xitoho i já nacachi a já xihín i: “Camún cuáqueún ñuu Jerusalén yóho jáchi a cándúsa toho na yóho tuhun vaha cahún sahá i”, nacachi Jesús xihín i. ¹⁹ Anda já nanducú

ñehe e tũhun nu Jesús já cáchí i já xihín á: “Candehé ndo, xitoho i. Sa xini vaha tóco ndihi ñayivi ña naxica nuu i ndijáa veñuhu tiin i na candeé ini ndohó ta já nacani i na ta nataán i na vecaa. ²⁰Ta sa xini na ña tá nasahní na Esteban, mé da naxica nuu cáhan tũhun vaha saha mé ndó, in nasacuu u xihín na nasahní ñahá cán. Jáchi táhán ini i cándichi i ndáá i jahmá ñayivi cán nani sáhní na Esteban”, nacachi i xihín Jesús. ²¹Anda já nacachi Jesús já xihín i: “Cuáqueún cuhun jáchi chindahá xicá i yohó cuhún cahún sahá i nuú ñayivi tóho, na coo naquixi chichi Israel”, nacachi Jesús xihín i —nacachi Pablo xihín na cán.

Cáhan chága Pablo xihín mé da cúu jefe nu ndíhi soldado

²²Nasanduu táji na Israel cán nani cáhan Pablo xihín ná. Joo tá nacahan da sahá na tóho cán já nacasáhá cáyuhú na já cáchí na já:

—Cahní ndó da jan. Ná quivi da. Co ndítahan ga nu dá coo da ñuyívi yóho —cáchí na cán cáyuhú na.

²³Ta sahá ña ndúcú ndeé na cáyuhú na ta jáni na jáhma ná nu táchi ta janda ña yácá jácana nihni na nu táchi. ²⁴Sahá ña cán queá nasahnda da cúu jefe soldado cán chuun ña ná jáquihvi na Pablo cán ini vehe soldado. Ta tá nandihvi da já nasahnda da chuun ña ná jácaxáhan na da xihín churú ní já ná nahma da ndíá nacaja da ta ndá saha queá ndícuíta ñayivi cán xihín dá. ²⁵Joo tá sa nacató na Pablo ta ndúcú na jácaxáhan na da já nacachi Pablo já xihín in soldado cán:

—Ta viti cahán ndó xihín i á núná nu ndo jácaxáhan ndó in da cúu taa romano tá cámaní yí caja víi ndó saha dá tá quiahva sáhná ley romano jáchi yehe cúu u da romano —nacachi Pablo xihín soldado cán.

²⁶Tá naxini johó da ña yóho chí ivi láa nasahan da cáxi tũhun da nu da cúu jefe soldado cán já cáchí da já xihín dá:

—Cuénta vaha coo ndó ta coto a cajú xixi ndó xihín da jan jáchi cúu dá taa romano —nacachi in soldado cán.

²⁷Anda já nacayatí da cúu jefe soldado cán nu Pablo já nacasáhá ndáca tũhún ñahá da já cáchí da já:

—Á ndaa cúun taa romano —cáchí da.

—Ajan, taa romano cúu u —nacachi Pablo xihín dá.

²⁸Anda já nacasáhá cáchí mé da cúu jefe soldado cán já xihín Pablo:

—Yehe nachahvi i cuahá ndivaha juhún já nacuu nanduu u in taa romano —nacachi da cán xihín Pablo.

Ta já cáchí Pablo já xihín dá:

—Joo yehe cúu u taa romano jáchi já nacacu u —nacachi Pablo.

²⁹Tá naxini johó na cuni jácaxáhan Pablo cán ña yóho chí nayihvi na já nacasáhá xica játa na cáxoo na nu dá. Ta janda mé da cúu jefe soldado cán nayihvi da jáchi sa natiin na da vatí cúu dá taa romano.

Ndíquehe Pablo saha mé dá nuú na sacuahá Israel

³⁰Ta inga quivi itaan natavá da cúu jefe soldado cán cadena nasandico ndáha Pablo. Ta sahá ña cuni da cán canda ini da ndá cuachi queá jácojo na jata Pablo sahá ña cán queá najátaca da na sacuahá nuú jutú xihín na sacuahá Israel. Anda já ñehe da Pablo já nasacu da da nuú na cán.

23 Anda já nasandehé Pablo nu tóco ndihi na sacuahá nuú na Israel cán já nacasáhá cáchí da já xihín ná:

—Candehé ndo, ñani i. Janda jihna ta janda quivi víti cajú i ña cuni Ndióxi ta xini mé á ndaja ndácaan jiní i —nacachi Pablo.

²Joo da cúu sacuahá nuú jutú naní Ananías cán nasahnda da chuun nuú na

ndíta yati xihín Pablo cán ña ná caní na jahndá yúhu dá. ³Anda já nacachi Pablo xihín Ananías cán:

—Tá quiahva nacani na jahndá yuhú i quiahva já caní Ndióxi yohó, da co cúu tá quiahva ndáa da. Íun jan ndaja ndíchún yehe jáchi jácojo na cuachi jatá i ña co sácú vaha i ley. Joo yóhó nandava ndojún ña sáhdá ley jáchi nasahndún chuun ña ná caní na yehe —nacachi Pablo xihín Ananías cán.

⁴Anda já nacasáhá na ndúu cán cáhan na xihín Pablo já cáhí na já xihín dá:

—Cuéntá coún jáchi cánahún xihín da cúu jutú sacuahá chága nu ndíhi jutú cuéntá Ndióxi —nacachi na xihín Pablo.

⁵Anda já nacachi Pablo já:

—Cáhnú coo ini ndó, ñani i jáchi co xini toho i ña cúu da jan jutú sacuahá chága nu ndíhi jutú cuéntá Ndióxi. Mé tūhun Ndióxi sáhdá chuun já cáhí a já: “A cánahún xihín da cómí chuun sahá ñuu ndó” —nacachi Pablo.

⁶Tá nandíhi já nandicuni Pablo ña ndúu java na saduceo ta ndúu ri java na fariseo mé cán. Sahá ña cán queá nacahan cóhó Pablo já nacachi da já:

—Candehé ndo, ñani i. Yehe cúu u in da fariseo ta in fariseo nasacuu ri tátá i. Ta viti cája víi na yóho sahá i sahá ña cándúsa i ña vaxi quiví nditacu tucu ndii —nacachi Pablo.

⁷Tá nacachi Pablo já ivi laá nandicuíta na fariseo xihín na saduceo ndítúhún xihín táhan na já nasahnda java táhan na. ⁸Jáchi na saduceo cán co cándúsa na ña vaxi quiví nditacu tucu ndii. Ta ni co cándúsa na ña ndúu tátó Ndióxi. Ta ni co cándúsa na ña íin ínimá ñayivi. Joo na fariseo cándúsa va na tóco ndíhi ña yóho. ⁹Tóco ndíhi na cán cáyuhú na ndúu na. Sahá ña cán queá nandaca ndíchi java na jánahá ley Moisés, mé na cuahan xoo na fariseo cán. Já nacasáhá cáhí na já xihín tóco ndíhi ñayivi cán:

—Coó toho cuachi ná caja da nani Pablo yóho. Jáchi ndá ínimá yii queá nacahan xihín da yóho á tá coó ta ndá tátó Ndióxi queá nacahan xihín da yóho. Sahá ña cán queá tá ná cahan ihvi yó xihín da yóho cúu á tátūhun cáni táhan í xihín Ndióxi —nacachi na jánahá ley Moisés xihín ná.

¹⁰A juú quiahva nacasáhá ndívaá ñayivi cán sahá ña cán queá nacasáhá yíhvi da cúu jefe soldado cán ña tiaha náa tiin na Pablo ta jácuachi na da. Sahá ña cán queá nasahnda da chuun ña ná quixi soldado tavá da Pablo tañu ñayivi cuaha cán. Ta já ná cañehe tucu na da cūhun da vehe soldado cán.

¹¹Ta ñuu inga quiví itaan já nacanáha nuu Jesús, xitoho í nu Pablo ta nacahan xihín dá já nacachi a já:

—A ndícani inún, Pablo jáchi tá quiahva nacahún sahá i nuú ñayivi ñuu Jerusalén yóho quiahva já cahún sahá i nuú ñayivi ndúu ñuu Roma —nacachi Jesús xihín dá.

Sácú ini na Israel cahní na Pablo

¹²Ta inga quiví itaan já najándique táhan java na Israel tūhun na ña cahní na Pablo. Ta nacachi na a cúxu na ta ni ticuif a cóho na janda quiahva ná cahní na Pablo. Ta nacachi xihín táhan na ña cūhun cháhan jata ndá da naxixi á naxihi ticuif nani tácu Pablo. ¹³Ta yáha ga nuú ivi jico taá cúu da najándique táhan tūhun caja ña yóho. ¹⁴Tá nandíhi já naqee na nasahan na cahan na xihín da sacuahá nuú jutú cán xihín na sacuahá nuú na Israel cán já nacachi na já xihín ná:

—Tóco ndíhi nde najándique táhan nde tūhun nde cahní nde Pablo. Ta nachicaan nde cháhan jata ndá da ná cuxu nani tácu Pablo. ¹⁵Sahá ña cán queá caja ndó ñamaní jándique táhan ndó tūhun ndó xihín java ga na sacuahá jan já ná cahan ndó xihín da cúu jefe sol-

dado já ná cañehe tucu da Pablo quixi da nu ndo. Ta cañan loho ndó xihín dá ña cúní ndó caja víí cuéé chága ndó sahá ña ñacaja Pablo. Já va cachi ndó xihín dá cúú jefe soldado cán ta ndeñe canduu tiañva nde cañní nde da tá ná quixi da íchi —ñacachi na xihín na sacuañá cán.

¹⁶ Joo in ña loho, da cúú jaxi Pablo ñañeñe dá tuñun ña sácú ini na cañní na Pablo sahá ña cán queá xínu da ñasahan da cáxi tuñun da nu Pablo vehe soldado cán. ¹⁷ Tá nandihí nandicaní ña loho cán ña yóho nu Pablo já ñacana da in táhan da cúú soldado cán já ñacachi da já xihín dá:

—Cajún ñamaní candacún da loho yóho ná cuñun da nuú da cúú jefe nu soldado. Jáchi íin tuñun cúní da yóho cañan da xihín da cán —ñacachi Pablo xihín dá.

¹⁸ Anda já ndáca soldado cán da cúú jaxi Pablo ñasahan da nuú da cúú jefe soldado cán já ñacachi da já xihín dá:

—Da naní Pablo ndácañ vehe soldado ñaxica da ñamaní nuú i ña ná candaca i da loho yóho quixi i ñehé e da jáchi íin tuñun cúní da cañan da xihín ndo —ñacachi da.

¹⁹ Anda já ñatiin jefe soldado cán ndahá ña loho cán já ñatavá xóo da da já ñacasáhá ndáca tuñun ñahá da já ñacachi da já xihín dá:

—Ndá cúnun cañun xihín i —ñacachi da.

²⁰ Anda já ñacasáhá ña loho cán cáxi tuñun da já ñacachi da já:

—Najándique táhan ña Israel tuñun na ña caça ña ñamaní nu mé ndó ña ná cañehe tucu ndó Pablo nuú na sacuañá nuú na Israel cán ña cavíí vaha chága saha dá. ²¹ Joo a cándúsa ndó caja ndó ña cúní na jáchi yáha chága nuú ivi jico ña ndáti jehé na íchi ña cañní na Pablo. Ta nandique táhan tuñun na ña a cúxu na ni a cóho na ticuíí janda quiañva ná cañní na Pablo. Ta viti ndáti na candehé

na á caja ndó ña cúní na —ñacachi jaxi Pablo cán xihín da cúú jefe soldado.

²² Ta tá nandihí já ñacachi da cúú jefe soldado cán xihín dá ña ná a ndicaní da nuú ni in ñayivi sahá ña sácú ini na Israel caja na xihín Pablo. Chí ñaquee da loho cán cuañan da.

Chíndahá na Pablo cuañan da nuú gobernador naní Felix

²³ Anda já ñacana jefe soldado cán ivi da sáñdá chuun nuú soldado ta ñasahnda da chuun nu dá ña ná caja tiañva da ivi ciento soldado táhan da xica sáhá xihín uní jico uxu soldado táhan da cándójó cuáyí. Ta ñatañnda chuun nu dá ña ná caja tiañva da inga ivi ciento táhan da ñeñe lanza já ná candaca na Pablo cuñun da ñuu Cesarea cán. Ta ná quee na cuñun na tátuhun caa in sacuaá. ²⁴ Ta ñasahnda da chuun ña ná caja tiañva na cuáyí canúu Pablo cuñun da. Ta ñasahnda da chuun ña ná candaa vaha na Pablo já ná cuu xinu coo vaha da nuú da cúú gobernador naní Felix ñuu Cesarea cán. ²⁵ Ta ñachindahá da in carta cuañan xihín ná já ná ndiquiañva na ña nuú da cúú gobernador cán ta ña yóho cúú mé tuñun ñacahyi nu carta cán:

²⁶ “Yeñe cúú Claudio Lisias ta chíndahá i carta yóho nu ndo, tá Felix. Ta nu carta yóho cañan Ndióxi yeñe xihín ndo, da cúú da cáñnu ñuu Cesarea cán. ²⁷ Candehé ndo, tá Felix. Chíndahá i da yóho nu ndo jáchi ñatiin na Israel da ta ndúcú na cañní na da. Joo tá ñacandaa ini i ña cúú dá da romano já ñasahan i xihín java soldado ta ñacandaa nde da ndáñá na cán. ²⁸ Ta sahá ña cúní candaa ini i ndá cuachi jácojo na jata dá sahá ña cán queá ñañeñe e da ñasahan i nuú na sacuañá nuú na Israel cán. ²⁹ Já ñacandaa ini i ña jácojo na cuachi jata dá saha ley mé va na. Ta sahá ña cóo cuachi ñacaja da nu mí sahá ña cán queá cóo ñaxeen nde ña ná cañní na da ta ni janda

vecãa cõ cãni nu dá cõhun dã, cãhãn i. ³⁰ Joo ñacandãã ini i ñã sãcũ ini ñã Israel cãhnĩ ñã dã sãhã ñã cãn quẽã chĩndahã vãhã i dã nu mẽ ndõ. Ta ñacachi i xihĩn ñã xõjõ ini xihĩn dá ñã ná sãã ñã nu mẽ ndõ cacu na sãhã dá ndĩã ndõho na xihĩn dá. Ñã yõho cũu ndihi ñã cãhãn i xihĩn ndõ, tá Felix. Ndiõxi ná coo xihĩn ndõ”, cãchĩ carta cuãhãn xihĩn Pablo.

³¹ Ta ñacaja mẽ soldado cãn tá ñĩn ñã-tãhndã chuun nu dá. Ta já ñẽhe ñũu ñã Pablo ñasãhãn ñã jãndã ñũu Antĩpãtris. ³² Ta inga quĩvĩ itããn já ñãndicõ cõõ java soldado, dã ñasãhãn sãhã cãn chí vehe soldado. Joo java dã cãndõjõ cuãyi cãn cãtãhãn yĩĩ dá xihĩn Pablo cuãhãn dã. ³³ Ta tá ñãxĩnu cõõ da ñũu Cesarea já ñãndiquiahva da carta cãn nuũ dã cũu gobernador. Ta ñãndiquiahva ri dã Pablo nuũ dã cãn. ³⁴ Ta tá sã ñãndihi ñãcãhvi dã cũu gobernador carta cãn já ñãcãsãhã ndãcã tũhũn dã Pablo sãhã ndã ñũu ñãquixi da. Ta tá ñãcandãã ini da ñã cũu Pablo dã ñũu Cilicia ³⁵ já ñãcachi da já xihĩn dá:

—Jãndã quiahva ná xĩnu cõõ ñã jãcõjõ cuãchĩ jatũn ãndã já cãja viĩ i sãhũn — ñãcachi Felix cãn xihĩn Pablo.

Tã ñãndihi já ñãsãhnda da chuun ñã ná candãã vãhã na Pablo nani ndãcããn dã vechũun Herodes cãn.

Ndĩquehe Pablo sãhã mẽ dá nuũ dã cũu gobernador nanĩ Felix cãn

24 Ta tá sã ñãyãhã uõhun quĩvĩ já ñãxĩnu cõõ dã cũu sacũhã nuũ jutũ, dã nanĩ Ananĩas cãn. Ñãxĩnu cõõ da ñũu Cesarea xihĩn java gã ñã sacũhã ta ndãcã da in dã ndĩquehe sãhã ñã Israel nanĩ dã Tãrtulo. Tõcõ ndihi ñã yõho ñãcãtãhãn na ñãsãhãn ñã sãcũ ñã sãhã Pablo nuũ gobernador cãn. ² Ta tá ñãndihi já ñãsãhãn quehe na Pablo já ñãxĩnu dã nuũ ndihi ñã cãn. ãndã já ñãcãsãhã Tãrtulo cãn sãcũ dã sãhã Pablo já ñãcachi da já:

—Ndĩquiahva ndẽ ndixãhvi nu ndõ, tá gobernador jãchĩ sãhã ñã ndĩchĩ jĩnĩ ndõ cũu ndãã vãhã ndõ ndẽhẽ. Ta cõõ tandõhõ taũu ndẽ ta tõcõ ndihi ndẽ ndũu tãjĩ ndẽ. ³ Ñãyivi ndũu ndijãã ñũu ñĩn tõi ñũhũ ñã xihĩn ndõ ta ndĩquiahva na ndixãhvi nu ndõ, tá Felix jãchĩ cãja cuãhã ndõ ñãmanĩ xihĩn ndẽ. ⁴ Ta viti cõ cũnĩ ndẽ jãquĩhvi ndẽ ndõhõ joo cãja ndõ ñãmanĩ cuni jõho loho ndõ ñã cũnĩ ndẽ cãhãn ndẽ xihĩn ndõ yõho. ⁵ Candẽhẽ ndõ, tá Felix. Ñãnditãhãn ndẽ dã nanĩ Pablo yõho xĩca nuu da jãquĩhvi dã ñãyivi. Ta nĩ cũu xĩca nuu da sãhndã java tãhãn da ñãyivi ñãquixi chĩchi Israel. Ta mẽ Pablo yõho cũu dá jĩnĩ nuũ in tãhndã ñãyivi, ñã nanĩ nazarenos. ⁶ Ta jivi mẽ dã yõho ñãnducũ dã jãyuxũ dã veũõhu cãhnu ndẽ ndãcããn ñũu Jerusalãn cãn. Sãhã ñã cãn quẽã ñãtiin ndẽ dã ta ñãnducũ ndẽ cãja viĩ ndẽ sãhã dá tá quiahva sãhndã ley mẽ ndẽ cãja ndẽ. ⁷ Joo dã cũu jefe soldado, dã nanĩ Lisias cãn ñãquĩhvi da taũu ndẽ ta xihĩn ñã tõi yĩ ñãcandãã da Pablo ndahã ndẽ. ⁸ Ta ñãcachi da xihĩn ndẽ ñã ná quixi ndẽ cãhãn cuãchĩ ndẽ nu mẽ ndõ sãhã Pablo. Ta viti, tá Felix cuu ndãcã tũhũn ndõ Pablo jãn ta já ñãhãmã mẽ va da nu ndõ. Ta xihĩn ñã yõho cuu candãã ini ndõ ñã ndãã cãhãn ndẽ sãcũ ndẽ sãhã dá nu ndõ — ñãcachi Tãrtulo cãn xihĩn Felix.

⁹ Ta jãri ñã Israel ndũu cãn ñãcachi na ñã jivi ndusa ñã ndãã quẽã. ¹⁰ ãndã já ñãndĩnehe gobernador cãn ndãhã dá ñã ná cãhãn Pablo. Ta já cãchĩ Pablo já:

—Cãjĩ ini i ndĩquehe e sãhã i nu mẽ ndõ, tá Felix jãchĩ sã cuãhã cuiã cãja viĩ ndõ sãhã ñãyivi Israel. ¹¹ Tá ná ndãcã tũhũn ndõ ñãyivi yõho já candãã ini ndõ ñã sã ñĩn uxũ ivĩ quĩvĩ ñãxĩnu cõõ i ñũu Jerusalãn cãja cãhnu i Ndiõxi. ¹² Ta ni in tũhũn toho ñãyivi cõ ndĩtũhũn ihvi yehẽ xihĩn. Ta ni in tũhũn toho ñãyivi cõõ ñãjãndĩnihi i veũõhu cãhnu ndãcããn Jerusalãn cãn. Ta ni ñã tãcã veũõhu vãlĩ

ta ni na táca cáye ñuu Jerusalén cán coó najándinihi i. ¹³ Ta na jácojo cuachi jatá i yóho a cúu caja na nahá na nu mé ndó ña ndaa cáhan na sahá i. ¹⁴ Ña cúní ndusa i caxi tuhun i xihín ndihi ndó queá cája cáhnu i Ndióxi, mé a nacaja cáhnu tásáhnu jícó i tá quiahva najánaha Jesús caja í. Vatí cáchí na Israel yóho ña co xíca i íchi ña ndaa. Joo cándusa i tóco ndihi ley nacahyí Moisés ta cándusa i ña nacahyí na profeta sanahá. ¹⁵ Ta tá quiahva cándusa na yóho quiahva já cándusa ri yehe va jáchi cándusa nde ña vaxi quiví nditacu tóco ndihi na sa nax-ihí. Coó caja toho á cúu ná na vaha á na quini. ¹⁶ Sahá ña cán queá xíní Ndióxi ña ndijáá ní quiví cája i ña vaha xihín ndinuhu ini i nu mé á xihín nuú ñayivi.

¹⁷ Sa fin chá cuia naxíca nuu i java ga ñuu. Andá jáví nandicó coo tucu u ñuu Jerusalén ña quiahva i jjuhún nuú na Israel ta joco i nu Ndióxi ña ndítahan nuú i joco i nu á. ¹⁸ Ta nani cája i mé ña yóho ndácaan i veñuhu cáhnu Jerusalén cán já java da Israel, da naquixi chí estado Asia cán naxini da yehe nu ndácaan i ve ñuhu cán. Ta tá nandihí nandaja víi i mí i tá quiahva sáhdá ley cája nde, coó ñayivi cuaha nasanduu cán ta ni in túhún toho na cán coó najándinihi i. ¹⁹ Ta na naquixi chí Asia cán, na cán va cúu na ndítahan cacu sahá i nu ndo, tá Felix tá fin a ndóho na xihín i. ²⁰ Joo na ndúu yóho coó saha toho na cacu na sahá i nu mé ndó. Á tá coó ná cáhan na tá nandinehe ná cuachi i tá nacaja víi na sahá i nuú na sacuahá nuú na Israel cán, dá já. ²¹ In túhún ña nacaja i tá cája víi na yóho sahá i queá nacayuhú u ta nacachi i: “Cája víi ndó sahá i sahá ña cándusa i ña vaxi quiví nditacu tucu ndii”, ña cán cúu ndihi va nacachi i xihín ná —nacachi Pablo cán xihín da cúu gobernador cán.

²² Sa xíní vaha Felix cán ndaja fin ña jánaha na cúu cuéntá Jesús cán sahá ña cán queá cúní da candati tóo da caja víi

da saha Pablo. Sahá ña cán queá já nacachi da já xihín na Israel cán:

—Candati ndó janda quiahva ná casaa da naní Lisias, da cúu jefe soldado ñuu Jerusalén já cuu caja víi i sahá da yóho —nacachi Felix.

²³ Tá nandihí já nasahnda Felix chuun nuú da sáhdá chuun nuú soldado cán ña ná chicaan tucu na Pablo vecaa. Ta nasahnda da chuun ña ná caja vaha da xihín Pablo ta ná quiahva da ñamaní nuú na xíca xihín Pablo coto nihni na da ña ná caja ndívi na nu dá.

²⁴ Tá nayaha chá quiví já nacasaa tucu Felix cán xihín Drusila, ñájíhí da, ña cúu ña Israel. Nacana tucu Felix Pablo ña ná quixi da ta ná ndicani da nu ná ndá quiahva caja na ndiquehe na íchi cuéntá Jesús. ²⁵ Ta nandicani Pablo nu ná ña ndítahan nu ná caja na ña ndaa cuití va ta ndítahan nu ná cahnu na nuú ña xíca ini yiquí cuñu na caja. Ta nandicani Pablo nu ná ña vaxi quiví caja víi Ndióxi sahá cuachi ñayivi. Andá já nayihví Felix cán já nacachi da já xihín Pablo:

—Cuáhán viti. Tá núná nuú i já cana tucu u yohó quisún —nacachi Felix xihín Pablo.

²⁶ Mé Felix yóho ndátí da quiahva Pablo jjuhún nu dá já janí ñahá da. Sahá ña cán queá cuahá ndivaha tañu nacana da da nditúhún da xihín dá. ²⁷ Ta tixi ivi cuia já cuití nacaja da xihín Pablo janda quiahva nandicojo da naní Porcio Festo chuun cacuu da gobernador saá cán. Ta mé Felix cán coó naxeen da janí da Pablo jáchi cúní da candoo vaha da nuú na Israel cán.

Ndíquehe Pablo saha mé dá nuú gobernador Festo

25 Tá sa nayaha uní quiví nandicojo Festo chuun cúu dá gobernador já naquee da ñuu Cesarea cán nasahan da chí ñuu Jerusalén. ² Ta tá naxinu coo da cán nasahan na sacuahá nuú jutú

xihín java gá na Israel, na íin chága saha cahan cuachi na saha Pablo nu Festo. ³Ta ñamaní cáhnu naxica na nu dá queá ña ná cahnda da chuun ná quixi Pablo chí ñuu Jerusalén yóho. Jáchí mé na cán nasacu ini na tiin na Pablo íchí cahní na da. ⁴Joo coó ñacandúsa Festo caja da ña cúní na sahá ña cán queá ñacachi da xihín ná ña ndáá vaha na Pablo ñuu Cesarea cán. Ta sahá ña sácú ini da cuhun yachí da mé cán ⁵sahá ña cán queá ñacachi da xihín ná já:

—Ndá na cúu na sacuahá nu ndó jan xíní ñúhú cuhun na ñuu Cesarea xihín i já ná cuu cacu na saha Pablo tá íin cuachi ñacaja da —ñacachi Festo xihín na Israel cán.

⁶Ta nasahíin Festo tátuhun uná á uxu quiví cuití va ñuu Jerusalén cán já ñandicó coo tucu da chí ñuu Cesarea. Ta inga quiví itaán já nasacoo da nu silleta nu sácóo na cája víi sahá ñayivi. Andá já ñasahnda da chuun ña ná cana na Pablo quixi da nu dá. ⁷Ta tá naxinu coo Pablo nu Festo cán já tóco ndihi na Israel, na ñaquixi ñuu Jerusalén cán ñacava nuu na jatá Pablo já ñacasáhá jácojo cuaha ná cuachi ndeé jatá dá. Joo co ñehe ná ndaja nahá na nu Festo cán ña cahan na ña ndaa saha dá. ⁸Ta ñacasáhá Pablo ndíquehe da saha mé dá já ñacachi da já:

—Ni in túhún toho cuachi coó ñacaja i xihín ley na Israel ta ni xihín veñuhu cáhnu coó ñacaja i cuachi. Ta ni nuú dá cómí cuéntá sahá ñuu Roma coó ñacaja i cuachi —ñacachi Pablo xihín tóco ndihi ñayivi ndúu cán.

⁹Ta sahá ña cúní Festo candoo vaha da nuú na Israel sahá ña cán queá ñandaca tuhún da Pablo já ñacachi da já:

—Á cándúsún cuhún ñuu Jerusalén já ná cajú víi i sahun cán —ñacachi da xihín Pablo.

¹⁰Andá já ñanducú ñehe Pablo tuhun nu dá já ñacachi da já:

—Uhun. Coó saha cúu á cuhun i ñuu Jerusalén jáchí viti ñúhú cándichi i nu mé ndó ta cúu ndó gobernador romano. Ta mé ndó ndítahan nuú cajú víi sahá i jáchí sa cándaa cáxí ini ndó ña coó cuachi toho ñacaja i xihín na Israel jan. ¹¹Joo tá ñacaja ndusa i cuachi, mé a ndaa co yihvíi toho i quivi i sahá cuachi i. Joo a juú toho ña ndaa cúu tóco ndihi cuachi jíquí jácojo na Israel jan jatá i sahá ña cán queá co ndítahan nu ndó ndiquíahva ndó yehe nuú na yóho. Ta viti xica i ñamaní nu ndo ña ná chindahá ndó yehe ná cuhun i nuú emperador ñuu Roma ná cajú víi mé dá sahá i —ñacachi Pablo xihín Festo cán.

¹²Tá ñandihí já ñanditúhún Festo cán xihín na sacuahá cajú chúun nu dá cán ndaja ndítahan coo cajú da. Andá já ñacachi tucu Festo cán já xihín Pablo:

—Vaha dá já. Nu emperador íin ñuu Roma ñacachún cuhun cúnun. Ta cán cuhun cavií sahun —ñacachi Festo xihín Pablo.

Tá íin Pablo nu rey Agripa

¹³Tá ñayaha chá quiví já naxinu coo in rey naní Agripa xihín ña naní Berenice ñuu Cesarea cán coto nihni na Festo.

¹⁴Ta ñasanduu na chá quiví xihín Festo cán. Ta nani ndúu na cán ñandicani Festo nu rey Agripa ndaja cajú ña ndóho Pablo já ñacachi da já xihín dá:

—Ini vechúun yóho ndácaan in da naní Pablo ta andá tá nasacuu Felix gobernador já ñatiin na da. ¹⁵Ta tá ñasahan i ñuu Jerusalén já sácú na sacuahá nuú jutú xihín na sacuahá nuú na Israel saha dá ña ná quivi da cajú i. ¹⁶Andá já ñanducú ñehe e tuhun nu ná ña co sahan ley ñuu Roma ñamaní ña cahní na ñayivi tá coó na sácú saha dá ndíta nu táhyí dá já ná cuu ndiquehe da saha dá nu ná. ¹⁷Sahá ña cán queá tá ñandai cuu na Israel cán ñuu Cesarea yóho já ñandihí ini i já ñasahan i nasacoo i inga quiví

itaan nu sácoo na caja víi sahá ñayivi. Já nasahnda i chuun ña ná cañehe na Pablo quixi da nuú i. ¹⁸ Tá naxinu coo na cán sácú na saha dá coo nasacu na cuachi cáhnu saha dá tá quiahva cáhán i. ¹⁹ Joo cáhí na ña co cúní da candúsa da tá quiahva cándúsa mé ná. Ta sácú na saha dá jáchí xíca da jánaħa dá saħa Jesús, mé a naxihí xihna. Joo jánaħa Pablo ña tácu yíi va mé Jesús. ²⁰ Ta saħa ña co cándaa ini i ndaja caja i caja víi i saħa ña yóho saħa ña cán quea nandaça tuhún i Pablo ña á cándúsa da cuħun da ñuu Jerusalén caja víi i saħa dá. ²¹ Joo ñacachi da xihín i ña cúní da cavií saha dá nuú da cúu emperador naní Augusto, da iin ñuu Roma cán. Saħa ña cán quea nasahnda i chuun ña ná candaa vaha na da janda quiahva ná cuu chindahá i da nuú emperador já ná caja víi da cán saha dá —ñacachi Festo xihín rey Agripa cán.

²² Anda já ñacachi rey Agripa cán já xihín Festo:

—Cúní ri yeħe va cuni johó i ndá quiahva cáħan da naní Pablo jan —cáhí Agripa.

Anda já ñacachi Festo já xihín dá:

—Itaan já cuni johún nuú caħan da —cáhí Festo.

²³ Ta inga quiví itaan naxinu coo rey Agripa xihín Berenice nu iin Festo cán. Ta ndíxi vaha ndivaha na nandihvi na xihín in yíco da cúu sacuaħa nu soldado xihín nataa iin saħa ñuu cán. Ta tá nasanduu na já nasahnda Festo chuun ña ná cuħun na quehe na Pablo. ²⁴ Ta tá nasaa da nu ná já ñacachi Festo já:

—Mé ndó, rey Agripa xihín ndihi ndó, na nataca ndúu xihín nde yóho. Candehé ndó da naní Pablo cándichi yóho. Cuħhá ndivaha táħan na Israel, na ndúu ñuu Jerusalén xihín na ndúu ñuu Cesarea yóho sácú na saha dá nuú i. Ta a juú quiahva ndúcú ndéé na cáħan na ña ndítahan quivi da caja i. ²⁵ Joo yeħe cáhán i ña co ndítahan toho nu dá quivi

da jáchí coo cuachi cáhnu ná caja da. Ta saħa ña naxica mé dá cavií saħa dá nuú emperador Augusto iin ñuu Roma cán saħa ña cán quea sácú ini i chindahá i da cuħun da cán cavií saħa dá. ²⁶ Joo co xíní ndía caħyí i nuú da cúu emperador ñuu Roma saħa cuachi sácú na saħa dá. Saħa ña cán quea nasani ndichi i da nuú ndihi ndó xihín nu mé ndó rey Agripa já ná ndaja ndichí ndó da já ná ñeħe íní i ndáa caħyí i nu carta chindahá i nu emperador ñuu Roma cán. ²⁷ Jáchí coo saħa cúu á chindahá i da ñuu Roma tá a cuú caħyí i ndá cuachi jácojo na jata dá —ñacachi Festo xihín na cán.

Ndíquehe Pablo saħa mé dá nu rey Agripa

26 Anda já ñacachi rey Agripa cán já xihín Pablo:

—Viti va sáħan nde ñamaní nuun ndiquehún saħun.

Anda já nandiñehe Pablo ndáħa da já ñacasáħa cáhí da já:

²—Cájji íní i ña cuu ndiquehe e saħa mí i nu ndó, rey Agripa jáchí a juú quiahva cuħhá cuachi jíquí jácojo na Israel jatá i. ³ Cájji íní i cáħan i nu mé ndó, rey Agripa jáchí cándaħa vaha ini ndó ndaja iin costumbre na Israel. Ta cándaħa ini ndó ndá ñaha quea ndítuhún táħan nde saħa. Saħa ña cán quea xíca tahví i nu ndó ña ná caja ndó ñamaní cáhnu coo ini ndó cuni johó ndó ña caħan i xihín ndo yóho.

⁴ Tóco ndihi na Israel xíní vaha na ña nacaja i tá nasacuu u da tacú. Ta anda viti xíní na yeħe ta xíní na ña nacaja i ñuu i xihín ñuu Jerusalén. ⁵ Ta xíní vaha na ña janda yúta i nasacuu u ta fariseo ta chí cuu ndicani na nu mé ndó tá cúní na. Ta ndeħe, na fariseo cúu nde na cája ley Moisés xihín ndinuhu chága ini nde a juú ga inga na. ⁶ Ta saħa ña cándeé cáhnu ini i ña vaxi quiví jánditacu tucu Ndióxi tóco ndihi na naxihí

sahá ña cán queá na Israel yóho ñehe na yehe ñacasaa na caja vií na sahá i nu mé ndó. Ta mé Ndióxi queá nasahan tuhun a nu tásáhnú jícó nde ña nditacu tucu ndii. ⁷Tóco ndihi ñayivi táhan na ñaquixi chíchi ndíhuxu ivi jahyi Israel cán ndáti na cuni na nuú jáxinu coo Ndióxi nuú tuhun a. Sahá ña cán queá nuú ta ndiví cája cáhnú na Ndióxi. Candehé ndo, rey Agripa. Sahá ña cándúsa i tá quiahva cándúsa na cán sahá ña cán queá jácojo na Israel cuachi jatá i viti — ñacachi Pablo xihin rey Agripa.

⁸Anda já ñacahan Pablo xihin na Israel ndúu cán já:

—Á mé a ndaa cándúsa ndó ña cuu caja Ndióxi ña nditacu tucu ndii — ñacachi Pablo xihin na Israel ndúu cán.

⁹Anda já ñacachi tucu Pablo xihin rey Agripa já:

—Yehe ñacahan i jihna ña ndítahan caja xíxi i xihin na cúu cuéntá Jesús, mé a ñaquixi ñuu Nazaret. ¹⁰Sahá ña cán queá já ñacaja i ñuu Jerusalén jihna. Ta nasahan i naxica i ñamaní nuú na sacuahá nuú jutú já ná quiahva na ñamaní nuú i caja i ña yóho. Ta tá ñañehé e ñamaní já nataán cuahá i na cúu cuéntá Jesús vecaa. Ta tá ñasahní ñahá na, cájii ini i sahá ña cája na já xihin ná. ¹¹Ta cuahá tañu ñacaja xíxi i xihin ná ña ná cahan ihvi na saha Jesús, mé a cándéé ini na. Níí cúu veñuhu naxica nuu i cája i já xihin ná. Ta janda ñuu tóho nasahan i ñandicuiña ñee e na jáchi ñasaxojo ndivaha ini i xihin ná.

Ndícani Pablo ndaja ñandihvi da íchi cuéntá Jesús

(Hch. 9:1-19; 22:6-16)

¹²In tañu ñañehé e ñamaní nuú na cúu sacuahá nuú jutú ñuu Jerusalén ña ná cahun i ñuu Damasco taán i na cúu cuéntá Jesús vecaa. Sahá ña cán queá ñaquee e cuahan i. ¹³Candehé ndó, rey Agripa. Nani xíca i cuahan i íchi cán cúu

á tátuhun caxivi já naxini i ñandiyihvi ndaa in ñúhu indivi ta yehe chága ña a juú ga candii. Ta ñacava nuu a jatá i xihin jatá da casahan xihin i cán. ¹⁴Anda já ñacuyu ndihi nde nu ñúhu ta já naxini johó nde in a cahan tuhun hebreo já ñacachi a já xihin i: “Saulo, Saulo ndá cuéntá queá ndícuítún cája xísún xihin i. Candehé. Cája xísún xihin mé vún. Ña cájun xihin i cúu á tátuhun ña cája tindiquí tá sání ndaa rí nu póyá”, ñacachi a cán xihin i. ¹⁵Anda já ñacasáhá ndáca tuhún i já cáchi i já: “Yo cúu mé ndó cahan xihin i.” Anda já ñanducú ñehe a cán tuhun nuú i já ñacachi a já: “Yehe cúu Jesús, mé a xíca nuún cája xísún xihin. ¹⁶Ta viti cuahán ndacoo, candichi. Ñanaha i mí i nuun já ná caja chúun cuéntá mí i viti já ná ndicanún nuú ñayivi ndaja cáa ña ñaxinún viti ta já ná ndicanún nu ná java ga ñaha já ñaha i nuun chága chí nuu. ¹⁷Mí i jácacu u yohó já ná a cáhni na Israel yohó ni na tóho a cáhni na yohó jáchi nu mé na tóho cán chindahá i yohó cahun cahun sahá i viti. ¹⁸Ta jánahún nu ná ndaja caja na jándicoo na íchi naá ndivaha nu xíca na viti. Jáchi ndítahan nu ná ndicaca na íchi mí i nu yehe ndivaha. Ta jánahún nu ná ña ná a ndíquiahva ga na mé ná ndahá tiñáhá sacuahá. Ña ndítahan caja na queá ndiquiahva na mé ná ndáha Ndióxi ta ná caja na ña cúní mé á. Ta ndítahan cándéé ini na yehe já ná caja cáhnú ini i sahá cuachi na. Ta já ná cuu in nduu na xihin na ñacaxi i ñehe táhvi ña cúní Ndióxi quiahva nu na”, ñacachi Jesús xihin i tá nasahan i íchi ñuu Damasco.

Ndícani Pablo sahá chuun cája da

¹⁹Candehé ndó, rey Agripa. Coó ñacaja sáá ini i. Jáchi ñacaja i tá íin nasahnda Jesús nuú i caja i. ²⁰Sahá ña cán queá ivi laá ñacasáhá cahan i tuhun vaha saha Jesús nuú ñayivi ñuu Damasco cán.

Tá nandihí já naquee e nasahan i cahan i ña xihín na ndúu ñuu Jerusalén xihín na ndúu ndijáá ñuu estado Judea. Ta janda xihín na coó naquixi chichi Israel nacahan i saha Jesús. Ta nacachi i xihín ná ña ndítahan nu ná jándacoo na ña núu cája na ta ná ndicó coo na nu Ndióxi. Ta ndítahan caja na ña vaha já ná nahá ña mé a ndaa táhyí nandiquehe na íchi cuéntá Jesús. ²¹ Ta sahá ña yóho cuití natiin na Israel yehe nani ndácaan i veñuhu cáhnu ñuu Jerusalén ta viti ndúcú na cahní na yehe. ²² Joo Ndióxi nachindeé a yehe sahá ña cán queá coó najándihí na sahá i. Ta anda viti xíca nuu i cahan i tuhun Ndióxi nuú ñayivi ta coó caja toho a á cúu ná na ndahví á cúu ná na íin cuahá saha. Ta tóco ndihí ña já-naha i nu ná co cúu á ña quíxi jiní mí i jáchi cúu á ña nacachi na profeta xihín ña nacachi Moisés coo. ²³ Ta ña nacachi na cán queá vaxi quiví quixi Jesucristo ñuyiví yóho ta a juú quiahva jándoho na ini a. Ta cahní na ña ta tá nandihí jánditacu tucu a. Ta mé á cacuu ña nu cuití nditacu nuú tóco ndihí na sa nax-ihí. Ta mé á jánaha nuú ñayivi ndaja cuu cacu ndaa ínimá ná coó caja toho a á cúu ná na Israel á cúu ná na tóho —nacachi Pablo xihín rey Agripa cán.

Cúni Pablo ná ndihvi Agripa íchi cuéntá Jesús

²⁴ Tá nacatáji loho Pablo nu cahan da já nacayúhú cóhó Festo nu dá já cáchi da já:

—Nacatachi vún, Pablo. Nayaha ndivaha quiahva najácuahún sahá ña cán queá nacatachun —nacachi Festo cán xihín Pablo.

²⁵ Anda já nacachi Pablo já xihín dá:

—Coó nacatachi toho i, tá Festo jáchi ndinuhu ña ndaa cahan i xihín ndo. ²⁶ Ta xini vaha mé rey Agripa yóho ña cahan i ña ndaa. Ta co yíhví cahan i nu dá jáchi cándaa ini i ña xini vaha mé dá ndá

saha cahan i jáchi co cúu á ñaha nayaha nuú jehé. ²⁷ Ta viti cachi ndó xihín i, rey Agripa á cándusa ndó ña nacahan na profeta sanahá. Cája i cuéntá cándusa ndó ña nacachi na —nacachi Pablo.

²⁸ Anda já nanducú ñehe rey Agripa cán tuhun já nacachi da xihín Pablo:

—Ja lóho cuití ta cavún jiní i ña ná nduu u cuéntá Jesús, nduu —nacachi rey Agripa.

²⁹ Anda já nacachi Pablo já xihín dá:

—Á yachi á cuee coó caja toho a. Ña xíca tahví i nu Ndióxi queá ná xinu coo mé ndó, rey Agripa xihín tóco ndihí na ndúu yóho cacuu ndó tátuhun mí i jáchi cándeé cáhnu ini i Jesús vatí mé a ndaa co cúni ña ná candico ndáha ndo tátuhun yehe —nacachi Pablo xihín dá.

³⁰ Tá nandihí nacahan Pablo já nandaca ndichi rey Agripa cán xihín Berenice ta nandaca ndichi Festo xihín java ga na nasanduu coo xihín dá cán. ³¹ Já natavá táhan na ndítuhún na saha Pablo já cáchi xihín táhan na já:

—Co ndítahan toho nuú da yóho quivi da jáchi coo cuachi ndeé ná caja da ta janda ni vecaa co ndítahan ndacaan da —cáchi na.

³² Anda já nacachi rey Agripa cán já xihín Festo:

—Tá ná a cahan da yóho ña cúni da cavií saha dá nuú da cúu emperador ñuu Roma ta cuu janí vún da, nduu —nacachi Agripa cán xihín Festo.

Chíndahá na Pablo ñuu Roma

27 Tá nasacu ini na chindahá na Pablo ná cuhun da chí nación Italia nu ndácaan ñuu Roma cavií saha dá já nandiquiahva na da xihín java ga da ndácaan vecaa cán nuú da naní Julio, da sáhdá chuun nu soldado cuéntá Roma. Mé Julio yóho cúu dá da cómi cuéntá sahá in táhdá soldado naní Augusto. Ta tañu na cuhun xihín Pablo cán cuahan ri yehe, da naní Lucas. ² Ta tañu

nde cán cuahan ri da naní Aristarco, da ñuu Tesalónica, ña ndácaan estado Macedonia. Nandaa nde ini barco, dó naquixi chí Adramitio. Mé barco yóho cúú dó cuhun ndijáá ñuu válí ñúhu estado Asia cán. Cándójó nde barco cán cuahan nde. ³Ta inga quiví itaan naxinu coo nde ñuu Sidón. Ta cán nacaja vaha da naní Julio cán xihín Pablo jáchi nasahan da ñamaní nu Pablo ña ná coto nihni da na xíní táhan xihín dá ndúu ñuu Sidón cán já ná caja ndíví na nu dá. ⁴Ta inga quiví itaan já nandihvi tucu nde barco já naquee nde ñuu Sidón cán. Ta sahá ña vaxi tachí xoo nuú cuhun barco cán sahá ña cán queá nayaha nde xoo íti isla Chipre jáchi co xícó cuahá tachí cán. ⁵Naxojo cava nde anda inga xoo tañuhú ta já nayaha nde in xoo estado Cilicia xihín estado Panfilia. Anda já naxinu coo nde ñuu Mira ndácaan estado Licia.

⁶Mé ñuu Mira cán nandiñehé da sáhdná chuun nu soldado cán in barco, dó naquixi chí Alejandría ta cuhun do chí Italia. Ta najánda da ndehe jata dó cán já naquee tucu nde cuahan nde. ⁷Cuéé vaha va cuahan nde ta nandoho chá ini nde cuahan nde sahá ña cán queá cuahá quiví nacaja nde janda quiahva naxinu coo nde ñuu Gnido. Ta sahá ña xícó ndivaha tachí xoo nuú cuhun nde cán sahá ña cán queá nandijama nde nuú cuhun nde. Ta já nayaha nde inga xoo isla Creta nuú nayaha nde ñuu Salmón. ⁸Cuéé ndivaha cuahan nde já yaha nde yati yuhú tañuhú isla Creta cán. Anda jáví naxinu coo nde nuú coo vaha barco naní Puerto Vaha yati ñuu Lasea.

⁹Sa nayaha cuahá quiví ta nacacuáchi nde. Ta iyo ndivaha cáa cuhun nde xihín barco jáchi nacayati tiempo vixi. Sahá ña cán queá nacahan Pablo xihín ndihi na cán já cáchí da já xihín ná:

¹⁰—Candehé ndo. Cája i cuéntá iyo ndivaha cáa coho xihín barco jáchi cuu ndihi saha barco xihín ña ndójo dó

cuahan do. Ta janda mí cuu quiví — nacachi Pablo xihín ná.

¹¹Joo coo naxeen da sáhdná chuun nuú soldado cán cuni johu da nu cáhan Pablo. Nacandúsa chága da nuú nacahan da ñéhe barco xihín da xiñaha barco a juú ga nuú nacahan Pablo. ¹²Ña nacachi na queá a cuú candoo na yóho tiempo vixi jáchi xícó ndivaha tachí. Ta tóco ndihi na nacachi na ña vaha chága ná cuhun nde. Tiahva náá jana quee vaha nde xinu coo nde janda ñuu Fenice cáhan na. Mé ñuu Fenice cán ndácaan isla Creta ta co xícó ndeé nahá tachí cán. Sahá ña cán queá nasacu ini na canduu na cán tiempo vixi.

Tá naxicó ndivaha tachí nuú tañuhú

¹³Tá nandihí já nacasáhá vitá uun xícó tachí sahá ña cán queá nacahan na ña cuu va quee nde cuhun nde. Anda já naquee nde cuahan nde yati yúhu isla Creta cán xíca nde cuahan nde. ¹⁴Joo tá nandihí já naxinu tachí ndeé jata barco. Mé tachí ndeé cán vaxi a chí xoo norte xihín chí nu cána candii. ¹⁵Ta nacasáhá ñúhu mé tachí ndeé cán barco cuahan do. Ta sahá ña coo nacuu caja nde jándicaca nde barco cán xoo nuú vaxi tachí sahá ña cán queá nasahan nde ñamaní ña ná cañehe a barco cuhun do tá quiahva cúni tachí. ¹⁶Tá nandihí já nayaha nde jata in isla loho naní Claudia. Ta mé cán coo naxicó nahá tachí ndeé. Anda já nacasáhá nde jánda nde lancha loho, dó jítá barco cáhnu cán. Joo nandoho chá ini nde já nacuu najánda nde do jata barco cáhnu cán. ¹⁷Tá nandihí já nacava nuu na rieta jata mé barco cáhnu já ná coo tóyí do. Tá nandihí já najánuu na jáhma cáhnu sánda barco cán ña ná cañehe mé tachí do. Nacaja na ña yóho jáchi yíhvi na xinu coo barco xoo naní Sirte nu yájí tañuhú ta cán cuu cachihín dó ñutí. ¹⁸Ta chí coo nasacuiin tachí ndeé nahá cán inga quiví itaan

sahá ña cán queá ñacasáhá ña jácana ni-hni na ñaha ndójo barco cán ini tañuhú já ná ndicama dó. ¹⁹ Ta tá naxinu quiví uní janda mé nde viti ñacasáhá nde jácana nde ña sácaya chúun barco cán ini tañuhú já ná ndicama chága do. ²⁰ Ta tixi cuahá ndivaha quiví coó naxini nde nuú candii ta ni quimi co tívi. Ta javi ñacuun quini ndivaha dó ta a juú quiahva naxicó ndivaha tachí. Sahá ña cán queá chí ñasahnda vaha ini nde: “Yóho quiví viti”, ñacahán nde.

²¹ Cuahá ndivaha quiví ñayaha ta ni in nde co cúnj cuxu. Sahá ña cán ñandaca ndichi Pablo tañu tóco ndihi na cán já ñacasáhá cáhí ña já:

—Tá ná coo johó ndó tá ñacahan i xihín ndo ta ná candoo í ñuu Creta, nduu. Ta ni a ndóho í ña ndóho í yóho viti ta ni a tívi toho ndihi ñaha ñasandojo barco yóho, nduu. Joo coó naxeen ndó candúsa ndó ña ñacahan i xihín ndo. ²² Joo cáhí i xihín ndó viti ña co ndítahan ndicani ini ndó. Jáchí ni in túhún toho ndó a quiví vatí mé barco ndihi saha do. ²³ Jáchí yehe cúu u cuéntá Ndióxi ta cája cáhnu i mé á. Ta mé ñuú janda véhe ñanaha in táto Ndióxi mé á nuú i. ²⁴ Ta já ñacachi a já xihín i: “A cáyhívi tohún, Pablo. Jáchí ndítahan xinun tá xinun nuú ña cúu emperador ñuu Roma cán. Ta saha yóhó jácacu ri Ndióxi tóco ndihi na ñuú xuhun ini barco ña já ná a quiví na ini tañuhú”, já ñacachi táto Ndióxi xihín i. ²⁵ Sahá ña cán queá a ndicani ga ini ndó jáchí cándeé cáhnu ini i Ndióxi ta cándaá cáxi ini i ña coo tá ín ñacachi táto Ndióxi xihín i. ²⁶ Joo in tachí ndeé caja ña ná tívi barco yóho yati in isla —ñacachi Pablo xihín ña cán.

²⁷ Sa naxinu sahun quiví xica nde ini barco cán cuahan nde. Ta in ñuú naxinu coo nde in xoo tañuhú naní Adria. Joo tá xoo johó tá xoo cáa ñehe tachí nde cuahan nde. Joo tátuhun java ñuu já

naxini ña ñehe barco cán ña cáyati nde yuhú tañuhú cuahan nde. ²⁸ Anda já ñacasáhá chíquiahvá ña ndá quiahva cúná tañuhú yati yúhu nuú nduu nde cán. Ta quiahva cúná do ñasacuu oco sahun in metro. Tá ñacasáhá cáyati chága barco yúhu cán já nachiquiahva tucu na. Ta cán sa yáji chága ta cúu á oco usa metro quiahva cúná a. ²⁹ Ta sahá ña yíhvi ña xinu coo barco cani ndaa dó tóto ñuú yati cán sahá ña cán queá ñatiin na rieta ña ndíco comí caa gáncho cáhnu nuú cán. Ta najácana na ña ini tañuhú chí xoo cáha mé barco cán já ná tiin a barco ná a cáca ga dó cuhun do chí nuu. Ta a juú quiahva yíhvi ña ndáti na ná tívi. ³⁰ Joo ndaja coo java ña cája chúun xihín barco cán ñacahán ña quee jehé ña xihín lancha loho cán cuhun ña. Sahá ña cán queá ñacasáhá ña ndáxi ña lancha loho cán ña jánuu da do nuú tañuhú ta já cuhun ña, cáhán ña. Ta ñacasáhá cája da tátuhun táan chága ña caa gáncho cán ini tañuhú já ná tiin a barco xoo chí nuu do. ³¹ Joo naxini Pablo ña cája da sahá ña cán queá ñacaxi tuhun da nuú ña sahná chuun nuú soldado ta xihín nuú soldado cán já cáhí ña já xihín ná:

—Tá ná quee ña ña cuhun ña já queá ndihi saha ndó ini tañuhú —ñacachi Pablo.

³² Anda já ñasahan soldado cán ñasahnda da rieta ndíco lancha loho cán já najándicava da dó ini tañuhú.

³³ Ta tá sa yati tívi yaa já najácahan Pablo tóco ndihi ña cán ña ná cuxu na vatí loho. Já ñacachi da já xihín ná:

—Sa ñayaha sahun quiví co xíxi ndó ta ni co quíji ndo. ³⁴ Sahá ña cán xíca i ñamaní nuú ndó ña ná cuxu ndó vatí chá va. Xíní ñuhú cuxu ndó já ná coo ndeé ndo chindeé ndó mé ndó já ná cacu ndó. Jáchí cacu ndihí. Ta ni janda in túhún íji jini yo a ndíhi saha —ñacachi Pablo xihín ná.

³⁵Tá nandihí naçachi Pablo ña yóho xihín ná já natiin da in pan ta nu táhyí ndihí na cán nandiquiahva da ndixahvi nu Ndióxi. Tá nandihí já nañahnda java da ña ta naçasáhá da xixi da. ³⁶Xihín ña yóho nandindeé ri ini na java cán ta naçasáhá na xixi na. ³⁷Ta tóco ndihí nde, na nañahu ini barco cán naçacuu nde ivi ciento uní jícó sañun in ñayivi. ³⁸Tá nandihí naçixi nde ña cúní nde já naçata na trigo ini tañuhú já ná ndicama chága jata barco cán.

Cáçoo barco çahá tañuhú

³⁹Joo tá naçivi yaa já naçini na ñundáhyi. Joo çoo naçuu ndicuni da cája chúun xihín barco cán ndá ñuu cúú á. Ta tá nandihí já naçini na ña íin ñutí nu yáji yuhú tañuhú cán. Anda já naçahan na já-cayati na barco yati yúhu cán. ⁴⁰Sahá ña cán queá nañahnda na rieta ndíço barco cán já najani dó. Ta naçandoo çaa gán-cho ini tañuhú naçaja na. Ta tá nandihí já najánditayi na yitó nuú jahnda ta xihín yító cán naçasáhá na jándicaca na barco cán nuú tañuhú. Ta najándindita tucu na jahmá cáhnu xoo nu barco cán já ná cuu caca dó xihín taçhi. Ta xihín ña yóho naçasáhá barco cán cáyati dó yuhú tañuhú. ⁴¹Ta in cuití naçinu barco cán nu ndíque táhan ivi táhnda tañuhú. Ta sahá ña naçayáji tañuhú nuú ñutí cán sahá ña cán queá naçatiin nuu barco cán. Ta ni loho ga çoo naçuu çuhun do. Joo xihín ña quiahva ndeé ndacú cáni ndaa tañuhú cán xoo cáha do sahá ña cán queá naçasáhá cháchi dó. ⁴²Anda já nanducú soldado cañni ndihí da na çuañan vecaa ñuu Roma cán. Jáchi tiahva náá jítá na çuhun na nuú tañuhú ta cunu na çuhun na tá sa naçqueta na yuhú tañuhú, cáhán na. ⁴³Joo da sáhnda chuun nuú soldado cán çoo naçahan da ñamañi ña ná caja na já jáchi cúní da jáçacu da Pablo. Ña naçaja da queá nañahnda da chuun nuú na tiahva jítá ticuúí ña ná jácana na mé

ná ini tañuhú cán já ná xinu na nu ñúhu. ⁴⁴Ta na java, na ço tiáhva jítá ticuúí cán naçachi da xihín ná ña ná ndaa na jata yító á jata túhun barco cán já ná xinu na nu ñúhu. Anda jávi naçinu çoo vaña tóco ndihí nde nu ñúhu.

Íin Pablo isla Malta

28 Tá sa naçinu çoo vaña ndihí nde yuhú ñundáhyi cán já naçandaa ini nde ña naní a isla Malta. ²Ta vaña ndivaña naçaja ñayivi ndúu isla cán xihín nde. Nandicahmi na ñúhu jáchi naçasáhá cúun ga javi ta a juú quiahva vixi xíní nde. Chí naçahan na xihín nde ña ná cativi nde catúní nde. ³Anda já najátaca Pablo java titó íchí, dó quee yávi núhu. Ta tá chójó da títo cán nu ñúhu já naçqueta in çoo tañu títo cán xínu rí sahá ña ihní ñúhu. Ta naçtiin rí ndáha Pablo. ⁴Ta tá naçini na isla Malta cán ña ndícaa çoo ndáha Pablo já naçasáhá cáchi xihín táhan na já:

—Ndá da sáhní ndii cúú da yóho jáchi vaçí çoo naçihí da ini tañuhú joo yóho cúní Ndióxi jándihí a saha dá —naçachi na.

⁵Joo mé Pablo naçuiji nihni da çoo ndícaa ndáha dá cán nu ñúhu cándaha cán ta çoo ña ná ndoho da. ⁶Tóco ndihí na cán ndáti na cuni na ña ná quihvi cuiñu ndáha dá á tá çoo ta in cuití ndicava da quivi da, naçahan na. Ndáti na java cán cuni na ndaa ndoho Pablo joo tá sa naçanahá ndáti na çoo ñaha ná ndoho toho Pablo cán. Anda já nandijama jini ná ta naçasáhá na cáhan na ña cúú dá in ndiόxi.

⁷Yati nuú naçinu nde cán naçacuu a ñundáhyi da naní Publio, da cómi cuéntá saha isla cán. Ta tixi uní quivi nandiquehe vaña ndivaña da ndehe ta vaña naçaja da xihín nde. ⁸Ta ndaja coo quihvi tátá Publio cándúhu dá ndóho da çuehe nij ta chícaan cáhni ñahá. Ta já naçahan Pablo naçito nihni da da ta na-

casahá Pablo xíca tãhví da nu Ndióxi saha dá ta nãchinúu Pablo ndáha dá jini dá ta já nandivaha da. ⁹Tá naxini java ga na quíhvi ndúu isla cán ña ñacaja Pablo já naquixi na nu dá ña ná ndaja vaha da na chí nandivaha na. ¹⁰Ta nandiquiahva na ndixahvi nuú nde ta najasá na cuahá ñaha nuú nde. Tá naxinu coo quívi ndaa nde barco cuhun nde já nasahan na ña xini ñúhú nde cuhun nde.

Xínu coo Pablo ñuu Roma

¹¹Nasanduu nde tátuhun unj yoo isla cán janda quiahva nandaa nde in barco, dó nasandati yaha tiempo vixi mé isla Malta cán. Mé barco cán naquixi dó chí Alejandría. Ta nuu do cándaa ivi tiniñu yúu ndióxi cája cáhnu na cán. In a naní a Cástor ta inga a naní Pólux. ¹²Naquee nde cuahan nde já naxinu nde in ñuu naní Siracusa ta cán nasanduu nde unj quívi. ¹³Ta naquee nde cuahan nde yati yúhu tañuhú janda quiahva naxinu coo nde ñuu Regio. Joo inga quívi itaan já ñacasahá víi uun xíco tachí chí sur sahá ña cán queá tá sa nayaha ivi quívi já naxinu nde ñuu Puteoli. ¹⁴Ta cán nanditahan nde java na cúu cuéntá Jesús. Ta ñacahan na xihín nde ña ná canduu nde in semana xihín ná ta já ñacaja nde. Ta tá nandihí já naquee nde cuahan sahá nde chí ñuu Roma. ¹⁵Ta na cúu cuéntá Jesús ndúu ñuu Roma cán sa ñañehe ná tuhun ña xinu coo nde cán. Sahá ña cán queá ñaqueta na vaxi na ñehe ná ndehe. Java na naquixi janda ñuu nu sãhjin yahvi cáhnu naní a Apio ta java na naquixi janda ñuu naní Unj Taberna. Tá naxini Pablo na cán já ñacasahá ndiquiahva da ndixahvi nu Ndióxi ta nandindacú ini da. ¹⁶Ta tá naxinu coo nde ñuu Roma já nandiquiahva da sãhnda chuun nuú soldado cán tóco ndihí da cuahan vecaa cán nuú in da cómi chuun saha mé vecaa ñuu Roma cán. Joo nasahan na ñamaní nu

Pablo coo jiin da vatí nasacu na in soldado ndáa ñahá.

Cáhan Pablo tuhun Ndióxi xihín na ñuu Roma

¹⁷Tá sa naxinu unj quívi naxinu coo nde ñuu Roma cán já ñacana Pablo tóco ndihí na saçuaha nuú na Israel ndúu ñuu Roma cán. Ta tá sa ñataca ndihí na ndúu na já ñacachi da já xihín ná:

—Candehé ndó, ñani i. Ni in túhún toho ñaha núu coo ñacaja yehe xihín na Israel mé ñuu Jerusalén cán ta ni xihín costumbre ñacaja tásáhnu jícó yo. Joo natiin na Israel yehe ta nandiquiahva na yehe nuú na cúu cuéntá gobierno ñuu Roma yóho. ¹⁸Ta tá nandihí nandaja ndíchí na yehe já nasacu ini na janí na yehe jáchí coo ñañehe ná cuachi i sahá ña cuu cahni na yehe. ¹⁹Joo ndaja coo na Israel coo naxeen na ña ná janí na cán yehe. Sahá ña cán queá naxica i ñamaní ña ná cavií sahá i nu emperador ñuu Roma yóho. Joo yehe coo cuni toho i jácojo i cuachi jatá na Israel jáchí cúu ná na naquixi chíchi nuú naquixi mí i. ²⁰Sahá ña cán queá ñacana i ndohó viti jáchí cuni cuni i ndohó já ná nditúhún i xihín ndo. Cuni ndicani i nu ndo ña ndíco ndáha i xihín cadena yóho sahá mé a ñachindahá Ndióxi jácaco a ndihí yó, na Israel —ñacachi Pablo xihín na Israel cán.

²¹Anda já nanducú ñehe na cán tuhun nu Pablo já cáchí na já xihín dá:

—A ñaha quixi carta estado Judea nuú nde ña cáhan sahá ña cájún. Ta ni na cúu táhan na Israel tá nandai cuu na ñuu yóho coo toho tuhun núu ñehe na ná casa na nuú nde saha yóhó. ²²Joo cuni nde ña ná ndicanún nuú nde ndia cándúsún jáchí níi cúu ñuyíví cáhan núu ñayivi sahá na cúu cuéntá Jesús —ñacachi na Israel cán xihín Pablo.

²³Tá nandihí nasacu na in quívi cahan Pablo xihín ná ta tá naxinu coo mé quívi

cán nataka cuahá ndivaha ñayivi mé vehe nu iin Pablo cán. Ta naha ta janda sahini najánaha da nu ná ña cúní Ndióxi cacomí a cuéntá sahá ñayivi. Ta xihín ña naçahyí Moisés sanahá ta xihín ña naçahyí na profeta já nandicani da nu ná saha Jesús ña ná candeé ini na mé á.
²⁴ Java na cán naçandúsa na ña naçachi Pablo xihín ná joo java na coó naçeen na candúsa na. ²⁵ Ta sahá ña coó naçuu ndique táhan vaha tuhun na Israel cán sahá ña jánaha Pablo sahá ña cán queá naçasáhá na queé na cuahan na. Tá naçini Pablo ña yóho já naçasáhá cáchí da já xihín ná:

—Mé a ndaa naçahan ínimá yíi Ndióxi nuú tásáhnu jícó yo tá naçahyí Isaías já:
²⁶ Cuáhán çahan xihín ñayivi Israel jan já cachún já xihín ná:

Mé a ndaa táhyí cuni johó ndó joo a cándaa ini ndó.

Ta vatí sándehé ndó in ñaha joo co ndí-cuni ndó ña.

²⁷ Jáchi ihvi ndivaha cúu ini ndó ta co cúní ndó caja ndó ña cáchí í.

Ta co cúní ndó cuni johó ndó ña çahan í xihín ndó.

Ta co cúní ndó ndicuni ndó ña cája ndó cuachi.

Jáchi tá ná jándacoo ndó cuachi cája ndó,

já queá cuu caja cáhnu ini í saha ndó, ta já cuu coo vaha ini ndó, já naçachi ínimá yíi Ndióxi xihín tásáhnu jícó yo.

²⁸ Anda já naçachi tucu Pablo já xihín ná:

—Ta viti xíní ñúhú candaa ini ndó, na Israel ña sa naçini johó na coó naçixi chichi Israel tuhun vaha saha Jesús. Ta cája í cuéntá candúsa mé na cán ña — naçachi Pablo xihín ná.

²⁹ Tá nandihi naçahan Pablo ña yóho já nanditúhún cuehe xihín táhan na Israel cán ta já naçee na cuahan na.

³⁰ Naçandoo Pablo ivi ní cuja vehe nuú naçahvi ndojo da. Ta nandiquehe vaha da tóco ndihi na sahan xito nihni ñahá. ³¹ Ta ni co yíhví da cáxi tuhun da xihín ñayivi ña cúní Ndióxi cacomí a cuéntá saha ná. Ta najánaha da tuhun vaha saha Jesucristo, xitoho í ta ni in na coó naçaji nuu nu dá caja da ña.

Carta nāchindahá Pablo núú nā cúú cuéntá Jesús ndúú ñuu Roma

Cáhan Ndióxi Pablo xihín nā cúú cuéntá Jesús

1 Yehe cúú Pablo ta Jesucristo cúú xi-toho i. Naçaxi Ndióxi yehe cacuu u in apóstol cuéntá mé á ta nāchindahá a yehe çuhun i çahan i tuhun vaha saha Jesús nuú ñayivi.

²Sanahá ndivaha naçaja Ndióxi ña ná çahýí nā profeta mé á tuhun vaha sahá ini libro yii Ndióxi. ³Mé tuhun vaha yóho çahan saha Jesucristo, xitoho í, mé a cúú in túhún jini já jahyi Ndióxi. Ta nanduu a in ñayivi nacacu ñuyiví yóho ta naquixi a çhichi rey David. ⁴Ta najá-naha ínima yii Ndióxi ñayivi ña cúú Jesús in túhún jini já jahyi Ndióxi, mé a cúú cāja tóco ndihi ñaha. Jáchi tá sa naxihí Jesús já nanditacu tucu a ta xihín ña yóho náha ña cúú á in túhún jini já jahyi Ndióxi. ⁵Ta sahá ña naçaja Jesucristo ndiça crúxu sahá ña yóho naçaja Ndióxi ñamaní xihín ndihí. Já nāchindahá Ndióxi mí ña ná çuhun í cuéntá mé á çahan í saha Jesús nu tóco ndihi ñayivi ndúú ñuyiví já ná cuu candeé ini na mé á ta já ná cāja na ña cúni a. ⁶Ta mé ndó, nā cúú cuéntá Jesús ndúú ñuu Roma jan, naçaxi Ndióxi ndohó cacuu ndó cuéntá mé á.

⁷Ña cán queá cáhyí i carta yóho nu ndó, nā ndúú ñuu Roma jan. Jáchi cúni ndivaha Ndióxi ndohó ta naçaxi a ndohó nduu ndó ñayivi mé á. Ta ná cāja Ndióxi, tátá yo xihín Jesucristo, xitoho í cuahá ñamaní xihín ndo ta ná cāja ña ná coo vaha ini ndó.

Cúni Pablo çuhun da ñuu Roma coto nihni da nā cúú cuéntá Jesús ndúú cán

⁸Ndiqiahva i ndixahvi nu Ndióxi sahá ña naçaja Jesucristo xihín in in ndó jáchi ñayivi ndúú ndijáá ñuyiví xini joho na ña candeé ini ndó Jesús. ⁹Yehe cāja çuhun i cuéntá Ndióxi ta ndinuhu ini i caxi tuhun i tuhun vaha saha Jesús, mé a cúú in túhún jini já jahyi Ndióxi nuú ñayivi. Ta xini vaha Ndióxi ña tóco ndihi quivi xica tahvi i nu mé á sahá ndihi ndó. ¹⁰Ta ndijáá ní quivi xica tahvi i nu Ndióxi ña ná quiahva ñamaní nuú i saa i jan coto nihni i ndohó tá cúni a. ¹¹Jáchi cúni cuni i ndohó já ná çaxi tuhun i xihín ndo ndá quiahva cúni ínima yii Ndióxi cāja ñamaní xihín ndo já ná ndindacú chága ndó cuéntá mé á. ¹²Ña cúni queá ná quiahva tuhun ndeé ini táhan í jáchi in candeé ini ndihí Ndióxi.

¹³Cúni ña ná candaá ini ndó, ñani mí i, nā cúú cuéntá Jesús ña sa cuahá tañu sácu ini i saa i coto nihni i ndohó joo in cuahá ña sáji nuu nuú i sahá ña cán queá çamaní saa i jan. Cúni chindeé e ndohó ña ná caca vaha ndó íchi cuéntá Jesús. Jáchi quiahva já nāchindeé e java ga ñayivi, nā co cúú çhichi Israel. ¹⁴Joo ndítahan nuú i çaxi tuhun i tuhun Ndióxi nu tóco ndihi ñayivi ndúú ñuu náhnu xihín nā ndúú yucú ñúhú. Ta çahan i tuhun Ndióxi xihín nā ndíchi jini ta xihín nā co ndíchi jini. ¹⁵Ña cán queá xica ndivaha ini i saa i nu ndúú ndó ñuu Roma jan çahan i tuhun vaha saha Jesús xihín ndo.

Jáçacu Ndióxi ñayivi sahá tuhun vaha çahan saha Jesús

¹⁶Co cáçahan nuú i sahá tuhun vaha çahan saha Jesús jáchi cúú á ndeé Ndióxi jáçacu a tóco ndihi ñayivi, nā candeé ini mé á. Ta jihna ñúhú naçasahá Ndióxi jáçacu a ñayivi naquixi çhichi Israel ta viti

jácaçu a tóco ndihi ñayivi tá candeé ini na mé á vatí cúu ná na tóho á cúu ná na Israel. ¹⁷ Jáchi náha tuhun Ndióxi nu yo ndá quiahva nduú ñayivi ndaa nu mé á. Ta cúu á sahá ña candeé ini mé á ta sahá ña yóho cuití va jáchi coó a inga nuú ña caja í cacuú ñayivi ndaa nu Ndióxi. Já cáchi tuhun Ndióxi já: “Ndá na cúu ñayivi ndaa nu Ndióxi catacu na sahá ña candeé ini na mé á.”

Tóco ndihi ñayivi ndúu ñuyívi cómí na cuachi nu Ndióxi

¹⁸ Janda indiví nu fin Ndióxi xójo ini a xihin tóco ndihi ñayivi cája cuachi ñuyívi yóho ta jándoho a ini na sahá cuachi cája na. Ta sahá ña núu cája na sáji nuu na nuú java ga ñayivi, na cúni candaá ini ña ndaa saha Ndióxi. ¹⁹ Jándoho Ndióxi ini ñayivi sahá cuachi cája na jáchi sa najánaha mé á ña ndaa nu ná ta sa xini na saha mé á joo co cándúsa na ña. ²⁰ Janda sahá ñuyívi xini ñayivi ña nacavaha Ndióxi ñuyívi xihin indiví xihin tóco ndihi ñaha. Ta xihin ña yóho cuu candaá ini na ña fin Ndióxi ta cuu candaá ini na ña fin ndée mé á caja ña cúni a anda ama cáa quivi. Sahá ña cán queá a cúu cachi na ña co xini na á fin Ndióxi á coó a. ²¹ Vatí candaá vaha ini na ña fin Ndióxi joo co cája cáhnu na mé á tátuhun ndítahan nu ná caja na. Ta ni co ndíquiahva na ndixahvi nu á. Ña cája na queá cáhvi núu ini na ta coó saha toho ña cáhvi ini na. Ta cúu ná tátuhun ñayivi tóntó jini, na xica nuu nuú naá yávi. ²² Ta vatí cáchi na cúu ná na ndíchí jini joo cúu ná na tóntó jini. ²³ Najándacoo na ña cája cáhnu na Ndióxi, mé a tácu anda ama cáa quivi ta nacavaha na tñiñu yúu ña ñehe nahná taa, da xihí yachi. Ta nacavaha na nahná laa xihin nahná quítí xihin nahná coo. Ta nacasáhá cája cáhnu na ña.

²⁴ Sahá ña cán queá najándacoo Ndióxi na ña ná caja na tá nuú ña núu

ñá cúni na caja na. Anda jávi nacasáhá na cája quini na xihin yiquí cuñu táhan na. ²⁵ Co xeén na candúsa na ña ndaa cáhan saha Ndióxi joo nacandúsa na ña tuhún. Ta nacaja cáhnu na ña nacavaha Ndióxi ta coó nacaja cáhnu na mé Ndióxi, mé a nacavaha tóco ndihi ñaha. Jáchi Ndióxi queá xini ñúhu caja cáhnu í anda ama cáa quivi. Já ná coo.

²⁶ Sahá ña cán queá najándacoo Ndióxi na ña ná caja na ña xica ini na caja na, ña co ndítahan caja na. Ta naxinu na janda nuú najándacoo najihí ña quíji na xihin yí na ta já nacasáhá quíji xihin táhan ndaja jhí mé va na. Ta ña yóho cúu á ña coó nasacu ini Ndióxi caja na. ²⁷ Ta quiahva já nacaja ri dataa. Najándacoo da ña quíji da xihin ñájihí da ta nacasáhá ndicají ini da caja da ña núu xihin táhan mé va da janda quiahva nacasáhá quíji xihin táhan mé dá. Chí nuú cacahan nuu yo queá cája xihin táhan da. Ta tá ndihi já casáhá ndóho ini yiquí cuñu na sahá ña núu cája na.

²⁸ Naxinu na nuú najándacoo xóo na Ndióxi ta co cúni ga na candaá ini na sahá. Sahá ña cán queá najándacoo xóo Ndióxi na ña ná cahvi núu ini na ta já cája tá cája na ña co ndítahan nu ná caja na. ²⁹ Nandicutú ndaa ínima ná xihin tá nuú ña núu, ña cúu cuachi. Ta ndiáva íni na quehe na ñaha cómi inga ñayivi ta cája xixi na xihin ná ta cáhiví ini na ta sáhní na ndijí ta cáni táhan na ta jándahvi na ñayivi ta cáhvi núu ini na sahá inga na ta xica nuu na cáhan tuhún na. ³⁰ Ta canahá quini ndivaha na xihin inga na ta cája ichi ini na ta cája cáhnu na mé va na. Ndiáva íni na ndaja caja chága na cuachi ta sáa ini na caja na ña cúni tátá náná na. ³¹ Co xini túni na ta co jáxinu coo na tuhun sahan na nuú ñayivi. Co quíhvi ini na ñani táhan na ta co cája cáhnu ini na saha ná ta co táhnda ini na sahá ñayivi. ³² Xini vaha na

ñā ñasahnda Ndióxi nū ná ta xíní na ñā ndítahan quivi na sahá cuachi cája na. Vatí cándaā ini na ñā yóho joo xihín nd-inuhu ini na cája tá cája na ñā núu. Ta janda cájii ini na tá cája java ñayivi mé ñā núu.

Caja vií Ndióxi saha tóco ndihi cuachi

2 Mé a ndaa cómi ndó cuachi nū Ndióxi. Sándehé ndaa ndó inga ñayivi sahá cuachi cája na joo chícaan ndó cuachi jata mé va ndó jáchi cája ndó mé cuachi cán. ² Sa xíní vaha í ñā cája ndaa Ndióxi tá jándoho á ini ñayivi sahá cuachi cája na. ³ Mé ndó sándehé ndaa ndó cuachi cája java ga ñayivi ta cáhán ndo vaha cája Ndióxi tá chíndahá na cūhun na indayá. Joo cáhán ndo ñā caja cáhnu ini a saha mé ndó vatí cája ndó mé cuachi cája na cán. ⁴ Ndája núu ndó Ndióxi, mé a cúní caja cuahá ñamaní xihín ndo jáchi xíní ndó ñā co jándoho yachi Ndióxi ini na cája cuachi. Cúní Ndióxi ñā ná ndicó coo ini ndó jándacoo ndó cuachi cája ndó. ⁵ Ihvi ndivaha cúu ini ndó jáchi co jándacoo ndó cuachi cája ndó. Nandicuahá cuachi ndó ta jándoho chága Ndióxi ini ndó tá ná tandaa quiví caja vií a sahá cuachi ñacaja ñayivi. Mé quiví já ndaca náha ñā cojo ini mé á saha cuachi ñayivi ta náha ñā íin saha mé á jándoho a ini na cán. ⁶ Mé tiempo cán quiahva Ndióxi nuú in in ñayivi ñā ndítahan nū ná ndiquehe na sahá ñā ñacaja na ñuyíví yóho. ⁷ Java ñayivi ñacaja na ñā vaha xihín ndinuhu ini na ta ñacacúní na caja na ñā ná cajii ini Ndióxi xihín já ná cachi Ndióxi ñā cúu ná ñayivi vaha. Ta ñacacúní na coo na nū íin Ndióxi anda ama cáa quiví. Ta mé na cán cúu na cūhun coo xihín Ndióxi anda ama cáa quiví. ⁸ Joo cojo ini Ndióxi tá jándoho a ini na sáá ini, na co cúní cūhun xoo ñā ndaa jáchi cátóo na cūhun na xoo ñā núu. ⁹ Ndoho ndivaha ini tóco ndihi ñayivi cája cuachi ta

cacuéha ndivaha ini na. Jihna ñúhú na ñaquixi chichi Israel ndoho ini já casáha ndoho ini na coo ñaquixi chichi Israel. ¹⁰ Joo cajii ini Ndióxi xihín na cája ñā vaha ta ndaja cáhnu a na ta caja mé á ñā ná coo vaha ini ná. Jihna ñúhú já caja mé á xihín na ñaquixi chichi Israel já casáha caja ri a já xihín na coo ñaquixi chichi Israel.

¹¹ Jáchi co cúu á tátuhun cúní Ndióxi in ñayivi ta cándají a inga na jáchi in cúu ndihi ví nū Ndióxi. ¹² Vatí co cándaā ini ñayivi ñā sáhdá ley Moisés joo cūhun tá cūhun na indayá sahá cuachi ñacaja na. Ta vatí cándaā ini ñayivi ñā sáhdá ley Moisés joo cūhun tá cūhun na indayá sahá cuachi ñacaja na. ¹³ Jáchi tá cándaā ini na ñā sáhdá ley Moisés ta co cája na ñā jáchi co cáchí Ndióxi ñā cúu ná ñayivi ndaa nū mé á. Ta tá cája na ñā sáhdá mé ley Moisés anda jáví cáchí Ndióxi ñā cúu ná ñayivi ndaa nū mé á. ¹⁴ Ñayivi, na coo ñaquixi chichi Israel co xíní na ñā sáhdá ley Moisés. Cája mé ná ñā sáhdá ley Moisés jáchi já xinu ini na caja na ñā vatí co xíní na mé ley Moisés. ¹⁵ Ñā cája mé ná náha nuú ñayivi ñā ñasacu Ndióxi ley mé á ini xíní túní ná. Ta xihín xíní túní ná cándaā ini na tá cája na ñā vaha á tá cája na ñā núu. Ta quiahva já xihín mé xíní túní ná xíní vaha na á cája na cuachi á cája na ñā vaha ¹⁶ tá ná xinu quiví quiahva Ndióxi chuun nū Jesucristo caja vií a sahá ñā ñacaja tóco ndihi ñayivi vatí ñacaja jehé na ñā. Jáchi já cáhan tūhun vaha saha Jesús ñā jánaha i nū ndo.

Na ñaquixi chichi Israel cándusa na ley Moisés

¹⁷ Ta mé ndó cáchí ndo cúu ndó na ñaquixi chichi Israel, na cándusa ley Moisés. Ta cáchí ndo cája chága Ndióxi ñamaní xihín mé ndó a juú ga xihín java ga ñayivi. ¹⁸ Ta cáchí ndo ñā sa xíní ndó ñā cúní Ndióxi caja ndó ta cáchí

ndõ ña sa xíní ndó çaxi ndó ña vaha jáchí sa najácuaaha ndó ley Moisés. ¹⁹ Ta cáchí ndó tiahvã vaha ndó chindeé ndó ñayivi ña ná ndihvi na íchí Ndióxi ta cáchí ndõ ña cúú ndõ tátuhun in lámpara jándiyéhe nuú ñayivi xíca nuu nuú naá. ²⁰ Ta cáchí ndõ ña tiahvã ndó jánaħã ndó nuú ñayivi, na çõ xíní túni ta cáchí ndõ ña tiahvã ndó jánaħã ndó nuú ñayivi, na çamaní cataçu vaha ini. Cómí ndõ ley Moisés saħá ña cán queá cáhán ndõ xíní ndó tóçõ ndihí ña ndaa xihín tóçõ ndihí ñaha. ²¹ Mé ndó jánaħã ndõ ley Moisés nuú ñayivi joo jihna núhú ndítahan caja ndó ña. Mé ndó jánaħã ndó nuú ñayivi ña a váha toho caja cuihná na joo cúú ndó na cuihná. ²² Mé ndó jánaħã ndó nuú ñayivi ña a váha toho coo in ãa xihín in ñáñáħã, ná çõ cúú ñájíhí ðã joo íin ndó xihín ñájíhí inga na. Mé ndó çõ cúni ndó yoçõ ndindojo veñuhu ñayivi, na çõõ naquixi chichi Israel joo cája cuihná ndõ ña cuiçã núhu veñuhu na cán. ²³ Cája cáhnu ndó mé va ndó jáchí cómí ndõ ley Ndióxi joo çõ cája cáhnu ndó mé á jáchí çõ cúni ndó caja ndó ña sáħndá mé ley. ²⁴ Ña cán queá ndaa cáhan tuhun Ndióxi saħã ndó tá cáchí a já: “Ñayivi, na çõõ naquixi chichi Israel cáhan núu na saħã Ndióxi saħá ña cája mé ndó, na Israel”, cáchí tuhun Ndióxi.

²⁵ Tá cája ndó ña sáħndá ley Moisés já queá ndíyahvi marca nachicaan na yiquí cuñu ndó. Joo tá çõ cája ndó ña sáħndá ley Moisés já queá çõ ndíyahvi toho marca nachicaan na yiquí cuñu ndó. ²⁶ Na çõõ naquixi chichi Israel çõ chícaan toho na mé marca jan yiquí cuñu na joo tá cája na ña sáħndá ley Moisés já ndiquehe Ndióxi na tá quiahva ndiquehe ri mé á na íin marca yiquí cuñu. ²⁷ Ndá na cája ña cáchí ley vatí çõõ naquihvi marca yiquí cuñu na, íin saħá na cán chícaan na cuachi jatã na çõ cája ña cáchí ley vatí íin a nu ná ta naquihvi marca

yiquí cuñu na. ²⁸ Ña cán queá tá ná caja in na naquixi chichi Israel mé costum-bre ña ná cuni cuití va ñayivi ña já queá a juú ña ndaa ña cúú ná cuéntã Ndióxi. Ta ndá na chícaan na marca yiquí cuñu na çõ cája na mé costum-bre cuéntã yiquí cuñu cuití va na. ²⁹ Ta ndá na naquixi chichi Israel tá mé a ndaa cúú ná cuéntã Ndióxi ta cája na ña cúni mé á çõ cúú á saħã ña nasahnda loho na yiquí cuñu na. Cúú á saħã ña nacaja ínimã yii Ndióxi ini na. Ta mé na cán jácavatã na ini Ndióxi jáchí xihín ínimã yii mé á cája na ña cúni mé á.

3 Sahá ña cán queá ná ndaca tuhún i ndohó ña yóho: Á íin cuahã chága saħã ñayivi naquixi chichi Israel a juú ga saħã java ga ñayivi. Á ndíyahvi nu Ndióxi ña nachicaan na marca yiquí cuñu na. ² Ajan. Íin cuahã saħã ñayivi naquixi chichi Israel ta tá nachicaan na marca yiquí cuñu na ndíyahvi a nu Ndióxi jáchí nasacu ini a jándacoo a tuhun a nuú na naquixi chichi Israel já ná cacomí na cuéntã saħã. ³ Ta vatí ná caja java ñayivi, na cándeé ini mé á ña çõ cúni mé á caja na joo ama saħã ña cán a ndíjama toho Ndióxi jini á ña ná caja ña núu xihín ná, vaha. ⁴ Çõ cája toho Ndióxi já. Ña cája Ndióxi ní tiempo cúú ndinuhu ña ndaa vatí tóçõ ndihí ñayivi cáhan na ña tuhún. Já cáchí tuhun Ndióxi já: Xihín tuhun cáhan Ndióxi cándaã íni ña cúú á Ndióxi ña ndaa ta a cúu quee vaha na chícaan cuachi jíquí jatã jáchí cúú mé á in Ndióxi ndaa, já cáchí tuhun mé á.

⁵ Ta viti ná çahan i xihín ndó tá quiahva cáhán ñayivi ñuyiví. Cáhán na ña çõ cája vaha Ndióxi tá jándoho a mí saħã cuachí jáchí xihín cuachí jándindita jíçõ chága yó Ndióxi. Ta xihín ña cája í náħã ña cúú Ndióxi in Ndióxi ña ndaa ta mí cúú yó ñayivi cuachi. ⁶ Joo çõ cáhán vaha na jáchí tá çõ cája ndaa Ndióxi, nduu já queá a cuú caja víí mé á saħã

ndihi cuachi cája tóco ndihi ñayivi ndúu ñuyíví.

⁷ Já cáchí ñayivi já: “Cóho ná cajú yó cuachi já ná candaá chága ini ñayivi ña cája ndaa Ndióxi ta xihín ña yóho cajú cáhnu chága ná mé á”, cáchí na. Joo co cáhan vaha na jáchi tá cáhán yo ña xihín cuachi cája í ndícahnu chága Ndióxi já queá co candaá ini ndá saha queá jándoho Ndióxi ini ñayivi saha cuachi na. ⁸ Joo java ñayivi cáchí na: “Cóho ná cajú í cuachi já ná cajú cáhnu ini mé á sahá cuachí já ndícahnu chága Ndióxi”, cáchí na joo co cáhan vaha na. Ta java ñayivi cáhan ihvi na sahá yehe ta chícáan na cuachi jata í ta cáchí na ña jánaḥa yehe ña yóho nuú ñayivi. Ndítahan jándoho Ndióxi ini tóco ndihi ñayivi, na jánaḥa ña yóho.

Tóco ndihi ñayivi ndúu ñuyíví cómí na cuachi nu Ndióxi

⁹ Ña cán queá a cuú cachi yó ña cuú mí na vaha chága a juú ga inga ñayivi sahá ña naquixí chichi Israel. Jáchi sa najánaḥa í nu ndo ña mí, na naquixí chichi Israel xihín na coo naquixí chichi Israel cuú yó ñayivi cája cuachi. ¹⁰ Já cáchí tūhun Ndióxi já:

Coó toho ni in ñayivi cája ña ndaa.

¹¹ Ta coó toho ni in na candaá ini ña ndaa,

ta coó ni in na ndínducú Ndióxi.

¹² Naçaxoo na nu Ndióxi já naquehe na ichí núu caḥan na.

Coó ñayivi cája ña vaha janda ni in tūhún na coó.

¹³ Quini ndivaha yúhu ná jáchi cuú á tá-tūhun in yávi ndii ña cámaní ndee ñúhu.

Cúu ná ñayivi tūhún ndivaha.

Tá quiaḥva cája coo tá tūn rí ñayivi já cája na cán tá cáhan na ña tūhún.

¹⁴ Ta mé cháhan cuití cáhan yúhu ná ta xihín ña yóho játaḥvi na ini ñayivi.

¹⁵ Ní tiempo ndícají ini na cahní na ndii ta xihí ndii cája na.

¹⁶ Ta ndá nu xínu na jándoho na ini ñayivi jándacoo ndáhví ñahá na.

¹⁷ Ta co xini na ndá a queá canduu vaha na xihín ñayivi.

¹⁸ Ta ni co candaá ini na ña ndítahan nu ná cayihví na Ndióxi, cáchí tūhun Ndióxi.

¹⁹ Sa xini yó ña ndítahan nuú na Israel cajú na tóco ndihi ña sáhdá ley Moisés jáchi cuú á cuénta na naquixí chichi Israel. Ta xihín ña yóho chícáan ley Moisés cuachi jata mé na cán ta náḥa ña tóco ndihi ñayivi ndúu ñuyíví cómí na cuachi nu Ndióxi ta a cuú cachi na ña co cómí na cuachi. ²⁰ Ni in ñayivi a cuú nduu ndaa na nu Ndióxi sahá ña cája na tóco ndihi ñaha sáhdá ley Moisés. Ña cája mé ley queá ña ná candaá ini ña cómí yo cuachi nu Ndióxi.

Jácaçu Ndióxi mí jáchi cándeé ini mé á

²¹ Viti jánaḥa Ndióxi nu yo ndá quiaḥva nduu ndaa yo nu mé á. Ta jári cáchí mé ley xihín na profeta sahá ña yóho. Ta co cuú á sahá ña cája í ña cáchí mé ley ²² joo sahá ña cándeé ini ñayivi Jesucristo já cája Ndióxi ña ná nduu ndaa na nu mé á. Já cajú mé á xihín tóco ndihi na cándeé ini Jesucristo jáchi tá quiaḥva cája Ndióxi xihín na Israel quiaḥva já cája ri a xihín na co cuú na Israel. ²³ Tóco ndihi ñayivi cómí na cuachi nu Ndióxi ta naçaxicá na nu á ta a cuú nduu na ñayivi vaha tá quiaḥva cúní mé á. ²⁴ Joo naçaja Ndióxi in ñamaní cáhnu xihín yo já ná nduu ndaa yó nu mé á. Ta coo naçahví sahá jáchi naçahvi Jesucristo sahá cuachí tá naxihí a ndíca crúxu. Ta viti co cómí ga yó cuachi nu mé á. ²⁵ Naçindahá Ndióxi Jesucristo ña ná cuita nii a sahá cuachí já ná cuu cajú cáhnu ini Ndióxi sahá yo tá ná candeé ini Jesucristo. Xihín ña yóho

náha ña cúu á in Ndióxi ndaa. Tá cámaní quivi Jesucristo sahá cuachí já coó naquehe Ndióxi cuéntá sahá cuachi. Já nacaja mé á jáchi cáhnu ndivaha ini a. ²⁶ Ta xihín ña yóho náha ña mé a ndaa táhyí cúu á in Ndióxi ña ndaa janda quivi víti. Tóco ndihi na cándéé ini Jesús cúu ná na ndaa nu Ndióxi jáchi najándoo Jesús cuachi na. Ta xihín ña yóho náha ña cúu á Ndióxi ndaa.

²⁷ Ndá sahá cája cáhnu í mí, vaha. Ama ná cuu caja cáhnu í mí sahá ña nacaja í. Jáchi a cuú nduu ndaa yó nu Ndióxi sahá ña nasacu vaha í ley Moisés. Cúu á sahá ña cándéé ini Jesús. ²⁸ Sahá ña cán queá sa xíní yó viti ña nduu ndaa yó nu Ndióxi tá ná cándéé ini Jesús cuití va. Ta co cúu á sahá ña nasacu vaha í ña sáhdá ley Moisés.

²⁹ Á cája Ndióxi ña yóho sahá na naquixi chichi Israel cuití va, vaha. Uñun. Jáchi jácacu Ndióxi na naquixi chichi Israel xihín na coó naquixi chichi Israel. ³⁰ Jáchi iin in táláá Ndióxi ta mé Ndióxi yóho jácacu a ñayivi tá ná cándéé ini na mé á vatí cúu ná na Israel á co cúu toho ná. ³¹ Á cacu xoo í ley Moisés, da já. Uñun. Vatí cándéé ini Jesús joo a cuú cacu xoo í ley Moisés jáchi náha ña cúu á ña ndaa ta ndiyahvi a nu yo.

Ña nacaja Abraham sanahá ndivaha

4 Ta ndá saha nacachi Ndióxi sahá Abraham, tásáhnu jícó yo ña nanduu da taa ndaa nu mé á. ² Co cúu á sahá ña nacaja da ña nanduu da taa ndaa nu Ndióxi já ná a cája cáhnu da mé dá. Ta coó toho ñaha ña cuu caja cáhnu da mé dá saha. ³ Jáchi já cáhí tñhun Ndióxi: “Nacandéé ini Abraham Ndióxi sahá ña cán queá nanduu ndaa da nu mé á”, cáhí tñhun Ndióxi. ⁴ Ta viti ná caja í cuéntá cája chúun in dataa. Ta tá nandihí cháhvi na nu dá ta mé jñhún cán co cúu á ña jásá na nu dá. Cháhvi na nu dá jáchi cáni a nu dá quehe

da ña sahá chuun nacaja da. ⁵ Jáchi a cúu ndaja ndaa ñayivi mé ná nu Ndióxi sahá ña cája na. Tá ná cándéé ini ñayivi Jesús, mé a nachahvi sahá cuachí anda jáví ndaja Ndióxi na ñayivi ndaa nu mé á. ⁶ Ta quiahva já nacahan rey David sahá ña yóho tá nacachi da ña tahví nahá nacuu da ndája ndaa Ndióxi vatí coó nacaja da ñaha ña ná cuu ndaja ndaa da mé dá nu Ndióxi. ⁷ Já nacachi David já:

Tahví nahá nacuu ñayivi tá nacaja cáhnu ini Ndióxi sahá ña núu nacaja na ta tá najándoo a cuachi na.

⁸ Ta tahví nahá nacuu ñayivi tá coó naquehe Ndióxi cuéntá sahá cuachi nacaja na, nacachi David sanahá ndivaha.

⁹ Á tahví nahá nacuu na nachicaan marca yiquí cuñu cuití va. Uñun. Jáchi ndúu ndaa ñayivi nu Ndióxi sahá ña cándéé ini na mé á ta co cúu á sahá ña nachicaan na marca yiquí cuñu á coó a. Ta sa xíní yó ña nacachi Ndióxi ña nanduu Abraham taa ndaa nu mé á sahá ña nacandéé ini da mé á. ¹⁰ Á nacachi Ndióxi ña cúu Abraham taa ndaa nu mé á tá cámaní chicaan da marca yiquí cuñu da á tá nandihí nachicaan da marca yiquí cuñu da. Nacachi a já xihín dá tá cámaní chicaan dá marca yiquí cuñu da. ¹¹ Jihna ñúhú nacandéé ini Abraham Ndióxi anda jáví nacachi a ña cúu Abraham taa ndaa nu á. Tá nandihí já nachicaan da in marca yiquí cuñu da já náha ña mé a ndaa nanduu da taa ndaa nu Ndióxi jáchi nacandéé ini da mé á. Xihín ña yóho naxinu Abraham nanduu da tátñhun tátá tóco ndihi ñayivi, na cándéé ini Ndióxi vatí coó nachicaan na marca yiquí cuñu na. Ta vatí coó nachicaan na mé marca yóho yiquí cuñu na joo cúu ná ñayivi ndaa nu Ndióxi. ¹² Ta quiahva já nanduu Abraham tátá na iin mé marca yiquí cuñu. Ta a juú sahá mé marca yóho cuití va jáchi nanduu da tátá na sahá ña cándéé cáhnu ini na Ndióxi tá quiahva na-

candee ini Abraham mé á tá cámaní chican da marca yiquí cuñu da.

Jáxinu coo Ndióxi tuhun sahan nu yo tá ná candee ini mé á

¹³ Sañahá ndivaha nasahan Ndióxi tuhun a nu Abraham xihín nuú na naquixi chichi da. Nacachi Ndióxi ña tandaa quivi ñehe táhvi ná ña ná nduu ñuyivi ñaha mé ná. Coó nasahan Ndióxi tuhun a nu Abraham sahá ña nacaja da ña sáhdá ley Moisés. Nasahan mé á tuhun a nu dá sahá ña nacandee ini da mé á ta já nanduu ndaa da nu Ndióxi. ¹⁴ Joo tá mé á ndaa na nasacu vaha ley cúu na ñehe táhvi cuhun indivi já queá coo chuun candee ini Ndióxi, dá já. Jáchí xihín ña yóho jándacoo núu í tuhun nasahan Ndióxi nu yo ña caja mé á xoho. ¹⁵ Ndítahan nu Ndióxi jándoho a ini ñayivi tá coo caja na ña sáhdá ley Moisés. Joo tá coo toho mé ley já queá coo toho cuachi ñayivi nu ley.

¹⁶ Nasahan Ndióxi tuhun a nu Abraham sahá ña nacandee ini da mé á. Ta sahan mé á tuhun a nu yo tá candee ini mé á. Coó a caja toho a á caja í ña sáhdá ley Moisés á coo caja toho í ña jáchí mé á ndaa ndiquehé ña vaha sahan Ndióxi nu yo tá candee ini mé á tátuhun nacandee ini Abraham mé á. Ta cúu á tátuhun nanduu Abraham tátá tóco ndihi na candee ini Ndióxi. ¹⁷ Já cáchí Ndióxi já xihín Abraham: “Nacaja í ña ná nduu mún tátá ñayivi ndúu cuahá nación”, já cáchí tuhun Ndióxi sañahá. Mé Abraham cúu dá tátuhun tátá ndihí nu Ndióxi. Nacandee ini da Ndióxi, mé á cuu jánditacu tucu ndii ta xihín tuhun cahan mé á caja ña ná coo ña coo nasahin jihna.

¹⁸ Vatí coo naxinu nuú tuhun nasahan Ndióxi nu Abraham joo nacandee tá nacandee ini da Ndióxi ta nasandati da jáxinu coo mé á tuhun a. Já nanduu da chichi nuú naquixi cuahá ñayivi, na ndúu cuahá nación. Já nayaha

jáchí já nacachi Ndióxi xihín dá sañahá: “Ndicuaha ndivaha ñayivi quixi chichún”, nacachi Ndióxi xihín dá. ¹⁹ Ta nacandee ini Abraham Ndióxi ña cacu jahyi da vatí sa nacayati quivi xinu da in ciento cuia ta vatí sa cándaá cáxi ini da ña jalóho cuití va quivi catacu da ñuyivi yóho xihín Sara, ñajihí da. Ta sa cándaá ini da ña a cuú ga cacu jahyi ná joo nacandee ini da Ndióxi. ²⁰ Ta coo nacavitá ini da ta coo nandicaní ivi johó ini da sahá tuhun nasahan Ndióxi nu dá. Joo nanduu ndee chága ví ini da já ná candee cáhnu chága ví ini da Ndióxi ta nacaja cáhnu da mé á. ²¹ Já naxinu ini da ña mé á ndaa táhyi íin ndee Ndióxi ná jáxinu a tuhun sahan nuú ñayivi. ²² Nacandee ini Abraham Ndióxi sahá ña cán queá nacachi a ña nanduu da ña ndaa nu mé á.

²³ Ta tá cáchí tuhun Ndióxi ña nanduu Abraham ña ndaa nu Ndióxi sahá ña nacandee ini da mé á já queá coo nacahyi ña yóho sahá Abraham cuití va. ²⁴ Nacahyi ri a saha mí jáchí tá ná candee ini Ndióxi, mé á najánditacu Jesús, xitoho í tañu ndii já queá ndiquehe Ndióxi mí ta ndaja mé á mí ña ná nduu ñayivi ndaa nu mé á. ²⁵ Ta nandiquiahva na Jesús ña ná quivi a ndica crúxu sahá cuachí. Ta tá nandihí nanditacu tucu a ña ná nduu ñayivi ndaa nu mé á.

Nacaja Ndióxi ña ná nduu ndaa yó nu mé á

5 Sahá ña cán queá coo ga cuachi jata yo jáchí nacandee ini Ndióxi ta nandique táhan maní yó xihín á sahá ña nacaja Jesucristo, xitoho í. ² Ta sahá ña candee ini Jesucristo sahá ña cán queá caja Ndióxi cuahá ñamaní xoho. Candee ini mé á ta cájii ini ndátí cuhun í coo í xihín mé á. ³ Ta quiahva já cájii ini tá ná quixi tondóhó nu yo jáchí sa xini yo ña ndindacú chága ini cuéntá Ndióxi tá ndóho í tondóhó. ⁴ Tá sa nandindacú

iní cuéntá Ndióxi ñacaja tondóhó anda jáví táhan ini Ndióxi xihin yo jáchi ñaxito ndojó mé á mí ta nandindacú chága iní cuéntá mé á. Tá natahan ini Ndióxi xihin yo anda jáví candaa vaha iní ña jáxinu coo mé á tuhun nasahan a nu yo. ⁵Tá ndátí ña nasahan Ndióxi tuhun a quiahva nu yo já a cándoo núu toho Ndióxi xihin yo jáchi najándicutú Ndióxi ínimá yo xihín ña quíhvi ini a mí. Ñacaja Ndióxi ña yóho xihin ínimá yíi mé á ña nasahan nu yo.

⁶Sahá ña coo ndée yo jácacú mí sahá ña cán quéa ñaxihí Jesucristo saha yo ta coo ñacayáncá a quivi a ta ni coo ñaxihí yachi a. Ñaxihí a mé quívi nanditahan quivi a sahá cuachi ñayivi quini. ⁷Ihvi ndivaha cáa já queta in ñayivi quivi na sahá inga ñayivi vatí cúu ná ña vaha. Joo mé a ndaa cuu queta in ñayivi coo tiahva na quivi na sahá in ña cúu ña vaha ndivaha. ⁸Náha Ndióxi nu yo ña mé a ndaa táhyí quíhvi ini a mí jáchi vatí cúu yó ñayivi cája cuachi joo ñaxihí tá ñaxihí Jesucristo saha yo. ⁹Ta viti sa ñanduú ñayivi ndaa nu mé á sahá ñi Jesucristo, dó ñaxita saha yo. Ta sa saha mé á cacu ndaa ínimá yo já ná a cójo ini Ndióxi sahá cuachí. ¹⁰Nasacuú ña coo ñaxini táhan vaha xihin Ndióxi joo sahá ña ñaxihí in túhún jini já jahyi mé á sahá ña cán quéa ñandique táhan mání yó xihin á viti. Xihín ña yóho cuu cacu ndaa ínimá yo jáchi ñanditacu tucu Jesucristo ta sa ñandique táhan mání yó xihin Ndióxi viti. ¹¹Ta a juú ña yóho cuítí va vaha jáchi cájii ndivaha iní xihin Ndióxi sahá ña ñacaja Jesucristo, xitoho í. Sahá ña cán quéa ñaxinu yó ñandique táhan mání yó xihin Ndióxi.

Ña ñacaja Adán xihin ñacaja Jesucristo

¹²Ta sahá cuachi ñacaja in ña naní Adán sahá ña cán quéa ñandihvi cuachi ñuyívi yóho ta tá ñandihvi cuachi ñuyívi

já ñacasáhá xihí ñayivi. Tóco ndihí cája í cuachi ta sahá ña yóho ndítahan quivi ndihí. ¹³Tá cámani quiahva Ndióxi ley mé á nu Moisés ñasacomí tóco ndihí ñayivi cuachi. Joo coo quéhe Ndióxi cuéntá sahá cuachi jáchi coo toho ley nasahiin tiempo já. ¹⁴Janda tiempo nasahiin Adán ñacasáhá xihí ñayivi sahá cuachi na ta janda ñaxinu tiempo nasahiin Moisés ñaxihí na vatí coo ñacaja na mé cuachi ñacaja Adán. Ñasacomí Adán cuachi jáchi ñaquehe núu da ña ñacachi Ndióxi xihin dá. Ta mé Adán yóho nasacuú da tátuhun yuhú nuú da quixi tá nu ndíhí.

¹⁵Joo a cuú jándique táhan í cuachi ñacaja Adán xihin tóco ndihí ña vaha sahan Ndióxi nu yo. Jáchi sahá cuachi ñacaja in túhún ña, xihí cuahá ndivaha ñayivi. Joo ñamani ñacaja Ndióxi xoho sahá ña ñacaja in túhún ña naní Jesucristo cúu á in ñamani cáhnu ndivaha ña ñéhe táhvi cuahá ndivaha ñayivi. ¹⁶A cuú jácatáhan í cuachi ñacaja in ña ña xihín ñamani cája Ndióxi xoho jáchi saha in túhún cuachi ñaxinu cháhan jatá ñayivi ta já ñacasáhá xihí ña. Vatí ñandicuahá cuachi ñayivi joo ñacaja Ndióxi ñamani xihin ná já ñandaja ndaa mé á ña ta ñacachi a ña coo ga cuachi na nu mé á. ¹⁷Sahá cuachi ñacaja in túhún ña naní Adán ñacasáhá xihí ñayivi. Joo sahá ña ñacaja in túhún ña naní Jesucristo ñéhe táhvi yó ndoo mání uun cuachí nu Ndióxi. Jáchi cáhnu ndivaha ñamani cája Ndióxi xoho ña cán quéa ñéhe ndée chága iní yo caca í íchi cuéntá Ndióxi sahá ña ñacaja Jesucristo.

¹⁸Sahá cuachi ñacaja Adán ñacachi Ndióxi ña cómi tóco ndihí ñayivi cuachi nu á. Joo sahá ña ndaa ñacaja Jesucristo ñacachi Ndióxi ña ndá ñayivi ñacuu cuu nduu ndaa ña nu mé á jáchi coo cómi ga ña cuachi nu á. ¹⁹Sáa nasahiin ini Adán jáchi coo ñaxeeñ da ña ña cúni Ndióxi. Ta sahá ña ñacaja Adán cuahá

ndivaha ñayivi nanduu na ñayivi cuachi. Joo ñacaja Jesucristo tóco ndihi ña cúní Ndióxi ta xihín ña ñacaja in túhún ña Jesucristo nanduu ndaa cuahá ndivaha ñayivi nu Ndióxi.

²⁰Tá nasahan Ndióxi ley nu Moisés já ñacandaá ini ñayivi ña cuaha chága cúu cuachi na. Joo tá nandicuaahá cuachi ñayivi já natahvi chága ini Ndióxi saha ná. ²¹Nandihvi cuachi ñuyiví ta nasacomí a cuéntá sahá ñayivi. Ta sahá ña ñacaja na cuachi sahá ña cán queá nacasahá xihí na. Joo ñacaja Ndióxi cuahá ñamaní xihín yo ta nasacomí a cuéntá saha yo já ná cuu nduú ñayivi ndaa nu mé á ta já ná cuu çacu ndaa ínimá yo anda ama cáa quivi sahá ña ñacaja Jesucristo, xitoho í.

Naxihí yó nuú cuachi joo tácu yó xoo Jesucristo

6 Ama ná cachi xihín táhan í: “Cóho caja tá caja í cuachi já ná coo cáhnu chága ini Ndióxi saha yo.” ²Ama ná cachi rí já jáchí cúu yo tátuhun na sa naxihí nuú cuachi ta tá sa naxihí yó nuú cuachi ama ná cacomí ga cuachi cuéntá saha yo. ³Tá ñacandúta yo cuéntá Jesucristo cúu á tátuhun in yó naxihí xihín Jesucristo. ⁴Jáchí tá ñacandúta yo já cúu á tátuhun in yó nanduxu xihín Jesucristo ta naxihí yó nuú cuachi. Ta tá najánditacu Ndióxi Jesucristo já cúu á tátuhun in yó nanditacu xihín mé á. Jáchí xihín ndéé cáhnu Ndióxi, tátá yo nanditacu Jesucristo ta sa xihín mé ndéé cán cuu caca í ichí saá viti.

⁵Tá quiahva in nanduú xihín Jesucristo tá naxihí a quiahva já in nanduú xihín á tá nanditacu a. ⁶Tá cámaní cándéé iní Jesús já ñacatóo ndivaha í cája í cuachi jáchí ñasahnda cuachi chuun nu yo. Joo sahá ña naxihí Jesucristo ndica crúxu sahá ña cán queá najándacoo í cuachi cája í ta viti co sáhná ga cuachi chuun nu yo. ⁷Jáchí tá sa naxihí in dataa

co sáhná ga cuachi chuun nu dá ña cán queá cúu á tátuhun sa naxihí yó xihín Jesucristo sahá ña cán queá co sáhná ga cuachi chuun nu yó viti. ⁸Ta cúu á tátuhun naxihí yo tá naxihí Jesucristo ña cán queá xíní vaha í ña cuhun yó coo í nu íin mé á anda ama cáa quivi. ⁹Sa xíní yo ña nanditacu tucu Jesucristo ta a ndíco coo ga quivi a jáchí ni in ñaha a cuú caja ña ná quivi tucu a. ¹⁰In táláá tañu naxihí a sahá cuachí ta viti xihín chí nuu co ndítahan ga nu á quivi a sahá cuachí. Ta viti tácu Jesucristo cuéntá Ndióxi. ¹¹Ña cán queá ndítahan catacu ndó ñuyiví yóho tátuhun na sa naxihí nuú cuachi já ná a cáhná ga cuachi chuun nu ndo. Ndítahan catacu ndó cuéntá Ndióxi ña in ná nduu ndó xihín Jesucristo.

¹²Ña cán queá a quiáhva ndó ñamaní nuú cuachi ña ná cacomí a cuéntá sahá yiquí cuñu ndó jáchí tá ná ndiquiahva ndó mé ndó ndahá cuachi já queá caja ndó cuachi ña xíca ini ndó caja ndó. ¹³A ndíquiahva ga ndó yiquí cuñu ndó ndáha cuachi ná a cája ndó ña núu. Joo vaha chága ná ndiquiahva ndó yiquí cuñu ndó ndáha Ndióxi. Nasacuu ndó tátuhun in ndíi nu Ndióxi jáchí ñacaja ndó cuachi joo viti cúu ndó tátuhun ñayivi, na nanditacu tucu ñacaja Ndióxi. Ndítahan ndiquahva ndó mé ndó ndáha Ndióxi ña ná caja ndó ña vaha. ¹⁴Co cómí ga cuachi cuéntá saha ndó viti jáchí tácu ndo sahá ñamaní cája Ndióxi ta co tácu ndo sahá ña sácú vaha ndó ley Moisés.

Ndítahan nu yo ndicaxí ndá íchí candico yo

¹⁵Ama ná caja rí cuachi sahá ña co cómí ga ley Moisés cuéntá saha yo. Uhun. A cája toho í ña jáchí xihín ñamaní cája Ndióxi xihín yo cándaá iní ña cómí mé á cuéntá saha yo. ¹⁶Sa xíní ndó ña ndíquiahva in mozo mé dá ndáha xitoho da ta cája da ndá chuun nacuu ña sáhan xitoho da nu dá caja da. Ta

viti cuu ndicaxi ndó ndá nā cacuu xitoho ndó. Tá ná ndicaxi ndó caja ndó cuachi já queá cacuu ndó mozo ña quini ta cūhun ndó indayá. Ta tá ná ndicaxi ndó caja ndó ña cūni Ndióxi já queá cacuu ndó cuéntá mé á ta caja mé á ña ná nduu ndaa ndó nu á viti. ¹⁷ Jihna ñacaja ndó cuachi cuiti va joo ndixahvi Ndióxi jáchi xihín ndinuhu ini ndó caja ndó ña ndaa, ña ñacatiāhva ndó cuéntá Ndióxi. ¹⁸ Nandoo cuachi ndó ta co cúu ga ndó mozo cuéntá cuachi viti. Nanduu ndó mozo cuéntá Ndióxi ta caja ndó ña ndaa viti. ¹⁹ Najánaha í sahá in mozo nu ndó já ná candaā vaha chága ini ndó ña ndaa. Mé ndó nasacuu ndó tátuhun mozo jáchi jihna nandiquiahva ndó mé ndó ndahá cuachi ta mí cuachi nasacuu a tátuhun xitoho ndó. Ñacaja ndó tá nuū ña núu, ña ñacahvi ini ndó caja ndó. Joo viti nandiquiahva ndó mé ndó ndahá Ndióxi ta nasacu ini ndó caja ndó ña ndaa xihín ndinuhu ini ndó jáchi já cáni a nu ndó caja ndó ña ná cacuu ndó ñayivi yij nu mé á.

²⁰ Tá nasacuu ndó mozo cuachi coo naxeén ndó caja ndó ña ndaa ña cūni Ndióxi. ²¹ Ni in ña vaha coo ñañehe ndó saha cuachi ñacaja ndó. Ta viti cácahan nuū ndo saha mé cuachi ñacaja ndó. Ta ndá ñayivi sá caja cuachi cūhun nā coo na indayá anda ama cáa quivi. ²² Joo co cómi ga cuachi cuéntá saha ndo viti jáchi nanduu Ndióxi xitoho ndó. Vaha quehe ndó tá ná caja ndó ña cūni mé á jáchi já xinu coo ndó cacuu ndó ñayivi yij nu Ndióxi ta já cūhun ndó coo ndó xihín mé á anda ama cáa quivi. ²³ Jáchi tá caja í cuachi cúu á tátuhun ndíyicá yo nu Ndióxi sahá ña ñacaja í ta ini indayá chahví sahá. Joo ñamaní caja Ndióxi xoho sahá ña ñaxihí Jesucristo, xitoho í cúu á ña cohó catacú indivi xihín mé á anda ama cáa quivi.

Co cómi ga ley cuéntá saha yo

7 Candehé ndo ñani mí i, nā cúu cuéntá Jesús. Sa xini vaha ndó ley Moisés ta sa xini ndó ña cómi ley cuéntá saha ñayivi nani tácu cuiti va na. ² Cúu á tátuhun tá natandaha in ñánaha xihín in dataa já queá cáchi ley cúu ná ñájlí da anda ná xinu coo quivi quivi da. Joo cáchi mé ley ña tá sa ñaxihí da co cúu ga ná ñájlí da. ³ Saha ña cán queá cuu tandaha tucu ña xihín inga ta jáchi co sáhdá ga mé ley chuun nu ña. Ta co caja ña cuachi nu Ndióxi tá ná tandaha tucu ña jáchi sa ñaxihí va yij ña. Joo tá ná tandaha tucu ña nani tácu yij ña já queá caja ná cuachi nu Ndióxi.

⁴ Ta quiahva já ndóho ri ndóho va ñani mí i, nā cúu cuéntá Jesús. Cúu á tátuhun ñaxihí ndó nu ley Moisés ña cán queá co cómi ga mé ley cuéntá saha ndo. Ta viti núná nuū Jesucristo cacomí a cuéntá saha ndo ña ná cacuu ndó cuéntá mé a nanditacu tucu. Ta viti cuu caja í ña vaha, ña cūni Ndióxi. ⁵ Tá cámaní candéé iní Jesucristo ñacaja í ndinuhu ña núu ña nasacahvi iní caja í. Vatí sa xini yó ña cáchi mé ley joo ñacaja chága yó cuachi ña ñacahvi iní caja í. Ña cán queá nanditahan nu yó quivi ná cūhun í ndoho iní indayá, nduu. ⁶ Joo ñacaja Ndióxi ña ná janí yó nuū ña sáhdá ley Moisés ña nasacomí cuéntá saha yo. Ta viti núná nu yó caja í ña cūni mé á jáchi nandijama ínima yij Ndióxi mí sahá ña cán queá co cómi ga ley, ña ñacahví ná jihna cuéntá saha yo viti.

Caja tá caja í cuachi vatí candéé iní Jesucristo

⁷ Á cūni cachi ña yóho ña a váha toho ley Moisés. Uhun. Ña vaha cúu á jáchi xihín ña cáhan mé ley cándaā vaha iní ndá a cúu cuachi. Já cáchi mé ley já: “A ndiáva toho ini ndó cacomí ndó ñaha cómi inga na”, cáchi a. Ña cán queá cán-

daa iní viti ña a váha toho tá ná caja i já. ⁸Tá ná a cóo toho ley, nduu já quea a cánda a ini i ña cúu cuachi. Ta cóo toho cuachi caja i tá cóo ley, nduu. Joo viti cánda a ini i ña a váha toho ndiáva ini i cacomí i ñaha ñani táhan i jáchi cáchi ley a caja i ña. Ña cán quea nandihvi cuachi ini i ta ñacasáhá cáhvi ini i ndaja caja i cacomí i ñaha inga na. ⁹Tá cámaní canda a ini i ña cáchi ley Moisés já ñacahán i cúu u da váha. Joo tá ñatanda quivi ñatacu ini i xihín ña cáchi ley Moisés anda jávi ñacanda a ini i ña ñúhu cuachi ini i ta ñacanda a ini i ña cúu u da caja cuachi ta ndítahan nuú i cuhun i indayá sahá. ¹⁰Tá ná cuu caja ñayivi tóco ndihi ña cáchi ley Moisés já cuhun ña coo na nu íin Ndióxi anda ama cáa quivi. Joo cóo ñacuu caja i ña cáchi mé ley sahá ña cán quea nditahan nuú i cuhun i indayá sahá. ¹¹Najándahvi cuachi yehe jáchi ñacahán i cuu cuhun i indivi sahá ña caja i ña cáchi ley joo sahá ña cóo ñacuu xinu cóo i caja i ña sahá ña cán quea cuhun i indayá.

¹²Ta yii ndivaha cúu ley Moisés. Ta yii ndivaha cúu tuhun ñasahnda Ndióxi caja í. Ta cúu á ña ndaa ta cúu á ña váha. ¹³Ama ná jáqueta nuu ley yehe ini indayá nani cúu á ña váha. Uhun. A cúu cuití caja ley jáqueta nuu a yehe ini indayá. Cuachi quea ndúcu chindahá yehe cuhun i indayá. Ñañehe íni cuachi cañehe a yehe cuhun i indayá saha ley. Xihín ña yóho cánda a ini i ña quini ndivaha cúu cuachi ta váha ndivaha cúu mé ley.

¹⁴Sa xini yo ña cúu ley cuénta Ndióxi joo yehe cúu u in da caja cuachi ta caja i ña núu jáchi mé cuachi cómi a cuénta sahá i. ¹⁵Có cánda a ini i ña caja i jáchi cúni caja i ña váha joo cóo caja i ña. Ña caja i quea mé ñaha ña cándají i. ¹⁶Tá caja i cuachi ña cóo cúni caja i já cánda a ini i ña váha cúu ley. ¹⁷Mé a ndaa cóo cúni caja i cuachi joo cuachi ndácaan ini

i cúu á ña jácahan yehe caja i ña. ¹⁸Sa xini ña cóo ndeé yiquí cuñu i caja ña váha jáchi cóo ña váha ndácaan ini i. Vatí cúni caja i ña váha joo cóo sáhan mé á caja i ña. ¹⁹Cúni caja i ña váha joo cóo caja toho i ña. Ña caja i cúu á ña núu ña cóo cúni caja i. ²⁰Caja i ña cóo cúni caja i já cánda a ini i ña cuachi ndácaan ini i quea chindahá nihni a yehe caja i ña núu.

²¹Cándehe ndo ña yóho: Vatí cúni caja i ña váha joo caja i ña núu jáchi ña cán cuití va xinu íni i caja i. ²²Janda íni ma i xinu cóo ña cóo i caja i ña cáhan ley Ndióxi. ²³Joo ndácaan inga ñaha ini i ta cáni táhan mé ñaha cán xihín xini túni i. Ta mé ñaha ndácaan ini i cúu á cuachi. Ta cándeé cuachi xihín i já sáhdá a chuun nuú i.

²⁴Ndáhvi ñahá ñacuu u. Yo cuu jácau yehe ná a caja ga i cuachi ña cañehe yehe cuhun i indayá. ²⁵Ndiquiahva i ndixahvi nu Ndióxi jáchi xihín ña ñacaja Jesucristo, xitoho í cuu jácau Ndióxi yehe já ná a caja ga i cuachi. Ña cán quea cánda a ini i ña ndítahan caja i ña sáhdá ley Ndióxi joo cuachi ndácaan ini i sáhdá chuun nuú i.

Ndíco í in íchi nu caja í ña cúni íni ma yii Ndióxi

8 Ta sahá ña in nandúu xihín Jesucristo sahá ña cán quea a chínúu Ndióxi cuachi jata yo viti. Jáchi cóo caja ga í ña xica ini yiquí cuñu í. Ña caja í cúu ña cúni íni ma yii Ndióxi. ²Jáchi xihín ña ñacaja Jesucristo ñacacu íni ma yii Ndióxi mí ta ñasahnú a cuachi já ná a cuhun yó indayá. ³Cóo nacuu caja í tóco ndihi ña sáhdá ley Moisés ña cán quea cóo ñacuu nduu ndaa yó nu Ndióxi xihín mé ley. Ña cán quea ñacaja Ndióxi inga ñaha tá ñachindahá mé á Jesucristo, jahyi a. Nanduu Jesucristo in ñayivi ta tá quiahva cácu ñayivi quiahva já ñacacu Jesucristo ñuyiví. Ta tá ñaxihí mé á ndica crúxu já ñachahvi a saha

tóco ndihi cuachi sahá ña cán queá co sáhdá ga cuachi chuun nu yo. ⁴ Ta ña-
caja Ndióxi ña yóho já ná cuu xinu coo í
caja í ña sáhdá ley mé á tá ndáca ínima
yii Ndióxi mí. Jíin va caja í viti jáchi co
ndúu ga yó ndahá cuachi.

⁵ Ñayivi, ña cája ña xíca ini yiquí cuñu,
ña cán cúu ná ndícani cuhá ini sahá
yiquí cuñu. Joo ña cája ña cúní ínima yii
Ndióxi ña cán cúu ná ndúcu jácavatá ña
Ndióxi. ⁶ Tá ná ndicani cuhá ini na sahá
ña cúní yiquí cuñu na já queá cuhun ña
indayá. Joo tá ná ndicani ini na sahá ña
cúní ínima yii Ndióxi já queá coo vaha
ini na ta ñehe táhvi ná cuhun ña indiví.
⁷ Joo ñayivi ndícani ini saha yiquí cuñu,
ña cán cúu ná ña ihvi Ndióxi jáchi co
cúní ña caja na ña cáchi ley Ndióxi ta
ni a cuú caja na ña. ⁸ Sahá ña cán queá
tá cómi cuachi cuéntá saha ná já queá a
cuú caja na ña cájii ini Ndióxi xihín.

⁹ Ta tá mé a ndaa ndácaan ínima yii
Ndióxi ini ndó já queá co ndíco ga ndó
íchi cuéntá ña núu, ña nasacaja ndó ji-
hna. Ta viti ndíco ndó íchi vaha ta cája
ndó ña cúní Ndióxi. Jáchi ndá ña co ndá-
caan ínima Jesucristo ini, ña cán co cúu
ná cuéntá mé á. ¹⁰ Tá ndácaan Jesucristo
ini ínima ndo vaxi quivi quivi yiquí cuñu
ndó sahá cuachi ñacaja ndó. Joo mé a
ndaa catacu ínima ndo nu fin Ndióxi an-
da ama cáa quivi jáchi ñandu ndaa ndó
nu Ndióxi ñacaja mé á. ¹¹ Ñacaja ínima
yii Ndióxi ña ná nditacu tucu Jesucristo
ta tá ndácaan ínima yii Ndióxi ini ínima
ndo já tandaa quivi caja mé á ña ná ndi-
tacu tucu yiquí cuñu ndó saha mé ínima
yii Ndióxi ndícaan ini ndó.

¹² Candehé ndó ñani mí i, ña cúu
cuéntá Jesús. Co ndítahan nu ndó caja
ndó ña núu, ña xíca ini ndó caja ndó.
¹³ Jáchi tá ndinuhu ini ndó caja ndó ña
núu, ña xíca ini ndó já queá ndítahan nu
ndó cuhun ndó indayá. Joo tá xihín ndée
ínima yii Ndióxi jándihi ndó sahá ña núu
xíca ini ndó caja ndó já queá vaxi quivi

cuhun ndó coo ndó xihín mé á anda ama
cáa quivi.

¹⁴ Ndá ña ñandiquiahva mé ndáha ín-
ima yii Ndióxi ña ná candaca a na,
mé a ndaa táhyí cúu ná jahyi Ndióxi.

¹⁵ Nasahan Ndióxi ínima yii mé á nu
ndo joo coo nasahan ña nu ndo ña ná
catavi nihni a ndohó ta já quixi ña jáy-
ihví a ndohó. Nasahan Ndióxi ínima yii
mé á nu ndo jáchi xihín ña yóho ndája
Ndióxi ndohó jahyi mé á ta saha mé ín-
ima yii yóho cáhan yó xihín Ndióxi ta
cáchi yo: “Tátá maní i.” ¹⁶ Ta cáchi ín-
ima yii Ndióxi xihín ínima yo ña mé a
ndaa cúu yó jahyi Ndióxi. ¹⁷ Ta sahá ña
cúu yó jahyi mé á sahá ña cán queá ñehe
táhvi mí ví ndiquehé ña ñacachi Ndióxi
quiahva nu yo. Ta sa mé ña ñehe táhvi
yo yóho tahnda java ña xihín Jesucristo.
Tá ta mé a ndaa táhyí ndoho iní xihín á
já queá tá ñandihí cohó coo í xihín mé á
indiví ta cán ndicáhnu í xihín á.

¹⁸ Coó a caja toho a tá ná ndoho ini
í ñuyiví yóho jáchi vaxi quivi ndicáhnu
ndivaha í xihín Jesucristo caja Ndióxi.

¹⁹ Tóco ndihi ña ñacavaha mé á ndáti
ndihi a ta ndiáva iní a ña ná tandaa quíi
quivi cachi Ndióxi ndá ñayivi cúu cuéntá
mé á. ²⁰ Ñacaja Ndióxi ña ná ndoho ini
tóco ndihi ña ñacavaha mé á. Mé ñaha
ñacavaha Ndióxi co cúní a ndoho ini
a joo sácú ini Ndióxi ña ná ndoho ini

tóco ndihi ña ñacavaha mé á. Ta ndáti
tiáha ndihi ñaha ²¹ anda tandaa quivi
caja Ndióxi ña janí ña já ná a cácomí
ga cuachi cuéntá sahá já ná a tívi ga ña.
Ta ñúchí ndivaha mé quivi já tá cajií ini
tóco ndihi ñaha ñacavaha Ndióxi xihín
tóco ndihi ña cúu jahyi mé á. Jáchi a
cácomí ga cuachi cuéntá saha ná. ²² Sa
xíni yo ña janda sanahá ndivaha ta anda
viti tána ndivaha tóco ndihi ña ñacavaha
Ndióxi ta ndóho ndivaha ini a tátuhun
ndóho ini in ñáñaha tá ndúcu ndée ña
cacu jahyi ña. ²³ Ta quiahva já ndóho ri
ini mí ví. Ínima yii Ndióxi cúu ña sahan

tiáhva mé á nū yō já ná candaā iní ndá quiahva íin ñā quiahva mé á nū yō chága chí nū. Ta tána ndivaha í anda quiahva ná yaha ñā ndóho iní. Ta ndátí tandaa quiví ndaja Ndióxi tóco ndihi mí ná nduú jahyi mé á já ná ndiquehé yiquí cuñu saá. ²⁴ Najácacu Ndióxi mí jáchi ñacandéé iní mé á vatí coō ñaxiní ñā ñacachi mé á quiahva nū yō. Tá xíní cáxí yō in ñaha já candaā iní ñā co xíní ñúhú toho candatí quehé ñā jáchi co xíní ñúhú candatí ñaha cómí yō. ²⁵ Joo tá ná candatí in ñaha ñā co xíní yō já queá co ndíhi iní nani ndátí ñā.

²⁶ Tá cávitá iní já chindeé ínima yii Ndióxi mí jáchi co tiáhva í ndaja çaça tahví yō nū Ndióxi tá quiahva ndítahan çaça tahví yó nū á. Joo sa mé ínima yii Ndióxi yóho tána ta cáhan xihín tūhun ñā a cuú çahan yō. Já caja mé á tá xí-cā tahví a nū Ndióxi saha yō. ²⁷ Ta sa xíní Ndióxi ñā cáhvi iní ta sa xíní a ñā xíca tahví ínima yii mé á saha yō. Ñā cúní Ndióxi caja saha yō ñā jan queá xí-cā tahví ínima yii mé á saha yō, ñā cuú ñayivi cuéntá mé á.

Ni in ñaha a cúu çahnu a mí tá cándéé iní Jesucristo

²⁸ Ta sa xíní yō ñā tóco ndihi ñā ndóho í ndaja Ndióxi ñā ná nduu a ñā vaha tá quíhvi iní mé á. Jáchi mí cuú yó ñā sa ñasacu iní Ndióxi ñā ná caja í ñā cúní mé á.

²⁹ Ndá ñayivi ñacaxi Ndióxi anda saha ñacaxi a ñā ñā ná nduu na tátūhun Jesucristo, mé á cuú jahyi Ndióxi. Jáchi cúní Ndióxi ñā ná nduu Jesucristo jini nuú ndihi ñā cuú cuéntá mé á. ³⁰ Ta ñacana Ndióxi ñā ñacaxi a ñā ná candéé iní na mé á. Ta ñacaja mé á ñā ná nduu ndaa ñā nū á. Ta vaxi quiví caja mé á ñā ná ndináhnu ndihi ñā cán xihín á.

³¹ Ndía cachí sahá ñā yóho. Ni in túhún ñaha a cúu cani táhan xohō ta ni a

cúu quee vaha xohō jáchi cuahan Ndióxi xoo í. ³² Ta coō ñacajíhnda Ndióxi jahyi a jáchi ñandiquiahva Ndióxi Jesucristo, jahyi a ñā ná quivi a saha yō. Xihín ñā yóho candaā iní ñā co ndáhví cuú iní a quiahva tóco ndihi ñaha nū yō. ³³ Yo já cuu chícaan cuachi jatá na ñacaxi Ndióxi. Ni in ñayivi a cúu chícaan cuachi jatá na jáchi sa mé Ndióxi ñandaja mé á ñā ñayivi ndaa nū á. ³⁴ Yo já cuu já-cojo cuachi jatá ñā cuú cuéntá mé á. Ni in ñayivi jáchi ñaxihí Jesucristo saha yō. Ñanditacu tucu a ta íin coo a xoo cuáha Ndióxi indiví xíca tahví a ñā Ndióxi saha yō. ³⁵ Yo já cuu caji nuu nū Jesucristo quíhvi iní a mí. Ni in ñaha a cúu caja ñā jándacoo Jesucristo ñā quíhvi iní a mí. Vatí ná ndoho ndivaha iní ta vatí ná quixi ñā yíhvi yō ta vatí ná ndicuíta na caja xíxi na xohō ta vatí ná quixi joco ta vatí janda jáhma yō ná ndimaní ta vatí tondóhó vaxi nū yō á ñayivi ndúcú cahní mí joo ni in ñā yóho a cúu caji nuu a nū Jesucristo ñā quíhvi iní a mí. ³⁶ Já cáchí tūhun Ndióxi já:

Saha Ndióxi sácú iní ñayivi cahní ñā ndehe ndijáá ní quiví.

Tá quiahva cája na xihín ndicachi, í çuhun quivi quiahva já cája na xihín nde, cáchí tūhun Ndióxi.

³⁷ Vatí ndóho í tóco ndihi ñā yóho joo quee vaha tá quee vaha í caja Jesucristo jáchi quíhvi iní a mí. ³⁸ Sa xíní vaha í ñā ni in ñaha a cuú caja tavá mí ndáha Jesucristo, mé a quíhvi iní mí. Ta coō a caja toho a á tácu yō á sa ñaxihí yō. Ni táto Ndióxi ni ñā sáhnda chuun nuú ñayivi ta ni ñā ndóho iní viti ni ñā ndoho iní chí nū ³⁹ ta ni in ñaha íin indiví ta ni in ñaha íin tíxi ñúhū ta ni in ñaha ñacavaha Ndióxi a cuú tavá mí ndáha Ndióxi, mé a quíhvi iní mí. Ta najánaha Jesucristo, xitoho í nū yō ñā quíhvi ndivaha iní Ndióxi mí.

**Ñayivi ñaquixi chichi Israel
cúu ña ñacaxi Ndióxi**

9 Ña ndaa cúu ña cáhan i xihín ndó viti ta cō cávaha i ña tuhún jáchi cúu u cuénta Jesucristo. Sáhdá ínima yij Ndióxi chuun nu xíní túní i sahá ña cán quéa cō cáhan i ña tuhún. ² Ín cuéha ndivaha ini i ta já táhvi ndivaha ini i sahá ña Israel. ³ Mé a ndaa cúní yehe chindeé e ña ñaquixi chichi nuú ñaquixi mí i ña ná candé ini na Jesucristo. Ta janda ín tiahva i cacuu u ña chícaan ña cháhan jata tá ta xihín ña yóho cuu cacu ndaa ínima ná. Joo a cuú caja i ña. ⁴ Mé ña cán ñaquixi na chichi Israel ta ñacaxi Ndióxi ña já ná nduu na ñayivi cuénta mé á. Najánaha Ndióxi nu ná ndá quiahva cáhnu cúu mé á. Ta nasahan tuhun a nu ná ña nasacu ini a caja saha ná. Nasahan Ndióxi ley Moisés nu ná ta najánaha mé á ña ndaja ndítahan nu ná caja cáhnu na mé á. Ñacaxi tuhun a xihín ná sahá ñamaní caja mé á xihín ná chí nuu. ⁵ Ta ñayivi Israel ñaquixi na chichi ña nasanduu sanahá. Ta ñacacu Jesucristo chichi mé ña cán ta nanduu a in ñayivi. Chí anda ama cáa quivi ná caja cáhnu yó Jesucristo, mé á cúu Ndióxi, mé á cómi cuénta saha tóco ndihi ñaha. Já ná coo.

⁶ A juú cahán ndo ña cōo najáxinu Ndióxi tuhun a nasahan nuú ña Israel. A juú ndihi ñayivi jan cúu ña cuénta Ndióxi vatí ñaquixi na chichi Israel. ⁷ A juú tóco ndihi na ñaquixi chichi Abraham cúu ná cuénta Ndióxi jáchi janda saha ñacaxi Ndióxi xihín dá: “Ñayivi cuaha quixi chichún cacuu na jahyi Isaac”, cáchi a xihín Abraham. ⁸ Ña yóho cúní cachi a ña ni in tuhún ñayivi cō cúu ná jahyi Ndióxi sahá ña ñaquixi na chichi Abraham. Ña cúu ndusa jahyi Ndióxi cúu ná ñaquixi chichi Isaac jáchi cuénta Isaac najáxinu cōo Ndióxi tuhun nasahan nu Abraham. ⁹ Sanahá ndivaha

nasahan Ndióxi tuhun a nu Abraham já cáchi a já: “Xinu cuia já quixi tucu u ta cacu jahyi ña ñájhún, Sara.”

¹⁰ Candehé ndo ná ndicani i nu ndo ña nayaha chaga chinuu. Isaac, ña cúu tásahnu jícó yo nasacuu da tátá ndíví ña valí jahyi Rebeca. ¹¹ Tá cámani cacu ña cuatí jahyi na já nasacu ini Ndióxi caxi a in a ta cacu xóo a inga vatí a ñaha caja ndíví ña valí ni ña vaha ni ña núu. Já nasacu ini a caja ¹² ta já ñacaxi a xihín Rebeca: “Jahyún, ña cacu chí ivi cahnda chuun nuú ña cacu nu cuítí.” ¹³ Ta já cáchi tucu tuhun Ndióxi já sahá jahyi Rebeca: “Ñacaxi i Jacobo, ña ñacacu chí ivi caja i ñamaní xihín dá joo nasacu xóo i Esau, ña ñacacu nu cuítí.” Já ñacaja Ndióxi jáchi já nasacu ini a caja.

¹⁴ Ama ná cachi rí ña cōo cajú ndaa Ndióxi. A cáchi toho í já. ¹⁵ Já ñacaxi Ndióxi xihín Moisés sanahá: “Tahvi ini i sahá ñayivi joo mí i caxi i yo tahvi ini i saha. Ta tahnda ini i sahá ñayivi, joo mí i caxi i yo tahnda ini i saha”, ñacaxi Ndióxi sanahá. ¹⁶ Ña cán quéa cōo cajú Ndióxi ña cúní ñayivi ta a cúu caja ndúsa ñayivi xihín a ña ná tahnda ini a saha ná jáchi táhnda ini a sahá ñayivi, ña cúní mé á tahnda ini a saha. ¹⁷ Já cáchi tuhun Ndióxi já xihín ña cúu rey nuú nación Egipto: “Nandaja i yohó rey jáchi cúní jánaha i nuun ña cuu cajú i tóco ndihi ñaha tá cúní já ná candaa ini tóco ndihi ñayivi ndúu ñuyíví ña cáhnu ndivaha cúu yehe”, ñacaxi Ndióxi. ¹⁸ Ña cán quéa tá cúní Ndióxi tahnda ini a sahá ñayivi já cuu tahnda ini a saha ná. Ta tá cúní a ndaja táhyí a ínima ná já cuu ndaja táhyí a ña.

¹⁹ Joo a cuú cachí ña cōo cajú ndaa Ndióxi tá cáchi a ña cómi yo cuachi. Vatí sácú ini Ndióxi ña caja in in ñayivi joo cōo chindahá a ña caja na cuachi. ²⁰ Cōo ndítahan nuú ñayivi ndaja ndichí ña Ndióxi sahá ña cajú mé á. Jáchi sa xíní yo ña cōo ndítahan nuú in quiji cachi a xihín ña cá-

vaha ñaha: “Co cátóó i coo i tá quiahva ñacavaħa ndó yeħe.”²¹ A cuú cachi quiji cán já jáchi mé da cávaħa quiji cán, cávaħa da ña tá quiahva cúni mé dá. Xihín in mbohla loho ñuhú quíji cuu cávaħa da in quiji cacuu a javí á in quiji cuéntá yávi núħu.

²² Ta quiahva já cája Ndióxi xihín ñayivi. Ín tiaħva mé á jánaħa nu ná ña xójo ndivaħa ini a saħá cuachi na. Ta fin tiaħva mé á jánaħa nu ná ña cuu caja mé á tóco ndihi ñaha. Joo ñacaja ndeé ini Ndióxi ta ñasandati a jándoho a ini ñayivi vatí ñanditahan nu ná ndoho ini na saħá cuachi na. ²³ Mé a ndaa táhnda ini Ndióxi saħá ñayivi ta cúni a jánaħa nu ná ña cáħnu ndivaħa cúu mé á ta cúni a jánaħa nu ná ndá quiahva quíhvı ini a na. Anda sanahá ndivaħa sácú ini a jánaħa nu yo ndá quiahva cáħnu cacuu yó nu mé á. ²⁴ Naçaxi a ñayivi tañu na ñaquixi chíchi Israel ta ñaçaxi mé á ñayivi tañu na coó ñaquixi chíchi Israel. Ta mí cúu yó na ñaçaxi a. ²⁵ Já ñaçachi Ndióxi já sanahá ta já ñaçahı́ Oseas ini tuħun Ndióxi:

Tandaa quıvı çaxi yeħe ñayivi, na co cúu cuéntá mí i ta ndaja i na cuéntá mí i.

Ta na coó ñaquıhvı ini i jihna quıhvı ini i na vıti.

²⁶ Ta sa mé nu ndúu ñayivi, na coó ñasacuu cuéntá Ndióxi,

cán cuħun mé á çaxi a na ta caja ña ná nduu na cuéntá mé á jáchi cúu á in Ndióxi tácu, já cáchi tuħun mé á.

²⁷ Ta saħá na ñaquixi chíchi Israel já ñaçachi Isaías: “Vatı ndıcuahá ñayivi Israel tá quiahva cuahá ñutı yuhú tañuhú joo chá va cacuu na cacu ndaa íni-ma. ²⁸ Jáchi jonáa va jáxinu coo Ndióxi tuħun a ta anda javı caja vıı a saħa tóco ndihi ñayivi ndúu ñuyıvı”, ñaçachi Isaías. ²⁹ Ta já ñaçachi tucu Isaías já sanahá:

Tá quiahva ñacaja Ndióxi najándihi a saħá ñayivi ñuu Sodoma xihín ñuu Gomorra quiahva já caja Ndióxi jándihi a saħa yo, nduu.

Joo saħá ña ñatahvı ini Ndióxi saħá na Israel saħá ña cán queá coó najándihi a saħa ná, já cáchi tuħun Ndióxi.

Ndítahan nuú na Israel candeé ini na Jesucristo

³⁰ Ña cán queá ndıcani i nu ndo saħá ñayivi, na coó ñaquixi chíchi Israel. Co ndınducú na nduu ndaa na nu Ndióxi joo tá ñacasáhá na candeé ini na Jesucristo já ñacaja Ndióxi ña ná nduu ndaa na nu mé á. ³¹ Joo ñayivi Israel cája na ña saħndá ley Moisés xihín ndinuhu ini na jáchi cáħán na cuu nduu ndaa na nu Ndióxi saħá ña sácú vaħa na ley Moisés. Joo coó ñacuu nduu ndaa na nu Ndióxi xihín ña yóho. ³² Já ñandoho na Israel jáchi ñanditahan nu ná candeé ini na Jesucristo. Xihín ndinuhu ini na cája na ña cáchi ley joo coó ñacuu nduu ndaa na nu Ndióxi xihín ñaha cája na. Ña cán queá cúu ná tátuhun in na ñaçachıhin saħa xihín yuu cáħnu. ³³ Jáchi cáchi tuħun Ndióxi ña cúu Jesucristo tátuhun yuu cáħnu nu cáchıhin saħá ñayivi. Já cáchi tuħun Ndióxi já:

Ñasacu yeħe in yuu tóto cáħnu ñuu Sıón ta xihín yuu cáħnu cán cuahá na cachıhin saħa.

Joo ndá na ná candeé ini mé a ñachindahá i, na cán cúu ná na a cáçahan nuu, já ñaçachi tuħun Ndióxi.

10 Cuni johu vaha ndó, ñani i, na cúu cuéntá Jesús. Jáchi ndinuhu ini i xıca tahvı i nu Ndióxi saħá ñayivi Israel ña ná candeé ini na Jesús já ná cuu jáçacu Ndióxi na nuú cuachi na. ² Mé a ndaa ná çahan i xihın ndo ña cája cáħnu na Israel Ndióxi xihın ndinuhu ini na joo coó cándaçá cáxi ini na ña cúni Ndióxi caja na. ³ Jáchi coó xıni na ndaja cája Ndióxi

ñā ná nduu ndaa ñayivi nū mé á sahá ñā cán queá ndúcú nā nduu ndaa nā nū mé á xihín ñā cāja mé va na. Ta cō cúnī nā ndiquiahva na mé ná ndáha Ndióxi ñā ná cāja na ñā nasacu ini mé á cāja na. ⁴Cō xínī nā ñā naquixi Jesucristo ta naxihī a saha yō já najáxinu cōo a cāja ñā cáchī ley ñā ná nduu ndaa tóco ndihi nā cándéé ini mé á.

⁵Sanahá ndivaha ñacahyí Moisés sahá ñayivi, nā cúnī nduu ndaa nū Ndióxi xihín ley Moisés. Já cáchī á jā: “Ndá na cō cómī cuachi nū Ndióxi, nā cán cuu nduu ndaa nū mé á ta jácacu a na”, já ñacahyí da. ⁶Joo tá ná jácacu Ndióxi mí sahá ñā cándéé ini mé á já queá cō xínī ñúhú cūhun yō indivī jánuu í Jesucristo ñā ná nuu a chindeé a mí jáchī sa nacaja mé á ñā. ⁷Ta cō xínī ñúhú cūhun yō nū ndúu ínimā ndijī ñā ná ndiquehé Jesucristo tañu nā sa naxihī jáchī mé Jesucristo sa nanditacu tucu a. ⁸Cō xínī ñúhú cūhun xícá nahá yō ndinducú yō Jesucristo jáchī íin yati ndivaha mé á nū yō jáchī íin a xohō. Ta mé tūhun cáhan nde yóho cúú á tūhun cáhan saha Jesucristo já ná cándéé ini ndó mé á. ⁹Ta tá cachún ñā cúú Jesús xitohún ta tá cándúsún xihín ndinuhu ínimun ñā najánditacu Ndióxi Jesús tañu nā naxihī já queá cuu cacu ndaa ínimun. ¹⁰Jáchī tá cándéé ini ñayivi Ndióxi xihín ndinuhu ini na já nduu ndaa nā cāja Ndióxi. Ta tá cáhan nā xihín java ga ñayivi ñā cándéé ini na mé á já queá cuu cacu ndaa ínimā ná.

¹¹Já cáchī tūhun Ndióxi já: “Ndá nā ná cándéé ini Jesús a xínū toho quivī cahán nā ñā najándahvi Ndióxi na.” ¹²In cúú tóco ndihi ñayivi nū Ndióxi. Tá quiahva jácacu Ndióxi nā naquixi chíchī Israel quiahva já jácacu a nā cōo naquixi chíchī Israel. Jáchī sa mé Ndióxi cán cúú Ndióxi nū tóco ndihi ñayivi ta cō ndáhvī cúú ini a quiahva ñaha nuú nā xícá tahví nū mé á. ¹³Já cáchī tūhun Ndióxi: “Ndá na

ná cacā tahví nū Ndióxi ñā ná chindeé a nā, nā cán cacu ndaa ínimā.” ¹⁴Ta ndaja cāja na cacā tahví nā nū Jesús tá ta cámanī cándéé ini na mé á. Ta ndaja cāja na cándéé ini na mé á tá a ñāha cuni johō na tūhun vaha cáhan saha Jesús. Ta ndaja cāja na cuni johō na tūhun vaha saha Jesús tá cámanī cūhun in na caxi tūhun na ñā nū ná. ¹⁵Ta ndaja cāja na cūhun nā cahan nā tūhun Ndióxi xihín ná tá ta cō íin in nā chindahá nā cūhun nā. Já cáchī tūhun Ndióxi já: “Ndaja ñúchī chá tá xínū cōo nā ñéhe tūhun vaha saha Ndióxi ñā ná cōo vaha í xihín mé á.”

¹⁶Joo a juú ndihi ñayivi cándúsa tūhun Ndióxi. Ñā yóho cúú á tá quiahva nacachi Isaías: “Ndióxi, mé ndó cúú ndó xitoho nde. Chá cuití ñayivi cándúsa tūhun ñacahan nde xihín ná.” ¹⁷Jáchī jihin ñúhú cáhan nā tūhun vaha saha Jesucristo nuú ñayivi ta xihín ñā xínī johō nā cán jáxinu ini na xihín á. Andā jáví cásahá nā cándéé ini na mé á ta cāja na ñā cúnī a.

¹⁸Á sa naxini johō na tūhun vaha cáhan saha Jesús. Ajan. Sa naxini johō na ñā. Jáchī já cáchī tūhun Ndióxi já: Nasahan nā cahan nā tūhun Ndióxi nuú ñayivi, ta níí cúú sahá ñuyiví naxinu tūhun cáhan nā, já cáchī tūhun Ndióxi.

¹⁹Á ñacandaa ini ñayivi Israel ñā yóho. Ajan. Cándaa vaha ini ná ñā. Jáchī já ñacahyí Moisés sanahá:

Ndióxi queá ñacachi a: Caja i ñā ná cándúsa nā tóho yehe já ná cahihvi ini na Israel.

Ta cōjō ini na xihín nā tóho sahá ñā cāja i ñā ná cándúsa mé nā tóho cán yehe, ñacachi tūhun Ndióxi.

²⁰Xihín ñā yóho nasahan ndeé ini Isaías cahyí da ñā ñacachi Ndióxi tá ñacachi a já:

Mé nā cō ndinducú yehe, nā cán cúú nā nandiñehé yehe.

Ta najánaha i mí i nu ná vatí coó nandaca tuhun na sahá i, nacachi tuhun Ndióxi.

²¹ Joo já nacachi Ndióxi sahá ñayivi Israel: “Níi tiempo cúní ndiquehe vaha i ñayivi Israel joo co cúní na quixi na nuú i jáchi sáá ini na ta co cúní na caja na ña cúní”, nacachi tuhun Ndióxi.

Cája Ndióxi ñamaní xihín ñayivi Israel

11 Ta viti ná ndaca tuhún i ndohó ña yóho: Á cáhán ndo ña najándacoo ndáha Ndióxi ñayivi Israel. A juú ña ndaa cúu á jáchi sa mé yehe cúu u da Israel, da naquixi chichi Abraham ta naquixi i chichi Benjamín, da nasacuu jahyi ñání jícó Abraham. ² Janda mé saha nacachi Ndióxi ña nacaxi mé á na Israel cacuu na cuéntá mé á ta co cándají a na viti. Sa xíní ndó ña nacachi tuhun Ndióxi sahá da nasacuu profeta Elías. Mé da yóho tá naxica tahví da nu Ndióxi já najácojo da cuachi jatá na Israel. ³ Já nacachi da já: “Cándehe ndo Ndióxi, xitoho i. Sa nasahní na profeta cuéntá mé ndó ta nandicani na nu náa ndo. Ta viti nú laá in tuhún yehe cuití va cája ña sáhdá ndo. Ta ndúcú na cahní na yehe”, já nacachi Elías xihín Ndióxi. ⁴ Ta já nacachi Ndióxi xihín dá: “A juú in tálaá yóhó cája ña cúní jáchi ndúu yíi va usa mil taa cája ña cúní ta coó nacaxítí na nuú tinñu yúu Baal”, nacachi Ndióxi xihín dá. ⁵ Quiahva já fin a viti. Ndúu chá na cája ña cúní Ndióxi jáchi nacaja Ndióxi ñamaní xihín ná ta nasacu ini a jácau a na. ⁶ Nacaxi Ndióxi na jáchi natahvi ini a saha ná. Coó nasacuu a sahá ña nacaja na jáchi tá ná cacuu a sahá ña cája na já co cúu ga ñamaní Ndióxi ta ña yóho cúu ña cúní Ndióxi caja.

⁷ Ña cán queá cuahá ndivaha ñayivi Israel coó nanduu ndaa na nu Ndióxi sahá ña nacaja na jáchi nandaja táhyí na ínimá ná. Joo na nacaxi Ndióxi, na cán

cúu na nanduu ndaa nu mé á. ⁸ Já cáchi tuhun Ndióxi já: “Co cúní na candúsa na Ndióxi sahá ña cán queá nasaji Ndióxi xíní túní ná chí in ndeé. Ta quiahva já ndaa na janda víti jáchi co cándaa ini na ña cahan Ndióxi xihín ná.” ⁹ Já nacahyí David sanahá:

Ná cahan na ña cuahan vaha na ichi Ndióxi sahá cuahá ñaha cómí na, ta ná ndoho ini na sahá cuachi cája na.

¹⁰ Ta ná cuáa na já ná a cúní na, ta ná nditojo jata ná níi tiempo sahá ña ve ndójo na, nacachi David.

Jácau Ndióxi na coó naquixi chichi Israel

¹¹ Ta viti ná ndaca tuhún i ndohó ña yóho: Á cáhán ndo ña a cuú cacu ndaa ínimá na Israel. A juú ña ndaa cúu á. Jáchi vatí sáá ini na Israel ta vatí co cúní na candeé ini na Jesús joo xihín ña nacaja na yóho nanuna nuú na tóho cuni johu na tuhun vaha saha Jesús ta já cuu cacu ndaa ínimá ná nu mé á. Ta sahá ña yóho casahá na Israel cahihvi ini na xihín na tóho. ¹² Nacaja Ndióxi cuahá ñamaní xihín tóco ndihi na tóho jáchi nacaja ña ná cuu ndihvi na íchi cuéntá mé á sahá ña najándacoo na Israel íchi cuéntá mé á. Joo cuaha chága ñamaní caja Ndióxi xihín tóco ndihí tá ná xinu quiví ndiquehe na Israel íchi cuéntá mé á.

¹³ Joo fin in ñaha ña cúní cahan i xihín ndo, na tóho. Ndióxi queá nachindahá yehe tañu ndóhó, na coó naquixi chichi Israel ta chuun cahnú ndivaha queá ndójo i xíní i. ¹⁴ Jáchi ña cúní mí i queá ná cahihvi ini na Israel xihín ndo sahá tuhun Ndióxi ta já ná ndinducú mé ná Ndióxi já ná cacu ndaa ínimá na Israel nu Ndióxi jáchi mé ná cúu ná chichi nuú naquixi mí i. ¹⁵ Nasacu xóo tóo Ndióxi na naquixi chichi Israel jáchi nasacu ini a jándique táhan maní á tóco ndihi ñayivi ndúu ñuyiví xihín mé á. Ta tá ná xinu

quívī casáhá nā Israel ndiquehe na tūhun Ndióxi cacuu a in ñaha ñúchí ndivaha. Cacuu a tátūhun casáhá nditacu tucu na jáchi viti cúú ná tátūhun nā ñaxihí jáchi coó ñaxeén nā ndiquehe na tūhun Ndióxi. ¹⁶ Abraham nasacuu da cuéntá Ndióxi ña cán queá jahyi da, nā ñacacu chichi da cúú ná ñayivi cuéntá Ndióxi. Abraham, da cúú cuéntá mé á cúú dá tátūhun yóho in yitó olivo. Ta ñayivi ñacacu chichi da cúú ná cuéntá mé á ta cúú ná tátūhun ndáha mé yitó olivo cán.

¹⁷ Cúú á tátūhun nasahnda Ndióxi java ndáha, dó vaha ta ñachitivi ndaa mé á ndáha yitó olivo yúcu mé nuú nasahiin ndáha cán. Ta viti quiahva dó ndée nu ndáha yitó olivo yúcu cán ña ná catacu dó. Quiahva já ñacaja Ndióxi nasacu xóo a nā Israel ta ñacaja mé á ñamaní xihin mé ndó, nā tóho já ná nduu ndó cuéntá mé á. Ta viti cája Ndióxi cuhá ñamaní xihin ndo tá quiahva cája xihin nā Israel. ¹⁸ Joo ndóhó, nā cúú nā tóho a cáhán ndo ña vaha chága mé ndó a juú ga nā Israel. Co ndítahan cahán ndo já. Co cúú ndó tátūhun yohó yitó jáchi cúú ndó tátūhun ndáha do. Ta tá co yóho dá já queá a cúú catacu ndáha do. Sahá ña cán queá co ndítahan caja cáhnu ndó mé ndó.

¹⁹ A váha cahvi ini ndó ña náhnu chága mé ndó nu Ndióxi a juú ga nā Israel sahá ña nasacu xóo mé á nā Israel ta ñasuná a íchi nu ndóhó candeé ini ndó mé á. ²⁰ Cándehé ndo. Nasacu xóo Ndióxi nā Israel sahá ña coó ñacandeé ini na mé á ta ñandacaxi a ndóhó sahá ña candeé ini ndó mé á ña cán queá co ndítahan caja cáhnu ndó mé ndó. Ña ndítahan caja ndó queá cayihvi ndo Ndióxi. ²¹ Xíní ñúhú ndicūhun ini ndó ña cuu jácaxoo tucu Ndióxi ndohó. Coó natāhnda ini a jándacoo xóo a nā Israel, mé nā ñacaxi á. Sahá ña cán queá cachí ga ví mé ndó, nā tóho ndáa náha caja Ndióxi cacu xóo tucu a ndohó. ²² Cándehé ndo jáchi táhvi ini Ndióxi sahá ñayivi tá candeé ini na mé

á joo cuehe ndivaha mé á xihín nā sáa ini. Ña cán queá tá co candeé ini ndó mé á ta ni co quihvi ini ndó a já cacu xóo a ndohó tá quiahva ñacaja xihin nā Israel. ²³ Joo tá ná ndihvi nā Israel íchi Ndióxi candeé ini na mé á já queá ndiquehe tucu Ndióxi nā jáchi cuu caja mé á tóco ndihi ñaha. ²⁴ Nandiquehe Ndióxi ndohó vatí nasanduu xicá ndó nu á ta ñandaja mé á ndohó cuéntá mé á vatí cúú ndó nā tóho. Mé ndó cúú ndó tátūhun ndáha yitó olivo, dó yúcu, dó ñachitivi ndaa Ndióxi tóco dó vaha. Ta ña yóho queá a cúú coo já, nduu. Joo ñacaja Ndióxi já xihin ndo. Ta ndáa náha cuu caja tucu Ndióxi xihin nā Israel ña ndiquehe tucu a nā ta cacu tucu a nā nu ndahá yitó olivo, dó vaha nuú nasandaa na jihna.

Vaxi quívī tá candeé ini nā Israel Jesús

²⁵ Ñani mí i, nā cúú cuéntá Jesús. Cúni ña ná candaa ini ndó ña nasacu ini Ndióxi caja chága chí nuu já ná a cája cáhnu ndó mé ndó. Cuhá nā Israel ñandaja táhyí nā ínima ná ta co cúni nā ndiquehe na tūhun Ndióxi. Joo tá sa ñandiquehe ndihi nā tóho, nā nasacu ini Ndióxi jácacu a anda javí casáhá nā Israel ndiquehe na tūhun Ndióxi. ²⁶ Anda javí cacu ndaa ínima ndihi nā Israel. Ta já cáchi tūhun Ndióxi sahá ña yóho: Ñuu Sión quixi in da jácacu ñayivi Israel, nā ñaquixi chichi Jacob ná a cája ga nā cuachi.

²⁷ Ta jándoo i cuachi ñacaja na, tá quiahva ñacachi i xihin ná caja i, cáchi Ndióxi.

²⁸ Tiempo viti cuhá ndivaha nā Israel co cúni nā tūhun vaha saha Jesús sahá ña cán queá co cúni nā Ndióxi. Joo cája na ña yóho ña ná nuná nu ndóhó, nā tóho já ná cuu candeé ini ndó Ndióxi. Vatí cája nā Israel ña yóho joo quihvi ini tá quihvi ini Ndióxi nā sahá tūhun nasahan nu tásahnu jícó na. ²⁹ Tá sahan Ndióxi

ñā cáhí a quiahva nū yō já queá cō ndímanj mé á nuú tuhun a ta cō ndícó cōo a cándaa ñā sáhan nū yō. Ta ni cō ndícó cōo ini a tá sã nandacaxi a mí. ³⁰ Sáá ñasahjin ini ndóhó, ñā tóho sanahá joo viti nacaja mé á cuahá ñamanj xihín ndó sahá ñā sáá ini ñā Israel. ³¹ Ta vatí sáá ini ñā Israel viti joo xihín ñā yóho núná nū ndóhó, ñā tóho ndiquehe ndó ñamanj Ndióxi. Joo vaxi quiví tá tahví ini Ndióxi sahá ñā Israel tá quiahva ñatahví ini a saha ndóhó, ñā tóho. ³² Nachicaji Ndióxi xíní túnj ñā Israel xihín ñā tóho ñā ná nduu na ñā sáá ini. Nacaja Ndióxi ñā yóho já ná cuu tahví in nuú ini a saha tóco ndihi ñayivi.

³³ Cáhnū ndivaha cúu tóco ndihi ñaha Ndióxi. Ndíhí ndivaha jiní mé á ta cándaq ini a tóco ndihi ñaha. Ni in ñayivi a cuú ndicani na ñā cáhvi ini Ndióxi. Ta ni in na a cuú candaq ini ñā cája Ndióxi. ³⁴ Já cáhí tuhun Ndióxi já: “Ni in ñayivi a cuú candaq ini na ñā cáhvi ini Ndióxi. Ta ni in ñayivi a cuú jácahan ñā mé á caja ñā ndítahan caja. ³⁵ Cōó ñayivi cája ñamanj xihín Ndióxi ñā ná ndaca ñā ñā nū mé á”, cáhí tuhun Ndióxi. ³⁶ Jáchi Ndióxi queá nacavaha tóco ndihi ñaha ta ndúu a saha mé á ta ndúu a cuéntá mé á. Andá ama cáa quiví ná caja cáhnū í Ndióxi. Já ná coo.

Tácú yō caja chúun í cuéntá Ndióxi

12 Natahví ini Ndióxi saha ndó, ñani mí í, ñā cúu cuéntá Jesús. Sahá ñā cán queá xíca tahví í nū ndo ñā ná ndiquiahva ndó mé ndó ndáha Ndióxi já ná cacuu a tátuhun joco ndó mé ndó nū Ndióxi. Ta caja ndó tóco ndihi ñā cúni Ndióxi caja ndó ñā ná cajii ini a. Jáchi xihín ñā yóho náha ñā mé a ndaa táhyí cája cáhnū ndó Ndióxi ta ñā yóho cúu á ñā ndítahan nū ndó caja ndó. ² A cája ga ndó ñā núu ñā cája ñayivi ñuyíví. Quiahva ndó ñamanj nū Ndióxi ñā ná ndaja víí a xíní túnj ndo. Andá jáví can-

daq ini ndó ñā cúni mé á caja ndó. Ta xihín ñā yóho cuu caja ndó ñā vaha ta cuu caja vatá ndó ini mé á ta cuu caja ndó ñā cúni mé á xihín ndinuhu ini ndó.

³ Nacaja Ndióxi ñamanj xihín í tá nacaxi a yehe. Ñā cán queá cáhan í xihín ndihi ndó ñā cō ndítahan cáhan ndo ñā cúu ndó ñā náhnū ndivaha joo ná cahvi ini ndó ñā ndaa saha mé va ndó. Ñā ndítahan caja ndó queá coto ndojó ndo mé ndó jáchi ñasacu ini Ndióxi ñā ná candéé ini ndó mé á já ná cuu caja ndó ñā cúni a. ⁴ Candehé ndó tá quiahva íin yiquí cuñu í. In túhún cúu yiquí cuñu í joo cuahá nuú ñaha ndáca ta sã jíin sã jíin chuun cája in in ñā ndáca yiquí cuñu í. ⁵ Quiahva já íin tóco ndihí, ñā cúu cuéntá Jesús. Sã jíin sã jíin chuun cája in in í joo in va cúu yō xihín Jesucristo. Ta sã jíin sã jíin chuun cája in in í.

⁶ Sã jíin sã jíin chuun ñasahan Ndióxi nuú in in í caja í ta mé á ñasacu ini a ndá chuun queá quiahva nuú in in í. Sahá ñā cán queá tá ñasahan Ndióxi chuun nū ndó jáyaha ndó tuhun mé á nuú ñayivi, caja ndó ñā xihín ndéé mé á jáchi cándéé ini ndó a. ⁷ Ta tá ñasahan Ndióxi chuun nū ndó ñā ná chindeé ndó ñayivi já queá ndítahan nū ndó chindeé vaha ndó ñā. Ta tá ñasahan Ndióxi chuun nū ndó jánaha ndó ñayivi já queá ndítahan nū ndó jánaha vaha ndó ñā. ⁸ Tá ta ñasacu Ndióxi ini ínimã ndo quiahva ndó tuhun ndéé ini na, caja ndó ñā xihín ndinuhu ini ndó. Ta ndá ñaha jáás ndo nuú ñayivi xíní ñúhú cajii ini ndó jasá ndó ñā. Ta ndá ndó ndójo chuun xíní ñúhú coo cuéntá vaha ndó xihín chuun ndójo ndó. Ta ndá ndó cátóo chindeé ñayivi ná cajii ini ndó chindeé ndó ñā.

Ñā ndítahan caja ñā cúu cuéntá Jesús

⁹ Xihín ndinuhu ini ndó quihví ini táhan ndó. Candají ndó ñā núu ta caja ndó ñā vaha xihín ndinuhu ini ndó.

¹⁰ Xíní ñúhú quihv̄i ini ndó n̄a cúu cuéntá Jesús jách̄i cúu ná tátuhun n̄a vehe ndó ta cajii ini ndó tá caja cáhnu táhan ndó.

¹¹ Nducú ndéé ndo ta a cácuu ndó n̄a jusá ta xih̄in ndinuhu ini ndó caja chúun ndó cuéntá Ndióxi, xitoho í.

¹² Xíní ñúhú cajii ini ndó candatí ndó xinu coo tuhun nasahan Ndióxi nu ndo. Quiáhva ndeé vaha ini ndó tá ndóho ini ndó ta a jándacoo ndó ña caça tahví ndo nu Ndióxi.

¹³ Ndá ñaha ndíman̄i nuú java ga n̄a cúu cuéntá Jesús ná chindeé ndó n̄a. Ta ndiquehe vaha ndó ñayivi xító nihni ndohó.

¹⁴ Caça tahví ndo nu Ndióxi sahá na cája xíxi xih̄in ndo ña ná caja Ndióxi ñaman̄i xih̄in ná. Caça tahví ndo nu Ndióxi saha ná ta a chícaan ndó cháhan jatá ná.

¹⁵ Cajii ini ndó xih̄in n̄a cájii ini ta cuacu ndó xih̄in n̄a sácu.

¹⁶ In nuú quihv̄i ini táhan ndó. A cája ich̄i ini ndó. Ña ndítahan caja ndó queá jánuu ndáha ndó mé ndó xih̄in ñayivi ndáhvi, n̄a co ndínehe jícó mé. Ta a cáhán ndo ña cúu ndó n̄a ndíchí ndivaha.

¹⁷ Tá cája núu na xih̄in ndó, a ndícó coo ndó caja ndó ña núu xih̄in ná. Joo nducú ndó quiáhva caja ndó ña vaha já ná a cháhan núu ñayivi saha ndo. ¹⁸ A ndúcú ndo cani táhan ndó xih̄in ñayivi ta ndih̄i ini ndó coo vaha ndó xih̄in ndihi na. ¹⁹ Ñani mí i, n̄a cúu cuéntá Jesús. Tá cája xíxi na xih̄in ndo a ndúcú ñehe toho ndó ña núu nu ná jách̄i cojo ini Ndióxi xih̄in n̄a cája já ta ndítahan nu mé á jándoho a ini na. Já cáchí tuhun Ndióxi: “Yehe ndítahan nuú jándoho i ini ñayivi, n̄a cája ña núu”, cáchí Ndióxi. ²⁰ Vaha chága ná caja ndó ña cáchí tuhun Ndióxi: “Tá cuíco ñayivi, n̄a co cúní ndohó quiáhva ndó ná cuxu na. Ta tá ich̄i ini n̄a co cúní ndohó quiáhva ndó ticuif̄i nu ná coho na. Tá ná caja ndó ña yóho já queá cacahan nuú n̄a cán sahá

ñā núu cája na xih̄in ndó.” ²¹ A quiáhva ndó ñaman̄i quee vaha ña quini xih̄in ndó. Ña ndítahan caja ndó queá caja ndó ña vaha já ná cuu quee vaha ndó cahnu ndó ña quini.

13 Xíní ñúhú coo johō ndó nuú ña cáhan n̄a jutixia xih̄in ndo. Jách̄i sáhan Ndióxi ñaman̄i nuú n̄a cán cahnda na chuun nuú ñayivi. Ta mé Ndióxi queá nasacu a n̄a. ² Ta ndá n̄a co cúní cuni johō nu sáhdá n̄a jutixia cúu ná n̄a sáji nuu nu Ndióxi jách̄i Ndióxi queá nasacu a n̄a cán. Ta ndá n̄a co cúní caja ña sáhdá n̄a ndoho ini na. ³ Jách̄i coo nasacu Ndióxi n̄a jutixia ña ná jáyih̄vi n̄a ñayivi, n̄a cája ña vaha. Nasacu Ndióxi n̄a ña ná jáyih̄vi n̄a ñayivi, n̄a cája ña núu. Tá co cúní ndó cayih̄vi ndo n̄a jutixia xíní ñúhú caja ndó ña vaha já ná cajii ini n̄a jutixia xih̄in ndo. ⁴ Nasacu Ndióxi n̄a jutixia ña ná chindeé n̄a ndohó. Joo tá cája ndó ña núu já queá xíní ñúhú cayih̄vi ndó n̄a jách̄i mé n̄a cán cahnda na chuun ña ná cháhvi ndó sahá ña núu cája ndó. Sahá ña cán nasacu Ndióxi n̄a ña ná jándoho na ini n̄a cája ña núu. ⁵ Ña cán queá ndítahan nu ndó caja ndó ña sáhdá n̄a jutixia já ná a jándoho na ini ndó jách̄i sa náha mé va xíní tún̄i yo cháhan xohō ña xíní ñúhú candúsa í ña sáhdá n̄a jutixia nu yo. ⁶ Sahá ña cán queá cháhvi ndó jihuún cuéntá impuesto jách̄i sa xíní ndó ña ndítahan nu ndó cháhvi ndó ña. N̄a jutixia cája chúun na cuéntá Ndióxi tá cája na ña xih̄in ndinuhu ini na.

⁷ Ndiquiáhva ndó nuú ñayivi ña ndítahan nu ná ndiquehe na. Cháhvi ndó impuesto nuú n̄a játaca ña. Caja cáhnu ndó ñayivi, n̄a ndítahan caja cáhnu ndó ta coo ton̄i ñúhú ndó xih̄in n̄a ndítahan coo ton̄i ñúhú ndó xih̄in. ⁸ A cáyicá ndo ñaha nuú ni in ñayivi. Ña ndíyicá ndo queá quihv̄i ini táhan ndó. Jách̄i ndá n̄a quihv̄i ini ñayivi, n̄a cán cúu n̄a cája ña sáhdá ley Moisés. ⁹ Jách̄i tá quihv̄i ini ndó ñani táhan ndó já queá a ndiáva ini ndó caja

ndó ña núu xihin na. Ta a cáhvi ini ndó coo ndó xihin ñájíhí ñani táhan ndó. Ta a cáhni ndó ndíi. Ta a cáhvi ini ndó caja cuíhna ndó ñaha inga na. Ta ni a ndiáva ini ndó cacomí ndó ñaha cómi inga na. Tá quíhvi ini ndó ñani táhan ndó já queá cúní cachi a ña cája ndó ña sáhdá ley Moisés tá cáhí a já: “Quíhvi ini ndó ñani táhan ndó tá quíhva quíhvi ini ndó mé ndó.”¹⁰ Ndá na quíhvi ini ñani táhan, na cán cúu na cája vaha xihín ñani táhan na. Ña cán queá tá quíhvi iní ñani táhan í já queá jáxinu yó nuú ña sáhdá ley Moisés.

¹¹ Sahá tóco ndihi ña cáhan í xihin ndo yóho xíní ñúhú candehé ndo ndá quíahva cáa tiempo ndúu viti. Xíní ñúhú ndicáxi vaha ini ndó caja ndó ña cúní Ndióxi jáchi viti sa nacayati chága quívi jácacu Ndióxi mí a juú ga tá jacá nacandúsa í tuhun Ndióxi.¹² Cúu á tátuhun ja chá cúní yaha ñuu ta casáha tivi yaa. Ña yóho cúní cachi a ña sa nacayati quívi quixi tucu Jesucristo. Ña cán queá xíní ñúhú jándacoo í ña núu cája í tátuhun cája ñayivi xíca nuu naá. Ta xíní ñúhú caja í ña vaha já queá quee vaha í xihín ña núu.¹³ Ndísáhnú ná coo iní caja í tóco ndihi ñaha tátuhun cúu yó na ndúu nu yehe. A cácuú ñayivi xíhi ta ni a cája í vicó lándá ndivaha. Ta ni a cáca nuu jii yo xihín ñájíhí ñani táhan í ta a ndiáva iní coo í xihín najihí. Ta a ndúcu yo caní táhan í xihín ñani táhan í ta ni a cáhíhvi iní xihín ná.¹⁴ Ña ndítahan caja í queá caça chága yo ndée yo nu Jesucristo, xitoho í já ná cacuu a tátuhun candixí in jahmá caa ña sándixi da cáni táhan. Ta coto a quíahva ndó ñamaní nuú yiquí cuñu ndó caja ña núu.

Có ndítahan candehé ndaa táhan í

14 Ndiqhehe vaha ndó na cúu cuéntá Jesús vatí co cándaa vaha ini na ña jánaḡa tuhun Ndióxi. Ta a cáni táhan yúhu ndó xihín ná sahá ña

cándúsa na.² Íin java na cúu cuéntá Jesús cáhan na ña cuu cuxu na cuñu, ña najoco na nuú yoco. Joo java na cúu cuéntá Jesús, na saá xihín tuhun Ndióxi cáhan na ña a cúu toho cuxu na cuñu, ña najoco na nuú yoco sahá ña cán queá co xíxi na ña.³ Na xíxi mé cuñu cán co ndítahan nu ná candehé ndaa na na co xíxi ña ta na co xíxi cuñu cán co ndítahan nu ná candehé ndaa na na xíxi ña. Jáchi ndíqhehe vaha Ndióxi ndíví na cán vatí sa jíin cáhan na.⁴ Ta quíahva já co ndítahan nu ndó candehé ndaa ndó mozo ñani táhan ndó á cája vaha da á co cája vaha da nuú xitoho da. Vaha ri caja vaha da tá vaha ri co cája vaha da jáchi mé va xitoho da cán xíní sahá ña cán. Joo cuu caja Ndióxi ña ná candoo vaha mozo cán nuú xitoho da.

⁵ Java ñayivi cáhí na ña íin quívi náhnú chága nuú java ga quívi. Ta java na cáhí na ña in cúu tóco ndihi quívi. Ta ndítahan nuú in in na caxi na ña cáhvi ini na sahá ña yóho.⁶ Tá sácú ini na caxi na in quívi caja cáhnú na Ndióxi ta vaha va cája na. Ta tá cáhan na cuu caja cáhnú na Ndióxi ndá quívi nacuu va ta vaha ri já va. Ta vatí xíxi na cuñu, ña sa najoco na nuú yoco á co xíxi toho na ña joo ndíquíahva na ndixahvi nu Ndióxi sahá ta xihín ña yóho cája cáhnú na mé á.

⁷ Ni in yó co tácu saha mí ta ni in yó co xíhi saha mí.⁸ Ta tá tácu yo á tá naxihí yo mé a ndaa cúu yó na cómi Ndióxi cuéntá saha ta cúu mé á xitoho í.⁹ Sahá ña cán queá naxihí Jesucristo ta nanditacu tucu a já nanduu a xitoho ñayivi, na tácu xihín na sa naxihí.

¹⁰ Ña cán queá a váha toho cája ndó tá sánehé ndaa ndó ñani táhan ndó. A váha caja ndó candají ndó na jáchi vaxi quívi ndique táhan ndihí candita í nu Ndióxi ña caja ví a saha yo.¹¹ Jáchi já cáhí tuhun Ndióxi já:

Yóho ín i cáhí i xihín ndo ña xinu quiví ndica xítí tóco ndihi ñayivi nuú i, ta casáhá ña caja cáhnu na yehe, ña cúu Ndióxi, cáhí Ndióxi, xitoho í. ¹² Jáchí nditahan nuú in in í ndiquiahva í cuéntá sahá ña ñacaja í nu Ndióxi.

A caja ndó ñaha ña cuu jándicava ñayivi nuú cuachi

¹³ Sahá ña cán queá co ndítahan candehé ndaa táhan í. A cácu ini ndó caja ndó ñaha, ña cuu jándacava ña cúu cuéntá Jesús nuú cuachi ta já ná jándacoo na ña cándéé ini na Ndióxi. ¹⁴ Sahá ña cándéé ini i Jesús, xitoho i sahá ña cán queá cándaá vaha ini i ña co caja i cuachi tá xíxi i ña najoco na nuú yoco. Joo tá ndúu ña cáhán ña a váha toho cuxu na ña já queá co ndítahan cuxu na ña jáchi cuu candojo na cuachi sahá tá ná cuxu na ña. ¹⁵ Joo tá ndíhíhvi ñanún, ña cúu cuéntá Jesús sahá ñaha xísún já queá cúní cachi a ña cándajún ña. Cuéntá cóun ná a cájún ña ndicava ña cán nuú cuachi sahá ña xísún jáchi cúu ná ña naxihí Jesucristo saha. ¹⁶ Vatí cándaá ini ndó ña cuu cuxu ndó ña najoco ña nuú yoco joo a cúxu toho ndó ña tá ná cahán núu ñayivi sahá ña caja ndó. ¹⁷ Jáchí a juú sahá ña xíxi ni sahá ña xihí cacomí Ndióxi cuéntá saha yo. Ña cúní Ndióxi caja í queá ná canduu ndaa yo nu mé á ta ná coo vaha iní xihín ñayivi ta ná cají iní. Tóco ndihi ña yóho cúu á ña quixi nu ínima yí Ndióxi. ¹⁸ Tá ná caja ndó ña yóho já queá caja cáhnu ndó Jesucristo ta cají ini Ndióxi caja ndó ta candoo vaha ndó nuú ñayivi.

¹⁹ Ña cán queá xíní ñúhú ndinducú yo tóco ndihi ñaha, ña cuu candaca mí canduu táji yo xihín ñani táhan í ta já ná cuu jácuahnu táhan í xihín ñaha Ndióxi. ²⁰ Nasacu ini Ndióxi jácacu a ñayivi sahá ña cán queá coto a cájí nuu ndó nuú ña cúní Ndióxi caja sahá ñaha xíxi ndó.

Mé a ndaa tóco ndihi ñaha cúu á ña vaha cuxú. Ña co váha queá jándacava í ñayivi nuú cuachi sahá ña xíxi. ²¹ Vaha chága ná a cúxu ndó cuúu ta ni a cóho ndó vino ta ni a caja ndó inga ñaha ña cuu jándacava ñani táhan ndó nuú cuachi. ²² Tá ta cándaá cáxi ini ndó ña co caja ndó cuachi nu Ndióxi, a ndicani ndó ña nuú java ga ñayivi. Jáchí tahví nacuu ñayivi tá xíní ña co caja na cuachi nu Ndióxi. ²³ Joo ndá na ndúcú cuxu in ñaha ta cáhvi ivi joho ini na xihín á tá xíxi na ña já queá xínu cuachi jatá ná. Jáchí ndá ñaha nacuu ná caja í ta tá ta cándúsa yó ña cúu á cuachi já queá xínu a cacuu a cuachi nu yo.

Chindeé ndó ña cáhvi ivi joho ini

15 Tá ndacu cuahán yó xihín tũhun Ndióxi já queá co ndítahan cacu xóo í ña vitá xihín tũhun Ndióxi. A ndúcú ndo caja ndó ña jándivaha ini mé cuití va ndó. ² Tóco ndihí xíní ñúhú caja í ñaha ña táhán ini ñani táhan í xihín. Ta xíní ñúhú caja í ña já ná chindeé yó ña ña ná canduu vaha na ta já ná cuu cuahnu chága ña xihín tũhun Ndióxi. ³ Jáchí mé Jesucristo coo ñanducú a caja ña táhan ini mé cuití a. Ña ñacaja mé á queá najáxinu coo a nuú tũhun Ndióxi. ⁴ Jáchí mé Jesucristo coo ñanducú a caja ña táhan ini mé cuití a. Ña ñacaja mé á queá najáxinu coo a nuú tũhun Ndióxi tá ñacachi a já: “Tũhun núu ña najácana na nu mé ndó naxinu ri a jatá yehe viti.” ⁵ Tóco ndihi ña ñacahyí nuú tũhun Ndióxi sanahá ñacahyí a já ná jánahá nu yo ña co ndítahan ndicani iní. Ta, náha ña ndítahan quiahva tũhun ndeé iní nani ndátí jáxinu Ndióxi tũhun ñasahan nu yo. ⁶ Ndióxi queá sáhan ndée nu yo ña ná coo cáhnu iní ta sa mé á sáhan tũhun ndeé iní. Ña cúní Ndióxi queá chindeé a ndohó caja ndó tá quiahva ñacaja Jesucristo ta já in ná nduu xihín táhan ndó. ⁷ Ta já in ná jándique táhan ndihí caja cáhnu í Ndióxi, mé a cúu tátá Jesucristo, xitoho í.

**Xíní joho na coó naquixi chichi
Israel tuhun vaha saha Jesús**

⁷Ndiquehe vaha ndó tóco ndihi na cúu cuéntá Jesús tá quiahva nandiquehe vaha Jesucristo ndohó já ná ndicáhnu Ndióxi. ⁸Ndítahan ndicuhun ini ndó ña naquixi Jesucristo chindeé a ñayivi Israel. Ta naquixi a jánahá nu ná ña mé a ndaa táhyí jáxinu coo Ndióxi tóco ndihi nuú tuhun ña naşahan nuú tásáhnú jícó yo jáchi co ndímaní Ndióxi nuú tuhun a. ⁹Ta naquixi a jácaçu a ñayivi, na coó naquixi chichi Israel ña ná cajú cáhnú na mé á sahá ñamaní naçaja mé á xihín ná. Jáchi já cáchi tuhun Ndióxi:

Yehe xihín na coó naquixi chichi Israel
caja cáhnú nde ndohó, Ndióxi,
ta yehe cata i nu ndo caja cáhnú i quivi
ndo.

¹⁰Ta íin inga tucu nu cáchi a já:
Ndóhó, na coó naquixi chichi Israel xíní
ñúhú ndique táhan ndó cajji ini ndó
xihín na naquixi chichi Israel.

¹¹Anda já naçachi tucu a já:
Tóco ndihi ndó, na coó naquixi chichi Is-
rael caja cáhnú ndó Ndióxi, xitoho í,
ta ná a jándacoo toho ndihi ñayivi caja
cáhnú na Ndióxi.

¹²Tá naçahyí Isafías nuú tuhun Ndióxi já
naçahyí da tuhun yóho:

Vaxi quivi cacu in da chichi Isafí,
ña ná cacomí da cuéntá sahá ñayivi, na
coó naquixi chichi Israel.

Ta mé ñayivi yóho candeé ini na mé da
quixi chichi Isafí cán.

¹³Ndióxi queá cajú ña ná candeé ini
ndó mé á ta já cuu jácaçu a ndohó. Ná
caja mé á ña ná ndicutú ini ndó xihín
ña cajji ini ndó ta ná cajú mé á ña ná
coo vaha ini ndó jáchi candeé ini ndó a.
Xihín ndée ínima yii Ndióxi ná quiahva
mé á cuaha ndée nu ndó candeé chága
ini ndó a.

¹⁴Cándehe ndó ñani i, na cúu cuéntá
Jesús. Sa xíní vaha i ña naçhutú ndo

xihín ña vaha ta cándaá vaha ini ndó
tuhun Ndióxi. Ta xihín ña jan cuu já-
nahá táhan ndó. ¹⁵Joo tá naçahyí i carta
yóho nu ndo já naçaja ndeé ini i cáhyí
i saha java ñaha jáchi co cúni ña ná
ndindójó ndo ña. Cáhyí i ña yóho jáchi
naçaja Ndióxi ñamaní xihín i ¹⁶cajú
chúun i cuéntá Jesucristo cáxi tuhun i
tuhun vaha saha mé á nuú ñayivi, na coó
naquixi chichi Israel. Ta cúu i tátuhun
jutu jáchi xíca i cáhan i tuhun Ndióxi
xihín ná já ná cuu cacu ndaa ínima ná.
Cúu á tátuhun jóco i na nu Ndióxi já ná
cajji ini mé á xihín ná ta já ná cuu ndaja
ínima yii mé á ña ná nduu na ñayivi ví
nu mé á.

¹⁷Ta sahá ña cándúsa i Jesucristo sahá
ña cán queá ndivaha ini i caja chúun i
cuéntá Ndióxi. ¹⁸Jáchi sahan ndeé ini i
cáhan i sahá ña naçaja Jesucristo tá na-
caja chúun mé á yehe ña candaca i na
coó naquixi chichi Israel ña ná cajú na
ña cúni Ndióxi. Ta sahá ña naçahan i
xihín na cán já naxini joho na ta naçaja
na ña cáchi tuhun Ndióxi. ¹⁹Ta sa nax-
ini na ña xitúhún xihín ña náhnú ndi-
vaha naçaja i nu ná xihín ndée ínima
yii Ndióxi. Ta quiahva já naçaxi tuhun
i tuhun vaha saha Jesucristo nuú ñayivi
ndúu ñuu Jerusalén xihín nu tóco ndihi
na ndúu ndijáá ñuu anda estado Ilfrico.

²⁰Ña ndúcu u caja i queá cahan i xihín
ñayivi ña cúni Ndióxi jácaçu a na. Ta sá
cahan i ña yóho nuú ñayivi, na a ñaha
cuni joho saha Jesucristo jáchi co cúni
ndiquehe e chuun ña sa najacava sáhá
inga na. ²¹Cáhvi ini i ña vaha chága
ná cuhun i nuú ñayivi, na coó naxini
joho tuhun vaha saha Jesús jáchi já cáchi
tuhun Ndióxi já:

Vatí coó naxini joho na tuhun vaha saha
mé á joo vaxi quivi xinu coo na
cahan xihín ná,

ña ná cándaá ini na ña coó naçandaá ini
na jihna, cáchi tuhun Ndióxi.

Sácú ini Pablo cūhun dā ñuu Roma

²² Ta sahá chuun cāja i yóho coó ñacuu saa i coto nihni i ndohó vatí sa cuahá tañu ñasacu ini i saa i jan. ²³ Joo viti sa najándihi i chuun ñacaja i tañu ñayivi ndúu yóho. Ta sa cáhvi ini i saa i coto nihni i ndohó anda sanahá. ²⁴ Sahá ña cán queá sácú ini i saa i coto nihni i ndohó tá ná yaha i cūhun i chí España. Ta tá ná ndihi cajji ini i cuni i ndohó anda jávi ndiquehe tucu u íchi cūhun i. Joo cúní ña ná chindeé ndó yehe já ná cuu ndiquehe tucu u íchi cūhun i. ²⁵ Joo viti cūhun i chí ñuu Jerusalén chindeé na cúu cuéntá Jesús ndúu cán. ²⁶ Jáchí na cúu cuéntá Jesús ndúu estado Macedonia xihín na ndúu estado Acaya ñasacu ini na játaca na jjuhún ta chindahá na ña nuú na cúu cuéntá Jesús, na cándáhvi ndúu ñuu Jerusalén. ²⁷ Mé na tóho yóho ñasacu ini na caja na ña ta vaha cāja na jáchi cáhán na ña ndítahan nu ná chahvi na sahá ña ñacaja na Israel, mé na cúu cuéntá Jesús ndúu ñuu Jerusalén xihín ná. Jáchí ñasahan na Israel ñacaxi tūhun na tūhun vaha saha Jesús nu ná. Ta viti ndúcú ñehe na tóho yóho ñamaní ñacaja na Israel xihín ná. Ña cán queá chindeé ñahá na toho xihín ña cómi na. ²⁸ Ta tá sa najándihi i caja i chuun yóho ta tá sa ñandihí ndiquiahva i jjuhún ñataca na tóho nuú na cúu cuéntá Jesús ndúu ñuu Jerusalén anda já nuná nuú i cūhun i España ta já yaha i jan coto nihni i ndohó. ²⁹ Ta xini vaha i ña tá ná saa i jan caja Jesucristo cuahá ñamaní xihín ndo sahá tūhun vaha cahan i xihín ndo.

³⁰ Xíca tahví i nu ndo ñani mí i, na cúu cuéntá Jesús, ña in nuú ná caça tahví yo nu Ndióxi sahá chuun cāja i. Jáchí cándéé ini ndó Jesucristo ta quíhvi ini ndo yehe ñacaja ínimá yii Ndióxi. ³¹ Caça tahví ndo nu á ña ná chindeé a yehe ná a cāja ñayivi, na co cándúsa Ndióxi ndúu estado Judea ni in ñaha

xihín i. Ta caça tahví ndo nu Ndióxi ña ná cándúsa na cúu cuéntá Jesús ndúu ñuu Jerusalén cán ndiquehe vaha na jjuhún ñehe cuahan i nu ná. ³² Já queá tá ná cúní Ndióxi já cajji ini i saa i coto nihni i ndohó ta ndiquehe ndeé e nani xito nihni i ndohó. ³³ Ndióxi ná coo xihín ndo ta ná caja mé á ña ná coo vaha ini ndó. Já ná coo.

Chindahá Pablo Ndióxi coo na ndúu ñuu Roma

16 Já chá va casa ña naní Febe, ña cúu cuéntá Jesús nu ndo. Mé Febe yóho ñacaja chúun ña veñuhu Cencrea. ² Caja ndó ñamaní ndiquehe vaha ndó ña sahá ña cúu ña cuéntá Jesús, xitoho í ta já ndítahan caja na cándéé ini Jesús. Chindeé ndó ña yóho xihín ndihi ñaha ña cámani nu ña jáchi ñachindeé ña cuahá ndivaha ñayivi ta ñachindeé ri ña yehe va.

³ Chindahá i Ndióxi coo Priscila xihín Aquila jáchi in cúu ná xihín i cāja chúun na cuéntá Jesucristo. ⁴ Mé na yóho ñasahin tiaha na quivi na já ná cuu cacu yehe tá ñaquixi tondóho nuú i. Ta a juú in túhún yehe ndíquiahva ndixahvi nu ná vaha. Tóco ndihi na cúu cuéntá Jesús, na coó ñaquixi chichi Israel ndíquiahva na ndixahvi nu ná. ⁵ Ta jári chindahá i Ndióxi coo na cúu cuéntá Jesús, na ndíque táhan vehe Priscila xihín Aquila. Ta cahan Ndióxi ndó xihín Epeneto jáchi quíhvi ndivaha ini i da. Mé dá ñasacuu da nu cuítí ñandihvi íchi cuéntá Jesús estado Acaya. ⁶ Ta cahan Ndióxi ndó xihín María, ña chindeé cuahá ndohó. ⁷ Ta chindahá i Ndióxi coo Andrónico xihín Junias. Ndívi da yóho cúu dá da ñaquixi chichi nuú ñaquixi mí i. Ta in ñasañuhu nde veca xihín dá. Ta cúu dá da náhnu tañu na apóstol. Ta jihna ñúhú ndívi mé da yóho ñacasahá cándúsa da Jesucristo a juú ga yehe.

⁸Ta caḥan Ndióxi ndó xihín Amplias jáchi quíhvi ndivaha ini i da. Ta in cúu nde cuéntá Jesús. ⁹Ta chindahá i Ndióxi coo Urbano. In cúu mé dá xihín nde cája chúun da xihín nde cuéntá Jesucristo. Ta chindahá i Ndióxi coo Estaquis, da quíhvi ndivaha ini i. ¹⁰Ta chindahá i Ndióxi coo Apeles jáchi cuahá tañu najánaha da nuú ñayivi ña mé a ndaa táhyí cándee cáhnu ini da Jesucristo. Ta quiahva já chindahá i Ndióxi coo na vehe Aristóbulu. ¹¹Ta caḥan Ndióxi ndó xihín Herodión jáchi in naquixi nde chichi Israel. Ta caḥan Ndióxi ndó xihín na vehe Narciso jáchi cándúsa na Jesús, xitoho í. ¹²Ta caḥan Ndióxi ndó xihín Trifena ta xihín Trifosa, na cája chúun cuéntá Jesucristo, xitoho í. Ta caḥan Ndióxi ndó xihín Pérsida, jáchi quíhvi ndivaha ini i ña ta cuahá ndivaha na-
caja chúun ña cuéntá Jesucristo, xitoho í. ¹³Ta caḥan Ndióxi ndó xihín Rufo jáchi cúu dá da cáhnu ndivaha tañu na cúu cuéntá Jesús. Ta caḥan Ndióxi ndó xihín náná da jáchi cúu ña tátuhun náná mí i viti. ¹⁴Ta chindahá i Ndióxi coo Asíncrito xihín Flegonte xihín Hermas xihín Patrobas xihín Hermes. Ta chindahá i Ndióxi coo tóco ndihi na cúu cuéntá Jesús ndúu xihín na cán. ¹⁵Ta caḥan Ndióxi ndó xihín Filólogo xihín Julia xihín Nereo ta xihín quiahva da. Ta caḥan Ndióxi ndó xihín Olimpas ta xihín tóco ndihi na cúu cuéntá Jesús ndúu xihín na cán.

¹⁶Ña cúni queá ná caḥan Ndióxi xihín táhan ndó ta ná tatí yíhu táhan ndó ta yíi caja ndó ña. Tóco ndihi na cúu cuéntá Jesús, na táca veñuhu yóho chindahá na Ndióxi coo ndihi ndó.

¹⁷Cándehé ndó ñani mí i, na cúu cuéntá Jesús. Xíca tahví i nu ndo ña ná coo cuéntá ndó xihín na cátoo ndicahnda ñayivi, na cúu cuéntá Jesús jáchi sáji nuu na nuú na cája ña cúni Ndióxi. Ña cája na jan queá cáxoo na nuú ña najá-

naḥa nde nu ndo. Coto a cátaḥan ndó xihín ná. ¹⁸Jáchi mé na yóho coo cúu ná na cája chúun cuéntá Jesucristo, xitoho í. Ña cája na queá ndúcu na ña vaha mé cuítí va na. Ta xihín tuhun ñúchí ta xihín tuhun vií jándahvi na ñayivi, na coo tácu vaha ini. ¹⁹Tóco ndihi ñayivi xíni na ña cája ndó ña cúni Ndióxi ña cán queá cáji ndivaha ini i. Ña cúni queá ná naḥa ndó ña ndíchí jiní ndo xihín ña vaha cája ndó. Ta a cáñuhu ini ndó caja ndó ña núu. ²⁰Yachi chá jándihi Ndióxi sahá Satanás, rí cúu tiñahá saçuaha ta já cuu cañnu ndó rí xihín ndee Ndióxi. Cacu a tátuhun chiníhni saḥa ndó rí. Ná caja Ndióxi ña ná coo vaha ini ndó. Ta ná caja cuahá Jesucristo, xitoho í ñamaní xihín ndihi ndo.

²¹Chindahá Timoteo Ndióxi coo ndó ta in cúu dá cája chúun da xihín i. Ta chindahá ri Lucio xihín Jasón xihín Sosípater Ndióxi coo ndó. Tóco ndihi da yóho naquixi da chichi Israel nuú naquixi mí i.

²²Yeḥe naní Tercio ta cáhyí i carta yóho ta chindahá ri yeḥe va Ndióxi coo ndó cuéntá Jesucristo, xitoho í.

²³Chindahá Gayo Ndióxi coo ndó. Vehe mé dá ín i ta sa mé yóho táca na cúu cuéntá Jesús. Ta chindahá ri da naní Erasto Ndióxi coo ndó. Mé Erasto cómi da cuéntá sahá jjuhún ñuu yóho. Ta chindahá ri Cuarto, da cúu cuéntá Jesús Ndióxi coo ndó.

²⁴Ná caja cuahá Jesucristo, xitoho í ñamaní xihín ndihi ndó. Já ná coo.

Cája cáhnu Pablo Ndióxi

²⁵Coho caja cáhnu í Ndióxi jáchi mé á cuu ndaja ndacú a ndohó xihín tuhun vaha saḥa Jesús ña janaha nde nu ndo. Andá sanahá tá cámani cava sahá saḥa ñuyívi nasacu ini Ndióxi jácaçu a ndohó ta viti naxinu quiví janaha mé á ña nu ndo. Nahá ndivaha nasahin jehé tuhun vaha saḥa Jesús. ²⁶Ta viti cándaa imí ña

naçahan Ndióxi saha Jesús nuú na profeta ta na yóho naçahyí na ña nuú tutu. Ta naçahnda Ndióxi chuun nuú na cúu cuéntá mé á ña ná cuhun na çaxi tuhun na ña nu tóco ndihi ñayivi ndúu ñuyíví. Ta xihin mé ña yóho naçaja Ndióxi ña ná cuu candeé ini ñayivi mé á ta já ná çaja

na ña cúni a, mé a tácu anda ama cáa quivi.

²⁷ Ta mé cuití va cúu Ndióxi ta mé cuití va ndíchí jini sahá ña cán quea ndítahan çaja cáhnu yó a anda ama cáa quivi sahá ña naçaja Jesucristo, xitoho í. Já ná coo.

Carta nu cuítí naçahyí Pablo nuú na cúu cuéntá Jesús ndúu ñuu Corinto

Cáhan Ndióxi Pablo xihín na cúu cuéntá Jesús ndúu ñuu Corinto

1 Yehe cúu Pablo, da naçaxi Ndióxi cacuu apóstol cuéntá Jesucristo jáchi já cúní a caja. Yehe xihín ñani Sóstenes ²chíndahá nde Ndióxi coo ndó, na cúu cuéntá Jesús ndúu ñuu Corinto jan jáchi in cúu ndó xihín Jesucristo. Mé Ndióxi naçaxi a ndohó cacuu ndó ñayivi yii, na nandiquiahva mé ná ndáha mé á. Ta quiahva já naçaxi ri a java ga na ndúu ndijáa ñuu cacuu na cuéntá mé á, na cája cáhnu Jesucristo, xitoho í jáchi cúu ri a xitoho mé ná. ³Ña cúní queá ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

Ñamaní cája Ndióxi xoho sahá ña cándéé ini Jesucristo

⁴Ní tiempo ndíquiahva i ndixahvi nu Ndióxi jáchi naçaja mé á cuahá ñamaní xihín ndo sahá ña cándéé ini ndó Jesucristo. ⁵Ta sahá ña in nanduu ndó xihín mé á sahá ña cán queá naçaja Ndióxi cuahá ñamaní xihín ndo já ná cuu cahán vaha ndó saha mé á. Ta já nasuná a xíní túní ndo já ná candaa vaha ini ndó saha mé á. ⁶Ta ña naçaxi i xihín ndó sahá Jesucristo naçinu a ini ndó ta viti cája ndó ña cúní mé á caja ndó. ⁷Ta viti nani ndáti ndó quiví quixi tucu Jesucristo, xitoho í ñuyiví yóho ni in túhún toho ñaha a ndímaní nu ndo ña ná caja ndó ña cúní Ndióxi jáchi nasahan mé á tóco ndihi ñaha nu ndo. ⁸Mé Ndióxi chindeé a ndohó já ná caca tuun ndó íchi cuéntá mé á janda quiví nu ndíhí. Ta já ná a cúu chícaan ñayivi cuachi jata ndo tá ná xinu

coo quiví quixi tucu Jesucristo, xitoho í ñuyiví yóho. ⁹Jáchi cája tá cája Ndióxi ña sahan mé á tuhun a caja. Ta mé á queá naçaxi a mí ña ná in cacuu xihín Jesucristo, xitoho í ña cúu in túhún jini já jahyi mé á.

Tává xoo java na cúu cuéntá Jesús mé ná

¹⁰Candehé ndo, ñani mí i, na cúu cuéntá Jesús. Xíca tahví i nu ndo xihín quiví Jesucristo, xitoho í ña ná ndique táhan ví tuhun ndihi ndó ta a cáhnda táhan ndó. Xíní ñúhú cuni táhan vaha ndó ta in túhún ñaha cañuhu ini ndó saha. Ta quiahva já ndítahan coo jini ndihi ndó. ¹¹Candehé ndo, ñani mí i, na cúu cuéntá Jesús. Cáhan í ña yóho xihín ndo jáchi naçaxi tuhun na vehe Cloé xihín i ña ndaja mé ndó cáni táhan ndó. ¹²Jáchi nañehé e tuhun ña java ndó cáhí ndo ña cúu ndó cuéntá yehe, da cúu Pablo. Ta java ndó cáhí ndo ña cúu ndó cuéntá Apolos. Ta java ndó cáhí ndo cúu ndó cuéntá Pedro. Ta java ndó cáhí ndo cúu ndó cuéntá Jesucristo. ¹³Ta xihín ña yóho ña cája ndó queá sáhnda java táhan ndó. Cándehé ndo. Coó naçixi i, da cúu Pablo ndíca crúxu saha ndo já ná jácacu u ndohó. Ta ni coó naçandúta ndó cuéntá mí i. ¹⁴Ndixahvi Ndióxi coó najácandúta i ndohó. Jáchi ndájá ga ví cachi ndó cúu ndó cuéntá yehe tá ná jácandúta i ndohó, nduu. Joo da najácandúta i cúu Crispo xihín Gayo cuítí va. ¹⁵Ña cán queá ni in túhún ndó a cúu cachi ndó ña naçandúta ndó cuéntá mí i jáchi coó najácandúta toho i ndohó. ¹⁶Ta ndícuñun ini i ña najácandúta ri na vehe Estéfanos. Na yóho cuítí cúu na ñúhu ini i najácandúta i. ¹⁷Jáchi coó naçindahá toho Jesucristo yehe ña ná caca nuu i jácandúta i ñayivi. Naçindahá mé á yehe ña ná caca nuu i cahán i tuhun vaha saha mé á xihín ñayivi já ná cuu cacu ndaa ínima ná. Ta coó toho

tuhun ndíchí cáhan i xihín ná jáchi co cúní jánuu ndáha i xihín tuhun cáhan i yóho tóco ndihi ña ñacaja Jesucristo tá naxihí a ndica crúxu saha yo.

Ndíchí jini Jesucristo ta iin ndée mé á quíxi nu Ndióxi

¹⁸ Ñayivi, na xíca cuahan ndihi saha ná ini indayá, mé na cán cáhan na ña cúu yó na tachi tá cáhan yó ña naxihí Jesucristo ndica crúxu já ná cacu ndaa íni-ma ná. Joo nu mí, na nasacu ini Ndióxi jácaacu a cávatá yo cándaa ini ña xihín ndée Ndióxi naxinu tuhun mé á nu yo.

¹⁹ Já cáchi tuhun Ndióxi já: Jándihi i sahá ña ndíchí jini ñayivi ñuyíví, ta a quehe e cuéntá sahá ña cándaa ini ñayivi, já ñacahyi a nuú tuhun Ndióxi.

²⁰ Sahá ña cán queá coó saha toho ñaha ñuyíví yóho nu Ndióxi vatí da ndíchí jini xihín da tácu ini cáhan da ña cúu dá da ndíchí ndivaha sahá ña xini da cahan da sahá ñaha ñuyíví yóho. Joo ñacaja Ndióxi ña ná cacuu a ña coó saha. ²¹ Sahá ña ndíchí jini Ndióxi, co cúní mé á ña ná cuu cándaa ini ñayivi saha mé á xihín ña ndíchí quixi jini ñayivi ñuyíví. Ña ñacaja mé á queá nachindahá a java ñayivi ña ná cahan na tuhun vaha saha mé á já queá ndá na cándúsa ña ta cándee ini na Ndióxi já cuu cacu ndaa íni-ma ná. Ta ña yóho cúu á in ña tachi ndivaha nuú ñayivi ñuyíví.

²² Jáchi ñayivi Israel cáchi na ña ndúsa cuni na ña xituhún ndivaha já cuu cándúsa na tuhun vaha saha Jesús. Ta na tóho, na ñuu Grecia cúní na ña ná cahan ndíchí ndivaha ñayivi xihín ná já cuu cándúsa na ña. ²³ Joo mé nde xíca nuu nde cáxi tuhun nde nuú ñayivi sahá Jesucristo, mé a naxihí ndica crúxu saha ñayivi. Joo tá xini joho na Israel ña yóho já ndíhíhví na. Ta tá xini joho na tóho ña yóho já cáhan na ña cúu á ña tóntó ndi-

vaha. ²⁴ Joo tóco ndihi na ñacaxi Ndióxi cacuu na cuéntá mé á, á cúu ná na tóho á cúu ná na Israel, cándaa ini na ña cáhan nde sahá Jesucristo, ña iin ndée mé á jácaacu a ñayivi. Ta xini vaha na ña ndíchí ndivaha jini mé á ñacaja Ndióxi. ²⁵ Nuú ñayivi ñuyíví ña cája Ndióxi cúu á ña tóntó ndivaha. Joo ña cája Ndióxi cúu á ña ndíchí chága nu ndíhi ñaha cája ñayivi ñuyíví. Ta vatí cáchi ñayivi ña co ndíyahvi ña naxihí Jesucristo ndica crúxu joo yahvi chága ña yóho a juú ga inga ñaha cuu caja ñayivi. ²⁶ Candehé ndo, ñani i, na cúu cuéntá Jesús. Ñacaxi Ndióxi ndohó cacuu ndó cuéntá mé á vatí chá cuití ndó cúu ndó na ndíchí jini nuú ñayivi ñuyíví. Ta chá ndó cúu ndó na náhnu nuú ñayivi ta chá cuití ndo cúu ndó na cuicá. ²⁷ Joo ñacaxi Ndióxi ñayivi, na cáchi ñayivi ñuyíví cúu ná na tóntó jini já queá ná cacahan nuú na ndíchí jini. Mé Ndióxi ñacaxi a ñayivi vitá ná cacuu na cuéntá mé á já ná cacahan nuú na náhnu ndúu ñuyíví yóho. ²⁸ Ñayivi, na coó saha ñuyíví yóho, na quehe núu ñayivi saha, na cán cúu na ñacaxi Ndióxi. Ta ñacaxi a na co ndáyahvi toho ñuyíví yóho ña ná nuu ndáha na náhnu cuéntá ñuyíví yóho. ²⁹ Ta xihín ña yóho cándaa ini ñayivi ña a cúu ndínehe jícó na mé ná nu Ndióxi. ³⁰ Mé Ndióxi queá ñacaja ña ná in ndúu xihín Jesucristo. Ta ñacaja mé á ña ná ndindíchí jini yo. Ta ñacaja mé á ña ná canduu ndaa yó nu Ndióxi. Ñacaja mé á ña ná ndúu ñayivi yii, na cúu cuéntá mé á. Ta mé á ñajácaacu a mí nuú cuachi. ³¹ Ta já cáchi tuhun Ndióxi já: “Ndá na cúní caja lándaa, xini ñúhú caja lándaa na saha ña náhnu ñacaja Ndióxi saha ná.”

Cáxi tuhun Pablo ña naxihí Jesucristo ndica crúxu saha cuachi ñayivi

2 Candehé ndó, ñani i, na cúu cuéntá Jesús. Tá nasahan i nacahan i ña ndaa cuéntá Ndióxi nu ndo, coó nacahan

ĩ ña xihín tũhun ndíchí ñuyíví yóho. ²Joo nasacu ini ĩ caħan ĩ sahá Jesucristo cuití va tañu ndó, mé a ñaxihí ndica crúxu. ³Tá nasahĩin ĩ tañu ndó, coó ñandiñehe jícó ĩ mí ĩ. Ña ñacaja ĩ queá yíhví yíhví cúú u andá quíji ñinu ĩ. ⁴Ta tá ñacasáhá ĩ cáxi tũhun ĩ tũhun vaħa sahá Jesucristo nu ndo, coó toho tũhun ndíchí ñacaħan ĩ xihín ndo ña ná cava ĩ jini ndó xihín á, vaħa. Ña ñacaja ĩ queá ñacaħan ĩ xihín ndo xihín ndée ĩnima yii Ndióxi ta mé a najáxinu a ini ndó xihín ndée mé á. ⁵Já queá ná candaá ini ndó ña Ndióxi queá cája ña ná candeé ini ndó mé á xihín ndée mé á. Ta co cúú á sahá ña ndíchí quíxi jini ñayivi ñuyíví yóho.

Ínima yii Ndióxi cája ña ná candaá ini ñayivi saħa mé á

⁶Joo tá ndítuhún nde xihín ña sa candaá vaħa ini ñaha Ndióxi já caħan nde tũhun ndíchí xihín ná. Joo co caħan nde tátũhun caħan ta ndíchí ndúu ñuyíví yóho. Ta ni co cúú á tátũhun ña caħan da ndíchí, da cómí cuéntá sahá ñuyíví yóho. Jáchi yachí ndihi sahá ña cán. ⁷Ña caħan nde cúú á ña ndíchí cuéntá Ndióxi. Ta cúú á ña nasahĩin jehé, ña co xini ñayivi saħa janda tá cámaní cava sahá saħa ñuyíví. Jáchi janda mé tiempo já nasacu ini Ndióxi ndá quiahva cava jácaçu a mí andá ama cáa quívi. ⁸Ta ni in túhún ña náhnu cómí cuéntá sahá ñuyíví yóho co candaá ini na ña nasacu ini Ndióxi jácaçu a mí. Jáchi tá ná candúsa na ña já queá a cáta caa toho na Jesucristo, xitoho í ndica crúxu, nduu. Jáchi mé Jesucristo cúú á ña cáhnu ndivaħa. ⁹Ta já cáchi tũhun Ndióxi já: Ni in túhún ñayivi a ñaha cuni na ta a ñaha cuni joho na, ta ni a ñaha cahvi ini na, ndá quiahva ĩn ña náhnu sácú ini Ndióxi quiahva nuú ñayivi tá quíhví ini na mé á, cáchi tũhun Ndióxi.

¹⁰Ñacaja ínima yii Ndióxi ña ná candaá ini tóco ndihi ña yóho. Jáchi ínima yii mé á sándehe a tóco ndihi ñaha ta xini a janda ña cáhvi ini mé Ndióxi.

¹¹Ni in túhún ñayivi co xini ña ña cáhvi ini inga na. Ínima in in na cuití va xini a ña cáhvi ini in in na. Quiahva já ĩn ri xihín Ndióxi va. In túhún ínima yii mé á xini ndía cáhvi ini a. ¹²Nasahan Ndióxi ínima yii mé á nu yo ta co cúú á tátũhun ínima ñayivi ñuyíví. Ta ñacaja mé á ña ná candaá ĩn ndaja ĩn ña náhnu saħan mé á nu yo. ¹³Ta tá caħan nde sahá ña yóho, caħan nde tá quiahva najánaha ínima yii Ndióxi nuú nde. Ta co caħan nde ña xihín tũhun ndíchí ñacatiahva nde ñuyíví yóho. Quiahva já ndícani nde ñaha Ndióxi xihín ña ñúhu ínima yii Ndióxi ini.

¹⁴Tóco ndihi ña yóho cúú á ña tóntó ndivaħa nuú ñayivi, ña co ñúhu ínima yii Ndióxi ini. Co ndíquehe vaħa na ña ta ni a cúú candaá ini na ndaja ĩn a jáchi ña ñúhu ínima yii Ndióxi ini, ña cán cúú ndusa ña candaá ini ñaha Ndióxi. ¹⁵Joo ña ñúhu ínima yii Ndióxi ini, ña cán cúú ña candaá ini ndá ñaha cúú ña vaħa ta ndá ñaha co cúú toho ña vaħa. Ta xihín ña yóho cátontó ñayivi ñuyíví jáchi co candaá ini na ña cúú cuéntá Ndióxi. ¹⁶Jáchi cáchi tũhun Ndióxi: “Ni in túhún ñayivi a cúú candaá ini na ña cáhvi ini Ndióxi, xitoho í. Ta ni in túhún ña a cúu cachí xihín mé á ña ndítahan nu á cava”, cáchi tũhun Ndióxi. Joo mí, ña cúú cuéntá Jesús, cáhvi ini tá quiahva cáhvi ini Jesucristo jáchi ñúhu ínima yii Ndióxi ini mí, ña cúú cuéntá mé á.

Ña cája chúun cuéntá Ndióxi

3 Candehé ndó, ñani ĩ, ña cúú cuéntá Jesús. Coó ñacuu caħan ĩ xihín ndo tá quiahva caħan ĩ xihín ña ñachutú ndaa xihín ínima yii Ndióxi. Jáchi mé ndó cúú ndó tátũhun lee loho ña chíchi jáchi a ñaha cuahnu ndó xihín tũhun

Ndióxi jáchi cája ndó ña xíca ini yiquí cuñu ndó caja tá quiahva cája ñayivi ñuyívi. ²Sahá ña cán queá tá najánaha i tuhun Ndióxi nu ndo, coo ñacuu jánaha i ña ihvi chága nu ndo jáchi a cúu candaa ini ndó ña. Ña ñacaja i xihin ndo queá ñasahan i tátuhun leche nu ndo jáchi cúu ndó tátuhun na valí chíchi sahá ña a cúu cuxu ndó ñaha vee. Ta janda viti co fin tiahva ndó jácuaha ndó ña ihvi chága cuéntá tuhun Ndióxi. ³Jáchi cúu yii va ndó tátuhun ñayivi ñuyívi. Ndaja táhan mé ndó cáhivhi ini xihin táhan ndó ta cáni táhan ndó ta sáhná java táhan ndó. Ta xihin ña yóho cája ndó ña cúni mé cuití ndo tá quiahva cája ñayivi ñuyívi. ⁴Java ndó cáchi ndo ña cúu ndó cuéntá yehe, da cúu Pablo. Ta java ndó cáchi ndo ña cúu ndó cuéntá Apolos. Ta xihin ña yóho sáhná java táhan ndó ta náha ndó ña cája ndó tá quiahva cája ñayivi ñuyívi.

⁵Ndá da cúu Apolos xihin yehe ña ná cani táhan ndó sahá nde. Co ndítahan caja ndó já jáchi mé nde cúu nde da xíca nuu cája chúun cuéntá Jesucristo, xitoho í cuití va. Ta sahá chuun cája nde yóho ñacuu ñacandúsa ndó mé á. Ta ña yóho cúu chuun ñanaha Jesucristo, xitoho í nuu yehe xihin nu Apolos caja nde. ⁶Ña ñacaja nde cúu á tátuhun ña cája na tá xútu na. Ta yehe cúu u tátuhun da ñachihin tata jáchi ñacaxi tuhun i tuhun Ndióxi nu ndo. Ta Apolos cúu dá tátuhun da ñaxojo ticuí nuu a cán jáchi najánaha chága da tuhun Ndióxi nu ndo. Joo Ndióxi queá ñacaja ña ná cuahnu a jáchi cája mé á ña ná cuu cuahnu ndó xihin tuhun mé á. ⁷Sahá ña cán queá vatí yehe cúu u da ñaxutu ta Apolos cúu dá da ñaxojo ticuí joo ni in túhún nde coo saha. Cáhnú cúu Ndióxi jáchi mé á queá ñacaja ña ná cuahnu mé tata ñaxutu nde cán. ⁸Xíní ñúhú candaa ini ndó ña in cúu va na chíhin tata xihin na xójo ticuí nu á. Ta tá in tá in chuun ñacaja

in in na cán quehe na yahvi saha. ⁹Yehe xihin Apolos in cúu nde cája chúun nde cuéntá Ndióxi. Ta mé ndó cúu ndó tátuhun in yójo nuu nasacu Ndióxi ndehe caja chúun nde cuéntá mé á.

Ta jári cúu ndó tátuhun in vehe ña cávaha Ndióxi. ¹⁰Ta yehe cúu u tátuhun da cávaha mé vehe yóho. Ta mé Ndióxi queá ñasahan ñamaní nuu i ña ná taán i yuu ndúhu sahá ta ná jácava sahá i ña. Ta inga na xíní ñúhú caja chúun xihin á. Joo ndítahan candehé vaha na ndaja caja na chuun yóho. ¹¹Jáchi in túhún Jesucristo cúu á tátuhun yuu ndúhu sahá vehe yóho. Ta ni in na a cúu tavá xóo na ña ta já cacu na inga ñaha. ¹²Mé na cávaha vehe nuu yuu ndúhu yóho cuu jáxinu na ña xihin jiuuhun cuáán ta cuu caja na ña xihin jiuuhun cúxú ta cuu caja ri na ña xihin yuu ñúhí. Ta jári cuu caja na ña xihin yíto ta cuu caja ri na ña xihin xehe ndiyoho ta janda xihin toñamá cuu caja na ña. ¹³Joo vaxi quivi quixi tucu Jesucristo coto ndojó mé á chuun ñacaja in in ñayivi cuéntá mé á. Cacuu a tátuhun coto ndojó a ña xihin ñuhú cáyi já queá ná ñaha nu á, á ndihi sahá, á co ndíhi sahá. Ta xihin ña yóho ñaha nu á, á vaha ñacaja chúun ñayivi cuéntá mé á, á a váha toho ñacaja na. ¹⁴Ta tá coo ñandíhi sahá ña ñacaja na cán já queá chahvi Ndióxi na sahá chuun ñacaja na. ¹⁵Joo tá ná cayi ña ñacavaha na cán já ndíhi saha tóco ndíhi chuun ñacaja na vatí mé ná cacu ndaa ínima ná. Ta ña yóho cacuu a tátuhun tá jácacu in dataa mé dá tá quéta da ini in vehe tá cáyi a xihin ñúhu ita.

¹⁶Á co xíní ndó ña cúu ndó tátuhun veñuhu Ndióxi tá ndacaan ínima yii mé á ini ínima in in ndó. ¹⁷Ta ndá na ná jándíhi na sahá veñuhu Ndióxi yóho já queá jándíhi Ndióxi sahá na cán. Jáchi yii ndivaha veñuhu Ndióxi. Ta mé ndó cúu ndó tátuhun veñuhu Ndióxi cáhan i saha jan.

¹⁸ Candehé ndo. Ndá ndó cáhán ña cúu ndó na ndíchí jiní sahá ña xíní ndó ñaha ñuyíví yóho, xíní ñúhú candaa ini ndó ña cúu á tátuhun jándahvi ndó mé ndó. Xíní ñúhú ndaja ndó mé ndó tátuhun na co xíní já queá ná nuná nu Ndióxi já-ñaha nu ndo ndaa cúu ndusa na ndíchí jiní. ¹⁹ Jáchí ña ndíchí quíxi jiní ñayivi ñuyíví cúu á ña tóntó ndivaha nu Ndióxi. Já cáhí tuhun Ndióxi já: “Ña cája mé á queá ná cachihin saha ná xihín ña ndíchí quíxi jiní mé va na.” ²⁰ Quiahva já cáhí ri tuhun Ndióxi: “Cándaá cáxi ini Ndióxi ña coó sahá ña cáhvi jiní na ndíchí ndúu ñuyíví yóho”, já cáhí tuhun Ndióxi. ²¹ Sahá ña cán queá ni in túhún ñayivi co ndítahan ndínehe jícó na mé ná sahá ña tiahva in ñayivi ñuyíví yóho cája na. Xíní ñúhú ndicuhun ini ndó ña nasahan Ndióxi tóco ndihi ñaha nu ndo. ²² Nandiquiahva mé á ndehe, da cúu Pablo xihín Apolos xihín Pedro nu mé ndó já ná cuu jáñaha nde tuhun Ndióxi nu ndo. Nasahan mé á ñuyíví yóho nu ndo já ná cuu catacu ndó. Ta nasacu ini mé á quívi quivi ndó ta já tandaa quívi cuhun ndó coo ndó xihín mé á. Tóco ndihi ña yóho nasahan Ndióxi nu ndo. ²³ Ta mé ndó cúu ndó cuéntá Jesucristo ta Jesucristo cúu á cuéntá Ndióxi.

Ndicani Pablo ndaja fin chuun cája na apóstol

4 Co ndítahan toho ndaja cáhnu ndó ndehe. Xíní ñúhú quehe ndó cuéntá ña natahnda chuun nuú nde caja chúun nde cuéntá Jesucristo jáñaha nde ña coó nasaxiní ñayivi jihna, ña nasacu ini Ndióxi caja. ² Ta ndá da ndíquehe in chuun, xíní ñúhú ñaha da ña mé a ndaa cuu candee ini na da, ña mé a ndaa caja tá caja da chuun natahnda nu dá caja da. ³ Ta cája i cuéntá nacaja vaha i chuun nasahnda Ndióxi nuú i caja i. Sahá ña cán queá co sáhní toho i mí i tá chícaan ndó cuachi jatá i. Ta co ndicani ini i tá

java ga ñayivi chícaan na cuachi jatá i. Jáchí cája i cuéntá coó toho cuachi nacaja i. ⁴ Tá ná cachi i xihín ndo ña coó toho cuachi nacaja i, co cúní cachi i ña mé a ndaa co ndójo ga i cuachi. Jáchí xíní vaha Jesucristo, xitoho i á nacaja vaha i á coó nacaja vaha i. ⁵ Sahá ña cán queá co xíní ñúhú ndihi ini ndó candehé ndaa ndó ñayivi. Xíní ñúhú candati ndó janda quiahva ná quixi Jesucristo caja ví mé á sahá ñayivi já ná nditívi ña ñúhu ínimá in in ñayivi. Ta xihín ña yóho cuni tóco ndihi ñayivi ña cáhvi ini na. Anda jáví ndaja cáhnu Ndióxi na nacaja vaha.

⁶ Candehé ndo ñani i, na cúu cuéntá Jesús. Sahá ña cúní nde ña ná candaa ini ndó ndía ndítahan caja ndo sahá ña cán queá ndicani i nu ndo saha Apolos xihín saha mí i. Jáchí fin in tuhun ta cáhí a ña co ndítahan nu ndó caja cáhnu ndó in ñayivi nani quehe núu ndó inga na. Ta xihín ña yóho cuu candaa ini ndó ña co ndítahan ndínehe jícó ndo mé ndó sahá ña cúu ndó cuéntá in da jáchí xihín ña yóho jánuu ndáha ndó inga na táhan nde. ⁷ Jáchí ni in ndó co cúu ndó na náhnu chága a juú ga inga na. Xíní ñúhú candaa ini ndó ña tóco ndihi ña cómí ndo cúu á ña nasahan Ndióxi nu ndo. Sahá ña cán queá co ndítahan caja cáhnu ndó mé ndó sahá ña ñahehe táhvi ndo nu Ndióxi.

⁸ Cáhán ndo ña ni in ñaha co ndímaní nu ndo joo co cúu á ña ndaa. Cáhán ndo ña cúu ndó na cuicá joo co cúu á ña ndaa. Ta cáhán ndo cúu ndó na cómí cuéntá sahá ñayivi joo co cúu á ña ndaa. Cája ndó tátuhun co xíní ñúhú toho ndó ndehe. Vá ná cacomí ndusa ndó cuéntá sahá ñayivi já ná cacomí ri ndehe va cuéntá saha ná xihín ndo. ⁹ Cúu á tátuhun nasacu Ndióxi ndehe, na cúu apóstol janda nu ndíhí. Cúu nde tátuhun na ndicuíta yíco cuhun quivi. Ta jandá joho sándehe ñayivi ñuyíví ndehe ta sácu ndaa na ndehe. Ta janda mé tá-

to Ndióxi sándehe nã ndehe cuahan nde. ¹⁰ Sahá ñã quíhvi ini nde Jesucristo cúu nde tátuhun ñayivi tóntó ndivaha nuú ñayivi ñuyívi. Joo mé ndó nandaja ndó mé ndó tátuhun nã xíní ndivaha saha mé á. Mé nde cúu nde tátuhun ñayivi vitá nuú ñayivi ñuyívi joo cája ndó tátuhun na ndacú ini. Ndája cáhnu ñayivi ñuyívi mé ndó nani quehe núu na ndehe. ¹¹ Ta janda viti ndóho tá ndóho ini nde. Java tañu coó ñã cuxu nde ta coó ticuíf coho nde ta ni jáhma candixi nde coó. Ta janda joho cája xíxi ñayivi xihín nde. Ta ni vehe nde coó. ¹² Ta a juú quiahva ndúcú ndéé nde cája chúun nde catacu nde. Ta tá chícãan ñayivi cuachi jatá nde já xíca tahví nde nu Ndióxi ñã ná caja mé á ñamaní xihín ná. Ta cája ndeé ini nde tá cája xíxi nã xihín nde. ¹³ Ta vitá cãhan nde tá ndúcú ñehe nde tuhun nuú ñayivi vatí cãhan núu na sahá nde. Mé nde cúu nde tátuhun xehe nuú ñayivi ñuyívi. Ta cája na xihín nde tá quiahva cája na xihín ñaha coó saha, ñã ñacandoo cuhun cuíta. Ta quiahva já cája na xihín nde janda viti.

¹⁴ Xíní ñúhú candaã ini ndó ñã co cáhyí i ñã yóho nu ndo sahá ñã cúní jácãcãhan i nuu ndo. Cáhyí i ñã nu ndo jáchi cúu ndó tátuhun jahyi i. Ta jãnaã i ñã nu ndo tá quiahva cája in dataa xihín jahyi da jáchi quíhvi ini i ndóho. ¹⁵ Jáchi vatí ná coo uxu mil ñayivi jãnaã na ndóho sahá Jesucristo joo in túhún yehe cúu tátuhun tátá ndo. Jáchi yehe cúu u da ñacãhan tuhun vaha sahá Jesucristo nu ndó nu cuítí ta já ñacandee ini ndó mé á. ¹⁶ Sahá ñã cán queá xíca tahví i nu ndó ñã ná caja ndó tá quiahva cája i.

¹⁷ Sahá ñã cán queá chindahá i Timoteo nu ndo jáchi cúu dá tátuhun jahyi maní i ta cája chúun da cuéntá Jesucristo, xitoho í xihín ndinuhu ini da. Ta jándicuhun ini da ndóho ndá quiahva cája i tañu nã cúu cuéntá Jesús ta ndá quiahva jãnaã i nu ná ndijáá veñuhu

nu xíca i cuahan i. ¹⁸ Java ndó ñacasáhá ndo cája lãnda ndó jáchi cáhan ndo ñã a sãa ga i coto nihni i ndóho. ¹⁹ Joo yachi saa i coto nihni i ndóho tá cúní Ndióxi. Andã já candehé e, á mé a ndaa ñin ndee Ndióxi ini nã xíca cája lãnda jan á yúhu uun na cãhan nã. ²⁰ Tá mé a ndaa cómí Ndióxi cuéntá sahá in ñayivi já queá ñin ndee mé á ini na caja na ñã cúní mé á. Ta coó saha toho a á tãhva ndivaha na cãhan nã. ²¹ Ta viti cachi ndó xihín i ndíã queá catóó chága ndo. Á catóó chága ndo ñã ná saa i jãnani i ndóho sahá ñã cája ndó ñã núu. Á catóó chága ndo ñã ná saa i ta víí víí cãhan i xihín ndo jáchi najãndacoo ndó ñã núu cája ndó. Ndíã cúní ndó.

Cãhan Pablo sahá in da ñin xihín nãná queén da

5 Sa ñãñehé e tuhun ñã ñin in da cúu cuéntá Jesús tañu ndó jan ta ñin da xihín nãná queén da. Ta ñã yóho cúu á in cuachi cáhnu ndivaha. Ta ni ñayivi ñuyívi co cája ñã yóho. ² Ta vatí ñin cuachi cáhnu yóho tañu ndó joo cáa ga ri ndóho cája cáhnu ndó mé ndó. Xíní ñúhú cacuéha ini ndó sahá ñã yóho. Ta xíní ñúhú tavá ndó da cája cuachi yóho tañu ndó jan. ³ Vatí co ñin i xihín ndo jan joo ndícãni ndivaha ini i sahá ñã cúu jan. Ta cúu á tátuhun ñin i xihín ndó jan ñã cán queá sa ñasacu ini i ñã xíní ñúhú caja ndó xihín da cája cuachi jan. ⁴ Já-taca táhan ndihi ndó nã cúu cuéntá Jesucristo, xitoho í. Ta mé a cán quiahva ndee á nu ndo caja ndó ñã cúní mé á. Ta cacuu a tátuhun coo i xihín ndó jan. ⁵ Andã já xíní ñúhú ndiquiahva ndó da jan ndãha tiãhá saçuãha já ná jãndoho rí ini yiquí cuñu da viti ta já ná cuu cacu ndaa ínima dá tá ná xinu coo quívi quixi tucu Jesucristo.

⁶ Co ndítahan caja lãnda ndo sahá ñã cája ndó. Xíní ñúhú ndicuhun ini ndó in tuhun ñã cáchi já: “Chá cuití yúsa

naxaa játiví ndihi a java yúsa ña íin vaha.”⁷ Xíní ñúhú tavá ndo da jan tañu ndó jáchi cúú dá tátuhun yusá naxaa, ña játiví ña íin vaha. Ta xihín ña yóho quee ña núu veñuhu nu táca ndó jan jáchi sahá da jan cuu caquini inga na ta caja na cuachi. Xíní ñúhú canduu víi ndo tátuhun mé pan xíxi na vicó pascua jáchi coó yusá naxaa ñúhu xihín á. Ta Jesucristo nasacua a tátuhun in ndicachi, rí najoco na nu Ndióxi vicó pascua sahá cuachi ñayivi jáchi naxihí a ndica crúxu sahá cuachí já ná cuu cacu ndaa ínima yo.⁸ Sahá ña cán queá ndítahan cajíi iní sahá ña nacaja Jesucristo. Xíní ñúhú jándacoo í ña núu sa nacaja í jihna, ña cúú tátuhun pan naxaa. Ta xíní ñúhú caja í ña ndaa xihín ndinuhu iní. Ta ña yóho cúú á tátuhun pan ña coó nacava táhan yusá naxaa xihín.

⁹Nu carta natchindahá í nu ndó jihna ga, nacachi í xihín ndo ña ná a catáhan ndó xihín ñayivi, na ndúu xihín na co cúú yíí ná á ñájihí na.¹⁰ Tá nacachi í ña yóho xihín ndo co cúni cachi a ña xíní ñúhú tavá xoo ndó mé ndó chí in ndeé nuú ñayivi ñuyíví yóho jáchi a cuú quee ndó ñuyíví yóho cuhún ndo. Ta mé a ndaa ndúu cuahá na ñuyíví yóho cája na cuahá cuachi xihín yiquí cuñu na ta cátoó ndivaha na jihún ta cája cuíhná na ta cája cáhnu na yoco.¹¹ Ña cúni cachi í xihín ndo queá co ndítahan catáhan ndó xihín na cáchí cúú cuéntá Jesús nani cája na ña núu xihín yiquí cuñu na, á tá cúú ná na cátoó ndivaha jihún, á tá cúú ná na cája cáhnu yoco, á tá cúú ná na tuhún, á tá cúú ná na xíhi, á tá cúú ná na cuíhná. Ta ni a cácoo ndó cuxu ndó xihín ná tá cája na ña yóho.¹² Co cáhan í sahá ñayivi ñuyíví jáchi co ndítahan nuú í caja víi í sahá ná. Joo ndítahan nu ndó candehé ndo ndaja cája na cúú cuéntá Jesús ndúu tañu ndó jan.¹³ Jáchi mé Ndióxi queá caja víi a sahá cuachi ñayivi ñuyíví. Ña cán queá

ndítahan nu ndó tavá ndó da cája cuachi tañu ndó jan.

Tá sácú saha táhan na cúú cuéntá Jesús nuú na jutixia

6 Tá co táhan ini ndó xihín ña cája ñani ndó, na cúú cuéntá Jesús co ndítahan nu ndó cuhún ndó cacu ndó saha ná nuú na jutixia, na co cúú cuéntá Jesús. Ña ndítahan caja ndó queá cáhan ndó xihín mé na cúú cuéntá Jesús ña ná caja víi na sahá ña co táhan ini ndó xihín jan.² Á co xíní ndó tandaa quívi caja víi na cúú cuéntá Jesús saha tóco ndihi ñayivi ñuyíví. Ta tá mé ndó cacuu ndó na caja víi saha tóco ndihi ñayivi ñuyíví, ndá cuéntá queá co cúni ndó caja víi ndó sahá ña válí cúu tañu mé ndó jan.³ Ña xíní ñúhú caja ndó queá nducú ndo caja víi ndo sahá ña cúu tañu ndó jan. Jáchi xíní ñúhú ndicuhún ini ndó ña janda táto Ndióxi caja víi yo saha.⁴ Sahá ña cán queá tá cáni táhan ndó sahá ñaha válí ñuyíví yóho co xíní ñúhú toho cuhún ndó cavií saha ndó nuú na co cúú cuéntá Jesús.⁵ Candehé ndó. Cáhan í ña yóho xihín ndo já ná cacahan nuu ndo. Á co íin in da tácu ini tañu ndó jan ña ná caja víi da saha ndó, vaha. Xíní ñúhú ndindita in da tácu ini já ná cuu caja víi da sahá ña cúu tañu ndó jan.⁶ Joo ña cája ndó queá cáni táhan ndaja táhan mé ndó ta já ndaca táhan ndó cuahan ndó cavií saha ndó nuú na co cúú cuéntá Jesús. Co ndítahan toho caja ndó já.

⁷Sa cuachi cáhnu ndivaha queá cája ndó tá cáni táhan ndaja táhan mé ndó jan. Vaha ná caja ndeé ini ndó tá co cája vaha in na xihín ndo. Vaha ná caja ndeé ini ndó tá ná caja cuíhná na ñaha ndó. Jáchi co ndítahan cacu saha táhan ndó nuú na co cúú cuéntá Jesús.⁸ Joo ña cája ndó queá ña núu xihín ñani táhan ndó ta janda cája cuíhná ndo ñaha ñani ndó, na cúú cuéntá Jesús.

⁹Xíní ñúhú candaá ini ndó ña coó saha toho ñayivi cája ña núu jan cuhun na nuú cacomí Ndióxi cuéntá saha ná. A jándahvi ndó mé ndó jáchi na ndúu xihín na coo cúu yí ná á ñájíhí na a cùhun toho na nuú cacomí Ndióxi cuéntá saha ná. Ta ni na cája cáhnu yoco ni na ndúu xihín yí á ñájíhí inga na ta ni da cúu taa líhí a cùhun toho na nu Ndióxi. ¹⁰Ta ni na cuihná ta ni na cátóo ndivaha jihuún ta ni na xihí ta ni na ndahnda yúhu ta ni na jándahvi ñahá ta ni in táhan na yóho a cùhun toho na nuú cacomí Ndióxi cuéntá saha ná. ¹¹Ta táhan na yóho nasacuu ri java ndóhó va, nduu. Joo viti sa ñandaja víi Ndióxi ndohó ta ñacaxi a ndohó cacuu ndó cuéntá mé á. Nanduu ndó ñayivi ndaa nu Ndióxi sahá ña ñacaja Jesucristo, xitoho í ta sahá ña cája ínimá yíi Ndióxi.

Xíní ñúhú candaá í yiquí cuñu í jáchi cúu á ña yíi

¹²Ndúu java ñayivi ta cáchí na ña núná nu ná caja na ña cúní mé va na. Vatí mé a ndaa núná nu ná caja na ña cúní mé ná joo xíní ñúhú candehe na á vaha, á a váha ña cája na. Jáchi mé a ndaa núná nu yo caja í ña cúní mí joo co ndítahan quiahva í ñamaní ña ná cahnu ña núu yiquí cuñu í. ¹³Ta cáchí na ña fin tixi yó sahá ña cán queá xíní ñúhú cuxú. Ta cáchí na ña xíní ñúhú cuxú jáchi fin tixí. Joo vaxi quívi jándihí Ndióxi saha ndíví ña yóho. Ta coó nasahan Ndióxi yiquí cuñu í nu yo ña ná caja í cuachi xihín á tátuhun ña ná coo í xihín na coo cúu ñájíhí yo á yí yo. Nasahan Ndióxi yiquí cuñu í nu yo já ná caja í ña cúní mé á. Ta ñacaja mé á ña ná cacomí a cuéntá saha yo. ¹⁴Ta tá quiahva ñacaja Ndióxi najánditacu a Jesucristo, xitoho í quiahva já caja ri a jánditacu a yiquí cuñu í xihín ndée mé á.

¹⁵Xíní ñúhú candaá ini ndó ña in cúu ndó xihín Jesucristo. Ta tá cuahan ndó

cája ndó cuachi xihín najihí xíca jii, cúu á tátuhun ñehe ndó Jesucristo cuahan cája ña núu. Co ndítahan caja ndó já. ¹⁶Sa xíní vaha ndó ña tá quíhvi nuu in dataa xihín najihí xíca jii já queá ndúu na tátuhun in víxí ñayivi. Jáchi cáchí tuhun Ndióxi já: “Tá ná ndique táhan in dataa xihín in ñañáha já queá ndúu na tátuhun in víxí ñayivi.” ¹⁷Ndá na ndiquiahva mé ndáha Jesucristo, xitoho í já queá in ndúu na xihín mé á jáchi ñúhu ínimá yíi Ndióxi ini na.

¹⁸Cama caxoo ndó nu tóco ndihí ña núu xíca ini yiquí cuñu ndó caja. Co ndítahan coo ndó xihín na coo cúu ñájíhí ndo á yí ndo jáchi ni in túhún toho cuachi coo cája quini ñahá xihín yiquí cuñu ñayivi tátuhun cuachi yóho. Jáchi ndá na fin xihín na coo cúu yí ná á ñájíhí na já queá cája na cuachi nuú yiquí cuñu mé va na. ¹⁹Xíní ñúhú ndicuhun ini ndó ña mé yiquí cuñu ndó jan cúu á tátuhun in veñuhu nu ndácaan ínimá yíi Ndióxi, mé a nasahan Ndióxi nu ndo. Ta viti yiquí cuñu ndó a juú ñaha mé ndó cúu á jáchi cúu á ñaha Ndióxi. ²⁰Jáchi yahvi ndivaha ñachahvi Ndióxi saha ndo tá ñaxihí Jesucristo ndíca crúxu. Saha ña cán queá ndítahan caja cáhnu ndó Ndióxi xihín yiquí cuñu ndó ta jári xihín ínimá ndo jáchi ndíví a cúu á cuéntá Ndióxi.

Tá tándaha ñayivi

7 Ta viti cúní nducú ñehé e tuhun nu ndo sahá ña ñandaca tuhún ndó yehe nu carta ñachindahá ndó nuú í. Cáchí í xihín ndó sahá da cámaní tandaha ña vaha cája da tá ná coo tacú da. ²Joo sahá cuachi cája ñayivi tá ndúu na xihín na coo cúu ñájíhí na á yí ná sahá ña cán queá vaha chága ná tandaha ná já ná coo ñájíhí in in taa ta jári najihí va ná coo yí in in na. ³Ta in dataa ndítahan ndiquiahva da mé dá nu ñájíhí da ta jári ñañáha ndítahan ndiquiahva ña mé ña nu yí ña jáchi quiahva já sáh-

ndá a coo a. ⁴Jáchì in ñãñáha, ñã ñã-tandaha cõ cómi ga ñã cuéntá saha mé ñã jáchì yí ñã cúu da cómi cuéntá saha yiquí cuñu ñã. Ta ni in dataa, da natan-daha cõ cómi ga da cuéntá sahá yiquí cuñu da. Ñájíhí da cúu ñã cómi cuéntá sahá yiquí cuñu da. ⁵Sahá ñã cán queá ndítahan ndiquiahva nu táhan ndó ta a cándají táhan ndó. Ta tá cõ cúni ndó cuju xitáhan ndó xíní ñúhú cacuu a sahá ñã sa najándique táhan tuhun ndó ñã a cúju xitáhan ndõ sahá ñã cúni ndó ca-ca tahví ndó nu Ndióxi chá tiempo. Joo tá nandihí xíní ñúhú ndique táhan tucu ndó jáchì tiahva náa jácahan Satanás, mé tiñáhá sacuahá ndõhó ñã ná caja ndó cuachi sahá ñã a cuú cahnu ndó nuú ñã xíca ini yiquí cuñu ndó caja.

⁶Tócó ndihí ñã cahan i xihin ndõ yóho cõ cúni cachi a ñã xíní ñúhú tándaha ndõ vatí cuu tandaha ndõ tá cúni ndõ. ⁷Vatí mé a ndaa cájii íni i tá ná canduu tacú ndihí ndó tátuhun yehe. Joo sa jíin sa jíin nacaja Ndióxi xihín in in í. Java na ñéhe táhví ná tandaha na ta java na ñéhe táhví na canduu tacú na.

⁸Ndá na ndúu tacú xihin ndá na ndúu cuáan, ñã vaha chága queá ná a tándaha ná ta ná canduu na tátuhun yehe. ⁹Joo tá cõ ndeé ini na cahnu na yiquí cuñu na, vaha chága ná tandaha ná jáchì vaha chága ná tandahá ñayivi a juú ga ñã ná ndiava íni na coo na xihín na cõ cúu yíí ná á ñájíhí na.

¹⁰Ta nu ndóhó, na sa íin yíí á ñájíhí, sáhná i chuun nu ndó ñã ná a jándacoo táhan ndó. Ta ñã sáhná i nu ndõ yóho cõ cúu á ñã naquixi jini mí i. Cúu á ñã sáhná Ndióxi caja ndó. Cõ ndítahan nuú in ñãñáha jándacoo ñã yíí ñã. ¹¹Ta tá ná jándacoo ñã da, cõ ndítahan nu ñã tandaha ñã xihín inga da. Á tá cõ tá ñã ndítahan caja ñã queá ndique táhan maní tucu ñã xihín yíí ñã. Ta jári in dataa cõ ndítahan nu dá jándacoo da ñájíhí da.

¹²Íin java ga ñaha cúni cahan i xihin ndõ. Mí i cáhan i ñã vaha caja ndó ñã vatí mé a ndaa cõ cúu á ñã nasahnda Ndióxi nuú i jánaha i nu ndõ. Ta ñã yóho queá ñã cahan xihín ndõ: Tá íin in da cúu cuéntá Jesús ta íin ñájíhí da, ñã cõ cúu cuéntá Jesús. Ta tá cájii ini ñã coo ñã xihín dá já queá cõ ndítahan nu dá jándacoo da ñã. ¹³Ta tá íin in ñã cúu cuéntá Jesús ta íin yíí ñã, da cõ cúu cuéntá Jesús. Ta tá cájii ini da coo da xihín ñã já queá cõ ndítahan jándacoo ñã da. ¹⁴Jáchì cája yíí Ndióxi in dataa sahá ñã íin da xihín ñájíhí da, ñã cúu cuéntá Jesús. Ta jári cája yíí Ndióxi in ñãñáha sahá ñã íin ñã xihín yíí ñã, da cúu cuéntá Jesús. Jári cája yíí Ndióxi jahyi na yóho ná a cacuu na tátuhun na cõ xíní Ndióxi. Ta xihín ñã yóho cuu candaa ini na ndaja íin íchì cuéntá Jesús. ¹⁵Joo tá cúni yíí ndõ á ñájíhí ndõ, na cõ cúu cuéntá Jesús jan, quee na cuhun na já queá quiahva ndó ñamaní nu ná caja na ñã. Jáchì cõ ndítahan nu ndó caja ndúsa ndó xihín na cõ xíní Ndióxi cán ñã ná coo na xihín ndõ. Jáchì cúni Ndióxi ñã ná canduu víí ndõ. ¹⁶Ta ni cõ xíní ndõ á ndiquehe yíí ndó á ñájíhí ndõ íchì cuéntá Jesús, á a ndiquehe na ñã.

¹⁷Ta cáxi tuhun i nu tóco ndihí na cúu cuéntá Jesús ndúu ndijáa veñuhu ñã ndítahan coo na tá quiahva nasahin na tá nandihvi na íchì cuéntá Jesús jáchì quiahva já cúni Ndióxi. ¹⁸Ta tá naquihvi ndó íchì cuéntá Jesús ta sa ndácaan marca yiquí cuñu ndó cõõ caja toho a. Joo tá cõõ marca jan yiquí cuñu ndó cõ ndítahan chícacaa ndó ñã yiquí cuñu ndó. ¹⁹Jáchì cõõ caja toho a á íin marca yiquí cuñu ndó á cõõ a. Ñã cúni Ndióxi queá ná caja ndó ñã sáhná mé á nu ndõ caja ndó xihín ndinuhu ini ndó. ²⁰Ta ndítahan coo ndó tá quiahva nasahin ndó tá nandiquehe ndó íchì cuéntá Jesús. ²¹Ta tá nasacuu ndó na naxeen xitoho ndó caja chúun ndó tá nandiquehe ndó íchì

cuéntá Jesús já queá cō ndítahan ndicani ini ndó sahá. Joo tá ná quiahva xitoho ndó íchi nū ndó ña ná quee ndó cūhun ndo já queá caja ndó ña. ²² Jáchí dā cúú cuéntá Jesús cúú dá dā najaní Ndióxi nuú cuachi da vatí cándoo da cája chúun da cuéntá xitoho da, dā naxeen ñahá. Ta dā naxica núná mé tá nandiquehe da íchi cuéntá Jesús cúú dá mozo cuéntá Jesucristo. ²³ Jáchí yahvi ndivaha naxahvi Ndióxi saha ndo tá naxihí Jesucristo ndica cruxu ña ná cacomí a cuéntá saha ndo. Sahá ña cán queá a ndiquiahva toho ndó mé ndó ndáha ñayivi ña ná cahnu ña ndohó. ²⁴ Candehé ndo ñani mí i, ña cúú cuéntá Jesús. Ndítahan coo ndó tá quiahva nasahin ndó tá nacana Ndióxi ndohó cacuu ndó cuéntá mé á jáchí íin mé á xihin ndo.

²⁵ Ta viti cúní cahán i sahá ña tacú, ña cámani tandaha. Coó naxachi toho Ndióxi xihín i sahá ña yóho ña cán queá cahán i ña cáhvi ini mí i sahá. Ta cuu candúsa ndó ña cahán i xihin ndo jáchí nacaja Ndióxi ñamani xihín i ña cúú u in dā tácu ini. ²⁶ Ta cáhán i ña ndítahan coo tacú in dataa jáchí ihvi ndivaha cáa tiempo ndúú viti. ²⁷ Joo tá íin ñájíhí ndo, a jándacoo ndó ña. Ta tá coó ñájíhí ndo, a ndúcu ndó ña. ²⁸ Joo a juú cuachi queá cája ndó tá ná tandaha ndo. Ta ni a juú cuachi queá cája in ña tacú tá ná tandaha ña. Joo mé a ndaa ná cahán i xihin ndo, yáncá a tá ná tandaha ñayivi jáchí cuahá ndivaha ndoho ini na. Ta cō cúní ña ná ndoho ini ndó já sahá ña cán queá cahán i ña yóho xihin ndo.

²⁹ Candehé ndo ñani i, ña cúú cuéntá Jesús. Ña cúní cachi i cúú ña yóho: Sa nacayati tiempo quixi Jesucristo. Sahá ña cán queá ña íin ñájíhí xíní ñúhú ndíhi ini na caja chúun na cuéntá mé á tá quiahva cája chúun ña tacú cuéntá mé á. ³⁰ Ta ndá ña ndúu cuéha ndivaha ndítahan caja na tátuhun ña cájii ini. Ta ña cájii ini ndítahan caja na tátuhun

ñā ndúu cuéha ndivaha ini. Ta ña xéen ñaha ñuyiví yóho ndítahan caja na tátuhun naxeen na ña cō cúú ñaha na. ³¹ Ta ña cómí ñaha ñuyiví yóho, xíní ñúhú ndindójó ña sahá ñaha cán. Jáchí vaxi quiví ndíhi saha ñuyiví yóho xihin tóco ndíhi ñaha íin nu á.

³² Ña cúní yehe queá ña ná a ndícani nahá ini ndó sahá ñaha ñuyiví yóho. Jáchí tá cámani tandaha in dataa já queá núná nu dá caja chúun da cuéntá Ndióxi xihín ndinuhu ini da. Ta ndúcu dā ndá quiahva caja da ña cájii ini Ndióxi xihin.

³³ Joo dā sa natandaha ndítahan caja chúun da ñuyiví yóho já ná cana ña cuxu ña vehe da. Ta cája da ña cájii ini ñájíhí dā xihin. ³⁴ In dā natandaha cō xíní dā ndía ndíhi chága ini da saha, á Ndióxi á ñájíhí dā. Ta jári najíhí tá cúú ná ña tacú ndíhi ini na caja na ña cúní Ndióxi jáchí ndiquiahva na mé ná ndáha Ndióxi ña ná cacomí a cuéntá saha yiquí cuñu na ta sahá ínima ná. Joo najíhí ndúu yíi ndíhi ini na sahá chuun vehe na jáchí cúní ña ña ná tahan ini yíi ná xihin ná.

³⁵ Cahán i ña yóho xihin ndo jáchí cúní chindee e ndohó ta cō cahán i ña sahá ña cō cúní ña ná tandaha ndo. Ña cúní queá ná núná nu ndó caja chúun ndó cuéntá Ndióxi xihín ndinuhu ini ndó ta ná a cájii nuu ni in ñaha nu ndó caja ndó ña cúní Ndióxi.

³⁶ Ta ndá dā íin jahyi jíhí ta cáhán dā ña ndítahan tandaha ña jáchí sa cuahá cuja ña já cuu quiahva da ña ña ná tandaha ña tá cúní dā. A juú toho cuachi cúú ña yóho. ³⁷ Ta tá cáhán ndo ña cō ndítahan toho tandaha jahyi ndó ta cáhán ndo ña cájii ini ña ña coo mé ña já queá vaha va cája ndó tá cō cája ndúsa ndó xihin ña ná tandaha ña. ³⁸ Vaha cája in dataa tá sahan da ñamani nuú jahyi jíhí dā ña ná tandaha ña. Joo vaha chága cája da tá cō cája ndúsa dá xihin ña ña ná tandaha ña.

³⁹Ta a cuú tandaha in ñáñáha xihin inga dataa nani tácu yí ña. Joo tá naxihí yí ña já queá candoo núná nu ña tandaha tucu ña. Joo ndítahan tandaha ña xihín da cúu cuéntá Jesús. ⁴⁰Vatí cáhán i ña cajíi chága ini ña tá ná a tandaha tucu ña. Ña yóho queá cáhvi ini i sahá ña yóho. Ta ínima yíi Ndióxi queá jácahan yehe cáhí i ña yóho xihín ndo.

Cáhan Pablo sahá ña najoco ñayivi nuú yoco

8 Ta viti cúni ndicani i nu ndo sahá ña ndítahan cajú ndó xihín ña najoco na nuú yoco. Vatí cúu á ña ndaa tá cáhí java na ña xíní vaha na sahá ña yóho joo tá cáhán yo cúu yó na xíní vaha já queá cásahá yo ndínehe jícó yo mí. Joo tá quíhvi iní ñani táhan í já ndindacú chága yó xihín ñaha Ndióxi. ²Tá ndúu java na tañu ndó ta cáhán na ña sa xíní na ndaja táhan ñaha, na yóho náha ña cámaní cándaq ini na ña ndítahan cándaq ini na. ³Jáchí mé a ndaa xíní vaha Ndióxi ndá na cúu na quíhvi ini mé á.

⁴Ta viti cáhan i xihín ndo sahá ña najoco na nuú yoco. Cándaa cáxí ini ña coo a cúu toho yoco ndúu ñuyíví. Ta cándaq cáxí ini ña in táláa Ndióxi cúu ndusa Ndióxi. ⁵Vatí cáhí ñayivi ña ndúu cuahá ndiόxi ta ndúu cuahá xitoho indiví xihín ñuyíví ⁶Joo mí cándaq vaha iní ña fin in túhún Ndióxi, mé a cúu tátá yo. Ta mé á queá nacavaha tóco ndihi ñaha. Ta nacavaha mé á mí ña ná cajú cáhnu í mé á. Ta fin in túhún xitoho í ña cúu Jesucristo. Ta mé á queá cajú ña ná coo tóco ndihi ñaha ta cajú ña ná catacu mí viti.

⁷Joo a juú tóco ndihi na cúu cuéntá Jesús xíní ña yóho. Jáchí java táhan na sa cajú cáhnu yoco sanahá cán tá xíxi na ña najoco ñayivi nuú yoco cáhán na ña cúu á ña najoco na nuú java ndiόxi. Ta xihín ña yóho cáhán na ña cúu ná na sa nayuxu sahá ña naxixi na ña najoco

ñayivi nuú yoco. Ta co xíní na á ndítahan cajú na ña á co ndítahan cajú na ña. ⁸Cándehe ndo. Co ndíquehe toho Ndióxi mí sahá ña xíxi. Jáchí co cúu yó na in chága saha tá xíxi in ñaha. Ta ni co cúu yó na coo saha tá co xíxi ñaha. ⁹Joo xíní ñúhú candehé ndo ña ná a jándicava ndó inga na nuú cuachi saha ña cajú ndó jan. Jáchí vatí xíní vaha ndó ña cuu cajú ndó ña cán joo ndúu java na vitá cuahan íchí cuéntá Jesús. ¹⁰Cúu á tátuhun sácoo ndó cajú ndó nu cáyahvi ña najoco na nuú yoco jáchí sa xíní ndo sahá ña yóho. Ta nani in ndó xíxi ndó jan yáha in da cúu cuéntá Jesús, da vitá xihín ñaha Ndióxi. Ta sahá ña xíní da ndohó já quíhvi da jan xíxi da xihín ndo vatí cáhán da cúu á cuachi. ¹¹Xihín ña cajú ndó jan cuu jándicava ndó da vitá xihín ñaha Ndióxi cán nuú cuachi vatí xíní vaha ndó ña co cajú ndó cuachi tá ná cajú ndó ña najoco na nuú yoco. Xíní ñúhú ndicuhun ini ndó ña naxihí Jesucristo sahá da jan. ¹²Tá jándicava ndó ñani ndó, da vitá xihín ñaha Ndióxi cán nuú cuachi já queá cajú ndó cuachi nuú Jesucristo viti. ¹³Sahá ña cán queá tá ná jándicava i ñani i nuú cuachi sahá ña xíxi i cuñu, ña najoco na nuú yoco cajú i cuéntá a cúu ga i ña já ná a jándicava i inga da nuú cuachi.

Ña núná nuú in na apóstol cajú

9 Mé a ndaa yehe cúu u in apóstol cuéntá Jesucristo sahá ña cán queá núná nuú i cajú i ña cajú in apóstol. Jáchí mí i sa naxini i xihín nuú i Jesucristo, xitoho í. Ta mé ndó nandiquehe ndó íchí cuéntá mé á sahá chuun nacaja i ta ña yóho náha ña mé a ndaa cajú chúun i cuéntá mé á. ²Cajú i cuéntá ndúu java na ta co ndíquehe na yehe tátuhun in apóstol cuéntá Jesucristo. Joo ndóhó ndítahan ndiquehe ndó yehe jáchí nandu ndó cuéntá mé á sahá chuun nacaja i. Ta xihín ña yóho náha ña mé a ndaa cúu u in apóstol cuéntá mé á.

³ Ta ña yóho cúu tũhun ndúcu ñehe e nuú na cáhan núu sahá i jan: ⁴ Ín sahá i ña ná coto ndó yehe. ⁵ Ta tá ná coo ñájíhí i, ña cúu cuéntá Jesús íin sahá i candaca i ña caca nuu i tá quiahva cája Pedro xihín java ga na apóstol xihín ñani Jesucristo, xitoho í. ⁶ Á cáhan ndo ña in túhún yehe xihín Bernabé cúu nde da coó saha ña ná coto na cúu cuéntá Jesús ndehe, vaha. ⁷ Jáchí ni in túhún toho soldado co quehe da jiuhún mé dá ta já xito da mé dá. Jári ndá da xútu yitó uva, cuu caxí da uva cána nu dó cán jáchí já cáni a coo a. Ta jári ndá da ndáá ndicachi cuu coho da leche ndicachi ndáá da cán jáchí já cáni a coo a. ⁸ Ta a juú cahán ndo ña cáhan i ña quíxi jini mé cuití vi jáchí cáchí ley mé Moisés ña yóho viti. ⁹ Já cáchí a já: “A chícaun ñunu yuhú tĩndiqui nani cája chúun rí sání rí trigo. Joo xíní ñúhú quiahvún ñamaní nu rí caxí rí a”, cáchí tũhun Ndióxi. Joo co ndíhi ini Ndióxi sahá tĩndiqui cuití va. ¹⁰ Saha mí ví nacahyí Moisés ña yóho ta saha mí ví cáhan ña yóho tá cáchí a já. Cúu á tátũhun cája da xútu tátí xihín da jáquee tátí jáchí ndátí ndívi da ndiquehe da táhan numi cán saha ña nacaja chúun da xihín á. ¹¹ Tá nacahan nde tũhun Ndióxi xihín ndó já cúu á tátũhun nacihin nde tata cuéntá Ndióxi ini ínimá ndo. Sahá ña cán queá ndítahan nu ndo chindeé loho ndó ndehe xihín ña cómi ndo jáchí najánaha nde tũhun Ndióxi nu ndo. ¹² Ta mé a ndaa íin chága saha mé nde ña ná coto ndó ndehe a juú ga inga na.

Ta vatí ndítahan nu ndó coto ndó ndehe joo coó nacaja ndúsa nde xihín ndo ña ná caja ndó ña. Ta cuhá tañu cája ndeé ini nde jáchí co cúní nde caji nuu nde ña ná ndicuíta nuu tũhun vaha sahá Jesucristo. ¹³ Mé ndó sa cándaq vaha ini ndó ña núna nuú na cája chúun ini veñuhu cuxu na ña jóco ñayivi nu Ndióxi. Ta na cája chúun nu náa Ndióxi

veñuhu núna nu ná cuxu na cuñu quíti, rí najoco ñayivi nu Ndióxi. ¹⁴ Ta quiahva já cája chúun nde cuéntá Jesucristo, xitoho í cáhan nde tũhun vaha saha mé á. Ta nasahnda mé á chuun ña ná coto na cúu cuéntá mé á ndehe sahá chuun cája nde. ¹⁵ Joo ni in túhún tañu coó nacaja ndúsa i xihín ndo ña ná coto ndó yehe vatí cáni nu ndó caja ndó ña. Ta ni co cáhyí i carta yóho nu ndo já ná quiahva ndó ñaha nuú i, vaha. Jáchí mé a ndaa íin vaha ini i cáhan i tũhun Ndióxi xihín ndo ta coó caja toho a ña ná quivi i joco.

¹⁶ Yehe co ndínehe jícó i mí i sahá ña xíca nuu i cáhan i tũhun vaha sahá Jesucristo nuú ñayivi jáchí cúu á chuun ndítahan nuú i caja i. Ta ndáhví nahá nacuu u tá ná caja sáa ini i caxi tũhun i ña. ¹⁷ Tá ná cája i chuun yóho sahá ña cúní mí i cuití va já queá cuu quehe e yahvi sahá. Joo co cája toho i já jáchí nacaxi Ndióxi yehe cahán i tũhun mé á sahá ña cán queá ndúsa cája i ña. ¹⁸ Ta sa mé yahvi quehe e sahá chuun cája i queá cájii ini i tá cáhan i tũhun vaha sahá Jesús nuú ñayivi ta co cháhvi na sahá. Ta cájii ini i jáchí co cája ndúsa i xihín ndo ña ná coto ndó yehe tá quiahva cája ndó xihín java ga na cáhan tũhun Ndióxi xihín ndo.

¹⁹ Vatí mí i co cúu u mozo ñayivi joo cája chúun i mí i tátũhun mozo saha tóco ndíhi ñayivi. Jáchí cáxi tũhun i tũhun vaha saha Jesucristo nu ná já ná cuu ndicuaḥa chága na cúu cuéntá Jesús. ²⁰ Tá xíca nuu i tañu na Israel ndája i mí i tátũhun in da Israel jáchí ña cúní queá ná ndiquehe na íchí cuéntá Jesús. Ña cúní cachi i queá tá íin i tañu na cája ley Moisés in cája i xihín ná vatí co ndíco i íchí cuéntá ley Moisés viti. Joo cája i ña sahá ña cúní i ña ná ndiquehe na íchí cuéntá Jesús. ²¹ Ta tá xíca nuu i tañu na co cája ña sáhdá ley Moisés já cája i tá quiahva cája mé ná jáchí cúní ña ná ndiquehe na íchí cuéntá Jesús. Joo co cája i cuachi tá quiahva cája na cán

jáchí sáhndá ley Ndióxi chuun nuú i viti ta cája i ña cúní Jesucristo cuití va. ²² Ta tá xíca nuu i tañu na vitá xihín ñaha Ndióxi já queá jánuu ndáha i mí i jáchi cúní ña ná ndindacú na xihín tuhun mé á. Ña cúní cachi i xihín ndo queá ndája i mí i tátuhun ndá na ñacuu va jáchi cúní quee vaha i xihín ná já ná ndihvi na íchi cuéntá Jesús ña ná cacu ndaa ínimá ná. ²³ Cája i tóco ndihi ña yóho já queá ná ndicuíta nuu tuhun vaha cáhan sahá Jesucristo. Jáchi xihín ña yóho caja caha Ndióxi ñamaní xihín i.

²⁴ Candehé ndo. Sa xíní vaha ndó ña tá jáquehe táhan java ña tuhun da ña ná cunu da, mé a ndaa tóco ndihi da ndúcú ndéé da xínu da. Joo in túhún da quee vaha. Ta já quehe da ña ndítahan nu dá quehe da. Quiahva já ndítahan caja ri ndóhó va. Xíní ñuhú nducú ndo cuhún vaha ndó íchi cuéntá Jesús janda quiahva ná xínu coo ndó janda nu ndihí cuí já ná quiahva Ndióxi nu ndo ña ndítahan ndiquehe ndó. ²⁵ Tóco ndihi ñayivi tá cája tiahva na mé ná ña ná cuhún na cunu na, co cúní na caja na ndá ña ñacuu jáchi ndáa na mé ná. Tóco ndihi ña yóho cája na sahá ña cúní na quee vaha na ña ná ñehe ná in tiyivi ita sánúu jiní ná vatí cama chá íchi ita cán. Joo mí ndúcú ndéé yo cuahan yo íchi cuéntá Jesús jáchi ña ndátí mí quiahva Ndióxi nu yo co ndíhi saha anda ama cáa quivi. ²⁶ Joo co cúu u in da xínu cuáá. Ta ni co cúu u tátuhun in da jácana yiquí nuú tachi. Jáchi ndúcú ndéé e quee vaha i já ná ndiquehe e ña quiahva Ndióxi nuú i. ²⁷ Ña cája i queá cája ndúsa i xihín yiquí cuñu i ña ná caja i ña cúní Ndióxi. Jáchi a juú tiahva náá jándacoo Ndióxi yehe vatí mí i cúu u da najánaha tuhun Ndióxi nuú ñayivi.

Cáhan Pablo ña co ndítahan caja cáhnu na yoco

10 Candehé ndo ñani i, na cúu cuéntá Jesús. Co cúní ña ná ndindójó ndo ndá quiahva ñacaja Ndióxi sanahá xihín tásáhnu jícó yo tá ñasandaca mé á na yucú íchí cán. Ñacaja mé á ña ná xínu in vico núhú xoo nuú cuahan na ña ná candaca a na. Ta ñachindeé a na ña ná cuu cojo cava na tañuhú naní tañuhú cuáhá. ² Ta tóco ndihi na cán in ñandu ndihi na xihín Moisés tá ñayaha na tañuhú nani ndáca vico núhú na. Ñasacuu a tátuhun ñacandúta ná ña ná cacomí Moisés cuéntá saha ná. ³ Ta tóco ndihi na cán ñaxixi na ña ñachindahá Ndióxi, ña ñaquixi a nu ná chí indiví. ⁴ Ta quiahva já tóco ndihi na cán ñaxihi na ticuí, dó ñasahan mé á nu ná coho na. Mé ticuí cán cúu dó dó ñacana tixi in tóto. Ta mé tóto cán cúu á tátuhun yuhú nu Jesucristo, mé a ñasahin xihín ná nani ñaxica nuu na yucú íchí cán. ⁵ Joo cuahá ndivaha táhan na cán ñacaja na ña núu ña co cáji íní Ndióxi xihín. Sahá ña cán queá ñaxihi na mé yucú íchí nu xíca na cuahan na cán.

⁶ Tóco ndihi ña ñayaha yóho jáñaha nu mí ña co ndítahan ndiava iní ña co táhan ini Ndióxi xihín tá quiahva ñacaja na cán. ⁷ Sahá ña cán queá coto a juú caja cáhnu ndó yoco tá quiahva ñacaja java na cán jáchi já cáhí tuhun Ndióxi já: “Tóco ndihi ñayivi cán ñasacanduu na xíxi na ta xíxi na ta já ñandicuíta na xíta sáhá na ña cája cáhnu na yoco”, já ñacaja na cáhí tuhun Ndióxi. ⁸ Joo mí xíní ñuhú candaa í mí já ná a cája í cuachi ña quihvi nuu í xihín inga najihí á xihín inga dataa tá quiahva ñacaja java na cán. Ta sahá cuachi ñacaja na cán ñaxihi oco uní mil na in túhún quivi. ⁹ Ta co ndítahan nu yo coto ndojó yo Jesucristo, xitoho í ña ná candehé yo á mé a ndaa jándoho a iní sahá cuachi cája í.

Jáchí quiahva já nacaja java na cán va ta sahá ña cán naxihí na nacaja cuahá coo. ¹⁰ Coto a cáhan cuéhé ndó saha Ndióxi tá quiahva nacaja java tásáhnú jícó yo cán. Jáchí sahá ña nacaja na naxihí na nacaja táto Ndióxi, mé a xíca sáhní ñahá.

¹¹ Tóco ndihi ña nayaha xihín tásáhnú jícó yo cúu á ña náha nu yo ña co ndítahan quehe núu í Ndióxi. Ta nacahyi a nuú tuhun Ndióxi já ná cuni mí, yó ndúu tiempo yóho ña co ndítahan caja í tá quiahva nacaja na cán jáchí sa nacayati quívi ndihi saha ñuyivi. ¹² Ña cán queá tá cáhan ndo cuahan vaha ndó íchi cuéntá Ndióxi já queá xíní ñúhú candaa vaha ndó mé ndó já ná a ndícava ndó nuú cuachi. ¹³ Candehé ndo. Xíní ñúhú ndicuhun ini ndó ña a juú mé ndó cuití quixi tondóhó nuú jáchí quíxi tondóhó jan nu tóco ndihi java ga ñayivi. Ta ndítahan candee ini ndó Ndióxi jáchí a quiahva toho mé á ñamaní ña ná quixi tondóhó náhnú nu ndo ña co cándeé ndó xihín. Ña cája Ndióxi queá chindeé a ndohó tá ná quixi tondóhó nu ndo já ná cuu caja ndeé ini ndó tá ná ndoho ndó ña.

¹⁴ Candehé ndo ñani í, na cúu cuéntá Jesús. Xíní ñúhú jándacoo vaha ndó ña cája cáhnú ndó yoco. ¹⁵ Tá quiahva cáhan í xihín ñayivi tácu ini quiahva já cáhan í xihín ndo. Ta mé ndó cándaq vaha ini ndó á ndaa á a ndaa queá cáhan í xihín ndo. ¹⁶ Ná ndiquiahva í ndixahvi nu Ndióxi tá ndicuhun iní sahá ña nacaja Jesucristo tá naxihí a saha yo. Jáchí tá xíhí vino ña yíi já cúní cachi a ña in nanduú xihín mé á sahá ña naxita nii mé á ndíca crúxu saha yo. Ta jári tá xíxí pan ña yíi ña sáhná java nu táhan í cúní cachi a ña in nanduú xihín mé á jáchí nandiquiahva yiquí cuñu a saha yo. ¹⁷ Ta vatí cuahá ndivaha cúu yó joo in túhún pan sáhná java í xíxí jáchí xihín ña yóho náha ña in cúu ndihí xihín Jesucristo.

¹⁸ Xíní ñúhú candehé ndo ndá quiahva cája na Israel jáchí tá sáxí na cuñu quítí, rí najoco inga na nu náa cán já cúu á tátuhun mé ná nasahní na mé quítí cán ta najoco na rí. Quiahva já yáha xihín mé ndó tá sáxi ndó cuñu ña najoco na nuú yoco. Cúu á tátuhun najoco mé ndó ña. ¹⁹ Joo xíní ñúhú ndicuhun ini ndó tá cáhí í ña yóho xihín ndo co cúní cachi í ña ín sahá yoco. Ta ni co cúní cachi í ña ín chága sahá cuñu najoco na nuú yoco a juú ga inga cuñu. ²⁰ Ña cúní cachi í xihín ndo queá tá ná joco ñayivi, na co xíní Ndióxi jan in quítí nuú yoco cúu á tátuhun joco na jan rí nuú tiñáhá va. Ta co cája toho na ña nu Ndióxi. Ta cáxi tuhun í ña yóho xihín ndo já ná a cáxi ndó cuñu jan jáchí tá ná caxí ndó ña cacuu a tátuhun najoco rí ndóhó va ña nuú tiñáhá. ²¹ Jáchí a cuú cuhun ndo coho ndó ña najoco na nuú rí quini ta já quixi ndó coho ndó ña yíi cuéntá Jesucristo, xitoho í. Ta ni a cuú cuxu ndó ña najoco na nuú rí quini ta já cuxu ndó ña yíi, ña xíxi na tá ndicuhun ini na ña naxihí Jesucristo, xitoho í. ²² A cája ndó ña yóho jáchí cúu á tátuhun cúní ndó já-cojo ndó ini Ndióxi. Xíní ñúhú ndicuhun ini ndó ña co cúu ndó na ndacú chága a juú ga Ndióxi.

**Sahá ña quíhvi iní ñani táhan í
co ndítahan caja í ndá ña
nacuu cúní mí caja í**

²³ Ndúu java na ta cáhí na já: “Núná nu yo caja í ndá ña cúní mí caja í.” Vatí ña yóho cúu á ña ndaa joo a juú ndihi ña cája í cája vaha xoho. Mé a ndaa núná nu yo caja í ndá ña cúní mí joo co chindeé a mí cuahnu í xihín ñaha Ndióxi. ²⁴ Co ndítahan nu yo nducú yó ña vaha mí cuití yo. Ndítahan ndihi iní caja í ña vaha sahá ñani táhan í.

²⁵ Cuu caxí ndó ndijáa cuñu cáyahvi nuú yahvi ta a ndaca tuhún ndo ndájá naquixi a já ná a cáhvi ívi johó ini ndó

xihin á. ²⁶ Jáchí ñaha Ndióxi, xitoho í cúú ñuyiví yóho xihin tóco ndihi ña íin nu á.

²⁷ Candehé ndo. Tá ná cana in na co cúú cuéntá Jesús ndohó ña ná cuhun ndó cuxu ndó xihin ná, cuhán ndo tá cúní ndo ta cuxu ndó tóco ndihi ña sácú na nu ndó cuxu ndó. Ta a ndaca tuhún ndó ña á naquixi a nuú yoco. Cuxu ndó ña jáchí tá ná ndaca tuhún ndo na já cuu casahá ndicani ini ndó xihin á. ²⁸ Joo tá sa naçaxi tuhun yachi na xihin ndo ña cúú á cuñu najoco na nuú yoco já queá a cúxu toho ndó ña. Jáchí tá ná cuxu ndó ña já queá caja ndó ña ná a váha cuu ini mé na cán. ²⁹ Cahan i ña yóho jáchí cúní ña ná caja vaha ndó sahá inga na. Co çahan i ña saha mé ndó.

Mé a ndaa ndúu java ndó ta cahan ndo ña co ndítahan ndihi ini ndó sahá ña çahvi ini inga na jáchí cahan ndo ña núná nu ndó caja ndó ña cúní ndo. ³⁰ Ta java ndó cahan ndo ña tá sa nandiquahva ndó ndixahvi nu Ndióxi sahá ña xixi ndó já queá a cuú çahan núu ñayivi sahá ña caja ndó. ³¹ Joo cáchí i xihin ndó ña xíní ñúhú candehé vaha í ña caja í ná a jándicava í inga na nuú cuachi. Jáchí janda xihín ña xixí ta xihín ña xihí, xíní ñúhú caja cáhnu í Ndióxi. ³² Co ndítahan cacuú na jándicava inga ñayivi nuú cuachi jáchí tá caja í já cúú yó tátuhun yuu cándúhu jácachihin sahá ñayivi. A caja ndó já xihín na Israel ta ni xihín na tóho ta ni xihín na cúú cuéntá Jesús. ³³ Ta tóco ndihi ña caja i, caja i ña ná cajji ini ndihi ñayivi xihin. Ta co ndúcú u ña vaha mí i jáchí ndúcú u ña ná cajji ini ñayivi já ná cuu çacu ndaa ínimá ná.

11 Xíní ñúhú caja ndó tá quiahva caja yehe jáchí quiahva já caja i ña naçaja Jesucristo, xitoho í.

Ña ndítahan nuú najihí caja na tá caja cáhnu na Ndióxi

² Cájji íní i xihin ndo, ñani i, na cúú cuéntá Jesús. Jáchí ní tiempo ñúhu ini ndó sahá i ta caja ta caja ndó ña najána ña i nu ndo. ³ Joo cúní ña ná candaa ini ndó ña cúú Jesucristo jini nuú in in ña. Ta quiahva já in in ña cúú dá jini nuú ñájihí dá. Ta quiahva já Ndióxi cúú á jini nuú Jesucristo. ⁴ Sahá ña cán queá tá co cándaa in dataa yijini dá nani xíca tahví da nu Ndióxi á nani çahan da tuhun Ndióxi nu táca ñayivi já queá náha ña co caja cáhnu da Jesucristo, mé a cúú jini nuú mé dá. ⁵ Ta in ñañáha tá co chíjahvi ña jini ña nani xíca tahví ña nu Ndióxi á nani çahan ña tuhun Ndióxi nuú ñayivi veñuhu já queá náha ña quehe núu ña yí ña, da cúú jini nuú mé ña. Cúú á tá-tuhun najatá ña jini ña. ⁶ Jáchí tá co chíjahvi in ñañáha jini ña janda vaha chága ví ná jatá táhyí ña jini ña. Joo tá cahan ña ña quini canáha jini ña tá ná jatá táhyí ña jini ña já queá xíní ñúhú chijahvi ña jini ña. ⁷ Co ndítahan toho nuú in dataa chijahvi da jini dá veñuhu jáchí mé dá cúú dá da naçavaha Ndióxi xihín yuhú nuú mé á. Ta mé dá cúú dá da náha ndá quiahva cáhnu cúú Ndióxi. Ta náha in ñañáha ña yí ña cúú da jini nuú ña. ⁸ Jáchí xíní ñúhú ndicuhun ini ndó ña coo natavá toho Ndióxi lásá yiquí ndíca ñañáha já naçavaha mé á dataa, vaha. Ña naçaja mé á queá natavá a lásá yiquí ndíca dataa ta já naçavaha mé á ñañáha. ⁹ Jihna ñúhú naçavaha Ndióxi dataa ta já naçavaha mé á in ñañáha chindee ña da. ¹⁰ Ta sahá ña jihna ñúhú ga naçavaha Ndióxi dataa sahá ña cán queá ndítahan nuú in ñañáha chijahvi ña jini ña ná na ña ña nu táto Ndióxi ña mé a ndaa caja cáhnu ña yí ña. ¹¹ Joo mí, na cúú cuéntá Jesús ndítahan candaa íní ña xíní ñúhú táhan ña xihin náha. ¹² Vatí naçavaha Ndióxi ñañáha nuú cutí xihin lásá

yiquí ndícá d̄at̄aa joo viti tóco ndihi d̄at̄aa cácu da ñuyíví yóho cája najihí. Joo tóco ndihi ñayivi tácu na jáchi já cúní Ndióxi.

¹³ Mé ndó xíní ñúhú candehé ndó á vaha á a vaha toho ña ná a chíjahví in ñáñáha jiní ñá nani xíca tahví ña nu Ndióxi veñuhu. ¹⁴ Jáchi sa cándaqa vaha iní ña a vaha toho cája d̄at̄aa tá ñin nání ijí jiní dá. ¹⁵ Joo ndisáhnú náha ñáñáha tá ñin nání ijí jiní ña jáchi Ndióxi nasahan ijí jiní ná nu ña já ná chíjahví a jiní ña. ¹⁶ Joo tá ndúu java na ta co táhan ini na xihín ña cáhan i yóho já queá co cúní toho i nditúhún ihví i xihín ná sahá ña yóho. Jáchi xíní ñúhú candaa ini na ña ndijáá java ga na cúu cuéntá Jesús cája na tá quiahva cáhí i yóho tá táca na veñuhu.

Jánani Pablo na cúu cuéntá Jesús jáchi co cája ndisáhnú na tá táca na cajíni na ña yíi cuéntá Jesús

¹⁷ Ta ñin inga ñaha cúní cahan i xihín ndó saha ta co táhan ini i xihín á. Jáchi ñañehé e t̄uhun ña co cája vaha ndó tá táca ndó veñuhu. ¹⁸ Candehé ndó. Sa ñañehé e t̄uhun ña sáhná java táhan ndó tá táca ndó cája cáhnú ndó Ndióxi. Ta cája i cuéntá cándúsa i ña cáhí na saha ndó. ¹⁹ Vatí mé a ndaa náha xíca a ña ndítahan cahnda táhan ndó já ná cuu cuni ñayivi ndá ndó cúu ndusa cuéntá Jesús ta ndá ndó co cúu cuéntá Jesús. ²⁰ Ta sahá ña sáhná táhan ndó nu táca ndó jan, náha ña quehe núu ndó ña yíi xíjini ndó ta xihín ña yóho co cúu ga ña cuéntá Jesucristo, xitoho í. ²¹ Jáchi tá ndíndaa hora cajíni ndó tá in tá in ndó sa jihna ñúhú ndó ndáva ndó cuahan ndó quehe ndó ña cajíni mé cuití ndó. Ta java ndó ni co ñehé ndó ña cuxu ndó. Joo java ndó xíhi ndó janda jáxini ndó mé ndó. ²² Vaha chága ná cuxu ndó ta ná coho ndó vehe ndó a juú ga ña ná quixi ndó quehe núu ndó veñuhu Ndióxi. Ta a

vaha cája ndó jáchi co ñehé na ndahví ña cuxu na cája ndó ta xihín ña yóho cácahan nu ná. A cándati toho ndó ña cajíi iní i xihín ña cája ndó yóho jáchi a juú ña vaha queá cája ndó.

Ña ndítahan caja na cúu cuéntá Jesús Jesús tá xíjini na ña yíi cuéntá Jesús

(Mt. 26:26-29; Mr. 14:22-25; Lc 22:14-20)

²³ Ña jánaha i nu ndó yóho cúu ña najánaha Jesucristo, xitoho í nuú i. Jáchi mé nuú tá cámaní ndiquiahva na mé á ndáha na ihví a já ñatiin a in pan. ²⁴ Tá ñandihí ñandiquiahva ndixahví nu Ndióxi já nasahnda java ña ta já ñacachi a já xihín ná: “Mé pan yóho cúu á tátuhun yiquí cuñu i ña ndiquiahva i saha mé ndó. Xíní ñúhú caha ndó ña yóho ña ná ndicuhun ini ndó ña ñaxihí i saha ndó”, ñacachi Jesús. ²⁵ Ta tá ñandihí ñaxíjini na cán já ñatiin a in vaso nu ñúhu tó uva. Ta já ñacachi a já: “Dó ñúhu ini vaso yóho cúu dó tátuhun ní i, dó cuita saha ndó. Ta xihín dó yóho xinu coo nuú t̄uhun nasahan Ndióxi nuú ñayivi sanahá tá ñacachi a jácacu a ñayivi. Ndijáá tañu tá ná coho ndó mé tó uva, dó yíi ndítahan ndicuhun ini ndó ña ñaxihí i saha ndó”, ñacachi Jesús. ²⁶ Sahá ña cán queá ndijáá tañu tá táca ndó xíxi ndó pan ta xíhi ndó tó uva yóho cúní cachi a ña ndicuhun ini ndó ña ñaxihí Jesucristo, xitoho í saha ndó. Ta xíní ñúhú caha ndó ña janda quiahva ná quixi tucu mé á ñuyíví yóho.

²⁷ Candehé ndó. Tá ná cuxu ndó pan ta tá ná coho ndó tó uva, ña yíi cuéntá Jesucristo, xitoho í ta co ñin víi ínimá ndó já queá cája ndó cuachi nu mé á ta quehe núu ndó ña ñaxihí a ndíca crúxu saha ndó. ²⁸ Sahá ña cán queá tá cámaní casahá cajíni ndó ña yíi cuéntá Jesús xíní ñúhú coto ndojó jihna ndó mé ndó á víi ínimá ndó nu Ndióxi á coo víi a. ²⁹ Jáchi tá ná cuxu ndaja ñacuu ndó ña yíi cuéntá

Jesús já queá náha ña quehe núu ndó mé á. Jáchí ña xíxi ndó jan cúú á tátuhun yiquí cuñu mé á ta dó xíhi ndó jan cúú dó tátuhun ñi á. Ta tá ná quehe núu ndó ña já quixi ña ndoho ini ndó caja Ndióxi. ³⁰ Sahá ña cája ndó jan cuaha táhan ndó quíhvi ta cuaha ndó cávitá ndó ta andá java na sa naxíhi ná sahá ña naquehe núu na ña yíi cuéntá Jesús. ³¹ Joo tá ná coto ndojó yo mí ña á fin víi ínimá yo nu Ndióxi já queá a ndítahan toho nu mé a cúú xitoho í caja víi a sahá cuachí. ³² Joo tá jándoho mé á ini mí cúú á sahá ña co cúnj a ña ná ndoho iní xihín ñayivi ñuyívi tá ná xinu coo quívi caja víi mé a cúú xitoho í sahá cuachi nacaja na cán.

³³ Candehé ndo, ñani i, na cúú cuéntá Jesús. Ña ndítahan caja ndó cúú ña yóho. Tá ná nditaca ndó cajíni ndó ña yíi cuéntá Jesús xíní ñúhú candati táhan ndó jandá quiahva ná taca tóco ndihi ndó. ³⁴ Ta tá cuíco ndó já queá xíní ñúhú cuxu ndó vehe ndó já ná a jándoho Ndióxi ini ndó sahá ña cája ndó ña núu tá táca ndo cajíni ndó ña yíi jan. Ta caja víi i sahá java ga ñaha tá ná saá i coto nihni i ndohó jan.

Ña ñehe táhvi ñayivi nu ínimá yíi Ndióxi

12 Candehé ndó, ñani i, na cúú cuéntá Jesús. Cáhyí i ña yóho nu ndo jáchí cúnj ña ná candaa ini ndó ndaja fin ña sáhan ínimá yíi Ndióxi nu yo.

² Mé ndó sa cándaa vaha ini ndó ña tá cámaní ndiquehe ndó íchí cuéntá Jesús já nasacuu ndó tátuhun ñayivi cuáá jáchí nasanduu ndó ndáha tá nuú yoco, ña coo tachí cáhan. ³ Ta viti cúnj caxi tühún i xihín ndo ña ni in ñayivi a cuú chícaan na chahan jata Jesús tá ta ínimá yíi Ndióxi queá sáhan tühun nu ná cahan na. Ta tá cáchí na xihín ndinuhu ini na ña Jesús cúú xitoho na já queá náha ña

ínimá yíi Ndióxi queá sáhan tühun nu ná cahan na.

⁴ Cuahá nuú ñaha ñehe táhvi ñayivi caja na cuéntá Ndióxi ta in tühún ínimá yíi Ndióxi sáhan ña nu ná. ⁵ Cuahá nuú chuun cuu caja ñayivi cuéntá Ndióxi ta tóco ndihí cája chúun í cuéntá mé a cúú xitoho í. ⁶ Ta sa jíin sa jíin cája in in í chuun nasahan Ndióxi nu yó caja í. Joo in tühún mé á queá sáhan ña yóho nuú in in í caja í. ⁷ Ta sáhan Ndióxi in ñaha nuú in in í já náha ña ñúhu ínimá yíi Ndióxi iní ta xihín ña yóho cuu chindee yo tóco ndihi na cúú cuéntá Jesús. ⁸ Ínimá yíi Ndióxi yóho queá cája ña ná cuu candaa ini java ñayivi ndaja fin ña vaha xihín ña a váha ta já ndicani na ña nuú ñayivi. Ta sa mé ínimá yíi Ndióxi queá cája ña ná cuu cahan ñayivi ña ndichí ndivaha. ⁹ Ta cája mé ínimá yíi Ndióxi yóho xihín java na ña ná candee cáhnu ini na mé á. Ta sáhan mé ínimá yíi Ndióxi nuú java na ña ná cuu ndaja vaha na na quíhvi. ¹⁰ Java na ñehe táhvi ná caja na ña xitühún. Ta java na ñehe táhvi ná jáyaha na tühun nacahan Ndióxi xihín ná nuú ñayivi. Ta java na ñehe táhvi ná ndicuni na ndá na cúú na cája chúun cuéntá ínimá yíi Ndióxi ta ndá na co cája chúun toho cuéntá mé á. Ta java na ñehe táhvi ná cahan na tühun ña coo nasatiahva na. Ta java na ñehe táhvi ná nducú ñehe na ña cúnj cachi tühun cáhan na cán nuú ñayivi. ¹¹ Ta sa mé ínimá yíi Ndióxi cája tóco ndihi ña yóho ta in tühún mé á sáhan nuú in in ñayivi ña sácú ini a caja chúun vaha na xihín.

In cúú tóco ndihi na cúú cuéntá Jesús sahá ña cándee ini na mé á

¹² Candehé ndo. Cuahá ndivaha nu ndaca yiquí cuñu í joo in víxi cúú á. Quiahva já fin xihín na cúú cuéntá Jesús. ¹³ Ta quiahva já yáha xihín tóco ndihi mí, coo caja toho a á cúú yó na Israel á co

cúu yó nā Israel. Ta coó caja toho a á cúu yó nā cómi in xitoho cuéntá saha, á cúu yó nā xíca núná mé. Jáchī cāja ínima yīi Ndióxi nā cúu yó tátuhun in víxī ñayivi sahá nā in nanduú xihín Jesucristo tá nā-candúta yó cuéntá mé á. Ta in túhún ínima yīi mé á nasacu a ini ínima in in í.

¹⁴ Xíní ñúhú ndicuhun iní nā a juú in víxī nū ndáca yiquí cuñu í jáchī cuahá ndivaha nu ndáca yiquí cuñu ñayivi. ¹⁵ Candehé ndo. Cúu á tátuhun tá ná cahan in xoo saha yo já cáchī a já: “Yehe coo cúu toho i ndáha ñayivi sahá nā cán queá coo chuun toho i nuú yiquí cuñu na”, cáchī a. Joo coo cāja toho nā cahan saha yo yóho jáchī cúu á cuéntá yiquí cuñu í. ¹⁶ Ta cúu á tátuhun tá ná cachi in joho í já cáchī a já: “Yehe coo cúu toho i nduchú núú ñayivi sahá nā cán queá coo chuun toho i nuú yiquí cuñu na”, cáchī a. Joo coo cāja toho nā cahan joho í yóho jáchī cúu á cuéntá yiquí cuñu í. ¹⁷ Jáchī cāja mé ndó cuéntá ndaja caja í cuni joho í tá níí cúu yiquí cuñu í ná cacuu a nduchú núu yo. Ta ndaja caja í tahmí ñaha tá níí cúu yiquí cuñu í ná cacuu a joho í. ¹⁸ Joo in in nā ndáca yiquí cuñu í yóho nasacu Ndióxi nā mé nu ndítahan coo a jáchī já nasacu ini a caja. ¹⁹ Xíní ñúhú caja ndó cuéntá tá in víxī joho ná candaca níí cúu yiquí cuñu í já queá coo in ndihi toho yiquí cuñu í. ²⁰ Ta vatí cuahá ndivaha nu ndáca yiquí cuñu in in í joo in víxī cúu yiquí cuñu í. Ta quiahva já ín a xihín nā cúu cuéntá Jesús.

²¹ Candehé ndo jáchī sácú u in quiahva nu ndo: Nduchú núu yo a cúu cachi a xihín ndáha yo nā coo xíní ñúhú a nā. Ta ni yiquí jíní yo a cúu cachi a xihín saha yo nā coo xíní ñúhú a nā. ²² Nā yáha xihín yiquí cuñu í cúu nā yóho. Java tañu cáhán yo nā vitá in ñaha ndáca yiquí cuñu í joo nā jan xíní ñúhú chága yó nā. ²³ Ta mé xoo yiquí cuñu í nā cáhán yo

coo cuahá saha, nā coo cúní yo nā ná candehé ñayivi, nā cán cúu nā chíjahví vaha í ²⁴ vatí coo xíní ñúhú caja í já xihín ñaha nā cuu candehé ñayivi. Xihín nā yóho cuu candaá iní ndá quiahva nacavaha Ndióxi in in xoo yiquí cuñu í ta cuu candaá iní ndaja candaá vaha chága yó nā cáhán yo coo cuahá saha. ²⁵ Ta xihín nā yóho coo sáhdá java táhan yiquí cuñu í jáchī in in xoo yiquí cuñu í ndihi ini a sahá java ga xoo yiquí cuñu í. ²⁶ Nā cán queá tá ndícuehe in xoo yiquí cuñu í ndijáá java ga nā cán ndíhíhvī a sahá nā ndóho in xoo yiquí cuñu í. Joo tá víí cāja na xihín in xoo yiquí cuñu í já queá cájii ini java ga xoo yiquí cuñu í.

²⁷ Ta tóco ndihi ndó, nā cúu cuéntá Jesús cúu ndó tátuhun yiquí cuñu Jesucristo jáchī in nanduú ndihi ndó xihín á ta in in ndó cúu ndó tátuhun in xoo yiquí cuñu a. ²⁸ Ta tá quiahva ín chuun cāja in in xoo yiquí cuñu í quiahva já ín chuun caja in in nā cúu cuéntá Jesús. Jihna ñúhú nacaxi Ndióxi nā apóstol ta já nacaxi a nā jáyaha tuhun Ndióxi nuú ñayivi ta já nacaxi a nā jánaha tuhun Ndióxi nuú ñayivi ta já nacaxi a nā cāja nā xitúhún. Ta já nacaxi a nā ndája vaha nā quíhvī xihín nā chindeé ñayivi xihín nā sáhdá chuun nuú java ga ñayivi xihín nā cahan tuhun nā coo nasatiahva na. ²⁹ Joo a juú ndihi nā cán cúu apóstol. Ta ni a juú ndihi na cúu ná nā jáyaha tuhun cahan Ndióxi nuú ñayivi. Ta ni a juú ndihi na jánaha ñayivi. Ta ni a juú ndihi na cāja nā xitúhún. ³⁰ Ta ni a juú ndihi na ndája vaha na nā quíhvī. Ta ni a juú ndihi na cahan tuhun nā coo nasatiahva na. Ta ni a juú ndihi na tiahva nducú ñehe nā cúní cachi tuhun cahan nā cán. ³¹ Joo mé ndó xíní ñúhú ndinducú ndo nā ná quiahva Ndióxi in nā vaha chága nu ndo. Ta viti cúní jánaha í nā cúu nā vaha chága nu ndo.

Ña ndítahan caja í tá quíhvi iní ñayivi

13 Tá ná cuu cahan í tá nuú tuhun cahan ñayivi ndúu ñuyívi yóho ta tá ná cuu cahan í tuhun cahan táto Ndióxi joo tá co quíhvi iní í ñayivi já queá coó saha toho ña cahan í. Jáchi xihín ña jan cúu y tá tuhun in caa jácasá na, á tá tuhun in caa xoo tá jácasá na ña. Quiahva já ín í tá co quíhvi iní í ñayivi. ²Ta ni coó sahá ña ná cacuu y in da jáyaha tuhun cahan Ndióxi nuú ñayivi tá co quíhvi iní í ñani táhan í. Jáchi tá co quíhvi iní í ñayivi coó caja toho ña ná cuu candaa iní í tóco ndihi ñaha ta ni coó caja toho a tá xini tóco ndihi ña xini da ndichí ta ni coó saha toho tá cándéé cáhnu ndivaha iní í Ndióxi jandá quiahva cuu cahan í xihín in yúcu ña ná ndicanda ña. Coó saha toho tóco ndihi ña yóho tá co quíhvi iní í ñani táhan í. ³Ta vatí ná ndicahnda í tóco ndihi ña cómi í ta já quiahva í ña nuú na ndahví coó sahá toho ña cája í tá co quíhvi iní í ñayivi. Ta ni coó caja toho ña ná ndiquiahva í yiquí cuñu í ña ná cayí a sahá ña cahan í tuhun Ndióxi tá co quíhvi iní í ñayivi.

⁴Jáchi tá mé a ndaa táhyí quíhvi iní ñayivi co ndíhi iní xihín ná. Ta tá quíhvi iní ña táhvi iní saha ná ta co cáhíhvi toho iní xihín ná. Ta ni co cája lándá yo nu ná ta ni co cája cáhnu í mí nu ná. ⁵Tá quíhvi iní ñayivi ín toní ñúhú yo xihín ná ta co cájílhnda yó ñaha nu ná jáchi co ndúcú yo ña vaha mé cuití yo. Ta ni co xójo iní xihín ná. Ta ni co quéhé cuéntá sahá ña núu cája na xihín yo tá quíhvi iní ña. ⁶Ta tá quíhvi iní ñayivi co cájii toho iní tá cája núu na joo cájii iní tá cája na ña ndaa. ⁷Tá quíhvi iní ñayivi ín tiahva í ndoho iní saha ná ta cáhvi iní ña vaha cuití va saha ná. Ta cándúsa í ña cája na ña ndaa. Ta sahan ndeé iní xihín tóco ndihi ñaha.

⁸Tá mé a ndaa quíhvi iní ñani táhan í já queá anda ama caa quívi a ndíhi sahá ña quíhvi iní ña. Joo vaxi quívi a jáyaha ga ñayivi tuhun cahan Ndióxi xihín ná nuú ñayivi jáchi vaxi quívi ndíhi sahá. Ta a cahan ga na tuhun ña coó nasatiahva na. Ta vaxi quívi ndíhi sahá ña ndichí jiní ñayivi. Joo a ndíhi toho saha ña quíhvi iní táhan í. ⁹Jáchi chá cuití xini yó saha Ndióxi ta chá cuití tiahva í jáyaha í tuhun cahan Ndióxi nuú ñayivi. ¹⁰Joo tá ná xinu coo quívi ndaja Ndióxi ña ná nduu ñayivi víi já queá a cúní ñúhú ga yó ña tóco ndíhi java ga ña ndíhi saha cán jáchi sa nanduú ñayivi víi nu mé á.

¹¹Candehé ndo. Tá nasacuu y in ta loho nacahan í tá quiahva cahan na valí ta quiahva já nacahvi iní í ta quiahva já nacaja í. Joo tá nasahnu í najándacoo í ña cája na valí. ¹²Viti co cándaa vaha iní ndá quiahva caa Ndióxi. Cúu á tá tuhun tá sándehé yo nuú in yutátá ña co jinú vaha ga. Joo vaxi quívi cuní mé á tá quiahva caa. Viti cuahá ñaha co cándaa iní saha mé á. Joo vaxi quívi candaa iní saha mé á tá quiahva xini mé á mí viti. ¹³Ín uní nuú ñaha ña a ndíhi sahá. Ta ña yóho cúu á: ña cándéé iní Ndióxi, ta inga cúu ña ndátí casaá, ta inga cúu ña quíhvi iní Ndióxi xihín ñani táhan í. Ta cúní Ndióxi ña ná caja í ndihuni ña yóho joo ña cáhnu chága cúu ña quíhvi iní Ndióxi xihín ñani táhan í.

Tá cahan ñayivi tuhun ña coó nacatiahva na

14 Xini ñúhú ndíhi iní ndó quíhvi iní ndó ñani táhan ndó. Ta xihín ndinuhu iní ndó ndinducú ndo ña sahan ínima yii Ndióxi nu yo. Ña xini ñúhú ndíhi chága iní ndó ndinducú ndo cúu ña ná cuu jáyaha ndó tuhun cahan Ndióxi xihín ndó nuú ñayivi. ²Jáchi ndá na nacuu cahan tuhun ña coó nacatiahva na já queá cahan na xihín Ndióxi joo co cahan na xihín ñayivi jáchi co cán-

daa ini ñayivi ña cáhan na. Ña cáhan na cúu ña ñaquixi cuénta ínima yii Ndióxi ta cúu á ña co xini ndihi ga ñayivi. ³ Joo ñayivi tiahvá jáyaha tuhun cáhan Ndióxi xihin ná nuú ñayivi cája na ña ná cuu cuahnu chága na cúu cuénta Jesús xihin tuhun cáhan Ndióxi. Ta sáhan na tuhun ndeé ini ñayivi ta quiahva já jáxinu chága na ini na cán. ⁴ Ta na ñehe táhvi cáhan tuhun ña coo ñacatiávha na sáhu mé cuití va na xihin tuhun sáhan Ndióxi nu ná cáhan na. Joo na tiahvá jáyaha tuhun cáhan Ndióxi nuú ñayivi chindeé na na cúu cuénta Jesús ña ná cuahnu chága na xihin ñaha cuénta Ndióxi.

⁵ Mí i cájii íni i tá ná cuu cáhan ndihi ndó tuhun ña coo ñacatiávha ndó. Joo cájii chága ini i tá ná jáyaha ndó tuhun cáhan Ndióxi xihin ndó nuú ñayivi jáchi xini ñúhú chága ña yóho a juú ga ña ná cáhan ndó tuhun ña coo ñacatiávha ndó. Vaha cája ndó ña ná cáhan ndó tuhun ña coo ñacatiávha ndó tá íin in na tiahvá nducú ñehe ña cuni cachi tuhun cáhan ndó nuú ñayivi já queá ná cuu cuahnu na cúu cuénta Jesús xihin mé tuhun cán. ⁶ Xini ñúhú candehé vaha ndó ña cáhan i xihin ndo, ñani mí i na cúu cuénta Jesús. Coó saha toho ña cája i tá ná saa i coto nihni i ndohó ta já casáhá i cáhan i inga tuhun ña coo cándaq ini ndó. Tá ná caja i já ndaja caja ndó candaq ini ndó tuhun Ndióxi. Ña ndítahan caja i queá cáhan i xihin ndo ña najánaha Ndióxi nuú i. Ta ndítahan cáhan i ña ndichí cuénta Ndióxi. Ta ndítahan cáhan i tuhun ñasahan Ndióxi nuú i jáyaha i ña nu ndo. Ta ndítahan jánaha i ña ndaa cuénta Ndióxi nu ndo.

⁷ Sácú u in quiahva nu ndó sahá in tóyoo xihin dó jácaha. Ndaja caja ñayivi candaq ini na ndá yaa tiví yo tá co tiahvá í tiví vaha í, á tá co tiahvá í jácaha vaha í. ⁸ Ta ndaja caja na soldado cacu tiahvá na mé ná ña ná cuhún na caní táhan na tá ta co tiahvá vaha da tiví trompeta

tiví da do. ⁹ Quiahva já yáha ri xihin mé ndó jáchi tá co cáhan ndó tuhun ña cuu candaq ini ñayivi ndaja caja ri na cán candaq ini na ña cáchi ndo. Cúu á tátuhun cáhan ndó nu táchi cuití va. ¹⁰ Cája i cuénta íin cuahá ndivaha nuú tuhun cáhan ñayivi ndijáá ñuyiví. Joo ndijáá tuhun yóho cáxi cáhan nuú ñayivi cáhan na mé tuhun yóho. ¹¹ Joo tá co candaq ini i ña cáhan inga ñayivi xihin i já cúu u tátuhun in da tóho nu mé ná. Ta na cán cacuu na tátuhun in na tóho nu mí i sahá ña co candaq ini i tuhun cáhan na. ¹² Sahá ña cán queá tá mé a ndaa cuni ndó ndiquehe ndó ña sáhan ínima yii Ndióxi nu ndo já queá xini ñúhú ndinducú ndó ña ná cuu chindeé ndó na cúu cuénta Jesús ná cuahnu chága na xihin tuhun Ndióxi.

¹³ Ña cán queá ndá ndó ñehe táhvi cáhan ndó tuhun ña coo ñacatiávha ndó já queá xini ñúhú caqa ndó nu Ndióxi ña ná cuu ndicani ndó ña cuni cachi a nuú ñayivi. ¹⁴ Jáchi tá ná casáhá cáhan i tuhun ña coo ñacatiávha i nani xíca táhvi i nu Ndióxi já queá mé a ndaa cája cáhu i Ndióxi xihin ínima i joo co cája i ña xihin xini túní i jáchi co candaq ini i ña cáhan i. ¹⁵ Ndiá caja i. Ña xini ñúhú caja i queá caqa táhvi i nu Ndióxi xihin ínima i ta xihin xini túní i. Ta quiahva já xini ñúhú cata i xihin ínima i ta xihin xini túní i viti. ¹⁶ Candehé ndó. Ná caja í cuénta tá ndúu ndó veñuhu ta casáhá ndo cáhan ndó tuhun ña coo ñacatiávha ndó nani cája cáhu ndó Ndióxi xihin ínima ndo ta ndaja coo quíhvi in ñayivi ini veñuhu, na co candaq cuahá ini sahá ñaha cuénta Ndióxi. Ta xini johó na ña cáhan ndo joo a cúu caja na ndiquiahva na ndixahvi nu Ndióxi in nuú xihin ndo jáchi co candaq ini na tuhun cáhan ndo. ¹⁷ Vatí ndató ndivaha cáhan ndo ndiquiahva ndó ndixahvi nu Ndióxi joo co chindeé a na cán ná cuahnu na xihin tuhun Ndióxi

jáchí cō cándaq ini na tũhun cáhan ndo. ¹⁸Ndíquiahva i ndixahvi nu Ndióxi jáchi cáhan cuahá chága i tũhun ña cōo ñasatiahva i a juú ga ndóhó. ¹⁹Joo nani já-ñaha i ndohó ini veñuhu cájii chága íni i cáhan chá cuití va i tũhun já ná cuu candaq cáxi ini ndó ña cáhan i. Jáchi ndá chuun queá ná cáhan cuahá ñahá i tũhun ña cō candaq ini ndó.

²⁰Candehé ndo ñani i, na cúu cuéntá Jesús. A cáhvi ini ndó tá quiahva cáhvi ini na valí. Xíní ñúhú cahvi ini ndó tá quiahva cáhvi ini ñayivi sa tácu ini. Vatí mé a ndaa xíní ñúhú caja ndó tá quiahva cája na valí, na cō caja cuachi. ²¹Xíní ñúhú ndicuhun ini ndó ndaja cáhí ley ñacahyi Moisés sanahá tá ñacachi Ndióxi já: “Vatí ná chindahá i na cáhan java tũhun tóho nuú ñayivi Israel joo a cuni johó na nuú cáhan na tóho cán jáchi sáá ini na Israel”, ñacachi Ndióxi. ²²Tá cáhan ndó tũhun ña cōo ñasatiahva ndó nani cája cáhnu ndó Ndióxi cō chindeé cuahá ña yóho na cúu cuéntá Jesús cuahnu na xihín tũhun Ndióxi vatí mé a ndaa na cō xíní tũhun Ndióxi cátontó na xihín ña yóho. Joo tá jáyaha ndó tũhun cáhan Ndióxi xihín ndó nuú na cúu cuéntá Jesús já cuu cuahnu chága na xihín tũhun Ndióxi vatí cō chindeé cuahá ña yóho na cámaní ndihvi íchi cuéntá Jesús. ²³Caja mé ndó cuéntá tá ná taca cuahá na cúu cuéntá Jesús ta casahá cáhan ndo tũhun ña cōo ñasatiahva ndó nani cája cáhnu ndó Ndióxi ta ndaja coo quíhvi na cō xíní tũhun Ndióxi nu ndúu ndó jan. Ta tá ná cuni na ña sa jíin tũhun cáhan ndihi ndó já queá cahán na ña cúu ndó na tachí. ²⁴Joo tá ná jáyaha tóco ndihi ndó tũhun cáhan Ndióxi nuú ñayivi ta ndaja coo quíhvi in na cō xíní tũhun Ndióxi. Ta tá ná cuni johó na ña cáhan ndo já queá tahnda ini na sahá cuachi na ta já casahá ndícani ini na sahá ña núu cája na. ²⁵Ta já ñahma na cuachi na nuú ñayivi ta já ndicava

xítí na caja cáhnu na Ndióxi. Ta xihín ña yóho candaq ini na ña mé a ndaa táhyi íin Ndióxi tañu ndó.

Tóco ndihi ña cája ndó cuéntá Ndióxi xíní ñúhú caja ndó ña xihín toní ñúhú

²⁶Candehé ndó, ñani i, na cúu cuéntá Jesús. Tá ná nditaca ndihi ndó caja cáhnu ndó Ndióxi ndítahan nuú java ndó cata ndó salmo ta java ndó jánaha ndó nuú ñayivi. Ta ndítahan nuú java ndó jáyaha ndó tũhun cáhan Ndióxi xihín ndó nuú ñayivi ta java ndó cáhan ndó tũhun ña cōo ñacatiahva ndó. Ta ndítahan nuú java ndó nducú ñehe ndó ña cúní cachi tũhun cáhan na cán. Tóco ndihi ña cája ndó xíní ñúhú chindeé a ndohó ná cuahnu chága ndó xihín tũhun Ndióxi. ²⁷Ta ndítahan nuú ivi á uní ñayivi cuití va cáhan na tũhun ña cōo ñacatiahva na. Joo tá in tá in na caja na ña. Ta ndítahan canduu na tiahva nducú ñehe na ña cúní cachi tũhun cáhan na jan. ²⁸Ta nu táca ndo tá cōo ni in na tiahva nducú ñehe ña cúní cachi tũhun cáhan na jan já queá vaha chága ná a cáhan na tũhun ña cōo ñacatiahva na. Ña vaha chága queá ná cáhan yaá na ña ná cuni johó mé ná xihín Ndióxi cuití va. ²⁹Ta quiahva já tá jáyaha na tũhun cáhan Ndióxi xihín ná nuú ñayivi ná cáhan ivi á uní na cuití va. Ta xíní ñúhú cáhan na nani ndúu tútú java ga na veñuhu sándehe na á mé a ndaa cáhan na cuéntá Ndióxi. ³⁰Cája i cuéntá nani jáyaha in na tũhun cáhan Ndióxi xihín ná nuú ñayivi ta jácahan Ndióxi ini inga na ña ná jáyaha na tũhun cáhan Ndióxi xihín na nuú ñayivi já queá xíní ñúhú cacoo na nu cuití cán. ³¹Xihín ña yóho tá in tá in ndó cuu jáyaha ndó tũhun cáhan Ndióxi xihín ndó nuú ñayivi. Já cuu catiahva na xíní johó ña yóho ña ná ndindeé chága ini na xihín tũhun Ndióxi. ³²Na jáyaha tũhun Ndióxi nuú ñayivi xíní ñúhú cañehe na quiahva xihín ña

cája na nani ndáti na jáyaha na tũhun cán. ³³ Jáchĩ cúnĩ Ndióxi ña ná coo vaha iní caja í tóco ndihi ñaha ta ná a jána í nuú cája í ña.

Ta cájijĩ ini mé á tá cája vaha ndó tá quiahva cája java ga ña cúu cuéntá Jesús ndúu ndijáá ga ñuu. ³⁴ Nani táca ndo veñuhu co ndítahan nuú najihí cahan na jáchĩ co cáni a nu ná cahan na. Ta co ndítahan nu ná cacomí ña cuéntá sahá na veñuhu jáchĩ quiahva já sáhdá ley Moisés. ³⁵ Ta tá cúnĩ ña candaa ini na sahá ña jánaha na veñuhu xínĩ ñúhú ndaça tũhún ña yíi ná sahá tá cásaa ña vehe na. Jáchĩ co náha vaha tá cahan in ñáñaha nani táca ña veñuhu.

³⁶ Xínĩ ñúhú ndicuhun ini ndó ña a juú ndóhó cúu ña ñandiquehe tũhun Ndióxi nu cuítĩ. Ta a juú ndóhó cuítĩ xínĩ tũhun Ndióxi, vaha. ³⁷ Ta ndá ña cáhán ña nachutú ndaa ínima ná xihín ínima yijĩ Ndióxi ña ná jáyaha na tũhun cahan Ndióxi xihín ná nuú ñayivi, mé ña cán ndítahan nu ná ndicuni na ña cahan i ña sáhdá Ndióxi nuú i cahan i. ³⁸ Joo tá co cúnĩ ña cán cuni joho na ña cahan i cuéntá Ndióxi já queá a cúnĩ joho ndó ña cahan ña cán.

³⁹ Candehé ndo, ñani i, ña cúu cuéntá Jesús. Xínĩ ñúhú ndihi ini ndó nducú ndó ña ná jáyaha ndó tũhun cahan Ndióxi xihín ndó nuú ñayivi. Ta a cájijĩ nuu ndó nuú ña cúu cuéntá Jesús tá ñehe táhvi ná nu Ndióxi cahan ña tũhun ña coo nasatiahva na. ⁴⁰ Joo tóco ndihi ña cája ndó xínĩ ñúhú caja ndó ña xihín toní ñúhú já ná a jána ndó nu cája ndó ña.

Ndicani Pablo sahá quiví tá ñanditacu Jesús

15 Candehé ndó, ñani i, ña cúu cuéntá Jesús. Viti cúnĩ ña ná ndicuhun ini ndó tũhun vaha sahá Jesús ña najánaha i nu ndo. Mé tũhun vaha yóho sa ñandiquehe vaha ndó ña ta cán-

deé vaha ini ndó a janda viti. ² Ta jivi saha mé tũhun vaha najánaha i nu ndo yóho cuu caçu ndaa ínima ndo tá ná caja ndó ña najánaha i nu ndo xihín ndinuhu ini ndó. Joo tá ná a cája ndó ña já queá mé a uun va queá ñacandúsa ndó ña.

³ Candehé ndó. Ña jihna ñúhú ñacaja i queá najánaha i ndohó ña ñacati-ahva mí i cuéntá Jesucristo, mé á ñaxihí ndica cruxu sahá cuachĩ tá quiahva cáchĩ tũhun Ndióxi. ⁴ Ta najánaha i ndohó ña najánduxu ña mé á joo tá ñaxinu quiví uní já ñanditacu tucu a tá quiahva cáchĩ tũhun Ndióxi coo. ⁵ Ta já ñanaha mé á nu Pedro xihín nuú java ga táhan da uxu ivi ñaxica tuun xihín a cán. ⁶ Ta tá ñandihí já ñanaha mé á nu yáha ga nuú uhun ciento ña cúu cuéntá mé á. Ta in ñaxini toco ndihi na mé á. Ta cuaha táhan ña ñaxini ñahá cán tácu yijĩ va na vatí java na sa ñaxihí ña. ⁷ Ta tá ñandihí já ñanaha mé á nu Jacobo ta anda já ñanaha mé á nu tóco ndihi ña ñaxica tuun xihín á.

⁸ Ta tá nu ndihí já ñanaha ri Jesús mé á nuú i vatí cúu u da ñacacu tá sa ñayaha mé tiempo tá ñaxica nuu Jesús ñuyiví yóho. ⁹ Yehe cúu u in apóstol joo ñin chága saha tóco ndihi java ga ña apóstol a juú ga yehe. Ta ni coo sahá i cahan ña apóstol xihín i jáchĩ ñaxica nuu i ñacaja xixi i xihín ña cúu cuéntá Ndióxi jihna. ¹⁰ Joo mé a ndaa cúu u in apóstol jáchĩ ñacamáni Ndióxi yehe. Ta a juú ña uun cúu ñamaní ñacaja Ndióxi xihín i jáchĩ cuahá ga chuun cája yehe cuéntá mé á a juú ga java ga ña apóstol cán. Vatí mé a ndaa co cája chúun i xihín ndée mí i. Sahá ña táhvi ini Ndióxi sahá i sahá ña cán queá chindeé a yehe cája i chuun mé á yóho. ¹¹ Joo co cája toho a á yehe á ña java apóstol cán cája chúun chága. Ña vaha queá tóco ndihi nde jánaha nde sahá Jesucristo ta mé ndó sa ñacandúsa ndó ña najánaha nde nu ndo.

Vaxi quiví nditacu tóco ndihi ndii

¹² Tá nacahan nde tuhun Ndióxi xihin ndo najánaha nde ndohó ña nanditacu tucu Jesucristo ta nacandúsa ndó ña. Joo viti java ndó cáchí ndo ña co ndítacu toho na sa naxihí. ¹³ Joo tá cáchí ndo ña co ndítacu toho na sa naxihí cúu á tátuhun co cándúsa ndó ña nanditacu tucu Jesucristo. ¹⁴ Ta tá co cándúsa ndó ña nanditacu tucu Jesucristo já queá coó saha toho tuhun Ndióxi ña xica nde já-naha nde nuú ñayivi. Ta xihín ña yóho mé a uun va cándeé ini ndó mé á. ¹⁵ Ta tá mé a ndaa coó nanditacu Jesucristo já queá cúu nde na cáhan ña tuhún saha Ndióxi jáchi cáchí nde xihin ndo ña mé Ndióxi najánditacu a Jesucristo. Joo tá co ndítacu toho ndii ta ndehe cáchí nde ña nanditacu Jesucristo já queá cúu nde na tuhún. ¹⁶ Jáchi tá co ndítacu ndii já queá cúní cachi a ña coó nanditacu toho Jesucristo. ¹⁷ Ta tá coó nanditacu Jesucristo já queá coó saha toho ña cándeé ini ndó mé á ta cómi yij va cuachi cuéntá saha ndó. ¹⁸ Ta xihín ña yóho cúní cachi a ña a cácu ndaa toho ínima na cúu cuéntá Jesús tá ná quivi na. ¹⁹ Tá ndiyahvi ña cúu yó cuéntá Jesús nani tácu yo ñuyíví yóho cuití va já queá ndáhví nahá nacúu.

²⁰ Joo mé a ndaa nanditacu ndusa Jesucristo. Ta mé á cúu á ña nu cuití nanditacu. Ta vaxi quiví nditacu tóco ndihi yó, na cúu cuéntá mé á. ²¹ Candehé ndo. Naquihvi cuachi ñuyíví sahá ña nacaja Adán, da nasacuu ta nu cuití ta sahá cuachi yóho nacasáhá xihí ñayivi. Ta jivi sahá ña nacaja Jesucristo tá naxihí a ndica crúxu cuu nditacu tóco ndihi na sa naxihí. ²² Xihí ñayivi sahá ña naquixi na chichi Adán ta cája na ña núu tá quiahva nacaja Adán sanahá. Ta viti sahá ña cúu yó cuéntá Jesucristo catacú anda ama cáa quiví sahá ña nacaja mé á. ²³ Ta tá ná ndindaa nuú in in na nditacu na já

nditacu na caja Ndióxi. Mé Jesucristo queá nanditacu nu cuití. Ta tá ná ndicó coo tucu mé á ñuyíví yóho já caja mé á ña ná nditacu tóco ndihi na cúu cuéntá mé á. ²⁴ Anda já ndihi saha tóco ndihi ñaha ñuyíví yóho jáchi jándihi Jesucristo saha tóco ndihi na cómi cuéntá sahá ñayivi ñuyíví yóho. Ta ndiquiahva tóco ndihi na cúu cuéntá mé á ndáha Ndióxi, tátá a já ná cacomí a cuéntá saha ná. ²⁵ Jáchi Jesucristo queá ndítahan nu cacomí cuéntá sahá na cúu cuéntá mé á janda quiahva ná xinu coo quiví jándihi Ndióxi saha tóco ndihi na co cúní nahá. ²⁶ Ta janda nu ndíhí jándihi mé á sahá ña ná quivi ñayivi. Ta xihín ña yóho a quiví ga ñayivi. ²⁷ Jáchi mé Ndióxi nandiquiahva tóco ndihi ñaha nuú Jesucristo já ná cacomí a cuéntá sahá. Joo tá cáchí tuhun Ndióxi ña cómi Jesucristo cuéntá saha tóco ndihi ñaha, co cúní cachi a ña cómi a cuéntá saha Ndióxi viti jáchi mé Ndióxi queá nandiquiahva tóco ndihi ñaha ndáha mé á ña ná cacomí a cuéntá sahá. ²⁸ Ta tá sa cómi Jesucristo cuéntá saha tóco ndihi ñaha anda já ndiquiahva Jesucristo mé á ndáha Ndióxi ña ná cacomí a cuéntá sahá. Jáchi cúu á in túhún jini já jahyi Ndióxi ta mé Ndióxi queá nandiquiahva tóco ndihi ñaha nuú Jesucristo. Ta Ndióxi cacuu a ña cáhnu chága nu tóco ndihi ñaha.

²⁹ Ndúu java ñayivi ta cándúta ná sahá na sa naxihí já ná cacu ndaa ínima ná. Joo cáchí na co cándúsa toho na ña ndítacu ndii. Ta ndá sahá queá cája na já tá co cándúsa na nditacu ndii. Joo xini vaha í ña nditacu ndii.

³⁰ Ndá chuun queá chicaan yo mí ndijáá ní quiví nuú tondóho nuú cuu cahní na mí tá co cándúsa í ña nditacu tucu ndii. ³¹ Candehé ndo, ñani i, na cúu cuéntá Jesús. Ndiáá ní quiví vaxi tondóho nuú i. Ta jalóho cúní quivi i. Mé ndó cándaá vaha ini ndó ña cájii ini i sahá in nanduu ndó xihín Jesu-

cristo, xitoho í. Sahá ña cán queá ndítahan nu ndo candúsa ndó ña cáhan i xihín ndo. ³² Cuahá tañu naquihvi táhan i xihín ñayivi quini ñuu Efeso. Mé na cán cúú ná tátuhun quití yúcú. Joo coó saha toho ña ndóho ini i yóho tá mé a ndaa co ndítacu toho ndii. Jáchí tá co ndítacu toho ndii já queá cuu cohó caja í tá quiahva cáchí java ñayivi tá cáchí na já: “Cóho cuxu vaha í ta coho vaha í jáchí yó quiví itaan á iajá cúú yó.”

³³ A quiahva ndó ñamaní jándahvi inga na ndohó. Xíní ñúhú ndicuhun ini ndó in tuhun ña cáchí já: “Tá catáhan í xihín ñayivi, na co caja vaha já queá jativí na mí.” ³⁴ Xíní ñúhú ndicaxí vaha ini ndó ta a caja ndó cuachi jáchí ndúu java ndó ta co xíní toho ndó Ndióxi. Cáhan i ña yóho xihín ndo já ná cacahan nuu ndo sahá ña núu caja ndó.

Ndaja coo tá ná nditacu ndii

³⁵ Caja i cuénta ña ndúu java ndó ta ndicani ini ndó já cáhan ndo já: “Ndaja caja Ndióxi jánditacu a na sa naxihí. Ndá yiquí cuñu ndiquehe na caja Ndióxi.” Já ndáca tuhún java ndó ndicani ini ndó.

³⁶ Joo ña ndicani ini ndó saha jan cúú á ña tóntó ndivaha. Xíní ñúhú cándehé ndo ndá quiahva yaha xihín in tata tá chíhin na ña. Mé tata yóho xíní ñúhú quiví a já ná nduta utu loho nu á. ³⁷ Tá xútu ñayivi, co xútu toho na in yucu. Ña xútu na cúú mé tata ta co caja toho a á cúú á trigo á inga nuú tata. ³⁸ Ta mé Ndióxi queá caja ña ná ñehé táhvi in in a cán ndá quiahva coo a ta ndá javí cañehe in in a. ³⁹ Ta a juú in javí ñehe tóco ndihi ñaha. Sa jíin sa jíin javí in in a. Tátuhun yiquí cuñu in dataa, sa jíin íin yiquí cuñu da xihín yiquí cuñu quití. Ta yiquí cuñu laa sa jíin íin a xihín yiquí cuñu tiyacá. Sa jíin ñacaja Ndióxi xihín in in ña ñacavaha mé á. ⁴⁰ Ta quiahva já ñacavaha Ndióxi ña ndúu indiví ta jíin va ndáa a. Ta jíin yiquí cuñu ñayivi ñuyiví yóho. Ta

sa jíin quiahva ndató ña íin indiví ta sa jíin quiahva ndató ña íin ñuyiví. ⁴¹ Jíin ñacaja Ndióxi ña ná yehe candii ta jíin ñacaja mé á ña ná yehe yoo. Ta jíin ñacaja mé á ña ná yehe quimi ta íin java quimi sa jíin sa jíin yehe rí nuú inga rí. ⁴² Quiahva já yaha ri xihín ñayivi tá ná xinu coo quiví jánditacu Ndióxi na. Jáchí yiquí cuñu yó ña jánduxu na tixi ñúhu cúú á ña ndihi saha. Joo tá ná nditacu tucú já a ndíhi ga saha yo anda ama cáa quiví. ⁴³ Mé yiquí cuñu í jánduxu na tixi ñúhu yóho cúú á tátuhun in ña núu ndivaha jáchí ndihi sahá. Joo tá ná xinu coo quiví ndicoo tucu a caja Ndióxi já cacuu a ña ndató ndivaha jáchí a ndíhi sahá. Ña jánduxu na tixi ñúhu cúú á ña vitá ndivaha joo ña nditacu tucu cacuu a ña ndacú vaha. ⁴⁴ Jáchí tá ná jánduxu na mí tixi ñúhu, ña jánduxu na cúú yiquí cuñu cuénta ñuyiví yóho. Joo tá ná nditacu tucú já ñehé yó inga yiquí cuñu, ña cúú cuénta indiví. Jáchí tá íin yiquí cuñu cuénta ñuyiví, ña ndíhi saha ta já íin ri yiquí cuñu cuénta indiví, ña a cuú ndihi saha.

⁴⁵ Cáchí tuhun Ndióxi ña tá ñacavaha Ndióxi Adán, da ñasacuu ta nu cuítí já ñacaja mé á ña ná catacu da. Joo cáhnu chága Jesucristo a juú ga Adán jáchí mé á caja ña ná catacu ñayivi anda ama cáa quiví. ⁴⁶ Ña jihna ñúhú sahan Ndióxi nu yo cúú yiquí cuñu í, ña ndíhi yachí saha. Ta tá nu ndíhi já sahan mé á inga yiquí cuñu nu yo cuénta indiví ta ña cán cúú á ña co ndíhi saha. ⁴⁷ Mé Adán, da ñacavaha Ndióxi nu cuítí ñasacuu da da ñacavaha mé á xihín ñundáhyi ta cúú dá da ñuyiví yóho. Ta Jesucristo, xitoho í, cúú á inga táhan dataa joo cúú á ña naquixi chí indiví. ⁴⁸ Tá in tá in ñayivi ñehe na yiquí cuñu tátuhun yiquí cuñu Adán jáchí cúú á ña ñacavaha Ndióxi xihín ñundáhyi. Joo ñayivi, na ndiquiahva mé ndáha Jesucristo vaxi quiví ndiquehe na inga yiquí cuñu cuénta indiví, ña co

ndíhi saha. ⁴⁹Ta viti íin yiquí cuñu í tátuhun yiquí cuñu Adán joo vaxi quiví ndiquehé inga yiquí cuñu í cuéntá indiví ta cacua a tátuhun yiquí cuñu Jesucristo.

⁵⁰Candehé ndo, ñani í, na cúu cuéntá Jesús. Cúni caxi tuhun í xihín ndo ña a cúu toho cuhun yiquí cuñu í yóho indiví ña né cacomé Ndióxi cuéntá sahá jáchi mé yiquí cuñu í yóho co cúu á ña cuu catacu anda ama cáa quiví. Joo ña inga, ña quiahva mé á nu yo cán, a ndíhi toho sahá. ⁵¹Ta viti cúni caxi tuhun í nu ndo sahá in ñaha nasahjin jehé nuú ñayivi ta ña yóho queá: A juú ndihi toho í quiví jáchi tá ná xinu coo quiví quixi tucu Jesucristo ñuyiví yóho anda jávi ndijama ndihí tá quiahva ndáa í ta mé Ndióxi quiahva inga yiquí cuñu nu yo. ⁵²Ta in náa cuití yaha ña yóho jáchi cacua a tátuhun in ndicuaní nuu yo ta já ndahyi trompeta, mé dó ndahyi nu ndihí cuí cán já nditacu tóco ndihi na sa naxihí ta a ndíco coo ga na quivi na. Ta mí, tá tácu yo, ña caja Ndióxi xihín yo queá ndijama yiquí cuñu í. ⁵³Jáchi mé yiquí cuñu í ña ndíhi saha yóho a cúu toho nduu a tátuhun yiquí cuñu ña quiahva Ndióxi nu yo. Sahá ña cán queá xíní ñuhú ndijama mé á yiquí cuñu í yóho já ná cuu cohó coo í xihín mé á anda ama cáa quiví. ⁵⁴Ta tá sa ndijama yiquí cuñu í ta nanduu a ña co ndíhi saha anda ama cáa quiví já queá xinu coo nuú tuhun ña nacachi na profeta sanahá: “Vaxi quiví ndihi sahá ña xihí ñayivi jáchi nacandéé Jesucristo nasahnu a nuú ña xihí na. ⁵⁵Ta xihín ña yóho cája cáhnu í mé á jáchi a quiví ga ñayivi sahá ña naquee vaha Jesucristo”, cáchi tuhun Ndióxi. ⁵⁶Tá cája ñayivi cuachi já quivi tá quivi na sahá ña cája na. Ta cúu á tátuhun tá tíin líhma na jáchi ndóho ini na sahá cuachi na. Anda sanahá ndivaha sáhdá ley Moisés ña quivi ñayivi sahá cuachi na jáchi ñehe íni cuachi caja ña ná quivi ñayivi. ⁵⁷Joo ndixahvi Ndióxi

jáchi chindeé a mí ña ná cuu quee vaha í sahá ña nacaja Jesucristo, xitoho í saha yo.

⁵⁸Sahá ña cán queá ndítahan nu ndó, ñani máni í, na cúu cuéntá Jesús, coo ndacú ini ndó xihín tuhun Ndióxi. Ta co xíní ñuhú jándacoo ndó ña cándéé ini ndó mé á. Ta ndítahan nu ndó ndíhi ini ndó caja chuun ndó cuéntá mé á jáchi sa cándaá vaha ini ndó ña a juú ña uun cúu toho chuun cája ndó jáchi íin Jesucristo, xitoho í xihín ndo.

Tá ndítaca jjuhún ña jasá na nuú na cúu cuéntá Jesús

16 Ta viti cúni ndicani í nu ndo ndá quiahva ndítahan caja ndó tá jánditaca ndó jjuhún ña jasá ndo nuú na cúu cuéntá Jesús ndúu ñuu Jerusalén. Xíní ñuhú caja ndó tá quiahva najánaha í nuú na cúu cuéntá Jesús ndúu estado Galacia. ²Ña ndítahan caja ndó queá: tá in in domingo xíní ñuhú tavá xóo ndó táhan jjuhún ña sácú ini ndó jasá ndo jatá ña nandiquehe ndó sahá chuun nacaja ndó. A cándati toho ndó janda quiahva ná saa í jan jáchi xíní ñuhú jánditaca cuéé ndó ña. ³Ta caxi mé ndó ndá na cúni ndó cañehe jjuhún jan ñuu Jerusalén. Ta tá ná xinu coo í jan chindahá í na ña ná cuhun ñehe na jjuhún ñuu cán. Ta chindahá í in carta xihín ná ña ná quiahva na ña xihín jjuhún jan nuú na cúu cuéntá Jesús ndúu mé cán. ⁴Ta tá cúni Ndióxi já cuhun ri yehe va xihín na jan anda ñuu Jerusalén.

Sácú ini Pablo cuhun da coto nihni na cúu cuéntá Jesús ndúu java ga ñuu

⁵Saa í coto nihni í ndohó cúni. Joo jihna ñuhú yaha í coto nihni í na cúu cuéntá Jesús ndúu estado Macedonia. Ta anda jávi saa í ñuu Corinto jan. ⁶Ta tá cúni Ndióxi candoo nahá chá í xihín ndo. Á tá coo ta coo í níi tiempo vixi xihín ndó jan. Ta tá sa ná quee e cuhun í inga

ñuu já cuu chindeé ndó yehe. ⁷ Co cúni toho i coto nihni númi i ndohó. Ña cúni queá candoo tóo i coo nahá chá i xihin ndo jan tá cúni Ndióxi. ⁸ Joo candoo tóo i coo i ñuu Efeso yóho janda quiahva ná vaha vicó Pentecostés. ⁹ Jáchí mé a ndaa núná nuú i cája chúun i cuéntá Ndióxi yóho jáchí cuahá ndivaha na ndíquehe vaha na tuhun Ndióxi vatí ndúu cuahá na co cúni yehe sahá chuun cája i yóho.

¹⁰ Tá ná xinu coo Timoteo nu ndúu ndó ñuu Corinto jan, ndítahan ndiquehe vaha ndó da já ná cajií íni da coo da xihin ndo. Jáchí cája chúun da cuéntá Jesucristo, xitoho í tá quiahva cája chúun yehe. ¹¹ A cándají ndó da. Ña ndítahan caja ndó queá chindeé ndó da já ná coo vaha ini da quixi da nuú i. Jáchí yehe xihín java ga na cúu cuéntá Jesús ndátí nde xinu coo da nu ndúu nde yóho.

¹² Ta viti cúni ndicani loho i nu ndó sahá ñani, da naní Apolos. Mí i naxica tahví ndivaha i nu dá ña ná saa da xihín java ga na cúu cuéntá Jesús coto nihni da ndohó. Joo co cúni da caja da ña viti. Cája i cuéntá tá ná núná nu dá já saa da coto nihni da ndohó.

Ndíndayí Pablo na cúu cuéntá Jesús ndúu ñuu Corinto

¹³ Cuéntá vaha coo ndó. Xíní ñúhú ndacú coo ini ndó jáchí cándeé ini ndó Jesús. A yíhví toho ndó. Canduu ndacú ndó íchí cuéntá Jesús. ¹⁴ Xíní ñúhú caja ndó tóco ndihi ñaha sahá ña quíhví ini ndó ñani táhan ndó.

¹⁵ Candehé ndo ñani i, na cúu cuéntá Jesús. Sa xíní vaha ndó sahá na vehe

Estéfanos, mé na nu cuítí nandihvi íchí cuéntá Jesús estado Acaya. Sa nandiquiahva na mé ná chindeé na na cúu cuéntá Jesús. ¹⁶ Ña cúni cacá i nu ndo cúu ña ná cuni johó ndó ña sáhandá na cán nu ndó caja ndó. Ta xíní ñúhú caja ndó tá quiahva cúni ndihi na cán jáchí chindeé na ñayivi ta caja chúun vaha na cuéntá Jesús. ¹⁷ Cájii ini i jáchí naxinu coo Estéfanos xihín Fortunato xihin Acaico nu íni i ta nachindeé na yehe. Ta vatí a cuú quixi mé ndó nuú i ¹⁸ joo na yóho sáhan na tuhun ndéé ini i xihín ñaha cuéntá Ndióxi tá quiahva naja na xihin mé ndó. Mé a ndaa ndítahan nu yo caja cáhnu í na cája tátuhun na yóho.

¹⁹ Na cúu cuéntá Jesús ndúu estado Asia chindahá na Ndióxi coo ndó. Ta jári Aquila xihin Priscila chindahá na Ndióxi coo ndó. Ta jári na cúu cuéntá Jesús táca cája cáhnu Ndióxi vehe na cán chindahá na Ndióxi coo ndó. ²⁰ Tóco ndihi na cúu cuéntá Jesús ndúu chóho chindahá na Ndióxi coo ndó. Ta xíní ñúhú cahān Ndióxi xihin táhan ndó ta tatí yúhu táhan ndó ta yí caja ndó ña.

²¹ Yehe cúu Pablo ta xihin ndáha mí i cáhyí i ña yóho nu ndó ta chindahá i Ndióxi coo ndó.

²² Ta ndá na co quíhví ini Jesucristo já ná cuhun cháhan jata ná. Cama chá ná quixi Jesucristo, xitoho í.

²³ Ña cúni queá ná caja cuaha Jesucristo, xitoho í ñamaní xihin ndo. ²⁴ Quíhví ini i tóco ndihi ndó jáchí tóco ndihí cúu yó cuéntá Jesucristo, xitoho í. Já ná coo.

Carta chí ivi ñacahyí Pablo núú ña cúú cuéntá Jesús ndúú ñuu Corinto

Cáhan Ndióxi Pablo xihín ña cúú cuéntá Jesús ndúú ñuu Corinto

1 Yehe cúú Pablo, ña ñacaxi Ndióxi cacuu apóstol cuéntá Jesucristo jáchi já cúni a caja. Yehe xihín ñani, Timoteo cáhyi ñe carta yóho nu ndóhó, ña cúú cuéntá Ndióxi ndúú ñuu Corinto ta nu tóco ndihi ña cúú cuéntá Ndióxi ndúú estado Acaya. ²Ña cúni queá ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

Ndóho ini Pablo

³Cóho caja cáhnu í Ndióxi, mé a cúú tátá xitoho í, Jesucristo. Jáchi Ndióxi cúú á tátá yo, mé á sá ñahví ini saha yo ta cúú á Ndióxi ña chindeé mí tá ndóho iní.

⁴Mé a cán sahan ñuhun ñeé ini nu tóco ndihi ña ndóho iní já queá ná cuu caja ri mé ví quiahva í ñuhun ñeé ini ñayivi tá ndóho ini na. Tá quiahva cája mé á xoho quiahva já ndítahan caja í xihín ñayivi. ⁵Jáchi tá quiahva ndóho ndivaha iní saha Jesucristo ta sa mé quiahva já sahan cuahá ndivaha mé á ñuhun ñeé iní tá ndóho iní. ⁶Tá ndóho ini mé ñe já cuu quixi ñuhun ñeé ini mé ndó ta já cuu çacu ndaa ínima ndo. Tá sahan Ndióxi ñuhun ñeé ini ñe já queá sahan ri mé á ñuhun ñeé ini mé ndó viti. Ta xihín ña yóho cuu coo ndacú vaha ini ndó tá ná quixi ña ndoho ini ndó tá quiahva ndóho ini mé ñe. ⁷Cándeé ini ñe ña a jándacoo ndó ñuhun Ndióxi jáchi cándaá cáxi ini ñe ña tá quiahva ndóho iní quiahva já sahan Ndióxi ñuhun ñeé iní.

⁸Candehé ndó, ñani i, ña cúú cuéntá Jesús. Cúni ñe çaxi ñuhun ñe nu ndó tá quiahva ñandoho ini ñe estado Asia. Ñasacuu a tondóhó chichánu nuú ñe ta chí a cándeé ga ini ñe ñacahán ñe, nduu. Ta chí ñasahnda ini ñe: “Yóho quiví”, ñacahán ñe. ⁹Ñacahán ñe ña jánda ndáti cuití ñe quivi ñe joo ñachindeé ña yóho ñehe jáchi ñaha nuú ñe ña ço ndítahan candéé ini ñe mé ñe. Jáchi ña ndítahan candéé ini ñe cúú Ndióxi, mé a jánditacu tucu ndii. ¹⁰Ñajácacu Ndióxi ñehe tañu tondóhó ná a quiví toho ñe. Ta mé á queá jáçacu a ñehe nuú ndihi tondóhó vaxi chága chí nuú. Jáchi cándeé ini ñe mé á ña chindeé tá chindeé a ñehe nuú ndihi tondóhó. ¹¹Ta mé ndó chindeé ndó ñehe tá xíca ñahví ndó nu Ndióxi sahá ñe. Jáchi tá ná çaca ñahví cuahá ñayivi nu Ndióxi sahá ñe, sa mé quiahva já ndiquiahva cuahá ñayivi ndixahvi nu Ndióxi sahá ñamaní caja Ndióxi xihín ñe.

Ndicani Pablo ndá saha queá coó ñasahan ña ñuu Corinto

¹²Ín java ñaha cája ña ná coo vaha ini ñe ta cúú á ña yóho: cándaá cáxi ini ñe ña ço cája ñe ña núu ta tóco ndihi ña cája ñe ñuyiví yóho cája ñe ña xihín ndinuhu ini ñe. Ta xihín ndinuhu chága ini ñe cája ñe ña cán tañu mé ndó. Ta ni in ña cája ñe ço cája ñe ña sahá ña ndíchí quixi jiní mé ñe jáchi mé Ndióxi queá ñahví ini sahá ñe ta chindeé a ñehe cája vaha ñe. ¹³Tá ñacahyí ñe carta nu ndo jihna coó ñacahyí ñe ñuhun ña a cuú cándaá ini ndó jáchi ndacú ndacú cáhan ñe xihín ndo nu carta cáhyi ñe. Jáchi cúni ñe ña ná cándaá vaha ini ndó ¹⁴ñe ço cándaá cuahá ini ndó viti. Ta cúni ñe ña ná cajji ini ndó saha mé ñe tá quiahva cajji ini ñe saha ndo tá ná tandaa quiví quixi tucu Jesucristo ñuyiví yóho.

¹⁵ Sahá ña cándeé ini i ndohó sahá ña cán queá nasacu ini i coto nihni jihna ñúhú i ndohó ña ná cajii ndivaha ini ndó tá ná cuni ndó yehe ivi tañu. ¹⁶ Jáchí nasacu ini i coto nihni i ndohó tá ná yaha i cuhun i chí estado Macedonia ta já coto nihni tucu u ndohó tá ná ndicó coo i cán. Anda já cuu chindeé ndó yehe quehé e íchi cuhun i chí estado Judea. ¹⁷ Coto a cáhan ndo ña ñacahvi ivi joho ini i tá nasacu ini i caja i ña yóho. Ta ni a cáhan ndo ña sácú ivi joho ini i xihín ña cája i tá quiahva cája ñayivi ñuyví jáchí ndá chuun queá cáchí i jivi a tá a juú a. ¹⁸ Sándehé cáxí Ndióxi ña co jándahvi nde ndohó jáchí co cáchí nde xihín ndo “ajan” tá cúní cachi nde “uhun.” ¹⁹ Jáchí co cája Jesucristo já. Co cáchí a “ajan” tá cúní a cachi a “uhun.” Ndinuhu ña ndaa queá cáhan Jesucristo jáchí mé á cúú á in túhún jini já jahyi Ndióxi, mé a cáhan Timoteo xihín Silvano xihín yehe sahá nu ndo. ²⁰ Jáchí xihín Jesucristo jáxinu coo Ndióxi tóco ndihi tuhun nasahan mé á nu yo. Sahá ña cán queá tá cája cáhnu í Ndióxi cuu cachi yó “Já ná coo.” Ta tá cáchí yo “Já ná coo” cúú á sahá ña ñacaja Jesucristo. ²¹ Ta mé Ndióxi ñandaja ndacú a ndehe ta ñandaja ndacú a ndohó. Ta ñacaxi a mí cacúú ñayivi cuéntá mé á. ²² Jáchí mé á cúú á xitoho mí ta cómí a cuéntá saha yo. Ta nasacu a ínimá yii mé á ini ínimá yo já ná candaa vaha ini ndá quiahva íin ñamaní caja Ndióxi xihín yo chí nuu.

²³ Sándehé cáxí Ndióxi ña mé a ndaa táhyí cáhan i xihín ndo. A ñaha saa i nuu Corinto jan tá quiahva nasacu ini i caja i jáchí co cúní jácacuéha i ini ndó. ²⁴ Co cúú á sahá ña cúní nde caja ndúsa nde sahá ña ndítahan candúsa ndó. Jáchí sa xini nde ña sa ndúu ndacú ndó cándeé ini ndó Jesucristo. Ña cúní nde queá chindeé táhan nde xihín ndo já ná cajii ini ndó.

2 Sahá ña cán queá nasacu ini i ña ná a cuhun tucu u coto nihni i ndohó já ná a cacuéha ini ndó. ² Jáchí tá ná jácacuéha yehe ini ndó a cúu caja ndó jácajii ndó ini i jáchí mé ndó cúú ña jácajii ini i. Joo ndaja caja ndó jácajii ndó ini i tá sa najácacuéha i ini ndó. A cuú caja ndó ña. ³ Sahá ña cán queá ñacahyí i in carta ña ñachindahá i nu ndo cán jáchí co cúní xinu i jan ta jácacuéha ndó ini i sahá ña cája ndó. Jáchí ndítahan jácajii ndó ini i nani íin i xihín ndo. Jáchí xini vaha i ña tá cájii ini i já cájii ini ri ndóhó va. ⁴ Joo nani ñacahyí i mé carta cán já ñacasáhá táhvi ini i ta ndícani ini i janda quiahva ñacasáhá sácú u. Coo ñacahyí i ña sahá ña cúní ña ná catati ini ndó xihín á joo cúní ña ná candaa ini ndó ndá quiahva quihvi ndivaha ini i ndohó.

Ndítahan caja cáhnu ini ña ndúu ínuu Corinto sahá in da ñacaja cuachi

⁵ Ta mé da ñacaja cuéha ini i cán coo ñacaja cuéha da ini in túhún yehe tá ñacaja da cuachi. Joo cúú á tátuhun ñacaja cuéha ri da ini ndihi ndó. Cáhan i ña yóho xihín ndo ña ná a jánani ndivaha ndó da. ⁶ Jáchí cuaha ndó sa najánani ndó da cán. Vati já va caja xixi ndó xihín dá. Ndáhví da. ⁷ Ña ndítahan caja ndó queá caja cáhnu ini ndó saha dá viti ta quiahva ndó tuhun ndeé ini da jáchí a juú tiahva náa cacuéha ini da xihín ña cája ndó xihín dá. ⁸ Sahá ña cán queá xíca táhvi tucu u nu ndo ña ná jánaha ndó nu dá ña mé a ndaa quihvi ini ndó da. ⁹ Sa ñacahyí vi in carta nu ndo nu ndícani i sahá ña yóho. Ñacahyí i ña sahá ña nasacu ini i coto ndojó i ndohó á mé a ndaa táhyí cája ndó tá íin ñacachi i xihín ndo. ¹⁰ Ña cán queá ndá ña ná caja cáhnu ini ndó saha já caja cáhnu ri ini yehe va saha ná. Ta tá íin in ñaha ndítahan caja cáhnu ini i saha já queá cája i ña saha mé ndó. Ta sándehé cáxí Jesucristo ña cája i. ¹¹ Jáchí tá ná a cája í ña já queá

cándeé tiñáhá saꝓuaḥa xih̄in yo jách̄i sa x̄in̄i vaḥa í ña cún̄i rí jándahvi rí ñayivi.

Ndicani ini Pablo nani iin da ñuu Troas

¹²Tá nax̄inu coḡ i ñuu Troas ña caḡi tuḥun i tuḥun vaḥa saḥa Jesucristo já nanuná nuú i caja chúun vaḥa i cuéntá mé á cúu xitoho í. ¹³Joo coḡ naḥiḡin vaḥa ini i jách̄i coḡ nañehé e ñani Tito. Saḥá ña cán queá nandindayí i ñani, na ndúu ñuu Troas já naḡee e cuḥan i chí estado Macedonia ndinducú u da.

Sáhan Jesucristo ndée á nu yó quee vaḥa í

¹⁴Ndiꝓiaḥva i ndixahvi nu Ndióxi jách̄i saḥá ña naḡaja Jesucristo queé vaḥa í ní tiempo. Tá quiaḥva ndícuḡta nuu in jíco támi saḥan quiaḥva já ndícuḡta nuu tuḥun Ndióxi cája nde já queá ná cuu candaa ini ñayivi tuḥun vaḥa saḥa Jesucristo. ¹⁵Jách̄i mí cúu yó tátuhun jusa vaḥa ña támi saḥan ña jó-co Jesucristo nu Ndióxi. Ta ndícuḡta nuu a tañu na jácaꝓu Ndióxi saḥá ña cándeé ini na mé á. Ta jári ndícuḡta nuu a tañu na cuḥun indayá saḥá ña coḡ naḡandúsa na mé á. ¹⁶Mí cúu yó tátuhun jusa támi saḥan nuú na sa cándaa ini tuḥun Ndióxi jách̄i x̄in̄i na ñeḥe yó tuḥun ña cuu jácaꝓu ínim̄a ná. Ta nuú na co x̄in̄i tuḥun Ndióxi cúu yó tátuhun in ña quini ndivaḥa saḥan jách̄i cuḥun na indayá. Ndá na cúu caja jáx̄inu ini ñayivi, da já. ¹⁷Jách̄i x̄in̄i Ndióxi ña mé nde co x̄ica nuu nde cáhan nde tuḥun Ndióxi saḥá j̄uhún ta co jáma nde ña tá quiaḥva cája cuḥá ñayivi. Ña cája nde queá cáhan nde x̄ih̄in ñayivi x̄ih̄in ndinuhu ini nde ña saḥan Ndióxi nuú nde caḥan nde. Jách̄i mé nde cúu nde na naḡindahá Ndióxi ta cája chúun nde saḥa Jesucristo.

Cáxi tuḥun Pablo saḥá tuḥun saá ña sáhan Ndióxi nuú ñayivi

3 Co cáhan nde ña yóho xih̄in ndo saḥá ña cún̄i nde caja cáhnu nde mé nde. Jách̄i co x̄in̄i ñúhú nde caꝓa nde in tutu ña cách̄i cúu nde ñayivi ndísáhnu ini nu ndo tá quiaḥva cája java na. ²Mé va ndó cuu quiaḥva ndó tuḥun vaḥa saḥá nde jách̄i tá ná cuni ñayivi tá quiaḥva nandijama Ndióxi ínim̄a ndo x̄ih̄in tuḥun naḡahan nde xih̄in ndo já candaa ini na ña naḡaja vaḥa nde tá naḡaja chúun nde tañu mé ndó. ³Jách̄i náḥa cáxi táhyí a ña cúu ndó tátuhun in carta naḡahyí Jesucristo ta mé nde jánaḥa nde ña nuú ñayivi. Co cúu á in carta naḡahyí nuú tutu. Cúu á ña naḡahyí ínim̄a ȳi Ndióxi, mé a tácu indiví. Ta cúu á in carta ña coḡ naḡahyí nuú yuu jách̄i cúu á tátuhun naḡahyí a ini ínim̄a ñayivi.

⁴Ta cáhan nde ña yóho jách̄i cándeé cáhnu ini nde Ndióxi saḥá ña naḡaja Jesucristo. ⁵Co cúu á saḥá ña quíxi jin̄i mé nde cája nde ña. Jách̄i Ndióxi queá saḥan ndée á nuú nde caja nde chuun yóho. ⁶Ta mé á queá chindeé ndeḥe caja chúun nde cuéntá mé á x̄ih̄in cuéntá tuḥun saá naḥan nu yo. Co cája chúun nde saḥa ley naḡahyí nuú tutu joo cája chúun nde saḥa ínim̄a ȳi Ndióxi. Mé ley cája ña ná quivi ñayivi joo cája ínim̄a ȳi Ndióxi ña ná catacu ñayivi anda ama cáa quiví.

⁷Tá naḡahyí ley Moisés nuú yuu, já nandiyeh̄e ndivaḥa nuu Moisés janda quiaḥva coḡ naꝓu ga candehé na Israel nuu dá. Joo nuú nandiyeh̄e nahá cán naḡasáḥa ndáhva ña janda quiaḥva nandahva ña. Candehé ndó. Vatí nandiyeh̄e ndivaḥa nuú naquixi mé ley, ña cuu chindahá ñayivi cuḥun na indayá ⁸joo ndaja ga ví ndiyeh̄e chága nuú quixi tuḥun vaḥa cáhan saḥa Jesús nuú ñayivi jách̄i saḥan ínim̄a ȳi Ndióxi tuḥun yóho nu yo. ⁹Candehé ndo. Vatí ndató naḥiḡin tá naquixi mé ley ña cuu chin-

dahá ñayivi indayá joo ndaja ga ví ndató coo tá cáxi tuhun í xihín ñayivi ña coó ga cuachi na nu Ndióxi. ¹⁰ Jáchí coó sahá ga ña ndató mé ley naquixi jihna cán tá ná jácatáhan í ña xihín ña ndató chága nasahan Ndióxi nu yo viti. ¹¹ Ta tá ndató nasahiin nuú naquixi ña nandihí saha cán ndaja ga ví ndató chága coo ña sahan Ndióxi nu yo yóho jáchi a ndíhi toho sahá.

¹² Ta sahá ña ndátí tiahva nde coo ña yóho sahá ña cán queá co yihví nde cáhan nde ña xihín ñayivi. ¹³ Co cája nde tá quiahva nacaja Moisés tá nachijahvi da nuu dá xihín in jáhma ña ná a cúní na Israel ña sa cuahan ndáhva ña nandiyehé nuu dá cán. ¹⁴ Joo mé na Israel cán coó nacandaá ini na ndá cuéntá queá nachijahvi Moisés nuu dá. Ta jandá viti ndájí yíi xíní túní ná jáchi vatí cáhvi na tuhun Ndióxi ña nacahyí sanahá joo co cándaá ini na ña jáchi najahvi xíní túní na ta a cúu nuná. Jesucristo cuití va cuu jándinuna xíní túní ná tá cándéé ini na mé á. ¹⁵ Mé na Israel ndájí yíi xíní túní ná jandá viti jáchi tá cáhvi na ña nacahyí Moisés co cándaá ini na ña. Cúu ná tá-tuhun in na jáhvi jáhma nuu. ¹⁶ Joo tá ná ndicó coo ini ñayivi nu Ndióxi já ndinuna xíní túní ná. Cúu á tátuhun ndicava jáhma nasandaji nuu ná. ¹⁷ Jáchí ínima yíi Ndióxi cúu á xitoho í. Ta nu fin mé á, cán núná xíní túní ñayivi. ¹⁸ Ta viti cúu yó tátuhun in yutátá nuú cuu cuni ñayivi tá quiahva cáhnu cúu Ndióxi. Jáchí co ndájí ga xíní túní yo viti sahá ña nacasahá ndíjama Ndióxi mí viti ná nduú tá quiahva cáa Jesucristo. Ta tá quiahva cáhnu cúu mé á quiahva já loho loho nduu cáhnu yó tá quiahva cáa mé á. Já cája xitoho í, mé a cúu ínima yíi Ndióxi.

4 Sahá ña cán queá fin ndacú ini nde cáhan nde tuhun Ndióxi xihín ñayivi jáchi sahá ña natahvi ini Ndióxi sahá nde sahá ña cán queá nasahan mé á chuun yóho nuú nde. ² Mé nde nasacu

xóo nde tóco ndihi ña núu cája jehé ñayivi. Ta co sácú ini nde jándahvi nde ñayivi tá cáhan nde tuhun Ndióxi xihín ná. Ña cája nde queá cáhan nde ndinuhu ña ndaa ta xihín ña yóho sándehé cáxi Ndióxi tá quiahva náha nde nuú ñayivi ña cája nde ña vaha. ³ Tá co cándaá ini ñayivi tuhun vaha sahá Jesús ña cáhan nde xihín ná, cúu á sahá ña xíca na íchi cuahan indayá. ⁴ Jáchí sahá ña co cándúsa na ña cáhan nde xihín ná sahá ña cán queá nandaji xíní túní ná nacaja tiñahá, mé rí cúu xitoho ñuyiví yóho ña ná a cúní na ndá quiahva ndató ndíyehé tuhun vaha cáhan saha Jesucristo, mé a cáhnu ndivaha, mé a cúu á yuhú nuu Ndióxi. ⁵ Mé nde co xíca nuu nde cáhan nde saha mé va nde. Ña cája nde queá xíca nuu nde cáhan nde saha Jesucristo, mé á cúu xitoho í. Ta cáhan nde xihín ndo ña cája chúun nde nu ndo sahá ña cúní nde Jesús. ⁶ Jáchí nasahnda Ndióxi chuun ña ná queta ña yéhe tañu ña naá cán. Ta mé a cán queá nacaja ña ná ndiyehé ínima yo xihín tuhun Ndióxi já queá ná cuu candehé yo ndá quiahva yéhe nuu Jesucristo, ña náha ndá quiahva cáhnu cúu Ndióxi.

Ndá quiahva cuu canduú tá cándéé iní Jesucristo

⁷ Joo tóco ndihi ña ndáyahvi ña nasahan Ndióxi nu yo yóho cúu á ña ndácaan yiquí cuñu í vatí yiquí cuñu í cúu á tátuhun in quiji ndahyí. Nasahan Ndióxi ña ndáyahvi nu yo já queá ná cuu cuni ñayivi ña fin ndéé Ndióxi cája tóco ndihi ñaha ta co cúu á ndéé mí. ⁸ Ta vatí vaxi cuahá tondóhó nu yo joo jáyaha tá jáyaha Ndióxi mí. Ta vatí ndicani ndivaha iní joo co jándihí nahá yo mí. ⁹ Ta vatí ndicuita ñee na mí joo co jándacoo ndáha toho Ndióxi mí. Ta vatí jándicava na mí joo co jándihí na sahá yo chí uun. ¹⁰ Ta ndá nacuu nu xíca nuu í a ihvi toho cahní na mí tá quiahva nacaja na xihín

Jesús. Ta xihín ña ndóho yiquí cuñu í náha ña tácu yíi va Jesucristo ta íin a xoho. ¹¹ Jáchí ndijáá níi quívi ndúcú na cahní na mí sahá Jesucristo. Joo xihín ña yóho núná nu yo jánaħa í nuú ñayivi ña ndácaan ndée mé á ini yiquí cuñu í nani ndúú ñuyívi yóho. ¹² Ta sahá ña xíca nuu nde cahan nde tuhun Ndióxi xihín ndo sahá ña cán queá ndúcú na cahní na ndeħe. Joo sahá ña ndóho ini nde yóho cuu caçu ndaa ínimá ndóhó anda ama cáa quívi.

¹³ Jáchí já cáchí tuhun Ndióxi: “Sahá ña nacandeé ini í Ndióxi sahá ña cán queá nacahan í cuéntá mé á.” Ta quiahva já cája ri ndeħe va sahá ña cándeé ini nde Ndióxi. Ña cán queá co yíhví nde cahan nde saħa mé á nuú ñayivi. ¹⁴ Jáchí cándaċa cáxí ini nde ña tá quiahva najánditacu Ndióxi Jesucristo, xitoho í quiahva já jánditacu a mí coo í xihín mé á. Ta já ndóhó xihín ndeħe xinu coo í nu íin mé á. ¹⁵ Nasacu ini Ndióxi ndoho ini nde tóco ndihi ña yóho saħa mé ndó. Ña cán queá tá ná caja Ndióxi cuahá ñamaní xihín cuahá chága ñayivi já nduu cuahá na ndiquiahva ndixahvi nu á ña ná ndicáħnu mé á.

¹⁶ Sahá ña cán queá co cátați ini xihín ña ndóho í vatí sa cáyatá yiquí cuñu í. Joo ndíyúta ini in in quívi yáha. ¹⁷ Cama chá yáha tóco ndihi ña válí ndóho ini ñuyívi yóho joo tá nandihí nandoho ini já vaxi cuahá ndivaha ña náħnu chága cuéntá mé á nu yo ta anda ama cáa quívi a ndíhi sahá. ¹⁸ Ta co ndítahan nu yo quehé cuéntá sahá ña sándeħé yó viti. Ña ndítahan caja í queá cahvi ini sahá ña a cuú cuní xihín nuu yo. Jáchí vaxi quívi ndihi saħa tóco ndihi ña sándeħé yó viti joo ña a cuú cuní coo a anda ama cáa quívi.

5 Jáchí sa cándaċa ini ña cuú yiquí cuñu í tátuhun veħe nu ndácaan ínimá yo. Mé veħe nu ndácaan ínimá yo yóho cuú á ña vaxi quívi ndihi sahá. Ta anda jáví

nasacu ini Ndióxi quiahva nu yo inga yiquí cuñu nuú coo ínimá yó indiví. Ta mé nuú coo ínimá yó cán a ndíhi sahá anda ama cáa quívi jáchí nacavaha Ndióxi ña. ² Nani ndácaan ínimá yó yiquí cuñu í yóho já ndóho ini ta tána í jáchí xíca quíi ini ndiquehé inga tucu yiquí cuñu saá cuéntá indiví. ³ Jáchí jácandixi Ndióxi mí xihín yiquí cuñu saá cuéntá indiví já ná a cácuú tátuhun na coo jáħma. ⁴ Jáchí nani ndácaan ínimá yo ini yiquí cuñu í yóho tána í ta táħnda ini vatí coo cuú á sahá ña cúní yo jándacoo í yiquí cuñu í. Cuú á sahá ña ndiáva cáħnu ini coo ínimá yo ini in yiquí cuñu saá. Anda jáví jándacoo í yiquí cuñu í ña ndíhi saħa ta ndiquehé yiquí cuñu saá ña cuu cañehé anda ama cáa quívi. ⁵ Jáchí mé Ndióxi queá nasacu tiahva mí ndiquehé in yiquí cuñu saá jáchí mé á queá nasahan ínimá yíi á nu yo já ná cándaċa vaha ini ndá quiahva íin ña sácú ini Ndióxi quiahva nu yo chí nuu.

⁶ Sahá ña cán queá íin ndeé ini jáchí cándaċa ini ña nani ndácaan ínimá yó yiquí cuñu í yóho ndúu xíca yo nu Jesucristo, xitoho í. ⁷ Ta vatí coo xíní yo mé á joo xíca í íchí cuéntá mé á sahá ña cándeé ini mé á. ⁸ Ta co yíhví ga yó quívi viti jáchí cúní chága í jándacoo í yiquí cuñu í yóho já ná cuu cohó coo í xihín Jesucristo, xitoho í indiví. ⁹ Sahá ña cán queá níi tiempo ndúcú yó caja í ña táħán ini mé á xihín. Vatí tácu yo á naxihí yo cúní tá cúní yó cája í ña táħán ini mé á xihín. ¹⁰ Jáchí vaxi quívi tá ná ndique táhan ndihí candita í nuú Jesucristo ndiquiahva tá in tá in í cuéntá nu mé á sahá ña naçaja í xihín yiquí cuñu í ñuyívi yóho, á cuú á ña vaha á cuú á ña núu.

Nandique táhan máni yó xihín Ndióxi sahá ña naçaja Jesucristo

¹¹ Cája cáħnu í Jesucristo xihín ndinuhu ini ta cándaċa ini ña vaxi quívi cohó

candita í nu mé á. Sahá ña cán queá ndíhi ini nde jácahan nde ñayivi ña ná ndicó coo ini na. Ta xíni vaha Ndióxi ña cája nde ta cúni nde ña ná candaá ini ri mé va ndó ña. ¹² Ña cáhan nde yóho co cúu á sahá ña cúni tucu nde ndínehe jícó nde mé nde. Ña cúni nde queá ná coo vaha ini ndó xihín ña cája nde já ná cuu nducú ñehe ndó tuhun nuú na xíca ndínehe jícó mé, na xíca cáhan lán-
da ta coó ña vaha quíxi ínimá ná. ¹³ Vatí cúu nde na tachí nuú ñayivi joo cúu á sahá ña cája nde chuun Ndióxi. Ta tá co cúu nde na tachí já queá cúu á sahá ña vaha mé ndó. ¹⁴ Ta sahá ña quíhvi ini Jesucristo ndehe sahá ña cán queá ndúsa cája nde ña cúni mé á. Jáchi cándaá cáxi ini nde ña naxihí Jesucristo saha tóco ndihi ñayivi ta in nanduú xihín Jesucristo tá naxihí a. ¹⁵ Naxihí Jesucristo saha tóco ndihí ña ná a cátaacú ga í saha mé cuití yo. Joo cúni a ña ná catacú saha mé a naxihí saha yo ta tá nandihí nanditacu tucu a. ¹⁶ Sahá ña cán queá co sándehe ndaa ga nde ñayivi tá quiahva cája ñayivi ñuyiví. Vatí nacahan núu nde saha Jesucristo sanahá joo co cája ga nde já viti. ¹⁷ Jáchi tá in nanduú xihín Jesucristo já nanduú tátuhun ñayivi saá. Ña cán queá nandihí sahá ña yatá ta nanduú ñayivi saá nacaja Ndióxi.

¹⁸ Ta tóco ndihi ña yóho cúu á ña cája Ndióxi jáchi najándique táhan máni á mí xihín mé á sahá ña nacaja Jesucristo. Ta najándacoo a chuun yóho nuú nde ña ná jándique táhan máni nde tóco ndihi ñayivi xihín mé á. ¹⁹ Ta nasahan ñamaní nuú ñayivi ndique táhan máni ná xihín á sahá ña nacaja Jesucristo. Ta coó naquehe Ndióxi cuéntá sahá cuachi nacaja na. Ta ña yóho cúu chuun natahnda nuú nde nacaja Ndióxi ña ná caxi tuhun nde nuú ñayivi ña cúni mé á ndique táhan máni á xihín ná. ²⁰ Mé nde cúu nde na nachindahá Jesucristo ta xíca nde cáhan nde saha mé á. Ta viti cúu

á tátuhun xíca tahví Ndióxi nu ndo tá cáhan mé nde. Ta viti xíca tahví nde nu ndó saha Jesucristo ña ná ndique táhan máni ndó xihín mé á. ²¹ Mé Jesucristo coó nacaja ni in cuachi joo sahá mí nacaja Ndióxi ña ná ndoho Jesucristo tátuhun in da nacaja cuachi. Ta sahá ña nacaja mé á co quehe ga Ndióxi cuéntá sahá cuachi nacaja í ta nanduú ñayivi ndaa nu mé á tátuhun cúni mé á.

6 Ta sahá ña in cúu ndó xihín nde cája chúun yó cuéntá Ndióxi sahá ña cán queá xíca tahví nde nu ndo ña ná a quehe núu ndó ñamaní cája Ndióxi xihín ndo. ² Jáchi já cáchi tuhun Ndióxi já: Tá natandaa tiempo caja í ñamaní xuhun já naxini joho í nuú nacahun. Ta tá naxinu quívi jácaacu u yohó já nachindeé e yohó, cáchi tuhun Ndióxi.

Candehé vaha ndó. Viti ñúhú cúni Ndióxi caja cuahá ñamaní xihín ndo. Ta viti ñúhú cúni a jácaacu a ndohó.

³ Ta ni in túhún ña núu co cája nde já ná a cáhan núu ñayivi sahá chuun cája nde. ⁴ Ña cája nde queá jánaha nde nuú ñayivi ní tiempo ña cúu nde na cája chúun cuéntá Ndióxi. Jáchi sahan ndeé ini nde tá ndóho ini nde. Ta tá ndímaní ñaha nuú nde ta tá vaxi tondóho nuú nde co ndíhi ini nde. ⁵ Jáchi nacani na ndehe ta nataán ná ndehe vecaa ta ndí-
vaa na xoo nde. Ta a juú quiahva najá-
caca chúun na ndehe ta java tañu co quíji nde ta java tañu vaxi joco nuú nde. ⁶ Joo jánaha nde nuú ñayivi ña cúu nde ñayivi cuéntá Ndióxi jáchi ndúu víi nde ta cándaá ini nde ña ndaa ta íin cáhnu ini nde xihín ñayivi ta cúu nde na vaha ini. Ta sahá ña ndácaan ínimá yíi Ndióxi ini nde ta sahá ña quíhvi ini ndusa nde ndohó ⁷ ta sahá ña cáhan nde ña ndaa xihín ndeé nasahan mé á nuú nde sahá ña cán jánaha nde nuú ñayivi ña cája chúun nde cuéntá mé á. Ta sahá ña cúu nde ñayivi ndaa nu Ndióxi sahá ña cán queá

quihvi nuu nde cáni táhan nde xihín rí quini tá cúni rí caja xíxi rí xihín nde. ⁸Java tañu cája cáhnu ñayivi ndehe ta java tañu cáhan ihvi na xihín nde. Java tañu cáhan vaha na sahá nde ta java tañu cáhan núu na sahá nde. Ta java tañu tá quiahva cája na xihín na tuhún quiahva já cája na xihín nde vatí cáhan nde ña ndaa. ⁹Ta java tañu cája na tátuhun co xíni na ndehe vatí xíni vaha na ndehe. Ta mé a ndaa cúu nde tátuhun na sa xíhi vatí tácu yíi va nde. Cája xíxi na xihín nde joo co sáhní na ndehe. ¹⁰Ta java tañu ndúu cuéha ini nde joo ní tiempo cájii ini nde. Ta java tañu cándáhví ndivaha nde joo já cuahá ndivaha na cúu ná tátuhun na cuicá viti jáchi nacaxi tuhun nde tuhun Ndióxi nu ná. Ta ndaa nde tátuhun na coo ñaha nuu joo ín ndihi ñaha cuéntá Ndióxi nuu nde.

¹¹Ñani mí i, na ndúu ñuu Corinto jan. Tá cáhan nde xihín ndo co chíjehé tuhun nde nu ndo jáchi quihvi ini nde ndohó xihín ndinuhu ini nde. ¹²Vatí co quihvi ini ndo ndehe tá quiahva quihvi ini nde ndohó joo co jándacoo nde ña quihvi ini nde ndohó. ¹³Sahá ña cán queá xíca tahví i nu ndo tá quiahva cája in dataa tá xíca tahví da nuu jahyi da. Ña cúni queá ña ná quihvi vaha ini ndo yehe tá quiahva quihvi ndivaha ini i ndohó.

**Co ndítahan quihvi
nuu na cúu cuéntá Jesús
xihín ñayivi cuéntá ñuyívi**

¹⁴Cuéntá coo ndó ná a ndique táhan ndó xihín na co cúu cuéntá Jesús jáchi coo in cúu na xihín ndo. Jáchi ndaja cuu ndique táhan ña vaha xihín ña núu. Ta ndaja cuu ndique táhan ña yehe xihín ña naá. Ni in ña yóho a cúu coo já. ¹⁵Ta ama cuéhe Jesucristo coo a xihín Satanás, mé rí quini. Ta quiahva já ama ná cuu ndique táhan in na ndíco íchi cuéntá Jesús xihín in na co cúu cuéntá mé á. ¹⁶Ta ama ná cuu cachi ndó ña in cuu

nu cája cáhnu na Ndióxi xihín nu cája cáhnu na yoco. Jáchi mí cúu yó tátuhun veñuhu Ndióxi, mé á tácu indiví. Ta já nacachi a já:

Ndacaan i ínimá na cúu cuéntá mé i ta caca nuu i xihín ná.

Yehe cacuu u Ndióxi ña caja cáhnu na, ta mé ná cacuu na ñayivi, na cacomí i cuéntá saha, cáchi Ndióxi.

¹⁷Sahá ña cán queá já nacachi Ndióxi, xitoho í já xihín ná:

Tavá ndo mé ndó tañu ñayivi quini jan. Caxoo ndó nu ná ta a cája ndó ña núu ña cája na já ná cuu ndiquehe vaha i ndohó.

¹⁸Ta já yehe cacuu u tátá ndo, ta mé ndó cacuu jahyi tao i xihín jahyi jíhi i, cáchi Ndióxi, mé a cúu cája tóco ndihi ñaha.

7 Candehé ndó ñani máni, na cúu cuéntá Jesús. Ña yóho cúu tuhun nasahan Ndióxi nu yo. Sahá ña cán queá co ndítahan nu yo caja í in ña núu ña cuu jácaquini yiquí cuñu í á ínimá yo. Ña ndítahan caja í queá cayihvi yo Ndióxi ta cacu ini ndaja víi yo mí já ndiquiahva í mí ndáha mé á.

**Cájii ini Pablo jáchi nandíco coo
ini na ndúu ñuu Corinto**

²Xíca tahví nde nu ndo ña ná a cáji nuu ga ndó nu ínimá ndo ta ná quihvi ini ndo ndehe. Jáchi ni in ndó coo nacaja xíxi nde xihín ta ni in ndó coo najátivi nde ta ni in ndó coo najándahvi nde. ³Co cáhan i ña yóho xihín ndo sahá ña cúni candehé ndaa i ndohó, vaha. Jáchi janda jihna va nacachi i xihín ndo ña ñúhu ndó ínimá i. Ta vaha ri catacu u ta vaha ri quivi i joo quihvi ini tá quihvi ini i ndohó. ⁴Mé a ndaa cándeé cáhnu ndivaha ini i ndohó ta cájii ini i xihín ña cája ndó. Ta tá ndícuhun ini i saha ndo já ndíndacú ini i ta ndícutú ndaa ini i xihín ña cájii ini i vatí ndóho ini i.

⁵ Jandá naní naxinü nde estado Macedonia chí a cuú canduu vaha nde jáchi ndáchí nacuu ndáca náha tondóhó nuú nde. Jáchi ndijáá quixi ñaha jáquihvi ndehe janda quiahva yíhvi nde ndúu nde yóho. ⁶ Joo sáhan Ndióxi tuhun ndeé ini ñayivi ndúu cuéha ini. Ña cán queá nasahan tuhun ndeé ini nde jáchi naxinü Tito nu ndúu nde yóho. ⁷ Ta a juú sahá ña naxinü da yóho cuití va, vaha. Nandihvi tuhun ndeé ini nde jáchi nacajii ndivaha ini mé dá nacaja ndóhó. Ta nandicani da nuú nde ña xíca ndivaha ini ndó cuni ndó ndehe ta anda quiahva táhnda ini ndó sahá nde. Ta nacachi da xihín i ndá quiahva ndicani ini ndó sahá i ta xihín ña yóho nacajii chága ví ini i.

⁸ Vatí nacacuéha ini ndó xihín carta nacahyí i nu ndo joo viti co táhnda toho ini i ña nachindahá i ña nu ndo. Vatí natáhnda ini i tá naxini i ña nacacuéha ini ndó tixi chá tiempo ⁹ joo cájii ini i viti. Co cúu á sahá ña nacaja cuéha carta cán ndohó. Cájii ini i jáchi tóco ndihi ña nacaja cuéha ini ndó cán nanducú ñehe a ndohó nu Ndióxi. Mé ndó nacaja ndeé ini ndó tá quiahva cúní Ndióxi. Sahá ña cán queá cándaá ini nde ña coo nacaja núu nde xihín ndo. ¹⁰ Jáchi tá cácuéha iní ta tá cája ndeé iní tá quiahva cúní Ndióxi caja í já queá chindeé a mí ndicó coo iní. Ta xihín ña yóho jácacu a mí ta coo ñaha ndítahan táhnda iní saha. Joo tá cácuéha ini ñayivi ñuyiví co ndicó coo ini na sahá ña cán queá ndihi saha ná indayá. ¹¹ Cándehé ndó ndaja nacaja ndeé ini ndó tá nacacuéha ini ndó tá quiahva cúní Ndióxi. Joo tá coo ña yóho ná yaha ta a jándacoo toho ndó cuachi nasacaja ndó, nduu. Joo viti a juú quiahva naxojo ini ndó saha mé cuachi ta nayihví ndo sahá. Ta tá nandihí já naxica ini ndó cuni ndó yehe ña ná chindeé e ndohó. Ta anda já nasahjin tiáhva ndó jándoho ndó ini da nacaja cuachi cán. Ta xihín ña yóho náha ña co táhan ini ndó xihín

cuachi nacaja da cán. ¹² Ña cán queá tá nacahyí i carta cán nu ndo coo nacaja i ña sahá da nacaja cuachi cán. Ta ni coo nacaja i ña sahá ñayivi nandoho ini sahá cuachi nacaja da. Nacahyí i ña jáchi xihín ña yóho cuu jánaha ndó nu Ndióxi ndá quiahva quihvi ini ndó ndehe. ¹³ Ta ña yóho queá sáhan tuhun ndeé ini nde.

Joo nandindeé chága ví ini nde ta nacajii iní nde tá naxini nde ña cájii ini Tito. Jáchi mé ndó nachindeé ndó da ña ná ndivaha ini da. ¹⁴ Jáchi mí i sa nacachi i xihín Tito ña cájii ini i xihín ña cája ndó ta coo nacandoo núu i nu Tito xihín ña nacachi i xihín dá saha ndo. Joho nacandoo vaha johó i nu dá jáchi tá quiahva cáhan nde ña ndaa xihín ndo quiahva já nacahan ndaa nde xihín mé dá. Ta ña cáchí nde queá cájii ini nde xihín ña cája ndó. ¹⁵ Ta cásahá quihvi ini chága da ndohó tá ndicuhun ini da ña nacaja ndó ña cúní mé dá. Ta nasahjin toní ñuhú ndó xihín dá ta nandiquehe ndó da xihín ndinuhu ini ndó. ¹⁶ Ta cájii ndivaha ini i jáchi cuu candeé ini i ndohó sahá ña cája vaha ndó.

Játaca na jihún quiahva na nuú na ndahví

8 Ta viti cúní nde ndicani nde nu ndóhó, ñani i ndá quiahva cája Ndióxi ñamaní xihín na cúu cuéntá Jesús ndúu estado Macedonia. ² Vatí a juú quiahva cuahá tondóhó quixi nu ná joo cájii tá cájii ndivaha ini na. Ta vatí cúu ná ñayivi cándahví ndivaha joo ín vaha ndivaha ini na jóco ná jihún tátuhun na cuicá. ³ Cáhan ndaa i nu ndo ña cájii ini na jásá na ña ín nu ná ta jandá java na coo cuahá nu ná sáhnda java na ña. ⁴ Ta xihín ndinuhu ini na naxica táhvi na nuú nde ña ná quiahva nde ñamaní nu ná ñehe táhvi ná chindeé na na cúu cuéntá Jesús ndúu Jerusalén. ⁵ Chí nayaha quiahva najasá na ñaha na chí coo nacahan nde caja na já. Jáchi ji-

hna ñúhú ñandiquiahva na mé ná ndáha Ndióxi, xitoho í ña ná cajú na ña cúni mé á. Andá já ñandiquiahva na mé ná ndáha mé nde ná chindeé ña ndehe. ⁶ Sahá ña cán queá naxica tahví nde nu Tito ña ná saa tucu da nu ndó jan já ná jáxinu coo da nuú chuun ñacasáhá cajú da jihna ña játaca da ña jóco ñani uun ndó. ⁷ Jáchi mé ndó yójó joho ndó nu ndíhi ña cajú ndó. Yójó ndó xihín ña cándee ini ndó Ndióxi. Ta yójó ndó xihín tuhun cáhan ndó cuéntá Ndióxi. Ta yójó ndó xihín ña xini ndo. Ta yójó ndó xihín ña ndíhi ini ndó cajú ndó ña vaha xihín ñayivi. Ta quiahva já yójó ndó xihín ña quíhvi ini ndó ndehe. Ta quiahva já ndítahan cayojó ndo nuú ña jása ndo nuú ña ndahví.

⁸ Ña cáhan í xihín ndo yóho co cúu á in chuun sáhná í nu ndo. Ña cúni queá ná candaá ini ndó ndá quiahva chindeé ña cán ñayivi xihín ndinuhu ini na. Ta tá cajú ndó tá quiahva cajú ña cán já queá jánaha ndó ña mé a ndaa quíhvi ini ndó ñayivi. ⁹ Jáchi sa candaá vaha ini ndó ña ñatahvi ini Jesucristo, xitoho í saha yo. Ta vatí ñasacomí a tóco ndíhi ñaha joo ñajándaco a ña ta ñandaja ndáhvi a mé á ña ná cuu nduu ndó tátuhun ña cuicá ndivaha. Ta ñacaja mé á ña yóho jáchi quíhvi ndivaha ini a ndohó.

¹⁰ Cajú í cuéntá ña vaha chága ná jáxinu coo ndó ña ñacasáhá cajú ndó ava. Jáchi jihna ñúhú mé ndó ñacasáhá ndó játaca ndó jiuhún jan ta ñacaja ndó ña xihín ndinuhu ini ndó. ¹¹ Candehé ndo. Xini ñúhú jáxinu coo ndó ña ñacasáhá cajú ndó jan. Ta ná cajú ndó ña xihín ndinuhu ini ndó tá quiahva ñacaja ndó janda tá mé saha. Ta xini ñúhú quiahva ndó ña cuu jása ndo ¹² jáchi ndá ña cúni jása ñaha já ndíquehe vaha Ndióxi ndá ña cuu jása ña. Sahá ña cán queá xini ñúhú quiahva ndó ña cuu quiahva ndó jáchi co xica Ndióxi nu yo quiahva í ña co cómi yo.

¹³ A cáhan ndo ña co ndítahan nuú ña cán cajú chuun na nani cajú chuun mé ndó ña ná chindeé ndó na. ¹⁴ Ña cúni Ndióxi queá ná a ndímani ni in ñaha nu táhan ndó. Jáchi ña ndímani nuú ña cán, íin cuahá nu ndóhó viti ña ná cuu chindeé ndó ña. Joo inga tañu ña ndímani nu ndóhó, coo a nuú ña cán ta já cuu chindeé ña cán ndohó. Ta quiahva já canduu in nuú xihín táhan ndó. ¹⁵ Já cáchi tuhun Ndióxi já: “Ni coo ñacayojó a nuú ña ñajátaca cuahá. Ta ni coo ñandímani á nuú ña ñajátaca chá ña.”

Tito xihín ña xica xihín dá

¹⁶ Ndíquiahva í ndixahvi nu Ndióxi jáchi ñacaja mé á ña ná ndíhi ini Tito saha ndo tá quiahva ndíhi ini mí í saha ndo. ¹⁷ Jáchi ñacandúsa da cajú da ña ñasahnda í nu dá. Ta sa ndícani ini ri mé dá saha ndo ta saha ña cán queá cúni da coto nihni da ndohó cuéntá mé dá viti.

¹⁸ Ta chindahá í in dataa, da cúu cuéntá Jesús sa da xihín Tito jan. Ta tóco ndíhi ñayivi ndúu java ga veñuhu cáhan vaha na saha da cán ta saha ña cajú chuun vaha da cáxi tuhun da tuhun vaha saha Jesús nuú ñayivi. ¹⁹ Ta mé ña cúu cuéntá Jesús, ña táca ndijáá veñuhu yóho ñandacaxi na da ña ná caca da xihín nde cañehe nde jiuhún cuhun nde ñuu Jerusalén. Ta tá cajú nde ñamani xihín ñayivi cán já queá jánaha nde ña mé a ndaa táhyí cúni nde chindeé nde na. Ta xihín ña yóho cajú cáhnu nde Ndióxi. ²⁰ Jáchi co cúni nde ña ná cáhan núu ñayivi saha ña cajú nde xihín jiuhún cuahá cán, ña ñajátaca ndó. ²¹ Sahá ña cán queá ndíhi ini nde cajú nde ña vaha. Ta a juú nu Ndióxi cuití va ndíhi ini nde cajú nde ña vaha jáchi cúni nde cajú nde ña vaha nuú ñayivi viti.

²² Ta xihín mé ñani, da chindahá í nu ndó jan chindahá í inga tucu da cúu cuéntá Jesús. Mé da yóho cuahá ndivaha tañu ñanaha da ña íin ini da cajú da ña

vaha xihín ñayivi. Ta viti xíca chága ini da caja da ña jáchi cándeé ini da ña a jándacoo núu ndó da. ²³Ta ndá na ná ndaca tühún ndohó saha Tito ndítahan cahan ndó xihín ná ña cúu dá da xíca xihín mí i. Ta cahan ndó ña in nuú cája chúun da xihín i chindeé nde ndohó. Ta tá ná ndaca tühún na ndohó sahá java ga na cúu cuéntá Jesús cuahan xihín dá ndítahan cahan ndó ña cúu ná na nāchin-dahá na cúu cuéntá Jesús táca veñuhu chóho. Ta cahan ndó xihín ná ña cúu ná na cája cáhnu Jesucristo. ²⁴Ta xíní ñúhú jánaha ndó nuú na cán ña mé a ndaa táhyi quíhvi ini ndó na já ná candaá ini na táca veñuhu cán ña íin sahá nde cájii ini nde xihín ndo.

Sa natata jühún cühun nuú na cúu cuéntá Jesús

9 Co xíní ñúhú cahyí chága i nu ndo sahá jühún ña játaca ndó chindeé ndó na cúu cuéntá Jesús ñuu Jerusalén. ²Jáchi sa xíní vi ña íin vaha ini ndó caja ndó ña. Ta ndivaha ini i tá cáxi tühun i nuú na ndúu estado Macedonia ña mé ndó, na ndúu estado Acaya jan nasacu ini ndó chindeé ndó ñayivi janda ava. Ta cuahá na ndúu estado Macedonia nandindeé ini na chindeé na ñayivi sahá ña vaha ini mé ndó. ³Joo chindahá i na cúu cuéntá Jesús yóho nu ndo já queá ná a cándoo núu i jáchi nacahan vaha i saha ndo nuú na yóho. Ta ña cúní queá ña ná coo tiahva ndó ndiquiahva ndó jühún ña najátaca ndó jan tá quiahva nacachi i xihín ná. ⁴Jáchi tiahva náá java na ndúu estado Macedonia saa na xihín i ta cuni na ña co ndúu tiahva ndó xihín mé jühún. Tá ná yaha ña yóho ta já cacahan ndivaha nuú nde caja ndó xihín ña jan sahá ña nasandeé cáhnu ini i ndohó ta sa mé quiahva já cacahan ri nuú ndohó va. ⁵Ta saha mé ña jan queá nacahan i ña xíní ñúhú caça i ñamaní nuú na cúu cuéntá Jesús yóho ña ná cühun na

coto nihni jihna ñúhú na ndohó. Ta já ná chindeé na ndohó nu játaca ndó jühún ña nasahan ndó tühun ndó quiahva ndó jan. Já queá ná coo tiahva jühún cán tá ná saa i ña ná nahá ña sahan ndó jühún jan sahá ña íin maní ini ndó ta co sahan ndó ña xihín ña ndúsa.

⁶Xíní ñúhú ndicuhun ini ndó ña yóho: Da xútu loho, chá va jáquee da. Da xútu cuaha, cuaha jáquee da. ⁷Tá in tá in ndó xíní ñúhú quiahva ndó tá quiahva nasacu ini ndó quiahva ndó. A quiahva cajíhnda joho ini ndó ñaha ta ni a quiahva ndó ña xihín ña ndúsa. Jáchi quíhvi ini Ndióxi na cájii ini jasá ñaha. ⁸Ta cuu quiahva Ndióxi cuahá ndivaha nuú ña vaha nu ndó já queá ná a ndímaní ni in ñaha nu ndo. Jáchi joho cayojó joho a nu ndo já ná cuu chindeé ndó na ndímaní ñaha nu nani ná cacuu a nuú ña vaha. ⁹Jáchi já cáchi tühun Ndióxi já: Cuahá ndivaha ñaha jasá Ndióxi nuú na ndahví, ta já coo ña vaha cája mé á xihín ñayivi anda ama cáa quívi, cáchi tühun Ndióxi.

¹⁰Jáchi Ndióxi queá sahan tata nuú in dataa já ná cutu da ña. Ta mé a cán sahan ña cuxu da viti. Ta quiahva já caja Ndióxi xihín ndo. Quiahva mé á ña xíní ñúhú ndo já ná cuu chindeé chága ví ndó ñayivi. Ta já queá ñeñe táhvi ndó canduu vaha ndó sahá ñamaní cája ndó. ¹¹Ta já xínu ndó cacomí ndo cuahá ndivaha nuú ña cuicá ta xihín ña yóho cuu chindeé cuaha ndó ñayivi xihín á. Ta mé jühún játaca ndó jan tá ndiquiahva nde ña nuú na ñuu Jerusalén já queá ndiquiahva na cán ndixahvi nu Ndióxi sahá. ¹²Jáchi mé jühún játaca ndó cán tá ná ndiquiahva nde ña nuú na cúu cuéntá Jesús cán já queá chindeé a na xihín ña ndímaní nu ná. Ta xihín ña yóho ndiquiahva ndivaha na cán ndixahvi nu Ndióxi. ¹³Ta já caja cáhnu na Ndióxi jáchi xihín ña cája ndó yóho nahá ña co quehe núu ndó

tuhun vaha cahan saha Jesucristo. Jári caja cáhnu na Ndióxi sahá ña vaha íin ini ndó xihín ná. Jáchí chindeé ndó na xihín ña jásá ndó nu ná ta chindeé ri ndó java ga ñayivi. ¹⁴Ta ndiquiahva na ndixahvi nu Ndióxi saha ndo jáchi xihín ña caja ndó náha cáxi a ña caja cuaha Ndióxi ñamaní xihín ñayivi. ¹⁵Ndixahvi Ndióxi jáchi najasá mé á in ña cáhnu ndivaha nu yo ta ni co ñehe yo tuhun ndá quiahva ndicaní ña.

Cáhan Pablo saha mé dá

10 Yehe cúu Pablo ta cúní caca i ñamaní nu ndo. Joo cúní cahan víi i ña nu ndo tá quiahva cahan víi Jesucristo xoho. Ndúu java na tañu ndó ta cáchí na ña tá íin i tañu ndóhó já cúu u in taa uun ini. Joo cáchí na tá íin xícá i já cúu u da co yihví cahan ndacú xihín ndo. ²Ta viti xíca tahví i nu ndo ña ná a caja ndó ni in ñaha ña cuu jánani i ndohó saha. Tá ná saa i coto nihni i ndohó jan co cúní jánani i java ndó, na jácojo cuachi jatá nde, na cáchí ña caja nde tóco ndihi ñaha tá quiahva caja ñayivi ñuyíví. Jáchí mé a ndaa sácú ini i saa i quihvi táhan i xihín na jan. ³Vatí cúu yo ñayivi ndúu ñuyíví joo co caja nde tá quiahva caja ñayivi ñuyíví. ⁴Jáchí ña chindeé ndehe co cúu á ña chindeé ñayivi ñuyíví. Joo ña chindeé ndehe cúu ndeé Ndióxi ña sahan mé á nuú nde já ná cuu jándihi nde sahá ña caja tiñhá sacuahá. ⁵Ta quiahva já jándihi nde sahá ña caja ihví xihín Ndióxi ta xihín ndeé mé á jándihi nde sahá ña cahan ñayivi, na caja cáhnu mé jáchi co xíní na Ndióxi. Ta tóco ndihi ña cáhvi ini nde ndiquiahva nde ña ndáha mé á já ná caja nde tóco ndihi ña cúní Jesucristo. ⁶Ña cán queá tá ná ñaha ña íin tiáhva ndó caja ndó tóco ndihi ña nasahnda nde nu ndó já queá cacu ini nde jánani nde ndá na nacuu, na co cúní caja ña sáhdá Jesucristo.

⁷Mé ndó co xíní ndó ndá quiahva cáa ínimá ñayivi jáchi sándehe ndó ña cáa chí jata cuití va. Joo tá mé a ndaa táhyí cáhán java ndó ña cómí Jesucristo cuéntá saha ndo xíní ñúhú quehe ndó cuéntá ña cúu ri ndehe va na cómí Jesucristo cuéntá saha. ⁸Co cáchan nuú i caja cáhnu loho i mí i sahá chuun nasahan Ndióxi nuú i. Jáchí nacaja mé á ña ná cahnda i chuun nu ndo jáchi mé Jesucristo, xitoho í nasahan chuun nuú i ña ná jácuahnu i ndohó tá quiahva cúni mé á. Ta co cúni a ña ná jándihi i saha ndo. ⁹Co cúni ña ná cahan ndo ña jáyihví i ndohó xihín carta chindahá i nu ndo. ¹⁰Ndúu java na ta cáchí na ndacú ndivaha yuhú u cahan i nu carta cáhyí i. Joo tá íin i xihín ndo co náha i ña cúu u da jáyihví ndohó jáchi tá cásáha cahan i xihín ndo co náha i ña cúu u da ndítahan coo toní ñúhú ñayivi xihín. ¹¹Joo na xíca cahan ña yóho xíní ñúhú candaá ini na ña tá quiahva ndacú yuhú i tá cahan i xihín carta tá íin xícá i quiahva já caja i tá ná xinu coo i tañu ndó jan.

¹²Mé a ndaa co sahan i ínimá i jácatáhan i mí i xihín na caja cáhnu mé jan. Joo ndíá cáa mé caja na jan tá jácatáhan ndaja táhan mé va na ta xihín ña yóho náha ña tóntó ndivaha caja na. ¹³Co caja cáhnu i mí i jáchi co ndítahan nuú i caja i ña. Cáhan cuití va i sahá chuun nasahan Ndióxi nuú i caja i cuéntá mé á ta mé á queá nachindahá yehe saa i anda nu ndúu ndó jan. ¹⁴Co caja cáhnu i mí i tá cahan i sahá chuun nasahan Ndióxi nuú i caja i. Jáchí mé nde cúu nde na nu cuití nasahan nacahan nde tuhun vaha saha Jesucristo nu ndo. ¹⁵Sahá ña cán queá candaá vaha ini ndó ña co cahan nde sahá chuun najácava sahá inga na. Ta ni co yáha nde caja cáhnu nde mé nde sahá chuun caja nde yóho. Ña cúní nde queá ná candeé chága ini ndó Jesucristo nani caja chúun chága nde tañu ndó tá cúní Ndióxi. ¹⁶Ta cúní

nde cahan nde tuhun vaha saha Jesús nuú ñayivi, na ndúu xíca chága nuú ñuu Corinto jan. Joo co cúní nde quihvi nuu nde nuú sa nacaja chúun inga na já ná a cája lándá nde sahá chuun nacaja inga na.

¹⁷ Ta já cáchí tuhun Ndióxi já: “Ndá na cúní caja lándá, xíní ñúhú caja lándá na sahá ña náhnu nacaja Ndióxi xihín ná.” ¹⁸ Jáchí co táhán ini Ndióxi xihín na ndínehe jíco mé joo ndínehe jíco Ndióxi ñayivi tá táhán ini a xihín ña cája na.

Cáhan Pablo sahá na co cúu apóstol

11 Xíca tahví i nu ndo ña ná a quehe ndó cuéntá sahá ña cája i tá ná caja i tátuhun in taa tachí. Caja ndó ñamaní xihín i. ² Ndióxi queá nacaja ña ná quihvi ndivaha ini i ndohó sahá ña cán queá co cúní ña ná jándacoo ndó íchí cuéntá mé á. Cája i tátuhun cája da cuínú jáchí nasacu ini i ndiquiahva ví i ndohó ndáha Jesucristo tátuhun cája in dataa ndiquiahva da jahyi jíhí da, ná cúu ña tacú ndinuhu nuú da cacuu yí ña. ³ Á co ndícuñun ini ndó ndaja nacaja tiñáhá sacuahá tá najándahvi rí ña naní Eva sa-nahá. Ta viti yíhví i ña ná jándahvi java ñayivi ndohó tá quiahva najándahvi rí mé ná. Jáchí viti cándéé ini ndó Jesús ta cája cáhnu ndó mé á xihín ndinuhu ini ndó. Joo yíhví i jándacoo ndó ña jan. ⁴ Jáchí mé ndó sahan ndó ñamaní ña ná saa ndá ñayivi nacuu va vatí jánaha na ña tuhún saha Jesucristo. Co jánaha na ndohó tá quiahva najánaha mé nde nu ndo jáchí jíin va cahan na saha íni-ma yí Ndióxi ta jíin va cáchí na jáca cu Ndióxi ñayivi. Joo nandiquehe vaha ndó na. ⁵ Ta cáhán ndo ña cúu ná na apóstol, na náhnu ndivaha joo xíní vaha i ña co cúu ná na vaha chága a juú ga yehe. ⁶ Vatí co tiahva i cahan ví i joo íin vaha xíní túní i jánaha i tuhun Ndióxi nu ndo.

Ta xíní vaha ndó ña yóho jáchí cuahá tañu najánaha vaha i tuhun Ndióxi nu ndo.

⁷ Java tañu cáhán i ña coó nacaja vaha i jáchí coó naquehe e yahvi nu ndo tá nacahan i tuhun Ndióxi xihín ndo. Ta java tañu cáhán i ña coó nacaja vaha i tá najánuu i mí i já ná cuu ndindita jíco ndohó. ⁸ Mé a ndaa cúu á tátuhun nacandaa joho i jiuñun nuú java na cúu cuéntá Jesús ta naquehe e yahvi i nuú na cán ña ná quixi i caja chúun i tañu mé ndo. ⁹ Ta tá naxini ñúhú i in ñaha tá nasahin tañu ndó jan coó najáquihvi toho i ndohó sahá ña naxini ñúhú i. Jáchí mé na cúu cuéntá Jesús, na naquixi Macedonia nasahan na nuú i ña naxini ñúhú i catacu u. Mí i coó naxeen toho i jáquihvi i ndohó. Ta a cája toho i ña viti. ¹⁰ Cáhan i ña ndaa xihín ndo jáchí íin Jesucristo xihín i. Ta ni in ñaha a cájí nuu toho nuú i cahan i ña yóho nuú na ndúu estado Acaya. ¹¹ Coto a cáhán ndo ña co quíhví ini i ndohó sahá ña cahan i quiahva já xihín ndo. Jáchí xíní vaha Ndióxi ña quíhví ndivaha ini i ndohó.

¹² Joo a jándacoo toho i caja i ña cája i yóho já ná a quiahva i ñamaní nuú na cán ndínehe jíco na mé ná. Jáchí cáchí na cája chúun na cuéntá Ndióxi tá quiahva cája ndehe. Joo co cúu á ña ndaa. ¹³ Mé a ndaa co cúu toho na jan apóstol cuéntá Jesucristo vatí ndája na mé ná tátuhun apóstol. Ta jándahvi na ñayivi tá cáchí na ña cúu ná na apóstol. ¹⁴ Joo co ndítahan catóntó yo sahá ña yóho jáchí janda Satanás, mé tiñáhá sacuahá ndája rí mé rí tátuhun in táto Ndióxi, ña yehe ndivaha. ¹⁵ Ta jári na ndíco jata rí cán co yáncá toho na ndája na mé ná tátuhun ñayivi cája ña vaha. Joo vaxi quíví ndiquehe na yahvi sahá ñaha nacaja na.

Ndóho ini Pablo sahá ña cúú dá apóstol

¹⁶ Ta ná caħan tucu u ña yóho xihin ndo: coto a cáħán ndo ña cúú u da nacatachí. Joo tá cáħán ndo ña cúú u da nacatachí i quiahva loho ndó ñamaní nuú i ña ná caħan i xihin ndó tátuhun in da tachí já ná cuu ndiñehe jícó loho i mí i. ¹⁷ Tá cáħan lándá i yóho co cúú á tuhun nasahan Ndióxi nuú i. Cáħan i ña tátuhun in da nacatachí cuítí va. ¹⁸ Ta sahá ña ndúu cuahá na cátoó ndiñehe jícó mé sahá ña cája na ñuyiví yóho sahá ña cán queá ná caja ri yeħe va quiahva já. ¹⁹ Mé ndó cáħán ndo cúú ndó ñayivi ndíchí ndivaha jini joo cájii ini ndó táa johó ndó nu cáħan ñayivi tachí cán xihin ndo. ²⁰ Ta ni co sáħní ndo mé ndó tá cája ndúsa na cán xihin ndo caja ndíví ndó nu ná vatí queħe na ñaha cómí ndo. Ta jándahvi na ndohó ta queħe núu na ndohó jandá cáni na jahndá nuu ndo. ²¹ Á cáħán ndo ña ndítahan cacahan nuú i sahá ña coo nasahan ndeé toho ini nde caja nde tá quiahva cája na jan xihin ndo.

Joo tá co sáħní na jan mé ná cája lándá na, caja ri yeħe va já vatí cáħan i ña yóho tátuhun in da tachí. ²² Ta tá cáħan lándá na jan ña cúú ná na hebreo, mé a ndaa da hebreo cúú ri yeħe va. Ta tá cáħan lándá na jan ña cúú ná na Israel, mé a ndaa da Israel cúú ri yeħe va. Ta tá cáħan lándá na jan ña naquixi na chichi Abraham, mé a ndaa da naquixi chichi Abraham cúú ri yeħe va. ²³ Ta tá cáħan lándá na jan ña cúú ná na cája chúun cuéntá Jesucristo, mé a ndaa yeħe cúú da cája chúun chága cuéntá mé á. Vatí cáħan i tátuhun in da tachí joo mé a ndaa cuahá chága cája chúun yeħe a juú ga na jan. Cuahá chága tañu nachicaan na yeħe vecaa a juú ga na jan. Ta cuahá chága tañu nacaja xixi na xihín yeħe a juú ga na jan. Ta cuahá ndivaha tañu sa yátí quivi i a juú ga na jan. ²⁴ Ta uhun tañu najácaxáħan

na Israel yeħe xihín churú. Ta in tá in táhndá cán najáxinu na churú jatá i o-co saħun comi tañu. ²⁵ Ta uni tañu najácaxáħan na yeħe xihín vara ta in tañu nacati na nacuun na yuú yeħe. Ta sa uni tañu nasacoo barco, mé dó cuahān i cán caħá tañuhú. Ta nasanúu i nuú tañuhú in ñuu ta in ndiví. ²⁶ Ta ndóho ndivaha ini i nu xíca nuu i jáchí cuahá tañu ndúcu tani i xihín yuta. Ta jandá ta cuahá a fhvi queta nuú i. Ta naxíca iyo i tañu na ñuu i xihín tañu na tóho. Ta tá fin i ñuu náħnu á fin i yúcu á fin i tañuhú já vaxi tá vaxi tondóhó nuú i. Ta jandá tañu na cáchí cúú cuéntá Jesús vatí co cúú na naquixi tondóhó nuú i. ²⁷ Ta cánaá i cája chúun i jandá ndíhíhvi ndivaha i. Ta cuahá tañu co quíji vaha i. Ta cuahá tañu naquixi joco nuú i ta naquixi ña íchí ini i ticuíf ta jandá ínimā uun i fin i jáchí co ñeħe e ña cuxu u. Ta cuahá tañu ndóho ini i sahá ña vixi xíní i jáchí coo jáħma candixi i.

²⁸ Ta vatí ndóho i ña yóho xihín java ga ñaha joo ndícani tá ndícani ini i saħa tóco ndihi na cúú cuéntá Jesús, na táca ndijáá veñuhu. ²⁹ Jáchí tá cuítá ini ñayivi já cúú á tátuhun cuítá ri ini yeħe va xihín ná. Ta tá ndícava in na nuú cuachi cája inga na já queá xójo ndivaha ini i xihín na najándicava ñahá cán. ³⁰ Ta tá fin in ñaha ña cuu caħan lándá i saħa já ná caħan lándá i sahá ña náħa ña coo cuahá ndée mí i. ³¹ Ta Ndióxi, tátá Jesucristo, xitoho í, mé a ndítahan caja cáħnu i anda ama cáa quiví xíní vaha ña cáħan i ña ndaa xihín ndo. ³² Jáchí in tañu nasahii in i ñuu Damasco ta ndaja coo da cúú gobernador, da nacaja chúun nu rey Aretas nasahnda da chuun ña ná chicaji na yéħe ñuu cán já ná cuu tiin na yeħe. ³³ Joo java na cúú cuéntá Jesús najánuu na yeħe ini in toyicá chí ventana mé corra yuu ndájí ñuu cán já nacuu najácacu na yeħe.

Ña naxini Pablo ñacaja Ndióxi

12 Ni in ñaha co ñehe e tá ndínehe jícó i mí i. Joo já ndítahan nuú i ndicani i nu ndo sahá ña naxini i cuéntá indiví, ña najánaha Ndióxi nuú i ta sahá ña ñacachi mé á xihín i coo. ² Sa fin uxu comí cuiã ñayaha ña yóho. Najándaa Ndióxi yehe, da cãndeé ini i Jesucristo ñasahan i indiví uní nu fin mé á. Co xini yehe á ñandaa yiquí cuñu i xihín i á ñacandoo a ñuyiví yóho. In túhún Ndióxi xini. ³ Joo xini vaha i ña yehe cúu da ñasahan cán vatí co xini i á ñandaa yiquí cuñu i á ñacandoo a ñuyiví yóho. Ndióxi cuití va xini. ⁴ Joo xini vaha i ña ñasahan i nu ndató ndivaha indiví. Ta mé cán naxini joho i tuhun, ña co ndínehe e ndaja ndicani i ña nuú ñayivi ta ni co sahan Ndióxi ñamaní nuú i ndicani i ña nu ná. ⁵ Cuu ndínehe jícó i mí i sahá ña naxini i yóho joo a cája toho i ña. Vaha chága ná cajú lãnda i sahá ña coó toho ndée mí i. ⁶ Ta tá ná cacu ini i ndínehe jícó i mí i já queá a cacuu toho i da tachí jáchí ña ndaa táhyí cacuu tuhun çahan i. Joo co cája toho i ña jáchí cúní ña ná çáhan ñayivi ña ndaa cuití va sahá i ta sahá ña ñacaja i xihín sahá ña ñaçahan i.

⁷ Ta sahá ña co cúní Ndióxi ña ná cajú çáhnú i mí i sahá ña naxini i sahá ña cán queá ñaquixi in ña ndóho i. Cúu á tá-tuhun in ñnu sa cánee nuú yiquí cuñu i xini i, ña quixi nuú tiñáhá sacuaça cája xixi rí xihín i já ná a cája çáhnú i mí i. ⁸ Ta sa uní tañu ñaxiça tahví i nu Ndióxi, xitoho í ña ná tavá a ña ndóho i yóho. ⁹ Joo ñanducú ñehe mé á tuhun nuú i já ñacachi a já: “Sa quiahva cúu mé a quíhví ini i yohó jan va jáchí ña cúu cája i xihín ñayivi náha çaxí chága tá co ndée ná”, ñacachi Ndióxi. Ña cán queá cájii ini i cúu u in da çamaní ndée já queá náha ña xihín ndée Jesucristo cája i tóco ndihi ñaha. ¹⁰ Sahá ña quíhví ini i Jesu-

cristo, cájii tá cájii ini i tá cávitá ini i, á tá cánahá ña xihín i, á tá çamaní ñaha nuú i, á tá ndúcú ña yehe ña cajú xixi na xihín i. Jáchí tá cávitá ini i já ndíndacu chága i xihín ndée Ndióxi.

Ndicani ini Pablo sahá ña cúu cuéntá Jesús ndúu ñuu Corinto

¹¹ Tá quiahva cája da tachí já cája i joo ndóhó cúu ña ñacaja ndúsa xihín i cajú i ña. Jáchí mé ndó cúu ña ndítahan çahan vaha sahá i, nduu. Joo já coó toho chága sahá ña çáhan ndó cúu apóstol jan a juú ga yehe vatí mé a ndaa nu Ndióxi coó saha toho i. ¹² Jáchí xihín ña náhnú ñacaja i nu ndo jan ta xihín ña xitúhún naxini ndó ñacaja i jan najánaha i nu ndo ña mé a ndaa táhyí cúu u in apóstol. Coó ñandíhi ini i tá ñacaja i ña xitúhún jan nu ndo. ¹³ Ta tá quiahva ñacaja i xihín java ga ña cúu cuéntá Jesús quiahva já ñacaja rí xihín ndóhó va. In túhún ña coó ñacaja i xihín ndó queá coó najáquihvi toho i ndóhó sahá ña xini ñúhú i catacu u tá quiahva ñacaja i xihín java ga ña cúu cuéntá Jesús. Á çáhan ndo ña vaha chága ná cajú ndúsa i xihín ndó quiahva ndó nuú i ña xini ñúhú i.

¹⁴ Ta viti sa fin tiahva i saa i coto ni-hni i ndóhó ña chí uní. Ta ni viti a jáquihvi toho i ndóhó jáchí co xíça toho ini i quehe e ña cómí ndo. Ña cúní queá ná quíhví ini ndó yehe tá quiahva quíhví ini i ndóhó. Jáchí mé ndó cúu ndó tátuhun jahyí i sahá ña najánaha i tuhun Ndióxi nu ndo. Ta ndá ñacuu ña valí co xito na tátá ña joo mé tátá ña cúu ña xito mé ña valí. ¹⁵ Ta cájii ini i jándihi i tóco ndihi ñaha cómí i já ná chíndeé e ndóhó. Ta jãnda ndiquiahva i mí i já ná cacu ndaa ínima ndo. Cája i cuéntá tá quíhví chága ini i ndóhó já co cúu chága ini ndó xihín i.

¹⁶ Mé a ndaa coó najáquihvi toho i ndóhó. Joo ndúu java na tañu ndó ta çáchí ña ña ñacaja ndúsa i xihín ndo

já najándahvi tá najándahvi i ndohó. ¹⁷ Á cahan ndó ña najándahvi i ndohó tá nachindahá i java ñayivi nu ndo jan. A juú a já. ¹⁸ Jáchí naxica tahví i nu Tito ña ná saa da coto nihni da ndohó jan. Ta nachindahá i inga da cúu cuéntá Jesús xihín dá. Á najándahvi da ndohó, vaha. Sa xini vaha i ña coó najándahvi da ndohó. Ta tá quiahva cája Tito quiahva já cája ri yehe va jáchi in ímima ñehe nde xihín dá.

¹⁹ Á cahan ndo ña sa ñacasáhá cahan chíjín tucu nde xihín ndo viti. Co cúu á já. Jáchí sándehe cáxi Ndióxi ña cahan nde ña yóho xihín ndo tá quiahva cúni Jesucristo. Ta cája nde tóco ndihi ña yóho jáchi quíhvi ini nde ndohó ta cúni nde ña ná cuahnu chága ndó xihín tühun Ndióxi. ²⁰ Yíhvi i jáchi tá ná saa i coto nihni i ndohó co cúni i ndiñehé e ndohó cája ndó ña núu, ña co cátóo i. Ta sa mé quiahva já yíhvi i ña cuni ndó yehe caja i ña co cátóo ndo. Yíhvi i jáchi tiahva náa cani táhan ndó, á cahíhvi ini xihín táhan ndó, á cojo ini xihín táhan ndó, á ndacahnda táhan ndó, á cahan ndó ña tühún sahá ñani táhan ndó, á candehe ndaa táhan ndó, á ndiñehe jícó ndo mé ndó, á sa jíin sa jíin cája in in ndó. ²¹ Ta yíhvi i ña tá ná saa i coto nihni i ndohó jan caja Ndióxi ña ná cacahan nuú i saha tóco ndihi ña cája ndó jan. Ta yíhvi i cuacu u sahá cuahá na cája cuachi, na sa janda jihna ñacasáhá cája cuachi ña a ñaha jándacoo na cája na xihín yiquí cuñu na. Ta cuacu u jáchi a ñaha jándacoo na ña ndúu na xihín na co cúu ñájíhí na á yíi ná. Ta ni a ñaha jándacoo na tóco ndihi ña núu, ña xica ini yiquí cuñu na caja.

Jáxinu coo Pablo tühun cahan da xihín na ñuu Corinto

13 Ta xihín ña yóho xinu uni táhnda saa i coto nihni i ndohó. Ta xini ñuhú ndicuhun ini ndó ña sáhnda tühun

Ndióxi chuun nu yo ta cáhí a ña tá ná cahan ivi á uni testigo sahá cuachi nacaja in ñayivi anda jávi candaa ini ndó ña mé a ndaa fin cuachi na. ² Tá quiahva ñacahan i xihín ndo tá ñaxito nihni i ndohó ña chí ivi quiahva já cahan i xihín ndo viti vatí fin xicá i. Ta tá quiahva ñacahan i xihín na ñacaja cuachi jihna jan quiahva já cahan i xihín ndihi ndó viti. Ta tá ná casaa tucu u coto nihni i ndohó jan já queá a táhnda ga ini i saha ndo sahá cuachi cája ndó. ³ Ta xihín ña yóho candaa ini ndó ña mé a ndaa táhyí cahan i ña sáhnda Jesucristo cahan i. Cúni ña ná candaa ini ndó ña co cahan chíjín toho Jesucristo xihín ndo. Ña cája mé á xihín ndo queá náha nu ndo ña fin ndée mé á cája ña cúni a. ⁴ Mé Jesucristo queá nacata caa na ndica crúxy tátühun in da co ndée. Joo viti tácu mé á saha ndée Ndióxi. Ta tá quiahva vitá ñasahíin yiquí cuñu a quiahva já vitá ndúu yó viti. Joo sahá ña in ñanduú xihín mé á já cuu cat-acú xihín ndée a. Ta xihín ña yóho cája chúun nde tañu mé ndó.

⁵ Xini ñuhú candehe vaha ndó mé ndó á mé a ndaa táhyí candeé cahnú ini ndó Ndióxi. Xini ñuhú coto ndojó ndó mé ndó. Ta tá mé a ndaa táhyí cúu ndó cuéntá Jesús xini ñuhú ndicuhun ini ndó ña ndácaan Jesucristo ini ímima ndo á tá coó yúhu uun va ndó cúu ndó cuéntá Jesús. ⁶ Ta ndáti i xinu quiví candaa ini ndó ña coó najándahvi nde ndohó. ⁷ Xica tahví nde nu Ndióxi ña ná a cája ndó ni in ña núu. Ta co cúu á sahá ña cúni nde cahan vaha ñayivi sahá nde, vaha. Ña cúni nde queá ná a jándacoo ndó caja ndó ña vaha vatí ná cahan ñayivi ña coó ñacaja vaha nde xihín ña najánaha nde nu ndo. ⁸ Co xini ñuhú nde jánani nde ndohó nani cája ndó ña ndaa joo tá cája ndó ña núu já queá xini ñuhú jánani nde ndohó. ⁹ Ta cájii ini nde tá ndaa nde tá quiahva ndaa na vitá ini tá cúu á sahá ña ndacú ini mé ndó cuéntá Ndióxi.

Ta a jándacoo toho nde caça tãhví nde nu Ndióxi saha ndo ña ná xinu coo ndó cacuu ndó ñayivi coó cuachi nu mé á. ¹⁰ Jihna ñúhú cáhyí i carta yóho nu ndo já saa i coto nihni tucu u ndohó. Jáchi tá ná saa i jan co cúní cahan ihví nahá i xihin ndo vatí nasahan Ndióxi chuun yóho nuú i. Ta coó nasahan mé á ña nuú i ña ná jándihi i saha ndo. Nasahan mé á chuun yóho nuú i já ná cuu ndaja ndacú u ndohó cuéntá mé á.

¹¹ Candehé ndo, ñani i, na cúu cuéntá Jesús. Xihín tũhun yóho jáxinu coo i tũhun cáhan i xihin ndo. Ná coo Ndióxi xihin ndó. Ta ná ndindacú chága ndó já

ná nduu ndó ñayivi ndaa. Ta quiahva tũhun ndéé ini táhan ndó. Coo vaha ndó xihín ñani táhan ndó já quea coo Ndióxi xihin ndo. Mé a cán quihvi ini a ndohó ta cúní a ña ná coo vaha ini ndó. ¹² Cahan Ndióxi xihin táhan ndó ta tatí yũhu táhan ndó ta yii caja ndó ña. ¹³ Tóco ndihi na cúu cuéntá Jesús chindahá na Ndióxi coo ndó.

¹⁴ Ná tãhví ini Jesucristo, xitoho í saha ndo jáchi quihvi ini Ndióxi ndohó. Ta ná coo tuun ínimã yii mé á xihin ndo. Ña yóho quea cúní ña ná caja Ndióxi xihin ndo. Já ná coo.

Carta nāchindahá Pablo nuú nā cúu cuéntá Jesús ndúu ñundáhyi Galacia

Chíndahá Pablo Ndióxi coo nā cúu cuéntá Jesús ndúu ñundáhyi Galacia

1 Yehe cúu Pablo, da cáhyi carta yóho nū ndo. Naçaxi Ndióxi yehe cacuu u in apóstol ta a juú toho ñayivi naçaxi yehe. Ta ni coó nāchindahá ñayivi yehe jáchi Jesucristo xihín Ndióxi, tátá yo, mé a najánditacu Jesucristo, mé a cán queá naçaxi a yehe cacuu u in apóstol. ²Yehe xihín tóco ndihi java ga nā cúu cuéntá Jesús ndúu xihín i yóho, chíndahá nde carta yóho nū ndóhó, nā ndúu ñundáhyi cuéntá Galacia jan. ³Ñā cúnī nde queá ná caja Ndióxi, tátá yo xihín Jesucristo, xitoho í cuahá ñamanī xihín ndo ta ná caja mé á ñā ná coo vaha ini ndó. ⁴Xínī ñúhú ndicuhun ini ndó ñā nandiquiahva Jesucristo mé á quivi a saha cuachi cája í ta xihín ñā yóho najáçacu a mí nuú ñā núu cája ñayivi ñuyívī. Ta nayaha ñā yóho jáchi já cúnī Ndióxi, tátá yo. ⁵Cáhnū ndivaha ná cacuu Ndióxi anda ama cáa quívī. Já ná coo.

Coó ga inga tuhun cáhan sahá Jesucristo ñā cuu jáçacu a mí

⁶Mé a ndaa nacatontó ndivaha i jáchi cama chá naçasáhá ndo cáxoo ndó nū Ndióxi, mé a naçana ndohó cacuu ndó cuéntá mé á sahá ñā quíhvī ini Jesucristo ndohó. Ta viti naçasáhá ndo xínī johō ndó inga tuhun ñā cáchī ñayivi cuu jáçacu a ndohó. ⁷Mé a ndaa coó toho inga tuhun ñā cuu jáçacu a ñayivi. In túhún va cúu tuhun Ndióxi ta cáhan sahá Jesucristo. Joo ndúu java ñayivi ta cúnī nā jájana na jinī ndo ta cúnī nā ndijama na tuhun vaha cáhan sahá Jesucristo, mé a jáçacu mí. ⁸Joo tá vaxi in na ta jánaħa nā inga tuhun ñā cáchī nā cuu já-

çacu a ndohó ta coo cúu á tuhun vaha ñā najánaħa nde nū ndó já queá ná cuhun cháhan jata ná ta coó caja toho a ndá ñayivi cúu ná janda mí i á janda in táto Ndióxi ná quixi indiví. ⁹Sa naçachi i ñā yóho xihín ndó jihna ta viti ndicó coo tucu u cáhan i ñā xihín ndo: tá jánaħa in ñayivi inga tuhun ñā cáchī nā cuu jáçacu a ndohó ta coo cúu á tuhun najánaħa nde nū ndo já queá ná cuhun cháhan jata ná.

¹⁰Co ndúcu u candoo vaha i nuú ñayivi. Ñā cúnī queá candoo vaha i nū Ndióxi jáchi tá cúnī candoo vaha i nuú ñayivi já cúnī cachi a ñā coo cúu ga i da cája chúun cuéntá Jesucristo xihín ndinuhu ini i.

Ndícani Pablo ndaja nanduu da apóstol

¹¹Candehé ndó ñani mí i, nā cúu cuéntá Jesús. Mé tuhun naçahan i xihín ndó coó naquixi a jinī ñayivi ñuyívī. ¹²Ta coó nandiquehe e ñā nuú ñayivi. Ta ni in túhún toho ñayivi coó najánaħa nā ñā nuú i jáchi Jesucristo queá najánaħa ñā nuú i. ¹³Cája i cuéntá sa naxini johō ndó sahá ñā naçaja i jihna tá nasandico i costumbre nā Israel. Jáchi naxojo ndivaha ini i xihín nā cúu cuéntá Jesús mé tiempo cán. Ta naçaja xixi ndivaha i xihín ná ta nasacu ini i jándihi i saha ná. ¹⁴Ta mí i nasacuu u da naçayojó chága cája costumbre nā Israel nuú ndihi nā ñuu i, nā nasahnu xihín i. Jáchi nasativi i xihín ndinuhu ini i costumbre tásáhnū jícó nde. ¹⁵Joo Ndióxi naçaxi a yehe janda tá cámanī cacu u ñuyívī yóho ta sahá ñā cúnī a caja ñamanī xihín i sahá ñā cán queá naçana mé á yehe. Ta tá naxinu coo quívī nasacu ini mé á ¹⁶já najánaħa Ndióxi Jesucristo, jahyi a nuú i já ná cuu çaxi tuhun i tuhun vaha saha mé á nuú nā coó naquixi chichi Israel. Ta mé tiempo cán coó nasahan i cáhan i xihín ni in ñayivi sahá ñā najánaħa Ndióxi nuú i. ¹⁷Ta ni coó nasahan i ñuu Jerusalén

cáhan i xihín na cúu apóstol nu cuítí a juú ga yehe. Ña nacaja i queá ivi laá naquee nasahan i ñundáhyi cuéntá Arabia. Ta tá nandihí nandicó coo i chí ñuu Damasco.

¹⁸ Ta tá sa nayaha uní cuia já nasahan i ñuu Jerusalén ndicuni táhan i xihín Pedro ta nasahjin i sahun quivi xihín dá. ¹⁹ Ta cán naxini ri da cúu Jacobo, ñani Jesucristo joo coo naxini toho i na java ga cúu apóstol cán. ²⁰ Sándehé cáxi Ndióxi ña co jándahvi toho i ndohó. Ña ndaa queá cáhyi i nu ndó yóho.

²¹ Tá nandihí já naquee e cuahan i chí ñundáhyi cuéntá Siria xihín Cilicia. ²² Joo mé tiempo cán na cúu cuéntá Jesús ndúu estado Judea a ñáha cuni na yehe, nduu. ²³ Joo naxini johó na ña cáhan java ñayivi sahá i: “Da nacaja xíxi xihín yo jihna, da cán cúu da xíca nuu cáhan tuhun Ndióxi xihín ñayivi viti. Da nacúni jándihí sahá tuhun Ndióxi jihna, da cán cúu da jánaha ñayivi cándéé ini na mé á”, cáchi na. ²⁴ Ta viti cája cáhnu na Ndióxi sahá ña nandijama mé á yehe.

Na apóstol ndíquehe vaha na Pablo.

2 Tá sa nayaha uxu comí cuia já nasahan tucu u ñuu Jerusalén. Nasahan Bernabé xihín i ta nasañehe ri i Tito nasahan da xihín nde. ² Ta nasahan i jáchi nanaha Ndióxi nuú i ña ndítahan cuhun i. Ta tá nataca jín ndihí na náhnu, na comí cuéntá sahá na cúu cuéntá Jesús ñuu Jerusalén cán, já nacasáhá i ndícani i nu ná ndaja cáa tuhun vaha saha Jesús ña jánaha i nuú na coo naquixi chichi Israel. Nacaja i ña yóho jáchi coo nacúni ña ná cachi na náhnu cán ña coo saha toho ña jánaha i. ³ Ta nandiquehe vaha na ndehé ta ni coo nacaja ndúsa na xihín Tito, da nasahjin xihín i ña ná chican da marca yiquí cuñu da vatí coo cúu dá da naquixi chichi Israel. ⁴ Joo java na, na coo xíca ndaa íchi cuéntá Jesús, nandihvi jehé na tañu nde ña ná can-

dehé na ndá quiahva núná nuú nde cája cáhnu nde Ndióxi sahá ña cándéé ini nde Jesús. Jáchi nanducú na cája ndúsa na xihín nde ña ná ndicó coo nde caja nde tóco ndihí ña sáhdá ley Moisés. ⁵ Joo coo nacandúsa toho nde tuhun cáhan na xihín nde jáchi cúni nde cándaá ini ndó ña ndaa cáhan saha Jesucristo, ña cuu jáca cu ndaa ínima ndó tá ná cándéé ini ndó mé á.

⁶ Joo mé na náhnu, na comí cuéntá sahá na cúu cuéntá Jesús cán coo nacachi na xihín i ña ná ndijama i ña jánaha i nuú ñayivi. Cáchi i ña cúu ná na náhnu vatí coo cája toho a nuú i ndá quiahva náhnu chuun ndójo na jáchi in cúu tóco ndihí nu Ndióxi. ⁷ Táhan ini na náhnu cán xihín ña cája i jáchi nandicuni na ña mé Ndióxi queá nasahan chuun yóho nuú i ña caca nuu i cáhan i tuhun vaha sahá Jesús nuú na coo naquixi chichi Israel. Ta sa mé Ndióxi queá nasahan chuun nu Pedro ña ná cuhun da cáhan da tuhun vaha sahá Jesús nuú na naquixi chichi Israel. ⁸ Ta sa mé Ndióxi, mé a nachindahá Pedro cáhan da tuhun mé á nuú na naquixi chichi Israel, mé a yóho cúu ri ña nachindahá yehe cáhan i tuhun mé á nuú na coo naquixi chichi Israel.

⁹ Jacobo xihín Pedro xihín Juan cúu ná na náhnu comí cuéntá sahá na cúu cuéntá Jesús ñuu Jerusalén cán. Ta nandicuni na cán ña nacaja Ndióxi cuahá ñamaní xihín i tá nasahan mé á chuun yóho nuú i. Sahá ña cán queá natiin na ndahá yehe xihín ndáha Bernabé ta xihín ña yóho náha ña in cúu nde cája chúun nde xihín tuhun Ndióxi. Ña cája na cán queá cája chúun na xihín na naquixi chichi Israel nani ndehé cája chúun nde xihín na coo naquixi chichi Israel. ¹⁰ Ta in túhún ñamaní naxíca na nuú nde caja nde queá ña ná a ndíndójo nde chindeé nde na ndahví. Ta ña yóho cúu ndusa ña ndíhi ini i cája i.

Pablo jánani da Pedro ñuu Antioquía

¹¹ Joo tá nandique táhan i xihín Pedro ñuu Antioquía já nu táhyí da najánani i da jáchi coo ñacaja vaha da. ¹² Ña ñacaja da queá ñaxixi da xihín ña coo ñaquixi chichi Israel tá cámaní xinu coo java na Israel, ña ñachindahá Jacobo. Joo tá ñaxinu coo ña Israel cán já ñacasáhá tává jín Pedro mé dá nuú ña coo ñaquixi chichi Israel ta ni co xixi ga da xihín ná. Jáchi ñayihví da ndífa cachi ña Israel, ña jánaha ña co ndítahan cuxu na xihín ña co cúu ña Israel. ¹³ Ta xihín ña yóho ñachijehé Pedro ña cáhvi ini da sahá ña cán. Ta java ña cúu cuéntá Jesús, ña ñaquixi chichi Israel cán ñacasáhá cája na tá quiahva cája Pedro. Ta janda Bernabé ñacaja da tá quiahva cája ña cán. ¹⁴ Anda já ñaxini i ña co xíca na íchi cuéntá ña ndaa xihín ndinuhu ini na tá quiahva sáhdá tuhun Ndióxi cája na sahá ña cán queá najánani i Pedro nu táhyí tóco ndihi ñayivi ndúu cán. Já ñacachi i já xihín dá: “Yóhó cúun da Israel joo ñacasáhá cájún tá quiahva cája ña coo ñaquixi chichi Israel jáchi co cájún ña sáhdá ley Moisés viti. Sahá ña cán queá co ndítahan nuún caja ndúsa tohún xihín ña coo ñaquixi chichi Israel ña ná caja na ña sáhdá ley Moisés”, ñacachi i xihín dá.

Jácau Ndióxi ñayivi sahá ña cándéé ini na mé á

¹⁵ Janda quívi ñacacú cúu yó ña Israel ta co cúu yó tátuhun ña toho, ña cáhí yo cája cuachi sahá ña co cája na ña sáhdá ley Moisés. ¹⁶ Joo sa cándaá vaha ini ña co ndúu ndaa ñayivi nu Ndióxi sahá ña cája na ña sáhdá ley Moisés. Jáchi nduu ndaa ña nu Ndióxi sahá ña cándéé ini na Jesucristo cuití va. Ta sa saha mé ña cán ñacandéé ini Jesucristo já ñanduu ndaa yó nu Ndióxi ta co cúu á sahá ña cája i ña sáhdá ley Moisés jáchi ni in a cuú

nduu ndaa ña nu Ndióxi sahá ña cája na ña sáhdá ley Moisés.

¹⁷ Cándehé ndo. Sahá ña cúni yo canduu ndaa yo nu Ndióxi sahá ña cándéé ini Jesucristo cuití va sahá ña cán queá co cája ga i ña sáhdá ley Moisés. Joo cáhí java ñayivi ña ndójo i cuachi sahá ña co cája i ña cáhí mé ley. Vatí co cája i ña cáhí ley Moisés, co cúni cachi ña yóho ña jácahan Jesucristo mí caja i cuachi. Ña yóho co cúu á ña ndaa jáchi co jácahan Jesucristo mí caja i cuachi. ¹⁸ Joo mé a ndaa caja i cuachi tá ná casáhá tucu candéé ini ley Moisés ña ná jácau a mí jáchi sa najándacoo i ña tá ñacandéé ini Jesucristo. ¹⁹ Ta viti cúu á tátuhun ñaxihí yehe cuéntá ley jáchi co cómi ga ley cuéntá sahá i jáchi sahá ña cándéé ini i Jesucristo sahá ña cán jácau Ndióxi yehe ña ná catacu u cuéntá mé á. ²⁰ Cúu á tátuhun ñaxihí i ndíca crúxu xihín Jesucristo tá ñaxihí a. Sahá ña cán queá co cája i tá quiahva cúni mé vi jáchi Jesucristo queá ndícaan ini i ta mé a cán queá ndáca yehe. Ta viti tóco ndihi ña cája i ñuyiví yóho cája i ña jáchi cándéé ini i Jesucristo, jahyi Ndióxi, mé á ñaxihí ndíca crúxu sahá i sahá ña quíhvi ini a yehe. ²¹ Ta co cúni quehe núu i ñamaní cája Ndióxi xihín i jáchi tá ná cuu nduu ndaa yo nu Ndióxi sahá ña cája i ña sáhdá ley Moisés já queá mé a uun va queá ñaxihí Jesucristo, nduu.

Vaha chága cándéé ini Jesús a juú ga cándéé ini ña sáhdá ley Moisés

3 Á jána va jini ndó, ña ndúu ñundáhyi Galacia. Yo já najándahvi ndohó ña ná jándacoo ndó ña ndaa. Jáchi tá ñacahan nde tuhun Ndióxi xihín ndo já ñandicani cáxi nde nu ndo ndá quiahva ñaxihí Jesucristo sahá cuachi. ² Cuni johó ndó ná ndaca tuhún i ndohó: Á ñandihvi ínima yii Ndióxi ini ínima ndo sahá ña ñacaja ndó ña sáhdá ley

Moisés. Co cúu toho a já. Nasacuu a sahá ña nacandúsa ndó tūhun vaha sahá Jesucristo ña naçahan nde xihín ndo. ³Mé a ndaa táhyí cúu ndó na najana jiní. Jáchí tá nacasáhá ndó xíca ndó íchí cuéntá Jesús já nasandaca ínima yii Ndióxi ndohó. Ta viti cúni ndó ndicó ço ndó caja ndó ña sáhdá ley Moisés jáchí cáhán ndo ña cuu xínu ço ndó cacuu ndó ñayivi ndaa nu Ndióxi sahá ña cája ndó. Joo a cuú toho a. ⁴Xíní ñúhú ndicūhun ini ndo ndá quiahva nandoho nahá ini ndó sahá tūhun Ndióxi. Á mé a uun va nasacuu ña nandoho ndó jan. Cája i cuéntá uun. ⁵Jáchí sahan Ndióxi ínima yii mé á nu ndó ta cuahá ndivaha ña náhnu cája mé á tañu ndó ta ço cúu á sahá ña cája ndó ña sáhdá ley Moisés. Cúu á sahá ña cándéé ini ndó mé á.

⁶Cáchí tūhun Ndióxi ña nanduu Abraham ta ndaa nu mé á sahá ña nacandéé ini da Ndióxi. ⁷Sahá ña cán queá ndíthahanda ini ndó ña ndá na cándéé ini Ndióxi, mé na cán cúu ndusa na tátūhun na naquixi chichi Abraham. ⁸Jáchí sa janda jihna nacachi tūhun Ndióxi ña vaxi quivi casáhá Ndióxi jácacu a ñayivi, na ço naquixi chichi Israel tá ná candéé ini na mé á. Na cán queá naçahan Ndióxi tūhun vaha yóho xihín Abraham já nacachi a já: “Saha mún tandaa tiempo caja cuahá i ñamaní xihín ñayivi canduu ndijáá ñuyívi”, cáhí a. ⁹Sahá ña cán queá tá quiahva nacaja Ndióxi cuahá ñamaní xihín Abraham quiahva já cája ri a xihín tóco ndihi ñayivi tá cándéé ini na mé á tá quiahva nacaja Abraham.

¹⁰Joo ndá ñayivi ndúcu nduu ndaa nu Ndióxi sahá ña cája na ña cáhí ley Moisés já queá cuahán cháhan jata ná. Jáchí cáhí tūhun Ndióxi já: “Cháhan va cuahán jata tóco ndihi na ço xínu ço cája tóco ndihi cuí ña cáhí ley ña naçahí Moisés.” ¹¹Ta cáxi táhyí çahan ña yóho xihín yo ña a cuú nduu ndaa ñayivi nu Ndióxi sahá ña sácú vaha na

ley Moisés. Já cáhí tūhun Ndióxi já: “Ndá na cúu ñayivi ndaa nu Ndióxi catacu na sahá ña cándéé ini na mé á”, cáhí a. ¹²Joo jín va cáhí ley Moisés jáchí cáhí a ña tá cúni na nduu ndaa na nu Ndióxi sahá ley Moisés xíní ñúhú caja na tóco ndihi cuí ña cáhí mé ley. Ta ço çahan mé ley sahá ña cándéé ini na Ndióxi.

¹³Joo najáçacu Jesucristo mí já ná a xínu ço çahan jata yo caja ley. Jáchí naquixi cháhan jata mé á sahá mí tá naxihí a ndíca crúxu. Jáchí cáhí tūhun Ndióxi: “Cháhan cuahán jata ndihi na xihí ndíca crúxu.” ¹⁴Ta sahá ña nacaja Jesucristo tá naxihí a ndíca crúxu sahá ña cán queá tóco ndihí vatí cúu yó na Israel á na ço cúu na Israel, ñehe táhvi yo ñamaní Ndióxi tá cándéé iní mé á. Jáchí já nasahan Ndióxi tūhun a nu Abraham jihna. Ta viti quiahva mé á ínima yii á nu yo tá cándéé iní mé á jáchí já nasahan Ndióxi tūhun a nu yo.

Ña cáhí ley Moisés xihín ña cáhí tūhun nasahan Ndióxi nuú Abraham

¹⁵Ñani mí i, na cúu cuéntá Jesús, candehé ndo ná çahan i xihín ndo ndá quiahva cája ñayivi tá sahan na tūhun na nuú inga ñayivi. Tá çavaha na in tutu ta tá nandihí naçahyi na quivi ná nu á já queá ni in túhún toho ñayivi a cuú ndijama na ña sa naçahyi cán ta a cuú chícaan chága na tūhun nuú mé tutu. ¹⁶Candehé ndo. Nasahan Ndióxi tūhun a nuú Abraham ta nuú in da quixi chichi da. Joo ço naçahan Ndióxi sahá cuahá ñayivi quixi chichi da. Naçahan Ndióxi sahá in tálaá jahyi da ta mé a cán cúu á Jesucristo. ¹⁷Ña cúni cachi i queá: Nasahan Ndióxi tūhun a nuú Abraham ta nasacuu a tátūhun naçahyi Ndióxi quivi á nuú in tutu. Sahá ña cán queá a cuú jándihi ley Moisés sahá tūhun nasahan Ndióxi nuú Abraham. Jáchí jihna ñúhú nasahan Ndióxi tūhun a nuú Abraham ta

tá sa nayaha comi ciento oco uxu cuija já nasahan Ndióxi ley nuú Moisés. Ta mé ley yóho a cuú toho ndijama tuhun nasahan Ndióxi nuú Abraham. Ta mé ley a cuú ndaja núu a tuhun nasahan Ndióxi nu dá jihna. ¹⁸ Joo ña sahan Ndióxi nuú ñayivi co quíxi a sahá ña sácú vaha na ley Moisés. Jáchi tá ná quixi a quiahva já co cúu ga sahá ña nasahan Ndióxi tuhun a ña caja mé á ña. Ña nayaha queá nacacúni Ndióxi caja ñamaní uun xihín Abraham ta coó nasacuu a sahá ña nasacu vaha da ley Moisés.

¹⁹ Ta viti, á ndáca tuhún ndó ndá saha nasahan Ndióxi ley nuú Moisés. Nasahan Ndióxi ña jáchi cúni a ña ná candaa ini ñayivi ndá quiahva sáá ini na caja na ña cúni Ndióxi. Ta nasacu ini a candoo ley janda quiahva ná xinu coo mé a quixi chichi Abraham cán. Jáchi mé a cán queá nasahan Ndióxi tuhun a quixi. Ta tátó Ndióxi queá nacahan ley yóho xihín Moisés ta najáyaha da ña nuú ñayivi. ²⁰ Joo tá nasahan Ndióxi tuhun a nuú Abraham coó naxini núhú toho a ñayivi jáyaha na ña. Ta coó nacaja chúun a táto mé á jáchi in túhún Ndióxi nacaja mé á ña.

Ña cúni ley caja í

²¹ Jihna núhú nasahan Ndióxi tuhun a nuú Abraham anda jávi nasahan ley nuú Moisés. Á cúni cachi ña yóho ña co ndique táhan ley Moisés xihín tuhun nasahan Ndióxi nuú Abraham. Co cúu a já. Jáchi tá ná cuu jácacu ley Moisés ñayivi já queá cuu nduu ndaa na nu Ndióxi sahá ña sácú vaha na ña sáhdá mé ley. Joo co cúu a já. ²² Jáchi cáchi tuhun Ndióxi ña mé cuachi cándíhi a tóco ndihi ñayivi. Joo tá ná candeé ini Jesucristo já cuu ndiquehé ña nasahan Ndióxi tuhun a quiahva nu tóco ndihi ñayivi sahá ña candeé ini na mé á.

²³ Tá cámaní quixi Jesucristo já nasacomí ley cuéntá saha yo ta

nasandaca mí janda quiahva naxinu quivi nanaha Ndióxi nu yo ña ndítahan candeé ini Jesucristo. ²⁴ Nasandaca ley mí tá quiahva cája in dataa xihín jahyi válí da anda quiahva naquixi Jesucristo, mé á nacaja ña ná canduu ndaa yo nu Ndióxi sahá ña candeé ini mé á. ²⁵ Ta viti co cómi ga ley cuéntá saha yo jáchi cómi Jesucristo cuéntá saha yo tá cándúsa í mé á.

²⁶ Ta in nanduu ndó xihín Jesucristo sahá ña candeé ini ndó mé á ta já nanduu ndó jahyi Ndióxi. ²⁷ Ta tá nacandúta ndo já in nanduu ndó xihín Jesucristo ta nanduu ndó tá quiahva íin mé á. ²⁸ Ta co cája toho a tá cúu ndó na naquixi chichi Israel, á co cúu toho ndó na. Ta co cája toho a á cúu ndó na naxeen ñayivi caja chúun nu ná, á co cúu toho ndó na. Ta co cája toho a á cúu ndó ña á ñaha. Jáchi tá nacandúsa ndó Jesucristo já in nanduu tóco ndihi ndó jáchi in nanduu ndó xihín mé á. ²⁹ Ta sahá ña cómi Jesucristo cuéntá saha ndo sahá ña cán queá cúu ndó tátuhun na naquixi chichi Abraham. Ta sahá ña cán queá ñehe táhvi ndó ña nacachi Ndióxi quiahva nuú da cán tá nasahan tuhun a nuú Abraham sanahá.

4 Ña cúni cáchi í cúu ña yóho: Cúu á tátuhun tá sahan in dataa tóco ndihi ña cómi da nuú jahyi da. Joo nani cúu dá ña loho já a cuú cacomí da cuéntá sahá ña nandiquehe da ndaha tátá da. Cúu dá tátuhun mozo vatí tandaa quivi cacomí da cuéntá saha tóco ndihi ñaha tátá da. ² Jáchi nduu java ñayivi, na cómi tóo cuéntá saha mé dá ta saha tóco ndihi ña najándacoo tátá da nu dá janda quiahva ná xinu coo quivi nasacu ini tátá da. ³ Quiahva já yaha ri xihín mé ví. Jáchi jihna nasacuu tátuhun navalí. Nasacomí ley na Israel cuéntá saha yo tátuhun cája xitoho xihín mozo da. ⁴ Joo tá naxinu coo quivi nasacu ini Ndióxi já nachindahá mé á Jesucristo, jahyi a. Ta in ñañaña ñuyívi yóho nasacuu ña najá-

cacu ñahá. Ta ñacaja mé á ña sáhndá ley Moisés. ⁵Ta ñaxihí a ndíca crúxu já ná cuu चाहि a saha cuachí ña ná jani yó nu ley ña nasacomí cuéntá saha yo. Ta xihín ña yóho ñacuu nanduú jahyi Ndióxi.

⁶Ta sahá ña nanduú jahyi mé á sahá ña cán queá ñachindahá Ndióxi ínima jahyi a ña ná ndicaan mé á ini ínima yo já queá ná cuu cahan yó xihín Ndióxi já cachi yó já: “Tátá maní i.” ⁷Ta viti co cúu ga yó tátuhun mozo jáchi co cómi ga ley cuéntá saha yo ta nanduú jahyi Ndióxi viti. Ta viti cuu ñehe táhvi yó quehé ña nasacu ini mé á quiahva nuú ña cúu cuéntá mé á sahá ña ñacaja Jesucristo.

Ndícani ini Pablo sahá ña cúu cuéntá Jesús ñundáhyi Galacia

⁸Jihna ga tá coó ñacandaá ini ndó saha Ndióxi já ñacaja cáhnu ndó java ga ndiόxi ña co cúu toho ndiόxi joo nasacomí a cuéntá saha ndo. ⁹Ta viti sa xini ndó Ndiόxi joo vaha chága ná cachi i ña sa xini Ndiόxi ndohó. Ta ndivaha cuni ndó ndicó coo tucu ndó caja ndó tá quiahva ñacaja ndó jihna. Jáchi co ndiyahvi toho ña ñacaja ndó cán ta ni a cuú chindeé a ndohó. ¹⁰Joo cája tucu ndó víco ta xihín ña yóho cája cáhnu ndó java quivi xihín yo xihín cuia. ¹¹Ndícani ndivaha ini i saha ña cája ndó jan. Jáchi viti co cándaá ini i á mé a uun va nasacuu chuun ñacaja i tañu ndó jan.

¹²Candehé ndó, ñani mí i, ña cúu cuéntá Jesús. Xíca tahvi i nu ndo ña ná caja ndó tá quiahva cája i viti. Jáchi najándacoo i cája i ña sáhndá ley tá ñandihvi i íchi cuéntá Jesús. Vaha ndivaha ñacaja ndó xihín i tá nasahiin i xihín ndó jan. ¹³Ta cája i cuéntá ndícuñun ini ndó ña quíhvi ndivaha i tá nu cuítí nasahan i çaxi tuhun i tuhun vaha sahá Jesús tañu ndó jan. ¹⁴Ta sahá cuehe ñandoho i ñacuu candají ndó yehe, nduu. Joo coó ñacaja ndó ña. Ña

ñacaja ndó queá ñandiquehe vaha ndó yehe ta ñacaja ndó xihín i tá quiahva ná caja ndó xihín in táto Ndiόxi á xihín Jesucristo. ¹⁵Ta ñacajii ndivaha ini ndó mé tiempo cán. Jáchi xini vaha i ña nasahiin tiaha ndó tavá ndó nduchú núu ndo quiahva ndó ña nuú i, nduu tá ná cuu caja ña ná ndivaha i. ¹⁶Joo viti nanduú u tátuhun in ña ihvi ndo sahá ña cáhan i ña ndaa sahá Jesucristo xihín ndo.

¹⁷Ndúu java ñayivi tañu ndó jan ta co jánaha ña ña ndaa nu ndo. Cája cuaha ná ñamani xihín ndo joo a juú ña vaha queá cuni ña xihín ndo. Ña cuni ña queá ná jácaxoo táhan í ta ná ndíhi ini ndó saha ña jánaha mé ná. ¹⁸Co cuni cachi i ña a váha toho ndíhi ini sahá ñayivi. Vaha va ná caja í ña ní tiempo ta xihín ndinuhu ini. Joo ñayivi jan ndíhi ini na saha ndó tá ñin yehe tañu ndó cuítí va. ¹⁹Candehé ndó, jahyi a. Ñacasahá ndíhíhvi tucu ini i saha ndo. Tá quiahva ndíhíhvi in ñáñáha tá sáhndá a tíxi ná cácu jahyi ña quiahva já ndíhíhvi ini i saha ndo. Ta ndoho tá ndoho chága ini i saha ndo janda quiahva ná caja ndó ña cuni Jesucristo. ²⁰Viti ñúhú cúu ini i coo i jan já ná cuu cahan vaha chága i xihín ndo jáchi janda nu ñin i yóho ndícani ndivaha ini i saha ndo.

Ña ñacaja Agar xihín ña ñacaja Sara sanahá

²¹Candehé ndo. Mé ndó, ña cuni ndiquiahva tucu ndáha ley Moisés, xini ñúhú candehé vaha ndó ña cáchi mé ley cán. ²²Cáchi a ña ñacacu ivi jahyi ña Abraham. In jahyi da ñacacu xihín Agar, ña cúu mozo ñájíhí ña ta inga jahyi da ñacacu xihín Sara, ña cúu ñájíhí vaha da. ²³Tá ñacacu jahyi ña Abraham xihín Agar cán, ñacacu a tá quiahva cácu tóco ndíhi ñayivi. Joo jahyi ña da, ña ñacacu xihín ñájíhí vaha ña, ña naní Sara cán ñacacu a jáchi nasahan Ndiόxi tuhun a nu dá ña ná cacu a. ²⁴Candehé ndo

ñā náha ñā yóho nū yō. Ndívi najihí yóho cúú ná tátuhun ivi tuhun nasahan Ndióxi nū yō. In táhan tuhun yóho cúú á ley nasahan Ndióxi nuú Moisés jini yúcu naní Sinaí cán. Ta Agar cúú yuhú nuú ley yóho. Ta jahyi ñā cán tá nacacu a ñandu a mozo. Ta ñā ndíco ley cúú ná tátuhun jahyi Agar jáchi cómi ley cuéntá saha ná. ²⁵ Ta Agar cúú ná yuhú nuú ley ñā nasahan Ndióxi nuú Moisés yúcu naní Sinaí, ñā ndácaan chí ñundáhyi Arabia cán. Ta jári mé ñā cúú ñā yuhú nuú Jerusalén, ñā cúú jini nū tóco ndihi na cája ñā sáhdá ley Moisés. Ta mé ñā xihín ñā ndúu cán cúú ná tátuhun mozo jáchi cómi ley cuéntá saha ná. ²⁶ Joo ín inga ñuu Jerusalén, ñā ín indivi cán. Ta ñayivi ndúu cán co cúú toho na mozo jáchi cúú ná tátuhun jahyi Sara, ñájihí vaha Abraham. Ta mí cúú yó tátuhun ñā ndúu ñuu cán jáchi cándéé iní Jesucristo. ²⁷ Já cáhí tuhun Ndióxi já: Xíní ñúhú cajii ini ndó najihí, ñā a cuú cacu jahyi.

Cayuhú ndó xihín ñā cájii iní ndo, vatí a náha cahnda tixi ndó cacu jahyi ndó.

Jáchi najihí, ñā najándacoo tóo yí canduu chága jahyi na a juú ga najihí ndúu yí, cáhí tuhun Ndióxi.

²⁸ Candehé ndo, ñani i, ñā cúú cuéntá Jesús. Cúú yó tátuhun Isaac, jahyi Sara cán sahá ñā cándéé iní Jesús jáchi cúú yó jahyi nasahan Ndióxi tuhun a quiahva nuú Abraham. ²⁹ Joo tá quiahva ñacaja ñā cúú jahyi Agar sanahá tá ñacasáhá ñā cája xíxi ñā xihín ñā cúú jahyi Sara quiahva já ín a viti jáchi ñā sácú vaha ley Moisés cája xíxi na xihín ñā cándéé iní Jesucristo. ³⁰ Joo cuni johó ndó ñā cáhí tuhun Ndióxi tá ñacahan Ndióxi xihín Abraham: “Tavá ñā cúú mozo ñā ná quee ñā cuhūn ñā xihín jahyi ñā. Jáchi ñā cúú jahyi mozo ñā a cúú ñehe táhví dá ndiquehe da ñā quiahva i nuú ñā cúú jahyi ñájihí vahún ñā”, ñacachi

Ndióxi sanahá. ³¹ Candehé ndó, ñani i, ñā cúú cuéntá Jesús. Co cúú yó tátuhun jahyi ñā cúú mozo ñā jáchi co cómi ga ley cuéntá saha yō. Viti cúú yó tátuhun jahyi Sara, ñā cúú ñájihí vaha Abraham cán jáchi co ndúu ga yó ndáha ley Moisés sahá ñā cándéé iní Jesucristo.

Sa najani yō ndáha ley Moisés ñacaja Jesucristo

5 Co ndúu ga yó ndáha ley Moisés sahá ñā ñacaja Jesucristo. Ta viti cándéé ini ndó mé á sahá ñā cán queá xíní ñúhú canduu ndacú ndo ta co ndítahan nū ndó ndicó coo ndó caja ndó ñā sáhdá mé ley cán.

² Cuni johó ndó ñā cáhan i xihín ndo. Tá ná candéé ini ndó ñā cuu nduu ndaa ndó nū Ndióxi sahá ñā chícaan ñā marca yiquí cuñu ndó já queá cúní cachi a ñā quehe núu ndó ñā ñacaja Jesucristo tá ñaxihí a ndíca crúxu saha ndo. ³ Candehé ndó ná cáhan tucu u xihín ndo. Tá cúní ndó canduu ndaa ndó nū Ndióxi sahá ñā chícaan ndó marca yiquí cuñu ndó já queá ndítahan nū ndó caja ndó tóco ndihi cuí ñā sáhdá ley Moisés. ⁴ Mé ndó cúú ndó ñā cúní canduu ndaa nū Ndióxi sahá ñā sácú vaha ndó ley Moisés. Ta viti ñacaxoo ndó nū Jesucristo ta ñacaxoo ndó nuú ñamaní cúní Ndióxi caja xihín ndo. ⁵ Joo mé nde xíní vaha nde ndúu ndaa nde nū Ndióxi sahá ñā cándéé ini nde Jesucristo. Ta ndáti tiahva nde jáchi chindeé inima yí Ndióxi ndehe. ⁶ Jáchi tá in ñanduú xihín Jesucristo já queá coo caja toho a á ñaquíhvi marca yiquí cuñu í á coo a. ñā ndíyahvi ndusa queá ñā cándéé iní Jesucristo jáchi xihín ñā yóho cuu quíhvi iní ñani táhan í.

⁷ Sa vaha ndivaha va cuahan ndó xihín ñā cándéé ini ndó Jesús. Yo já ñandijama jini ndo ñā ná a cándúsa ga ndó ñā ndaa. ⁸ A juú toho Ndióxi ñandijama jini ndo jáchi mé a cán queá ñacana ndohó ñā ná cacuu ndó cuéntá mé á. ⁹ Xíní ñúhú

ndicuhun ini ndó in tūhun ta já cáchí a “Vatí loho yusá naxaa ná cava táhan í xihín yusá cuaha cán játiví ñahá a.” Quiahva já cajú na cúní ndijama jiní ndó jan. ¹⁰ Joo cándeé ini í Jesucristo, xitoho í sahá ña cán queá xíní vaha í ña a cándusa ndó na jan ta ndicó coo ndó cahvi ini ndó tá quiahva cáhvi ini yehe. Ta jándoho Ndióxi ini na xíca jájaca xíní túní ndó jan ta coo cajú toho a ndá na cúú ná.

¹¹ Joo yehe jánaha í nuú na cúú cuéntá Jesús ña co ndítahan ga chicaan na marca yiquí cuñu na ta sahá ña cán queá ndícuíta na Israel xihín í. Tá ná jánaha í nuú ñayivi ña ndítahan chicaan na marca yiquí cuñu na já queá a ndícuíta ga na cán xihín í. Joo mé a ndaa cándají na cán yehe jáchí jánaha í nuú ñayivi ña cuu çacu ndaa ínimá ná sahá ña cándeé ini na Jesucristo cuití va, mé a naxihí ndíca crúxu saha yo. ¹² Sahá ña cúní na cán cajú ndúsa na xihín ndó chicaan ndó marca yiquí cuñu ndó sahá ña cán queá cajú í cuéntá vaha chága ná chitúhun ndihi mé ná yiquí cuñu na ta ná jándacoo tájí ná ndohó.

¹³ Candehé ndó, ñani í. Co ndúu ga ndó ndáha ley Moisés naçaja Jesucristo. Joo co cúní cachi ña yóho ña najani ndo já ná cuu cajú ndó ndá ña núu ña xíca ini yiquí cuñu ndó cajú. Jáchí naçana Ndióxi ndohó ña ná quihvi ini táhan ndó ta ná chindeé táhan ndó. ¹⁴ Joo tóco ndihi ña cúú ley Moisés in cáchí ndihi a tá cáchí a já: “Quihvi inún ñani táhún tá quiahva quihvi inún mún.” ¹⁵ Joo cuéntá coo ndó jáchí tá casáha ndo cajú xíxi xihín táhan ndó ta cajú quini xihín táhan ndó já queá xinu quiví jándihi saha táhan ndó.

Ña cúní ínimá yii Ndióxi cajú í xihín ña cúní yiquí cuñu í cajú í

¹⁶ Candehé ndo, ñani í. Ndítahan cajú ndó ña cúní ínimá yii Ndióxi ta co ndíta-

han cajú ndó ña xíca ini yiquí cuñu ndó cajú. ¹⁷ Jáchí tóco ndihi ña núu ña cúní yiquí cuñu yó cajú í cáni táhan xihín ña vaha ña cúní ínimá yii Ndióxi cajú í. Ta a cuú cuni táhan ínimá yii Ndióxi xihín ña núu jáchí co ndíque táhan vaha ña núu xihín ña vaha sahá ña cán queá a cuú cajú í ndá ña naçuu cúní yó cajú í. ¹⁸ Ta tá ná ndiquiahva ndó mé ndó ña ná candaca ínimá yii Ndióxi ndohó já queá a cácomí ga ley Moisés cuéntá saha ndo.

¹⁹ Ta co yáncá toho ndícuní ndá na cúú na cajú ña núu ña cúní mé ná cajú na. Jáchí ña cajú na cúú ña yóho: ndúu na xihín na co cúú ñájíhí na á yíí ná ta cajú na tá nuú ña núu xihín yiquí cuñu na. Ta ndícají ini na cuju na xihín ñáha á ña. ²⁰ Cajú cáhnu na yoço xihín tiniñu yúu ta cajú na ña tají. Ta cándají táhan na. Ta cáni táhan na ta ndácaan ña cuiñú jiní ná. Ta cama chá jáa xihín táhan na. Ta cáhvi ini na saha mé cuití va na. Ta catóo na jácani táhan na ñayivi já ná canduu jiiin na. Ta xihín ña yóho sáhdá táhan na ñayivi. ²¹ Cúú ná ñayivi ihvi ini ta cúú ná na sáhní ndii ta cúú ná na xíhi. Ta a juú quiahva ndehé na ta cuahá ndivaha java ga táhan ña yóho cajú na. Joo mé ndó cuni johó ndó ná cahan tucu u ña sa naçachi í jihna xihín ndo: Ndá na cajú já a ñehé táhvi toho na cacomí Ndióxi cuéntá saha ná.

²² Joo tá ndícaan ínimá yii Ndióxi ini já queá cajú mé á ña ná quihvi ini táhan í ta cajú ña ná cajú ini ta cajú ña ná coo vaha ini ta cajú ña ná a coço cama ini ta cajú ña ná chindeé yó ñayivi ta cajú ña ná cacuu ñayivi vaha ini ta cajú ínimá yii Ndióxi yóho ña ná cacuu ñayivi, na co cáhvi ivi johó ini. ²³ Ta cajú ña ná cacuu ñayivi, na co ndíñehe jícó mé, na cúú sáhnü mé. Ta ni in túhún toho ley a cuú chicaan cuachi jatá ñayivi tá sácú vaha na tóco ndihi ña cáchí tūhun yóho. ²⁴ Tóco ndihi na cómi Jesucristo cuéntá saha, sa najándacoo na ña núu naçahvi

ini na cajú na xihín yiquí cuñu na. Ta cúu ná tátuhun na sa naxihí nuú cuachi nasa- cajú na. ²⁵ Co cajú ga yó cuachi nacaja í jihna sahá ña ndácaan ínimá yíi Ndióxi iní. Ta xíní ñúhú quiahva í ñamaní nu mé á ña ná candaca a mí nuú ndihi ña cajú í.

²⁶ Ta co ndítahan ndiñehe jícó yo mí ta ni co ndítahan jácani táhan í ñayivi ta ni co ndítahan cahihví ini xihín táhan í.

Ndítahan nuú na cúu cuéntá Jesús chindeé táhan na

6 Candehé ndó, ñani í. Tá naxini ndó nandicava in na cúu cuéntá Jesús nuú cuachi já queá ndítahan nu ndóhó, na nachutú ndaa ínimá xihín ínimá yíi Ndióxi, chindeé ndó na já ná ndicaca vaha na íchi cuéntá Jesús. Joo víí víí cahan ndó xihín ná jáchi ndítahan cahvi ini ndó ña vaxi quiví tá cuu ndicava ri ndóhó va nuú cuachi. ² Xíní ñúhú chindeé táhan ndó tá ndóho ini ndó. Ta xihín ña yóho jáxinu coo ndó ña sáhdá Jesucristo nu ndó cajú ndó.

³ Tá ndúu java na tañu ndó ta cáhán na cúu ná na náhnu ndivaha vatí co cúu á ña ndaa já queá jándahvi na mé va na. ⁴ Tá in tá in ndó ndítahan candehé ndó ndá quiahva cajú ndó já ná cuu cajíi ini ndó tá cajú vaha ndó. Ta co ndítahan ndiñehe jícó ndó mé ndó sahá ña cáhán ndó ña vaha chága cajú mé ndó a juú ga inga ga na. ⁵ Jáchi tá in tá in ndó ndítahan nu ndó candehé ndó ña cajú ndó, á cúu á ña vaha á cúu á ña núu.

⁶ Tóco ndihi ndó, na jácuaha tuhun Ndióxi ndítahan nu ndó chindeé ndó na jánahá ndóhó xihín ña cómi ndó.

⁷ Jándahvi ndó mé ndó tá cáhán ndó ña cuu jándahvi ndó Ndióxi jáchi a cuú jándahvi ñayivi Ndióxi. Sa xíní ndó tá xútu ndó in tata nu ñúhu já queá vaxi quiví tá jáquee ndó mé ñaha naxutu ndó.

⁸ Tá cajú ñayivi ña núu ña cúni mé cuití na já queá vaxi quiví cuhun na indayá

sahá ña núu nacaja na. Joo tá cajú na ña vaha ña cajíi ini ínimá yíi Ndióxi xihín já queá ñehe táhvi na cuhun na coo na xihín Ndióxi andá ama cáa quiví, cajú ínimá yíi Ndióxi. ⁹ Sahá ña cán queá a cánaá yó cajú í ña vaha jáchi tá ná a jándacoo í cajú í ña cúni Ndióxi já queá vaxi quiví quiahva Ndióxi nu yo ña ndítahan ndiquehé sahá ña táhan ini mé a xihín ña nacaja í. ¹⁰ Sahá ña cán queá tá núná nu yó cajú vaha í xihín tóco ndihi ñayivi cóho cajú í ña. Ta cachí ga ví tá cúu ná na cándéé ini Jesús.

Ndídayí Pablo na cúu cuéntá Jesús

¹¹ Candehé ndó ndaja náhnu letra cáhyí í nu ndo xihín ndáha mí í viti.

¹² Cúni ña ná candaa ini ndó sahá java ga ñayivi, na cúni cajú ndúsa xihín ndó ña ná chícáan ndó marca yiquí cuñu ndó. Cajú na ña yóho jáchi cúni na candoo vaha na nuú na Israel. Ta yíhvi na ndicuita ñayivi xihín ná sahá ña cándúsa na Jesucristo, mé a naxihí ndica crúxu sahá cuachí. ¹³ Joo mé na chícáan marca yiquí cuñu cán co sácú vaha na tóco ndihi ña sáhdá ley Moisés. Joo cúni na ña ná chícáan ndó marca yiquí cuñu ndó já ná cuu cahan lándá na nuú na Israel sahá ña nacaja ndúsa ná xihín ndo.

¹⁴ Joo yehe, ni in túhún toho ñaha co cúni cahan lándá í saha. Ña cúni cajú í queá cahan í sahá Jesucristo, mé á naxihí ndica crúxu. Ta sahá ña cándéé ini í Jesucristo sahá ña cán queá cúu á tátuhun naxihí í nuú ña núu ñuyiví yóho. Co cúni ga í cajú í ña cajú ñayivi ñuyiví ta co cúni na cán catáhan na xihín í. ¹⁵ Ta co ndíyahvi nu Ndióxi á naquihvi marca yiquí cuñu í á coo a. Ña ndíyahvi ndusa queá ña nanduú ñayivi saá sahá ña cándéé iní Jesucristo. ¹⁶ Cúni ña ná coo vaha ini ndó, na cajú ña cahan í yóho. Ta ná cajú Ndióxi cuahá ñamaní xihín ndó ta xihín tóco ndihi na cúu cuéntá mé á.

¹⁷Ta viti xihín chínuu cō cúní ga í ña ná jáquihvi ga ñayivi yehe. Jáchi tóco ndihi yanda ndáá a nu yiquí cuñu í náha ña mé a ndaa cúú u da cája chúun cuéntá Jesucristo.

¹⁸Ñani í na cúú cuéntá Jesús, ña cúní quéa ná caja Jesucristo, xitoho í cuahá ñamaní xihín ndihi ndó. Já ná coo.

Carta naçahyí Pablo nuú na cúu cuéntá Jesús ndúu ñuu Efeso

Chíndahá Pablo Ndióxi coo na cúu cuéntá Jesús ndúu ñuu Efeso

1 Yehe cúu Pablo, da naçaxi Ndióxi cacuu apóstol cuéntá Jesucristo. Cáhyí i carta yóho nuú na cúu cuéntá Ndióxi ndúu ñuu Efeso, na cándeeé ini Jesucristo. ²Ña cúní queá ná caja Ndióxi, tátá yo xihín Jesucristo, xitoho í cuahá ñamaní xihín ndó ta ná caja mé á ña ná coo vaha ini ndó.

Ñehe táhvi yó cuahá ñamaní cája Ndióxi sahá ña cándeeé iní Jesucristo

³Cóho caja cáhnu í Ndióxi, mé a cúu tátá Jesucristo, xitoho í. Cóho caja cáhnu í mé á jáchi cuahá ndivaha ñamaní naçaja xoho. Ta tá nuú ña vaha quíxi indivi nasahan ndihi mé á nu yo jáchi in cúu yo xihín Jesucristo. ⁴Janda tá camaní cava sahá saha ñuyiví já naçaxi Ndióxi mí ña ná cacuu cuéntá mé á sahá ña naçaja Jesucristo. Ta nasacu ini a ndaja mí ña ná cacuu ñayivi yí, na coó ga cuachi nu mé á. ⁵Quíhvi ndivaha ini a mí sahá ña cán queá sa nasacu ini mé á ña ná quivi Jesucristo saha yo já ná nduu jáhyi mé á. Já naçaja jáchi já cúní a coo. ⁶Sahá ña cán queá ndítahan nu yo caja cáhnu í Ndióxi ní tiempo jáchi cuahá ndivaha ñamaní cája mé á xihín yo tá naçaja mé á ña in nanduú xihín Jesucristo, jáhyi maní á. ⁷Naçaja Ndióxi ñamaní cáhnu xihín yo tá naxita ní Jesucristo ndica crúxu saha yo. Anda jávi cuu jáçacu a mí ta cuu caja cáhnu ini a sahá cuachí. ⁸Mé a ndaa naçaja cuahá ndivaha Ndióxi ñamaní xihín yo. Naçaja mé á ña ná ndindichí jini yo já ná candaá iní tühun mé á. ⁹Ta nasahan ñamaní nu yo ña ná candaá iní ña nasacu ini mé á caja jáchi janda sanahá nasahin jehé a nu yo joo viti sa candaá iní ndá

saha nachindahá mé á Jesucristo. ¹⁰Ta vaxi quivi coo ña nasacu ini mé á coo. Ta mé quivi cán caja Ndióxi ña ná cacomí Jesucristo cuéntá saha tóco ndihi ñaha ndúu ñuyiví xihín ña ndúu indivi jáchi tóco ndihi ñaha xinu a canduu a ndaha Jesucristo.

¹¹Ta coo tá quiahva nasacu ini Ndióxi coo jáchi cája mé á tóco ndihi ña sácú ini a caja. Janda sanahá ndivaha nasacu ini a çaxi a mí cacuu ñayivi ñehe táhvi ndiquehé ña vaha, ña quíxi nu ín mé á sahá ña in nanduú xihín Jesucristo. ¹²Sahá ña cán queá ndítahan nuú nde caja cáhnu nde Ndióxi ña ná ñaha ndaja cáhnu cúu mé á jáchi jihna ñúhú nde naçasahá cándeeé ini nde Jesucristo. ¹³Ta quiahva já naçaja ri ndóho va jáchi tá naxini johó ndó ña ndaa sahá Jesucristo já naçandeeé ini ndó mé á. Mé tühun yóho najánaña nu ndo ndá quiahva najáçacu mé á ndohó. Ta tá naçandúsa ndó a já in nanduú ndó xihín á ta cúu á tá tühun nanani marca Ndióxi ndohó ña náha ña mé a ndaa cúu ndó cuéntá mé á. Ta mé marca yóho cúu ínima yí mé á ña nasahan tühun a nu ndó quiahva nu ndo. ¹⁴Ta ndácaan ínima yí mé á ini ínima yo sahá ña cán queá candaá vaha iní ña vaxi quivi ndiquehé ña vaha, ña quiahva Ndióxi nu yo jáchi sa nasahan mé á tühun a caja ña. Ta sa já ndácaan ínima yí mé á ini ínima yo janda quiahva ná xinu quivi jáçacu a mí nuú cuachí. Sahá ña cán queá cóho caja cáhnu í mé á ña ná ñaha ndaja cáhnu cúu mé á.

Xíça táhvi Pablo nu Ndióxi ña ná quiahva mé á ña ndichí jini na cúu cuéntá Jesús

¹⁵Ta sahá ña sa candaá vaha ini i ña cándeeé ini ndó Jesucristo, xitoho í ta sahá ña sa candaá ini i ña quíhvi ini ndó tóco ndihi na cúu cuéntá Ndióxi ¹⁶sahá ña cán queá co jandacoo i ña ndiquiahva

ĩ ndixahvi nu Ndióxi saha ndo. Ta co ndindójo i caca tahvi i nu Ndióxi saha ndo. ¹⁷ Ta tá xica tahvi i nu Ndióxi, mé a cúu tátá Jesucristo, xitoho í, mé a cúu Ndióxi cáhnu ndivaha já xica tahvi i nu á ña ná quiahva ínimá yii mé á nu ndó. Anda já caja mé á ña ná ndindíchi jini ndo já ná nahá ndaja cáa Jesucristo. Ta xihín ña yóho candaá vaha chága ini ndó saha mé á. ¹⁸ Ta xica tahvi i nu Ndióxi ña ná jándiyehé a xíní túní ndo já ná candaá ini ndó sahá ña vaha caja mé á chága chí nuu xihin ndo. Ta ñúchí ndivaha coo tá ná xinu quivi ndiquehe Ndióxi ndohó cuhun ndó coo ndó xihin mé á anda ama cáa quivi sahá ña cúu ndó cuéntá mé á. ¹⁹ Ta xica tahvi i nu á ña ná candaá ini ndó ña co vája xinu coo nu ndíhi ndée Ndióxi jáchi fin ndivaha ndée mé á. Ta fin mé ndée yóho tañu mí, na cúu cuéntá mé á. Ta sa mé ndée yóho queá nacaja chuun Ndióxi ²⁰ tá najánditacu a Jesucristo. Anda jáví nasacu coo a ña xoo cuáha mé á indiví. ²¹ Ta nacaja Ndióxi ña ná nduu Jesucristo jini nu tóco ndihi na fin ndée cahnda chuun ñuyivi yóho xihín na fin ndée cahnda chuun indiví. Sáhndá Jesucristo chuun nu tóco ndihi na cán vatí cúu ná na ndúu tiempo viti á cúu ná na vaxi chága chí nuu. ²² Tóco ndihi ñaha ndúu indiví xihín ñuyivi nandiquiahva Ndióxi ña ndáha Jesucristo ña ná cacomí mé á cuéntá sahá. Ta sa mé á cúu á jini nu tóco ndihi na cándéé ini mé á. ²³ Ta tóco ndihi na cúu cuéntá Jesucristo cúu ná tátuhun yiquí cuñu mé á sahá ña nandicutú ndaa ínimá ná xihin mé á. Ta mé a cán jáchutú a tóco ndihi na ndúu ñuyivi xihin indiví.

Najácacu Ndióxi mí jáchi quíhvi ini a mí

2 Ta jihna nasacuu ndó tátuhun na sa naxihí jáchi nasacaja ndó cuahá cuachi. Joo viti cúu ndó tátuhun na nanditacu tucu jáchi Ndióxi najácacu ndohó.

² Ta nasacaja ndó tá quiahva cája ñayivi ñuyivi yóho. Ta nasacaja ndó ña cúni tiñhá sacuaña, rí cúu jini nu tóco ndihi rí quini. Ta mé rí cán cómi rí cuéntá sahá ñayivi, na co cája ña cúni Ndióxi. ³ Ta quiahva já nasanduú jihna jáchi nasacaja í ña xica ini mí ví ta nasacaja í tóco ndihi ña núu, ña nasacavi ini caja í. Ta saha tóco ndihi ña núu nacaja í yóho nanditahan nu yo jándoho ndivaha Ndióxi ini tá quiahva cája mé á xihín java ga na co cúni candúsa mé á. ⁴ Joo natahvi ndivaha ini Ndióxi saha yo ta naquihvi ini ndivaha mé á mí. ⁵ Ta vatí nasacuú tátuhun ndji ta coo nacuu ndique táhan maní yo xihin Ndióxi sahá cuachi nasacaja í joo natahvi ini Ndióxi saha yó sahá ña cán queá najácacu a mí sahá ña nacaja Jesucristo. ⁶ Vatí nasacuú tátuhun ndji sahá cuachi nasacaja í joo tá nanditacu Jesucristo já nasacuu a tátuhun nanditacu yó xihin mé á nacaja Ndióxi. Ta nacaja mé á ña ná cacoo í xihín Jesucristo tá ná xinu coo í indiví. ⁷ Nacaja Ndióxi ña yóho jáchi nasacu ini a jánaña nu yo viti xihin chága chí nuu ña quíhvi ndivaha ini a mí ta táhvi ndivaha ini a saha yo sahá ña nacaja Jesucristo. ⁸ Ta sahá ña natahvi ini Ndióxi saha ndo nañehe táhvi ndó cacu ndaa ínimá ndo jáchi cándéé ini ndó mé á. Ta co cúu á sahá ña cája mé ndó jáchi cúu á ñamaní nacaja Ndióxi xihin ndo. ⁹ Ta coo najácacu a ndohó sahá ña vaha cája ndó jáchi co cúni a ña ná caja cáhnu ndó mé ndó. ¹⁰ Jáchi nacavaha Ndióxi mí tá quiahva cúni a ña in ná ndúu xihín Jesucristo já ná caja í ndinuhu ña vaha, ña nasacu ini a caja í anda jihna.

Íin vaha ini sahá ña nacaja Jesucristo xoho

¹¹ Candehé ndó, na tóho, na cúu cuéntá Jesús. Ná ndicuhun ini ndó ndaja nasacuu ndó jihna. Nacachi na Israel saha ndó ña coo yahvi toho ndó jáchi

coó n̄achicaan n̄a marca yiquí cuñu ndó. ¹²Ndítahan ndicuhun ini ndó ña mé tiempo cán co xíní toho ndó Jesucristo. Ta ni coó nasacuu ndó n̄a Israel, n̄a n̄acaxi Ndióxi. Ta ni coó nasacuu ndó ñayivi nasahan Ndióxi tuhun a nuu. Nasanduu uun ndó ñuyiví yóho jáchi coó nasaxíní ndo Ndióxi ta ni coó n̄acahán ndo cuhun ndó indiví. ¹³Vatí coó nasacuu ndó n̄a cúu cuéntá Ndióxi joo viti n̄acayati ndó nu á ta já in n̄anduu ndó xihín Jesucristo sahá ña naxihí a ndica crúxu saha ndo. ¹⁴Ta n̄acaja Jesucristo ña ná coo vaha ini n̄a Israel xihín n̄a tóho. Ta n̄acaja ña in n̄anduu na cuéntá mé á. Jáchi najándihi á sahá ña nasaji nuu nuú n̄a cán ñá ná ndique táhan mání xihín táhan na. ¹⁵Ta tá naxihí Jesucristo najáxinu coo a nu ley ña nasahnda chuun nu yo sahá ña nanditahan caja í. Ta n̄andaja mé á ña in n̄anduu n̄a Israel xihín n̄a coó naquixi chichi Israel. Ta tá n̄andihí já n̄andaja mé á ña n̄anduu na cuéntá mé á já n̄anduu vaha ini xihín táhan na. ¹⁶Tá naxihí Jesucristo ndica crúxu já n̄acaja mé á ña ná ndique táhan mání xihín táhan na ta já n̄andihí sahá ña cáni táhan na. Andá já najándique táhan mání á n̄a xihín Ndióxi ta já in n̄anduu na.

¹⁷Ta naquixi Jesucristo caxi tuhun a tuhun vaha nu yo ña ná coo vaha ini xihín Ndióxi. Ta coó caja toho a á cúu ná n̄a tóho, n̄a nasacuu xícá nu á tátuhun mé ndó, á cúu ná n̄a Israel, n̄a nasanduu yati nu á tátuhun mé nde jáchi nasahan mé á tuhun vaha nu tóco ndihí. ¹⁸Ta sahá ña n̄acaja Jesucristo cuu cayatí nu Ndióxi viti. Coó caja toho a á cúu yó n̄a naquixi chichi Israel á co cúu yó n̄a naquixi chichi Israel jáchi ínima yii mé á queá chindeé a mí cayatí nu Ndióxi. ¹⁹Sahá ña cán queá co cúu ga ndó n̄a tóho, n̄a naquixi xícá jáchi in n̄anduu ndó xihín n̄a cúu cuéntá Ndióxi viti ta cúu ndó n̄a vehe mé á. ²⁰Ta viti tóco

ndihí, n̄a cúu cuéntá mé á cúu yó tátuhun in vehe. Ta n̄a apóstol xihín n̄a profeta cúu ná tátuhun yuu ndúhu sahá vehe jan jáchi najánaha n̄a tuhun Ndióxi nu ndó nu cuítí. Ta Jesucristo cúu á tátuhun yuu ndúhu cuahan titó vehe jan ña sahan ndée vehe jan. ²¹Ta n̄acaja Jesucristo ña n̄andique táhan vaha tóco ndihí n̄a cúu cuéntá mé á. Ta n̄andaja mé a mí ña loho loho ná nduu tátuhun in veñuhu yii nu sá ndacaan Ndióxi, xitoho í. ²²Sahá ña in n̄anduu ndó xihín Jesucristo sahá ña cán queá n̄andique táhan mání xihín táhan ndó. Ta n̄acaja Ndióxi ña ná nduu ndó tátuhun in vehe nu ín Ndióxi jáchi ndacaan ínima yii mé á chí ini ndó.

**N̄achindahá Ndióxi Pablo
cahan da tuhun mé á nuú n̄a
coó naquixi chichi Israel**

3 Yehe cúu Pablo ta sahá ña xíca nuu i cahan i tuhun vaha sahá Jesucristo nuú n̄a coó naquixi chichi Israel saha ña cán queá ndacaan i vecaa viti. ²Ta sa cándaq ini ndó ña sahá ña natahvi ini Ndióxi saha ndó sahá ña cán queá nasahan mé á chuun yóho nuú i ña ná cahan i tuhun Ndióxi xihín ndo. ³Jihna n̄achijehé Ndióxi ña nasacu ini a caja joo viti najánaha mé á nuú i ña nasacu ini a caja. Ta sa n̄acahan chá i sahá ña jan tá n̄acahyí i carta nu ndo. ⁴Tá ná cahvi tucu ndó ña já cuni ndó ña mé a ndaa táhyí sa cándaq ini i ña nasahin jehé sahá Jesucristo. ⁵Coó n̄acandaq ini ñayivi ña yóho jáchi nasahin jehé ña. Joo viti n̄acaja ínima yii Ndióxi ña ná candaq ini n̄a apóstol xihín n̄a profeta, n̄a cúu cuéntá mé á sahá ña yóho. ⁶Ta ña nasahin jehé jihna cúu ña yóho: xihín ña n̄acaja Jesucristo ña in n̄anduu n̄a cúu chichi Israel xihín n̄a coo cúu chichi Israel já ná ñehe ná ña vaha ña nasacu ini Ndióxi quiqhva nuú n̄a cúu jahyi mé á. Jáchi in n̄anduu n̄a Israel xihín n̄a tóho ta in cúu ná ndáti na

ñehē ná ña ñacachi Ndióxi quiahva nu ná sahá ña ñacaja Jesucristo.

⁷Joo ñacaja Ndióxi ñamaní xihín i ta xihín ndéé mé á xíca nuu i cáhan i tūhun vaha saha mé á nuú ñayivi. ⁸Ñacaja Ndióxi ñamaní xihín i jáchi nasahan mé á chuun yóho nuú i ña ná cahan i tūhun vaha saha Jesucristo nuú na coo naquixi chichi Israel. Vati cúu u tātuhun in da coo saha tañu na cúu cuéntá Jesús joo ñacaja mé á ñamaní xihín i ña ná ndicani i nuú na tóho ndá quiahva náhnu nahá cája Jesucristo xihín ná. ⁹Ta nasahan Ndióxi chuun nuú i ña ná jánaha i tūhun vaha ña nasahin jehé nuú ndihi ñayivi. Ta anda sanahá nasahin jehé a ñacaja Ndióxi, mé a ñacavaha tóco ndihi ñaha.

¹⁰Ñacaja Ndióxi ña yóho jáchi sahá ña in nanduu na Israel xihín na tóho anda javí nahá nu tóco ndihi na sáhdá chuun nuú na ndúu indivi ndá quiahva ndíchí ndivaha jiní mé á. ¹¹Sanahá ndivaha nasacu ini Ndióxi ña yaha chága chí nuu. Ta viti xihín ña ñacaja Jesucristo, xitoho í naxinu coo nuú ña nasacu ini mé á coo anda ama cáa quivi. ¹²Ta sahá ña in nanduu xihín Jesucristo sahá ña cán queá co yihvi ga í cayati nu Ndióxi. Ta xini vaha í ña ndiquehe mé á mí jáchi cándéé ini mé á. ¹³Sahá ña cán queá xíca tahví i nu ndo ña ná a cávita ini ndó sahá ña ndóho ini i. Jáchi sahá ña ñacahan i tūhun Ndióxi nu ndo sahá ña cán queá ndóho ini i viti já ná cuu canduu vaha mé ndó. Ta xini ñúhú cajji ini ndó sahá ña cája i saha ndo.

Quíhvi ini Jesucristo ñayivi

¹⁴Sahá ña cán queá ndáca xítí i nu Ndióxi, mé a cúu tátá Jesucristo, xitoho í tá cáhvi ini i ndá quiahva náhnu cája mé á. ¹⁵Jáchi mé á cúu tátá tóco ndihi na ndúu indivi xihín tóco ndihi na ndúu ñuyivi yóho sahá ña cúu ná na vehe mé á. ¹⁶Ta cúní mé á cája cuahá ndivaha ñamaní xihín yo sahá ña cán queá xíca

tahví i nu á ña ná chindahá ínima yii á nu ndo já ná quiahva tūhun ndéé ini ndó ta já ná coo ndacú ini ndó. ¹⁷Ta xíca tahví i nu Ndióxi ña ná ndacaan Jesucristo ínima ndo sahá ña cándéé ini ndó mé á ta ná coo ndéé ini ndó sahá ña quíhvi ini a ndohó. Ta tá quiahva tūhun yohó yíto ñundáhyi quiahva já ndítahan coo ndó xihín Jesucristo. ¹⁸Ta anda javí mé ndó xihín tóco ndihi na cúu cuéntá Jesús cuu candaa ini ndó ndá quiahva quíhvi ini a ndohó. ¹⁹Ta xíca tahví i nu Ndióxi ña ná candaa ini ndó ndá quiahva quíhvi ini Jesucristo ndohó já queá ná ndicutú ndaa ínima ndó xihín Ndióxi. Joo mé a ndaa a cuú xinu coo ndó candaa ini ndó ndá quiahva quíhvi ini a ndohó.

²⁰Ta viti cáhnu nahá ná cacuu Ndióxi, mé a ña ndivaha ndéé cája cuahá nuú ñaha jáchi cája cuaha chága mé á ñamaní xihín yó a juú ga nuú ña cáhvi ini caca yó nu á jáchi chindeé Ndióxi mí xihín ndéé mé á. ²¹Cóho ndihí, na cúu cuéntá Jesús ña ná cája cáhnu í Ndióxi sahá ña ñacaja Jesucristo. Viti xihín ndijáá ní quivi ta anda ama cáa quivi ná cája cáhnu í mé á. Já ná coo.

Cája ínima yii Ndióxi ña in nanduu tóco ndihi na cúu cuéntá Jesús

4 Yehe ndácaan i vecaa sahá ña cája chúun i cuéntá Jesucristo, xitoho í. Sahá ña cán queá xíca tahví i nu ndo ña ná cája ndó ña cúní Ndióxi cája na cúu cuéntá mé á. Jáchi ñacaxi a ndohó sahá ña cán queá ndítahan cája ndó tá quiahva cúní mé á. ²Coto a cája cáhnu ndó mé ndó. Vii cája ndó xihín ñayivi. A cójo cama ini ndó xihín ná. Ta tá yáha nu cája xihín táhan ndó cája cáhnu ini saha táhan ndó jáchi quíhvi ini táhan ndó. ³Xini ñúhú ndinducú ndo in ná nduu ndó jáchi chindeé ínima yii Ndióxi ndohó cája ndó ña. Ta coto a ndacahnda táhan ndó já ná coo vaha ini xihín táhan ndó. ⁴Tóco ndihi mí, na cúu cuéntá

Jesús naxinu coo í cúu yó tátuhun in túhún ñayivi. Jáchí ín in túhún ínima yíi Ndióxi íní ta in túhún cúu ri ñā ndátí quiahva Ndióxi nū yó sahá ñā nacaxi a mí ndiquehé ñā. ⁵In túhún jini Jesu- cristo, xitoho í queá ín. Ta in túhún jini mé á ndítahan candee íní jáchí in nacandúta yó cuéntá mé á. ⁶Ta ín in túhún Ndióxi, mé a cúu á tátá tócó ndihí. Ta mé a cán cómí a cuéntá sahá tócó ndihí. Ta sáhan mé á ndée yó caja í ñā cúni a. Ta ndácaan ínima mé á ini tócó ndihí ñayivi cuéntá mé á.

⁷Joo tá in tá in mí nañehe táhví yó nasacu ini Jesucristo quiahva nū yó. ⁸Sahá ñā cán queá cáchí tuhun Ndióxi já:

Naquee vaha mé á xihín na ihví a ta nasandaca mé á na tá nandico coo a nandaa indiví.

Anda já nasahan tahví nuú in in ñayivi, nacachi tuhun Ndióxi.

⁹Tá cáchí a ñā nandaa Jesucristo indiví já cúni cachi a ñā nū cuítí nanuu a indiví anda ñuyívi yóho. ¹⁰Ta mé Jesu- cristo, mé á naquee indiví cán ta nanuu a ñuyívi yóho nandaa tucu a cuahan jan- da nū jícó cuí indiví ta já najándicutú a ñuyívi xihín indiví xihin ñā nacaja mé á.

¹¹Ta tá nasahan tahví nuú in in ñayivi já nañehe táhví java na cacuu na após- tol ta java na cacuu na profeta ta java na caca nuu na cahan na tuhun Ndióxi ñā cuu jácacu ñayivi. Ta java na nañehe táhví ná cacuu na na cómí cuéntá sahá na cúu cuéntá mé á ta java na cacuu na na jánaḡa tuhun Ndióxi nuú ñayivi.

¹²Já nacaja Ndióxi xihín na cán já ná canduu tiahva na caja chúun na cuéntá mé á ta já ná cuu caja na jacuahnu na na cúu cuéntá Jesús. ¹³Já queá ná xinu coo ndihí in canduu xihín na cúu cuéntá Jesús sahá ñā candee íní mé á. Já ná cuu xinu coo í candaa vaha chága íní sahá Jesu- cristo, mé a cúu in túhún jini já jahyi Ndióxi. Ta xihín ñā yóho cuu ndindacu

yó cuéntá mé á janda quiahva cuahnu vaha í jáxinu coo í ndicutú ndaa yó xihin mé á. ¹⁴Ná a cacuu ga í tátuhun na valí, na co tácu ini, na ndíjama jini tá tóo. Ta tá nandihí ndíco na jatá ñā jánaḡa inga na janda quiahva jándahvi na na. Ta mé na jándahvi ñahá yóho xini vaha na ndá quiahva caja na cañehe na na cuḡun na in íchi ñā co cúu íchi vaha. ¹⁵Na ndíta- han caja í queá cahan ndaa xihin táhan í xihín ndinuhu íní sahá ñā quíhví ini táhan í ta já cuahnu í xihín Jesucristo, mé a cúu jini nū tócó ndihí na cúu cuéntá mé á janda quiahva ná nduú tá quiahva cáa mé á. ¹⁶Sahá ñā cúu mé á jini nū yó sahá ñā cán queá cuu ndique táhan vaha í xihín java ga na cúu cuéntá Jesús. Ta ñúchí ndivaha ndique táhan na cúu cuéntá mé á tá caja in in na ñā cúni mé á. Ta xihín ñā yóho cuu canduu vaha í ta cuu ndindacu chága yó cuéntá mé á ta já cuu quíhví ini táhan í.

Ñā saá cája í viti

¹⁷Ñā yóho queá cáxi tuhun í xihin ndó. Xíca tahví í nū ndó cuéntá Jesu- cristo, xitoho í ñā ná a caja ga ndó cuachi tá quiahva caja ñayivi ñuyívi jáchí coo yahví toho tá nuú ñā núu cáhví ini na caja na. ¹⁸Mé na cán nandaji xini túni ná. Ta co cúu ná na jácacu Ndióxi jáchí nachicaji na xini túni ná nū mé á ta nandaja táhyí na ínima ná. ¹⁹Co cácahan nuu ná jáchí nayaha va quiahva caja na ñā núu xihín ndinuhu ini na. Ta co sáji nuu na nuú yiquí cuñu na tá cúni a caja tá nuú ñā núu. ²⁰Joo tá nandiquehe ndó íchi cuéntá Jesús já najánaḡa nde ndohó ñā ná caxoo ndó nuú cuachi tátuhun ñā yóho. ²¹Jáchí naxini joho ndó sahá mé á ta nandiquehe ndó tuhun ndaa, ñā najánaḡa nde nū ndó, ñā cáhan sahá mé á. ²²Sahá ñā cán queá ndítahan nū ndó já- caxoo ndó nū tócó ndihí ñā núu nasaca- caja ndó jihna. Jáchí cuachi queá nacaja ndúsa xihin ndó ñā ná caja ndó ñā núu

ta játiví a ndohó sahá ña nandiava íní ndo caja ndó ña núu, ña jándahvi ndohó. ²³ Xíní ñúhú cacuu ndó na nanduu saá ínimá xihín xíní túní sahá ña cúu ndó cuéntá Jesús. ²⁴ Ta xihín ña yóho cuu xinú coo ndó cacuu ndó tátuhun ñayivi saá, na cáa tá quiahva cáa mé á. Ta náha ña mé a ndaa táhyí cúu ndó ñayivi ndaa, na nandiví nu mé á.

²⁵ Sahá ña cán queá a cáhan ga ndó ña tühún. Ña ndítahan nu ndó caja ndó queá cahan ndó ña ndaa xihín ñani táhan ndó jáchi in nanduu ndihí cuéntá Jesucristo.

²⁶ Ta tá jáa ndo xihín ñayivi coto a cája ndó cuachi jáchi xíní ñúhú yaha yachi ña xójo ini ndó xihín ná. Ta tá sa nahini sa co ndítahan ndácaan ga ña xójo ini ndó xihín ná. ²⁷ Ta a quiahva ndó ñamaní nuú tiñáhá sacuaḥa ña ná caja rí ña cúní rí xihín ndo.

²⁸ Ndá na nasacaja cuíhná jihna coto ná a cája cuíhná ga na viti. Ndítahan caja chúun vaha na ña ná cuu chindeé na na cámaní ñaha nuu.

²⁹ A cáhan ga ndó tühun núu. Ña ndítahan nu ndó queá chindeé ndo ñayivi xihín tühun cáhan ndó. Ta já cuu cuahnu na xihín á ña ná ñeḥe ná ñamaní nu Ndióxi. ³⁰ A cája ndó ña ná cacueḥa ínimá yíi Ndióxi xihín ndo jáchi mé ínimá yíi Ndióxi cán queá náha ña mé a ndaa cúu ndó cuéntá mé á. Cúu á tátuhun nañani marca Ndióxi ndohó ña náha ña a jándacoo toho a ndohó janda quiahva ná xinú coo quiví tá chí in ndeé va jácacu Ndióxi ndohó.

³¹ Xíní ñúhú tavá xóo ndó tóco ndihi ña núu, ña co sáhan ñamaní nu ndó canduu vaha xihín táhan ndó. Ta co ndítahan jaá ndo xihín ñayivi ta ni co ndítahan cojo ini ndó. Ta co ndítahan cayuhú nu táhan ndó ta ni a cánahá ndó xihín ná. Ña ndítahan caja ndó queá tavá xóo ndó mé ndó nu tóco ndihi ña núu. ³² Ña ndítahan caja ndó queá ná caja vaha xihín

táhan ndó ta candáhví ini táhan ndó. Ta caja cáhnu ini saḥa táhan ndó tá quiahva nacaja cáhnu ini Ndióxi saḥa ndó sahá ña nacaja Jesucristo saḥa ndo.

Ña ndítahan caja na cúu jahyi Ndióxi

5 Mé ndó cúu ndó jahyi máni Ndióxi sahá ña cán queá ndítahan ndihi ini ndó caja ndó tá quiahva cája mé á. ² Xíní ñúhú quihví ini ndó ñani táhan ndó tá quiahva nacaja Jesucristo. Naquihví ini a mí ta nandiquiahva mé á quivi a ndica crúxu saḥa yo tátuhun in quítí, rí nasahní na joco na nu Ndióxi. Ta mé a ndaa nasacuu a ña nacajii ini Ndióxi xihín.

³ Co cúní cuni joho i ña cája ndó cuachi tátuhun tá íin in ñayivi xihín ñájíhí á yíi ñani táhan na á tá cája na ña núu xihín yiquí cuñu na á tá chínúu na ínimá ná jatá jjuhún na. Co ndítahan nu ndó caja ndó ña yóho jáchi cúu ndó na cúu cuéntá Ndióxi viti. ⁴ Coto a cáhan ndó ña núu ña coo saḥa. Ta ni a ndítuhún jiquí xihín táhan ndó xihín tühun núu. Jáchi co cája vaha toho ña yóho xoho. Ña ndítahan caja ndó queá ndiquiahva ndó ndixahvi nu Ndióxi. ⁵ Jáchi sa cándaḥa ini ndó ña ndá na ndúu xihín na co cúu ñájíhí na á yíi ná, á tá cája na ña núu xihín yiquí cuñu na á tá cúu ná na chínúu ínimá jatá jjuhún, mé na cán a ñeḥe táhví toho na cacomí Jesucristo xihín Ndióxi cuéntá saḥa ná. Jáchi na chínúu ínimá jatá jjuhún cúu ná tátuhun na cája cáhnu yoco. ⁶ A cándúsa ndó caja ndó cuachi cája na jan jáchi cúní na jándahvi na ndohó xihín ña tühún. Jáchi cúu ná ñayivi saá ini, na jácojo ini Ndióxi. Ta tandaa quiví jándoho a ini na cán. ⁷ Sahá ña cán queá co ndítahan ndique táhan ndó caja ndó ña núu xihín na jan.

⁸ Mé ndó nasanduu ndó nuú naá ndivaha jihna joo sahá ña in nanduu ndó xihín Jesucristo ndúu ndó nu yéḥe viti. Sahá ña cán queá ndítahan caja vaha

ndó já ná naha ña mé a ndaa cúu ndó ñayivi mé á, na xíca nu yéhe. ⁹ Jáchí tóco ndihi na ndúu nu yéhe cája na nd-inuhu ña vaha ta xíca ndacú na íchi cuéntá ña ndaa. ¹⁰ Xíní ñúhú jácuaha ndó caja ndó ña cájii ini Ndióxi xihín. ¹¹ A catáhan ndó xihín ñayivi ndúu nuú naá yávi ta a cája ndó ña núu xihín ná, ña co ndáyahvi. Ña ndítahan caja ndó queá jánan ndó na ta naha tuhun ndó sahá ña núu cája na. ¹² Jáchí chínuú cacahan nuu yo nditúhún yo sahá ña cája jehé na jan. ¹³ Joo tá ná xínu quívi canáha ndihi ña cája na jan já candaa ini tóco ndihi ñayivi ña nacaja jehé na. Jáchí tóco ndihi ña ñúhu jehé quee ndihi a nu yéhe. ¹⁴ Sahá ña cán queá já cáchí tuhun Ndióxi já:

Xíní ñúhú ndicáxi inún jáchí cúun tá-tuhun da quíji tañu na naxihi.

Ta tá ná ndicáxi inún já jándiyehé Jesucristo ínimun já ná a cájún cuachi, cáchí tuhun Ndióxi.

¹⁵ Xíní ñúhú candehé vaha ndó ndá quiahva ndítahan caja ndó. A cája ndó tá quiahva cája ñayivi co xíní túní. Ndítahan cacuu ndó ñayivi ndíchí jini. ¹⁶ Xíní ñúhú ndihi ini ndó caja ndó ña cúní Ndióxi jáchí quini ndivaha cáa tiempo viti. ¹⁷ Coto a cája ndó ña tóntó. Xíní ñúhú ndicani vaha ini ndó sahá ña cúní Ndióxi, xitoho í caja ndó. ¹⁸ A jáxini ndó mé ndó jáchí co cája vaha ña jan xihín ndo. Ña ndítahan caja ndó queá quiahva ndó ñamaní nu Ndióxi ña ná jándicutú a ínimá ndo xihín ínimá yii mé á. ¹⁹ Ta tá ná nditúhún ndo xíní ñúhú ndinuhu ini ndó caja cáhnu ndó Ndióxi, xitoho ndó xihín tuhun cáhan ndó. Xíní ñúhú cata ndó salmo xihín himno xihín canto, ña sáhan ínimá yii Ndióxi nu ndo. Joo xíní ñúhú cacuu a ña quíxi ínimá ndó cája cáhnu ndó Ndióxi. ²⁰ Níi tiempo ndítahan ndiquiahva ndó ndixahvi nu Ndióxi, tátá yo saha tóco ndihi ñaha. Ta cáhan

ndó quívi Jesucristo, xitoho í tá ná caja ndó ña.

Ña ndítahan caja na sa natandaha

²¹ Ndítahan nu ndó candúsa táhan ndó já ná cuu ndicáhnu Ndióxi sahá ña cája ndó.

²² Ndóhó, najihí ndúu yíi ndítahan candúsa ndó yíi ndo tá quiahva cándúsa ndó Jesucristo, xitoho í. ²³ Jáchí yíi ndó cúu da cómí cuéntá saha ndo tá quiahva cómí Jesucristo cuéntá sahá na ndíco íchi mé á. Ta tóco ndihi na cúu cuéntá mé á cúu ná na ndáca tátuhun yiquí cuñu mé á. Ta mé á queá jácacu a na nuú cuachi. ²⁴ Tá quiahva cája na cúu cuéntá Jesús cándúsa na ña sáhdá mé á nu ná quiahva já ndítahan caja najihí ndúu yíi. Xíní ñúhú caja ndihi na ña cúní yíi na caja na.

²⁵ Ta ndóhó, da ndúu ñájihí, xíní ñúhú quihvi ini ndó na tá quiahva naquihvi ini Jesucristo na cúu cuéntá mé á tá naxihí a saha ná. ²⁶ Nacaja Jesucristo ña yóho jáchí cúní mé á ña ná nduu na cúu cuéntá mé á ñayivi víi sahá ña nandoo na xihín ticuifí ta sahá ña sácú vaha na ña cáchí tuhun Ndióxi. ²⁷ Sahá ña cán queá cuu cayati na nu Ndióxi sahá ña cúu ná ñayivi víi cuéntá mé á, na naquee vaha xihín ña núu, na co jácaquini mé xihín cuachi. Ta viti cúu ná ñayivi yii nu mé á jáchí co cája ga na cuachi. ²⁸ Ndítahan nuú in dataa quihvi ini da ñájihí da tá quiahva quihvi ini da yiquí cuñu da jáchí in nanduu na. Tá quihvi ini da ñájihí da já queá quihvi ini da mé dá. ²⁹ Jáchí ni in túhún toho ñayivi co cándají na yiquí cuñu na. Ña cája na queá sáhan na ña cuxu a ta ndáa vaha na ña ta quiahva já ndáa Jesucristo na cúu cuéntá mé á. ³⁰ Jáchí tóco ndihí mí, na cúu cuéntá Jesús cúu yó java na ndáca yiquí cuñu mé á. ³¹ Sahá ña cán queá cáchí tuhun Ndióxi já: “Tá ná tandaha in dataa já ndítahan quee xóo da nu tátá náná da já

na ndique táhan da coo da xihín ñájíhí da. Ta já ná nduu ndívi na tátuhun in túhún jiní ñayivi”, cáchí tũhun Ndióxi. ³²Mé a ndaa yáncá ndivaha cándaá iní tóco ndihi ña yóho. Joo náha nu yó ndá quiahva cúu yó tátuhun yiquí cuñu Jesucristo tá in nanduú xihín á. ³³Xíní ñúhú ndicuhun ini ndó ña ndítahan quihvi ini in in ndó ñájíhí ndo tá quiahva quihvi ini ndó mé ndó. Ta jári ndóhó, najihí xíní ñúhú caja cáhnu ndó yí ndo.

6 Ndóhó, na valí xihín na tacú, xíní ñúhú coo johu ndó nu sáhná tátá náná ndo chuun nu ndo. Jáchí ña yóho queá cúní Ndióxi caja ndó. ²Xíní ñúhú caja cáhnu ndó tátá ndo ta caja cáhnu ndó náná ndo jáchí jihna ñúhú nasahnda Ndióxi ña yóho nu yó caja í. Ta jatá ña yóho nasahan mé á tũhun a nu yó tá cáchí a já: ³“Tá ná cajún ña yóho já cuahnu yatún ta quixi cuahá ña vaha nuun.”

⁴Ta ndóhó, na ndúu jahyi, a jácojo ndó ini jahyi ndó. Ña ndítahan caja ndó queá jánaḥa vaha ndó nu ná ña ndítahan caja na. Ta jánaḥa ndó nu ná ndá quiahva caca na íchí cuéntá Ndióxi, xitoho í.

⁵Ta ndóhó, na naxeen na caja chúun nu ná xíní ñúhú coo johu ndó nu cáhan xitoho ndó, na cómí cuéntá saḥa ndo ñuyiví yóho. Ta ndítahan caja cáhnu ndó na ta cayihví ndó na. Joo xíní ñúhú caja ndó ña xihín ndinuhu ini ndó jáchí cúu á tátuhun cája chúun ndó nuú Jesucristo.

⁶Ndítahan nu ndó caja chúun vaha ndó nu ná ta a juú tá ndíta cuití na sánehé na nu cája chúun ndó sahá ña cúní ndó candoo vaha ndó nuú na cán, vaha. Ndítahan caja chúun ndó xihín ndinuhu ini ndó nuú xitoho ndó jáchí cúu á tátuhun cája chúun ndó nuú Jesucristo. Saḥá ña cán queá ndítahan caja ndó ña cúní Ndióxi xihín ndinuhu ini ndó. ⁷Xíní ñúhú cajjí ini ndó ta ndinuhu ini ndó tá cája chúun ndó. Ta ndítahan

caja ndó cuéntá ña cája chúun ndó nu Ndióxi ta co cája chúun ndó nuú ñayivi cuití va. ⁸Jáchí sa cándaá ini ndó ña vaxi quiví xinu yó nuú Jesucristo, xitoho í ndiquehé yahvi saḥá ña vaha nacaja í ñuyiví yóho. Ta coo caja toho a á cúu yó xitoho á cúu yó na cája chúun nuú xitoho.

⁹Ta jári ndóhó va, na cúu xitoho mozo naxeen ndó jan ndítahan nu ndó caja vaha ndó xihín ná ta co ndítahan jáyihví ndó na xihín tũhun cáhan ndó xihín ná. Ndítahan ndicuhun ini ndó ña ín Jesucristo indiví ta cúu á xitoho mé ndó ta sa mé á cán cúu xitoho na cája chúun xihín ndo. Ta co sáhní toho a cán mé á saḥa ndá ñayivi ín chága saḥa a juú ga inga na jáchí in cúu ndihí nu mé á.

Ndaja caja í quee vaha í xihín ña quini

¹⁰Ta viti xíní ñúhú caja ndacú ndo mé ndó xihín ndéé cáhnu Jesucristo, xitoho í jáchí in nanduú ndó xihín mé á viti. ¹¹Xíní ñúhú caja chúun ndó xihín tóco ndihi ndéé sahan Ndióxi nu ndo já ná cuu quee vaha ndó xihín tiñáhá saḥaḥa tá cúní rí jándahvi rí ndohó.

¹²Jáchí a juú xihín ñayivi, na ín yiquí cuñu cáni táhan í, vaha. Na cáni táhan í xihín cúu táto tiñáhá saḥaḥa, rí xíca nuu nu táchí indiví ta rí cán cúu rí rí cómí cuéntá saḥá ñayivi ndúu nuú naá yávi ñuyiví yóho. ¹³Sahá ña cán queá xíní ñúhú caja chúun ndó xihín tóco ndihi ndéé sahan Ndióxi nu ndó já queá ná cuu quee vaha ndó xihín rí quini tá ná xinu rí caní táhan rí xihín ndo. Ta xihín ña yóho cuu candita ndacú ndó tá sa nandihí naḥani táhan ndó xihín rí.

¹⁴Ta candita ndacú ndó xihín ña ndaa ña sahan Ndióxi nu ndo jáchí cúu á tátuhun in cinturón pañi tixi sahan ndéé ndácaan tóco ndo. Ndicuhun ini ndó ña cúu ndó ñayivi ndaa nu Ndióxi. Saḥá ña cán queá cúu á tátuhun ndíxi ndó cotó caa. ¹⁵Xíní ñúhú canduu tiaḥva ndó

cahan ndó tūhun vaha sahá Jesús xihín ñayivi jáchi tūhun yóho queá cajú ña ná coo vaha ini na xihín Ndióxi. Sahá ña cán queá cúú á tátūhun yíhi ndó tūhun Ndióxi. ¹⁶ Xíní ñúhú candeé ini ndó Ndióxi já queá ná cuu quee vaha ndó caji nuu ndó nuú ña núu cúni tiñáhá sacuahá chindahá rí nu ndo. Sahá ña cán queá cúú á tátūhun ñéhe ndó in caa jáh-ndá ña chicají a ndohó. Ta xihín mé ña yóho cuu candaji nuu nu ndo nuú ña ñéhe ñuhú ita jácana mé rí cán nu ndo. ¹⁷ Ndicūhun ini ndó ña najácau Ndióxi ndohó nuú cuachi sahá ña cán queá cúú á tátūhun ñúhu ndó yíjini caa. Tá ná cahan cáxi ndó tūhun sáhan ínimá yii Ndióxi nu ndó já queá cúú á tátūhun ñéhe ndó machiti, ña cúú tūhun Ndióxi. ¹⁸ A jándacoo ndó caça tǎhví ndó nu Ndióxi. Níi tiempo xíní ñúhú caça tǎhví ndo nu mé á. Joo ndítahan caça ndó ña jánahá ínimá yii mé á nu ndo caça ndo. Xíní ñúhú canduu tiǎhva ndó ta a cáva ini ndó ta xíní ñúhú caça tǎhví ndó saha tóco ndihi na cúú cuéntá Ndióxi. ¹⁹ Ta caça tǎhví ndó nu Ndióxi saha mí i viti já ná chindeé Ndióxi yehe cahan i xihín ñayivi tūhun mé á ta caça tǎhví ndó nu á ña ná quiǎhva mé á ndéé a nuú i já ná

cuu cahan i tūhun mé á ña coo nasaxini na jihna, nduu. Jáchi ña yóho queá cuu jácau a na nuú cuachi. ²⁰ Ndióxi queá nachindahá a yehe cūhun i cahan i tūhun yóho ta sahá ña xíca i cahan i tūhun yóho ndácaan i vecaa viti. Caça tǎhví ndó sahá i já ná a cáyihví i cahan i sahá Jesús nuú ñayivi ndúu yóho tá quiǎhva ndítahan nuú i caja i.

Ndíndayí Pablo ñayivi, na cúú cuéntá Jesús

²¹ Ñani máni yo, da naní Tíquico mé a ndaa cúú dá da chindeé táhan xihín i chuun Jesucristo, xitoho í. Ta mé dá cán cañehe da tūhun sahá i tá ná saa da nu ndo já ná candaa ini ndó ndátǎhvi yáha i. ²² Sahá ña cán chindahá i da nu ndo já ná caxi tūhun da nu ndó ndá quiǎhva yáha nde ndúu nde yóho ta xihín ña yóho ná cuu quiǎhva da tūhun ndeé ini ndó.

²³ Ña cúni queá ná caja Ndióxi, tátá yo xihín Jesucristo, xitoho í ña ná coo vaha ini tóco ndihi ndó, na cúú cuéntá Jesús. Ta ná caja mé á ña ná quihvi ini táhan ndó sahá ña candeé ini ndó mé á. ²⁴ Ta ná jándicutú ndaa mé á ñamaní jata tóco ndihi na quihvi ini Jesucristo, xitoho í xihín ndinuhu ini na. Já ná coo.

Carta n̄achindahá Pablo núú n̄a cúú cuéntá Jesús ndúú ñuu Filipos

Carta n̄ac̄ahí Pablo núú n̄a cúú cuéntá Jesús ndúú ñuu Filipos nani nas̄andac̄aan d̄a vec̄aa

1 Yehe cúú Pablo ta cája chúun i xih̄in Timoteo cuéntá Jesucristo. Ta cáhyí nd̄e carta yóho n̄u tóco ndihi n̄a cúú cuéntá Jesús, n̄a ndúú ñuu Filipos jáchi in n̄anduu na xih̄in Jesucristo. Ta cáhyí ri nd̄e carta yóho núú n̄a sacuah̄a núú n̄a cúú cuéntá Jesús xih̄in núú n̄a ch̄indeé mé n̄a sacuah̄a veñuhu. ²Xíca tahví i n̄u Ndióxi, tátá yo xih̄in núú Jesucristo, xitoho í ña ná caja cuah̄a mé á ñaman̄i xih̄in nd̄o ta ná caja mé á ña ná coo vaha ini ndó.

Xíca tahví Pablo n̄u Ndióxi sahá n̄a cúú cuéntá Jesús

³Ndíquiahva ndivaha i ndixahvi n̄u Ndióxi tá nd̄icuhun ini i saha nd̄o. ⁴Ní tiempo tá xíca tahví i n̄u Ndióxi saha ndihi nd̄o cájii ini i. ⁵Jách̄i j̄anda tá n̄andiquehe ndó ích̄i cuéntá Jesús ta j̄anda viti n̄achindeé ndó yehe cáhan i tuhun Ndióxi xih̄in ñayivi. ⁶Nacasáhá Ndióxi cája ña ná nduu ndó ñayivi nd̄aa n̄u mé á ta x̄in̄i vaha i ña j̄ax̄inu coo a ña j̄anda quiahva ná x̄inu coo quixi tucu Jesucristo ñuyví yóho. ⁷Cája i cuéntá vaha ndivaha va ndíquiahva i ndixahvi n̄u Ndióxi saha nd̄o jáchi mé a nd̄aa quih̄vi ndivaha ini i ndohó. Tá quiahva cája Ndióxi ñaman̄i xih̄in i quiahva já cája ri a ñaman̄i xih̄in mé ndó. Ta coó caja toho a tá nd̄acaan i vec̄aa. Ta coó caja toho a tá ná ndiquehe vaha i sahá tuhun Ndióxi núú n̄a jutixia á tá caxi tuhun i xih̄in ñayivi ña mé a nd̄aa cúú á tuhun Ndióxi, ña cúú jácacu ñayivi. ⁸Ta cándaa cáxi ini Ndióxi ña

quih̄vi ndivaha ini i ndohó tá quiahva quih̄vi ini Jesucristo ndohó. ⁹Xíca tahví i n̄u Ndióxi ña ná x̄inu ini ndó quih̄vi chága ini ndó ñayivi. Ta ná nd̄indichí chága jin̄i ndó ta ná coo chága x̄in̄i túni ndo. ¹⁰Já ná cuu caxi ndó ña vaha chága ní tiempo ta xih̄in ña yóho cacuu ndó ñayivi nd̄aa, n̄a co ndójo cuach̄i tá ná x̄inu quiví quixi tucu Jesucristo. ¹¹Nd̄itahan caja ndó ña vaha xih̄in ndinuhu ini ndó jáchi xih̄in ña yóho j̄anaha ndó núú ñayivi ña mé a nd̄aa cúú ndó cuéntá Jesús ta xih̄in ña yóho ndicáhnu ndivaha Ndióxi.

Ná caja í ña cúni Jesucristo xih̄in ndinuhu ini i

¹²Candehé ndó, ñani mí i, n̄a cúú cuéntá Jesús. Cúni ña ná cándaa ini ndó ña ndóho i vec̄aa yóho. Mé a nd̄aa sahá ña nd̄acaan i vec̄aa yóho n̄axini joh̄o cuah̄a chága ñayivi tuhun vaha sahá Jesucristo. ¹³Tóco ndihi soldado, n̄a ndúú vehe rey yóho xih̄in java ga ñayivi sa cándaa ndihi ini na ña nd̄acaan i vec̄aa sahá ña nd̄ico i ích̄i cuéntá Jesucristo. ¹⁴Ta sahá ña n̄acandaa ini cuah̄a n̄a cúú cuéntá Jesús ña nd̄acaan i vec̄aa yóho, n̄andindeé ini na caca nuu na cáhan n̄a tuhun Ndióxi xih̄in ñayivi ta co ylh̄vi n̄a caja na ña jáchi cándeé cáhnu chága ini na Ndióxi viti.

¹⁵Mé a nd̄aa ndúu java n̄a xíca nuu cáhan tuhun Ndióxi núú ñayivi sahá ña cáh̄ih̄vi cuití ini na. Ta java na cája na ña jáchi cúni n̄a cayojó n̄a núú i. Joo mé a nd̄aa java na cáhan n̄a tuhun Ndióxi sahá ña cúni n̄a caja na ña vaha. ¹⁶Joo java na cáhan n̄a tuhun Ndióxi sahá ña vaha mé cuití va na ta co cája na ña xih̄in ndinuhu ini na. Ña cúni n̄a caja na queá jáquih̄vi chága n̄a yehe nani nd̄acaan i vec̄aa yóho. ¹⁷Joo mé a nd̄aa java na cáhan n̄a sahá Jesucristo jáchi quih̄vi ndusa ini na yehe ta sa cándaa ini na ña nasacu Ndióxi yehe yóho ña ná ndiquehe

e sahá tuhun vaha cáhan sahá Jesucristo. ¹⁸ Joo co sahní toho i mí i ndá saha cája na ña jáchi cájii ini i tá cáhan na sahá Jesucristo nuú ñayivi. Ta cájii chága ini i ¹⁹ jáchi cándaã ini i ña quee vaha i nu tóco ndihi ña ndóho i yóho sahá ña chindee ínima Jesucristo yehe ta sahá ña xíca çã tahvi ndó nu Ndióxi sahá i. ²⁰ Cándee ini i ña a cándo núu i. Ta ndáti tiaha i chindee Ndióxi yehe já ná cuu çahan i sahá Jesucristo nuú ñayivi. Xihín ña cáhan i yóho jánaã i ndá quiahva cáhnu cúu Jesucristo. Ta co cája toho a á tácu u á naxihi i jáchi caja cáhnu tá caja cáhnu i Jesucristo. ²¹ Ta nani tácu u íin i ñuyívi yóho cája cáhnu i Jesucristo xihín ndinuhu ini i. Ta tá ná quivi i já vaha chága ví jáchi çuhun i coo i xihín mé á. ²² Ta co cándaã ini i ndíã vaha chága jáchi tá ná catacu u já cuu ñehe chága íni i çahan i sahá Jesucristo xihín ñayivi. ²³ Ivi joho cáhvi ini i ña á vaha chága ná catacu u á vaha chága ná quivi i. Jáchi tá ná quivi i ivi laã xinu coo i coo i xihín Jesucristo. Ta vaha chága ná çuhun i coo i cán a juú ga ña ná coo i ñuyívi yóho. ²⁴ Joo saha mé ndó xíní ñúhú coo tóo chága i ñuyívi yóho. ²⁵ Ta viti cándaã vaha ini i ña coo chága i ñuyívi yóho ña ná chindee e ndóho catiahva chága ndó tuhun Ndióxi já ná cajii chága ini ndó sahá ña cándee ini ndó mé á. ²⁶ Sahá ña cán queã cuu cajii ini ndó sahá ña coo tucu u xihín ndó ta cuu caja cáhnu ndó Jesucristo sahá ña yóho.

²⁷ Cúni ña ná ndíhi ini ndó caja ndó tá quiahva cáchi tuhun vaha cáhan sahá Jesucristo. Já queã tá ná saa i á tá ná a saa toho i coto nihni i ndóho cúni ñehé e tuhun ña in cúu ndihi ndó ta ndúu ndacú ndo cuéntá Ndióxi. Ta cúni ñehé e tuhun ña in cúu ndó ndúcú ndéé ndo cáhan ndó tuhun vaha sahá Jesucristo nuú ñayivi ña ná cándee ini na mé á. ²⁸ Ta coto a quiahva ndó ñamaní nuú na ihvi ndo jan ña ná jáyihvi na

ndóho. Jáchi xihín ña yóho cándaã ini na cán ña xíca na cuahan na nuú ndihi saha ná. Joo mé ndó cándaã ini ndó ña xíca ndó íchi nuú çacu ndaa ínima ndo caja Ndióxi. ²⁹ Jáchi sahá ña ñacaja Jesucristo ñehe táhvi ndó cándee ini ndó mé á. Ta quiahva já ñehe táhvi ri ndó ndóho ini ndó sahá ña cándee ini ndó mé á. ³⁰ In nuú ndóho ini sahá Jesucristo. Sa naxini ndó ndá quiahva ñandoho ini i jihna. Ta sa ñehe ndó tuhun ndá quiahva ndóho ini i viti.

Nanduu Jesucristo ñayivi vatí cúu á Ndióxi

2 Xíni vaha i ña sahan Jesucristo tuhun ndeé ini ndó ta quíhvi ini a ndóho. Xíni vaha i ña in nanduu ndó jáchi ndácaan ínima yíi Ndióxi ini ínima ndo. Xíni vaha i ña quíhvi ini táhan ndó ta táhnda ini saha táhan ndó. ² Sahá ña cán queã ndítahan caja ndó ña ná cajii ndivaha ini i sahá ña in cúu ndihi ndó ta sahá ña quíhvi chága ini táhan ndó. Ta sahá ña in nanduu ndó ñacaja ínima yíi Ndióxi já in nanduu xíní túní ndo nuú ña cúni ndó caja ndó. ³ Coto a ndúcú cuachi xihín táhan ndó. Ta coto a ndínehe jícó ndo mé ndó. Ndítahan coo ndisáhnu ini ndó. Ta ndítahan çahán ndo ña cáhnu chága inga ñayivi a juú ga mé ndó. ⁴ Ta co ndítahan ndíhi ini ndó sahá ña vaha mé ndó cuití va. Xíní ñúhú ndíhi ri ini ndó sahá ña vaha inga na.

⁵ Xíní ñúhú cahvi ini ndó tá quiahva nasacahvi ini Jesucristo. ⁶ Jáchi tá quiahva íin Ndióxi quiahva já íin Jesucristo. Ta vatí cúu á Ndióxi joo coo ñandaja cáhnu a mé á vatí cuu caja ña, nduu. ⁷ Ña ñacaja Jesucristo queã nasacu xóo a tóco ndihi ña cáhnu cúu mé á cán ta ñaquixi a ñacacu a ñuyívi yóho tá quiahva cácu ñayivi. Ta nasacuu a in dataa, da cája chúun cuéntá xitoho da. ⁸ Tá ñandíhi nanduu a ñayivi já najánuu a mé á janda quiahva

nasahan mé á quivi a ndica crúxu nuú naxihí a tátuhun da cajú cuachi quini. ⁹Sahá ña cán queá najándindita jícó ndivaha Ndióxi Jesucristo ta nasahan in quivi á nu á ta quivi Jesucristo yóho queá cáhnu chága nu tóco ndihi quivi. ¹⁰Sahá ña cán queá tóco ndihi na ndúu indivi xihín na ndúu ñuyívi cuni joho na quivi Jesucristo ta já ndaca xítí na nu á. Ta janda na ndúu tixi ñúhu ndaca xítí na nuú Jesucristo ña cajú cáhnu na mé á. ¹¹Anda jávi cahan in in na cán ña cúu Jesucristo xitoho na ta xihín ña yóho ndicáhnu ndivaha Ndióxi, tátá yo.

Na cúu cuéntá Jesús cúu ná tátuhun ñúhu, ña jándiyehé ñuyívi yóho

¹²Candehé ndó ñani mí i, na cúu cuéntá Jesús. Tá quiahva nacandúsa ndó cajú ndó ña nasahnda i nu ndo tá nasahin i tañu ndó jan quiahva já ndítahan candúsa chága ndó yehé viti nani iin xíca i nu ndo. Xíni ñúhu ndihi ini ndó cajú ndó ña cúní Ndióxi jáchi najácacu a ndohó. Ta xíni ñúhu cayihví ndó Ndióxi nani cajú cáhnu ndó a xihín ndinuhu ini ndó. ¹³Jáchi Ndióxi queá cajú ña xíca ini ndó cajú ndó ña vaha ta chindeé a ndohó cajú ndó ña táhan ini mé á xihín.

¹⁴Ta a cahan cuachi ndo saha tóco ndihi ña cajú ndó. Ta ni a ndítuhún ihvi xihín táhan ndó. ¹⁵Já ná ñaha ña cúu ndó ñayivi víi, na coo cuachi. Ndítahan cajú ndó tá quiahva cajú na cúu jahyi Ndióxi, na co cáquini xihín cuachi ña cajú ñayivi quini cuéntá ñuyívi yóho. Cúu á tátuhun ndíyihvi ndaa ndó xihín ña vaha cajú ndó tá quiahva ndíyihvi ndaa quimi indivi. ¹⁶Jáchi cahan ndó tuhun vaha sahá Jesucristo nuú ñayivi já ná cuu catacu na anda ama cáa quivi. Tá ná cajú ndó ña yóho já queá cajii ini i xihín ndó tá ná xinu quivi quixi tucu Jesucristo. Jáchi xihín ña yóho canda ini i ña a juú ña uun nasacuu chuun nacaja i. ¹⁷Ta vatí ná ndiquiahva i mí i quivi i

saha ndo joo cajii tá cajii ini i. Jáchi tá ná quivi i cúu á tátuhun catáhan i xihín ña joco ndó nu Ndióxi sahá ña candeé ini ndó mé á. Ta sahá ña yóho cajii ini i ta in nuú cajii ini ndihí. ¹⁸Sahá ña cán queá ndítahan cajii ini mé va ndó já ná cajii ini ndihí.

Sácú ini Pablo chindahá da Timoteo xihín Epafrodito nuú na ñuu Filipos

¹⁹Ta cúní Jesucristo, xitoho í chindahá yachi i Timoteo nu ndo ña ná cañehe da tuhun saha ndó nuú i. Anda jávi cajii ini i tá ná canda ini i saha ndo. ²⁰Mé a ndaa quihvi ini da ndohó ta coo ga inga da ñúhu ini saha ndo tá quiahva ñúhu ini yehé saha ndo. ²¹Jáchi java ga na cúu cuéntá Jesús ndicani ini na sahá ñaha mé va na ta co ndicani ini na sahá ñaha cuéntá Jesucristo. ²²Joo sa xíni ndó ña cúu Timoteo ta vaha ndivaha ta sa canda ini ndó ndá quiahva chindeé da yehé nu xíca i cahan i tuhun Ndióxi xihín ñayivi. Cúu dá tátuhun jahyi i jáchi chindeé cuahá da yehé. ²³Sahá ña cán queá sácú ini i chindahá i da nu ndo tá sa nacanda ini i ndaja cáa sahá i. ²⁴Ta candeé ini i ña quiahva Ndióxi ñamaní nuú i sa yachi mé vi coto nihni i ndohó jan.

²⁵Cajú i cuéntá xíni ñúhu chindahá i ñaní Epafrodito ña ná ndicó coo tucu da nu ndo jáchi mé ndó nachindahá ndó da nuú i ña ná chindeé da yehé. Ta mé a ndaa cuahá ndivaha nachindeé da yehé janda quiahva nandoho ini da xihín i. ²⁶Joo viti xíca ndivaha ini da cuni ndihi da ndohó. Ndicaní ini da saha ndo jáchi nañehé ndó tuhun ña sa naquihvi da. ²⁷Ta mé a ndaa nandoho da cuehe ta jalóho quivi da, nduu. Joo nacaja Ndióxi ñamaní xihín da ta já nandivaha da. Ta xihín ña yóho nacaja ri mé á ñamaní xihín yehé ña ná a cacueha chága ví ini i jáchi sa iin cuaha ña ndóho i viti. ²⁸Sahá ña cán queá chindahá númí i da

ñā ná saā quíi dá nū ndo já ná cajji ini ndó cuni tucu ndó dā ta xihín ñā yóho ndivaha ri ini yehe va. ²⁹ Nditahan cajji ini ndó ndiquehe ndó dā jáchi cúu dá ñani ndó dā cúu cuéntá Jesús. Ta ndítahan coo toní ñúhú ndó xihín tóco ndihi nā cája tá quiahva cája mé dá. ³⁰ Jáchi mé a ndaa jalóho quivi da sahá chuun nacaja da cuéntá Jesucristo. Cuahá ndivaha tondóho naquixi nū dá sahá ñā nachineé dā yehe jáchi nacaja mé dá ñā a cuú caja mé ndó yóho sahá i.

Ñā íin chága saha nū Ndióxi

3 Candehé ndó ñani mí i, nā cúu cuéntá Jesús. Xíni ñúhú cajji ini ndó xihín ñā cája Ndióxi. Co cája toho a nū mí i cáhyí ivi tucu u ñā sa nacahyí i nū ndó jihna jáchi chindeé a ndohó. ² Cuéntá coo ndó xihín ñayivi quini, na xíca cája ñā núu jan. Jáchi jánaha ñā ñā ndítahan cahnda ndó yiquí cuñu ndó ñā ná chícaan ndó marca yiquí cuñu ndó já ná cacuu ndó cuéntá Ndióxi. ³ Joo mí co cándusa í ñā cúu yó cuéntá Ndióxi sahá ñā sáhdá yo yiquí cuñu í vatí mé a ndaa cúu yó tátuhun nā naquihvi marca yiquí cuñu sahá ñā cája cáhnu í Ndióxi jáchi ndácaan ínimā yii mé á ini ínimā yo. Ta viti cájji ini yo sahá ñā cúu yó cuéntá Jesucristo. Co cándéé ini ñā cája í ⁴ vatí mí i cuu cachi i ñā cándéé ini i ñaha nacaja i, nduu. Jáchi nasacaja i ñā cáchí ley xihín ndinuhu chága ini i a juú ga inga na. ⁵ Jáchi tá naxinu una quiví nacacu u já nachicaan nā marca jan yiquí cuñu i. Ta mí i cúu u dā Israel, dā naquixi chichi Benjamín. Ta tátá náná i naquixi na chichi Israel ta cáhan nde tuhun hebreo. Ta nasandico i táhan dā cúu fariseo, dā sácú vaha ley Moisés. Ta nacaja i tóco ndihi ñā nasahnda ley Moisés. ⁶ Nasandico cáhnu ndivaha i íchi cuéntá nā fariseo cán sahá ñā cán queá nacasáhá nandicuita i cája xíxi i xihín nā cúu cuéntá Jesús. Xihín ndinuhu ini

i nacaja i tóco ndihi ñā cáchí ley sahá ñā cán queá ni in na coo nacuu chícaan nā cuachi jatá i saha ley Moisés. ⁷ Tóco ndihi ñā yóho nasacuu a ñā náhnu ndivaha nuú i. Joo viti coo sahá ga ñā cán nuú i jáchi nacasáhá cándéé ini i Jesucristo. ⁸ Ta mé a ndaa yahvi chága ñā cándéé ini i Jesucristo a juú ga tóco ndihi ñā nacaja i jihna. Saha ñā xitói candaā chága ini i sahá Jesucristo, xitoho i sahá ñā cán queá najandacoo i tóco ndihi ñā nacaja i cán. Ta tóco ndihi ñā cán cúu á tátuhun yehe ta coo sahá toho a nuú i viti jáchi cúni candico chága i Jesús. ⁹ Ta cúni cacuu u in dā in ná nduu xihín Jesucristo. Joo co ndátí i nduu ndaa i nū mé á sahá ñā sácú vaha i ley Moisés jáchi xíni vaha i ñā cája Ndióxi ñā ná nduu ndaa i nū mé á sahá ñā cándéé ini i Jesucristo cuití va. ¹⁰ Ñā cúni queá candaā chága ini i sahá Jesucristo. Ta cúni ñā ná chutú ndaa ínimā i xihín ndée Ndióxi, mé ndée ñā nacaja ñā nanditacu tucu Jesucristo. Ta cúni ndoho ini i tá quiahva nandoho ini mé á tá naxihí a ndica crúxu. ¹¹ Já queá ndátí i xinu coo quiví nditacu u tá ná nditacu nā sa naxihí.

Nditahan nducú ndée yo janda quiahva ná xinu coo í ndiquehé ñā quiahva Ndióxi nū yo

¹² Co cúni cachi i ñā sa naquee vaha vi. Ni co cúni cachi i ñā sa naxinu coo i cúu u in taa ndaa tátuhun cúni Ndióxi. Ñā cája i queá ndíhi ini i jáxinu coo i cacuu u in dā cája tá quiahva cúni Jesucristo jáchi sahá ñā cán najacacu a yehe. ¹³ Candehé ndo ñani i, nā cúu cuéntá Jesús. Co cúni cachi i ñā sa nanduu u tá quiahva cúni mé á. Ñā cája ndusa i queá ndíndójó i sahá ñā nasacaja i jihna ta ndíhi ini i jáxinu coo i cája i ñā sácú ini Ndióxi caja i. ¹⁴ Já caja i janda quiahva ná xinu coo i ndiquehe e ñā sácú ini Ndióxi quiahva nuú i sahá ñā na-

caja Jesucristo. Jáchi cána Ndióxi yehe cūhun i coo i indivi xihin mé á.

¹⁵Tóco ndihi mé ndó, na sa nandin-dacú xihín ña cándéé ini ndó Ndióxi, xíní ñuhú cahvi ini ndó tá quiahva cáhvi ini yehe. Ta tá co cáhvi ini ndó tá quiahva cáhvi ini yehe já queá jándiyéhe Ndióxi xíní túní ndo ña ná cajii ini ndó xihin á. ¹⁶Joo ndítahan nu yo caja í ña ndaa, ña coo najándacoo í caja í anda viti.

¹⁷Candehé ndo ñani i, na cúu cuéntá Jesús. Ndítahan candehé ndo ndá quiahva cája yehe ña ná caja ndó ña. Ta ndítahan candehé ndo ndá quiahva cája java ga na sa najánaha nde jáchi nacañahva na cája na tá quiahva cája mé nde. ¹⁸Sa cuahá ndivaha tañu nacachi i ña yóho xihin ndó ta viti táhvi ticuij nuú i cáhan tucu u ña xihin ndo. Ndúu cuahá ñayivi ta cáhí na cúu ná cuéntá Jesús joo cája na tátuhun na co cándúsa ña naxihí Jesucristo ndica crúxu. ¹⁹Joo vaxi quivi ndihi saha ná anda ama cáa quivi sahá ña núu cája na jáchi a juú quiahva ndihi ini ná sahá ña xixi na. Ta ndínehe jícó na mé ná sahá ña núu cája na ta chí coo a cácahan nuu ná. Ñaha ñuyívi yóho cuití va cáhvi ini na saha. ²⁰Joo mí cúu yó ñayivi cuéntá Ndióxi, na canduu indivi xihin mé á. Ta ndátí tiahva i ña quixi Jesucristo, xitoho í chí indivi, mé á jácacu mí. ²¹Ta ndijama mé á yiquí cuñu í, ña nacavitá já ná nduu a tátuhun yiquí cuñu mé á jáchi cáhnu ndivaha cúu á. Ta ndijama mé á mí xihin ndée a jáchi mé á sáhdá chuun nu tóco ndihi ñaha xihin ndée á.

Xíní ñuhú cajii ini ndó xihin ña cája Ndióxi xihin ndo

4 Candehé ndo ñani mí i, na cúu cuéntá Jesús. Xíca ndivaha ini i cuni i ndohó jáchi quihvi ini i ndohó. Ta cajii ndivaha ini i xihin ndo jáchi co cácahan nuu i saha ndo. Cúni ña ná candico

ndacú ndo íchi cuéntá Jesucristo, xitoho í.

²Xíca tahví i nu Evodia xihín nu Síntique ña ná ndique táhan vaha na jáchi in quihvi cúu ná cuéntá Jesús. ³Ta xíca tahví i nu mún, da cája chúun tuun xihin i ña ná cajún ñamaní cahún xihin ndívi quiahva i jan ña ná ndique táhan maní ná. Jáchi ndívi na jan nacheéde cuahá na yehe tá naxíca nuu i nacahan i tuhun Ndióxi, mé tuhun cúu jácacu ñayivi. Ta quiahva já nacheéde ri ñaní, da naní Clemente yehe. Ta java ga da cúu cuéntá Jesús nacheéde táhan na xihin i. Sa ndaa va quivi ná nu libro nu ndaa quivi tóco ndihi na catacu anda ama cáa quivi.

⁴Níi tiempo ndítahan cajii ini ndó xihin ña cája Ndióxi xihin ndo. Á sa xini johó ndó. Níi tiempo ndítahan cajii ini ndó. ⁵Ta xihin ña yóho candaa ini tóco ndihi ñayivi ña cúu ndó ñayivi vaha ini. Sa nacayati quivi quixi tucu Jesucristo, xitoho í.

⁶A ndícani nahá ini ndó sahá ni in ñaha. Ña ndítahan caja ndó queá caça tahví ndo nu Ndióxi níi tiempo ta ndícani ndó nu mé á ndaja cáa ña ndóho ndó. Caça tahví ndó nu á ta a ndíndójó ndo ndiquiahva ndó ndixahvi nu mé á. ⁷Anda já caja Ndióxi ña ná coo vaha ini ndó ta cáhnu chága ña yóho a juú ga tóco ndihi ña cuu candaa ini ñayivi. Ta tá ná caja Ndióxi ña ná coo vaha ini ndó já queá chindeé a ndohó já ná ndíndacú ínima ndo xihin xíní túní ndo sahá ña in nanduu ndó xihin Jesucristo.

Xíní ñuhú cahvi ini ndó caja ndó ndinuhu ña vaha

⁸Jandá ña yóho cuití va cúni cahan i xihin ndo, ñani i, na cúu cuéntá Jesús. Xíní ñuhú cahvi ini ndó sahá ña ndaa ta sahá ña cuu coo toní ñuhú ndó xihin. Ta xíní ñuhú cahvi ini ndó sahá ndaja caja ndó ña ndaa. Ta xíní ñuhú cahvi ini ndó sahá ñaha víi. Ta xíní ñuhú cahvi ini ndó

sahá ñaha cuu cajji íní ñayivi xihín, ña cuu cahan vaha na saha. Ta xíní ñuhú cahvi ini ndó sahá ña vaha cuu caja ndó ña ná cuu caja cáhnu ñayivi Ndióxi saha.

⁹ Caja ndó tóco ndihi ña najánaha i nu ndó caja ndó. Ndítahan caja ndó ña ñaxini johó ndó ñacahan i xihín ña ñaxini ndó ñacaja i. Ta ná coo Ndióxi xihín ndo ta mé á queá caja ña ná coo vaha ini ndó.

Na cúu cuéntá Jesús ndúu ñuu Filipos chindeé na Pablo

¹⁰ Cájji ndivaha ini i ta ndíquiahva i ndixahvi nu Jesucristo, xitoho í jáchi ñandicuhun tucu ini ndó sahá i. Co cúní cachi i ña sa ñandindójó ndó sahá i, vaha. Na cúní i cachi i queá co núná nu ndo chindeé ndó yehe. ¹¹ Co cahan i ña yóho xihín ndó sahá ña ndímaní ñaha nuú i jáchi sa ñacatiqva i cájji íní i xihín ña íin nuú i. ¹² Sa xíní coo ndáhvi ndivaha i ta sa xíní i coo cuahá ndivaha ñaha nuú i. Ñacatiqva i coo ndéé ini i nu tóco ndihi ña quíxi nuú i. Sahá ña cán queá íin vaha ini i vatí íin cuahá ña cuxu u á coó a. Ta vatí yójó ñaha nuú i á ndímaní ña nuú i íin vaha ini i. ¹³ Sahan ndéé ini i nu tóco ndihi ña quixi nuú i jáchi Jesucristo queá chindeé a yehe caja i ña. ¹⁴ Joo vaha ñacaja ndó jáchi ñachindeé ndó yehe tá ñandoho ini i sahá ña ñandímaní nuú i.

¹⁵ Sa xíní ndó ña in túhún mé ndó, na cúu cuéntá Jesús ndúu ñuu Filipos jan cúu ndó na ñachindeé yehe tá ñaquee e cahan i chí Macedonia cahan i tuhun Ndióxi, ña cuu jácacu ñayivi. Ta na-

caja ndó ña yóho jáchi ñacamáni ndó yehe sahá ña ñachindeé e ndohó xihín tuhun Ndióxi. ¹⁶ Jáchi tá nasahin i ñuu Tesalónica cán já ñachindahá ta ñachindahá ndó ñaha ñandímaní nuú i. Ta a juú in tañu cuití va ñacaja ndó ña. ¹⁷ Co cahan i ña yóho xihín ndo sahá ña cúní ñehe cuití vi ñaha. Na cúní queá ná chahvi Ndióxi sahá ñamaní ñacaja ndó. ¹⁸ Ta viti coó ga ñaha ndímaní nuú i. Janda yójó johó a nuú i viti xihín tóco ndihi ña ñachindahá ndó xihín Epafrodito ñehe da ñaquixi da nuú i yóho. Tóco ndihi ña ñachindahá ndó nuú i yóho cúu á ña cájji ndivaha ini Ndióxi xihín. Cúu á tátuhun jóco ndó in ña támi sahan nu mé á. ¹⁹ Ta Ndióxi, mé a cája cáhnu i chindeé a ndohó ná a ndímaní ga ni in ñaha nu ndo. Jáchi cuahá ndivaha ña cuicá cómi Ndióxi ta quiahva mé á ña nu ndo sahá ña cúu ndó cuéntá Jesucristo. ²⁰ Cáhnu ná cacuu Ndióxi, tátá yo anda ama cáa quivi. Já ná coo.

Ndíndayí Pablo na cúu cuéntá Jesús

²¹ Sahá ña in cúu yó cuéntá Jesucristo chindahá i Ndióxi coo tóco ndihi na cúu cuéntá mé á cán. Ta ñaní, na cúu cuéntá Jesús ndúu xihín i yóho chindahá na Ndióxi coo ndó. ²² Ta jári java ga na cúu cuéntá Ndióxi ndúu chí yóho chindahá na Ndióxi coo ndó. Ta na chindahá chága ví Ndióxi coo ndó cúu na cája chúun vehe da cómi cuéntá sahá ñuu Roma.

²³ Ná caja Jesucristo, xitoho í cuahá ñamaní xihín tóco ndihi ndó. Já ná coo.

Carta nāchindahá Pablo nuú na cúu cuéntá Jesús ñuu Colosas

Chindahá Pablo Ndióxi coo na cúu cuéntá Jesús ñuu Colosas

1 Yehe cúu Pablo, da nandicaxi Ndióxi cacuu u apóstol cuéntá Jesucristo. Ta yóho ín Timoteo, ñaní, da cúu cuéntá Jesús. ² Chindahá nde carta yóho nu ndo, na cúu cuéntá Ndióxi ndúu ñuu Colosas jan. Jáchí cúu ndó na cúu cuéntá Jesucristo, na cāndeé cáhnu ini mé á. Ña cúni nde queá ná caja cuahá Ndióxi, tátá yo ñamaní xihín ndo ta ná caja ña ná coo vaha ínima ndo.

Xíca tahví Pablo sahá na cúu cuéntá Jesús cán

³ Níi tiempo ndíquiahva nde ndixahvi nu Ndióxi, mé a cúu tátá Jesucristo, xitoho í tá xíca tahví nde nu mé á saha ndo. ⁴ Jáchí sa nañehé nde tuhun ña cāndeé ini ndó Jesucristo ta nañehé nde tuhun ña quihvi ini ndó tóco ndihi na cúu cuéntá mé á. ⁵ Ta cája ndó ña yóho jáchí sa naçandaa ini ndó ña ndaa sahá Jesucristo ta ndáti ndó ndiquehe ndó ña quiahva Ndióxi nu ndó indiví. Ta janda naní naxini johó ndó tuhun vaha cáhan sahá Jesucristo já naçasáhá cúni ndó cuhún ndó indiví. ⁶ Mé tuhun vaha naxini johó ndó sahá Jesucristo yóho naçasáhá ndicuita nuu a nuú ñayivi ta cuahá na sa cāndúsa ña ndijáá níi cúu saha ñuyívi. Ta tóco ndihi na cán cája na tá quiahva naçaja mé ndó tá naxini johó ndó ña quihvi ini Ndióxi ndohó ta já naçandaa ini ndó ña mé a ndaa táhyí quihvi ini Ndióxi ndohó. ⁷ Ña yóho queá najánaha da naní Epafras nu ndo. Mé a ndaa quihvi ini nde da jáchí in cúu da cája chúun da xihín nde ta mé a ndaa naçaja chúun da nu mé ndó xihín ndinuhu ini da tá najánaha da ndohó tuhun

Ndióxi. ⁸ Ta tá naquixi da yóho já naçaxi tuhun da xihín nde ña cája ínima yíi Ndióxi ña quihvi ini ndó na cúu cuéntá Jesús.

⁹ Ta janda naní naçandaa ini nde saha ña cája ndó já naçasáhá xíca tahví nde nu Ndióxi saha ndó ndijáá níi quívi. Ta xíca tahví nde nu á ña ná naña nu ndo ña cúni mé á caja ndó. Ta xíca tahví nde nu á ña ná quiahva mé á ndaja táhan ña ndichí nu ndo ta ná caja mé á ña ná cāndaa ini ndó tóco ndihi ñaha cuéntá mé á. ¹⁰ Já queá ná cuu caja ndó tá quiahva ndítahan caja ndó jáchí cúu ndó ñayivi cómi Ndióxi cuéntá saha. Níi tiempo xini ñúhú caja ndó ña caji ini mé á xihín. Ta quiahva já xini ñúhú naña ndó ña cája tá cája ndó ña vaha xihín ñayivi ta quiahva já xini ñúhú cāndaa chága ini ndó saha Ndióxi. ¹¹ Ta quiahva já xíca tahví nde nu Ndióxi ña ná ndaja ndacu a ndohó xihín ndeé cáhnu ndivaha mé á já queá cuu caja ndeé ini ndó ta já a ndíhi ini ndó tá ná quixi cuahá tondohó nu ndo. Ta caji ini ndó ¹² ndiquiahva ndó ndixahvi nu Ndióxi jáchí naçacu tiaha mé á ndohó ña ná ndiquehe ndó ña naçacu ini mé á quiahva nu tóco ndihi na cúu cuéntá mé á tá ná xinu coo na nu yehe ndivaha nuú cacomí mé á cuéntá saha ná. ¹³ Naçanduú yó nuú naá ndivaha ta cán naçavá Ndióxi mí ndáha ña quini ta nandiquiahva mé a mí ndáha Jesucristo, jahyi maní á ña ná cacomí a cuéntá saha yo. ¹⁴ Ta mé Jesucristo najáçacu a mí tá naxihí a ndica crúxu ta naçaja cáhnu ini a sahá cuachí.

Jesucristo cúu á jini nu tóco ndihi ñaha

¹⁵ Ta Jesucristo cúu yuhú nuú Ndióxi, ña a cuú cuni tívi ta janda tá cámaní casáhá cavaha Ndióxi ñuyívi yóho sa ín jahyi a, Jesucristo. ¹⁶ Ta sa mé Jesucristo naçavaha tóco ndihi ñaha ndúu ñuyívi yóho xihín ña ndúu indiví. Ta mé á na-

cavaḡa tóco ndiḡi ña xihín nuu yo xihín ña a cuú cuní. Ta naçavaḡa mé á táto Ndióxi, ña cómi chuun cuéntá Ndióxi ta naçavaḡa java ga táto a, na ñin cuḡa ndéç cahnda chuun. Tóco ndiḡi ña yóho naçavaḡa Jesucristo ña ná cacuu a ñaha mé á. ¹⁷ Ta sa ñin va mé á tá cámaní ca-va sáhá saḡa tóco ndiḡi ñaha ta cája mé á ña ná cuu canduu tóco ndiḡi ñaha indiví xihín ñuyíví. ¹⁸ Ta cuú á jini nu tóco ndiḡi na cuú cuéntá mé á, na cuú tá-ḡuhun yiquí cuñu a. Ta mé a cán caja ña ná ndiḡi ñayivi íchi mé á catacu na xihín ndéç a jáchi anda saḡa naçahiin mé á ta jihna ñúhú nañditacu tucu a tañu na sa naçihí. Ta xihín ña yóho naçinu coo a nañduu a jini nu tóco ndiḡi ñaha. ¹⁹ Tá quiaḡva cáa Ndióxi quiaḡva cáa ri Jesucristo jáchi já cuni Ndióxi coo. ²⁰ Ta cuni ri Ndióxi ndique táhan máni tucu a xihín tóco ndiḡi ña naçavaḡa. Ña cán quéç naçihí Jesucristo ndiça crúxu já ná cuu ndique táhan máni tóco ndiḡi ña ndúu ñuyíví xihín indiví xihín Ndióxi.

²¹ Mé ndó naçandu u xicá ndo nu Ndióxi ta naçini iḡvi ndó a jáchi ndinuhu ña núu naçacavi ini ndó caja ndó, nduu. Joo viti najándique táhan máni Ndióxi ndoḡo xihín mé á ²² saḡá ña naçaja Jesucristo, jaḡi a tá naçihí yiquí cuñu a ndiça crúxu. Já naçaja mé á ña ná cuu xinu ndó canduu vií ndó nu á. Ta nañdiquiaḡva mé á ndoḡo ndáḡa Ndióxi já ná cacuu ndó ñayivi vií, na coo ga cuachi nu á. ²³ Joo xini ñúhú candeé cáhnu ini ndó Jesús ta a jándacoo xóo ndó ña ndáti ndó quiaḡva Ndióxi nu ndo. Jáchi tá naçini johu ndó ḡuhun vaḡa saḡá Jesucristo já naçandaḡa ini ndó ña cuu jácaçu a ndoḡo. Ta sa mé ḡuhun yóho ndiçuḡita nuu ndiçáá níí cuú saḡa ñuyíví ta yeḡe cuú da çindeé táhan jándiçuḡita nuu a nuú ñayivi.

Cája chuun Pablo cuéntá na cuú cuéntá Jesús

²⁴ Ta viti cájji ini i jáchi ndóho ini i saḡa ndo ta ña cája i quéç jáçinu coo i ña naçacu ini Jesucristo ndoḡo i saḡá na cuú cuéntá mé á, na cuú táḡuhun yiquí cuñu a. ²⁵ Nañdaja Ndióxi yeḡe ña ná nduu u in da caja chuun nuú na cuú cuéntá Jesús. Jáchi naçahan mé á chuun yóho nuú i ña ná çindeé e ndoḡo saḡá ña jánaḡa cáxi i ḡuhun Ndióxi nu ndo. ²⁶ Ta jañda tá naçava sáhá saḡa ñuyíví naçahiin jeḡe a nuú ñayivi joo viti najánaḡa Ndióxi nuú na cuú cuéntá mé á ña naçahiin jeḡe jihna. ²⁷ Ta viti sácú ini Ndióxi naḡa nuú na cuú cuéntá mé á ndá quiaḡva náhnu ñamaní cuni caja mé á xihín na tóho. Ta ña naçahiin jeḡe cuú ña yóho: ndácaan Jesucristo ini ínima ndo ta xihín ña yóho vaçi quivi ndicáhnu ndó xihín mé á.

²⁸ Cáxi ḡuhun nde nuú ndiḡi ñayivi saḡá Jesucristo. Ta jácaḡan nde na ña ná a cája na cuachi. Ta xihín ndinuhu ini nde jánaḡa nde nu ná ña ndítahan caja na já ná nduu na ñayivi ndaa nu Ndióxi saḡá ña naçaja Jesucristo. ²⁹ Ta ña yóho cuú chuun ndúcú ndéç e caja i xihín ndéç cáhnu saḡan Jesucristo nuú i.

2 Cuni ña ná candaḡa ini ndó ña ndúcú ndéç e xicá ḡahví i nu Ndióxi saḡa ndó xihín saḡá na cuú cuéntá Jesús ndúu ñuu Laodicea. Ta quiaḡva já ndúcú ndéç e xicá ḡahví i nu Ndióxi saḡá na cuú cuéntá Jesús, na a ñaha cuni táhan xihín i. ² Ndúcú ndéç e xicá ḡahví i nu Ndióxi saḡa ná já ná ndiḡi ndéç Ndióxi ini ínima na ta in ná nduu na saḡá ña quihvi ini táhan na. Ta xicá ḡahví i nu Ndióxi ña ná candaḡa vaḡa ini ná ña ndaa saḡá Jesucristo, ña mé a ndaa ndíyaḡvi ndivaḡa. Jáchi ña naçahiin jeḡe jihna najánaḡa Ndióxi nu ná viti ta ña yóho cuú Jesucristo. ³ Ta mé Jesucristo candaḡa ini a tóco ndiḡi ñaha. Candaḡa ini a ndiça quéç

ñā núu ta ndíā quéā ñā vaha ta cúni mé á ñā ná candaā ri ini mé ví ñā jan. ⁴Cáxi tuhun i ñā yóho xihín ndó ná a jándahvi inga na ndohó jáchi ndúu java na ta ndatō ndivaha cáhan nā joo cúu ná nā jándahvi ñayivi. ⁵Ta vatí cō íin mí i xihín ndo nū ndúu ndó jan joo ñúhu ini i sahá ndo níi tiempo. Ta cájii ini i tá xíní i ñā ndúu víi xihín táhan ndó. Ta cájii ini i sándehe é ñā cō jándacoo ndó ñā cándéé ini ndó Jesucristo.

⁶Tá nandiquehe ndó íchi cuéntá Jesús já nanduu mé á xitoho ndó. Ta viti ndítahan nū ndó caca nuu ndó xihín á ndijáá níi quívi. ⁷Xíní ñúhú cativi tuun ndó Jesucristo já ná quiahva mé á ndéé á nū ndo. Xihín tuhun Ndióxi ñā najánaha nde nū ndó jan ndítahan candéé chága ini ndó Jesucristo. Ta ná a jándacoo ndó ñā ndíquiahva ndó ndixahvi nū mé á.

Íchi saá xíca í viti

⁸Cuéntá coo ndó ná a jándahvi na ndohó xihín ñā tuhún cúni nā jánaha nā nū ndo. Jáchi náha ñā quíxi a nū Ndióxi joo cúu á ñā quíxi jini mé va na cuití va. Ta cáhan nā sahá ñā jánaha ñayivi ñuyíví ta cō cúu á ñā jánaha Jesucristo nū yo.

⁹Tá quiahva cáa Ndióxi quiahva já cáa Jesucristo vatí nanduu a in ñayivi. ¹⁰Ta nandicutú ndaa mé ndó xihín mé á jáchi in nanduu ndó xihín Jesucristo, mé a sáhdá chuun nū tóco ndihi nā cómi cuéntá sahá indivi xihín ñuyíví yóho. ¹¹Ta sahá ñā in nanduu ndó xihín Jesucristo sahá ñā cán quéā nanduu ndó ñayivi cuéntá mé á ta cúu á tátuhun nāchicaan Ndióxi marca ndohó ta cō cúu á tátuhun marca chícaan ñayivi yiquí cūñu na. Ñā cāja Jesucristo quéā jácaxoo a mí nuú cuachí já quéā ná a cāja ga yó ñā. ¹²Jáchi tá nācandúta ndo cuéntá Jesucristo já nasacuu a tátuhun naxihí ndó ta nanduxu ndó xihín Jesucristo jáchi najándacoo ndó cuachi nacaja ndó. Ta

tá nanditacu mé á nasacuu a tátuhun nanditacu ri mé va ndó xihín á sahá ñā cán quéā cúu ndó ñayivi saá viti jáchi nācandéé ini ndó ñā íin ndéé Ndióxi cāja ñā ná nditacu Jesucristo. ¹³Jihna nasacuu ndó tátuhun ndii sahá cuahá cuachi nacaja ndó ta sahá ñā cō naxeen ndó cāja ndó ñā sáhdá Ndióxi. Ta nasacaja ndó tá quiahva cúni mé va ndó jáchi nasacomí cuachi cuéntá saha ndo. Joo viti nacaja Ndióxi ñā ná ñehe táhvi ndó catacu ndó xihín Jesucristo ta nacaja cáhnu ini a saha tóco ndihi cuachi ndó. ¹⁴Nasacomí yo cuachi nū Ndióxi jáchi naquehe núu í ñā nasahnda mé á cāja í. Ta ndácaan cuachi jata yó nacaja ley joo najándoo Ndióxi cuachí tá naxihí Jesucristo ndica crúxu saha yo. ¹⁵Ta tá naxihí a ndica crúxu já naquee vaha mé á xihín tiñáhá sacuahā ta naquee vaha mé á xihín rí quini, rí sáhdá chuun nuú ñayivi ñuyíví. Ta sahá ñā najácacahan Jesús nuu rí nuú ñayivi sahá ñā cán quéā a cuú chinúu ga rí cuachi jata yó viti. Xihín ñā nacaja Jesucristo yóho najánaha Ndióxi nū yo ñā a cuú ga cāja tiñáhá sacuahā ni in ñaha xoho.

Ndítahan ndinducú yo ñaha íin indivi

¹⁶A quéhe ndó cuéntá sahá ñayivi tá ná candehé ndaa na ndohó sahá ñā xíxi ndó á sahá ñā xíhi ndó. Ta ni a quéhe ndó cuéntá tá sándehe ndaa na ndohó sahá ñā cō cāja ndó víco cāja mé ná ta ni sahá ñā cō cāja ndó víco quívi cāja cáhnu na yoó saá. Ta ni a quéhe ndó cuéntá tá sándehe ndaa na ndohó sahá ñā cō cāja cáhnu ndó quívi ndiquehe ndéé na. ¹⁷Sanahá tá cámaní cacu Jesucristo já nasahnda Ndióxi chuun nuú ñayivi ñā ná cāja na ley Moisés joo cōo chuun a viti jáchi sa najáxinu cōo Jesucristo tóco ndihi ñā nasahnda ley Moisés. ¹⁸A cándúsa ndó ñayivi tá cáchi nā xihín ndó ñā cūhun ndó indayá sahá ñā cō cāja ndó ñā cáchi mé ná. Cāja cáhnu na táto Ndióxi ta sahá

ñā jan ndája tohó ndivaha na mé ná. Ta cáchí na ñacahan tívi Ndióxi xihín ná sahá ñā cán queá ndínehe jíco ndivaha na mé ná. Xíní túní na yóho cúú á xíní túní ñayivi ñuyíví cuití va. ¹⁹ Jáchí co xíca tuun na jan xihín Jesucristo, mé a cúú jiní nu mí. Mé á sahan ndéé á nu yo cuahnu í ta jándique táhan mé á mí xihín á tá quiahva nasacu ini Ndióxi.

²⁰ Tá ñaxihí Jesucristo ndíca crúxu já cúú á tátuhun ñaxihí ndó nuú cuachi, jáchí co cómí ga ñaha ñuyíví yóho cuéntá saha ndó viti. Sahá ñā cán queá co ndítahan nu ndó caja ndó tá quiahva cāja ñayivi ñuyíví yóho. Co ndítahan caja ndó ñā cáchí na xihín ndo tátuhun ñā yóho: ²¹ “A tíin toho ndó ñā jan. A cáxí toho ndó ñā cáa. A cáni ndaa ndáha ndó ñā yóho”, cáchí na xihín ndó. ²² Tóco ndihi ñā yóho ndihi saha. Tóco ndihi ñā cāja na yóho cúú á ñā sáhdá ñayivi ñuyíví cuití va ta co cúú á ñā naquixi nu Ndióxi. ²³ Jáchí tóco ndihi ñā jánaha na jan cúú á ñā quíxi jiní mé va na vatí ndáa na tátuhun na ndíchí jiní. Ta jánaha na ñā ndítahan caja cáhnu ñayivi Ndióxi xihín costumbre ñacavaha mé va na. Ta náha na tátuhun ñayivi tohó joo ndínehe jíco na mé ná. Ta jánaha na ñā xíní ñúhú jándoho í yiquí cuñu í joo coó saha toho ñā yóho jáchí co chíndeé a mí jándihi sahá ñā xíca ini yiquí cuñu í caja.

3 Tá ñanditacu Jesucristo tañu na sa ñaxihí cúú á tátuhun ñanditacu ndó xihín mé á. Sahá ñā cán queá xíní ñúhú ndínducú ndo ñaha cúú cuéntá Ndióxi, mé ñaha quíxi indiví nu íin coo Jesucristo xoo cuáha Ndióxi. ² Xíní ñúhú cáhvi ini ndó sahá ñaha cúú cuéntá Ndióxi ta co xíní ñúhú ndicani ini ndó sahá ñaha ñuyíví yóho. ³ Jáchí mé ndó cúú ndó tátuhun na sa ñaxihí tá ñaxihí Jesucristo. Sahá ñā cán queá co xíní ñúhú ndiava ini ndó cacomí ndó ñaha ñuyíví yóho jáchí cuhún ndó coo ndó xihín Jesucristo indiví nu íin Ndióxi. ⁴ Ta

sahá ñā ñacaja Jesucristo sahá ñā cán queá tácu yo viti ta tá ná canáha nuu Jesucristo ñuyíví yóho já ndacanáha nuu ndó xihín á. Tá quiahva ndiyehe ndivaha mé á quiahva já ndiyehe ri ndóhó va ta ndicáhnu ndó xihín mé á.

Jihna ñaxíca í ichí cuachi joo viti xíca í ichí saá

⁵ Ndítahan jácaxoo ndó nuú cuachi, ñā cāja ñayivi ñuyíví. Coto a cóo ndó xihín ñayivi, na co cúú ñájihí ndo á yíí ndo. Ta ni a cāja ndó ñā núu xihín yiquí cuñu ndó ta ni a cāja ndó ñā núu, ñā xíca ini yiquí cuñu ndó caja. Ta ni a chínúu ndó ínima ndó jatá jiuhún ndo jáchí cúú ndó tátuhun na cāja cáhnu yoco tá cāja ndó já. ⁶ Jáchí vaxi quívi jándoho Ndióxi ini na cāja ñā yóho sahá ñā co xéén na caja na ñā cúní Ndióxi. ⁷ Ta janda mé ndó tá ñaxíca nuu ndó ichí cuachi já ñacaja ndó ñā jan. ⁸ Joo viti xíní ñúhú jándacoo ndó tóco ndihi ñā jan: a cójo ga ini ndó xihín ñayivi ta ni a cāja ga ndó ñā xíca ini yiquí cuñu ndó caja ta a cāja ga ndó ñā núu ta ni a cánahá ga ndó xihín ñani táhan ndó ta a cáhan ga ndó tuhun quini. ⁹ Ta a cáhan túhún xihín táhan ndó jáchí co cúú ga ndó na ñasacuu ndó jihna ta tóco ndihi ñā núu ñasacaja ndó jihna jan co cómí ga cuéntá saha ndó viti. ¹⁰ Jáchí viti sa ñanduu ndó ñayivi saá, na loho loho ndiví chága ínima na cāja Ndióxi janda quiahva ná xinu coo ndó nduu ndó tá quiahva cáa Jesucristo ta já candaa vaha chága ini ndó a. ¹¹ Jáchí viti coó sahá ga á tá cúú yó na Israel á tá co cúú yó na Israel, á tá cúú yó na naquihvi marca yiquí cuñu í á tá coó naquihvi marca yiquí cuñu í, á tá cúú yó na tóho á tá co cúú toho í na. Ta ni coó saha toho a á tá cúú yó na yucú ñúhú ta ni coó saha toho a á tá cúú yó na cómí xitoho cuéntá saha, á tá cúú yó na xíca núná mé. Joo ñā íin saha queá tá ná ndiquiahva ndó mé ndó ndáha Jesucristo ñā ná cacomí a

cuéntá saha ndo jáchí tóco ndihi na cán cúú ná na ndácaan Jesucristo ínimá.

¹² Quíhvi ini Ndióxi ndohó ta nacaxi a ndohó ña ná cacuu ndó ñayivi cuéntá mé á. Ta tá quiahva natahnda ini Ndióxi saha ndo quiahva já xíní ñúhú tahnda ini ndó sahá ñayivi. Xíní ñúhú caja vaha ndó xihín ná. Coto a cája cáhnu ndó mé ndó. Xíní ñúhú coo víi ini ndó xihín ñayivi ta a ndíhi ini ndó xihín ná. ¹³ Xíní ñúhú coo cáhnu ini xihín táhan ndó. Ta caja cáhnu ini saha táhan ndó tá yáha nu cája xihín táhan ndó. Tá quiahva nacaja Jesucristo, xitoho í tá nacaja cáhnu ini a saha ndó quiahva já ndítahan caja cáhnu ini saha táhan ndó. ¹⁴ Xíní ñúhú ndicutú ndaa ndó xihín ña quíhvi ini táhan ndó já queá ná cuu canduu in nuú xihín táhan ndó ta já a cúu cahnda java táhan ndó. ¹⁵ Ta ná caja Ndióxi ña ná coo vaha ini xihín táhan ndó já ná caja ndaa ndó xihín ná. Jáchí nasacu ini mé á ña ná caja ndó já ta nacaxi a ndohó nduu ndó tátuhun yiquí cuñu a. Ta ndítahan ndiquiahva ndó ndixahvi nu Ndióxi ní tiempo.

¹⁶ Ta ná ndicutú ndaa ínimá ndó xihín tuhun vaha cáhan sahá Jesucristo. Ta xihín tuhun yóho xíní ñúhú jánahta táhan ndó ta xíní ñúhú quiahva tuhun ndeé ini táhan ndó ña ná candaa vaha ini ndó ña. Ta xihín ndinuhu ini ndó xíní ñúhú ndiquiahva ndó ndixahvi nu Ndióxi. Cata ndó salmo xihín himno xihín canto ña sahan ínimá yíi Ndióxi nu ndo. ¹⁷ Ta tóco ndihi ña cája ndó xíní ñúhú caja ndó ña cuéntá Jesucristo, xitoho í. Ta xíní ñúhú ndiquiahva ndó ndixahvi nu Ndióxi, tátá yo sahá ña nacaja Jesucristo, xitoho í.

Ndá quiahva ndítahan canduu na cúú cuéntá Jesús

¹⁸ Ndóhó, najihí ndúu yíi, xíní ñúhú coo johó ndó nu cáhan yíi ndó xihín ndo jáchí já ndítahan caja najihí, na cúú cuéntá Jesús. ¹⁹ Ta jári ndóhó, dataa,

xíní ñúhú quíhvi ini ndó ñájihí ndo ta co ndítahan caja ndó ndaja nacuu xihín ná. ²⁰ Ta jári ndóhó va, na valí xíní ñúhú taa johó ndó tóco ndihi ña sahánda tátá náná ndo nu ndo jáchí ña yóho queá cájii ini Ndióxi xihín. ²¹ Ta jári ndóhó va, na ndúu jahyi, a jácojo quini ndó ini jahyi ndó já queá ná a cávítá ini na caja na ña vaha. ²² Ta ndóhó, na naxeen xitoho caja chúun uun va ndó, xíní ñúhú caja ndó tóco ndihi ña sahánda xitoho ndó, na ndúu ñuyíví yóho nu ndo. Ta a juú tá ndíta cuítí na sándehe na nu cája chúun ndó sahá ña cúni ndó candoo vaha ndó nuú na cúú xitoho ndó cán. Na xíní ñúhú caja ndó queá caja chúun ndó xihín ndinuhu ini ndó nu ná jáchí cúú ndó na cája cáhnu Ndióxi. ²³ Ndítahan cajii ini ndó caja ndó tóco ndihi ñaha. Ta ndicuhun ini ndó ña nu Ndióxi cája ndó ña ta co cúú á nuú ñayivi cuítí va. ²⁴ Jáchí sa cánda ini ndó ña चाहvi Jesucristo nu ndó saha tóco ndihi ña cája ndó. Ta ñehe táhvi ndo cuhun ndo indiví jáchí cája cáhnu ndó Jesucristo, mé á cúú ndusa xitoho ndó. ²⁵ Joo ndá na cája ña núu tandaa quívi ndoho ini na sahá ña núu nacaja na jáchí caja Ndióxi ña ná चाहvi in in na sahá ña nacaja na.

4 Ta jári ndóhó va, na cúú xitoho co ndítahan jándoho nahá ndó na naxeen ndó caja chúun nu ndó jan. Ndítahan caja vaha ndó xihín ná jáchí vaxi quívi ndiquiahva ri ndóhó va cuéntá nuú Ndióxi, xitoho ndó, ña íin indiví.

² A jándacoo ndó cacá tahví ndó nu Ndióxi xihín ndinuhu ini ndó. Ta ndítahan coo tiaha vaha ndó ndiquiahva ndó ndixahvi nu mé á. ³ Cacá tahví ndó nu Ndióxi sahá nde ña ná cuná mé á íchi nuú nde cahan nde tuhun vaha sahá Jesucristo, mé tuhun nasahíin jehé anda viti. Ta saha mé ña yóho ndácaan i ve-caa viti. ⁴ Cacá tahví ndó nu Ndióxi ña ná cuu cahan cáxi i tuhun Ndióxi nuú ñayivi tá quiahva ndítahan nuú i caja i.

⁵ Cọ ndítahan caja ndó ña yóho á ña cáa nuú na cọ cúu cuéntá Jesús. Ta xíní nùhú ndíhi ini ndó cahan ndó tũhun Ndióxi xihín ná. ⁶ Tóco ndihi ña cahan ndó xíní ñúhú cacuu a ña vaha, ña cuu cajii ini Ndióxi xihín. Ta xíní ñúhú canda ini ndó ndaja caja ndó nducú ñehe vaha ndó tũhun nuú ñayivi.

Ndíndayí Pablo na ndúu ñuu Colosas

⁷ Chín dahá i da naní Tíquico nu ndó jan já ndicani da sahá i nu ndó. Mé da cúu ñani mání yo ta xihín ndinuhu ini da in cúu dá cája chúun da xihín i. ⁸ Chín dahá i da saa da nu ndo já ná caxi tũhun da xihín ndo ndá quiahva ndóho nde yóho. Ta chín dahá i da já ná quiahva da tũhun ndeé ini ndó. ⁹ Ta chín dahá ri ñani mání yo Onésimo, da ndíco cáhnu íchí cuéntá Jesús cuahan xihín dá ta mé Onésimo yóho cúu da ñuu ndó jan. Ta mé dá xihín Tíquico caxi tũhun da nu ndó ndaja cándo nde janda viti.

¹⁰ Aristarco, da ndácaan vecaa xihín i chín dahá da Ndióxi coo ndó. Ta jári Marcos, da cúu ñani cuachí Bernabé chín dahá da Ndióxi coo ndó. Ta sa naçaxi tũhun i xihín ndo ndá quiahva ndítahan caja ndó xihín Marcos tá ná saa da coto nihni da ndohó. Xíní ñúhú ndiquehe vaha ndó da. ¹¹ Ta jári da naní Jesús, da naní tucu Justo chín dahá da Ndióxi coo ndó. Janda ndíhuni na yóho cuítí va cúu na cuéntá Jesús, na naquixi chichi Israel cája chúun na xihín i tá xíca nuu nde cahan nde nuú ñayivi ña cómi Ndióxi

cuéntá saha ná. Ta mé a ndaa nachindeé cuaha ndíhuni na cán yehe. ¹² Ta jári Epafras, da ñuu ndó jan chín dahá da Ndióxi coo ndó. Mé da cán cúu dá da cája chúun cuéntá Jesucristo. Ta ní tiempo xíca tahví da nu Ndióxi saha ndó xihín ndinuhu ini da já ná candita ndaçú ndó ta ná ndiquiahva ní ndo mé ndó caja ndó ña cúni Ndióxi. ¹³ Ta xíní i xihín nuú i ndá quiahva ndíhi ini Epafras xíca tahví da nu Ndióxi saha ndo ta sahá na cúu cuéntá Jesús ndúu ñuu Laodicea xihín na ndúu ñuu Hierápolis viti. ¹⁴ Lucas, da cúu doctor maní yo chín dahá da Ndióxi coo ndó. Ta jári Demas chín dahá da Ndióxi coo ndó.

¹⁵ Cahan Ndióxi ndó xihín na cúu cuéntá Jesús, na ndúu ñuu Laodicea ta cahan Ndióxi ndó xihín ná naní Ninfas ta xihín tóco ndihi na cúu cuéntá Jesús táca vehe ná. ¹⁶ Ta tá nandíhi naçahvi ndó carta yóho caja ndó ñamaní chín dahá ndó ña ná cuhuni a nuú na cúu cuéntá Jesús, na ndúu ñuu Laodicea ña ná cahvi ri na cán va ña. Ta jári ndítahan nu ndó cahvi ndó carta ña nachín dahá i nuú na cán. ¹⁷ Ta caja ndó ñamaní caxi tũhun ndó nu Arquipo ña xíní ñúhú ndíhi ini da caja chúun vaha da chuun nasahan Ndióxi nu dá caja da.

¹⁸ Ta yehe, da cúu Pablo cáhyí i java tũhun yóho nu ndó xihín ndahá i ña ná chín dahá i Ndióxi coo ndó. Xíní ñúhú ndicuhuni ini ndó ña ndácaan i vecaa. Ta ña cúni quea ná caja cuaha Ndióxi ñamaní xihín ndo. Já ná coo.

Carta nu cuítí nacahyí Pablo nuú na cúú cuéntá Jesús ñuu Tesalónica

Pablo xihín da xíca xihín dá chíndahá da Ndióxi coo na cúú cuéntá Jesús ñuu Tesalónica

1 Yehe cúú Pablo, da cáhyí carta yóho xihín Silvano xihín Timoteo ta chíndahá i ña nuú ndihi ndó, na cúú cuéntá Jesús ndúu ñuu Tesalónica. Ta in ñandu ndó xihín Ndióxi, tátá yo ta in ñandu ndó xihín Jesucristo, xitoho í. Ná caja Ndióxi, tátá yo xihín Jesucristo, xitoho í cuahá ñamaní xihín ndihi ndó ta ná caja mé á ña ná coo vaha ini ndó.

Cándeé cáhnu ini na Tesalónica Jesús

² Já cuití ndíquiáhva nde ndixahvi nu Ndióxi sahá ndihi ndó. Ta co ndíndójó nde xíca tahví nde nu mé á saha ndo. ³ Ndiquiáhva nde ndixahvi nu Ndióxi, tátá yo saha ndo jáchi cándeé cáhnu ini ndó mé á. Ta sahá ña quíhvi ini ndó mé á sahá ña cán quéa cája chúun vaha ndó cuéntá mé á. Sahá ña cándeé ini ndó Jesucristo ña quixi tucu a ñuyiví yóho sahá ña cán quéa cája ndeé ini ndó tá ndóho ini ndó. ⁴ Cuni johó vaha ndó, ñani mí i, na cúú cuéntá Jesús. Sa xíní nde ña quíhvi ini Ndióxi ndohó ta nacaxi a ndohó cacuu ndó cuéntá mé á. ⁵ Tá nacaxi tühun nde tühun vaha sahá Jesús nu ndo a juú tühun uun nacahan nde xihín ndo. Nacahan nde mé tühun xihín ndeé ña nasahan ínimá yii Ndióxi nuú nde. Ña cán quéa sa xíní ndo ña ndaa cuití va nacahan nde xihín ndo. Ta sa xíní vaha ndó ña nacaja ndaa nde tá nasanduu nde xihín ndo jáchi cúní nde chindeé nde ndohó.

⁶ Anda jávi nacasáhá ndó cája ndó ña nacaja mé nde xihín ña nacaja Jesucristo. Jáchi nandiquehe vaha ndó ña

najánaha nde nu ndo. Ta vatí nandoho ndivaha ini ndó joo nacavatá ndo nacaja ínimá yii Ndióxi. ⁷ Ta tá nandihí nanduu ndó na jánaha nu tóco ndihí na cúú cuéntá Jesús, na ndúu estado Macedonia xihín estado Acaya ña ndítahan caja na. ⁸ Ta a juú Macedonia xihín Acaya cuití va vaha jáchi ndijjáa ñuu nandicuita nuu tühun vaha sahá Jesús nacaja ndó. Ña cán quéa sa xíní tóco ndihí ñayivi ña cándeé cáhnu ini ndó Ndióxi. Ña cán quéa ndá ñuu cásaa nde cáxi tühun na cán nuú nde saha ndo chí co xíní ñúhú ga nde cahan nde saha ndo nu ná. ⁹ Ta viti tóco ndihí na cán cáxi tühun na nuú nde ndaja nandiquehe vaha ndó tühun nacahan nde xihín ndo tá nasanduu nde xihín ndó ñuu Tesalónica cán. Ta cáxi tühun na ndaja nandijama ndó tá nandicoo ndó ña cája cáhnu ndó yoco jáchi viti cája cáhnu ndó Ndióxi cuití va. Ta cáxi tühun na ndaja nandicoo coo ini ndó ta nacasáhá ndo cája chúun ndó cuéntá Ndióxi, mé a cája ña ndaa cuití va, ña tácu a íin a indiví viti. ¹⁰ Ta cáxi tühun na nuú nde ndá quíahva ndátí ndó ndicó coo Jesucristo quixi a indiví, mé a cúú jahyi Ndióxi. Ta Ndióxi najánditacu a Jesús, mé á jácaçu mí ná a ndóho iní tá ná xínu quiví caja víi Ndióxi sahá cuachi ñayivi.

Chuun nacaja Pablo tá nasahin da ñuu Tesalónica

2 Ta sa xíní ndihí ndó, ñani mí i, na cúú cuéntá Jesús ña coo nacasaa uun va nde ñuu Tesalónica jan jáchi nandiquehe vaha ndó tühun Ndióxi. ² Joo tá cámaní saa nde ñuu ndó jan sa xíní ndo ndaja nacaja xíxi na ñuu Filipos xihín nde ta nacanahá na xihín nde. Joo tá nacasaa nde ñuu ndó nasahan ndeé ini nde nacaja Ndióxi já nacaxi tühun nde tühun vaha saha Jesús nu ndo vatí ndúu cuahá na co cúní ndehe. ³ Ta coo nacahan nde ña tühun xihín ndo jáchi

tuhun ndaa cuití va cúú ña najánaha nde nu ndo. Ta coó ñacahvi núu ini nde ta coó najándahvi nde ndohó. ⁴ Joo ñacaxi Ndióxi ndehe ta nasahnda mé á chuun nuú nde ña ná caxi tuhun nde tuhun vaha saha Jesús nuú ñayivi. Ta vatí coó táhán ini ñayivi xihín ña cáhan nde joo coó ñandijama toho nde ña. Jáchí Ndióxi queá sándehe ínima yo ta táhán ini a xihín ña cáhan nde. ⁵ Sa xíní vaha ndó ñacahan ndaa nde xihín ndo ta coó ñacahan chíjín nde xihín ndo. Ta coó najándahvi nde ndohó sahá jiuhún. Joo xíní ndaa táhyí Ndióxi ña ndaa cuití va ñacahan nde xihín ndo. ⁶ Ta sa xíní vaha ndó ña ni tañu mé ndó ta ni tañu java ga ñayivi coó ñandinducú nde ña ná caja cáhnu ñayivi ndehe vatí ín saha nde cahnda nde chuun nu ndo jáchí cúú nde ña apóstol ñachindahá Ndióxi nu ndo. ⁷ Joo ñacaja víí nde xihín ndo tá quiahva ndáá vaha in ñáñáha jahyi ná. ⁸ Ta cúní ndivaha nde ndohó ña cán queá ñacaxi tuhun nde tuhun vaha sahá Jesús nu ndo. Ta ín tiahva nde quivi nde saha ndo jáchí quíhví ini nde ndohó. ⁹ Ñani nde, ña cúú cuéntá Jesús, á co ndicuhun ini ndó ndá quiahva ñacaja nde tá nasanduu nde xihín ndo cán. Nuú tá ndiví ñacaja chúun nde já ná cuu chahvi nde sahá ña xíxi nde. Jáchí co cúní nde jáquíhví nde ndohó nani cáxi tuhun nde tuhun vaha sahá Jesús nu ndo.

¹⁰ Ta sa xíní ndaa táhyí ndihi ndó, ña cúú cuéntá Jesús ña ñacaja vaha nde xihín ndo ta cuu cáhan ndó saha nde. Ta xíní táhyí Ndióxi ña ñacaja ndaa nde xihín ndo ta ñacaja víí nde xihín ndo ña cán queá a cúú chicaan ñayivi cuachi jatá nde. ¹¹ Sa xíní vaha ndó ndaja najácahan nde in in ndó ta ndaja nasahan nde tuhun ndeé ini ndó ña ná candico cáhnu ndó íchí cuéntá Jesús. Tátuhun cája in dataa xihín jahyi da já ñacaja nde xihín ndo. ¹² Ta nasahnda nde chuun nu ndo caja ndó ña cúní Ndióxi jáchí cúú

ndó cuéntá mé á. Mé Ndióxi, mé a sáhnda chuun indiví, mé a cán queá ñacaxi a ndohó cahnda ndó chuun xihín á. Mé á cúú á in Ndióxi cáhnu ndivaha ta ndaja cáhnu mé á ndohó xihín á.

¹³ Ña cán queá níí tiempo ndíquiahva nde ndixahvi nu Ndióxi jáchí ñandiquehe vaha ndó tuhun Ndióxi ña ñacaxi tuhun nde nu ndo. Tá ñaxini johó ndó ña já ñacandaa ini ndó ña cúú á tuhun Ndióxi ta coó cúú á tuhun ñayivi ñuyiví. Ta mé a ndaa cúú á tuhun Ndióxi jáchí tá ñaxini johó ndó ña já queá najándicoo ndó cuachi cája ndó sahá ña cándeé ini ndó Jesús. ¹⁴ Andá jáví mé ñayivi ñuu ndó ñacasahá ña jándoho na ini ndohó, ñani mí í ta nacaja xíxi na xihín ndó. Ta quiahva já ñandoho ña cúú cuéntá Jesús estado Judea. Jáchí ña Israel, ña ndúu estado Judea ñacaja xíxi na xihín ná. ¹⁵ Jihna ñasahní java ña Israel ña profeta cuéntá Ndióxi. Ta quiahva já ñasahní java ri ña Israel Jesucristo, xitoho í. Ta viti java ña Israel cája xíxi na xihín nde ta ñataxí ña ndehe veñuhu. Co cájii ini Ndióxi xihín ná jáchí cándají ña tóco ndihi ñayivi. ¹⁶ Ta coó nasahan ña ñamaní nuú nde caxi tuhun nde tuhun vaha sahá Jesús nuú ñayivi, ña coó ñaquixi chíchi Israel ña ná jácacu Ndióxi ña. Ta sahá ña yóho ñandicuahá cuachi na nu Ndióxi ta sahá ña cán queá xójo ini a xihín ná ta viti ñaxinu coo hora jándoho a ini na.

Cúní Pablo coto nihni tucu da ñayivi ñuu Tesalónica

¹⁷ Ñani mí í, ña cúú cuéntá Jesús, tá ñandihí ñaquee nde ñuu ndó ñan já ñandicuhun ini nde saha ndo. Ñúhu ini nde saha ndo vatí coó xíní nde ndohó xihín nuú nde. Ta ndiáva ini nde ndicó coo nde ñuu ndó coto nihni nde ndohó. ¹⁸ Nasacu ini nde saa nde nu ndo. Ta yehe, da cúú Pablo cuahá tañu ñacacúní

saa i ñuu ndó joo tiñáhá sacuahá nasaji nuu rí nuú i sahá ña cán queá coó nacuu saa i jan. ¹⁹Ndá saha queá cándée ini nde ndohó ta ndá saha queá cájii ini nde ta ndá saha queá coo vaha ini nde tá tandaa quivi quixi tucu Jesucristo ñuyívi yóho. Sahá ña ndíco ndo íchi cuéntá Jesucristo, xitoho í sahá ña cán queá cájii ini nde. ²⁰Mé a ndaa fin vaha ini nde ta cájii ini nde cája ndó.

3 Ta saha ña cuni ndivaha i candaa ini i ndaja ndúu ndó cán sahá ña cán queá nasacu ini i candoo in talaá mí i ñuu Atenas. ²Ta nachindahá i ñaní Timoteo, mé da cája chúun xihín nde cuéntá Ndióxi cáxi tuhun da tuhun vaha sahá Jesucristo nuú ñayivi. Nachindahá i da saa da coto nihni da ndohó já queá jácahan da ndohó ña ná coo ndacú chága ínimá ndó nu Ndióxi ta ná chindeé da ndohó candeé cáhnu chága ini ndó Ndióxi. ³Jáchí cuni nde ña ná coo ndacú ini ndó ná a jándicoo ndó íchi cuéntá Jesús vatí cája xixi ñayivi xihín ndo. Jáchí sa xini vaha ndó ña ndítahan nu yo ndóho tá ndóho iní sahá Jesucristo. ⁴Á co ndícuhun ini ndó tá nasanduu nde xihín ndo naçaxi tuhun nde nu ndo ña vaxi quivi ndoho iní saha mé á. Ta viti sa xini ndó ña nayaha ña naçahan nde xihín ndo. ⁵Sahá ña coó nañehé e tuhun saha ndo sahá ña cán queá nachindahá i Timoteo nu ndo ná cañehe da tuhun saha ndó quixi a nuú i já ná candaa ini i á mé a ndaa táhyí ndíco cáhnu ndó íchi cuéntá Jesús. Jáchí nayihví i ña jándahvi tiñáhá sacuahá ndohó. Ta tá ná quee vaha tiñáhá sacuahá xihín ndo, nduu já queá mé a uun queá naçahan nde tuhun Ndióxi xihín ndo.

⁶Joo viti chá va naquixi Timoteo yóho tá nandihí naxito nihni da ndohó jan. Ta nañehé dá tuhun vaha saha ndo ña cándée ini ndó Jesucristo ta quihvi ini táhan ndó. Ta cáchí da ña ñuhu ndivaha ini ndó sahá nde. Ta xíca ndivaha ini ndó

cuni ndó ndehe tá quiahva xíca ndivaha ini nde cuni nde ndohó. ⁷Cándehé ndó, ñani i. Vatí ndóho ndivaha ini nde yóho joo nasahan ndeé ini nde jáchi nañehé nde tuhun ña cándée cáhnu ini ndó Jesús ta ndíco cáhnu ndó íchi cuéntá mé á. ⁸Ta nandivaha ini nde jáchi cándaa ini nde ña ndacú fin ini ndó xihín Jesucristo, xitoho í. ⁹Ta co ñehe ga nde ndá quiahva ndiquiahva nde ndixahvi nu Ndióxi saha mé ndó jáchi cájii ndivaha ini nde nacaja ndó. ¹⁰Chí nuú ta ndivi xíca tahví nde nu Ndióxi ña ná quiahva ñamaní nuú nde saa nde coto nihni nde ndohó jáchi cuni nde xinu coo nde jánaha chága nde tuhun Ndióxi nu ndo já ná candeé cáhnu chága ini ndó mé á.

¹¹Ña cán queá xíca tahví nde nu Ndióxi, tátá yo xihín Jesucristo, xitoho í ña ná chindeé a ndehe saa nde nu ndo coto nihni nde ndohó. ¹²Ta ná caja Ndióxi ña ná quihvi chága ini táhan ndó. Ta ná chutú ndaa ini ndó xihín ña quihvi ini ndó tóco ndihí ñayivi tá quiahva quihvi ini nde ndohó. ¹³Ta ná caja Ndióxi ña ná coo ndacú ínimá ndo nu mé á. Ta ná jándoo a ínimá ndo já ná coo víi a nu mé á tá ná quixi tucu Jesucristo ñuyívi xihín ndihí na cúu cuéntá mé á.

Ña ndítahan nu yo caja í já ná tahan ini Ndióxi xihín yo

4 Cuni johó vaha ndó ñani mí i, na cúu cuéntá Jesús. Jihna najánaha nde ndohó ndaja ndítahan caja ndó já ná tahan ini Ndióxi xihín ndo. Ta xini nde já cája ndó anda viti. Xihín ndée sahan Jesucristo nuú nde xíca tahví nde nu ndo ta sáhdá nde chuun nu ndo ña ná a jándicoo ndó caja ndó ña najánaha nde nu ndo.

²Sa xini vaha ndó ña sáhdá nde chuun nu ndó jáchi nasahnda Jesucristo, xitoho í chuun nuú nde cahan nde ña yóho xihín ndo. ³Ña cuni Ndióxi queá ná

coo víi ínima ndó nu mé á ta ná a cája ndó cuachi ña coo ndó xihín najihí á taa, na coo cúu ñájihí ndo á yí ndo. ⁴ Ña cúní Ndióxi quéa ná tandaha ndó xihín in táláa ñáñáha. Ta ná coo víi ndó xihín ña ta ná caja cáhnu ndó ña. ⁵ Ta ná a ndiáva ini ndó caja núu ndó xihín ná tá quiahva cája ñayivi, na coo xíní Ndióxi. ⁶ Co ndítahan caja ndó cuachi xihín ñájihí ñani táhan ndó jáchi xihín ña yóho jándahvi ndó yí ña. Ta jándoho ndivaha Ndióxi ini tóco ndihi na cája já. Ta sa xíní vaha ndó ña yóho jáchi nacaxi tuhun nde ña nu ndó jihna. ⁷ Jáchi coo nacana Ndióxi mí ña ná caja í cuachi. Nacana mé á mí jáchi cúní a ña ná cacuú ñayivi yí, na íin víi ínima. ⁸ Ta ndá na coo cúní cuni johó ña jánaha nde já quéa cándaá ini ndó ña a juú ndehe cuití va cándají na. Jáchi quéhe núu na Ndióxi sahá ña coo cája na ña cúní mé á. Ta Ndióxi quéa nasahan ínima yí mé á nu yo cañuhu a iní.

⁹ Sa najánaha va Ndióxi ndohó ndá quiahva ndítahan quihvi ini táhan ndó, na cúu cuéntá Jesús. Sahá ña cán quéa nu carta yóho coo ndítahan cahyí tucu u ña nu ndo. ¹⁰ Ta sa xíní vi ña mé a ndaa quihvi ini ndó tóco ndihi na cúu cuéntá Jesús ndúu estado Macedonia. Joo xíca tahví i nu ndó, ñani mí i ña ná quihvi chága ini ndó na. ¹¹ Xíní ñúhú nducú ndo coo vaha ini ndó xihín ndihi ñayivi. Ta nducú ndo coo ndisáhnu ini ndó. Ta ndítahan nu in in ndó caja ndó chuun mé ndó jáchi já najánaha nde nu ndó jihna. ¹² Ta tá ná caja chúun vaha ndó já quéa cahán vaha ñayivi, na coo cúu cuéntá Jesús sahá ndo. Ta tá ná caja chúun vaha ndó já quéa a ndímaní ni in ñaha nu ndo catacu ndó.

Vaxi quiví quixi tucu Jesucristo ñuyiví yóho

¹³ Ta viti cúní nde ndicani nde nu ndó, ñani i, na cúu cuéntá Jesús ña ná can-

daa vaha ini ndó ña ndaa sahá ñayivi, na sa naxihí. A cacuéha ini ndó sahá ná tá quiahva cája ñayivi, na coo cándeé ini Ndióxi. ¹⁴ Tá quiahva cándúsa nde ña naxihí Jesucristo ta nanditacu tucu a quiahva já cándúsa nde ña jánditacu tucu Ndióxi na sa naxihí, na nasandeeé ini mé á tá nasatacu na. Caja Ndióxi ña ná quixi na cán xihín Jesús tá ná quixi tucu a ñuyiví yóho.

¹⁵ Ña cán quéa cahán nde ña yóho xihín ndo ta cúu á ña najánaha Jesucristo, xitoho í nuú nde. Tá ná quixi tucu mé á ñuyiví yóho ndiquehe a mí já quéa a cühun toho jihna ñúhú na tácu ñuyiví yóho jáchi jihna ñúhú ndindita na sa naxihí. ¹⁶ Jihna ñúhú nuu Jesucristo quixi tucu a ñuyiví yóho. Ta mé já cayuhú a cahnda a chuun nuú ndihi ñayivi. Já cayuhú táto sacuaaha Ndióxi ta ndahyí trompeta Ndióxi. Já nditacu nu cuítí na sa naxihí, na cándúsa Jesucristo. ¹⁷ Andá javí tóco ndihi mí, na tácu ndique táhan í xihín na nanditacu nu cuítí ta cañehe Ndióxi mí tañu víco. Já ndique táhan í xihín Jesucristo, xitoho í nu táchi ta já coo í xihín mé á andá ama cáa quiví. ¹⁸ Sahá ña cán quéa ndítahan nu ndó quiahva tuhun ndeé ini táhan ndó xihín tuhun yóho.

5 Candehé ndo, ñani i, na cúu cuéntá Jesús. Co xíní ñúhú cahyí i nu ndo sahá ndá ama quixi tucu Jesucristo ñuyiví yóho. ² Jáchi cándaá vaha ini ndó ña mé quiví coo cáhán yo quixi Jesucristo ñuyiví yóho já quixi mé á. Tá quiahva jonáa cuití va xínu in da cuíhna tá nuú quiahva já jonáa xínu Jesucristo ñuyiví yóho. ³ Tá ná cahán ñayivi sa ndúu vaha ndivaha na ta ni in ñaha a cúu yihví na andá javí jonáa xínu ña ndoho ndivaha ini na. Tá quiahva jonáa xínu ña sáhdá a tíxi in ñáñáha tá cúní cacu jahyí ña quiahva já xínu quiví ndihi sahá ná. Ta ni in na a cuú cacu toho. ⁴ Joo mé ndó, ñani mí i, na cúu cuéntá Jesús coo ndúu

ga ndó nuú naá sahá ña cándaã ini ndó ña quixi tucu Jesucristo ñuyiví yóho. Ta vatí catóntó ndo tá ná xinu in da cuihná nu ndo joo co ndítahan catóntó ndo tá ná quixi tucu Jesucristo. ⁵ Jáchí tóco ndihi ndó, na cándeé ini Jesucristo ndúu ndó nu yéhe sahá ña xica ndó íchí cuéntá Jesús. Co xica toho ndó íchí nuú naá nu xica ñayivi ñuyiví, na co cándeé ini Jesucristo. ⁶ Sahá ña cán queá ndítahan coo tiahva í candatí quixi Jesucristo ta a cúju yo tá quiahva cája java ga ñayivi. Ña ndítahan caja í queá cañuhu táhyí iní xihin tóco ndihi xíní túní yo candatí xinu Jesucristo. ⁷ Jáchí na quíji, quíji na tá ñuú ta na xíhi, xíhi na tá ñuú. ⁸ Joo mí sa xica í nu yéhe ta ndítahan cañuhu táhyí iní. Ndítahan nu yó chindeé yo mí. Tá cándeé iní Jesucristo ta tá quíhví ini táhan í já cúú á tátuhun ndíxi yó cotó caa. Tá ndátí quixi tucu Jesucristo jácaçu a mí já cúú á tátuhun ñúhu ndó yíjini caa. ⁹ Jáchí coo naçaxi Ndióxi mí ndicuehe a xihin yo jáchí na xihí Jesucristo, xitoho í sahá cuachí sahá ña cúní a jácaçu a mí ná a cùhun yó indayá. ¹⁰ Na xihí Jesucristo saha yo ta tá tácu yo á sa na xihí yo mé quiví quixi tucu a ñuyiví yóho já queá cañehe a mí cohó coo í xihin mé á anda ama cáa quiví. ¹¹ Ña cán queá quiahva tuhun ndeé ini táhan ndó ta chindeé táhan ndó tá quiahva sa cája ndó.

Ndicani Pablo nuú na cúú cuéntá Jesús ña ndítahan caja na

¹² Ta viti xica tahví nde nu mé ndó, na cúú cuéntá Jesús ña ná caja cáhnu ndó ñayivi, na cája chúun tañu ndó jáchí ndáca na ndohó íchí cuéntá Jesucristo, xitoho í ta jánahã na tuhun Ndióxi nu ndo. ¹³ Ndítahan coo toní ñúhú ndo xihin ná ta quíhví ini ndó na xihin ndinuhu ini ndó jáchí cája chúun na cuéntá Ndióxi tañu ndó. Coo vaha ini ndó xihin ñani táhan ndó.

¹⁴ Xica tahví nde nu ndó ña ná jánani ndó ndá na co cúní caja chúun. Quiahva ndó tuhun ndeé ini ndá na cácuéha ini. Chindeé ndó ñayivi, na vitá ini xihin tuhun Ndióxi. Ta coo cáhnu ini ndó xihin ndihi ñayivi.

¹⁵ Candehé ndo. A ndúcu ñehe ndó ña núu cája inga na xihin ndo. Ta ndinducú ndo caja vaha xihin táhan ndó níí tiempo ta quiahva já caja ndó ña vaha xihin tóco ndihi ñayivi.

¹⁶ Ná coo vatá ini ndó níí tiempo. ¹⁷ Ta caça tahví ndó nu Ndióxi níí tiempo. ¹⁸ Ndá naçuu ña ndóho ndó ndítahan nu ndo ndiquiahva ndó ndixahvi nu Ndióxi sahá jáchí ña yóho cúní Ndióxi caja mé ndó, na cúú cuéntá Jesús.

¹⁹ A cáji nuu ndó nuú ña cúní ínimã yíi Ndióxi caja xihin ndo. ²⁰ A quehe núu ndó ñayivi, na jáyaha tuhun, ña nasahan Ndióxi nu ná cahan na xihin ndo. ²¹ Coto ndojó ndo tóco ndihi ña cahan na xihin ndo. Çaxi ndó ña vaha ²² ta caxoo ndó nu tóco ndihi ña núu.

²³ Ta Ndióxi, mé a cája ña coo vaha ini ndó, ná caja yíi ndihi a ndohó. Ná caja yíi á ínimã ndo xihin yiquí cuñu ndó já ná coo víí ndo tá ná xinu quiví quixi tucu Jesucristo, xitoho í. ²⁴ Jáchí sa naçaxi Ndióxi mí ta a jándicoo a mí anda quiahva jáxinu coo a tóco ndihi ña naçachi a.

Jáxinu coo Pablo ña cahan da ta ndíndayí da na

²⁵ Ñani mí i, na cúú cuéntá Jesús, caça tahví ndo nu Ndióxi sahá nde.

²⁶ Cahan Ndióxi ndó xihin ndihi na cúú cuéntá Jesús ta tatí yúhu táhan ndó ta yíi caja ndó ña.

²⁷ Candehé ndo, ñani i, na cúú cuéntá Jesús. Sáhndá i chuun nu ndó cuéntá Jesucristo, xitoho í ña ná cahvi ndó carta yóho nuú ndihi na cúú cuéntá Jesús ndúu xihin ndó jan.

²⁸ Ná caja Jesucristo, xitoho í cuahá
ñamaní xihin ndo. Já ná coo.

Carta chí ivi nacahyí Pablo nuú na cúú cuéntá Jesús ñuu Tesalónica

Pablo xihín da xíca xihín dá chindahá da Ndióxi coo na cúú cuéntá Jesús ñuu Tesalónica

1 Yehe cúú Pablo, da cáhyí carta yóho xihín Silvano xihín Timoteo ta chindahá i ña nuú ndihi ndó, na cúú cuéntá Jesús ndúu ñuu Tesalónica. Ta in nandu ndó xihín Ndióxi, tátá yo ta in nandu ndó xihín Jesucristo, xitoho í. ²Ná caja Ndióxi, tátá yo xihín Jesucristo, xitoho í cuahá ñamaní xihín ndihi ndó ta ná caja mé á ña ná coo vaha ini ndó.

Caja víí Ndióxi sahá na cája cuachi tá ná quixi tucu Jesucristo ñuyíví yóho

³Ndijáá níí quívi ndítahan nuú nde ndiquiahva nde ndixahvi nu Ndióxi sahá ndóhó, na cúú cuéntá Jesús. Ta íin sahá cája nde já jáchi nini quívi cándéé chága ini ndó Jesús ta quíhví chága ini táhan ndó na cúú cuéntá Jesús. ⁴Sahá ña cán queá cájii ini nde cáhan nde sahá ndo nuú java ga na cúú cuéntá Jesús ndá nacuu nu táca na jáchi cándéé ini ndó Jesús ta sahan ndeé ini ndó tá ndóho ini ndó sahá ña cája xíxi ñayivi xihín ndo. ⁵Jánaha Ndióxi nu yo ña ndaa cája mé á tá cája víí a saha yo. Ta sahá ña yóho sácú tiahva mé á ndóhó cuhun ndó indivi cacomí a cuéntá sahá ndó jáchi ndóho ini ndó cuéntá mé á viti.

⁶Ta ndaa cája Ndióxi tá jándoho a ini ñayivi, na cája xíxi xihín ndó viti. ⁷Ta sahá ña ndóho ini ndó ná caja mé á ña ná ndiquehe ndéé ndo tá quiahva caja mé á ña ná ndiquehe ndéé ri ndehé va mé quívi quixi tucu Jesucristo ñuyíví yóho. Ta quixi a xihín tátó ndéé mé á ta cumi yó a ña quixi a indivi tañu núhu ita. ⁸Quixi a jándoho a ini na co cándéé ini

Ndióxi ta ni co cándúsa na tñhun vaha sahá Jesús, xitoho í, mé a cuu jácau mí. ⁹Ta ndá na co cándéé ini Jesucristo já queá ndoho ndivaha ini na anda ama cáa quívi ini indayá ta a cóo ga na nu Ndióxi. Ta tavá jíin Ndióxi na já ná a cúní ga na nuu á anda ama cáa quívi. Ta a cúní ga na ña náhnu cája Ndióxi xihín ndéé mé á. ¹⁰Tá ná quixi tucu Jesucristo ñuyíví yóho já caja cáhnu ndivaha tóco ndihi na cúú cuéntá Jesús mé á nuú quixi a. Ta já catóntó ndivaha tóco ndihi na sahá ña náhnu ndivaha caja Jesucristo. Ta quiahva já caja cáhnu ri ndóhó va Jesucristo mé quívi cán jáchi cándéé ini ndó tñhun vaha sahá Jesús ña nacahan nde xihín ndo.

¹¹Ña cán queá ndijáá níí quívi xíca tahví nde nu Ndióxi sahá ndo ña ná cacuu ndó ñayivi ndaa tá quiahva cúní mé á jáchi sahá ña yóho nandicaxi a ndóhó. Ta xíca tahví nde nu Ndióxi sahá ndo ña ná quiahva mé á ndéé a nu ndo já ná cuu jáxinu coo ndó ña vaha ña cúní ndó caja ndó nani cája chúun ndó cuéntá mé á sahá ña cándéé ini ndó mé á. ¹²Ta sahá ña vaha cája ndó, caja cáhnu ñayivi Jesucristo. Anda jáví ndiñehe jícó Jesucristo ndóhó jáchi cúú ndó cuéntá mé á ta cája ndó ña cúní mé á. Mé a ndaa cúní Ndióxi xihín Jesucristo, xitoho í caja cuahá ñamaní xihín yo.

Cáhan Pablo sahá da ihvi Jesucristo, mé da quixi chí nuu

2 Cuni johó vaha ndó, ñani mí i, na cúú cuéntá Jesús jáchi cáxi tñhun i xihín ndo sahá mé quívi quixi tucu Jesucristo ñuyíví játaca mé a mí ndique táhan í xihín á. Xíca tahví i nu ndó ²ña ná a cándúsa ndó java ñayivi tá cáchi na ña sa naxinu quívi ndicó coo Jesucristo ñuyíví. A ndícani ga ini ndó sahá ña cáchi na jáchi a juú ña ndaa cúú á. Tá ná cachi na cán ña nacahan Ndióxi xihín ná á tá ná cachi na ña nacachi mé nde

ñā nandindaa mé quiví cán á tá ná cachi nā cán ñā naçahí nde in carta nu ná já queá a cándusa toho ndó nā jáchi a juú ñā ndaa cúu á. ³ A cándusa ndó ñā cáchi nā cán jáchi cúni nā jándahvi na ndohó. Ta viti cáhan nde ñā ndaa xihín ndo saha mé quiví quixi tucu Jesucristo. Jáchi jinha ñúhú casáha cuahá ndivaha ñayivi nduu na na ihvi Ndióxi ta jándicoo na íchi cuéntá mé á. Andá jávi casaa in da quini, da cája cuahá ndivaha nuú cuachi. Joo vaxi quiví tá jándihi Ndióxi saha dá ini indayá. ⁴ Ta mé da quini yóho, da cúu da ihvi Ndióxi cándají da mé á ta cándají da tóco ndihi ñā cúu cuéntá mé á. Andá jávi casaa da veñuhu cáhnu ndacaan ñuu Jerusalén cacao da cán tá-tuhun Ndióxi. Ta cachi da xihín ñayivi ñā cúu dá Ndióxi.

⁵ Á co ndícuhun ini ndó tá nasahíin i xihín ndo já cuití naçahan i ñā yóho xihín ndo. ⁶ Ta viti sa cándaa ini ndó ndíá sáji nuu nuú da ihvi cán ñā ná a xínu coo da mé quiví ñā co ndítahan nu dá xínu da. ⁷ Vatí cámaní jánaħa da ihvi mé dá nuú ñayivi joo cája chúun jehé da viti ñúhú jándihi da saħá ñaha Ndióxi cúni da. Ta viti íin in a sáji nuu nuú da ihvi ta co sáhan ñamaní jánaħa da ihvi mé dá nuú ñayivi. Joo vaxi quiví caxoo ñā sáji nuu nuú da ihvi cán. ⁸ Ta andá jávi jánaħa da mé dá nuú ñayivi. Ta cahní Jesucristo mé da ihvi cán xihín tachi yúhu a tá ná quixi a ñuyiví yóho. Ta jándihi a saħa dá xihín ñā ndiyihvi ndaa nuú quixi a. ⁹ Tá cámaní quixi tucu Jesucristo ñuyiví já casaa mé da ihvi xihín cuahá ndivaha ndée ñā nasahan tiñáħa saçuaħa nu dá. Ta jándahvi da ñayivi jáchi caha da cuahá ñaha náhnu, ñā co cúu ñā ndaa. ¹⁰ Ta caha da tóco ndihi nuú cuachi jáchi cúni da jándahvi da ñayivi, mé nā xíca íchi cuahan indayá. Cuhun nā indayá jáchi coo naheen na candúsa na ñā ndaa saħa Jesucristo ta coo naheen na quihvi ini na ñā ndaa, ñā

cuu jácaçu ñahá. ¹¹ Ñā cán queá quiahva Ndióxi ñamaní jándahvi da ihvi cán nā já ná candúsa na ñā tuhún. ¹² Já queá jándoho Ndióxi ini tóco ndihi nā cán jáchi coo naçandúsa na ñā ndaa ta ndinuhu cuachi naçatoo nā cája na.

Naçaxi Ndióxi ndohó ñā ná jácaçu a ndohó

¹³ Ta ndijáá ní quiví ndítahan nuú nde ndiquiahva nde ndixahvi nu Ndióxi saħa ndó, nā cúu ñani nde cuéntá Jesús saħá ñā quihvi ini a ndohó. Jáchi janda tá cámaní cava saħá saħa ñuyiví naçaxi Ndióxi ndohó ñā ná jácaçu a ndohó. Jáchi nandaja ví ínimā yíi mé á ínimā ndo saħá ñā cándeé ini ndó ñā ndaa saħa Jesús. ¹⁴ Cúni Ndióxi ñā ná cándeé ini ndó mé á ñā cán queá naçindahá a ndeħe çaxi tuhun nde tuhun vaħa saħa Jesucristo nu ndo. Naçaxi Ndióxi ndohó ñā ná in nduu ndó xihín Jesucristo, xitoho í. Cáhnu ndivaha cúu mé á ta ndaja cáhnu a mí xihín á.

¹⁵ Ñani mí i, nā cúu cuéntá Jesús coo ndacú ini ndó xihín ñā cándeé ini ndó Jesucristo. A ndíndójó ndo tiin tuun ndó ñā ndaa ñā najánaħa nde nu ndo tá nasandu nde xihín ndó. Ta tiin tuun ndó ñā naçahí nde nu ndó viti. ¹⁶ Jesucristo, xitoho í xihín Ndióxi, tátá yo, mé a quihvi ini mí ná quiahva tuhun ndeé iní ta andá ama cáa quiví a ndíhi saħá. Ta viti ndátí tiaħva caha Ndióxi cuahá ñamaní xihín yo. ¹⁷ Ta xíca tahví nde nu Ndióxi ñā ná jachutú a ínimā ndó xihín ndée mé á. Ta ná chindeé a ndohó çahan ndó tuhun vaħa ta caha ndó ñā vaħa cuití va.

Cúni Pablo ñā ná caça tahví nā nu Ndióxi saħa dá

3 Candehé ndó, ñani i, nā cúu cuéntá Jesús. Nu ndíhi cáhan i tuhun yóho xihín ndo. Caça tahví ndo nu Ndióxi saħá nde. Ta caça tahví ndo nu mé á ñā ná ndicuíta nuu yachi tuhun vaħa

sahá Jesús ndijáá ñuu ta ná ndiquehe vaha ñayivi mé tuhun vaha tá quiahva nandiquehe ndó ña. ²Ta caca tahví ndó nu Ndióxi sahá nde ña ná jácacu a ndehe ndahá ñayivi quini. Vatí ndúu cuahá na co cándéé ini Jesucristo ³joo jáxinu coo Ndióxi tuhun mé á. Já queá quiahva mé á tuhun ndeé ini ndó ta candaa mé á ndohó já ná a cája tiñáhá sacuahá ña núu xihín ndo. ⁴Cándéé ini nde Jesucristo ta cándéé ini nde ndohó ña cája tá cája ndó ña najánaha nde nu ndo. ⁵Ná chindeé Ndióxi ndohó candaa ini ndó ndá quiahva quihvi ini á ndohó. Ta ná chindeé a ndohó caja ndeé ini ndó tá ndoho ini ndó tá quiahva nacaja ndeé ini Jesucristo tá nandoho ini a.

Xíní ñúhú caja chúun í catacú

⁶Cuni johó vaha ndó, ñani mí i, na cúu cuéntá Jesús. Nasahnda Jesucristo chuun nu yo sahá ña cán queá sáhdá nde chuun nu ndo ña ná caxoo ndó nuú na cúu cuéntá Jesús tá cájúsá na caja chúun na tá quiahva najánaha nde nu ndó. ⁷Ta sa xíní ndó ña ndítahan nu ndó caja ndó tá quiahva nacaja mé nde tá nasanduu nde xihín ndo jáchi coo nacajúsá nde caja chúun nde. ⁸Nachahvi nde sahá ña naxixi nde cán. Nacaja chúun vaha nde ñuu ta ndiví já ñañehé nde jihuún catacu nde já ná a ndóho ni in ndó sahá ña naxito ndó ndehe. ⁹Vatí ñin sahá nde cachi nde xihín ndo ña ná coto uun ndó ndehe joo coo nacaja nde já. Ña nacaja nde queá nacaja chúun vaha nde já najánaha nde nu ndo ndá quiahva ndíta-

han nu ndó caja ndó. ¹⁰Á co ndícuhun ini ndó chuun nasahnda nde nu ndo tá nasanduu nde xihín ndo. Já nacachi nde já: Ndá na co cúni caja chúun, ná a cúu toho na, nacachi nde. ¹¹Jáchi ñañehé nde tuhun ña ndúu java na jusá tañu ndó ta co cúni na caja chúun na ta xíca nuu na játaca na tuhun sahá ñayivi. ¹²Ta sáhdá nde chuun nuú na jan ta jácahan nde na xihín ndeé nasahan Jesucristo, xitoho í nuú nde ña ná caja chúun ndísáhu na já ná ñehé ná ña cuxu na.

¹³Candehé ndo, ñani i, na cúu cuéntá Jesús. A cánaá ndó caja ndó ña vaha. ¹⁴Tá ná canduu java na tañu ndó ta co cúni na caja na ña cáchi nde xihín carta yóho já queá xíní ñúhú candehé vaha ndó ndá na cúu ná ta a cáca nuu ga ndó xihín ná já ná cacahan nuu ná sahá ña cája na. ¹⁵Joo a cája ndó cuéntá ña cúu ná na ihvi Jesucristo. Xíní ñúhú jácahan ndó na ña ná caja vaha na jáchi cúu ná ñani ndó, na cúu cuéntá Jesús.

Ndíndayí Pablo ñayivi Tesalónica

¹⁶Ta Jesucristo, xitoho í, mé a ñin vaha ini ná quiahva mé á nu ndo ña ná coo vaha ini ndó ndaja táhan quivi. Ta ná coo vaha ini ndó xihín ndá ñaha nacuu vaxi nu ndo. Ná coo Jesucristo, xitoho í xihín ndihi ndó.

¹⁷Yehe cúu Pablo ta chindahá i Ndióxi coo ndó ta cáhyí i quivi i xihín ndáha i já ná candaa vaha ini ndó ña mé a ndaa yehe cúu da nacahyí i ña yóho nu ndo. ¹⁸Ná caja Jesucristo, xitoho í cuahá ñamaní xihín ndo. Já ná coo.

Carta nu cuítí nacahyi Pablo nuú Timoteo

Chíndahá Pablo Ndióxi coo Timoteo

1 Yehe cúu Pablo, da cúu in apóstol cuéntá Jesucristo sahá ña nasahnda Ndióxi xihín Jesucristo chuun yóho nuú i. Ta Ndióxi cúu á ña jácaçu mí ta Jesucristo cúu á ña ndátí quixi. ² Cáhyi i carta yóho nu mún, Timoteo jáchi cúun tá-tuhun jahyi maní i sahá ña cándéé inún Jesucristo. Ta cúni ña ná caja Ndióxi, tátá yo xihín Jesucristo, xitoho í cuahá ñamaní xuhun. Ta ná tãhvi ini a sahun ta ná caja ña ná coo vaha inún.

Ndícani Pablo sahá na coo jánaha ña ndaa

³ Tá jalóho cámaní quee e ñuu Efeso quixi i estado Macedonia yóho já naxica tãhvi i nuun ña ná candoun ñuu Efeso jan. Ta viti xica tãhvi tucu u nuun ña ná coun cán. Jáchi ndúu java ñayivi cán ta jánaha na ña tũhún nuú ñayivi. Ta ndítahan nu mún cahndún chuun nu ná ña ná a jánaha ga na ña tũhún. ⁴ Ta ná a táa johu na cuento nani, ña cáhan sahá chichi naquixi tásahnu jícó yo. Jáchi ndítũhún uun va na sahá ña yóho ta co chindeé a na cándéé ini na Ndióxi, mé á nasacu ini jácaçu a mí.

⁵ Ndítahan cahún ña yóho xihín ná jáchi cúni Ndióxi ña ná quihvi ini táhan í xihín ndihi ínima yo ta cúni a ña ná caja í ña vaha cuití va ta cúni a ña ná cándéé ini mé á xihín ndinuhu ini. ⁶ Joo java ñayivi najándicoo na ña ndaa ta najátivi na ña cája na jáchi ña quihvi cuití va ndítũhún xihín táhan na. ⁷ Vatí cúni na cán jánaha na ley Moisés joo co cándaq ini na ña jánaha na ta ni co cándaq ini na ña cáhan mé ley.

⁸ Joo sa xini yo ña mé ley Moisés cúu á ña vaha tá ná caja chúun vaha í

ña tá quiahva cúni Ndióxi. ⁹ Xini ñuhú ndicuhun ini ña ni in ley co chicaan cuachi jatá ñayivi vaha. Joo chicaan cuachi jatá ñayivi quini, na sáa ini jáchi co cája na ña cúni Ndióxi. Ta chicaan cuachi jatá ñayivi núu, na cája cuahá nuú cuachi. Ta chicaan cuachi jatá ñayivi co cája cáhnu Ndióxi, na cáhahá xihín mé á. Ta chicaan cuachi jatá ñayivi sáhní tátá náná na xihín jatá tóco ndihi na sáhní ndii. ¹⁰ Ta chicaan cuachi jatá ñayivi ndúu xihín tãa á ñãha, na co cúu yí ná á ñãjhi na. Ta chicaan cuachi jatá tãa lhi, da quihvi nuu xihín inga tãa. Ta chicaan cuachi jatá na cája cuíhna ñayivi sahá ña cúni na jicó ñahá na. Ta chicaan cuachi jatá ñayivi cáhan ña tũhún, mé na jandã quivi Ndióxi táva na tá cáhan na ña tũhún. Ta chicaan cuachi jatã tóco ndihi ñayivi tá co cája na ña ndaa, ña jánaha Ndióxi nu yó caja í. ¹¹ Ta nasahnda Ndióxi chuun nuú i ña ná jánaha i ña ndaa yóho nu ndo jáchi cúni a jácaçu a tóco ndihi ñayivi. Cáhnu ndivaha cúu mé á ta ndítahan caja cáhnu í mé á.

Ndíquiahva Pablo ndixahvi nu Ndióxi jáchi táhnda ini a sahã dá

¹² Ndíquiahva i ndixahvi nu Jesucristo, xitoho í jáchi nacaxi a yehe caja chúun i cuéntá mé á ta nasahan mé á tũhun ndéé ini i ña ná caja i ña xihín ndinuhu ini i. ¹³ Vatí jihna nacahan ihvi i sahã Ndióxi ta nacaja xixi i xihín á ta nacanahá i xihín á joo nacaxi a yehe. Ta natãhnda ini a sahã í tá cámaní cándéé ini i Jesucristo jáchi coo nacandaq ini i ña nacaja i. ¹⁴ Nacaja Ndióxi cuahá ñamaní xihín i tá nacaja ña ná cándéé ini i mé á. Ta nacaja mé á ña nachutú ndaa ini i xihín ña quihvi ini i na cúu cuéntá mé á sahã ña in nãnduu u xihín mé á.

¹⁵ Ña yóho cúu á ña ndaa ta ndítahan nuú ndihi ñayivi candúsa na ña cáhí i yóho: naquixi Jesucristo ñuyivi yóho jácaçu a ñayivi, na cája cuachi. Ta yehe

cúu u da yójó nu ndíhi na cája cuachi. ¹⁶Ta sahá ña yóho natahvi ini Ndióxi sahá i já ná cuu naḥa Jesucristo ndaja cáhnu coo ini mé á. Ta vatí naçaja cuaha chága i cuachi a juú ga java ga ñayivi joo já nasacuu u yuhú nuú tóco ndihi na vaxi chága chí nuu ña ná candeé ini na mé á ta já coo na xihín mé á anda ama cáa quivi. ¹⁷Ña cán queá cóho caja cáhnu í Ndióxi anda ama cáa quivi jáchi mé á cómi á cuéntá saḥa yo anda ama cáa quivi. Ta mé Ndióxi a cuú quivi a ta ndíchi ndivaha jiní á ta íin a indiví vatí a cuú cuní a. Cáhnu ndivaha cúu mé á. Já ná coo.

¹⁸Candehún Timoteo, da cúu tátuhun jahyi mí i. Jándacoo i chuun yóho nu mún jáchi quiahva já naçachi profeta saḥún jihna. Ta xíní ñúhú quiahva ndeé inún cajún ña jáchi cúu á tátuhun cáni táhún xihín ña núu. ¹⁹A jándacóun ña candeé inún Jesucristo ta xihín ndinuhu inún cajún ña ndaa. Jáchi java ñayivi cóo naçaja na ña xíní na cúní Ndióxi caja na ta chí nandíhi sahá ña candeé ini na Jesucristo. ²⁰Ivi táhan da cán cúu Hime-neo xihín Alejandro. Nandiquiahva i da cán ndáḥa tiñáhá saçuaha va já ná candaa ini da ña a cuú quehe núu da Ndióxi xihín tuhun cáhan da.

Ndaja caja í caça tahví yo nu Ndióxi

2 Ña xíní ñúhú chága caja ndó queá caça tahví ndó nu Ndióxi sahá ndihi ñayivi ña ná tahví ini a saḥa ná. Ndiquiahva ndó ndixahvi nu Ndióxi sahá ñamaní caja mé á xihín ndó. ²Ta sa mé quiahva já ndítahan caça tahví ndó nu Ndióxi saḥa tóco ndihi na cómi cuéntá saḥa yo. Jáchi tá caja í ña yóho já cuu coo vaha iní xihín ndihi ñayivi ta já coo toní ñúhú xihín táhan í. Ta já nuná nu yo caja cáhnu í Ndióxi. ³Tá xíca tahví yo nu Ndióxi sahá ndihi ñayivi já queá caja í ña vaha ta cájji ini Ndióxi, mé á jáçacu mí. ⁴Jáchi cúní a jáçacu a tóco

ndihi ñayivi ña ná candaa ini na ña ndaa saḥa mé á. ⁵Jáchi íin in tálaá Ndióxi. Ta íin in tálaá Jesucristo, mé á cúu á ta ta cája mé á ña ná ndique táhan máni ñayivi xihín Ndióxi. ⁶Ta nandiquiahva Jesucristo mé á quivi a saḥa cuachi tóco ndihi ñayivi. Xihín ña yóho náḥa Ndióxi nu yo ña nandindaa tiempo tá cúní a jáçacu a tóco ndihi ñayivi. ⁷Sahá ña cán queá naçaxi Ndióxi yehe cacuu u apóstol ña ná çaxi tuhun i tuhun vaha saḥa Jesús nuú na tóho, na coo cúu na Israel. Jáchi cúní Ndióxi ña ná candaa ini na ña ndaa já ná cuu candeé ini na Jesús. Cáhan i ndinuhu ña ndaa xihín ndo ta coo cáhan i ña tuhún xihín ndo.

⁸Ña cúní queá ná caça tahví nataa nu Ndióxi tóco ndihi nu táca ndo. Ta ndítahan nu ná coo víí ínimá ná já ná cuu ndínehe na ndáḥa ná nu Ndióxi. Ta ndítahan nu ná jándicoo na ña xójo ini na ta ná a cáni táhan yúhu ná. ⁹Jári coo ndítahan nuú najihí candixi na jahmá lándá. Ta ná a caja lándá ná xihín íj jíni ná. Ta ná a ndíhi ini na caja cutú na mé ná xihín ñaha jjuhun cuáán á xihín jíqui yahvi tátuhun perla. Ta ná a cándixi na jahmá yahvi ña caja lándá ná xihín. ¹⁰Vaha chága ná caja na ndinuhu ña vaha tá quiahva ndítahan nuú najihí, na cúu cuéntá Jesús caja na. ¹¹Ndítahan nuú najihí canduu táji ná cuni johó na tuhun Ndióxi ta coto ná a ndínehe jíco na mé ná. ¹²Ta coo sahan i ñamaní nuú najihí ña ná jánaḥa na nu táca ñayivi. Ta ni coo sahan i ñamaní nu ná ña ná cacomí na cuéntá saḥa dataa. Joo ndítahan nu ná coo táji ná. ¹³Jáchi jihna ñúhú nacavaha Ndióxi Adan ta anda jávi naçavaha mé á Eva. ¹⁴Ta a juú Adan cúu da najándahvi tiñáhá saçuaha, vaha. Joo najándahvi tiñáhá saçuaha Eva ta já nandicava ña nuú cuachi. ¹⁵Sahá ña cán queá naçaja Ndióxi xihín najihí ña ná ndoho ini na tá cacu jahyi na. Joo jáçacu Ndióxi na tá ná a jándacoo na ña candeé

ini na mé á. Ta já ndítahan nu ná quihvi ini na ñayivi. Ta ná a cajú lándá ná ta ná ndiquiahva víi na mé ná ndáha Ndióxi.

Ndaja ndítahan caja na sacuahá nuú na cúu cuéntá Jesús

3 Ta ña ndaa cúu tuhun yóho: ndá da cúní cacuu da sacuahá nuú na cúu cuéntá Jesús, ña vaha queá cúní da. ²Jáchí ndítahan nuú da sacuahá caja da ndinuhu ña ndaa já ná a ñehe íni ñayivi cahan nú na saha dá. Ta in túhún ñájíhí da ndítahan coo. Ta ndítahan cacuu da da tácu ini ta ndítahan nu dá cañehe vaha da quiahva ta ndítahan cacuu da da íin toní ñúhú ñayivi xihín. Ta ndítahan nu dá cajii ini da ndiquehe vaha da ñayivi vehe da. Ta xíní ñúhú cacuu da da tiáhva vaha jánahá da ñayivi. ³Có ndítahan cacuu da da xihí ta có ndítahan cacuu da da ndúcú cuachi xihín ñayivi. Joo ndítahan coo víi da xihín ñayivi ta ná a cáni táhan da xihín ná. Ta có ndítahan cacuu da da ndiává ini quehe cuahá da jjuhún. ⁴Ta ndítahan nuú da sacuahá cacomí vaha da cuéntá saha na vehe da. Ta ndítahan nuú jahyi da coo joho na nu cahan tátá na xihín ná ta ná coo toní ñúhú na xihín dá. ⁵Jáchí tá ta a cúu cañehe vaha da cuéntá sahá na vehe da já queá a cúu caja da cacomí da cuéntá sahá na cúu cuéntá Jesús. ⁶Ta mé da sacuahá có ndítahan cacuu da da jacá nandihvi íchi cuéntá Jesús. Jáchí tiáhva náa casahá da ndiñehe jíc da mé dá ta sahá ña yóho jándoho Ndióxi ini da tá quiahva ñacaja mé á xihín tiñahá sacuahá. ⁷Mé da sacuahá nuú na cúu cuéntá Jesús yóho ndítahan cacuu da da íin toní ñúhú ñayivi, na có cúu cuéntá Jesús xihín. Jáchí tiáhva náa ndicava da ndáha tiñahá sacuahá ta xihín ña yóho cahan nú ñayivi ñuyíví saha dá.

Ndaja ndítahan caja na tá ná chindeé na na sacuahá veñuhu

⁸Ta ndá da cúní cacuu da chindeé na sacuahá veñuhu ndítahan nu dá cacuu da da íin toní ñúhú ñayivi xihín. Ta xíní ñúhú cacuu da da cahan ndinuhu ña ndaa. Có ndítahan cacuu da da xihí ta có ndítahan nu dá cacuu da da ndiává ini coo cuahá jjuhún nuú. ⁹Ta xíní ñúhú tiin tuun da ña ndaa ña ñanaha Ndióxi nu yó ta ña yóho cúu á ña ndítahan candeé iní mé á. Ta ná a cáhvi ivi joho ini da. ¹⁰Jihna ñúhú xíní ñúhú coto ndojó ndo mé da cúní chindeé na sacuahá veñuhu. Ta tá có cajú da cuachi nu Ndióxi já queá cuu chindeé da na sacuahá veñuhu. ¹¹Ta jári najihí viti ndítahan cacuu na na íin toní ñúhú ñayivi xihín. Có ndítahan cacuu na na ndahnda yúhu. Ná cacuu na na ndísáhnú ini ta ná caja chúun na xihín ndinuhu ini na. ¹²Ta mé da chindeé na sacuahá veñuhu ndítahan nu dá cacuu da da cóo inga náha xihín ta in túhún ñájíhí da ndítahan coo. Ta ndítahan nu dá cacomí vaha da cuéntá sahá jahyi da xihín sahá ndihi na vehe da. ¹³Jáchí tá ná chindeé vaha da yóho na sacuahá veñuhu já casahá cahvi vaha ini ñayivi saha dá ta xihín ña yóho ñehe íni da cahan chága da sahá ña candeé ini da Jesucristo.

Cahan Pablo saha ndá a cúu mé Jesucristo

¹⁴Vatí ndúcú u saa yachi i jan joo cáhyí i carta yóho nuun. ¹⁵Jáchí tá ná cacuáchi loho i saa i jan já queá sa cánda inún xihín carta yóho ndaja ndítahan caja mí, na cúu na vehe Ndióxi. Mé a ndaa cúu yó cuéntá Ndióxi, mé á tácu ta ndítahan nu yó quiahva ndeé iní ndiquehé sahá ña ndaa cahan saha Jesucristo. ¹⁶Jáchí mé a ndaa cáhnu ndivaha cúu ña náha Ndióxi nu yó:

Naquixi Jesucristo ñuyívi yóho ta ñasacuu a ñayivi.

Ta ñaçahan ínima yii Ndióxi saha mé á ña coo ñajaja ni in cuachi.

Ta ñaxini táto Ndióxi Jesús.

Ta ndijáa ñuyívi ñaçaxi tuhun na tuhun vaha saha mé á ta cuahá ndivaha ñayivi ñacandéé ini na mé á ta tá ñandihí ñandaa cuahañ indiví.

Cáhan Pablo sahá ña co jánaha ña ndaa

4 Cáhan cáxi ínima yii Ndióxi ña vaxi quívi jándacoo java ñayivi ña candéé ini na Jesús. Ta casáhá ña candico ña ña jándahvi ñahá, ña jánaha ña ñaquixi nuú tiñahá sacuahá. ²Ta mé ña jánaha ña tuhún yóho co cúu ná tá quiahva ndáa na. Jáchi cúu ná ñayivi tuhún, ña ñandaji xíní túní xihín ña núu. ³Ta jánaha ña yóho ña a cuú tandaha ñayivi ta jánaha ña ña a cuú cuxu ñayivi java ñaha, ña ñacavaha Ndióxi cuyú. Joo cúní Ndióxi ña ná cuyú ña ña ña tá ná ndiquiahva í ndixahvi nu mé á sahá jáchi candéé ini mé á ta xíní vaha í ña ndaa. ⁴Jáchi tóco ndihí ña ñacavaha Ndióxi cúu á ña vaha ta ni in ñaha co ndítahan candají yo. Joo ná ndiquehe vaha í ña ta ná ndiquiahva í ndixahvi nu Ndióxi sahá. ⁵Jáchi tá ná çaca tahví yo nu Ndióxi já caja yii mé á ña xihín tuhun mé á.

Ña ndítahan caja da cája chúun vaha cuéntá Jesucristo

⁶Tá ná jánahún ña yóho nuú ña cúu cuéntá Jesús já queá caja chúun vahún cuéntá mé á. Ta quiahva ndeé inún tá jácuaha chágun ña ndaa sahá Jesucristo já ná candico cáhnu chágun íchi cuéntá mé á. ⁷Coto a táa johún cuento ña cáhan ñayivi ñuyívi jáchi coo saha toho ña ña. Ña ndítahan cajún queá jácuaha chágun ndá quiahva caja cáhnún Ndióxi. ⁸Tá ná

caja chúun cuahá í xihín yiquí cuñu í já queá chindeé a mí ñuyívi yóho cuití va. Joo tá ná caja cáhnu í Ndióxi já queá chindeé chága yó mí jáchi xihín ña yóho cuu coo vaha ini ñuyívi yóho ta sa xihín mé ña yóho cuu coo vaha í xihín Ndióxi tá ná cuhún yó coo í xihín mé á. ⁹Ta ña yóho cúu á ña ndaa ta xíní ñúhú candúsa í ña. ¹⁰Ta sa saha mé ña ndaa yóho cája chúun vaha í jáchi candéé ini Ndióxi, mé á tácu. Mé a cán cúní a jácacu a tóco ndihí ñayivi ta mé a ndaa jácacu a tóco ndihí ña candéé ini mé á.

¹¹Ta xíní ñúhú jánahún nuú ñayivi tóco ndihí ña cáhí í xuhún yóho ta xíní ñúhú cahndún chuun nu ná ña ná caja na ña. ¹²Coto a quiahvún ñamaní nuú ñayivi quehe núu ña yohó sahá ña cúun da yúta. Joo xihín ña cajún xíní ñúhú jánahún nuú ña cúu cuéntá Jesús ndá quiahva ndítahan caja na ta ndá quiahva ndítahan cahan ña. Ta xíní ñúhú jánahún nu ná ndá quiahva ndítahan quihvi ini na ñayivi ta ndá quiahva ndítahan candéé ini na Ndióxi. Ta víí uun cajún tóco ndihí ñaha já ná a cáhvi núu ini ñayivi sahan. ¹³Nani ndátún saa í ña xíní ñúhú cahvún tuhun Ndióxi nuú ña cúu cuéntá Jesús nu táca ña. Ta quiahvún tuhun ndeé ini na ta jánahún ña. ¹⁴Coto a ndíndójún sahá ña ñasahan Ndióxi nuun tá ñaxica tahví ña cúu profeta nu mé á sahan tá nachojó na sacuahá ndáha ná jinun.

¹⁵Xihín ndinuhu inún caja chúun cuéntá Ndióxi já ná cuu cuni tóco ndihí ñayivi ndá quiahva xíca vahún xihín ñaha Ndióxi. ¹⁶Cuéntá vaha coún xihín mún ta cuéntá vaha coún xihín ña jánahún nuú ñayivi. Ta xíní ñúhú coo ndacú inún xihín ndihí ña cajún. Jáchi tá ná cajún ña yóho já queá çacu ndaa ínimun ta jári çacu ndaa ínima ña xíní johu nu cáhún.

**Jánaḡa Pablo nu Timoteo
ndaja ndítahan cajú da xihín
na cúu cuéntá Jesús**

5 Cọ ndítahan jánanún da sáhnu. Ña ndítahan cajún queá jácahun dá tá quiahva cáhun xihín tátún. Ta xíní ñúhú cajún xihín da yúta chága tá quiahva cajún xihín ñanún. ²Ta xihín na sáhnu xíní ñúhú cajún tá quiahva cajún xihín ñanún. Ta xihín na tacú xíní ñúhú cajún tá quiahva cajún xihín quiahvún. Vii uun cajún xihín ná ta a cáhvi núu inún saha ná.

³Xíní ñúhú chindeé ndó na cuáan tá cọ ndíní cúu na tá ta cọ na vehe na. ⁴Joo tá íin in ñá cuáan ta ndúu jahyi ñá á ndúu jahyi ñání ña já queá ndítahan nuú na cán chindeé na ña. Jáchí táhán ini Ndióxi xihín ñayivi tá chindeé na tátá náná na ta xihín ña yóho chahvi na ñamaní nacaja tátá na xihín ná tá najácuahnu ñahá na. ⁵Jáchí mé ñá cuáan ña mé a ndaa cọ na vehe ñá chindeé na ña mé ña cán cúu ñá cándéé chága ini ñá Ndióxi. Ta nuú ta ndiví xíca tahví ñá nu mé á ña ná chindeé a ña. ⁶Joo ñá cuáan, ñá cajú ña núu ña cúní mé cuití ña, ña cán cúu ñá tátuhun ndii vatí tácu ña. ⁷Ña cúní queá ná cahndún chuun yóho nuú na cán já ná a ñéhe íní yo jánaní na. ⁸Jáchí ndá na cọ chindeé na táhan na ta ni cọ chindeé na na vehe na já queá náha cáxi a ña cọ cándéé ini na Jesucristo ta janda núu chága cajú na a juú ga na cọ cúu cuéntá Jesús.

⁹Tá ndúu na cuáan ta tá cúní na chindeé na na sacuaḡa veñuhu já queá cahyún quívi ná nuú tutu. Xíní ñúhú cacuu na na naxinu uní jícó cuiá á chága ta xíní ñúhú cacuu na na ñasahin xihín in túhún yí. ¹⁰Mé na yóho xíní ñúhú cacuu na na cáhan vaha ñayivi sahá ña vaha cajú na. Tátuhun tá ñasandaa vaha na jahyi na á tá nandiquehe vaha na ñayivi xínu cọ vehe na. Ta xíní ñúhú

cauu na na cajú ndiví nuú na cúu cuéntá Jesús. Ta ndítahan coo tiaḡva na chin-deé na ñayivi tá ndóho ini na. Tá cajú na ña yóho xihín java ga ñaha vaha já cuu quehe ndó na ná chindeé na na sacuaḡa veñuhu.

¹¹Joo a cáhyí tohún nuú tutu jan quívi na cuáan, na yúta chá jáchí tiaḡva náa casahá ndiava ini na tandaha tucu na ta anda jávi jándicoo na chuun cajú na cuéntá Jesucristo. ¹²Ta xihín ña yóho cajú na cuachi nu Ndióxi jáchí cọ najáxinu cọ na tuhun ñasahan na nu Ndióxi. ¹³Ta jári casahá xíca nuu na tá vehe tá vehe ta ndúu na na jusá. Ta a juú ña cán cuití va vaha jáchí casahá na ndahnda yúhu ná ta quíhvi nuu na nuú cọ ndítahan coo na ta casahá cáhan na ña cọ ndítahan cáhan na. ¹⁴Sahá ña cán queá cáchí i xuhun ña vaha chága ná tandahá najihí cuáan, na yúta ta ná cacu jahyi na ta ná candaa vaha na vehe na. Ta xihín ña yóho a quiahva toho na ñamaní nuú na ihvi yo cáhan núu na saha ná. ¹⁵Jáchí ndúu java najihí cuáan ta sa ñacaxoo na nu íchí cuéntá Jesús ta ñacasahá na ndí-cọ na tiñahá sacuaḡa.

¹⁶Joo ndóhó, na cúu cuéntá Jesús tá íin ñá cuáan nu ndo ndítahan chindeé mé ndó ña já queá ná nuná nuú java ga na cúu cuéntá Jesús chindeé na na cuáan, na cọ na vehe.

¹⁷Na sacuaḡa, na cajú chúun vaha na veñuhu ta cómi na cuéntá sahá na cúu cuéntá Jesús, na cán cúu na ndítahan ndiquehe cuahá chága yahvi sahá chuun cajú na. Ta chága ví tá xíca nuu na jánaha na tuhun Ndióxi nuú ñayivi. ¹⁸Jáchí já cáchí tuhun Ndióxi já: “A chícayun ñunu yuhú tindiquí nani cajú chúun rí sání rí trigo. Joo xíní ñúhú quiahvún ñamaní nu rí caxí rí ña.” Ta íin inga tucu nu cáchí a: “Da cajú chúun ndítahan quehe da yahvi sahá chuun cajú da.”

¹⁹ A cándúsa tohún na chácaan cuachi jatá in da sacuaḥa veñuhu tá ta co ndúu ivi á uni testigo na sahan tuhun sahá ña naçaja da cán. ²⁰ Joo ndá na co cúní jándacoo cuachi cája na já queá xíní ñúhú jánanún na nu táhyí ndihi na cúu cuéntá Jesús já queá ná cayihví na java cán caja na cuachi. ²¹ Nu Ndióxi ta xihín nu Jesucristo xitoho í ta xihín nu táto Ndióxi sáhdá i chuu nu mún Timoteo ña ná cajún ña naçahví i yóho. Tá jánanún in da cúu cuéntá Jesús sahá cuachi cája da xíní ñúhú jánanún da vatí cúu dá da xíní táhan vaḥa xuhun. ²² Coto a chójó yachún ndáhún jiní in da cúní cacuu da sacuaḥa nuú na cúu cuéntá Jesús. Jáchi nu cuítí xíní ñúhú ndicani vaḥa inún sahá ña cajún. Jáchi tá ná caja da cán cuachi já queá çahán java ñayivi ña in vaḥa inún xihín cuachi cája da. Coto a cajún ña núu.

²³ Ta sahá ña já cuítí quihví tisún sahá ña cán co ndítahan cohún ticuí uun va. Joo ndítahan coho lohún vino.

²⁴ Ndúu java ñayivi ta náha cáxi táhyí cuachi cája na nuú ñayivi vatí cámaní nahma na ña. Joo ndúu java ga ñayivi ta ñúhu jehé cuachi na joo vaxi quivi tá ndacanáha cuachi na. ²⁵ Ta sa mé quiahva já ndacanáha cáxi táhyí ña vaḥa cája java ñayivi. Ta vatí ná caja jehé na ña vaḥa joo vaxi quivi ndacanáha nuú ña vaḥa naçaja na.

6 Ta ndúu na cúu cuéntá Jesús ta cómi xitoho na cuéntá saḥa ná já queá xíní ñúhú caja cáhnu na xitoho na xihín ndinuhu ini na já ná a çahan núu ñayivi sahá quivi Ndióxi ta ni ná a quehe núu na ña jánaha nde. ² Ta tá ndúu java na ta xitoho na cúu dá cuéntá Jesús já queá xíní ñúhú caja cáhnu na xitoho na sahá ña cúu da cán da candee ini Jesús. Ña ndítahan caja na cán queá caja ndíví vaḥa chága na nu sáhdá xitoho na caja na jáchi xíní ñúhú ndicuhun ini na ña tá cája ndíví vaḥa na nuú da cán já queá

cája ndíví vaḥa na nuú ñani máni ná, da cúu cuéntá Jesús. Ña yóho queá xíní ñúhú jánahún nuú ñayivi ta xíní ñúhú cahndún chuun nu ná ña ná caja na ña.

Ñayivi, na jánaha ña co cúu ña ndaa

³ Ta ndá ñayivi tá jánaha na ña co cúu ña ndaa, ña co ndíque táhan vaḥa xihín tuhun naçahun Jesucristo, xitoho í nu yó ta ni co ndíque táhan vaḥa xihín tuhun Ndióxi ⁴ já queá na cán cúu ná na ndínehe jíco ndivaḥa mé ta co xíní na ni in ñaha. Ndiáva ini na cani táhan yúhu ná ta cásahá cáhiví ini na xihín ñayivi ta ndícuehe xihín táhan na. Cánahá na xihín ñayivi ta co cándee ini táhan na. ⁵ Ta co jándacoo na ña cáni táhan na sahá ña najaca xíní túni na ta nandindójo na ña ndaa. Ta cúní na ndicuicá na xihín ña jánaha na nuú ñayivi sahá Jesús. Candehún. Xíní ñúhú caxoún nuú na cán. ⁶ Vatí mé a ndaa tá ndíco yó íchi cuéntá Jesús cúu yó na cuicá ndivaḥa nani in vaḥa ini xihín ña cómi yo. ⁷ Jáchi coo ñaha ñehé tá naquixí ñuyiví yóho ta ni coo ñaha cuu cañehé coho tá ná quivi. ⁸ Sahá ña cán queá tá in ña cuxú ta tá in ña candixí já queá ndítahan coo vaḥa ini. ⁹ Joo na cúní ndicuicá co cándee na çahnu na nuú ña cúní yiquí cuñu na ta já ndícava na nuú cuachi. Ta xihín ña yóho cásahá ndicají ini na caja na cuahá nuú ña núu. Ta cája ña yóho ña ná ndihi saḥa ná. ¹⁰ Ta sahá ña cátoó ndivaḥa ñayivi jjuhún sahá ña cán queá quixi cuahá ña núu jiní ná. Ndúu java na najándacoo na ña candee ini na Jesús sahá ña cátoó na jjuhún. Ta sahá ña yóho nacasáhá ndóho ini na janda nuú co ndee ga ini na.

Ndítahan nuú na cúu cuéntá Jesús candico çahnu na mé á

¹¹ Candehún, Timoteo, da cúu cuéntá Ndióxi. Xíní ñúhú caxoún nuú tóco ndihi ña núu já ná candico çahnún íchi cuéntá ña ndaa. Cajún ña vaḥa, ña cúní Ndióxi

ta candeé inún Jesús. Xíní ñúhú quihvi inún ñani táhún. Quiahva ndeé inún tá ndóho inún ta víi cajún tóco ndihi ñaha. ¹² Xíní ñúhú candico cáhnún íchi ña candeé inún Jesús. Coto a jándacoún íchi ña cañehe yohó cuhún coún indivi xihín Ndióxi. Jáchí saha mé ña jan nacana Ndióxi yohó tá naçaxi tuhún nú cuahá ñayivi ña candeé inún Jesucristo. ¹³ Nu Ndióxi, mé á cajú ña tácu tóco ndihi ñaha ndúu ñuyíví, xihín nu Jesucristo, mé á coo nayihví cahan ña ndaa tá nasandichi a nu Poncio Pilato, nu ndívi a cán sáhdá i chuun nu mún, Timoteo ¹⁴ ña ná cajún xihín ndinuhu inún tóco ndihi ña sáhdá Ndióxi nuun. Ta coto a ndíjama tohún ña jáchí quiahva já ñehe íni ñayivi jánani na yohó. Ta xíní ñúhú cajún ña yóho janda quiahva ná tandaa quivi quixi tucu Jesucristo, xitoho í. ¹⁵ Ta tá ná xinu coo quivi nasacu ini Ndióxi já caja mé á ña ná coo tóco ndihi ña yóho. Jáchí in tuhún Ndióxi cúu á ña yii ta cúu á xitoho nu tóco ndihi ñaha. Ta mé á cúu á jiní nuú in in da cómí cuéntá sahá ñayivi ndúu ñuyíví. Ta mé á cúu á xitoho nuú ndihi da cúu xitoho nuú ñayivi ndúu ñuyíví. ¹⁶ Mé á cúu á in tuhún jiní Ndióxi, ña a cúu quivi. Ta ni in ñayivi a cúu cativi yati nu fin mé á jáchí yéhe ndivaha nu fin mé á. Ta ni in

ñayivi ndúu ñuyíví coo naxini na mé á jáchí a cuú cumi ñayivi Ndióxi. Ndítahan caja cáhnu í mé á anda ama cáa quivi jáchí a ndíhi toho sahá ña sáhdá mé á chuun. Já ná coo.

¹⁷ Ndítahan nu mún, Timoteo cahndún chuun nuú ña cómí cuahá ñaha cuicá ñuyíví yóho ña ná a cácuu na ñayivi catóo ndiñehe jícó mé. Ta xíní ñúhú cahndún chuun nu ná ña ná a candeé ini na ñaha cuicá cómí ña jáchí cuu ndihi saha tóco ndihi ñaha cómí na. Ña ndítahan caja na queá candeé ini na Ndióxi, mé á quiahva tóco ndihi ñaha nu yo já ná caji íni yo. ¹⁸ Cahndún chuun nu ná ña ná caja vaha na ta ná cayojó joho ña vaha cája na. Ta xíní ñúhú coo tiahva na cahnda java na ña cómí ña xihín java ga ñayivi. ¹⁹ Jáchí xihín ña yóho ñehe táhvi ná coo cuahá ñaha cuicá ña indivi tá ná tandaa quivi cuhun ña coo na xihín Ndióxi anda ama cáa quivi.

²⁰ Candehún Timoteo. Xíní ñúhú quehe cuéntá vahún ña jánaha i nuun. Coto a cúní johún tuhun ña cahan ñayivi ñuyíví jáchí coo saha toho a ta ni co xíní ña ña cahan ña saha. ²¹ Jáchí java ña cán cáhí ña xíní ndivaha na joo najándacoo na ña candeé ini na Ndióxi.

Ná caja Ndióxi cuahá ñamaní xihín ndihi ndó. Já ná coo.

Carta ivi nacahyi Pablo nuú Timoteo

Chíndahá Pablo Ndióxi coo Timoteo

1 Yehe cúu Pablo ta cúu u da apóstol, da cája chúun cuéntá Jesucristo. Nacaxi Ndióxi yehe ta nachindahá mé á yehe caxi tuhun i tuhun vaha sahá Jesucristo nuú ñayivi. Jári nasahan Ndióxi tuhun a nuú ñayivi ña cán queá tá cándéé ini na mé á já queá cuhun na coo na xihin mé á anda ama cáa quivi. ² Cáhyi i carta yóho nu mún, Timoteo jáchi cúun tátuhun jahyi mí i ta quihvi ndivaha ini i yohó. Ná caja cuaha Ndióxi, tátá yo xihín Jesucristo, xitoho í ñamaní xuhun ta ná tahnda ini a sahun ta ná caja mé á ña ná coo vaha inún.

Jácahan Pablo Timoteo ña ná ndicani da nuú ñayivi sahá Jesucristo

³ Ndíquiahva i ndixahvi nu Ndióxi saha mún, Timoteo jáchi ndicuhun ini i yohó tá xica tahvi i nu Ndióxi nuú ta ndiví. Cája chúun vaha i cuéntá mé á tátuhun nacaja chúun tásahnu jícó i sa-nahá. Ta xíní ña fin vaha ínimá i nu Ndióxi. ⁴ Ndicuhun ini i ndaja nasacu ndivahún ta natahnda inún sahá i tá naquee e cán vaxi i yóho. Jári yehe va cúní ndivaha i cuni tucu u yohó já ná chutú ndaa ini i xihin ña cáji ndivaha ini i. ⁵ Ndíquiahva i ndixahvi nu Ndióxi tá ndicuhun ini i ña mé á ndaa cándéé inún Jesucristo. Nu cuítí nacandéé cáhnu ini ná chéhun, Loida xihin nánún, Eunice Jesucristo ta quiahva já xíní vaha i ña cándéé cáhnu inún mé á.

⁶ Ña cán queá jácahan i yohó ña ná ndicuhun inún caja chúun chágun xihín ña nañehe táhvun nu Ndióxi tá nachinúu i ndahá i jinun. ⁷ Jáchi co cúní Ndióxi ña ná cayihvi yo. Já queá nasahan ínimá yíi á nu yo já ná nduu ndéé iní ta

ná quihvi ini táhan í ta ná cahnu yo mí cañehe vaha í quiahva xihín á. ⁸ A cácahan toho nuun cahun tuhun vaha sahá Jesucristo, xitoho í. Ta a cácahan nuun saha mí i vatí ndácaan i vecaa sahá Jesucristo. Joo ña ndítahan cajún queá quiahva ndéé inún tá ná ndoho inún sahá Jesucristo jáchi sahan Ndióxi ndéé mé á nuun. ⁹ Najácaacu Ndióxi mí ta nacaxi a mí ña ná cacuú ñayivi yíi cuéntá mé á. Ta a juú sahá ña nacaja vaha í joo nacaxi a mí jáchi nasacu ini a caja ñamaní xoho anda tá camaní cava sahá saha ñuyiví. Sahá ña cán queá nachindahá a Jesucristo quivi a sahá cuachí. ¹⁰ Ta anda viti naxinu coo ña nasacu ini a jáchi naquixi Jesucristo ñuyiví yóho ta naxihí a ndica crúxu. Ta sahá ña nacaja mé á co ndítahan yihvi yo quiví jáchi cuhun í coo í xihín mé á anda ama cáa quivi tá ná cándéé iní tuhun vaha cáhan sahá Jesucristo.

¹¹ Nacaxi Ndióxi yehe ná cacuu u in apóstol cuéntá mé á ña ná jánaha i tuhun vaha sahá Jesús nuú ñayivi, na coo naquixi chíchi Israel. ¹² Ta vatí ndóho ini i sahá ña yóho joo co cácahan toho nuú i jáchi xíní vaha i yo cúu Jesucristo, mé a cándéé ini i. Nandíquiahva i mí i ndáha mé á ta xíní vaha i ña candaa mé á yehe anda quiahva ná tandaa quivi quixi tucu a ñuyiví yóho.

¹³ Ta jácahan i yohó ña ná candico cáhnún íchi ndaa, ña najánaha i nuun. A jándicoún ña cándéé inún Jesucristo ta a jándicoún ña quihvi inún ñayivi jáchi in nanduú xihín Jesucristo sahá ña cándéé iní mé á. ¹⁴ Sahá ña ndácaan ínimá yíi Ndióxi ini in in yó ta sahá ña chindeé a mí sahá ña cán queá xíní ñuhú cacu vahún ña nasahan Ndióxi nuun.

¹⁵ Sa xíní vahún ña najándicoo tóco ndihi na cúu cuéntá Jesús ndúu estado Asia yehe. Tañu mé na cán ndácaan Figelo xihín Hermógenes. ¹⁶ Cúní ña ná tahvi ini Ndióxi sahá Onesíforo xihín

na vehe da jáchi cuahá tañu nachine-
deé da yehe ta já nandivaha ini i. Ta
coó nacacahan nuu da sahá ña ndacaan
i vecaa. ¹⁷ Ña nacaja da queá nandin-
ducú da yehe tá nasaa da ñuu Roma
yóho ta coó nandiquehe ndée da anda
quiahva nandiñehe dá yehe. ¹⁸ Ná tahvi
ini Ndióxi sahá da cán tá ná ndindaa
quíví quixi tucu Jesucristo ñuyíví yóho.
Ta sa xíní vahún ña nachineé da yehe
ta nasahijn i ñuu Efeso.

Ná quiahva ndeé iní tá ndóho iní sahá Jesucristo

2 Ta mún, Timoteo cúun tátuhun jahyi
mí i ña cán queá jácahan i yohó
ña ná coo ndacú inún xihín ndée ña
nasahan Jesucristo nuun. ² Sa xíní johún
tuhun vaha nacaxi tuhun i nuú cuahá
ñayivi. Ta viti ndítahan nu mún jánahún
ña cán nuú java ñayivi, na cúu ñayivi
ndísáhnú ini já ná cúu jánahá ná ña nuú
java ga ñayivi.

³ Quiahva ndeé inún tá ndóho inún
sahá Jesucristo jáchi cúun tátuhun in
soldado vaha cuéntá mé á. ⁴ Jáchi in sol-
dado cája cuití da ña sáhná jefe da nu
dá ta co cája da inga ga ñaha jáchi cúni
da ña ná tahan ini jefe da sahá ña cája
da. Tá quiahva cája mé soldado yóho
quiahva já ndítahan nu yo caja í. ⁵ Jári
sa xíní vaha ndó ndaja cája da sájiquí
pelota. Tá co sájiquí víi da já queá a cuú
quee vaha da. Quiahva já cúu á xihín mí
jáchi tá co cája í ña cúni Ndióxi já queá
a cuú quee vaha í. ⁶ Tá ndíhi ini in da
xútu já queá ndítahan nu dá jáquee da nu
cuití ñaha naxutu da. Ta quiahva já ndí-
tahan ndíhi iní caja chúun í cuéntá Jesu-
cristo já queá cuu ndiquehé ña quiahva
Ndióxi nu yo. ⁷ Ndicani vaha inún saha
tóco ndíhi ña nacahan i xuhun ta já chin-
deé Ndióxi yohó candaa vaha inún tóco
ndíhi ña cáchi i xuhun.

⁸ Xíní ñúhú ndicuhun inún Jesucristo,
mé á naquixi chíchi David. Najándi-

ta cu Ndióxi mé á tá naxihí a. Ta viti
cáxi tuhun i tuhun vaha saha mé á nuú
ñayivi. ⁹ Ta ndóho ndivaha ini i sahá
tuhun cáhan i nuú ñayivi. Nacató na
yehe xihín cadena ta nachicaan na yehe
vecaa tá quiahva cája na xihín in da
quini. Joo a cuú caja na ña yóho xihín
tuhun Ndióxi jáchi cuahá chága ñayivi
cáhan na sahá Jesús viti. ¹⁰ Ña cán queá
ín tiaha i ndoho ini i sahá ñayivi, na
nacaxi Ndióxi cacuu na cuéntá mé á.
Jáchi cúni Jesucristo jácacu a ndíhi na
cándeé ini mé á já ná coo na xihín mé á
anda ama cáa quívi. Ta ñúhí ndivaha
cán. ¹¹ Ña cáchi mé ña yóho cúu á ña
ndaa:

Tá ná quíví sahá Jesucristo já queá cuu
canduú xihín mé á anda ama cáa
quívi.

¹² Tá ná caja ndeé iní ña ndóho iní sahá
Jesucristo já queá vaxi quívi cahnda
í chuun xihín mé á.

Tá ná cachí ña co cúu yo cuéntá Jesu-
cristo já queá cachi mé á ña co xíní
toho a mí.

¹³ Vatí ná ndindójó yo sahá Jesucristo
joo a ndindójó toho mé á saha yo,
jáchi mé a ndaa jáxinu coo mé á tuhun
sáhan nu yó caja.

Táhán ini Ndióxi xihín da cája chúun vaha cuéntá mé á

¹⁴ Ña yóho ndítahan jándicuhun inún
ñayivi. Cahndún chuun nu ná ña ná a
cáni táhan yúhu ná saha ndá tuhun cúu
ña vaha chága jáchi coo saha cúu á. Joo
ña cája na cán queá játiví na xíní túni
mé ñayivi xíní johó ña cán. ¹⁵ Ndinuhu
inún caja chúun vahún cuéntá Ndióxi já
ná tahan ini mé á xuhun. Tá ná cajún
ña yóho já queá a cácahan nuun jáchi
ndinuhu ña ndaa najánahún nuú ñayivi.
¹⁶ A quíhvi nuún nditúhún xihín ñayivi
tá nditúhún quíhvi na jáchi quéta nuu
chága na tañu cuachi tá nditúhún quíhvi
na. ¹⁷ Ta java tañu ña cáhan xihín táhan

na jan jándihhvi a ñani táhan na jáchi tá quiahva jándihi cuehe táhyi sahá yiquí cuñu ñayivi quiahva já jándihi tuhun cáhan na sahá ñayivi. Já nandoho Hime-neo xihín Fileto. ¹⁸ Nacaxoo ndívi da nu íchi ña ndaa ta viti jánaha da ña tuhún jáchi cáchi da ña sa nayaha va quívi tá nditacu tucu na sa naxihí. Jájana da jiní java ñayivi ña na a cándee ga ini na Jesús. ¹⁹ Joo Ndióxi cáhan ña ndaa ta a cuú ndijama mé á ña nacahan. Ta já cáchi tuhun Ndióxi sahá ñayivi cuéntá mé á: “Xini Ndióxi ndá na cúu na cuéntá mé á.” Já cáchi tucu tuhun Ndióxi já: “Tá ná cachi ñayivi ña cándee ini na Jesucristo, xitoho na já quea ndítahan nu ná jándicoo na cuachi cája na”, cáchi tuhun Ndióxi.

²⁰ Ta viti ná cacu u in quiahva nuun: ini in vehe cáhnu íin ñaha jiyhun cuáán xihín ñaha jiyhun cúxú. Jári núhu ri ñaha nacavaha xihín yíto ta núhu ri ñaha nacavaha xihín ndahyi. Ta java ña cán íin javí a ta java ña cán íin chuun a ndijáá ní quívi. ²¹ Tá najándicoo í cuachi cája í já quea cacuú ñayivi víi nu Ndióxi. Ta cacuú tátuhun in cohó vaha jáchi cuu caja chúun í cuéntá Ndióxi ta já cuu coo tiahva í caja í tóco ndihi ña vaha.

²² Cama chá caxoún nuú cuachi ña ndiáva ini da tacú caja da. Ta candi-co cáhnún íchi cuéntá ña ndaa ta cándee inún Ndióxi ta quihvi inún ñayivi ta coo vaha inún xihín ná. Tá ná cajún ña yóho in cacuún xihín tóco ndihi na cúu cuéntá Jesús, na íin víi ínimá nu Ndióxi jáchi xíca na nu Ndióxi ña ná chindee a na. ²³ A quíhvi nuún nditúhún quíhvún xihín ñayivi jáchi tá ná cajún ña yóho já quea vaxi quívi tá casáhá cani táhan na xuhun. ²⁴ Ta ndá da ndíco íchi cuéntá Jesús co ndítahan nu dá nducú da cuachi xihín ñayivi. Ña ndítahan caja da quea caja vaha da xihín tóco ndihi ñayivi ta ná cacuu da in da tiahva jánaha vaha ñayivi ta ná coo cáhnu ini da xihín ná.

²⁵ Ta co ndítahan nu dá ndiñehe jíco da mé dá nani jánaha da nuú ñayivi, na sáá ini xihín tuhun Ndióxi jáchi tiahva náá caja Ndióxi ña ná ndíco coo ini na ta já candaa ini na ña ndaa sahá Jesucristo. ²⁶ Jáchi tá ná ndíco coo ini na já quea janí ná ndáha tiñhá sacuahá jáchi nasa-comí mé rí cuéntá saha ná ña ná caja na ña cúni mé rí.

Ña tandaa caja ñayivi tá jalóho cúni ndihi sahá ñuyiví

3 Ta ndítahan candaa vaha inún, Timoteo ña tá ná cayati quívi quixi tucu Jesucristo ñuyiví yóho já quea ndoho ndivaha ini na cúu cuéntá Jesús. ² Jáchi vaxi quívi tá caja ñayivi cuahá ndivaha cuachi. Cuahá ñayivi cajihnda ná ta quihvi ndivaha ini na jiyhún na. Ta já caja cáhnu na mé ná ta íchi ndivaha coo ini na ta candají na Ndióxi ta a cúni johó na nuú cahan tátá náná na xihín ná. Ta ni ndixahvi a ndíquiahva na nu Ndióxi ta ni a cája cáhnu na mé á. ³ Ta a quíhvi ini táhan na ta ni a cája cáhnu ini saha táhan na. Ta cahan jíquí na saha java ga ñayivi ta catúhún na. Ta a cuú cahnú na nuú ña xíca ini na caja na. Xíxi coo ini na xihín ñayivi ta candají na tóco ndihi ña vaha. ⁴ Jíco túhún táhan na. Ta cacuu na ñayivi cama jiní. Ta caja íchi ndivaha ini na. Catóo chága na cájii ini na xihín ñaha ñuyiví yóho a juú ga xihín ñaha Ndióxi. ⁵ Ta caja na tá quiahva cája na cúu cuéntá Ndióxi joo chijehé tuhun na saha Ndióxi, mé á sahan ndee nu ná caja na ña cúni mé á.

Caxoún nuú ndihi na cája cuachi yóho. ⁶ Jáchi tañu na jan ndúu java ñayivi, na quíhvi vehe tá vehe jándahvi na najihí quíhvi xihín ña jánaha na. Ta mé najihí yóho ndójo cuahá ndivaha na cuachi jáchi nayaha quiahva cája na tá nuú ña núu xíca ini na caja na. ⁷ Ta mé najihí yóho jácuaha ta jácuaha na joo co xínu coo nu ná candaa ini na ña ndaa. ⁸ Sa-

nahá ndivaha nasanduu ivi da tají. In da naní da Janes ta inga da naní da Jambres. Tá quiahva nasaji nuu da cán nuú Moisés quiahva já sáji nuu java ñayivi nuú ña ndaa viti. Ña núu ndácaan xíní túní na ta coó naxeen na candeé ini na Jesucristo. ⁹ Joo vaxi quivi tá a cúu ga jándahvi na ñayivi jáchí mé quivi cán candaá cáxí ini ñayivi ndaja tóntó nacaja na cán. Já nandoho Janes xihín Jambres sanahá jáchí nacandaá cáxí ini ñayivi ña nacaja núu da xihín Moisés.

Sáhdá tucu Pablo chuun nuú Timoteo

¹⁰ Joo sa xíní vahún tá quiahva nacaja i tá najánaha i nuun. Ta sa xínun ña cája i catacu u xihín ña nasacu ini i cajú i chá-ga chí nuu. Ta sa xínun ndaja candeé ini i Jesús. Ta sa mé quiahva já xíní vahún ña co xójo ini i xihín ñayivi. Ta sa xíní vahún ña quihvi ini i tóco ndihi ñayivi. Ta xínun ndaja nasahan ndeé ini i ¹¹ tá nacaja xíxi na xihín i ta ndaja najándoho na ini i tá nasahin i nuu Antioquía xihín nuu Iconio xihín nuu Listra. Joo naxindeé Ndióxi yehe ta natavá mé á yehe nu tóco ndihi ña nandoho i. ¹² Ta mé a ndaa ndoho tá ndoho ini ñayivi tá cúní na candiço cáhnu na íchí cuéntá Jesús. ¹³ Ta ñayivi quini, mé na jándahvi ñayivi cája chága ví na cuachi ta co xíní na ndájá xínu coo nuú ndihi cuachi cája na. Xíca na jándahvi na ñayivi ta janda mé na cán najándahvi ñayivi.

¹⁴ Joo jácahan i yohó, Timoteo ña ná a jándicoún ña ndaa, ña nacati-ahvún tá najácuahún xihín nde jáchí xíní vahún ña cúu á ña ndaa. Ta sa xíní vahún ndá ñayivi cúu nde. ¹⁵ Ta candaá vaha inún tūhun Ndióxi jáchí anda tá lohún najácuahún ña. Ta mé tūhun Ndióxi cuu jánaha yohó cajún ña cúní mé á ta cuu jácau a yohó jáchí candeé inún Jesucristo. ¹⁶ Nacahyí ñayivi tóco ndihi tūhun Ndióxi yohó jáchí najácahan

Ndióxi ínimá ná ña ná cajú na ña. Ta mé tūhun Ndióxi yohó chindeé a mí jáchí jánaha mí cajú í ña cúní Ndióxi ta jánani ri a mé ví tá co cája vaha í. Ta jándi-caca vaha mí tá co xíca vaha í íchí cuéntá Ndióxi. Ta sa mé quiahva já jánaha mí ña ná cacuu ñayivi ndaa, na co cája cuachi. ¹⁷ Já queá ná cuu nduu ndacu chága ini na candeé ini Ndióxi xihín tūhun mé á ta xihín ña yohó cuu coo tiahva na cajú na tá nuú ña vaha.

4 Vaxi quivi quixi tucu Jesucristo ñuyiví yohó cacomí a cuéntá sahá yo ta mé já cajú ví a sahá na tácu xihín sahá na sa naxihí. Sahá ña cán queá nu Ndióxi xihín nuú Jesucristo, xitoho í sáhdá i chuun nu mún, Timoteo ² ña ná coo tiahvún cahun tūhun Ndióxi nuú ñayivi ní tiempo tá núná nuún á tá coó. Ta ndítahan nuun cavún jiní na cája cuachi ta jácahún na ña ná cajú na ña cúní Ndióxi. Ta ndítahan quiahvún tūhun ndeé ini na. Ta ví ví jánahun tūhun Ndióxi nu ná ní tiempo. ³ Jáchí vaxi quivi tá a cándúsa ga ñayivi cuni johó na tūhun ña ndaa. Joo ndihi ini na nducú cuahá na maestro, da jánaha ña xíca ini mé ná taa johó na. ⁴ Ta a cándúsa na taa johó na ña ndaa jáchí cájii chága ini na taa johó na ña tūhún cuéntá ñayivi ñuyiví. ⁵ Sahá ña cán queá sáhdá i chuun nu mún, Timoteo ña ná cañehe vahún quiahva xihín ña cajún. Ta quiahva ndeé inún tá ná ndoho inún. Caxi tūhún tūhun vaha sahá Jesús nuú ñayivi xihín ndinuhu inún. Ta xíní ñúhú jáxínu coún tóco ndihi chuun nasahan Ndióxi nuun cajún.

⁶ Sa fin tiahva i joco i mí i nu Ndióxi. Sa xíní ví ña sa nacayati quivi quivi ví. ⁷ Nacaja chúun vaha i cuéntá Ndióxi tá-tūhun cája chúun vaha in soldado nu jefe da. Najáxínu coo ndihi i chuun nasahan Ndióxi nuú i tátūhun cája in da xínu tá sa naquee vaha da. Ta ndiço cáhnu i íchí ña candeé ini i Jesús. ⁸ Ta viti ndátí i casaa quivi cajú ví Jesucristo, xitoho

í saha tóco ndihi ñayivi. Mé tiempo cán ndiquehe e ña quiahva mé á nuú i saha ña nacaja i ña ndaa. Ta quiahva já caja Jesucristo, mé á cúú ña ndaa xihín java ga ñayivi, mé na cájii ini ndáti na casaa quiví quixi tucu a ñuyiví.

Cáhan Pablo cuéntá mé da viti

⁹Ndihí inún quixi camún coto nih-nún yehe. ¹⁰Najándicoo Demas yehe jáchi nacatóo chága da ñaha ñuyiví yóho ta cuahan da ñuu Tesalónica viti. Ta naquee Crescente cuahan da estado Galacia ta já naquee Tito cuahan da chí estado Dalmacia. ¹¹In túhún Lucas ín da xihín i. Ndinducún Marcos ná quixi da xuhun tá ná quisún yóho jáchi cuu chindeé vaha da yehe xihín chuun cája i yóho. ¹²Sa nachindahá i Tiquico ñuu Efeso. ¹³Tá ná quisún yóho cajún ñamaní cañehún cotó ndeé e ña najándicoo i ñuu Troas vehe Carpo. Ta jári libro va cañehún ña quisún yóho. Ta a ndíndójún cañehún níí quítí ña nahayí i nuun.

¹⁴Á co ndícuhun inún Alejandro, da cája chúun cáni caa. Cuahá ndivaha ña núu nacaja da xihín i joo vaxi quiví tá chahvi da sahá, caja Jesucristo, xitoho í. ¹⁵Cuéntá coún xihín dá jáchi cándají ndivaha da tuhun Ndióxi, ña jánaḡa yó nuú ñayivi.

¹⁶Tá nandiquehe e sahá i nuú cuítí nuú na jutixia ni in ñayivi coó nachindeé yehe. Tóco ndihi na najándicoo na yehe. Ná caja cáhnu ini Ndióxi sahá ña nacaja na cán. ¹⁷Joo Ndióxi queá nachindeé a yehe ta nasahan ndeé á nuú i ña ná cuu caxi tuhun i tuhun vaha sahá Jesús ná cuni johó tóco ndihi na coó naquixi chíchi Israel. Tá nachindeé Ndióxi yehe já cúú á tátuhun naçacu yehe yuhú león. ¹⁸Ta cándéé ini i ña jáçacu a yehe nuú ndihi ña núu. Ta candaa vaha Ndióxi yehe anda quiví cuhun i indiví coo i xihín mé á nuú cahnda Ndióxi chuun anda ama caa quiví. Cóho caja cáhnu í mé á anda ama caa quiví. Já ná coo.

Ndíndají Pablo na cúú cuéntá Jesús

¹⁹Chindahá i Ndióxi coo Prisca xihín Aquila xihín na vehe Onesíforo. ²⁰Nacandoo Erasto ñuu Corinto. Ta nacandoo Trófimo ñuu Mileto jáchi quíhvi da. ²¹Ndihí inún quisún yóho tá cámaní xinu coo tiempo vixi. Eubulo xihín Pudente xihín Lino xihín Claudia chindahá na Ndióxi coún. Ta jári ndihi na cúú cuéntá Jesús ñuu yóho chindahá na Ndióxi coún.

²²Ná coo Jesucristo, xitoho í xuhun. Ná caja Ndióxi cuahá ñamaní xihín ndihi ndó.

Carta načindahá Pablo nu Tito

Cáhan Ndióxi Pablo xihin Tito

1 Yehe cúu u Pablo, da cajú chúun cuéntá Ndióxi ta cúu u in apóstol cuéntá Jesucristo. Naçindahá Ndióxi yehe çaxi tuhun i tuhun vaha saha mé á nuú ñayivi ña ná candeé ini na mé á. Ta já ná candaq ini na ña ndaa saha mé á jáchi nandicaxi a na. ²Ta ndátí tiahva na çuhun na coo na xihin mé á anda ama cáa quivi jáchi já nasahan Ndióxi tuhun a nu yo tá camañi çava sáhá saha ñuyiví. Ta co cáhan Ndióxi ña tuhun. ³Ta viti naxinu coo quivi nasacu ini Ndióxi jánaħa nuú ñayivi ndá quiahva cuu candeé ini na mé á. Ta viti ndójo i chuun ña nasahnda Ndióxi nuú i ña ná çaxi tuhun i tuhun vaha saha Jesucristo nuú ñayivi, mé a jáçacu mí. ⁴Chindahá i tutu yóho nu mún, Tito, da cúu tátuhun jahyi mí i jáchi in nuú candeé ini Jesucristo. Ta xica tahví i nu Ndióxi, tátá yo xihin nuú Jesucristo, xitoho í, mé a jáçacu mí ña ná cajú cuahá ñamaní xuhun ta ná cajú ña ná coo vaha inún.

Chuun načaja Tito isla Creta

⁵Najándicoo i yohó isla Creta jan ña ná jáxinu coñu chuun ña najándicoo ñahñu i jan. Ndítahan ndicasún na saçuaha nuú na cúu cuéntá Jesús in in ñuu tá quiahva nandicani i nuun cajún. ⁶Ta mé da saçuaha yóho ndítahan cacuu da ñayivi vaha, da a cúu ñehe ini ñayivi jánani na sahá ña cajú da. Ta ndítahan nu dá cacuu da da coó inga ñahá xihin ta in túhún ñájíhí da ndítahan coo. Ta ndítahan nuú jahyi da candeé ini na Ndióxi. Ta co ndítahan nuú jahyi da cajú na ña núu joo ndítahan nu ná candúsa na cajú na ña cáchi náná tátá na já ná a cúu chícaan ñayivi cuachi jata ná. ⁷Jáchi ndá da cúu da saçuaha cajú chúun da cuéntá

Ndióxi sahá ña cán queá ndítahan cacuu da in ñayivi ndaa. Ta co ndítahan nu dá cajú ichi ini da ta ni co ndítahan nu dá cajú cama ini da xihín ñayivi. Ta ni ná a cacuu da da xihí ta ni ná a cátóo da cani táhan da xihín ñayivi ta ni ná a cátóo da ñehe cuaha dá jiuhún. ⁸Ña ndítahan nu dá cajú da queá cají ini da ndiquehe vaha da ñayivi vehe da ta ná cajú da ña vaha cuití va ta ná cacuu da da ndísáhnú ini, da cañehe vaha quiahva. Ta ndítahan nu dá cajú da ña ndaa cuití va ta ná candico cáhnú da ichi cuéntá Ndióxi ta ná candaca ví da yiquí cuñu da ná a cajú da cuachi. ⁹Ta ndítahan nu dá cativi tuun da ña ndaa sahá Jesucristo, ña nacatiahva da já queá cuu chindeé da ñayivi xihín ña ndaa jánaħa da nu na. Ta xihin mé tuhun vaha yóho cuu jáxinu da ini java ga ñayivi, na cáhan núu sahá tuhun Ndióxi.

¹⁰Jáchi cuahá ñayivi co cúní na cajú na ña cáchi tuhun Ndióxi. Ta tañu na yóho ndúu cuahá na Israel. Coó saha toho tuhun cáhan na ta xihín ña yóho jándahvi na ñayivi. ¹¹Yuhú na yóho ndítahan chicají jáchi xica na jáçaca na jiní ñayivi ta janda tóco ndihi na ndúu vehe nacava na jiní ná xihín ña co cúu ña ndaa já ná ñehe cuahá na jiuhún jatá ñayivi jándahvi ñahá na.

¹²Ta tañu na yóho nasahin in profeta ta já nacachi da já sahá ñayivi ñuu da, na ndúu isla Creta cán: “Na ndúu Creta cáhan na ña tuhún ní tiempo. Yucú na ta ndehé na ta júsa ndivaha na cajú chúun na”, nacachi da. ¹³Ta ña ndaa cúu ña načahan da cán saha ná. Na cán queá ndítahan nuun jánani vahún na ña ná candeé cáhnú ini na Jesús ¹⁴ta ná a táa johó na cuéntó ña ndícani ñayivi Israel nu ná jáchi ña quixi jiní mé va na queá. Ta ná a táa johó na nu cáhan ñayivi, na nacaxoo nuú ña ndaa.

¹⁵Ta tá ndacaan ví xini túni ñayivi já queá tóco ndihi ñaha cúu á ñaha ví nu

ná. Joo tá cō cándúsa ñayivi Ndióxi ta ndácaan ña núu xíní túní na já queá tóco ndihi ñaha cúu á ña núu nu ná jáchi co ín ví ínima ná xihín xíní túní na.¹⁶ Vatí cáchí ña yóho ña cándéé ini na Ndióxi joo xihín ña núu cája na náha ña mé a ndaa cō cándéé ini na mé á. Sáa ndivaha ini na ta a xeén toho na caja na ña ndaa sahá ña cán queá ni in ñaha vaha a cuú caja na.

Ndítahan jánaḥa yo tuhun vaha sahá Jesús nuú ñayivi

2 Ta ndítahan nu mún, Tito jánaḥún ñayivi ndaja caja na ña ndaa, ña cáchí tuhun Ndióxi caja na.² Jánaḥún na sacuaḥa ña ndítahan cacuu na ñayivi ndisáhnu ini, na ín toní ñúhú ñayivi xihín, na ñéhe vaha quiahva xihín ñaha. Ta ndítahan candéé vaha ini na Ndióxi ta ndítahan quihvi ini na ñayivi ta ndítahan coo ndacú ini na já ná cuu candéé ini na tá ná ndoho ini na.³ Ta quiahva já ndítahan coo toní ñúhú najihí sacuaḥa xihín ñayivi. Ta cō ndítahan cacuu na najihí túhún ta ni ná a cacuu na na xihí. Jáchi ndítahan nu ná cacuu na na ín toní ñúhú ñayivi xihín sahá ña vaha cája na.⁴ Ta ndítahan jánaḥa na najihí yúta ña ná quihvi ini na yí ná xihín jahyi na.⁵ Ta ndítahan caḥnu na mé ná ta ndítahan cacuu na ñayivi víi ta ná candaa vaha na vehe na ta ná caja na ña vaha cuití va. Ta ndítahan candúsa na caja na ña sáhndá yí ná nu ná. Tá cája na tóco ndihi ña yóho já queá a ñéhe ín ñayivi caḥan núu na saḥa tuhun Ndióxi.

⁶ Ta quiahva já ndítahan jácaḥún da tacú ná coo ndisáhnu ini da.⁷ Xihín ña cájún jánaḥún nu ná ndaja caja na ña vaha. Ta xíní ñúhú jánaḥa ndisáhnu ña yóho nu ná ta ná cajún ña xihín ndinuhu inún.⁸ Ta ná caḥún ña vaha cuití va já queá a cúu chicaan ñayivi cuachi jatun. Ta xihín ña yóho cacahan nuu na cō

cúni yohó jáchi a cúu caḥan ihvi ná saḥa ndihi ndó, na cúu cuéntá Jesús.

⁹ Ta jácaḥún ndá na cája chúun xihín xitoho na ña ná caja na tóco ndihi ña sáhndá xitoho na nu ná jáchi xíní ñúhú coo toní ñúhú na xihín ná ta ná a nducú ñéhe ichi na tuhun nuú xitoho na.¹⁰ Ta ná a cája cuíhná na nu ná joo ná cacuu na ndinuhu ñayivi ndaa. Ta xihín ña yóho náha ndá quiahva ndatō ndivaha cúu tuhun Ndióxi, ña caḥan saḥa mé á jácaḥu a mí.

¹¹ Najánaḥa Ndióxi mí ña cúni a caja cuahá ñamaní xihín ñayivi ta ín tiaḥva mé á jácaḥu a tóco ndihi ñayivi.¹² Ta jánaḥa mé á nu yo ña ndítahan jándicoo í tóco ndihi ña núu, ña xíca íní caja í ñuyívi yóho. Jáchi ndítahan nu yo caḥnu í mí ta ná caja í ña ndaa cuití va ta ná candicō caḥnu í ichi cuéntá Ndióxi.¹³ Ta cájii íní nani ndáti tiaḥva í xinu cōo quivi ndicō cōo tucu Jesucristo xihín ndée á. Ta cúu á Ndióxi caḥnu ta jácaḥu a mí.¹⁴ Nandiquiahva Jesucristo mé á quivi a sahá ndihí jáchi cúni a jácaḥu a mí ná a cája ga yo ña núu. Ta cúni a jándoo a tóco ndihi cuachí já ná nduú ñayivi cuéntá mé á ña ná ndihi íní caja í ña vaha.

¹⁵ Ndítahan jánaḥún tóco ndihi ña yóho nuú ñayivi ta jácaḥún na ña ná caja na ña naḥyí í yóho. Ta ndítahan nu mún jánaḥún ñayivi cája cuachi jáchi ín saḥun caḥndún chuun nu ná. Coto a quiahvún ñamaní nuú ñayivi quehe núu na yohó.

Ña ndítahan caja na cúu cuéntá Jesús

3 Xíní ñúhú jándicuhun inún na cúu cuéntá Jesús ña ná coo joho na nu sáhndá na jutixia nu ná. Ta ná coo tiaḥva na caja na ndá ña cacuu nani cúu á ña vaha.² Ta xíní ñúhú caḥún xihín ná ña ná a caḥan núu na sahá inga ñayivi ta ná a cáni táhan na xihín inga na joo víi

caja na xihin ná. Ta ná a ndínehe jícó na mé ná nuú ndihi ñayivi.

³ Jáchí ndítahan ndícuñun iní ña tá cámaní ndíhví íchí cuéntá Jesús já nacaja í cuahá nuú cuachi. Quíhví nasacaja í ta cóo nacaja í ña cúní Ndióxi. Nacandúsa í ña tühún, ña nacachi na jándahvi mí. Ta nasacaja í tá nuú ña núu jáchí nandíavá iní yo caja í ña ta mé cuachi nasahnda chuun nu yo. Tócó ndihi quívi nasacaja í ña núu ta nasacuú ñayivi íhví ini. Nasandají ñayivi mí ta ndaja mí nasandají táhan í viti. ⁴ Andá javí Ndióxi, mé a jácacu mí najánaha nu yo ña táhvi ini a saha yo ta quíhví ini a mí. ⁵ Sahá ña cán queá najácacu a mí. Ta cóo nacaja ña sahá ña vaha nacaja í. Joo najácacu a mí jáchí táhnda ini a saha yo. Najándoo a cuachí ta xihín ña yóho nacaja ínimá yíi Ndióxi ña nandúú ñayivi saá, na xíca íchí saá viti. ⁶ Naxihí Jesucristo saha yo ña ná jácacu a mí ta xihín ña yóho nachutú ndaa ínimá yo xihín ínimá yíi mé á. ⁷ Nacaja Ndióxi ñamaní uun xihín yo ña ná canduu ndaa yó nu mé á sahá ña cán queá ndáti tiahva í cuñun yo coo í xihín mé á andá ama cáa quívi.

⁸ Ta tócó ndihi ña cáhyí í yóho cúu á ña ndaa. Sahá ña cán queá cúní ña ná ndinuhu inún jáñahún ña yóho nuú ñayivi, na cúu cuéntá Jesús ña ná ndíhi ini na caja na ña vaha. Jáchí ña nacahyí í yóho cúu á ña vaha ta cuu chindeé a tócó ndihi ñayivi. ⁹ Joo coto a quíhví nuún nditühún xihín ñayivi cáhan tühun quíhví, ña ndícani sahá chíchi tásáhnun jícó yo. Ta a ndíhvi ndó caní táhan yúhu

ndó xihín ná saha ley Moisés jáchí cóo saha toho ña yóho ta mé a uun va queá caní táhan ndó xihín ná.

¹⁰ Tá íin in na cúu cuéntá Jesús ta tá cúní na caní táhan na xihín java ga na cúu cuéntá Jesús, xíní ñúhú jáñanún na ña ná a cája ga na ña yóho. In á ívi tañu cuítí va cahun xihín na ta tá có cúní na cuni joho na ña cahun xihín ná já queá tavún na ña ná cuñun na. ¹¹ Jáchí sa xíní vahún ña nandeta nuu ña núu xíní túni ná ta sa xíní vaha na ña cája na cuachi.

Sáhdá Pablo chuun nu Tito

¹² Tá ná chindahá í Artemas á Tíquico nuun já queá ndíhi inún cuñun ñuu Nicópolis jáchí cán cája í cuéntá coo í tiempo víxi. ¹³ Xíní ñúhú ndinducún ndaja cuu chindeún Apolos xihín Zenas, mé da tiahva ley. Quiahvún ñaha nu ná já ná a ndímaní ñaha tá ná quee na cuñun na viaje na. ¹⁴ Ta ndítahan nu ndíhi na cúu cuéntá Jesús jácuaha na ndaja caja na ña vaha xihín java ga ñayivi. Ta ndítahan nu ná chindeé na ndá ñayivi nacuu na ndímaní ñaha nu. Tá ná caja na ña yóho já queá a cóo uun va na ñuyíví yóho.

Ndíndayí Pablo Tito

¹⁵ Tócó ndíhi na ndúu xihín í chindahá na Ndióxi coñun ta chindahá nde Ndióxi coo ndíhi na cúu cuéntá Jesús cán jáchí xíní vaha í ña quíhví ini na ndeñe sahá ña cándéé iní Jesús. Ná caja Ndióxi cuahá ñamaní xihín ndíhi ndó. Já ná coo.

Carta nacahyí Pablo nuú Filemón

Chíndahá Pablo Ndióxi coo Filemón

1 Yehe cúu ʋ Pablo ta ndácaan i vecaa yóho saha ña cúu ʋ cuéntá Jesucristo. Yehe xihín Timoteo, ñani í, da cúu cuéntá Jesús cáhyí nde carta yóho nu mún, Filemón. Quíhvi ini nde yohó ta in cúun xihín nde sahá ña cája chúun cuéntá Jesucristo. ²Ta jári cáhyí nde carta yóho nuú ña cúu cuéntá Jesús táca vehún jan xihín nu Apia, ña cúu quiahva í sahá ña cándeé ini ña Jesús. Ta quiahva já cáhyí nde carta yóho nu Arquipo jáchi in cúu da ndóho ini da cája chúun da cuéntá Jesucristo. ³Ndióxi, tátá yo xihín Jesucristo, xitoho í ná caja cuahá ñamanj xihín ndo ta ná caja ña ná coo vaha ini ndó.

Cándeé cáhnu ini Filemón Jesucristo

⁴Tá xíca tahví i nu Ndióxi sahun co ndíndójó i ndiquiahva i ndixahvi nu mé á saha mún. ⁵Jáchi nañehé e tuhun ña cándeé inún Jesucristo, xitoho í ta quíhvi inún mé á xihín ndihi ña cúu cuéntá mé á. ⁶Ta xíca tahví i nu Ndióxi ña ná ndicanún nuú java ñayivi ndá quiahva cándeé inún mé á. Ta xihín ña yóho cuu candaq vaha ini na ndaja náhnu ñamanj cája Ndióxi xihín tóco ndihi mí, ña cándeé ini Jesucristo. ⁷Cáji ini i ñani mí i ta sahan tuhun ndeé ini i jáchi quíhvi inún ña cúu cuéntá Jesús. Ta jári sahan tuhun ndeé ini cuahá ña cúu cuéntá Jesús jáchi quíhvi inún ña.

Xíca Pablo ñamanj nu Filemón saha Onésimo, da naxeen Filemón caja chúun nu dá

⁸Yehe cúu ʋ in apóstol Jesucristo ña cán queá íin sahá i cahnda i chuun nuun cajún ña ndítahan nuun cajún. ⁹Joo co

cája i ña. Ña cája i queá xíca i ñamanj nuun jáchi quíhvi ini i yohó. Xíní ñúhú ndicuhun inún ña cúu ʋ Pablo, da sáhnú, da ndácaan vecaa saha Jesucristo. ¹⁰Ta viti xíca i ñamanj nuun saha Onésimo, da nanduu tátuhun jahyi mí i cuéntá Jesús nani ndácaan i vecaa yóho.

¹¹Jihna ga nasacuu Onésimo da coo chuun nuun joo viti íin chuun da nu ndíví yo. ¹²Ta viti chíndahá i da nuun. Ndiqehé vahún da saha mí i jáchi quíhvi ndivaha ini i da. ¹³Cúni ña ná candoo da yóho xihín i já ná cuu chindeé da yehe nu mún. Jáchi ndácaan i vecaa yóho sahá ña cáhan i tuhun vaha sahá Jesucristo nuú ñayivi. ¹⁴Joo nasacu ini i chíndahá i da nuun jáchi tiahva náa a váha cúu inún xihín i tá ná candoo da yóho xihín i. Jáchi tá ná cajún ñamanj xihín i cúni ña ná cajii inún cajún ña ta co cúni caja ndúsa i xuhun. ¹⁵Cája i cuéntá nacaxoo tóo Onésimo nuun joo viti ndicó coo da ná coo da níi tiempo xuhun. ¹⁶A cája gaún cuéntá ña cúu dá da naxeún. Joo vaha chága viti jáchi cúu da ñani máni yohó cuéntá Jesucristo. Quíhvi ndivaha ini i da joo xíní ñúhú quíhvi ini chágun da jáchi cája chúun da nuun ta cúu da ñanún cuéntá Jesús viti.

¹⁷Ta tá mé a ndaa quíhvi inún yehe já queá ndiquehe vahún da tá quiahva ndiquehe vahún yehe tá ná xinu coo i nu íun jan. ¹⁸Ta tá nacaja da in cuachi nuun á tá yíca da nuun já queá ndacún ña nuú i ta já chahvi i sahá. ¹⁹Yehe cúu ʋ Pablo ta cáhyí i ña yóho xihín ndáha i já ná candaq inún ña sahan i tuhun i nuun ña chahvi i ña. Xíní ñúhú ndicuhun inún ña yícun nuú i jáchi nandihvún íchi cuéntá Jesús sahá tuhun nacahan i xuhun. ²⁰Inga tucu xíca i ñamanj nuun ña ná ndiquehe vahún Onésimo jáchi cúun ñani mí i, da cúu cuéntá Jesús. Tá ná cajún ña yóho sahá ña cándeé inún mé á já queá quiahvún tuhun ndeé ini i.

²¹ Cándaa vaha ini i ña cajún ña xíca i nuun cajún sahá ña cán queá cáhyí i carta yóho nuun ta cándaa ini i ña yaha chága cajún nuú ña xíca i nuun.

²² Inga tucu xíca i ñamani nuun ña ná caja tiahvún in vehe loho nuú coo i. Jáchí sahá ña xíca tãhví ndihi ndó nu Ndióxi ña ná saa i coto nihni i ndohó sahá ña cán queá cája i cuénta caja mé á ñamani xihín i saa i jan.

Ndídayí Pablo Filemón

²³ In da naní Epafra, da ndácaan ve-caa xihín i saha Jesucristo chíndahá

da Ndióxi coún. ²⁴ Chíndahá Marcos xihín Aristarco xihín Demas xihín Lucas Ndióxi coún. Mé na yóho cája chúun na xihín i cuénta Jesucristo.

²⁵ Ná caja Jesucristo, xitoho í cuahá ñamani xihín ndihi ndó, na ndúu jan. Já ná coo.

Hebreos, mé carta cuahan nuú na Israel

Nachindahá Ndióxi Jesucristo ña ná quixi a jáyaha tūhun Ndióxi nu yó

1 Cuahá ndivaha tañu nacahan Ndióxi sanahá xihín tásáñnu jícó yo. Ta cuahá ndivaha nuú nacahan xihín ná tá najáyaha na profeta tūhun cáhan mé á nuú ñayivi. ²Joo tiempo nu ndíhí yóho nachindahá mé á Jesucristo, in tūhún jini já jahyi a ña ná jáyaha tūhun Ndióxi nu yó viti. Ta nacaja Ndióxi ña nacavaha Jesucristo ndijáá ñaha ñuyiví xihín ñaha indiví. Ta najándacoo Ndióxi tóco ndihi ñaha yóho ndáha mé á. ³Ta mé á queá náha ndá quiahva cáñnu cúú Ndióxi jáchi yehe a tá quiahva yehe Ndióxi. Ta tá quiahva cáa Ndióxi quiahva já cáa ri Jesucristo, jahyi a. Ta xihín tūhun cáhan yūhū mé á cómi a cuéntá saha tóco ndihi ñaha jáchi iin ndivaha ndée tūhun mé á. Ta nandaja ví mé a mí nuú ndihi cuachí ta já nasacoo a indiví xoo cuáha Ndióxi, tátá a.

Cáñnu chága Jesucristo a juú ga táto Ndióxi

⁴Ta Jesucristo, mé jahyi Ndióxi naxinu a nanduu a ña cáñnu chága a juú ga táto Ndióxi. Ta nacaja Ndióxi ña ná ñehe táhvi á ña cáñnu chága quiví naní a a juú ga quiví táto mé á. ⁵Jáchi a ñaha cachi Ndióxi xihín ni in tūhún toho táto mé á tá quiahva nacachi a xihín jahyi a já: Jahyi yehe cúú yóhó, ta viti cáchi i ña nanduu u tátún, cáchi a. Ta ni coo nacachi Ndióxi xihín ni in tūhún toho táto á tá quiahva nacachi a xihín jahyi a já: Yehe cacuu u tátún, ta yóhó cacuún in tūhún jini já jahyi yehe, cáchi a.

⁶Joo tá jalóho cúni chindahá Ndióxi Jesucristo, jahyi a ñuyiví yóho já nacachi a já:

Ndítahan nu tóco ndihi táto mí i caja cáñnu na jahyi i, nacachi a.

⁷Já nacachi Ndióxi já saha táto mé á:

Tá quiahva cama chá xícó táchi quiahva já cama chá cuahan táto mí i.

Ta yehe na tá quiahva yehe ñuhú cáyi ita, já nacachi Ndióxi.

⁸Joo tá nacahan Ndióxi sahá jahyi a já nacachi a já:

Yóhó cúun Ndióxi ta cacomún cuéntá sahá ñayivi anda ama cáa quiví, ta cáñdún chuun xihín ña ndaa.

⁹Ta a juú quiahva cátoón ña vaha ta nandajún ña núu.

Sahá ña cán queá nacaxi i yohó jáchi yehe cúú u Ndióxi ta cúú u tátún.

Ta najácutú ndaa i yohó xihín ña cájii inún já ná cajii chága inún a juú ga na xíca xuhun, nacachi a.

¹⁰Ta jári já nacachi a já xihín jahyi a:

Nacavahún tóco ndihi ñaha tá nacava sahá saha ñuyiví ta cúun xitoho nuú ña cán.

Ta xihín ndáñun nacavahún indiví.

¹¹Ta vaxi quiví tá ndihi saha tóco ndihi ña yóho joo mún coo tá coún anda ama cáa quiví.

Ta tóco ndihi ña jan cayatá ña tá quiahva cayatá jáñma ndíxi na.

¹²Tá quiahva sáñnu ñayivi jáñma quiahva já chicanún ñuyiví xihín indiví.

Ta tá quiahva ndijama ñayivi jáñma ndíxi na quiahva já ndijama ña jan cajún.

Joo mún a ndijama tohún jáchi coo tá coún anda ama cáa quiví,

ta a ndijama tohún ta a ndíhi toho sañun, nacachi Ndióxi xihín Jesucristo.

¹³A ñaha cachi Ndióxi xihín ni in tūhún toho táto mé á tá quiahva nacachi a xihín jahyi a já:

Naha quíi cacuún xoo cuáha i yóho,

janda quiahva ná cahnu i nu tóco ndihi na co cúní yohó ta janda ná chinduu u na sahun jan, nacachi Ndióxi xihín Jesucristo.

¹⁴ Jáchí tóco ndihi táto Ndióxi cúú ná na tácu ta íin ínima ná joo coó toho yiquí cuñu na. Cája chúun na cuéntá Ndióxi ta mé á chindahá a na ñuyívi ña ná chindeé na ñayivi, na nacaxi Ndióxi cacu ndaa ínima.

Naquixi Jesucristo jácacu a mí

2 Sahá ña cán queá ndítahan nu yó taa joho í ña ndaa, ña naxini joho í já ná a cáxoo í íchi cuéntá Ndióxi. ² Nacahan táto Ndióxi tuhun nasahan mé á nu ná ta cúú á ña ndaa joo coó naxeen ñayivi cacu vaha na ña. Sahá ña cán queá najándoho Ndióxi ini na tá quiahva ndítahan ndoho ini na sahá cuachi nacaja na. ³ Joo mí, ndaja caja í cacu ndaa ínima yo tá ta co taa joho í tuhun cahán sahá Jesús, mé a jácacu mí. Ta ña yóho cúú á ña cáhnu ndivaha jáchi jihna ñúhú ga mé Jesucristo, xitoho í nacaxi tuhun a ña yóho nuú ñayivi. Ta na nataa joho nu cáhan mé á, na cán sahan na tuhun na nu yo ña cúú á ña ndaa. ⁴ Ta náha Ndióxi ña cúú á ña ndaa jáchi cája mé á cuahá ndivaha ña náhnu xihín ña xítúhún ndivaha. Ta nachindahá Ndióxi ínima yii mé á nuú na cúú cuéntá Jesús ña ná caja na ña xítúhún tá quiahva nasacu ini mé á caja na.

Nandu Jesucristo in ñayivi

⁵ Coó nasahan toho Ndióxi ñamaní nu táto mé á ña ná cacomí na cuéntá sahá ñuyívi saá, ña vaxi chága chí nuu. ⁶ Jáchí já cáhí tuhun Ndióxi já: Táta Ndióxi, coó saha toho ñayivi ta coó ña náha cúú ná. Joo mé ndó ñúhu ini ndó saha ná ta ndíhi ini ndó saha ná.

⁷ Tá nacavaha ndó ñayivi nandaja ndó na nandu na ña náhnu ndivaha.

Ta táto mé ndó cuití va cúú ná nasayojó loho nu ná tixi chá tiempo.

Ta tóco ndihi ña nacavaha ndó nandiquiahva ndó ña ndahá ñayivi, ⁸ já ná cacomí na cuéntá sahá, cáhí tuhun Ndióxi.

Ta mé a ndaa ni in ñaha coó nacandoo xoo jáchi nasacu ini Ndióxi cacomí ñayivi cuéntá saha tóco ndihi ñaha joo cámani yii va xinu coo mé quivi cán. ⁹ Vatí cámani yaha ña yóho joo xini yo ña nandoho Jesús. Tixi chá tiempo nacaja Ndióxi ña ná nuu ndaha chága mé á nu táto Ndióxi jáchi sahá ña quihvi ini Ndióxi mí sahá ña cán queá nasacu ini a ña ná quivi Jesucristo sahá ndihi ñayivi. Ta viti nandindita mé á nandu a ña cáhnu ndivaha sahá ña nandoho a tá naxihí a ndica crúxu.

¹⁰ Tóco ndihi ñaha ña nacavaha Ndióxi cúú á cuéntá mé á sahá ña nacachi mé á ña ná coo a. Ta nasacu ini a ña ná ndoho ini Jesucristo quivi a saha yo. Ta xihín ña yóho najaxinu coo a nuú chuun natahnda nu á ña ná jácacu a mí. Jáchí ña cúní Ndióxi cúú ña ná canduu ndihí, na cúú cuéntá mé á nu íin a. ¹¹ Nandaja víi Jesucristo mí ta sahá ña yóho cúú yó jahyi Ndióxi. Ta viti Ndióxi cúú tátá ndihí ta cúú á tátá Jesucristo. Ña cán queá co cáchan toho nuú Jesucristo cahán ñani a mí ta cahán quiahva mí viti. ¹² Jáchí nacahyi ini tuhun Ndióxi ña nacahan Jesús xihín tátá a. Ta nacachi a já:

Ndicani i nuú ñani i saha mé ndó.

Ta nu ndítútú na cata i caja cáhnu i ndohó, cáhí Jesús.

¹³ Ta cáhí tucu a já:

Yehe cándéé ini i Ndióxi, tátá i.

Ta cáhí tucu a já xihín Ndióxi:

Yóho íin i xihín ndihi jahyi ndó, na nasahan mé ndó nuú i cacomí i cuéntá saha, cáhí Jesús.

¹⁴ Sahá ña íin yiquí cuñu ñayivi, na cúú jahyi Ndióxi sahá ña cán queá nan-

duu Jesús in ñayivi ta ñasahijn yiquí cuñu a tátuhun mí. Ta tá ñaxihí yiquí cuñu a já ñacandee a ñasahnu a nuú tiñáhá sacuahá, rí cája ña xihí ñayivi. ¹⁵ Ta xihín ña yóho najácacu a tóco ndihi ña ñasayihví quivi jáchí ní tiempo ñasanduu na ndáha tiñáhá sacuahá sahá ña yíhvi ña. ¹⁶ Jáchí mé a ndaa coó ña quixi Jesucristo ña ná chindee a ña cúu táto Ndióxi. Ña ña quixi mé á caja queá chindee a ñayivi, ña candeé ini Ndióxi tá quiahva ñacandee ini Abraham Ndióxi. ¹⁷ Ña cán queá ñaxini ñúhú Jesús nduu a in ñayivi cácu ñuyívi yóho tátuhun mí. Ta xihín ña ñandoho a ñaxinu a ñanduu a in jutú sacuahá nu Ndióxi indiví. Ta ñaxihí a ndíca crúxu sahá cuachí jáchí cája ndaa mé á tóco ndihi ñaha ta táhvi ini a sahá yo. Ta xihín ña yóho ñacaja cáhnu ini a sahá cuachí. ¹⁸ Ta sahá ña ñandoho ini mé á ta sahá ña ñaxito ndojó rí quini mé á sahá ña cán queá xini a ndá quiahva ndóho ini. Ña cán queá cuu chindee a ndaja táhan ña ndóho ini, ña xito ndojó tiñáhá sacuahá.

Cáhnu chága Jesús a juú ga Moisés

3 Candehé ndo, ñani i, ña cúu cuéntá Jesús. Mé ndó cúu ndó ña ñacaxi Ndióxi cacomí a cuéntá sahá. Candehé ndó Jesucristo, mé á cúu á tátuhun apóstol, ña ñachindahá Ndióxi cacuu jutú sacuahá sahá yo nu Ndióxi sahá ña candeé ini mé á. ² Ta xihín ndinuhu ini a ñacaja chúun a cuéntá Ndióxi, mé a ñacaxi ñahá. Jáchí tá quiahva ñacaja Moisés tóco ndihi ña cúní Ndióxi tañu ña cúu cuéntá mé á quiahva já ñacaja Jesús tóco ndihi ña cúní Ndióxi, tátá a. ³ Joo ndítahan ndicáhnu chága Jesús a juú ga Moisés jáchí cáhnu chága Jesús a juú ga Moisés. Cúu á tátuhun tá cávaha in dātā in vehe ta ndítahan ndicáhnu chága mé dá a juú ga vehe da. ⁴ Ndúsa coo in dā cávaha vehe já cuu cavaha ña joo tóco ndihi ñaha íin a jáchí ñacavaha

Ndióxi ña. ⁵ Ña cán queá ñacaja chúun Moisés cuéntá Ndióxi xihín ndinuhu ini da tañu ñayivi mé á. Ta chuun ñacaja da queá cáxi tuhun jíni da xihín ná ña cúní Ndióxi cahan xihín ná chága chí nuu. ⁶ Joo jíin va chuun ñacaja Jesús, mé á cúu in túhún jíni já jahyi Ndióxi jáchí cómí a cuéntá sahá ña cúu cuéntá mé á xihín ndinuhu ini a. Cuéntá mé á cúu mí tá ndacú coo ínimā yó ta tá ná candeé ini mé á. Ta xíní ñúhú cajii ini candatí anda quixi mé á.

Cúní Ndióxi ña ná ndihvi ña cúu cuéntá mé á nuú ndiquehe ndée ná

⁷ Candehé ndó ndá quiahva cáchí ínimā yii Ndióxi ini tuhun mé á tá cáchí a já:

Tá ná cuni johó ndó ña cáhan Ndióxi xihín ndó quiví víti,

⁸ a cája sáá ini ndó xihín á tá quiahva ñacaja ña Israel tá ñaxica nuu na yucú íchí cán.

Jáchí ñandiñehe yúhu ná nu Ndióxi ta ihvi ndivaha nasacuu ini na xihín Ndióxi.

⁹ Ta já cáchí Ndióxi já:

“Mé yucú íchí ñan ñaxito ndojó tásáhnu jíco ndó yehe,

vatí ñaxini na ña náhnu ndivaha ñacaja i tixi ivi jíco cuia.

¹⁰ Sahá ña cán queá ñaxojo ini i xihín tóco ndihi ña cán,

ta ñacachi i sahá ná ña cúu ná ña cáhvi ivi, johó ini,

ta sáá ini na caca na íchí cuéntá mí i.

¹¹ Sahá ña cán queá ñaxojo ini i xihín ná, ta ñasahan i tuhun i ña a quiahva toho i ñamaní nu ná

ndihvi na nuú ndiquehe ndée ña xihín i”, ñacachi Ndióxi xihín ña Israel.

¹² Ña cán queá cuéntá vaha coo ndó, ñani i já ná a cáñehe ndó ínimā quini ña jácaxoo ndó nu Ndióxi, ña tácu, sahá ña coo cúní ndó candúsa ndó mé á. ¹³ Ña ndítahan caja ndó queá quiahva tuhun ndée

ini táhan ndó nini quiví. Ta a quiahva ndó ñamaní yaha quiví víti tá núná nu ndó caja ndó ña cúní Ndióxi. Jáchí co cúní a ña ná jándahvi ña núu ñuyiví yóho ndohó ta já ná ndisáá ini ndó nu Ndióxi. ¹⁴ Jáchí tá ná candeeé ndusa ini mé á janda quiahva ná xinu quiví nu ndíhí cuú tá quiahva ñacaja í janda saha já queá cúní cachi a ña in nanduú xihín Jesucristo.

¹⁵ Jáchí quiahva já cáchí tuhun Ndióxi:

Tá xíní johó ndó ña cáhan Ndióxi xihín ndo quiví víti,
a cája saá ini ndó xihín á tá quiahva ñacaja na Israel tá ñandiñehe yúhu ná nu Ndióxi yucú íchí cán, cáchí a.

¹⁶ Jáchí sa xíní ndó ndá na ñandiñehe yúhu nu Ndióxi tá ñaxini johó na ña ñasahnda mé á nu ná. Na cán cuú na tóco ndihi na ñasandaca Moisés tá ñaqueta na nación Egipto. ¹⁷ Ta xihín mé na cán ñaxojo ini Ndióxi tíxi iví jíco cuia jáchí ñacaja na cuachi nu mé á ta sahá ña cán queá ñacuyu na ñaxihí na yucú íchí cán.

¹⁸ Ta sahá ña coó ñaxeen na caja na ña cúní Ndióxi sahá ña cán queá ñasahan Ndióxi tuhun a ña a quiahva toho a ñamaní nu ná canduu na nuú ndiquehe ndée na xihín á. ¹⁹ Ta mé a ndaa cándaá ini ña coó ñacuu ndihvi na nuú ñasacu ini Ndióxi coo na sahá ña co ñaxeen na candúsa na mé á.

4 Sahá ña cán queá viti sahan yíi va Ndióxi ñamaní nu yó yaha í nuú ñasacu ini mé á ndiquehe ndée yo xihín á. Joo xíní ñúhú cuéntá vaha coo ndó jáchí tiahva náá a xínu coo java ndó ndihvi ndó cán. ² Jáchí tá quiahva ñaxini johó na Israel tuhun Ndióxi quiahva já ñaxini johó í tuhun mé á, ña cáchí a cúní jácaacu Ndióxi ñayivi. Joo coó ñacandúsa na cán ña sahá ña cán queá coo chuun a nu ná. ³ Joo mí cuú yó na candeeé ini Ndióxi ta sahá ña yóho tandaa quiví xinu

coo í ndihvi nuú ndiquehe ndée yó xihín á. Ta já cáchí Ndióxi já sahá ña yóho:

Ñaxojo ini í xihín na co cándúsa yehe, sahá ña cán queá ñasahan í tuhun í ña ná a ndihvi toho na nuú ñasacu ini í ndiquehe ndée ná xihín í, cáchí a.

Ñacachi Ndióxi ña yóho vatí sa ñacaja tiahva mé á nuú ndihvi na ndiquehe ndée na anda tá ñacava sahá saha ñuyiví.

⁴ Ndaá ini tuhun Ndióxi ña ñacaja mé á quiví usa. Já cáchí a já:

Quiví usa ñandiquehe ndée Ndióxi nuú chuun ñacaja tá ñacavaha tóco ndihi ñaha, cáchí tuhun Ndióxi.

⁵ Ta já cáchí tucu a já sahá na co cándúsa Ndióxi:

A ndihvi toho na canduu na nuú ndiquehe ndée ná xihín í, ñacachi a.

⁶ Ta coó ñandihvi toho na ñacahan Ndióxi xihín nu cuítí cán jáchí coo ñaxeen na candúsa na mé á. Joo núná yíi va nuú java ñayivi ndihvi na ndiquehe ndée ná xihín mé á. ⁷ Jáchí ñasacu Ndióxi inga quiví ta cuú á quiví víti ta já cuu ndihvi ñayivi ndiquehe ndée na xihín mé á. Sa-nahá ndivaha ñacahan Ndióxi xihín rey David sahá ña yóho ta ñacahví da ña ta já cáchí a já:

Tá xíní johó ndó ña cáhan Ndióxi xihín ndó quiví víti a cája saá ini ndó xihín á, cáchí tuhun Ndióxi.

⁸ Ta sa xíní yo ña coó ñajándihvi Josué ñayivi nu ndíquehe ndée na xihín Ndióxi jáchí ñacahan Ndióxi sahá inga quiví vaxi chága chínuu. ⁹ Sahá ña cán queá sa xíní yo ña cámaní xinu coo quiví ndiquehe ndée na cuú cuéntá mé á tá quiahva ñandiquehe ndée mé á quiví usa. ¹⁰ Jáchí ndá na ná ndihvi ndiquehe ndée nu íin mé á cán já queá ndíquehe ndée ná nuú chuun ñacaja na tá quiahva ñandiquehe ndée Ndióxi nuú chuun ñacaja mé á. ¹¹ Sahá ña cán queá ndítahan ndihi ini ndihvi nuú ndiquehe ndée yo cán. Ta ná a cája í tá quiahva ñacaja na

Israel cán tá coó naxeen na candúsa na nuú nacahan mé á xihin ná.

¹² Íin cuaha ndée tuhun Ndióxi ta cúu á tátuhun ña tácu. Ta íin chága ndée tuhun Ndióxi a juú ga in yúchu ña ivi yúhu. Ta tá quiahva quíhvi yúchu ña ivi yúhu tá sáhdá yiquí cuñu quiahva já quíhvi tuhun Ndióxi janda maá ini íni-ma ñayivi xihin xíní túní ná ta já xínu a ini na. Ta náha ndá quiahva cáhvi ini na.

¹³ Jáchí xíní Ndióxi tóco ndihi ñaha ta a cúu chijehé yo ña cáhvi iní jáchí sándehe mé á tóco ndihi ñaha nacavaña mé á. Ta vaxi quívi nahma yó nu mé á tóco ndihi ña nacaja í.

Jesús cúu á jutú sacuaña nuú ndihí indiví

¹⁴ Mé Jesús cúu á jutú sacuaña nuú ndihí sahá ña cán queá co ndítahan jándacoo í ña cándée iní Jesús, mé a cúu in túhún jiní já jahyi Ndióxi. Ta nandihvi a indiví nu íin Ndióxi. ¹⁵ Ta cándáhví ini Jesús mí jáchí cúu á jutú sacuaña nu yo ta cándañ ini a ña cúu yó ñayivi vitá ndivaha ini. Jáchí tá naxica nuu a ñuyíví yóho naxito ndojó tiñáhá sacuaña mé á xihin tá nuú ñaha tá quiahva cája rí xihin mí joo ni in túhún cuachi coo nacaja mé á. ¹⁶ Ña cán queá a cáyhívi toho í cayatí nu íin coo Ndióxi, mé a quíhvi ini a mí jáchí táhvi ini a saha yo ta chindeé a mí tá ná caca í ñamaní nu á.

5 Tóco ndihi da cúu jutú sacuaña chága nu ndíhi jutú cúu dá da sá caxi na tañu ñayivi Israel já ná cahan cuachí da sahá ñayivi nu Ndióxi. Ta jári jóco da ñaha nu Ndióxi ta sáhní da quítí nu náa sahá cuachi na. ² Ta sahá ña cúu dá da vitá ini, da ñuyíví yóho sahá ña cán queá cuu candáhví ini da ñayivi, na co xíní ña sáhdá Ndióxi. Ta cuu candáhví ini da na cája cuachi. ³ Ta sahá ña vitá ini da sahá ña cán queá ndítahan cahní da quítí jóco da rí nu Ndióxi sahá cuachi mé dá xihín sahá cuachi ñayivi viti.

⁴ Ta ni in da cán a cúu chinúu da mé dá cacuu da jutú sacuaña chága nu ndíhi jutú. Jáchí xíní ñúhú cacuu da da nacana Ndióxi caja chúun cuéntá mé á tá quiahva nacaja Ndióxi sanahá tá nacana mé á Aaron ña ná caja chúun da cuéntá mé á. ⁵ Quiahva já nayaha xihín Jesucristo jáchí coo naxinúu a mé á ña ná nduu a jutú sacuaña. Ndióxi queá naxinúu ñahá tá nandaja cáhnu a Jesús. Ta já nacachi Ndióxi já xihín á:

Jahyi yehé cúu yóhó,
ta viti cáhí í ña nanduu u tátún, cáhí a.

⁶ Ta inga nu cahan tuhun Ndióxi já cáhí a já:

Anda ama cáa quívi cacuún jutú,
ta cajún tá quiahva nacaja in jutú, da nasananí Melquisedec sanahá, cáhí a.

⁷ Nani nasahjin Jesucristo ñuyíví yóho a juú quiahva naxica táhvi a nu Ndióxi. Ta java tañu nasacu a ta java tañu nacayuhú a nu Ndióxi, mé a cúu chindeé ñahá ña ná a quíví toho a. Ta sahá ña nasacaja Jesús tóco ndihi ña sáhdá Ndióxi, tátá a sahá ña cán queá naxini johó Ndióxi nu cahan mé á. ⁸ Ta vatí cúu Jesucristo in túhún jiní já jahyi Ndióxi joo xihín ña nandoho ini a ñuyíví yóho nacatiahva coo johó a nu cahan Ndióxi, tátá a xihín á. ⁹ Ta xihín ña yóho najáxinu coo mé á nacaja tóco ndihi ña natahnda nu á caja. Janda jáví nacuu jácacu a mí ña ná coo í xihín mé á anda ama cáa quívi tá ná caja í ña sáhdá mé á. ¹⁰ Ta nandicojo a chuun nacaja Ndióxi ña ná nduu a jutú sacuaña tátuhun mé jutú, da nasananí Melquisedec.

Cuéntá coo ndó ná a jándacoo ndó ña cándée ini ndó Jesús

¹¹ Íin cuahá ndivaha ñaha cúní ndicani í nu ndo sahá ña yóho joo yáncá ndivaha ndicani í ña nu ndo jáchí coo cúní ndo taa johó ndó nu cahan í. ¹² Anda jihna

nandihvi ndó íchi cuéntá Jesús ta viti sa ndítahan nu ndó jánaḥa ndó tūhun Ndióxi nuú ñayivi. Joo co cája ndó já jáchi nacavitá ndo ta tucu tucu jácuaha ndó ña co íhvi toho. Ta viti cúu á tá-tūhun co ndeé ini ndó cuxu ndó ña xíxi ñayivi náhnu joo ña cája ndó queá xíhi yíi va ndó leche tátūhun na valí va. ¹³ Ta tá quiahva xíhi na valí leche quiahva já cája ri na co tiáhva ndícuni ndíá cúu ña vaha ta ndíá cúu ña núu. ¹⁴ Joo ñayivi, na cándaḥa vaha ini tūhun Ndióxi cúu ná tátūhun ñayivi náhnu, na tácu ini, na xíxi cuúu va jáchi sá tiáhva na ndícuni na ndíá cúu ña vaha ta ndíá cúu ña núu.

6 Sahá ña cán queá ña ndítahan caja í queá ndindacú chága yo xihín ñaha Ndióxi janda quiahva ná xinu coo í cacuú ñayivi tácu ini xihín ñaha Ndióxi. Co ndítahan jácuaha tucú ña najácuaḥa í tá jacá nandihvi íchi cuéntá Jesús jáchi ndítahan catiahva í ña jan. Ndítahan cándaḥa iní ña cacu ndaa ínima yo sahá ña cándee iní Jesucristo cuití va ta co cúu á sahá ña cája í ña vaha. ² Ta sa cándaḥa iní ña ndítahan candúta na cúu cuéntá Jesús. Ta sa cándaḥa iní ndaja cája í chinúu ndáḥa yó jiní ñayivi tá xíca tahví yó nu Ndióxi saḥa ná. Ta sa cándaḥa iní ña vaxi quivi nditacu tucu tóco ndihi ndii ña ná caja víi Ndióxi saḥa ná. ³ Sahá ña cán queá cáchí í xihín ndó: Coho ndindacú chága yó xihín ñaha Ndióxi, tá ná quiahva Ndióxi ñamaní nu yo.

⁴ Ta a cuú ga ndicó coo ñayivi nu Ndióxi tá sa najándacoo na ña nasandeeé ini na mé á. Jáchi sa najándiyehē Ndióxi ínima ná ña ná candaa ini na saḥa mé á ta sa xíni na ndá quiahva íin ñaha Ndióxi. Ta janda ínima yíi Ndióxi sa nandacaan ínima ná. ⁵ Ta sa nacandaḥa ini na tūhun vaha cáhan saḥa Jesucristo ta sa nacandaḥa ini na ndá quiahva náhnu caja Ndióxi chága chí nuu. ⁶ Joo tá ná jándacoo na jan ña cándeeé ini na Ndióxi já queá a cuú ga ndicó coo na nu mé á jáchi

xihín ña cája na cúu á tátūhun cata caa tucu na Jesucristo, jahyi Ndióxi ndica crúxu ta já sácū ndaa na mé á nuú ñayivi. ⁷ Jáchi sa xíni ndo ndaja íin ñundáhyi nu cúun vaha javi ta ndíndáhyi a. Ta tá ná cana cuahá ñaha nuú naxutu ñayivi cán já queá cúní cachi a ña cája Ndióxi ñamaní xihín ñundáhyi cán. ⁸ Joo tá ná nana tohíñú xihín tochiḥmá nu núhu cán já queá coo saḥa toho a ta ña yóho cúní cachi a ña co cája toho Ndióxi ñamaní xihín á ta vaxi quivi cayi a caja Ndióxi.

Vaxi quivi coo í xihín Ndióxi tá co jándacoo í íchi cuéntá mé á

⁹ Candehé ndó, ñani maní í, na cúu cuéntá Jesús. Vatí cáhan nde ña yóho xihín ndo joo cándeeé ini nde ndohó ña cája tá cája ndó ña vaha ña ndítahan caja na cándeeé ini Jesús. ¹⁰ Ta xíni nde ña cája Ndióxi ña ndaa cuití va ta a ndíndójó toho mé á sahá ña vaha nacaja ndó tá nachindeé ndó na cúu cuéntá Jesús jáchi xihín ña yóho náḥa ña quíhvi ini ndusa ndó mé á. Ta mé a ndaa janda viti chindeé ndó na cán. ¹¹ Ta a juú quiahva cúní nde ña ná ndihi ini in in ndó chindeé ndo na cúu cuéntá Jesús anda quivi nu ndíhí. Ta xihín ña yóho vaxi quivi tá quiahva Ndióxi nu ndo tóco ndihi ña ndáti ndó quiahva mé á nu ndo. ¹² Co cúní nde ña ná cajúsá ndo caca ndó íchi cuéntá Jesús. Ña cúní nde queá ná ndihi ini ndó caja ndó tá quiahva cája na cándeeé ini Ndióxi, na coo najándacoo ña cándeeé ini na mé á ta xihín ña yóho ñehē táhvi ná ña nasahan Ndióxi tūhun a quiahva nu ná.

¹³ Tá nasahan Ndióxi tūhun a nu Abraham sanahá já natavá a quivi mé á tá-tūhun testigo jáchi coo inga ga ña cáhnu chága a juú ga mé á. ¹⁴ Ta tá nasahan mé á tūhun a nu dá já nacachi a já xihín dá: “Mé a ndaa caja cuahá í ñamaní xuhun ta caja í ña ná ndicuaḥá ndivaha na quixi chichún.” Já nacachi Ndióxi xihín Abra-

ham tá nasahan tũhun a nu dá. ¹⁵ Ta coó nandĩhi ini Abraham nani nasandati da jáxĩnu coo Ndióxi tũhun a ta chí nan̄he dá ña nasahan Ndióxi tũhun a quiahva nu dá. ¹⁶ Tá sáhan ñayivi tũhun na nuú inga ñayivi já tává na quiví in na cáhnu chága a juú ga mé ná ña ná cacuu na testigo. Jáchi cája ndúsa in testigo xihĩn ná jáxĩnu coo na ña nasahan na tũhun na caja na. ¹⁷ Sahá ña cán queá natavá Ndióxi quiví mé á jáchi cúnĩ a jánaha cáxĩ a nuú ñayivi ña a ndĩjama toho a tũhun nasahan nu ná ta ndúsa jáxĩnu coo a tũhun a nuú na ñehe táhvi ndiquehe a. ¹⁸ Ta cándaq iní ña nasahan Ndióxi tũhun a nu yó ta natavá a quiví á cacuu a testigo ta xihĩn ndívi ña yóho sa xínĩ ví ña a cuú ndijama Ndióxi ta ni a cuú çahan mé á ña tũhún. Ta xihĩn ña yóho sáhan mé á tũhun ndeé iní jáchi cándeé iní mé á ta sa nandiquiahva í mí ndáha mé á ña ná jáçacu a mí. ¹⁹ Sahá ña cán queá cátivi tuun í xihĩn Ndióxi ta cándeé iní ña quiahva mé á nu yo ña sáhan tũhun a quiahva nu yo. Ta sahá ña cándeé cáhnu iní mé á sahá ña cán queá co yĩhvi toho í cayatí nu mé á jáchi sa nandĩhvi Jesús nuú yii ndivaha indiví. ²⁰ Ta cúnĩ Jesús chindeé a mí ña ná xĩnu coo í nu íin a cán sahá ña cán queá nandĩhvi jihna ñũhú ga cán a juú ga mí. Ta cuu caja Jesús ña yóho jáchi nanduu a jutũ sacuaaha nu Ndióxi ta anda ama cáa quiví cája mé á chuun yóho tá quiahva nacaja da naní Melquisedec sanahá ndivaha.

Chuun nacaja Melquisedec sanahá

7 Mé Melquisedec yóho nasacuu da rey nuú ñayivi ñuu Salem ta nasacuu da jutũ nu Ndióxi, mé á cuú ña cáhnu chága a juú ga inga ga. In taũ ta nandicó coo Abraham nasahan da nacani táhan da xihĩn java rey ta najándihĩ da sahá na cán já naqueta Melquisedec íchĩ nuú vaxi Abraham ta já nacaja yii

dá Abraham. ² Ta mé Abraham nandaja da uxu táhndá tóco ndihĩ ña nacandaa da ndáha java rey tá naquee vaha da xihĩn na cán. Ta já nasahan da in táhndá nuú Melquisedec. Ta quiví Melquisedec yóho cúnĩ cachi a rey, da cája ña ndaa. Ta sahá ña cómĩ da cuéntá sahá ñuu Salem, ña cúnĩ cachi a nuú íin vaha ini ñayivi sahá ña cán queá cuú dá rey, da cája ña ná coo vaha ini ñayivi. ³ Ta ni in ñayivi co xínĩ na saha tátá náná mé Melquisedec yóho ta co ndáa nuú tutu quiví tásáhnu jícó da. Ta co xínĩ na ndá taũ nacacu da ta ni co xínĩ na ndá taũ naxihĩ da. Joo ña xínĩ na queá cuú dá jutũ anda ama cáa quiví tá quiahva cuú Jesucristo jutũ anda ama cáa quiví, mé a cuú in tũhún jini já jahyi Ndióxi.

⁴ Ta viti cuu candehé ndó ndaja cáhnu nasacuu Melquisedec jáchi janda mé Abraham, da nasacuu tásáhnu jícó yo nasahan da nuú Melquisedec in táhndá nuú uxu táhndá ñaha ña nacandaa da ndáha rey, da naquee vaha da xihĩn cán. ⁵ Ta sa xínĩ ndo ña cáchĩ ley Moisés ña íin saha nuú jutũ, na naquixi chĩchi Leví ndiquehe na in táhndá nuú uxu táhndá ña cómĩ na Israel. Jáchi mé jutũ cán cája chúun na nu Ndióxi cuéntá táhan na na Israel vatí in cuú tóco ndihĩ na sahá ña naquixi ndihĩ na chĩchi Abraham. ⁶ Vatí coo naquixi Melquisedec yóho chĩchi Leví joo naqueehe tá naqueehe da in táhndá nuú uxu táhndá ñaha nu Abraham, da nasahan Ndióxi tũhun a nuu ña caja cuahá ñamanĩ xihĩn. Tá nacaja yii Melquisedec Abraham ⁷ náha ña mé a ndaa cáhnu chága da cája yii ñayivi a juú ga na nacayii cán. Ta ni in na a cuú cachi na ña co cuú ña yóho ña ndaa. ⁸ Ta sa xínĩ yo ña cáhnu chága Melquisedec a juú ga jutũ, na naquixi chĩchi Leví, na quehe in táhndá nuú uxu ñaha jáchi cuú ná ñayivi, na ndíhi saha. Joo çahan tũhun Ndióxi sahá Melquisedec tátũhun tácu yii va da. ⁹ Ta

náha ña cáhnu chága Melquisedec a jutú ga Leví, da cúu tásáhnu jícó tóco ndihi jutú, na quéhe in táhndá nuú uxu a cán. Jáchí cúu á tátuhun nachahvi Leví in táhndá nuú uxu a tá nachahvi Abraham ña nu Melquisedec. ¹⁰ Jáchí tá naquehe Melquisedec in táhndá nuú uxu ñaha nu Abraham, cúu á tátuhun nasañehe Abraham tóco ndihi na vaxi chichi da ini yiquí cuñu da jáchí cámaní yíí cacu na mé tiempo já.

¹¹ Ta tóco ndihi jutú, na naquixi chichi Aarón, naquixi na chichi Leví viti. Ta vatí nacaja na chuun Ndióxi ña jáyaha na ley Moisés nuú ñayivi joo a cuú nduu ndaa ñayivi nu Ndióxi xihín mé ley. Sahá ña cán queá nachindahá Ndióxi Jesucristo ñuyívi yóho já ná cacuu a inga jutú, ña ná caja tá quiahva nacaja Melquisedec sanahá. Ta coó nacaja mé á tá quiahva nacaja Aarón, da nasacuu tásáhnu jícó jutú cán. ¹² Ta tá nachindahá Ndióxi in jutú saá xíní ñúhú a ndijama ri a ley va. ¹³ Ta mé jutú saá cúu Jesucristo, xitoho í, mé a cáhan tuhun Ndióxi saha. Ta coó naquixi Jesucristo chichi Leví ta ni coó naquixi a chichi Aarón. Jíin va chichi naquixi a ta ni in da ta naquixi chichi cán a ñaha cacuu da jutú. ¹⁴ Joo cándaq vaha ini ñayivi ña naquixi Jesucristo chichi Judá ta coó cúu á chichi nu sá cana jutú ta ni coó nacahan Moisés sahá na quíxi chichi Judá tá nacahan da sahá na cacuu jutú.

¹⁵ Ta cándaq vaha chága ini ña yóho jáchí sa xíní yo ña mé jutú saá ña cúu Jesucristo nandiquehe a chuun tátuhun nacaja Melquisedec sanahá. ¹⁶ Ta coó nanduu a jutú sahá ña nacacu a chichi Leví nu sá cacu jutú. Joo nanduu a jutú sahá ña cúu cája tóco ndihi ñaha ta sahá ña tácu a anda ama cáa quivi. ¹⁷ Jáchí tá cáhan Ndióxi saha Jesucristo já cáhí a já:

Yóho cúun jutú anda ama cáa quivi,

tátuhun mé jutú, da nasananí Melquisedec jáchí cájún chuun tá quiahva nacaja mé dá, cáhí tuhun Ndióxi.

¹⁸ Sahá ña cán queá nacandoo xóo ley Moisés jáchí coó chuun a ta a cuú chindeé a ñayivi. ¹⁹ Ta ni coó nacuu caja mé ley Moisés ña ná nduu ndaa ñayivi nu Ndióxi. Joo viti cájii ini jáchí xihín ña nacaja Jesucristo já cuu nduu ndaa yo nu Ndióxi ta já cuu cayatí nu mé á.

²⁰ Ta tá nacaja Ndióxi ña nduuu Jesucristo jutú já nasahan tuhun a ta nasacu a mé á cúu á testigo sahá. ²¹ Joo tá nanduu na naquixi chichi Leví cán jutú coó nasahan Ndióxi tuhun a saha ná tá quiahva nacaja xihín Jesucristo tá nanduu a jutú. Ta já nacachi Ndióxi ini tuhun mé á:

Yehe cúu Ndióxi ta nasahan i tuhun i nu yóho ta a ndijama toho i tuhun cáhan i:

“Nachinúu i yohó cacuún jutú anda ama cáa quivi.

Ta cajún chuun tá quiahva nacaja Melquisedec sanahá”, cáhí Ndióxi.

²² Sahá ña nandicojo Jesucristo chuun nasahan Ndióxi nu á sahá ña cán queá cándéé ini ña jáxinu coo Ndióxi tuhun nasahan nu yo. Ta vaha chága ña yóho a jutú ga ley Moisés. ²³ Ta ndaja coo nasanduu cuahá jutú, na naquixi chichi Leví cán jáchí naxihí ndihi na ta nacandoo chuun na nuú inga na. ²⁴ Joo tácu Jesucristo anda ama cáa quivi ña cán queá a jándacoo toho a chuun a nuú inga ga. ²⁵ Ña cán queá anda ama cáa quivi íin tiaha Jesucristo jácacu a mí tá ná cayatí nu Ndióxi sahá ña nacaja Jesucristo tá naxihí a ndica crúxu. Ta íin mé á nu Ndióxi xíca tahví a nu mé á sahá na cándéé ini mé á.

²⁶ Mé a ndaa xíní ñúhú yo Jesucristo ña ná cacuu a jutú sacuaha nu Ndióxi saha yo. Jáchí mé á cúu á ña yíi ndivaha ta ni in cuachi coó nacaja mé á ta ni in

cuachi a cúu chácaan yó jatá. Ta co xíca nuu ga mé á tañu na cája cuachi jáchi íin a indiví nu ndícahnu ndivaha mé á. ²⁷ Co xíní ñúhú caja Jesucristo tá quiahva nacaja java ga jutú sacuahá, na naquixi chichi Leví. Jáchi nini quívi nasahní na cán quítí jóco na rí nu Ndióxi sahá cuachi ñayivi. Ta nu cuítí nacaja na ña sahá cuachi mé va na ta anda jávi nacaja na ña sahá cuachi ñayivi. Joo jíin va nacaja Jesucristo jáchi in túhún tañu cuítí va najoco a mé á tá nañihí a ndíca crúxu sahá cuachi tóco ndihi ñayivi. ²⁸ Tá nacaja na ña cáchi ley Moisés já nasacu na in dataa, da cája cuachi ña ná cacuu da jutú sacuahá. Joo tá nandihí já nachinúu Ndióxi Jesucristo, jahyi a ña ná cacuu a jutú sacuahá, ña cája ña ndaa anda ama cáa quívi. Ta nasahan Ndióxi tuhun a nu yo ña jáxinu coo a tóco ndihi ña cáchi a.

Jesús cúu á jutú sacuahá saha yo indiví

8 Nacachi nde ña yóho ña ná candaa ini ndó ña cúu Jesucristo jutú sacuahá saha yo nu Ndióxi ta íin coo a xoo cuáha Ndióxi indiví nu ndícahnu ndivaha mé á. ² Cúu á jutú sacuahá cája ndíví a veñuhu indiví ña nacavaha Ndióxi ta co cúu á ña nacavaha ñayivi. ³ Ndítahan nu tóco ndihi na cúu jutú sacuahá cahní na quítí nu Ndióxi ta joco na ñaha nu á. Ña cán queá ndítahan ri nu Jesucristo joco a ñaha nu Ndióxi. ⁴ Tá ná caca nuu Jesucristo ñuyíví yóho, nduu já queá a cacuu toho a jutú, nduu. Jáchi sa ndúu cuahá ndivaha jutú ñuyíví yóho ta jóco na ñaha nu Ndióxi tá quiahva sáhdá ley Moisés. ⁵ Joo ña cája mé ndihi jutú ñuyíví yóho cúu á tátuhun yuhú nuu ña cája Jesucristo indiví. Ta candaa ini ña cúu á tátuhun yuhú nuu ña íin indiví jáchi sanahá ndivaha tá nasahnda Ndióxi chuun nu Moisés ña ná cavaha da veñuhu xihín ní quítí já nacachi Ndióxi já xihín da: “Cuénta coún ndaja cavahún

veñuhu xihín ní quítí jan. Jáchi xíní ñúhú coo a tá quiahva cáa ña nanaha i nuún jini yúcu cán”, nacachi Ndióxi xihín Moisés. ⁶ Joo Jesucristo, mé á cúu jutú sacuahá saha yo indiví nandicojo a in chuun ña vaha chága a juú ga chuun cája jutú ñuyíví. Vaha chága ña nacaja Jesucristo a juú ga ley Moisés jáchi jándique táhan máni a mí xihín Ndióxi ta xihín ña yóho xínu coo tuhun nasahan Ndióxi nu yó jihna.

⁷ Tá ná cuu caja ley Moisés ña jácacu a mí ná a cúhun toho í indayá, nduu já queá co xíní ñúhú quivi Jesucristo jándique táhan máni a mí xihín Ndióxi, nduu. ⁸ Joo xíní vaha Ndióxi ña mé ley Moisés a cuú jácacu a ñayivi sahá ña cán queá já nacachi a já: Vaxi quívi tá quiahva i tuhun saá nuú ñayivi Israel ta nuú na naquixi chichi Judá.

⁹ Jíin va cúu tuhun saá quiahva i nu ná, jáchi co cúu toho a tuhun nasahan i nu tásahnu jíc na sanahá ndivaha, tá nañiin ndahá i na ta natavá i na nuú nasanduu na nación Egipto.

Ta sahá ña coo najáxinu coo na tóco ndihi ña nasahnda i nu ná caja na sahá ña cán queá najándacoo i na.

¹⁰ Ta vaxi quívi tá quiahva i tuhun saá nuú ñayivi Israel.

Ta caja i ña ná candaa vaha ini na ley mí i ta cañuhu a ini ínima ná ña ná caja na ña cúní mí i.

Ta yehe cacuu Ndióxi caja cáhnu na, ta mé na cán cacuu ñayivi cacomí i cuénta saha.

¹¹ Ta a cúní ñúhú ga na jánahá ñani táhan mé ná ña ná candaa ini na saha Ndióxi,

jáchi tóco ndihi ñayivi anda na valí anda na sáhnu candaa ini na yo cúu yehe.

¹² Ta caja cáhnu ini i saha ndaja táhan ña núu nacaja na,

ta a ndícuun ga ini i sahá cuachi na, cáchi Ndióxi.

¹³ Tá ñaçaḥan Ndióxi sahá tũhun saá ña quiahva mé á nuú ñayivi já queá náha ña coó chuun ga mé tũhun ñasahan nu ná jihna ta cama chá ndihi sahá.

Veñuhu ñuyívi xihín veñuhu indivi

9 Tá ñasahan Ndióxi tũhun a nuú na Israel sanahá ndivaha já ñasahnda chuun sahá ndaja caja cáhnu na mé á ini veñuhu ña cávaha na ñuyívi yóho. ² Ta ndácaan ivi cuarto ini mé veñuhu cán. Ta ña ndácaan ini cuarto nu cuítí cúú in candelero xihín in mesa nu cándójó pan yii. Ta mé cuarto nu cuítí yóho naní a in nuú yii. ³ Ta fin in jahmá ndeé ña ndájí nuu táhan tañu ndívi cuarto yóho. Ta cuarto ndácaan maá naní a nuú yii ndivaha. ⁴ Ta mé cán fin in nu náá ña ña-cavaha xihín jũhũn cuáán nu chíníh má jutũ jusa vaha. Ta jári cán fin satõ arca ñaha Ndióxi ta tóco ndihi jata mé satõ arca ñandicuchu xihín jũhũn cuáán. Ta chí ini satõ cán ndácaan in tĩndõho jũhũn cuáán nu ñũhu maná ña ñaxixi na Israel tá ñaxica nuu na yucú íchí cán. Ta jári ndácaan mé yító ñaha Aarón, dó ñasaa núma sanahá. Ta chí ini arca cán ndácaan ri ivi yuu jáhndá nu ndáa ley ñasahan Ndióxi nuú Moisés. ⁵ Ta jiní mé satõ arca cán ndíndójó ña cúú yuhú nuu tátõ Ndióxi naní a querubines. Cándójó a cán ña ná ndicũhũn ini ñayivi ña fin Ndióxi cán cája cáhnu ini a sahá cuachi na. Ta mé tátõ Ndióxi cán ndíca ndixi a cándójó a jata arca. Joo a cúu ndicani chága yo sahá ña yóho viti.

⁶ Já ñasahiin tiaḥva tóco ndihi ñaha veñuhu. Ta ndijáá níi quivi ñandihvi jutũ cuarto nu cuítí cán cája ndívi ña ñaha caja cáhnu na Ndióxi. ⁷ Joo in tañu tá nu cuía in túhũn da cúú jutũ sacuaḥa ñaquihvi da cuarto maá cán. Ta ñéhe da níi quítí ña joço da nu Ndióxi sahá cuachi mé dá xihín sahá cuachi ñayivi. ⁸ Ta xihín ña yóho jánaḥa ínima yii Ndióxi nu yo ña a cuú ndihvi ndá ñayivi

ña cuu cuarto maá nuú yii ndivaha jáchi sa fin va cuarto nu cuítí. ⁹ Ta tóco ndihi ña yóho cúú á tátũhun yuhú nuu nuú ña fin tiempo viti. Ta sa xini yo ña a cuú ndaja vii ñayivi ínima ná xihín ña jóco na nu Ndióxi tá sahní na quítí ña quiahva na níi rí nu mé á. ¹⁰ Jáchi tóco ndihi ña ñacaja na cán ñasacuu a cuénta ña sáxi na xihín ña xihí na ta ñasacuu a cuénta ndaja ñandaja vii na mé ná xihín ticuif. Joo já ñanditahan cája na janda quiahva tandaa quivi ndijama Ndióxi tóco ndihi ñaha jáchi a cúu ndaja vii na ínima ná xihín ña yóho.

¹¹ Ta ndaja coo ñaquixi Jesucristo ñuyívi yóho ta ñandu a jutũ, da sacuaḥa chága nu yo. Ñaquixi a ña ná quiahva mé á ña vaha Ndióxi nu yo. Joo viti fin a indivi cája chúun a tátũhun jutũ veñuhu ña vaha chága cán. Cúú á veñuhu ña coó ñacavaha ñayivi ta coo cúú á ñaha ñuyívi. ¹² In tañu cuítí va ñandihvi a nuú yii ndivaha ta coo ñasanehe a níi tijũhu ni níi chélo ña joço a nu Ndióxi. Nii mé á cúú dó ñaxita ndica crũxu saḥa yo ña ná çacu ndaa ínima yo anda ama cáa quivi. ¹³ Jihna ñacaja ñayivi ña ñacachi ley Moisés ta nu yiquí cuñu na ñaxihnu ndaa jutũ níi tĩndiquí a níi tijũhu ta ñaxihnu ndaa ri da na xihín yaa chélo, rí ñasahmi na nu náa. Ta xihín ña yóho ñandivíi yiquí cuñu na nu Ndióxi. ¹⁴ Joo ndíyahvi chága níi Jesucristo a juú ga níi quítí. Jáchi tá ñaxihí Jesucristo já ñandivíi ínima yo já ná a cája ga yo ña coo ndíyahvi cán ta ná caja í tóco ndihí ña cúni Ndióxi. Ñacaja ínima yii Ndióxi, mé a tácu a anda ama cáa quivi ña ná ndiquiahva Jesucristo mé á ndáha Ndióxi já ñaxihí a ndica crũxu saḥa cuachí vatí coo toho cuachi mé á.

¹⁵ Ta sahá tũhun saá ñasahan Ndióxi nu yo sahá ña cán queá cáhan Jesucristo xoo mí nu Ndióxi. Ta sahá ña ñacaja Jesucristo tá ñaxihí a ndica crũxu cája cáhnu ini Ndióxi sahá cuachi na-

caja í tá nasandico yó ley Moisés. Ta nandacaxi Ndióxi ñayivi, na cúnj candúsa mé á já ná ndiquehe na ña vaha Ndióxi ña a ndíhi toho saha jáchi já cáa tuhun nasahan Ndióxi nu ná. ¹⁶ Cúu á tátuhun tá cávaha in dataa tutu cuéntá ña ñehe táhvi ná candoo ñaha nu ná. Joo xínj núhu candaa ini na ña mé a ndaa naxihj da jándacoo ñaha cán anda jávi ndíyahvi mé tutu cán. ¹⁷ Jáchi nani tácu da co ndíyahvi toho tutu nacavaha da sahá ñaha ndicoo táhvi da. Janda quiahva ná quivi da já ndíyahvi a. ¹⁸ Ña cán queá tá nu cuítj nasahan Ndióxi tuhun a nuú ñayivi nacaja mé á ña ná quivi quítj ta xihín nij rí cán nandoo cuachi ñayivi. ¹⁹ Jáchi tá ndihi nacahan Moisés ley nasahan Ndióxi nuú ñayivi Israel já natiin da in yíto, dó nani hisopo ta nacató da loho cachi cuhá nu do. Ta nachindaxi da dó cán xihín nij chélo xihín nij tjúhu, dó nacava táhan xihín ticuítj. Ta naxihnu ndaa da do nu libro nu ndaa ley Moisés. Ta naxihnu ndaa da dó nuú ñayivi Israel. ²⁰ Anda já nacachi da já xihín na Israel: “Xihín nij quítj yóho jáxinu coo Ndióxi tuhun a ña nasahnda nu ndó caja ndó”, nacachi Moisés. ²¹ Ta quiahva já naxihnu ndaa Moisés nij quítj nuú veñuhu ní quítj xihín nuú tóco ndihi ñaha núhu cán ña cája chúun na cája cáhnu na Ndióxi. ²² Jáchi cáchj ley Moisés ña xihín nij cuítj va ndivií ndaja táhan ñaha, vatj a juú ndihi a. Ta janda quiahva ná cuítj nij já cuu caja cáhnu ini Ndióxi sahá cuachi ñayivi.

Nandoo cuachí xihín nij Jesucristo

²³ Sahá ña cán queá nanditahan nu Moisés ndaja vií da ñaha veñuhu ñuyíví yóho xihín nij quítj. Ta mé ñaha cán cúu á yuhú nuú ña íin indiví. Joo ñaha íin indiví ndivií a xihín nij, dó vaha chága a juú ga nij quítj. ²⁴ Ta veñuhu ñuyíví

cúu á yuhú nuú cuítj va ña íin indiví. Coó nandihvi Jesucristo nuú yij ndivaha veñuhu, ña nacavaha ñayivi. Joo nandihvi mé á indiví ta cán íin a viti ta cáhan mé á xoo mí nu Ndióxi. ²⁵ Jáchi da cúu jutj sacuahá nandihvi da tá nu cuía nuú yij ndivaha veñuhu joco da nij quítj nu Ndióxi. Joo ña nacaja Jesucristo queá nandiquiahva a mé á quivi a saha yo ta in tañu cuítj va naxita nij á ndica crúxu. ²⁶ Jáchi tá ná nditahan nuú Jesucristo quivi a cuahá tañu já queá janda mé saha tá nacava sahá saha ñuyíví casahá quivi a, nduu. Joo a juú a já jáchi tá jalóho cúnj ndihi saha tiempo viti já nacasaa Jesucristo ñuyíví yóho ta in tañu cuítj va naxihj a sahá cuachi ñayivi. ²⁷ Quiahva já yaha xihín ñayivi jáchi in tálaa tañu quivi na ta anda jávi ndítahan candichi na nu Ndióxi caja vií mé á sahá ña nacaja na tá nasandu na ñuyíví yóho. ²⁸ Ta quiahva já in tañu cuítj va naxihj Jesucristo ndica crúxu jándoo a cuachi cuahá ñayivi. Ta tandaa quívj quixi tucu mé á ñuyíví yóho joo a quívj ga ña jáchi quixi a ndiquehe a na ndátj tiahva cuhun coo xihín mé á indiví.

10 Ta mé ley nacahyí Moisés yóho nasacuu a tátuhun in candahvi mé ña ndaa ña coo chága chinuu. Nasacuu a yuhú nuú uun ña vaha ña vaxi nu yo. Jáchi mé ley yóho coo nacuu caja ndaja vií a ínimá ñayivi vatj ná cayati na nu Ndióxi tá nu cuía sá sáhní na quítj joco na nu Ndióxi. ² Jáchi tá ná cuu ndivií ínimá ná sahá ña cája na ña cáchj ley Moisés já queá in tañu cuítj va joco na nij quítj nu Ndióxi, nduu. Ta xihín ña yóho ndoo cuachi na ta a ndicani ga ini na sahá cuachi na, nduu. ³ Joo tá nu cuía tá sá sáhní na quítj joco na nij rí nu Ndióxi já queá ndicuhun ini na ña cómi na cuachi nu Ndióxi. ⁴ Jáchi a cúu jándoo na cuachi na xihín nij tndiquí a xihín nij tjúhu.

⁵ Ña cán queá tá jalóho cúní casaá Jesucristo ñuyívi yóho já ñacachi a já xihín Ndióxi, tátá a:

Có cúní ndó ña ná cahní ñayivi quítí joco ña rí nu ndo ta ni có cúní ndo ña ná joco ña java ga ñaha nu ndo.

Sahá ña cán queá nasahan ndó in yiquí cuñu nuú i já ná ndiquiahva i ña nu ndo.

⁶ Có cájii ini ndó tá ná cahmi na quítí nu náa joco ña rí nu ndo. Ta ni có táhán ini ndó tá ná joco ña java ga ñaha nu ndo ña ná jándoo na cuachi na.

⁷ Sahá ña cán queá já ñacachi i já xihín ndo:

“Tátá Ndióxi, yóho íin i ta íin tiahva vi caja i ndá ña ñacuu cúní ndo.

Jáchí quiahva já ndáa ini tñhun mé ndó sahá i”, ñacachi Jesucristo.

⁸ Nu cuítí ñacachi Jesucristo ña có cúní Ndióxi ña ná cahní ñayivi quítí quiahva na ñi rí nu á. Ta ni có táhán ini a tá ná cahmi na quítí nu náa ña ná ndi-víi ínimá ná. Ta ñacachi a ña yóho vatí sáhndá ley Moisés caja ñayivi já. ⁹ Joo tá ñandihí ñacachi Jesucristo já xihín Ndióxi: “Yóho íin i ta íin tiahva vi caja i ndá ña ñacuu cúní ndo”, ñacachi a. Ña cán queá nasacu xóo Ndióxi ña ñacaja na jihna ta viti ndíquehe vaha mé á ñayivi sahá ña ñaxihí Jesucristo ndica crúxu. ¹⁰ Ñacaja Jesucristo ña nasacu ini Ndióxi caja sahá ña cán queá ñacandoo víi uun tóco ndihí mí jáchí in tálaá tañu ñandiquiahva Jesucristo yiquí cuñu a tá ñaxihí a sahá cuachí.

¹¹ Jihna ga ña ñacaja ndihí jutú cúú á ña nini quívi sándita da nu náa jóco da quítí nu Ndióxi. Ta vatí cuahá tañu sá cája da já joo a cuú jándoo da cuachi ñayivi xihín ña yóho. ¹² Joo in tañu cuití va ñaxihí Jesucristo sahá cuachi tóco ndihí ñayivi já ná cuu cacu ndaa ínimá ná anda ama cáa quívi. Anda jávi nasacoo a xoo cuáha Ndióxi, tátá a indívi. ¹³ Ta cán íin coo a viti cándati a jan-

da quiahva ná cacu Ndióxi ña cándají mé á tíxi sahá. ¹⁴ Jáchí in tálaá tañu ñaxihí Jesucristo ndica crúxu ta xihín ña yóho ñandaja víi a ínimá ñayivi, ña ñacaxi mé á. ¹⁵ Ta sa xíní yo ña cúú ña yóho ña ndaa jáchí já cáchí ínimá yíi Ndióxi já:

¹⁶ Vaxi quívi tá quiahva i tñhun saá nuú ñayivi Israel ta quiahva joho coo a. Caja i ña ná candaa vaha ini na ley mí i ta caja i ña cañuhu a ini ínimá ná.

¹⁷ Ta já cáchí tucu a já:

Caja cáhnu ini i sahá ndaja táhan ña núu ñacaja na ta a ndicuhun ga ini i sahá cuachi na, cáchí tñhun Ndióxi.

¹⁸ Ta sahá ña ñacaja cáhnu ini Ndióxi sahá cuachi ñayivi sahá ña cán queá có xíní ñúhú ga cahní ña quítí ña joco ña rí nu mé á sahá cuachi na.

Xíní ñúhú cayatí nu Ndióxi

¹⁹ Candehé ndo, ñani i, ña cúú cuéntá Jesús. A cáyihví toho í viti ndihví nu íin Ndióxi, mé nuú yíi ndivaha jáchí ñaxihí Jesucristo sahá cuachí. ²⁰ Ta tá ñandiquiahva mé á yiquí cuñu a já ñaxihí a ta xihín ña yóho nasuná a íchí saá já ná cuu cayatí nu íin mé á. ²¹ Ta mé Jesús cúú á jutú sacuahá saha yo nu Ndióxi jáchí cómi a cuéntá sahá ndihí, ña cúú cuéntá mé á. ²² Ña cán queá xíní ñúhú cayatí nu íin Ndióxi xihín ndinuhu iní jáchí cándeé iní mé á. Cúú á tátñhun ñandoo yiquí cuñu í tá ñaxihí Jesucristo ndica crúxu. Ta viti có ndítahan ndicani iní sahá cuachi ñacaja í jáchí ñajándoo mé á cuachí. ²³ A jándacoo í ña cándeé iní Ndióxi ta ná candati tiahva í jandá ná vaha ña cáchí mé á jáchí xíní vaha í ña jáxinu cóo Ndióxi tñhun nasahan nu yo. ²⁴ Ta ndítahan nu yo ndinducú yo ndaja caja í chindeé táhan í já ná quíhvi chága iní ñani táhan í. Ta ndítahan caja chága yó ña vaha. ²⁵ Có ndítahan toho caja í tá quiahva cája java ña cúú cuéntá Jesús, ña có cúní nditaca xihín ndihí java ga ña cúú cuéntá Jesús. Ña ndítahan caja í

queá jácahan chága táhan í ña ná taca í xihín java ga ña cúu cuéntá Jesús jáchi sa xini yo ña vaxi quivi quixi tucu Jesu-cristo ñuyívi yóho.

²⁶ Tá sa cándaá vaha iní ña co ndítahan caja í cuachi ta chínee tucú mí cuahan í cája í cuachi vatí sa cándaá iní ña ndaa, a cuú ga ndoo cuachí nu Ndióxi.

²⁷ Ta cáyihví yo candatí janda quiahva ndoho ndivaha iní caja Ndióxi. Jáchi já-cana mé á ñayivi nu ñúhu cáyi ita, mé nu ndihi sahá na ihví mé á. ²⁸ Jáchi ndá na Israel, na co cúní caja ña sáhd-ndá ley Moisés já queá ndítahan quivi na tá ná cacu iví á uní testigo sahá na nu juéxe. Ta ni in na a cándahví ini ñahá.

²⁹ Joo ndaja ga ví ndítahan ndoho ini na quehe núu Jesús, mé in túhún jini já jahyi Ndióxi. Jáchi cúu á tátuhun sání nihni na a ta co sáhní toho na mé ná ña naxihí a jándoo a cuachi na tá quiahva nasahan Ndióxi tuhun a caja. Cánahá na xihín ínima yii Ndióxi, mé a cája cuahá ñamaní xoho. ³⁰ Cándaá vaha iní yo cúu mé a ñacachi ña yóho: “Yehe jándoho í ini ñayivi, na cája cuachi. Ta caja í ña ná chahvi na sahá cuachi na”, cáchi a. Ta já cáchi tucu Ndióxi, xitoho í já: “Yehe caja ví í sahá na cúu cuéntá mí í”, cáchi a. ³¹ Mé a ndaa ndáhví nahá ñacuú tá ná tiin Ndióxi mí ña ná chahví sahá cuachí jáchi mé á cúu á Ndióxi, ña tácu indiví.

³² Ndítahan ndicuhun ini ndó ña ñayaha tá jacá ñacandee ini ndó Jesús. Vatí ñandoho ndivaha ini ndó ñacaja java ñayivi joo nasahan ndeé ini ndó. ³³ Java tañu ñasacu ndaa ichi na ndohó nuú ñayivi ta java tañu ñacaja xixi na xihín ndo ta java tañu ñacatáhan ndó xihín java ga ña tá ñandoho ri ini na sahá Jesús. ³⁴ Ta táhnda ini ndó sahá na cúu cuéntá Jesús ñúhu vecaa. Ta coo ñacahan cuachí ndo ta janda cájii ini ndó vatí ñacaja cuíhna na ñaha ndó jáchi cándaá vaha ini ndó ña cómí ndó ña vaha chága indiví ta a ndihi toho sahá

ña cán. ³⁵ Ña cán queá a jándacoo ndó ña cándeé ini ndó Jesús jáchi tandaa quivi quiahva cuahá Ndióxi ña vaha nu ndo tá cándeé ini ndó mé á. ³⁶ Ndítahan nu ndó quiahva ndeé ini ndó caja ndó ña cúní Ndióxi já queá ndiquehe ndó ña vaha nasahan mé á tuhun a quiahva nu ndo. ³⁷ Jáchi já cáchi tuhun Ndióxi já:

Jalóho cúní ta já quixi mé a ndítahan nuu quixi ta a cáyancá toho a.

³⁸ Joo ndá na cúu ñayivi ndaa nu mí í catacu na sahá ña cándeé ini na yehe.

Ta tá co cúní ga na cándeé ini na yehe ta já ndico coo na caja na cuachi já queá a cájii iní í xihín ná, já cáchi Ndióxi.

³⁹ Joo a cája toho í tá quiahva cája java ñayivi jáchi co cúní na candee ga ini na Jesús ta tandaa quivi cuhun na indayá. Joo mí cúu yó na cándeé iní Jesús ta tанда quivi coo í nu iin mé á.

Ndítahan nu yó candee iní Ndióxi

11 Tá ná candee iní Ndióxi já queá cúní cachi a ña sa xini vaha í ña yaha tá yaha ña ndátí yó yaha. Ta vatí co xini yó ña ndátí joo cándeé iní ña já coo. ² Jáchi sahá ña ñacandee ini tásáhnú jícó yo Ndióxi sanahá ndivaha sahá ña cán queá cájii ini Ndióxi xihín ná.

³ Ta sahá ña cándeé iní Ndióxi sahá ña cán queá cándaá vaha iní ña ñacahan Ndióxi ta já ñacavaha mé á ñuyívi xihín indiví. Jihna coo nasahin ni in ñaha joo viti náha nuú ña ñacavaha mé á.

⁴ Ta sahá ña ñacandee ini da naní Abel Ndióxi sahá ña cán queá ñatahan ini Ndióxi xihín ña ñacaja da tá najocó da ñaha nu á. Ta coo ñatahan ini a xihín ña najocó da naní Caín, da cúu ñani Abel jáchi coo ñacandee ini Caín mé á. Sahá ña cán queá ñandiquehe Ndióxi ña najoco Abel nu á ta xihín ña yóho ñanduú da da ndaa nu á. Ta vatí naxihí Abel joo xihín ña ñacaja da sanahá jáñaha da

nu yō ndaja ndítahan nu yó candeé ini Ndióxi.

⁵ Ta sahá ña ñacandeé ini da naní Enoc Ndióxi sahá ña cán queá coó naxihí toho da. Joo nasañehe Ndióxi dá indiví ta coó ñacuu ndiñehé ñayivi mé dá jáchi ñandaa da cuahān da indiví ñacaja Ndióxi. Ta cáhí tūhun Ndióxi já ñacaja mé á jáchi táhán ini a xihín ña ñacaja Enoc nani ñasahjīn da ñuyíví yóho. ⁶ Tá co candeé ini Ndióxi já queá co táhán ini Ndióxi xohō. Jáchi ndá ña cúní cayati nu Ndióxi xíní ñúhú cándúsa na ña ín mé á indiví ta xíní ñúhú cándúsa na ña quiahva mé á ña vaha nuú ñayivi tá ndinducú ña mé á.

⁷ Ta sahá ña ñacandeé ini da naní Noé Ndióxi sahá ña cán queá nataa johō da tá ñacaxi tūhun Ndióxi xihín dá ña ndoho ini ñayivi chága chí nuu vatí coó ñasanahā nu á. Ñacandúsa Noé Ndióxi ta chí ñacasáhá da cávaha da in barco cáhnu nuú cuu cacu ndaa mé dá xihín ña vehe da. Ta sahá ña ñacandeé ini da Ndióxi sahá ña cán queá ñanduū da taa ndaa nu mé á. Ta xihín ña ñacaja da najácojo da cuachi jatá ñayivi ñuyíví jáchi nahā cáxi a ña coó ñacandúsa na caja na ña cáhí Ndióxi.

⁸ Ta sahá ña ñacandeé ini da naní Abraham Ndióxi sahá ña cán queá ñacandúsa da ña ñacahān Ndióxi xihín dá. Ta chí ñaquee da ñuu da ta cuahān da in ñundáhyi, ña ñasahān Ndióxi tūhun a quiahva nu dá. Najándacoo da ñuu da vatí coó ñasaxiní da ndaja naní mé ñuu nuú cuhūn da. ⁹ Ta sahá ña candeé ini Abraham Ndióxi sahá ña cán queá ñaxinū coo da ñundáhyi ña ñasahān Ndióxi tūhun a quiahva nu dá. Joo ñandiñehe dá java ñayivi ndúu cán chí ñasahjīn da tá quiahva ndúu ña tóho. Vehe tienda ñasahjīn da xihín ña vehe da. Ta quiahva já ñasahjīn Isaac xihín Jacob jáchi ñasahān Ndióxi tūhun a nu mé dá xihín nuú ña vehe da. ¹⁰ Ñacaja

Abraham ña yóho jáchi ndátí da coo da in ñuu ña ín indiví, ña ñacavaha Ndióxi nuú coo a anda ama cáa quiví.

¹¹ Ta jári ñacandeé ini Sara, mé ñájihí Abraham Ndióxi sahá ña cán queá ñacaja Ndióxi ña ñacuu quee jahyi ná vatí sa ñacayatá ña. Ta tá ñandihi já ñacaju jahyi ná ta ñasacuu a sahá ña ñacandeé ini ná jáxinū coo Ndióxi tūhun ñasahān nu ña. ¹² Sahá ña cán queá vatí ñacayatá ndivaha Abraham ta ñacayati quiví quivi da joo ñacaju jahyi da xihín ña ta ñanduū da tásáhnu jicó ña Israel. Ta cuahā ndivaha na cúu chichi da janda a cuú candahvi na. Cúu á tátūhun quimi ña ín indiví á tátūhun ñutí yuhú tañuhú jáchi a cuú candahvi a.

¹³ Tóco ndihi ña ñaquixi chichi Abraham yóho vatí naxihí ña joo ñacandeé tá ñacandeé ini na Ndióxi. Ta vatí coó naxini na ña ñasahān mé á tūhun a quiahva nu ná joo ñasacuu a tátūhun ñaxini na ña. Jáchi ñacandeé ini na ña ñacachi Ndióxi xihín ná ta ñacajii íni ña. Ña cán queá ñacachi na ña ndúu tóo cuití ña ñuyíví yóho ta cúu ná tátūhun ña tóho jáchi coó ñuu na ñuyíví yóho. ¹⁴ Cándaa íni ña ndá ña cáhí já cúní cachi a ña ndinducú ña inga ñuu nuú canduu na. ¹⁵ Ta coó ñatahnda ini na sahá ñuu ñaquee na cán jáchi cuu ndicó coo na, nduu joo coó ñacacúní na caja na ña. ¹⁶ Joo ña ndúcú ña cúu in ñuu ña vaha chága, ña ín indiví. Ta ñacaja tiahva Ndióxi mé ñuu indiví nuú cuu coo na já queá a cácahan nuú mé á cachi a ña cúu ná cuéntá mé á.

¹⁷ Ta sahá ña ñacandeé ini Abraham Ndióxi sahá ña cán queá ñasahjīn tiahva da cahní da Isaac, jahyi da joco ñahá da nu Ndióxi tá ñaxito ndojó Ndióxi da. Já ñacaja Abraham vatí ñasahjīn in túhún jini jahyi da ta sa ñasahān Ndióxi tūhun a nu Abraham ¹⁸ tá ñacachi a já xihín dá: “Cacu jahyún, da cananí Isaac ta xihín da cán ndicuahá ndivaha chichún chá-

ga chí nuu”, ñacachi Ndióxi. ¹⁹ Sa ñacandaa vaha ini Abraham ña cuu caja Ndióxi ña ná nditacu tucu Isaac tá sa ñaxihí da. Ta vatí coó ñasahní toho Abraham Isaac joo cúú á tátuhun ñaxihí da ta ñanditacu tucu da jáchi ñasahin tiahva da cahní da da sahá ña ñacandee ini da Ndióxi.

²⁰ Ta sahá ña ñacandee ini Isaac Ndióxi sahá ña cán queá ñasahan da tuhun da nu ndívi jahyi da, da naní Jacob xihín da naní Esaú ña caja cuaha Ndióxi ñamaní xihín ndívi da chága chí nuu. ²¹ Ta sahá ña ñacandee ini Jacob Ndióxi sahá ña cán queá tá jalóho cúní quivi da já queá ñacachi da ña caja cuaha Ndióxi ñamaní xihín iví jahyi ñaní da, da cúú jahyi da naní José. Anda jávi ñacaja cáhnu da Ndióxi nani tíin ndaa da garrote da. ²² Ta sahá ña ñacandee ini José Ndióxi sahá ña cán queá tá jalóho cúní quivi da ñacahan da xihín na Israel sahá mé quivi tá ná quee na nación Egipto cuhun na. Ta ñasahnda da chuun nu ná ña ná cañehe na lasa yiquí cuñu mé dá cuhun ña xihin ná.

²³ Ta sahá ña ñacandee ini náná tátá Moisés Ndióxi sahá ña cán queá tá ñandihí ñacacu da já ñachicaan jehé na da tañu umí yoo. Náha ña cúú dá in léé ñúchí ndivaha ta chí coó ñayihví toho na tuhun ñacahan rey cán tá ñasahnda da chuun ña quivi ndihí taválí jacá ñacacu nuú na Israel. ²⁴ Ta sahá ña ñacandee ini Moisés Ndióxi sahá ña cán queá tá ñasahnu da ñajándacoo da vehe rey Egipto vatí ñajácuahnu ná cúú jahyi jíhí rey cán da tátuhun jahyi ná. ²⁵ Ta ña ñacaja da queá ñasahan da ñandoho ini da xihín na cúú cuéntá Ndióxi. Jáchi co cúní da cájii ini da cája da cuachi vatí chá tiempo. ²⁶ Ta ñacahan da ña vaha chága ná ndoho ini da saha Jesucristo, mé a chindahá Ndióxi cacomí cuéntá sahá ñayivi a juú ga ña ná cacomí da cuaha ñaha cuíca nación Egipto cán. Jáchi ñacahvi ini da sahá ñamaní caja Ndióxi

xihin da chága chí nuu. ²⁷ Ta sahá ña ñacandee ini Moisés Ndióxi sahá ña cán queá ñajándacoo da nación Egipto ta coó ñayihví da ña ná ndicuehe rey Egipto cán xihin dá. Ta ñasahan ndee ini da jáchi ñaxica da tátuhun in da xica xihin Ndióxi vatí coó ñaxini da mé á.

²⁸ Ta sahá ña ñacandee ini Moisés Ndióxi sahá ña cán queá ñasahnda da chuun ña ná caja na Israel vicó pas-cua. ñasahnda da chuun ña ná cahní na ndicachi ta já cuihna ndaa na ñi rí yuyehé vehe na Israel ña ná a quívi jahyi taa na, da ñacacu nu cuítí tá ná yaha táto Ndióxi, mé a cája ña ná quivi ñayivi. ²⁹ Ta sahá ña ñacandee ini na Israel Ndióxi sahá ña cán queá ñayaha na mahñú ndaa tañuhú naní tañuhú cuahá. Nasacuu a tátuhun xica na nu ñundáhyi íchí uun. Joo tá ñacasahá na Egipto yaha na mé tañuhú cán já queá coó ñacuu caja na ña. ñacandaa na ini ticuíf ta já ñaxihí ndihi na.

³⁰ Ta sahá ña ñacandee ini na Israel Ndióxi sahá ña cán queá ñacava nuu na ñuu Jericó tañu usa quivi ta já ñacuyu ndihi náma ñuu cán. ³¹ Ta sahá ña ñacandee ini ná xica jii naní Rahab cán Ndióxi sahá ña cán queá coó ñaxihí ná xihín ndihi ñayivi ñuu Jericó, na coó ñacandúsa Ndióxi. ñajácaçu Ndióxi Rahab cán jáchi sa ñandiquehe vaha ña java ta Israel tá ñacasaa da nu cuítí sándehe da ñuu cán.

³² Ndá chága cahan i xihin ndo. Sa ñacahan cuahá i xihin ndo joo cámani cahan i sahá da naní Gedeón xihin da naní Barac xihin da naní Sansón xihin da naní Jefté xihin da naní David xihin da naní Samuel xihin java ga na ñasacuu profeta. ³³ Sahá ña ñacandee ini na cán Ndióxi sahá ña cán queá ñaquee vaha na tá ñacani táhan na xihin java nación ta ñasacomí vaha na cuéntá sahá ñayivi ta ñandiquehe na ña vaha ñasahan Ndióxi tuhun a quiahva nu ná. Java na ñachicaji

na yúhu león. ³⁴ Ta java na nandahva na ñúhu cáyi ña ná a cáyi toho na. Ta java na ñacacu na ndahá ñayivi, na ñacacúni cahní ñahá xihín machiti. Ta java na vatí vitá ini na joo ñandihvi ndéé ná. Ta java na ñaquee vaha na tá ñacani táhan na xihín na ihvi na. ³⁵ Ta java ñajihí ñacandéé ini na Ndióxi ta sahá ña cán queá ñaxini na ña ñanditacu tucu na vehe na ñacaja Ndióxi.

Joo java na ñandoho ndivaha ini na janda quiahva ñaxihí na. Ta coó ñacandúsa na cacu xoo na Ndióxi jáchi ñacandaa vaha ini na ña cuhun na coo na in ñuu vaha chága nu fin mé á. ³⁶ Java na ñandoho ini na tá ñasacu ndaa ichi ñahá na ta ñacani ñahá na. Ta java na ñasandico na xihín cadena ta ñachicaan na ña vecaa. ³⁷ Ta java na ñaxihí na jáchi ñacuun ñayivi yuu ná ta java na ñaxihí na tá ñasahnda túhun ñahá na. Ta java na ñaxito ndojó ñayivi na ña ná caja na cuachi. Ta java na ñaxihí xihín machiti. Ta java na ñasandíxi na xihín ní ndicachi xihín ní tijúhu cuití va jáchi coó toho jjuhún na. Ñacaja xíxi ñayivi xihín ná ta ñajándoho na ini na. ³⁸ Ñaxica ndáhví na nu íchí ndivaha ta ñaxica nuu na yucú ñúhú ta ñasanduu na tixi cáva xihín yávi nu ñúhu. Mé a ndaa cúu ná ñayivi vaha ndivaha ta co ndítahan nu ná ndoho ini na ñuyíví yóho. ³⁹ Ta cájii ini Ndióxi xihín tóco ndihi na cán jáchi ñacandéé ini na mé á. Joo cámaní ndiquehe na ña ñasahan mé á tuhun a quiahva nu ná. ⁴⁰ Jáchi cúni Ndióxi ña ná candati na cán anda tandaa quiví ndiquehe tóco ndihí ña vaha chága quiahva Ndióxi nu yo.

Ná candéé ini Jesús cuití va

12 Mé ñayivi cuaha cán ñaquee vaha na jáchi ñacandéé ini na Ndióxi. Ta jánaha na nu yo ndaja caja í ña ná quiahva ndéé ini tá ná ndoho ini. Ña cán queá ná jándacoo í tóco ndihi cuachi caja

í, ña tñin tuun mí. Ta ná jácaxoo í tóco ndihi ña sájí nuu nu yo caja í ña cúni Ndióxi. Ta ná candico yó ichi Ndióxi xihín ndinuhu ini tá quiahva ndítahan caja í. ² Ta ná candehé cáxi yo nuu Jesús jáchi mé á cán caja ña ná casahá candéé ini Ndióxi ta caja ña ná candéé ini mé á anda tandaa quiví quiví. Nandoho ini Jesús tá ñaxihí a ndica cruxu ta coó ñacacahan nuu á vatí cácahan nuu ñayivi quivi na quiahva já. Jáchi ñacandaa ini a ña tá ná ndihi ndoho ini a já tandaa quiví caji ndivaha ini a. Ta viti fin coo a xoo cuáha Ndióxi indiví.

³ Xini ñúhú ndicuhun ini ndó ndaja ñacaja Jesús jáchi a juu quiahva ñandoho ini a ndahá ñayivi caja cuachi. Sahá ña cán queá a jándacoo ndó ña candéé ini ndó Jesús ta a cácutá ínimá ndó tá ndóho ini ndó. ⁴ Jáchi cámaní yii va cahní na caja cuachi ndohó sahá ña co xeén ndó caja ndó cuachi. ⁵ Á ñandindójó ndó tuhun ñacahan Ndióxi xihín ndo sahá ña cúu ndó jahyi mé á. Já cáchi tuhun Ndióxi já:

Jahyi maní i, a quehe núu ndó Ndióxi tá jándoho a ini ndó ña ná ndacaca vaha ndó.

Ta a cáva ivi joho ini ndó tá jánani mé á ndohó.

⁶ Jáchi já caja Ndióxi xihín na quíhvi ini a.

Jándoho a ini na já ná jándacoo na ña núu ta já nduu na jahyi mé á, cáchi tuhun Ndióxi.

⁷ Quiahva ndéé ini ndó tá caja Ndióxi ña ná ndoho ini ndó. Jáchi tá quiahva caja in da ña xihín jahyi da quiahva já caja mé á xihín ndo. Jáchi tóco ndihi dataa jácaxahan da jahyi da já ná ndacaca vaha da. ⁸ Ta tá co jándoho Ndióxi ini ndó já queá co cúu ndó jahyi mé á. Cúu ndó tá tuhun jahyi ndáhví na. Joo tá ná jándoho Ndióxi ini ndó já cándaa ini ndó ña mé a ndaa cúu ndó jahyi mé á. ⁹ Tá ñasacuu na valí ñacaja cáhnu yó tátá yo vatí ñajá-

caxáhan na mí. Joo íin chága saha caja cáhnu í Ndióxi, tátá yo, mé á íin indiví vatí jándoho a ini mí jáchi xihín ña yóho cuu coo í xihín mé á anda ama cáa quivi.¹⁰ Tá válí yo najándacaca vaha tátá yo mí tá najánani na mí jáchi já vaha xíní na vatí mé ñuyívi yóho cúú á nu ndúu tóo cuití ví. Joo tá jánani Ndióxi, tátá yo, mí cúú á ña vaha chága jáchi xihín ña yóho ndaja yii á mí tá quiahva íin yii mé á.¹¹ Mé a ndaa co táhán ini tá jánani na mí jáchi cáhíhvi yo xihín á. Joo tá nandihí já coo vaha ini jáchi ñacatihva í ndaja caca vaha í sahá ña ñandoho ini tá xihín ña yóho cacúú ñayivi ndaa nu mé á.

Ndítahan nu yó táa joho í nu cáhan Ndióxi

¹² Ña cán queá ndicuíta ndó ta a jándacoo ndó mé ndó. ¹³ Ta ndinducú ndó ichí ndacú já ná cuu chindeé ndó ñayivi, na cáva ivi joho ini ña ná a ndícó coo na nuú cuachi.

¹⁴ Xíní ñúhú ndinducú ndó ndaja caja ndó coo vaha ini ndó xihín tóco ndihí ñayivi. Jándacoo ndó cuachi cája ndó ta ndinuhu ini ndó caja ndó ña cúní Ndióxi já ná cuu coo ndó nu íin mé á. ¹⁵ Cuéntá coo ndó ná a jándacoo ni in ndó íchi cuéntá Ndióxi jáchi cúní a caja cuahá ñamaní xihín ndo. Cuéntá coo ndó ná a cácuu ndó tátuhun in yucu ova ña játívi ña xíxi na jáchi na cája cuachi cája quini na ta játívi na java ga na cúú cuéntá Ndióxi. ¹⁶ Coto a quíhvi nuu ndó coo ndó xihín in na coo cúú yí ndo á ñájíhí ndo. Coto a quehe núu ndó ñaha Ndióxi tá quiahva ñacaja Esau. Jáchi in quivi cuíco ndivaha da ta najícó da tóco ndihí ñaha ndítahan ndiquehe da nu tátá da sahá ña ná cuxu da in coho cuití va. ¹⁷ Joo cándaá ini ña tá nandindaa nuu dá ndiquehe da ñaha ndáha tátá da coo ñacuu ndiquehe da ni in ñaha. Jáchi najícó da ña nuú ñani da sahá ña ná cuxu da in coho. Ta vatí nasacu ndivaha da

joo coo ñacuu caja da ndijama da tühun da ña sa nasahan da nuú ñani da.

¹⁸ Ta mé ndó coo ñacayati ndó nu Ndióxi tá quiahva ñacaja na Israel sanahá. Mé na cán ñataca na saha in yucu naní Sinaí xihín da naní Moisés. Ta ñacayí ñúhu cán ta ñanaá ndivaha ta ñaxícó ndivaha tachi ñaxini na. ¹⁹ Ta ñaxini joho na ñativi trompeta ta ñacahan Ndióxi xihín na. A juú quiahva nayihví na tá ñaxini joho na nu cáhan Ndióxi chí ñaxica tahví na nu á ña ná a cáhan ga xihín ná. ²⁰ Jáchi coo ñacandeé ini na táa joho na ña sáhdá Ndióxi nu ná tá ñacachi a já: “Tá ná cani ndaa in ñayivi á in quítí yucu Sinaí yóho já queá xíní ñúhú cuun ndó yuu ná á tuxú ndó na xihín poyá anda ná quivi na”, cáchi Ndióxi. ²¹ Ta a juú quiahva nayihví na sahá ña ñaxini na cán. Ta anda Moisés viti nayihví ndivaha da ta já ñacachi da já: “Quíji ninu í xihín ña yíhvi í”, cáchi da.

²² Joo ña ñacaja mé ndó queá sa ñacayati ndó in nuú naní Sión, mé nu íin Ndióxi, mé a tácu indiví. Mé ñuu cán cúú á tátuhun inga Jerusalén, ña íin indiví ta ndúu cuaha mil táto Ndióxi cán. ²³ Sa ñataca ndó cán caja cáhnu ndó Ndióxi xihín tóco ndihí ñayivi, na mé a ndaa cúú jahyi Ndióxi, mé na ndaa quivi nu libro Ndióxi indiví. Ta sa ñacasaa ndó nu Ndióxi, mé a cája víi saha tóco ndihí ñayivi. Ta ñataca ndó xihín tóco ndihí ñayivi, na sa ñaxihí sanahá, mé na sa nanduu ndaa nu Ndióxi ñacaja mé á. ²⁴ Ta sa ñacayati ndó nuú Jesús, mé a cáhan xoo mí nu Ndióxi. Jáchi sahá ña ñacaja Jesús tá ñaxita nii á ndica crúxu sahá ña cán queá nasahan Ndióxi tühun a nu yo ña ná ndoo cuachí. Joo jíin va ñacaja Ndióxi tá ñaxita nii Abel sanahá ndivaha jáchi najándoho a ini ñani da, da naní Caín sahá ña nasahní ñahá da.

²⁵ Cuéntá coo ndó já ná a quehe núu ndó nu cáhan Ndióxi xihín yo. Jáchi

ñayivi cán, na coo naxeen cája ña cáchi Ndióxi nachahvi na sahá ña núu nacaja na mé ñuyívi yóho. Ta já caja ri Ndióxi xihín mí tá ná quehe núu í tuhun mé á jáchi janda indivi íin mé á cahan xoho. ²⁶ Mé tiempo cán najátaan Ndióxi ñuyívi yóho tá nacahan mé á. Joo já cáchi a já viti: “Vaxi quívi ta játaan tucu í ñuyívi ta mé tiempo cán jáquiji nuu í indivi viti”, cáchi a. ²⁷ Tá nacachi Ndióxi ña inga tucu játaan mé á ñuyívi yóho já cándaq iní ña ndihi sahá ñaha nacavaha mé á. Ta tóco ndihi ñaha, ña a cuú quiji nuu, ña cán coo a anda ama cáa quívi. ²⁸ Ñehe táhvi yo coo í nuú cacomí Ndióxi cuéntá saha yo ta mé cán a cuú quiji nuu a. Sahá ña cán queá ná ndiquiahva í ndixahvi nu Ndióxi ta ná caja cáhnu í mé á xihín ndinuhu iní jáchi cájii ini mé á xihín ña yóho. ²⁹ Jáchi mé a ndaa Ndióxi cúu á tátuhun ñúhu ña cáyi ña jándihi sahá ñaha. Ña cán queá caja mé á ña ná ndihi saha tóco ndihi cuachi.

Ná caja í ña táhan ini Ndióxi xihín

13 A jándacoo ndó ña quíhvi ini ndó na cúu cuéntá Jesús jáchi cúu ná tátuhun ñani ndó á quiahva ndó. ² A ndíndójó ndo ndiquehe vaha ndó na tóho tá ná casaa na vehe ndó jáchi xihín ña yóho java na nandiquehe vaha na táto Ndióxi vatí coo nacandaq ini na ña. ³ A ndíndójó ndo sahá ñayivi ñúhu vecaa ta xíní ñúhú tahnda ini ndó xihín ná jáchi xíní ñúhú cacuu a tátuhun ndácaan mé ndó vecaa xihín ná. Ta a ndíndójó ndo sahá ñayivi, na cája xíxi na xihín ta xíní ñúhú tahnda ini ndó xihín ná jáchi cuu ndoho ini ri ndóhó va tá quiahva ndóho ini na cán. ⁴ Vaha va cája ndó tá tándaha ndo ta xíní ñúhú caja cáhnu ndó yíi ndo á ñájíhí ndo. Ta a ndúcú toho ndó coo ndó xihín inga na jáchi jándoho Ndióxi ini ndá na quíhvi nuu coo xihín na coo cúu yíi na á ñájíhí na.

⁵ A ndiava ini ndó cacomí ndó cuahá jiuhún. Ndítahan cajii ini ndó xihín ña cómí ndo jáchi já cáchi Ndióxi já: “A jándacoo toho í ndohó ta ni a ndíndójó í saha ndo”, cáchi a. ⁶ Sahá ña cán queá cuu candeé iní Ndióxi ta cuu cachí já: Mé á cúu Ndióxi, xitoho í ta chindeé a yehe.

Ta a cáyihvi toho í ndá ñaha ndúcú ñayivi caja na xihín í.

⁷ A ndíndójó ndo sahá na nasacomí cuéntá saha ndo ta ni sahá na nacaxi tuhun tuhun Ndióxi nu ndo. Candehé ndó ndaja nacaja na ñuyívi yóho jáchi nacandeé ini na Ndióxi anda quiahva naxihí na. Ta ndítahan nu mé ndó candeé ini ndó a tá quiahva nacaja na cán.

⁸ Co ndíjama toho Jesucristo. Tá quiahva nasacuu a sanahá ndivaha quiahva já cúu ri a anda viti ta quiahva já coo a anda ama cáa quívi. ⁹ A quiahva toho ndó ñamaní nuú ñayivi ña ná jándahvi na ndohó xihín ña jánaha na nu ndo. Jáchi cúu á sahá ñamaní cája Ndióxi xoho ña ndíndacú ínima yo. Ta coo cúu á sahá ña jánaha java ñayivi tá cáchi na ña a cúu cuxú java ñaha ña ná nduu ndaa ínima yo. Mé a ndaa ña yóho coo chindeé a mí.

¹⁰ Tá naxihí Jesucristo ndica crúxu já najoco a mé a nu Ndióxi saha yo. Joo jíin va nacaja jutú cuéntá na Israel sanahá tá najoco na quíti nu Ndióxi. ¹¹ Jáchi da cúu jutú sacuahá nasañehe da ñii rí naxihí cán ini veñuhu nuú yii ndivaha ta já najoco da dó nu Ndióxi sahá cuachi ñayivi. Joo natavá da yiquí cuñu rí jatá ñuu nu sáhmi na ri. ¹² Ta quiahva já naxihí Jesús jatá ñuu Jerusalén. Ta naxitá ñii a ña ná jándoo a cuachi ñayivi. ¹³ Ña cán queá cóho nuú Jesús. Cúu á tátuhun cuhun í jatá ñuu ta a cácahan nuú yó ndoho iní xihín mé á. ¹⁴ Jáchi ñuyívi yóho coo toho ni in nuú cuu coo í anda ama cáa quívi. Joo ndínducú yo inga ñuu nuú cuu coo í chága chí nuu. ¹⁵ Cóho

caja cáhnu í Ndióxi ní tiempo ta chindeé Jesús mí caja í ña. Ta ña yóho cúú á tá-tuhun ña jóco yo nu mé á sahá ña nacaja tá naxihí a ndica crúxu. Cóho caja cáhnu í mé á xihín yúhu yo jáchi cúú yó cuéntá mé á.¹⁶ A ndíndójó ndo caja vaha ndó ta ná chindeé ndo ñani táhan ndó xihín ña cómí ndo. Jáchi ña yóho cúú á tátuhun ñaha jóco ndo nu Ndióxi ta cájii ini mé á xihín á.

¹⁷ Candúsa ndó na cómí cuéntá saha ndo ta caja ndó ña cúní na. Jáchi nasahan Ndióxi chuun yóho nu ná. Ta tandaa quiví nditahan ndicani na nu Ndióxi sahá ña nacaja na. Caja ndó ña cúní na já ná cajii ini na ta ná a cóo cuéha ini na jáchi a cuú quee vaha ndó já.

¹⁸ Caca tahví ndo nu Ndióxi sahá nde jáchi nandivií ínima nde ta cúní nde caja vaha nde ní tiempo.¹⁹ Caja ndó ñamaní caca tahví ndo sahá í ña ná quiahva Ndióxi ñamaní nuú í saa yachi í nu ndó coto nihni í ndohó.

Xihín tuhun yóho ndihi carta yóho

²⁰ Ña cúní queá ná quiahva Ndióxi ña ná coo vaha iní. Mé a cán najánditacu tucu a Jesucristo, mé a cúú xitoho í. Ta sahá ña nacaja Jesucristo tá naxita nij a

ndica crúxu sahá ña cán queá nasahan Ndióxi tuhun a nu yo ta a ndíhi toho sahá. Ta mé Jesús cómí a cuéntá saha yo tá quiahva in pastó cómí da cuéntá sahá ndicachi janá dá.²¹ Ta ná caja Ndióxi ña ná ndindacú ínima ndó já ná cuu caja ndó tóco ndihi ña cúní a. Ta sahá ña nacaja Jesucristo ná caja Ndióxi xihín yo ndá ña nacuu ña táhan ini mé á xihín. Ná caja cáhnu í Jesucristo anda ama cáa quiví. Já ná coo.

²² Xíca tahví í nu ndo ña ná coo cáhnu ini ndó xihín tuhun cáhan í xihín ndo, ñani í, na cúú cuéntá Jesús. Jáchi carta loho cuití va nacañyí í nu ndo já ná ndindacú ínima ndo.²³ Ta cáxi tuhun í xihín ndo sahá Timoteo, mé da nasandacaan vecaa joo sa najani dá viti. Tá ná casaa yachi da yóho já saa da xihín í coto nihni nde ndohó.

²⁴ Cahán Ndióxi ndó xihín tóco ndihi na jánaha tuhun Ndióxi nuú ñayivi ta cahán Ndióxi ndó xihín tóco ndihi na cúú cuéntá Jesús. Tóco ndihi na cúú cuéntá Jesús, na ndúu nación Italia yóho chíndahá na Ndióxi coo ndó.

²⁵ Ná caja cuaha Ndióxi ñamaní xihín tóco ndihi ndó. Já ná coo.

Carta nacahyí Santiago núú na cúú cuéntá Jesús

Cáhan Ndióxi Santiago xihín na cúú cuéntá Jesús

1 Yehe cúú Santiago, da cája chúun i cuéntá Jesucristo, xitoho í. Chíndahá i Ndióxi coo na Israel, na cúú cuéntá Jesús, mé na nandicuita nuu ndúu níí cúú ñuyíví.

Ndaja caja í candaá ini ña cúní Ndióxi caja í

² Cuni joho vaha ndó, ñani mí i, na cúú cuéntá Jesús. Ndítahan cájii ini ndó tá vaxi tá nuú ña ndóho ini ndó. ³ Jáchí sa xíní ndo ña tá ndóho ini ndó sahá ña cándéé ini ndó Jesucristo já queá catiághva chága ndó quiahva ndeé ini ndó sahá ña ndóho ini ndó. ⁴ Quiahva ndeé ini ndó tá ndóho ini ndó anda quiahva ná xinu coo ña cúní Ndióxi já queá cacuu ndó ñayivi ndaa nu mé á. Ta cuahnu vaha ndó xihín tuhun a ta ni in ñaha a cámaní ga nu ndo.

⁵ Tá co candaá ini ndó ña cúní Ndióxi caja ndó já queá xíní ñúhú caca tahví ndó nu mé á ta quiahva mé á cuahá ña candaá ini ndó. Jáchí co ndáhví cúu ini a quiahva ña nuú ndihi ñayivi. ⁶ Joo tá xíca tahví ndo nu Ndióxi xíní ñúhú candeé ini ndó mé á ta a cáhvi ivi joho ini ndó jáchí mé na cáhvi ivi joho ini, na cán cúú na tátuhun tañuhú tá ndácojo do cája tachí. Ta co íin táji do jáchí xíca dó tá xoo yóho tá xoo cúa cája tachí. ⁷ Jáchí tá ná cahvi ivi joho ini na já queá a cáhán na ña quiahva Ndióxi ñaha nu ná. ⁸ Mé na cáhvi ivi joho ini co xíca ndaa na tucu tucu ndíjama na íchí nu xíca na.

⁹ Ta na cúú cuéntá Jesús tá cúú ná na ndáhví ndítahan cájii ini na jáchí na náhnu cúú ná nu Ndióxi. ¹⁰ Ta na cuicá,

na cúú cuéntá Jesús ndítahan cajii ini na jáchí co yáhvi toho jiyuhún na nu Ndióxi. Jáchí tá quiahva íin itá yucu yachí íchí a ta ndicava ña quiahva já yachí quivi na cuicá. ¹¹ Jáchí tá naxinu coo cándii ta nacahihní já queá cama ndivaha íchí mé yucu ta ndicava ita nu á. Já ndihi va ña ñúhí ndáa jáchí nandihí sahá. Quiahva já ndoho na cuicá jáchí jonáa va ndihi sahá ná ta jándicoo na ña cája na.

Tá ndóho ndó tondóhó

¹² Ndaja tahví nacuu na sáhan ndeé ini tá ndóho ini na jáchí tá nandihí nasahan ndeé ini na já queá ñehe táhvi ná coo na xihín Ndióxi anda ama cúa quivi. Jáchí nasahan Ndióxi tuhun a nu yo ña tá cúní yo mé á já queá coo í xihín á anda ama cúa quivi. ¹³ Tá ná ndicají ini ndó caja ndó ña núu já queá a cáhán ndo ña xító ndojó Ndióxi ndohó. Jáchí a cúu caja Ndióxi ña núu ta co cúní a ña ná caja ñayivi ña núu. ¹⁴ Joo tá cája ndó ña núu cúú á sahá ña xíca ini ndó caja ndó ña ta xihín ña yóho ndicava ndó nuú cuachi. ¹⁵ Jáchí sahá ña núu xíca ini ñayivi caja na sahá ña cán cásahá na cája na cuachi. Ta tá sa nandicuahá cuachi na já queá cuhun na चाहví na sahá ña cája na ini indayá anda ama cúa quivi.

¹⁶ Cúní ndivaha i ndohó, ñani mí i na cúú cuéntá Jesús. A jándahvi ndó mé ndó. ¹⁷ Jáchí tóco ndihi ña vaha quíxi a indiví nu íin Ndióxi ta mé á sáhan ña vaha nu yo. Já íin va Ndióxi jáchí cája tá cája ña vaha cuití va. Ta co ndíjama toho Ndióxi. Ta mé Ndióxi, tátá yo nacavaha ña ndíyéhe íin indiví. Ta ndá tañu ndíjama táhan ña íin indiví joo Ndióxi co ndíjama toho a. ¹⁸ Jáchí cúní Ndióxi jácacu a mí sahá ña cándúsa í tuhun mé á ña cúú ña ndaa. Jáchí cúní Ndióxi ña ná cacuu na nu cuítí tañu tóco ndihi ñaha nacavaha mé á.

Ndaja caja í ndiquehe vaha í tuhun vaha cáhan sahá Jesús

¹⁹ A ndíndójó ndo ña cáhan í xihín ndo jáchi cúní ndivaha í ndohó, na cúu cuéntá Jesús. Ndítahan nu ndó cuni joho vaha ndó tá cáhan inga na xihín ndo. Ta a cácoma ini ndó nducú ñehe ndó tuhun ña cáhan inga na xihín ndo. Ta a cójo ini ndó xihín ná. ²⁰ Jáchi tá xójo ini ndó xihín inga na já queá caja ndó ña co cúní Ndióxi. ²¹ Ña cán queá cacu xóo ndó ndihi ña núu ta jándicoo ndó ndihi cuachi caja ndó jáchi ndúu cuahá na caja tá nuú cuachi tañu ndó. Joo xíní ñúhú jánuu ndáha ndó mé ndó nu Ndióxi ta ndiquehe vaha ndó tuhun mé á ña nacahan na xihín ndo jáchi tá ná candúsa ndó ña já queá jácacu Ndióxi ndohó.

²² Xíní ñúhú candúsa ndó caja ndó tuhun Ndióxi jáchi co yáhvi toho a tá xíní joho uun va ndó ña. Ta xihín ña yóho jándahvi ndó mé ndó. ²³ Ndá na co cándusa caja ña cáchi tuhun Ndióxi cúu ná tátuhun in da sándehe nuu nuú yutátá. ²⁴ Tá nandihí nasándehe da nuu dá já quee da cuahan da ta cama chá ndíndójó da ndaja cáa nuu dá. ²⁵ Joo mé ñayivi tá jácuaha na tuhun Ndióxi ta co ndíndójó na caja na ña cáchi a já queá caja yíi Ndióxi tóco ndihi ña caja na jáchi ña ndaa cúu tuhun Ndióxi. Tá caja í ña sáhdá tuhun Ndióxi nu yo caja í já queá co sáhdá ga cuachi chuun nu yo ta já ndinuhu iní caja í ña cúní Ndióxi.

²⁶ Cúu á tátuhun tá ñin in dataa tañu ndó ta cáhan da caja da ña cúní Ndióxi joo co ndáa da yúhu dá tá cáhan da sahá ñani táhan da já queá jándahvi da mé va da ta cóo saha toho ña caja da nu Ndióxi jáchi co caja da ña cáchi tuhun Ndióxi. ²⁷ Jáchi tá mé a ndaa nandihvi in da íchi cuéntá Jesús já cúu dá taa ndaa nu Ndióxi, tátá yo. Ta chíndeé da na cuáan ta chíndeé da na sánchó tá ndóho ini na. Ta cándeé ini da Ndióxi ta tává da mé

dá nuú cuachi jáchi co caja da ña núu tá quiahva caja ñayivi ñuyíví.

A caja ichi ini ndó xihín na ndahví

2 Cuni joho vaha ndó, ñani mí i, na cúu cuéntá Jesús. Mé ndó cándeé ini ndó Jesucristo, xitoho í, mé a cúu ña cáhu ndivaha. Ndítahan quihvi ini ndó na ndahví tá quiahva quihvi ini ndó na cuicá. ² Ña ndítahan caja ndó cúu ña yóho: Tá ná taca ndó caja cáhu ndó Ndióxi ta vaxi in da cuicá ndihvi da nu táca ndo ta ndíxi da jáhma vaha ndivaha ta ndácaan jéhe jiyhun cuáan nducu ndáha dá. Ta mé tañu já vaxi in da ndahví, da ndíxi jáhma núu ña yatá. ³ Ta ndíquehe vaha ndó mé da cuicá ta cáchi ndó xihín dá: “Silleta vaha coo ndó”, cáchi ndó xihín da cuicá. Joo xihín da ndahví cáchi ndó já: “Candichi ndó jan á coo ndó nu ñúhu yóho”, cáchi ndó xihín da ndahví. ⁴ Tá caja ndó ña yóho já queá caja ichi ini ndó xihín da ndahví ta caja cáhu ndó da cuicá sahá jiyhún da. Ta cáhvi núu ini ndó jáchi cáhan ndo ña ñin chága sahá da cuicá a juú ga da ndahví.

⁵ Cúní ndivaha í ndohó, ñani i, na cúu cuéntá Jesús. Ña cán queá cúní ña ná candaa vaha ini ndó ña naçaxi Ndióxi na ndahví ndúu ñuyíví yóho ná cacuu na na náhu nu Ndióxi tá cándeé ini na mé á. Jáchi nasahan Ndióxi tuhun a nuú ndihi na cán ña ná cacúní na mé á já queá ñehe táhvi ná cuhun na indivi coo na xihín mé á anda ama cáa quivi. ⁶ Joo mé ndó caja ichi ini ndó xihín na ndahví. Á co ndícuahun ini ndó ña mé na cuicá cúu ná na caja xíxi xihín ndó ta ñúhu na ndohó cuahan na nuú na jutixia chácaan na cuachi jata ndo. ⁷ Jáchi mé na cuicá cáhan núu na saha Jesucristo ta mé ndó cúu ndó cuéntá mé á.

⁸ Sáhdá tuhun Ndióxi chuun nu yo já cáchi a já: “Tá quiahva quihvi ini ndó mé ndó quiahva já ndítahan quihvi ini ndó ñani táhan ndó”, cáchi tuhun Ndióxi. Tá

ná caja ndó ña cáchí a yóho já queá cája vaha ndó jáchí ña yóho cúu á ley cáhnu nū Ndióxi. ⁹Joo cája ndó cuachi nū Ndióxi tá ndiquehe vaha chága ndó ña cuíca a juú ga ña ndahví. Ta xihín ña yóho chícaan ley Moisés cuachi jata ndó. ¹⁰Jáchí vatí nasacu vaha in ñayivi ndihi ley Moisés joo sahá in ñaha coó ñacaja na sahá ña cán queá ndójo na cuachi saha tóco ndihi ley. ¹¹Jáchí sa mé Ndióxi cáchí a já: “A quihvi nuu ndó xihín ñájíhí ñani táhan ndó”, ta já cáchí tucu a já: “A cáhni ndó ndji”, cáchí a. Ña cán queá cája ndó cuachi nū Ndióxi tá sáhní ndó ñayivi vatí co quihvi nuu ndó coo ndó xihín ñájíhí ñani táhan ndó. ¹²Ndítahan cája vaha cuití va ndó ta cahan ndaa cuití va ndó jáchí vaxi quivi cája víí Ndióxi saha yó xihín ley mé á ña jácaacu mí. ¹³Tá co táhnda ini ndó sahá ñayivi já queá a táhnda ini Ndióxi saha ndó tá ná casaa quivi cája víí a sahá cuachi ñacaja ndó. Joo tá ñatahnda ini ndó sahá ñayivi já queá quee vaha ndó tá ná cája víí Ndióxi sahá ña ñacaja ndó ñuyiví yóho.

Tá cándéé iní Ndióxi já cája í ña cúni mé á

¹⁴Cuni johó vaha ndó, ñani mí i, ña cúu cuéntá Jesús. Tá cáchí ndó cándéé ini ndó Jesucristo joo co cája ndó ña vaha já queá co yáhví toho nū Ndióxi ña cándéé ini ndó mé á. Ta sahá ña yóho a cúu toho jácaacu Ndióxi ndohó. ¹⁵Cúu á tátuhun tá íin in ña cúu cuéntá Jesús ta cámaní jáhma candixi na ta cámaní ña cuxu na quivi víti. ¹⁶Ta cáchí ndó xihín ña cán já: “Ná coo vahún ta ná candixi vahún ta ná cuxu vahún”, cáchí ndó xihín ná. Joo co sáhan ndó jáhma candixi na ta ni ña cuxu na co sáhan ndó nū ná ña cán queá coo chuun cúu ña cahan ndó xihín ná. ¹⁷Ña cán queá tá cáchí ndó cándéé ini ndó Jesucristo joo co cúni ndó cája ndó ña vaha, ña cúni Ndióxi

cája ndó já queá mé a uun cándúsa ndó Jesucristo.

¹⁸Tá íin in ña cúu cuéntá Jesús ta co cúni ña cája da ña cúni Ndióxi já queá co jánaha ña nuú ñayivi ña mé a ndaa cándéé ini da Jesucristo. Tá íin inga da ta cája tá cája da ña cúni Ndióxi já queá jánaha ña nuú ñayivi ña mé a ndaa cándéé ini da Jesucristo. ¹⁹Tá cándúsa ndó ña íin in tálaá cuití Ndióxi já queá vaha cája ndó. Jári rí quini cándúsa rí ña íin in tálaá cuití Ndióxi. Joo co cándúsa rí cája rí ña cúni Ndióxi ta yíhví ndivaha rí mé á janda quíji nū rí. ²⁰Á ñacatóntó jini ndó. Candehé vaha ndó. Tá cáchí ndó cándéé ini ndó Ndióxi joo co náha ndó xihín ña cája ndó ña mé a ndaa cándéé ini ndó mé á já queá coo saha mé va ña cája ndó. ²¹Á co ndícuhun ini ndó Abraham, tásáhnu jícó yo. Nandiquehe vaha Ndióxi Abraham sahá ña ñacaja da ta cáchí Ndióxi ña cúu dá ña ndaa nū mé á jáchí ñacandúsa mé Abraham cahni ña Isaac, jahyi da, ña joco ñahá ña nū mé á. ²²Candehé ndó. Tá ñacandúsa Abraham joco ña jahyi da nū Ndióxi já najánaha ña nuú ndihi ñayivi ña cándéé ini da Ndióxi. Ta sahá ña ñacaja da já ñaxinu coo da cándéé cáhnu ini da Ndióxi. ²³Jatá ña ñacaja Abraham ñaxinu coo tuhun Ndióxi tá cáchí a já: “Ñacandéé ini Abraham Ndióxi ña cán queá ñanduú da ña ndaa nū mé á”, cáchí tuhun Ndióxi. Ñacachi na sahá Abraham ña cúu dá ña nandique táhan máni xihín Ndióxi. ²⁴Ña cán queá cándaa vaha iní ña nduu ndaa yo nū Ndióxi sahá ña cándéé iní Ndióxi anda quiahva cándúsa í cája í ña cúni mé á. ²⁵Já ñayaha xihín Rahab, mé ña ñaxica jii sanahá ndivaha. Ñanduú ndaa ña nū Ndióxi sahá ña ñacaja ña xihín ñayivi Israel jáchí nandiquehe vaha ña java dataa ñachindahá Josué ñuu Jericó. Ta ñachindeé ña ña ná ndijama da íchi nuú cuhun ña. ²⁶Ña cán queá tá cáchí yo cándúsa í Ndióxi joo

co cája í ña cúní mé á já queá cúú yó tátuhun ñayivi sa naxihí, na sa cuahan ínima.

3 Cuni joho vaha ndó, ñani mí i, na cúú cuéntá Jesús. A ndúcú cuaha ndó cacuu ndó na jánaha tuhun Ndióxi nuú ñayivi jáchi cándaá vaha ini ndó ña tá co jánaha ndó ña ndaa já queá jándoho chága Ndióxi ini ndó a juú ga java ga ñayivi. ²Tóco ndihí cája cuaha yó cuachi. Joo ndá na cuu cahnda chuun nu yúhu ná ña ná a cáhan quini a já queá cuu cahnda na chuun nuú yiquí cuñu na viti ña ná a cája na cuachi ta já xinu coo na cacuu na ñayivi ndaa nu Ndióxi. ³Á co ndicuhun ini ndó ndaja chícagan na in freno yúhu cuáyí ña ná candaca na ri. Vatí loho ndivaha cúú mé freno joo cuu cañehe na rí nu cúní mé ná cuhun na. ⁴Candehé ndó in barco. Vatí cáhnu ndivaha cúú dó ta vaxi tachí ndeé ndivaha joo mé da ñehe dó cuu candaca da do xihín in timon loho ta cuu cañehe da do cuhun dó nu cúní mé dá. ⁵Tá quiahva sáhdá na chuun nu cuáyí xihín barco quiahva já cája í xihín yúhu yo. Vatí loho ndivaha cúú mé yúhu yo joo xihín mé yúhu yó cuu caja cáhnu í mé ví. Candehé ndó ndaja náhnu yúcu jáquihví ñúhu in titó loho tá ndicava dó nu á ta chícáyí yúcu anda quiahva ndihi sahá. ⁶Tátuhun in ñuhú cáyí cúú yúhu yo. Cúú á in ña núu ndivaha ndacaan tañu yiquí cuñu í ta játiví ndihi a mí. Ta cúú á tátuhun ña sa mé indayá sáhan chága ví a ñúhu nu á ña ná caja quini a ta jándihi a saha yo. ⁷Vatí ñayivi cándeé na sáhnú na nu tóco ndihi quítí xihín laa xihín coo xihín quítí ñúhu tañuhú ta cúú sáhdá na chuun nu ri. ⁸Joo ni in ñayivi a cuú cahnu na yúhu na jáchi co sájí yo yúhu yo tá cáhan quini sahá ñayivi. Cúú á tá quiahva cája coo tá tñin rí ñayivi chícagan rí veneno rí na já sáhní rí na. ⁹Xihín mé yúhu yo cuahá tañu cája cáhnu í Ndióxi ta sa xihín mé yúhu yo yóho cánahá yo xihín

ñayivi, na nacavaha Ndióxi yuhú nuú mé á. ¹⁰Ndá tañu cáhan vaha í xihín yúhu yo ta java tañu quini cáhan yo xihín mé yúhu yo. Candehé ndó, ñani mí i, na cúú cuéntá Jesús. Co ndítahan toho caja í ña yóho. ¹¹Jáchí cúú á tátuhun in chícoco nu cána ticuíí. A cuú cana ticuíí viji xihín ticuíí ova ini in chícoco. ¹²Ta sa xíní vaha ndó, ñani mí i ña in titó ñuhú co sáhan dó aceituna jáchi cúú dó titó ñuhú va. Já in yucu uva co sáhan toho a titó ñuhú jáchi cúú á yucu mé uva va. Ña cán queá sa xíní vaha ndó ña co ñúhu ticuíí viji xihín ticuíí ova ini in chícoco.

Ndaja íin na ndíchí jini cuéntá Ndióxi

¹³Tá íin in taa ndíchí, da tácu ini tañu ndó já queá ndítahan caja vaha da ta xihín ña yóho jánaha da nuú ñayivi ña cúú dá taa ndíchí. Tá co cája lándá da sahá ña cája da já queá jánaha da nuú ñayivi ña mé a ndaa cúú dá taa ndíchí. ¹⁴Tá ná ndicutú ndaa ini ndó xihín ña ihví ini ndó já queá a cáhan ndo cúú ndó na ndíchí. Ta tá ná caja ndó ñaha sahá ña cúní ndó ndiñehe jícó ndo mé ndó já queá a cáhan ndo ña cúú ndó na ndíchí. Jáchí mé da ndíchí co cája cáhnu da mé dá ta co cáhan túhún da jáchi mé a ndaa cúú dá taa ndíchí. ¹⁵Joo tá cája cáhnu da mé dá já queá cándaá ini ndó ña co ndíchí jini dá nu Ndióxi jáchi tuhun cáhan da coo naquixi a indiví nu íin Ndióxi. Cáhan da tuhun ñayivi ñuyiví yóho va ta jini mé va da vaxi a. Ta tuhun cáhan da cúú á tuhun núu, ña quixi nuú tiñahá sacuaha. ¹⁶Jáchí nu ndúu na ihví ini mé cán ndúu na co cúní táhan ta sa mé cán cáni táhan na ta cája na tóco ndihi nuú cuachi. ¹⁷Joo na ndíchí jini cáhan na tuhun quixi indiví nu íin Ndióxi. Ndinuhu ña vaha cája na ta co xójo ini na xihín ñayivi. Cája cáhnu ini na sahá ñayivi. Co xíxi ini na xihín ñayivi jáchi táhnda ini na saha ná. Cája na ña vaha cuití va. Cáhan na ña

ndāa cuití va ta co jándahvi na ñayivi.
¹⁸ Vatí cúní ñayivi cáni táhan na xihín na ndíchí joo ndúcú na coo vaha ini na xihín ndihi ñayivi ta já cúu ná ñayivi ndaa nu Ndióxi.

A cándico toho ndó íchí cuéntá na ñuyívi

4 Ndávaha ri cáni táhan ndó ta já quihvi ndó tondóhó tañu ñayivi. Cáni táhan ndó sahá ña ndícají ini ndó caja ndó cuahá nuú cuachi ña xíca ínimā ndo. Ta cúu á tátuhun cáni táhan ña vaha xihín ña núu ini ínimā ndo ² jáchi xíca ini ndó coo cuahá ñaha nu ndo joo a cuú ñehe ndó a. Ña cán queá sáhní ndó ñayivi já ñehe ndó ña cúní ndo. Cáhíhvi ini ndó tá xíní ndo ñaha inga na ta a cuú ñehe ndó a, ña cán queá cáni táhan ndó xihín ná. Joo co ñehe ndó ña cúní ndo jáchi co xíca tahví ndo nu Ndióxi sahá ñaha cámaní nu ndo. ³ Tá xíca ndo ñaha nu Ndióxi ta co sáhan mé á ñaha nu ndo já queá cándāa vaha ini ndó ña co íin vaha ínimā ndó nu Ndióxi jáchi nasacu ini ndó caja ndó ña cúní mé cuití ndo. ⁴ Tá quiahva cája ñañáha tá jándahvi ná yíí ná xihín inga datāa quiahva já cája ndó cuachi ña co táhán ini Ndióxi xihín. Á co cándāa ini ndó ña tá ná caja í tá quiahva cája ñayivi ñuyívi yóho já queá nduu na co cúní táhan xihín Ndióxi. Ta a cuú ndique táhan maní yó xihín mé á tá ná caja í ña núu ñuyívi yóho. ⁵ Jáchi sa xíní vaha ndó ña íin saha cáhan tuhun Ndióxi tá cáchí a já: “Nachicaan Ndióxi ínimā yíí mé á ini in in í jáchi cúní ndivaha mé a mí ta chí táhvi ndivaha ini a saha yo.” ⁶ Joo cája Ndióxi cuahá ga ñamaní xihín yo ta chindee a mí. Já cáchí tuhun Ndióxi já: “Co táhán ini Ndióxi xihín ñayivi, na ndínehe jícó mé. Joo chindee Ndióxi ñayivi vaha, mé na co ndínehe jícó mé”, cáchí tuhun Ndióxi. ⁷ Ndiquiahva ndó mé ndó ndáha Ndióxi ta chicaji ndó ínimā ndo nuú tiñáhá

sacuaha ná a cája ndó ña cúní ri. Anda jávi cunu rí cuhun ri. ⁸ Cayati ndó nu Ndióxi ta já cayati Ndióxi nu ndo. Jándicoo ndó cuachi cája ndó ta ndaja víí ndó ínimā ndo ña ná cándico ndó in túhún íchí cuéntá Jesús cuití va. ⁹ Cajuahú ini ndó ta ndahyi cóho ndo sahá cuachi cája ndó. Ndjama ndó ña cájii ini ndó ta ná nduu a ña cacueha ini ndó sahá cuachi ndó. ¹⁰ A ndínehe jícó ndo mé ndó nu Ndióxi já queá ndínehe jícó Ndióxi ndohó.

A cáhan núu ndó saha inga na

¹¹ Candehé ndo, ñani mí i, na cúu cuéntá Jesús. A cáhan núu saha táhan ndó ta a candehé ndaa táhan ndó. Jáchi ndá da cáhan núu sahá inga na já cáhan núu da saha ley Ndióxi ta sáji nuu da nu ley. Co ndítahan nu yo caji nuu í nu ley Ndióxi jáchi tá cája í já já queá quehe núu í ley Ndióxi ta sándehe ndaa í ña. Ña ndítahan nu yo caja í queá candúsa í ña ta caja í ña. ¹² Jáchi in túhún Ndióxi nasahan ley nu yo. Ta mé Ndióxi cúu á juéxe cáhnu nuú ndihi ñayivi ta mé á cuu caja víí a saha cuachí. Ndióxi cuití va cuu jácacu mí ta sa mé Ndióxi cuu chindahá mí indayá. Ña cán queá co ndítahan nu yo candehé ndaa táhan í.

Tá cáhan í saha ña caja í itaan

¹³ Ndúu java na tañu ndó ta cáchí na: “Viti á itaan cuhun tá cuhun nde in ñuu cáhnu ta cán canduu nde in cuia caja chúun nde ta ñehe cuahá nde jjuhún”, já cáchí java na. Tá cáhán ndo já ndítahan cuni johó vaha ndó ña cáhan í xihín ndo. ¹⁴ Co xíní toho ndó ndíá ndoho ndó itaan. Co xíní toho ndó ndá quívi quivi ndó. Cúu ndó tátuhun in vico ña íin tóo loho ta tá nandihí sa coo a. ¹⁵ Vaha chága ná cachi ndó já: “Catacu nde quívi itaan tá cúní Ndióxi. Ta caja nde ña jan á ña yóho tá cúní Ndióxi”, já cachi ndó. ¹⁶ Joo cája cáhnu ndó mé ndó tá cáchí

ndó ña cándaꝝ ini ndó ndíꝝ ndoho ndó quiví itaꝝ. Ta núu ndivaha cája ndó tá cája cáhnu ndó mé ndó. ¹⁷ Cuachi ndácaꝝ nuú na tiahva caja ña vaha ta co cája na ña.

Cáhan Santiago nuú na cuicá

5 Cuni joho vaha ndó na cuicá. Ndítahan nu ndó ndahyi cóhó ndo ta tahn-
da ini ndó jáchi vaxi quiví ndoho ini ndó. ² Nacasáhá táhyi tóco ndihi ñaha najá-
taca ndó ta nasaxi ndihi tiqijí jáhma
ndo. ³ Nacuju ndihi jihun cuáan xihín
jihun cúxú ña najátaca ndó catacu vaha
ndó quiví chága chí nuu. Joo co yáhvi
ga viti jáchi vaxi quiví tá nahá ña na-
cájhnda ndivaha ndó xihín jihún ndó.
Tá quiahva jándihi ñuhú cáyi sahá tutu
quiahva já ndihi sahá ndó tá chínúu ndó
ínima ndó jatá jihún ndó. ⁴ Candehé
ndó. Mé ndó coo nachahvi ndó mozo ndo
tá najácaja chúun ndó na nuú utu ndó.
Ta viti sácu cóhó na ndáca na cuéntá
nu ndo. Ta tá xíca tahví na nu ndo já
queá anda nu Ndióxi, mé á cáhnu ndi-
vaha, xínu coo ña cáhan na xihín ndo.
⁵ Mé ñuyiví yóho ndúu vaha ndó xihín
ña cuicá ndo ta cája ndó ña xíca ini
cuití va ndó. Xíxáhan vaha ndó ta viti
nandaha ndó tátuhun tindiqivi, rí naján-
daha chuun na cahní na. ⁶ Ta chícaꝝ
ndó cuachi jatá ñayivi ndaꝝ ta ndá tañu
sáhní ndó ñayivi vaha, mé na a cuú chín-
deé mé.

A candati númí ndó quiví quixi tucu Jesucristo

⁷ Candehé ndo, ñani mí i, na cúu
cuéntá Jesús. A ndíhi ini ndó ta cuéé coo
ini ndó candati ndó quiví quixi tucu Je-
sucristo, mé a cúu xitoho í. Tá quiahva
ndátí in dataꝝ jáquee da nuú utu da
quiahva já ndítahan candatí Jesucristo
ña quixi tucu a. Jáchi sa xíní ndo ndaja
cája in dataꝝ tá ndátí da cuun vaha javi
nuú tata ña nachihin da. Joo co ndátí

númí dá ña ná jáquee da nu á. ⁸ Quiahva
já ndítahan cuéé coo ini ndó candati ndó
quiví quixi tucu Jesucristo. Cacú ndacú
ndó ínima ndo jáchi jalóho cúni ndin-
daa quiví quixi tucu Jesucristo. ⁹ Can-
dehé ndo, ñani mí i. A cáhan cuachi nu
táhan ndó ná a jándoho Ndióxi ini ndó.
Ta viti jalóho cúni quixi Ndióxi, ña cúu
juéxe cáhnu caja ví a sahá cuachi ñayivi.
¹⁰ Á co ndícuhan ini ndó, ñani mí i. Sa-
nahá ndivaha mé na profeta Ndióxi na-
cáhan na tuhun Ndióxi nuú ñayivi. Tá
quiahva nasahan ndeé ini na tá nandoho
ini na quiahva já ndítahan nu mí quiahva
ndeé iní tá ná casaꝝ quiví ndoho iní.
¹¹ Ta ñéhe táhvi mé profeta ña cájii ini
na viti jáchi nasahan ndeé ini na tá nan-
doho ini na. Á coo naxini joho ndó sahá
in da naní Job. Vatí nandoho ndivaha ini
da joo nasahan ndeé ini da tá nandoho
ini da já queá nacaja cuhá Ndióxi ña-
maní xihín dá. Xihín ña yóho cándaꝝ iní
ña táhnda ini Ndióxi sahá ñayivi jáchi
quihvi ini a na.

¹² Cuni joho vaha ndo, ñani mí i
jáchi cáhnu chága tuhun yóho nuú ndíhi
tuhun. Co ndítahan tává ndo quiví indiví
ni quiví ñuyiví ni quiví inga ñaha. Jáchi
ndítahan cáhan ndó ña ndaꝝ cuití va. Ta
tá ndúcú ñehe ndó tuhun já cáchí ndó já:
“ajan”, á tá coo já cáchí ndó: “uhun.” Já
cuití va cachi ndó ná a jándoho Ndióxi
ini ndó.

¹³ Tá fin in na ndóho ini tañu ndó, ndí-
tahan nu ná caꝝ tahví na nu Ndióxi sahá
ña ndóho ini na. Tá fin in na cájii ini tañu
ndó, ndítahan nu ná cata na nu Ndióxi
já ná caja cáhnu na mé á. ¹⁴ Tá fin in na
quihvi tañu ndó já queá ndítahan nu ná
caꝝ na ñamaní nuú na sacuaꝝ veñuhu
ña ná quixi na caꝝ tahví na nu Ndióxi
sahá ná. Ta ná cuyu na sítí jiní na quihvi
ña ná ndivaha na. ¹⁵ Ndítahan nu ndó
candee ini ndó Ndióxi tá ná caꝝ tahví
ndo nu á sahá na quihvi já queá ndi-
vaha na quihvi caja Ndióxi. Ta tá na-

caja na cuachi já queá caja cáhnu ini Ndióxi sahá cuachi na. ¹⁶ Ña cán queá ndítahan nu ndó nahma nu táhan ndó cuachi ndó. Ta ndítahan nu ndo caca tahví ndo nu Ndióxi sahá ndaja táhan ndo já queá ndaja vaha Ndióxi ndohó tá quíhvi ndo. Jáchi chíndeé Ndióxi ñayivi vaha tá xihín ndinuhu ínimá ná xíca tahví na nu mé á. ¹⁷ Á co ndícuñun ini ndó da naní Elías, da nasacuu profeta sanahá. Nasacuu da ñayivi tátuhun mí. Ta xihín ndinuhu ini da naxíca tahví da nu Ndióxi ña ná a cúun javi. Ña cán queá

tañu uní cuia java coó nacuun toho javi. ¹⁸ Ta tá nandihí cán naxíca tahví tucu da nu Ndióxi ña ná casahá cuun tucu javi. Ña cán queá nacasahá cúun tucu javi chí nanana ndihí yucu cúí ñundáhyi cán.

¹⁹ Candehé vaha ndó, ñani mí i, na cúú cuéntá Jesús. Tá íin in na tañu ndó ta najándicoo na íchi cuéntá ña ndaa ta tá in ndó najándicoo coo ndó na cán ña ná caca tucu na íchi cuéntá Jesús ²⁰ já queá najáca cu ndó mé na cán ña ná a cúñun toho na indayá. Ta já caja cáhnu ini Ndióxi sahá cuahá cuachi naja na.

Cártá nacahyí Pedro nu cúití

Cáhan Ndióxi Pedro xihín na cúu cuéntá Jesús

1 Yehe cúu Pedro ta cúu u in após-tol cuéntá Jesucristo. Ta chindahá i Ndióxi coo ndó, na nacaxi mé á jáchi cúu ndó na tóho ñuu jan sahá ña nataxi ñayivi ndohó ñuu ndó. Ta viti nandicuíta nuu ndó ndúu ndó estado Ponto xihín estado Galacia xihín estado Capadocia xihín estado Asia xihín estado Bitinia. ²Cúu ndó na nacaxi Ndióxi, tátá yo jáchi janda saha nasacu ini mé á caja já xihín ndo. Ta xihín ínimá yii mé á nandaja ndohó ña ná nduu ndó cuéntá mé á já ná caja ndó ña sáhdá a nu ndó caja ndó. Ta nacaxi a ndohó já ná ndivií ndo xihín nii Jesucristo. Ná caja cuahá ndivaha Ndióxi ñamaní xihín ndo ta ná caja mé á ña ná coo vaha ndivaha ini ndó.

Jácaçu Ndióxi ñayivi

³Ná caja cáhnu yó Ndióxi, mé á cúu tátá Jesucristo, xitoho í jáchi táhnda ndivaha ini mé á saha yo ta nacaja ña tácu yó cuéntá mé á viti. Já nacaja jáchi nanditacu tucu Jesucristo ta mé a ndaa cándaq vaha iní ña jáxinu coo Ndióxi tühun a nasahan nu yo. ⁴Ta nasacu ini a quiahva cuahá ndivaha ña vaha ín indiví cán nu ndo. Mé ña vaha ín cán a cuú ndihi sahá ta ni co íchi a ta a cáyatá toho ña. Ta nasacu vaha Ndióxi mé ña vaha ín indiví cán anda tandaa quiví saq ndó cán. ⁵Cándeé ini ndó Ndióxi sahá ña cán queá xihín ndée mé á chindeé a ndohó nuú ña ihvi vaxi nu ndo anda xinu coo quiví nu ndíhí. Janda jávi cuni ndó ndá quiahva jácaçu a ndohó.

⁶Ña cán queá ndítahan nu ndó cajii ndivaha ini ndó viti vatí vaxi quiví ndoho ini ndó sahá tondóho quixi nu ndo. ⁷Tá ná candee cáhnu ini ndó

Ndióxi cúu á tátuhun jühun cuáán. Ta tá quiahva cája in dataa tá jáyaha da jühun cuáán nu ñuhú cáyi ña xito ndojó da ña quiahva já cája ri Ndióxi coto ndojó a ndohó ña ná nahá ña mé a ndaa cándeé cáhnu ini ndó mé á. Ta ndíyahvi chága ña cándeé ini ndó mé á a juú ga jühun cuáán, ña ndihi saha. Ña cán queá tá ná quixi tucu Jesucristo já cahán vaha mé á sahá ña nacaja ndó ta já ndaja cáhnu a ndohó jáchi nacandee ini ndó mé á.

⁸Quíhvi ini ndó Jesucristo ta cándeé ini ndó a vatí a ñaha cuni ndó a. Ña cán queá nacaan ndó cájii ini ndó ta ña yóho cúu á ña cáhnu ndivaha nu mé á. Ta ni co ñéhe ndó tühun ndá quiahva ndicani ndó ña yóho nuú ñayivi. ⁹Cájii ini ndó jáchi cándaq ini ndó ña jácaçu Ndióxi ndohó sahá ña cándeé ini ndó mé á.

¹⁰Anda sanahá ndivaha najáyaha na profeta tühun nacahan Ndióxi xihín ná nuú ñayivi. Ta cáchi na ña vaxi quiví caja cuahá Ndióxi ñamaní xihín ñayivi ña jácaçu a na nuú cuachi na. Ta vatí najácuaha na tühun mé á joo coo nacandaq ini na ndaja caja Ndióxi jácaçu a ñayivi. ¹¹Ta ñúhu ínimá yii Jesucristo ini ínimá na profeta ta nacaja mé á ña ná cahyí na nuú tutu ña nacahan mé á xihín ná. Ta nacahyí na ña vaxi quiví ndoho ndivaha ini Jesucristo joo tá ndíhí já ndicáhnu ndivaha mé á. Ta nanducú na cán candaq ini na yo cacuu Jesucristo ta ndá tiempo cacu a. ¹²Nacaja Ndióxi ña ná candaq ini na profeta ña a yáha yachi toho ña nacahyí na nuú tutu jáchi cacuu a ña coo tiempo vaxi chí nuú. Jáchi saha mé ndó nacahyí na ña nuú tutu ta java ñayivi sa nacaxi tühun na mé tühun vaha saha Jesucristo nu ndo. Ta nachindahá Ndióxi mé ínimá yii mé á ña ná quixi a indiví ta nachindee a na ña ná cahán na tühun vaha saha Jesucristo nu ndó. Ta janda mé táto Ndióxi cuni na candaq ini na ña yóho.

**Ndítahan nu yo caja í tá
quiahva cája Ndióxi**

¹³ Ña cán queá caja tiahva ndó xíní túni ndo ña ná caja ndó ña cúní Ndióxi. Cahnu ndó xíní túni ndo ta coo tiahva ndó candati ndó ná jáxiñu coo Ndióxi tühun a ña caja cuaha mé á ñamani xihín ndo tá ná xinu quivi quixi tucu Jesucristo. ¹⁴ A cácuu ndó ñayivi sáá ini jáchi cúu ndó jahyi Ndióxi. Co ndítahan ga cája ndó ña núu ña naxica ini ndó caja ndó tá cámaní candaa ini ndó tühun Ndióxi. ¹⁵ Ña ndítahan caja ndó queá caja ndó ña cúní Ndióxi xihín ndinuhu ini ndó já ná cacuu ndó ñayivi yii. Jáchi Ndióxi, mé á nacaxi ndohó cúu á ña yii. ¹⁶ Jáchi já cáchí tühun Ndióxi: “Ndítahan cacuu ndó ñayivi yii jáchi yehe cúu u Ndióxi yii.”

¹⁷ Ta tá ná cachi ndó “tátá Ndióxi” já ndítahan caja cáhnu ndó a nani ndúu ndó ñuyíví yóho. Jáchi mé á cája víí a sahá ña cája in in ñayivi ta coo sáhní toho a mé á ndá ñayivi cúu ná. In nuú cája mé á xihín ndihi na. ¹⁸ Jáchi mé Ndióxi najácacu a ndohó nuú ndihi ña núu nacaja ndó sanahá. Ta ña yóho cúu ña nacatiahva ndó nacaja tásáhnú jícó ndo. Ta sa cándaqa vaha ini ndó ña coo nachahvi Jesucristo sahá cuachi ndó jan xihín jjuhun cuáán á xihín jjuhun cúxú, ña ndihi saha. ¹⁹ Ña nacaja mé á queá nachahvi a sahá cuachi ndó xihín nii mé á, dó yahvi ndivaha. Naxita do cán tá naxihi a ndica crúxu vatí coo nacaja mé á cuachi. Najoco a mé á nu Ndióxi sahá cuachí tá quiahva nasacaja ñayivi tá najoco na in ndicachi víí nu Ndióxi sanahá sahá cuachi na. ²⁰ Tá cámani cavá sáhá saha ñuyíví já nasacu ini Ndióxi quivi Jesucristo sahá cuachi ñayivi. Tá naxinu tiempo já naquixa a ñuyíví ña ná chindeé a ndohó. ²¹ Xihín ña nacaja Jesucristo cándeé ini ndó Ndióxi viti, mé á najánditacu a Jesús ta nacaja cáhnu

ndivaha Ndióxi Jesús. Sahá ña nacaja Ndióxi cándeé ini ndó mé á ta ndáti ndó xinu quivi quiahva mé á ña vaha, ña in indivi nu ndó.

²² Ta viti nacasáhá ndo cája ndó ña ndaa já nandaja víí ndó ínima ndo ña ná quihvi ini ndó na cúu cuéntá Jesús. Sahá ña cán queá xíní ñúhú quihvi ini ndó na xihín ndinuhu ini ndó. ²³ Cúu á tátuhun nacacu tucu ndó joo a juú ñayivi nacaja ña nacacu tucu ndó. Jáchi cúu á sahá ña cándeé ini ndó tühun Ndióxi, ña coo ndíhi saha anda ama cáa quivi. Sahá ña cán queá cúu á tátuhun nacacu tucu ndó nacaja tühun Ndióxi. ²⁴ Jáchi já cáchí tühun Ndióxi:

Tócó ndihi ñayivi cúu ná tátuhun yucu cuíí ña cáa yúcu ña ndíhi yachí saha. Ta tóco ndihi ña náhnú cája na cúu á tátuhun in ita cánúu nuú yucu cán.

Jáchi mé yucu cán ichi a ta ndicava ita nu á ta quiahva já ndíhi ri sahá ña cája na cán.

²⁵ Joo tühun Ndióxi, xitoho í a ndíhi sahá anda ama cáa quivi.

Ta mé tühun yóho cúu á ña sa nacaxi tühun i xihín ndo. Ta cúu á tühun vaha cáhan sahá Jesucristo.

2 Xíní ñúhú jándacoo ndó tóco ndihi ña núu cája ndó ta a jándahvi ga ndó ñayivi. Ndítahan cacuu ndó tá quiahva ndáa ndó ta a cáhíhvi ga ini ndó ta a cácuu ga ndó ñayivi ndahndá yúhu. ² Tá quiahva cája na valí ndúcu na chichí na quiahva já ndítahan ndinducú ndó candaa ini ndó tühun Ndióxi já ná cuu cuahnu ndó xihín a ña ná jácacu Ndióxi ndohó. ³ Tá ná caja ndó já jánaha ndó ña mé a ndaa táhyí nacandaa ini ndó ña vaha ndivaha ini Ndióxi, xitoho í.

**Jesús cúu á tátuhun in yuu
cáhnú ndácaan titó vehe**

⁴ Cayati ndó nuú Jesucristo, xitoho í jáchi tácu va mé á ta cúu á tátuhun yuu ndúhu ña nacandají da cávaha vehe.

Joo n̄ Ndióxi cúu Jesucristo tátuhun in yuú vaha ndivaha ña nacaxi a. ⁵Ta caja Ndióxi xih̄in ndóhó ña ná cacuu ndó tátuhun yuu tácu ta cavaha Ndióxi veñuhu mé á xih̄in ndihi ndó. Ta sa cúu ndó jutū yij n̄ á. Ta sahá ña nacaja Jesucristo xih̄in ndó cuu joco ndó mé ndó caja ndó ña cuni mé cuití va jáchi ña jan queá cájii ini Ndióxi xih̄in. ⁶Sahá ña cán queá cáchi tūhun Ndióxi tá cahan sahá Jesús já cáchi a já:

Yehe nasacu u in a ñuu Sión ta cúu á tátuhun in yuu ndúhu ta mé yuu yóho cúu á ña nacaxi mí i ta cúu á ña yahvi ndivaha.

Ta ndá na ná candeé ini mé á a cándoo núu toho na caja i, cáchi tūhun Ndióxi.

⁷Mé yuu cahan Ndióxi saha yóho cúu á Jesucristo ta ndíyahvi ndivaha n̄ mé ndó jáchi candeé ini ndó a. Joo na co candeé ini Jesús na cán cúu na jáxinu nuú tūhun Ndióxi tá nacachi a já:

Mé yuu ndúhu, ña nacandají da cavaha vehe, nanduu a yuu ña fin chága saha.

⁸Ta fin inga tucu n̄ cáchi a sahá Jesús: Cúu á tátuhun in yuu cáhnu nuú cachihin saha ná ta jándicava a na, cáchi tūhun Ndióxi.

Ta mé na cán cáchihin saha ná jáchi co cuni na cuni johu na tūhun vaha cahan saha Jesucristo. Ta janda saha nasacu ini Ndióxi ndoho na.

Ñayivi, na cúu cuéntá mé á

⁹Joo mé ndó cúu ndó na nacaxi Ndióxi ña ná nduu ndó na vehe mé á. Ta nanduu ndó jutū cuéntá mé á ta mé á cúu á rey. Ta cúu ndó in táhndá cáhnu ñayivi yij ndácaan ndó in ñuu ña nandiquehe Ndióxi cacomí a cuéntá saha. Ta nacaxi Ndióxi ndóhó ña ná cahan ndó xih̄in ñayivi ndaja ndáa ña náhnu cája Ndióxi. Mé a nacana ndóhó tá nasanduu ndó nuú naá cán já ná quixi ndó nuú ndató ndi-

vaha yéhe n̄ fin a. ¹⁰Coó nasacu toho ndó ñayivi cuéntá Ndióxi jihna joo viti cúu ndó cuéntá mé á. Coó natahvi ini Ndióxi saha ndó jihna joo viti táhvi ini a saha ndo.

Xíní ñúhú caja í ña cuni Ndióxi

¹¹Candehé ndo, ñani i. Xíca tahvi i nu ndó, na cúu tátuhun na ndúu ñuu tóho jáchi indivi cúu ñuu ndó. Sahá ña quihvi ini i ndóhó sahá ña cán queá xíca i ñaman̄ nu ndo ña ná a cája ndó ña xíca ini yiquí cuñu ndó caja. Jáchi cúu á tátuhun cani táhan yiquí cuñu ndó xih̄in ínimā ndo. ¹²Mé ndó ndúu ndó tañu ñayivi ñuyíví, na co xíca íchi cuéntá Ndióxi. Xíní ñúhú caja vaha ndó já ná cuni na jan ndá quiahva cája ndó. Vatí viti cahan núu na saha ndo ta cáchi na ña cúu ndó na quini joo tá ná cuni na ña vaha cája ndó já queá caja cáhnu na Ndióxi tá ná xinu quiví caja víí mé á saha tóco ndihi ñayivi.

¹³Sahá ña cája cáhnu ndó Jesucristo, xitoho í xíní ñúhú coo johu ndó n̄ sáhdá na jutixia ndúu ñuyíví yóho n̄ ndo. Coo johu ndó n̄ cahan presidente, da ndójo chuun cáhnu chága. ¹⁴Ta coo johu ndó n̄ sáhdá da cúu gobernador jáchi mé presidente cúu da sáhdá chuun nuú gobernador ña ná caja víí da sahá na co cája vaha. Ta ndítahan n̄ dá cahan vaha da sahá na cája vaha. ¹⁵Cuni Ndióxi ña ná caja vaha ndó. Já queá na tóntó jini, na co xíca íchi cuéntá Ndióxi cuni na ña vaha cája ndó já ná a ñehe íni na cahan núu na saha ndo.

¹⁶Vatí najani ndó ndáha ley Moisés ña nasacomí cuéntá saha ndó jihna joo co cuni cachi a ña núná nu ndó caja ndó ndá cuachi cuni ndo. Jáchi xíní ñúhú ndicuhun ini ndó ña cúu ndó na cája chúun cuéntá Ndióxi viti. ¹⁷Xíní ñúhú coo toni ñúhú ndo xih̄in tóco ndihi ñayivi. Ta ndítahan quihvi ini ndó na cúu cuéntá Jesús. Ta ndítahan n̄ ndó

caja cáhnu ndó Ndióxi. Ta ndítahan coo toni ñúhú ndó xihín da cómi chuun ñuyiví yóho.

Coó ñaçahan núu Jesús xihín na ñaçaja xíxi xihín á ta quiahva já nditahan caja ri mé ví

¹⁸ Ndóhó, na cómi xitoho cuéntá saha xíní ñúhú caja ndó xihín ndinuhu ini ndó ña sáhdá xitoho ndó nu ndo. Ta a ndínehe yúhu ndó nu ná. Coó a caja toho a á cúu ná ñayivi xíxi ini xihín ndo á cúu ná na quíhvi ini ndohó, na co jándoho nahá ini ndó. ¹⁹ Sa xíni ndó ña cúní Ndióxi caja ndó. Saha ña cán queá caja ndeé ini ndó tá cája xíxi na xihín ndó sahá in ñaha coó ñaçaja ndó. Jáchi sahá ña yóho cajii ini Ndióxi xihín ndó. ²⁰ Vatí cája ndeé ini ndó tá ndóho ini ndó sahá cuachi ñaçaja ndó, co ñehe táhvi toho ndó ñamaní nu Ndióxi. Joo tá cája ndeé ini ndó tá ndóho ini ndó sahá ña vaha cája ndó já queá cajii ini Ndióxi xihín ndo. ²¹ Jáchi sahá ña yóho ñaçana mé á ndohó. Ta najánaha Jesucristo ña yóho nu ndo tá nandoho ini mé á saha ndo vatí coó ñaçaja mé á cuachi. Ta ña yóho cúu in quiahva nasacu a caja ndó. ²² Ni in túhún toho tañu coó ñaçaja mé á cuachi ta ni in túhún tañu coó najándahvi a ñayivi. ²³ Tá ñacasáhá na cánahá quini na xihín á coó nanducú ñehe mé á tuhun quini nu na. Ta tá najándoho na ini a coó nasacu ini a caja núu a xihín na cán. Ña ñaçaja mé á queá nasacu ndihi a ña ndáha Ndióxi, mé a cája víi ndaa saha tóco ndihi ñaha. ²⁴ Mé Jesucristo nandicojo a cuachí jatá yiquí cuñu a cuahan tá ñaxihí a ndíca crúxu. Ta cúu á tá-tuhun ñaxihí yó nuú cuachí ña ná cuu catacú cuéntá mé á tá ná cája í ña vaha cuítí va. Najándicuehe na Jesucristo ña ná cuu ndivaha mé ndó. ²⁵ Jáchi mé ndó ñaxíca nuu ndó ñuyiví yóho tá quiahva xíca nuu in ndicachi, rí nandiñúhú nuú xitoho. Joo viti nandicó coo ndó nu Je-

sucristo ta mé a cán ndáa a ndohó tá quiahva ndáa in dataa ndicachi janá dá. Ta co jándacoo ndáha mé á ndohó.

Ña ndítahan caja na sa ñatandaha

3 Candehé ndó, najihí, na ndúu yí. Xíni ñúhú caja ndó ña sáhdá yí ndó nu ndo. Já queá tá co cándusa da tuhun Ndióxi cuu xinu ini da candusa da ña sahá ña cája ndó ta a juú ga sahá ña cáhan ndó xihín dá. ² Jáchi tá ná cuni yí ndó ña cája vaha ndó ta cáhan toni ñúhú ndó xihín dá já queá cuu jáxinu ndó ini da xihín ña cája ndó. ³ A ndíhi nahá ini ndó caja cutú ndó mé ndó xihín ñaha ña cuu canaha lándá ndó xihín, tátuhun ña chuhun lándá ndó yútu jini ndo á tátuhun ña cañuhu lándá jíqui jí-co ndo. Ta a ndíhi ini ndó cañuhu lándá jéhe ndáha ndo. Ta a ndíhi ini ndó candixi ndó jáhma lándá. A ndíhi ini ndó saha tóco ndihi ña yóho. ⁴ Ña ndítahan ndihi ini ndó sahá cúu ña ndíyahvi nu Ndióxi. Ta ña yóho cúu in ínima ña nandicutú xihín ña vaha já ná coo víi ini ndó. Tóco ndihi ña yóho cúu ña co ndíhi saha. ⁵ Jáchi quiahva já ñúchí ndivaha nasacaja najihí yí, na nasacuu cuéntá Ndióxi sanahá. Nacandeé ini na Ndióxi ta ñaçaja na chuun nasahnda yí ná nu ná. ⁶ Quiahva já ñúchí ndivaha ñaçaja ña nasananí Sara tá ñacandúsa ña yí ñá, da nasananí Abraham. Ta mé ña cán nacachi ña sahá Abraham ña cúu dá xitoho ñá. Ta viti mé ndó cúu ndó tátuhun jahyi mé Sara cán tá cája ndó ña vaha ta tá co yíhvi ndo ni in ñaha.

⁷ Ta jári ndóhó va dataa, da íin ñájihí, a cája ndivaha ndó xihín ñájihí ndo. Coo toni ñúhú ndó xihín ña jáchi cúu ñá ña chíjín chága nu mé ndó. Ta ñamaní, ña nasacu ini Ndióxi quiahva nu ndóhó, dataa, nasacu ini mé á quiahva ri a nuú ña cán va. Saha ña cán queá ndítahan caja vaha ndó xihín ñájihí ndo já ná cuni johoh Ndióxi ña xíca tahví ndó nu á.

**Ndóho ini java na sahá
ña vaha cája na**

⁸Candehé ndo. In ndítahan cacuu ndihi ndó. Co ndítahan cahnda táhan ndó. Ndítahan quihvi ini táhan ndó tá-tuhun in cúu tátá ndihi ndó. Ta ndítahan candáhví ini ndó ñayivi. Ta coto a ndínehe jíco ndo mé ndó. ⁹Tá ná caja núu ñayivi xihín ndo a ndícó coo ndó caja ndó já xihín ná. Ta ni tá ná canahá na xihín ndo a ndícó coo ndó canahá ndó xihín ná. Vaha chága ná caca tahví ndó nu Ndióxi ña ná caja vaha mé á xihín na cán. Ta nacana Ndióxi ndohó ña ná caja mé á ñamaní xihín ndo. ¹⁰Jáchí já cáchí tuhun Ndióxi já:

Ndá na cúni canduu nahá ñuyívi yóho ta co cúni na quixi tondóho nu ná nani íin na yóho,

já queá ndítahan nu ná candaa na yúhu ná já ná a cáhan quini na.

Ta quiahva já ndítahan candaa na yúhu ná já ná a cáhan na ña tuhún.

¹¹Ndítahan caxoo na nu tóco ndihi ña núu ta caja na ña vaha cuití va.

Ta ndítahan ndinducú na ña coo vaha ini na xihín ñayivi ta a jándacoo na caja na ña.

¹²Jáchí ndáá Ndióxi na cája ndaa, ta táa johó a nu cáhan na tá xíca tahví na nu mé á.

Joo xójo ini a xihín ñayivi cája cuachi, já cáchí tuhun Ndióxi.

¹³Ni in ñayivi a cuú ndusa caja xíxi xihín ndó tá ná ndíhi ini ndó caja ndó ña vaha. ¹⁴Joo tá cája xíxi na xihín ndó vatí cája ndó ña vaha, tahví nahá nacuu ndó. A cáyihví toho ndó ñayivi ta a ndícani toho ini ndó. ¹⁵Ña ndítahan caja ndó queá caja cáhnu ndó Jesucristo, xitoho í xihín ndinuhu ínimá ndo. Ta xíní ñúhú coo tiáhva ndó nducú ñehe víí ndó tuhun nuú ñayivi, na cúni candaa ini sahá ña cándéé ini ndó Jesús. Ta ná coo tóni ñúhú ndó xihín ná ta a ndínehe jíco ndo

mé ndó nani ndícani ndó tuhun Ndióxi nuú na cán. ¹⁶Ndítahan caja ndó ña vaha já ná a cácahan nuú ndo. Ta tá cáhan núu na sahá ndo sahá ña cúu ndó cuéntá Jesús já queá cacahan nuú mé na cán sahá tuhun núu cáhan na sahá ndó. ¹⁷Ta tá mé Ndióxi queá cúni ña ná ndoho ini ndó já queá vaha chága ná ndoho ini ndó sahá ña vaha cája ndó a juú ga sahá ña núu.

¹⁸Ta in túhún tañu cuití va naxihí Jesucristo sahá cuachí. Ni in túhún toho cuachi coo nacaja mé á joo nandoho ini a sahá ñayivi quini já ná cuu ndíhvi ndihí íchí cuéntá Ndióxi. Ta sahá ña nasacomí a in yiquí cuñu ñayivi naxihí a joo mé á cúu á ña naquixi indiví sahá ña cán queá nanditacu tucu a ta tácu yíi va ínimá mé á. ¹⁹Ta nasahan ínimá mé á nu ndájí ínimá ndíi ta cán nacahan mé á tuhun Ndióxi xihín na. ²⁰Mé ínimá ndíi cán nasacuu na na coo naxeen cuni johó tuhun Ndióxi sanahá ndivaha. Tá nasatacu Noé já nasandatí Ndióxi ña ná cava ini na cán nani cávaha Noé mé barco cáhnu, dó jácaçu ñahá. Joo chá cuití nasacuu na nacacu. Una víxí laá na nacacu nuú ticuíf cán. ²¹Ta viti tá cándúta yo xihín ticuíf já cacu ínimá yó tá quiahva nacacu na cán ini barco sanahá. Tá cándúta yo xihín ticuíf co ndóo cuachí sahá ña nandoo yiquí cuñu í xihín ticuíf cán. Nacacú nuú cuachí jáchí cándéé iní Jesucristo ta cúni yó ña ná ndaja víí mé á ínimá yo. Ta náha ña nacacú nuú indayá tá nanditacu tucu Jesucristo ²²ta sa nandaa mé á indiví ta íin a xoo cuáha Ndióxi. Ta sáhná mé á chuun nu táto Ndióxi xihín nuú na cómí cuéntá sahá na ndúu indiví.

**Náha Ndióxi nu yo ndá quiahva
ndítahan nu yo caja chúun í ña
ná ñehe táhví yó nu mé á**

4 Tá quiahva nandoho yiquí cuñu Jesús quiahva já ndítahan canduu

tiãhva ri ndóhó va ndoho ini ndó. Jáchì ndá nã ndóho ini yiquí cuñu, nã cán cúú nã cõ cãja cuachi ndaja ñacuu. ²Ta viti cõ cãja gã yiquí cuñu ndó ñã núu cuéntã ñuyiví yóho. Ta níí tiempo ndúcú ndó cãja ndó ñã cúnì Ndióxi. ³Jáchì sã ñayaha ndivaha quiahva ñacaja ndó ñã núu jihna tá quiahva cãja ñayivi, nã cõ xínì Ndióxi. Mé tiempo tá cámanì candaa ini ndó saha íchì cuéntã Jesús já ñasacaja ndó tá nuú ñã núu tátuhun ñã xíca ini ndó cãja ndó xihín yiquí cuñu ndó. Ta ñasacuu ndó ñayivi xhí. Ta ñacatóó ndó cãja ndó vicó lãnda ndivaha. Ta chí ñajãyaha quini ndivaha ndó ñã ñasax-ihí ndó. Ta ñacaja cáhnu ndó yocõ ñã ñacachi Ndióxi cõ ndítahan cãja cáhnu ndó. ⁴Ta ñacasáhã cáhan núu ñayivi ñasatãhan xihín ndó tá ñasacaja ndó ñã núu jihna. Jáchì viti cõ xíca nuu gã ndó cãja ndó tá nuú ñã núu xihín ná. Ta viti sã ñacasáhã ndíhi ini na ndátì na ndicó cõ ndó xihín ná. ⁵Joo vaxì quiví cùhun nã cán cavíí saha ná nu Ndióxi, mé a íin tiãhva cãja víí sahã nã tácu xihín sahã nã sã ñaxihí. ⁶Jáchì sã ñaxini johò va ñayivi, nã sã ñaxihí cán tũhun vaha sahã Jesús tá ñasatacu na. Ñaxini johò na tũhun vaha sahã Jesús ñã ná cuu cat-acu ínimã ná tá quiahva tácu Ndióxi vatí ñacavíí saha ná ñuyiví yóho tá quiahva cávii saha tóco ndíhi ñayivi.

⁷Jalóho cúnì xinu cõ quiví ndíhi saha tóco ndíhi ñaha. Sahã ñã cán queã ndítahan nu ndõ coo cáxì táhyí ini ndó ta xihín ndinuhu ini ndó ndítahan cãca tahví ndó nu Ndióxi. ⁸Ñã cúnì queã ná quihví ini táhan ndó jáchì tá quihví ini táhan ndó já cãja cáhnu ini saha táhan ndó tá ná yaha xihín táhan ndó. ⁹Ta a cõjo ini ndó tá xinu cõ ñani táhan ndó xító nihni na ndóhó vehe ndó jáchì ndítahan ndiquehe vaha ndó nã. ¹⁰Ñasãhan Ndióxi nuú in in ndó ñã ná ñehe táhvi ndó in in ñamanì mé á. Ta ndítahan cãja chúun ndó a ñã ná chindeé ndó nã cúú

cuéntã Jesús. Ta ndítahan cãja ndó ñã tá quiahva sãhan Ndióxi ndéé ndó cãja ndó ñã. ¹¹Ta ndá tũhun ná cáhan ndó xihín ñani táhan ndó, ná cacuu a tũhun yíí tátũhun ñã cáhan Ndióxi. Ta ndá ndó cãja ñamanì xihín inga na, ná cãja ndó ñã xihín ndéé sãhan Ndióxi nu ndõ. Jáchì tóco ndíhi ñã cãja ndó ndítahan cacuu a ñã cuu cãja cáhnu í Ndióxi xihín. Ta cãja Jesucristo ñã ná cuu cãja cáhnu í Ndióxi. Cáhnu ndivaha cúú a ta sãhndã a chuun nuú tóco ndíhi ñaha anda ama cáa quiví. Já ná coo.

Ndóho iní jáchì cándeé iní Jesús

¹²Candehé ndõ, ñani í. Coto a cãtontó nahã ndõ tá quíxi tondóhó nãhnu nu ndõ. A cãja ndó tátũhun nã cõ xínì quixi tondóhó nuu. ¹³Ñã ndítahan cãja ndó queã cajii ini ndó jáchì xihín ñã yóho cándaã ini ndó ndá quiahva ñandoho ini Jesús. Ta xihín ñã yóho cajii ndivaha ini ndó tá ná cuni ndó ndá quiahva cáhnu cúú mé á tá ná quixi tucu a. ¹⁴Tá cá-ñahã ñayivi xihín ndõ sahã ñã cándeé ini ndó Jesucristo, tahví ñacuu ndó. Jáchì sã ñandicutú ndaa ínimã in in ndó xihín ínimã yíí Ndióxi ta mé á cúú á ñã cáhnu ndivaha. Mé ñayivi cán cáhan núu na sahã joo mé ndó cãja cáhnu ndó a. ¹⁵Tá ñacasáhã cãja xíxi na xihín ndó cõ ndítahan cacuu a sahã ñã cúú ndó ñã sãhni ndí. Ta ni cõ ndítahan cacuu a sahã ñã cãja cufhnã ndõ. Ta ni cõ ndítahan cacuu a sahã ñã a váha toho ñacaja ndó. Ta ni cõ ndítahan cacuu a sahã ñã ñaquihvi nuu ndó nuú cõ ndítahan nu ndõ. ¹⁶Joo tá ndóho ini ndó sahã ñã cúú ndó cuéntã Jesucristo cõ ndítahan cácahan nuu ndõ. Ñã ndítahan cãja ndó queã cãja cáhnu ndó Ndióxi jáchì ñañehe táhvi ndó cacuu ndó cuéntã Jesús.

¹⁷Viti sã ñaxinu cõ tiempo casáhã Ndióxi cãja víí a sahã nã cúú cuéntã mé á. Ta jihna mé yó, nã cúú cuéntã mé á cãja víí a saha. Ta a juú quiahva jãn-

doho a ini java ga ñayivi, na co cuni coo joho nuú ña sáhdá mé á nu ná caja na. ¹⁸ Jáchí cáchí tuhun Ndióxi ña jandá mí, na cúu ñayivi ndaa nu Ndióxi ta ihví cáa saha yo jácau Ndióxi mí. Ndaja ga ví caja Ndióxi xihín ñayivi sáa ini, na co cuni jándacoo cuachi. ¹⁹ Sahá ña cán queá tá ndóho ini ndó tá quiahva cuni Ndióxi, ndítahan nu ndó caja vaha ndó. Ta jári ndítahan nu ndó ndiquiahva ndó mé ndó ndáha Ndióxi, mé á nacavaha ndóho. Ta cája mé Ndióxi ña sáhan tuhun a caja.

Ndícani Pedro nuú na cúu cuéntá Jesús ndíá ndítahan nu ná caja na

5 Ta viti cuni cahan loho i xihín na sacuaḥa nuú na cúu cuéntá Jesús ndúu tañu ndó jan jáchí da sacuaḥa cúu ri yehe va. Ta cúu u in da naxini xihín nuú i tá quiahva nandoho ini Jesucristo. Ta tá quiahva cuni na sacuaḥa ndaja cáhnu cacuu na nu Ndióxi tá cuhun na coo na xihín mé á quiahva já caja ri Ndióxi xihín yehe va tá ná xinu coo quivi nu ndíhí. ² Xíca tahví i nu ndó ña ná cacomí vaha ndó cuéntá sahá na cúu cuéntá Jesús. Caja ndó ña xihín ndinuhu ini ndó jáchí mé Ndióxi najándicoo a na ndáha ndo. Sahá ña cán queá xíní ñúhú coo cuéntá vaha ndó xihín ná tá quiahva cuni Ndióxi. Ta coto a cája ndó ña xihín ña ndúsa. Ta ni a cája ndó ña sahá jiuḥún. Ña ndítahan caja ndó queá cajii ini ndó xihín chuun yóho. ³ Ta co ndítahan cahvi ini ndo ña cúu ndó xitoho na cúu cuéntá Jesús jan jáchí na jan cúu ná na najándacoo Ndióxi nu ndó candaa ndó. Xíní ñúhú caja vaha ndó já ná cuni ri na jan va caja na ña. Jáchí na jan cúu ná tátuhun ndicachi ta ndóho cúu ndó tátuhun da ndáá ñahá. ⁴ Ña cán queá tá ná quixi Jesucristo, mé á cúu da sacuaḥa nuú ndihi da ndáá na cúu cuéntá mé á anda já ndiquiahva mé á ña ndítahan ndiquehe ndó sahá chuun na-

caja ndó yóho. Ta ña quiahva mé á nu ndó a cacuu toho a in ñaha ña ndihi saha.

⁵ Ta viti cahan ri xihín ndóho, da tacú. Xíní ñúhú coo joho ndó nu sáhdá na sacuaḥa nu ndo. Tóco ndihi ndó ndítahan candúsa táhan ndó ta co ndítahan nu ndó ndiñehe jícó ndo mé ndó jáchí já cáchí tuhun Ndióxi:

Xójo ini Ndióxi xihín na cátoó ndiñehe jícó mé,

joo cája ñamaní xihín na jánuu ndáha mé.

⁶ Ña cán queá ndítahan jánuu ndáha ndó mé ndó nu Ndióxi jáchí sa cándaa ini ndó ña cáhnu ndivaha cúu mé á. Vaxi quivi jándiñehe jícó mé á ndóho sahá ña najánuu ndáha ndó mé ndó. ⁷ Tá ndícani ndivaha ini ndó ndítahan caça tahví ndó nu Ndióxi ña ná chindee a ndóho jáchí ñúhu ini a saha ndo.

⁸ Cuéntá coo ndó ta coto a náa ini ndó jáchí tiñáhá sacuaḥa cúu rí rí ihví yo ta xíca nuu rí tañu mí yóho. Ta tá quiahva cája in león ndáhyi rí ndúcú rí yo caxí rí quiahva já cája tiñáhá sacuaḥa yóho jándicava rí ñayivi nuú cuachi. ⁹ Xíní ñúhú coo ndacú ini ndó ta candeé ndusa ini ndó Ndióxi já cuu quee vaha ndó xihín ri. Ta ndítahan ndicuhun ini ndó ña tá quiahva ndóho ini ndó quiahva já ndóho ri java ga na cúu cuéntá Jesús ndúu ndijáá ñuyiví. ¹⁰ Ta tá sa nayaha chá tiempo ndóho ini ndó anda jávi caja Ndióxi ña ná ndoo cuachi ndó ta jándihvi mé á ndée a ini ínima ndo. Ní tiempo cacuu ndó ñayivi ndacú ini xihín tuhun Ndióxi ta xihín ña yóho candeé ndusa ini ndó Ndióxi. Mé á cán cája cuahá ñamaní xihín yo. Ta nacana mé á mí ña ná coho coo í indiví ña ná ndaja cáhnu Ndióxi mí anda ama cáa quivi sahá ña in nanduú xihín Jesucristo. ¹¹ Cáhnu ná cacuu mé á ta ín ndée a cája tóco ndihi ña cuni a anda ama cáa quivi. Já ná coo.

**Ndíndayí Pedro na
cáhyí da carta nuu cán**

¹² Chíndeé Silvano yehe cáhyí i carta yóho ta chindahá i ña nu ndo. Ta cája i cuéntá mé Silvano yóho cája chúun da cuéntá Ndióxi xihín ndinuhu ini da. Na-
cáhyí i mé carta loho nu ndo jáchi cúni ndicani i ña ndaa nu ndó ña cája tá cája Ndióxi ñamaní xihín ndo. Xíní ñúhú coo ndacú ini ndó ta a ndíndójó ndó tóco ndihi ña nacachi i xihín ndó yóho.

¹³ Na cúu cuéntá Jesús ndúu ñuu Babilonia chindahá na Ndióxi coo ndó. Ta tá quiahva nandacaxi Ndióxi ndohó quiahva já nandacaxi ri á na cán va. Ta jári Marcos, da cúu tátuhun jahyi i chindahá da Ndióxi coo ndó. ¹⁴ Cahan Ndióxi xihín táhan ndó ta tatí yúhu sajóho táhan ndó jáchi quiahva já ndí-tahan caja ndó sahá ña quíhvi ini táhan ndó.

Ta ña cúni quea ná coo vaha ini ndihi ndó, na cúu cuéntá Jesucristo. Já ná coo.

Carta naçahyí Pedro chí ivi

Cáhyí tucu Pedro inga carta nuú na cúu cuéntá Jesús

1 Yehe cúu Simón Pedro ta cája chúun i cuéntá Jesucristo ta cúu u in apóstol nachindahá mé á ña ná caħan i saħá tuħun a. Cáhyí i carta yóho nu ndóhó, na ñahehe táhv i candeé ini Ndióxi tá quiaħva candeé ini ndehe mé á. Jáchi cája ndaa Jesucristo tóco ndihi ñaha ta mé á cúu Ndióxi cája cáhnu í. Ta mé á queá jácaçu mí. ² Ña cúni queá ná cajú cuaha Ndióxi ñaman i xihin ndo ta ná cajú mé á ña ná coo vaha ini ndó saħá ña xini ndó yo cúu Ndióxi ta saħá ña xini ndo yo cúu Jesús, xitoho í.

Jáxinu Ndióxi ini ña ná cája í ña cúni mé á

³ Xihin ndée Ndióxi naçaja ña ná a ndíman i ñaha nu yo catacú ñuyiví yóho. Ta náha mé á nu yo ndá quiaħva cajú cáhnu í mé á xihín ña cajú í. Jáchi naçaja mé á ña ná candaa ini saħa Jesucristo. Ta xihin ndée mé á ta xihin tóco ndihi ña náhnu cajú mé á naçaxi a mí candeé ini mé á. ⁴ Ta saħá ña yóho nasahan tuħun a nu yo. Ta náhnu ndivaha cúu tuħun nasahan mé á nu yo ta ndíyahvi ndivaha ña. Jáchi xihín tuħun nasahan mé á nu yó já cuu xinu coo í coo í tá quiaħva iin mé á. Ta xihín ña yóho cuu caxoo í nuú ña núu xica ini yiquí cuñu í cajú ñuyiví yóho. ⁵ Saħá ña cán queá tá cúni ndó ñehe táhv i ndó ñaman i nu Ndióxi xini ñúhú candeé ini ndó Jesús. Ta vatí sa candeé ini ndó Jesús joo xini ñúhú cajú vaha ndó. Ta vatí sa cajú vaha ndó joo xini ñúhú candaa vaha ini ndó tuħun Ndióxi. ⁶ Ta vatí sa candaa ini ndó tuħun Ndióxi joo xini ñúhú caħnu ndó nuú ña núu ña xica ini yiquí cuñu ndó

cajú. Ta vatí sa saħnu ndó nuú ña xica ini yiquí cuñu ndó cajú joo ndítahan coo cáhnu ini ndó. Ta vatí sa iin cáhnu ini ndó joo ndítahan ndinducú ndo cajú ndó ña cúni Ndióxi. ⁷ Ta vatí sa cajú ndó ña cúni Ndióxi joo ndítahan quihvi ini ndó ñani táhan ndó, na cúu cuéntá Jesús. Ta xihín ña yóho cuu quihvi ini ndó tóco ndihi ñayivi.

⁸ Tá cajú ndó tóco ndihi ña yóho ta tá ndíhi ini ndó cuahnu ndó xihín á, a cácuu toho ndó ñayivi coo chúun nu Ndióxi. Ta tá ná xinu coo ndó candaa ini ndó saħa Jesucristo, xitoho í já queá a cácuu a ña uun. ⁹ Joo ndá na coo cajú tóco ndihi ña naçachi i xihin ndo cúu ná tá tuħun in na cuáá, in na a cuú candehe vaha. Jáchi nandindójo na ña najándoo Ndióxi cuachi naçaja na sanahá. ¹⁰ Saħá ña cán queá ndítahan nu mé ndó, ñani i, na cúu cuéntá Jesús ndíhi ini ndó naħa ndo nuú ñayivi ña mé a ndaa táhyí cúu ndó na naçana Ndióxi cacomí a cuéntá saħa. Jáchi tá ná cajú ndó tóco ndihi ña vaha naçachi i xihin ndo yóho a ndícava toho ndó nuú cuachi. ¹¹ Ta xihín ña yóho núna nu ndó cuħun ndo indivi nu iin Jesucristo, xitoho í, mé á jácaçu mí ta cacomí a cuéntá saħa yó anda ama cáa quivi.

¹² Saħá ña cán queá caħan tá caħan i saħá ña yóho nu ndo vatí sa xini va ndó ña ta vatí sa candeé ini ndó ña ndaa, ña najánaħa i nu ndo yóho. ¹³ Cajú i ña yóho jáchi cáhan i ña ndítahan cajú i ña nani tácu u ñuyiví yóho. Jáchi xini ñúhú ndicani i nu ndo ndía queá vaha ta ndía queá a váha. ¹⁴ Jáchi sa naçaja Jesucristo, xitoho í ña ná candaa ini i ña sa naçayati quivi quivi i ta jánda-coo i ñuyiví yóho. ¹⁵ Joo ndúcú ndée e ndinducú u ndá quiaħva cajú i já ná a ndíndójo ndó saħa tóco ndihi ña yóho tá sa naçahi i.

Ndicani Pedro ña ñaxini da ndá quiahva cáhnu cúu Jesús

¹⁶Tá najánaha nde ndohó ña ñin cuahá ndeé Jesucristo, xitoho í ta tá ñacachi nde xihín ndo quixi tucu mé á, coó ñasacuu a tuhun ñacana jiní mé nde ña jándahvi nde ndohó vaha. Jáchi ñaxini xihín nuu mé nde ndá quiahva cáhnu cúu Jesucristo, xitoho í.

¹⁷Ñaxini nde xihín nuú nde tá ñandaja cáhnu Ndióxi, tátá yo Jesucristo já ñandicáhnu ndivaha mé á. Ta ñúchí ndivaha ñasahjin tá ñaxini johu nde ñacachi Ndióxi já: “Mé a yóho cúu jahyi maní í ta cájii ndivaha ini í xihín tóco ndihi ña cája”, ñacachi Ndióxi sahá Jesús. ¹⁸Ta mé nde ñaxini johu nde ñacahan Ndióxi chí indiví jáchi ñasanduu nde xihín Jesús jiní mé yúcu yii cán.

¹⁹Ta ñin inga tucu ñaha cáhan ndá quiahva cáhnu cúu Jesús ta ña cán cúu ña ñacahyí ña profeta sanahá. Ta sa xíní vaha yó cúu á ña ndaa. Vaha cája ndó táa johu ndó ña ñacahyí ña profeta cán jáchi cúu á tátuhun in lámpara ña jándiyéhe nuú naá janda quiahva ná quixi Jesucristo. Ta mé á cúu á tátuhun quimi cáhnu, rí quéta tá ñativi jáchi jándiyéhe a ínimá ñayivi. ²⁰Joo coto a ndíndójó ndo ña ni in túhún toho na a cuú nducú ñehe ña cáhí tuhun Ndióxi nuú inga na sahá ña cána jiní mé va na. ²¹Jáchi ni in profeta coó ñacahyí ña ña ñasacu ini mé ná cahyí. Ña ñacaja na queá ñandiquiahva na mé ná ndáha ínimá yii Ndióxi ta mé Ndióxi ñasahan tóco ndihi ña ñacahan na.

Ña xíca jánaha ña tuhún

(Judas 4-13)

2Joo mé tiempo já ñasanduu ri profeta túhún tañu ña Israel cán. Quiahva já canduu ri ña jánaha ña tuhún tañu ndohó. Ta ña cán casáhá ña jácahan jehé ña ñayivi sahá ña cáhvi jiní

mé va na. Joo jáquihvi ndivaha na ñayivi xihín á. Ta xihín ña yóho a ndícuni na ña najácacu Jesús ña ta casáhá ña cácahan nuu ná sahá ña ñacaja mé á saha ná. Ta ña yóho queá caja ña ná ndihi yachi chága sahá ña cán. ²Cuahá ndivaha ñayivi casáhá candico ña jatá ña cán ta casáhá ña cája na ña núu xihín ña. Ta sahá ña núu cája ña cán casáhá ñayivi cahan núu na saha tuhun vaha cáhan saha Jesús vatí cúu á íchí ndaa. ³Ta sahá ña catóo ndivaha na jiuhún sahá ña cán queá nducú ña tavá ña jiuhún xihín ndo xihín mé ña tuhún jánaha ña cán. Ta xíní Ndióxi ña cája na ña cán queá ndihi tá ndihi saha ná. Jáchi sa janda sanahá ñasacu ini mé á taán a ñayivi ñan ini indayá.

⁴Coó ñacaja cáhnu toho ini Ndióxi saha tátó mé á tá ñacaja na cuachi nu mé á. Ña ñacaja mé á queá ñachindahá a ña indayá. Ta najándicoo a ña nuú naá ndivaha ta ñacató a ña xihín cadena ndúu na ndáti na xinu coo quivi caja víi Ndióxi saha ná. ⁵Ta ni coó ñacaja cáhnu ini Ndióxi sahá ñayivi ñasanduu sanahá ndivaha. Ña ñacaja mé á queá najácuun ndeé ndivaha javi já ñaxihí ndihi ñayivi quini cán. Ta in túhún ña naní Noé xihín ndíhusa ña vehe da najácacu a. Najácacu Ndióxi Noé jáchi ñacandúsa da mé á ta najácahan ña ñayivi ña ná caja vaha na. ⁶Ta quiahva já najándihi ri Ndióxi sahá ñayivi ñasanduu ñuu Sodoma xihín ñuu Gomorra. Nachicaan ñúhu a ña janda quiahva ñanduu na yaa uun. Ñacaja Ndióxi ña yóho já ná cuni ñayivi vaxi chága chí nuu ña quiahva já caja Ndióxi jándihi a sahá ñayivi quini. ⁷Joo najácacu Ndióxi in ña naní Lot jáchi ñasacuu da in ña vaha ta mé Lot yóho ñatahvi ndivaha ini da saha tóco ndihi cuachi ñasacaja ñayivi quini ñasanduu tiempo cán. ⁸Ndijáá níi quivi ñacacuéha ini Lot cán sahá cuachi ñayivi cán jáchi quini ñasacahan ña ta quini ñasacaja na.

⁹Ta tá quiahva ñacaja Ndióxi xihin Lot quiahva já cuu caja mé á jácacu a ñayivi, ña ndiquiahva mé ndáha mé á. Ta chindeé a ña tá cásahá ndóho ini na. Joo sácú xoo mé á ñayivi quini já ná canduu xóo na candati na xinu quivi caja ví a sahá cuachi na.

¹⁰Mé Ndióxi jándoho a ini tóco ndihi ña catóo caja ña xíca ini yiquí cuñu na jáchi cándají ña caja na ña sáhdá Ndióxi nu ná. Cúu ná ña ñihí ini ta ni co sáhní ña mé ná ta ni co yíhvi ña canahá ña xihín ña ndójo chuun náhnu ¹¹jáchi ni mé tátó Ndióxi, ña ndúu nu íin mé á vatí íin chága ndée ná a juú ga ñayivi, ña canahá xihín mé ña ndójo chuun cán. Joo co sáhan ndeé ini mé tátó Ndióxi chícáan ña cháhan jatá ña náhnu sáhdá chuun cán.

¹²Joo ñayivi quini jan cúu ná tátuhun quítí, rí co xíní túní. Ñacacu rí ñuyiví yóho ta tíin táhan rí ta sáhní táhan rí. Ta quiahva já cája ña cán jáchi cája na ndá ña xínu ini na caja na ta cáhan núu na sahá ñaha, ña co cándaq ini na saha. Ta tá quiahva xihí quítí já quivi ña cán. ¹³Tá quiahva jándoho na ini ñayivi quiahva já ndoho ini mé ná. Cáhán ña ña ndató ndivaha ndúu na jáchi tá yéhe candii xíca nuu na cája na ña núu. Ta tá ndúu na xihín ndó in víco catóo ña ndítati na, chinúú cácahan nuu ndo queá cája na. Cájí ndivaha ini na xihín ña cája na joo jándahvi uun na mé ná.

¹⁴Ta tá xíní uun na najihí ivi laá cásahá cáhvi núu ini na xihín ná. Chí co cánaá loho na cája na cuachi. Ta jándahvi na ña coó ndacú cuahan íchi cuéntá Ndióxi ta xíní vaha na ndaja caja na quehe na ña cúní ña. Ña jan cúu ná ñayivi ñatavi cháhan jata, ña cūhūn indayá. ¹⁵Mé ña jan ñandiñuhú ña jáchi najándacoo na íchi cuéntá ña ndaa. Cája na tá quiahva ñacaja ña naní Balaam, jahyi Beor sanahá, ña ñacacúní ñehe cuahá jjuhún jatá ña núu ñacaja da.

¹⁶Joo nanani da sahá cuachi da ñacaja in búrru jíhí jáchi tá quiahva cáhan ñayivi quiahva já ñacahan rí cán xihín dá ta nasaji nuu rí nu dá ña ná a cája ga da ña núu.

¹⁷Tóco ndihi ña, ña jánahá ña tūhūn yóho cúu ná tátuhun chicōho nuú co ñúhu ticuúí jáchi coó chuun na. Ta cúu ná tátuhun víco jácuicó tachi xoo nu cúní a ta viti ña ñañehe ná queá cūhūn ña coo na nuú naá yávi anda ama cáa quivi.

¹⁸Jáchi tūhūn cáhan na cúu á ña jándindita jíco ña mé ná xihín joo tóco ndihi ña cáhan ña cúu á ña coó saha. Ta xihín ña núu, ña xíca ini yiquí cuñu na caja, xihín ña jan jándahvi na ña jacá ñacaxoo nuú cuachi. ¹⁹Mé ña jánahá ña tūhūn yóho jácahan ná ñayivi ña núu ná ña cúní mé va na. Joo mé ña cán cúu ná tátuhun mozo nuú cuachi jáchi cómí tá cómí cuachi cuéntá saha ná. Ñúhu ñayivi ndahá ña tíin ñahá jáchi sáhdá a chuun nu ná. ²⁰Ta ndá ñayivi ñacaxoo nuú ña núu ñuyiví yóho sahá ña ñacandaq ini na yo cúu Jesucristo, xitoho í, mé á jácacu mí joo tá ñandihí cásahá tucu na cája na ña núu ta ndiquiahva na mé ná ndáha ña núu cán já queá ndiquini chága ví ña a juú ga tá cámaní ndiquehe na íchi cuéntá Jesús. ²¹Jandá vaha chága ná a ndíhvi ña íchi cuéntá Jesucristo, nduu. Jáchi a váha toho tá sa xíní ña ña cúu á ña yí ña ñasahan Ndióxi nu ná ta tá ñandihí já jándacoo na ña. ²²Joo xihín ña cája ña yóho xínu nuú tūhūn ña cáchi: “Ndíco coo tucu tina sáxi rí ña sa ñandusa rí. Ta cóchí, rí jacá ñandihí najácuchu na ndíco coo tucu rí chiníhni rí mé rí nuú ndahyi.”

Vaxi tucu Jesucristo, xitoho í

3 Candehé ndo, ñani mání. Xihín ña yóho xínu carta ivi chindahá í nu ndo. Ta nu ndíví carta ndícani í nu ndo ndá queá ndítahan caja ndó já ná ndicani ini ndó ndinuhu ña vaha. ²Ndítahan ndicūhūn ini ndó ña ñacachi ña

profeta yíi Ndióxi sanahá ta ndítahan ndicuhun ini ndó ña ñacachi Jesucristo, xitoho í, mé á jácacu mí jáchi cúú á ña najánaha na apóstol nu ndo.

³Nu cuítí cúní ña ná candaa ini ndó ña tá sa ñacayati quíví quixi tucu Jesucristo já queta ñayivi ta casáhá na cuacu ndaa na tóco ndihi ña yíi cuéntá Ndióxi. Ta caja na tóco ndihi ña núu, ña xíca ini yiquí cuñu na caja. ⁴Ta casáhá na ndaça tuhún ichi na já cachi na já: “Ñasahan Jesucristo tuhun a quixi tucu a ta ndá cuéntá queá a ñaha quixi a. Jáchi jandá tá nasatacu tásáhnú jícó yo, tá cáa ñuyíví yóho anda saha já cáa yíi va.”

⁵Ta cachi na ña yóho jáchi co cúní na candúsa na ña sa jandá sanahá ndivaha va ñacahan Ndióxi ta já ñacavaha indivi xihin ñuyíví. Ta mé Ndióxi queá nasahnda chuun ña ná ndinuna ticuíf cán já ná canáha nuú ñundáhyi ta íin ticuíf tóco ndihi xoo ñundáhyi viti. ⁶Ta xihín ticuíf najánaa a saha ñayivi ñuyíví sanahá tá najácuun mé á javi quíni. ⁷Joo indivi xihin ñuyíví ña íin viti yóho, ndúu a ndátí a xinu quíví chicaan núhu Ndióxi ña já ná ndihi sahá. Cája Ndióxi ña yóho já ná ndoho ini ñayivi quini cán ta jándihi a saha ná quíví caja víf Ndióxi sahá ñayivi quini cán.

⁸Ta viti candehé ndo, ñani maní i. In quíví cúú á tátuhun in mil cuja nu Ndióxi ta in mil cuja cúú á tátuhun in quíví nu Ndióxi. A ndíndójó ndó ña yóho. ⁹A cáhán ndo ña cácuáchí Jesús jáxinu coo a nuú tuhun a tá ñacachi a ña quixi tucu a tá quiahva cáhán java na. Joo a ñaha quixi Jesucristo jáchi táhvi ndivaha ini mé á sahá ñayivi. Ta co cúní mé á ña ná cuhun ni in tuhún na indayá ndihi saha ná. Ña cúní mé á queá ná ndicó coo ini na ña ná jándacoo na cuachi cája na.

¹⁰Mé quíví co cáhán na quixi Jesucristo já quixi mé á. Tá quiahva cája taa cuíhna tá xinu coo da nuú ta ni in na co xini na ña xinu da cája cuíhna da ñaha na

quiahva já coo nuú quixi ri Jesucristo va. Ta mé quíví cán in cuití cuni johó ñayivi ñihi ndivaha indivi ta já casáhá ña ndítani a. Ta já cayí ñuyíví yóho xihin tóco ndihi ñaha íin nu á. Ta já cayí ñaha ndúu nu táchi indivi ta ndihi saha tóco ndihi ñaha.

¹¹Mé a ndaa vaxi quíví coo tóco ndihi ña yóho sahá ña cán queá ndítahan nu ndó caca vaha ndó íchi cuéntá Ndióxi ta caja ndó ña cúní mé á xihín ndinuhu ini ndó. ¹²Candati ndó xinu quíví quixi tucu Jesucristo ñuyíví yóho. Ta nducú ndéé ndo cája chúun ndó cuéntá mé á já ná xinu yachi quíví cán. Tá ná xinu quíví cán já jándihi Ndióxi sahá indivi xihin núhu ita. Ta tóco ndihi ñuyíví jándutu mé á ña xihin núhu cáyi. ¹³Joo mí, yó cúú cuéntá Jesús ndátí inga indivi saá xihín in ñuyíví saá jáchi nasahan Ndióxi tuhun a nu yo ña quiahva ña nu yo. Ta cán tóco ndihi ñaha cacuu a ña vaha ta ndinuhu ña ndaa coo cán.

¹⁴Ñani i, quíhvi ndivaha ini i ndohó sahá ña cán queá cáhan i ña yóho xihin ndo. Nani cámaní xinu quíví caja Ndióxi tóco ndihi ña cán, ndítahan ndihi ini ndó caja ndó ña vaha já queá ná cuni Ndióxi ña íin vaha ini ndó xihin mé á ta já ná cuni a ña coo cuachi ndó. ¹⁵Ta a ndíndójó ndo ña ndátí yíi Jesucristo quixi tucu a ñuyíví yóho jáchi táhvi ndivaha ini mé á saha yo ta cúní a jácacu a mí. Ta tá quiahva cáhyí yehé nu ndo yóho quiahva já ñacahyí ri ñani maní yo, da cúú Pablo carta ñachindahá da nu ndo jáchi ñacaja Ndióxi ña ná candaa ini da cán ña cúní mé á. ¹⁶Nu tóco ndihi carta ñacahyí Pablo nu ndo cáhan da xihin ndo saha tóco ndihi ña yóho. Java ña yóho cúú á ña yáncá ndivaha cándaa iní saha. Ta na co cándaa ini xihin na co cándeé vaha ini Ndióxi ñacasáhá ndíjama na ña ñacahyí da. Quiahva já cája na ndíjama na java ga ña cáhí tuhun Ndióxi joo ndihi saha tóco ndihi na cán.

¹⁷ Candehé ndo, ñani maní i. Sahá ña sa xíní vaha ndó saha tóco ndihi ña nandicani i nu ndo yóho, xíní ñúhú canda da vaha ndó mé ndó já ná a jándahvi ñayivi quini ndohó já ná a ndácava ndó nuú cuachi vatí cuahan vaha ndó íchi cuéntá Ndióxi viti. ¹⁸ Xíní ñúhú canda

vaha chága ini ndó yo cúú Jesucristo, xitoho í jáchi mé á queá jácacu mí. Ta xíní ñúhú canda vaha chága ini ndó ña cája Ndióxi cuahá ñamani xoho. Cáhnu ná cacuu Jesucristo anda ama cáa quiyi. Já ná coo.

Carta nu cuití naçahví Juan núu na cúu cuéntá Jesús

Cáxi tuhun Juan núu ñayivi sahá Jesucristo

1 Cáhyi nde carta yóho nu ndó sahá Jesucristo, mé á nasahjin janda tá cámani çava sáhá saha ñuyiví. Mé nde naxini johó nde ña naçahan mé á ta chí naxini xihín núu nde mé á. Nasandehé nde a ta naçani ndaa ndahá nde a. Cáhan nde sahá Jesucristo mé á cúu tuhun Ndióxi, ña cája ña ná catacu ñayivi anda ama cáa quivi. ²Najánaħa mé á núu ñayivi ta mé nde naxini nde a sahá ña cán queá cáxi tuhun nde núu ñayivi saha mé á. Ta ndícani nde nu mé ndó viti saha Jesucristo, mé á sa janda ama cáa quivi fin a xihín Ndióxi, tátá a ta ço ndíhi toho sahá. Viti naquixi a najánaħa mé á nu yo. ³Ta cáxi tuhun nde nu ndo ña naxini nde xihín ña naxini johó nde já ná cuu in canduu ndó xihín mé nde. Jáchi in nanduu yó xihín Ndióxi, tátá yo ta xihín Jesucristo, mé a cúu in túhún jini já jahyi Ndióxi. ⁴Ta cáhyi nde ña yóho nu ndo já ná ndicutú ndaa ínima yo xihín ña çajji ín yo.

Jándiyehé ndaa Ndióxi nu fin a

⁵Ña najánaħa Jesucristo núu nde cúu á ña jánaħa nde nu ndó viti: Jándiyehé ndaa Ndióxi nu fin a ta ni loho ña naá ço fin nu fin mé á. ⁶Tá ná cachi yó ña in nanduu xihín Jesucristo nani cája í cuachi já queá cúu á tátuhun ndúu yii yó núu naá jáchi cátuhún yo ta ço cája í ña ndaa. ⁷Joo tá ndúu yó nu yéhe tá quiahva fin Ndióxi núu ña yéhe já queá in nduu ndihí. Ta Jesucristo, mé a cúu in túhún jini já jahyi Ndióxi jándoo ndihi a cuachí jáchi naxita nii á saha yo tá naxihí a ndíca crúxu.

⁸Ta tá ná cachi yó ña ço toho cuachi cája í já queá jándahví mé ví ta ço ndá-

caan ña ndaa ini. ⁹Joo tá ná nahma yó cuachí nu Ndióxi já queá cuu candeé ini ña caja ndaa Ndióxi xihín yo jáchi caja cáhnu ini a sahá cuachí ta ndaja ví a mí nu tóco ndihi ña núu. ¹⁰Joo tá ná cachi ña ni in túhún toho cuachi ço naçaja í já queá ndája túhún yo Ndióxi ta xihín ña yóho náħa ña mé a ndaa táhyi ço nandiquehe vaħa í tuhun vaħa cáhan saha mé á.

Jesucristo queá cáhan cuachí a saha yó nu Ndióxi

2 Candehé ndó. Mé ndó cúu ndó tá tuhun jahyi válí i ta cáhyi i ña yóho nu ndo ña ná a cája ndó cuachi. Ta vatí ná caja ndó cuachi joo fin Jesucristo cáhan cuachí a saha yó nu Ndióxi, tátá a. Ta cája mé á ña ndaa cuití va. ²Jáchi naçahvi Jesucristo sahá cuachí tá naxihí a ndíca crúxu. Já queá xihín ña yóho cuu caja cáhnu ini Ndióxi sahá cuachí. Ta a juú sahá cuachi mé cuití yo, vaħa jáchi naxihí rí a sahá cuachi ndaja táhan na ndúu ñuyiví.

³Jáchi tá cája í ña sáhndá Ndióxi já queá náħa ña mé a ndaa táhyi xini yo mé á. ⁴Joo tá cáchi in na ña xini na Ndióxi nani ço cája na ña sáhndá mé á já queá cúu ná na túhún ta ço ndácaan ña ndaa ini na. ⁵Joo na cája ña sáhndá Ndióxi, náħa ña mé a ndaa táhyi quihvi ini na mé á ta xihín ña yóho cándaa ini yó ña in nanduu na xihín mé á. ⁶Ta ndá na cáchi ña in nanduu na xihín Ndióxi, xini núhú caja na tá quiahva naçaja Jesucristo tá nasahjin a ñuyiví yóho.

Sáhndá Ndióxi chuun ña ná quihvi ini táhan í

⁷Candehé ndó ñani i, na cúu cuéntá Jesús. Ço cáhyi i nu ndó in chuun saħa ña nasahnda Ndióxi caja ndó. Cúu á mé chuun naçahnda nu ndó caja ndó janda mé saħa tá nandihvi ndó íchi cuéntá Jesús. Ta cúu á ña sa naxini johó ndó

andá mé cán. ⁸ Joo mé a ndaa ña cáhyí i yóho cúú á chuun saá jáchi sáhdá Ndióxi ña ná quihvi ini táhan í. Ta tá cája í ña sáhdá Ndióxi já queá queé ndihi ña naá cuahan ta mé a ndaa jándiyehé Jesucristo ínimá yo jáchi quihvi ini táhan í tá quiahva nacaja mé á.

⁹ Ta ndá na ná cachi ña sa nandiyehé ínimá na nacaja Jesucristo nani cándají na ñani na, na cúú cuéntá Jesús já queá cúní cachi a ña ndúu yií ná nuú naá ndivaha. ¹⁰ Ta ndá na quihvi ndusa ini ñani na já queá cúní cachi a ña mé a ndaa jándiyehé Jesucristo ínimá ná ta ni in ñaha a cúu caja ña ná ndacava na nuú cuachi. ¹¹ Joo ndá na cándají ñani na já queá ndúu na nuú naá ta xíca na nuú naá yáve. Ta ni co xíní na ndáchí xíca na jáchi cúú ná tátuhun na cuaá jáchi ndúu na nuú naá.

¹² Mé ndó cúú ndó tátuhun jahyi i ta cáhyí i carta yóho nu ndo jáchi sahá ña nacaja Jesucristo nacaja cáhnu ini Ndióxi sahá cuachí. ¹³ Ta cáhyí i carta yóho nu ndó, natáa, na cúú tátá jáchi nacandaa ini ndó sahá Jesucristo, mé a sa íin janda tá nacava sahá saha ñuyiví. Ta cáhyí ri carta yóho nu ndó, ta yúta jáchi nacandeé ndó nasahnu ndó nuú tiñáhá sacuahá.

Candehé ndo. Mé ndó cúú ndó tátuhun jahyi i ta cáhyí i carta yóho nu ndo jáchi nacandaa ini ndó yo cúú Ndióxi, tátá yo. ¹⁴ Ta cáhyí ri carta yóho nu ndó, na cúú tátá jáchi nacandaa ini ndó sahá Jesucristo, mé a sa íin janda tá nacava sahá saha ñuyiví. Ta cáhyí ri carta yóho nu ndó, ta yúta jáchi sáhan ndeé ini ndó ta ndacaan tuhun Ndióxi ini ínimá ndo ta nacandeé ndó nasahnu ndó nuú tiñáhá sacuahá.

¹⁵ Ta coto a cátóo ndó ña cúú cuéntá ñuyiví yóho ta ni a ndiava ini ndo cacomí ndó ña ndúu ñuyiví yóho. Jáchi ndá na cúní ñaha ñuyiví yóho já queá cúní cachi a ña co cúní na Ndióxi, tátá

yo. ¹⁶ Jáchi ni in ña núu ndúu ñuyiví yóho coo vaxi a cuéntá Ndióxi, tátá yo. Ta ña yóho cúú á ña a váha toho cáhvi ini ñayivi caja na ta jári ndiava ini na cacomí na ña xíní na xihín nuu ná ta jári ndínehe jícó ndivaha na mé ná sahá ña cómí na. Ndijáa ña yóho cúú á ña núu quíxi mé ñuyiví yóho. ¹⁷ Vaxi quiví ndihi saha tóco ndihi ña ndiava ini ñayivi ta janda mé ñuyiví yóho ndihi sahá joo ndá na cája ña sáhdá Ndióxi, na cán cúú na catacu nu íin mé á anda ama cáa quivi.

Ná co cúní táhan xihín Jesucristo

¹⁸ Candehé ndo jáchi cúú ndó tátuhun jahyi i. Jalóho cúní ndihi saha ñuyiví ta sa xíní johó ndó sahá in da vaxi caja ihvi xihín Jesucristo. Ta mé tiempo yóho sa naqueta cuahá na co cúní táhan xihín mé á. Sahá ña yóho sa cándaa ini yó ña sa nacayati quiví ndihi sahá ñuyiví yóho. ¹⁹ Mé na co cúní táhan xihín Jesucristo yóho nasañuhu na tañu mí. Joo a juú toho na cuéntá mí nasacuu na. Jáchi tá ná cacuu na cuéntá mí já canduu na tañu mí, nduu. Joo naqueta na cuahan na já ná nahá ña mé a ndaa co cúú ná cuéntá mí.

²⁰ Joo nu mé ndó nasahan Jesucristo ínimá yií mé á sahá ña cán queá tóco ndihi ndó cúú ndó ñayivi xíní ña ndaa. ²¹ Tá cáhyí i carta yóho nu ndo, co cúú á sahá ña co xíní ndó ña ndaa. Joo cúú á sahá ña sa xíní ndó ña ndaa ta sa xíní ndo ña ni in túhún ña tuhún a cúu quixi tañu ña ndaa.

²² Na tuhún cúú ná na co cúní ndicuni ña cúú Jesucristo mé á nachindahá Ndióxi jácaacu a ñayivi. Mé na tuhún yóho cúú ná na co cúní táhan xihín Jesucristo jáchi co cúní na ndicuni na Ndióxi, tátá yo ta ni co cúní na ndicuni na Jesucristo, mé a cúú in túhún jini já jahyi Ndióxi. ²³ Jáchi ndá na chíjehé tuhun ña xíní na Jesucristo, jahyi Ndióxi já cúní cachi a ña coo in nanduu na xihín

Ndióxi, tátá yo. Joo na cuahān xoo Jesucristo, jahyi Ndióxi in nanduu na xihin Ndióxi, tátá yo.

²⁴ Sahá ña cán queá xini ñúhú cacu vaha ndó tuhun Ndióxi ini ínima ndó, jáchi cúu á ña naxini joho ndó janda mé saha tá nandiquehe ndó íchi cuéntá Jesús. Ta tá mé a ndaa ndícaan ña naxini joho ndó ini ínima ndo já queá anda ama cáa quivi in nduu ndó xihin Ndióxi, tátá yo ta in nduu ndó xihin Jesucristo, mé a cúu in túhún jini já jahyi Ndióxi. ²⁵ Ta nasahan Jesucristo tuhun a nu yo ña cat-acú xihin mé á anda ama cáa quivi.

²⁶ Cáhyi i ña yóho nu ndo já ná canda ini ndó sahá na cúni jándahvi ndohó. ²⁷ Joo ndácaan ínima yii Ndióxi ini ndó, mé a nasahan Jesucristo nu ndo. Sahá ña cán queá co xini ñúhú toho ndó inga na jánaha na ndohó jáchi mé ínima yii Ndióxi, ña ndácaan ini ndó jan jánaha tóco ndihi ñaha nu ndo. Ta ña jánaha mé á nu ndó cúu á ña ndaa ta co cúu á ña tuhún. Sahá ña cán queá xini ñúhú catáhan tuun ndó xihin Jesucristo tá quiahva sácaya ndó jáchi quiahva já najánaha ínima yii Ndióxi nu ndo.

²⁸ Candehé ndo jáchi cúu ndó tátuhun jahyi i. Xini ñúhú catáhan tuun í xihin Jesucristo já ná cuu candeé ini mé á tá ná canáha mé á quixi a ta já ná a cácahan nu yo tá ná cuní mé á. ²⁹ Mé ndó sa canda ini ndó ña cája Jesucristo ndinuhu ña ndaa cuití va. Ta tá cája mé ndó ña ndaa já queá jánaha ndó ña mé a ndaa cúu ndó jahyi Ndióxi.

Ná cúu jahyi Ndióxi

3 Candehé ndó. A juú quiahva quihvi ini Ndióxi, tátá yo mí anda nasahan ñamaní nu yo cananí yo jahyi Ndióxi ta mé a ndaa cúu yó jahyi mé á. Joo ñayivi ñuyívi co xini na Ndióxi sahá ña cán queá co ndícuni na ña cúu yó jahyi mé á. ² Candehé ndo, ñani maní, na cúu cuéntá Jesús. Sa cúu yó jahyi Ndióxi vatí viti

ñúhú co canda ini ndá quiahva nduú. Joo canda vaha ini ña tá ná quixi Jesucristo já nduú tá quiahva cáa mé á jáchi cuní mé á tá quiahva cáa tá íin a. ³ Ta tóco ndihi na ndati nduu na tá quiahva cáa mé á já queá ndaja víi na mé ná jáchi cúni na coo víi na tá quiahva íin víi Jesucristo.

⁴ Tóco ndihi na cája cuachi sáhnú na nu ley Ndióxi jáchi tóco ndihi ña núu cúu á cuachi nu ley Ndióxi. ⁵ Mé ndó sa canda ini ndó ña naquixi Jesucristo ñuyívi yóho ta naxihí a já ná cuu ndoo cuachi ñayivi. Ta co ni in túhún toho cuachi mé á. ⁶ Sahá ña cán queá tóco ndihi na cátiivi tuun xihin mé á co xica nuu ga na cája na cuachi. Joo na xica cája cuachi jánaha na ña co xini toho na mé á ta jánaha na ña co cúu na cuéntá mé á. ⁷ Candehé ndó jáchi cúu ndó tátuhun jahyi i. Cuéntá coo ndó ná a jándahvi ni in na ndohó. Jáchi ñayivi ndaa cája ndaa na tá quiahva cája Jesucristo. ⁸ Joo na xica nuu cája cuachi cúu ná cuéntá tiñahá sacuaḥa jáchi janda mé saha ñacaja rí cuachi. Sahá ña cán queá naxinu Jesucristo ñuyívi yóho, mé á cúu in túhún jini já jahyi Ndióxi ta naquixi a jándihi a sahá ña núu cája tiñahá sacuaḥa.

⁹ Ni in túhún toho na cúu jahyi Ndióxi co xica na cája na cuachi jáchi viti nanduu na tá quiahva íin mé á. Ta co cúni ga na caca nuu na caja na cuachi jáchi cúu ná jahyi Ndióxi. ¹⁰ A fhvi toho ndicuní ndá na cúu jahyi Ndióxi ta ndá na cúu jahyi tiñahá sacuaḥa. Jáchi na co cája ña ndaa ta na co quihvi ini ñani táhan na cán cúu ná jánaha ña co cúu ná cuéntá Ndióxi.

Ndítahan nu yo quihvi ini táhan í

¹¹ Janda mé saha tá nandiquehe ndó íchi cuéntá Jesús já naxini joho ndó ña cáchi tuhun Ndióxi ña ndítahan quihvi ini táhan í. ¹² Co ndítahan caja í tá quiahva ñacaja Caín sanahá jáchi

nasacuu da cuénta tiñáhá sacuaḡa. Ta nasahní da ñani da jáchi mé Caín nasacaja da ña núu cuití va ta nandicuni da ña vaha cuití va nasacaja ñani da.

¹³ Candehé ndó, ñani mí i, na cúu cuénta Jesús. A cátóntó ndo tá cándají ñayivi ñuyíví ndohó. ¹⁴ Tá quíhví ini ná cúu cuénta Jesús já queá sa xíní yo sa najáca cu mé á mí ná a cūhun toho í indayá joo cūhun í coo í nu íin mé á indiví. Joo ndá na co quíhví ini ñani táhan na, cúu ná tátuhun in ndíi. ¹⁵ Ta tóco ndíhi na cándají ñani táhan cúu ná tátuhun in na sáhní ndíi jáchi sáhní na ñani táhan na ini ínimá na. Ta mé ndó sa cándaḡa ini ndó ña ni in na sáhní ndíi co núná nu ná cūhun na indiví catacu na anda ama cáa quívi. ¹⁶ Mé Jesucristo najánaḡa nu yo ndá quíahva cája ndusa in na quíhví ini ñani táhan jáchi naxíhí a saḡa yo. Quíahva já ndítahan ri nu mí ví coo tiahva í quívi saḡá ñani táhan í, na cúu cuénta Jesús. ¹⁷ Joo tá íin in na ta íin cuahá ndivaha ñaha nu ná ta co cúní na chindeé na na cúu cuénta Jesús, na ndímaní ñaha nuu já queá a cuú cachi na ña quíhví ini na Ndióxi. ¹⁸ Mé ndó cúu ndó tátuhun jahyi i saḡá ña cán queá cáhan i xihín ndo ña xíní núhú jánaḡa yó xihín ña cája í ña quíhví ini ñani táhan í ta a juú xihín yuhú ninu uun í cuití va.

Co ndítahan cayíhví yo Ndióxi tá cája í ña sáhná a

¹⁹ Tá cája í ña ndaa, ña cúní Ndióxi já queá cándaḡa ini ña cúu yó cuénta mé á ta íin vaha ini xihín mé á. ²⁰ Ta vatí cáhvi ini ña coo nacaja vaha í joo xíní vaha cháḡa Ndióxi á mé a ndaa nacaja núu í á coo a jáchi xíní mé á tóco ndíhi ñaha. ²¹ Candehé ndó ñani máni, na cúu cuénta Jesús. Tá xíní vaha í ña ndácaan ña vaha ínimá yo já queá co yíhví toho í cáhan í xihín á. ²² Ta mé Ndióxi queá quíahva tóco ndíhi ña xíca yó nu á jáchi mé a ndaa cája í ña sáhná a nu yo ta

cájii ini mé á xihín ña cája í. ²³ Ta ña sáhná Ndióxi nu yo cúu á ña ná candeeé ini Jesucristo, mé a cúu in túhún jiní já jahyi mé á. Ta sáhná a nu yo ña ná quíhví ini táhan í tá quíahva natahnda chuun nu yo cája í. ²⁴ Ta na cája ña sáhná Ndióxi in nanduu na xihín mé á ta in nanduu mé á xihín na. Ta saḡá ña nasacu Ndióxi ínimá yíi mé á ini in in í saḡá ña cán queá náha ña in nanduu yo xihín mé á.

Ínimá yíi Ndióxi co ndíque táhan xihín ínimá quini ña ndácaan ini na co cúní táhan xihín Jesucristo

4 Candehé ndo, ñani mí i, na cúu cuénta Jesús. A cándusa ndó tóco ndíhi na cáhí ña cúu ná cuénta Ndióxi jáchi cuḡa ná cúu ná na túhún. Ña xíní núhú cája ndó queá coto ndojó ndó na já ná cándaḡa ini ndó á mé a ndaa ndácaan ínimá yíi Ndióxi ini na á coo a. Jáchi cuḡá ndivaha na túhún nandicuita nuu na ñuyíví yóho jándahvi na ñayivi vatí cáhí na cáhan na cuénta Ndióxi. ² Xihín ña yóho cuu cándaḡa ini ndó ndá na cúu na núhu ínimá yíi Ndióxi ini jáchi tóco ndíhi na cándusa ña nanduu Jesucristo in ñayivi ñuyíví yóho na cán cúu ná na núhu ínimá yíi Ndióxi ini. ³ Joo na co cándusa ña nanduu Jesucristo in ñayivi ñuyíví yóho, na cán cúu ná na co núhu ínimá yíi Ndióxi ini jáchi ña ndácaan ini na cán cúu ínimá quini, ña co cúní táhan xihín Jesucristo. Sa naxini johó ndó ña quixi tá quixi mé ínimá quini, ña co cúní táhan xihín Jesucristo ta sa íin a ñuyíví yóho viti.

⁴ Candehé ndo jáchi cúu ndó tátuhun jahyi i ta cúu ndó cuénta Ndióxi. Nacandeeé ndó nasahnú ndó nuu na jánaḡa ña túhún jan jáchi tóyíi cháḡa ínimá yíi Ndióxi ndácaan ínimá ndo a juú ga ínimá quini ndácaan ínimá ñayivi ñuyíví. ⁵ Mé na jan cúu ná cuénta ña núu ñuyíví yóho ta ñaha ñuyíví yóho cuití cáhan na saḡa. Ta ñayivi ñuyíví táa johó na ña cáhan na.

⁶ Joo mí cúu yó cuéntá Ndióxi. Sáhá ña cán queá na cúu cuéntá Ndióxi xíní johó na ña cáhan yo. Joo na co cúu cuéntá Ndióxi co xíní johó na ña cáhan yo. Ta xihín ña yóho cuu ndicuní ndá na cúu na ndácaan ínimá yíi Ndióxi ini ta ndá na cúu na ndácaan ínimá quini ini. Jáchí ña ndaa cúu ínimá yíi Ndióxi ta ínimá quini cúu á ña tuhún.

Quíhvi ini ndusa Ndióxi ñayivi

⁷ Candehé ndo, ñani mání, na cúu cuéntá Jesús. Xíní ñúhú quíhvi ini táhan í jáchí ña yóho quixi a cuéntá Ndióxi. Tóco ndihi na quíhvi ini ñani táhan cúu ná jahyi Ndióxi ta xíní na yo cúu Ndióxi. ⁸ Na co quíhvi ini ñani táhan jánaña na ña co xíní na Ndióxi jáchí Ndióxi queá sáhan nu yo ña ná quíhvi ini táhan í. ⁹ Ta nachindahá Ndióxi Jesucristo, mé in túhún jiní já jahyi a ñuyíví yóho ña ná quivi a saha yo já ná catacú anda ama cáa quívi. Xihín ña yóho najánaña Ndióxi ndá quíahva quíhvi ini a mí. ¹⁰ Candehé ndo ndá quíahva quíhvi ini Ndióxi mí. A juú jihna ñúhú mí naquíhvi ini Ndióxi jáchí jihna ñúhú ga Ndióxi naquíhvi ini a mí. Ta nachindahá a Jesucristo, mé in túhún jiní já jahyi a ña ná chahvi mé Jesús sahá ndihi cuachí tá na xihí a ndíca crúxu.

¹¹ Candehé ndo, ñani mání, na cúu cuéntá Jesús. Tá ta quíahva johó na cajaan Ndióxi sahá ña quíhvi ini a mí já queá ndítahan ri nu mí ví quíhvi ini táhan í. ¹² Ni in ñayivi coo na xini xihín nuu ná Ndióxi. Joo ñúhú mé á ini tá quíhvi ini táhan í. Ta xihín ña yóho jáxinu coo í ña quíhvi ndusa ini ñani táhan í. ¹³ Ta sahá ña nasacu Ndióxi ínimá yíi mé á ini in in yó sahá ña cán queá náña ña in nanduú xihín mé á ta in nanduú mé á xihín yo. ¹⁴ Ta mé nde na xini nde a xihín nuu nde ta cáxi tuhun nde xihín ndaja táhan ñayivi ña nachindahá Ndióxi, tátá yo Jesucristo, mé a cúu in túhún jiní já jahyi

a ña ná jácacu a ndaja táhan na ndúu ñuyíví. ¹⁵ Ndá na cándusa ña cúu Jesucristo in túhún jiní já jahyi Ndióxi, na jan cúu na in nanduú xihín Ndióxi ta in nanduú Ndióxi xihín ná.

¹⁶ Ta viti sa nacandaa ini ta cándusa í ña mé a ndaa quíhvi ini Ndióxi mí. Ta ndá na quíhvi ini Ndióxi já in nanduú na xihín Ndióxi ta in nanduú Ndióxi xihín ná. ¹⁷ Ta xihín ña yóho jáxinu coo í ña quíhvi ini ñani táhan í xihín ndinuhu ini. Sáhá ña cán queá tá ná xinu coo quívi caja víi Ndióxi sahá ñayivi já queá a cácahan nuu yo tá candichí nu Ndióxi. Jáchí tá quíahva nasacaja Jesucristo tá nasahin a ñuyíví yóho quíahva já cajaan í viti. ¹⁸ Mé a ndaa quíhvi ini Ndióxi mí ña cán queá co yíhvi toho í mé á. Jáchí tá ná cáhan yo jándoho Ndióxi ini já queá cayíhvi yo mé á. Joo tá ná candaa vaha ini ña mé a ndaa quíhvi ndusa ini Ndióxi mí já queá a cáyíhvi toho í mé á. Ña cán queá tá yíhvi yo mé á já queá co xíní yo ña quíhvi ndusa ini a mí.

¹⁹ Quíhvi ini Ndióxi jáchí jihna ñúhú ga mé á naquíhvi ini a mí. ²⁰ Joo tá in in na ta cáchí na quíhvi ini na Ndióxi joo cándají na ñani táhan na já queá jánaña na ña cúu ná na tuhún. Jáchí tá co quíhvi ini na ñani táhan na, da sánehé na xihín nuu ná ndaja cajaan na cachi na quíhvi ini na Ndióxi, ña a cuú cuni tvi na. ²¹ Nasahnda Jesucristo chuun yóho nu yo: Ndá na quíhvi ini Ndióxi já ndítahan nu ná quíhvi ri ini na ñani táhan na viti.

Ndaja cajaan í quee vaha í xihín ña núu ndúu ñuyíví yóho

5 Tóco ndihi na cándusa ña cúu Jesús mé á nachindahá Ndióxi cacomí a cuéntá sahá ñayivi, na jan cúu ndusa jahyi Ndióxi. Ta ndá na quíhvi ini Ndióxi, tátá yo, xíní ñúhú quíhvi ri ini na tóco ndihi na cúu jahyi mé á. ² Tá quíhvi ini Ndióxi ta tá cajaan í ña sáhdá

mé á nū yó caja í, xihín ña yóho cándaḍá cáxí iní ña quíhvi iní na cúu jahyi Ndióxi. ³Ta na cája ña sáhdá Ndióxi, na cán cúu na jánahā ña mé a ndaa táhyí quíhvi iní na mé á ta chuun sáhdá mé á nū yó cō cúu á in ñaha ña a cúu candeé yó xihín. ⁴Ta tóco ndihi na cúu ndusa jahyi Ndióxi candeé na sáhnū na nuú ña núu ñuyíví yóho. Sáhā ña cán queá tá candeé iní Jesucristo já queá quee vaha í xihín ña núu ndúu ñuyíví yóho. ⁵Ndá na cándúsa ña cúu Jesucristo in túhún jini já jahyi Ndióxi, na cán cúu na candeé sáhnū nuú ña núu ndúu ñuyíví yóho.

Sáhan ínimā yij Ndióxi túhun sahá Jesús ña cúu á in túhún jini já jahyi Ndióxi

⁶Tá naquixi Jesucristo ñuyíví yóho já naḥandúta mé á xihín ticuíf. Ta jári naḥita niji á tá naḥihí a ndica crúxu saha yó. Naḥaja Jesucristo ndívi ña yóho: naḥandúta xihín ticuíf ta naḥita niji á tá naḥihí a ndica crúxu. Ta mé ínimā yij Ndióxi sáhan túhun sahá ña yóho ta ña cáhan mé á cúu á ña ndaa. ⁷Ndúu uní testigo indiví ta sáhan túhun sahá Jesús ña cúu á in túhún jini já jahyi Ndióxi: In testigo cúu Ndióxi, tátá yó ta inga testigo cúu túhun Ndióxi ta inga testigo cúu ínimā yij Ndióxi. Ta in cúu ndíhuni a sáhan túhun sahá Jesús. ⁸Ta ndúu uní testigo ñuyíví yóho. Ta in testigo cúu á ínimā yij Ndióxi ta inga testigo cúu á tá naḥandúta Jesús ta testigo cáhuni cúu á tá naḥita niji Jesús ndica crúxu. Ta ndíhuni testigo yóho sáhan túhun a sahá Jesús ña cúu á in túhún jini já jahyi Ndióxi. ⁹Ín tiahva í cándúsa í ña cáhan ñayivi xihín yó tá sáhan na túhun sahá in ñaha. Ña cán queá ama ná a cándúsa í ña cáhan Ndióxi xihín yó jáchi ña cája mé á queá sáhan túhun sahá Jesucristo, jahyi a ta ña yóho cúu á ña ndíyahvi chága a juú ga ña cáhan ñayivi. ¹⁰Ta tá cándúsa í ña cúu Jesucristo in túhún jini já jahyi Ndióxi já

cúu á tátuhun ndiquehe vaha í ña cáchi mé á iní ínimā yó. Joo na cō cándúsa ña yóho ndája na ña ná nduu Ndióxi ña túhún jáchi cō cándúsa na ña cáhan mé á sahá Jesucristo, jahyi a. ¹¹Ta túhun sáhan Ndióxi cúu ña yóho: Naḥahan mé á ñamaní catacú anda ama cáa quívi. Ta Jesucristo, jahyi mé á queá cája ña ná catacú indiví anda ama cáa quívi. ¹²Ta ndá na nandiquiahva mé ndáha Jesucristo, mé á cúu in túhún jini já jahyi Ndióxi, na jan cúu na catacu na anda ama cáa quívi nū ín mé á. Joo ndá na cō naḥeen ndíquiahva mé ndáha mé á a cúu catacu na anda ama cáa quívi xihín mé á.

Cáhyí chága Juan sahá ña ndítahan caja í

¹³Cáhyí i ña yóho nū ndóhó, na candeé iní Jesucristo, jahyi Ndióxi já ná cándaḍá iní ndó ña catacu ndó indiví anda ama cáa quívi.

¹⁴Ta cō yíhvi toho í xíca í nū mé á in ñaha, ña cúní a quiahva nū yó jáchi cándaḍá cáxí iní ña xíní johō a nū cáhan yó.

¹⁵Ta tá cándaḍá iní ña xíní johō Ndióxi nū cáhan yó já queá candeé iní ña quiahva tá quiahva mé á ña nū yó.

¹⁶Tá ná cuni ndó ñani ndó, na cúu cuéntá Jesús ta caja na cuachi ña cuu caja cáhnu iní Ndióxi saha já queá ndítahan caḥa tahví ndó nū Ndióxi sahá na cán. Ta xihín ña yóho caja cáhnu iní Ndióxi sahá na jan já ná catacu na anda ama cáa quívi. Joo ín cuachi ña cañehe ñahá cuhūn indayá ta cō ndítahan caḥa tahví yó nū Ndióxi sahá ña jan.

¹⁷Tóco ndihi ña núu cája í ñuyíví yóho cúu á cuachi nū Ndióxi joo cuahá ndivaha cuachi cája cáhnu iní Ndióxi saha.

¹⁸Ta cándaḍá iní ña tóco ndihi na cúu jahyi Ndióxi cō xíca ga na nuú cuachi jáchi ndáa Jesucristo mé ná, mé á cúu in túhún jini já jahyi Ndióxi já ná a cája tiñhá saḥaḥa ni in ña núu xihín ná.

¹⁹Cándaꝯ vaha iní ña cómi Ndióxi cuéntá saha yo joo tóco ndihi ñayivi cuéntá ñuyíví ñúhu na ndahá tiñáhá sacuahá ta cómi rí cuéntá saha ná.

²⁰Ta cándaꝯ cáxi iní ña ñaquixi Jesucristo, mé á cúú jahyi Ndióxi ta najándiyehé a xíní túní yo já queá ná candaꝯ iní ña cúú mé á ña ndaa. Ta viti in ñanduú xihín mé á jáchi in ñanduú

xihín Jesucristo, mé a cúú in túhún jini já jahyi Ndióxi. Mé a yóho cúú ndusa Ndióxi ta cúú á ña cája ña ná catacú anda ama cáa quiivi. ²¹Candehé ndo. Mé ndó cúú ndó tátuhun jahyi i ña cán queá cáhan i ña yóho xihín ndo. Coto a cája cáhnu ndó ni in yoco ta ni a cája cáhnu ndó ni in ñaha tá co cúú á Ndióxi. Já ná coo.

Carta chí ivi nacahyí Juan nuú na cúu cuéntá Jesús

Cáhan Ndióxi Juan xihín na cúu cuéntá Jesús

1 Yehe cúu u in da sacuahá ta cáhyí i carta yóho nu ndóhó, quiahva i na cúu cuéntá Jesús jáchi nacaxi Ndióxi ndóhó. Tá jari cáhyí i carta yóho nuú jahyi ndó jáchi mé a ndaa quihvi ndivaha ini i ndihi ndó. Ta a juú yehe cuiti va jáchi tóco ndihi na nacandaa ini na ndaa quihvi ini na ndóhó. ² Quihvi ini i ndóhó jáchi ndacaan na ndaa ini ínima ndihí ta anda ama cáa quivi coo a xihín yó. ³ Na cúni queá na ná caja Ndióxi, tátá yo xihín Jesucristo, jahyi mé á cuahá namani xihín yo. Ta ná tãhnda ini mé á saha yó ta ná caja mé á na ná coo vaha ini. Ta cuu caja mé á na yóho jáchi cúu á na ndaa ta quihvi ini a mí.

⁴ Cãji ndivaha ini i jáchi nanditahan i java jahyi ndó ta cája na na ndaa tá quiahva nasahnda Ndióxi, tátá yo caja í. ⁵ Candehé ndo quiahva i, na cúu cuéntá Jesús. Xíca tãhví i nu ndó na ná quihvi ini táhan í. Ta na cáhyí i yóho coo cúu á chuun saá jáchi cúu á na sa naxini johó í jãnda mé saha tá nandiquehé íchi cuéntá Jesús. ⁶ Ta tá mé a ndaa quihvi ini Ndióxi náha na mé a ndaa cája í na sãhnda Ndióxi caja í. Ta na nasahnda Ndióxi caja í jãnda mé saha cúu á na ná quihvi ini táhan í.

Na xíca nuu jándahvi na cúu cuéntá Jesús

⁷ Ní cúu ñuyíví nandicuíta cuahá na xíca nuu jándahvi na na cúu cuéntá

Jesús. Ta na cán coo cúni na ndicuni na na nãduu Jesucristo in ñayivi ñuyíví yóho. Ta na cán cúu ná na tuhún ta cúu ná na coo cúni táhan xihín Jesucristo. ⁸ Cuéntá coo ndó ná a jándahvi na ndóhó já ná a tíví chuun nacaja ndó sahá Jesucristo. Xiní ñuhú jáxinu coo ndó chuun cája ndó cuéntá mé á já ná ná cuu quiahva mé á tóco ndihi na ndítahan nu ndó ndiquehe ndó sahá mé chuun nacaja ndó.

⁹ Ta ndá na quéta xoo nuú na najána na Jesucristo ta coo xíca ndacu na íchi cuéntá mé á, na cán náha na coo in nãduu na xihín Ndióxi. Joo ndá na xíca na cája na na najána na Jesucristo, na cán cúu na in nãduu xihín Ndióxi, tátá yo ta in nãduu na xihín Jesucristo, jahyi mé á. ¹⁰ Ta ndá na vaxi nu ndo ta coo jána na na najána na Jesucristo nu ndo já queá a ndiquehe ndó na cán vehe ndó ta ni a cáhan Ndióxi ndó xihín ná. ¹¹ Jáchi tá ná jáyaha ndó na cán vehe ndó já queá in nãduu ri mé ndó xihín na ta cátahan ndó xihín na núu cája na.

Ndindayí Juan na cúu cuéntá Jesús

¹² Ín cuahá ndivaha na na cúni cáhan i xihín ndo joo coo cúni cáhyí i na nu ndo. Jáchi na cúni queá saa i coto nihni i ndóhó já ná cuu ndituhún yo na ná cavatá ndivaha ini ndihí.

¹³ Ta na cúu jahyi quihvi ndo chindahá na Ndióxi coo ndó jáchi mé na cúu na na nacaxi Ndióxi viti. Já ná coo.

Carta chí uní naçahyí Juan núú na cúú cuéntá Jesús

Cáħan Ndióxi Juan xihín in da naní Gayo

1 Yehe cúú u in da saçauħa ta cáhyí i carta yóho nu mún ñani máni, da naní Gayo. Ta mé a ndaa quřhví ndusa ini i yohó.

² Candehé, ñani máni, da cúú cuéntá Jesús. Xica ãhví i nu Ndióxi ña ná quiaħva mé á tá nuú ña vaħa nuun. Ta ná caja mé á ña ná a quřhvun ta já coo vaħa inún tá quiaħva fin vaħa inún xihín Ndióxi. ³ A juú quiaħva ná cajji íni i tá naquixi java na cúú cuéntá Jesús yóho ta nandicani na nuú i ña co caxóun nuú ña ndaa jáchi cája tá cajún ña. ⁴ A juú quiaħva cajji íni i tá ñéhé e tuħun ña xica ndó íchi cuéntá ña ndaa jáchi mé ndó cúú ndó tátuhun jahyi i.

⁵ Candehé, ñani máni. Vaħa ndivaha cajún jáchi xihín ndinuhu inún chindeún na cúú cuéntá Jesús tá saa na jan vatí cúú ná na quíxi ñuu tóho. ⁶ Ta nu tóco ndihi na táca veñuhu yóho ndícani mé na tóho ndá quiaħva quřhví ndivaha inún na. Ña cán quea xica i ñamaní nu yohó, Gayo ña ná chindeún na tá ná saa tucu na cán ta ná quiaħvún ña ndímaní nu ná cañehe na íchi cuħun na jáchi ña yóho cúú á ña cajji ini Ndióxi xihín. ⁷ Ndítahan chindeún na jáchi naqueta na xica nuu na cája na chuun cuéntá Jesucristo ta co cúni na caça na ñaha catacu na nuú na co cúú cuéntá Jesús. ⁸ Sahá ña cán quea ndítahan nu mí, na cúú cuéntá Jesús chindeé yó na cán xihín ña ndímaní nu ná. Ta xihín ña yóho in nduu yó xihín ná tá cáħan na ña ndaa xihín ñayivi.

Cuaħi cája in da naní Diótfrefes

⁹ Sa naçindahá i in carta nu tóco ndihi na cúú cuéntá Jesús ndúu jan joo Diótfrefes coó naheen da cándusa da ña cáchi nde. Jáchi cája cáħnu da mé dá ta cúni da cacuu da jini nu tóco ndihi na cúú cuéntá Jesús ndúu jan. ¹⁰ Sahá ña cán quea tá ná saa i jan çaxi tuħun i nuun saħá ña cája da jáchi xica nuu da cáħan ndivaha da ña tuħún saħá nde. Ta a juú ña yóho cuití cája da, vaħa jáchi ni co cúni da ndiquehe da na cúú cuéntá Jesús xínu coo jan. Ta sáji nuu da nuú na cúni ndiquehe vaħa ñahá ta janda táxi da na veñuhu.

¹¹ Candehé, ñani máni. A cajún ña núu tá quiaħva cája Diótfrefes jan. Xíni ñúhú cajún ndinuhu ña vaħa jáchi da cája ña vaħa cúú dá cuéntá Ndióxi joo da cája quini co xini da Ndióxi.

Ña vaħa cája Demetrio

¹² Joo tóco ndihi na cúú cuéntá Jesús cáħan vaħa na saħá da naní Demetrio jáchi ña ndaa cuití va cája da. Ta quiaħva já cáħan vaħa ri ndeħe va saħa dá ta cándaħ inún ña cáħan nde ña ndaa.

Ndíndayí Juan Gayo

¹³ Mé a ndaa fin cuaħá ndivaha ñaha cúni cáħan i xuhun joo co cúni çahyí i ña nuú tutu yóho ¹⁴ jáchi cúni cuni yachi i yohó já ná nditúhún yúhu mí i xuhun.

¹⁵ Ña xica i nu Ndióxi quea ná caja mé á ña ná coo vaħa inún. Na cúú cuéntá Jesús ndúu yóho chindahá na Ndióxi coún. Ta cajún ñamaní cáħan Ndióxi lohún xihín in in na cúú cuéntá Jesús ndúu jan.

Carta nacahyí Judas nuú na cúú cuéntá Jesús

Cáhyí Judas carta nuú na nacaxi Ndióxi cacuu na cuéntá mé á

1 Yehe cúú Judas, da cája chúun cuéntá Jesucristo ta cúú u ñani Jacobo. Cáhyí i carta yóho nu ndóhó jáchi cúú ndó na nacana Ndióxi, tátá yo. Cúú ndó na quíhvi ini mé á ta cúú ndó na ndáá Jesucristo jáchi in nanduu ndó xihín mé á. ² Ña xíca tahví i nu Ndióxi queá ña ná tahnda ndivaha ini mé á saha ndo. Ta ná caja mé á ña ná coo vaha ndivaha ini ndó. Ta ná chutú ndaa ini ndó xihín ña quíhvi ini a ndohó.

Cáhan Judas sahá na jánaħa ña tuhún (2 Pedro 2:1-17)

³ Candehé ndo, ñani mí i, na cúú cuéntá Jesús. A juú quiahva naxinu ini i cáhyí i nu ndo saha ndá quiahva najacacu Ndióxi ndihí. Joo viti ndíhi ini i cáhyí i carta yóho nu ndo ná caça tahví i nu ndo ña ná a jándacoo ndó ña cándee ini ndó Jesucristo jáchi ña yóho cúú á ña in tañu cuití va nasahan Ndióxi nu yo, na cúú cuéntá mé á. ⁴ Jáchi java ñayivi nandaja na mé ná tátuhun na cúú cuéntá Jesús ta naquihvi nuu na tañu ndó jan. Mé ñayivi yóho cúú ná na sa cáhan tuhun Ndióxi saha janda jihna ndivaha ta cáchi a ndítahan nu ná cuhun na indayá. Cúú ná ñayivi quini jáchi jánaħa na ña tá sa nacaja cáhnu ini Ndióxi sahá cuachi na já cuu caja na tá nuú cuachi ña cúní mé ná. Ta xihín ña yóho náħa ña co xéen na candúsa na Ndióxi, mé á cómí cuéntá saħa tóco ndihi ñaha. Ta jári náħa ña co cúú ná cuéntá Jesucristo, xi-toho í.

⁵ Sa xíní ndo ña nandoho na Israel tá natavá Ndióxi na ñundahyi Egipto sanahá. Ta viti jándicuhun ini i ndohó

ña vatí natavá Ndióxi tóco ndihi na Israel cán Egipto joo tá nandihí najándihí a saħa na coo naxeen candúsa ñahá. ⁶ Ta quiahva já nacaja ri mé á xihín na nasacuu táto mé á jáchi coo naxeen na caja na ña cúní Ndióxi ta najándacoo na nuú nasanduu na. Sahá ña cán queá nachicaji Ndióxi na nu naá ndivaha nu ñúhu na anda ama cáa quívi. Ta ndátí na cán xinu quívi caja ví mé á saħa ná. ⁷ Ta tá quiahva nacaja Ndióxi xihín mé táto cán quiahva já nacaja ri a xihín ñayivi ñuu Sodoma xihín na ñuu Gomorra ta xihín na nanduu ñuu ñéhe táhan xihín ndíví ñuu yóho. Najándihí Ndióxi saħa ná jáchi nandiquiahva na yiquí cuñu na ña ná caja na tá nuú cuachi. Ta ndaja táhan mé ta nacaja cuachi xihín táhan da. Sahá ña cán queá najacuyu Ndióxi ñúhu cáyi jata ná. Ta quiahva já ndoho na anda ama cáa quívi. Ta xihín ña yóho jánaħa Ndióxi nu yo ña quiahva já cuu ndoho ri mé ví tá co cája í ña cúní mé á.

⁸ Tá quiahva nacaja ñayivi sanahá quiahva já cája ri na jándahvi ndohó viti. Jáchi cúú ná ñayivi quini, na cája cuachi ta tá xíní na cája na in cuachi já cuahan na cája ná ña. Mé na cán cája na ña núu xihín yiquí cuñu na ta quehe núu na Ndióxi jáchi co quehe na cuéntá nu cáhan mé á xihín ná ta co yíhvi na cánaħa na xihín táto Ndióxi indiví, mé á ñin ndée cája cuahá ñaha. ⁹ Ta janda mé á cúú sacuaħa nu tóco ndihi táto Ndióxi naní a Miguel ni coo nacanaħa a xihín tiñahá sacuaħa. Ta ni co naxeen a cahan núu a xihín rí tá nacani táhan mé á xihín rí saħa yiquí cuñu Moisés. Ña nacachi a xihín rí queá: “Ndióxi ná jánaħi a yohó”, nacachi a xihín rí. ¹⁰ Joo ñayivi quini, na xíca jándahvi na cúú cuéntá Jesús yóho, co yíhvi na cánaħa na xihín ña co cándaħa ini na saħa. Joo cája na ña xíca ini yiquí cuñu jáchi cúú ná tátuhun quítí, rí co xíní túní ta ña núu cája na yóho jándihí a saħa ná.

¹¹ Ndáhví ndivaha nācuu nā jan jáchí cája na tá quiahva nācāja Caín, da nasahní ñani sanahá ndivaha. Ta jatá jihuún cuití va cája na ñaha tá quiahva nācāja Balaam sanahá. Ta cája rí na tá quiahva nācāja Coré sanahá tá nandínehe yúhu dá nu Ndióxi. Ta sahá ña yóho ndihi saha ná. ¹² Jáchí na jándahvi ndóhó jan jácacahan na nu ndó tá táca ndó xíxi ndó xihín java na cúu cuéntá Jesús. Jáchí yáha ndivaha ña xíxi na jan ta coó toní núhú na xihín ña cája na. Ta saha mé cuití va na ndíhi ini na. Cúu ná tátuhun víco núhú, ña xíca nuu cája tachi ña co ndójo javi. Ta cúu ná tátuhun yító cuihi, do co cúun ñaha nuu tá ndítahan cuun cuihi nu do. Cúu ná tátuhun yító, dó natuhun na janda yóho dó jáchí coó nācuun cuihi nu do. Ta cúu ná tátuhun na nandíhi saha chí in ndeé. ¹³ Ña cája na jan cúu á tátuhun yáco cāndo nuu chíquiñu tañuhú tá ndícojo do jáchí ña cácahan nuu yo cúu ña cája na jan. Cúu ná tátuhun quimi, rí najana ta co ndínehe rí nuú nasahíin rí. Ta sahá ña cája na cañuhu na nuú naá ndivaha anda ama cáa quivi caja Ndióxi.

¹⁴ Ta janda sanahá da naní Enoc, da nasācuu da usā nuú chíchi Adán najáyaha da tuhun nācahan Ndióxi sahá ña núu cája na jándahvi ndóhó cán. Ta já nācachi da já: “Candehé ndó. Sa vaxi Jesucristo, xitoho í xihín cuaha mil táto yí mé á ¹⁵ ña ná caja víí a saha tóco ndíhi na ndúu ñuyíví. Ta jándoho a ini tóco ndíhi ñayivi sahá ndíhi ña núu nācāja na. Ta quiahva já jándoho a ini na saha tóco ndíhi tuhun ihvi nācahan na saha mé á”, nācachi Enoc saha ná. ¹⁶ Mé ñayivi quini yóho ni in ñaha co táhan ini na xihín ta cáhan núu na saha tóco ndíhi ñaha. Ta níí tiempo cája na ña xíca yiquí cūñu na cuití va. Ta ndínehe jíco ndivaha na mé ná tá cáhan na nuú ñayivi. Ta cáhan vaha na sahá ñayivi ña ná nuná nuu ná jándahvi ñahá na.

Jácahan Judas na cúu cuéntá Jesús ña ná candee cáhnu ini na Ndióxi

¹⁷ Candehé ndo, ñani máni, na cúu cuéntá Jesús. Xíní núhú ndicuhun ini ndó ña nācachi na apóstol cuéntá Jesucristo, xitoho í xihín ndo sanahá. ¹⁸ Mé na cán nācachi na xihín ndó já: “Tá ná cayati quivi ndíhi saha ñuyíví yóho já queá cacu nuu ñayivi cuacu ndaa na Ndióxi. Ta caja na tá nuú ña núu ña xíca ini mé ná caja na”, nācachi na cán. ¹⁹ Mé ñayivi quini yóho cúu ná na xíca sáhdá java táhan na cúu cuéntá Jesús. Ta cája na ña núu ña cáhvi ini na caja na ta co ndácaan ínimā yí Ndióxi ini na.

²⁰ Joo mé ndó, ñani máni, na cúu cuéntá Jesús xíní núhú coo ndacú ini ndo xihín ña candee ini ndó Jesús jáchí ña jan cúu á ña yí ndivaha. Ta xíní núhú caca táhví ndo nu Ndióxi xihín ndeé ña sáhan ínimā yí mé á nu ndo. ²¹ A cáxoo ndó nu Ndióxi jáchí quíhvi ini a ndóhó. Ta candati tiahva ndó xinu coo quivi caja Jesucristo, xitoho í ña ná catacú anda ama cáa quivi jáchí mé a ndaa táhvi ini a saha yo.

²² Ta ndítahan candáhví ini ndó ndá na cáhvi ivi joho ini saha Jesús. ²³ Já queá jácacu Ndióxi na ña ná a cúhun toho na indayá. Xíní núhú candáhví ini ndó na. Joo cuéntá coo ndó xihín ná já ná a cásahá ndo caja ndó cuachi tá quiahva cája mé ná jáchí na cán cuu jácaquini na ndóhó.

Cája cáhnu Judas Ndióxi

²⁴ Mé Ndióxi queá íin tóco ndíhi ndeé chindee a mí ña ná a ndácava í nuú cuachi já ná cuu coo víí yo tá ná xinu coo í nu íin mé á. Ta caja mé á ña ná chutú ndaa yo xihín ña cájii ini tá ná xinu coo í nu íin mé á ta a juú quiahva ndató cáa cán. ²⁵ In túhún jini mé á cúu Ndióxi, mé á jácacu mí sahá ña nācāja Jesucristo, xitoho í. Cóho caja cáhnu í Ndióxi jáchí

yéhe ndivaha mé á ta cáhnu ndivaha cúú
á ta íin cuahá ndéé á ta mé á quéá cómí
cuéntá saha tóco ndihi ñaha. Cáhnu cúú

mé á viti ta anda saha ta anda ama cáa
quivi cáhnu cúú mé á. Já ná coo.

Ña najánaḥa Jesucristo nu Juan

Tá naḥaḥa Jesucristo mé á nu Juan

1 Ña yóho cúu ña naḥaḥa Ndióxi nuú Jesucristo ña ná cuu jánaḥa mé á ña nuú na cúu cuéntá mé á. Ta naḥin-dahá Jesucristo in táto mé á nuú yeḥe, ḍa cúu Juan, ḍa cája chúun cuéntá mé á já ná caḥi tuḥun táto mé á xihín i ndá a queá yaha chága chí nuu. Ta cúu á ña sa cáyati vaxi. ²Ta ndícani ndaa ndihi i sahá ña naḥini i xihín nuú i ta naḥayí i tóco ndihi ña yóho. Ta nasahan Jesucristo tuḥun a nuú i ña cúu á ña ndaa.

³Cajii ini ñayivi tá cáhvi na ña naḥayí i yóho ta cajii ini na xini johu na ña yóho nani cáhvi inga na ña jáchi cúu á ña naquixi cuéntá Ndióxi. Cajii ini ñayivi tá cája na ña cáhí a jáchi sa naḥayati quívi coo tóco ndihi ña yóho.

Cáhyi Juan ña yóho nu ndíḥusa ñuu nu ndítaca na cúu cuéntá Jesús

⁴Yeḥe cúu Juan ta cáhyi i carta yóho nuú ndíḥusa ñuu nu ndúu na cúu cuéntá Jesús estado Asia. Ña cúní queá ná caja cuahá Ndióxi ñamaní xihín ndó ta ná caja mé á ña ná coo vaha ini ndó. Mé Ndióxi fin a viti ta naḥaḥin a janda tá cámaní cava sáhá saḥa ñuyívi ta quixi a ñuyívi yóho. Ta cúní ña ná caja cuahá ínima yii Ndióxi ñamaní xihín ndo. Mé a cán cáa tátuhun usa ínima yii ta ndúu na nu Ndióxi, mé nu fin coo a cómi a cuéntá sahá indivi cán. ⁵Ta cúní ña ná caja cuahá Jesucristo ñamaní xihín ndo, mé á cáhan ña ndaa sahá ña naḥini a. Ta mé á naḥacu ña nu cuítí naḥitacu tañu na sa naḥihí. Ta cómi a cuéntá saḥa tóco ndihi rey, na cómi cuéntá sahá ñayivi ñuyívi yóho. Ta quíhvi ini Jesucristo mí ta najándoo a cuachí tá naḥita nji á ndica crúxu. ⁶Ta tóco ndihi mí, na cándéé ini mé á najándique táhan mé á mí já ná ca-

comí a cuéntá saḥa yo. Ta naḥaja mé á mí naḥuú tátuhun jutú ña ná caja cáhnu yó Ndióxi, mé a cúu tátá Jesucristo. Cáhnu ná cacuu mé á anda ama cáa quívi jáchi fin ndéé mé á caja tóco ndihi ñaha anda ama cáa quívi. Já ná coo.

⁷Sa naḥayati quívi quixi Jesucristo tañu viço. Ta tóco ndihi ñayivi cuni ñahá ta janda na naḥahni ñahá cán cuni na a. Ta tóco ndihi ñayivi ndúu ndijáá ñuu ní cúu saḥa ñuyívi canduu cuéḥa ndivaha ini na saḥa mé á. Já ná coo.

⁸Ta já cáhí Jesucristo, xitoho í saḥa mé á: “Yeḥe cúu mé a nu cuítí ta yeḥe cúu mé a nu ndíhí jáchi janda tá cámaní cava sáhá saḥa tóco ndihi ñaha sa fin va yeḥe ta coo tá coo i vatí ná ndihi sahá”, cáhí a. Mé a cúu Ndióxi, ña fin ndéé cája tóco ndihi ñaha. Ta mé á fin a viti ta naḥaḥin a janda tá cámaní cava sáhá saḥa ñuyívi ta quixi a ñuyívi yóho.

Naḥa Jesucristo nu Juan ndá quiaḥva cáhnu cúu mé á

⁹Yeḥe cúu Juan ta cúu u ñani ndó, na cúu cuéntá Jesús. Ta sahá ña cándéé ini i Jesús sahá ña cán queá naḥeḥe táhvi i xihín mé ndó cacomí Ndióxi cuéntá saḥa ndihí. Ta coo caja toho ña ná ndoho iní ñuyívi yóho jáchi sahan Ndióxi tuḥun ndéé iní já ná cuu caja ndéé iní tá ndóho iní. Naḥava xóo na yeḥe ta naḥahan ñeḥe na yeḥe isla naní Patmos sahá ña naḥi-ca nuu i naḥahan i tuḥun Ndióxi, ña cúu ña ndaa, ña najánaḥa Jesucristo nuú i. ¹⁰Ta ndaja coo naḥindaa quívi coo ña nasacu ini Jesucristo, xitoho í ta mé tañu já naḥutú ndaa ínima i xihín ínima yii Ndióxi ta já naḥini johu i cáhan cóhó in a chí jatá i ta naḥacu a tátuhun tá tívi na trompeta. ¹¹Ta mé tuḥun naḥini johu i cán naḥachi a já xihín i:

—Yeḥe cúu mé a nu cuítí ta yeḥe cúu mé a nu ndíhí jáchi janda tá cámaní cava sáhá saḥa tóco ndihi ñaha sa fin va

yehe ta coo tá coo i vatí ná ndihi sahá. Tóco ndihi ña ná cunún yóho xíní ñúhú çahyún ña nuú in libro. Ta já chindahún ña nuú ndihusa ñuu estado Asia nu ndúu na cúu cuéntá mí i. Chindahún ña nuú na ndúu ñuu Efeso xihín nuú na ndúu ñuu Esmirna xihín nuú na ndúu ñuu Pérgamo xihín nuú na ndúu ñuu Tiatira xihín nuú na ndúu ñuu Sardis xihín nuú na ndúu ñuu Filadelfia xihín nuú na ndúu ñuu Laodicea viti —ñacachi a xihín i.

¹²Tá naxini johó i ña yóho já nandicoto nihni játá i sándehe e yo cáhan xihín i. Ta já naxini i usa ña jiuñun cuáán nu sándójó ña túun. ¹³Ta tañu ña cán naxini i in a cúní coo tá cúní coo ñayivi ta ndíxi a in jáhma cání ña jandá sahá xínú coo a xihín quiahva cání á. Ta naxini i ndácaan in cinturón ña jiuñun cuáán tóco á ta cání a jandá yati yicá ndicá a. ¹⁴Ta ijí jini á cúu á ña yaa çachí tátuhun yaa yucú yáhvá. Ta nduchú núu a cúu á tátuhun ñúhu ita. ¹⁵Ta tá quiahva yehe çaa ña jándutu na ini horno quiahva já yehe sahá. Ta nihi ndivaha cáhan mé á ta cúu á tátuhun tá xójo cúyu ticuí yuta tañu cáva. ¹⁶Ta naxini i ñúhu usa quími ini ndahá cuáha mé á. Ta ini yúhu a naxini i quéta in yuchú cání ña jeen ndívi xoo yúhu. Ta naxini i yehe ndivaha nuú á tá quiahva yehe çandii çaxivi ndaa.

¹⁷Tá naxini i mé á já nandicava i sahá tátuhun in ndíi. Joo mé á naxinúu a ndahá cuáha jatá i já nacachi a já xihín i:

—A cáyihví tohún. Yehe cúu mé á nu cuítí ta cúu u mé a nu ndíhí. ¹⁸Tácú tá tácú va yehe. Mé a ndaa nasacuu u ndii joo viti tácú u ta catacu u anda ama cáa quívi. Ta yehe naquee vaha i tá nanditacu tucu u tañu ndii ta viti cómí i cuéntá sahá nu ndúu ínima na sa naxihí. ¹⁹Xíní ñúhú çahyún ña naxinún. Ta xíní ñúhú çahyún sahá ña cúu viti ta já çahyún sahá ña coo chága chí nuu. ²⁰Ña yóho quea cúní cachi ndihusa quími naxinún

ñúhu ini ndahá cuáha i xihín ndihusa ña jiuñun cuáán nu sándójó ña túun. Ndhusa quími cán cúu rí yuhú nuu in in na cómí cuéntá sahá usa veñuhu nu táca na cúu cuéntá Jesús. Ta ndihusa nu sándójó ña túun cán cúu á yuhú nuu usa veñuhu. Ta ña yóho coo naxini ñayivi jáchi nasacuu a ña jehé.

Ña nacachi Jesús xihín na cúu cuéntá mé á ndúu ñuu Efeso

2 Çahyún in carta nuú da cómí cuéntá sahá na cúu cuéntá mí i ndúu ñuu Efeso. Ta ña çahyún cúu ña yóho: “Ña yóho cúu tuñun cáhan Jesús, mé a ñúhu usa quími ini ndahá cuáha, mé a xíca nuu tañu usa ña jiuñun cuáán nu sándójó ña túun. Ta ña yóho quea cáhan Jesús xihín ndó, na ñuu Efeso: ²Sa cándaq ndihi ini i ndá quiahva cája ndó. Cándaa vaha ini i ña ndúcu ndéé ndo cája chúun ndó cuéntá mí i. Ta co jándacoo ndó chuun cája ndó cuéntá mí i. Ta sa cándaq vaha ini i ña co ndéé ini ndó xihín ña cája ñayivi quini. Ta sa cándaq ini i ña sa naxito ndojó ndó na cáchí cúu apóstol cuéntá Ndióxi joo co cúu toho na apóstol jáchi cúu ná na tuñun cuítí va. ³Ta sa cándaq cáxi ini i ña co jándacoo ndó cája chúun ndó cuéntá mí i. Ta cuahá ndivaha tañu ndóho ini ndó sahá i. Ta co cánaá ndó xihín ña yóho. ⁴Joo iin in ñaha cáhan cuachí i nu ndó saha: Ta ña cúní çahan i saha cán quea co cúní ga ndó yehe tá quiahva nacacúni ndó yehe jandá mé saha. ⁵Ña cán quea ndítahan ndicuhun ini ndó ndá quiahva nacacúni ndó yehe jihna. Ta ndítahan nu ndó ndicó coo ini ndó ta caja ndó tá quiahva nacaja ndó jandá mé saha. Á tá coo ta xinu yachi i nu ndo ta tavá i ña cándójó, ña túun nu ndo. Caja i ña yóho xihín ndo tá ná a ndicó coo ini ndó. ⁶Joo mé a ndaa cájii ini i xihín ndo jáchi cándají ndó ña núu cája na xíca cuéntá nicolaítas jan. Jáchi co táhán ri ini yehe xihín

ñā núu cāja nā jan. ⁷ Cuni joho vaha ndó, nā vaha joho ñā cáhan ínima yii Ndióxi xihín nā cúu cuéntá mí i, nā táca veñuhu: Ndá nā ná quee vaha tañu tóco ndihi ñā núu ñuyiví yóho, nā cán cúu nā quiahva i ñamaní nuu caxí cuihi cúun nu yíto, dó cāja ñā ná catacu ñayivi anda ama cáa quivi. Mé yíto cán cándichi dó nu fin Ndióxi.”

Carta cuahān nuú nā cúu cuéntá Jesús ndúu ñuu Esmirna

⁸ Cahyún inga carta cūhun nuú da cómi cuéntá sahá nā cúu cuéntá mí i ndúu ñuu Esmirna. Ta ñā cahyún nu ná cúu ñā yóho: “Ñā yóho queá cáchi Jesús, mé a cúu á nu cuítí ta cúu á nu ndíhí, mé á sa naxihí ta já nanditacu tucu a. Ta já cáchi a já xihín ndó, nā ñuu Esmirna: ⁹ Sa xíní vaha i ndá quiahva ndóho ini ndó. Ta xíní ndá quiahva cándahví ndo. Joo mé a ndaa cúu ndó nā cuicá nu Ndióxi. Ta sa xíní ndá quiahva cáhan núu na saha ndo jáchi cáchi nā cúu ná nā Israel joo a juú nā. Cúu ná in táhndá nā cāja cáhnu Satanás, mé tiñáhá saçuahā va. ¹⁰ A cáyihví toho ndó sahá ñā vaxi nu ndó ndoho ini ndó. Jáchi ñayivi quini, nā cúu cuéntá tiñáhá saçuahā taán nā java ndohó vecaa já coto ndojó nā ndohó. Ta tixi uxu quivi ndoho ini ndó. Ta xíní ñúhú cándeé tá cándeé ini ndó yehe vatí ná cahní nā ndohó ta já ná cāja i ñā ñehe táhvi ndó catacu ndó anda ama cáa quivi. ¹¹ Cuni joho vaha ndó, nā vaha joho ñā cáhan ínima yii Ndióxi xihín nā cúu cuéntá mí i, nā táca veñuhu: Ndá nā ná quee vaha nu tóco ndihi ñā núu ñuyiví yóho, nā cán cúu nā a cūhun toho na ndoho ini na indayá. Jáchi tá ndóho ini ñayivi indayá cúu á tátuhun xihí na chí ivi.”

Carta cuahān nuú nā cúu cuéntá Jesús ndúu ñuu Pérgamo

¹² Cahyún inga carta cūhun nuú da cómi cuéntá sahá nā cúu cuéntá mí i ndúu ñuu Pérgamo. Ta já cachún já nu carta jan: “Jesús, mé a ñehe yúchu cáni ñā jeen ndíví xoo yúhu cán queá cáchi já: ¹³ Sa xíní vaha i ñā fin ndó ñuu Pérgamo nu cāja Satanás, mé tiñáhá saçuahā ñā cúu mé rí xihín ñayivi. Joo xihín ndinuhu ini ndó cāja ndó ñā táhán ini i xihín. Ta coo najándacoo ndó ñā cándeé ini ndó yehe vatí naxini ndó ndá quiahva nacaja na xihín Antipas, mé da nacandeé cáhnu ini yehe cán. Jáchi nasahní nā da mé ñuu jan nu cómi Satanás, mé tiñáhá saçuahā cuéntá sahá ñayivi. ¹⁴ Joo fin in ñaha cáhan cuachí i nu ndó saha. Jáchi sahan ndó ñamaní nuú java ñayivi cán ñā ná candico cáhnu na ñā najánaha Balaam. Mé Balaam jan cúu dá da najánaha Balac ndaja cāja da jácahan da nā Israel cāja na cuachi tátuhun ná cuxu na ñā najoco ñayivi nuú yoco ta ná cuju xihín táhan ñayivi vatí coo cúu ná yí ná á ñájihí nā. ¹⁵ Ta coo fin vaha ini i xihín ndó, nā ñuu Pérgamo jáchi sahan ndó ñamaní nuú java ñayivi ñā ná candico nā jatá nā nicolaítas. Ta cándají ndivaha i ñā jánahā nā jan. ¹⁶ Xíní ñúhú ndicó coo ini ndó ta caca vaha ndó íchi cuéntá mí i. Á tá coo ta saa yachi nu ndúu ndó jan. Ta xihín tuhun cahan i caní táhan i xihín nā cāja cuachi jan. Ta mé tuhun cahan i cacuu a tátuhun yúchu cáni ñā cana yuhú u. ¹⁷ Cuni joho vaha ndó, nā vaha joho ñā cáhan ínima yii Ndióxi xihín nā cúu cuéntá mí i, nā táca veñuhu: Ndá nā ná quee vaha nuú ñā núu já queá quiahva i ñamaní nu ná cuxu na pan yii, ñā cúu tátuhun maná, ñā naquixi indiví. Ta ñā yóho cúu á ñā nasahin jehé nuú ñayivi. Ta já quiahva ri in yuú yaa nuú in in ñayivi nu ndaa quivi saá nā. In túhún

na ná ndiquehe yuú yaa cán cúu na xíní yu quívi queá ndáa nu á.”

Carta cuahan nuú na cúu cuéntá Jesús ndúu ñuu Tiatira

¹⁸ Cahyún inga tucu carta ná cuhun a nuú da cómi cuéntá sahá na cúu cuéntá mí i ndúu ñuu Tiatira. Ta já cachún já xihín ná: “Ña yóho queá cáhí Jesús, mé a cúu in túhún jiní já jahyi Ndióxi. Ta mé á queá yehe nduchú núu a tátuhun ñuhú ita ta yehe saha tá quiahva yehe caa, ña jándutu na ini horno. Ta mé á cáhí a já xihín ndóhó, na ñuu Tiatira: ¹⁹ Sa xíní vaha i tóco ndihi ña cája ndó. Xíní vaha i ña cúní ndó yehe. Ta xíní vaha i ña cándeé cáhnu ini ndó yehe. Ta sa xíní vaha i ña co jándacoo ndó cája ndó ña cájii íni i xihín. Ta sa cándaq vaha ini i ña ndíhi chága ini ndó cája chúun ndó cuéntá mí i a juú ga tá nacasáhá ndo cándeé ini ndó yehe. ²⁰ Joo íin in ñaha ña cúní cuahan cuachí i xihín ndó saha. Jáchí co cúní ndó jánani ndó ña naní Jezabel, ña íin tañu ndó jan. Vatí cáhí ña ña cáhan ña cuéntá Ndióxi joo xihín ña quixi jiní mé ña jándahvi ña na cúu cuéntá mí i. Jáchí jácahan ña na ná cuju xihín táhan na, na co cúu yíí ná á ñájhí na. Ta jánaha ña na ña ná cuxu na ña najoco ñayivi nuú yoco. ²¹ Sa nasandati ndivaha i ña ná ndicó coo ini ña sahá cuachi cája ña joo co cúní ña jándacoo ña ña quíji ná xihín na co cúu yíí ña. ²² Sahá ña cán queá caja i ña ná quíhvi ndeé ña candúhu ña xito ña. Ta caja i ña ná ndoho ndivaha ini ndihi da quíji xihín ña tá ná a jándacoo da cuachi cája da xihín ña jáchí ña jan cúu ña najánaha ña nu dá caja da. ²³ Ta caja i ña ná quivi ndihi jahyi ña. Ta xihín tóco ndihi ña yóho cuni na cúu cuéntá mí i, na ndúu ndijáa ñuu ña mé a ndaa xíní vaha i ña cáhvi ini ñayivi ta xíní ndaja íin ínimá ná. Ta quiahva i nuú in in ndó ña ndítahan quehe ndó sahá ña nacaja ndó. ²⁴ Ta viti cúní cuahan

i xihín java ga ndó, na cúu cuéntá mí i ndúu ñuu Tiatira jan. Jáchí co ndicó ndo jatá ña jánaha ña cán ta co ndicó ndó jatá ña cáhí ñayivi cúu ña ndíchí ndivaha cuéntá Satanás, mé tiñáhá sacuaqa. Ña cúní cachi i xihín mé ndó queá coo ga inga chuun sáhdá i nu ndo. ²⁵ Joo xíní ñúhú candita ndacu i ndo janda quiahva ná saa i nu ndúu ndó jan. ²⁶ Ta ndá na ná quee vaha nuú ña núu ñuyívi yóho ta cája na ña cúní yehe xihín ndinuhu ini na janda quívi nu ndíhi já queá caja i ña ná ñehe táhvi ná cahnda na chuun nuú ndijáa ñayivi ndúu ñuyívi. ²⁷ Tá quiahva nacaja Ndióxi, tátá i xihín i tá nasahan mé á ndeé a nuú i quiahva já caja i xihín na cándeé ini yehe. Ñehe táhvi ná cacomí na cuéntá sahá ñayivi ñuyívi ta cuu caja na tá quiahva cúní mé ná. Ta cuu jándihi na saha mé ñayivi ñuyívi tá quiahva cája ñayivi tá táhvi na quíji ndahyi. ²⁸ Ta quiahva ri yehe ñamaní nuú na cúu cuéntá mí i ña ná cacomí na quími cáhnu, rí queá tá natívi. ²⁹ Cuni johó vaha ndó, na vaha johó ña cáhan ínimá yíi Ndióxi xihín na cúu cuéntá mí i, na táca veñuhu.”

Carta cuahan nuú na cúu cuéntá Jesús ndúu ñuu Sardis

3 Cahyún inga tucu carta cuhun nuú da cómi cuéntá sahá na cúu cuéntá mí i ndúu ñuu Sardis ta já cachún já xihín dá: “Ña yóho queá cáhí Jesús, mé a ñúhu ínimá yíi Ndióxi ini, ña cúu ndíhusa yuhú nuú ínimá yíi mé á. Ta mé á cómi a ndíhusa quími ta ña yóho queá cáhí a xihín ndó, na ñuu Sardis jan: Xíní vaha i tóco ndihi ña cája ndó. Ta sa xíní vaha i ña cáhán ñayivi ña cája ndó tátuhun ñayivi tácu vatí mé a ndaa cúu ndó tátuhun ndíi. ² Xíní ñúhú ndicaxi vaha ini ndó ta a jándacoo ndó ña vaha cája ndó jan jáchí jalóho cúní ndihi sahá. Sándehé vaha i ña co cája ndó ña ndaa nu Ndióxi, tátá i. ³ Xíní ñúhú ndicuhun

ini ndó ña ñacatiãhva ndó cuéntá mí i ta a jándacoo ndó caja ndó ña. Ta xíní ñúhú ndicó cõo ndó nu Ndióxi ta ndicáxi vaha ini ndó. Á tá cõo ta jonáá cuití xinu cõo i nu ndo já caja víi i saha ndo. Mé quiví cõ cáhán ndo xinu cõo i nu ndo tá quiahva jonáá xinu da cuihná. ⁴ Joo mé a ndaa ndúu java ndó mé Sardis jan, na cõo ña- caja quini mé xihín cuachi. Saha ña cán queá cuu candixi na jahmá yaa ta já cuu caca tuun na xihín i jáchi ñin sahá caja na já. ⁵ Jáchi ndá na ná quee vaha nuú ña núu ñuyiví yóho já queá candixi na jahmá yaa. Ta a jándoo i quiví ná nu libro, mé nu ndaa quiví tóco ndihi na catacu anda ama cáa quiví. Ta nu Ndióxi, tátá i xihín nu táto mé á cahan cáxi i ña jivi ndusa cúu ná cuéntá mí i. ⁶ Cuni johovaha ndó, na vaha johovaha ña cáhan ínimayii Ndióxi xihín na cúu cuéntá mí i, na táca veñuhu.”

Carta cuahã nuú na cúu cuéntá Jesús ndúu ñuu Filadelfia

⁷ Cahyún inga tucu carta cuhũn nuú da cómi cuéntá sahá na cúu cuéntá mí i ndúu ñuu Filadelfia ta já cachún já xihín dá: “Ña yóho queá cáchi Jesús, mé á cúu ña yii ndivaha ta cúu á ña ndaa. Ta nu mé á ñin yávi, ña nasacomí rey David. Ta tá súná mé á in yéhe ni in na a cuú chicaji ña. Ta tá chicaji mé á in yéhe ni in na a cuú cuná ña. Ta ña yóho queá cáchi a xihín ndó, na ndúu ñuu Filadelfia jan: ⁸ Xíní vaha i tóco ndihi ña cája ndó. Nasuná i yéhe nu ndo ta ni in túhún na a cuú chicaji ña. Ta cándaã vaha ini i ña cája tá cája ndó ña ñasahnda i nu ndo caja ndó vatí cõo cuahã ndée ndó. Ta cõ chíjehé tuhun ndó ña xíní ndó yehe. ⁹ Candehé ndo ña caja i xihín na tuhún, na cája cáhnu Satanás, mé tiñáhá sacuahã sahá ña cáchi na cúu ná na Israel joo a juú toho na. Caja i ña ná caxítí na nu ndo já ná ndicuni na ña mé a ndaa quíhví ini i ndohó. ¹⁰ Cõo najándacoo

ndó cája ndó ña ñasahnda i nu ndó caja ndó ta ñasahan ndeé ini ndó sahá ña cán queá chindeé ví ndohó ná a ndóho toho ndó ña núu vaxi jatá ñayivi ñuyiví yóho. Jáchi tá ná cayati mé hora já casahá coto ndojó i tóco ndihi ñayivi ndúu ñuyiví. ¹¹ Yachi saa i nu ndo. Ta coto a jándacoo ndó ña cándeé ini ndó yehe já queá ná a ndíquiahva i nuú inga na ña sácú vaha i quiahva i nu mé ndó. ¹² Ta ndá na ná quee vaha nu tóco ndihi ña núu ñuyiví yóho, ndaja i na cán ná cacuu na tátuhun jihín, dó cúu ndée veñuhu Ndióxi, tátá i. Ta cán canduu na anda ama cáa quiví. Ta jatá mé ná cahyí i quiví Ndióxi, tátá i. Ta sa mé yóho cahyí i quiví ñuu nu ñin Ndióxi. Mé ñuu yóho cúu á inga Jerusalén, ña saá, ña vaxi chí indiví nu ñin Ndióxi. Ta jivi jatá mé ná cahyí i inga quiví saá i. ¹³ Cuni johovaha ndó, na vaha johovaha ña cáhan ínimayii Ndióxi xihín na cúu cuéntá mí i, na táca veñuhu.”

Carta cuahã nuú na cúu cuéntá Jesús ndúu ñuu Laodicea

¹⁴ Cahyún inga tucu carta cuhũn nuú da cómi cuéntá sahá na cúu cuéntá mí i ndúu ñuu Laodicea ta já cachún já xihín dá: “Ña yóho queá cáchi Jesús, mé a cúu ña ndaa. Mé a cáhan ña ndaa sahá ña ñaxini a xihín nuú á ta sahan tuhun a sahá. Ta mé á cúu á ña ñacavaha tóco ndihi ñaha, ña sácú ini Ndióxi coo. Ta ña yóho queá cáchi a xihín ndó, na ñuu Laodicea: ¹⁵ Xíní vaha i tóco ndihi ña cája ndó. Ta xíní vaha i ña mé ndó cõo cúu ndó tátuhun in ñaha ihní ndinuhu. Ta ni cõo cúu ndó tátuhun in ñaha víxi ndinuhu jáchi cõo cája cáhnu ndó yehe xihín ndinuhu ini ndó. Vaha ná ndinuhu ña víxi ná cacuu ndó á tá ndinuhu ña ihní ná cacuu ndó. ¹⁶ Joo mé ndó ñin java uun ndó jáchi in ivi ndácaan ínimã ndo ta sahá ña cán queá tavá xóo i ndohó nuú i. ¹⁷ Jáchi mé ndó cáchi ndo ña cúu ndó na cuicá

ndivaha. Ta cáhí ndo ña vaha ndivaha quehe ndó jáchí ñehé cuaha ndó jiuhún. Ta cáhí ndo ña ni in ñaha co ndímaní nu ndo. Joo mé ndó cúu ndó tátuhun na cuaá ndáhví ndivaha jáchí a ñaha cuni ndó ña co ñehé táhvi ndó nu Ndióxi. Cúu ndó na ndáhví ndivaha ta cúu ndó tátuhun na cuaá xíca lahla. ¹⁸ Sahá ña cán queá cúní jácahan i ndohó ña ná quixi ndó nuú i cueen ndó jiuhun cuáán nuú i ña sa naxito ndojó na nu ñúhu ita ta já queá ná cacuu ndusa ndó na cuicá. Ta quiahva já ndítahan nu ndo cueen ndó jahmá yaa cachi nuú i candixi ndó já ná chijahví ndó mé ndó jáchí cacahan nuu ndó sahá ña xíca lahla uun va ndó. Ta sa mé nuú yehe ndítahan cueen ndó tata chicaan ndó nduchú nuú ndo já queá ná cuu candehé vaha ndó. ¹⁹ Jáchí jánani i tóco ndihi ñayivi, na quihvi ini i ta jándoho i ini na ña ná caja vaha na. Sahá ña cán queá xihín ndinuhu ini ndó ndítahan ndicó coo ini ndó caja ndó ña cúní Ndióxi. ²⁰ Candehé ndo. Yehe cúu u tátuhun in da cándichi cáni ndáha yéhe vehe ndó ta cána i ndohó. Ta ndá na xíní johu nu cáhan i ta súná na yéhe vehe na nuú i já quihvi i vehe na ta cajíni i xihín ná ta mé ná cajíni na xihín i. ²¹ Ta ndá na ná quee vaha nu tóco ndihi ña núu ñuyívi yóho, caja i ña ná cuu cacoo na xihín i indiví nuú cacomí i cuéntá saha ná indiví. Jáchí quiahva já naquee vaha i nuú ña núu ta viti fin coo i xihín Ndióxi, tátá i nu fin coo mé á sáhdá chuun indiví. ²² Cuni johu vaha ndó, na vaha johu ña cáhan ínimá yii Ndióxi xihín na cúu cuéntá mí i, na táca veñuhu” —nacachi a.

Tá cája cáhnu na Ndióxi indiví

4 Tá sa nayaha tóco ndihi ña yóho já naxini i núná in yéhe indiví. Ta mé a naxini johu i nu cuítí ña cáhan tátuhun trompeta ta nacahan tucu a jatá i já nacachi a já:

—Cuáhán ndaa xoo chóho já ná nahá i nuun ndá queá coo chága chí nuu —já nacachi a já xihín i.

² Chí mé hora já nandeta nuu ínimá yii Ndióxi ini i. Já naxini i mé indiví cán in nu sácoo rey ta fin coo in a cán. ³ Ta mé a fin coo cán nasayéhe nuu á tátuhun yéhe in yuu naní jaspe xihín yuu naní cornalina. Ta naxini i nacava nuu in coyánquí nu fin coo a. Ta mé coyánquí cán yéhe ri tá quiahva yéhe yuu cuí naní esmeralda. ⁴ Ta nu fin coo mé a cán naxini i nacava tiyivi inga oco comi táyi vaha nu sácoo na cómi chuun. Ta naxini i oco comi na sacuaaha, in in na fin coo nuú in in táyi vaha cán. Ta ndíhoco comi mé na sacuaaha cán ndíxi na jahmá yaa cachi. Ta cándójó in tiyivi jiuhun cuáán jini in in na cán. ⁵ Ta naxini i ña queá tasa nu fin coo mé a cán. Ta sa mé cán cáhndí tátuhun tá cána javi ta yati mé cán cáyi usa ití xihín ñuhú ita. Ta ña yóho cúu á ndíhusa yuhú nuu ínimá yii Ndióxi. ⁶ Ta yati mé cán naxini i in ñaha ta náha tátuhun in tañuhú, ña yéhe tátuhun in yutátá.

Ta yati jfin nu fin coo a cán nacava tiyivi comi ña tácu. Ta chí a juú quiahva cuaha nduchú nuú a chí nuu á ta chí jatá. ⁷ Ta in táhan mé ña tácu cán, ña nu cuítí cán cáa tá quiahva cáa in León. Ta ña inga cán ña chí ivi cáa tá quiahva cáa tindiqui. Ta nuú ña cáhuni cán cúní coo a tá quiahva cúní coo nuú ñayivi. Ta ña comi cán cáa tá quiahva cáa in tityaha tá ndáchí ri. ⁸ Ta in in mé ña tácu yóho nasahin inu ndixi a. Ta nuu á ta jatá nachutú ndaa ña xihín nducú núu. Ta ni nuú ta ni ndiví coo jándacoo ndícomi ña cán cáhan já cáhí a já:

Yii ndivaha cúu mé ndó, Ndióxi, xitoho nde.

Ta cuu caja ndó tóco ndihi ñaha.

Mé ndó sa já fin va ndó tá nacava sáha saha ñuyívi.

Ta sa já fin ndó viti ta já coo tá coo ndó andá ama cáa quivi —nacachi ndícomi ña tácu cán.

⁹Ta tá cáhan mé ña tácu cán já cája cáhnu a Ndióxi ta ndíquiahva ndixahvi nu mé a fin coo nu sácoo rey, mé a tácu andá ama cáa quivi. Ta tá cáhan mé ña tácu cán ¹⁰já ndícaxítí ndíhoço comi na sacuahá cán cája cáhnu na Ndióxi, mé a tácu andá ama cáa quivi. Ta já tñn na tiyivi cándójó jini na jáxinu na ña nu fin coo Ndióxi cán ta já cáchí na já:

¹¹Ndióxi maní nde, cúu ndó xitoho nde ta ndítahan nuú nde caja cáhnu nde ndohó jáchi mé ndó ndítahan ndicáhnu ndivaha.

fin ndée ndo caja ndó tóco ndihi ñaha ta ndítahan caja cáhnu nde ndohó.

Jáchi nacavaha ndó tóco ndihi ñaha, ta ndúu ndihi ñaha jáchi cúni mé ndó ña ná canduu a.

Ta ndúu a jáchi cúni mé ndó cavaha ndó ña, já nacachi ndíhoço comi na sacuahá cán cája cáhnu na Ndióxi.

Tá ñaxini Juan in libro xihín in ndicachi

5 Tá nandihí já ñaxini i in libro indivi ini ndáha cuáha mé a fin coo nu sácoo rey. Ta mé libro cán cúu á tutu nativi tuun a ta nacahyi ndívi xoo nu á. Ta ndáji tuun a xihín usa sello. ²Ta já ñaxini i in táto Ndióxi, ña fin ndivaha ndée a. Ta ñaxini johó i cáhan cóhó a ta ndáca tuhún a já cáchí a já:

—Ndá na cúu na fin saha cahnda ndíhusa sello yóho já ná cuná na mé libro ña nativi tuun cán —nacachi mé táto Ndióxi cán.

³Joo coó nañehe ná ni in na fin saha cahnda ndíhusa sello cán. Ni indivi ni ñuyivi ni nu ndúu na ñaxihí coó nandínehe ná ni in na cuu cahnda ndíhusa sello cán ña ná candehé na ña ndáa nu mé libro cán. ⁴Ta já nacasáhá

sácu ndivaha i jáchi coó nandínehe ná ni in tuhún na fin saha cahnda ndíhusa sello cán ña candehé na ini mé libro cán cahvi na ña ndáa nu á. ⁵Joo in táhan na sacuahá cán nacachi a já xihín i:

—A cuácu gaún jáchi Jesús, mé á cúu tátuhun león, ña naquixi chíchi Judá ta naquixi a chíchi rey David, mé a cán naquee vaha ta nasahnu a nu tóco ndihi ña núu ñuyivi. Saha ña cán queá cuu cahnda ndíhusa sello ta já cuná mé á libro cán —nacachi a xihín i.

⁶Ta ñaxini i cándichi Jesús, mé á cúu tátuhun ndicachi loho tañu na sacuahá ta tañu ndícomi ña tácu cán. Ta mé a cúu tátuhun ndicachi loho cán cándichi a nu sácoo rey ta náha xicá ña najándicuehe na mé á tá nasahní ñahá na. Ta ñaxini i fin usa ndíqui a xihín usa nduchú núu a. Ta ña yóho cúu á ndíhusa yuhú nuu ínimá yii Ndióxi, ña nachindahá mé á níi cúu sahá ñuyivi. ⁷Ta mé á cúu tátuhun ndicachi loho cán ñaxinu a ta natiiin a mé libro cán ndahá cuáha mé á fin coo nu sácoo rey. ⁸Ta tá natiiin a mé libro ña nativi tuun cán já nandíca xítí ndícomi ña tácu cán xihín ndíhoço comi na sacuahá cán nu mé a cúu tátuhun ndicachi loho cán.

Ta tóco ndihi na cán cánee arpa ndáha ná jácaha na. Ta cánee coho chíñíh má, ña jiuñun cuáán ndáha ná ta nachutú nda ña xihín jusa támi sáhan. Ta ña cán cúu yuhú nuu tuhun ña xicá tahvi na cúu cuéntá Ndióxi nu á. ⁹Ta xihín ña saá xíta na cája cáhnu na mé á já cáchí na já:

Nu mé ndó cáni ndiquehe ndó mé libro jan ta cahnda ndó sello ña ná cuná ndó ña.

Jáchi mé ndó ñaxihí ndó nacaja ñayivi.

Ta tá ñaxita ñii ndo já ñaxeen ndó ñayivi ná cacuu na cuéntá Ndióxi.

Ta mé ndó nachahvi ndó sahá na naquixi ndijáa chíchi xihín na cáhan tá nuu tuhun xihín na ndúu ndijáa ñuu xihín ndijáa nación.

¹⁰ Ta mé ndó ñandaja ndó ñayivi yóho cacuu na tátuhun jutú já ná caja cáhnu na Ndióxi.

Ta mé na cán cacomí na cuéntá sahá ñayiví ndúu ñuyiví, cáhí na cája cáhnu na mé a cúu tátuhun ndicachi loho cán.

¹¹ Tá ñandihí já ñasandehé tucu u. Anda já ñaxini johó i cáhan cuahá ndivaha millón táto Ndióxi cája cáhnu na mé á fin coo nu sácoo rey. Ñacava tiyiví na ndúu na jatá ndícomí mé ña tácu cán xihín jatá ndíhoco comí na sacuahá cán.

¹² Ta já cáhan cóhó tóco ndihí mé táto Ndióxi cán já cáhí na já:

Mé Jesús, mé a cúu tátuhun ndicachi loho, rí ñaxihí ñacaja ñayivi, fin sahá caja tóco ndihí ñaha xihín ndée á.

Ta fin sahá ndiquehe a tóco ndihí ña cuicá ta fin sahá ndiquehe ndihí a ña ndíchí ta fin sahá ndiquehe a tóco ndihí ndée.

Ta fin sahá ña ná ndiñehe jícó ñayivi mé á.

Ta fin sahá caja cáhnu na mé á ta fin sahá ña ná cata na nu mé á, cáhí tóco ndihí na cán cája cáhnu na mé á.

¹³ Ta quiqhva já ñaxini johó rí cáhan tóco ndihí ñaha ña ñacavaha Ndióxi ndúu indiví xihín ña ndúu ñuyiví xihín ña ndúu tixi ñundáhyi ta xihín ña ñúhu ini tañuhú. Tóco ndihí ña ñacavaha Ndióxi yóho cája cáhnu a mé á ta já cáhí a já:

Ná ndicáhnu ndivaha Ndióxi, mé á fin coo nu sácoo rey.

Ta ná ndicáhnu ndivaha Jesús, mé á cúu tátuhun ndicachi loho.

Ná caja cáhnu í mé á ta ná ndiñehe jícó ñayivi mé á jáchí mé á queá fin ndée caja tóco ndihí ñaha.

Ná caja cáhnu yó mé á anda ama cáa quiví, já cáhí tóco ndihí na cán.

¹⁴ Já ñanducú ñehe ndícomí mé ña tácu cán tuhun já cáhí a já:

—Já ná coo.

Ta tá ñacachi a ña yóho já ñacaxítí ndíhoco comí na sacuahá cán cája cáhnu na Ndióxi, mé á tácu anda ama cáa quiví.

Tá ñasahnda Jesucristo ndíhusa sello

6 Tá ñandihí já ñaxini i ñasahnda Jesús, mé á cúu tátuhun ndicachi loho cán sello nu cuítí cán, ña cúu táhan ndíhusa sello cán. Ta tá ñandihí já ñaxini johó i cáhan in táhan ndícomí mé ña tácu cán xihín i ta tachí yúhu a cúu á tátuhun tá cána javi. Ta já ñacachi a já xihín i:

—Naha quí, candehún yóho —ñacachi a xihín i.

² Anda já ñasandehé e ta já ñaxini i in cuáyí cúxu ta ñaxini i cánúu in ñatáa jata rí. Ta ndáha ña cán ñaxini i cánee in arco. Ta ñaxini i ña ñañehe dá in tiyiví cánúu jiní dá. Ta cájii íní ña ñaqueta da jáchí cúu dá ña sa ñaquee vaha ta ñehe táhvi dá quee vaha tucu da.

³ Ta anda já ñaxini i ñasahnda Jesús, mé a cúu tátuhun ndicachi loho cán inga sello, ña cáhiví cán. Já ñaxini johó i ña ñacahan inga tucu táhan ndícomí mé a tácu cán xihín i. Já cáhí a já xihín i:

—Naha quí, candehún yóho —ñacachi a xihín i.

⁴ Ta já ñaxini i ñaqueta inga cuáyí ta cúu rí rí cuáhá. Ta mé ña cánúu jata rí cán ñañehe táhvi dá jácani táhan da ñayivi ndúu ñuyiví. Ta ñañehe táhvi dá caja da ña ná cahní ndaja táhan mé ñayivi ndúu ñuyiví. Ta ñaxini i ñañehe dá in yuchú cáni ña cáhnu cánee a ndáha dá.

⁵ Ta tá ñasahnda Jesús, mé a cúu tátuhun ndicachi loho inga sello, ña cáhuni já ñaxini johó i ñacahan mé ña tácu, ña cáhuni cán xihín i já ñacachi a já:

—Naha quí candehún yóho —ñacachi a xihín i.

Ta tá nasandehé e já naxini i in cuáyí ndáhyí tuun ta já naxini i ña cáñee in ña sácuita ñaha ndáha mé da cánúu jata rí cán. ⁶Ta tañu ndícomi mé ña tácu cán naxini johó i cáhan in a ta já cáchi a já:

—Ndiví yaa xíní ñúhú caja chúun í já cuu cueén in túhún laá kilo trigo. Ta in quiví ní xíní ñúhú caja chúun í já cuu cueén uní kilo cebada. Joo a quiáhva ndó ñamaní ña ná tiví sífí xihín vino — ñacachi a.

⁷Ta tá nasahnda Jesús, mé a cúu tá-tuhun ndicachi loho inga sello, ña cá-comi cán já naxini johó i ñacahan mé ña tácu, ña cácomi cán xihín i já ñacachi a já:

—Naha quíi candehún yóho —ñacachi a xihín i.

⁸Ta tá nasandehé e já naxini i in cuáyí cuáán johó. Ta da cánúu jata rí cája ña ná quivi ñayivi. Ta jata mé da cán naxini i ndíco da sáhdá chuun sahá nu ndúu ndii. Ta ñañehe táhvi ndíví da cavaha da tondóhó ñuyíví já ná caja da ña ná cahní táhan cuahá ndivaha ñayivi ndúu ñuyíví. Ta jári nasahní da ña xihín tama ndeé ta xihín cuehe ta xihín ndijáá quití yúcu ndúu ñuyíví janda quiahva naxihí in táhdá nuú comi táhdá ñayivi ndúu ní cúu saha ñuyíví.

⁹Ta tá nasahnda Jesús, mé a cúu tá-tuhun ndicachi loho cán inga sello, ña cáhuhun já naxini i in nu náa ta tixi mé cán ndúu ínima ñayivi, ña naxihí sahá ña ñacaxi tuhun na tuhun Ndióxi nuú ñayivi xihín ndinuhu ini na. ¹⁰Ta cáyuhú cóhó ña já cáchi ña já:

—Tátá Ndióxi, mé ndó cúu ndó ña yii ndivaha ta cája ndó ña ndaa cuití va. Ta cuu caja ndó tóco ndihi ñaha. Ndaja cáa chá quiví caja víf ndó sahá ñayivi ndúu ñuyíví. Ta já caja ndó ña ná chahvi na sahá ña ñacaja na nasahní ña ndehe — cáchi ña ndúu tixi náa cán.

¹¹Anda já ñañehe ná jahmá yaa candixi na ta ñatahnda chuun nu ná ña ná

candati tóo chága ña janda quiahva ná xinu coo nuú java ga ña cúu cuéntá Jesús quivi na caja ñayivi ñuyíví sahá ña cája chúun na cuéntá Jesucristo. Ta janda quiahva ná quivi ndihi ña yóho já cavií sahá ñayivi ñacaja quini xihín ná.

¹²Tá ñandihí já naxini i nasahnda Jesús, mé a cúu tá-tuhun ndicachi loho inga sello, ña cáhíñu cán. Já naxini i ña-tañ ndivaha ta naxini i ñanduu tuún candii tá-tuhun in jáhma tuún sá ndíxi ña ndúu ndíí. Ta níf cúu yoo naxinu cuahá nij rí. ¹³Ta ndijáá quími ñaquee rí indiví ta ñacuyu rí nu ñúhu. Cúu á tá-tuhun tá quíji nihni tachí ndeé ndivaha tító ñúhú ta já cúu cuíhi, rí cuíi nu ñúhu.

¹⁴Ñandihí saha indiví ta ñandacoo vaha ña tá-tuhun tá ndítivi in yívi ña co xíní ñúhú ga ña. Ta tóco ndihi yúcu xihín tóco ndihi isla mahñú tañuhú ñandijama ndihi ña ta co ndúu ga ña nuú nasanduu a. ¹⁵Ta tóco ndihi ña cómí cuéntá sahá ñuyíví ñandacoo jehé ña tañu cáva. Ta ñachiñee na tañu tóto chí yúcu cuahan ña. Ta cán ñachijehé ri ña sáhdá chuun nu soldado xihín tóco ndihi ña cuicá xihín tóco ndihi ña ín ndeé cája ña náhnu ñuyíví yóho. Ta jári tóco ndihi ña cómí in xitoho cuéntá saha xihín tóco ndihi ña xíca núná mé ñandacoo jehé ña tañu cáva xihín tañu tóto cán. ¹⁶Ta cáchi ña cáhan ña xihín yúcu ta cáhan ña xihín cáva ña ná cuyu a jata ná ta ná chijehé a ña ña ná a cúni mé a ín coo nu sácoo rey cán ña. Ta yíhví ña Jesús, mé á cúu tá-tuhun ndicachi loho cán jáchi sa ñaxojo ini a ta vaxi a jándihí a saha ná. ¹⁷Jáchi sa naxinu coo quiví jándoho mé á ini na ta ni in na co ndeé ini.

Ndícaxi Ndióxi in táhdá ña Israel

7 Tá sa ñayaha tóco ndihi ña yóho já naxini i ndíta comi táto Ndióxi ndí-comí xoo nu quíxi tachí nu ndícomí xoo níf cúu saha ñuyíví. Ta tñin a tachí já ná a cuicó ga tachí jatá ñuyíví ta ná a cuicó

ga t̄ach̄i nuú tañuhú ta ni nuú ni in yíto.
² Ta já naxini i naquixi inga táto Ndióxi xoo nu quéta candii. Ta mé táto Ndióxi yóho naxini i ñéhe a sello Ndióxi, mé á tácu indiví. Ta já naxini johó i nacayuhú mé táto Ndióxi yóho nuú ndícomi java ga táto Ndióxi, mé na ñañehe táhvi caja ña núu xihín ñuyíví ta xihín tañuhú viti ta já ñacachi a já xihín ná:

³—Candati ndó. A cája núu ndó xihín ñuyíví ta ni xihín tañuhú ta ni xihín ni in yíto. Jáchi jihna ñúhú xíní ñúhú cacú in sello taan na cúu cuéntá Ndióxi, mé a cája cáhnu mí —ñacachi a.

⁴ Ta naxini johó i cáhan in a ndaja cúu ñayivi nanani sello yóho taan na. Cúu ná in ciento ivi jico comi mil ñayivi Israel ta cúu ná na naquixi ndíhuxu ivi chichi na Israel. ⁵ In táhndá cúu uxu ivi mil na naquixi chichi Judá ta nanani sello taan na cán. Ta inga uxu ivi mil na naquixi chichi Rubén ñaquehe sello taan na. Ta quiahva já naquihvi ri sello taan uxu ivi mil na naquixi chichi Gad ⁶ xihín uxu ivi mil na naquixi chichi Aser xihín uxu ivi mil na naquixi chichi Neftalí xihín uxu ivi mil na naquixi chichi Manasés ⁷ xihín uxu ivi mil na naquixi chichi Simeón xihín uxu ivi mil na naquixi chichi Leví xihín uxu ivi mil na naquixi chichi Isacar ⁸ xihín uxu ivi mil na naquixi chichi Zabulon xihín uxu ivi mil na naquixi chichi José xihín uxu ivi mil na naquixi chichi Bejamín nanani sello taan na.

Tá naxini Juan cuahá ndivaha ñayivi ndíxi jahmá yaa

⁹ Tá ndiñi já ñasandehé e já naxini i cuahá ndivaha ñayivi. Ta ni in na a cuú cahvi ñahá sahá ña cuaha cúu ná. Ta cúu ná na naquixi ndijáá chichi ñayivi ndúu ñuyíví. Ta cúu ná na cáhan tá nuú tuhun. Ta cúu ná na ndúu ndijáá ñuu xihín ndijáá nación ñuyíví. Ta naxini i ndíta na nu Ndióxi, mé a ñin coo nu sácoo rey. Ta ndíta na nu Jesús, mé a cúu tátuhun

ndicachi loho cán. Ta tóco ndiñi na ndíxi na jahmá yaa cachi ta cáñee ñuu ndáha ná. ¹⁰ Ta tóco ndiñi na cáyuhú cóho na já cáchi na já:

Ndióxi, mé a ñin coo nu sácoo rey xihín Jesús,
 mé a cúu tátuhun ndicachi loho cán najácaçu a mí, cáchi na.

¹¹ Ta naxini i ndíta tóco ndiñi táto Ndióxi cája cáhnu na mé á ñin coo nu sácoo rey. Ta ñacava tiyivi na ndúu na jatá na sacuaḥa cán xihín jatá ndícomi mé ña tácu cán. Ta já ñacaxítí tóco ndiñi na janḍa quiahva ñacani ndaa taan na nu núhu ta já ñacasáhá na cája cáhnu na Ndióxi. ¹² Já cáchi na já:

Já ná coo. Cája cáhnu nde ndohó ta ndíñehe jícó nde quivi mé ndó. Jáchi ndíchi ndivaha jini ndo ta ndiquiahva nde ndixahvi nu ndo.

Ta ndítahan coo toní ñúhú nde xihín ndo jáchi mé ndó cúu ndó ña ñin ndée cája tóco ndiñi ñaha.

Ta já ná coo tóco ndiñi ña yóho nu mé ndó anda ama cáa quivi. Já ná coo, ñacachi na cán cája cáhnu na Ndióxi.

¹³ Anda já naxinu in táhan na sacuaḥa cán nuú i já ñandaca tuhún na yehe já ñacachi na já xihín i:

—Á co xínun ndá na cúu na ndíxi jahmá yaa yóho ta ndá naquixi na —ñacachi na xihín i.

¹⁴ Já ñanducú ñehe e tuhun nu ná já ñacachi i já xihín ná:

—Yehe co xíni toho i joo mé ndó sa xíni vaha ndó ndá na cúu ñayivi yóho —ñacachi i xihín ná.

Ta já ñacachi na já xihín i:

—Na ndíxi jahmá yaa yóho cúu ná na nayaha nuú cuahá ndivaha tondóho mé quivi tá ñandoho ndivaha ini na. Ta viti sa ñandoo cuachi na xihín nii Jesús, mé a cúu tátuhun ndicachi loho. ¹⁵ Sahá ña cán queá ndíta na nu Ndióxi, mé á ñin coo nu sácoo rey. Ta ñuu ta ndiví cája

ndívi nā nū mé á ini veñuhu a. Ta mé Ndióxi, mé a fin coo nū sácoo rey cán ndáá vaha mé á nā jáchi fin tuun a xihín ná. ¹⁶ Ta coó ga joco quixi nū ná ta ni a íchi ga ini na ticuí ta ni a cáyi ga na cája cándii ta ni a ndíhi ga ini na sahá ña ihní. ¹⁷ Jáchi Jesús, mé a cúu tátuhun ndicachi loho cán ndácaan mahñú nū sácoo rey cán ta candaa mé á nā tá quiahva ndáá in pastó ndicachi janá dá. Ta candaca mé á nā cūhun nā nū cána ticuí, dó cája ña ná catacu na anda ama cáa quívi. Ta yaco Ndióxi ticuí nū tóco ndihi nā sácu —nācachi nā sacuaḥa cán xihín i.

Tá nasahnda Jesús, mé a cúu tátuhun ndicachi loho cán inga sello, ña cáhusa

8 Tá nasahnda Jesús, mé a cúu tátuhun ndicachi loho cán inga sello, ña cáhusa já nācatáji ní tóco ndihi ñaha indiví tátuhun tixi java hora. ² Tá nandihí já naxini i ndíta usá táto Ndióxi nū á. Ta in in mé táto Ndióxi cán nañeḥe ná in in trompeta. ³ Já naxinu inga táto Ndióxi candichi a nū náa ña fin yati nū fin coo Ndióxi nū sácoo rey cán. Ta cánee in coḥo chíñíh má ndáha á, ña jihun cuáán. Ta nañeḥe á cuahá ndivaha jusa, ña joco a ña nū náa, ña nacavaha xihín jiuḥun cuáán. Ta quiahva já joco rí a nū náa cán ña xíca ḥaví nā cúu cuéntá Jesús nū Ndióxi. ⁴ Tá mé ñihma nācana nū coḥo chíñíh má cánee ndáha táto Ndióxi cán nandindita cuahān nū Ndióxi tá quiahva ndindita ña xíca ḥaví nā cúu cuéntá mé á nū á. ⁵ Anda já ñatiin táto Ndióxi cán coḥo chíñíh má ta já najácutú a ña xihín tití ñuhu, ña naquehe a nū náa cán. Ta já nacuihna ña jatá ñuyívi. Anda já nacasáhá cáhndi tátuhun tá cána javi. Ta jandá johó xójo cúu ta cána tasa ta naquixi in nditáan ndeé ndivaha jatá ñuyívi.

Tá natíví ndíhusa táto Ndióxi trompeta

⁶ Tá nandihí já nasacanduu tiaḥva ndíhusa táto Ndióxi tiví nā trompeta ña cánee ndáha nā.

⁷ Tá in táhan ndíhusa táto Ndióxi cán nacasáhá natíví a mé trompeta cán. Ta já nacuyu ñuhu cáyi xihín níí ña nacava táhan xihín nií jatá ñuyívi. Ta chí nacayi in táhndá nū uní táhndá ñuyívi yóho ta jári naquihvi ñuhu in táhndá nū uní táhndá yíto ndíta yúcu ta jári yucu cuí nacayi ndihi a.

⁸ Tá nandihí já natíví táto Ndióxi ña cáhivi cán inga trompeta. Ta naxini i naxani tátuhun in yúcu cándaha xihín ñuhu cuahān ndicava nū tañuhú. Ta in táhndá nū uní táhndá tañuhú cán nanduu dó nií. ⁹ Tá in táhndá nū uní táhndá tóco ndihi ñaha ñuhu ini tañuhú naxihí a. Ta quiahva já nandihí saha in táhndá nū uní táhndá barco nasandojó nū tañuhú cán.

¹⁰ Tá táto Ndióxi ña cáhuni cán natíví a inga trompeta ta já naxini i naquee in quimi cáhnu cándaha xihín ñuhu ita vaxi rí ndícava rí ñuyívi. Naquee rí indiví ta nandicava rí nū ñuhu nū in táhndá nū uní táhndá yuta xihín chícoḥo nū cána ticuí. ¹¹ Tá mé quimi cán naní rí ña ova. Ta nācaja rí ña nācaḥova in táhndá nū uní táhndá ticuí. Ta naxihí cuahá ndivaha ñayivi tá naxihí na dó ova cán.

¹² Tá nandihí já natíví táto Ndióxi ña cácomi cán inga trompeta já nanaá in táhndá nū uní táhndá nū cándii cán. Ta quiahva já nācaja rí a xihín yoo ta xihín quimi. Sahá ña cán queá coó nacuu tuun vaha cándii xihín yoo xihín quimi cán. Ña cán queá nacamani tátuhun in táhndá nū uní táhndá tuun cándii cán jatá ñuyívi. Ta quiahva já nacamani tuun yoo xihín quimi ñuu.

¹³ Tá nandihí já nasandehé e ta já naxini johó i catí ndixi in táto Ndióxi ndáchí

a maññú indiví. Ta cáyuhú cóhó a já cáchí a já:

—Ay, ay, ay ndáhví nahá naçuu ñayivi ndúu ñuyíví jáchí ndají ndoho ini na tá ná tiví uní ga táto Ndióxi trompeta — cáchí a.

9 Tá nandihí já naçini i nativí táto Ndióxi ña cáhuhun cán inga trompeta. Ta naçini i naçee in quimi indiví ta nandicava rí jatá ñuyíví. Ta ñañehe táhví rí cacomí rí yávi ña cuu cuná rí yávi cúná ndivaha, ña co xínu nu ndíhi nuu. ²Ta mé quimi nasuná rí yuyéhé mé yávi cúná já nandindita ñihma tátuhun ña ndíndita yúhu horno cáyí. Ta mé ñihma naçana cán najánaá nuú candii xihín nuú tachi viti. ³Ta tañu ñihma cán naçeta cuahá ndivaha tica, rí nandicuíta nuu níf cúu ñuyíví. Ta ñañehe táhví rí cacuu rí rí cuehe tá quiahva cuehe líhma. ⁴Ta natahnda chuun nu rí ña ná a jándihí toho rí sahá yucu ni sahá ñaha cuíi ni saha yitó cuíi ñuyíví yóho. Jáchí natahnda chuun nu rí ña ná tiin rí ñayivi cuití va, na co cánda marca Ndióxi taan. ⁵Joo coo ñañehe rí ñamaní cahní rí na. Ña naçaja rí xihín ná queá ná tiin rí na ña ná çahma na tixi uhun yoo. Ta tá quiahva çahma na tá tñin líhma na quiahva já çahma na tiin rí na. ⁶Mé quivi já nducú ñayivi quivi vaha na joo a cúu quivi na. Vatí cúní quivi na joo a cúu quivi na.

⁷Mé tica tñin ñahá cán ndáa rí tá quiahva ndáa cuáyí, rí ndúu tiahva cuhun cani táhan. Ta tá quiahva cúní coo tiyivi, ña jihun cuáán sándójó jini rey quiahva já cúní coo ña cándójó jini rí cán. Ta tá quiahva cúní coo nuú ñayivi quiahva já cúní coo nuu rí. ⁸Ta tá quiahva íin íj jini najihí quiahva já íin íj jini rí. Ta tá quiahva ndáa nuhu león quiahva já ndáa nuhu rí. ⁹Ta jáhvi yicá ndicá mé tica cán xihín jahmá çaa, ña sándixi soldado cáni táhan na. Ta tá çahma cáti ndixi rí cúu á tátuhun tá cáti

saça cuaha cuáyí tá ñúhu rí carreta xínu rí cuahan rí cani táhan rí. ¹⁰Ta íin íñu ndóho rí ña tñin tátuhun ndohó líhma. Ta xihín ña cán ñañehe táhví rí tiin rí ñayivi ña ná çahma na tixi uhun yoo. ¹¹Ta mé da cómí cuéntá saça mé tica cán naní da Abadón tuhun hebreo ta naní da Apolión tuhun griego. Ta quivi dá cúní çachi a da jándihí saça tóco ndihí ñaha. Ta da cán cúu da cómí cuéntá saça yávi, ña co xínu nu ndíhi nuu cán.

¹²Sa nayaha in tondóhó çahnu joo cámaní ivi çága ña quixi.

¹³Tá nandihí já nativí táto Ndióxi ña çahíñu cán inga trompeta ta já naçini joho i çahan in a naçeta tañu ndícomí ndíqui quéta in in xoo tito nu náa, ña jihun cuáán, ña cándichi nu íin Ndióxi cán. ¹⁴Ta já naçachi mé a cán já xihín mé táto Ndióxi çahíñu, ña ñehe trompeta cán:

—Janí ndícomí táto ña ndíco yuhú yuta çahnu naní Eufrates jan —naçachi a.

¹⁵Tá nandihí já naçini i najani ndícomí táto nasandíco cán ña ná cahní na in táhnda nuú uní táhnda ñayivi ndúu ñuyíví. Jáchí sa naçee jini va na chuun ña çaja na ña yóho. Ta sa xini na ndá hora ta ndá quivi ta ndá yoo ta ndá cuia çaja na ña. ¹⁶Ta naçini joho i çahan in a ndaja cúu na soldado cándójó cuáyí cuahan cán. Ta cúu ná ivi ciento millón soldado.

¹⁷Ta cúní ndicani i nu ndo ndaja ndáa cuáyí jana ná, rí naçini i cán. Naçini i ña yóho tátuhun in sani joo co quíi toho i. Ta naçini i mé da cándójó cuáyí cán nachijahvi da yicá ndicá da xihín in çaa, ña cúu á color cuahá nii xihín color ndíhí ticayi xihín color cuáán ita. Ta ndáa jini cuáyí tá quiahva ndáa jini león ta yúhu rí quéta ñúhu ita xihín ñihma xihín azufre. ¹⁸Ta in táhnda nuú uní táhnda ñayivi naçihí na naçaja uní nuú tondóhó naquixi jatá ñuyíví yóho. Naç-

ihí na xihín ñúhu cáyi ta xihín ñihma ta xihín azufre, ña naqueta yuhú cuáyi. ¹⁹ Jáchí yúhu mé cuáyi cán xihín ndóho ri cúu nu ndácaan ndée ri. Tá quiahva ndáa coo quiahva já ndáa ndóho ri. Ta xihín mé yiquí jíní coo cán cája quini rí xihín ñayivi.

²⁰ Tóco ndihi java ga ñayivi, na coo ñandihí saha xihín tondóhó ñaquixi ja-ta ñuyívi, na cán ñacaja yíi va na ña núu ñasacaja na. Ta ñacaja cáhnu yíi va na ña quini. Ta coo najándacoo na cája cáhnu na yoco, ña ñacavaha na xihín jiuñun cuáán ta xihín jiuñun cúxú ta xihín caa cuáán ta xihín yuu ta janda ña ñacavaha na xihín yíto viti. Ta mé yoco yóho a cuú candehé a ta ni coo tácu joho a ta ni a cuú caca nuu a. Joo ñacaja cáhnu tá ñacaja cáhnu na ña. ²¹ Ta ni coo najándacoo na ña sáhní na ndii. Ta ni coo najándacoo na ña tají cája na. Ta ni coo najándacoo na ña ndúu na xihín na coo cúu yíi ná á ñájihí na. Ta ni coo najándacoo na ña cája cuíhná na.

Tá ñaxini Juan ña cáñee in libro loho ini ndáha inga táto Ndióxi

10 Anda já ñaxini i inga táto Ndióxi, ña fin cuahá ndivaha ndée. Nanu a indivi ñaquee a vaxi a tañu in viço ta cánúu in coo yánquf jini á. Ta yéhe nuu á tá quiahva yéhe candii. Ta sahá cúu á tátuhun ivi jihin cándaha xihín ñúhu. ² Ta ini ndáha mé á ñaxini i cáñee in libro loho ña ñativi tátuhun yívi joo ñandindica ña. Ta ñachinúu mé á saha cuáha nuú tañuhú ta ñachinúu a saha íti a nu ñúhu. ³ Ta ñacayuhú cóhó a tátuhun tá ndáhyi león. Ta tá ñacayuhú a já ñaxini joho i ña ñacahan cóhó usa tasa tá ñacana ña. ⁴ Tá ñandihí ñacahan ndíhusa tasa cán já ñanducú u cahyí i ña ñacachi a joo ñaxini joho i cáhan in a ñaquixi chí indivi ta já cáhí a já xihín i:

—A cáhyún ña ñacachi ndíhusa tasa ñacana jan. Xíní ñúhú coo jehé a — ñacachi mé a cán xihín i.

⁵ Anda já ñaxini i mé táto Ndióxi ña cánúu in sahá nuú tañuhú ta inga sahá nu ñúhu cán, ñandínehe a ndahá cuáha indivi. ⁶ Ta já ñacahan mé á quivi Ndióxi ta já ñasahan tuñun a jáchi Ndióxi tácu a anda ama caa quivi, mé á ñacavaha indivi xihín ñuyívi xihín tañuhú xihín tóco ndihi ñaha fin nuu á. Ta já ñacachi mé táto Ndióxi já:

—A cáyáncá ga ⁷ jáchi tá ná casáhá tiví táto Ndióxi ña cáhusa cán trompeta já xinu coo nu tóco ndihi ña ñasacu ini Ndióxi coo jehé janda sanahá. Jáchí sa ñacaxi tuñun mé á xihín profeta cuéntá mé á ña ná cahan na sahá ña yóho nuú ñayivi —cáhi táto Ndióxi.

⁸ Anda jávi ñaxini joho i ñacahan tucu mé táto Ndióxi indivi já ñacachi a já xihín i:

—Cuáhán quehe libro loho núná nuu cán. Ndiqhehe a ndáha táto Ndióxi, mé a cánúu in saha nuú tañuhú ta inga sahá nu ñúhu jan —ñacachi a.

⁹ Tá ñasaa i nu táto Ndióxi cán já ñaxica i nu á ña ná quiahva libro loho cán nuú i. Ta já ñanducú ñehe táto Ndióxi cán tuñun nuú i já ñacachi a já xihín i:

—Yóho fin libro loho joo xíní ñúhú casún ña. Vatí mé a ndaa tá ná casún ña cacuu a tátuhun tá casún ñuñu jáchi caviji ndivaha yuhun caha ña. Joo tá ñandihí nduu a ña ova ini tisún —ñacachi a xihín i.

¹⁰ Tá ñandihí já ñatiin i mé libro loho ndáha táto Ndióxi cán ta já ñasaxí i ña. Ta ñacaviji yuhú u xihín á tátuhun ñuñu. Joo tá sa ñacocó i ña já ñacahova ña ini tixi i. ¹¹ Anda já ñatahnda chuun nuú i já ñacachi a já xihín i:

—Ndítahan nuñun caxi tuñun tucún xihín ñayivi ña cáhan Ndióxi sahá cuahá ndivaha nuu xihín cuahá ndivaha nación nu cáhan na ndijáa tuñun. Ta xíní ñúhú

caxi tuhún ña nuú ndijáa na cómi cuénta sahá ñuyívi —nacachi a xihín i.

Ivi na cúu testigo

11 Tá nandihí já nasahan na in yíto vara, dó chiquiahvá nuú i. Ta tá cúni coo ndoo já cúni coo mé vara cán. Ta já nacachi na já xihín i:

—Candichi ta chiquiahvún veñuhu cáhnu Ndióxi. Ta ndítahan chiquiahvún nu náa Ndióxi viti. Ta ndítahan cahvún ndaja cúu na cája cáhnu Ndióxi mé jan. ²Joo coto a chiquiahvún ñundáhyi, ña cáva nuu ndícomí tito yéhé veñuhu cán. Jáchí sa nandíquiahva Ndióxi ña yóho nuú ñayivi tóho ña ná caja tá quiahva cúni mé ná xihín Jerusalén, ña cúu ñuu yií ñaha Ndióxi tixi ivi jico ivi yoo. ³Ta já chindahá yehe ivi testigo, na candixi jahmá ndáhyí, ña ndíxi ñayivi tá cándif ini na. Ta cūhun na cahan na sahá yehe tixi in mil ivi ciento uní jico quívi —nacachi na.

⁴Ta naxini i ivi yitó olivo xihín ivi nu sándójó íti, dó cúu yuhú nuu testigo ndíta nu Ndióxi, mé a sáhnadá chuun nuú ñuyívi. ⁵Ta ni in na a cuú caja ni in ñaha xihín ndívi testigo Ndióxi yóho jáchí cuu caja na ña ná cana ñūhu ita ini yūhu ná ta cuu chicaan ñūhu na já ná jándihí na sahá na ihvi na. Ta quiahva já quívi ndá na ná nducú caja xíxi xihín ná. ⁶Ndívi mé testigo Ndióxi yóho íin ndée ná chicaji na indiví já ná a cúun javi nani cáhan na cuénta Ndióxi nuú ñayivi. Ta íin ndée ná ndaja na ticuí ña ná nduu dó nii. Ta íin ndée ná chicaan na ndá cuehe cúni mé ná chicaan na jatá ñuyívi yóho. Ta núná nu ná caja na ña ndaja tañu cúni mé ná. ⁷Joo tá sa nandihí nacahan ndívi testigo yóho xihín ñayivi janda jávi quixi in quití quini, rí queta tañu yávi, ña co xínu nu ndíhi nuu cán. Ta já cani táhan rí xihín ndívi na cán ta quee vaha rí xihín ná ta cahní rí na. ⁸Ta já canduu yiquí cuñu ndívi na

cán mahñú java ndaa cáyé ñuu Jerusalén nuú nasahní na Jesucristo, mé á cúu xitoho í. Ta mé ñuu Jerusalén yóho cúu á yuhú nuu ñuu Sodoma xihín nación Egipto sahá cuachi cuahá cája ñayivi ndúu cán. ⁹Ta ñayivi ndúu ndijáa ñuu xihín ndijáa nación xihín na cáhan tá nuú tuhun xihín na naquixi ndijáa chíchi cuni na yiquí cuñu mé testigo Ndióxi yóho tixi uní quívi java. Ta a quiahva toho na ñamani jánduxu na ndívi testigo Ndióxi yóho. ¹⁰Ta ñayivi ndúu ñuyívi cajii ndivaha ini na sahá ña naxihí ndívi testigo Ndióxi yóho. Ta cávatá na janda quiahva jasá ñaha nu táhan joho na sahá ña naxihí ndívi testigo Ndióxi, na najándoho ndivaha ini ñayivi ñuyívi xihín ña nacahan na. ¹¹Joo tá sa nayaha uní quívi java chí jánditacu Ndióxi ndívi testigo cán já ná ndacoo tucu na. Ta tá ná cuni ñayivi ña yóho casahá quiji ninu na xihín ña yíhví na. ¹²Anda já cuni joho ndívi testigo cán in a cáhan cóhó indiví. Ta já cachi a já xihín ná:

—Cuándaa ndó chóho —cachi a já xihín ná.

Já ndaa na indiví tañu in víco nuú ndihí na ihvi na. ¹³Ta mé hora já taan ndeé ndivaha. Ta jándihí a in táhndá nuú uxu táhndá mé ñuu cáhnu cán ta já quívi usa mil ñayivi. Ta na coo naxihí cán chutú ndaa na xihín ña yíhví na ta já casahá na caja cáhnu na Ndióxi, mé a íin indiví.

¹⁴Sa nayaha va tondóhó cáhivi. Joo sa cátivi tondóhó cáhuni vaxi a.

Tá natívi táto Ndióxi trompeta cáhusa

¹⁵Ta táto Ndióxi ña cáhusa cán natívi a inga trompeta. Ta tá natívi a do já naxini joho i cáhan cóhó cuaha ná indiví. Já cáchí na já:

Ta viti nandindaa hora sáhnadá Ndióxi, xitoho í xihín Jesucristo chuun.

Ta mé á quea nachindahá Ndióxi cacomí a cuénta sahá ñayivi.

Ta fin ndée a cahnda chuun nuú ñuyívi yóho anda ama cáa quívi, ñacachi cuaha ná mé indiví.

¹⁶ Ta ndíhoço comí na sacuaha, na ñacava tiyívi nasanduu coo nu táyvi vaha yati nu fin coo Ndióxi cán, ñacaxítí na janda quiahva ñacani ndaa taan na nu núhu ta ñacaja cáhnu na Ndióxi. ¹⁷ Já ñacachi na já xihín á:

Ndiquiahva nde ndixahvi nu ndóhó, Ndióxi, xitoho nde, mé a fin ndée caja tóco ndihi ñaha.

Janda tá cámaní cava sáha saha ñuyívi ñasahjin va mé ndó.

Ta sa já fin ndó viti ta quixi tucu ndó.

Ndáha mé ndó fin ndihi ndée viti sahá ña cán queá ñacasáhá ndo sáhndá ndo chuun nuú ñayivi.

¹⁸ Ta ñayivi ndúu níí cúu ñuyívi ñacasáhá na xójo ndivaha ini na.

Joo viti ñaxinu coo quívi caja xíxi ndó xihín na cán.

Ta viti ñaxinu coo hora caja vií ndó sahá na sa ñaxihí.

Ta sa ñaxinu coo hora chahvi ndó nuú na profeta, na cáhan cuéntá mé ndó.

Já ñaxinu coo hora chahvi ndó nuú na cúu cuéntá mé ndó, na cája cáhnu mé ndó,

ta coo caja toho a á cúu ná na náhnu á cúu ná na válí.

Ta ñaxinu coo hora jándihi ndó sahá ñayivi quini, na cája ña núu xihín ñuyívi yóho, cáhí na cán cája cáhnu na Ndióxi.

¹⁹ Tá ñandihí já ñaxini i ñanuna yéhe veñuhu Ndióxi, ña fin indiví. Ta cán tívi ndácaan sato arca ñaha Ndióxi. Ta já ñacasáhá cána tasa. Ta ñaxini johó i jandá johó vaa cúu tácu cáhan na. Ta ñacasáhá cána javi ta táan ndeé ndivaha ta cúun ndivaha níí.

Ñaxini Juan ña ndúcu in coo quini caja xíxi rí xihín in ñañáha

12 Tá ñandihí já ñaxini i ñayaha in ña xitúhún ndivaha indiví. Ñaqueta in ñañáha, ña cáatíví jáhma ña cúu candii. Ta cándichí ña jatá yoo. Ta cánúu in tiyívi jini ña, ña ñacacutú xihín uxu ivi quimi. ² Ta sa víxi ña cacu jahyi ña. Ta ndáhví ndáhyi ña jáchí ndóho ndivaha ini ña janda quiahva ná cacu jahyi ña. ³ Tá ñandihí já ñayaha inga ñaha cáhnu indiví. Ñaxini i in coo quini, rí cuahá. Ta fin usa jini rí xihín uxu ndíqui rí. Ta cánúu in tiyívi jatá in in yiquí jini rí cán. ⁴ Ta mé coo quini cán ñañuhu rí in táhndá nuú uní táhndá quimi ndúu indiví xihín ndóho rí. Ta já najani rí mé quimi cán jatá ñuyívi. Ta mé coo quini cán ñandaca ndichí rí yati nu fin ñañáha cácu jahyi cán jáchí cuni rí caxí rí jahyi ña tá ná cacu a. ⁵ Tá ñandihí já ñacacu in ña jahyi ña, ña cahnda ndeé chuun saha tóco ndihi ñayivi ñuyívi. Joo ñasañehe Ndióxi a ninu nu fin coo mé á. ⁶ Ta ñaxinu ñañáha cán cuahan ña chí xoo yucú íchí jáchí mé cán sa ñasacu tiaha Ndióxi nuú cuu coo ña coto ñahá tixi in mil ivi ciento uní jico quívi.

⁷ Tá ñandihí já ñacasáhá cúu tondóhó indiví. Ta ñaxini i Miguel xihín táto Ndióxi ñacani táhan na xihín coo quini cán ta xihín táto mé rí. ⁸ Joo coo ñacuu quee vaha coo quini cán xihín táto Ndióxi ña cán queá coo ñacuu canduu chága rí cán indiví. ⁹ Ña cán queá najácana Ndióxi mé rí cán janda ñuyívi yóho. Mé rí ñasahjin rí janda sanahá ndivaha. Ta naní rí Satanás, mé tiñhá sacuaha, rí jándahvi tóco ndihi ñayivi ndúu ñuyívi. Mé rí xihín tóco ndihi táto rí ndíco jatá rí najácana Ndióxi rí janda ñuyívi yóho.

¹⁰ Tá ñandihí já ñaxini johó i cáhan cóhó in a indiví já cáhí a já:

—Sa ñaxinu coo quívi cacu ndaa ínima ñayivi jáchí comí Ndióxi cuéntá saha ná

xihin ndée mé á. Ta sa naxinu coo quivi cahnda Jesucristo chuun, mé a nachine-dahá Ndióxi cacomí cuéntá sahá ñayivi. Sahá ña cán queá sa ñataxi Ndióxi tiñáhá sacuahá nu íin mé á jáchi ñuú ta ndivi ñasahjin rí nu mé á chicaoan rí cuachi jatá na cúu cuéntá Jesús. ¹¹ Mé na cúu cuéntá Jesús ñaquee vaha na xihin rí sahá ña ñajaja Jesús, mé a cúu tátuhun ndicachi loho tá naxita ñi á ndica crúxu saha ná. Ta ñaquee vaha na xihin rí jáchi coo ñajándacoo na cáhan na ña ndaa sahá Jesús. Ta co yíhvi toho na quivi na saha mé á. ¹² Tóco ndihi ndó, na ndúu indivi xini ñúhú cajji ini ndó. Joo ndáhví ñahá ñacuu na ndúu ñuyivi xihín na ndúu ini tañuhú. Jáchi xójo ndivaha ini tiñáhá sacuahá ta ñanuu rí caja xíxi rí xihín ndó jáchi cándaá vaha ini rí ña sa ja chá cuití cúní ndihi saha rí —ñacachi a indivi.

¹³ Tá ñacandaá ini mé coo quini cán ña ñajácana Ndióxi rí ñuyivi já ñacasáhá rí ndicuiña ñee rí ñañáha, ña ñacacu jahyi cán. ¹⁴ Joo ñañehe ña ivi ndixi náhnu ndivaha, ña cúu tátuhun ndixi tíyaha. Sahá ña cán queá ñandachí xícá ña nu mé coo quini cán cuahan ña yucú íchí nuú ñasahjin ná. Ta cán coto na ña tixi uní cuia java. ¹⁵ Tá ñandihí já ñacaja mé coo quini cán ña ná queta cuahá ndivaha ticuif yúhu rí. Ta já ñacavaha rí in yuta jáchi cúní rí jatañu rí mé ñañáha cán. ¹⁶ Joo ñachindeé ñundáhyi ñañáha cán jáchi ñandata ta ñaxihi ndihi a ticuif ñacana yúhu mé rí cán. ¹⁷ Ta xihín ña yóho ví ga ví ñaxojo ini coo quini cán xihín ñañáha. Sahá ña cán queá ñaquee rí cuahan rí cani táhan rí xihín java ga táhan na ñaquixi chichi mé ñá. Mé na yóho cúu ná na cája ña sáhdá tuhun Ndióxi ta co jándacoo na cája na ña ndaa ña ñajánaha Jesucristo nu ná.

Tá ñaxini Juan ivi quití quini

13 Tá cándichi i nuú ñutí yuhú tañuhú já ñaxini i ñaqueta in

quití quini tañu tañuhú cán. Ta ñasahjin usa yiquí jini rí xihín uxu ndiquí rí. Ta cánuu in tiyivi jatá in in ndiquí rí. Ta ndaa tuhun ña cánahá xihín Ndióxi nuú in in yiquí jini rí. ² Mé quití quini ñaxini i yóho, cáa rí tá quiahva cáa ndicaha. Ta saha rí ndaa ña tá quiahva ndaa saha oso. Ta yúhu rí cúu á tátuhun yúhu león. Ta mé coo quini cán ñasahan rí ndée rí nu mé quití quini, rí ñaqueta ini tañuhú yóho ña ná cuu cacomí rí cuéntá sahá ña cómí mé coo quini cán cuéntá saha. Ta cúu cája rí ña cúu cája mé coo quini. ³ Ta in táhan ndíhusa yiquí jini mé quití quini cán ñandicuehe cáhvi ña. Joo tá ñandihí já ñandivaha ña. Sahá ña cán queá ndaja táhan ñayivi ndúu ñuyivi ñacatóntó ndivaha na. Ta já ñacasáhá na ndíco na jatá mé quití quini cán. ⁴ Ta ñacaja cáhnu ñayivi coo quini cán jáchi ñasahan rí ndée rí nuú quití quini cán. Ta quiahva já ñacaja cáhnu na mé quití quini cán já cáhí na já:

—Coó ga inga rí cáhnu chága nu quití quini yóho. Ta ni in rí a cúu quihvi cani táhan xihín rí —cáhí na cája cáhnu na mé quití quini cán.

⁵ Ta mé quití quini cán ñañehe rí ñamaní ña ná cahan rí tuhun quini ndivaha, ña jándihihvi rí Ndióxi. Ta ñañehe rí ñamaní cahnda rí chuun tixi ivi jico ivi yoo. ⁶ Sahá ña cán queá ñacasáhá cáhan quini rí saha Ndióxi ta jándihihvi rí mé á xihín ña núu cáhan rí. Ta cáhan núu rí saha mé nu íin Ndióxi cán xihín saha tóco ndihi na ndúu indivi. ⁷ Ta ñañehe rí ñamaní cani táhan rí xihín na cúu cuéntá Ndióxi janda quiahva quee vaha rí xihín ná. Ta ñañehe rí ñamaní cahnda rí chuun saha ndaja táhan ñayivi ñaquixi ndijáa chichi xihín na cáhan tá nuú tuhun xihín na ndúu ndijáa ñuu xihín ndijáa nación. ⁸ Tóco ndihi ñayivi ñuyivi caja cáhnu na quití quini cán jáchi janda tá cámaní cavá sahá saha ñuyivi coo ñacahyi toho quivi ná nu libro nu ndaa quivi tóco

ndihi na catacu andá ama cáa quivi. Mé libro yóho íin a nu Jesús, mé á cúu tátuhun ndicachi loho, rí naxihí ndica crúxu.

⁹ Cuni joho vaha ndó, na vaha joho.

¹⁰ Ndá na ná chicaan in na vecaa, cuhun ri mé va na vecaa. Ta ndá na ná cahní inga na xihín yuchú cáni, xihín yuchú cáni quivi ri mé va na. Sahá ña cán queá xíní ñúhú quiahva ndeé ini na cúu cuéntá Ndióxi ta xíní ñúhú candeé cáhnu ini na mé á.

¹¹ Tá nandihí já naxini i inga tucu quití quini, rí naqueta nuú ñundáhyi. Ta nasahín ivi ndíqui ri ta ndáa ña tá quiahva ndáa ndíqui ndicachi. Joo cáhan rí tátuhun cáhan in coo quini.

¹² Ta nacaja chúun rí tóco ndihi ndeé mé quití quini nu cuítí cán nu íin mé rí. Nacaja rí ña ná caja cáhnu tóco ndihi ñayivi ndúu ñuyíví mé rí naqueta nu cuítí cán. Jáchí nandicuehe cáhvi jiní rí nu cuítí cán joo nandivaha rí. ¹³ Mé inga quití quini cáhivi cán nacaja cuahá ndivaha rí ñaha xitúhún. Nacaja rí ña ná quixi ñúhú cáyi chí indiví ta naxinu a nacuyu a ñuyíví nu tóco ndihi ñayivi.

¹⁴ Ta najándahvi rí ñayivi ndúu ñuyíví xihín tóco ndihi ña xitúhún, ña ñahehe rí ñamaní caja rí yóho nu mé rí nu cuítí cán. Ta nasahnda mé inga rí cán chuun nuú ñayivi ñuyíví ña ná cavaha na in tinínu yúu quití quini nu cuítí cán. Mé rí nandicuehe quini ndivaha ri xihín yuchú cáni joo nandivaha rí. ¹⁵ Ta mé rí cáhivi cán ñahehe rí ñamaní ña jánditacu rí tinínu yúu mé rí nu cuítí cán já ná cuu cáhan ri. Ta já ná cuu cahnda rí chuun ña ná cahní rí ñayivi, na coo cúni caja cáhnu mé rí quini cán. ¹⁶ Ta mé rí cáhivi cán nacaja rí ña ná quihvi marca ndahá cuáha ñayivi á taan na. Ta coo caja toho a á cúu ná na valí á na náhnu, á cúu ná na cuicá á na ndahví. Ta ni coo caja toho a á cúu ná na xíca núná, á cúu ná na cómi xitoho cuéntá saha. Nu tóco ndihi

ñayivi naquihvi marca nacaja mé rí cán.

¹⁷ Ta ni in ñayivi a cuú cueen na ñaha ta ni a cuú jicó na ñaha tá coo nanani mé marca cán na. Ta tá coo cándaa quivi mé quití quini, rí nu cuítí cán taan na á tá coo numero mé rí cándaa taan na já queá a cuú cueen na ñaha jáchí numero yóho náha ndaja naní mé rí nu cuítí cán.

¹⁸ Xihín ña yóho cuu candaa ini ndó ndá na cúu na ndíchí jiní. Ndá ndó, na cándaa ini xíní ñúhú jítá ndo cuéntá xihín numero ña cúu quivi mé rí nu cuítí cán jáchí cúu á tátuhun quivi ñayivi. Ta numero yóho cúu á inu ciento uní jico inu.

Tá xíta in ciento ivi jico comi mil ñayivi cája cáhnu na Ndióxi

14 Tá nandihí já naxini i Jesús, mé á cúu tátuhun ndicachi loho cándichi a jata yúcu naní Sión. Ta xihín mé á ndíta in ciento ivi jico comi mil ñayivi, na ndáa quivi Jesús taan, mé a cúu tátuhun ndicachi loho cán. Ta quiahva já ndáa quivi Ndióxi, tátá a taan na. ² Ta naxini joho i in a cáhan chí indiví. Ta tá cáhan mé a cán cúu á tátuhun tá níhi cúyu ticuí tañu tóto. Ta níhi a tátuhun tasa tá cána. Ta tácu a tá quiahva tácu nu jácaha cuahá ndivaha na arpa.

³ Ta naxini joho i ña saá xíta mé in ciento ivi jico comi mil ñayivi nu íin coo Ndióxi cán xihín nuú comi mé ña tácu cán xihín nuú na sacuahá cán. Mé na xíta cán cuítí va cúu na cuu catiahva cata na ña jáchí cúu ná na nacaxi Ndióxi jácacu a tañu ñayivi ndúu ñuyíví. ⁴ Ta na yóho cúu ná na víi, na coo nacaja quini mé jáchí coo nasanduu na xihín najihí. Cúu ná na nasandico níi tiempo jata Jesús, mé a cúu tátuhun ndicachi loho. Cúu ná na nacaxi Ndióxi jácacu a nu cuítí ña ná joco a na nu mé á xihín nu Jesús, mé a cúu tátuhun ndicachi loho. ⁵ Ta ni in taláa ña tuhún coo nacahan na. Ta ni in na coo nacuu ñehe íni chicaan cuachi jata ná.

**Tá cáhan unī t́átō Ndióxi t́uhun
vaha saha Jesucristo nuú
ñayivi ndúu ñuyiví**

⁶Tá nandihí já naxini í inga t́átō Ndióxi ndáchí a mahñú ndaa indiví. Ta ñéhe a t́uhun vaha sahá Jesucristo ña fin anda ama cáa quiví caxi t́uhun a ña nuú ñayivi ndúu ñuyiví, mé na naquixi ndi-jáá chichí xihín na cáhan tá nuú t́uhun xihín na ndúu ndijáá ñuu xihín ndijáá nación. ⁷Ta já cáyuhú mé t́átō Ndióxi cán já cáchí a já:

—Xíní ñúhú cayihví ndó Ndióxi ta xíní ñúhú cajú cáhnu ndó mé á jáchí sa naxinu coo quiví cajú víí mé á sahá ñayivi. Xíní ñúhú cajú cáhnu ndó mé á jáchí mé á queá nacavaha indiví xihín ñuyiví ta mé á queá nacavaha tañuhú xihín ndijáá nu cána ticuíí —cáchí t́átō Ndióxi cán.

⁸Tá nandihí já naxini í inga t́átō Ndióxi ta já nacachi a já:

—Ay, ay, sa nandihí va sahá ñuu cáhnu naní Babilonia xihín sahá ñayivi nasanduu jan. Ta na jan nasacuu na na najánaha ichí quini nuú ñayivi ndúu ñuyiví já ná cajú na tá nuú ña núu. Joo viti sa nandicava va mé Babilonia —cáchí t́átō Ndióxi, ña cáhiví cán.

⁹Tá nandihí já naxini í naqueta inga t́átō Ndióxi, ña cáhuni. Ta nacasáhá cáyuhú cóhó a já cáchí a já:

—Ndá na ná cajú cáhnu quití quini xihín t́iniñu yúú rí ta sáhan na ñamaní ña ná ñani marca mé rí cán taan na á ndáha na ¹⁰já queá ndoho ndivaha ini na cajú Ndióxi jáchí xójo ndivaha ini mé á xihín ñayivi quini. Jácana Ndióxi na nu cándaha ñuhu cáyi xihín azufre ta candehé tóco ndihí t́átō Ndióxi ta candehé Jesús, mé a cúu t́átuhun ndicachi loho cán ña ndóho na. ¹¹Ta cána ñihma ini nu ñúhu mé na ndóho ini cán anda ama cáa quiví. Ta ni ñuu ni ndiví co ndiquehe ndée ná nu ndóho ini na jáchí nacaja cáhnu na quití quini cán xihín t́iniñu yúú rí

ta nasahan na ñamaní ña ñanani marca quiví rí cán yiquí cuñu na. ¹²Xíní ñúhú quiahva ndeé ini na cúu cuéntá Ndióxi, mé na cajú tóco ndihí ña sáhdá Ndióxi ta co jándacoo na ña cajú cáhnu na Jesús —cáchí t́átō Ndióxi cáhuni.

¹³Tá nandihí já naxini johó í naquixi in a cáhan chí indiví já nacachi a já xihín í:

—Cahyún ña ná cáhan í xuhun yóho: “Viti ta chí nuú caji ini na naxihí, na cándeé ini Jesús, xitoho na” —cáchí a.

Ta já cáchí ínimá yí Ndióxi já:

—Mé a ndaa caji ini na cán jáchí ndiquehe ndée ná sahá ña nacaja chúun vaha na cuéntá mí í. Ta ña vaha nacaja na cán coo a níí tiempo xihín ná —cáchí ínimá yí Ndióxi.

Tá jándoho Ndióxi ini ñayivi

¹⁴Tá nandihí já nasandehé e ta já naxini í in víco yaa. Ta cánúu in da cáa tá quiahva cáa in ñayivi jatá mé víco. Ta cánúu in tiyiví jihun cuáan yiquí jíni da ta cánee in machiti tojo jeen ndáha dá.

¹⁵Tá nandihí já naqueta inga t́átō Ndióxi ini veñuhu Ndióxi cán ta já cáyuhú cóhó a já cáchí a já xihín mé da fin coo jatá víco cán:

—Xíní ñúhú casáhún jáqueún ña fin ñuyiví xihín machiti tojo ñéhún jan jáchí sa naxinu coo va hora jáqueún ña fin jatá ñuyiví jáchí sa nachichi va viti —nacachi a.

¹⁶Anda já naxini í nacasáhá mé da nasanúu jatá víco cán jáquihvi da machiti tojo da jatá ñuyiví ta já najáquee da ñaha jatá ñundáhyi.

¹⁷Tá nandihí já naxini í naqueta inga tucu t́átō Ndióxi ini veñuhu fin indiví cán ta quiahva já cánee inga machiti tojo jeen ndahá a. ¹⁸Ta nu fin nu náa mé veñuhu cán naqueta inga t́átō Ndióxi, mé a cómi cuéntá saha ñúhu ita ña cáyi. Ta já nacahan cóhó a xihín mé t́átō

Ndióxi nū cuítí cán, ña cáñee machiti tojo jeen ndáha cán já ñacachi a já:

—Xíní ñuhú jáquihvún machiti tojo jeen cáñee ndáhun jan ta casáhá cahndún uva cúun nū dó uva ndúu ñuyíví jáchi sa nachichi uva nū do —ñacachi a.

¹⁹ Andá já jáyaha táto Ndióxi cán machiti tojo nuú ñundáhyi ta já ñasahnda ndihi a uva nū tó uva cán ta ñataán a uva cán ini in pila cáhnu ña ná cuhní ri. Ta ña yóho náha ndá quiahva quini ndoho ini ñayivi caja Ndióxi jáchi xójo ndivaha ini a xihín ná sahá cuachi cája na. ²⁰ Ta tá ñasuhní uva cán ini mé pila cáhnu yuhú ñuu cán já ñacana nii, dó cúu tátuhun yuta cúná jandá quiahva cani ndaa dó yati yuhú in cuáyí. Ta tá quiahva cáni xíca dó cuahan do cúu á tátuhun uní ciento kilómetro.

Tá xínū coo táto Ndióxi xihín usa chága tondóhó quixi jatá ñuyíví

15 Tá ñandihí já ñaxini i inga tucu ña cáhnu chí indiví ta chí ñacatóntó i. Ta ña ñaxini i cúu usa táto Ndióxi ta in in ña yóho ñéhe a chága tondóhó quixi jatá ñuyíví ña ná jándihí a ña xójo ini Ndióxi.

² Ta ñaxini i in ñaha ta náha tátuhun in tañuhú ta tá quiahva fin nuú yutátá quiahva já fin nuu do joo cúu dó dó cáva táhan xihín ñúhu cáyi. Ta yati jfin mé tañuhú náha tátuhun yutátá cán ndíta ñayivi, ña ñacandeé ñasahnū nū tóco ndihi ña núu sahá ña coo ñacaja cáhnu na quití quini xihín tñiñū yúu ri. Ta ni coo ñaquehe na túni ña cúu numero mé rí quini cán. Ta mé ña ndíta cán cáñee arpa ndáha ña, dó ñasahan Ndióxi nū ná.

³ Ta xíta na ña ñaxita Moisés, mé dā ñacaja chúun cuéntá Ndióxi. Ta xíta na ña ñaxita Jesús, mé a cúu tátuhun ndicachi loho cán ta já cáhí ña já:

Cátóntó nde tá xíní nde tóco ndihi ña ñacavaha mé ndó, Ndióxi, xitoho nde,

jáchi fin ndée ndó caja ndó tóco ndihi ñaha.

Íchi cuéntá mé ndó cúu á íchi ndacú ta cúu á íchi cuéntá ña ndaa.

Ta mé ndó cúu ndó ña cómi cuéntá sahá ndaja táhan nación ndúu ñuyíví yóho.

⁴ Tóco ndihi ñayivi yíhvi ña ndohó, mé a cúu xitoho nde ta cáhan ña ndaja cáhnu cúu mé ndó.

Jáchi in túhún mé ndó cúu ndó Ndióxi yii.

Ta tóco ndihi ñayivi ndúu ndijáá nación xinu ña caja cáhnu na mé ndó, jáchi náha ndá quiahva cája ndó ña ndaa, cáhí ña xíta na.

⁵ Ta tá sa nayaha ña yóho já ñasandehé ta ñaxini i ñanuna veñuhu indiví, ña ñacavaha na xihín ñíi quítí. Ta ñasañuhu ley Moisés cán. ⁶ Ta ini mé veñuhu indiví ñaqueta ndíhūsa táto Ndióxi, mé a ñéhe usa nuú tondóhó quixi jatá ñuyíví. Ta ndíxi táto Ndióxi cán jahmá víi, ña lino, ña ndató ndivaha yéhe. Ta ndácaan in cinturón ña jñuhun cuáán tóco á ta cáni a jandá yati yicá ndíca a. ⁷ Ta in táhan ndícomi mé ña tácu cán ñasahan in in cóhó, ña jñuhun cuáán nuú in in táhan ndíhūsa táto Ndióxi cán. Ta ini in in cóhó cán ñúhu ndaja táhan tondóhó ña vaxi jatá ñayivi ndúu ñuyíví caja Ndióxi, mé a tácu andá ama cáa quivi. ⁸ Ta ñachutú ndaa veñuhu cán xihín ñihma, ña náha ndá quiahva cáhnu cúu Ndióxi xihín ndá quiahva cáhnu cúu ndée mé á. Ta ni in na coo ñañehé ñamaní quihvi ini veñuhu cán jandá quiahva ñaxinu ndíhūsa tondóhó, ña ñéhe ndíhūsa táto Ndióxi cán.

Usa coho ña ñúhu usa tondóhó

16 Tá ñandihí já ñaxini johó i ñacahan cóhó in a tañu veñuhu indiví cán. Ta já cáhí a xihín ndíhūsa táto Ndióxi cán já:

—Cuáhán ndó cūyu ndó ndíhusa cōho jan jatá ñuyíví. In in a cán cúú á in tondóhó chindahá Ndióxi jatá ñuyíví ta ndoho ndivaha ini ñayivi xihín á —cáchi a.

²Anda já in táto Ndióxi, mé a nu cuítí nasahan nacuyu a ña ñúhu ini cōho ñéhe a cán jatá ñuyíví. Ta já naxinu cuehe táhyi, ña ihvi ndivaha yiquí cuñu ñayivi, na ñaquehe marca quítí quini cán, mé na nacaja cáhnu tñiñu yúu rí.

³Tá nandihí já inga táto Ndióxi ña cáhivi cán nacuyu a ña ñúhu ini cōho ñéhe a jatá tañuhú. Ta tóco ndihí dó ñandu dó ñii tátuhun ñí ndii. Ta tóco ndihí ña tácu ini tañuhú cán naxihí ndihí a.

⁴Ta tá nandihí já nacuyu táto Ndióxi ña cáhuni cán ña ñúhu ini cōho ñéhe a jatá ndijáá yuta xihín ndijáá nu cána ticuíf ta ñandu dó ñii. ⁵Tá nandihí já naxini johó i cáhan in táto Ndióxi, mé a cómi cuéntá sahá ticuíf cán já cáchi a já:

—Tátá Ndióxi, mé ndó cája ndó ña ndaa jáchi nacaja víí ndó sahá ñayivi jan. Yii ndivaha cúú ndó ta íin ndó viti ta janda saha nasahiiñ ndó. ⁶Najándoho ndó ini ñayivi jan jáchi nasata na ñí na cúú cuéntá mé ndó xihín ñí na profeta tá nasahní ñahá na. Joo viti nacaja ndó xihín ná ña ná coho na ñii já ná ndoho ini na. Ta quiahva já cáni a coo a —nacachi táto Ndióxi cán.

⁷Tá nandihí já naxini johó i in a cáhan nu náa Ndióxi cán já cáchi a já:

—Tátá Ndióxi, mé ndó cúú ndó xitoho nde ta íin ndée ndó caja ndó tóco ndihí ñaha. Ta nacaja ndó ña ndaa tá nacaja víí ndó sahá ñayivi —cáchi a.

⁸Tá nandihí já naxini i inga táto Ndióxi ña cácomi cán ta nacuyu a ña ñúhu ini cōho ñéhe a jatá candii. Ta xihín ña yóho ñañehé candii cán ndée á chicaan ñúhu a ñayivi xihín ñúhu cáyi. ⁹Ta já nacayí quini ndivaha tóco ndihí ñayivi. Joo coó naxeen na ndicó coo ini na ta ni coó nacaja cáhnu na Ndióxi.

Ña nacaja na queá nacasáhá na cánahá ndivaha na xihín Ndióxi, mé a íin ndée nu tóco ndihí tondóhó quíxi jatá ñuyíví yóho.

¹⁰Tá nandihí já naxini i inga táto Ndióxi, ña cáhuhun cán ta nacuyu a ña ñúhu ini cōho ñéhe a jatá táyi nu íin coo quítí quini cán. Ta já naxini i nacanaá yávi mé nu ndúu na sáhdá rí chuun nu cán. Ta já nacasáhá mé na cán sáxi yihí na yáa ná jáchi nacasáhá ndóho ndivaha ini na. ¹¹Joo coó najándacoo na ña núu cája na. Ta sahá ña nacahihvi ndivaha yiquí cuñu na cán xihín cuehe ndóho na já nacanahá ndivaha na xihín Ndióxi, mé a íin indiví.

¹²Tá nandihí já naxini i inga táto Ndióxi, ña cáhiñu cán ta nacuyu a ña ñúhu ini cōho ñéhe a jatá in yuta cáhnu naní Eufrates. Ta já nahichí ndihí ticuíf nasañuhu ini yuta cáhnu cán ta já ñañuná nuú yaha na cúú rey, na ñaqui xí chí xoo nu cána candii.

¹³Tá nandihí já naxini i naqueta uní ínima quini. In rí naqueta yúhu coo quini ta inga rí naqueta yúhu quítí quini ta inga rí naqueta yúhu da cúú profeta túhún cán. Ta mé ínima quini cán ndaa tá quiahva ndaa láhva cúhndó. ¹⁴Ta rí cán cúú ínima rí quini, rí nacaja ña xitúhún nuú ñayivi. Ta cúú rí rí quéta cuahan játaca ndaja táhan rey sáhdá chuun nuú ñayivi ndúu ñuyíví já ná cani táhan na xihín Ndióxi. Jáchi sa nacayati quíví ñaha ndá quiahva cáhnu cúú Ndióxi jáchi mé á queá íin ndée cája tóco ndihí ñaha. ¹⁵Anda já nacachi Ndióxi já: “Cuéntá coo ndó jáchi tá quiahva jonáá xínu da cuíhná quiahva já jonáá xínu i nu ndo. Íin saha cájii ini ndá na sa ndátí tiahva saa i jáchi cúú ná tátuhun na nasandíxi tiahva jáhma. Já queá ná a cácahan nuú ná tá ndaa lahla na nuú ñayivi”, cáchi a. ¹⁶Ta rí quini cán najátaca rí tóco ndihí rey sáhdá chuun nuú

ñayivi in nuú naní Armagedón t̄uhun hebreo.

¹⁷ Tá nandihí já inga tátō Ndióxi ña cáhusa cán nacuyu a ña ñúhu ini cohō ñehe a nu táchi. Ta já naxini johō i cáhan in a ini veñuhu indiví nu ñin coo Ndióxi nu sácoo rey cán. Ta cáhan cohó á já cáchi á já:

—Sa nayaha tóco ndihi ña ndítahan coo —nacachi a.

¹⁸ Tá nandihí já naxini i nacasáhá cána tasa. Ta naxini johō i jandá vaá johō cúu tácu cáhan na. Ta naxini johō i jandá johō cána javi. Ta nacasáhá quiji ñinu ñundáhyi jáchi nacasáhá táan ndeé ndivaha. Ta mé nditáan yóho nasacuu a ña ndeé chága nu tóco ndihi ña táan jáchi jandá quiví nasacu Ndióxi ñayivi ñuyíví coó naquixi inga nditáan ndeé tátuhun ña yóho. ¹⁹ Ta mé ñuu cáhnu ndivaha cán nandata uní ña. Ta ndijáá ga ñuu náhnu ndúu ñuyíví nacuyu ndihi a. Ta nandicuhun ini Ndióxi sahá ñuu cáhnu naní Babilonia cán ta najándoho mé á ini na ndúu cán jáchi xójo ndivaha ini a xihín ná. Ta ña ndóho na cúu á tátuhun xíhi na vino cuéntá tondóhó. ²⁰ Ta tóco ndihi isla ñúhu ini tañuhú xihín ndijáá java ga yúcu ndúu jata ñundáhyi nandihí sahá. ²¹ Ta naxini i nacuun ñíí náhnu ña vee ndivaha tátuhun ivi jico kilo in in a. Ta jandá indiví naquee a nacuyu a jatá ñayivi ndúu ñuyíví. Ta nacasáhá na cánahá na xihín Ndióxi sahá ña najácuyu a ñíí yóho jata ná. Jáchi mé a ndaa ña yóho nasacuu a in tondóhó cáhnu ndivaha naquixi nu ná nacaja Ndióxi.

Tá jándihí Ndióxi sahá ñá xíca jii

17 In táhan ndíhusa tátō Ndióxi ña cánee in táhan usa cohō ndáha cán naxinu a nuú i já nacachi a já xihín i:

—Naha quíí yóho jáchi cúni jánaha i nuun ndá quiahva ndoho ini ñá xíca jii, ñá cáhnu, ñá ñin coo nuú cuahá ticuíí.

² Tóco ndihi na cúu rey ndúu ñuyíví yóho naquiji na xihín ñá cán. Najáxini ñá tóco ndihi ñayivi ñuyíví xihín ña núu nacaja ñá tá naquiji ñá xihín na coo cúu yíí ña —nacachi tátō Ndióxi cán xihín i.

³ Anda já nacaja ínama yíí Ndióxi xihín i ña ndáca tátō Ndióxi yehe nasahan i yucu íchí xihín á. Ta cán naxini i in ñañáha cánúu jatá in quití quini, rí cuahá. Ta níí cúu rí nacacutu xihín t̄uhun quini ña cánahá xihín Ndióxi. Ta naxini i ñin usa yiquí jíní rí xihín uxu ndíqui rí. ⁴ Ta mé ñá cánúu jata rí cán ndíxi ñá jáhma ndíhí ticayí, ña nacava táhan xihín ña cuahá. Ta nacacutu ña xihín j̄uhun cuáan xihín yuu yáhví ndivaha xihín perla. Ta naxini i cánee in cohō j̄uhun cuáan ndáha ña. Ta nachutú ndaa cohō cán xihín ña núu ta xihín ña tiquíni nacaja ñá xihín dataa. ⁵ Ta ndáa in t̄uhun taan ñá, ña coo cándaa ini ñayivi. Ta já cúni cachi mé t̄uhun cán: “Ñuu Babilonia cúu ñuu cáhnu ta cúu á tátuhun náná tóco ndihi najihí xíca jii. Ta cúu á tátuhun náná ndaja táhan ga ña núu ndúu ñuyíví yóho.” ⁶ Tá nandihí já náha ña naxini ndivaha mé ñañáha jáchi naxihi ñá níí na cúu cuéntá Ndióxi, na naxihí sahá ña coo najándacoo na cáhan na sahá Jesús. Ta tá naxini i ña yóho já nacatóntó ndivaha i. ⁷ Ta já nacachi tátō Ndióxi cán já xihín i:

—Ndá cuéntá queá catóntó nahún. Xíní ñúhú cuni johō vahún ña cahán i xuhun jáchi ndicani i nuun ndíá cúni cachi ña ñin jehé sahá ñañáha yóho. Ta jári ndicani i nuun ndíá cúni cachi quití quini, mé rí cánúu ñá, rí ñin usa yiquí jíní xihín uxu ndíqui cán. ⁸ Mé quití quini naxinún yóho nasatacu rí sanahá joo viti coo tácu ga rí. Joo vaxi quiví ndindita rí ta queta rí tañu yávi, ña coo xínu nu ndíhi nuu cán. Ta tá nandihí já cuhun rí ndihi sahá rí chí uun. Ta catóntó ndivaha tóco ndihi ñayivi ndúu ñuyíví, na coo nacahyi quiví jandá tá cámaní cava sahá sahá

ñuyívi nṽ libro nṽ ndáa quívi tóco ndihi na catacu andá ama cáa quívi. Cátóntó ndivaha na tá ná cuni na mé quití quini yóho, rí nasahjin sanahá ta co tácu ga rí viti joo nditacu tucu rí nṽ ná.

⁹Ta ndá ndó, nṽ ndíchí jini, cuu candaá ini ndó ña yóho: Ndíhṽsa yiquí jini quití quini cán cúu á yuhú nuú usá yúcu nṽ fin coo mé ñánáha xíca jii cán. ¹⁰Ta jári cúu á yuhú nuú usá rey. Ta uḥun táhan rey yóho sa nandihí va saha. Ta inga táhan rey yóho sáhdá da chuun nuú ñayivi viti níhú. Ta inga ga rey ña cáhṽsa cán cámaní xinu coo. Joo tá ná xinu coo da yóho já a cóo nahá toho da cahnda da chuun nuú ñayivi. ¹¹Ta quití quini, rí nasatacu sanahá ta viti sa coó ga rí, rí cán cúu rí yuhú nuú rey, da cáhṽna cán. Vatí cúu dá táhan java ndíhṽsa rey cán joo tá nandihí cahnda da chuun cṽhṽn da ndihí saha dá chí uun.

¹²Ta ndíhṽxṽ ndíqui naxinún yóho cúu á yuhú nuú uxṽ rey, mé nṽ cámaní casahá cahnda chuun nuú ñayivi ndúu ñuyívi. Joo in tálaá hora ñeḥe táhví nṽ cahnda na chuun xihín mé quití quini cán nuú ñayivi tátṽhun rey. ¹³Ta ndíhṽxṽ rey yóho jándique táhan na tṽhun na ña ná quiahva na ndéé ná nu mé quití quini já ná cahnda rí chuun. ¹⁴Ta caní táhan ndíhṽsa nṽ cán xihín Jesús, mé a cúu tátṽhun ndicachi loho cán. Joo quee vaḥa Jesús xihín ná jáchí cúu á xitoho nṽ náhnu ndúu ñuyívi yóho ta cúu á rey nuú ndaja táhan rey. Ta xoo Jesús cán canduu nṽ nacana Ndióxi, mé nṽ nacaxi a cacomí a cuéntá saha. Cúu ná na coó najándacoo ña cándeé ini na mé á —nacachi táto Ndióxi xihín i.

¹⁵Tá nandihí já nacachi tucu táto Ndióxi cán já xihín i:

—Ticuí, dó naxinún nṽ fin coo ña xíca jii jan cúu dó yuhú nuú ndijáá ñuu xihín ndijáá nación xihín ndijáá ñayivi, nṽ cáhan tá nuú tṽhun. ¹⁶Ta ndíhṽxṽ ndíqui naxinún nuú quití quini jan cúu

á yuhú nuú mé uxṽ rey, nṽ candají ña xíca jii jan. Ta jándacoo na ña ta já caca lahla ña. Ta caxi ndáa nṽ yiquí cuñu ña. Ta chicaan níhu ná ña xihín níhu cáyi. ¹⁷Jáchí jáxinu Ndióxi ini nṽ cán ña ná caja na ña cúni mé á. Ta jándique táhan nṽ cán tṽhun na ña ná ndiquiahva na chuun ndójo na nu mé quití quini cán ña ná cacuu rí tátṽhun rey jánda quiahva ná xinu coo nuú ña nacachi Ndióxi coo. ¹⁸Ta ñánáha naxinún cán cúu ña yuhú nuú ñuu cáhnu cán ña sáhdá chuun nuú ndaja táhan nṽ cúu rey —cáchí táto Ndióxi cán.

Tá jándihí Ndióxi sahá ñuu Babilonia

18 Tá sa nayaha tóco ndihi ña yóho já naxini i inga táto Ndióxi, ña ndójo chuun cáhnu ta nanuu a chí indiví. Ta chí nandiyihví ndaa jatá ñuyívi xihín quiahva yéḥe mé táto Ndióxi cán. ²Ta já nacasahá cáyuhú cóho a já cáchí a já:

—Ay, ay, sa nandihí va sahá ñuu cáhnu Babilonia cán ta nanduu a tátṽhun cavá tiñáhá. Cúu á tátṽhun nuú nandicutú ndaa ínimá quini níhu rí. Ta nanduu a tátṽhun in choḥo nṽ níhu tá nuú laa quini, rí cándají ñayivi. ³Nandihí sahá ñuu Babilonia yóho, mé a cúu tátṽhun in ñánáha xíca jii. Jáchí najáxiní ña ndaja táhan ñayivi ndúu ñuyívi ta najácáhan ña nṽ ña ná caja na tá nuú ña núu ña xíca ini na caja na. Ta mé nṽ ñuu Babilonia jan nasahan nṽ ñamaní ña ná xinu coo ndaja táhan da náhnu sáhdá chuun nuú nación ña ná xinu da ñuu Babilonia jan cuju da xihín ña xíca jii jan. Ta na cája ndahví ndicuicá na xihín tá nuú ña núu caja ña jáchí sátá johó ña ña cuicá ña —cáchí táto Ndióxi cán.

⁴Tá nandihí já naxini johó i inga cáhan chí indiví ta já cáchí a já:

—Ndóhó, nṽ cúu cuéntá mí i, cuáqueta ndó jatá ñuu jan já ná a cája ndó cuachi cája nṽ ñuu jan. Ta já ná a xinu

coo tondóho vaxi nuú na ñuu jan jata ndo. ⁵Jáchí sa nacacuahá ndivaha cuachi na ta jandá indivi xínu coo cuachi na. Ta co ndíndójó Ndióxi sahá cuachi cája na. ⁶Ta tá quiahva nacaja na jan xihín inga ñayivi quiahva já ndítahan caja ndó xihín ná viti. Ta jandá ivi táhndá chága ví ndicó coo ndó caja ndó xihín ná. Ta tá quiahva najácoho na jan inga ñayivi quiahva já ivi táhndá chága ví ndítahan quiahva ndó nu ná coho na. ⁷Nandiñehe jíco ndivaha na mé ná sahá ña cán queá ndítahan jándoho ndivaha ndó ini na viti. A juú quiahva nanduu cuícá na sahá ña cán queá ndítahan caja xíxi ndó xihín ná viti. Cáhán na ña cahná na chuun nuú in nación. Ta cáhán na ña a ndóho toho ini na. Ta cáhán na ña co cúu ná tátuhun in ña cuáan. ⁸Sahá ña cán queá tixi in tálaá quivi quixi tá nuú ña núu nu ná. Já casáhá quivi na ta cacuehá ndivaha ini na ta xínu joco nu ná. Ta já chicaan Ndióxi na nu núhu cáyi jáchí jándihi Ndióxi, xitoho í saha ná, mé a fin ndée cája tóco ndihi ñaha —cáchi a.

⁹Ta já casáhá cuacu ndijáá rey, na sáhndá chuun nuú ñayivi ndúu ñuyíví. Ta táhndá ini na tá ná cuni na ñihma cána ñuu Babilonia cán. Jáchí mé na náhnu yóho naquihvi nuu na xihín ña xíca jii cán ta najátiví na jiuhún na xihín ña. ¹⁰Ta xíca xíca nasacandichi na jáchí yíhvi na sahá ndá quiahva quini ndóho ini ña cúu yuhú nuu ñuu Babilonia cán. Ta já casáhá cáchi mé rey cán já:

—Ay, ay, ndáhvi nahá nacuu ndó, ñuu Babilonia jáchí vatí cúu ndó ñuu cáhnu ndivaha joo in too johó naxínu hora ndóho ini ndó —cáchi na cán.

¹¹Ta ndijáá na cája ndahvi ndúu ñuyíví cuacu ri na cán va ta táhndá ndivaha ini na sahá ñuu Babilonia jan jáchí a cóo ga na cueen ñaha ndójo na xínu coo na. ¹²Ta ña sádojo na cán quixi na jíco na cúu jiuhun cuáan xihín jiuhun

cúxú xihín yuu yahvi ndivaha xihín perla vaha xihín jahmá vaha ndivaha ña cávaha xihín yahva naní lino xihín jahmá seda xihín jáhma ndíhí ticayí xihín jáhma cuáhá nii xihín ndijáá nuú yíto támi sáhan xihín ñaha cávaha xihín nuhu yóco elefante xihín ndijáá yitó yahvi ndivaha xihín ndijáá ñaha cávaha xihín caa cuáan xihín ña cávaha xihín caa uun ta jári ñaha cávaha xihín yuu naní mármol. ¹³Ta quiahva já sáñehe na canela xínu coo na xihín ndijáá ñaha támi sáhan. Ta ñehe na jusa xihín mirra xihín perfume viti. Ta quiahva já ñehe ri na vino xihín aceite xihín harina vaha xihín trigo. Ta quiahva já sáñehe ri na quití xójo xihín ndicachi xihín cuáyí xihín carreta. Ta jandá ñayivi xéen na caja chúun nu ná sáñehe na. Ña yóho sádojo na quíxi na joo ni in na a cuéen ga ñaha na. ¹⁴Ndijáá na cája ndahvi cán cahan na xihín ñuu Babilonia cán já cachi na já:

—Coo ga cuíhi vaha, rí cátoó nahá ndó caxí ndó. Ta viti sa nandihí saha tóco ndihi ña lándá xihín ña cuícá nasanduu nu ndó jan —cáchi na.

¹⁵Ta na nacaja ndahvi xihín tóco ndihi ñaha yóho nandicuícá ndivaha na xihín ndahvi nacaja na xihín na ñuu Babilonia cán. Ta xíca xíca candita na candehé na ñuu Babilonia cán jáchí yíhvi na ndoho na tá quiahva ndóho ini na cán. Ta cuacu ndivaha na ta táhndá ndivaha ini na. ¹⁶Ta já cáchi na já:

—Ay, ay, ndáhvi nahá nacuu ñuu cáhnu Babilonia jan. Ndató ndivaha nasanaha ñuu yóho tátuhun in ñañáha ndíxi jahmá lino vaha ndivaha xihín jahmá ndíhí ticayí xihín jahmá cuáhá nii. Ta nacacutú ña xihín jiuhun cuáan ta xihín yuu yahvi ndivaha ta xihín perla. ¹⁷Joo in too johó nandihí saha tóco ndihi ña cuícá nasacomí mé ñuu Babilonia jan —nacachi na.

Ta ndijáá na sáhndá chuun nuú na ñehe barco, xihín ndijáá na cándójó xíca

xihín ndijáá nā cāja chúun ini mé barco cán xihín ndaja táhan na cāja ndahví xihín nā quixi chí tañuhú cán nasandita xicá nā sándehe ná. ¹⁸ Ta tá naxini na ndíndita ñihma nā cáyi ñuu cán já nacyuhú nā já nacachi na já:

—Ni in túhún toho inga ga ñuu co queé táhan xihín ñuu Babilonia nā cáhnu yóho —nacachi na.

¹⁹ Ta xihín nā táhnda ini na nachojó nā nā yácá jiní nā. Ta nacasáhá sácu ndivaha na já cáyuhú nā já cáchí nā já:

—Ay, ay, ndáhví nahá nacuu ñayivi nasanduu ñuu cáhnu jan jáchi xihín nā cuicá nasacomí nā najácacuicá nā ndijáá da xica nuú tañuhú xihín barco. Joo in too johó nandihí sahá nā jan —cáchí na cán sácu na.

²⁰ Ta ndítahan cajií ini nā ndúu indiví sahá nā nandoho ñuu cáhnu yóho. Ta quiahva já ndítahan cajií ri ini ndijáá nā cúu cuéntá Ndióxi xihín nā cúu apóstol xihín nā cúu profeta. Jáchi xihín nā nacaja Ndióxi xihín ñuu Babilonia yóho nandiquehe a cuéntá sahá nā núu nacaja mé nā cán xihín ndó, nā cúu cuéntá Ndióxi.

²¹ Tá nandihí já naxini í in táto Ndióxi, nā íin cuaha ndée. Ndiñehe a in yuu cáhnu nā cúu á tátuhun in yuu yojó. Ta najácana a nā ini tañuhú ta já nacachi a já:

—Tá quiahva najácana í yuú yojó yóho ini tañuhú ta nasacoo a चाहá tañuhú cuahan quiahva já yaha ri xihín ñuu Babilonia. Vatí cúu a in ñuu cáhnu ndivaha joo anda ama cáa quivi a ndíco coo ga ñayivi cuni na nā. ²² Ta ni música a tácu ga mé ñuu jan ta ni a cáha ga arpa ni tóyoó ni trompeta. Ta ni in ga ñayivi a cāja chúun ga ñuu jan jáchi ni in túhún toho ndahví a cāja na. Ta ni a tácu ga yuú yojó nā ndíco najihí. ²³ Ta janda ni in íti loho a túun ga ñuu jan. Ta ni a cáhan ga ñayivi vicó tándaha jáchi coo ga nā jan coo. Jáchi nā najicó ñaha cán nasacuu

na nā náhnu ndúu ñuyiví ta najándahvi na ndaja táhan ñayivi ndúu ñuyiví xihín nā tají nacaja na —cáchí táto Ndióxi.

²⁴ Ta ndoho ini na jáchi mé ñayivi ñuu Babilonia jan nasahní nā nā profeta xihín nā cúu cuéntá Jesús ta anda cuahá ñayivi ndijáá ñuu ñuyiví nasahní ñaha nā.

19 Tá sa nayaha tóco ndihí nā yóho já naxini johó í cáhan cóhó cuahá ndivaha ñayivi indiví ta já cáchí nā já: Cáhnu cúu Ndióxi jáchi in túhún mé á queá jácau mí.

Ta íin ndée mé á caja tóco ndihí ñaha ta cáni nu yó caja cáhnu ndivaha í mé á.

² Jáchi ndaa cāja ndihí mé á ñaha tá cāja víí a sahá ñayivi.

Ta ndaa nacaja mé á tá nasacu ini a jándihí a sahá ñuu Babilonia jan jáchi nasacuu a tátuhun nā xica jii.

Jáchi xihín tóco ndihí nā núu nasacaja nā nā quiji nā xihín nā coo cúu yíi nā najátiví ndihí nā ñayivi ndúu ñuyiví.

Sahá nā cán queá najándihí Ndióxi saha nā ta já natahnda cuéntá sahá nā nacaja nā tá nasahní nā nā cúu cuéntá Ndióxi, cáchí nā cáhan indiví cán.

³ Tá nandihí já nacasáhá tucu nā cán cáhan nā já cáchí nā já:

—Cáhnu cúu Ndióxi jáchi nacaja mé á nā cáyi ñuu cán ta anda ama cáa quivi ndíndita ñihma nā —já cáchí nā indiví cán.

⁴ Ta ndíhoco comí nā sacuaha ndúu cán xihín ndícomí mé nā tácu cán nacaxítí nā janda quiahva nacani ndaa taan na nu ñúhu ta já nacaja cáhnu na Ndióxi, mé a íin coo nu sácoo rey cán. Ta tá cāja cáhnu na Ndióxi já cáchí nā já:

—Já ná coo. Cáhnu cúu Ndióxi —cáchí nā.

⁵ Ta janda nu íin coo Ndióxi cán naxini johó í cáhan in a ta já nacachi a já:

—Tóco ndihí ndó, nā cāja chúun cuéntá mé á xíní ñúhu caja cáhnu ndó

Ndióxi, mé a cája cáhnu í. Coo caja toho a á cúu ndó na náhnu á na valí jáchi cája ndó ña sáhdá mé á —cáchi a.

Tá coo víco indiví sahá ña ndiquehe Jesucristo na cúu cuéntá mé á

⁶ Tá nandihí já naxini joho tucu u ña tácu tátuhun tá cáhan cuahá ndivaha ñayivi. Ta tácu ña tátuhun tá cáha cýu ticuíf tañu cáva ta tácu ña tátuhun tá cána tasa. Ta já cáchí na já:

Cáhnu cúu Ndióxi, xitoho í, mé á cája cáhnu í jáchi sa ñacasáhá mé á cómi a cuéntá sahá ñayivi viti.

Ta ñin ndée mé á cája tóco ndihí ñaha.

⁷ Xíní ñúhú cavatá yo ta xíní ñúhú cajii ndivaha iní caja cáhnu ndivaha í mé á.

Jáchi sa naxinu coo quivi ndiquehe Jesucristo, mé a cúu tátuhun ndicachi loho, na cúu cuéntá mé á.

Cacuu a tátuhun tándaha Jesucristo xihín na cúu cuéntá mé á, na sa ndúu tiahva na tandaha na xihín mé á.

⁸ Ta ñehé táhvi ná candixi na jahmá vaha ndivaha, ña naní lino ta cúu á ña ví ndivaha ta ndató ndíyihvi a, cáchí na.

Jáchi mé jahmá ví ña naní lino cán náha ña naxica vaha na cán íchi cuéntá Ndióxi.

⁹ Tá nandihí já ñacachi mé táto Ndióxi já xihín i:

—Cahyún ña yóho. Cajii ini ñayivi, na ñacana Ndióxi cuhun indiví tá ná xinu coo quivi ndiquehe Jesucristo, mé a cúu tátuhun ndicachi loho cán, na cúu cuéntá mé á —ñacachi táto Ndióxi cán xihín i.

Ta ñacachi tucu a já:

—Mé a ndaa ndinuhu tuhun Ndióxi cúu ña yóho —ñacachi a xihín i.

¹⁰ Andá já ñacaxítí i nu táto Ndióxi cán ña ná caja cáhnu i ña. Joo já ñacachi a já xihín i:

—A cáxítí tohún nuú yehé jáchi ndítahan caja cáhnún Ndióxi. Jáchi yehé cúu u da cája chúun nu Ndióxi tá quiahva cája chúun yóhó xihín java ga na cúu cuéntá Jesús, na cúu ñanún, na co jándacoo cáhan ña ndaa, ña najánaha Jesús nuú ñayivi. Caja cáhnún Ndióxi —cáchi a.

Jáchi na cúu profeta cándeé ini na ña jánaha Jesús ña ndaa sahá ña cán queá cáhan na ña nuú ñayivi.

Tá naxini Juan in a cánúu cuáyi yaa

¹¹ Tá nandihí já naxini i ñanuna indiví ta ñaqueta in cuáyi yaa. Ta mé a cánúu rí cán naní a: mé a co cáva ivi joho ini. Ta naní tucu a: ña ndaa. Jáchi ndaa cája víi a sahá ñayivi ta ndaa cája mé á tá quíhvi táhan cáni táhan xihín ná. ¹² Ta tá quiahva yehé nu cándaa ñúhu cáyi quiahva já yehé nduchú núu a. Ta cándojo cuahá ndivaha tiyivi jini á. Ta ndaa in quivi taan mé á joo in túhún mé á xini ndá quivi queá ndaa taan. ¹³ Ta nandaxi jáhma mé á xihín ni. Ta naní a: tuhun Ndióxi. ¹⁴ Ta naxini i ndíco in táhdá cáhnu soldado cuéntá indiví jatá cuahan na xihín á. Ta ndíxi na jahmá vaha ña naní lino. Ta cúu á jahmá yaa cachi, ña ndató ví ña. Ta in in na cán cánúu cuáyi yaa cásahan na xihín á. ¹⁵ Ta yúhu mé á ña cúu tuhun Ndióxi cán quéta in yúchu cáni ña jeen ndivaha. Ta xihín mé yúchu jeen cán jándicuehe quini ndivaha mé á ndijáá ñayivi ndúu ñuyíví. Ta cahnda ndeé mé á chuun saha ná. Ta cája víi a saha ná tá quiahva cája da sáni nihni jatá uva ini pila ña ná cuhni ri. Ta mé Ndióxi cúu á jándoho ndivaha ini ñayivi jáchi xójo ndivaha ini mé á xihín ná ta mé á cúu á Ndióxi ña ñin ndée caja tóco ndihí ñaha. ¹⁶ Ta jatá jáhma ndíxi mé a cán xihín nu jihin a ndaa java tuhun já cáchí ña já: “Yehé cúu rey nuú ndaja táhan rey ta cúu u xitoho nuú na náhnu ndúu ñuyíví”, cáchí a.

¹⁷ Tá nandihí já naxini i in táto Ndióxi cándichi a jatá candii. Ta já nacayuhú cóhó a nuú ndijáá laa, rí ndáchí nū táchi. Ta já nacachi a já xihín rí:

—Naha ndihí ndó taca ndó cajíni ndó ña quiahva Ndióxi nū ndo. ¹⁸ Ta ña caxí ndo cacuu a yiquí cuñu na náhnu, na sáhdá chuun nuú ñayivi. Ta caxí ndo yiquí cuñu na cúu sacuahá nū soldado xihín yiquí cuñu na ndacú. Ta caxí ndó yiquí cuñu cuáyí xihín yiquí cuñu da cándójó jata rí. Ta caxí ndó yiquí cuñu na xica núná mé xihín na cómí xitoho cuéntá saha. Ta quiahva já caxí ndó yiquí cuñu na valí xihín na náhnu viti —cáchi a.

¹⁹ Tá nandihí já naxini i rí cúu quití quini cán nataca rí xihín na náhnu, na sáhdá chuun nuú ñayivi ndúu ñuyiví ta xihín soldado na. Nataca na caní táhan na xihín mé a cánúu jata cuáyí yaa cán xihín soldado mé á. ²⁰ Ta natiiin mé á quití quini cán xihín da cúu profeta túhún, mé da nacaja ña xitúhún nū mé rí cúu quití quini cán. Jáchí xihín ña xitúhún nasacaja mé profeta túhún cán najándahvi da ñayivi ta najácahan da na ña ná nani marca mé rí quini cán yiquí cuñu na. Ta já nacaja cáhnu na tiniñu yúu rí. Ta naxini i najácana tácu Ndióxi mé quití quini cán xihín profeta túhún cán ini indayá, ña cúu tátuhun in mīni nū cándaha ñúhu cáyí xihín azufre. ²¹ Ta na java ga cán naxihí na xihín yúchu cáni ña naqueta yúhu mé a cánúu jata cuáyí yaa cán. Ta ndijáá laa nataca ndihí rí caxí rí yiquí cuñu na janda quiahva nandivaha ini rí.

Cáhan Juan sahá in mil cuia tá ná candiço ndaa tiñáhá sacuahá

20 Tá nandihí já naxini i nanuu in táto Ndióxi chí indiví ta ñéhe a yávi ña súná yuhú yávi cúná, ña co xínu nū ndihí nū cán. Ta cánee in cadena ndeé ndáha á. ² Ta natiiin mé á coo quini,

rí cúu tiñáhá sacuahá naní Satanás, rí nasahjin janda saha. Ta natató a rí xihín cadena cán tixi in mil cuia. ³ Ta najácana a rí ini yávi cúná nuú nachicaji a rí. Ta nasacu a in sello yuhú yéhe nū ndácaan rí já ná a queta rí jándahvi rí ñayivi ñuyiví janda quiahva ná yaha mé in mil cuia. Ta tá sa nayaha in mil cuia já jani tucu rí caca nuu rí tixi chá tiempo cuití va.

⁴ Tá nandihí já naxini i ndíta cuaha táyí vaha nū ndúu coo na candojo chuun ña caja víi na sahá ñayivi. Ta quiahva já naxini rí cán ndúu ínima na nachitúhun na yiquí jíní na jáchi nacahan na tuhun Ndióxi, ña ndaa najánaha Jesús nuú ñayivi. Ta cúu ná na coo nacaja cáhnu quití quini cán xihín tiniñu yúu rí. Ta ni coo nasahan na ñamaní nani marca rí taan na ni ndáha ná. Ta naxini i nanditacu tucu mé na cán ta anda jáví mé ná xihín Jesús nasacomí na cuéntá sahá ñayivi tixi in mil cuia. ⁵ Ta na yóho cacuu na nū cuítí nditacu tucu. Joo java ga na naxihí cán camaní nditacu na jáchi ndítahan nū ná candati na janda quiahva ná yaha in mil cuia. ⁶ Caji ini ñayivi, na nditacu tañu na jánditacu Ndióxi nū cuítí cán jáchi cúu ná na nandicaxi mé á. Jáchí a cúhun toho na indayá nū ndoho ini ñayivi quini. Ña cán cacuu a tátuhun quivi na chí ivi. Ña yaha xihín ná queta nduu na jutú caja ndíví na nū Ndióxi xihín nuú Jesucristo. Ta xihín mé á cacomí na cuéntá sahá ñayivi tixi in mil cuia.

⁷ Ta tá sa ná yaha in mil cuia cán já jani Satanás, mé tiñáhá sacuahá nū ndácaan rí ndájí rí cán. ⁸ Ta já queta rí jándahvi rí ndijáá ñayivi ndúu ñuyiví. Ta jándahvi rí ñayivi ndúu ñuu naní Gog xihín ñuu naní Magog ña ná taca na caní táhan na. Ta na soldado taca cán cacuu na tátuhun ñutí ndúu yuhú tañuhú xihín ña cuaha cúu ná. ⁹ Ta ndicuiña nuu ñayivi ndijáá ñuu ñuyiví ta cava yivi na jatá tóco ndihí

na cúu cuéntá Ndióxi. Ta quiahva já ca-
va yivi na jatá ñuu Jerusalén, mé ñuu
ña quihvi ini Ndióxi. Joo jácyu Ndióxi
ñuhú cáyi indivi ta jándihi a saha ná.
¹⁰ Ta mé tiñáhá saçuaha, mé rí naján-
dahvi ñahá cán jácana Ndióxi ri ini in
mĩni nu cándaha ñuhú cáyi xihĩn azufre.
Ta sa mé cán cúu nu jácana mé á quití
quini xihĩn da cúu profeta túhún. Ta cán
cañuhu na ndoho ini na ñuu ta ndiví an-
da ama cáa quivi.

Tá cajú vii Ndióxi sahá ñayivi

¹¹ Tá nandihí já naxini i in táyi cáhnu,
dó yaa cachi nu sácoo Ndióxi. Ta nuu
mé á nandiñuhú tóco ndihí ñuyiví xihĩn
indiví ta chí a vája ga cuu cuní ña.
¹² Ta naxini i ndijáa na sa naxihí, na
válí xihĩn na náhnu ndíta na nu fin coo
Ndióxi. Tá nandihí já naxini i nanuna
nuú java libro. Ta nanuna inga libro nu
ndáa quivi tóco ndihí na catacu anda
ama cáa quivi. Ta já nacavií sahá ña na-
caja in in na sa naxihí cán jáchi ini mé
libro cán ndáa tóco ndihí ña nacaja in
in ñayivi. ¹³ Ta nandindita tóco ndihí na
naxihí ini tañuhú xihĩn na nanduxu já ná
caja vii Ndióxi sahá ndihí na tá quiahva
cáa nacaja in in na cán. ¹⁴ Janda jáví a
quíví ga ñayivi ta a cühun ga ínima na
nuú nataca ínima na naxihí. Joo najá-
cana Ndióxi ñayivi quini ini mé mĩni nu
cándaha ñuhú cáyi. Mé mĩni cán cúu á
indayá nuú ndoho ini ñayivi ta cúu á
tátuhun quivi na chí ivi. ¹⁵ Ta mé cán
cúu nuú najácana Ndióxi tóco ndihí na
co ndáa quivi nu mé libro nu ndáa quivi
ñayivi catacu anda ama cáa quivi.

Tá naxini Juan indivi saá xihĩn ñuyiví saá

21 Tá nandihí já naxini i indivi saá
xihĩn ñuyiví saá. Jáchi sa nandihí
va sahá indivi xihĩn ñuyiví ña nu cuítí
cán. Ta jári tañuhú sa coo ga dó ñuhu
viti. ² Ta yehe, da cúu Juan naxini i

nanuu ñuu Jerusalén saá, ña yii ta
naquixi a chí indivi nu fin Ndióxi. Ta tá
quiahva ndató cácutú in ñañáha tándaha
ndiquehe ná yii ña quiahva já ndató na-
cacutú ñuu Jerusalén cán. ³ Tá nandihí já
naxini johó i nacayuhú cóhó a chí indivi
ta já cáchi a já:

—Ndióxi fin a tañu ñayivi viti jáchi
cúu ná cuéntá mé á. Ta coo a xihĩn ná
jáchi cúu á Ndióxi, mé á cajú cáhnu na.
⁴ Ta mé á yacó ndihí a ticuíf nuu ná ña
nasacu na. Ta a quíví ga na. Ta ni a caúcu
ga na. Ta ni a táhnda ga ini na. Ta ni a
ndíhiví ga na. Jáchi sa najándihi Ndióxi
saha tóco ndihí ña cán, ña nasahĩn jihna
—cáchi a.

⁵ Ta mé a fin coo nu sácoo rey nacahan
ta já nacachi a já:

—Candehé. Yehe ndája saá i tóco
ndihí ñaha.

Ta já nacachi tucu a já:

—Cahyún tóco ndihí ña cáhan i xuhun
yóho jáchi cúu á ña ndaa ta cuu candeeé
ini ndó ña —cáchi a.

⁶ Tá nandihí já nacachi tucu a já xihĩn
i:

—Sa najáxinu coo i tóco ndihí ñaha.
Yehe cúu u nu cuítí ta yehe cúu u nu
ndíhí jáchi janda tá cámaní cava sahá
saha tóco ndihí ñaha sa fin va yehe ta coo
tá coo i vatí ná ndihí sahá. Ta ndá na cuní
candaa chága ini sahá yehe já caja i ña
ná cuu candaa ini na sahá i. Ta cúu á tá-
tuhun íchi ini na ticuíf, dó cajú ña ná cat-
acu na anda ama cáa quivi. Ta coo toho
yahvi quehe e nu ná saha do. ⁷ Ta ndá na
ná cana vaha nu tóco ndihí ña núu ñehe
táhví na ndiquehe na tóco ndihí ña yóho
nuú i. Ta yehe cacuu u Ndióxi, mé á caja
cáhnu na ta mé ná cacuu na jahyi i. ⁸ Joo
na láhá xihĩn na co cuní candúsa tuhun
Ndióxi xihĩn na cándají na cúu cuéntá
Ndióxi, mé ná cán cühun na indayá nu
cándaha ñuhú cáyi xihĩn azufre. Ta cán
cühun ri na sáhní ndii xihĩn ndijáa na
ndúu xihĩn na co cúu yii á ñájihí na. Ta

cán cūhūn ndijáá nā cāja tá nuú ña tají xihín nā cāja cáhnu yoco xihín nā cáhan ña tuhún. Ña yóho cacuu a tátuhun quivi na chí ivi jáchi ndoho ndivaha ini na ini indayá nu cándaha ñuhu cáyi xihín azufre —cáchi a.

Cáhan Juan sahá ñuu Jerusalén saá

⁹Ta ndaja coo in táhan ndíhūsa táto Ndióxi ña ñehe usa coho nu ñuhu usa ña núu quixi jatá ñuyiví naxinu a nuú i ta já nacachi a já xihín i:

—Naha quí yóho candehún. Jáchi já-naha i nuun nā cúu cuéntá mé a cúu tátuhun ndicachi loho. Nā yóho cúu ná tátuhun in ná tándaha ta Jesucristo cúu á tátuhun yí ña —cáchi a.

¹⁰Anda já nacaja ínima yí Ndióxi xihín i ña ndáca táto Ndióxi yehe já nasahan i in yucu jícó ña cáhnu. Ta cán naxini i ñuu Jerusalén ña yí, ña nanuu chí indivi nu íin Ndióxi cán. ¹¹Ta mé ñuu cán ndató ndivaha yehe ña jáchi cāja mé á ña ná ndiyehé ña. Ta jíñu ña tá quiahva jíñu yuu yahvi ndivaha tátuhun yuu jaspe. Ta cúu á tátuhun yutátá jáchi cuu candehé yó chíhini a jandá inga xoo a. ¹²Ta jatá mé ñuu cán nacava nuu in náma yuu cáhnu ta jícó ndivaha. Ta nasahin uxu ivi yéhe a nu ndíta in in táto Ndióxi in in yéhe a. Ta ndica yéhe cán ndáa quiví ndíhuxu ivi táhndá nā naquixi chíchi Israel. ¹³Ta uní yéhe sándehé nu xoo cána candii. Ta uní yéhe sándehé nu chí norte. Ta uní yéhe sándehé nu chí sur. Ta uní yéhe sándehé nu xoo quéta nuu candii. ¹⁴Náma yuu ñuu Jerusalén cán nasahin uxu ivi yuu ndúhu saha. Ta jatá yuu cán ndáa quiví ndíhuxu ivi nā apóstol, nā naxica tuun xihín Jesús, mé a cúu tátuhun ndicachi loho cán.

¹⁵Mé táto Ndióxi ña cáhan xihín i cán cánee in tóyoó jñuhun cuáán ndáha ña ná chiquiahvá mé á ñuu cáhnu xihín yéhe a xihín náma yuu ña ndájí jatá.

¹⁶Ta nachiquiahvá a ña xihín tóyoó cán ta in quiahva ndáa ndícomí xoo mé ñuu cán ta chí in quiahva cáni a ta in quiahva ndíca ña. Ta quiahva ñehe a cúu á ivi mil ivi ciento kilómetro. Quiahva já cáni ña ta quiahva já jícó ña ta quiahva já ndíca ña. ¹⁷Tá nandihí já nachiquiahvá táto Ndióxi cán náma yuu ndájí jatá ñuu cáhnu cán. Ta quiahva ñehe a cúu uní jico comí metro. Ta metro cāja chúun táto Ndióxi cán cúu dó tátuhun dó chíquiahvá ñayivi ndúu ñuyiví ñaha.

¹⁸Ta mé náma yuu ndájí jatá ñuu cáhnu cán nacavaha ña xihín yuu jaspe. Ta mé ñuu cáhnu cán nacavaha ña xihín jñuhun cuáán, ña cúu tátuhun yutátá ña víi ndivaha nuu. ¹⁹Ta mé yuu ndúhu ña nacana saha mé náma yuu cán nacacutú a xihín tá nuú yuu yahvi ndivaha. Yuu ndúhu nu cuítí cán nacacutú a xihín yuu naní jaspe. Ta ña cáhivi cán nacacutú a xihín yuu naní zafiro. Ta ña cáhuni cán nacacutú a xihín yuu naní ágata. Ta ña cácomi cán nacacutú a xihín yuu naní esmeralda. ²⁰Ta ña cáhuhun cán nacacutú a xihín yuu naní ónice. Ta ña cáhñu cán nacacutú a xihín yuu naní cornalina. Ta ña cáhusa cán nacacutú a xihín yuu naní crisólito. Ta ña cáhuna cán nacacutú a xihín yuu naní berilo. Ta ña cáhjin cán nacacutú a xihín yuu naní topacio. Ta ña cáhuxu cán nacacutú a xihín yuu naní crisoprasa. Ta ña cáhuxu in cán nacacutú a xihín yuu naní jacinto. Ta ña cáhuxu ivi cán nacacutú a xihín yuu naní amatista. ²¹Ta ndíhuxu ivi yéhe ini ñuu cáhnu cán cúu á uxu ivi perla. Ta tá in tá in yéhe cán nacavaha xihín in táláa perla níí. Ta mé cáyé cáhnu ñuu cán cúu á ña nacavaha xihín ndinuhu jñuhun cuáán, ña cúu tátuhun yutátá jáchi jandá inga xoo a tívi.

²²Ta ni in túhún veñuhu coó naxini i ini mé ñuu cáhnu cán. Jáchi mé Ndióxi, xitoho í, mé a íin ndée cāja tóco ndihí

ñaha cúú á tátuhun veñuhu na. Ta jári Jesús, mé á cúú tátuhun ndicachi loho cán cúú á tátuhun veñuhu na. ²³ Ta mé ñuu cáhnu cán co xíní ñúhú toho a candii ni yoo ña ná jándiyehé ñahá jáchí xihín quiahva yéhe Ndióxi cán jándiyehé a mé ñuu cán. Ta Jesús, mé a cúú tátuhun ndicachi loho cán cúú á tátuhun lámpara jándiyehé a ñuu cán. ²⁴ Ndijáá ñayivi, na ñaqui xi ndijáá nación ñuyívi caca nuu na ini ñuu cáhnu cán xihín quiahva yéhe a. Ta ndijáá na sáhndá chuun nuú ñayivi ñuyívi xinu na ñuu cán ta ndiquiahva na tóco ndihi ña cuicá cómi na nu mé ñuu cán. ²⁵ Ta a cándaji toho yéhe a tá ndiví ta co toho ña ñuu coo cán. ²⁶ Ndijáá ña cuicá xihín ña náhnu cuéntá ñayivi ñuyívi yóho cañehe na ña nu mé ñuu cán. ²⁷ Joo ni in túhún ña quini a quíhvi toho ini ñuu cán. Ta ni in na cája ñaha cándají Ndióxi a quíhvi cán. Ta ni na cátoó jándahvi ñayivi a quíhvi cán. Na ndihvi cán cuítí va cúú ná na ndáa quívi nu libro nu ndáa quívi tóco ndihi na catacu andá ama cáa quívi. Mé libro yóho ín a nuú Jesús, mé á cúú tátuhun ndicachi loho.

22 Tá nandihí já najánaħa táto Ndióxi cán in yuta víi nuú i nu ñúhu ticuí, dó cája ña ná catacu ñayivi andá ama cáa quívi. Ta tá quiahva yéhe yutátá quiahva já yéhe nuu do. Ta cána dó chí xoo nu ín coo Ndióxi xihín Jesús, mé a cúú tátuhun ndicachi loho cán. ² Ta yáħa dó mé maħñú ndáa íchí cáhnu mé ñuu cán. Ta in in xoo yuta cán sáhnu yíto, dó cája ña ná catacu ñayivi andá ama cáa quívi. Ta tá yoo tá yoo cúun cuíhi nu dó cán. Ta uxu ívi tañu cúun cuíhi nu do nu cuía. Ta ndáħa do cája ña ná ndivaha ñayivi ñuyívi. ³ Ta cán ni in ġa ñaha a cúhun chahan ġata. Ta Ndióxi xihín Jesucristo, mé a cúú tátuhun ndicachi loho cán coo a nu sácoco rey mé ñuu cáhnu cán. Ta na cúú cuéntá Ndióxi caca cáhnu na mé a cán. ⁴ Ta cuni táhyí na nuu mé

á ta candaa quívi mé á taan na. ⁵ Ta cán coo toho ñuu coo. Na cán quea na canduu cán a cúni ñúhú ġa na ñúhu lámpara ta ni a cúni ñúhú ġa na ña ná yéhe candii jáchí mé Ndióxi, xitoho na jándiyehé a nu ná. Ta cahnda na chuun tátuhun rey andá ama cáa quívi.

Sa cáyati quívi quixi Jesucristo

⁶ Tá nandihí já ñacachi táto Ndióxi cán já xihín i:

—Tuhun yóho cúú á ña ndáa ta cuu candeé inún ña. Jáchí mé Ndióxi, xitoho í, mé a cája ña ná caħan profeta, mé a cán quea nachindahá a táto mé á já ná caxi tuhun a nuú na cúú cuéntá mé á ña yachí quixi tóco ndihi ña yóho —ñacachi a.

⁷ Ta já cáchí Jesús já:

—Sa saa yachí va yéhe. Caji ini na cándusa tuhun cáħan saħá ña yaha chí nuu, ña ndáa nu libro yóho —cáchí a.

⁸ Yéhe, da cúú Juan ñaxini joho i ta ñaxini ndihi i ña yóho. Ta tá nandihí ñaxini joho i ña ta tá nandihí ñaxini i ña já ñacaxítí i nu táto Ndióxi ña caca cáhnu i ña jáchí mé a najánaħa ña yóho nuú i.

⁹ Joo ñacahan táto Ndióxi cán xihín i já ñacachi a já:

—A cáxítí tohún nuú yéhe jáchí ndítaħan caca cáħnú Ndióxi. Jáchí yéhe cúú u da cája chúun nu Ndióxi tá quiahva cája chúun mún xihín ñanún, na cúú profeta cuéntá Ndióxi xihín na cándusa ña cáħan libro Ndióxi yóho —ñacachi táto Ndióxi cán xihín i.

¹⁰ Tá nandihí já ñacachi tucu a já xihín i:

—A chíjehé tuhún saħá tuhun Ndióxi, ña ndáa nu libro yóho jáchí sa ñacayati tiempo xinu nuu á coo a. ¹¹ Joo ndá da cája quini ná caca quini cháħa da tá cúni da. Ta ndá da coo víi ná caca tiquíni mé dá tá cúni da. Joo ndá da vaħa ná ndihí ini da caca da ña vaħa. Ta ndá da nandiquiahva vaħa mé ndáħa Ndióxi ná

ndihi ini da caca ndacú da íchi cuéntá mé á —cáchí táto Ndióxi xihín i.

¹² Ta já nacachi Jesús já xihín i:

—Candehé. Sa saa yachi vi. Ta vaxi i ñehe e yahvi quehe in in ñayivi. Ta ndiquiahva i nuú in in na ña ndítahan quehe na sahá ña nacaja na. ¹³ Yehe cúu u nu cuítí ta yehe cúu u nu ndíhi jáchi jandá tá camaní cava sahá saha tóco ndihi ñaha sa ín va yehe ta coo tá coo i vatí ná ndihi sahá —cáchí a.

¹⁴ Cajii ini ñayivi, na nandaja ví ínima jáchi cúu á tátuhun ndícata na jáhma ná já ná cuu ñehe táhvi na caxi na cuihi nuú yitó cuihi, dó caja ña ná catacu ñayivi anda ama cáa quívi. Jáchi xihín ña yóho cuu quíhvi na chí yéhe ñuu cáhnu cán.

¹⁵ Joo chí jata mé ñuu cán candoo tóco ndihi na nacaan cája ña núu xihín tóco ndihi na cája ña tají xihín ndijáa na ndúu xihín na coo cúu yí ná á ñájíhi na. Ta jata ñuu cán candoo ri na sáhní ndii xihín na cája cáhnu yoco xihín na cáhan ña tühún xihín na jándahvi ñani táhan.

¹⁶ —Yehe cúu Jesús ta natchindahá i táto mí i já ná caxi tühun a ña yóho xihín ndijáa na cúu cuéntá mí i, na ndítaca ndijáa veñuhu. Yehe nacaja i ña nacacu rey David ta naquixi i chichi mé David. Cúu u tátuhun quimi cáhnu, rí quéta tá nativi —cáchí Jesús.

¹⁷ Mé ínima yii Ndióxi xihín na cúu cuéntá Jesús cana na Jesús ña ná quixi a ta já cachi na já:

—Naha quíi ndo.

Ta ndá na xini joho ña yóho xini ñúhú cachi ri na cán va:

—Naha quíi ndo.

Ta ndá na íchi ini ticuí, na cuni coho dó ná quixi na nu mé á já quiahva ticuí nu ná, dó caja ña ná catacu na anda ama cáa quívi. Ta coo toho yahvi quehe mé á nu ná saha do.

¹⁸ Ta ña yóho quéa cuni cachi i xihín tóco ndihi ndó, na xini joho ña ndáa nu libro yóho: Ta ndá na ná chinúu chaga tühun jata ña sa cáhan libro yóho já quéa chinúu ri Ndióxi tondóhó, ña ndáa nu libro yóho jata ná. ¹⁹ Ta ndá na ná tavá tühun cáhan Ndióxi, ña ndáa nu libro yóho já quéa tavá Ndióxi quívi ná ña ndáa nu libro mé nu ndáa quívi tóco ndihi ñayivi catacu anda ama cáa quívi. Ta mé na cán a cuú quíhvi na ñuu yii ndivaha cán ta ni a quiahva Ndióxi nu ná ñaha cáhan mé libro yóho saha.

²⁰ Ta sahan Jesús tühun saha tóco ndihi ña yóho já cáchí a já:

—Mé a ndaa sa saa yachi vi —cáchí a.

Já ná coo. Naha quíi ndó Jesús, xitoho nde.

²¹ Ña cuni quéa ná caja cuahá Jesu-cristo, xitoho í ñamaní xihín ndihi ndó. Já ná coo.